


# BAL CEHEC JE HAUN



Genesis and the New Testament in the Amele language of Papua  
New Guinea

## BAL CEHEC JE HAUN

### Genesis and the New Testament in the Amele language of Papua New Guinea

### Buk Stat na Nupela Testamen long tokples Amele long Niugini

copyright © 1997 Wycliffe Bible Translators, Inc.

Language: Amele

Contributor: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

1997-01-01

---

PDF generated using Haiola and XeLaTeX on 11 Nov 2022 from source files dated 9 Oct 2020  
efcfe8ba-c483-58bb-922c-05455e0b9491

## Contents

Bal Cehec Je Huan . . . . .	1
JENESIS . . . . .	2
MATJU . . . . .	53
MAK . . . . .	99
LUK . . . . .	127
JON . . . . .	173
APOSEL . . . . .	203
ROM . . . . .	241
1 KORIN . . . . .	261
2 KORIN . . . . .	280
GALESIA . . . . .	293
EFESAS . . . . .	301
FILIPAI . . . . .	308
KOLOSI . . . . .	313
1 TESALONAika . . . . .	318
2 TESALONAika . . . . .	322
1 TIMOTI . . . . .	325
2 TIMOTI . . . . .	331
TAITAS . . . . .	335
FAILIMON . . . . .	338
HIBRU . . . . .	340
JEMS . . . . .	357
1 PITA . . . . .	363
2 PITA . . . . .	370
1 JON . . . . .	374
2 JON . . . . .	379
3 JON . . . . .	380
JUD . . . . .	381
JAHUNEC JE CAMASAC MUDEN . . . . .	383
Read the New Testament . . . . .	405
DADO MEC . . . . .	417

## Bal Cehec Je Huan

### Genesis and the New Testament in the Amele language of Papua New Guinea

### Buk Stat na Nupela Testamen long tokples Amele long Niugini

[aey]

Translation: © 1997, Wycliffe Bible Translators, Inc.

Print publisher, 1997 by Bible League International

Web version  
2015, Wycliffe Bible Translators, Inc.  
[www.Wycliffe.org](http://www.Wycliffe.org)

<http://pngscriptures.org>  
[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

**Your are free to share** — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** — For any reuse or distribution, you must make clear to others the license terms of this work.

#### Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela**.

## JENESIS

*Ceteteh cunug calein uqana je*

<sup>1</sup> Wele gug qocna Anut uqa sao mahaca ifanen. <sup>2</sup> Odocob maha eu ihulahal tanac gauc nijen. Wa ben tatacan tu ahulec cilehdhu nijen. Odocob Anut uqana kis eu wa tatacan jojoi cobon. <sup>3</sup> Odocob Anut madeceb, "Camajac calagale," eceeb camajac calen. <sup>4</sup> Anut camajac me bahic eu fimei waug ceelen. Odimei Anut camajac tuca filiganalen. <sup>5</sup> Camajac eu Anut uqa ijan "Cahineg" qon. Tu eu ijan "Witic" qon. Odocob witic mimei cojagen. Eu deel matu.

<sup>6</sup> Odocob Anut madeceb, "Wa ohisdecca wa mahana decca filiganalecnu qagojoc oso calagale," eceeb eu odi calen. <sup>7</sup> Qagojoc eu Anut uqa ifanen eu wa mahana decca wa ohisdecca filiganalen. <sup>8</sup> Odocob Anut qagojoc eu ijan "Sao" qon. Odocob witic mimei cojagen. Eu deel lecis doc.

<sup>9</sup> Odocob Anut madeceb, "Wa sao bisalu eu cudun osahicna gabandocob cudun galalec caleiale," eceeb eu odi calen. <sup>10</sup> Odocob Anut cudun galalec eu ijan "Maha" qon. Odocob wa cudun osahicna gabandon eu ijan "Macas" qon. Anut eu me bahic fimei waug ceelen. <sup>11</sup> Odocob Anut madeceb, "Mahana celumca na sihul filfil me qonaca cehelo gug filfil aig qonaca caleigale," eceeb eu odi calen. <sup>12</sup> Eunu mahana celumca na sihul filfil me qonaca cehelo gug filfil aig qonaca eu odi calein. Anut eu me bahic fimei waug ceelen. <sup>13</sup> Odocob witic mimei cojagen. Eu deel ijed doc.

<sup>14</sup> Odocob Anut madeceb, "Cahineg witicca filiganalecnu cabi saenca deelca cabi gelca gadac mecnu fulacdoc saona caleigale. <sup>15</sup> Fulacdoc i age maha fulacdoc utuqagannu saona tawoqagan," eceeb eu odi calen. <sup>16</sup> Oodon Anut uqa fulacdoc benben lecis mudalen. Fulacdoc ben bahic eu cahineg cofdocnu muden. Fulacdoc nag eu witic cofdocnu muden. Uqa malaqaha mudaden.

<sup>17-18</sup> Anut uqa maha fulacdoc utuqagannuca cahineg witicca cofdocnuca fulacdoc tuca filiganalecnuca fulacdoc i age saona maden. Anut eu me bahic fimei waug ceelen. <sup>19</sup> Odocob witic mimei cojagen. Eu deel wal oso doc.

<sup>20</sup> Odocob Anut madeceb, "Wana ceteteh cunug cebac nijuqagan eu fulusdoigale. Euha maha ohisnaca sao bisalunaca man fululec fululi coboigale," eceeb eu odi calen. <sup>21</sup> Odimei Anut macasnadec dool benben ifanen. Ceteteh cunug cebac cobogina agena sihul filfil toodudu wana am ben. Man fululec sihul filfil cunug euha ifanen. Anut eu me bahic fimei waug ceelen. <sup>22</sup> Odimei Anut eeladi maaden, "Fulusdumeig mati bahic caleigale. Macas cunug ihoc leigale. Mahana man fululec fulusdumeig mati bahic calimeig maha cunug ihoc leigale," aden. <sup>23</sup> Odocob witic mimei cojagen. Eu deel ebun oso doc.

<sup>24</sup> Odocob Anut madeceb, "Mahana dool gug filfil mananca cusca benga nagca caleigale," eceeb eu odi calen. <sup>25</sup> Odimei Anut uqa mahana dec dool manan sihul filfilca dool cus sihul filfilca ceteteh mahana cobogina sihul filfilca mudaden. Anut eu me bahic fimei waug ceelen.

<sup>26</sup> Odocob Anut maden, "Ege dana cajaca mudalecnu. Ege ihocomige qumeb ege cinigwe mudalecnu. Odocob ale dool wanadecca man fululec saonadecca dool mananca maha cunugca ceteteh cunug mahana cobogina eu cofadowasin," en. <sup>27</sup> Odimei Anut uquadodoc ihocon qu dana cajaca ifanalen. Manahal aidca uqa ifanalen. <sup>28</sup> Odimei Anut eelali maalen, "Mel basimesi fulusdosiale. Odimesi maha cunug ihoc limesi ilo bilesiale. Macasnadec doolca saonadec man fululecca ceteteh cunug mahana cebac cobogina eu cunugnu ale ilo bilesiale," aden. <sup>29</sup> Odimei uqa maalen, "Fesia! Celum aig qona gug filfilca cehelo aig qona gug filfilca ija wele alem euqua maha olana ihoc leia njija. Cehelo eu age agena aig eu alena sab biligian. <sup>30</sup> Qa mahana dec dool cunugca saonadec man fululec cunugca ceteteh cunug mahana cebac coboginaca eu age celum gigica cunug eu agena sab adiga," aden. Odocob eu odi nijen. <sup>31</sup> Odimei Anut ceteteh cunug uqa mudaden eu me bahic fimei waug ceel bahic en. Odocob witic mimei cojagen. Eu deel eben gic osahicca doc.

## 2

<sup>1</sup> Aria sao mahaca ceteteh cunug ifanen. Eu uqana cabi hedon. <sup>2</sup> Deel eben naha gic lecisca qee ihoc lec Anut uqana ifanec cabi cunug hedon. Odimei jaen muden. <sup>3</sup> Oodon Anut uqa ifanec cabi cunug hedumei jaen muden eunu deel eben naha gic lecisca eu eeldumei qagu fil men.

<sup>4</sup> Je i saen Anut sao mahaca ifanalennu je.

Tibud Anut uqa maha saoca ifanalen saen euna<sup>5</sup> uqa mahana wa qee suldol. Dana cabi cehecnu ha qee mudel. Eunu gigi o celum oso mahana qee cajec nijen.<sup>6</sup> Qa wa tut gaid mahanadec cajimei maha cunug wa utoloi.

<sup>7</sup> Odocob Tibud Anut uqa colig mahanadec umei dana<sup>\*</sup> oso muden. Odimei mede gigil ocna kis cebac eu fuldutocob dana cebac men.

### *Iden cabi*

<sup>8</sup> Aria Tibud Anut cabi oso cam tobi becna isec Iden ono cehen. Odimei dana uqa ifani mudon eu ono muden. <sup>9</sup> Odocob Tibud Anut uqa odocob mahanadec na cunug fecnu galeca sabnu me bahic eu cajein. Cabi gemo na lecis tawesin. Oso uqa na aig jifei cebac biligian. Oso uqa aig eu jifei doc meca me qeeca ugian.

<sup>10</sup> Aria wa tut oso Idendec boloi. Eu cabi wa utoloi. Odimei eunadec wa eu batac qu wal oso don. <sup>11</sup> Wa batac matu eu ijan Pison. Wa eu nuimei Hawila hatu eu cunug taldona. Hatu euna gol nijina. <sup>12</sup> Hatu eunadec gol eu me bahic. Ono na oso nijina eu uqana gilic eu dedeman me bahic. Eu ijan deliam. Euna ha meen oso nijina. Eu ijan oniks. <sup>13</sup> Wa oso, eu ijan Gion, eu nuimei Kus hatu eu cunug taldona. <sup>14</sup> Wa oso ijan eu Taigris. Eu Asiria cam tobi becna isec nuina. Wa oso ijan eu Jufretis.

<sup>15</sup> Aria Tibud Anut uqa dana eu umei Iden cabi dunuh muden. Cabi cehigiannuca cofdugiannuca muden. <sup>16</sup> Odocob Tibud Anut dana dahig hehewi bili je gagadic odi madon, “Hina na aig cunug cabina nijia eu cois jagale. <sup>17</sup> Qa doc meca me qeecanu na eu aig cain jagaun. Hina eu jegaga deel euna himec hina cal megan,” don.

<sup>18</sup> Aria odocob Tibud Anut maden, “Dana uqa cuhanuc bilec me qee. Ija uqa cesuldockoso muditung,” en. <sup>19</sup> Eunu Tibud Anut maha leih cedime dool mahanadecca man fululec saonadecca cunug mudaden. Odimei dana ijanaga aqeceb figia bili cedadi danaca ehadi len. Odocob dana uqa dool cunug osahicosahic ijanaga qon. Ijanaga qon eu age ijanaga ibuldon. <sup>20</sup> Oodon dana uqa dool mananca man fululec saonadecca dool cusca eu cunug ijanaga aqen qa uqa cesuldocnu cinigwe oso qee fel.

<sup>21</sup> Eunu Tibud Anut odocob dana uqa us geh men. Odocob uqa cal mecwe nijen. Ninjen Tibud Anut dana qeih teful oso umei teful onna deweg ganacna haun cufa quton. <sup>22</sup> Odocob Tibud Anut dana qeih teful euna caja oso mudimei danaca ehudi len. <sup>23</sup> Odocob dana uqa maden, “Mele bahic. Uqa teful eu ija tefulinadec. Uqa cuhun eu ija cuhuninadec. Uqa dananadec umei mudon. Eunu ija ijan ‘Caja† dugen,’ en. <sup>24</sup> Eunu dana uqa anag memegca culaleceb uqa aidegca gabandowasan. Odimesi ale dewenela osol mowasan.

<sup>25</sup> Aria dana aidegca ale bical aleqa qee majanala alel.

## 3

### *Dana cajaca Anutna je wooldosin*

<sup>1</sup> Aria man sononec uqa fanindocnu du cuhadon. Uqa dool cunug wooladec Tibud Anut maden. Odocob uqa caja sisildon, “Anut ale cehelo aig cunug cabina nijia eu Cain jowasin ec maalen eu melefo?” don.

<sup>2</sup> Odocob caja uqa man sononec jejeg hewi madon, “Cehelo aig osooso cabina nijeiga eu ele jecnu ihocqa<sup>3</sup> na gemo taweia eunu Anut uqa ale eundec aig eu Cain jowasin o Cain qududu fowasin. Eu odifesi ale cal mowasan ec malen,” don.

<sup>4</sup> Odocob man sononec caja madon, “Qeoo! Ale qee cal mowasin! <sup>5</sup> Ale aig eu jifesi alena cisdoc fogo docob ceteteh meca me qeecanu dowasan. Ale Anut cinigwe calowasan. Eu Anut uqa dona. Eunu uqa odi maalen,” don.

<sup>6</sup> Eunu caja uqa aig eu feceb galeca bahic ameg qon. Eu jecnu me bahic fen. Uqa doc meca me qeeca ocnu ha gale don. Eunu uqa cehelo eundec aig umei jen. Odimei gemug uqaca tawesin euha uteceb jen. <sup>7</sup> Odocob ale amala fogo don. Odocob ale bical eu dosin. Eunu ale dan bagac gisimesi taqesin.

<sup>8</sup> Aria wesu maha daec saenna Tibud Anut uqa cabina cocobon ale hutan dosin. Odimesi ale cabina na gemo Tibud Anut amegnu jahundosin. <sup>9</sup> Euqa Tibud Anut dana utadu madon, “Hina ai?” don.

<sup>10</sup> Odocob uqa jejeg hewi madon, “Ija hina cabina cocobagan hutain dugaqa ija bical. Eunu ija cucuimig jahuniga,” don.

<sup>11</sup> Odocob Anut uqa sisildon, “Hina bical ec eu indec maheia? Hina cehelo aig ale Cain jowasin ec mahem eundec u jagaf?” don.

\* 2:7: Hibru jena “dana” “maha” ca ale hutanala caca. † 2:23: Hibru jena “dana” “caja” ca ale hutanala caca.

<sup>12</sup> Odocob dana jejeg hewi madon, “Caja ijaca bileyannu item eu uqa cehelo eundec aig iteceb ija jiga,” don.

<sup>13</sup> Odocob Tibud Anut caja sisildon, “Eu celnu odoga?” don.

Odocob caja jejeg hewi madon, “Man sononec qauteceb ija jiga,” don.

#### *Anut wadacdoc je maaden*

<sup>14</sup> Odocob Tibud Anut man sononec madon, “Hina eu odi odogaru dool cunug mananca cusca gemo hina himec gelihigina. Qila hina wawinna dih sononi cobogan. Hina eu odi mahana cocobi li hinana cal mec deelna calegan.” <sup>15</sup> Ija odoconin hina cajaca qocobqocob owasan. Uqana sihuulca hinana sihuulca gaid cad biluwasan. Hibna caja uqana mel oso uqa ilom tulohdochob hina uqa jaih bisoc qu jegan,” don.

<sup>16</sup> Odimei uqa caja madon, “Ija hina mel basecnu dain hec saen eu ben bahic tubduhigen. Hina ben dain heheb mel basegan qa hina gemunnu gale hec eu odi nijigian. Euqa uqa hinana ilo biligian,” don.

<sup>17</sup> Odimei uqa dana madon, “Hina aiden jejeg dah mimeg cehelo aig ija Cain jowasin ec mahem eu jaga. Hina eu odi odogaru ija maha geldugina. Hina gagadic odocca dain hecnaca u jegan. Eu odi himec oodi li cal megan.” <sup>18</sup> Husca gagalitca hinana cabina cajoqagan. Odocob hina sab bahudec u jegan. <sup>19</sup> Hina musul heheb sab u jegan. Oodi li haun maha ibuldogan. Hina mahana mihem. Hina maha eunu haun ceseli maha ibuldogan,” don.

<sup>20</sup> Aria Adam\* uqa aideg eu uqa dana cajaca cunug agena anaga calen. Eunu uqa ijan Iw† qon. <sup>21</sup> Odocob Tibud Anut uqa dool ganacna lotoc mudimei Adam aidega aleceb taqesin.

#### *Anut Iden cabinadec dana caja ititacalen*

<sup>22</sup> Odocob Tibud Anut maden, “Qila dana ege oso cinigwe caleia. Ceteteh meca me qeeca dona. Euqa uqa eben mimei cebac biley na aigha u jimei cebac biley cataneccdain. Eunu ege cahacdoc bahic cahacdoqan,” en. <sup>23</sup> Eunu Tibud Anut uqa dana caja Iden cabinadec ititacalen. Maha dana muden euna sab cehiagiannu eunadec malen. <sup>24</sup> Ititacali hedocob cali lesin. Odimei Iden cabi cam tobi becna isec uqa han qali dana gagadic, ijan Kerub, ono maden. Odimei signin aig ja belicanca eu hagen cunugna isec walwaldudu tawena euna muden. Eu cebac biley catanec uqana jic cahacdoc.

## 4

#### *Ken Ebelca*

<sup>1</sup> Aria Adam uqa aideg Iwca nijimesi uqa melca men. Odimei Ken basen. Odocob uqa maden, “Tibud cesulteceb ija mel momodo oso ehudiga,” en. Eunu uqa ijan Ken\* qon. <sup>2</sup> Odocob uqa hibna Ken waliag Ebel basen. Odocob Ebel uqa ben mimei dool cofadec dana calen qa Ken uqa ben mimei cabi ceteteh cehec dana calen.

<sup>3</sup> Aria saen osona Ken uqa cabinadec sab leih cedi ahumei Tibud ihandon. <sup>4</sup> Ebel uqaha Tibud ihandon qa uqa sipsip nag leih hahawan basadec eundec aqi tuqadimei cuhunuga lalonoga eu cedadi ahon. Odocob Tibud uqa Ebelnuaca uqana ihanecnuca waug nijen. <sup>5</sup> Qa Kennu uqana ihanecnuca Tibud uqa waug qee nijel. Eunu Ken uqa gemag geh bahic ben. Odocob ola gulu qon. <sup>6</sup> Odocob Tibud uqa Ken madon, “Celnu hina gemain bena? Celnu hina olain gulu qona?” <sup>7</sup> Hina odi cuhadoummi ija wawi hinanu nijoub. Qa hina qee odi cuhadocompi silail hinana cebecna hagawihecnu saciadoia taweia. Uqa hinanu nalunin meia taweia. Qa hina gagadic mimeg wooldoga,” don.

<sup>8</sup> Aria Ken waliag Ebel madon, “Gec beli bahu cobewa,” don. Odocob belesin. Cocobi bilesi Ken uqa cajimei waliag Ebel qagadocob cal men.

<sup>9</sup> Aria Tibud uqa Ken sisildon, “Hina walin Ebel ai?” don.

Odocob uqa jejeg hewi madon, “Ija qee dugina. Ija wali cofdoc danafo?” don.

<sup>10</sup> Odocob Tibud madon, “Hina eeta odoga? Hina walin golac mahana basedoia eu dana jejeg cinigwe utai mateia ija dah miga.” <sup>11</sup> Qila ija hina gelihigina. Hina walin qagadocom cal mecebi uqa golac mahana basedoia. Odimei golac maha dunuh noia eu maha cocawé mimei sugudoia. Eunu maha i hina cetehe cebecnu ihoc qee. Eunu ija hina maha inadec ititachigina. <sup>12</sup> Saen hina maha ina sab cehegaqa hina sab me qee cajihelian. Hina jehen osoca qee. Hina odi mahamaha loldudu cobogan,” don.

<sup>13</sup> Odocob Ken uqa Tibud madon, “Ijana me qee odo ameg eu ben bahic. Ija gahidocwe qee. <sup>14</sup> Faga! Hina qila deel ina maha inadec ititactagana. Odomoc ija hina amennu

\* 3:20: “Adam” uqana gug eu “dana.” † 3:20: “Iw” uqana gug eu “cebac.” \* 4:1: “Ken” uqana gug eu “ehudon.”

bisachi nuigen. Ija jehenca qee mahamaha loldudu cobigen. Odi cocobomin in oso guluctigiaqa qagateceb cal migen,” don.

<sup>15</sup> Qa Tibud jejeg hewi madon, “Eu odi qee. Dana oso Ken qagadocob cal migiaqa ija dana eu ameg culumen eben naha gic lecisca wadacdugen,” don. Odocob Tibud uqa Kennu gaga oso men. Eunu dana oso Ken gulucdugiaqa uqa gaga eu fimei uqa qee gagadolaun. <sup>16</sup> Odocob Ken uqa Tibud amegnu bisacdumei caji nuen. Odimei uqa Iden cam tobi becna isec nuimei hatu ono bilen. Hatu eu ijan “Loldudu Coboc”.

### *Kenna sihul*

<sup>17</sup> Aria Ken aidegca nijimesi uqa melca men. Odimei Inok basen. Saen euna Ken uqa taun ben oso cecehi bilei uqa melah ijan Inok eu taun eu ijan qon. <sup>18</sup> Aria Inok ben mimei caja oso ocob mel basen. Eu uqa ijan Irad qon. Odocob Irad uqa caja oso ocob mel basen. Eu uqa ijan Metusel qon. Odocob Metusel ben mimei caja oso ocob mel basen. Eu ijan Lamek qon. <sup>19</sup> Odocob Lamek ben mimei caja lecis cedalen. Oso ijan Eda. Oso ijan Sila. <sup>20</sup> Odocob Eda uqa Jabal basen. Jabal uqa dana dool manan cofaadi bileig lotoc talahna himec nijegina eu agena asaga calen. <sup>21</sup> Jabal uqa waliagca, eu ijan Jubal. Uqa dana sihul gita qoginaca cololo fuldoginaca eu agena asaga calen. <sup>22</sup> Odocob Sila uqaha mel oso basen. Uqa ijan eu Tubal-ken. Tubal-ken uqa bras ainca na cabi teful aigcaca mudec dana calen. Tubal-ken uqa cebinagca, eu ijan Nama.

<sup>23</sup> Odocob Lamek aidegul maalen,

“Eda Silaca ale ija jejeni dah mesia.

Ale ijana caja ijana je dah mi cuhadosia.

Dana oso uqa ija qiteceb golani necebf  
ija qocomin cal migian.

Mel oso uqa ija qitecebfi

ija qocomin cal migian.

<sup>24</sup> Dana oso Ken qagadocob cal mecebfi  
wadacdoci ameg eu ben ugian.

Qa dana oso ija qagatifei

uqa wadacdoci ameg eu culumenga bahic ugian,” alen.

### *Setna sihul*

<sup>25</sup> Odocob Adam haun aidegca nijimesi uqa mel oso basen. Odimei uqa maden, “Ken uqa Ebel qagadocob cal men. Eunu Anut uqa mel oso haun itia. Eu Ebel hehuldocnu itia,” en. Eunu ijan Set<sup>†</sup> qon. <sup>26</sup> Odocob Set uqa caja oso ocob mel basen. Eu uqa ijan Inos qon. Saen euna dana age Tibud ijanna inondudu ihanec sanan mein.

## 5

### *Adamna sihul*

<sup>1</sup> Je jaqoc ina Adamna sihul ijanaga nijia. Anut uqa dana ifanen saen euna uqa dana Anut cinigwe muden. <sup>2</sup> Uqa manahalca aidca ifanalen. Ifanaalen uqa eelalimei ijanala “Dana Cajaca” aqalen. <sup>3</sup> Saen Adam ugana cabi gel 130 eu odi bibili bilei uqa aideg mel oso basen. Mel eu uqa cinigwe uqa hahun umei cali hon. Odocob uqa ijan Set qon. <sup>4</sup> Aria Set cali hocob Adam uqa bileceb li ugana cabi gel 800 eu odi calen. Oodon Adam aideg uqa melahul ategulca haun basaden. <sup>5</sup> Eunu Adam ugana cabi gel cunug gabandoc eu 930. Odocob uqa cal men.

<sup>6</sup> Aria Set uqa bibilen li ugana cabi gel eu 105 eu odi caleceb uqa aideg mel oso basen. Odocob ijan Enos qon. <sup>7</sup> Odimei Set uqa bibilen li cabi gel 807 on. Oodon uqa aideg melahul ategulca haun basaden. <sup>8</sup> Eunu Set ugana cabi gel cunug gabandoc eu 912. Odocob uqa cal men.

<sup>9</sup> Aria Enos uqa bibilen li ugana cabi gel 90 ocob uqa aideg mel oso basen. Odocob ijan Kenan qon. <sup>10</sup> Odimei Enos bibilen li cabi gel 815 on. Oodon uqa aideg melahul ategulca haun basaden. <sup>11</sup> Eunu Enos ugana cabi gel cunug gabandoc eu 905. Odocob uqa cal men.

<sup>12</sup> Aria Kenan uqa bibilen li ugana cabi gel 70 ocob uqa aideg mel oso basen. Odocob ijan Mahalalel qon. <sup>13</sup> Odimei Kenan bibilen li cabi gel 840 on. Oodon uqa aideg melahul ategulca haun basaden. <sup>14</sup> Eunu Kenan ugana cabi gel cunug gabandoc eu 910. Odocob uqa cal men.

<sup>15</sup> Aria Mahalalel uqa bibilen li ugana cabi gel 65 ocob uqa aideg mel oso basen. Odocob ijan Jared qon. <sup>16</sup> Odimei Mahalalel bibilen li cabi gel 830 on. Oodon uqa aideg

† 4:25: “Set” ugana gug eu “iten.”

melahul ategulca haun basaden. <sup>17</sup> Eunu Mahalalel uqana cabi gel cunug gabandoc eu 895. Odocob uqa cal men.

<sup>18</sup> Aria Jared uqa bibilen li cabi gel 162 ocob uqa aideg mel oso basen. Odocob ijan Inok qon. <sup>19</sup> Odimei Jared bibilen li cabi gel 800 on. Oodon uqa aideg melahul ategulca haun basaden. <sup>20</sup> Eunu Jared uqana cabi gel cunug gabandoc eu 962. Odocob uqa cal men.

<sup>21</sup> Aria Inok uqa bibilen li cabi gel 65 ocob uqa aideg mel oso basen. Odocob ijan Metusela qon. <sup>22</sup> Odimei Inok uqa cabi gel 300 eu odi Anutca cobosin. Oodon uqa aideg melahul ategulca haun basaden. <sup>23</sup> Eunu Inok uqana cabi gel cunug gabandoc eu 365. <sup>24</sup> Aria Inok mahana bibili uqa Anutca cobosin. Oodon Anut uqa ehuden. Eunu uqa jajanu qelen.

<sup>25</sup> Aria Metusela uqa bibilen li cabi gel 187 ocob uqa aideg mel oso basen. Odocob ijan Lamek qon. <sup>26</sup> Odimei Metusela bibilen li cabi gel 782 on. Oodon uqa aideg melahul ategulca haun basaden. <sup>27</sup> Eunu Metusela uqana cabi gel cunug gabandoc eu 969. Odocob uqa cal men.

<sup>28</sup> Aria Lamek uqa bibilen li cabi gel 182 ocob uqa aideg mel oso basen. <sup>29</sup> Odocob uqa maden, "Maha i Anut wele geuldon eunadec mel i ege cehi jecnu cabi culumenca oqonanu mel i uqa cesulgigian," en. Eunu mel eu ijan Noa\* qon. <sup>30</sup> Odimei Lamek bibilen li cabi gel 595 on. Oodon uqa aideg melahul ategulca haun basaden. <sup>31</sup> Eunu Lamek uqana cabi gel cunug gabandoc eu 777. Odocob uqa cal men.

<sup>32</sup> Aria Noa uqana cabi gel 500 hedocob uqa melahul ijedca bilen. Age ijanaga eu Semca Hamca Jafetca.

## 6

### *Dana age qisol mein*

<sup>1</sup> Aria saen euna dana sihul mahana geh bahic fulusdumeig mel aid basadein. <sup>2</sup> Mel aid eu age galeca bahic. Eunu Anutna sao mel age dana atagail feciadecebile amaga qon. Odocob age aidagailnu agena gawecnana cedadein. <sup>3</sup> Odocob Tibud uqa maden, "Dana cajaca age qee bielecebile cataneiaun. Eunu ijana Kis eu dana cajaca ageca qee bieleceb cataneiaun. Qila ija odadecemin age cabi gel 120 himec biluqagan," en. <sup>4</sup> Saen euna hibnaha dana citoec mahana bilein. Aria Anutna sao mel age dana atagail gami ocobocob imeig mel basadein. Mel eu age dana citoec age hannu gelehinigaca calein. Dana eu age age dana weledec age ijanagaca.

<sup>5</sup> Aria Tibud uqa dana cajaca mahanadec agena qisol mec eu ben bahic fen. Agena cisdoc me qeeca golanaga me qeenu sililecca odi nijen. <sup>6</sup> Uqa dana cajaca ifanadimei mahana mudennu waloc don. Uqa waug ben qon. <sup>7</sup> Odocob Tibud uqa maden, "Ija dana sihil cunug ifanadem eu qee madigen. Mahana doolca man fululecca ceteteh cunug mahana cobogina eu qee madigen. Ija ifanademnu waloc tena," en. <sup>8</sup> Qa Tibud uqa Noana odic fimei Noanu waug tawen.

<sup>9</sup> I Noanu je. Noa uqa dana ititom. Uqa Anut amegna cahuldoccia qee. Uqa Anutca cobosin. <sup>10</sup> Noa uqa melahul ijedca. Age ijanaga eu Semca Hamca Jafetca. <sup>11</sup> Qa saen euna dana cajaca cunug age Anut amegna qisol mec me qee bahicca. Age cunug han me qee cadein. <sup>12</sup> Anut uqa dana cajaca mahana cunug bilein age qisol mein eu fen.

### *Noa wag ben jelen*

<sup>13</sup> Odocob Anut uqa Noa madon, "Dana cunug agena qisol mec eu maha cunug ihoc len. Eunu ija age cunug qee madigen. Mele bahic ija maha cunug fadaldugen. <sup>14</sup> Wag ben oso wamenia hinadodocnu himec jelega. Wag eu hamol mati bahicca muduga. Odimeg baial dunuhca maha gumuca joudoga. <sup>15</sup> Hina odi jelegan. Wag eu uqana cecelac eu 133 mita. Uqana bagalan eu 22 mita. Uqana ohis tec eu 13 mita. <sup>16</sup> Hina jo qab naca qeih naca gemo fufu cebecha qahegan. Fufu cebec uqana ohis tec eu mita naha himec. Odimeg cebec eu wag qeihna qahegan. Wag eu uqana bahim ijed dunuh bacatca mudegan. <sup>17</sup> Faga! Ija wa sil mahana suldugen. Ceteteh cunug mahana coboginaca sao bisalunaca cunug fadaladigen. Ceteteh mahana cebac bilingina age cunug cal moqagan. <sup>18</sup> Qa ija hinaca bal cehec je madewan. Odocob hina wag tobegan. Hinaca hina melelemenca hina aidenca hina melelemenca aidagailca toboqagan. <sup>19-20</sup> Ceteteh cunug mahana cobogina eundec dool filfil man fululec filfil manahalca cufunecca ehadil ehi li wagna madegan. Odocob age qee cal mowain. <sup>21</sup> Odocob hina sab gug filfil hinanuca agenuca cedi ehi li megan," don. <sup>22</sup> Aria Noa uqa Anut madon eu cunug toodu odon.

\* 5:29: "Noa" uqana gug eu "cesuldoc."

*Wa sil ben*

<sup>1</sup> Odocob Tibud uqa Noa madon, "Saen ina hina himec ija amina dana ititom. Eunu hinaca hinana talaunelca wag dunuh leiga. <sup>2</sup> Hina dool qagoc eundec gug filfil manahal eben naha gic lecisca cufunec eben naha gic lecisca odi cedadaga. Odimeg hina dool qagoc eundec manahal osahic cufunec osahic odi cedadaga. <sup>3</sup> Odocob man fululec sao bisaludecha manahal eben naha gic lecisca cufunec eben naha gic lecisca odi cedadaga. Eu age hibna haun mahana fulusdoqagan. <sup>4</sup> Deel eben naha gic lecisca hedocob ija wa ben saonadec sulldugen. Odocob wa eu cahineg 40 witic 40 odi hugian. Saen euna ija ceteteh cunug maha ina ifanadem eu fadaladigen," don. <sup>5</sup> Odocob Noa uqa Tibud madon eu cunug toodoo odon.

<sup>6</sup> Aria Noa ugana cabi gel eu 600. Saen euna wa sil cajimei maha cunug ihoc len. <sup>7</sup> Oodon Noa uqa wa sil cajigianni uqa melahul gami uqa aidegca uqa melahul aidagail gami age wag dunuhlein. <sup>8</sup> Dool qagocca qee qagocca manca ceteteh cunug mahana cobogina euha dunuhlein. <sup>9</sup> Euqa manahalca cufunecca Noa gami wag dunuhlein. Age Anut Noa madon eu odi toodoolein. <sup>10</sup> Odocob deel eben naha gic lecisca hedocob wa sil mahana cajen.

<sup>11</sup> Saen euna Noa ugana cabi gel eu 600. Wa sil cajen eu deel 17 jagel lecis docna wa ameg cehec maha dunuhdec eu ugana cebec qajawen. Odocob saonadec cebec cunug hudeceb wa ben nen. <sup>12</sup> Odocob wa eu cahineg 40 witic 40 odi mahana nen. <sup>13</sup> Deel euna dih Noaca uqa melahul Sem, Ham, Jafetca ageca uqa aidegca uqa melahul aidagailca age cunug wag dunuhlein. <sup>14</sup> Dool mananca cusca eundec sihul filfil ceteteh cunug mahana cobogina eundec sihul filfil man fululecca ceteteh cunug hojonogaca sihul filfil eundec age cunug Noa gami wag dunuhlein. <sup>15</sup> Age cunug Noa gami lein. Dool cunug cebac cobogina age leciscleis wag dunuhlein. <sup>16</sup> Dool lein eu manahalca cufunecca odi lein. Age cunug Anut maden odi toodumeig wag dunuhlein. Odocob Anut hibilimega jic cebec menen.

<sup>17</sup> Aria mahana wa sil tubca cacaji ninijen deel 40 leceb wag u suldocob basai cobon. <sup>18</sup> Odocob wa ben bahic cajimei mahana wa gudoc calen. Odimei wag u suldocob wa lal cobon. <sup>19</sup> Wa mahana ben bahic ihoc timei aluh benben sao bisalu eu cunug jahuladen. <sup>20</sup> Odimei wa 7 mita ohis aluh cunug u jebucaden. <sup>21</sup> Odocob ceteteh cunug mahana cobogina age cal mein. Man fululec cunug dool mananca dool cusca cunug mamanig cunug mahana cobogina euca dana cunugca cal mein. <sup>22</sup> Ceteteh cunug mahana cocobi medemegana siwogina eu cunug cal mein. <sup>23</sup> Ceteteh cunug mahana cebac cobogina danaca doolca mamanigca man fululec saonadecca eu cunug Anut uqa mahanadec qee maden. Odocob Noa ugaca ugana silihulca age himec wagna bielein. <sup>24</sup> Odocob deel 150 odi wa sil mahana caji nijen.

*Wa sil ben hedon*

<sup>1</sup> Qa Anut uqa Noaca dool cusca dool mananca wagna bieleinnu dahig qee celel. Eunu uqa odocob fufu oso mahana hon. Odocob wa sil seeldon. <sup>2</sup> Odocob wa ben cehec maha dunuhnadecca saonadecca eu calena cebec eu cufa qon. Odocob wa sao ohisdec nen eu gatidon. <sup>3</sup> Wa mahana nijen eu cebitnana seeldon. Odocob deel 150 hedocob wa toni non. <sup>4</sup> Deel 17na jagel eben naha gic lecisca docna wag eu Ararat aluh osona toni bilen. <sup>5</sup> Odocob wa haun cebitnana seeldon li jagel eben nahannahaca on. Odocob jagel eu ugana deel sanan mecnal aluh agena igoc camasac mein.

<sup>6</sup> Odocob deel 40 hedocob Noa fufu cebec uqa muden eu huden. <sup>7</sup> Odimei uqa alog oso u suldocob nuen. Nuimei qa qee ceseli hol. Uqa fululi cocobon li wa mahana cunug sidon. <sup>8</sup> Odonqa Noa uqa cuhudid oso umei suldocob nuen. Uqa wa mahana seeldonfo qeefo eu dugianni suldon. <sup>9</sup> Qa wa maha cunugna nijen. Eunu cuhudid eu cudun oso hewi bibili jaen mudecnu qee fimei uqa haun wagna ceseli hon. Odocob Noa eben maha gumu leceb ugana cuhudid u wag dunuh ehi li muden. <sup>10</sup> Odocob Noa uqa deel eben naha gic leciscia haun wa seeldugianmu sumuden. Odocob uqa cuhudid wagnadec haun u suldon. <sup>11</sup> Wesu memen cuhudid eu ceseli ugaca hon. Uqa cona na oso, ijan oliw, eu bagac cebac u qada qu ahon. Odocob Noa uqa wa wele hidon eu don. <sup>12</sup> Odocob Noa uqa deel eben naha gic leciscia hedocob uqa cuhudid haun suldon qa cuhudid eu ugaca qee ceseli hol.

<sup>13</sup> Saen Noa ugana cabi gel 601na jagel sanan mecnal aluh agena igoc camasac wa mahana cunug hidu qee men. Odocob Noa uqa wag ohis jahuldoc eu qosocdon. Noa meciimei maha tatacdec eu galalec ninijen fen. <sup>14</sup> Saen deel 27na jagel lecis docna maha galal bahic en.

<sup>15</sup> Odocob Anut Noa madon, <sup>16</sup> “Wag culimeig caleiga. Hinaca hina melemenelca hina aidenca hina melemenel aidagailca caleiga. <sup>17</sup> Ceteteh cunug mahana cebac coboginaca man fululecca doolca mamanig cunug mahana coboginaca age agena sihul eu mahana geh bahic fulusdoqagannu cedadecem hina gami maha gumu caleiga. Odimeig maha cunug ihoc loqagan,” don. <sup>18</sup> Eunu Noa uqa maha gumu calen. Uqaca uqa melahulca uqa aidegca uqa melahul aidagailca age maha gumu calein. <sup>19</sup> Dool cunug mamanig cunug man fululec cunug ceteteh cunug mahana cobogina eu cunug agena sihulnana qagocqagoc wag dunuhdec calein.

### *Noa uqa Tibud ihandon*

<sup>20</sup> Odocob Noa uqa Tibud ihandugia bili meenna ihanec cabal oso gualen. Odimei uqa dool qagoc eundecca man fululec qagoc eundecca osahicosahic cedadimei ihanec cabal euna Tibud ihandudu bili manen. <sup>21</sup> Odocob Tibud uqa dedeman eu tinca don. Eunu uquadodoc waugna maden, “Dana age melnadec agena qisol cisdoc eu gaid odi nijina. Eunu hibna ija dananu maha haun qee geldugaun. Ceteteh cunug mahana cobogina eu qila fadaladiga odiwe haun qee fadaladigaun. <sup>22</sup> Mahana saen eu odi nijigian cehec saenca sab oc saenca duan saenca cam saenca san saenca wa saenca cahinegca witicca eu cunug qee qee meiaun,” en.

## 9

### *Anut Noaca bal cehec je men*

<sup>1</sup> Odocob Anut uqa Noaca uqa melahulca eelaadi bili maaden, “Age aig qumeig fulusdoigale. Odimeig maha cunug ihoc leigale. <sup>2</sup> Dool cunug saonadec man fululec cunug wanadec dool cunug mamanig cunug mahana cobogina eu age cunug agenu cucuui teleloqagan. Ceteteh eu age cunug age ebenegana migina. <sup>3</sup> Weleca ija celum himec jecnu adem. Qila ceteteh cunug mahana cebac cobogina euha agena sabnu adigina. <sup>4</sup> Euqa golac eu cebac silih. Eunu age dool golacca Cain jowain. <sup>5</sup> Dana oso uqa oso qagadocob golac toni basecdocob cal mecebf ija dana eu wadacdok utigen. Dool oso uqa dana oso qocob cal mecebf ija uqa wadacdru qocomin cal migian. <sup>6</sup> Ija ihoconi qumig dana ifanem. Eunu in oso dana oso qocob cal mecebf uqadodocha dana age qocobil cal migian.

<sup>7</sup> Qa agenu eu odi age aig qumeig mati bahic caleigale. Age fulusdu mati bahic calimeig maha cunug ihoc leigale,” aden.

<sup>8</sup> Odocob Anut uqa Noaca uqa melahulca ha maaden, <sup>9</sup> “Aria feiga! Ija qila ageca agena sihul hibna cali hoqagan eucanu bal cehec je madigina. <sup>10</sup> Euha man fululecca dool mananca dool cusca ceteteh cunug wagnadec cali hoiga euca ceteteh cunug mahana cebac cobogina eu ageca wagna bileiga eu agenu ha bal cehec je madigina. <sup>11</sup> Ija bal cehec je i edi madigina, ‘Ija ceteteh cunug mahana cebac cobogina eu wa sil haun qee fadaladigaun. Wa sil oso maha i haun qee bahic fadaldoiaun,’ igina. <sup>12</sup> Bal cehec je i ijaca ageca ceteteh cunug mahana cebac cobogina euca gemo biligianu migina. Bal cehec je i billeceb catanigian. Eu uqana gadac eu i hen. <sup>13</sup> Ija taenna wal cehegina. Euqa bal cehec je ija mahaca gemo biligianu migina eu uqana gadac. <sup>14</sup> Ija taenna maha jahuldocomin wal saona caligian saen euna <sup>15</sup> ija wa sil oso ceteteh cunug mahana cebac cobogina eu haun qee fadaladeiaun ec ageca dool cunugca maadiga eu cisdugen. <sup>16</sup> Saen wal taenna caligian fimig ija bal cehec je ijaca ceteteh cunug mahana cebac cobogina euca gemo billeceb catanigian eunu cisdugen. <sup>17</sup> Bal cehec je ijaca ceteteh cunug mahana cebac cobogina euca gemo biligianu uqana gadac eu hen,” aden.

### *Noa uqa melahulca*

<sup>18</sup> Aria Noa uqa melahulca wagnadec cali hoin eu age ijanaga eu Sem, Ham, Jafetca. Ham uqa Kenan memeg. <sup>19</sup> Mel ijed eu age Noa melahul. Odocob dana eu agenadec dana cajaca cunug sabijimeig fulusdocobil maha cunug ihoc len.

<sup>20</sup> Aria Noa uqa jehen cabi oc dana. Eunu uqa wain halu cabina cehimei aig cedimei wain wa muden. <sup>21</sup> Saen osona wain wa muden eundec naha jimei dalul qon. Odocob uqa uqana lotoc tacec hulimei bical uqana lotoc talahna nijen. <sup>22</sup> Ham, uqa Kenan memeg, uqa memeg Noa bical ninijen fimei maha gumu cali limei waliagul lecis maalen. <sup>23</sup> Qa Sem Jafetca ale lotoc oso umesi qatomolana huleldu hewimesi bicbic limesi memela jahuldosin. Ale memela bical nijen eunu qee felesin. Ale amala abes nuen. <sup>24</sup> Odocob hibna Noa uqa wain jen eu dalul qoc hedocob uqa melah subig odudon eu wele don. <sup>25</sup> Odocob uqa madon,

“Hina melem, Kenan, geldugina.

Uqa waliagul agena cabi dana biligian.

<sup>26</sup> Tibud Uqa Semna Anut.

Eunu binan waseiale.  
Kenan uqa Semna cabi dana biliale.

<sup>27</sup> Anut uqa Jafetna\* sihul hatu ben utiale.  
Age Sem asagaca bileigale.

Kenan uqa Jafetna cabi dana biliale,” don.

<sup>28</sup> Aria wa sil hedon eu Noa uqa cabi gel 350 odi bilen. <sup>29</sup> Eunu Noa uqa mahana bilen eu cabi gel 950 eu hedocob uqa cal men.

## 10

### Noa melahul agena sihul

<sup>1</sup> Aria Noa melahul Sem, Ham, Jafetca agena sihul je i edi. Wa sil cajen eu hedocob melamagail eu age aidagail mel haun basadein.

<sup>2</sup> Jafet melahul eu Gome, Megog, Madai, Jawan, Tubal, Mesek, Tirasca. <sup>3</sup> Gome melahul eu Asigenas, Rifat, Togamaca. <sup>4</sup> Jawan melahul eu Elisa Tasisca. Dana sihul i age Kit Dodanica ageha Jawannadec. <sup>5</sup> Sihul eunadec dana age bilisadumeig age lannaca nuinaca belein. Age bilisadumeig agena jobon medeh filfilnana hatu filfilnana je filfilnana qaguqagu belein.

<sup>6</sup> Ham melahul eu Kus, Isip, Put, Kenanca. <sup>7</sup> Kus melahul eu Seba, Hawila, Sabta, Rama, Sabtegaca. Rama melahul eu Siba Dedanca.

<sup>8</sup> Aria Kus uqa melah oso ijan eu Nimrod. Nimrod mahana han cadecnu gelehinca calen. <sup>9</sup> Uqa Tibud amegna dool qocnu ijanca calen. Eunu je oso odi madegina, “Nimrod cinigwe dool qoc dana ijanca Tibud amegna,” egina. <sup>10</sup> Hahawan bahic uqa taun benben hewaden eu Sina mahana taun eu Bebel, Erek, Akadca. <sup>11</sup> Maha eunadec uqa cajimei Asiria nuen. Odimei uqa ono Niniwa, Rehobot-ia, Kala, <sup>12</sup> Resenca cehaden. Resen eu Niniwa Kalaca gemo bilen. Kala eu taun ben bahic.

<sup>13</sup> Isip uqa dana sihul Lud, Anam, Lehab, Naftu, <sup>14</sup> Patrus, Kaslu, Kaptoca asaga calen. Filistia age Kaptona sihulnадec calein.

<sup>15</sup> Kenan uqa melah matu eu Saidon. Kenan uqa melahul haun eu Het, <sup>16</sup> Jebus, Amo, Girgas, <sup>17</sup> Hiwi, Aki, Sini, <sup>18</sup> Awad, Sema, Hamatca. Agena sihul age asagail calein. Hibna Kenan uqana sihul age jobon medeh filfilnадec age bilisadumeig belein. <sup>19</sup> Odocob Kenan agena maha gadac eu Saidondec sanan mimei nui Gasa gadac eu Gera isec euha Sodom, Gomora, Atma, Seboimca leceb Lasa gadac. <sup>20</sup> Aria eu age Ham melahul. Age agena sihulnana agena jenana agena mahana agena hatunana odi qaguqagu belein.

<sup>21</sup> Sem ha melahulca. Uqa waliag matu eu Jafet. Hibru dana cunug age asaga eu Sem.

<sup>22</sup> Sem melahul eu Ilam, Asur, Apaksad, Lud, Aramac. <sup>23</sup> Aram melahul eu Us, Hul, Geta, Masca. <sup>24</sup> Sela memeg eu Apaksad. Ebe memeg eu Sela. <sup>25</sup> Ebe uqa melahul lecisca. Oso ijan eu Peleg.\* Uqana saenna maha gadac qatani mati bahic calen. Eunu ijan odi qon. Uqa waliag ijan eu Joktan. <sup>26</sup> Joktan melahul eu Almodad, Seleb, Hasamawet, Jera, <sup>27</sup> Hadoram, Usal, Dikla, <sup>28</sup> Obal, Abimel, Siba, <sup>29</sup> Ofia, Hawila, Jobabca. Dan eu age eu Joktan melahul. <sup>30</sup> Maha age bileyin eu Mesa sanan mimei leceb Sefa gadac. Eu hatu aluh mati bahic cam tobi becna isec. <sup>31</sup> Aria dana eu age eu Semna sihul. Age agena sihulnana agena jenana agena mahana agena hatunana odi qaguqagu belein.

<sup>32</sup> Aria eu age eu Noana sihul. Agena jobon medeh filfil. Age agena sihulnana agena hatunana odi qaguqagu belein. Wa sil hedocob Noana sihulnадec dana cajaca mahana cunug bileyin eu calein.

## 11

### Bebel ono jo ohis bahic

<sup>1</sup> Aria weleca Nimrod bilen saenna mahamaha cumug agena je madec eu osol himec. Eu filfil qee. <sup>2</sup> Dana cajaca eu age bili u cocobi bileig cam tobi becna isec belein. Bebeleig maha asou osona calein. Eu Sina agena hatu. Odimeig age ono bilein. <sup>3</sup> Odocob age madocobmadocob imeig madein, “Gec, maha agam cedimeb jana manocomun gagadic mimei brik caligian,” ein. Age simen baial mimeig brik fagdudufagdudu nuein. <sup>4</sup> Odocob age madein, “Gec hoiga. Ege eguna taun ben oso cehecnu. Ege jo oso ohis bahic cehecnu. Uqana qab eu sao qududugian. Eufi ege qatani filigandumeb mahamaha cunug qee ihoc loquaun qa ege ijanigeca bileyin,” ein.

<sup>5</sup> Odocob Tibud uqa dana eu age taun ben jo ohis bahic cecehegin tena eu figia bili nen. <sup>6</sup> Odimei uqa maden, “Feiga! Dana i age age sihul osol. Age cunug je osolca. Age cabi i odoqagannu sanan mi odogina eu odoqagan. Age qila cel oso odoqagannu nalug

\* 9:27: “Jafet” uqana gug eu “ben mec.” \* 10:25: “Peleg” uqana gug eu “cesawec.”

mifeig age odocobil ihoc himec ligian. <sup>7</sup> Age odi odowainnu ege ono numeb agena je ihulduadecnu. Eufi age agena je madec eu docobdocob qee owain,” en. <sup>8</sup> Eunu Tibud uqa filiganadeceb age onodec bilisadumeig mahamaha cunug ihoclein. Odimeig age taun ben eu cehec culein. <sup>9</sup> Odocob ono Tibud uqa mahamaha cunug agena je qu ihulahalduadimei filiganadeceb age bilisadumeig mahamaha cunug ihoclein. Eunu jobon eu ijan Bebel\* doin.

### *Semna sihul*

<sup>10</sup> Semna sihul agena je eu odi. Aria wa sil hedocob cabi gel lecis nueceb Sem ugana cabi gel eu 100 eu odi ihoc leceb uqa aideg mel oso basen. Uqa ijan Apaksad qon. <sup>11</sup> Odimei Sem bibilen li haun cabi gel 500 bilen. Oodon Sem aideg melahul ategulca haun basaden.

<sup>12</sup> Aria Apaksad uqa bibilen li ugana cabi gel eu 35 eu odi ihoc leceb uqa aideg mel oso basen. Uqa ijan Sela qon. <sup>13</sup> Odimei Apaksad bibilen li haun cabi gel 403 bilen. Oodon Apaksad aideg melahul ategulca haun basaden.

<sup>14</sup> Aria Sela uqa bibilen li ugana cabi gel eu 30 eu odi ihoc leceb uqa aideg mel oso basen. Uqa ijan Ebe qon. <sup>15</sup> Odimei Sela bibilen li haun cabi gel 403 bilen. Oodon Sela aideg melahul ategulca haun basaden.

<sup>16</sup> Aria Ebe uqa bibilen li ugana cabi gel eu 34 eu odi ihoc leceb uqa aideg mel oso basen. Uqa ijan Peleg qon. <sup>17</sup> Odimei Ebe bibilen li haun cabi gel 430 bilen. Oodon Ebe aideg melahul ategulca haun basaden.

<sup>18</sup> Aria Peleg uqa bibilen li ugana cabi gel eu 30 eu odi ihoc leceb uqa aideg mel oso basen. Uqa ijan Reu qon. <sup>19</sup> Odimei Peleg bibilen li haun cabi gel 209 bilen. Oodon Peleg aideg melahul ategulca haun basaden.

<sup>20</sup> Aria Reu uqa bibilen li ugana cabi gel eu 32 eu odi ihoc leceb uqa aideg mel oso basen. Uqa ijan Serug qon. <sup>21</sup> Odimei Reu bibilen li haun cabi gel 207 bilen. Oodon Reu aideg melahul ategulca haun basaden.

<sup>22</sup> Aria Serug uqa bibilen li ugana cabi gel eu 30 eu odi ihoc leceb uqa aideg mel oso basen. Uqa ijan Noho qon. <sup>23</sup> Odimei Serug bibilen li haun cabi gel 200 bilen. Oodon Serug aideg melahul ategulca haun basaden.

<sup>24</sup> Aria Noho uqa bibilen li ugana cabi gel eu 29 eu odi ihoc leceb uqa aideg mel oso basen. Uqa ijan Tira qon. <sup>25</sup> Odimei Noho bibilen li haun cabi gel 119 bilen. Oodon Noho aideg melahul ategulca haun basaden.

<sup>26</sup> Aria Tira uqa bibilen li ugana cabi gel eu 70 eu odi ihoc leceb uqa melahul ijedca. Ijanaga eu Ebram, Noho, Haranca.

### *Tirana sihul*

<sup>27</sup> Aria Tirana sihul agena je eu odi. Tira uqa melahul ijedca. Eu Ebram, Noho, Haranca. Haran uqa Lot memeg. <sup>28</sup> Aria Tira cebac bibilen Haran uqa cal men. Uqa anag basen maha euna cal men. Eu ijan Ur. <sup>29</sup> Aria Ebram Nehoca ale caja cedesin. Ebram aideg ijan eu Sarai. Noho aideg ijan eu Milka. Milka uqa Haran ateg. Iska uqaha Haran ateg. <sup>30</sup> Odonqa Sarai uqa goud. Uqa melca qee.

<sup>31</sup> Odocob Tira uqa melah Ebramca Haran melah uqa asag Lotca Ebram aideg Saraica ehadeceb age Kaldia hatu ijan Ur eu culimeig Kenan hatuna beloqaganne belein. Belimeig li age Haran hatuna calein. Odimeig age ono bilein. <sup>32</sup> Odocob Tira uqa Haran ono cal men. Uqana cabi gel cunug eu 205 odi.

## 12

### *Anut Ebram utadon*

<sup>1</sup> Aria Tibud uqa Ebram madon. “Hina memenca hinana sihulca hinana hatuca culimeg hatu ija ihachigen euna nuuga. <sup>2</sup> Odocom ija odocomin hinana sihul eu mati bahic caloqagan. Ija eelhigen. Ija binainca mihigen. Odocob hina binainnu mati bahic age eeldoc oqagan.

<sup>3</sup> Dana hina eelhigian eu ija eeldugen.

Qa in oso hina gelihigian eu ija geldugen.

Hinanu himec mahamaha sihul cunug age eeldoc oqagan,” don.

<sup>4-5</sup> Ebram uqa Anutna je dah men saen euna ugana cabi gel eu 75. Aria Ebram uqa Anutna je toodumei uqa aideg Saraica uqa waliag melah Lotca ugana cabi dana Haran ono cedaden euca ugana ceteteh cunug ono ceden euca cunug cedimei Haran hatunadec culimei Kenan hatuna nuen.

Uqa jicna niji u nui Kenan hatuna calen. <sup>6</sup> Odocob Ebram uqa Kenan hatuna calimei cocobi bili u nui maha oso ijan Sekem ono calimei More ugana na ben gun oso gugna

\* **11:9:** “Bebel” ugana gug eu “ihul ahal.”

calen. Aria saen euna Kenan dana age maha euna bibilegin uqa ono calen. <sup>7</sup> Odocob Tibud uqa ono Ebram amegna camasac mimei madon, "Maha i hinana sihul adigen," don. Odocob uqa ono Tibud camasac menna uqa Tibud ihandocnu meen cabal oso gualen. <sup>8</sup> Odimei uqa onodec haun cajimei cam tobi becna isec aluh oso Betel cemenug njia euna nuen. Uqa cudun euna uqa lotoc talah cehen. Betel eu cam toni nocna isec ninijen Ai eu cam tobi becna isec njia. Uqa gemo euna Tibud ihandocnu meen cabal oso gualen. Odimei uqa Tibud ijan u bili ihandon. <sup>9</sup> Uqa onodec haun cajimei cocobi bili nui Negew isec nuen.

### *Ebram Isip bilen*

<sup>10</sup> Aria saen euna maha euna cahel saen ben calen. Eunu Ebram uqa Isip biligiannu onoca nuen. <sup>11</sup> Nuimei Ebram uqa Isip calecnu dodoldudu bili uqa aideg Sarai madon, "Faga! Hina caja jaca eu ija dugina. <sup>12</sup> Saen Isip dana age hina mecihimeig age i uqa aideg ec cisdoqagan. Odimeig age ija qagatimeig hina oihuqagan. <sup>13</sup> Eunu hina uqa ija cebinami ec odi maadagale. Hina eu odi maadecemfi ija culitimeig me eeltoqagan," don.

<sup>14</sup> Odocob Ebram Isip ono caleceb Isip dana age aideg mele uqa caja jaca bahic eu fein. <sup>15</sup> Odocobil Fero ugana cabinu ilo dana age caja eu fimeig Fero caja eu galeca bahic madocnulein. Eunu caja eu ehudi Ferona jona lein. <sup>16</sup> Fero uqa Sarainu dumei uqa Ebram eeldu cuhadon. Odimei uqa sipsipca memeca bulmakaucu cesel manahal cufunecca cabi dana cajaca kamelca cedadi Ebram uton.

<sup>17</sup> Odonqqa Fero uqa Sarai on eunu Tibud uqa hag me qee me qee suldon. Odocob Fero caja cunug ugana jona bilingea euca age hag me qee eu hewaden. <sup>18</sup> Odocob Fero Ebram utadocob hocob madon, "Celnu kobil i oditem? Celnu hina uqa hina aiden ec qee matelem? <sup>19</sup> Celnu hina uqa ija cebinami ec matem? Ija uqa aideninu imig om eu celnu qee cahactelem? Aria hina aiden i hen. Umeg nuuga," don. <sup>20</sup> Odimei ugana dana maadeceb age Ebramca uqa aidegca ugana ceteteh cunugca odi ehadi ehi nui maha gadacna culadein.

## 13

### *Ebram Lot culdon*

<sup>1-2</sup> Aria ono Ebram uqa cehewan ben bahicca. Uqa sipsipca memeca bulmakaucu golca silwaca. Odocob Ebram uqa aidegca Lotca ugana ceteteh cunugca cedimeig Isip culimeig Negew tein. <sup>3</sup> Onodec uqa Negew culimei cocobicocobi nui Betel ono calen. Maha euna uqa hahawan lotoc talah cehennu euqa Betel Aica gemo. <sup>4</sup> Cocobi li uqa hahawan ihanec meen cehennna ono calen. Odimei cudun euna uqa Tibud ijan u binan sulen.

<sup>5</sup> Aria Lot uqa Ebramca belesin. Uqaha sipsipca memeca bulmakaucu ugana cabi danaca. <sup>6</sup> Qa ale alena ceteteh eu mati bahic eunu maha eu ale osoben gabandu bielecnu ihoc qee. <sup>7</sup> Eunu Ebramna dool cofadec danaca Lotna dool cofadec danaca gemo fee dadanec calen. Aria saen euna Kenan danaca Peres danaca age maha euna bielein.

<sup>8</sup> Odocob Ebram Lot madon, "Odi cain. Ele cotigcotig. Eunu ele fee dadan ecebeceb qee owaun o ijana dool cofadec danaca hinana dool cofadec danaca ageha qee fee dadanowain. <sup>9</sup> Maha cunug eu me himec njia fagana. Eunu cois ele filigandowan. Ansecna isec nuecemfi ija meulana isec nuigen. Qa hina meulana isec nuecemfi ija ansena isec nuigen," don.

<sup>10</sup> Odocob Lot ameg suli umei Jodan maha asou leceb Soa maha eu cunug fen. Maha eu cunug wa uti cuhadoc nijen. Maha eu Tibudna cabi cinigwe eu Isip agena maha cinigwe. Saen euna Tibud uqa Sodom Gomoraca qee fadalalec ninijen. Eu ale ihoc nijesin. <sup>11</sup> Eunu Lot uqa uqadocnu Jodan maha asou cunug nesilen. Odocob uqa cam tobi becna isec nuen. Ale eu odi filigandosin. <sup>12</sup> Ebram uqa Kenan mahana bilen. Oodon Lot uqa jobon benben maha asou euna njiegina ono age gemo nui bilen. Odocob uqa li Sodom cemenug ugana lotoc talah cehen. <sup>13</sup> Aria Sodom dana age qisol jaumadec. Age Tibud amegna silail dana bahic.

### *Ebram Hebron nuen*

<sup>14</sup> Saen Lot Ebram culdi nueceb Tibud uqa Ebram madon, "Amen suli umeg cudun hina tawaganadec hagen cunugna isec meciecem nuia. <sup>15</sup> Ija hinaca hinana sihulca maha cunug fagana eu adigen. Agena gaid biligiannu adigen. <sup>16</sup> Odocob ija odoocomin hinana sihul eu bobos cinigwe fulusdugian. Eunu in oso bobos saniecnu ihocfi hinana sihulha saniecnu ihoc. <sup>17</sup> Cajaga. Maha i ija hina ihigen eu cocobi nui cunug faga," don. <sup>18</sup> Eunu Ebram ugana lotoc talah wagalimei cocobi nui Mamri ugana na benben gugna calen. Ono Hebron cemenugca bilen. Odimei uqa ono ihanecnu meen cabal gualen.

**14***Ebram uqa king aqaden*

<sup>1-8</sup> Aria saen euna dana ben oso bilen uqa ijan Kedoleoma. Uqa Ilam agena king. Wele Kedoleoma uqa king ebum oso cadadimei ilo bilen. King ebum oso i age eu odi. Sodom agena king Beraca Gomora agena king Birsaca Adma agena king Sinabca Seboim agena king Semebacca Bela agena kingca. Kedoleoma uqa cabi gel 12 eu odi king ebum oso agena ilo bilen. Odocob cabi gel 13 docna king eu age Kedoleoma feedoin. Odocob cabi gel 14 docna Kedoleoma uqana danah king ijedca gami gabandoin. King ijed i age eu odi. Sina agena king Amrafaelca Elasa agena king Ariokca Goim agena king Tidalca. Kedoleoma king ijedca agena han dana cedadimeig jicna bebeli bileig Refaim dana age Asterot-kanaim one bibilegin aqadein. Odimeig age Susim dana Ham onoha aqadein. Odimeig Emim dana Kiriataim onoha aqadein. Odimeig Ho dana age Sia agena hatu aluhca jabadi ehi nui El-paran gadac ono aqadein. El-paran eu wadua naca qee cemenug nijia. Odimeig age haun ceselein. Ceseli humeig En-misbat ono calein. En-misbat eu Kades. Odimeig ono han cadimeig Amalek agena hatu eu cunug oin. Odimeig Amo age Hasason-tema ono bilein euha aqimeig hatu eu oin.

Aria Sodom agena kingca Gomora agena kingca Adma agena kingca Seboim agena kingca Bela eu Soa agena kingca age wele gabandoin. Age Kedoleomaca uqana han danaca aqadecnu sacia dumeig gabandu Sidim maha asouna ono cali hoin. Sidim eu wa macasca bahic cudun. <sup>9</sup> Age Ilam agena king wal oso i age han cadoqagannu cajein. Ilam agena king eu Ilam agena king bahic Kedoleomaca Goim agena king Tidalca Sina agena king Amrafaelca Elasa agena king Ariokca. Eu king wal oso age king ebum oso gami han cadoqagannu cajein. <sup>10</sup> Aria Sidim asou eu maha baial. Helo mati bahic euna gag bibi nijen. Odocob Sodom Gomoraca alena king hannu bibusali bilesi helo euna nosin. King ijed ale culadesin euha busalein qa age aluhna belein. <sup>11</sup> Odocobil king wal oso age Sodom Gomoraca agena ceteteh cunugca agena sab cunugca cedimeig belein. <sup>12</sup> Ebram melah Lot uqa Sodom ono bilen uqaha ehudimeig uqana ceteteh cunug cedimeig belein.

<sup>13</sup> Aria Ebram uqa Mamri Amodec uqana na benben gugna bilen. Mamrica uqa waliagul Eskol Aneca age Ebramna danah. Odimei Ebram bibilen dana oso hannahadec busali humei Hibrudec Ebram madocob don. <sup>14</sup> Odimei uqa uqana sihul eundec u hewi nueiga ec dah mimei uqa uqana cabi dana 318 eu hannu wele iwaladec eu age uqana jobon bilein cedadeceb age tooadi beli Dan ono calein. <sup>15</sup> Uqa witic euna uqana dana qatanecceb uqa uqana cabi danaca age aqimeig jabadi ehi nui Hoba ono calein. Eu Damaskas taun hagen ono isec. <sup>16</sup> Odimei Ebram uqa melah Lotca uqana cajaca uqana ceteteh cunugca dana cajaca king wal oso agena ceteteh cedein eu cawaladi cedimei ceselen.

*Melkisedek Ebram eeldon*

<sup>17</sup> Aria Ebram uqa Kedoleoma king leih uqaca gabandoin eu hanna aqimeig ceselein. Eu hedumei ceseli limei Sawe maha asouna ono calen. Sawe eu ijan oso King Agena Maha Asou. Ono Sodom agena king Ebram gulucdon. <sup>18</sup> Ono Melkisedek Salemdec king uqaha Ebram gulucdon. Melkisedek uqa Anut Ohis Bahic uqana gemo tawec ihanec dana Ebram eeldoc je madugiannu bret wainca hewimei li gulucdon. <sup>19</sup> Odimei uqa Ebram eeldudu madon, "Anut Ohis Bahic uqa sao mahaca ifanen eu Ebram eeldoiale. <sup>20</sup> Anut Ohis Bahic hina cesulheceb han wooldoga eu binan suleqale," don. <sup>21</sup> Odocob Ebram ceteteh cunug ila meceb li am 10 calen. Odocob 10 eundec osahic eu Melkisedek uten.

Odocob Sodom agena king uqa Ebram madon, "Dana cajaca ija iteg ceteteh eu hina cedega," don.

<sup>22</sup> Odocob Ebram Sodom agena king madon, "Anut Ohis Bahic uqa sao mahaca ifanen eu uqa amegna wele je cagu madiga. <sup>23</sup> Ija hinana ceteh oso qee ugaun. Halu wegecfo jaimiga tacec halufo qee ugaun. Hibna hina ija Ebram cehewanca mudem ec madagaun. <sup>24</sup> Ijadodocnu ija ceteh oso qee ugaun. Ijana dana sab jein eu cois agena ceteteh eu himec ugen. Qa ijana danah Ane, Eskol, Mamrica eu age age mugumuga mec eu himec cois oqagan," don.

**15***Anut Ebramca bal cehec je maden*

<sup>1</sup> Odocob ceteteh i hedocob Tibud uqana je ola codocna Ebramca humei madon, "Ebram hina cain cucuiagaun. Ija hina cofhi cuhadumig hina wadacdoc ameg ben bahic ihigen," don.

<sup>2</sup> Qa Ebram jejeg hewi madon, "O Tibud ijana Ben ija melca qee. Hina adi wadacdoc ameg ben bahic itegan? Ija cal meceminf ija cehwani eu Eliesa Damaskasdec ugian.

<sup>3</sup> Mel oso qee itelelmu eunu cabi dana oso ijana jona bilia cehwani eu ugian," don.

<sup>4</sup> Odocob Tibud uqa Ebram haun madon, "Cabi dana i hina cehwain qee oiaun qa hinadodoc melem uqa hina cehwain eu ugian," don. <sup>5</sup> Odimei Tibud uqa Ebram ehudeceb maha gumu cali lesin. Odimei madon, "Faga! Saona isec meciimeg malaqa sicanadaga. Hina sicanadecnu ihofca hinana sihul ha malaqa nijia eu odiwe nijigian," don.

<sup>6</sup> Odocob Ebram Tibudna jenu meleen. Eunu Tibud uqa Ebram gale docob uqa dana ititom don. <sup>7</sup> Odimei uqa madon, "Ija Tibud. Ija maha i ihecemin hinana biligiannu Ur Kaldia agena hatunadec ehihi ahom," don.

<sup>8</sup> Qa Ebram sisildon, "O Tibud ijana Ben maha i ijana biligian eu adi dugen?" don.

<sup>9</sup> Eunu Tibud uqa jejeg hewi madon, "Hina bulmakau osoca meme osoca sipsip manahal osoca agena cabi gel ijed doc eundec cedi ahutuga. Euha cuhudid lecisca eu odi cedi ahutuga," don.

<sup>10</sup> Odocob Ebram uqa ceteteh eu age cedimei Anutca ahon. Odimei uqa dool eu cunug qatani lecis aali helen. Odimei uqa nahanaha eu am lecisia mealen. Qa cuhudid eu qee tuqalel. <sup>11</sup> Odocob alog leih age nimeig cuhun joqaga bili odocobil qa Ebram jabadeceb belein.

<sup>12</sup> Odi oodon am tonen. Oodon Ebram uqa us docob cal mecwe bahic nijen. Uqa eu odi ninijen uqa ceteh ola odochana cinigwe fimei ben bahic cucuien. <sup>13</sup> Odocob Tibud uqa Ebram odi madon, "Hina du cuhadogale. Hinana sihul eu age cele agena mahana jag biluqagan. Odimeig age cabi dana gauc biluqagan. Odocobil cele dana age me qee mamadebil li cabi gel 400 ugian. <sup>14</sup> Qa cele dana eu age kobel eu odi odoqagan ija wadacadigen. Odocomin hina jajainel age hatu eu cuculeig ceteteh mati bahic cedi hewi beloqagan. <sup>15</sup> Euqa hina bibili li toia mimeg hina wawin bodoecca cal mecem hel cisihuqagan. <sup>16</sup> Hinana sihul eu maha ina mahuc qee ceseli howain. Amo sihul age maha ina bilegina kobol me qee mati bahic eua qee odi hedoc nijia. Cabi gel 400 leceb age odi hedocobil aria ija age gagadic wadacadimig maha inadec ititacadigen. Odocomin saen euna hina jajainel ene ceseli hoqagan," don.

<sup>17</sup> Aria cam casileceb tu gihadon. Oodon hal jaca oso calen. Oodon ceial ja belicanca osoha calen. Odimesi ale dool am lecis aali na naha mealec eu gemo cobosin. <sup>18</sup> Witc euna himec Tibud uqa Ebram bal cehec je madumei madon, "Maha i cunug ija hinana sihul adigen. Eu uqana gadac eu Isip agena wanadec nueceb wa ben Jufretis gadac. <sup>19</sup> Age Ken agena mahaca Kenis agena mahaca Kadmon agena mahaca <sup>20</sup> Het agena mahaca Peres agena mahaca Refaim agena mahaca <sup>21</sup> Amo agena mahaca Kenan agena mahaca Girkas agena mahaca Jebus agena mahaca eu cunug adigen," don.

## 16

### Hega Ismalca

<sup>1-3</sup> Aria Ebram Kenan mahana bibilen cabi gel 10 hedocob Sarai Ebram aideg uqa Ebram mel oso qee basitol. Qa uqa Isipdec cabi caja osoca. Uqa ijan Hega. Eunu Sarai Ebram madon, "Faga! Tibud uqa ija mel Cain basigaunnu wawi jic menen. Eunu hina ijana cabi cajaca lecem nijesia. Ija mel uqanadec ugenfa," don.

Odocob Ebram Saraina je don. Odocob Sarai Ebram aideg uqa Hega uqana cabi caja Isipdec ehudi ehi li uqa aideg biligiannu gemug Ebram uten. <sup>4</sup> Odocob uqa Hegaca nijimesi Hega uqa melca men.

Odocob Hega uqa melca fimei uqa culaug ocob Sarai cewudoloi. <sup>5</sup> Odocob Sarai uqa Ebram madon, "Hega ija cewitina eu hinana cahuldoc. Ijadodoc ijana cabi caja ihm qe uqa melca mimei uqa cewitina. Ija cahuldomfo qee hina cahuldomfo? Tibud uqa tem li figian," don.

<sup>6</sup> Odocob Ebram uqa Sarai jejeg hewi madon, "Faga! Hinana cabi caja eu hina ebenna bilia. Hina adi odudegannu gale hena eu odudoga," don. Odocob Sarai uqa galac mecnica cabi culumencaca uten. Odocob Hega uqa Sarai amegnadeb busalen.

<sup>7</sup> Aria odocob Tibudna ensel uqa Hega wadaw naca qeena wa tut cemenug bibilen guludcon. Wa tut eu Sur nuec jicna. <sup>8</sup> Odimei uqa madon, "Hega, Saraina cabi caja, hina anadec hoga? Odeia hina ana nuuguna?" don.

Odocob uqa maden, "Ija ijana ben Sarai amegnadeb busaligina," en.

<sup>9</sup> Odocob ensel uqa madon, "Ceseli hinana benca nuuga. Odimeg uqa co toodoo odoga," don. <sup>10</sup> Odimei uqa haun madon, "Ija hinana sihul eu odadecmin mati bahic fulusdoqagan. Eu oso sicanai madecwe qee. <sup>11</sup> Faga! Hina mel oso basegan. Tibud uqa

hinana culumennu wawin qajena eu dah meia. Eunu hina uqa ijan Ismal\* qogan. <sup>12</sup> Qa uqa cesel cus cinigwe cocobi biligian. Uqa dana cunug cad madigian. Odocob dana cunug age uqa cad muduqagan. Odocob uqa cotugul gami gidod biluqagan,” don.

<sup>13</sup> Odocob Hega uqa uqadodoc waug maden, “I mele bahicfo? Anut ija gaid mecitina eu figaqa ija cebac biliga,” en. Eunu uqa Tibud ijan Anut Mecitina qon. <sup>14</sup> Eunu wa tut hunec eu Kedes Beretca gemo nijia age “Oso Cebac Bilina Uqa Mecitina Uqana Wa Tut,” ec madeginia.

<sup>15</sup> Odocob Hega mel oso basen. Odocob Ebram uqa mel eu ijan Ismal qon. <sup>16</sup> Saen euna Ebram uqana cabi gel eu 86 odi.

## 17

*Deweg gaga qoc eu bal cehec je gadac*

<sup>1</sup> Aria saen Ebram uqana cabi gel 99na Tibud uqa Ebrahim amegna calimei madon, “Ija Anut Gagadic Bahic. Ija amina ititom coboga. <sup>2</sup> Ijana bal cehec je ijaca hinaca gemo mudigen. Ija odocomin hinana sihul eu gadacca qee fulusdugian,” don.

<sup>3</sup> Odocob Ebram uqa maha cotadon. Oodon Anut madon, <sup>4</sup> “Bal cehec je eu i edi mudigina. Hina hatu mati bahic age asaga calegan. <sup>5</sup> Ija hina hatu mati bahic age asaga mihiben. Eunu hina haun ijain Ebram qee howain qa hina ijain Ebrahim\* hoqagan. <sup>6</sup> Ija odadecemin hinana sihul mati bahic caloqagan. Leih age king caloqagan. Ija odadecemin hinana sihul hatu filfil caloqagan. <sup>7</sup> Bal cehec je eu bileceb catanecnu mudigen. Euqa ijaca hinaca gemo biligian. Hinana sihul hibna cali hoqagan eu age gemo ha biligian. Bal cehec je eu odi. Ija hinana Anut biligen. Hinana sihul hibna cali hoqagan eu agena Anut ha biligen. <sup>8</sup> Qila hina Kenan hatuna jag biliga. Qa hatu i cunug eu hinana biligiannu ihigen. Hinana sihul cunug hina toohi cali hoqagan, eu ha agena biligiannu, adigen. Euqa ageca bileceb catanigiannu adigen,” don.

<sup>9</sup> Odocob Anut haun Ebrahim madon, “Aria hinanu je qa odi. Hina ijana bal cehec je eu hewec bahic hewaga. Hinana sihul hibna hina toohi cali hoqagan eu age ha hewec bahic hewoqagan. <sup>10</sup> Bal cehec je eu hinaca hinana sihulca biligian eu odi. Hinana sihulna manahal cunug eu mel simca dana cunugca deweg gaga qoc bahic hoqagan. <sup>11-12</sup> Hinana sihul hibna cali hoqagan eu manahal cunug eu mel simca dana cunugca deweg gaga hoqagan. Mel sim cunug basecebil deel eben naha gic ijedca hedocob age deweg gaga qoc bahic hoqagan. Hinana jona cabi dana cunug cali hoqagan euca hinana sihul qee hinana begabeg ageca deweg gaga hoqagan. Hina deweg gaga qogan. Euqa bal cehec je ija hinaca gemo bilia eu uqana gadac. <sup>13</sup> Cel cabi dana hinana jona cali hugian o begabeg age deweg gaga qoc bahic hoqagan. Eunu ijana bal cehec je eu age dewenegana biligian. Eu bal cehec je bileceb catanigiannu gadac. <sup>14</sup> Odocob manahal oso uqa deweg gaga qee golfi uqana sihulnadec ijan qetoqagan. Uqa ijana bal cehec je eu qee toodol,” don.

<sup>15</sup> Odocob Anut uqa Ebrahim madon, “Hina aiden, ijan Sarai, eu haun Sarai qee dogaun qa qila hina uqa ijan Sera dogan. <sup>16</sup> Odocob ija uqa eeldocomin uqa mel oso basihigian. Odocob Sera uqa hatuhatu age asaga caligian. Dana eu age leih king caloqagan,” don.

<sup>17</sup> Odocob Ebrahim uqa gob cehi bilimei jogoinu olana maha cotadudu bili asalen. Odimei uqa waugna maden, “Dana ija edec ijana cabi gel 100 ija golaninadec mel oso cali hocnu ihocfo? Odocob Sera uqana cabi gel eu 90 uqa mel oso basecnu ihocfo?” en. <sup>18</sup> Odocob Ebrahim uqa Anut sisildon, “Ismal uqa ija melami eeldocomin biligian ihocfo?” don.

<sup>19</sup> Odocob Anut madon, “Ao, euqa hina aiden Sera uqa mel oso basihigian. Odocob hina uqa ijan Aisak† qogan. Odocob ijana bal cehec je eu uqaca mudigen. Euqa uqana sihul hibna cali hoqagannu mudigen. Bal cehec je eu bileceb catanigiannu mudigen. <sup>20</sup> Aria Ismalnu je madaga eu ija dah mihiba. Faga! Ija uqa eeldocomin uqana sihul mati bahic fulusdoqagan. Uqana sihul eunadec hatu ilo 12 caloqagan. Uqana sihul hatu ben oso caligian. <sup>21</sup> Hina melem, Aisak, saen i edina cabi gel osona Sera basihigian. Euqa ijana bal cehec je eu hina melem Aisakca mudigen,” don. <sup>22</sup> Saen Anut uqa Ebrahimca je madi hedumesi uqa culdimei ohis ti nuen.

<sup>23</sup> Odocob deel euna himec Ebrahim uqa Anut madon eu toodu odon. Uqa melah Ismalca uqana cabi dana uqana jona cali hoin euca uqana begabeg ageca deweg gaga aqaden. Uqana tal manahal eu cunug deweg gaga aqaden. <sup>24</sup> Aria Ebrahim uqa uqana cabi gel 99na uqa deweg gaga qon. <sup>25</sup> Uqa melah Ismal uqana cabi gel 13na uqa deweg gaga qon. <sup>26</sup> Ebrahim uqa melah Ismalca ale deel euna himec deweg gaga qosin. <sup>27</sup> Dana

\* 16:11: “Ismal” uqana gug eu “Anut dah mena.” \* 17:5: “Ebrahim” uqana gug eu “sihul sihul madi bahic agena ilo.” † 17:19: “Aisak” uqana gug eu “uqa asalena.”

uqana jona cali hoinca begabeg ageca dana cunug Ebrahimca bilein age Ebrahim gami deweg gaga qoin.

## 18

### *Tibud Sera uqa Aisak basigian ec maden*

<sup>1</sup> Aria Tibud uqa Ebrahimca camasac men. Saen euna Ebrahim uqa Mamrina na gug benbenna lotoc talah cehi bilen. Cam eu gagadic tatawen Ebrahim uqa lotoc talah cebecna bilen. <sup>2</sup> Bibilen uqa ameg suli umei dana ijed cemenug tatawegin meciaden. Saen Ebrahim meciadimei uqa lotoc talah cebec culimei dana ijed gulucadecnu gudugudui len. Odimei uqa gob cehi bilimei jogoi nu maha cotadudu bili <sup>3</sup> maaden, "Ijana ben ija age amagana tawecemin gale adenafii agena ewel dana cain wooldu belowain. <sup>4</sup> Age wa nag oso ahocobil jaimiga cuseigale. Odocob age na salu jaen mudeigale. <sup>5</sup> Ija sab oso saciaduadigen. Odocob age gagadic odoc umeig coboqagan. Age agena ewel danaca wele hoiga. Eunu ija loo adigennu culiteigale," aden.

Odocob age madoin, "Cois hina madaga eu odi odogale," doin.

<sup>6</sup> Odocob Ebrahim uqa mahucwe lotoc talah dunuh limei Sera madon, "Hina mahucwe plaua uqana culumen eu 14 kilo odi umeg ibuldumeg managa," don. <sup>7</sup> Odocob Ebrahim uqa guguli bulmakau gelna len. Odimei uqa bulmakau nag oso eu uqa cuhun jecnu bodoec umei uqana cabi dana uten. Odocob cabi dana uqa bulmakau eu mahuc bahic cilecnu saciadugia bili nuen. <sup>8</sup> Odocob uqa bulmakauna su muhuc qagocca su haunca bulmakau nag cili saciadon euca ahu miaden. Odimei age jejegin uqa gesacna na salu meciadi tawen.

<sup>9</sup> Odocob age sisildoin, "Hina aiden Sera ai?" doin.

Uqa jejenega hewi maaden, "Uqa lotoc talah dunuh bilia," aden.

<sup>10</sup> Odocob dana oso uqa Ebrahim madon, "Mele bahic saen ina cabi gel oso euna ija hinaca ceseli hugen. Euqa hina aiden Sera uqa mel oso wele basigian," don.

Aria Sera uqa lotoc talah cebecna dah mimi bilen. <sup>11</sup> Aria Ebrahim Seraca ale wele toia mesin. Alena cabi gel eu mati bahic. Sera uqana jagel qoc saen eu wele hedon. <sup>12</sup> Eunu Sera uqa uqadodoc waug dunuhna asali bili maden, "Ija wele toia mem. Gemuni ha wele toia men. Gemunica nijimeu ija wawi migenifo?" en.

<sup>13</sup> Odocob Tibud uqa Ebrahim madon, "Eu adi Sera uqa asali bili ija toia bahic eu mele bahic ija mel basigeno ec madeia? <sup>14</sup> Ceteh oso eu ija odocnu ija ihoc qeefo? Ija cabi gel osona hinaca ceseli hugen. Saen euna Sera uqa mel oso wele basigian," don.

<sup>15</sup> Odocob Sera uqa cucuiimei maden, "Ija qee asalelem," en.

Odocob uqa madon, "Qeeo, hina asalaga," don.

### *Abraham Sodomnu inondon*

<sup>16</sup> Aria dana age beloqaga bili cajimeig age Sodom isec meciecebil non. Odocob Ebrahim uqa culadeceb beloqaga bili osoben cocobi lein.

<sup>17</sup> Odocob Tibud uqa uqadodoc waug maden, "Ija ceteh oso odige bili eu Ebrahim ameg jahundi odigenfo qeefo? <sup>18</sup> Mele bahic Ebrahim uqa uqana sihul hatu oso binanca caligian euha gagadic odocca. Odocob Ebrahim sihul hatu cunug age eeldoc oqagan.

<sup>19</sup> Ebrahim melahulca uqana sihulca Anutna je toodocnu maadigian eunu Ebrahim nesiludem. Euha Ebrahim age ititom odocnuca me odocnuca dado madigian. Age odi odocobilfi ija Ebrahimnu je cunug madem eu odigen," en.

<sup>20</sup> Odocob Tibud uqa maden, "Sodom Gomoraca qisol ben bahic mesina dah migi.

<sup>21</sup> Eunu ija noc bahic numig Sodom Gomoracanu madegina eu melefo qeefo figen," en.

<sup>22</sup> Odocob dana lecis ale waldumesi Sodom isec belesin. Ale bebelesin Ebrahim uqa Tibud olana tawen. <sup>23</sup> Odocob Ebrahim uqa Tibud cemenug limei madon, "Hina dana ititomca qisol mecca osoben tetec golisdocwe golisadeganfo? <sup>24</sup> Dana ititom 50 taunna bielecebili hina eu cunug tetec golisdocwe golisadeganfo? Dana ititom 50 bieleiga eunu taun qee fadaldogaunfo? <sup>25</sup> Hina dana ititom qisol mec danaca gabanadi qee madegafi euqa hinana kobil qee. Eu odi odocaga hina dana ititom qisol mecca osoben ihocihoc odadegan. Eu odi odoc hinana kobil qee! Hina mahamaha cunug agena gesilec dana. Hina tutuc gesilgec bahic gesilgaga," don.

<sup>26</sup> Odocob Tibud uqa jejeg hewi madon, "Ija Sodom taun dunuh dana ititom 50 gulucadifig ija taun eu cunug qee fadaldugaunfo," don.

<sup>27</sup> Odocob Ebrahim haun madon, "Ija Tibud je madocnu gauc temduga ijaqa dana mahanadec himec. <sup>28</sup> Dana ititom 50 qee bieleinfa. Eu 45 himec bieleiga. Hina dana ititom 45nu taun qee fadaldogaunfo?" don.

Odocob Tibud uqa jejeg hewi madon, "Ija dana ititom 45 gulucadifig ija eu qee fadaldigaun," don.

<sup>29</sup> Odocob Ebrahim uqa haun madon, "Dana ititom 40 bileigafa?" don.

Odocob Tibud uqa jejeg hewi madon, "Dana ititom 40 bilecebifli ija qee fadaladigaun," don.

<sup>30</sup> Odocob Ebrahim uqa madon, "O Tibud hina cain gemain beiaun. Culitecem je madiga. Dana ititom 30 bilecebifli hina fadaladeganfo?" don.

Odocob uqa madon, "Dana ititom 30 ono gulucadifig ija qee fadaladigaun," don.

<sup>31</sup> Odocob Ebrahim uqa madon, "Ija Tibud je madocnu temduga. Dana ititom 20 gulucadifeg hina fadaladeganfo?" don.

Odocob uqa madon, "Dana ititom 20 gulucadifig ija taun eu qee fadaldugaun," don.

<sup>32</sup> Odocob Ebrahim uqa madon, "O Tibud hina cain gemain beiaun. Culitecem haun je madi osahic dugen. Dana ititom 10 himec gulucadifeg hina eu fadaladeganfo?" don.

Odocob uqa madon, "Dana ititom 10 bilecebifli ija qee fadaladigaun," don.

<sup>33</sup> Odocob Tibud uqa Ebrahim je madu hedodoi ha uqa Ebrahim cuculdi nuen. Odocob Ebrahim uqa uqana cudunna ceseli nuen.

## 19

### *Sodom agena qisol mec*

<sup>1</sup> Aria Tibudna ensel lecis eu ale wesu Sodom ono calesin. Lot uqa taun cebecna bilen. Odocob Lot uqa mecialimei caji gulucaligeria bili len. Uqa gulucalimei gob cehi mahana bilimei jogoi nu maha cotadoin. <sup>2</sup> Odimei maalen, "Ijana ben lecis ale waldumesi alena ewel danana jona hosiale. Humesi jaimila cusesiale. Odimesi witic ene nijesiale. Odocobil ale uquadec qasil bahic cajimesi belowasan," alen.

Qa ale jejeg hewi madosin, "Qeeo, ele maha gemo cegulec cudunna us nijewan," dosin.

<sup>3</sup> Odocobil uqa cesuscesusaleceb ale waldumesi uqana jona lesin. Odocobil Lot uqana cabi dana maadeceb age sab tinca oso saciadualein. Odimeig age bret jisca qee qagecebile jesin.

<sup>4</sup> Ale us nijuwasa oodosin taundec dana age jo talildoin. Sodomdec dana toiaca mel haunca eu cunug age jo talildoin. <sup>5</sup> Age Lot utai sisildoin, "Dana qila witic hinaca hoiga eu ai? Ehali cali hocum ege canalecnu," doin.

<sup>6</sup> Qa Lot uqa meciadigia bili jic cebeccna cali len. Oodon uqa jic cebec hibilohu isec menen. <sup>7</sup> Odimei uqa maaden, "Ija cotiel eu odi cain. Qisol mec kobel cain odowain. <sup>8</sup> Qa feiga. Ija ateniel lecis eu dana gami oso qee nijeselin. Culitecebifli ija eu ale ehali ahocomin age agena gawecna odalogoqagan. Qa dana eu ale adih oso cain odalowain. Ale ijaca loo hobia. Eunu me cofaligen," aden.

<sup>9</sup> Qa age madoin, "Jag, hina isa quguga! Ege eeta odoocomun cain magagaun. Hina isa quguga. Qeefi hina me qee odiheqan eu wooldoc ale me qee odaleqan," doin. Age Lot gagadic bahic sundoin. Odimeig age cebec batawoqaga bili cemenuglein.

<sup>10</sup> Dana lecis dunuh bilesin euqa ebenela hocob Lot hewi didocobil jo hamol len. Odimesi ale jic cebec menesin. <sup>11</sup> Odimesi ale fulacdochna dana toiaca mel haunca aqesin. Ale fulacdona amaga afac quadecebifli jic cebec walecnu cabi mein.

### *Lot Sodom culdon*

<sup>12-13</sup> Odimesi dana lecis ale Lot madosin, "Ele taun i fadaldowan. Eunu hinana talnadec indec oso melemfo atenfo atenel gemulailfo hinaca taun ene bilecebifli eu cedadecem taun i culimeig beleiga. Euqa Tibud agena qisol mec eu me qee bahic dah men. Eunu Tibud uqa fadaldocnu sulleia," dosin.

<sup>14</sup> Odocobil Lot uqa cali limei dana lecis uqa ategul cedalowasannu je nijen eu maalen, "Cajesia! Taun i culdesia! Tibud uqa taun i fadaldugian," alen. Odonqa ale uqa uqadocin maalena ec cisdosin.

<sup>15</sup> Odocobil qasil cocojagen ensel lecis ale Lot cesusdudu madosin, "Cajaga! Odimeg hina aidenca hina atenel leciscia cedadecem beleiga. Qeefi ageha fadaloqagan ele taun i fadaldowan saenna," dosin.

<sup>16</sup> Lot uqa cisdoc leciscia men. Euqa Tibud uqa uqanu waug qon. Eunu dana lecis ale uqa ebenga aideg ebenga uqa ategul ebenelaca hewadi ahu cedimesi ehadi taun gesacna nui madesin. <sup>17</sup> Odocobil ale ehadi nui taun gesacna madimesi dana eu ale oso maaden, "Mahuc busaleiga! Age cal mowainnu busaleiga! Hibilomoga isec cain meciowain. Maha asouna ha cain tawowain. Aluhna busali beleiga. Qeefi taun i fadaldodohul ageha fadaloqagan," aden.

<sup>18</sup> Qa Lot uqa maalen, "O ijana ben lecis eu ihoc qeo. <sup>19</sup> Ale ijana gale alena. Eu nalug mec kobel ihactesia. Euqa ija cal migauunu cesultesia. Qa ija aluhna busali nuecwe qee. Ja i ija oiteceb cal migen. <sup>20</sup> Qa fesia. Taun oso i onoca qee ono busali lecnu eu nag ihoc. Ija culitecem ono busali liga. Ija ono lifig ija qee cal migauun. Eu taun nag bahic," alen.

<sup>21</sup> Odocob uqa jejeg hewi madosin, “Cois. Je madaga eunu ha cois howona. Taun hina madaga eu qee fadalowaun. <sup>22</sup> Aria mahuc ono busali beleiga. Age ono calecebile himec ele ceteh oso odocnu ihoc,” dosin. Lot taun eu nag ec maden eunu taun eu ijan Soa\* dogina.

*Anut Sodom Gomoraca fadalalen*

<sup>23</sup> Aria walag dadanen Lot uqa Soa calen. <sup>24</sup> Odocob Tibud uqa meen dain gulgulecca jaca osoben saonadec suldocob wa cinigwe Sodom Gomoraca nen. <sup>25</sup> Tibud uqa taun eu ale eu odi fadalalen. Maha asou eu cunug fadaldon. Dana caja taun bilein euca teteteh mahana cehec nijen euha cunug fadaldon. <sup>26</sup> Qa Lot aideg uqa Lot hibilohu isec mecimeei si meen ibuldon. Odimei na tutuc cinigwe tawen.

<sup>27</sup> Aria cojageceb Ebrahim qasil bahic cajimeei ceseli nui cudun uqa Tibud amegna tawen euna len. <sup>28</sup> Odocob Ebrahim uqa mecieceb Sodom Gomoraca isec non. Odimei maha cunug asouna nijen euha fen. Ja casuc ben bahic mahanadec sao ohis teten eu fen. Eu cinim manecebil casuc cajenawe eu odi fen. <sup>29</sup> Qa Anut uqa taun lecis fadalalen saen euna uqa Ebrahimnu cisidumei Lot fadalec cudunnadec suldocob taun uqa bilen eu culimei busali nuen.

*Moab Amonca alena sihuлу gug*

<sup>30</sup> Euqa Lot uqa Soa bilecnu cucuien. Eunu uqa ategul lecis gami Soa culdimeig aluhna timeig age meen hatin osona bilein. <sup>31</sup> Odocob ateg matu eu milum madon, “Ele memile uqa toia. Odocob dana oso ele ocnu ene qee biled. Ele mel oso adi basewan? <sup>32</sup> Gec hoga. Memile wain utocohul jimei dalul qocob uqaca nijeqan. Eu odifeu ele melca mewan. Eufi eguna sihu gaid biligian,” don. <sup>33</sup> Eunu witic euna ale memela wain utecebile jecel dalul qon. Odocob ateg matu eu leceb memegca nijesin. Odosin memeg uqa ateg leceb nijimesi culdi cajen eu qee dol.

<sup>34</sup> Odocob cojageceb ateg matu eu milum madon, “Faga. Cum witic ija meica nijuwan. Gec qila witic ha wain utocohul jimei dalul qocob hina lecem uqaca nijuwasan. Eufi eguna sihu gaid biligian,” don. <sup>35</sup> Eunu witic euna ha ale memela wain utecebile jecel dalul qon. Odocob ateg milum eu cajimeei leceb memegca nijesin. Odosin memeg uqa ateg leceb nijimesi culdi cajen eu qee dol.

<sup>36</sup> Eunu Lot uqadodoc ategul odaleceb ale melca mesin. <sup>37</sup> Odocob ateg matu eu mel oso basen. Odimei eu ijan Moab† qon. Uqa Moab sihu asaga calen. Age qila bilegina. <sup>38</sup> Odocob ateg milum uqaha mel oso basen. Odimei eu ijan Ben-ami‡ qon. Uqa Amon sihu asaga calen. Age qila bilegina.

## 20

*Ebrahim Abimelekca*

<sup>1</sup> Aria Ebrahim uqa Mamri culimei Negew hatuna nuen. Odimei jobon lecis gemo bilen. Oso ijan eu Kedes. Oso ijan eu Sur. Hibna uqa Gera bilen. <sup>2</sup> Gera bibilen Ebrahim uqa Seranu uqa ija cebinami ec oso madon. Eunu Gera agena king Abimelek uqa uqana cabi dana suladeceb nui Sera aideg biligiannu ehudi uqacalein. <sup>3</sup> Odoinqa witic osona Anut uqa bebelecna Abimelekca humei madon, “Sera uqa dana wele on. Hina uqa omnu hina cal mega biliga,” don.

<sup>4</sup> Qa Abimelek uqa Sera cemenuq qee lec ninijen uqa Anut madon, “O Tibud ija qisol meec oso qee odolom. Hina ijaca ijana hatuca fadaldoganfo? <sup>5</sup> Faga. Ebrahim uqadodoc Seranu ija cebinami ec maten. Seraha Ebrahimnu uqa ija cebinami ec maten. Eunu ija odom eu cisdoc tutuc odom. Ija silail qee meleem,” odi madon.

<sup>6</sup> Odocob Anut uqa bebelecna jejeg madon, “Hina odom eu cisdoc tutucna odom eu ija dugina. Eunu ija qee culihecemin caja euca lelem. Eunu ija hina cahuldogauunu cahahahem. <sup>7</sup> Qilaqa caja eu gemugca suldocom ceseli ligian. Dana eu uqa ijana je hahun madec dana. Eunu uqa inondocob hina qee cal magaun. Qa hina caja eu qee ceseli suldocomfi hinaca hinana dana cajaca age cunug cal moqagan,” don.

<sup>8</sup> Cojageceb qasil bahic Abimelek uqa uqana cabi dana utaa deceb hocobil ceteh fen eu cunug saadeceb age ben bahic cucuein. <sup>9</sup> Odimei uqa Ebrahim utadocob leceb madon, “Hina eetanu kobil eu odi odigem? Ija hina adi oso cahulhem eunu hina culumen ben i ijaca ijana dana cajaca ege gemo migem? Kobil eu odi odom eu hina qee oditoum. <sup>10</sup> Celnu eu odi odom?” don.

\* 19:22: “Soa” uqana gug eu “nag.” † 19:37: “Moab” uqana gug eu “meinadec.” ‡ 19:38: “Ben-ami” uqana gug eu “gainina melah.”

<sup>11</sup> Odocob Ebrahim uqa madon, "Dana jobon enedec age Anutnu qee cucuiegina. Eunu age ija aideni ocnu qagatogagan ec odi cisdom. <sup>12</sup> Qa Sera uqa ija cebinami eu mele bahic. Ele memile osolnadec qa ele anile eu filfil. Odocob ija uqa aideninu om. <sup>13</sup> Saen ija meina jona bibiligin Anut uqa oditeceb mahamaha loldudu cocobi bilig Sera edi madom, 'Hina ijanu nalunin mec eu i edi ihactoga. Anaana belewan eu hina ijanu uqa ija cebinami ec madagale,' dom," odi madon.

<sup>14</sup> Odocob Abimelek uqa Sera ceseli suldocob Ebrahimca len. Odimei sipsipca bulmakauca cabi dana cajaca ha cedadi ahu Ebrahim uten. <sup>15</sup> Odimei Abimelek uqa Ebrahim madon, "Maha fagana eu ijana maha. Hina maha ina ana biledannuhi hinana gawecna biligale," don. <sup>16</sup> Odocob Abimelek uqa Sera odi madon, "Ija qaig uqana ameg eu 1000 silwa eu odi cebinem wele utiga. Eu gadac oso. Agena sihul cunug hinaca biledina age hina silalca qee doqagan eunu gadac," don.

<sup>17-18</sup> Aria Tibud uqa Sera Ebrahim aidegnu caja cunug Abimelekna jona biledina eu wawaga meniaden. Eunu Ebrahim uqa Anut inondocob Abimelek uqa me men. Uqa aidegca uqana cabi cajaca eu wawaga jic hudiaden. Odocob age mel haun basecnu ihoc.

## 21

### *Sera Aisak basen*

<sup>1</sup> Aria Tibud uqa Seranu maden eu dahig bilen. Eunu uqa Seranu je wele qel qeti maden eu toodu odon. <sup>2</sup> Saen Ebrahim uqa toia cocobon Sera uqa waugca mimei mel oso basiton. Euqa Anut saen gadac menna mel basiton. <sup>3</sup> Odocob mel Sera basiton eu Ebrahim ijan Aisak qon. <sup>4</sup> Deel eben naha gic lecisca hedocob Ebrahim uqa melah Aisak deweg gaga quton. <sup>5</sup> Aria Sera uqa Aisak basen saen euna Ebrahim uqana cabi gel eu 100 gadac. <sup>6</sup> Odocob Sera uqa maden, "Anut uqa oditen eunu ija celeboigina." \* Dana cunug ija celeboigina dah moqagaqa eu ageha ija gami celeboeqan. <sup>7</sup> In uqa Ebrahim odi madoub, 'Sera uqa mel basimei su utigian,' doub? Euqa uqa toia bibilen ija melah basituga," en.

<sup>8</sup> Odocob mel eu meca mimei su jec culen. Odocob deel euna himec Ebrahim uqa mel sim eunu ja qon.

### *Ebrahim uqa Hega Ismalca ititacalen*

<sup>9</sup> Aria deel osona Ismal Isipdec caja Hega uqa Ebrahim basiton eu uqa Sera melah, Aisak, bulamdon Sera uqa fen. <sup>10</sup> Eunu Sera uqa Ebrahim madon, "Cabi caja eu uqa melahca ititacalecem belesia. Cabi caja eu uqa melah hina cehewain ija melami Aisaknu muguh biligian eu qee cesawi oiaun," don.

<sup>11</sup> Qa Ismal uqaha Ebrahim melah. Eunu Ebrahim uqa Serana je eu dumei uqa waug culumen don. <sup>12</sup> Odocob Anut uqa Ebrahim madon, "Hina hinana cabi caja uqa melahca alenu cain jaen qihiaun. Aisak uqana sihulna eu hinana sihul mele bahic. Eunu eeta Sera mahena eu toodu odoga. <sup>13</sup> Cabi caja melah uqaha ija odocomin uqana sihul eu sihul ben oso caloqagan. Uqaha hina melem," don.

<sup>14</sup> Odocob deel oso euna Ebrahim uqa qasil bahic cajimei sabca wa leih dool ganacna tacec eu cedadimei uton. Odimei uqa mel Hega qatona mitumei suldocob nuen. Odocob uqa nuimei Biasiba wadau waca qeena lili huhu i cobon. <sup>15</sup> Odi cocobon wa dool ganacna eu qee men. Odocob uqa mel ehi li na nag oso salafuna muden. <sup>16</sup> Tawimei cocobi li bilen. Eu onoca qee. Uqa maden, "Ija mel cal memeb cain figaun," en. Uqa ono bibilei co suli umei qajen.

<sup>17</sup> Odocob Anut uqa mel qaqajen dah men. Odocob Anutna ensel saonadec Hega utadudu madon, "Hega, eetanu qajagana? Cain cucuiaagan. Anut uqa mel eu odi qaqaji ninijen wele dah meia. <sup>18</sup> Cajaga. Mel eu eben umeg cesuldocom cajeia. Ija odocomin mel eu uqana sihul eu sihul ben oso caligian," don. <sup>19</sup> Odocob Anut uqa ameg fogo dutocab wa tut oso fen. Odimei uqa limei wa eu dool ganacna wetimei mel uteceb jen.

<sup>20</sup> Aria Anut uqa ameg mel eu cofdodon ben men. Ben memen uqa Paran agena wadauna bilen. Odocob uqa qali dana calen. <sup>21</sup> Odocob uqa anag Isipdec caja oso uton.

### *Ebrahim Abimelek bal cehec je madesin*

<sup>22</sup> Saen euna Abimelek uqa uqana han dana ilo, ijan Fikol, uqaca belimesi Ebrahim madon, "Hinana odoc cunugna Anut hinaca bilia. <sup>23</sup> Hina Anut amegna qel qetec je oso madaga. Ija Abimelekca uqana melca uqana sihulca qee quaudigaun ec odi madaga. Ija kobil me bahic odihem. Eunu qel qetec madaga. Ija Abimelek uqana dana cajaca ija gemo biligina euca kobil me bahic odadigen ec madaga," don.

<sup>24</sup> Odocob Ebrahim uqa madon, "Hina mataga eu ija toodu odigen," don.

\* **21:6:** "Ija celeboigina." Aisak ijan gug eu "uqa asalena."

<sup>25</sup> Qa Abimelek ugana cabi dana age Ebrahim ugana wa tut oso cawaludein. Eunu Ebrahim uqa Abimelek gonagona mudon. <sup>26</sup> Odocob Abimelek uqa madon, “Indec odea eu ija qee dugina. Hina oso qee matelem. Ija je oso qee dolom. Qila himec eunu dugina,” don. <sup>27</sup> Odocob Ebrahim sipsipca bulmakauba cedadime Abimelek uten. Odocob ale bal cehec je madi cagasin. <sup>28</sup> Odimei Ebrahim uqa sipsip nag cufunec eben naha gic lecisa cedadime abes meaden. <sup>29</sup> Odocob Abimelek uqa Ebrahim sisildon, “Sipsip cufunec i age abes madaga eu eetanu odoga?” don.

<sup>30</sup> Odocob Ebrahim uqa madon, “Hina sipsip nag eben naha gic lecisa cedadaga. Cedadecemfi Ebrahim uqa wa tut i hunen oqagan,” don. <sup>31</sup> Eunu cudun eu ijan Biasiba<sup>†</sup> ein. Dana lecis ale cudun euna bal cehec je madi cagasin eunu.

<sup>32</sup> Aria ale Biasiba ono bal cehec je madi cagocobil Abimelek uqa ugana han dana ilo Fikolca cajimesi Filistia agena mahana ceseli belesin. <sup>33</sup> Eu hedocob Ebrahim uqa na oso, ijan tamaris, Biasiba ono cehen. Odimei uqa Tibud Anut Bilec Catanec binan sulen. <sup>34</sup> Aria Ebrahim uqa odi odimei saen cecelac Filistia mahana bilen.

## 22

### Anut Ebrahim Aisak ihandocnu ec madon

<sup>1</sup> Aria hibna saen osona Anut uqa Ebrahim temdon. Uqa madon, “Ebrahim!” don. Odocob Ebrahim uqa jejeg hewi madon, “Ija i hen,” don.

<sup>2</sup> Odocob Anut madon, “Hina melem osahic himec, Aisak, eu hina ugana nalug magana eu ehudecem Moraia hatuna belesia. Odimeg ono aluh oso ija ihachigenna hina mel eu ihantaga,” don.

<sup>3</sup> Odocob qasil bahic Ebrahim uqa cajimei ugana cesel saciadumei ja ihanecnu ha qatani sogen. Odimei uqa ugana cabi dana haun lecisa uqa melah Aisakca ehadeceb age cudun Anut madon euna belein. <sup>4</sup> Bebelegin deel hedocob Ebrahim uqa ameg suli umei cudun Anut madon eu onoca ninijen fen. <sup>5</sup> Odimei Ebrahim ugana cabi dana haun eu maalen, “Ale ceselca ene bibilebil ija melca ele ono belewan. Ele ono cuha fimeu aleca haun ceseli howan,” alen.

<sup>6</sup> Odocob Ebrahim ihanecnu ja sogenca umei melah Aisak qatona men. Odimei uqa ebenna ja cijec jaca sigenca cedali hewen. Odocob ale osoben cocobi belesin. <sup>7</sup> Ale odi cocobi bebeli bilesi Aisak uqa memeg Ebrahim madon, “Mei!” don.

Odocob Ebrahim uqa jejeg hewi madon, “Melami, ija i hen,” don.

Odocob Aisak uqa sisildon, “Faga. Ja cijec jaca i hen. Qa sipsip ihanecnu eu ai?” don.

<sup>8</sup> Odocob Ebrahim jejeg hewi madon, “Melami, Anut uquadodoc sipsip ihanecnu iligan,” don. Eunu ale osoben haun cocobi belesin.

<sup>9</sup> Belimesi ale cudun Anut madon euna calesin. Ebrahim ono ihanec meen cabal gualen. Odimei ja sogenca meen cabal tatacan men. Eu hedocob uqa melah Aisak jaih ebenga libimei ja tatacan muden. <sup>10</sup> Odimei Ebrahim uqa eben leceb melah qogia bili sign on. <sup>11</sup> Qa Anutna ensel uqa saonadec utadudu madon, “Ebrahim, Ebrahim!” don.

Odocob Ebrahim uqa jejeg hewi madon, “Ija i hen,” don.

<sup>12</sup> Odocob ensel uqa madon, “Hina eben eu mel eu oso cain qududoiaun. Hina ceteh oso cain odudogaun. Hina Anutnu cucuiagana qila ija dugina. Hina melem osahic himec eu ija ihanecnu qee cahacdolom,” don.

<sup>13</sup> Odocob Ebrahim uqa falicdu meciimei hibilohu isec sipsip manahal oso ugana tub cullisna hagawen tatawen fen. Odimei uqa li sipsip eu on. Uqa umei uqa melah cudunna sipsip eu ihanen. <sup>14</sup> Odimei Ebrahim uqa cudun eu ijan “Tibud Uqa Igigan,” qon. Eunu qila saen ina odi madegina, “Tibud ugana aluhna uqa igigan,” egina.

<sup>15</sup> Odocob Anutna ensel saonadec Ebrahim haun utadudu <sup>16</sup> madon, “Tibud uqa odi madena, ‘Ija Tibud. Ija ijanina qel qetec je oso migen. Hina melem osahic himec ija ihanecnu qee cahacdolom eunu mele bahic ija hina eelhigen. <sup>17</sup> Odimig ija odocomin hinana sihul mati bahic fulusdoqagan. Euqa malaqa saona nijiaca lanna cesic nijiaca eu odiwe caloqagan. Odocobil hinana sihul agena cad aqadoqagan. <sup>18</sup> Hina ijana je toodu odoga. Eunu mahamaha hatu cunug eeladigen eu odiwe hinana sihul eeldugen,’ ena,” don.

<sup>19</sup> Odocob Ebrahim Aisakca ale ceseli ugana cabi dana haun bilesin euna calesin. Eunadec age cajimeig osoben Biasiba belein. Aria Ebrahim uqa ono bilen.

### Nehona sihul

<sup>20</sup> Aria saen osona Milka, uqa Noho aideg, mel basaden eu Ebrahim dah men. <sup>21</sup> Mel matu eu ijan Us. Uqa waliagul ijanaga eu Bus, Kemuel, <sup>22</sup> Kesed, Haso, Pildas, Jitlap,

<sup>†</sup> **21:31:** “Biasiba” ugana gug eu “je cagocna wa tut” fo “eben naha gic lecisa doc wa tut” fo.

Betuelca. Kemuel uqa Aram memeg.<sup>23</sup> Betuel uqa Rebeka memeg. Mel eben naha gic ijedca eu age Milka uqa Neho basaditon. Neho uqa Ebrahim waliag.<sup>24</sup> Reuma uqa Nehona cabi caja oso ugaha mel basaditon. Ijanaga eu Teba, Gaham, Tahas, Makaca.

## 23

*Sera cal meceb Ebrahim hel cisec cudun oso fajen*

<sup>1</sup> Sera ugana mahana coboc cabi gel eu 127. <sup>2</sup> Odocob uqa Kenan mahana Hebron ono cal men. Odocob Ebrahim Seranu uqa me qadac qajen.

<sup>3</sup> Odocob Ebrahim uqa aideg deweg ganac nijen cudun eu culdimei dana Hetna sihul eundecca nuimei maaden,<sup>4</sup> “Ija dana jag. Ija age gemo loldudu cobigina. Aideni hel cisigennu age maha oso idadecnu culiteiga,” aden.

<sup>5</sup> Odocob age jejeg hewi madoin,<sup>6</sup> “O eguna ben dah migigale. Ege gemo hina king melah cinigwe. Eunu hinana gawecna cel meen hatin eu gale hena euna hina aiden deweg ganac hel cisigale. Egena meen hatinnu oso qee cahachoqaun,” doin.

<sup>7</sup> Eunu Ebrahim uqa cajimei age amagana jogoen. <sup>8</sup> Odocob Ebrahim uqa odi maaden, “Age ija maha ene ijana caja deweg ganac hel cisecnu cois toqaganfi age Efron, Soha melah, ija coni umeig maduteiga.<sup>9</sup> Eu odi maduteiga, ‘Ebrahim uqa Makpela meen hatin fajecnu gale dona. Makpela meen hatin eu hinana cabi cemenug nijia. Uqa fajecnu coisfo? Meen hatin eu fajecnu ameg cunug ihigian. Euqa ugana qalqal biligian. Eu fajecnu eu ege amigena odigian,’ odi maduteiga,” aden.

<sup>10</sup> Odonqa Efron uqa ugana dana age taun cebecna gabandoi bibilegin uqa age gemo bibili bileyi cunug dah memegin uqa Ebrahim madon,<sup>11</sup> “Ijana ben, qeo. Dah mitiga. Ija cabi eu ihigina. Meen hatin cabi euna nijia euha ihigina. Dana caja melamagail amagana ihigina. Aideni deweg ganac euna hel cisiga,” don.

<sup>12</sup> Qa Ebrahim uqa haun maha eunadec dana cajaca amagana jogoen. <sup>13</sup> Odocob age amagana uqa Efron madon, “Hina dah mitigale. Ija cabi eu ugana ameg ihigen. Hina cabi eu ameg ocom ija aideni deweg ganac euna hel cisigen,” don.

<sup>14</sup> Odocob Efron uqa Ebrahim jejeg hewi madon,<sup>15</sup> “O ijana ben dah mitiga. Cabi i ugana ameg eu silwa 400 eu odiqa hina eunu Cain cisdogaun. Eunu aiden euna hel cisiga,” don.

<sup>16</sup> Odocob Ebrahim uqa Efronna je dah mimei uqa meen qaig 400 silwa eu odi saniimei uten. Meen qaig ameg eu Ebrahim uqa wele dana cajaca Het sihuldec amagana maden. Ebrahim uqa idadec doc dana cinigwe meen qaig eu sanien.

<sup>17</sup> Eunu idadec jicna bahic Ebrahim uqa Makpela ono, eu Mamri cemenug, faji on. Cabica meen hatinna cunug cabi euna tawein euca uqa faji on.<sup>18</sup> Eunu Het dana age taun cebecna cegulein bibilegin age amagana Ebrahim uqa cabi faji on.<sup>19</sup> Eu cunug hedocob Ebrahim uqa aideg Sera meen hatin cabi euna nijia ono hel cisen. Cabi eu Makpela ono Mamri cemenug nijia eu Kenan hatuna nijia.<sup>20</sup> Eunu cabi meen hatinca eu Ebrahim faji on. Euqa idadec jicna Het melahul ebenege nadec qalqalnu faji on.

## 24

*Age Aisakna caja oso walein*

<sup>1</sup> Aria Ebrahim uqa wele toia men. Uqa bibilen cabi gel mati bahic nuen. Ceteteh cunug uqa odon eu Tibud uqa eeldon.<sup>2</sup> Odocob Ebrahim uqa ugana cabi dana matu eu ugana cabi cunugnu ilo eu madon,<sup>3</sup> “Hina ebein ija tucumi gemo mimeg qel qetec je oso madaga.\* Anut uqa saonaca mahananca Tibud bilina, hina uqa amegna qel qetec je madaga. Hina melaminu Kenan sihulnadec caja oso qee u togaun.<sup>4</sup> Qa hina nuimeg caja ijana hatunadec euqa ijana sihulnadec oso u ija melami Aisak uqa aidegnu u togan,” don.

<sup>5</sup> Odocob cabi dana uqa sisildon, “Caja eu maha ina tooti hocnu culecebf ija adi odigen? Hina melem ehudi ceseli nui maha hina homnadec euna mudigenfo?” don.

<sup>6</sup> Odocob Ebrahim uqa jejeg madon, “Batut fagale! Ija melami ono Cain ehudi lagaun.

<sup>7</sup> Anut uqa saonadec Tibud, uqa ija meina jonadec ehit. Odocob ija meina joca maha ija cali hom euca culem. Odocob uqa bal cehec je matimej je hahun i maten, ‘Maha i hinana sihul adigen,’ ten. Eunu Anut uqa ugana ensel aquni suldocob jic qahihiqian. Odocob hina ija melami ugana caja onodec u togan.<sup>8</sup> Qa caja eu hina toohecnu culecebf iina Anut amegna eu odi odigen aga eunu hina dewenna jeca qee. Qa ceteh oso ija melami ono Cain ceseli ehudi lagaun,” don.<sup>9</sup> Eunu cabi dana eu uqa eben Ebrahim tucuh gemo mimei Ebrahamna je eu toodoo odigen en.

\* 24:3: “Hina ebein ija tucumi gemona mimeg.” ugana gug eu odi. Qel qetec je eu gaidgaid nijigian.

<sup>10</sup> Odocob cabi dana eu ugana ben ugana kamel 10 cedadimei nuen. Uqa ceteteh me me leihha ugana ben ebennadec cedimei nuen. Uqa cajimei Noho ugana taun eu Mesopotemia hatuna nijia ono nuen. <sup>11</sup> Uqa niji u nui wesu memen uqa Noho ugana taun gesacna wa tutna calen. Odocob uqa kamel odadeceb gob qahi bilein. Saen eu caja agena wa wetec saen. <sup>12</sup> Odocob uqa Tibud Anut inondudu maden, “O Tibud Anut hina ijana ben Ebrahim ugana Anut, ijana ben Ebrahim hinana kobol me bahic ihacdoga. Cabi i odocomin tutuc caligiannu cesultaga. <sup>13</sup> Faga. Ija wa tut gesacna tatawigin taunnadec mel aid age wa wetoqagannu hogina. <sup>14</sup> Ija caja oso madocomin, ‘Hinana halon mahana toni mimesg ija wa gab oso itiga,’ docomin uqa odi matecebf, ‘Wa gab jejem ija hinana kamelha wa adigen,’ tecebf mel aid eu ijana ben Aisak aidegnru camasac muditiga. Hina uqi odi odocomfi hina ijana ben kobol me bahic ihacdogan ija dugen,” don.

<sup>15</sup> Uqa inondudu qee hedoc Rebeka uqa wa halon qatona bibilen cali hon. Rebeka uqa Betuel ateg. Betuel uqa Noho Milkaca ale melamala. Noho uqa Ebrahim waliag. <sup>16</sup> Rebeka uqa caja taula olaca euqa uqa dana osoca qee nijelesin. Uqa wa tutna numei wa weti hedumei haun ceseli ben.

<sup>17</sup> Odocob Ebrahanna cabi dana uqa mahucwe bahic guguli gulucdugiannu len. Odimei uqa madon, “Hina hinana halonnadec wa nag itecem jecnu coiso?” don.

<sup>18</sup> Odocob uqa madon, “Ijana ben gad wa gab jaga,” don. Odi madudu bileyi uqa mahuc bahic wa halonca qatonadec u ehi ni ebenna hewen. Hewimei uqa uteceb wa gab jen.

<sup>19</sup> Uqa wa gab ji hedocob madon, “Ija hinana kamelha wa adecemin ihoc jecebil gadacna culigen,” don. <sup>20</sup> Odocob uqa mahuc bahic wa halonna eu basecdocob dool agena wa gab jec bohna non. Odimei haun guguli ceseli nu wa tutna wa weti ehi bi haun basecdon. Uqa eu odi dih oodon kamel wa ihoc jecebile culen. <sup>21</sup> Eu oodon Ebrahim ugana cabi dana uqa jeca qee mecidudu cisdon, “Tibud uqa kobol me bahic Ebrahim ihacdonaf qeefo?” en.

<sup>22</sup> Odocob kamel wa ji hedocobil dana eu uqa dahof oso eu golna mudec umei Rebeka medena men. Uqaha sai lecis eu golna mudec cedalimei Rebeka ebenna men. <sup>23</sup> Odimei uqa sisildon, “Hina indec ateg? Hina memenna jona ege us nijechni cudun ihocfo?” don.

<sup>24</sup> Odocob uqa jejeg hewi madon, “Ija Betuel ateg. Betuel uqa Noho Milkaca melamala.

<sup>25</sup> Egena jona dool us nijechni gigi galalecca sabca ihoc bilia. Hina us nijechni cudunha ihoc bilia,” don.

<sup>26</sup> Odocoh dana uqa gob cehimei mahana jogoen. Odimei uqa Tibud binan susuli <sup>27</sup> maden, “Tibud binan wasi nuiiale. Uqa ijana ben Ebrahim ugana Anut. Uqa ijana ben kobol me bahic odudia. Uqa qee quadol. Uqa ija dado mimiten hu ijana ben uqa waliagna jona caliga,” en.

<sup>28</sup> Odocob caja eu uqa guguli limei uqa anagna jona calimei ugana tal ceteteh eunu maaden. <sup>29-30</sup> Odocob Rebeka uqa cebinag Leban je eu madudu bileyi dahofca saica ihacdocab fen. Odocob Leban uqa guguli cali limei wa tutna nuen. Odimei uqa dana eu ono kamel gami tatawegin fimei <sup>31</sup> madon, “Ijaca belowa. Anut hina eelheia. Hina maha gemo odi cain tawagaun. Ija jo wele saciaduga. Hinana kamel agena cudunha wele saciaduga,” don.

<sup>32</sup> Eunu Leban uqa dana eu ehudi jona len. Odimei uqa ugana ud kamel homoganadec cedi mahana men. Odocob uqa gigi galalecca sabca kamel agena ahu aden. Odimei uqa dana euca leih uqa gami hoin euca jaimiga cusuqagannu wa ahu aden. <sup>33</sup> Odocob sab jecnu ahu mitoin. Mitocobil uqa maaden, “Ija sab mahuc qee jigaun qa je maadigen huga eu casac maadi hedumig ija sab jigen,” aden.

Odocob Leban uqa madon, “Cois, magaga,” don.

<sup>34</sup> Odocob uqa maaden, “Ija Ebrahanna cabi dana. <sup>35</sup> Tibud uqa ijana ben Ebrahim ben bahic eeldon. Eunu uqa cehewanca bahic calen. Uqa sipsip amca meme amca bulmakau amca silwaca golca cabi danaca cabi cajaca kamelca ceselca uto. <sup>36</sup> Aria Sera ijana ben uqa aideg ijana ben mel oso basiton. Euqa toia cocobi lili basiton. Odocob ceteteh cunug Ebrahim uqa melah Aisak muguh eu uto. <sup>37</sup> Aria ijana ben oditeceb ugana je toodugennu qel qetec jena madem. Uqa maten, ‘Hina ija melaminu Kenan hatunadec caja oso Cain u togaun. <sup>38</sup> Qa nuimeg ija mei ugana jobon medeh ugana sihulnadec caja oso ija melami aideg biligiannu u ahu toga,’ ten. <sup>39</sup> Odocob ija ijana ben sisildom, ‘Caja ija qee tootecebfi ija eeta odigen?’ dom. <sup>40</sup> Odocob uqa jejeni hewi maten, ‘Tjana Tibud, uqa amegna ija cobigina uqa ugana ensel suldochob hina cesulheceb cabi eu ocom ihoc ligian. Odocob hina ija melami ugana caja eu ija meina jobon medehnadec euga ugana sihul eundec oso ahu togan. <sup>41</sup> Hina eu odi oodom ijana sihul gulucadecem age caja eu qee ihecebifilji jic eu himec qel qetec je eu qee migian,’ ten.

<sup>42</sup> Eunu ija qila wa tutna humig edi inondudu madiga, ‘O Tibud Anut, hina ijana ben Ebrahim ugana Anut, cabi i odocomin tutuc caligiannu cesultaga. <sup>43</sup> Faga. Ija wa tut gesacna tawigina. Caja taula oso wa wetiannu hohob ija madugen, ‘Wa nag hinana

halonnadec gab jigennu coisfo?" dugen. <sup>44</sup> Odocomin uqa edi matecebfii, 'Cois wa gab jejem ija hinana kamelha wa adigen,' tecebfii caja eu ijana ben Ebraham melahnu nesilia ija dugen,' iga. <sup>45</sup> Odimeig ija wawina inondudu qee hedudugun Rebeka uqa wa halon qatona gahidumei hoia. Odimei uqa wa tutna wa wetecnu noia. Odocob ija maduga, 'Hina wa gab itecem jecnu coisfo?' duga. <sup>46</sup> Odocomin uqa mahucwe bahic wa halonca qatonaadec u ehi ni ebenna hehewi bili mateia, 'Gad gab jaga. Oodom ija hinana kamelha wa adigen,' teia. Eunu ija wa gab jjiggin uqa kamel wa adeia. <sup>47</sup> Odocob ija sisilduga, 'Hina indec ateg?' duga. Odocob uqa mateia, 'Ija Betuel ateg. Betuel uqa Neho Milkaca ale melamala,' teia. Odocob ija dahof oso medena miga. Odimeig sai lecis ebenna miga. <sup>48</sup> Odimeig ija gob cehimig jogoi bilih Tibud binan susuli ijana ben Ebraham uqana Tibud Anut eeldoc je maduga. Uqa ija jic tutucna dado miteceb ijana ben uqana sihulnadec age ataga oso uqa melah aidegnu gulucduga. <sup>49</sup> Eunu age je madiga inu, 'Coisfo qeefo?' teiga. Age ijana ben kobil me bahic ihacdodoig jic tutucna cesuldoqaganfo qeefo? Tutuc mateiga. Odocobilfi ija aisecnu nuigen eu dugen," aden.

<sup>50</sup> Odocob Leban Betuelca jejeg hewi madosin, "Mele bahic Tibud uqaene ehihi ahoia. Eunu ege jeca qee. <sup>51</sup> Rebeka i hen. Uqa umeg nuuga. Odocom uqa hinana ben uqa melah aidegnu biligian eu Tibud uqa ihacheia eu odi cultuquale," dosin.

<sup>52</sup> Odocobil saen Ebraham uqana cabi dana je eu dah mimei uqa Tibud amegna gob cehi jogoen. <sup>53</sup> Odimei uqa ceteteh silwaca golna mudec euca lotoc me bahicca cedimei Rebeka uten. Uqa ceteteh qaig bennadec Rebeka cebinagca anagca alen.

<sup>54</sup> Odocob uqaca dana uqaca hoin euca age sabca waca jejeig age witic eu ono us nijein. Cojageceb age qasil cajimeig dana eu maaden, "Culiteceb ilija ijana benca ceseli nuigen," aden.

<sup>55</sup> Odocob Rebeka cebinagca anagca ale madosin, "Caja eu culdecem ege gami deel 7fo 10fo odi bilimeb hinaca belowasan," dosin.

<sup>56</sup> Qa uqa maalen, "Cain cahacteceil daleigaun. Qa qila Tibud uqa cesulteceb ijana cabi me caleia. Eunu sultecebil ijana benca nuigen," alen.

<sup>57</sup> Odocob ale jejeg hewi madosin, "Caja eu utadumeb uqana gale docnu sisildocnu," dosin. <sup>58</sup> Eunu ale Rebeka utadumesi sisildosin, "Hina dana ica belowasanfo?" dosin.

Odocob uqa maalen, "Ija nuigen," alen.

<sup>59</sup> Eunu Rebeka suldocobil Ebrahamna cabi dana gami belein. Cabi caja Rebeka uqa simnadec cofldodon ben men euha uqa gami belein. <sup>60</sup> Bebelegin age Rebeka eeldoc je madudu madein,

"Ege cebinamige, hina mati bahic fulusdogale.

Hinana sihul agena cad aqimei lahaadi ititacadeiale," doin.

<sup>61</sup> Odocobil Rebeka uqa uqana cabi cajaca age cajimeig agena kamel toboin. Odimeig age dana tooadein. Eunu cabi dana uqa Rebeka umei niji u ceseli nuen.

<sup>62</sup> Aria Aisak uqa "Oso Cebac Bilina Uqa Mecitina Uqana Wa Tut," ceseli hon. Uqa wadau waca qee Kenan ono bilen. <sup>63</sup> Wesu osona uqa cocobi bili uqa cabina nuen. Odimei uqa ameg suli umei meciyen. Euqa uqa kamel hohogin meciaden. <sup>64</sup> Odocob Rebeka uqaha ameg suli umei meciimei Aisak fen. Odimei uqa kamel ohisdec tonimei <sup>65</sup> cabi dana sisildon, "Eu cel dana ege gulucgigliu cabina cocobi hona?" don.

Odocob cabi dana uqa madon, "Uqa ijana ben," don. Odocob uqa olanaga jahuldoc lotoc umei ola jahuldon.

<sup>66</sup> Odocob cabi dana uqa ceteteh cunug odon eu Aisak madon. <sup>67</sup> Odocob Aisak uqa Rebeka uqa aideg biligiannu ehudimei uqa anagna lotoc talah dunuh muden. Uqa Rebekanu ben bahic nalug men. Wele Aisak uqa anag cal men. Eunu uqa waloc don qa qila Rebeka Aisak anagna cudun on. Eunu uqa waug ceelen.

## 25

### *Ebrahamna sihul abesabes*

<sup>1</sup> Aria Ebraham uqa caja oso on. Uqa ijan eu Ketura. <sup>2</sup> Odocob uqa mel i age basaditon. Simran, Joksan, Medan, Midiana Isbak, Suaca. <sup>3</sup> Joksan uqa Siba Dedanca memela. Dedan melahul age dana sihul i age memega calein. Asur, Letus, Leumca. <sup>4</sup> Midian uqa melahul eu Efa, Efe, Hanog, Abida, Eldaca. Eu age cunug age Keturana sihul.

<sup>5</sup> Aria Ebraham uqana ceteteh cunug eu Aisak uten. <sup>6</sup> Qa uqana cabi caja eu uqa aideg cinigwe biloloig eu age melamaga ha Ebraham uqa ceteteh leih loo aden. Odimei uqa suladeceb age Aisak culdimeig maha cam tobi becna isec belein.

### *Ebrahim cal meceb hel cisein*

<sup>7</sup> Aria Abraham uqana cabi gel cunug gabandoc mahana bilen eu 175. <sup>8</sup> Uqa toia men. Uqana cabi gel mati bahic. Odocob uqa kis umei cal men. Uqa asagul cal mein eu agena cudunna nuen. <sup>9</sup> Odocob uqa melahul Aisak Ismalca ale Makpela eu Mamri cemenug meen hatinna deweg ganac hel cisesin. Makpela eu Efronna cabina nijen. Efron uqa Soha melah uqa dana sihul Hitdec. <sup>10</sup> Cabi eu Abraham uqa Hit dana ebeneganadec faj on. Aideg Sera hel ciseinna uqa ono hel cisein. <sup>11</sup> Abraham cal meceb Anut uqa melah Aisak eeldon. Aisak uqa “Oso Cebac Bilina Uqa Mecitina Uqana Wa Tut,” ono bilen.

### *Ismalna sihul*

<sup>12</sup> Aria je i eu Ismalna je. Ismal uqa Hega melah. Hega Isipdec uqa Serana cabi caja uqa Ismal Ebrahim basiton. <sup>13</sup> Ismal melahul ijanaga i edi. Age ijanaga eu toodocobtoodocob cali hoin eu odi nijen. Nebaiot uqa Ismal melah matu. Uqa melahul leih eu Keda, Atbil, Mipsam, <sup>14</sup> Misma, Duma, Masa, <sup>15</sup> Hedat, Tema, Jetur, Napis, Kedemaca. <sup>16</sup> Uqa melahul eu age jobon medeh 12 calein. Uqa melahul 12 age ijanaga eu jobon medeh ijanaga filfil qoin. <sup>17</sup> Aria Ismal uqana cabi gel cunug gabandoc mahana bilen eu 137. Odocob uqa kis umei cal men. Uqa asagul cal mein agena cudunna nuen. <sup>18</sup> Odocob uqana sihul age maha Hawiladec nuecib Sur gadac euna niji u coboloig. Sur eu Isip maha cam tobi becna isec eu Asiria jic nuecna nijen. Age maha euna isec cotigcotigca han cacadi niji u coboloig.

### *Rebeka Iso Jekobca basalen*

<sup>19</sup> Aria je i Ebrahim melah Aisak uqana je. <sup>20</sup> Aisak uqana cabi gel 40na uqa Rebeka on. Rebeka uqa Betuel ateg uqa Leban cebinag. Betuel uqa Aram dana uqa Mesopotemiadec. Leban uqaha Aram dana. <sup>21</sup> Aria Aisak uqa aidegnu Tibud inondon. Odocob Tibud uqa uqana inondoc eu dah mimei wadacdon. Odocob Rebeka uqa melca men. <sup>22</sup> Odon eu mel momodo lecis ale waugna niniji bilesi ale cadecwe mesin. Odocob Rebeka uqa maden, “Tibud uqa elena inondoc dah menfi celnu i edi oditina?” en. Eunu uqa Tibud sisildugia bili len.

<sup>23</sup> Odocob Tibud uqa madon,

“Mel lecis hina wawinna bilesia.

Hina basalecem ale fulusdumesi

sihul lecisna qatani filigandowasan.

Oso uqa gagadicca eu oso wooldugian.

Odocob matu eu milumna cabi dana biligian,” don.

<sup>24</sup> Odocob uqana basec saen hocob uqa mel gahca basalen. <sup>25</sup> Mel uqa casac cali hon eu bagic cacawac. Bagic eu golca. Eu dool deweg cinigwe. Eunu age ijan Iso\* qoin. <sup>26</sup> Uqa cali hocob uqa waliag toodoo cali hon. Uqa cali hon eu eben oso Iso jaiah bisoc hewimei cali hon. Eunu uqa ijan Jekob† qoin. Aisak uqana cabi gel 60na uqa aideg mel eu basalen.

### *Iso uqana muguh mec idaden*

<sup>27</sup> Aria mel lecis ale ben mimesi Iso uqa dool qoc gesis dana calen. Uqa bahu dana, uqa bahu njoloi. Jekobqa uqa malol dana, uqa jeca qee. Odocob uqa lotoc talahna himec biloloi. <sup>28</sup> Aria Aisak uqa dool cus Iso qoloi eu jecnu gale doloi. Eunu Isonu nalug moloi. Rebekaqa uqa Jekobnu nalug moloi.

<sup>29</sup> Deel osona Jekob uqa wehuc me bahic cilen. Odon Iso uqa bahudec hon. Uqa wen geh bahic dodon hon. <sup>30</sup> Odocob uqa Jekob madon, “Ija wenene qitina. Mahucwe macin wehuc golca eu itecem jiga,” don. Eunu age Idom‡ doin.

<sup>31</sup> Qa Jekob uqa madon, “Hina matu. Casac ceteteh hina mugum mec eu itiga ija ihigen,” don.

<sup>32</sup> Odocob Iso madon, “Coiso! Ija wele cal migen odigina. Eunu matu bilec eu cel me oso oditigian,” don.

<sup>33</sup> Odocob Jekob jejeg hewi madon, “Casac ija amina hinana matu bilec eu ija itigannu qel qeti mataga,” don. Odocob Iso eu odi toodooodon. <sup>34</sup> Odocob Jekob uqa bretca me macin wehucca Iso uteceb jen. Odimei Iso cajimei nuen. Eunu Iso uqa uqana matu bilec eu ceteh gauc cinigwe qelen.

## 26

### *Aisak uqa Gera bilen*

<sup>1</sup> Aria saen osona cahel saen me qee oso calen. Eu Ebrahamna saenna calen eu odi we haun calen. Eunu Aisak uqa Abimelek Filistia agena king Gera ono bilina uqaca nuen. <sup>2</sup> Wele Tibud uqa Aisakca camasac mimei madon, “Hina Isip cain nogau. Maha

\* 25:25: “Iso” uqana gug eu “bagicca.” † 25:26: “Jekob” uqana gug eu “jaiah bisoc” fo “quaudoc” fo. ‡ 25:30: “Idom” uqana gug eu “golca.”

ija mahigen euna biliga.<sup>3</sup> Maha ina nag odi biliga. Odocom ija hinaca biligen. Odimig ija eelhigen. Hinaca hinana sihulca ija maha i cunug adigen. Bal cehec je ija wele Ebrahimca madi cagoh eu ija hinaca ha madi cagowan.<sup>4</sup> Odimig ija hinana sihul eu odocomin age malaqa saona nijia eu odiwe caloqagan. Odimig hinana sihul eu maha i cunug adigen. Odocomin hatuhatu cunug hinana sihul jabjabna age ha eeldoc oqagan.<sup>5</sup> Ebrahim uqa ijana loo jeca cunug ija madom eu ha uqa toodu odon. Eunu hina eelhigen,” don.

<sup>6</sup> Odocob Aisak uqa Gera ono bilen.<sup>7</sup> Saen dana jobon eunadec age uqa aidegnu sisidocobil uqa ija cebinami ec maaden. Rebeka uqa caja jaca bahic. Eunu uqa odi cisdon, “Dana jobon inadec age Rebekanu ija qagatecebile cal migau,” en. Eunu uqa cucuiimei eu odi maaden.

<sup>8</sup> Aisak uqa ono bibilen gieceb saen osona Filistia agena king Abimelek uqa fufu oc cebecna meciimei Aisak uqa Rebeka deweg losdodon fen.<sup>9</sup> Eunu king Abimelek uqa Aisak utadocob leceb madon, “Faga. Uqa hina aiden! Eu adinu hina uqa ija cebinami ec matem?” don.

Odocob Aisak uqa jejeg hewi madon, “Uqanu ija qagatecebile cal migau imig odi mahem,” don.

<sup>10</sup> Odocob Abimelek madon, “Hina eeta odigiga? Ijana dana oso hina aidenca njoubmiga eu hinanu Anut ege wadacgoub,” don.<sup>11</sup> Eunu Abimelek uqa dana cunug je gagadic maaden, “Dana oso dana ifo uqa aidegfo quduallifei mele bahic qocomun cal migian,” aden.

<sup>12</sup> Aria Aisak uqa maha euna sab cehen. Odocob Tibud uqa eeldorf. Eunu cabi gel euna himec uqa sab eu wal meceb on eu mati bahic on. Uqa aig osol cehen eunadec aig 100 haun on. Eu odiodi on.<sup>13</sup> Odocob Aisak uqa cabi gaid odi oodon li uqa cehewan eu ben bahic men.<sup>14</sup> Uqa ceteh mati bahicca. Uqa sipsip, bulmakau, cabi dana amca. Filistia danaqa age uqana cehewan fecebil gale aden.<sup>15</sup> Eunu Filistia age wa tut hune uqa memegna cabi dana age Ebrahamna saenna hunein eu age eu cunug maha tacitaci belein.

<sup>16</sup> Odocob Abimelek uqa Aisak madon, “Hina eguna hatu culdimeg nuuga. Hina gagadicca. Hinana gagadic odoc eu egeca ihoc qee,” don.<sup>17</sup> Odocob Aisak uqa eunadec cajimei nui Gera maha asouna ono cudun hewen. Odimei uqa ono bilen.<sup>18</sup> Odocob wa tut uqa memeg Ebrahamna saenna hunadein eu Filistia age tacalein eu Aisak haun hunaden. Odimei wa tut eu uqa memeg Ebrahim ijanaga aqaden eu haun ijanaga aqen.

<sup>19</sup> Odocob Aisakna cabi dana age maha asouna wa tut oso hunein. Odimeig age wa fifi beben gulucdooin.<sup>20</sup> Eu hunein qa Geradec sipsip cofadec dana age Aisakna sipsip cofadec dana age wa tutnu gonagona mimeig maadein, “Wa tut eu eguna,” adein. Eunu Aisak uqa wa tut eu ijan “Gona Gona Mec” qon.<sup>21</sup> Odocob Aisakna dool cofadec dana age wa tut oso haun hunein. Odocobil eunu ha age gonagona madein. Eunu uqa eu ijan “Cadec” qon.<sup>22</sup> Odocob Aisak uqa cudun eu culimei ono wa tut oso hunen. Odonqa age wa tut eunu qee gonagona mudolein. Eunu uqa wa tut ijan “Jeca Qee” qon. Uqa odi maden, “Qila Tibud uqa cudun ihoc igia. Eunu ege maha ina danaca doolca cehewanigeca fulusdugian,” en.

<sup>23</sup> Odocob onodec uqa Biasiba ono ten.<sup>24</sup> Odocob witic euna Tibud uqaca camasac men. Odimei uqa madon, “Ija hina memen Ebrahim uqana Anut. Cain cucuiagaun. Ija hinaca biligina. Ija eelhimig odocomin hinana sihul fulusdugian. Euqa ijana cabi dana Ebrahimnu cisдумig odigen,” don.<sup>25</sup> Eunu Aisak uqa cudun euna ihanec meen cabal oso gualen. Odimei uqa Tibud binan sulen. Odocob uqa ono uqana lotoc talah cechen uqana cabi dana age wa tut oso hunein.

#### *Aisak Abimelekca qel qetec je madesin*

<sup>26</sup> Odon saen euna Abimelek uqaca uqana cisdoc utec dana Ahusatca ugana han dana ilo, Fikol, uqaca age Gera onodec Aisakca hoin.<sup>27</sup> Odocobil Aisak uqa sisiladen, “Age ija me qee oditein. Odimeig agena hatunadec ititactein. Eunu age celnu ijaca hoiga?” aden.

<sup>28</sup> Odocob age jejeg madoin, “Qila ege camasac doqona. Tibud uqa hinaca bilina ege doqona. Eunu ege odi cisdom, ‘Ege gemo gabandocnu je oso cagu madecnu euqa hinaca egeca gemonu madecnu,’ om. Qel qeti madecnu eu i edi madecnu.<sup>29</sup> Hina ege me qee qee odigigaun. Eu odiwe ege hina me qee mihecnu qee odi quduhilom. Egeqa gaid hina me eelhimib sulhocomun wawin malolca nuem. Qila Tibud hina eelhen eu camasac doqona,” doin.<sup>30</sup> Odocob Aisak uqa sab ben cilimei adecebe jein.<sup>31</sup> Odocobil qasil bahic cajimeig age qel qeti madein eu agedodoc age gemo madocbmadocob imeig Aisak uqa suladeceb wawaga malolca belein.

<sup>32</sup> Aria deel euna himec Aisak uqana cabi dana age humeig wa tut oso hunein eunu madoin, “Ege wa gulucdoqa,” doin.<sup>33</sup> Eunu uqa wa tut eu ijan “Qel Qetec” qon. Eunu

taun eu ijan Biasiba eu qila saen ina ha odi madegina. Biasiba je eu gug “Qel Qeti Madec Uqana Wa Tut.”

*Isona jab caja*

<sup>34</sup> Odocob Iso uqana cabi gel 40na uqa caja lecis Hetdec cedalen. Caja oso eu ijan Judit, uqa Beri ateg. Caja oso eu ijan Basemat, uqa Elon ateg. <sup>35</sup> Iso aidegul lecis ale Aisak Rebekaca wawala dain calec alolosi.

**27**

*Aisak uqa Isona eeldoc je on*

<sup>1</sup> Aria saen Aisak uqa toia memen uqa ameg wa hidon. Oodon uqa tutuc meciecwe qee. Saen euna uqa melah matu Iso utadudu madon, “Melami,” don.

Odocob uqa jejeg hewi madon, “Ija i hen,” don.

<sup>2</sup> Odocob Aisak madon, “Faga. Qila ija toia. Ija ijana cal mec deel eu ija qee dugina. <sup>3</sup> Qila hina hinana qalica gamedca cedimeg bahu nui dool cus aqi ahutuga. <sup>4</sup> Dool eu ahumeg wehuc jecnu tinca maga. Euqa ija gale tenana isec maga. Odimeg saciadu ahutecem jimig qee cal mec ninijeb ija eelhigen,” don.

<sup>5</sup> Saen Aisak uqa melah matu Iso madodon Rebeka uqa dah mudon. Eunu saen Iso bahu dool aqimei jobon hewi hocnu nunuen <sup>6</sup> Rebeka uqa melah Jekob madon, “Faga. Ija hina memen uqa walin Iso edi madodon duga. <sup>7</sup> Dool cus leih aqimeg wehuc jecnu tinca saciadu ahutuga. Odocom ija jimig qee cal mec ninijeb ija Tibud amegna eelhigen ec madodon duga. <sup>8</sup> Aria melami je ija mahigen. Eu dah mi cuhadumeg eu odi toodoo odoga. <sup>9</sup> Meme amnana bileiga euna limog meme nag oso jecnu me bahic lecis cedali ahutuga. Odocom ija wehuc jecnu tinca hina memen gale donana isec ija saciadugen. <sup>10</sup> Odocomin hina memen ehi litocom uqa jimei qee cal mec ninijeb hina eelhigan,” don.

<sup>11</sup> Odocob Jekob uqa anag jejeg hewi madon, “Faga. Ija wali Iso uqa bagic cacawac. Ijaqa deweni eu bagicca qee. <sup>12</sup> Ija mei uqa ija deweni tebandugiaqa ija cahuldugina eu dugian. Ija uqa amegna quaeq danawe caligen. Odocob uqa qee eelteiaun. Gelitigian,” don.

<sup>13</sup> Qa Jekob anag uqa madon, “Melami gelihec je ihecebfi eu ija ugen. Ija mahiga eu odi dih odoga. Nuimeg ceteteh ija mahiga eu cedi ahutuga,” don.

<sup>14</sup> Eunu uqa nuimei meme lecis cedalimei ahuton. Odocob uqa anag wehuc jecnu tinca uqa memeg gale donana isec saciadon. <sup>15</sup> Odimei Rebeka uqa melah matu Isona lotoc me bahic jona bilen eu cedimei uqa melah milum Jekob taciton. <sup>16</sup> Odimei uqa ebenga du jocosaigca eu meme ganacna jahuldukon. <sup>17</sup> Odimei uqa sab tinca bretca saciadon euha melah Jekob uten.

<sup>18</sup> Odocob Jekob uqa memegca humei madon, “Mei,” don.

Odocob uqa madon, “Ija i hen. Melami hina indec?” don.

<sup>19</sup> Odocob Jekob jejeg hewi madon, “Ija Iso, hinana mel matu. Ija hina mataga eu odi odiga. Caji bilimeg dool cus ija aqiga eu jaga. Odimeg hina ija eeltecnu ihoc,” don.

<sup>20</sup> Odocob Aisak uqa melah sisildon, “O melami, eu adinu dool cus eu mahuc bahic gulucadaga?” don.

Odocob Aisak jejeg hewi madon, “Tibud, hinana Anut, uqa cesultceebnu ija odi mahuc bahic odiga,” don.

<sup>21</sup> Odocob Aisak uqa Jekob madon, “O melami cemeni hocom ija dewen tebandugen. Euqa hina ija melami Iso bahicfo qeefo?” don. <sup>22</sup> Eunu Jekob uqa memeg Aisak cemenug len. Odocob uqa deweg tebandumei maden, “Jejein eu Jekob jejeg qa eben eu Iso eben,” en. <sup>23</sup> Odonqa Aisak uqa eu Jekob ec qee dol. Uqa eben eu bagic cacawac euqa uqa waliag Iso eben cinigwe. Eunu uqa eeldoc je utigia bili <sup>24</sup> uqa sisildon, “Hina ija melami Iso bahicfo?” don.

Odocob uqa jejeg hewi madon, “Ese, ija Iso,” don.

<sup>25</sup> Eunu Aisak uqa madon, “Ahutuga. Dool cus hina aqaga eu jimig ija eeldoc je ihigen ihoc,” don. Odocob Jekob uqa ahutocob uqa jen. Uqa wain leihha ahutocob uqa jen.

<sup>26</sup> Odocob Aisak uqa madon, “Melami cemeni hocom ija cotahigen,” don. <sup>27</sup> Eunu Jekob uqa cemenug leceb uqa cotadon. Oodi bilei uqa uqana lotoc cahug eu don. Eunu uqa eeldudu bilei maden, “Faga. Melami uqa deweg cahug eu cabi Tibud eeldon eu cahug cinigwe.

<sup>28</sup> Anut hina saonadec coi ihiale.

Uqaha sab me bahic mahanadec ihiale.

Macinca wainca geh bahic ihiale.

<sup>29</sup> Hatuhatu hina ewel uheheig hinanu jogoeigale.  
Hina cotinel agena ilo biligale.

Hina aninna sihul age hinanu jogoeigale.  
 Oso hina gelicheebfi Anut geludigian.  
 Oso hina eelheceebfi Anut eeldugian," en.

*Iso uqa Aisak eeldoc jenu sisildon*

<sup>30</sup> Aisak uqa Jekob eeldoc je madu hedocob uqa Aisak olanadec nunuen saen qee giec uqa waliag Iso dool cusnu gumu tonen eu hon. <sup>31</sup> Uqaha sab jecnu tinca saciadumei memegna hewi ahuton. Odimei uqa memeg madon, "Mei caji bilimeg dool leih ija quga eu jaga. Odimeg hina eeltec je mataga," don.

<sup>32</sup> Odocob Aisak uqa melah Iso sisildon, "Hina indec?" don.

Odocob Iso uqa jejeg hewi madon, "Ija hina melem matu, Iso," don.

<sup>33</sup> Odocob Aisak uqa gagadic bahic geleli maden, "Indec uqa dool qumei ija ahuteceb iiga? Ija jimir uqa eeldocomin qila bahic nunuen hina hoga. Euqa uqa eeldoc ugian ijom," don.

<sup>34</sup> Saen Iso uqa memegna je eu dah mimei uqa geh bahic gemagna isec qaqqaji memeg madon, "O mei, ija eeltaga. Ijaha eeltaga," don.

<sup>35</sup> Odocob Aisak uqa jejeg hewi madon, "Hina walin ijaca humei uqa qauteia. Hinana eelhec je eu wele umei nuia," don.

<sup>36</sup> Odocob Iso maden, "Uqa ijan Jekob\* eu ihoc bahic qoin. Jekob uqana gug eu quaec. Uqa ija qauti lecis don. Uqa ijana matu bielec eu on. Aria qila uqa ijana eeltec je eu oia," en. Odimei uqa sisildon, "Hina ijanu eeltec je oso culuga biliafo?" don.

<sup>37</sup> Qa Aisak uqa Iso jejeg hewi madon, "Faga. Ija uqa hinana ilo mudiga. Euha uqana cotugul eu uqana cabi dana madiga. Uqanu sabnuca wainnuca ija odi eeldoc je utiga. Uqana sabca wainca geh bahic calimei saen cecelac nijigian. Aria melami hinanu ija cel je oso madigen?" don.

<sup>38</sup> Odocob Iso uqa memeg haun sisildon, "O mei, hina eeldoc je osocofo? O mei ijaha eeltaga," don. Odi madodoi uqa qajen.

<sup>39</sup> Odocob uqa memeg jejeg hewi madon,  
 "Faga. Coi saonadec hinanu qee neiaun.  
 Hinana cabinadec sab me bahic qee caleiaun.

<sup>40</sup> Hinana bielec eu hina han seibulna cacadi bilegan.  
 Hinaqqa walinna cabi dana bilegan.  
 Odeganga hina fee dadaneesi

hina uqa ilo bielecnu qajudogan," don.

<sup>41</sup> Odocob Iso uqa Jekobnu gemag ben. Uqa memeg Aisak uqa Jekob eeldoc je uten eunu. Odocob Iso uqa cisdon, "Ija mei uqana cal mec deel eu dodoldona. Uqa cal meceb ija wali Jekob qocomin cal migian," en.

<sup>42</sup> Aria age Iso uqana je eu Rebeka madocobil dah mimei uqa Jekob utadocob hocob madon, "Hina walin uqa qagaheceb cal megannu cисдоң айыл мемеңи балыкадодук вауғ соадат көбөн." <sup>43</sup> Eunu melami jejeni dah maga. Odimeg mahuc bahic cajimeg busali cebinami Lebanca Haran nuuga. <sup>44</sup> Odimeg ono uqaca bielecem saen gieiale. Ono bibilem hina walin uqa gemag qee migian. <sup>45</sup> Uqa hinanu gemag qee meceb hina odudem eunu dahig celeceb ija je suldochomin hina onodec ceseli hogan. Qeefi melamiel ale qocobqocob imesi deel osolna cal mowasindain," don.

*Aisak uqa Jekob suldoch Lebanca nuen*

<sup>46</sup> Odocob Rebeka uqa Aisak madon, "Isoma Hitdec caja eu alenu alal tena. Jekob uqaha Hitdec caja oso uqa aidegny ocobfi euqa ijana bielec mahana eu ihoc qee caleiaun," don.

## 28

<sup>1</sup> Odocob Aisak uqa Jekob utadocob hocob eeldudu je gagadic madon, "Hina Kenandec caja cain ogaun. <sup>2</sup> Cajimeg Mesopotemia hina asin Betuel uqana guc ono nuimeg hina memen Leban uqa ategul eundec oso hinana cajau oga. <sup>3</sup> Anut Gagadicca Bahic hina eelheiale. Odimei uqa odocob hinana sihul eu mati bahic caligian. Hinana sihul hatuhatu mati bahic caloqagan. <sup>4</sup> Uqa Ebraham eeldon eu odiwe hinaca hinana sihulca eeladigian. Euqa maha i Anut uqa Ebraham uton eu hina biliga eu ogaan," don. <sup>5</sup> Odocob Aisak Jekob suldoch uqa Lebanca Mesopotemia onoca nuen. Leban uqa Betuel melah. Ale Aram dana. Leban uqa Rebeka cebinag. Rebeka uqa Jekob Isoca anala.

*Iso uqa caja haun oso on*

<sup>6</sup> Aria Iso uqa Aisak Jekob eeldudu je eu madumei caja oso ocnu suldoch Mesopotemia nuen don. Aisak uqa je odi Jekob madon, "Hina Kenandec caja oso cain ogaun," ec

\* <sup>27:36:</sup> "Jekob" uqana gug eu "jaih bisoc" fo "qaudoc" fo.

madodon Iso uqa don. <sup>7</sup> Jekob uqa memeg anagca conola toodumei Mesopotemia nuen euha Iso uqa don. <sup>8</sup> Odocob Iso uqa memeg Aisak Kenandec caja ocnu waug qee njel eu fen. <sup>9</sup> Eunu uqa Ebraham melah Ismalca nuimei caja haun oso, ijan Malahat, on. Malahat uqa Nebaiot cebinag. Euqa uqa caja casac cedalen eu qee ititacale.

### *Jekob Betel ono bebelen*

<sup>10</sup> Aria Jekob uqa Biasiba culimei Haran isec nuen. <sup>11</sup> Uqa nunuen cam casi leceb cudun osona witic meceb us nijigiannu bilen. Odocob uqa eunadec meen oso umei ilona tet qumei cosoli njien. <sup>12</sup> Odocob uqa us ninjiei bebelen. Uqa bebelii edi fen. Wadowad oso naha eu mahana qudoc naha eu ti sao qududoc fen. Wadowad euna Anutna ensel age wadowad eu tobi toni eegin meciaden. <sup>13</sup> Odon eu uqa Tibud cemenug tatawen fen. Odocob uqa madon, "Ija Tibud, ija Ebraham Aisakca alena Anut. Maha hina nijiga eu ija hinaca hinana sihulca adigen. <sup>14</sup> Hinana sihul euha age mati bahic caloqagan. Age maha bobos cinigwe caloqagan. Odimeig maha hagen cunug ihoc loqagan. Hinaca hinana sihulca agenu dana sihul cunug mahana biluqagan eu eeladec oqagan. <sup>15</sup> Aria faga. Ana nuegan eu ija hinaca belewan. Bebeleu ija cofhigen. Euha ija maha ina ceseli ahu mihigen. Ija hina qee culihigaun. Ija hinaca bibilig li je cunug mahiga eu odigen," don.

<sup>16</sup> Odocob Jekob us nijecnadec seli cajimei maden, "Mele bahic, Tibud uqa cudun ina bilia eu ija qee dolom," en. <sup>17</sup> Odimei uqa cucui maden, "Cain. Cudun i cucuianca bahic. Mele bahic i Anutna jo. I sao cebec," en.

<sup>18</sup> Eunu Jekob uqa qasil bahic cajimei meen uqa tet qu njien eu umei dahig biligiannu gadac cehen. Odimei Anut utecnu mool meen eu tatac basecdon. <sup>19</sup> Odocob uqa cudun eu ijan Betel\* qon. Weleca taun oso cemenug nijoloi eu ijan Lus. <sup>20</sup> Odocob Jekob uqa Anut amegna je cagumei edi madon, "O Tibud, hinaca belimeu ija jicna coftetab sab jecnuca lotoc tacecnuca itiga. <sup>21</sup> Odimeg haun coftetem ija ceseli nui ija meina jona caligen. Hina odi odifeg hina ijana Anut bilegan. <sup>22</sup> Meen i ija cehiga eu Anutna cuha fecnu cudun caligian. Ceteteh cunug hina itegan eu ija am 10na ila mimig am osahic eundec ceseli ihigen," don.

## 29

### *Jekob uqa Lebanna gun calen*

<sup>1</sup> Odocob Jekob haun caji nuen. Uqa nuimei cam tobi bec dana agena mahana calen. <sup>2</sup> Uqa ono calimei wa tut oso fen. Wa tut eu cemenug sipsip am ijed wa tut eu gesacna ninijegin meciaden. Age wa tut eunadec wa adecebil joloig. Aria meen wa tut eu cufa qoc eu ben bahic. <sup>3</sup> Saeri sipsip cunug cegulecebil sipsip cofadec age meen wa tut ameg qoc eu qosocdumeig wa adecebil joloig. Odimeig meen eu haun ceseli wa tut ameg qoloig.

<sup>4</sup> Odocob Jekob uqa sisiladen, "O cotiel age anadec?" aden.

Odocob age jejeg hewi madoin, "Ege Harandec," doin.

<sup>5</sup> Odocob uqa sisiladen, "Age Noho asag Leban uqanu doginafo?" aden.

Odocob age jejeg hewi madoin, "Ege uqanu doqona," doin.

<sup>6</sup> Odocob uqa sisiladen, "Uqa me biliafo?" aden.

Odocob age jejeg hewi madoin, "O uqa me bilia. Faga. Uqa ateg Resel uqana sipsip amca hogina," doin.

<sup>7</sup> Odocob uqa maaden, "Feiga. Qila cahineg eu sipsip gelna madec saen qee. Sipsip wa adimeig ehadi nu gigi jec cudunna madeiga," aden.

<sup>8</sup> Odocobqa age jejeg hewi madoin, "Ege eu odi mahuc odocnu qee njel. Casac sipsip cunug hu gabandocobil meen wa tut conadec qosocdumeb wa adoqonanu," doin.

<sup>9</sup> Uqa je maadi tatawen Resel memegna sipsip amca hoin. Uqaha sipsip cofadec caja.

<sup>10</sup> Odocob Jekob uqa Resel uqa awig Lebanna sipsip amca hocobil fimei uqa limei meen wa tut cona eu qosocdon. Odimei uqa Lebanna sipsip wa aden. <sup>11</sup> Odocob Jekob uqa Resel cotadudu biley qaqqaji waug ceelen. <sup>12</sup> Odimei Jekob uqa Resel madon, "Ija hina memen awig. Ija Rebeka melah," don. Odocob Resel uqa guguli limei memeg madon.

<sup>13</sup> Odocob Leban uqa awig Jekob uqa je eu dah mimei uqa mahuc bahic gulucdugia bili guguli len. Odimei uqa cogadudu bili cotadon. Odimei ehudi jona len. Odocob Jekob uqa je cunug Leban sadon. <sup>14</sup> Odocob Leban uqa madon, "Mele bahic hina ijanadec bahic. Hina ijana sihulnadec," don. Odocob Jekob uqa ono Leban gami jagel osahic eu odi bileyin.

### *Jekob uqa Resel Liaca oialecnu Lebanna cabi on*

<sup>15</sup> Odocob Leban uqa Jekob sisildon, "Hina ijana sihulnadec eunu hina ijanu gauc cabi ogona eu cois bahic qee. Mataga. Hina cabi ogonanu cel ameg ogannu wawin nijia?" don.

\* <sup>28:19:</sup> "Betel" uqana gug eu "Anutna jo."

<sup>16</sup> Aria Leban uqa ategul lecisca. Matu eu ijan Lia. Milum eu ijan Resel. <sup>17</sup> Lia uqa ola fecnu me bahic qa Resel uqa olaca deweg cunug fecnu eu jaca. <sup>18</sup> Odonqa Jekob uqa Reselnu nalug men. Eunu uqa madon, “Ija hinana cabi gel eben naha gic lecisca cabi ugen. Euqa hina aten milum Reselnu cabi ugenfi,” don.

<sup>19</sup> Odocob Leban jejeg hewi madon, “Dana oso utecnu eu me qee qa hina ihecnu eu me bahic. Ene ijaca bilewan,” don. <sup>20</sup> Eunu Jekob uqa Lebanna cabi cabi gel eben naha gic lecisca cabi on. Odonqa uqa saen eu cecelac cinigwe qee. Eu deel matica qee cinigwe fen. Uqa Reselnu nalug men eunu.

<sup>21</sup> Aria Jekob uqa Leban madon, “Saen gadac mitem eu wele qee meia. Ijana caja itiga. Odocom ija uqaca nijewan,” don. <sup>22</sup> Eunu Leban uqa ugana jobonnadec dana cunug cedeceb age sab ben hewein. <sup>23-24</sup> Aria Leban uqana cabi caja Silfa eu ehudi ehi li Liaca mudon. Odocob wesi saenna Leban uqa ateg Lia ehudi ehi li Jekob uten. Odocob Jekob uqa Liaca nijesin. <sup>25</sup> Odonqa qasil Jekob uqa caja eu ola eu Lia fen! Odimei uqa Lebanna limei madon, “Celnu kobol i oditiga? Ija Reselnu hina hinana cabi uhem. Celnu qautuga?” don.

<sup>26</sup> Qa Leban uqa jejeg hewi madon, “Egena jobon kobol i edi. Mel aid milum eu matu wooldumei uqa casac dana qee ona. <sup>27</sup> Hina ocobocob ec i ugana ja qoc deel eunu cuha osahic himec bilecem leceb ege Reselha ihecnu. Odocob hina uqanu haun cabi gel eben naha gic lecisca cabi organ,” don.

<sup>28</sup> Odocob Jekob uqa je eu toodoo odigian ec maden. Uqa ocobocob ec ugana ja qoc euna bibilen li cuha osahic hedon. Odocob Leban uqa ateg Resel uqa aidegenu uten. <sup>29</sup> Euha Leban uqa ugana cabi caja Bilha ehudi ehi li Reselca mudon. <sup>30</sup> Eunu Jekob uqa Reselca nijesin. Odonqa uqa Reselnu nalug men eu wooldoc Lianu nalug men. Odocob Jekob uqa Lebanna cabi haun cabi gel eben naha gic lecisca cabi on.

### *Jekobna mel*

<sup>31</sup> Aria saen euna Tibud uqa Jekob Lianu qee nalug mel eu fen. Eunu uqa Liana mel jool huden. Euqa Reselna mel jool menen. Odocob uqa goud men. <sup>32</sup> Odocob Lia uqa melca mimei mel oso basen. Uqa maden, “Tibud uqa ija wawi me qee mec eu fen. Mele bahic qila ija gemuni uqa ijanu naluni migian,” en. Eunu ijan Ruben<sup>\*</sup> qon. <sup>33</sup> Odocob uqa haun melca mimei mel oso basen. Odimei uqa maden, “Ija gemuni uqa ijanu qee naluni mena Tibud uqa dah mena. Eunu uqa melami i ha itia,” en. Eunu uqa mel eu ijan Simion<sup>†</sup> qon. <sup>34</sup> Odocob uqa haun melca mimei mel oso basen. Odimei uqa maden, “Ija gemuni uqa mel ijed basiton. Eunu qila uqa ija fagtigian,” en. Eunu uqa ijan Liwai<sup>‡</sup> qon. <sup>35</sup> Odocob uqa haun melca mimei mel oso basen. Odimei uqa maden, “Qila ija Tibud binan suligen,” en. Eunu uqa ijan Juda<sup>§</sup> qon. Odocob uqa mel basec culen.

## 30

<sup>1</sup> Aria Resel uqa Jekob mel oso qee basitumeinu uqa caja hiagnu hel men. Odocob uqa Jekob madon, “Mel leih itiga. Qeefi ija cal migen,” don.

<sup>2</sup> Odocob Jekob uqa Reselnu gemag ben. Eunu uqa madon, “Ija Anutfo? Hina mel basecnu jic menihem,” don.

<sup>3</sup> Odocob uqa madon, “Ijana cabi caja Bilha i hen. Uqaca nijimesi ija mel basiteia. Odocob jic ina uqanadec ijahia ijana talca bileqan,” don.

<sup>4</sup> Eunu Resel uqa Jekob ugana cabi caja Bilha aideg cinigwe uten. Odocob Jekob ugaca nijesin. <sup>5</sup> Odocob Bilha uqa melca mimei mel oso basen. <sup>6</sup> Odocob Resel uqa maden, “Anut uqa tutuc gesilteia. Odimei uqa ija jejeni mele bahic dah mimei mel oso itia,” en. Eunu uqa mel eu ijan Dan<sup>\*</sup> qon. <sup>7</sup> Odocob Reselna cabi caja Bilha uqa melca mimei mel oso Jekob haun basiton. <sup>8</sup> Eunu Resel uqa maden, “Ija caja hicca ben bahic licdoh. Odimeu ija wooldom,” en. Eunu uqa mel eu ijan Naftali<sup>†</sup> qon.

<sup>9</sup> Saen Lia uqa mel basecnu culen eu dumei uqa ugana cabi caja Silpa ehudi ehi li Jekob aideg cinigwe uten. <sup>10</sup> Odocob Liana cabi caja Silpa Jekob mel oso basiton. <sup>11</sup> Odocob Lia uqa maden, “Eu ijanu me bahic,” en. Eunu uqa ijan Gad<sup>‡</sup> qon. <sup>12</sup> Odocob Liana cabi caja Silpa Jekob mel oso haun basiton. <sup>13</sup> Odocob Lia maden, “Ija wawi ceelena. Caja age ija ceelec toqagan,” en. Eunu uqa ijan Asa<sup>§</sup> qon.

\* 29:32: “Ruben” ugana gug eu “fec” fo “ija melami” fo “ijana culumen fen” fo. † 29:33: “Simion” ugana gug eu “dah mec.” ‡ 29:34: “Liwai” ugana gug eu “fagdoc.” § 29:35: “Juda” ugana gug eu “binan sulec.” \* 30:6:

“Dan” ugana gug eu “Anut tutuc gesilteia.” † 30:8: “Naftali” ugana gug eu “licodoc.” ‡ 30:11: “Gad” ugana gug eu “ijanu me bahic.” § 30:13: “Asa” ugana gug eu “ceelec.”

<sup>14</sup> Aria wit qetec saenna Ruben uqa cabina nuen. Odimei uqa na oso ijan mandreik\*\* eu uqana bobog ceden. Odimei eu hewadi ahumei anag Lia uten. Odocob Resel uqa Lia madon, "Hina melemna mandreik bobog eundec oso itigamo," don.

<sup>15</sup> Qa uqa jejeg hewi madon, "Hina ija gemuni ija cawaltem eu ihoc qeefo? Eunu qila hina ija melamina mandreik bobogha cawaldochnu madaganafao?" don.

Odocob Resel uqa madon, "Hina melemna mandreik bobog itecemfi Jekob uqa hinaca qila witic nijuwasan," don.

<sup>16</sup> Eunu Jekob uqa wesu cabinadec ceseli hohob Lia uqa gulucdugia bili len. Uqa gulucdumei madon, "Ija wele ija melami uqana mandreik bobogna fajihiga. Eunu hina ijaca nijewan," don. Eunu witic euna Jekob uqa Liaca nijesin. <sup>17</sup> Odocob Anut uqa Liana inonec eu dah men. Eunu Lia uqa melca mimei uqa Jekob melah ebun osahic doc oso basiton. <sup>18</sup> Odocob Lia uqa maden, "Anut uqa ija ijana cabi caja ija gemuni utemnu ameg wadac itia," en. Eunu uqa mel eu ijan Isaka†† qon. <sup>19</sup> Odocob Lia uqa haun melca mimei uqa Jekob mel eben naha gic osahicca doc oso basiton. <sup>20</sup> Odocob Lia uqa maden, "Anut uqa ija ceteh me bahic oso itia. Ija uqa melahul eben naha gic osahicca basaditom. Eunu ija gemuni uqa ijaca gaid bilewan," en. Eunu uqa mel eu ijan Sebjulan‡‡ qon. <sup>21</sup> Odocob hibna uqa mel aid oso basimei ijan Daina qon.

<sup>22</sup> Odocob Anut uqa Reselnu dahig bilen. Uqa Reselna inonec eu dah mimei uqa uqana mel jool huditon. <sup>23</sup> Eunu uqa melca mimei mel oso basen. Odimei maden, "Anut uqa ija majani qu qeleia. <sup>24</sup> Uqa mel oso haun itia," en. Eunu mel ijan Josef§§ qon.

### *Jekob Lebanca Jekobna cabi amegnu madesin*

<sup>25</sup> Aria Resel uqa Josef baseceb Jekob uqa Leban madon, "Sultecem nuiga. Ija ijana jobon nuigen. Ijana hatuna nuigen. <sup>26</sup> Ijana cajaca mel simca agenu cabi om eu itecem nuiga. Ija hinana cabi u cuhadom doga," don.

<sup>27</sup> Qa Leban uqa madon, "Hina gale hecebf ijaca bilewan. Hinanu himec Tibud uqa ija eelten. Ija jahunec je eunadec duga. <sup>28</sup> Eunu hina cel ameg ogannu wawin nijia eu matecim ihigen," don.

<sup>29</sup> Odocob Jekob uqa jejeg hewi madon, "Ija hinana cabi u cuhadomnu doga. Hinana dool am cofaadigin fulusdoin eu ha dogona. <sup>30</sup> Saen ija qee hocna hina dool am nag bahic. Qa saen ija hocomin hinana dool eu fulusdu mati bahic doin. Hinana cel cabi oso ija om eu Anut cunug eeldon. Qilaqa ija ijana talnu cabi odi oso ugen," don.

<sup>31</sup> Odocob Leban uqa sisildon, "Ija adi fajihigen?" don.

Odocob Jekob uqa jejeg hewi madon, "Hina ceteh oso Cain itigaun. Qa hina ceteh osahic i oditecemfi ija haun hinana dool cofadigen. <sup>32</sup> Qila ija cultecem hinana sipsipca memeca cunug dewenega tolotoloca eu ija cabi om eunu ameg cedadigen. Sipsip nag dewenega casca euha oso cedadigen. <sup>33</sup> Odocob hibna hina kobol tutuc ija odom eu dogan. Euqa hina cabi ameg item eu fimeg eunadec meme oso deweg tolotoloca qeefo sipsip nag oso casca qeefo fifeq ija hinanadec heje om ec dogan," don.

<sup>34</sup> Odocob Leban uqa madon, "Cois eu me bahic. Hina je mataga eu odi odowan," don.

<sup>35</sup> Odonqa deel euna himec Leban uqa meme cufunec manahalca dewenega tolotolo qoc senenec eu cunug cedaden. Odimei uqa sipsip nag cascaca ha cedaden. Odimei uqa eu cunug melahul cofadecnu ebenegana maden. <sup>36</sup> Odocob Leban uqa jic oso nuen. Jic eu uqana cecelac eu deel ijed eu odi. Uqa Jekob culdeceb Leban uqana dool am leih eu gigi jejegin cofaden.

<sup>37</sup> Odocob Jekob uqa na sihil filfil ijed eundec batac osolosol qetaden. Na eu ijanaga eu popla, almon, plenca. Odimei uqa na eu age batac obutibit qasaladen. Odocob na caun senenec eu camasac men. <sup>38</sup> Odimei uqa na batac eu dool wa jegina agena boh cemenug quadeng. Euqa dool wa jejegin age tobadoloi. Eunu na batac eu ono quadeng. <sup>39</sup> Odocob meme age na batac cemenug tobadeceil hibna age nag basein eu tolotoloca cascaca basadein. <sup>40</sup> Odocob Jekob uqa sipsip nagnag eu fil maden. Odimei age olanaga waldochob age Lebanna dool dewenega tolotoloca cascaca meciadein. Eunu uqa jic eu odina Lebanna dool amnadek filiganadimei uqananu ceden. <sup>41</sup> Saen dool cufunec gagadicca age agena tobec saen caleceb uqa na batac eundec oso umei wa gab jec boh cemenug qudoloi. Age na batac eu cemenug li toboloi. <sup>42</sup> Qa dool oso uqa gagadicca qeefi uqa na batac eu olana qee qudoloi. Eunu dool gagadicca qee eu Lebannalein. Odocob dool gagadicca eu Jekobnalein. <sup>43</sup> Odocob jic eu odina Jekob cehewan bencu

---

\*\* 30:14: "Mandreik" eu marila eundec oso. †† 30:18: "Isaka" uqana gug eu "dana fajen" fo "ameg wadacdoc" fo. ‡‡ 30:20: "Sebjulan" uqana gug eu "itia." §§ 30:24: "Josef" uqana gug eu "haun itiale" fo "ehudeia" fo.

calen. Odimei uqa dool am mati bahic, cabi dana mati bahic, cabi caja mati bahic, kamel mati bahic, cesel mati bahicca men.

## 31

### *Jekob Lebannu busali nuen*

<sup>1</sup> Aria Jekob uqa Leban melahul je edi mamadegin don, "Jekob uqa ceteteh cunug ege memige ugana ceden. Ege memige ugana ceteteh eu ege memigedec cedimei uqa cehewanca men," eegin don. <sup>2</sup> Odocob eu culecnu. Wele Leban uqa Jekob me oduduloi qa saen ina uqa eu edi haun qee odudel eu uqa fen. <sup>3</sup> Odocob Tibud uqa Jekob madon, "Ceseli maha hina memen bilinana nuuga. Hinana sihulca nueiga. Euqa ija hinaca bilewan," don.

<sup>4</sup> Eunu Jekob uqa Resel Liaca je sulduali maalen, "Humesi ijana dool am cabina cobigina euna ale guluctesia," alen. <sup>5</sup> Odocob ale limesi gulucdocobil uqa maalen, "Ale memela uqa weleca ija me oditoloi qa qila eu odi qee oditina eu ija figina. Euqa ija mei ugana Anut eu ijaca bilina. <sup>6</sup> Aria ija ale memela ijana gagadic odoc cunugcana cesuldolig ale dosina. <sup>7</sup> Euga ale memela eu qautimei ijana cabi ameg eu ibulabaldu 10 don. Uqa eu odi odochna ija wawi tudocnu odonqa Anut uqa Leban culdeceb ija deweni oso qee me qee mudel. <sup>8</sup> Uqa odi matecebf, 'Dool cunug dewenega tolotoloca basadein dool eundec hinana cabi amegnu cedadegan,' tecebf dool basadein eundec himec. Uqa odi matecebf, 'Dool cunug dewenega gaga eu made gaga obutibit eu hinana cabi amegnu cedadegan,' tecebf dool basadein eundec himec. <sup>9</sup> Eunu jic i edina Anut uqa ale memela ugana dool amnadec ija cehewanica miten.

<sup>10</sup> Aria dool agena manag hewec saenna ija saen osona bebelimig meme manahal dewenega tolotoloca dewenega made gaga obutibitca age cufuncu eu manag hehwadegin eu feciadem. <sup>11</sup> Odocob Tibudna ensel bebelecna maten, 'Jekob,' ten. Odocob ija madom, 'Ija i hen,' dom. <sup>12</sup> Odocob uqa maten, 'Qila amen suli umeg faga. Meme manahal cunug cufuncu manag hewadegina eu dewenega tolotolocafu dewenega made gaga obutibitcafo. Leban uqa hina me qee odihen eu ija wele fem. Eunu ceteh fem eu ija odocomin calen. <sup>13</sup> Ija Anut hina Betel ono fecitem eu. Betel cudunna hina meen cehimug mool basecd qom. Cudun euna hina je cagu matem. Aria cajaga. Maha i culuga. Maha hina anin basihen euna ceseli nuuga,' ten," alen.

<sup>14</sup> Odocob Resel Liaca ale jejeg hewi madosin, "Qila ele memile ugana ceteteh oso qee owaun. <sup>15</sup> Uqa ele cele caja cinigwe mecilena. Uqa ele fajilecna ameg on. Qa eu cunug ji hedon. <sup>16</sup> Mele bahic, ele memile ugana cehewan cunug Anut cawaldon eu eleca elena talca egenacin. Eunu hina Anut adi maheia eu odi toodu odoga," dosin.

<sup>17-19</sup> Eunu Jekob ugana ceteteh cunug cedadi Kenan nuecnu saciadon. Aria Leban uqa ugana sipsip baginiga jehecnu cabina len. Odocob Resel uqa memegna jo gadan tibud eu heje on. Odocob Jekob uqa aidegulca mel simca cedadimei kamel tatacanna maden. Odimei uqa ugana dool am cunug eu suladeceb aquni belein. Eunu uqa ceteteh cunug Mesopotemia ono bibilei ceden eu cedadimei busali memeg Aisakca Kenan hatuna nuen. <sup>20</sup> Odonqa Jekob uqa Leban ija busali nuigina ec qee madol. Eunu uqa qaududu busali nuen. <sup>21</sup> Odimei uqa ugana ceteteh cunug cedadimei caji mahuc busali nui Jufretis wa leten. Odimei uqa ameg leceb Giliad hatu aluhcana isec mecidudu nuen.

### *Leban uqa Jekob jabi toodon*

<sup>22</sup> Aria deel ijed hedocob Leban uqa Jekob busali nuen ec don. <sup>23</sup> Odocob Leban uqa cotugul cedeceb age Jekob jabi toodooin. Age deel eben naha gic lecisca eu odi jabi toodu belein. Odimeig age Giliad hatu aluhcana ono mecidoin. <sup>24</sup> Odocobil witic euna Anut uqa bebelecna Leban madon, "Batut faga! Jekob Cain geuldoc je madogaun. Ceselecnu ha Cain cesusdogau," don. <sup>25</sup> Saen Leban uqa Jekob mecidocob uqa ugana lotoc talah aluh osona cehi bilen. Odocob Leban uqa cotugul gamiha Giliad hatu aluhcana ono lotoc talah cehi bilein.

<sup>26</sup> Odocob Leban uqa Jekob gulucdumei madon, "Hina eu cel kobol odom? Hina qautimeg ija ateniel lecis eu han cacadi caja cawaladecwe cedali busalem. <sup>27</sup> Hina celnu busali hom qa ija qee matelem? Hina celnu ami hewem? Hina ija matoummi ija wawi ceelecca due sisili casu qudud cued fulduduca sulhoum. <sup>28</sup> Eu odom qa hina culitecem ija ateniel asielca cotaadecemin houbda. Hina gad kobol bahic odom. <sup>29</sup> Ija hina qihetcnu gagadic odoccaqa qila witic hina memenna Anut uqa je edi mateia, 'Batut faga! Jekob Cain geuldoc je madogaun. Ceselecnu ha Cain cesusdogau,' teia. <sup>30</sup> Hina memen nui fecnu holimeg busali hom eu ija dugina. Qa hina celnu ijana tibud heje cedadem?" don.

<sup>31</sup> Odocob Jekob jejeg hewi madon, "Ija cucuiem. Hina ateniel lecis eu cawaltigaun imig eunu odom. <sup>32</sup> Euqa hina humeg hina cotinel amagaca ceteteh faga. Euna ceteh oso

hinana fifeg hina oga. Odocob in oso hinana tibud eu cedadifei uqa qee cebac biliaun,” don. Qa Jekob uqa Resel tibud cedaden eu qee dol.

<sup>33</sup> Odocob Leban uqa Jekobna lotoc talah dunuh len. Eunadec Liana talah dunuh len. Eunadec cabi caja lecis alena lotoc talah dunuh len. Qa uqa euna tibud eu qee gulucadel. Odocob uqa Reselna lotoc talah dunuh len. <sup>34</sup> Aria Resel uqa jo tibud eu cedadimei kamel tatacan biley cabal uqana jool tacen. Odimei jool euna cilehdu bilen. Odocob Leban uqa ceteh cunug lotoc talah dunuh bilein eu cijawi fen qa tibud eu oso qee gulucadol. <sup>35</sup> Odocob Resel uqa memeg madon, “Ijana ben, cain gemain beiaun. Ija jagel qitina. Eunu ija hina cemein caji lec ihoc qee,” don. Eunu Leban uqa cijawi cuhadon qa uqa uqana gadan tibud eu qee gulucadel.

<sup>36</sup> Odocob Jekob uqa gemag beceb Leban je gagadic madudu madon, “Ija adi cahuldu odihem eu madaga duga? Ija cel silail odemnu i edi jabitigina? <sup>37</sup> Hina qila ijana ceteteh cunug wele cijawi faga. Cel oso eu hinanacim gulucdoga? Aria ceteh eu hina cotinelca ijana talca ege amigenea fecnu i hen ec magaga. Odocom age ija cahuldomfo qee hina cahuldom fo gesiluqagan. <sup>38</sup> Ija hinaca cabi gel 20 biloh. Qa hinana sipsipca memeca eu cunug age nag qee basec oso qee nijoloig. Euha hinana sipsip manahal amnadeec oso ija qee jelem. <sup>39</sup> Dool cus oso hinana sipsip oso qocobfi eu ija qee ahuholig qa ija ijanaadec oso eu cesuldu iholig. Odocob dool oso witicfo qee cahinegfo heje ocobilfi hina ija ebeninadec ameg ogannu matolog. <sup>40</sup> Ija eu odi oodi bilolig. Cahineg ija cam cijitoloi. Witic ija duan toloi. Odocob ija us me qee nijolig. <sup>41</sup> Cabi gel 20 euna ija eu odi oodi hinaca bilolou. Hina atenel lecis eunu ija cabi gel 14 cabi om. Odocob hinana dool am cofadecnu ija cabi gel eben naha gic osahicca cabi om. Odocob hina ijana cabi amegha ibulabalu 10 dom. <sup>42</sup> Ija asi Ebrahamca Aisak meica alena Anut ijaca qee biloubmi hina ija ebeni tanac gauc sultecem nuoum. Qa Anut uqa ijana culumenca ija cabi gagadic omca eu fen. Eunu uqa qila witic hina je gagadic maheia,” don.

### *Jekob Lebanca bal cehec je madi cagosin*

<sup>43</sup> Odocob Leban uqa jejeg hewi madon, “Caja lecis eu ale ija ateniel. Alena mel sim euha ijana. Dool am i age euha ijana. Ceteh cunug hina fagana eu ijana himec. Qa qila ija ateniel i aleca alena mel simca eu adi haun cedadigen? <sup>44</sup> Eunu qila ija hinaca ele gemo bal cehec je oso madewan. Odocob ele bal cehec je mamadi meen am osolnu qeleanor,” don.

<sup>45</sup> Odocob Jekob uqa meen ben tutuc sosoloig cecelacca oso umei mahana cehen. <sup>46</sup> Odocob Leban uqa cotugul maaadeceb age meen cedi ahumeig haudooin. Odimeig age meen eu cemenug sab jein. <sup>47</sup> Odocob Leban uqa cudun eu ijan Jega-sahaduta\* qon. Odocob Jekob uqa cudun eu ijan Galed† qon.

<sup>48</sup> Odocob Leban uqa Jekob madon, “Meen am i qila deel ina hina ijaca ele gemo bal cehec je madowa eu uqana gadac,” don. Eunu age cudun eu Galed doin. <sup>49</sup> Odimei madon, “Saen ele filigandu cocobohul Tibud hina ijaca cofleiale,” don. Eunu cudun eu ijan osoha Mispa‡ doin. <sup>50</sup> Odocob Leban madon, “Hina ija ateniel eu me qee odalegaunfo qee hina caja leih haun cedadeganfo, eufi ija qee mecihiqaun qa Anut mecihiqian doga. <sup>51</sup> Faga, meen am ica meen tutuc tawec ica ija hinaca ele gemo cehowa ene njija. <sup>52</sup> Meen am ica meen tutuc tawec ica eu cadnu gaga cudun biligian. Ija meen am i qee wooldumig hagen ono isec hina qihecnu ligaun. Eu odiwe hinaha meen am ica meen tutuc tawec ica qee wooldumeg hagen ene isec ija qitecnu hogau. <sup>53</sup> Ebraham Nehoca alena Anut uqa ele gemo gesilligian,” don. Odocob Jekob uqa Anut uqa memeg Aisak cucuidona eu amegna Leban je maden eu cunug toodoo odigen imei je cagu maden. <sup>54</sup> Odocob Jekob uqa aluhna dool oso qumei Anut ihandon. Odimei uqa cotugul maaadeceb sab jecna lecebil sab jein. Odimeig age witic euna aluhna ono us nijein. <sup>55</sup> Odocobil qasil bahic Leban uqa cajimei uqa asagul simsimeca uqa ategul lecis euca cottaadi biley eeldoc je aden. Odimei uqa culadimei ceseli uqana jobon nuen.

## 32

### *Jekob Iso gulucdocnu saciadon*

<sup>1</sup> Odocob Jekob uqaha uqana jicna nuen. Nunui bili ensel age uqa gulucdoin. <sup>2</sup> Saen Jekob uqa meciadimei maden, “I eu Anutna cudun,” en. Eunu uqa cudun eu ijan Mahanaim\* qon.

\* <sup>31:47:</sup> “Jega-sahaduta” eu Aram je, uqana gug eu “bal cehec je uqana am.” † <sup>31:47:</sup> “Galed” eu Hibru je, uqana gug eu “bal cehec je uqana am.” ‡ <sup>31:49:</sup> “Mispa” uqana gug eu “cadnu meciec cudun.” \* <sup>32:2:</sup> “Mahanaim” uqana gug eu “cudun lecis.”

<sup>3</sup> Odocob Jekob uqa dana leih sos suladeceb age uqa waliag Isoca belein. Iso uqa Sia agena mahana bilen. Sia eu Idom hatuna nijen. <sup>4</sup> Qa casac Jekob uqa sos maaden, "Age ijana ben Iso je edi madoqagan, 'Hinana cabi dana Jekob odi madena, 'Ija Lebanca bilolounu qila ceselgina. <sup>5</sup> Ija bulmakau amca cesel amca sipsip amca meme amca cabi danaca cabi cajaca hogona. Qila ija je i hina sulduhigina. Hina ijanu wawin me nijigian nu,' ec madena,' age je i madigina eu odi madoigale," aden.

<sup>6</sup> Odocob Jekob uqana sos ceseli hu madoin, "Ege hina walin Isoca loqa. Odeiaqa uqa hona. Dana 400 eu odi ugaca hogina," doin.

<sup>7</sup> Odocob Jekob geh bahic cucuui jaen qon. Eunu Jekob uqa uqana dana cajaca dool amca eu qatanadimei am lecisna maden. <sup>8</sup> Iso uqa humei han sanan mecebfí am oso eu age busali beloqagan ec odi cisdon.

<sup>9</sup> Odocob Jekob uqa odi inondú madon, "O ija asi Ebrahamca ija mei Aisakca alena Anut, O Tibud, hina dah mitiga. Hina matem, 'Hina ceseli hinana hatunaca hina cotinelca nuuga. Odocom ija odocna hina cehewainca calegan,' tem. <sup>10</sup> Ija hinana cabi dana. Hina hinana kobol me bahic eu ihactem. Hina ijanu cisdom. Qa ija ihoc qee. Weleca ija gotutca himec Jodan wa i letem. Qa qila ija am lecis ica ceseli huga. <sup>11</sup> Ija wali Iso ebennadec caahahataga. Ija cucuigina. Uqa humei han sulimei ijaca ijana tal eu qee migigian. Eunu ija cucuigina. <sup>12</sup> Qa hina matem, 'Ija mele bahic odihecemín hina cehewainca megan. Odocob hinana sihil eu lannadec cesic cinigwe caloqagan. Euqa sicanecwe qee eu odi caloqagan,' tem," uqa eu odi inondon.

<sup>13</sup> Odimei uqa witic ono us nijen. Odocob uqa waliag Iso loo utigiannu dool leih uqana amnadec nesili cedaden. <sup>14</sup> Dool cedaden eu i edi. Meme cufunec 200, meme manahal 20, sipsip cufunec 200, sipsip manahal 20, <sup>15</sup> kamel cufunec su ogina eundec 30 agena nagca, bulmakau cufunec 40, bulmakau manahal 10, cesel cufunec 20, cesel manahal 10. <sup>16</sup> Odocob uqa dool eu qatanadi am naha maden. Odimei uqa dool am eu age uqana cabi dana ebenegana men. Uqa dool am gug fil eu cabi dana oso ebenna men. Odocob dool am gug fil eu cabi dana oso ebenna men. Uqa dool am gug filfil cabi dana osahicosahic ebenegana men. Odimei uqa maaden, "Age casac aquni beleiga. Age cain gabandu belowain. Oso nueceb oso toodoia qa big togoctogoc Cain belowain," aden.

<sup>17</sup> Odocob uqa cabi dana aquni nugian eu madon, "Saen ija wali Iso uqa guluchimei sisilhecebfí, 'Hinana ben eu indec?' Dool i age indecna? Odeiaqa hina ana nuuguna?" uqa odi sisilhecebfí, <sup>18</sup> hina edi madegan, 'Dool i age hinana cabi dana Jekobnacin. Euqa uqana ben Isonu loo suldoia. Odeiaqa Jekob uqadodoc hib hona,' hina odi madegan," don. <sup>19</sup> Odocob cabi dana leih aquni nuen eu toodoiñ eu age cunug je eu odi himec madoqagannu maaden, "Age Iso gulucdodoig je cabi dana aquni nuigianu maduga eu ageha eu odi madoiga. <sup>20</sup> Qa je i madocnu dahanaga cain celeiaun. 'Hinana cabi dana Jekob uqa hib toogen'a, 'doiga,' aden. Jekob uqa cisdon, 'Ija dool lonu aquni suldugina i uqa waug me nijigian. Odocob hibna uqa gulucdocomin uqa ija me meciitigian," ec cisdon. <sup>21</sup> Eunu Jekob dool waliagna lonu suldon eu casac cedi hewi belein. Qa uqa witic euna cudun euna himec us nijen.

#### *Dana oso Peniel ono Jekobca hewecebhweweceb imesi hagalesin*

<sup>22</sup> Aria uqa witic euna dih Jekob uqa cajimei aidegul lecisca cabi caja leciscá uqana mel 11ca cedadimei suladeceb Jabok wa letein. <sup>23</sup> Uqana tal suladeceb letecebíl uqana ceteteh cunug hib cabi dana suladeceb cedi ehilein. <sup>24</sup> Odimei Jekob uqa cuhanuc ono bilen.

Odocob dana oso hocob ugaca hewecebhweweceb imesi hahagalesin li cojagen. <sup>25</sup> Hahagali bilesi dana eu Jekob wooldocnu ihoc qee fimei uqa Jekob cataic tudocob cataic teful falicdon. <sup>26</sup> Odocob dana eu madon, "Wele cojagena. Culitecem nuiga," don.

Qa Jekob uqa jejeg hewi madon, "Ija qee culihecemín nuugaun. Euqa eeltecempí ija culihigen," don.

<sup>27</sup> Odocob dana uqa Jekob sisildon, "Hina ijain indec?" don.

Odocob uqa jejeg hewi madon, "Jekob," don.

<sup>28</sup> Odocob uqa Jekob madon, "Hina ijain haun Jekob qee howain. Hina Anutca hagalimesi dana cunug wooladaga. Eunu age Isrel<sup>†</sup> hoqagan," don.

<sup>29</sup> Odocob Jekob uqa sisildudu madon, "Hina ijain mataga," don.

Qa uqa madon, "Hina celnu ijaninu sisiligana?" don. Oodoi uqa ono Jekob eeldon.

<sup>30</sup> Odocob Jekob uqa maden, "Ija Anut ola figaqa ija qee cal melem," en. Eunu Jekob cudun eu ijan Peniel<sup>‡</sup> qon. <sup>31</sup> Aria qasil cam tobi beben uqa Peniel cudun eu culimei len. Euqa uqa cataicnu citogohui cobon. <sup>32</sup> Aria dana eu uqa Jekob cataic teful eu hiliman

<sup>†</sup> 32:28: "Isrel" uqana gug eu "uqa Anutca hagalesina." <sup>‡</sup> 32:30: "Peniel" uqana gug eu "Anut ola."

tudon. Eunu qila saen ina Isrel dana caja age dool hiliman cataic amegnadec eu qee jegina.

### 33

#### *Jekob Iso gulucdon*

<sup>1</sup> Aria odocab Jekob uqa ameg suli u meciimei Iso dana 400 ugaca hohigin feciaden. Odocab uqa ugana mel sim Liaca Reselca cabi caja leciscia age qatanadi am ijedna maden. <sup>2</sup> Odimei uqa cabi caja lecis ale alena mel gami aquini maden. Odimei Lia uqa ugana mel gami age gemo maden. Odimei uqa Resel Josefca ale hib malen. <sup>3</sup> Odocob uqa ugadodoc wooladimei uqa aquini nuen. Odimei uqa waliag dodoldodoi jogoi eben naha gic leciscia don. <sup>4</sup> Odon Iso uqa guguli humei Jekob gulucdon. Gulucdumei uqa cogadudu bili cotadon. Odocob ale qajesin. <sup>5</sup> Odocob Iso uqa ameg suli umei cajaca mel simca meciaden. Odimei sisildon, “I indec ni hinaca hogina?” don.

Jekob uqa jejeg hewi madon, “O ijana ben, Anut me bahic eeltiti mel sim i age iten,” don. <sup>6</sup> Odocob cabi caja ale alena mel sim gami humeig Iso amegna jogoein. <sup>7</sup> Odocob Lia ugana mel sim gami humeig Iso amegna jogoein. Odocob Resel Josefca ale humesi Iso amegna jogoesin.

<sup>8</sup> Oodogin Iso uqa sisildon, “Dool am hahu bilig gulucadiga eu cel gugnu?” don.

Odocob Jekob uqa jejeg hewi madon, “Euqa ijana ben hina wawin me mudencu faga,” don.

<sup>9</sup> Qa Iso madon, “O wali ija ceteteh geh bahicca. Ceteteh hinana eu cois hinanacin biligian,” don.

<sup>10</sup> Odocob Jekob madon, “Qee, qila hina ijanu wawin me nijecebfí ceteteh loo ihiga i ebeninadec cedega. Qila hina wawin ceelecna guluctaga. Eunu hina olain figina eu Anut ola fecwe migina. <sup>11</sup> Anut uqa ija me eelten. Odocob ija ceteteh ihoc. Eunu ceteteh hina loo ihigina eu cedega,” don. Odimei Jekob uqa cesusdudu li uqa ceteteh loo uten eu cediton.

<sup>12</sup> Odocob Iso madon, “Cois ege belecnu. Ija aquini nunuemin age hib tooteiga,” don.

<sup>13</sup> Odocob Jekob madon, “O ijana ben, ijana mel sim age gagadicca qee hina dogona. Euha sipsip bulmakaucha cufunec eu agena nagca eu ija cofadigen ec cisdigina. Age gagadic deel osahica cobifeig age cunug cal moqagan. <sup>14</sup> Eunu hina casac aquini nunuem ijaca ijana dool amca ijana simca ege cebitnana hib tooheqan. Ija agena jic lec eu age buluaadi toohi Sia ono guluchigen,” don.

<sup>15</sup> Odocob Iso madon, “Cois ija ijana dana leih hinaca culadigen,” don.

Qa Jekob madon, “Odi cain odagaun. Hina me mitiga eu ihoc,” don.

<sup>16</sup> Eunu deel euna himec Iso ceseli Sia nuecnu uqa coboc sanan men. <sup>17</sup> Qa Jekob uqa Sakot isec nuen. Ono uqa ugana jo oso cehen. Odimei uqa dool agena jo ha cehen. Eunu cudun eu ijan Sakot\* egina.

<sup>18</sup> Aria Jekob uqa Mesopotemiadec humei uqa Sekem taun ono culumenga qee me bahic calen. Sekem eu Kenan hatuna nijia. Uqa taun fecnu ihocna cudun oso hewimei lotoc talah cehi bilen. <sup>19</sup> Uqa lotoc talah cehenna maha eu 100 silwana faji on. Uqa Hamo melahul ebeneganadec faji on. Hamo uqa Sekem memeg. <sup>20</sup> Ono uqa ihanec cabal gualimei ijan El qon. “El” eu Isrelna Anut uqa ijan.

### 34

#### *Sekem uqa Daina caluwandu ehi li hehewen nijesin*

<sup>1</sup> Aria saen osona Daina, Lia ateg uqa Jekob basiton eu, Kenandec caja feciadencu nuen. <sup>2</sup> Aria Hamo, uqa Hiwi dana, uqa maha eu agena ilo bilen. Odocob uqa melah Sekem Daina cocobon fimei uqa caluwandu ehi li hehewen nijesin. <sup>3</sup> Uqa waug eu Dainanu cal men. Odocob uqanu nalug mimei je bodoecna isec madon. <sup>4</sup> Odocob Sekem uqa memeg Hamo madon, “Mel aid haun i ijana cajanu u taga,” don.

<sup>5</sup> Aria Jekob uqa dana eu uqa ateg Daina me qee mudia ec don. Saen euna uqa melahul age cabina bulmakau cofaadegin je eu don. Eunu uqa je oso qee maadec bibilen age hoin. <sup>6</sup> Odocob Sekem memeg Hamo uqa Jekob je madugia bili uqa hon. <sup>7</sup> Ale je mamadesin Jekob melahul age cabinadec ceseli hoin. Odocob age Sekem uqa Jekob ateg hewebe nijesin eu Isrel amagana majanaga hewec kobil odon eu dumieig age filicitimeig gemanaga ben. Kobol eu Isrelna sihul gemo odocnui qee nijel eu odon.

<sup>8</sup> Qa Hamo uqa Jekob madon, “Ija melami waug eu hina atennu nijia. Hina ocobocob owasannu utuga. <sup>9</sup> Age ege gami ocobocob eqan. Age atagail ege igeiga. Odimeig ege

\* 33:17: “Sakot” ugana gug eu “dool jo.”

atigeil age cedadeiga. <sup>10</sup> Eufi age ege gemo biluqagan. Odocobil maha eu age bielecnu jeca qee. Odocob age ene idadecnuca maha ocnua ihoc,” don.

<sup>11</sup> Odocob Sekem uqa Daina memega cebinagulca maaden, “Age ijanu wawaga me nijcebfí cel ceteh osonu sisiltoqagaqa eu ija adigen. <sup>12</sup> Caja fajec ameg ganic mateiga? Eeta gale adena eu ija adigen. Eu ameg ben bahicfi euha ija fajigen. Qa caja eu iteiga,” aden.

<sup>13</sup> Aria Sekem uqa Jekob melahul age cebinamaga Daina me qee muden. Eunu age gami qauecna isec Sekem memega je wadacdu maalein. <sup>14</sup> Odocob age maalein, “Ege cebinamige dana oso deweg gaga qee qoc ocnu eu ihoc qee. Eu eguna kobel qee. Eufi ege majanige gecona isec odocnu. <sup>15</sup> Ege jic osahicna himec hina cois hecnu. Jic eu odi. Hinana dana cunug age dewenega gaga qoqagan. Eufi age ege cinigwe caloqagan. <sup>16</sup> Eu odi odocobilfi ege atigeil eu age adocomun age atagail eu ege iguqagan. Odocobil ege ageca bielecnu. Odimeb dana sihul osahic calecnu. <sup>17</sup> Qa age dewenega gaga qocnu maadoqa eu qee dah migifeig euqa ege cebinamige eu umebe nuecnu,” alein.

<sup>18</sup> Hamo melah Sekemca je eu dah mesin eu me bahic. <sup>19</sup> Odocob uqa Jekob ategnu waug ceelen. Eunu dana haun eu cabi eu odocnu qee daleel. Hamo uqana talna uqa dana ben, uqa binanca biloloi.

<sup>20</sup> Odocob Sekem uqa memeg Hamoca taun uqana gel cebecna humesi dana taunnadec je maadi madesin, <sup>21</sup> “Dana i age egena danah. Eunu culadecebíl maha ina idadi biluqagan. Maha i eu ben bahic ihoc. Ege age atagail cedadimeb ocoacob ecnu. Odimeb ege atigeil eu age adecnu. <sup>22</sup> Euqa age gami bielecnuca dana sihul osahic calecnuca jic osahicna himec odi odocnu cois goqagan. Jic eu odi. Dana cunug ege gemo bilegina eu dana i age cinigwe caloqagan euqa age cunug dewenega gaga qoqagan. <sup>23</sup> Odocob agena dool cunugca ceteteh cunugca agena qee biliaunfo? Eunu ege cois adocomun age egeca bieleqan,” esin. <sup>24</sup> Eunu dana cunug taun gel cebecnalein eu age Hamo melah Sekemca alena je dah mein. Odocobil dana cunug age saen euna dewenega gaga qoin.

<sup>25</sup> Aria deel ijed hedocob saen eu age dain aden ninijegin Jekob melahul lecis, Simion Liwaica, ale Daina cebinagul, ale han cadec sigin cedemesi taun euna hosin. Taun eunadec dana qee dodogin humesi cunug aqeceil cal mein. <sup>26</sup> Ale Hamo melah Sekemca siginna aqeceil cal mesin. Odimesi Daina Sekemna jonaadec ehudi belesin. <sup>27</sup> Odocobil Jekob melahul cunug age humeig dana cal mein ninijegin taun eu dunuhna ceteteh cunug gogoqi heje cedi ehi nuein. Dana taun eunadec age Jekob melahul cebinamaga me qee mudein, eunu odi odoin. <sup>28</sup> Odimeig age agena sipsip amca bulmakau amca cesel amca ceteteh cunug agena taun bilein euca cabina bilein euca cunug cedein. <sup>29</sup> Age cehewanaga cunugca agena cajaca agena mel simca cunug cedimeig belein. Ceteteh cunug jona nijen euha cunug cedein.

<sup>30</sup> Odocob Jekob uqa Simion Liwaica maalen, “Ale ija deweni jeca mudesia. Ale odocobil dana Kenandec Peresdecca dana cunug maha inadec age ija agena cadwe doqagan. Ege dana matica qee. Age gabandumieig ijaca han sulecebifli ijaca ijana talca ege qee necnu,” alen.

<sup>31</sup> Qa ale madosin, “Uqa ele cebinamile jicnadec wal caja cinigwe odudecnu ihocfo?” dosin.

## 35

### Anut Betel ono Jekob eeldorf

<sup>1</sup> Odocob Anut uqa Jekob madon, “Aria cajimeg Betel ono taga. Odimeg ono biliga. Ija Anut eu saen hina walin Iso cemenugnadec bibusalegan uqa hinaca camasac men. Eunu Betel ono hina ihanec meen cabal gualimeg ihangata,” don.

<sup>2</sup> Eunu Jekob uqa uqana talca dana caja cunug uqaca bilein eu maaden, “Cele agena tibud ageca bieleiga, eu cunug qeladeiga. Odimeig dewenega eeldumeig lotoc haun tacadeiga. <sup>3</sup> Odocob hoiga. Ege Betel ono tecnu. Ono ija Anut ihanec cabal oso gualimig ihandugen. Ija anaana cocobilig saen ija culumenca bibilic Anut je madocomin uqa dah mitoloi,” aden. <sup>4</sup> Eunu age cele agena tibud agena bilein eu cunug Jekob utein. Odocob dahof age dahinigana tacein euha utein. Odocob Jekob uqa ceteteh eu cedimei Sekem cemenug na ben gugna hel cisaden.

<sup>5</sup> Odocob age bebelegin Anut uqa odocob cucuiec ben oso dana caja taun age aliladi billeinna nen. Odocob age qee tooadelein. <sup>6</sup> Odocob Jekob uqaca dana caja uqaca belein eu age hu Luscalein. Lus qila eu ijan eu Betel. Eu Kenan mahana. <sup>7</sup> Odocob uqa cudun euna ihanec cabal oso gualen. Saen uqa waliag Iso cemenugnadec bibusalen Anut uqa ono uqaca camasac men. Eunu cudun eu ijan Betel qon. <sup>8</sup> Odocob Rebekana cabi caja Debora cal men. Odocob uqa na ben gugna Betel bisalu hel cisein. Eunu cudun eu ijan Qajec Na Ben qoin.

<sup>9</sup> Aria saen Jekob Mesopotemiadec ceseleceb Anut ugaca haun camasac mimei eeldorf.  
<sup>10</sup> Odimei Anut uqa madon, "Hina ijain eu Jekob qa hina haun Jekob qee howain. Hina ijain eu Isrel hoqagan," don. Eunu Anut uqa ijan Isrel qon. <sup>11</sup> Odocob Anut uqa je oso ha edi madon, "Ija Anut Gagadic Bahic. Sihul fulusdumeg mati bahic caloqagan. Ija odihecemin hinana sihul ben oso caligian. Sihulna ilo biley mati bahic age hinana sihulnadec caloqagan. <sup>12</sup> Maha ija Ebraham Aisakca alem eu hina ihigen. Odocob hinana sihul hina toohec hibna cali hoqagan euha maha eu adigen," don. <sup>13</sup> Odocob Anut cudun uqa je madon eu culimei sao ohis ti nuen. <sup>14</sup> Odocob Jekob cudun uqa Anutka je madezin euna meen cecelac oso umei tutuc cehen. Odimei uqa Anut ihandocwe wain meen eu baseedu qon. Eu hedocob uqa meen eu moolha baseedu qon. <sup>15</sup> Odimei uqa cudun eu ijan Betel qon.

#### *Resel uqa cal men*

<sup>16</sup> Odocob age Betel culimeig belein. Saen age Efrat qee calec ninijen Resel uqa mel basecnu dain doc sanan men qa uqa ihoc bahic qee. <sup>17</sup> Uqa dain ben dodon Resel ugana cesuldoc caja eu madon, "Cain cucuiagaun, Resel. Hina qila mel manahal oso basegan," don. <sup>18</sup> Qa uqa cal migia dodoldodon kis u biley melah eu ijan Benoni\* qon. Euqa memeg uqa Benjamin† don.

<sup>19</sup> Resel cal meceb uqa jic Efrat nuec eu gesacna hel cisein. Cudun eu qila Betlehem engina. <sup>20</sup> Odocob Jekob meen oso euna ugana qalqal gadac nec cehen. Euqa qila saen inaha bilia. <sup>21</sup> Odocob Jekob uqa cocobi nuimei Ede agena han qali jo hagen naha isec ugana lotoc talah cehen.

#### *Jekob melahul*

<sup>22</sup> Odocob Jekob uqa ono maha euna bibilen Ruben uqa limei memegna cabi caja aideg cinigwe biloloi eu Bilhaca ugaca nijesin. Odocob Jekob uqa eu don.

Aria Jekob uqa melahul cunug gabandoc eu 12. <sup>23</sup> Melahul Lianadec eu ijanaga Ruben, Simion, Liwai, Juda, Isaka, Sebjulanca. Ruben uqa Jekobna mel matu. <sup>24</sup> Melahul Reselnaadec eu ijanala Josef Benjaminca. <sup>25</sup> Melahul Resel ugana cabi caja Bilhanadec eu ijanala Dan Naftalica. <sup>26</sup> Melahul Lia ugana cabi caja Silpanadec eu ijanala Gad Aseca. Melahul i age Mesopotemia ono Jekob basaditoin.

#### *Aisak uqa cal men*

<sup>27</sup> Odocob Jekob uqa memeg Aisakca Mamri ono nuen. Mamri eu Hebron cemenug. Cudun euna Ebraham Aisakca bilesin. <sup>28</sup> Aria Aisak ugana cabi gel cunug gabandoc eu 180. <sup>29</sup> Odocob Aisak uqa dana toia bahic uqa kis umei cal men. Ugana cabi gel eu mati bahic. Odocob uqa melahul Iso Jekobca ale deweg hel cisesin.

## 36

#### *Isona sihul*

<sup>1</sup> I eu Isona je. Iso ijan oso eu Idom. <sup>2-3</sup> Iso uqa caja Kenandec cedaden. Eu ijanaga Ada, Oholibama, Basematca. Ada uqa Elon ateg, uqa Het dana. Oholibama uqa Ana ateg. Ana memeg eu Sibion, uqa Hiwi dana. Basemat uqa Ismal ateg, uqa cebinag eu Nebaiot. <sup>4</sup> Odocob Ada uqa Iso Elifas basiton. Odocob Basemat uqa Iso Reuel basiton. <sup>5</sup> Odocob Oholibama uqa Iso Jeus, Jalam, Koraca basaditon. Mel i age eu Iso melahul, age Kenan ono basaditoin.

<sup>6</sup> Odocob Iso uqa aidegulca ugana mel simca ugana cabi danaca dool manan amca cehewanca Kenan ono bibili ceden eu cunug cedimei waliag Jekob cemenugdec qisacdu fil aluhna Sia ono nuen. <sup>7</sup> Alena cehewanala eu ben bahic. Alena dool am eu ben bahic. Eunu ale gabandu bileyce qee. Maha ale osoben bilesin eu ale lecisnu ihoc qee. <sup>8</sup> Eunu Iso uqa Sia maha aluhca ono bilen.

<sup>9</sup> Iso uqa Idom sihul eundec agena memega calen. Iso ugana sihul age Sia maha aluhca ono bilein.

<sup>10-13</sup> Aria Iso aideg Ada uqa Iso mel osahic basiton, ijan eu Elifas. Odocob Elifas aideg oso uqa mel ebum oso basaden. Ijanaga eu Teman, Oma, Jefo, Gatam, Kenasca. Odocob Elifas aideg oso, ijan Timna, uqa mel osahic basen, ijan eu Amalek.

Aria Iso aideg Basemat uqa mel osahic basen, ijan eu Reuel. Reuel aideg uqa mel wal oso basaden. Ijanaga eu Nahat, Sera, Sama, Misaca.

<sup>14</sup> Aria Iso aideg Oholibama, eu Ana ateg, eu Sibion asag, uqa Iso mel ijed basaditon. Ijanaga eu Jeus, Jalam, Koraca.

\* **35:18:** "Benoni" ugana gug eu "mel basecnu abuldon." † **35:18:** "Benjamin" ugana gug eu "melami meuladec."

<sup>15</sup> Aria Isona sihul eu odi. Iso melah matu eu Elifas. Uqa sihul i edi agena ilo bilen. Teman, Oma, Sefo, Kenas, <sup>16</sup> Kora, Gatam, Amalekca. Eu age Elifas aideg Ada asagul.

<sup>17</sup> Aria Iso melah Reuel uqa sihul i edi agena ilo bilen. Nahat, Sera, Sama, Misaca. Eu age Iso aideg Basemat asagul.

<sup>18</sup> Aria Iso aideg Oholibama, Ana ateg, uqa sihul i edi agena ilo bilen. Jeus, Jalam, Koraca.

<sup>19</sup> Iso uqa sihul cunug agena ilo bilen.

### *Siana sihul*

<sup>20-21</sup> Sia dana age casac Idom bilein, age Ho sihulnadec. Sia melahul age Idom bilein eu Lotan, Sobal, Sibeon, Ana, Dison, Ese, Disanca. Sia uqa Ho sihul agena ilo bilen. <sup>22</sup> Odocob Lotan melahul eu Hori Hemanca. Timna uqa Lotan cebinag. <sup>23</sup> Odocob Sobal melahul eu Alwan, Manahat, Ebai, Sefo, Onamca. <sup>24</sup> Odocob Sibeon melahul eu Aia Anaca. Ana i maha wadauna saen uqa memeg Sibionna cesel cofaadi biley uqa wa fifiji bec daina gilucdon. <sup>25</sup> Odocob Ana melah eu Dison. Ana ateg eu Oholibama. <sup>26</sup> Odocob Dison melahul eu Hemdan, Esban, Itran, Keranca. <sup>27</sup> Odocob Ese melahul eu Bilhan, Sawan, Akanca. <sup>28</sup> Odocob Disan melahul eu Us Aranca. <sup>29</sup> Aria Ho sihulnadec ilo dana eu Lotan, Sobal, Sibeon, Ana, <sup>30</sup> Dison, Ese, Disanca. Eu age Sia mahana agena jobon medeh filfilna ilo dana bilein.

### *Idomna ilo dana*

<sup>31</sup> Aria Isrel agena ilo dana qee biley saenna Idom hatu euna ilo dana age hatu eunu ilo bilein. Age toodocboodocob bibilegin nuon. <sup>32</sup> Bela, uqa Bio melah, uqa Idom agena hatu ilo dana calen. Uqana taun eu Dinhaba. <sup>33</sup> Aria Bela cal meceb Jobab uqa Sera melah, eu Bosradec, uqana cudun umei hatu ilo dana bilen. <sup>34</sup> Aria Jobab cal meceb Husam, uqa Teman hatunadec, uqa uqana cudun umei hatu ilo dana bilen. <sup>35</sup> Aria Husam cal meceb Hadad, uqa Bedad melah, uqa uqana cudun umei hatu ilo dana bilen. Bedad uqa Midian dana eu aqen, eu Moab hatuna. Hadad uqana taun eu Awit. <sup>36</sup> Aria Hadad cal meceb Samla, uqa Masrekadec, uqa uqana cudun umei hatu ilo dana bilen. <sup>37</sup> Aria Samla cal meceb Saol, uqa Rehobot wanadec, uqa uqana cudun umei hatu ilo dana bilen. <sup>38</sup> Aria Saol cal meceb Bal-hanan, uqa Akbo melah, uqa uqana cudun umei hatu ilo dana bilen. <sup>39</sup> Aria Bal-haran, uqa Akbo melah, cal meceb Hadad uqa uqana cudun umei hatu ilo dana bilen. Uqana taun ijan eu Pau. Uqa aideg ijan eu Mehetabel, eu Matred ateg. Matred eu Mesahab ateg.

<sup>40-43</sup> Aria Iso uqa Idom sihul cunug agena ilo bilen, uqa Idom asag. Idom agena sihul age jobon medeh filfil bileyin. Ijanaga eu Timna, Alwa, Jetet, Oholibama, Ela, Pinon, Kenas, Teman, Mibsa, Magdiel, Iramca.

## 37

<sup>1</sup> Aria Jekob uqa maha memeg bilenna eu Kenan ono bilen. <sup>2</sup> Jekobna je eu odi.

### *Josef waliagulca*

Aria Josef uqa mel haun uqana cabi gel 17 saen euna uqa waliagul, eu Jekob aidegul lecis Bilha Silpaca melemegail, gami dool cofadein. Qa Josef uqa waliagul kobil me qee leih odooin eu hu memeg sadon.

<sup>3</sup> Aria Jekob uqa toia bibilen Josef uqa cali hon. Eunu uqa Josefnu ben bahic nalug men. Odocob memeg uqa lotoc deweg cunug jahuldocnu gaga mati bahicca muditon. <sup>4</sup> Odocob Josef waliagul age memega Josefnu nalug ben bahic men eu fimeig age uqanu gemanaga ben. Eunu age je me bahic madocnu eu wawaga qee nijoloi.

<sup>5</sup> Aria witic osona Josef uqa bebelen. Odocob bebelec eu uqa waliagul saadeceb age uqanu gemanaga ben bahic ben. <sup>6</sup> Uqa maaden, "Bebelec iija bebeliga i dah meiga. <sup>7</sup> Ege wit gug cabina sog cecedoqon ijana sog eu caji tutuc taweria. Odocob agena sog eu ijana eu talildu tawimeig ijana sog amegna jogoeiga," aden.

<sup>8</sup> Odocob waliagul age madoin, "Hina egena ilo bileyganfo? Hina egena cofgec bileyganfo?" doin. Eu odi maadeceb casac gemanaga ben eu wooldoc gemanaga ben.

<sup>9</sup> Odocob Josef uqa bebelec osoha bebelen eu saaden, "Dah meiga. Ija bebelec osoha bebelem eu odi, camca jagelca malaqa 11ca age ija amina jogoeiga," aden.

<sup>10</sup> Odocob uqa bebelec eu uqa memegha sadon. Odocob memeg uqa galac mumudi madon, "Eu cel bebelec bahic? Ijaca hina aninca hina walinelca ege mele bahic hinaca humeb hina amenna jogoechnufo?" don. <sup>11</sup> Odon waliagul age uqanu gonagona mein. Qa memeg eu je maden eu cunug uqana cisdocna men.

*Ismal dana age Josef fajudi umeig Isip ono ehudi belein*

<sup>12</sup> Aria Josef waliagul age memegana dool am cofadoqaga bili Sekem ono belein.  
<sup>13</sup> Odocob Jekob uqa Josef madon, "Hina walinel age Sekem ono dool am cofadegina. Ija sulhecemin nuegan," don.

Odocob Josef madon, "Cois, eu ihoc," don.

<sup>14</sup> Odocob Jekob uqa madon, "Hina nuimeg walinel dool amca me bileigafo feciadegan. Odimeg ceseli hu mataga," don. Eunu uqa Josef suldocob Hebron maha asounadec Sekem ono nuen.

Nuimei Sekem calen. <sup>15</sup> Odocob uqa ono cabina calimei wawaladi cocobon dana oso gulucdumei sisildon, "Hina celnu fecii cobogona?" don.

<sup>16</sup> Odocob uqa jejeg hewi madon, "Ija walielnu feciigina. Ana dool am cofadegina eu hina matecnu ihocfo?" don.

<sup>17</sup> Odocob dana eu madon, "Age enedec wele beleiga. Age odi mamadegin duga, 'Gec, ege Dotan beloqa,' eegin duga," don. Eunu Josef uqa waliagul tooadi nuimei Dotan ono gulucaden.

<sup>18</sup> Qa uqa filec hohon fimeig age cemenega qee lec ninijen age qocobil cal migiannu je madi cagoin. <sup>19</sup> Odocob age madocobmadocob ein, "Bebelec dana i hec hona. <sup>20</sup> Gec hoiga, ege qagadumeb wa hel maha dunuh qelecnu. Odimeb ege madecnu, 'Dool hanca oso qu jeia,' ecnu. Odocob uqana bebelec eu mele caligianfo qeefo ege fecnu," ein.

<sup>21</sup> Qa Ruben uqa je eu dah mimei uqa Josef cal mecnadec caahadon. Odocob uqa maaden, "Ege uqa cain qocomun cal meiaun. <sup>22</sup> Ege uqa golac cain baseckoqaun. Wa hel wadauna njija ina helocomun nugian. Qa uqa deweg oso cain tudowain," aden. Ruben uqa je eu odi maaden eu uqa waliag cal mecnadec caahadumei ceseli memegca ehudi ligiannu ec cisdon. <sup>23</sup> Eunu Josef uqa waliagul cemenega leceb uqana lotoc gaga mati bahic eu hulitumeig <sup>24</sup> ehudi li wa helna helecebil non. Aria wa hel euna waca qee, eu galalec nijen.

<sup>25</sup> Odocob age sab joqaga bili bibilegin dana Ismal sihuldec age Giliaddec agena kamel mati bahic big togoctogoc hohogin feciadein. Agena kamel euna sabca cilecebil tinca mecnu euca glic dedemanca ceteteh eundec gahidu age Isip noin. <sup>26</sup> Odocob Juda uqa waliagul maaden, "Ege walining qagadumeb je jahunifeb ege eunadec cel ameg oso ocnu? <sup>27</sup> Gec hoiga, ege uqa Ismal dana ebenegana idadocnu. Qa ege uqa deweg oso cain tudioquaun. Naha, uqa ege walining ege golanige osol," aden. Odocob Juda waliagul age je eu dah mimeig uvi odi odocnu ein. <sup>28</sup> Odocob Midiandec idadec dana age cemenega hohogin Josef waliagul age Josef helnadec didocobil cali ben. Odocob age Josef Ismal ebenegana mimi meen qaig silwa 20 oin. Odocobil Ismal dana Josef ehudi Isip noin.

<sup>29</sup> Saen leih leceb Ruben haun ceseli Josef figiannu wa helna len qa Josef uqa ono qee biley. Eunu uqa uqana lotoc baladon. <sup>30</sup> Odimei uqa waliagul ceseli nui maaden, "Mel eu ono qee biley. Qila ija adi odigen?" aden.

<sup>31</sup> Eunu Josefna lotoc umeig meme oso qocobil cal meceb uqana golac euna age Josefna lotoc eu cumdoiga. <sup>32</sup> Odocobil age lotoc gaga mati eu umeig memegaca ehi belein. Odimeig madoin, "Ege lotoc gulucdoqa. Faga, eu hina melem uqana lotocfo qeefo?" doin.

<sup>33</sup> Odocob eu fimei uqa maden, "O ija melami uqana lotoc. Dool cus oso uqa jeudia. Mele bahic Josef tatali calcaldoia," en. <sup>34</sup> Eunu Jekob uqa uqana lotoc baladon. Odimei uqa gehel lotoc u tacen. Odimei uqa melahun deel mati bahic qada qaqqaji bilen. <sup>35</sup> Uqa qaqqajen melahul ategulca age wahohogdqagannu caji uqacalein. Qa age wahohogdocnu eu culen. Odocob uqa maaden, "Mele bahic ijana qada qaqqajena himec ija melamica helna nugen," aden. Eunu memeg uqana qaqqaji bilen.

<sup>36</sup> Odon Midian dana age Josef Isip ono ehudi numeig Potifaca idadoin. Potifa uqa Ferona han dana agena ilo.

## 38

### Juda Temaca

<sup>1</sup> Aria saen euna Juda uqa waliagul culadimei Adulam ono non. Uqa dana oso, ijan Hiraca, biluwassanu non. <sup>2</sup> Ono Juda uqa Kenandec caja oso fen. Uqa memeg ijan eu Sua. Odocob uqa caja eu ocob uqaca nijesin. <sup>3</sup> Odocobil uqa melca mimei mel oso baseceb Juda ijan Er qon. <sup>4</sup> Odocob uqa haun melca mimei mel oso baseceb uqa ijan Onan qon. <sup>5</sup> Odocob uqa haun mel oso baseceb uqa ijan Sela qon. Sela uqa Kesib ono basiton.

<sup>6</sup> Odocob Juda uqa melah matu, Er, uqana caja uton. Caja uqa ijan Tema. <sup>7</sup> Qa Er, Judana mel matu, uqa Tibud amegna eu qisol dana. Eunu Tibud uqa qagadocob uqa cal men.

<sup>8</sup> Odocob Juda uqa Onan madon, "Hina walining aidegca lecem nijesia. Kobol i eu odi. Hina walining uqa melca qee. Eunu hina walining aideg ocom mel basigian eu hina walining qumeg uqana sihul calitugiannu," don. <sup>9</sup> Qa Onan mel cali hoqagan eu uqana qee eu uqa don.

Eunu saen uqa waliag aidegca niniji olosi eu uqa ugana hinh eu gauc mahana basecdoloi. Euqa uqa waliag aideg mel cain baseiaunnu odoloi.<sup>10</sup> Uqa kobil odon eu Tibud amegna qisol kobil bahic. Eunu Tibud uqa qagadocob ugaha cal men.<sup>11</sup> Odocob Juda uqa cisdon, "Sela uqa Er aideg, Tema, aidegnu ocobfi uqa waliagul cal mesin eu odi cal mec dain," en. Eunu Juda uqa Tema madon, "Hina memenca ugana jona ceseli nuuga. Ono caja wij bibilem li ija melami Sela uqa ben migian," don. Odocob Tema uqa memegna jona biliigannu nuen.

<sup>12</sup> Saen mati bahic leceb Juda aideg, uqa Sua ateg, uqa cal men. Odocob gehel saen hedecob Juda uqa Timna ono ten. Uqa dana ugana sipsip bagic jejehegin feciadecnu ten. Odocob ugana danah Hira Adulamdec uqa Judaca tesin.<sup>13</sup> Saen Tema uqa Juda Timna ono sipsip bagic jehecnu tena ec dumei<sup>14</sup> uqa caja wij agena lotoc eu hulimei caja oso ola ugia bili lotoc nag osona ola jahuldon. Odimei uqa li Enaim gel cebecna bilen. Euqa Timna jic nuecna. Aria Juda melah Sela uqa wele ben men Tema uqa don qa Sela uqa Tema qee ol. Eunu uqa odi odon.

<sup>15</sup> Odocob Juda uqa humei Tema fecidodon uqa ola jahuldon. Eunu caja eu uqa wal caja ec cisdon. <sup>16</sup> Juda uqa caja eu uqa melah aideg ec qee dol. Eunu uqa uqaca jic gesacna limei madon, "Hoga, ijaca nijuwa," don.

Odocob uqa sisildon, "Hinaca nijifeu hina eeta itegan?" don.

<sup>17</sup> Odocob uqa jejeg hewi madon, "Ija meme nag oso ijana amnadec sulduhigen," don.

Odocob caja uqa madon, "Euqa cois. Hina qilaga cteh oso hina je cagu madaga meme nag oso itegan aga eu ugana gadac cinigwe itiga," don.

<sup>18</sup> Odocob uqa sisildon, "Cel oso gadac cinigwe ihigen?" don.

Odocob uqa jejeg hewi madon, "Hinana golegoleca ijain gaga mudec ctehca hinana gom hewegenia euca itadegan," don. Eunu uqa ceteteh eu utadeceb uqaca nijesin. Odocob uqa hibna melca men.<sup>19</sup> Aria Tema uqa Juda culdi limei uqa lotoc ola jahuldon eu cagasi umei caja wij agena lotoc euna haun bala falen.

<sup>20</sup> Odocob Juda uqa limei ugana ceteteh caja uten eu cedigiannu ugana danah Hira uqa meme nagca suldon. Qa ugana danah uqa caja eu qee gulucdol. <sup>21</sup> Odocob Judana danah eu dana ono bilingina eu sisiladen, "Wal caja uqa Enaim jic gesacna bilia eu ana bilia?" aden.

Qa age madoin, "Wal caja oso ene qee bilinanu," doin.

<sup>22</sup> Eunu uqa ceseli Judaca limei madon, "Ija uqa qee gulucdolum. Euha dana ono bilingina age mateiga, 'Wal caja oso ono qee bilinanu,' teiga," don.

<sup>23</sup> Odocob Juda madon, "Ceteteh uqa ceden eu hawadoga uqa cois cedeia. Ele ceteteh eu cedecnu haun sisilocohulfu age asalloqagan. Ija meme nag fajudocnu suldugaqa hina qee gulucdolum," don.

<sup>24</sup> Aria jagel ijed eu odi hedecob dana oso uqa Juda madon, "Hina melem aideg, Tema, uqa wal cajawie odoloi. Odocob qila uqa melca men," don.

Odocob Juda uqa maaden, "Ehudi ahoiga. Jana manecebil ja cijeceb cal meia," aden.

<sup>25</sup> Age ehudi aahogin Tema uqa Judaca je suldudu madon, "Ceteteh i faga. Dana ija melca miten ugananin. Gole goleca ijain gaga mudec ctehca gomca faga. Eu inna?" don.

<sup>26</sup> Odocob Juda ceteteh eu feciadimei ugana eu don. Uqa maaden, "Uqa caja ititom bahic. Uqa ija wooltec. Ija melami Sela aidegnu utoum qa qee utelem," aden. Odocob uqa haun Temaca qee nijiesin.

<sup>27</sup> Aria Temana mel sim basec saen dodoldodon mel gahca ale waugna ninijesin tebandon. <sup>28</sup> Odocob uqa mel babasen mel momodo oso eben men. Eunu caja cesuldoin eundec oso uqa golac haluna eben eu qagen. Odimei uqa maden, "I uqa casac cali hoia," en. <sup>29</sup> Qa uqa eben ceseli ocob uqa waliag cali hon. Odocob uqa maden, "Hina batawi cali hogu eu odi," en. Eunu uqa ijan Peres<sup>\*</sup> qon. <sup>30</sup> Odocob uqa waliag ebenna golac halu eu cali hocob ijan Sera<sup>†</sup> qoin.

## 39

### *Josef Potifa aidegca*

<sup>1</sup> Aria Ismal sihuldec dana age Josef ehudi Isip noin. Odocob Potifa uqa Josef Ismal dana ebeneganadec fajudi on. Potifa uqa Isipdec dana ben. Uqa Farona han dana am oso age Ferona jo cofdocnu uqa eu agena ilo. <sup>2</sup> Odocob Tibud Josefca bilen. Eunu uqa ugana cabi eu cunug me bahic calen. Uqa ugana ben Isipdec eu ugana jona bilen. <sup>3</sup> Odocob ugana ben Tibud uqa Josefca bilen eu fen. Ugana cabi uqa amegna calen eu me bahic himec euha fen. <sup>4</sup> Eunu ugana ben uqa Josefnu waug nijen. Odocob uqa Josef ugana cabi dana

\* 38:29: "Peres" ugana gug eu "batawi cali hoc."

† 38:30: "Sera" ugana gug eu "golac bahic."

matu mudon. Odimei uqa uqana joca uqana ceteteh cunugca cofdocnu cabi uten.<sup>5</sup> Saen eunadec nueceb Tibud Josefna Potifana ceteteh cunug jona bileiga euca eeldon. Josef uqa jo euna bilen. Eunu Tibud uqa ceteteh cunug jonaca cabinaca eeldon.<sup>6</sup> Odocob Potifa uqa ceteteh cunug uqana eu Josef ebenna men. Uqa ceteteh cunug cofdocnu qee cisadol. Qa sab jecnu himec eu uqa cofdon.

Aria Josef uqa ola eu fecnu galeca. Uqa dewegha fecnu galeca.<sup>7</sup> Odocob saen leih leceb uqana ben aideg Josefna ameg qon. Odocob uqa Josef madon, "Hocom ijaca nijewan," don.

<sup>8</sup> Qa uqa madon, "Cain, ijana ben jo i cofdocnu miten. Uqa ceteh oso jona bilia eunu qee cisadol. Ceteteh cunug uqana eu ija cofdugennu ebenina men.<sup>9</sup> Dana oso jona ija wooltec qee biled. Ijana ben uqa jona ceteteh cunug cofdocnu ija iten. Qa hina uqa aideg. Hina cofhecnu qee itel. Qisol kobol i adi odigen? Odimig Anut amegna silail migennu mataganano?" don.<sup>10</sup> Odocob uqa deel abesabes cunug Josef uqaca nijuwasanu ninicdon qa Josef uqaca qee nijelesin. Uqa cemenug bilecnu culoloi.

<sup>11</sup> Odocob deel osona Josef uqa cabi ugia bili jo dunuh len. Odonqa saen euna ha cabi dana leih age jo dunuh ono qee cabi olion.<sup>12</sup> Odocob Potifa aideg uqa uqana lotoc hewi didumei madon, "Hoga, ijaca nijuwa," don. Qa uqa lotoc ebenna culitotoi busalen. Odimei maha gumu calen.<sup>13</sup> Uqa lotoc ebenna culitotoi busali maha gumu cali len eu fimei<sup>14</sup> uqa cabi dana maha gumu eu utaadi maaden, "Feiga, Hibrudec i ija gemuni jona ehudi ahon eu uqa odigeceb ege majanige geia. Uqa ene hewiteceb ijaca nijewannu hoiaqa ija euiga.<sup>15</sup> Odocob uqa ija euecemin dah mimei uqa uqana lotoc ija cemeni cuculi busali maha gumu cali leia," don.

<sup>16</sup> Eunu Potifa aideg uqa Josefna lotoc eu men bibilen uqa gemug jona hon.<sup>17</sup> Odocob uqa gemug je i madon, "Hibrudec cabi dana hina eguna cabi ugianu fajudi om eu ijaca hamol hoia. Uqa ijaca nijewannu hoia.<sup>18</sup> Odocob ija euecemin uqa uqana lotoc ija cemeni cuculi busali maha gumu cali leia," don.

<sup>19</sup> Odocob Josef uqana ben aideg je eu odi madocob uqa gemag eu ja cinigwe ben.<sup>20</sup> Odocob Josef uqana ben uqana han dana maadeceb age Josef ehudimeig gihadoc jona ehi li tacudein. Gihadoc jo eu Ferona gihadoc dana bileyin euna age Josef tacecebil bilen.<sup>21</sup> Qa Josef gihadoc jona bibilen Tibud uqa Josefca bilimei uqa eeldon. Odocob dana gihadoc jo cofdoc eu Josefna waug me nijen.<sup>22</sup> Eunu dana gihadoc jo cofdoc uqa Josef gihadoc dana cunug cofadecnu muden. Odimei cabi cunug Josef ebenna men.<sup>23</sup> Aria Tibud uqa Josefca bilen. Odocob Josef uqa cabi cunug me bahic odon. Eunu dana gihadoc jo cofdoc eu uqana cabi eunu uqa qee cisadol.

## 40

### *Josef uqa bebelec gug sildec don*

<sup>1</sup> Aria saen leih leceb Ferona wain gabin hewec ilo danaca uqana bret manec ilo danaca ale Fero, uqa Isip agena ilo, odudecebilem gemag ben.<sup>2-3</sup> Odocob Fero uqa han dana maadeceb age cabi ilo dana i alenu uqa gemag ben eu cedalimeig gihadoc jona malein. Gihadoc jo eu han dana ilo uqa cofdoloi. Gihadoc jo euna Josef uqaha bilen.<sup>4</sup> Odocob han ilo i uqa Josef madon, "Hina cabi ilo dana i alena cabi dana bilegan," don.

Aria age euna bibilegin saen nag leceb<sup>5</sup> Ferona wain gabin hewec ilo danaca uqana bret manec ilo danaca ale witic osona bebelesin. Qa alena bebelec eu fil. Bebelec lecis alena gug eu fil.

<sup>6</sup> Qaslinna Josef uqa humei ale olanala gulu qeeca biblesin fezialen.<sup>7</sup> Eunu uqa sisilalen, "Celnu ale olanala gulu qeeca bilesia?" alen.

<sup>8</sup> Odocob ale jejeg hewi madosin, "Ele lecisca odi bebelowa. Qa dana oso gug sildilecnu qee biled," dosin.

Odocob Josef uqa maalen, "Gug sildec cabi eu Anutna himec. Alena bebelec satesia duga," alen.

<sup>9</sup> Odocob wain gabin hewec ilo dana uqa uqana bebelec Josef sadu madon, "Ijana bebelecnia ija wain halu olanina tatawen figa.<sup>10</sup> Wain halu eu batac ijed. Ija uqana bobog qee cifilicdoc figa. Odon bobog cifilicdodon figa. Odocob ija aig qumei ben mi wal memen figa.<sup>11</sup> Odocob Ferona wain gabin eu ija ebenina biliben ija aig eu cedimig cafdocomin Ferona gabinna noia. Odocob gabin eu uqa ebenna migia. I odi figa," don.

<sup>12</sup> Odocob Josef madon, "Bebelec gug eu i edi. Batac ijed eu deel ijed.<sup>13</sup> Odocob deel ijed hedocob Fero uqa hina enedec besihi oihimei hinana cabi ilo weledec eu haun ihigian. Odocob hina haun Ferona gabin uqa ebenna megan. Euqa hina wele uqa ebenna wain gabin molog eu odi odegan.<sup>14</sup> Qa ceteh ija mahiga eu me calecebfii ijanu me cisdogale. Ijanu Fero madoga. Odocob uqa ija gihadoc cudun inadec besitigian.<sup>15</sup> Ija qee gale tecna

Hibru agena mahanadec ehti ene ahoin. Odocob ha ija qila gihacdoc jona biliga eu ija ceteht oso qee cahuldolom. Ija gauc bahic ene ahu mitein. Eunu ijanu Fero madoga,” don.

<sup>16</sup> Odon bret manec ilo dana uqa Josef bebelec eu ugana gug me bahic dah mimei uqa madon, “Ijaha bebeliga,” don. Odocob uqa edi sadu madon, “Ija ilomina bret galelca ijed bileiga. <sup>17</sup> Galel tatacan bilia euna Ferona bret gug filfil manec figa. Qa man fufulec age galel ilomina bilia eunadec jejegin meciadiga. Ija odi figa,” don.

<sup>18</sup> Odocob Josef uqa madon, “Bebelec gug eu i edi. Galel ijed eu deel ijed. <sup>19</sup> Deel ijed hedocob Fero uqa ened besihi oihigian. Odimei uqa hina ben qetigian. Odimei nana deweg cabusuhigian. Odocob man fululec age hina cuhunin joqagan,” don.

<sup>20</sup> Aria hibna deel ijed docna eu Fero ugana basen deel. Eunu uqa sab ben ugana cabi dana iloilo eu ciliaden. Saen euna uqa ugana wain gabin hewec ilo danaca bret manec ilo danaca eu ale gihacdoc jonadec ugana cabi dana iloilo amagana besali cedalen. <sup>21</sup> Odocob uqa wain gabin hewec ilo dana eu ugana cabi weledec euna haun ehi li muden. Eunu uqa haun wain gabin Fero ebenna miton. <sup>22</sup> Qa uqa bret manec ilo dana eu nana deweg cabusudoin. Eu Josef maalen eu odi bahic toodoo odalein. <sup>23</sup> Odonqa wain gabin hewec ilo dana uqa Josefnu qee cisdo. Uqa dahig celen.

## 41

### *Josef uqa Ferona bebelec ugana gug silditon*

<sup>1</sup> Aria cabi gel lecis hedocob Fero uqa bebelen. Bebelec eu i edi. Uqa Nail wa ofna tatawen <sup>2</sup> bulmakau bobogolec eben naha gic leciscia Nail wa dunuhdec cali bein eu uqa feciaden. Age bohboh lec feciaden. Odocob age wa colna gigi jejegin feciaden. <sup>3</sup> Odocob bulmakau qehemega becca meciadecnu galeca qee age Nail wa dunuhdec cali bein eu feciaden. Odimeig age wa colna bulmakau eben naha gic leciscia age casac cali bein eu cemenega tawein. <sup>4</sup> Odocob bulmakau qehemega bec age bulmakau bobogolec eu belucadein. Odocob Fero uqa seeli cajen. <sup>5</sup> Odocob uqa haun us nijen. Odimei haun bebeli lecis dumei uqa macin eben naha gic leciscia me bahic bobogolec age macin gug osolna hanoc tatawegin feciaden. <sup>6</sup> Odocob haun macin eben naha gic leciscia fufu maha daincanadec welacadec eu cogain aqec age hanoc tatawegin feciaden. <sup>7</sup> Odocob age tawimeig macin eben naha gic leciscia bobogolec eu belucaadegin feciaden. Odocob Fero uqa seeli cajimei uqa bebelen eu don. <sup>8</sup> Qasil uqa bebelec eunu jaen qon. Eunu uqa doi mec danaca Isipdec doc danaca je sulduadeceb hocobil Fero ugana bebelec eu saaden. Euqa dana eundec oso age bebelec eu alena gugnu qee fogo dol.

<sup>9</sup> Odocob Fero ugana wain gabin hewec ilo dana uqa Fero madon, “Qila ija cahuldom eu cisdugina. <sup>10</sup> Saen osona hina hinana cabi dananu gemain ben. Odocob uqa ija ugana bret manec ilo danaca ele han dana Fero cofdogina eu ugana ilo ugana gihacdoc jona tacilen. <sup>11</sup> Aria witic osona ele leciscia bebelec filfil bebeloh. Odocob bebelec eu alena gugha osol qee. <sup>12</sup> Aria Hibrudec dana haun oso uqa ege gami bilom. Uqa hinana han dana uqa cofdoc agena ilo dana eu ugana cabi dana. Odocob ele elena bebelec sadoh. Odocob uqa bebelec eu alena gug filfil eu malen. <sup>13</sup> Uqa bebelec gug malen eu, eu odi toodoo calen. Hina ija gihacdoc jonadec besiti oitimeg ijana cabi weledecna mitem. Odocob dana oso eu age be qetecebil cal men,” don.

<sup>14</sup> Odocob Fero uqa Josefnu je suldocob age mahucwe bahic Josef gihacdoc jonadec ehudi ahoin. Odocob uqa met qumei lotoc haun tacimei uqa Fero amegna hon. <sup>15</sup> Odocob Fero uqa Josef madon, “Ija bebeliga. Qa dana oso uqa bebelec eu gug matecnu ihoc qee. Qa hina bebelec gugnu sildec ijc ija dah migi,” don.

<sup>16</sup> Odocob Josef uqa madon, “O ijana ben ija ijadodoc ihoc qee. Qa Anut ija cesultceeb hina sildihecemin wawin me nijigian,” don.

<sup>17</sup> Odocob Fero uqa Josef madon, “Ijana bebelecna ija Nail wa ofna tatawigin <sup>18</sup> wa dunuhdec bulmakau bobogolec eben naha gic leciscia cali beiga. Odimeig age wa colna gigi jejegin feciadiga. <sup>19</sup> Odocob haun bulmakau eben naha gic leciscia cali beiga. Eu age qehemega bec meciadecnu galeca qee. Bulmakau meciadecnu galeca qee eu Isip mahana oso eu odi qee felem. <sup>20</sup> Odocob bulmakau qehemega bec age tawimeig bulmakau bobogolec eu belucadeiga. <sup>21</sup> Euqa age meciadecnu galeca qee eu odi himec. Dana oso uqa meciadifei age bobogolec eu belucaidega ec qee doiaun. Odocob ija seeli cajiga. <sup>22</sup> Odocob ija ijana bebelecna macin bobogolec eben naha gic leciscia feciadiga. Macin eu gug osolna himec hahanon feciadiga. <sup>23</sup> Odocob macin eben naha gic leciscia fufu maha daincanadec welacadec eu cogain aqec age cali hohogin feciadiga. <sup>24</sup> Odocob age cali humeig macin eben naha gic leciscia bobogolec eu belucaadegin feciadiga. Ija bebelec i doi mec dana saadigaqa agena eundec oso ugana bebelec i gug silditecnu ihoc qee,” don.

<sup>25</sup> Odocob Josef uqa Fero madon, "Hinana bebelec lecis eu abesabes qee. Uqana gug eu osol. Anut uqa ceteh odigiannu ihacheia. <sup>26</sup> Bulmakau eben naha gic leciscia bobogolec macin eben naha gic leciscia bobogolecca eu gug osol. Gug eu odi. Lu saen oso caligian. Eu ninijeb li cabi gel eben naha gic leciscia ugian. <sup>27</sup> Odocob bulmakau qehemega bec macin cogain qocca euha gug osol. Lu saen eu hedocob cahel saen caligian. Euha ninijeb li cabi gel eben naha gic leciscia ugian. <sup>28</sup> Je ija mahiga eu odiwe, Anut uqa ceteh odigiannu ihacheia. <sup>29</sup> Faga, sab geh Isip maha cunugna caligian uqana saen hona. Eu uqa cali ninijeb li cabi gel eben naha gic leciscia ugian. <sup>30</sup> Qa eu hedocob cahel saen toodoo hugian. Eu cabi gel eben naha gic leciscia nijigian. Euqa cahel saen eu maha me qee mudugian. Eunu sab geh bahic nijigian saen eunu dahanaga celegian. <sup>31</sup> Cahel saen caligian eu me qee bahic nijigian. Eunu maha ina sab geh bahic ninijeb saen eunu qee cisdownain. <sup>32</sup> Aria bebelec eu bebeli lecis doga eu uqana gug eu odi. Anut uqa wele eu odi odigen imei odeia. Euga uqa saen gohincna wele odigan.

<sup>33</sup> Aria eunu Fero, hina dana cisdock gesilecca oso fimeg Isip maha i cofdocknu mudoum. <sup>34</sup> Hina sab cofdock dana Isip hatunadec gesil cedadaga. Lu saen sab cabi gel eben naha gic leciscana nijigian euna sab cofdock dana eu age sab inadec oc saenna age sab dana ebeneganadec haudumeig ila mecebile am ebum osahic caligian. Odocob am osahic eundec age hina ihuqagan. <sup>35</sup> Hina maadecem age sab lu saen hona eunadec cunug cedi haudumeig taun benna jona moqagan. Sab eu jona ninijeb eu Fero uqana. Eu hinana han dana cofdoqagan. <sup>36</sup> Sab i hibna jecnu abes moqagan. Euga cahel saen Isip hatuna calimei ninijeb li cabi gel eben naha gic leciscia ugian saen euna joqagannu abes moqagan. Isip hatun cunug cahel saenna me qee mudedainnu eu odi odegan," don.

#### *Fero uqa Josef Isip cunug agena ilo bilecnu muden*

<sup>37</sup> Josef je maden eu Fero uqaca uqana cabi ilo danaca age je dah mein eu me bahic. <sup>38</sup> Odocob Fero uqa cabi ilo dana maaden, "Ege dana oso dana i cinigwe Anutna Kis uqaca bilina oso qee gulucdoqaun," aden. <sup>39</sup> Eunu Fero uqa Josef madon, "Anut hina ceteh inu maheia. Dana oso cisdock silecca hina cinigwe oso qee biele. <sup>40</sup> Hina ijana jonus ilo bilegan. Odocob ijana dana cunug age hina con toodoo odoqagan. Ija king eunu ija himec hina woolhec biligen. <sup>41</sup> Ija qila hina Isip maha cofdocknu ilo mihibina," don. <sup>42</sup> Odocob Fero uqa ijan gaga mudec eben gicnadec umei Josef eben gicna taciton. Odocob uqa lotoc cecelac me bahic oso umei Josef taciton. Odimei gilolo golna mudec oso umei Josef benna be awiton. <sup>43</sup> Odocob Fero uqa uqana karis doc eu uteceb euna cobon. Cobocob Fero uqana han cofdock dana age aquni utai madein, "Isa qoiga! Isa qoiga!" adein. Eunu uqa Isip maha cunugnu ilo muden.

<sup>44</sup> Odocob Fero uqa Josef madon, "Ija Fero. Loo oso Isipdec hina qee madec ceteh oso qee odeaun. Uqa hina sisilhimei himec odigian," don. <sup>45</sup> Odocob Fero uqa Josef Isipdec ijan oso qon. Uqa Safenat-panea don. Odimei uqa caja oso uto. Ijan eu Asenat. Uqa Potifera ateg. Potifera uqa ihanec dana oso Heliopolis bilen. Odocob Josef uqa Isip maha cunugna coboloi.

<sup>46</sup> Aria saen euna Josef uqana cabi gel eu 30 uqa Fero Isipdec king cabi euna muden. Odocob uqa Fero cemenugnaadec culimei nui Isip maha cunugna coboloi. <sup>47</sup> Odocob lu saen cabi gel eben naha gic leciscia euna sab geh bahic maha euna calen. <sup>48</sup> Odocob Josef uqa sab cunug lu saen cabi gel eben naha gic leciscia eunadec cedi haudumei taun benbenna jona men. Taun cunug agena cabi talidu nijiein Josef uqa cabi eundec sab cedimei uqa taun euna men. Uqa taun cunugnu eu odiodi odoloi. <sup>49</sup> Josef uqa sab geh bahic haudon. Eunu uqa saniadecel len ihoc qee, mati bahic. Odocobnu uqa saniec culen.

<sup>50</sup> Odocob cahel saen qee hoc ninijen Josef uqa aideg, Asenat, uqa mel lecis basaliton.

<sup>51</sup> Odocob Josef uqa melah matu eu ijan Manasa<sup>\*</sup> qon. Uqa maden, "Anut uqa oditeceb ija ijana culumennuca ija meinuca walielnuca dahini celeia," en. Eunu uqa melah ijan eu odi qon. <sup>52</sup> Odocob uqa maden, "Anut uqa ija culumenca biley mahana mel iten," en. Eunu melah milum eu ijan Ifrem<sup>†</sup> qon.

<sup>53</sup> Aria odocob lu saen cabi gel eben naha gic leciscia Isip mahana eu cit qon. <sup>54</sup> Odocob cahel saen cabi gel eben naha gic leciscia eu sanan men. Eu Josef je maden eu odi bahic toodoo calen. Odocob cahel saen maha cunug ihoc len qa Isip hatuna eu sabca bilen.

<sup>55</sup> Saen cahel saen eu Isip maha cunug ihoc leceb dana cajaca age wen adec tebandoin. Odocobnu age Fero inoni madoin, "Sab igiga," doin. Odocob Fero dana caja Isipdec maaden, "Josefca leiga. Uqa cel je oso maadigian eu odi toodoo oideiga," aden. <sup>56</sup> Saen cahel eu Isip hatu cunug ihoc leceb Josef uqa sab jo jic hudimei Isipdec dana cajaca

\* 41:51: "Manasa" uqana gug eu "uqa odocob dahig celeia." † 41:52: "Efrem" uqana gug eu "mel basiton."

idadoqagannu suldoloi. Oodon saen euna Isip mahana cahel eu me qee bahic nijen. <sup>57</sup> Aria cahel eu hatuhatu cunugna me qee bahic ihoc li nijen. Eunu dana hatu filflnadec age Isip ono sab Josef ebennadec fajoqagannu holoig.

## 42

### *Josef waliagul age sab fajecnu Isip belein*

<sup>1</sup> Aria Jekob Isip ono sabca uqa don. Eunu uqa melahul maaden, "Age eetanu gauc billegina? <sup>2</sup> Feiga, Isip ono sabca eu ija dah mig. Age ono numeig cudun eunadec egena sab leih fajeiga. Eufi ege cebac bielecnu, ege qee cal moquaun," aden. <sup>3</sup> Odocob Josef waliagul 10 eu age sab Isipdeci fajoqagannu ono noin. <sup>4</sup> Qa Jekob uqa Josef waliag gug, Benjamin, waliagul gami qee suldol. Uqa cisdon, "Cal mec oso uqaca hoclain," en. Eunu uqa Benjamin suldocnu cucuien.

<sup>5</sup> Aria cahel saen calen eu Kenan hatuha on. Eunu Jekob melahul age sab fajoqagannu nonogin age dana leih ageha sab fajoqagannu nonogin eu osoben gabandu noin. <sup>6</sup> Aria Josef uqa hatu eu ilo bilen. Odocob uqa dana hatu cunug eunadec hocobil sab idadec cabi oloi. Odocob Josef waliagul age humeig uqa amegna jogoi nu maha cotadoin. <sup>7</sup> Saen Josef uqa waliagul meciadime uqa wele don qa uqa dana celedec cinigwe ihocon qumei uqa je gagadic sisiladen, "Age anadec hoiga?" aden.

Odocob age jejeg hewi madoin, "Ege Kenan hatunadec sab fajecnu hoqa," doin.

<sup>8</sup> Aria Josef uqa Isip je maaden. Je falicdoc dana oso Hibru je falicdon. Eunu Josef uqa waliagul meciaadi uqa don qa uqa waliagul age eu Josef ec qee doloin. <sup>9</sup> Odocob Josef uqa waliagulnubebelen eunu cisdon. Odimei maaden, "Age hannu cijawi coboc dana. Age egena hatu maha qee cofdoc nijia eu foqagannu hoiga," aden.

<sup>10</sup> Odocob waliagul age jegog hewi madoin, "Qeoo, egena ben. Ege hinana cabi dana. Ege sab fajeqannu hoqa. <sup>11</sup> Ege dana osahic melahul. Ege hannu cijawi coboc dana qee. Ege je mele madec dana," doin.

<sup>12</sup> Qa uqa maaden, "Qeoo. Age egena maha qee cofdoc nijia eu foqagannu hoiga," aden.

<sup>13</sup> Odocob age madoin, "Egena ben, ege dana osahic melahul. Ege weleca gabandoc cunug eu 12. Ege Kenan mahana biluqona. Odocob subig eu memigeca bilia qa osahic eu wele cal men," doin.

<sup>14</sup> Odocob Josef maaden, "Ija wele maadiga eu odi himec. Age hannu cijawi coboc dana. <sup>15</sup> Ija i edi temadigen. Fero amegna je cagu madigina. Waliniga subig eu ene hugian. Qeefi age cudun i qee culimeig belowain. <sup>16</sup> Age eundec oso suldochobil nui waliniga ehudi ahoia. Cunug age gihacdoc jona biluqagan. Odocob agena je eu melefo qeefo ege fecnu? Age cahuldufeig mele bahic, Fero amegna, age hannu cijawi coboc dana," aden. <sup>17</sup> Odocob uqa waliagul cunug gihacdoc jona tacadeceb deel ijed bielein.

<sup>18</sup> Aria Josef uqa deel ijed docna maaden, "Ija Anut amegna cobigina. Eunu ceteh oso odifeig age cebac biluqagan. <sup>19</sup> Age je madec eu melefo qeefo gesilecnu waliniga oso gihacdoc jona age bileiga euna cculdeig beleiga. Age cahel saennu agena talnu sab gahidumeig beleiga. <sup>20</sup> Odimeig waliniga subig eu ijaca ehudi ahoiga. Odocobilfi agena je eu mele eu feqan. Odocob age qee cal mowain," aden.

Odocob Josef maaden eu age cois ege toodu odecqan ec madoin. <sup>21</sup> Odocob age madocobmadocob i madein, "Mele bahic ceteh i egeca calena eu celnu? Ege Josef odudom eunu odigina. Ege uqana cucuiecca jaen qocca eu fecomun uqa inongigi maaden, 'Ija cahahateiga,' een ege uqa qee dah mudewce mom. Eunu culumen ben bahic qila egeca hoia," ein.

<sup>22</sup> Odocob Ruben maaden, "Ija mel eu deweg cain tudowainnu maadem qa age ija qee dah mitilein. Eunu qila ege eu odomnu uqana ameg eu ocnu," aden.

<sup>23</sup> Odonqa Josef uqa agena jena je madein eu don. Qa waliagul age eunu qee doloin.

<sup>24</sup> Odocob uqa culadi limei qajen. Qa uqa haun maadecnu gagadic mimei ceseli humei Simion iohohdumei uqana han dana maadeceb age Simion umeig age amagana eben libein.

### *Josef waliagul age Kenan ceseli belein*

<sup>25</sup> Odocob Josef uqa uqana cabi dana maadeceb age sab agena bekna taciadimeig agena meen qaig silwana mudec haun ceseli tahiadein. Jicna sab jecnu euha adeiga ec maaden. Odocob age eu odi odiadein. <sup>26</sup> Odocob Josef waliagul age agena sab udca ceselna meadimeig Isip culimeig belein. <sup>27</sup> Age cudun witic meceb nijein euna calimeig age oso uqa cesel sab utigiannu uqana bek co cufalen. Odimei uqana meen qaig silwana mudec eu bek cona bibilen fen. <sup>28</sup> Odocob uqa waliagul utaadi maaden, "Ijana qaig eu ceseli taceiga eu bek cona bibilen figa," aden. Odocob age dumanaga culen. Odocob age geleli bileig madocobmadocob madein, "Anut uqa i cel kobil ege odigia?" ein.

<sup>29</sup> Aria age Kenan hatuna calimeig age memega, Jekobca, hoin. Ceteh cunug ageca calen eu sadudu madoin. <sup>30</sup> “Dana oso, uqa hatu eunadec dana ben, uqa ege je gagadic bahic magen. Odimei uqa ege hannu cijawi coboc dana gen. <sup>31</sup> Qa ege madom, ‘Ege hannu cijawi coboc dana qee. Ege mele je madec dana. <sup>32</sup> Ege dana osol melahul. Ege waliagwaliag, cunug gabandoc eu 12. Oso eu cal men. Subig eu qila ege memigeca ono Kenan mahana bilia,’ dom. <sup>33</sup> Odocob dana ben eu magen, ‘Age mele je madec danafo qeefo eu i edi dugen. Age waliniaga oso ene ijaca culdimeig agena cahel saennu sab cedimeig agena talca nueiga. <sup>34</sup> Qa age waliniaga subig eu ehudij i jaca ahoiga. Eufi age hannu cijawi coboc dana qee. Age mele je madec dana eu ija dugen. Odocob ija age waliniaga oso i ceseli adigen. Odocob age ene idadecnu hoqagan eu ihoc,’ gen,” age memega je odi sadoin.

<sup>35</sup> Aria saen age agena beknadec sab hihidi bileig age cunug agena meen qaig badom eu age abesabes agena sab bekna bibilen fein. Odocob Jekob uqa melahul gami age eu odi fimeig age filiciti cucuiein. <sup>36</sup> Odocob age memega Jekob uqa maden, “Age ijana mel Josef cawaltein. Uqa qee bilel. Odocob Simion uqaha qee bilel. Odeiaqa qila age Benjamin cawaltoqagannu mateginafo? Age culumen i ija itegina,” aden.

<sup>37</sup> Odocob Ruben uqa memeg madudu maden, “Benjamin ija ebenina mecem ija cofdodomin belewan. Odocob haun ceseli ahu hinaca mudigen. Ija Benjamin qee ehudi ceseli hocominfi hina ija melamiel lecis eu ale qagaalaga,” don.

<sup>38</sup> Qa Jekob uqa madon, “Ija melami uqa hinaca Isip ono qee noiaun. Uqa waliag, Josef, eu wele cal men. Odonnu uqa jaih cuhanuc himec bilina. Saen uqa jicna cocobob cal mec oso uqaca hocobfi euqa colini beceb ija toia migen. Eunu ija wawi cagoc bibili helna nugen,” don.

## 43

### *Josef waliagul Benjaminica age haun Isip belein*

<sup>1</sup> Aria cahel saen eu qee qee mel. Eu me qee bahic odi nijen. <sup>2</sup> Eunu age sab Isipdec ehi bein eu ji qee mudimeig age memega maaden, “Isip haun belimeig sab leih haun fajadeiga,” aden.

<sup>3</sup> Qa Juda uqa memeg madon, “Dana eu je gagadic edi magen, ‘Age waliniaga qee hocobilfi ija amina haun qee howain,’ gen. <sup>4</sup> Hina ege waliniage eu uqaca sulgecemfi ege numeb hinana sab fajihetcnu. <sup>5</sup> Qa hina uqaca qee sulgecemfi ege qee noquaun. Dana eu uqa edi magen, ‘Age waliniaga qee hocobilfi ija amina haun qee howain,’ gen,” don.

<sup>6</sup> Odocob Jekob uqa sisiladen, “Age eetanu dana eu madoin, ‘Ege waliniage oso bilia,’ ec madoinnu edi me qee bahic oditegina?” aden.

<sup>7</sup> Qa age madoin, “Dana eu uqa egena silhuln bahic sisilgen. Uqa odi sisilgen, ‘Age memega cebac biliafo? Age waliniaga osocofo?’ gen. Odocob ege uqa sisilec eu jejeg hewom. Qa uqa edi magen, ‘Age waliniaga ene ehudi neiga,’ gen eu ege adi docnu?” doin.

<sup>8</sup> Odocob Juda uqa memeg, Jekob, madon, “Mel eu egeca osoben sulgaga. Odocob ege qila bahic cajimeb beleqan. Eufi ege qee cal moqaun. Ege cebac biclecnu. <sup>9</sup> Ija je cagu madigina. Ija uqa ene hina amenna qee ehudi ahufiq ija ja eu gahidudu li cal migen. <sup>10</sup> Ege qee dalearummi ege wele ono numeb ceseli hu lecis doum,” don.

<sup>11</sup> Odocob Jekob maaden, “Age eu odi odoqaganfi cois eu odi odoiga. Age hatu inadec ceteteh caunca leih cedimeig agena bekna tacadeiga. Age na gilic moolca dedeman me bahicca cenal cinigwe eundec pistasio almon aigca cedadeiga. Age ceteteh i age eundec nagnag cedadimeig dana eu lōo utuqagannu hewi nueiga. <sup>12</sup> Odocob age meen qaig onodec hewadi ceselein euha cedeiga. Odimeig eu tatac meen qaig haun eu uqana ameg eu casacnadec eu cinigwe eu odi ha cedeiga. Age meen qaig casacnadec bek cona tahein eu haun ceseli adoqagan. Eu cahuldu taheinfa. <sup>13</sup> Walinigaha ehudi beleiga. Odimeig qilaca caji ceseli dana euca beleiga. <sup>14</sup> Anut Gagadic Bahic uqa dana eu oduocob uqa agenu waug me nijeceb age amegna tawecibil uqa waliniaga euca Benjaminca besali adigia. Qa ijana doc odi ijana mel culdifiq cois ija culdigen,” aden.

<sup>15</sup> Eunu uqa melahul age dana ben eu loo utuqagannu ceteteh euca meen qaig hewi ceselein euca haun hewi nuecnu cedein euca cedadimeig age Benjamin ehudecebil cajimeig Isip ono noin. Odimeig age Josef amegna tawein. <sup>16</sup> Saen Josef uqa Benjamin ageca fimei uqa uqana sab cofdoc dana eu madon, “Dana i age ijana jona cedi hewi nuuga. Odimeg dool oso qocom cal meceb jecnu sciadiogga. Dana i age qila cahineg age ija gami sab jeqan,” don. <sup>17</sup> Odocob sab cofdoc dana eu Josef madon eu odi odon. Uqa Josef waliagul ehadimei Josefna jona ehadi nuen.

<sup>18</sup> Saen Josef waliagul age dana eu Josefna jona ehadi nunuen age ben cucuiein. Age odi cisdoin, “Saen ege ene hahawan nom euna age eguna meen qaig silwana badom eu ege cunug eguna bek cona tacigein. Uqa qaignu je euna um qigimeig eguna cesel cedimeig ege

cahacgi hewigimeig gihacdoc jona tacigimeig cabi gagadic iguqagan. Eunu ege ene ehigia ahona," ein.<sup>19</sup> Eunu age Josefna sab cofdoc dana euca limeig jo cebecna madoin,<sup>20</sup> "O dana ben, saen ege hahawan ene sab fajecnu nom eu<sup>21</sup> ceseli bebeloqon witic meceb us nijecnu jaen mudom eu ege abesabes eguna bek co cufalimeb ege cunug eguna qaig cunug bibilen fom. Eunu ege qila haun hewi ceseloqa.<sup>22</sup> Ege qaig leihha sab fajecnu hewi noqa. Osoqa uqa eguna qaig haun ceseli eguna beknana tacigen eu qee doqona," doin.

<sup>23</sup> Odocob uqa maaden, "Cain cisdownain. Eunu jeca qee. Cain cucuiowain. Agena Anut, age memegana Anut, uqa age qaig eu agena beknataciadenfa. Ija agena meen qaig silwana mudec eu odi," aden. Odimei uqa Simion ageca ehudi ahu muden.

<sup>24</sup> Odocob sab cofdoc dana eu uqa Josef waliagul ehadi Josefna jona len. Odimei uqa jaimiga cusecnu wa adeceeb agena cesel sabha aden.<sup>25</sup> Aria waliagul age cahineg Josefca ono sab jogagan ec doin. Eunu age Josef ceteteh loo utuqagannu saciadoin.<sup>26</sup> Odocob cahineg Josef uqa jona hocob age ceteteh loo utuqagannu ebenegana hewimeig jo hamol lein. Odimeig age uqa amegna gob cehi bilimeig jogoi nu maha cotadoin.<sup>27</sup> Odocob uqa sisiladen, "Age me biliagafo? Age memeganu madein eu uqa me biliagafo? Uqa cebac biliagafo?" aden.

<sup>28</sup> Odocob age jejeg hewi madoin, "O ben, ege memige uqa me bilia. Uqa cebac bilia," doin. Odocob age haun uqa amegna jogoein.

<sup>29</sup> Odocob uqa waliag gug Benjamin fifi maaden, "Age waliniq subig inu ija mateinfo?" aden. Odimei uqa Benjamin madon, "Anut hinanu waug me njiale," don.<sup>30</sup> Odocob Josef uqa waliagnu waug qocob qajigianu odon. Eunu uqa mahuc bahic cali len. Odimei uqa qajigianu cudun walen. Odimei uqa ugana cuamu dunuh euna limei ono qajen.<sup>31</sup> Eu hedocob uqa ola cusimei cali hon. Uqa cali humei haun qajecdainnu uqadodoc gagadic mimei ugana cabi dana maaden, "Sab qoiga," aden.<sup>32</sup> Odocob age casac Josefna sab qoin. Odimeig age Josef waliagul agena sab qoin. Odimeig age Isipdec dana ageca sab joqagannu bileen eu agena sab qoin. Qa Isip dana age Hibrus dana gami sab gabandu joqagannu qee gale adel. Eunu abes bileen.<sup>33</sup> Aria age Josef waliagul maadecebil age sab jecnu bileen eu i edi bileen. Waliaga matu uqa casac cali hon eu uqa aquni bilen. Odocob age toodocbotoodocob cali hoin eu odi bibilegin li subig cali honna cit qon. Age eu odi bileen eu fimeig age wawaga qee foto dol.<sup>34</sup> Saen cabi dana age sab Josefna sab jec cabalnadec siwiadecebil Benjamin uqa sab leih wooladec on. Uqa sab on eu dana ebum osahic jec ihocwe on. Eunu age cucuiecca qee Josef gami sab jejeig wain jejeig ein.

## 44

### *Age gabin heje oin*

<sup>1</sup> Aria Josef uqa ugana jo cofdoc dana madon, "Dana i agena beknana sab tacecebile am beia. Age gahidoc ihoc eu odi taceiga. Odimeig age osahicosahic agena meen qaig eu bek cona taceiga." <sup>2</sup> Odocob mel subig ugana beknana ijana gabin silwana mudec euca ugana meen qaig sab fajecnu euca bek cona tacitoiga," don. Odocob dana eu Josef madon eu odi odon.<sup>3</sup> Qasil cocojagen Josef uqa suladeceb age agena ceteteh ceselna meadimeig agena jicna cocobi belein.<sup>4</sup> Odocob age taun ben culdi onoca qee nuec ninijen Josef uqa ugana jo cofdoc dana madon, "Hina cajimeg dana eu age jabadi tooadi nuuga. Gulucadimeig sisiladaga, 'Age celnu kobil mena odadecemin me qeena wadacdoiga?' <sup>5</sup> Celnu age ijana benna gabin silwana mudec heje oiga? Gabin i ijana ben uqa euna gab jenanu. Odi ha uqa gabin ina doi menanu. Eu kobil me qee bahic odoiga,' adaga," don.

<sup>6</sup> Odocob uqa jabadi tooadi nuimei gulucadi je eu odi maaden. <sup>7</sup> Odocob age jejeg hewi madoin, "Egena ben, uqa je eu odi celnu madena? Ege dana ititom. Eu odocnu ihoc qee.<sup>8</sup> Faga, meen qaig eguna bek cona bilen eu ege Kenan mahananadec ceseli ahu hom. Ege silwafogolfo eguna benna jonadec adi heje ocnu?" <sup>9</sup> Ceteh eu ege oso heje ocobfi cois age dana eu qagadocobil cal migian. Odocob egeha cois gihacqoqagan," doin.<sup>10</sup> Eunu uqa maaden, "Je age madeiga eu odi himec ija odigen. Qa gabin eu in oso ugana beknana gulucdufig dana eu gihacdocnu mudigen. Odocob age cunug age dewenegana jeca qee," aden.<sup>11</sup> Odocob age mahucmahuc agena bek cesel gogodomoganaadec cacu ti mahana mimeig bek co huleladein.<sup>12</sup> Odocob uqa agena beknana cijawec sanan men. Uqa matuna beknana cijawec sanan mimei waliaga subigna beknana cit qon. Uqa cijawemei gabin eu Benjaminna beknana gulucdon.<sup>13</sup> Odocob waliagul dumanaga culeceb age agena lotoc bahalaadein. Odimeig agena ud haun cedi cesel gogodomogana mimeig ceseli taun benna belein.

<sup>14</sup> Saen Juda uqa waliagul gami Josefna jona hoin eu uqa ono bibilen age hoin. Age uqa amegna calimeig age mahucwe bahic mahana gob cehi bilimeig ubocuboc nijiein.

<sup>15</sup> Odocob Josef maaden, "Age cel kobol oditeiga? Dana ija edec ija doi mecnu ihoc ec qee doginafo?" aden.

<sup>16</sup> Eunu Juda uqa jejeg hewi madon, "Ijana ben, eeta higen? Ege cel je madecnu? Cahuldoc eu ege qee odolom. Eu adi ihachechu? Anut uqa eguna cahuldoc camasac meia. Qila hina ege gihacdona migeagan. Dana gabin uqana bekna gulucdoiga euca egeca osaben gihacdona migeagan," don.

<sup>17</sup> Qa Josef uqa maaden, "Ija eu odi odocwe qee qa ijana gabin cel dana uqana bekna gulucdoiga eu himec uqa gihacdona mudigen. Odocob age cunug cois wawaga malolca age memegaca ceseli beloqagan," aden.

### *Juda uqa Benjamin haun ocnu inonii madon*

<sup>18</sup> Odocob Juda uqa Josef cemenug timei madon, "O ijana ben, hina Feroca ale ihochic. Ijanu cain, gemain beiaun qa ija culitecem je oso mahiga. <sup>19</sup> Ijana ben, weleca hina ege sisilgem, 'Age memegacafo? Age waliniq osocaf?' gem. <sup>20</sup> Odocob ege jejein hewi mahom, 'Ege memigeca, uqa toia. Odocob ege waliniq subigca uqa ege memige toia bibilen anige basiton. Subig eu uqa waliag wele cal men. Eunu uqa anag mel osahic, uqa jaih cuhanuc. Ege memige uqa uqanu cal menu,' hom. <sup>21</sup> Odocob hina magem, 'Ehudi necebili ija amigul figen,' gem. <sup>22</sup> Odocob ege mahom, 'Mel eu uqa memeg culdecwe qee. Uqa culdecebf uqa memeg cal migian,' hom. <sup>23</sup> Qa hina magem, 'Age waliniq subig eu uqaca qee nifeig age ija amina haun qee howain,' gem.

<sup>24</sup> Eunu, ijana ben, ege ceseli belimeb ege memige hinana je i madom. <sup>25</sup> Odocob ege memige uqa magen, 'Ceseli belimeig sab leih haun fajeiga,' gen. <sup>26</sup> Qa ege madom, 'Ege nocwe qee. Ege waliniq subig uqacafi nocnu. Ege waliniq subig uqaca qee nufeb ege dana eu amegna haun qee loqaun,' dom. <sup>27</sup> Odocob ege memige uqa magen, 'Ija aideni, Resel, uqa melamiel lecis basaliten age dogina. <sup>28</sup> Odocob oso uqa ija culitimei nuen. Odocob ija madem, 'Mele bahic, uqa tuqi calcaldoiga,' em. Euqa ija haun qee felem. <sup>29</sup> Odocob age iha ija cemeninadec cocobil cal mec uqaca hocobfi age ija oditecebili wawi me qee mecca helna nugen,' uqa odi magen.

<sup>30-31</sup> Eunu, ijana ben, ege haun ceseli belocomun ege memige uqa waliniq subig eu qee fifei uqa cal migian. Uqana cebac biley eu melah subig euna bilina. Eunu ege memige uqa odidicomun waug me qee mecca helna nugian. <sup>32</sup> Odenqa ija je wele cagu ijana mei madom. Ija odi madom, 'Melem subig eu qee ceseli ehudi ahocominfi ja eu ija dewenina bibileb li cal mec gadacna caligen,' dom. <sup>33</sup> Aria, ijana ben, eunu ija hinana gihacdona jona bibilemin mel subig eu culdecem waliagul gami ceseli beleiga. <sup>34</sup> Mel eu ijaca qee belocomunfi ija meica adi ceseli nuigen? Ija eu odi odifig ija mei uqana waug me qee mec eu adi figen?" don.

## 45

### *Josef uqa waliagul camas mi ija Josef ec maaden*

<sup>1</sup> Odocob Josef qajecnu amulig bi cit qon. Odocob uqa dana amagana gagadic mecwne qeenu uqa qagai maaden, "Dana cunug age ija aminadec cali li beleiga," aden. Eunu dana cunug age calecebili Josef uqa waliagulka himec bilimeig uqa ija age waliniq ec qasali maaden. <sup>2</sup> Odocob Josef uqa co suli umei geh bahic qaqajen Isip dana onodec calein eu age dah mudein. Odocob Fero uqaca uqana talca ageha Josef qajieianu je eu doin. <sup>3</sup> Aria Josef uqa waliagul maaden, "Ija Josef. Ija mei uqa cebac biliafo?" aden. Qa age filiciteeg culunuga cacu teceb jeca qee qeleli tawein. <sup>4</sup> Odocob uqa maaden, "Ija cemeni hoiga," aden. Age eu odi odocobil uqa maaden, "Ija age waliniq Josef age Isip dana ebenevana idadoin. <sup>5</sup> Qa age qila eu odi odoinnu Cain jaen aqeaun. Age dana enedeca idadteinnu Cain cisdowain. Anut uqa ene sulten. Anut uqa age qee hoc ninijen dana qee cal mowainnu ija aquuniadi sulten. <sup>6</sup> Cahel eu maha ina cabi gel lecis docna himec ninijen hoia. Odocob cabi gel ebun osahic eu qee hedoc nijia. Saen euna sab cehecnuca ocnuca qee nijiaun. <sup>7</sup> Qa Anut ageca agena sihulca qee cal mowainnuca cal mecnadec caahahaadigianuca uqa ija aquuniadi sulten. <sup>8</sup> Eunu age ene ija qee sultelein qa Anut uqa ija ene sulten. Uqa ija Ferona cisdoc dana miten. Ferona dana cunug ija cofadigma. Isip hatu cunug ija ilo bilingina.

<sup>9</sup> Eunu mahuc bahic ija meica ceseli timeig madoiga, 'Hina melem, Josef, edi madeia, 'Anut uqa ija Isip hatu cunugnu ilo miten. Mahuc ijaca hogu. Cain daleagaun. <sup>10</sup> Hina Gosen mahana bilegan. Euqa hina ija cemeni bilegan. Hinaca hinana mel simca hina asinelca age cunug Gosen mahana biluqagan. Agena sipsip amca meme amca bulmakau amca ceteteh cunug hinana euca age ono biluqagan. <sup>11</sup> Age ono bileyebilfi ija cesuladigen. Cahel saen cabi gel ebun osahic eu hugian. Gad gad hinaca hinana talca age sawen bilimeig cal mowain,' Josef eu odi madeia,' doiga. <sup>12</sup> Feiga, aqegul amagana mecitegina.

Odocob ija wali Benjaminha uqagul amegna mecitina. Ija Josef, ija himec je maadigina. <sup>13</sup> Ija ene Isip hatuna dana ben, ijanica biliga eunu madoiga. Ceteh cunug ene wele feiga eunu ha madoiga. Odocob age mahucwe ija mei ene ehudi ahoiga,” aden.

<sup>14</sup> Odocob uqa eben qelalimei waliag Benjamin colowandumei qajen. Odocob Benjamin uqaha Josef cogadudu bili qajen. <sup>15</sup> Odocob uqa waliagul cunug cotaadimei agenu qajen. Eu cunug hedocob uqa waliagul age uqaca je madein.

<sup>16</sup> Aria Fero uqa Josef waliagul uqaca hoiga ec don saen euna uqaca ugana dana iloiloca age wawaga ceelen. <sup>17</sup> Odocob Fero uqa Josef madon, “Hina waliniel edi maadaga, ‘Agena cesel cunug jajadimeig ceseli Kenan mahana beleiga. <sup>18</sup> Odimeig age memegaca agena talca cedadimeig ehadi ijaca ahoiga. Odocobil ija Isip hatuna maha me bahic oso, maha cunug wooladec, oso adigen. Odocob age sab me bahic hatu eunadec joqagan,’ adaga. <sup>19</sup> Je ha maadaga, ‘Karis leih ene Isipdec cedimeig nui ono age aidagailca agena mel simca tacadi ahoiga. Age memegaha ehudi ahoiga. <sup>20</sup> Agena ceteteh culecnu cain cisdowain. Isip hatunadec ceteh cauncaca eu adigen,’ eu odi maadaga,” don.

<sup>21</sup> Odocob Jekob melahul age Fero maaden eu odi odoin. Josef uqa Ferona je toodumei waliagul karis leih aden. Odimei sab jicna joqagannu ha aden. <sup>22</sup> Uqa waliagwaliag cunug lotoc haunhaun aden. Qa Benjaminnu eu uqa lotoc haunhaun ebum osahic utaden. Odimei uqa meen qaig silwana mudec eu 300 eu odi uten. <sup>23</sup> Odocob uqa memegaca ceteteh Isip hatunadec ceteteh cauncaun eu cesel 10 age gahidoin euca sab uqa memeg saen uqa jicna cocobi bilei jigiannuca eu cesel 10 age gahidoin euca suldon. <sup>24</sup> Odimei uqa waliagul suladeceb belein. Age bebelegin uqa maaden, “Age jicna cain fee dadanowain,” aden.

<sup>25</sup> Odocob age Isipdec Kenan hatuna memega Jekobca bein. <sup>26</sup> Odocob age Kenan bimeig memega edi madoin, “Josef qee cal mel. Uqa cebac bilia. Mele bahic uqa Isip hatu cunug eu cofdociu uqa ilo bilia,” doin.

Odocob Jekob uqa filiciten qa uqa je eunu waug qee meleel. <sup>27</sup> Odonqa saen age Josefna je eu sadodoig karis uqa tacudi ehudi nocnu Josef suldon eu fimei uqa waug togdon. <sup>28</sup> Odocob Jekob uqa maden, “Eu mele bahic! Ija melami Josef uqa gaid cebac bilia. Ija nui fimig cal migen,” en.

## 46

### *Jekob uqana talca Isip belein*

<sup>1</sup> Eunu Jekob uqa uqana cetetehca Isip nuen. Uqa Biasiba ono calimei uqa memeg Asakna Anut eu ihandon. <sup>2</sup> Odocob witicna Anut uqa Jekob ola codocna edi madon, “Jekob, Jekob,” don.

Odocob uqa je jeg hewi madon, “Tja i hen,” don.

<sup>3</sup> Odocob Anut uqa madon, “Ija Anut, ija memenna Anut. Hina Isip nocnu cain cucuiaagan. Ija odocna ono hinana sihul eu mati bahic fulusdoqagan. <sup>4</sup> Ija hinaca Isip nowan. Odocob mele bahic ija hina haun ceseli ehihi bigen. Odocob hina Josef ebenna cal Megan,” don.

<sup>5</sup> Odocob Jekob uqa Biasiba culdimei nuen. Odocob Jekob melahul age memegaca aidagailca agena mel simca karis Fero memega tacuduqagannu aden euna tacadimeig ehadi belein. <sup>6</sup> Odocob Jekob uqa uqana sihul cunugca gami noin. Uqana dool mananca ceteteh cunug Kenan mahana ono bibili bilei cedaden eu cunug cedadec Isip ono belein. <sup>7</sup> Uqa melahulca uqa asagul danaca uqa ategulca uqa asagul cajaca uqana sihul cunugca odi cedadimei ehadi uqaca Isip noin.

<sup>8</sup> Aria i eu Jekob uqa melahul ijanaga, euqa Jekob uqa gami Isip ono noin. Ruben uqa Jekob melahul matu. <sup>9</sup> Ruben melahul eu ijanaga Hanok, Palu, Hesron, Kameca. <sup>10</sup> Simion uqa melahulca eu ijanaga Jemuel, Jamin, Ohad, Jakin, Soha, Saolca. Saol uqa Kenan cajanadec calen. <sup>11</sup> Liwai uqa melahulca eu ijanaga Geson, Kohaf, Merarica. <sup>12</sup> Juda uqa melahulca eu ijanaga Er, Onan, Sela, Peres, Sinaca. Aria Er Onanca ale Kenan mahana cal mesin. Odocob Peres uqa melahul eu ijanala Hesron Hamulca. <sup>13</sup> Isaka uqa melahulca eu ijanaga Tola, Pua, Jasub, Simronca. <sup>14</sup> Sebjulan uqa melahulca eu ijanaga Seret, Elon, Jalelca. <sup>15</sup> Lia uqa melahul i age Jekob Mesopotemia ono basaditon. Uqaha ateg oso, Daina, ono basiton. Jekobna mel mel aidca age Lia uqa anaga bilen cunug gabandoc eu 33.

<sup>16</sup> Aria Gad uqa melahulca eu ijanaga Sifion, Hagi, Suni, Esbon, Eri, Arodi, Arelica. <sup>17</sup> Ase uqa melahulca eu ijanaga Imna, Iswa, Iswi, Beria, age cebinamaga Seraca. Odocob Beria melahul lecis eu ijanala Hiba Malkielca. <sup>18</sup> Dana i age eu Silpa melahul. Silpa uqa Liana cabi caja Leban uqa uten. Uqa melahul i age Jekob basaditon eu cunug gabandoc eu 16.

<sup>19</sup> Aria Jekob aideg Resel uqa mel lecis basaliton. Eu ijanala Josef Benjaminca. <sup>20</sup> Odocob saen Josef uqa Isip ono bibilen aideg, Asenat, uqa mel lecis Josef basaliton. Eu ijanala Manasa Ifremca. Asenat uqa Potifera ateg. Eu Heliopolis ihanec dana. <sup>21</sup> Aria Benjamin uqa melahulca eu ijanaga Bela, Beke, Asbel, Gera, Naman, Ehi, Ros, Mupim, Hupim, Adca. <sup>22</sup> Eunu Jekobna mel age Resel uqa anaga bilen eu cunug gabandoc eu 14.

<sup>23</sup> Aria Dan melah eu Husim. <sup>24</sup> Naftali uqa melahulca eu ijanaga Jasel, Guni, Jese, Silemca. <sup>25</sup> Dana i age eu Bilha melahul. Bilha uqa Reselna cabi caja Leban uqa uten. Uqa melahul i age Jekob basaditon. Eu cunug gabandoc eu eben naha gic leciscas.

<sup>26</sup> Dana cunug Jekob uqana silih bahic uqa gami Isip belein eu gabandoc 66. Euqa Jekob melahul aidagailca qee gabandu sicanadec. <sup>27</sup> Josef aideg mel manahal lecis Isip ono basalen. Eunu Jekobna tal cunug gabandoc Isip noin eu 70.

#### *Jekob uqana talca Isip ono bilein*

<sup>28</sup> Aria Jekob uqa Juda aquni Josefca suldon. Uqa Josef madocob Gosen maha eu ana nijia eu dado mudigiannu suldon. <sup>29</sup> Odocob age Gosen cacalegin Josef uqa uqana karis saciadumei memeg Jekob gulucdugiannu nuen. Saen Josef uqa memeg gulucdumei uqa eben limei memeg colowandudu saen cecelacca uqanu qajen. <sup>30</sup> Odocob Jekob uqa Josef madon, "Qila ija cal mecnu ihoc. Ija ijadodoc hina cebac gaid biliga eu mecihiga," don.

<sup>31</sup> Odocob Josef uqa waliagulca memeg uqana talca maaden, "Ija Feroca timig ija walielca ija mei uqana tal eu Kenan mahana bilegina age ijaca hoiga ec madugen. <sup>32</sup> Age sipsip cofadec dana. Age dool cofadeginanu. Eunu age agena dool am cunugca agena ceteteh cunugca cedimeig hoiga ec madugen. <sup>33</sup> Saen Fero uqa utaaideceb uqaca lecebil edi sisiladecebf, 'Age cel cabi oginanu?' adecebf <sup>34</sup> age odi jejeg hewi madogagan, 'Egena ben, ege dool simnadec cofaadi ben mom. Ege memigeil odoloig eu odi dih odoqona,' doqagan. Age eu odi madocobilfi uqa age Gosen mahana biluqagan eunu cois adigian," aden. Aria Isip dana age dool cofadec dananu qee gale adena. Eunu Josef eu odi maaden.

## 47

<sup>1</sup> Odocob Josef uqa waliagul ebum oso ehadi li Feroca calimei madon, "Ija meica ija walielca agena dool amca agena ceteh cunug euca Kenan mahanadec hoiga. Age qila Gosen bileiga," don. <sup>2</sup> Odocob Josef uqa waliagul ebum osahic eu nesili cedadimei Fero amegna ehadi len.

<sup>3</sup> Odocob Fero uqa Josef waliagul sisiladen, "Age cel cabi oginanu?" aden.

Odocob age jejeg hewi madoin, "Egena ben, ege sipsip cofadec dana. Euqa ege memigeil odoloigwe odoqona. <sup>4</sup> Cahel saen Kenan mahana eu me qee bahic nijia. Odocob eguna dool amnu eu sabca qee. Eunu ege qila Gosen ono culigecem bileqannu sisilhqona," doin.

<sup>5</sup> Odocob Fero uqa Josef madon, "Hina memenca hina walinelca age hinaca hoiga. <sup>6</sup> Eunu Isip maha eu hina ebenna bilia. Cel maha me bahic oso fimeig memen walinelca euna madaga. Gosen ono madecem biluqagan eu cois. Odocob hina walinel eundec oso uqa dool cofadencu doc qataneccaffi uqa ijana dool cofadiginanu ilo muduga," don.

<sup>7</sup> Odocob Josef uqa memeg Jekob Fero amegna ehudi len. Odocob Jekob uqa Fero eeldoc je madon. <sup>8</sup> Odocob Fero uqa Jekob sisildon, "Hinana cabi gel ganic?" don.

<sup>9</sup> Odocob uqa jejeg hewi madon, "Ijana cabi gel eu 130. Odocob ija maha filfilna geh bahic loldudu cobem. Qa cabi gel eu cecelac qee, eu gohic. Ijana loldudu coboc eu columen mati bahicca. Ija memiel loldudu coboin eu cabi gel mati bahic. Eu wooldoc ijana cabi gel," don. <sup>10</sup> Odocob Jekob uqa Fero eeldoc je haun madon. Odimei uqa Fero amegnadek cali li nuen. <sup>11</sup> Eunu Josef uqa memega uqa waliagulca Isip ono madecib bilein. Odimei uqa maha eunadec ceteteh cauncaca eu aden. Maha Fero ihacadan eu ijan Rameses. <sup>12</sup> Odocob Josef uqa memegnuca waliagulnuca memegna talnuca mel simnuca sab ihoc siwiaden.

#### *Cahel saen*

<sup>13</sup> Odocob cahel eu me qee bahic nijen. Eunu maha cunug sabca qee men. Odocob Isip Kenanca dana age wennu gagadicca qee mein. <sup>14</sup> Odocob Josef uqa meen qaig sab fajecnu gulucdu haudumei Ferona jona ehi len. <sup>15</sup> Aria dana cajaca Isipdec Kenandeca agena meen qaig qee meceb Isip dana age humeig Josef madoin, "Sab igiga. Qee igejemfi ege cal meqan. Cesulgaga. Egena meen qaig ji hedoqa," doin.

<sup>16</sup> Odocob Josef uqa maaden, "Agena dool manan ahoiga. Agena meen qaig eu qee mecebfi ija eu wadadocnu sab adigen," aden. <sup>17</sup> Eunu age agena hosca sipsipca memeca bulmakauca ceselca Josefca ahocobil uqa eu wadadocnu sab aden. Odocob Josef uqa cabi gel euna eu odi odon. Agena dool manan cunug ahocobil uqa eu wadadocnu sab aden.

<sup>18</sup> Odocob cabi gel eu hedocob eu cabi gel haunna uqaca hoin. Odimeig madoin, "Egena ben, ege hina amenna je mele eu jahunecwe qee. Egena qaig eu qee men. Euqa eguna dool manan hina wele ihom. Ege ceteh oso hina ihecnu qee bilel. Qa ege dewenigeca eguna mahaca himec bilia. <sup>19</sup> Cain culigecem cal moquaun. Cain culecem eguna maha me qee meiaun. Egeca eguna mahaca fajigi oigiga. Odocob egeca eguna mahaca eu Ferona bielecnu. Sab aig igeceg ege eu cehimbej jiji cebac bielecnu eu odifi ege qee cal moquaun," doin.

<sup>20</sup> Eunu Josef uqa Isip maha cunug eu Ferona fajiton. Cahel saen eu ageca me qee bahic nijen. Eunu Isipdec dana cunug age agena maha idadecnu suldoin. Eunu maha cunug eu Fero faji on. Odocob uqa muguh bilen. <sup>21</sup> Odocob Josef uqa dana cajaca Isip maha gadac osonadec nueceb osona gadac eu age cunug fajadi on. <sup>22</sup> Odonqa Josef uqa ihanec dana agena maha qee faji ol. Fero uqa meen qaig agenu ihoc bielecnu aden. Eunu ihanec dana age agena maha idadecnu qee suldoloin. <sup>23</sup> Odocob Josef uqa dana cajaca maaden, "Aria feiga, qila ija ageca agena mahaca Ferona fajaditom. Eunu agena sab aig i hen. Cedimeig mahana ceheiga. <sup>24</sup> Odocob sab wal mec saenna age sab cedimeig am ebum osahicna ila mimeig age am eundec oso Fero utuqagan. Odimeig am wal oso eu agena. Euqa agena eu aig cehecnua sab jecnua biligian. Aig leih cabina cehoqagan. Leih ageca agena talca joqagan," aden.

<sup>25</sup> Odocob age madoin, "Hina cebac bieleqannu cesulgagana. Hina me bahic eelgagana. Eunu ege agena ben Ferona bieleqan," doin.

<sup>26</sup> Eunu Josef uqa je sab cedimeig am ebum osahicna ila mimeig age am eundec oso age Fero utuqagannu maaden eu gagadic mudeceb loo oso Isipna calen. Loo eu qilaha gaid njija. Euqa odi sab am eundec oso Fero uteginanu. Ihanec dana agena maha himec eu Ferona qee njiel.

### *Jekobna cit qoc je*

<sup>27</sup> Aria Isrel dana caja age Isip ono Gosen mahana bielein. Odimeig age cehewanagaca mein. Odocob age fulusdumeig mati bahic calein. <sup>28</sup> Odocob Jekob uqa Isip ono cabi gel 17 bilen. Odocob uqana cabi gel cunug gabandoc eu 147. <sup>29</sup> Aria Jekob uqa cal migia bili uqana saen dodoldodon uqa melah Josef utadocob hocob madon, "Hina eben tucumi gemo mimeg je madegan eu cagu madaga, 'Ija Isip ene cain hel cisihigaun,' aga. <sup>30</sup> Ija cal mec saenna hina ehiti nui ija asiel nijeigana ono hel cisitiga," don.

Odocob Josef uqa je jeg hewi madon, "Hina madaga eu odi odigen," don.

<sup>31</sup> Odocob Jekob madon, "Cois je cagu madaga," don. Odocob Josef uqa odi odigiannu je cagu madon. Odocob Jekob uqa uqana cabalna bilimei inondocna Anut hetaga don.

## 48

### *Jekob uqa Ifrem Manasaca eelalen*

<sup>1</sup> Aria ceteh i hedocob saen leih leceb age Josef madoin, "Hina memen uqa hag njija," doin. Eunu uqa melahul lecis Manasa Ifremca ehaleceb lein.

<sup>2</sup> Saen Jekob uqa edi madocobil, "Hina melem Josef uqa hinaca hoia," docobil uqa gagadic mamei caji cabalna bilen.

<sup>3</sup> Odocob uqa Josef madon, "Anut Gagadic Odocca uqa Kenan mahana Lus ono ijaca calimei ono uqa eeltiti <sup>4</sup> je edi maten, 'Ija odocna hina fulusdumeg mati bahic calegan. Hina sihul mati calegan. Odocob ija maha i hinana sihul hina toohi cali hoqagan eu adigen. Maha i agena gaid bieleceb catanigian,' ten. <sup>5</sup> Aria hina melem lecis ija Isip ene hinaca qee hoc ninijen cali hosin eu ale ijana mel bilesia. Ifrem Manasaca ale ijana mel Ruben Simionca cinigwe calowasan. <sup>6</sup> Hina melemenel haun melem lecis i ale tooali cali hocobil eu age ijana mel qee calowain. Hina melemenel eu age ceteh age mugumuga mec eu Ifrem Manasacanadec cedoqagan. <sup>7</sup> Ija Reselnu odi odigina. Ija Mesopotamiadec ceceseling Resel uqa Efrat cemenug Kenan mahana cal men. Odocob ija uqanu wawi ben me qee men. Eunu ija Efrat ono jic gesacna hel cisem," don. Qila Efrat eu Betlehem.

<sup>8</sup> Odocob Jekob uqa Josef melahul lecis eu mescalimei uqa sisildon, "Mel i ale indec?" don.

<sup>9</sup> Odocob Josef uqa memeg jeg jeg hewi madon, "Eu ija melamiel lecis Anut uqa Isip ene iten," don.

Odocob Jekob uqa madon, "Ehali ijaca hocom eelaligen," don. <sup>10</sup> Aria Jekob uqa toia mennu ameg eu me bahic qee. Uqa meci ciuhadocwe qee. Eunu Josef uqa melahul eu memeg cemenug ehali leceb uqa cotaali cogaaen. <sup>11</sup> Odocob Jekob uqa Josef madon, "Ija hina olain haun qee figaun em qa qila Anut odocna ija hina melemenelha meciadigina," don. <sup>12</sup> Odocob Josef uqa melahul eu ale uqa memegna gobnadec cedalen. Odimei uqa du qahi mahana non.

<sup>13</sup> Odocob Josef uqa melahul lecis eu cedalen. Odimei Ifrem Jekob eben ansena isec muden. Odocob Manasa Jekob eben meulana isec muden. Odimei ehali memega cemenug len. <sup>14</sup> Odonqa Jekob uqa eben wadacalimei eben meula eu Ifrem ilona men qa Ifrem uqa milum. Odimei uqa eben anse eu Manasa ilona men qa Manasa uqa matu.

<sup>15</sup> Odocob uqa Josef eeldudu je edi maden,

"Anut ija memiel Abraham Aisakca ale uqa amegna cobosin  
uqa mel i ale eelaleiale.

Anut ija cofteten cocobi hu

qila saen ina gadac uqa eelaleiale.

<sup>16</sup> Ensel ija aisais me qeenadec besiti oiten eu  
uqa mel i ale eelaleiale.

Odocob ija ijanica ija memiel ijanagaca eu aleca bileiale.

Odocob alena sihul mati bahic fulusdosiale," en.

<sup>17</sup> Aria Josef uqa memeg eben meula eu Ifrem ilona memen fimei uqa eu odinu waug qee nijel. Eunu uqa memeg eben eu umei waldu ehi li Manasa ilona mecnu odon.

<sup>18</sup> Odimei Josef uqa madon, "O mei eu odi qee. I eu uqa matu hina eben meula eu i ilona maga," don.

<sup>19</sup> Qa uqa memeg cuculi bili madon, "O melami, ija dugina, ija dugina. Uqaha uqana sihul hibna sihul ben oso caloqagan. Qa uqa waliag milum eu uqana sihul age benben caloqagan. Euqa uqa matuna sihul wooldoc caloqagan," don.

<sup>20</sup> Eunu uqa deel euna eelali maden, "Isrel age ale ijanalana eel docobdocob oqagan. Age madoqagan, 'Anut odocob age Ifrem Manasaca cinigwe caleigale,' oqagan," en. Eunu Jekob uqa eeldoc je euna Ifrem Manasa aqunitu men.

<sup>21</sup> Odocob Jekob uqa Josef madon, "Ija cal mige doddodudugin hina fecitem. Qa Anut uqa hinaca biligian. Odimei ehihi nui hina asinel agena mahana mihigian. <sup>22</sup> Sekem, maha laloca, ija Amo dana ebeneganadec, sign qalicana cacadi cawaladem, maha eu hina walinel qee adigaun qa hina ihigina," don.

## 49

### *Jekob hahun je maaden*

<sup>1</sup> Odocob Jekob melahul cunug utaaideceb hocobil maaden, "Alitti tawcebil ceteh oso hibna caligian eunu maadigen.

<sup>2</sup> Jekob melahul age, cegulimeig dah meiga. Age memega Isrel dah mudeiga.

<sup>3</sup> Ruben, hina melami matu, hina ijana gagadic odoc.

Saen ija dana ibuldom eu hina ijana mel matu calem.

Hina ijain eu ben bahic,

hina uwein eu gagadic odocta.

<sup>4</sup> Hina wa sil quhulina cinigwe.

Qa hina ijana cabi caja, ija aideni cinigwe, euca nijesin.

Odocob hina ija majani hewitem.

Eunu hina matu cudun qee ogaun.

<sup>5</sup> Simion Liwaica ale waliagwaliag.

Alena han signin eu hannu gelehinca.

<sup>6</sup> Ale gemanala beceb dana leih aqeceil cal mein.

Odimesi ale udocnu bulmaku jaimiga qahiqahe belesin.

Eunu ija alena je jahuni madecna qee gabanaligaun.

Odocob ija alena cegulecna qee biligaun.

<sup>7</sup> Alena gemanala eu gagadic bahic eunu ija geldugina.

Ale olohonola eu me qee bahic eunu ija geldugina.

Ija odocomin age Isrel mahana qatani bilisadoqagan.

Ija odocomin age filigandumeig

Isrel dana gami gabandoqagan.

<sup>8</sup> Juda, hina walinel age hina binain suluqagan.

Hinana cad benega hewegan.

Hina walinel age hina amenna dunuga qahoqagan.

<sup>9</sup> O Juda, hina laion haun cinigwe.

Uqa dool qumei uqana cudunna ceselena.

Uqa titiqimei nijina.

Oso uqa seelecnu qee tulidona.

<sup>10</sup> Juda uqa ilo uqana gom hewigian.

Odocob uqana sihul age himec gaidgaid maha ilo biluqagan.

Uqa ilo bibileb  
 dana mahamaha cunug agena bagol utecnu hoqagan.  
 11 Uqana cesel wain gugna qagigian.  
 Uqana cesel haun wain me bahic batacna qagigian.  
 12 Uqa uqana lotoc ceteteh wain muhucna cusigian.  
 Uqa aig eu gagatucca wain muhuc cinigwe.  
 13 Sebjulan uqa macas gesacna biligian.  
 Uqana lanna eu macas tiliec nijigian eu  
 wag benbennu me bahic.  
 Uqana maha gadac eu nui Saidon gadac.  
 14 Isaka uqa cesel gagadicca cinigwe.  
 Uqa ud lecis gemo nijina.  
 15 Qa uqa jaen mudec cudun me bahic fena.  
 Odocob maha eu fecnu galeca fena.  
 Eunu uqa ud gahidocnu gob qahi biligian.  
 Age madocobil uqa cabi dana meceb cabi gagadic utuqagan.  
 16 Dan uqa uqana dana cajaca gesiladigian.  
 Euqa age Isrel jobon medeh leih cinigwe.  
 17 Dan uqa man sononec jic gesacna cinigwe caligian.  
 Euqa man sononec aqi jeceb cal meginanu.  
 Uqa hos jaih bisoc qu jenanu.  
 Odocob hos uqa dana queludeceb ijag tagtag toninanu.  
 18 O Tibud, hina ija cahahategannu sumihigina.  
 19 Gad uqa heje dana hejenu humeig uqaca han moqagan.  
 Qa uqa waldumei jabadigian.  
 20 Ase uqana maha eu sab me bahic caligian.  
 Uqa sab saciadugian eu kingna sab cinigwe.  
 21 Naftali uqa dia, uqana gawecna cobona, cinigwe.  
 Uqa dia nag galecaca basadena cinigwe.  
 22 Josef uqa cesel cus cinigwe.  
 Uqa hos cus aluh nagna tawena cinigwe.  
 23 Uqana cad uqaca han mecnu gagadic hogina.  
 Age olohonogana uqa qocnu qali gusegina.  
 24 Qa Jekobna Anut Gagadic Odocca eu  
 uqa gagadic odoc utina.  
 Anut eu uqa Isrel agena cofadec, uqa Isrelna gagadic odoc.  
 Eunu uqana qali eu iilalecca qee tawena.  
 Odocob uqa uwens eu gagadicca.  
 25 Hina memen uqana Anut eu cesulhena.  
 Anut Gagadic Odocca uqa eelhena.  
 Uqa edi eelhena.  
 Wa ohisdec ihena.  
 Wa tut maha dunuhdec ihena.  
 Mel sim mati bahic ihena.  
 26 Macin bobogca ihena.  
 Aluh ihena.  
 Aluhnadec ceteteh me bahic gaid bileceb catanigian eu ihena.  
 Ceteteh i cunug Josef ilona biliale.  
 Ceteteh i dana uqa waliagul qisacadi bilina eu  
 uqa ilona biliale.  
 27 Benjamin uqa qa cus hanca cinigwe.  
 Qasil uqa uqana dool sabnu qon eu jena.  
 Wesu uqa ceteteh hannadec cedena eu ila mena,” en.  
 28 I age eu Isrel agena jobon medeh 12. Odocob i eu eeldoc je age memega odi maaden.  
 Uqa eeldoc je cunug agenu osahicosahic aden eu agenu ihoc filfil siwiaden.

### *Jekob cal meceb hel cisein*

<sup>29</sup> Odocob Jekob uqa melahul je gatiti edi maaden, “Ija asiel cal mein eu gami nuecnu saen eu dodoldona. Ija cal mecemin ija asiel gami meen hel Efron Hitdec uqana cabina nijina ono hel cisiteiga. <sup>30</sup> Meen hel eu Makpela cabina euqa Mamri cemenuug Kenan mahana nijia. Meen hel eu Ebraham uqa qalqalnu Efron Hitdec dana ebennadec cabi

euca faji on.<sup>31</sup> Ono Ebraham uqa aideg Saraca hel cisalein. Ono Aisak uqa aideg Rebekaca ale hel cisalein. Ono ija Lia hel cisem.<sup>32</sup> Cabi meen hel euca Ebraham uqa Hit dana ebenganadec faji on. Ono ija hel cisiteiga,” aden.

<sup>33</sup> Aria Jekob uqa je gatiti melahul maadimei uqa jaih mahananadec suli u cabalna men. Odimei uqa siw ehi bi helimei kis on.

## 50

<sup>1</sup> Odocob Josef uqa memeg tatacan tonimei qaqaji bili memeg cotadon. <sup>2</sup> Odocob Josef uqa uqana cabi dana maadeceb age memeg deweg saen cecelac nijigiannu mool joudiein. <sup>3</sup> Odocob dana eu age Josef memeg deweg hel ciseccnu saciadodogin deel 40 ihoc len. Deel 40 eu cal mecebil hel cisadecnu dewenega ganac saciadogina uqana gadac bahic. Odocob Isipdec dana age Jekobnu deel 70 qadaca bilein.

<sup>4</sup> Odocob qadaca biley saen eu hedocob Josef uqa Ferona dana iloilo eu age maaden, “Ija coni umeig Fero maduteiga. <sup>5</sup> Edi madoiga, ‘Saen ija mei uqa cal migia bili bibili biley uqa oditeceb ija je cagu madem. Ija uqa meen hel uqa saciadon Kenan mahana nijia ono hel cisidugen em. Eunu culitecem ija nuimig ija mei hel cisimig haun ceseli hugen,’ doiga,” aden.

<sup>6</sup> Odocob Fero uqa wadacdoc je ceseli suldumei madon, “Hina memen odi odiheceb je cagu madem eu odi odoga. Timeg memen hel cisiga,” don.

<sup>7</sup> Eunu Josef uqa memeg hel cisigliannu ten. Odocob Ferona dana iloilo cunugca uqana jonadec dana matu cunugca Isipdec dana benben cunugca age Josef gami belein.

<sup>8</sup> Úqana talca uqa waliagulca uqa memegna talca eu cunug uqaca belein. Agena mel simca sipsipca memeca bulmakauba age himec Gosen ono biley. <sup>9</sup> Dana karisnaca hos ghaddoin agheda uqa gami belein. Euqa dana am ben bahic belein.

<sup>10</sup> Belimeig age wit tudoc cudun, Atad eu Jodan cemenug, ono calimeig age ono haun conoga suli umeig qada ben bahic qajein. Odocob Josef uqa ono deel eben naha gic lec исца haun qada qaqaji gehel biley. <sup>11</sup> Aria dana cajaca Kenan mahananadec age wit tudoc cudun, Atad, ono qada qaqajegin meciadimeig age madein, “I eu Isip agena gehel ben,” ein. Eunu cudun eu Jodan cemenug eu ijan Abel-Misraim\* qoin.

<sup>12</sup> Eunu Jekob melahul age uqa maaden eu odi odoin. <sup>13</sup> Age gahidu ehi belimeig Kenan mahana meen hatin Makpela cabina nijia, eu Mamri cemenug, ono hel cisein. Meen hatin euca cabica osoben Ebraham uqa qalqalnu Efron Hit dana ebennadec faji cedalen. <sup>14</sup> Odocob Josef uqa memeg hel cisi hedumei uqa waliagulca dana cunug uqaca memeg hel cisuqagannu tein eu gami age haun ceseli Isip noin.

### *Josef waliagul qee cucuiowainnu je maaden*

<sup>15</sup> Aria Josef waliagul age memega cal meceb fimeig age madein, “Adi Josef uqa egenu gaid gemag benafa. Ege me qee odudom. Eunu wadacdugianfa?” ein. <sup>16</sup> Eunu age Josef je edi suldutumeig madoin, “Ege memige uqa qee cal mec bibili biley <sup>17</sup> hina mahecnu magen. Uqa edi magen, ‘Hina walinel me qee odihein eu dahin celeiale. Hina silail eu cagasiadagale,’ gen. Eunu hina qila ege, hina memen uqana Anutna cabi dana, ege me qee odihom eu cagasiigiga,” doin. Saen Josef uqa je suldoin eu dah mimi uqa qajen.

<sup>18</sup> Odocob uqa waliagul age agedodoc hu mahana bilimeig dunuga qaqqahi madoin, “Ege hinana cabi dana,” doin.

<sup>19</sup> Qa Josef uqa maaden, “Cain cucuiowain. Ija Anutwe uqana cudunna qee tawigaun.

<sup>20</sup> Age me qee oditecnu odoin qa Anut uqa odocob ija me biley. Euqa ija dana ben miten. Eunu ija dana cajaca mati bahic cal mecnadec caahaaadecnu ihoc. <sup>21</sup> Eunu Cain cucuiowain. Ija ageca agena mel simca cofadigen,” aden. Odimei uqa cesuladecnu je me me maaden.

### *Josef cal men*

<sup>22</sup> Odocob Josef uqa Isip ono memegna talca biley. Uqa cebac biley eu uqana cabi gel cunug gabandoc eu 110. <sup>23</sup> Uqa cebac bibili biley uqa dodigul, euqa Efraim uqana mel, agena mel, eu meciaden. Uqa melah, Manasa, uqana mel, Makia, euqa uqa dodigul euha uqa cebac bibili biley cedadeceb age ijanaqeu uqana tal ijanaqaca gabandoc tawen. <sup>24</sup> Odocob Josef uqa waliagul maaden, “Ijana cal mec doldordona qa Anut uqa cofadimei maha inadec ehadi nui maha uqa Ebraham, Aisak, Jekobca adigiannu je cagu maaden ono madigian,” aden.

<sup>25</sup> Odocob Josef uqa Isrel melahul maadeceb age je edi cagu madein, “Anut uqa maha inadec ehigi nuigian saen euna ege hina tefulinha osoben hewi beleqan,” ein. <sup>26</sup> Eunu

\* **50:11:** “Abel-Misraim” uqana gug eu “Isip agena gehel.”

Josef uqa Isip ono cal men. Uqana cabi gel 110na cal men. Odocob age deweg saen cecelac  
nijigiannu mool joudimeig deweg ganac eu cudaug dunuh tacein.

## Me Je i Matju Jaqen Aqunec Je

Me je i cel dana bahic jaqen eu je oso qee nijel. Euqa Kristen tamanec cofadec dana age wele Jisas Krais mahana cobon saennadec li saen qila nijia eu Matju, uqa aposel 12-pela eundec oso, me je i jaqen ec madein. Matju i uqa takis cedec dana, uqa uqana cabi culimei Jisas toodon. (Matju 9.9-13 feiga.) Makna me jenaca, Lukna me jenaca ale Matju ijan fil qosin, eu Liwai.

Me je i Matju jaqen eu Jisas mahana bilen saenna ceteh calen eunu saadena. Eu Jisas Kraisnu me je 4-pela eundec oso. Oso eu Mak jaqen, oso eu Luk jaqen, oso eu Jon jaqen. Me je i Maria uqa Jisas basecdon saenna sanan mimei leceb age Jisas qocobil cal mimei ceseli cajimei uqana malogom culadimei sao jobon ten eunu saadena.

Matju uqa ceteh ben oso ihacdocrinu gale don. Wele Anut uqa Isrel dana cajaca hahun je oso maaden. Uqa dana oso uqa Anutna dana cajaca caahahaadecnu suldugian ec maden. Dana i uqa ijan eu Hibru jena eu Mesaia, eu Grik jena eu Krais. Matju uqa Juda dana cajaca Jisas eu agena Krais eunu ihacadecnu gale ben dona. Me je ina je mati bahic odi odona, eu odi: 1.22-23, 4.14-16, 8.17, 12.17-21, 13.35, 27.9-10. Me je ina je mati ha nijia eu Jisas uqa uqana odocnua Anut hahun je wele maden eu ihoc lena, eu odi: 2.4-6, 2.14-15, 2.23, 21.2-5, 21.16, 26.24, 26.31, 26.54.

Matju uqa ceteh oso ha ihacdocrinu gale don, eu Jisas uqa Juda dana cajaca agena king. Wele bahic Isrel agena king ben oso bilen, uqa ijan eu Dewid. Eunu Matju uqa Jisas eu Dewid Melah ec je mati maden, eu odi: 1.1, 1.6, 1.17, 1.20, 9.27, 12.3, 12.23, 15.22, 20.30, 21.9, 21.15, 22.42-45.

Euqa Matju uqa Jisas eu Juda agena Kraisca, agena kingca himec ec qee madel. Jisas uqa dana cajaca cunug agena Kraisca, agena kingca echa maden. Galili eu Juda dana qee eundec agena hatu. Odimei Jisas uqa Galili hatuna uqana cabi sanan men, odimei uqa Galili hatuna uqana cabi cit qon. (Matju 9.1-2, 28.7 feiga.) Matju himec uqa Jisas eu je hahun madec dana Nasaretddec ec maden. (Matju 2.23 feiga.) Nasaret jobon eu Galili hatu ono nijen. Odimei Matju uqana me jena Jisas uqa Juda dana cajaca age Jisas hibemdocobifli Anut uqa uqana cul eu Juda dana qee eundec adigian ec ulauladen, eu 21.43. Odimei Jisas uqa Anutna culnu me je i mahamaha cunug qasali maadecebil ihoc lili ninijeb dana cajaca cunug doqagan ec maden, eu 24.14. Odimei Jisas uqa uqana malogom age mahamaha cunug beladimeig dana cajaca ijana malogom madeiga ec maden, eu 28.19. Je i cunug eu Matju uqana me jena himec nijia.

Matjuna buk naha 5-pelana Jisas iwalandec je cecelac maden eu nijia. Je cecelac aqunec eu dac 5-7na nijia, je eu Jisas aluh osona maden. Je ina Jisas uqa dana cajaca age Anutna bilegina age adi cobocnu dado maden. Je cecelac lecisdock eu dac 10na nijia. Je ina Jisas uqa uqana malogom 12-pela age dana cajaca uqanu me je qasali maadeecnu suladecib belein. Jisas uqa malogom qasali mamadeig adi odocnua, adi cobocnu ec maaden. Je cecelac cijeddoc eu dac 13na nijia. Je ina Jisas uqa galolo jena Anutna cul eu cel ceteh dana cajaca sildiadien. Je cecelac 4-peladoc eu dac 18na nijia. Je ina Jisas uqa dana cajaca age adi uqana malogom bilecnu maaden. Je cecelac 5-peladoc eu dac 24-25na nijia. Je ina Jisas uqa deel cit qocna cel ceteh caligliannu maaden.

### *Je Dunuhnu Dado Mec*

1. Jisas uqa calimei mel men (dac 1-2)
  - A. Jisas uqana sihul ijanaga (1.1-17)
  - B. Maria uqa Jisas basen (1.18-2.12)
  - C. Jisas uqa Isip hatuna bilen (2.13-23)
2. Jisas uqa uqana cabi oc sanan men (3.1-4.11)
  - A. Wa Joadec Jon uqa Jisas aqunidon (3.1-12)
  - B. Jon uqa Jisas wa jouden (3.13-17)
  - C. Seten uqa Jisas temdu fen (4.1-11)
3. Jisas uqa Galili hatuna uqana cabi on (4.12-14-12)
  - A. Uqana cabi Galili ono sanan men (4.12-25)
  - B. Uqa aluh ohis dana cajaca me je maaden (dac 5-7)
  - C. Uqa kobolkobol odoc filfil odon (dac 8-9)
  - D. Uqa aposel 12-pela agena cabi oc aden (dac 10)
  - E. Uqa Galili hatuna cocobi li cabi on (dac 11-12)

- F. Uqa sao cul jobonnu galolo je filfil maden (dac 13)  
 G. Herod uqa Jisasnu uqa Wa Joadec Jon ec cisdon (14.1-12)
4. Jisas uqa Galili hatu culdimei cudun filfil nuen (14.13-17.20)  
 A. Uqa Galili wa gad cagoc leti uqa cudun ono isec nuen (14.13-15.20)  
 B. Uqa Foniais hatuna nuen (15.21-28)  
 C. Uqa Dekapolis hatuna nuen (15.29-16.12)  
 D. Uqa Sisaria Filipai taunna nuen (16.13-17.20)
5. Jisas uqa Galili hatuna uqana cabi hedon (17.22-18.35)  
 A. Jisas uqa cal mimei ceseli cajigian ec maden (17.22-23)  
 B. Tempel cabinu takis helec (17.24-27)  
 C. Sao cul jobonnu je (dac 18)
6. Jisas uqa Judia hatunaca Peria hatunaca cabi on (dac 19-20)  
 A. Jisas uqa ocobocobek kobel cagocnu iwaladen (19.1-12)  
 B. Jisas uqa mel simnu iwaladen (19.13-15)  
 C. Dana haun cehwewanca uqa Jisasca hocob madesin (19.16-30)  
 D. Wain cabi ocnu galolo je (20.1-16)  
 E. Jisas uqa cal mimei ceseli cajigian ec haun maden (20.17-19)  
 F. Jems Jonca anala uqa Jisas je madugiannu bilen (20.20-28)  
 G. Jisas uqa Jeriko ono dana amala galuc nec lecis me malen (20.29-34)
7. Deel 6-pela hedocob Pasowa Sab Jec Ben Deel caligiannu ninijen Jisas uqa age qocobil cal miigiannu Jerusalem ono nuen (dac 21-27)  
 A. Jisas uqa kingwe Jerusalem dunuh len (21.1-11)  
 B. Jisas uqa tempel jo soidon (21.12-17)  
 C. Jisas uqa Juda dana benben gami fee dadani hedoin (21.18-23.39)  
 D. Jisas uqa Oliw Aluhna cit qoc saennu maden (dac 24-25)  
 E. Juda dana benben age adi Jisas qocnu togodooin (26.1-6)  
 F. Caja oso Jisas ilona mool dedeman me bahic joiden (26.6-13)  
 G. Age Jisas hewudi gesildumeig na babalecna tuitu qocobil cal men (26.14-27.66)
8. Jisas ceseli cajimei uqana malogom age cabi oqagannu maaden (dac 28)

*Jisas Krais uqana sihul ijanaga  
 (Luk 3.23-38)*

<sup>1</sup> Jaqec je i Jisas Krais uqana sihul ijanaganu je. Jisas uqa Dewid sihulnadec, odocob Dewid uqa Ebraham sihulnadec.

<sup>2</sup> Ebraham uqa Aisak memeg.

Odocob Aisak uqa Jekob memeg.

Odocob Jekob uqa Juda waliagulca memega.\*

<sup>3</sup> Odocob Juda uqa Peres Seraca memela. Ale anala eu Tema.

Odocob Peres uqa Hesron memeg.

Odocob Hesron uqa Ram memeg.

<sup>4</sup> Odocob Ram uqa Aminadab memeg.

Odocob Aminadab uqa Nason memeg.

Odocob Nason uqa Salmon memeg.

<sup>5</sup> Odocob Salmon uqa Boas memeg. Uqa anag eu Rehab.

Odocob Boas uqa Obed memeg. Uqa anag eu Rut.

Odocob Obed uqa Jesi memeg.

<sup>6</sup> Odocob Jesi uqa King Dewid memeg.

Odocob Dewid uqa Solomon memeg. Solomon anag wele eu uqa Uria aideg.†

<sup>7</sup> Odocob Solomon uqa Riaboam memeg.

Odocob Riaboam uqa Abaisa memeg.

Odocob Abaisa uqa Esa memeg.

<sup>8</sup> Odocob Esa uqa Jehosafat memeg.

Odocob Jehosafat uqa Joram memeg.

Odocob Joram uqa Usia memeg.

<sup>9</sup> Odocob Usia uqa Jotam memeg.

Odocob Jotam uqa Ehas memeg.

\* **1:2:** Judaca waliagulca age Isrel sihuñagail 12-pela jajanagail. † **1:6:** Caja i cunug age ijanagail lista ina nijen eu age Isrel sihuldec qee, age sihul celedec. Age Isrel dana oin. Tema Rehabca lecis i ale Kenan sihuldec, odocob Rut uqa Moab sihuldec. Batseba, uqa Solomon anag, uqa himec eu Isrel caja. Euqa hahawan uqa Uria aideg, odocob Uria uqa Hit dana. Lukna lista uqa caja celedec inu qee madel. Age Luk 3.23-38 feiga.

Odocob Ehas uqa Hesekias memeg.

<sup>10</sup> Odocob Hesekias uqa Manasa memeg.

Odocob Manasa uqa Emos memeg.

Odocob Emos uqa Josaia memeg.

<sup>11</sup> Odocob Josaia uqa Jekonaia waliagulca memega. Saen euna Isrel dana cajaca age Babilon ono belimeig gihacdoc bilein.

<sup>12</sup> Age Babilon ono gihacdoc bibileig

Jekonaia uqa Sialtiel memeg.

Odocob Sialtiel uqa Serababel memeg.

<sup>13</sup> Odocob Serababel uqa Abiut memeg.

Odocob Abiut uqa Elaiakim memeg.

Odocob Elaiakim uqa Eso memeg.

<sup>14</sup> Odocob Eso uqa Sedok memeg.

Odocob Sedok uqa Ekim memeg.

Odocob Ekim uqa Elaiat memeg.

<sup>15</sup> Odocob Elaiat uqa Eleasa memeg.

Odocob Eleasa uqa Matan memeg.

Odocob Matan uqa Jekob memeg.

<sup>16</sup> Odocob Jekob uqa Josef memeg.

Odocob Josef uqa Maria gemug. Odocob Maria uqa Jisas basen, eu uqa Krais<sup>†</sup> egina.

<sup>17</sup> Eunu sihul cunug eu Ebrahamnадec leceb Dewid calen eu sihul 14. Odocob sihul cunug eu Dewidnадec leceb Isrel dana cajaca age Babilon ono belimeig gihacdoc bilein saenna calen eu sihul 14. Odocob sihul cunug eu Isrel age Babilon ono gihacdoc bilein saennadec leceb Krais calen euha sihul 14.

*Maria uqa Jisas Krais basen  
(Luk 2,1-7)*

<sup>18</sup> Jisas cali honnu je eu odi nijia. Jisas anag Maria uqa Josef col codoc bibili uqa qee ocna Kis Gun odocna waugca men. <sup>19</sup> Uqana dana, Josef, uqa Anut amegna tutuc coboloi. Odimei uqa Maria waugca ec dumei uqa culdigen ec cisdon. Euqa uqa Marianu cewudec je uqa dewegna cain hoiaunnu naha jahuni culdigen ec cisdon. <sup>20</sup> Odi cisdudu cocobon Tibudna ensel Josef witic us ninijen bebelecna camas mimei madon, “O Josef, hina Dewid sihulnадec, hina aiden Maria ocnu cain cucuiagaun. Faga, uqa melca eu Kis Gunnadec. <sup>21</sup> Uqa mel baseceb uqa uqana dana cajaca agena silailnu fadalowainnu cahahaadigian, eunu hina uqa ijan Jisas<sup>§</sup> qogan,” don.

<sup>22</sup> Eu Tibudna je uqa je hahun madec dana cona maden eu ihoc ligiannu ceteh eu calen. Je hahun madec dana uqa wele odi maden:

<sup>23</sup> “Feiga, mel aid taula oso waugca mimei mel basigian.

Odocob age mel eu ijan Emanjuel qoqagan,” en. *(Aisaia 7,14)*

Je eu Anutna jaqec je tawena. (Ijan Emanjuel eu uqana gug eu, “Anut egeca biluquna.”)

<sup>24</sup> Odocob Josef uqa us niji cajimei Tibudna ensel maden eu odi toodu uqana caja, Maria, ehuden. <sup>25</sup> Euqa Josef uqa Maria mel qee basec ninijen uqaca qee niji lesin. Mel baseceb uqa ijan Jisas qon.

## 2

*Haiden agena doc silecca dana age Jisas fecnu hoin*

<sup>1</sup> Maria uqa Jisas Betlehem jobon ono Judia hatuna baseceb Herod uqa king bilen.\* Saen euna haiden agena doc silecca dana age cam tobi becnadec Jerusalem jobon cali humeig <sup>2</sup> dana sisiladi maadein, “Mel sim haun uqa Juda agena king cali hon eu ana bilia? Ege uqana malaqa ono cam tobi becna isec camas meceb fimeb ege amegna gob cehimelb uqanu cuha feqannu hoqa,” adein. <sup>3</sup> Odocob King Herod je eu madecebil dah mimei geh cisdon, odocob Jerusalem dana cajaca cunugha eunu geh cisdoen. <sup>4</sup> Odocobil Herod uqa ihanec dana benbenca loo je iwaladec danaca utaadecib cegulecebil uqa sisiladi maaden, “Krais i Anut uqa suldocob uqa Anutna dana cajaca cahahaadecnu hugian eu cel jobon cali hugian?” aden. <sup>5</sup> Odocob age madoin, “Uqa Betlehem jobon Judia hatuna cali hugian. Je hahun madec dana agena je odi jaqec wele nijia:

<sup>6</sup> ‘O Betlehem, Judia hatuna,

<sup>†</sup> **1,16:** Krais eu dana Anut uqana dana caja cahahaadecnu wele nesili ehuden. <sup>§</sup> **1,21:** Hibru jena ijan Jisas eu hutan odi, “Jehowa sus.” Uqana gug eu “Tibud cahahaadena.” Ijan Jisas eu Grik jenadec. Eu Hibru jena age Josua ein.

\* **2,1:** King Herod i uqa Judia hatuca, hatu eu Judia hatu cemenug nijen euca cofaden. Herod uqa king euqa uqa Rom agena king ben, eu Sisa ein, bisalu bilen.

king uqa Isrel dana cajaca cofadigiannu eu Betlehem ono cali hugian.  
Eunu Juda jobon benben age hina qee woolhegina,’ jaqec je taweria,” doin. (Maika 5.2)

<sup>7</sup> Odocobil Herod uqa doc silecca dana jahuni utaadeceb hocobil uqa malaqa cel saen cali hon eunu sisiladen. <sup>8</sup> Age silditocibil dumei Betlehem jobon belecnu dado madimei maaden, “Ijaha nui mel eunu cuha figennu age uqanu megi cuhadoigale. Odocob age eu gulucdu fimeig hu sateigale,” aden.

<sup>9</sup> Odocob age kingna je dumeig Betlehem jobon beloqagannu belein.<sup>†</sup> Odocob malaqa wele cam tobi becna isec fein eu aquniaadi, jo mel bilen eu ohis cehi qudu tawen. <sup>10</sup> Age malaqa fimeig age wawaga gehca ceelen.

<sup>11</sup> Odocob age jona limeig melca uqa anag Maria ha facialimeig age mel amegna gob cehi jogoimeig uqanu cuha fein. Odimeig agena bokis qosocdumeig goldca, gilic ja manecebil dedeman meca, gilic dedeman meca umeig age toinanaga osoosoca Jisas utein. <sup>12</sup> Odocob Anut uqa age bebelecna maadi maaden, “Herod cemenug haun ceseli cain belowain,” aden. Maadeceb dumeig age jic osona agena hatuna ceseli belein.

### *Josef Mariaca alena melca Isip hatuna busali belein*

<sup>13</sup> Doc silecca dana age wele belecebil Tibudna ensel Josef us ninjen bebelecna camas mimei madon, “Faga, Herod uqa mel wawali li qcocnu madena. Eunu hina caji mel anagca cedalimeg busali Isip hatuna nui biliga. Ija mahecemin haun ceseli ene hogan,” don.

<sup>14</sup> Odocob Josef uqa witic cajimei mel anagca cedalimei Isip hatuna nui bilein. <sup>15</sup> Odimeig age Isip hatuna bibilegin li Herod uqa cal men. Saen euna Tibudna je hahun madec dana uqana je ihoc ligiannu ceteh eu calen. Je hahun madec dana uqa wele odi maden:

“Ija melami Isip ono bibilen utadocomin Isipnadec cali hon,” en. (Hosea 11.1)

### *Herod maadeceb age Betlehem jobonna mel mati aqeceil cal mein*

<sup>16</sup> Herod uqa doc silecca dana age ija uhultiti woolti belein imei gemag ben bahic ben. Odimei uqa han dana suladeceb age mel manahal age cabi gel lecis qee wooladec eundec cunug age Betlehem jobonca hatu cemenugca ono bilein eu aqi hedoin. Uqa doc silecca dana malaqa cel saen wasen sisiladeceb madocobil don eu toodu mel aqeceil cal mein.

<sup>17</sup> Eu odocna je hahun madec dana Jeremaia uqana je ihoc len. Uqa wele odi jaqen:

<sup>18</sup> “Rama jobonna qajec ben bahic dah mein.

Qada qajec ben bahic onodec hon.

Resel uqana melnu qada qajena.

Mel cal mein eunu qada qajena.

Age wahohog je madocobil dah mecn culen,” en.

(Jeremaia 31.15)

### *Josef Mariaca alena melca ceseli Isipdec hu Nasaret bilein*

<sup>19</sup> Herod cal meceb Isip hatu ono Tibudna ensel bebelecna Josefca camas mimei 20 madon, “Dana age madi, mel qoqan, ein age wele cal mein. Eunu cajimeg mel anagca cedalecem ceseli Isrel hatuna beleiga,” don. <sup>21</sup> Odocob Josef cajimei mel anagca cedaleceb ceseli Isrel hatuna hoin.

<sup>22</sup> Humeig Herod melah Akeleas memeg hehuldi king bibilen eu madocobil dumei uqa Judia hatuna bielecnu cucuen.<sup>‡</sup> Anut uqa Josef bebelecna dado mudeceb Galili hatuna nuimeig <sup>23</sup> Nasaret jobon ono bilein. Je hahun madec dana age wele odi madein, “Age uqa Nasaretdec doqagan,” ein. Eunu je hahun madec dana agena je oso ihoc ligiannu age Nasaret jobon ono bilein.

## 3

### *Wa JoaDEC Dana Jon me je maaden*

(Mak 1.2-8; Luk 3.1-18; Jon 1.19-28)

<sup>1</sup> Saen euna Jon, wa joaDEC dana, cajimei Judia hatuna wadau\* ono cocobi me je qasali maaden. <sup>2</sup> Uqa maaden, “Sao cul jobon eu age cemenega hona.<sup>†</sup> Eunu agena silailnu tului falicdoigale,” aden. <sup>3</sup> Ge, Jon uqa dana eu Anut uqa je hahun madec dana, Aisaia, cona eunu maden. Uqa wele odi maden:

“Dana jejeg oso uqa wadauna bibili utai maadena,

<sup>†</sup> 2:9: Betlehem jobon eu Jerusalem cemenug nijen, eu odi kilomita 8-pela onoca nijen. <sup>‡</sup> 2:22: King Herod cal meceb Rom age uqana hatu qatani uqa melahul cijed cesawiadein. Akeleas uqa Sameria hatuca Judia hatuca alena king calen. Odimei uqa cabi gel 10-pela king bilen. \* 3:1: Hatu euna wadau eu naca qee, eu waca qee, eu meen esicca euna geh nijen. <sup>†</sup> 3:2: Je i Sao cul jobon o Anutna cul alena gug eu odi. Anut uqa king, odocob dana caja cunugca ceteteh cunugca age Anut bisalu bilingina.

Tibudna jic saciadoiga.

Uqana jic tutuc mudeiga,’ adena,” en.

(Aisaia 40.3)

<sup>4</sup> Jon uqa kamel bagicna lotoc mudec tacoloi, odimei uqa wailohna dool ganacna oologam mudec taqoloi, odimei uqa sisca mehud uqana waca joloi.<sup>‡</sup> <sup>5</sup> Saen euna dana cajaca age Jerusalem bileginaca, dana cajaca age Judia hatu cunugna bileginaca, dana cajaca age jobonjobon Jodan Wa cemenug bileginaca age Joncalein. <sup>6</sup> Limeig age agena silailnu je qasali madocobil Jon uqa Jodan Wana wa joaden.

<sup>7</sup> Odocob Jon uqa Farisi Sadjusica mati age uqa wa joadigiannu uqaca hohogin feciadimei maaden, “Age man sononec nag me qee! In madeianu age Anutna gemag bec jawe hugia odona euna busalecnu age ihoc, egina? <sup>8</sup> Agena silailnu mele bahic culimeig tului falicdumeig Anutna je qee tefacdoginanufi me odoc oso odoiga eu ihacteiga.

<sup>9</sup> Euga ija mele maadigina, Anut uqa meen ene nijegina eu cedimei Ebraham talacul euna madecnu ihoc. Eunu age cain cisdudu madowain, ‘Ebraham ege asige. Eunu Anutna gemag bec egeca qee hoiau,’ owain. <sup>10</sup> Sapol na gug qetecnu wele taweria. Na cunug aig me qee qona uqa qetimei jana heligian,” aden.

<sup>11</sup> Ija age agena silailnu wele tului falicdoinnu wana wa joadigina qa oso hib tooti hona, uqana gagadic odoc ijana gagadic odoc wooldona. Uqa dana meca bahic. Ijaq a dana meca qee. Ija uqana cabi dana me bahic ihoc qee, ija uqana jaih tacec hewecwe qee. Uqa age Kis Gunna janaca wa joadigian. <sup>12</sup> Uqa sawolca hona. Sawol euna wit aig cunug eeldocnuca, wit aig uqana jo bisna mecnuka hona. Odimei uqa witna tetec ja qee cafulina euna manigian,” aden.

### *Jon uqa Jisas wa joudien*

(Mak 1.9-11; Luk 3.21-22)

<sup>13</sup> Saen euna Jisas Galilidec Jodan Wana len. Uqa Jon uqa wa joudigiannu Jonca limei <sup>14</sup> madon, “Ijaha wa joitigale,” don. Odocob Jon uqa cahacdudu madon, “Hina ija wa joitegan eu me bahic. Hina etanu ija hina wa joihencu matagana?” don. <sup>15</sup> Odocob Jisas Jon jejeg hewi madon, “Anut madena eu cunug toodoo odocnu eu tutuc. Eunu qila culimeg gad wa joitigale,” don. Odi madocob Jon cois imei wa joudien. <sup>16</sup> Jisas wa joc umei uqa mahucwe wa ocna ti tatawen sao ohis jic cebec hudeceb uqa Anutna Kis cuhuditid cinigwe ni uqaca bilen fen. <sup>17</sup> Odocob sao ohisdec ha jejeg oso camas mi maden, “Ija melami nelugca ihen. Ija uqanu wawi ben ceelena,” en.

## 4

### *Seten uqa Jisas temdu fen*

(Mak 1.12-13; Luk 4.1-13)

<sup>1</sup> Saen euna Seten uqa Jisas temdu figiannu Kis Gun uqa Jisas iwaldocob wadauna\* nuen. <sup>2</sup> Uqa deel 40 cahineg witicca sab qee jec bilen. Saen hedocob wen don. <sup>3</sup> Wen dodon temgec eu uqaca limei madon, “Hina Anut Melahfi meen i maadecem sab ibuldocob jaga,” don. <sup>4</sup> Euqa Jisas uqa Seten jejeg hewi madon, “Anutna jaqec je eu odi madena:

‘Sab jec himec dana cebac biley qee adena qa  
je cunug Anut conadec cali hona eu

dana cebac biley adena,’ ena,” don.

(Loo 8.3)

<sup>5</sup> Odocob Seten uqa Jisas ehudimei jobon gunna ehi ti tempel qab tatacanna muden.

<sup>6</sup> Mudimei madon, “Anutna jaqec je eu odi madena:

‘Anut uqana ensel maadeceb

hina jaim meenena qee tudoiaunnu

age hina ebenelegana hewihi ehi ni mihuqagan,’ ena.

(Buk Song 91.11-12)

Eunu hina Anut Melahfi busali tonoga,” don.

<sup>7</sup> Jisas Seten jejeg hewi madon, “Anutna jaqec je osoha madena:

‘Tibud, hinana Anut, eu cain temdu fagaun,’ ena,” don.

(Loo 6.16)

<sup>8</sup> Odocob Seten uqa haun Jisas ehudi aluh benna ehi ti muden. Mudimei mahamaha cul cunug agena tumutum cahulecca ihacdudu madon, <sup>9</sup> “Faga, hina amina gob cehi ijanu cuha fecemfi fagana eu cunug culihigen,” don. <sup>10</sup> Odocob Jisas Seten jejeg hewi madon, “Anutna jaqec je odi madena:

‘Tibud uqa hinana Anut uqanu cuha faga,

uqa himec cewel utugale!’ ena,

(Loo 6.13)

<sup>‡</sup> 3:4: Jonna lotocca sabca eunu je eu Jon uqa dana oso cinigwe dot quton, eu je hahun madec dana Ilaija. Age 2 King 1.8ca, Malakai 4.5ca, Matju 11.14, odocob 17.10-13ca eu feiga. \* 4:1: Age je Matju 3.1na nijia eu feiga.

Eunu Seten, cuculti nuuga," don.

<sup>11</sup> Odocob Seten uqa Jisas cuculdi nueceb ensel age hu Jisas cewel utoin.

*Jisas uqana cabi Galili hatu ono sanan men  
(Mak 1.14-15; Luk 4.14-15)*

<sup>12</sup> Aria, Jisas uqa age Jon hewimeig gihacdoc jona mudein ec dumei uqa Galili hatu ono nuen. <sup>13</sup> Odimei uqa Nasaret culimei Kapaneam jobon nui bilen. Kapaneam jobon eu Galili wa gad cagocna isec nijina, eu Sebjulan sihulca Naftali sihulca agena hatu gadac nijina.<sup>†</sup> <sup>14</sup> Je hahun madec dana, Aisaia, je oso wele maden eu ihoc ligiannu odi odon. Uqa odi jaqen:

<sup>15</sup> "Sebjulan sihulca, Naftali sihulca, alena hatu eu  
Galili wa gad cagocna isec nijia,  
Jodan Wa ono isec,  
Galili hatu Juda dana qee eundec agena,  
<sup>16</sup> hatu euna dana cajaca age tuna biloloig  
eu fulacdoc ben oso fein,  
dana cajaca age cal mec hatuna tuna biloloig,  
eu fulacdoc ben oso iletaden," Aisaia odi jaqen.

*(Aisaia 9.1-2)*

*Jisas uqa dana 4-pela utaaideceb toodoin  
(Mak 1.16-20; Luk 5.1-11)*

<sup>17</sup> Saen ina Jisas uqa dana cajaca je qasali maadi sanan mimei maaden, "Sao cul jobon eu age cemenega hona. Eunu agena silailnu tului falicdoigale," aden. <sup>18</sup> Jisas uqa Galili wa gad cagocna cocobi dana oso waliagca facialen, eu Saimon, age Pita egina, uqa waliag Andruca. Ale cimec ben wana hehelesin fen. Ge, age cul dool cedec dana. <sup>19</sup> Odocob Jisas maalen, "Hu tootecebil ija odalecemin ale dana cajaca cedadowasan," alen. <sup>20</sup> Maaleceb mahuc bahic alena cimec ben cuculesi uqa toodu belesin.

<sup>21</sup> Uqa nag bahic onoca limei dana oso waliagca fil facialen, eu Jems, uqa Sebedi melah, uqa waliag Jonca. Ale memela, Sebedica, agena wagna bibileig cimec ben tatalec eu haun wewegi bilein. Odocob Jisas utaalen. <sup>22</sup> Mahuc bahic ale wag memelaca cuculadi limesi Jisas toodu belesin.

*Jisas me je maaadei dana cajaca mati me maden  
(Luk 6.17-19)*

<sup>23</sup> Jisas uqa Galili hatu cunug cocobi nuen. Uqa Juda agena cuha jonana limei dana cajaca iwaladen. Odimei uqa sao cul jobonnu me je qasali maaden. Odimei uqa dana cajaca agena hag filfilca age dewenega laleg mein eundec filfilca me maden. <sup>24</sup> Åge uqa hutannu je saec eu Siria hatu cunugna ihoc len.<sup>‡</sup> Odocob age dana cajaca hag gug filfil me qee maden eundecca, dain ben aden eundecca, buga me qee hewadein eundecca, dana caja titi hudec hagca age gaid dewenega qeleceb toni mahulegina eundecca, dana tefulunuga laleg mi cal mein eundecca cedadi Jisasca ahocobil Jisas uqa me maden. <sup>25</sup> Dana cajaca am ben age Galili hatunadecca, Dekapolis<sup>§</sup> hatunadecca, Jerusalemdecca, Judia hatunadecca, Jodan Wa ono isec hatunadecca age toodu belein.

## 5

*Jisas uqa aluh ohis dana cajaca je maaden*

<sup>1</sup> Jisas uqa dana cajaca mati bahic uqaca hohogin feciadimei uqa aluh osona ti bibilen uqana malogom uqaca hoin.\*

*Jisas uqa madi maden, dana cajaca cunug age eeladec ocnu ihoc, en*

<sup>2</sup> Odocobil uqa uqana malogom iwalaadi maaden:<sup>†</sup>

<sup>3</sup> "Dana age Anutnu doc dumanaga ihoc qee eunu dogina eundec saona gun cul eu agena.

† **4:13:** Wele Isrel sihul lecis, eu Sebjulan sihulca Naftali sihulca, age Galili wa gad cagoc cemenug biloloig. Euqa Jisas uqana saenna agena hatu eu Galili hatu naha oso calen. ‡ **4:24:** Rom age Juda dana cajaca cofadein saenna Isrel hatu eu hatu ben Rom age Siria ein euna nijen. § **4:25:** Dekapolis uqana gug eu jobon 10-pela. \* **5:1:** Jisas uqa Juda agena kobil toodu odon. Agena kobil eu Anutna jenu doc dana uqa dana cajaca iwaladecnu gale docobfi uqa bilimej i waladoloi. Age Matju 13.2, 24.3ca Luk 4.20ca euha feiga. † **5:2:** Matju 4.23-25 (9.35ha eu Jisas uqa cabi lecis odon ec madena. Cabi oso uqa dana cajaca je iwaladen, odocob cabi oso uqa dana caja hag filfilca eu meaden. Eunu Matju dac 5-7na Jisas uqa dana cajaca Anutna culnu kobil iwaladen eunu je mati nijen ec foqona. Eu toodumei Matju dac 8-9na Jisas uqa dana caja hagca meaden eunu je mati nijen ec foqona. Matju bukna Jisas uqa je cecelac 5-pela maaden, eu dac 5-7ca, dac 10ca, dac 13ca, dac 18ca, dac 24-25ca. Je cecelac i dac 5-7na nijen, eu iwaladec je osoldoc. Jisas uqa je i aluh ohisna maaden.

Eunu age eeladecca bilegina.

<sup>4</sup> Dana age qada qajegina eundec Anut age wahohogadigian.

Eunu age eeladecca bilegina.

<sup>5</sup> Dana age gemanaga jocosaiga eundec mahamaha cunug eu age mugumuga oqagan.

Eunu age eeladecca bilegina.

<sup>6</sup> Dana age tutuc odoc ihoc ligiannuca, agedodoc agena odoc tutuc migiannuca odogina eu odi sab wen adenaweca, wa gab adenaweca eundec Anut uqa cesuladeceb age ihoc oqagan.

Eunu age eeladecca bilegina.

<sup>7</sup> Dana age cotogail walocca bibilegin feciadimeig wawaga qocob me madegina eundec age saen osona walocca bibilebil Anut feciadimei waug qocob me madigian.

Eunu age eeladecca bilegina.

<sup>8</sup> Dana age wawaga cataniec eundec age Anut ola foqagan.

Eunu age eeladecca bilegina.

<sup>9</sup> Dana age maul qetegina eundec age ijanaga Anut melahul oqagan.

Eunu age eeladecca bilegina.

<sup>10</sup> Dana age tutuc odoginanu aaqati tootooadec gahidogina eundec saona gun cul eu agena.

Eunu age eeladecca bilegina,” aden.

<sup>11</sup> “Dana mahana dec eundec age, age ijana bilegina eunu cewadimeig aaqati tootooadimeig age agenu je me qee uhulaadi madegina saen euna age eeladecca bilegina. <sup>12</sup> Odi bahic ha dana age je hahun madec dana wele biloloig eu aaqati tootooadoloig. Age sao jobonna ameg me bahic oqagan. Eunu age wawaga me meceb ceeli bileigale,” aden.

*Age odi macas fulacdocca cinigwe*

(Mak 9.50; Luk 14.34-35)

<sup>13</sup> Jisas je haun maaden, “Age odi mahamahanu macas bilegina. Euqa macas uqana mug qah becebfii adi haun mugca migian? Macas qah bec eu ceteh osonu qee ihoc lena. Age dana lahacluhucdoqagannu helegina,” aden.

<sup>14</sup> “Age odi mahamahanu fulacdoc bilegina. Jobon ben aluhna cehein nijia eu jahunec nijecnu qee nijel. <sup>15</sup> Dana age gowoc oso madacdumeig hal dunuh qee tacena qa age gowoc ohisna caqusegina. Odochobil jona bilegina eundec cunug fulacadena. <sup>16</sup> Dana age agena me odoc eu fimeig age Memega sao jobon bilia uqa binan suluqagannu age eu odiwe agena gowoc madacdocabil eu dana fulacadeiale,” aden.

*Jisas uqa Anutna loo jenu maden*

<sup>17-18</sup> Jisas je haun maaden, “Ija mele maadigina, sao mahaca qee mudigian deel qee cali hoc ninijeb loo je jaqec naha nag osolha qee fadaleiaun. Loo je ninijeb li ceteh cunug ihoc ligian. Eunu age ijau uqa Mosesna loo jeca je hahun madec dana agena iwaladec jeca bebesi qee mudigianu hon odi cain cisdowain. Qeeo, ija loo jeca agena iwaladec jeca qee mudigennu qee holom qa ija loo jeca agena iwaladec jeca toodu bahic ihoc ligiannu hom. <sup>19-20</sup> Ija maadigina, agena tutuc odoc eu Farisica loo je iwaladecca agena tutuc odoc qee wooldocbfii ageha saona gun culna qee lowain. Eunu dana oso loo je nag odi besimei dana odi ha toodu odocnu iwaladena eu uqanu saona gun culna age uqa caunca qee oqagan. Osoqa loo je toodu odimei dana ha odi odocnu iwaladena eu saona gun culna ijau meca ugian,” aden.

*Jisas uqa je tutuc mudec kobolnu maden*

(Luk 12.57-59)

<sup>21</sup> Jisas je haun maaden, “Loo je age jajanagail wele oin eu age dogina eu odi madena: ‘Hina oso cain qocom cal meiaun.’

Oso qocob cal meceb eu uqa gesilec jona ligian,’ ena ec je nijia. (Kisim Bek 20.13)

<sup>22</sup> Ijaqaa maadigina, oso uqa cotignu gemag bena eu gesilec jona ligian. Odochobil oso uqa cotig cewudec je me qee madona eu Juda dana matu agena cegulec age dana eu gesildocnu ihoc. Odochobil oso uqa cotig madona, ‘Hina dana gad,’ dona eu oloqanah jana lecnu ihoc,” aden.

<sup>23</sup> “Eunu hina ihanec cabalna tatawi hinana ceteh ihandoga bibili hina cotin hina dewennu je hewihewi cobona eunu dahin fogo docobfi <sup>24</sup> hina casac hinana ceteteh ihanec cabalna ninijeb cuculi cotinca li je tutuc mudesiale. Odimeg hu hinana ceteteh ihandogale,” aden.

<sup>25</sup> “Dana oso hina dewennu um qocobfi hinana cad gesilec dana ben uqa ebenna mihiawnu, odochob gesilec dana ben uqa gesilec jona cofadec dana ebenna miheceb uqa gihacdoc jona tacihiaunnu eunu hina hinana cadca gesilec jona bebelesi jicna uqaca

tanawecnu wawin nijiale. <sup>26</sup> Ija mele mahigina, hina meen qaig ihoc lec qee helecemfi qee bahic besihuwain,” aden.

*Jisas uqa dana wal kobil odona eunu maden*

<sup>27</sup> Jisas je haun maaden, “Age jajanagail wele loo je oso oin eu ageha dogina je eu odi madena:

‘Hina dana cajaca alena sisi jelalec cain wagalagaun,’ ena ec je nijia. (*Kisim Bek 20.14*)

<sup>28</sup> Ijaqa maadigina, oso dana osona caja fimei nenehegdudu hewoum ena eu uqa wele waug dunuhna cajaca wal kobil odosin,” aden.

<sup>29</sup> “Hina amen meula isec eu silail mecnu faninhigia odocobfi selimeg helagale. Hina dewen cunug oloqanah jana helowaindainnu hina dewen naha culimeg silail qee moum eu me. <sup>30</sup> Hina eben meula isec eu silail mecnu faninhigia odocobfi qeti helagale. Hina dewen cunug oloqanah jana helowaindainnu hina dewen naha culimeg silail qee moum eu me,” aden.

*Jisas uqa dana aideg culdina eunu maden*

(*Matju 19.9; Mak 10.11-12; Luk 16.18*)

<sup>31</sup> Jisas je haun maaden, “Wele age odi madoloig:

‘Oso uqa aideg culdina eu uqa sisi jelec cufalec jaqec je utigian,’ oloig ec je nijia. (*Loo 24.1*)

<sup>32</sup> Ijaqa maadigina, dana oso uqa aideg dana osoca qee leceb nijelesin euqa gauc dana caja sisi jelec cagumei caja culdina eu uqa aideg odudeceb aideg wal kobil odona. Eetanu? Uqa aideg dana oso ocob ale wal kobil odosina. Odocob dana oso uqa caja gemug culden eu ona uqaha dana caja sisi jelec cufalimei wal kobil odona,” aden.

*Jisas uqa age hahun je Anut amegna madegina ec eunu maden*

<sup>33</sup> Jisas je haun maaden, “Ageha age jajanagail je oso oin eu mamadegin odi doin, ‘Hina Tibud amegna ceteh oso odigen ec je cagoc oso madecemfi hina je cagoc eu cain dahin celeiaun. Hina Tibud amegna je madem eu cisidudu toodoo odogale,’ madegina ec je nijia.

<sup>34</sup> Ijaqa maadigina, Tibudca ceteh osoca amegna madigina odi cain bahic owain. Odocob sao eu Anutu bilec bahim. Eunu sao amegna madigina cain owain. <sup>35</sup> Odocob maha eu bahim Anut uqa jaih tatacan mudina. Eunu maha amegna madigina cain owain. Odocob Jerusalem eu King Ben uqana jobon. Eunu Jerusalem amegna madigina cain owain. <sup>36</sup> Hinaha hina gosin osol cas lec eu senenec ibuldocwe qee, odocob hina gosin osol senenec eu cas lec ibuldocwe qee. Eunu hina ija ilomina je tutuc madigina cain agaun. <sup>37</sup> Age sisiladecebile eu melefi age ‘Ese’ ec dih madeigale. Qeefi, age ‘Qee’ ec dih madeigale. Age je eu je oso tubdufeig Setenna je ec madoqagan,” aden.

*Age ameg me qee wadac Cain adowain*

(*Luk 6.29-30*)

<sup>38</sup> Jisas je haun maaden, “Age je oso odi madoloig ec doin:

‘Oso uqa cotigna ameg me qee mudecebf

ageha uqa ameg me qee mudeigale.

Oso uqa cotigna maih me qee mudecebf

ageha uqa maih me qee mudeigale,’ oloig ec je odi doin. (*Kisim Bek 21.24; Wok Pris 24.20; Loo 19.21*)

<sup>39</sup> Ijaqa maadigina, qisol mec dana age, age dewenega me qee mudegina eundec age ameg me qee wadac Cain adowain. Oso hina sihom oso naha qahecebfi hina naha ha ihacdogle. <sup>40</sup> Oso hinaca cetehnua tutuac cacadesi hinana siot cawalihecebfi hinana lotoc meca ha cultigale. <sup>41</sup> Oso uqaca nuecnu kilomita osol ihoc lecnu ninichecebfi hina kilomita leciscadoc belesiale. <sup>42</sup> Oso ninichecebfi eu ceteh utugale. Oso cesultagale hecebfi Cain hibemdogau, cesuldogle,” aden.

*Jisas uqa age agena cad nalunuga mecnu kobil eunu maden*

(*Luk 6.27-28, 32-36*)

<sup>43</sup> Jisas je haun maaden, “Age je oso odi madoloig ec doin, ‘Hina hina utuqain biley eundecnu nalunuga magale. Hinana cad sagagadagale,’ oloig ec je odi doin.<sup>‡ 44-47</sup> Ijaqa maadigina, age, dana age agenu nalunuga megina eundec himec nalunuga meginafi Anut cel ameg me adigian? Takis cedec dana eu ageha odi odogina. Odocob age agena danah eundec himec feele ec maadeginafi age in wooldu odogina. Haiden ageha odi odogina. Uqa Memega Anut uqa me odoc eundecca me qee odoc eundecca cam sulduadena. Uqa

<sup>‡ 5:43:</sup> Je i “Hina hina utuqain biley eundecnu nalunuga magale,” oloig eu Wok Pris 19.18na nijia. Euqa je i “Hinana cad sagagadagale,” oloig eu anadec bahic hon doc dana age qee dogina. Euqa age Loo 7.2, 20.16ca, Song 139.21-22ca eu feiga.

tutuc coboginaca tutuc qee coboginaca osobennu waha sulduadena. Eunu age Memega sao jobon bilia eu age uqa melahul bilegina eu camas moqagannu age agena cadnu nalunuga meigale. Aaqati tootooadegina eundecnu Anut waug qugianmu inondoigale. <sup>48</sup> Age Memega sao jobon bilia eu uqa odoc me ihoc lec bilina. Eunu ageha agena odoc me ihoc lec bileigale,” aden.

## 6

### *Jisas uqa dana leih cesuladec kobilnu maden*

<sup>1</sup> Jisas je haun maaden, “Batut feigale. Age dana egena Anut cewel utoc foqagan imeig odocobilfi age Memega sao jobon bilia eu ameg me uqa qee adeiaun. Eunu age Anut cewel utoc eu ege odochocomun dana age meciguqagan Cain owain,” aden.

<sup>2</sup> “Me hihili coboc dana age Juda agena cuha jonaca jicnaca ege binanige suluqagan imeig sawen dana loo siwiadoqa bili aquniaadi taul fuldogina. Eunu hina me hihili coboc dana eundec odi odogina Cain odogaun. Ija mele maadigina, dana eundec age agena ameg oc eu wele oin. <sup>3-4</sup> Euqa hina wawin qocca loo siwiadec eu jahunec biligiannu hina sawen dana eundec loo siwiadecem eben meulana isec odona eu eben ansena isec Cain doiaun. Odochob Memen uqa ceteh jahunecna bilia eu fena uqa ameg me ihigian,” aden.

### *Jisas uqa Anut inondoc kobilnu maden (Luk 11.2-4)*

<sup>5</sup> Jisas je haun maaden, “Me hihili coboc dana age dana ege Anut inondocomun meciguqagan imeig Juda age cuha jonaca jicnaca tatawi Anut inondogina eunu gale ben adena. Eunu hina me hihili coboc dana Anut inondoginawe odi Cain inondogaun. Ija mele maadigina, dana eundec age agena ameg oc wele oin. <sup>6</sup> Euqa hina Memen inondoga bili hina jo hamol limej jic cebec menimeg Memen uqa jahunecna bilia eu inondoga. Odochob Memen uqa ceteh jahunecna bilia eu fena uqa ameg me ihigian,” aden.

<sup>7</sup> Haiden age madegina, “Ege egena tribud je mati bahic madocomunifi jejenige toodu odigian,” egina. Eunu age inondudu je gauc madegina eu odi haiden odoginawe Cain madowain. <sup>8</sup> Age Memega qee madoc ninijeb uqa agena wawaga hoolecca agena togo nijigiannu madegina eu wele dona. Eunu age haiden odogina odiwe Cain odowain,” aden.

<sup>9</sup> “Eunu age odi inondoigale:

‘O ege Memige, hina sao jobon biligina,  
hina ijain gun biliale.

<sup>10</sup> Hinana cul egeca hoiale.

Hina con toodoo odoc sao jobon ihoc lenawee  
odi mahana ha ihoc leiale.

<sup>11</sup> Sab jecnu ba i ihoc igigale.

<sup>12</sup> Dana age ege me qee odigieinnu ege dahinige celenwe  
hinaha egena me qee oddadec eunu dahin celeiale,

<sup>13</sup> Hina ege temgecna Cain ehi li migigaun.

Euqa qisol mec kobil eu cagasigagale,\* “doigale,” aden.

<sup>14</sup> “Ge, age dana age me qee odadein eu agena silail dahiniga celecebfi Memega sao jobon bilia uqaha agena silail dahig celigian. <sup>15</sup> Euqa age dana age me qee odadegina eu agena silail qee dahiniga celecebfi Memega uqa agena silailha dahig qee celeiaun,” aden.

### *Jisas uqa sabnu qagu bielecnu eunu maden*

<sup>16</sup> Jisas je haun maaden, “Me hihili coboc dana eu age ege sabnu qagu biluquna eu meciguqagan imeig olanaga jugu qocca cobogina. Euqa age sabnu qagu bielecnu bibileig olanaga jugu qoc me hihili coboc dana eu odi odoginawe Cain cobowain. Ija mele maadigina, dana eundec age agena ameg oc eu wele oin. <sup>17-18</sup> Euqa dana hina sabnu qagu biligina eu Cain fecihuwaninuqa Memen jahunecna bilia eu mechihigiannu hina sabnu qagu bielecnu bibili gosin cilidumeg olain wasacudagale. Odochob Memen uqa ceteh jahunecna bilia eu fena uqa ameg me ihigian,” aden.

### *Jisas uqa maha cehewannu maden (Luk 12.33-34)*

<sup>19-21</sup> Jisas je haun maaden, “Hina toinain haudoc nijina eunu hina wawin cisdocha nijina. Mahana cehewan eu cumucumca tontonca hewi me qee mudina, odochob heje dana ceteh euha heje ocna cawaladoqagan. Eunu age mahana cehewan meca

---

\* **6:13:** Grik je doc dana leih age je i “qisol mec kobil” eu odi “dana uqa qisol mec kobil odona” eu Seten ec cisdogina. Odochob Grik jaqec je hilah leihna age je oso tubdu jaqein eu odi: Me culca, gagadic odochob, kobilkobilca eu hinana himec bieleceb catanigian. Mele.

agedodocnu haudocnu cain cabi owain. Euga sao jobonna cehewan eu tontonca qee hewena, eu susul me qee mudecwe qee, odocob heje oc dana euha heje ocna cawaladecwe qee. Eunu age sao jobonnu age cehewanaga meca haudocnu cabi oigale,” aden.

*Dewegna fulacdoc eu ameg  
(Luk 11.34-36)*

<sup>22</sup>Jisas je haun maaden, “Dewenna fulacdoc eu hina amen. Eunu hina amen me nijinafi hina dewen cunug fulacdoccia nijina. <sup>23</sup>Euqa hina amen galuc mecebfii dewen cunug tu migian. Eunu fulacdoc eu wawinna bilia eu cafulecbii wawin eu gagatucna bahic bilina!” aden.

*Cabi dana oso uqa dana ben lecis alena cabi ocwe qee  
(Luk 16.13)*

<sup>24</sup>Jisas je haun maaden, “Cabi dana oso uqa dana ben lecis alena cabi ocwe qee. Ge, uqa oso sagagduduqa osonu nalug migian. Qeefi, uqa osonu waug nijigian qa oso cewudigian. Odiwe ha age Anutca maha cehewanagaca agena tibud mumudi osoben cabi u calecnu qee nijel,” aden.

*Jaen qoc waug madecca kobolnu  
(Luk 12.22-31)*

<sup>25</sup>Jisas je haun maaden, “Eunu ija age maadigina, age mahana cebac bilecnu Cain jaen aqeaun. Eeta sab jeqan, eeta gab jeqan, Cain owain. Age deweneganu ha Cain jaen aqeaun. Eeta taceqan Cain owain. Agena cebac biley eu sab jec wooldona. Dewenega eu lotoc wooldona. <sup>26</sup>Man fululec sao bisilag cobogina eu meciadeigale. Age ceteteh qee cehegina. Ageha wal meceb ceteteh jo bisna qee tacegina. Euqa age Memega sao jobon bilia uqa moot madena. Age agena fajec eu man fululec agena fajec wooldoc bahic bilegina! <sup>27</sup>Age info uqa uqana cebac bilecnu jaen qonana uqa uqana maha biley saen nag cecelacca mudecnu ihoc?” aden.

<sup>28</sup>“Age eetanu lotoc tacecnu jaen ben aqena? Age ceteh sal qoc wasena eu feiga. Age cabi qee ogina, agena lotocha qee mudegin. <sup>29</sup>Euqa ija odi maadigina, Solomon uqa lotoc tumutumca bahic tacitawen eu sal qoc bahunadec tawena i oso qee wooldol. <sup>30</sup>Euqa Anut uqa ceteh gigisac gami tacec balaca adena, ceteh eu qila tawena uqadec jana helecebilecijina. O age wawaga meleec meca qee, age dogina, Anut uqa age gigisac wooldudu tacecnu adigan. <sup>31-32</sup>Haiden age ceteh eu cunugnu jaen aqena. Odocob age Memega sao jobon bilia uqa age ceteh euca qeefi age maha ina bileywe qee eu uqa dona. Eunu age jaen aqecib eeta sab jeqan, eeta gab jeqan, cel cetehna dewenige taceqan eu Cain madowain. <sup>33</sup>Euqa age casac age Anut mudcebil uqa agena king biliiale, odocob age uqana tutuc coboc umeig toodoigale. Oodobil ceteh mahananadec eu toodu ageca hugian. <sup>34</sup>Deel uqadec uqadoc jaen qocca cisdigian. Eunu age deel uqadec uqana gihacadec eunu Cain jaen aqeaun. Deel abesabes gihacadec gahidocnu ihoc gulucdoigale,” aden.

## 7

*Age cotoga Cain gesildowain  
(Luk 6.37-38, 41-42)*

<sup>1-5</sup>Jisas je haun maaden, “Eetanu hina cotin amegna hilican nag eu fagana qa hinadodoc amenna fan ben nijina eu qee fagana? Qeefi, hina adi cotin madogana, ‘Coti, cultecem hilican nag amenna nijia eu u helihigen,’ dogana qa hina amenna fan ben nijina? Hina me hihili coboc dana! Casac fan ben eu hina amenna fagdoc nijia eu catagi helagale. Odocob hilican nag cotin amegna nijia eu u helecnu ihoc fegan. Gesilec age osonu je madegina gesilec euna Anut uqa age gesiladigian. Age ihoc mec dana ihoc miadegina ihoc mec euna ha Anut u hewi age ihoc miadigian. Eunu Anut age gesiladimei camasac mimi cewadeiaunnu age dana osona kobil gesildumeig Cain camasac mimi cewudec je madowain,” aden.

<sup>6</sup>“Qa age falicdu age tataladowainnu age ceteh Anutnu gun bahic nijia eu qa Cain culiadowain. Ho age gilolo eu lahacluhudcowainnu agena gilolo me eu ho amagana Cain helowain,” aden.

*Anut uqa dana age uqanu inondogina eundec ceteh me bahic adigan  
(Luk 11.9-13)*

<sup>7-8</sup>Jisas je haun maaden, “Cunug age cetehnu Anut sisildogina eu ceteh ogina. Odocobil oso ceteh walena eu ceteh gulucdona. Odocob oso jic cebec gohugohudona eu Anut huditungian. Eunu Age Anut cetetehnu inondocobil ceteh eu adigan, odocobil age wawali cobimeig ceteh walegina eu gulucdoqagan, jic cebec gohugohudocobil Anut hudiadigian.

<sup>9</sup> Qeefi, age gemona dana oso ugana mel uqa memeg sab itiga jiga docobfi memeg uqa sab qee utina qa meen utinafo? <sup>10</sup> Qeefi, age gemona dana oso ugana mel uqa memeg cul dool itiga jiga docobfi memeg uqa cul dool qee utina qa man sononec utinafo? <sup>11</sup> Feiga, age dana gug me qee qa age agena mel ceteh me adecnu dogina. Eunu age mele dogina, Memega sao jobon bilia eu uqa age sisildogina eundec ceteh me bahic adigian! <sup>12</sup> Eunu dana filfil age agenu odadecebile gale adenaweu odi age dana filfilnu ha odadeigale. Ge, Mosesna loo jeca je hahun madec dana agena iwaladec jeha madein agena je eu ugana caun inhen,” aden.

*Age jic cebec sosog bahicna loqagan  
(Luk 13.24)*

<sup>13-14</sup> Jisas je haun maaden, “Fadalecna calecnu jic cebec eu bagalan, jic euha bagalan. Toodocnu eu hetec. Odocob jic cebec euna mati bahic limeig jic euna cobogina. Euqa cebac biley catanec euna calecnu jic cebec eu sosog, odocob jic euha cacanigca. Odocob dana cajaca mati bahic jic eu gulucdumeig qee toodogina. Eunu age cebac biley catanec euna loqaga bili jic cebec sosogna leigale,” aden.

*Age uhulec je hahun madec dana eunu batut feigale  
(Luk 6.43-44; 13.25-27)*

<sup>15</sup> Jisas je haun maaden, “Age uhulec je hahun madec dana age sipsip ganac tacimeig eu age qee waadecnu odi ageca hogina. Euqa wawaga dunuhna age qa cus olohonogaca odi nijia, age me qee bahic odadoqagan. Eunu ageca hu quauadowainnu batut feigale. <sup>16</sup> Age agena odoc aig qocnana cisadi feigale. Qam aig gagalit na mogi jecnu nijiafo? Dan aig momos na mogi jecnu nijiafo? <sup>17</sup> Eu odi cehelo gug me eu aig me qona, odocob na gug me qee uqa aig me qee qona. <sup>18</sup> Cehelo gug me uqa aig me qee qocwe qee, odocob na gug me qee eu uqa cehelo aig me qocwe qee. <sup>19</sup> Na uqa aig me qee qona eu codocobil toneceb cedimeig jana manegina. <sup>20</sup> Eu odiwe age uhulec je hahun madec dana agena odoc aig qocna cisadi feigale,” aden.

<sup>21</sup> “Dana cajaca age ija ‘Tibud, Tibud,’ tegina eu cunug sao cul jobon dunuh qee lowain. Euqa Mei sao jobon bilia eu madena eu toodu odogina age himec loqagan. <sup>22</sup> Deel cit qoc euna mati odi matoqagan, ‘Tibud, Tibud, ege hina ijainna je hahun madeginaw odi qee madolomfo? Ege hina ijainn Hewi buga me qee eundec qee ititacadolomfo? Ege hina ijainna kobilkobil qee odolomfo?’ toqagan. <sup>23</sup> Odi matecebile ija maadigen, ‘Ija age, age ijana eu qee faciadelem. Age qisol mec kobil odogina cuculti beleiga,’ adigen,” aden.

*Jo cehecnu kobil lecis nija  
(Luk 6.47-49)*

<sup>24</sup> Jisas je haun maaden, “Eunu oso, ijana je dah mimei eu toodu odona, eu dana cisdoc silecca cinigwe. Dana eu uqa ugana jo maha gagadic meencana cehen. <sup>25</sup> Odocob wa ben neceb wa cue ha humei jona leceb gugula ha hu jo eu heweceb qa jo eu ugana nah maha gagadicna cehen tawennu jo qee cabat. <sup>26</sup> Osoqa uqa ijana je dah mimei eu toodu qee odona eu uqa dana gad oso odi, uqa ugana jo wa gon esicna cehen. <sup>27</sup> Odocob wa ben neceb wa cue humei jona leceb gugula ha hu jo heweceb jo eu cabaten. Odimej jo cabati nui me qee bahic muden,” aden. <sup>28-29</sup> Jisas uqa Juda agena loo je iwaladec dana oso cunug maadeinwe odi qee maadel qa uqa je Tibud gagadic odocca iwallaadi maaden. Eunu uqa je eu maadi mamaden dana cajaca age wawaga cacaden biley, ugana iwaladec je eu wawaga qon.

## 8

*Jisas dana oso lepraca me muden  
(Mak 1.40-44; Luk 5.12-14)*

<sup>1</sup> Jisas uqa aluh culimei toni nuen. Toni nunuen dana cajaca am ben bahic toodu belein. <sup>2</sup> Jisas nunuen hag dana oso deweg lepraca uqa Jisas fimei uqa limei Jisas olana gob cecehi Jisasnu cuha fefei cesusdu madon, “O Tibud, hina ija me mitiga hecebfii hina me mitecem ijana hag culteceb ija Anut amegna cataniec biley ioc,” don. <sup>†</sup> <sup>3</sup> Odocob Jisas eben huledumei deweg quddododoi madon, “Ija me mihiga tena. Me maga!” don. Saen

\* <sup>8:1:</sup> Age je eu Matju 5.2na nijia eu feiga. <sup>† 8:2:</sup> Juda agena loo je oso nijen eu odi. Dana osofo, caja osofo uqa lepra hagcafo, hag eundec osocafo bileycebfii uqa Anut amegna gegehinca bilen ec maden. Odocob eu uqa ugana hag qee men ec cisdon saen euna uqa ihanec dana fecidocnu nuen. Odocob ihanec dana uqa danafo, cajafo hagca qee eu fecebfii uqa danafo, cajafo eu qila uqa Anut amegna cataniec bilina ec maden. Age Wok Pris dac 13-14 feiga.

eunadih lepra hag eu uqa dewegna culdeceb deweg hul hon.<sup>‡</sup> <sup>4</sup> Odocob Jisas cahacdu madon, "Dah maga, ceteh inu oso cain sadudu cobogaun. Euqa li nawel tawec ihanec dana eu hina dewen ihacdocom maleldugian. Odimeg Moses loo je wele maden eu toodumeg hina qila me biliga dana cajaca cunug ihacadecnu Anut ihandogale," don.

*Jisas uqa Rom agena han ilo dana 100 cofadec oso uqana cabi dana me muden  
(Luk 7.1-10)*

<sup>5</sup> Jisas uqa Kapaneam jobon dunuh lelen Rom agena han ilo dana 100 cofadec oso ono uqaca hu ninidudu madon, <sup>6</sup> "O Tibud, ijana cabi dana ijana jona hag njia. Uqa aleg men deweg geh dain dona," don. <sup>7</sup> Odocob Jisas uqa jejeg hewi madon, "Ija hinaca belimeu me mudihigen," don. <sup>8-9</sup> Euqa Rom agena han ilo dana 100 cofadec uqa madon, "O Tibud, hina ijana jo dunuh lecnu eu ija dana me bahic ihoc qee. Faga, ijaha ijadodoc han dana ilo oso bisalu bilingina. Odocob ijaha han dana leih ija bisalu bilingina. Ija oso nuuga ecemin nuina. Ija oso hoga ecemin hona. Odocob ija ijana cabi bega meh dana odi odoga ecemin uqa coni toodoo odona. Eunu hina je osol madecem ijana cabi dana hag medugian," don. <sup>10</sup> Jisas uqa Rom agena han ilo dana 100 cofadec je eu madeceb dah mimei tumatumai toodoin eundec maaden, "Ija mele maadigina, ija waug meleec uqana bilina cinigwe Isrel gemona oso qee gulucdolom!" aden.

<sup>11</sup> "Ija age maadigina, cam tobi becnadecca cam toni nocnadec ha mati hoqagan. Age Ebrahamca, Aisakca, Jekobca gami sao cul jobon ono sab jecnu biluqagan." <sup>12</sup> Age odi bibilegin Isrel dana cajaca Anut uqa age sao cul jobon bilecnu nesili ehadan eundecqa Anut ititacadeceb jobon hahagum limeig tu gagatuccana biluqagan. Ono dana age qada qaqaji maimaga kicodudu biluqagan," aden.

<sup>13</sup> Odimei uqa Rom agena han ilo dana 100 cofadec madon, "Wawin meleec eu toodoo odihiale. Hina gad nuuga," don. Madodon euna bahic Rom agena han ilo dana 100 cofadec uqana cabi dana hag medon.

*Jisas uqa Pita momoig me muden  
(Mak 1.29-31; Luk 4.38-39)*

<sup>14</sup> Odocob Jisas uqa Pitana jona limei uqa Pita momoig hag deweg daincaca hulec ninijen fen. <sup>15</sup> Odimei uqa hageca caja eu eben qududocob uqana hag culden. Odocob uqa cajimei sab jec saciadumei Jisas cewel uten.

*Jisas uqa dana cajaca mati bahic me maden  
(Mak 1.32-34; Luk 4.40-41)*

<sup>16</sup> Odocob wesi meceb dana age cotogail mati dewenega buga me qee hewadein eundec cedadeceb Jisasca ahoin. Odocob Jisas uqa buga me qee je maadeceb dana deweneganadec cali hu belein. Odimei dana cajaca cunug age hagca me maden. <sup>17</sup> Uqa je hahun madec dana, Aisaia, uqana jaqec je ihoc ligiannu odi odon. Jaqec je eu wele odi maden,

"Uqa egene hag filfil cedi gahidu nuen," en.

*(Aisaia 53.4)*

*Jisas uqa uqa toodocnu kobol eunu maden  
(Luk 9.57-60)*

<sup>18</sup> Odocob Jisas uqa dana cajaca am ben bahic talildu tatawegin fimei uqana malogom maaden, "Ege wa gad cagoc cool ono isec beleqan," aden. <sup>19</sup> Odocob loo je iwaladec dana oso Jisasca humei madon, "Iwalgec, hina anaana nunuem ija toohigen," don. <sup>20</sup> Odocob Jisas jejeg hewi madon, "Qa cus agena helona nijegina, odocob man fululec agena teicna nijegina. Euqa Dana Melah uqa us nijec cudunca qee," don. <sup>21</sup> \*\* Odocob malogom oso uqa Jisas madon, "O Tibud, cultecem ija casac ceseli nuimig mei heel cisigen," don. <sup>22</sup> Odocob Jisas jejeg hewi madon, "Cal mec dana culadecem cal mec eundec agena heel ciseigale. Hinaqa ija tootaga," don.

*Jisas uqa gugula macasca maaleceb manin tilien  
(Mak 4.36-41; Luk 8.22-25)*

<sup>‡ 8:3:</sup> Juda agena loo je osoha nijen eu odi, hina ebenna dana lepra hagca deweg qududufeg hinaha Anut amegna gegehinca biligian ec maden. Euqa Jisas uqa dana eu deweg qududon saenna uqa gegehinca qee calel. Uqa dana eu medocob uqana hag qee men. Odimei uqa cataniec calen. <sup>§ 8:7:</sup> Juda dana age Juda dana qee eundec osona jona lifeig age Anut amegna gegehinca caloqagan ec cisdoen. Eunu age agena jona lecnu qee gale adena. Age Aposel 10.28 feiga. Euqa Jisas uqa eunu qee cisdoil. Uqa Rom dana uqana jona ligian ec maden. <sup>\*\* 8:20:</sup> Jisas uqadodocnu uqa Dana Melah en. Dana Melah eu Mesaia ijan oso. Eunu Jisas uqa dana Anut uqana dana caja caahahaadecnu wele nesili ehuden eu ija ec maden.

<sup>23</sup> Jisas uqa wag osona tobocob ugana malogom toodoo toboin. <sup>24</sup> Age nunuegin quqlubadecwe gugula ben neceb macas† me qee meceb caji qahi wag dunuh qelen. Euqa Jisas uqa us nijen. <sup>25</sup> Odocob malogom age li Jisas tulidudu madoin, “Tibud, ege fadalecnu odoqona. Cahahagagale!” doin. <sup>26</sup> Odocobil uqa maaden, “Oe age wawaga meleec meca qee. Eetanu cucuiegina?” aden. Odimei uqa caji gugula macasca cahacaali maaleceb manin tilien. <sup>27</sup> Dana age eu oodon fimeig tumatumai madein, “Uqa cel dana fufuca macas qahecca uqa co toodoo odosina?” ein.

*Jisas uqa dana lecis alena buga me qee ititacaden  
(Mak 5.1-17; Luk 8.26-37)*

<sup>28</sup> Odocob age nui Gadara agena hatuna calein, eu Galili wa oc naha isec. Odocob dana lecis buga me qee hewalein eu ale qalgal hatinnadec cajimesi Jisas gulucdosin. Ale cus bahic. Eunu dana age jic euna nuecwé qee. <sup>29</sup> Odocob ale jejenela suli u madosin, “O Anut Melah, hina ege eeta odigegan? Saen qee calel hina ege me qee odigecnu hogafó?” dosin. <sup>30</sup> Aria, ho am ben oso ono isec sab jiji coboin. <sup>31</sup> Odocob buga me qee age Jisas ninidudu madoin, “Hina ititacgifeq ho am euna sulgecem age dewenegana leqan,” doin.

<sup>32</sup> Odocobil Jisas maaden, “Beleiga,” aden. Odocob age dana lecis cuculaleig ho deweneganalein. Odocobil ho cunugca aluh qeihqeih guguli nu Galili wa gad cagoc dunuh gotoimeig cunugca odi wa jimeig cal mein.

<sup>33</sup> Odocobil dana ho cofadoloiq eu age fimeig busali belein. Age taun ben limeig ceteh cunug calennu dana cajaca maadein. Age ceteh dana lecis buga me qee hewalein aleca calen eunu saadein. <sup>34</sup> Odocob dana cajaca cunug age taun euna bilein eu age limeig Jisas gulucdoin. Odimeig age Jisas fimeig dana Gadara agena hatunadec cunug Jisas cuculadi nuigiannu ninidoin.

## 9

*Jisas uqa dana laleg mec oso me muden  
(Mak 2.1-12; Luk 5.17-26)*

<sup>1</sup> Jisas uqa wagna tobimei wa gad cagoc leti hagen naha isec nuen. Odimei uqa ugana jobon calen.\* <sup>2</sup> Odocob dana leih age dana laleg hagca oso gabagabna ninijen Jisasca hehewi ehudi ahoion. Saen Jisas agena wawaga meleec eu ben bahic fimei dana laleg eu madon, “Melami, hinana silail cagashiga qee meia eunu wawin toogdoiale,” don.

<sup>3</sup> Odocob loo je iwaladec dana leih age togododu madein, “Dana eu uqa Anut cewudec je madeia,” ein.

<sup>4</sup> Euqa Jisas uqa agena cisdock dumei maaden, “Age wawagana cisdock qisol je eetanu madegin? <sup>5</sup> Cel je madec cacanigca qee ija madigen? ija madigen, ‘Hinana silail cagashiga qee meia,’ ecfo, qee ‘Cajimeg coboga,’ ec madigenfo? <sup>6</sup> Euqa Dana Melah mahana silail cagasiadecnu gagadic odoc ebenna nijia eu doqagannu ihacadigen,” aden. Odimei uqa dana laleg hagca madon, “Cajimeg hinana gabagab eu qahimeg hewi hinana jobon nuuga,” don. <sup>7</sup> Odocob dana eu cajimei ugana jobon nuen. <sup>8</sup> Odocob dana ono cegulein age odi oodon fimeig cucuiein. Odimeig Anut uqa gagadic odoc eundec dana aden eu binan sulein.

*Jisas uqa Matju utadocob toodon  
(Mak 2.13-17; Luk 5.27-32)*

<sup>9</sup> Jisas uqa jobon eu culimei uqa cali li dana oso, ijan Matju, uqa takis cedec jona bibilen fen. Fimei madon, “Tootaga,” don. Odocob uqa cajimei Jisas toodoo nuen.

<sup>10</sup> Odocob hibna Jisas uqa jo euna sab jejei bilen.† Bibilen takis cedec danaca, silail danaca mati hocobil age Jisas ugana malogomca gami sab jein. <sup>11</sup> Odocob Farisi age Jisas odi oodon fimeig Jisasna malogom maadein, “Eetanu agena iwaladec uqa takis cedecca silail danaca eundec gami sab jegina?” adein.‡

<sup>12</sup> Euqa Jisas uqa je eu dumei maaden, “Hagca qee age hag me madec danaca qee legina. Qeelo. Hagca himec age hag me madec danaca legina. <sup>13</sup> Ija ititom dana cajaca ‘Age agena silailnu wawaga tului falicdoigale,’ ec utai maadecnu qee holom. Euqa ija silail dana

† 8:24: Macas eu Galili wa gad cagoc. \* 9:1: Saen euna Jisas ugana cudun eu Kapaneam. Age Matju 4.13 feiga.

† 9:10: Dana mati age jo eu Matjuna jo ec cisdogina, uqa leih age jo eu Jisasna jo ec cisdogina. † 9:11: Farisi age agena loo je mati toodoo odoin. Eunu age cel dana uqa loo je eu qee toodoo odona dana eu uqa silail mena, odimeig uqa Anut amegna gegehinca bilina ec cisdoin. Odocob Juda dana qee eundec age dana eu gami billecebifli euha dana eu gegehin mudina ec cisdoin. Takis cedec dana age gaid Rom dana gami bilein. Rom age Juda dana qee eundec, age haiden dana. Eunu Farisi age Juda dana age Rom agena takis cedein eu dana gegehinca bahic Anut amegna bilein ec cisdoin.

cajaca 'Age agena silailnu wawaga tului falicdoigale,' ec utai maadecnu hom. Eunu age je i Anutna jaqc je nijia eu ugana gugnu doc eu li oiga. Je eu odi madena:  
 'Ija age gauc ihantecnu qee gale tena.

Ija age dananu wawaga qocca biluqagannu gale tena,' ena," aden.

(Hosea 6.6)

*Jisas uqa sabnu qagu bielek kobil eunu maden*

(Mak 2.18-22; Luk 5.33-39)

<sup>14</sup> Saen euna Jonna malogom age Jisasca humeig sisildoin, "Eetanu egeca Farisica ege gaid esuesu sabnu qagu biluquna qa hinana malogom eu qee sabnu qagu bilegina?" doin.

<sup>15</sup> Odocobil Jisas maaden, "Age dana caja ocobocobecna cegulein bilegina eunu age caja oc dana eu gami bieleig adi qada qajec biluqagan? Euqa saen oso hibna dana leih hu caja oc dana cawaladecebilel deel euna age sabnu qagu biluqagan," aden.

<sup>16</sup> "Odocob oso ugana lotoc hilah giloccanu eu eeldugia bili, uqa lotoc fan haun qee cusec tatacan qee faldona. Eu odi odoubmiqa age lotoc cusecebilel fan haun eu nag meceb eu gesacna haun ceseli balahadu bendoub. Wele balahadon eu wooldu qatanoub.  
<sup>17</sup> Odiha wain haun jool mecmec ganacna mudec hilahna qee o danegina. Jool mecmec ganacna mudec hilah eu wele galalec eunu odoubmiqa wain eu jool ganacna mudec qatanoub, wain basecdु cusdoub, odocob jool ganacna mudecha qatani cusdoub. Qeeo, age wain haun jool ganacna mudec haunna o danecebilel euna lecisca odi me nijuwasan," aden. §

*Juda agena ilo dana uqa Jisas cesuldocnu madon*

(Mak 5.22-24; Luk 8.41-42)

<sup>18</sup> Jisas uqa odi maaaden Juda agena ilo dana oso uqa humei Jisas amegna gob cecehi uqanu cuha fimei madon, "Ija ateni qila cal meia. Euqa humeg eben dewegna mudecem uqa cebac biligian," don. <sup>19</sup> Odocob Jisas cajeceb uqa ugana malogomca age ilo dana eu toodoo belein.

*Hagca caja oso Jisasna lotoc heweceb me muden*

(Mak 5.25-34; Luk 8.43-48)

<sup>20-21</sup> Jisas cocobi lelen caja oso ono cabi gel 12-pela golac nenen odi hewi coboloi eu uqa dana cajaca cegulec gemo limei Jisas hibilohu isec ben. Uqadodoc maden, "Ija ugana lotoc dih qududocominfi ija hag metigian," en. Odimei Jisasna lotoc bibig qududon. <sup>22</sup> Odocob Jisas waldumei caja eu fimei madon, "Ateni, hinana wawin meleec eu me mihia eunu wawin toogdoiale," don. Mahuc bahic caja eu hag medon.

*Jisas uqa Juda agena ilo dana ateg tulidocob ceseli cajen*

(Mak 5.35-43; Luk 8.49-56)

<sup>23</sup> Odocob Jisas uqa Juda agena ilo dana ugana jona calimei uqa dana cololo fuldogin dana cajaca age dahocfafalegin eu fimei <sup>24</sup> maaden, "Mel aid i qee cal mel. Uqa us himec nijina! Isa qoigal!" aden. Odocob age asaldoi. <sup>25</sup> Euqa age dana cajaca ititacadecebilel maha gemo lecebilel Jisas uqa jo dunuh len. Odimei uqa mel aid eben u heweceb caji bilen. <sup>26</sup> Odocob Jisas odonnu je hatu naha isec eu cunug ihoc leceb dana cajaca doin.

*Jisas uqa dana lecis amala galuc mec me malen*

<sup>27</sup> Jisas uqa cudun eu culimei nunuen dana lecis amala galuc mec ale Jisas toodu utadudu madosin, "O Dewid Melah, elenu walol heiale," dosin. \*\* <sup>28</sup> Jisas uqa jona leceb dana lecis amala galuc mec ale ugaca lecebilel sisilmaalen, "Ale ija odi odalecnu ihoc wawala meleenafo?" aden. Odocob madosin, "Ese Tibud, ele eunu wawile meleena," dosin. <sup>29</sup> Odocobil Jisas ebenna amala qududumei maalen, "Wawala meleecna odaleia," aden. <sup>30</sup> Odi maaleceb ale amala fogo docob ceteh fesin. Odocob Jisas uqa cahacali maalen, "Batut fesiale, dana oso ija odaliga eu cain sadocobil doiaun," aden. <sup>31</sup> Euqa dana lecis ale hatuhatu cunug cocobi Jisas odalen je eu dana cunug saadecebilel doin.

*Jisas uqa dana oso co cufa qoc me muden*

<sup>32</sup> Dana lecis nunuesin age dana oso ehudi Jisasca hoin. Dana eu buga me qee hewen uqa co cufa qon. <sup>33</sup> Jisas uqa buga me qee eu ititacdocob dana eu cuculdi nueceb dana

§ 9:17: Juda age mecmec qumeig bilacdumeig ganacna gisimeig jool mudoloig. Age jool ganacna mudec euna wain o danoloig. Age wain haun jool mecmec ganacna mudec haun o danecebilel saen cecelac nijimei wain tinca me bahic caloloi. Saen euna wain eu jool ganacna mudec didon. Odocob jool ganacna mudec eu wele galaleni eu qatani qee men. Aria, je i galalo je. Lotoc hilahca jool mecmec ganacna mudecca eu loo je iwaladec Farisica agena iwaladec je. Wain haun eu Jisas ugana iwaladec je. \*\*\* 9:27: Juda dana cajaca age dana Anut ugana dana caja cahahahaedcu wele nesili ehuden eu ugna Dewidna silihuldec caligian ec doin. Dana lecis amala galuc mec i ale Jisas uqa dana i Isrel age sumudeinu wawala meleen, eunu ale madosin, "O Dewid Melah," dosin.

eu je maden. Dana cajaca age eu fimeig tumatumaimieg madein, "Uqa odona odoc odiwe dana wele Isrel gemona oso qee odocob folom," ein.<sup>34</sup> Euqa Farisi age madein, "Uqa buga me qee agena ben uqana gagadic odocna buga me qee ititacadena," ein.

*Jisas uqa dana cajacanu waug qon*

<sup>35</sup> Jisas uqa jobon nagnag benbenca cocobi Juda agena cuha jona limei dana cajaca iwaladen. Uqa sao cul jobonnu me je qasali maadimei agena hag filfil aqecca dewenega laleg mein eundecca eu me maden.<sup>36</sup> Uqa dana cajaca meciaden. Age jaen aqecca eu oso cesuladecca qee bilein. Age sipsip cofadecca qee cobogina odiwe bilein. Eunu agenu waug qon.<sup>37</sup> Odimei uqana malogom maaden, "Cabina ceteh mati bahic cedi haudocnu wal men nijia, euqa cabi dana mati ceteteh cedi jo bisna mecnuna qee bilegina."<sup>38</sup> Eunu sab cedi haudocnu gug uqa cabi dana suladeceb sab haudocnu inondoigale," aden.

## 10

*Jisas uqana aposel 12-pela age ijanaga  
(Mak 3.13-19; Luk 6.12-16)*

<sup>1</sup> Odimei Jisas uqa uqana malogom 12-pela utaaideceb uqaca hocobil uqa buga me qee dana deweneganadec ititacadecnuca, dana hag filfil aqecca dewenega laleg mein eundecca cunug me madecnuca cabi eu ebenegana men.

<sup>2</sup> Uqana aposel<sup>\*</sup> 12-pela age ijanaga eu odi. Casac eu Saimon, ageha Pita egina, odocob uqa waliag eu Andru. Oso eu Jems, uqa Sebedi melah, odocob uqa waliag eu Jon.<sup>3</sup> Odocob Filipca, Batolomjuca, Tomasca. Odocob Matju, uqa takis cedec dana. Odocob Jems, uqa Alfias melah, odocob Tadias.<sup>4</sup> Odocob Saimon, uqa Selot agena am oso, age Juda dana eu Rom dana Judia hatunadec ititacadecnu egina. Odocob Judas Iskariot, uqa hibna Jisasnu balijimei uqana cad ebenegana muden.

*Jisas uqa aposel 12-pela agena cabi aden  
(Mak 6.7-13; Luk 9.1-5)*

<sup>5</sup> Jisas uqa dana 12-pela eu suladi maaden,<sup>†</sup> "Juda dana qee eundec agena hatuna Cain lowain. Sameria agena jobon oso Cain lowain.<sup>6</sup> Qee. Age Isrel sihildec sipsipwe dad mi cobogina eundecca leigale.<sup>7</sup> Age eu cocobi me je qasali maadeiga, 'Sao cul jobon cemeneva hona,' adeiga.<sup>8</sup> Hag nijeginha eu me madeiga. Cal mein eundec tuliaideiga. Lepra hewadec eu eeladeiga. Buga me qee dana deweneganadec ititacadega. Age eu odocnu gagadic odoc i qee fajelein, age gauc loo adem. Eunu ageha gauc loo adeigale," aden.

<sup>9</sup> "Age gold qaigca, silwa qaigca, kopa qaigca agena oologamna u tacecnu Cain walowain.<sup>10</sup> Dana cabi ona eu uqana cabinu sab jec wadac gulucedocnu ihoc bilina. Eunu jic cobocnu ceteh oso Cain hewowain. Age badom Cain hewi cobowain. Lotoc leciscia Cain hewi belowain, osol himec taceiga. Jaimaga tacec eu Cain tacowain. Jic coboc kom ha Cain hewi cobowain," aden.

<sup>11</sup> "Age jobon osoosona limeig age dana oso hutan meca bilinafo eunu sisiladi feigale. Odocob oso hutan me bielecbi age uqana jona bibleig li jobon eu culimeig beleiga.<sup>12</sup> Age jo euna leleig dana cajaca age jo euna biley eu maadoqagan, 'Anut eeladeiale,' adoqagan.<sup>13</sup> Aria, jo euna biley eundec dana mefi eu agena eeladec je dewenega fagdugian. Euqa jo euna biley eundec eeladec je eu ocnu ihoc qeefi agena eeladec eu ceseli ageca hugian.<sup>14</sup> Odocob dana oso age oiaadecnu agena je ha dah mecnu culecebfli age jo eufo, jobon eufo cuculadi beloqaga bili comis jaimagana fagdon eu qoidu heleiga.<sup>‡</sup> <sup>15</sup> Ija mele maadigina, Gesiladec Deel Benna jobon eu ameg me qee bahic ugian. Dana cajaca Sodom Gomora bilein eu ageha Gesiladec Deel Benna ameg me qee oqagan. Euqa jobon eu agena je hibemdogina jobon eu agena ameg me qee eu Sodom Gomora agena ameg me qee wooldugian," aden.

*Culumen ben filfil malogomca caligian  
(Mak 13.9-13; Luk 21.12-17)*

\* **10:2:** Aposel uqana gug eu "oso suldon." Jisas uqa uqana malogom 12-pela ijanaga aposel qumei cabi oso ebenegana men. Cabi eu uqa dana cajaca Jisasnu me je qasali maadecnu suladen. Malogom 12-pela i age aposel bilein. Euqa dana leihha age aposel ein, eu odi Pol Banabasca. Age Aposel 14.14 feiga. † **10:5:** Je i je cecelac 5-pela Jisas maaden buk Matjuna nijen eundec leciscoc. Je cecelac i 10.5-42na nijen. Eu Jisasna malogom age dana cajaca Anutna me je maadoqagan saen euna ceteh eu ageca caligian eunu madena. ‡ **10:14:** Malogom age dana cajaca jobon euna bilein age Anut geladigiannu ulauladecnu odi odoin. Age Mak 6.11ca, Aposel 13.51ca euha feiga.

<sup>16</sup> Jisas je haun maaden, “Feiga, ija age suladigina odi sipsip age qa cus gemo leginawé suladigina. Eunu age man sononec doc silecca odi cisdudu coboginawé ciboigale. Euqa age cuhudid qaucca qee odi ciboigale,” aden.

<sup>17</sup> “Age dananu dah qut ciboigale. Age gesiladecnu cegulec amegna ehi li madimeig agena cuha jona ha qisaadoqagan. <sup>18</sup> Ageha ija cilehtecnu cisdumeig gabman ilo kingca amagana ehi li madecebile tawoqagan. Odimeig age ijana me je gabman ilo kingca Juda dana qee eundecca madoqagan. Saen euna age dana amagana wawaga meleec age eu doqagan eunu qasali madoqagan. <sup>19</sup> Age age gesiladecnu cegulec amegna madecebile saen euna Anut je adeceeb je eu tutuc madoqagan. Eunu age casac cel je cel je madigen eu Cain saciadowain. <sup>20</sup> Ge, agedodoc je qee madowain. Memegana Kis eu age uqa co tawecibil je madigian,” aden.

<sup>21</sup> “Saen euna dana waliagwaliagnu balijimeig age waliniqail aqecibil cal moqagannu gesilec jona madoqagan. Memegail ageha agena melnu balijuqagan. Mel age memegail anagailnu cajimeig age aqoqagannu gesilec jona madoqagan. <sup>22</sup> Odocob ija ijani heweginia eunu dana cajaca cunug age agenu gemanaga beceb sagagadoqagan. Euqa dana cajaca cunug age ceteh eu cunug wooldudu cit qoc gadacna calegina eu Anut uqa age caahaaqidigian. <sup>23</sup> Ija mele maadigina, age jobon oso cuculi busali osona li bielec odi oodi Isrel agena jobon cunug qee li hedoc ninjeb Dana Melah ceseli hugian. Eunu dana age jobon oso aqati tootooadecibil busali jobon osona beli bieleiga,” aden.

<sup>24</sup> “Malogom uqana iwaldoc wooldoc qee nijel. Odocob cabi danaha uqana dana ben qee wooldona. <sup>25</sup> Malogom uqa uqana iwaldoc cinigwe bilina eu ihoc. Cabii danaha uqa uqana dana ben cinigwe bilina eu ihoc. Age jo gug jajabi Bielsebul doin<sup>S</sup> eunu ege doqona, uqana jo eundec ha odi jajabadi je me qee bahic madoqagan,” aden.

*Dana age Anutnu dih cucuiuqagan*

(Luk 12.2-7)

<sup>26</sup> Jisas je haun maaden, “Ceteh cunug jahuldoc nijina eu isi camassac migian. Odocob ceteh cunug jahunec nijina eu isi cunug doqagan. Eunu age dananu Cain cucuiuwain. <sup>27</sup> Ija tuna jahuni je maadigina eu cahinegna dana amagana madeigale. Ija age jahna maadecemin dah megina eeu jo ohisna tatawi dana cajaca cunug qasali maadeigale. <sup>28</sup> Dana age dewenega cal mecnu qoc fegina qa dolonoga cal mecnu qoc eu qee fegina eundecin Cain cucuiuwain. Qeoo. Age Anutnu dih cucuiuqagan. Uqa dewenega dolonogaca eu oloqanah jana fadaligiannu ihoc nijina,” aden.

<sup>29</sup> “Feiga, man fululec nag eundec lecis toea osolna idadogina. Man fululec eu age oso age Memega qee madec mahana qee tonena. <sup>30</sup> Age gosiniga ilomogana nijia euqa cunug Anut wele sanijen bilia. <sup>31</sup> Eunu Cain cucuiuwain. Agena fajec eu man fululec nag mati agena fajec wooldoc nijia,” aden.

*Ege Jisasna malogom ec madecnu Cain majanaga adeiaun*

(Luk 12.8-9)

<sup>32</sup> Jisas je haun maaden, “Eunu oso uqa dana amagana tatowi ijanu madi madena, ‘Ija Jisas uqana malogom,’ ena eu uqanu ijaha Mei sao jobon bilia amegna madigen, ‘Eu ijana,’ igen. <sup>33</sup> Osoqa uqa dana amagana tatowi ijanu qee sasac qu madena, ‘Ija Jisas uqana malogom qee,’ ena eu uqanu ijaha Mei sao jobon bilina amegna madigen, ‘Dana i ijana qee,’ igen!” aden.

*Jisasna malogom age Jisas nalug moqagan*

(Luk 12.51-53; 14.26-27)

<sup>34</sup> Jisas je haun maaden, “Age wawagana Cain madowain, Jisas uqa mahana malol bielec igecnu hon owain. Ija malol bielec mahana ahu mecnu qee holom. Ija han cadec ehi nem.

<sup>35</sup> Ge, ija dana cajaca qatanadecemin

‘mel oso memegna cad ibuldugian,  
odocob mel aid uqa anagna cad ibuldugian,  
odocob huhighuhigca ale cad biluwasan’  
eunu hom.

<sup>36</sup> ‘Odocob dana uqana jona bilegina eundec

age wawaga filfilca uqana cadca biluqagan,’ aden.

(Maika 7.6)

<sup>37</sup> “Oso uqa memeg anagcani ija wooltitu nalunula menafi eu ijana bielecnu ihocca qee. Oso uqa melahnua ategnuca ija wooltitu nalug menafi eu ijana bielecnu ihocca qee. <sup>38</sup> Oso

ugana na babalec gahidu ija tooti cobocnu culinafi eu uqa ijana bielecnu ihocca qee.<sup>\*\*</sup>  
<sup>39</sup> Oso uqa ugana cebac bielec hewigia odona eu uqa ugana cebac bielec felacudigian. Oso uqa ijana bilina eunu ugana cebac bielec felacudecebfi eu ugana cebac bielec ugian,” aden.

*Dana age Kraisna sihul cesuladegina eundec age ameg me oqagan  
 (Mak 9.41)*

<sup>40</sup> Jisas je haun maaden, “Dana oso uqa age ehadi ugaca bielecnu cudun culiadena eu uqa bielec cudun ija culitena. Oso uqa ija bielec cudun culitena eu Anut sulten eu bielec cudun culitona. <sup>41</sup> Oso uqa je hahun madec dana oso uqa je hahun madec dana bilina eunu bielec cudun culticobfi eu uqa je hahun madec dana ameg me oc eu ugian. Oso uqa dana ititom oso uqa dana ititom bilina eunu bielec cudun culticobfi eu uqa dana ititom ameg me oc ha ugian. <sup>42</sup> Oso uqa mel sim eundec oso uqa ijana malogom bilina eunu wa daec oso dih wetidocob jecebfi ija mele maadigina, uqa ameg me oc eu culecw qee,” aden.

## 11

*Wa Joadec Jon uqa ugana malogom Jisasca suladen  
 (Luk 7.18-35)*

<sup>1</sup> Jisas uqa malogom 12-pela je eu cunug maadi hedumei uqa caji nunui uqa jobonjobon dana cajaca iwalaadi Anutna me je maaden.

<sup>2</sup> Wa Joadec Jon uqa gihadoc jona bilen. Odimei uqa Krais odonnu je dah mimei ugana malogom suladeceb Jisascalein. Uqa ugana malogom maaden, <sup>3</sup>“Age Jisasca limeig sisildoiga, ‘Hina i himec hocnu Anut sulhenfo, qee ege osonu amige meqanfo?’ doiga,” aden. Odimei suladeceblein.

<sup>4</sup> Leceb Jisas uqa Jonna sos jejenega hewi maaden, “Ceseli belimeig ceteh feginaca je dah meginaca Jon madoiga. <sup>5</sup> Dana amaga galuc mec haun feciegina. Dana laleg mec haun cobogina. Dana lepraca dewenega cataniecca calena. Dana dahiniga cufa qoc haun je dah megina. Dana cal mec haun cebac megina. Oso uqa sawen dana me je qasali maadeceb age dah megina.\* <sup>6</sup> In oso uqa ijanu waug meleec qee felacudel eu Anut uqa eeldugian,” aden.

<sup>7</sup> Odocob Jon ugana malogom age ceseli beleceb Jisas uqa dana cegulec ben eu Jonnu maaden, “Age Jon wadauna† ugaca belein saen euna eeta foqagannu belein? Age balac fufu heweceb gulaaeb foqagannu beleinfo? <sup>8</sup> Age eetanu belein? Dana lotoc me bahicca taqen foqagannu beleinfo? Feiga, dana age lotoc me bahic tacegina age kingna jona bilegina. <sup>9</sup> Mateiga, age eetanu belein? Age Anutna je hahun madec dana oso foqagannu beleinfo? Ija mele maadigina, uqa je hahun madec dana qa uqa je hahun madec dana cunug wooladena. <sup>10</sup> Jon uqanu Anutna jaqec je oso odi madena: ‘Anut madena, ‘Feiga, ijana sos suldocomin aqunihi nuigian. Uqa hinana jic saciadugian,’ ena,’

Anutna jaqec je odi madena.

(Malakai 3.1)

<sup>11</sup> Ija mele maadigina, Wa Joadec Jon uqa dana mahana cunug wooladena. Euqa dana oso uqa nag bahic sao cul jobon bilina eu uqa Jon wooldona,” aden.

<sup>12</sup> “Wa Joadec Jon me je qasali madec saennadec leceb qila dana hihibanagaca age sao cul jobon ocnu gagadic megina.‡ Odimeig dana hihibanagaca age euna sundocobdocob limeig gagadic megina. <sup>13</sup> Ge, Mosesna loo jeca je hahun madec dana agena jeca bibili hu Jon ugana saenna Anutna je himec mamadi bilen. <sup>14</sup> Age je eu ocnu gale adecebfi dah meiga. Anutna jaqec je madi, je hahun madec dana Ilaija uqa hugian, ena. Je eu Jonnu maden. <sup>15</sup> Oso uqa dahigca je eu dah meiale,” aden.

<sup>16</sup> “Euqa dana cajaca qila bilegina eu age adec? Age eetanu ihocihoc madigen? Age i ediwe. Age mel simsim maha gemona ududu bibileig cotogail utai maadegina:

<sup>17</sup> ‘Ege agenu cololo fuldoqonaqa  
 age qee due dueelein.

\*\* **10:38:** Saen euna Rom age kobil me qee oso odoloig. Age agena cad qocnu gale adecebfi age na babalecna tuitu qumeig caqusecebil caculimeig cal moloig. Age agena bega meh cabi dana age cabi me qee odoinka, dana age dana oso qocobil cal menca, heje oc danaca, dana eundecca ageha na babalecna tuitu qoin. Odimeig age dana oso qocnu gale aden eu odudecebil uqa ugana na babalec gahidu cocobi li cudun age ugana na babalec cehein euna calen. Aria, Jisas uqa dana cajaca age ugana malogom bahic biluqagannu gale aden eu age cal mecnu saciadoin biluqagan. Uqa ceteh i waladecnu galolo je i maden. \* **11:5:** Wele je hahun madec dana, Aisaia, uqa Anut uqa Isrel dana cajaca cesuladigian saenna ceteh i edec caligan ec maden. † **11:7:** Age je Matju 3.1na nijia eu feiga. ‡ **11:12:** Grik je i ugana gug eu camasac bahic qee. Falidoc je fil osoha nijia eu odi: Wa Joadec Jon me je qasali madec saennadec leceb qila sao cul jobon eu hihibanca hona.

Ege cal mec due siluqunaqa  
age qada qee qajelein,’ adegina.

<sup>18</sup> Ge, Jon uqa sabca wainca qee jejen hol qa age madein, ‘Uqa buga me qee hewen bilia!’ ein. <sup>19</sup> Odocob Dana Melah uqa sabca wainca jejen hon qa age madein, ‘Dana i feiga! Uqa sab muhna jec dana. Uqa wain jecel dalul qoc dana. Uqa takis cedec danaca silail danaca agena danah bilingina,’ age odi madein. Euqa dana age Anutna doc silecca toodu odogina eu age tutuc odogina eunu dana cajaca cunug age fimeig madein, ‘Anutna doc silecca eu ititom,’ ein,” aden.

*Dana cajaca age tului qee falicdoloin eu walocca  
(Luk 10.13-15)*

<sup>20</sup> Jobon leih euna Jisas uqa kobolkobol odoc mati odon qa dana cajaca age wawaga tului qee falicdol. Eunu saen euna Jisas uqa dana cajaca eu galac madimei ulauladec je maaden. <sup>21</sup> Uqa maaden, “O Korasin, O Betsaida, odoc kobolkobolca agena calen eu odi Taia Saidonca caloubmi wele bahic dana ono age lotoc me qee tacimeig comisna bibili agedodoc dewenegana weti heheli biloub. Age agena silail hibemdogina ihacadencu eu odi odoub! Eunu Korasin, age walocca! Betsaida ha, age walocca! <sup>22</sup> Ijaqa maadigina, Gesiladec Deel Benna Anut uqa Korasin Betsaidaca ameg me qee wadacadigian eu Taia Saidonca ameg me qee wadacadigian eu wooldoc hugian. <sup>23</sup> Odocob Kapaneam agenu! Age Anut uqa sao jobon ohis ehadi tigian ec cisdoginafo? Qeelo, odoc kobolkobolca ija Kapaneam ono odom eu oso uqa Sodom ono odoubmiqa Sodom qila deel ina biloub. Eunu Anut uqa heladeceb oloqanikhna noqagan! <sup>24</sup> Euqa ija maadigina, Gesiladec Deel Benna Anut uqa Kapaneam ameg me qee wadacadigian eu Sodom ameg me qee wadacadigian eu wooldoc hugian,” aden.

*Age ijaca humeig jaen mudeiga  
(Luk 10.21-22)*

<sup>25</sup> Saen euna Jisas je odi maden, “Mei, saoca mahaca alena Tibud, hina ceteh eu dana cisdoc silecca docca eundecnu jahunem. Dana cajaca age mel sim bileginawe bilingina eundec amagana je eu camas mem. Eunu ija hina hetaga hinga. <sup>26</sup> Mele, Mei, hina hinana gale hec me bahic toodu odi odom. <sup>27</sup> Mei uqa ceteteh cunug ija ebenina men. Dana oso uqa Anut Melah qee du cuhadona. Euqa Memige Anut himec Anut Melahnu du cuhadona. Dana osoha Memige Anut qee du cuhadona. Anut Melah uqa himec Memige Anutnu du cuhadona. Odocob Anut Melah eu uqana gale docna dana oso Memige Anutna gug ihacdonia euha Memige Anut du cuhadugian,” en.

<sup>28</sup> “Age cunug cabi gisi cagocca culumen ben gahidu cobocca age ijaca hoigale, age jaen mudec oqagan. <sup>29-30</sup> Feiga, ijana sol eu jocosaiqca, ijana sol mec eu hetec. Ija gemani jocosaiqca, ija wawi lal qocca bahic. Eunu age ijana cisdoc umeig ijana je bisalu bileigale. Age ijaca gami sol hewi gahidumeb ija ihiconi oigale. Odi oodoig age wawagana jaen mudec gulucedoqagan,” en.

## 12

*Jisas uqa Juda agena cuha deelna cabi ocnu gun mudec kobil eunu maden  
(Mak 2.23-28; Luk 6.1-5)*

<sup>1</sup> Juda agena cuha deel osona Jisas uqana malogom gami cobimeig wit cabi osoosona gemogemo li beli coboin. Malogom age wen adeceb wit aig wal mec tawen qu u ehi li aig jein. <sup>2</sup> Oodogin Farisi leih age eu fimeig Jisas madoin, “Faga, hinana malogom age ceteh oso eguna cuha deelna eguna loo je cahacgena eu odogina,” doin.\* <sup>3</sup> Odochabil Jisas jejenega hewi maaden, “Age Dewid odonnu je oso qee sanijeleinfo? Saen uqaca uqana eundec age gami coboinca age wen ben adeceb <sup>4</sup> uqa Anutna jo dunuh limei Anutnu ihanec bred oso u jimei uqana dana adeceb jein. Eu odonqa uqaca age uqaca coboin age ihanec bred jecnu Mosesna loo je eu cahacaden. Mosesna loo je madi, bred eu nawel tawec ihanec dana himec eu jecnu cois, ena. <sup>5</sup> Qeeli, age je osoha Mosesna loo jena nijia eu qee sanijeleinfo? Nawel tawec ihanec dana age tempelna cabi ogina eu age cuha deelna cabi oqagan ec je nijia. Age cuha deelna loo je tefacdolina qaa age Anut amegna qee cahuldogina. <sup>6</sup> Ija maadigina, ceteh eu tempel wooldona eu ene bilia. <sup>7</sup> Euqa age je i Anutna jaqec jena nijia:

Ija age gauc ihantercnu qee gale tena.

Ija age dananu wawaga qocca biluqagannu gale tena,’ ec je nijia

*(Hosea 6.6)*

\* **12:2:** Juda agena loo je eu agena cuha deelna Cain cabi owain ec maden. Cabi ocnu loo je osoha nijen eu odi maden, “Ageha sab wal meceb cuha deelna Cain cabi owain,” en (Kisim Bek 34.21. Eunu Farisi age malogom age loo je tefacdolina ec madein.

eu ugana gug du cuhadoubmi age dana qee cahuldogina eu age silail dana ec qee madoub.  
<sup>8</sup> Ge, Dana Melah uqa Tibud, uqa cuha deel ugana ilo bilina,” aden.

*Juda agena cuha deel osona Jisas dana eben laleg mec me muden  
 (Mak 3.1-6; Luk 6.6-11)*

<sup>9</sup> Jisas uqa cudun eu culimei jobon osona nuimei Juda agena cuha jona len. <sup>10</sup> Odocob dana oso uqa eben gatoc men eu ono bilen. Dana leih age Jisas dewegna je um qudecnu gale aden eunu age sisildoin, “Egena cuha deelna dana hagca me madecnu loo je eu cois ec madenafo?” doin. <sup>11</sup> Odocob uqa jejenega hewi maaden, “Age dana oso ugana sipsip maha qahec helona dunuh toneceb cuha deel i edina sipsip eu helonadec didocobil qee cali beiiaunfo? <sup>12</sup> Euqa dana ugana fajec eu sipsip ugana fajec wooldoc bilia. Eunu ege cuha deelna me mudecnu eu cois,” aden. <sup>13</sup> Odimei uqa dana eben gatoc men eu madon, “Hina eben heli huledogaa,” don. Odocob dana eben heli huledocob me men. Eu uqa eben oso cinigwe calen. <sup>14</sup> Euqa Farisi age cuculdi nuimeig Jisas qoqagannu jic wawali je togodoin.†

*Jisas uqa Anutna cabi dana bahic*

<sup>15</sup> Jisas uqa Farisi eeta odudecnu gale aden ec dumei cudun eu cuculi nuen. Dana cajaca mati toodocobil uqa cunug me maden. <sup>16</sup> Odimei uqa dana cajaca age ugana gug camas mowainnu cahacaden. <sup>17</sup> Uqa je hahun madec dana, Aisaia, ugana je ihoc ligiannu odi odon. Ugana je wele odi maden:

<sup>18</sup> “Dana i ijana cabi dana.

Ija uqa nesili ehudem.

Ija nalug migina.

Ija wawi ugana gale ben dona.

Ija ijana Kis uqa mitugen.

Uqa Juda dana caja qee eundec ititom kobilnu je qasali maadigian.

<sup>19</sup> Fee dadanec je qee madeiaun,  
 utai biah anag qee meiaun.

Uqa jic cunugna co suli u mamadeb dana cajaca age dah qee mowain.

<sup>20</sup> Dana cajaca age balac gagadicca qee uqa qahigannu cinigwe eu uqa cunug qee qaheiaun.

Dana cajaca age gowoc qee iletu cuhadona cinigwe uqa qee cafuladeceb qee meiaun.

Uqa odocob ititom kobil mele bahic wooladi biligannu uqa cabi u biligian.

<sup>21</sup> Juda dana caja qee eundec age uqa ijannu wawaga meleceeb uqa caahahaadiannu sumudi biluqagan,” en. *(Aisaia 42.1-4)*

*Age Jisas Bielsebulca cabi osina ein*

*(Mak 3.20-30; Luk 11.14-23; 12.10)*

<sup>22</sup> Age dana oso buga me qee hewen eu Jisasca ehudi ahoin. Dana eu ameg galuc men, co ha cufa qon. Jisas uqa dana eu me mudeceb je madecnuca ceteteh fecnuca ihoc len.

<sup>23</sup> Odocob dana cajaca cunug filiciti madein, “Dana i Dewid Melah qeefo?” ein.‡ <sup>24</sup> Euqa Farisi age dana odi mamadegin dumeig age Jisasnu madein, “Dana eu uqa Bielsebul, buga me qee agena ben, ugana gagadic odocna dih buga me qee dana deweneganadec ititacadena,” ein.§

<sup>25</sup> Jisas uqa age wawagana mamadegina dumei maaden, “Hatu osolna mam cadecebifil qatanec bilecebfii age gaus danogagan. Jobon oso mam cadecebifil bilecw qee. Sihul oso mam cadecebifil euha age bilecw qee. <sup>26</sup> Odocob Seten ugana eundec ititacadoubmi ugana am qatanec biloub, eunu ugana cul adi biloub? <sup>27</sup> Age ijanu madi, uqa buga me qee Bielsebulna gagadic odocna dana deweneganadec ititacadena, egina, eu melefi agena malogom euha inna gagadic odocna buga me qee dana deweneganadec ititacadegina? Eunu agena malogom agena odoc eu Farisi agena je cahuldoc eunu ihacadigian. <sup>28</sup> Ijaqa Anutna Kis cesulceeb ija Anutna gagadic odocna buga me qee dana deweneganadec ititacadiginafi Anutna cul ageca wele hoia,” aden.

<sup>29</sup> “Qeefi, in oso dana gagadicca ugana jona li ugana ud cawaldecnu donafo? Oso uqa casac li dana eu eben jaihca libimei ugana ud cawaldecnu dona,” aden.\*\*

† **12:14:** Farisi age hag meadecnu kobil euha cabi oc ec cisdoein. Odocob agena loo je eu agena cuha deelna Cain cabi owain ec maden. Euqa Jisas uqa cuha deelna dana hagca medon. Eunu Farisi age Jisasnu gemanaga beceb uqa qoqagannu jic walein. Age Luk 13.14ca, Jon 5.16-18ca euha feiga. ‡ **12:23:** Age je Matju 9.27na nijia eu feiga.

§ **12:24:** Bielsebul eu Seten ijan oso. \*\*\* **12:29:** Dana gagadicca eu Seten. Dana uqa Setenna ceteteh cawaldena eu Jisas.

<sup>30</sup> “Oso ijana danah qee eu ija cad mitina. Oso ija cesultimei dana cajaca Tibud cemenug qee hauadena eu dana cajaca bilisaadena,” aden.

<sup>31</sup> “Eunu ija maadigina, silail oso cunug Anut lelandoc oso cunugca Anut uqa dana eu agena silail cagasiadigan. Euqa Kis Gun lelandoc eu dana uqana silail cagasitocnu qee nijel. <sup>32</sup> Odocob dana oso Dana Melahnu je me qee oso madecebfí Anut uqa dana eu uqana silail cagasitugian. Euqa oso Kis Gunnu je me qee madenafi Anut uqa silail eu saen qilaca saen bielec catanecca qee cagasioitaun,” aden.<sup>††</sup>

*Ege je madoqona eu cel ceteh ege wawigena bilina eu camas mena  
(Luk 6.43-45)*

<sup>33</sup> Jisas je haun maaden, “Na eu gug mefi eu aig me qona. Euqa na eu gug me qeefi eu aig me qee qona. Dana age casac aig fimeig na gug eu mefo, me qeefo ec doqagan. <sup>34</sup> Age man sononec uqana nag! Age me qee sihuldecl! Age adi je me madoqagan? Ceteh waugna am bec nijia eu cona cali hu camas mena. <sup>35</sup> Dana me uqa waug dunuh cisdock me am bec nijinanu eunadec cisdock me camas mena. Dana me qee uqa waug dunuh cisdock me qee am bec nijinanu eunadec cisdock me qee camas mena,” aden.

<sup>36-37</sup> “Ijaqa odi maadigina, hinana je madec mefi Anut uqa hinana je menu hina ititom dana ec madigian. Euqa hinana je madec me qeefi hinana je me qeenu Anut uqa hina dana me qee ec madigian. Eunu Anut uqa Gesiladec Deel Benna dana cajaca age je me qee madegina eundec age eetan je ilag madein? ec sisiladigian. Odocob age je me qeenu ameg me qee oqagan,” aden.

*Dana leih age Jisas kobolkobol oso odoga foqa doin  
(Mak 8.11-12; Luk 11.29-32)*

<sup>38</sup> Saen euna loo je iwalandecca Farisica leih age Jisas madoin, “Iwalgec, ege hina Anutna cabi ogonana gaga eunu kobolkobol oso oodom faga gena,” doin.

<sup>39-40</sup> Odocobil Jisas jejenega hewi maaden, “Anut hibemdoc sihul i qisol megina age gaga oso fecnu walegina. Je hahun madec dana, Jona, uqa cahineg cijedca witic cijedca dool ben macasnaadec waugna nijenwe Dana Melah cahineg cijedca witic cijedca maha dunuh noc biligian.<sup>‡‡</sup> Eunu age gaga abes oso qee fowain. Age Jona uqana gaga eu himec foqagan <sup>41</sup> Weleca Niniwa dana age Jona me je qasali maadeceb agena silailnu tului falicdoin. Ijaqa maadigina, oso eu Jona wooldoc ene bilia! Eunu Niniwa dana age isi Gesiladec Benna dana sihul qila i ene bilegina eundec gami cajimeig age dana i bilegina deweneganu geladec je madoqagan. <sup>42</sup> Weleca Kwin sautdec uqa Solomonna cisdock silecca je dugen imei hatu onoca bahic cocobi niniji hu je dah men. Ijaqa maadigina, oso eu Solomon wooldoc ene bilia! Eunu Kwin sautdec uqa Gesiladec Benna dana qila i ene bilegina eundec gami cajimeig uqa dana i bilegina deweneganu geladec je madigian,” aden.

*Buga me qee haun ceseli hon  
(Luk 11.24-26)*

<sup>43</sup> Jisas je haun maaden, “Saen buga me qee dana dewegnaadec cali hona uqa jaen muduc cudun wawali hatu galalecna cobona. Euqa uqa cudun oso qee gulucdol. <sup>44</sup> Uqa madena, ‘Ijana jo cuculi hom euna ceseli nuigen,’ ena. Uqa ceseli humei jo eu oso qee bielec, gegehinca qee, cunug eeldoc ninijen fena. <sup>45</sup> Odimei uqa haun ceseli nuimei buga me qee 7-pela cedi ahocob uqa gami bilegina. Buga me qee 7-pela eu agena odoc me qee uqana odoc me qee eu wooldoc. Eunu dana eu uqana bielec qila euna me qee bahic mena. Uqana bielec weledec wooldona. Dana cajaca me qee qila bilegina eu ageha odi caloqagan,” aden.

*Jisas anag waliagulca eu in?  
(Mak 3.31-35; Luk 8.19-21)*

<sup>46-47</sup> Jisas uqa dana cajaca je maadi bibilen uqa anag waliagulca maha gumu tatawi ege Jisas je madoqan ein. [Odocobil dana oso Jisas madon, “Hina anin walinelca ono taweiga age ege Jisas je madoqan egina,” don.]<sup>§§</sup> <sup>48</sup> Odocob Jisas dana eu jejeg hewi madon, “Ija

<sup>††</sup> **12:32:** Jisas uqa Kis Gunna gagadic odocna dana me muden. Euqa Farisi age uqa Setenna gagadic odocna dana me muden ec cisdoin. Eunu age cahulec bahic bielein. Age Kis Gun eu Seten ec cisdoin. Eunu Anut uqa agena silail cagasiadecnu ihoc qee nijel. Age Mak 3.28-29 feiga. <sup>‡‡</sup> **12:39-40:** Age Jona 1.17 feiga. Je hahun madec dana Jona uqana buk euha Jona uqa dana cajaca age Niniwa ono bielein eu Anutna je qasali maadennu je saen. Odocob age je eu dumeig agena silailnu tului falicdoin. Age Jona 3.5 feiga. <sup>§§</sup> **12:46-47:** Grik jaqec je hilah leihna age but i [ ] gemo nijia eu qee nijel. Grik je doc dana age Matju je i qee jaqel, euqa dana fil oso uqa hibna Matjuna je eu Mak 3.2ca, Luk 8.20ca eu caca calecnu je i tubdu jaqen ec cisdogina.

au in? Ija waliel an?" don. <sup>49-50</sup> Uqa odi madumei ebenna uqa malogom ihohadimei maaden, "Feiga, oso uqa Mei sao jobon bilia, uqa co toodu odona eu uqa ija walica, ija cebinamica, ija auca. Eunu ija au walielca ihen!" aden.

## 13

*Jisas uqa dana cabina wit aig qelennu galolo je maaden  
(Mak 4.1-9; Luk 8.4-8)*

<sup>1</sup> Deel euna dih Jisas uqana jona dec li Galili wa cagocna numei lanna bilen. <sup>2</sup> Ono bibilen dana cajaca mati bahic uqaca hu talildu cegulein. Eunu uqa wag oso tobi bibilen dana cajaca cunug age lanna tawein. <sup>3</sup> Tatawegin uqa je filfil galolo jena maadi maaden, \* "Dana oso uqana cabina wit aig helecnu nuen," aden.

<sup>4</sup> "Uqa aig hehelein aig oosooso jic cobocna tonen. Odocob man fululec eu age humeig cedi ji hedoin. <sup>5</sup> Aig oosooso maha eu meen baibaca maha meca qee euna tonen. Maha eu dunuh qee nol eunu aig eu mahuc qala qahimei nag wasen. <sup>6</sup> Odocob cam gagadic tatawen eu cijaden. Odocob bebeig dunuh qee nol eunu qala jajawalen. <sup>7</sup> Aig oosooso dud geuna tonen. Dud eu mahuc caji ben mimeig ceteh cilehdhocobil mahulimei qee men. <sup>8</sup> Aig oosooso eu mulu mahana tonen. Odocob qala qahimei ben mi aig qon. Aig oso qoc 100 ihoc len, oosooso 60 ihoc len, oosooso 30 ihoc len. <sup>9</sup> Oso dahigca je eu dah meiale," aden.

*Jisas uqa eetanu galolo jena madena eu malogom sildiaden  
(Mak 4.10-12; Luk 8.9-10)*

<sup>10</sup> Odocob malogom age Jisasca limeig sisildu madoin, "Hina eetanu galolo jena je maadagana?" doin. <sup>11-12</sup> Odocob uqa malogom maaden, "Oso uqa docca nijia eu Anut haun uteceb uqana doc meca migian. Euqa oso uqa docca qee eu Anut uqa uqana doc nag nijia eu cawaldugian. Eunu Anut culadeceb age sao cul jobonnu ceteh jahunec docnu nijia. Euqa dana i age eu docnu qee nijel.

<sup>13</sup> Dana cajaca amagana feginaga qee feginaga,  
odimeig age dahinigana dah megina qee dah megina,  
odimeig age qee fogo adena  
eunu ija galolo jena je maadigina. <sup>14-15</sup> Agena odocna Aisaia je hahun maden eu ihoc lena. Uqana je eu wele odi maden:

'Dana cajaca i age ilohonoga cisdocnu eu cal mec bahic.

Age dahiniga cufa qoin.

Odocob age amaga amusein.

Eunu age dah moqagan qa qee dowain.

Age foqagan qa wawaga qee fogo doiaun.

Qeefami age amagana fimeig fogo adoub,

age dahinigana dah mimeig doub,

age wawaga fogo doub.

Odocob age ijaca falicdocobil me madoum,' en," aden.

*(Aisaia 6.9-10)*

<sup>16</sup> "Euqa age amaga Anutna ceteh feginaga, age dahiniga Anutna je dah megina. Eunu age eladecca bileyina. <sup>17</sup> Ija mele maadigina, je hahun madec danaca tutuc coboc eundecca wele bilein mati age, age qila feginaga eu fecnu wawaga ben hoolen euqa age ceteh eu qee felein. Dana eundec age, age qila dah megina eu dah mecnu wawaga hoolen euqa age je eu qee dah melein," aden.

*Wit aignu galolo je gug*

*(Mak 14.13-20; Luk 8.11-15)*

<sup>18</sup> Jisas je haun maaden, "Ija age wit aig helec dananu galolo je saadecemin dah meigale.

<sup>19</sup> Oso uqa sao cul jobonnu je dah meceb dahig qee fogo dona dana eu uqa wit aig jicna tonenwe. Seten eu qisol mec dana bahic, uqa humei je dana waugna tonen eu cawaldona.

<sup>20</sup> Aig maha meen baibacana tonennu madiga eu odiwe dana oso uqa me je dah mimei waug ceelecca je eu mahuc ona, <sup>21</sup> euqa uqadodoc bebeigca qee. Uqa saen nag himec culumen gahidona. Anutna jenu aqati tootoodocca temdocca uqaca hocob mahuc waug meleec tonena. <sup>22</sup> Aig dud geuna tonennu madiga eu odiwe dana oso uqa me je dana, euqa mahana bileyina jaen qocca, maha cehewan ocnu waug madec eu toodu odocca eu Anutna je cilehdhocob aig qee qona. <sup>23</sup> Aig mulu mahana tonennu madiga eu odiwe dana oso uqa Anutna je dumei waug fogo dona. Uqa mele bahic ben mi aig qona. Dana eundec leih age aig 100 ihoc legina, odocob leih age aig 60 ihoc legina, odocob leih age aig 30 ihoc legina eu camas mena," aden.

\* **13:3:** Je i je cecelac 5-pela Jisas maaden buk Matjuna nijen eundec cijeddoc. Je cecelac i 13.3-52na nijen. Euna sao cul jobonna kobolnu galolo je mati nijia.

*Wit gemona huhel me qee wasennu galolo je*

<sup>24</sup>Jisas uqa galolo je haun oso maaden, "Sao cul jobon eu odi. Dana oso uqana cabina wit aig me dih helen. <sup>25</sup>Euqa dana us ninijegin uqana cad limei cabi euna wit gemo huhel me qee aig qelimei nuen. <sup>26</sup>Wit wasi hanocob huhel me qeeha camas men. <sup>27</sup>Odocob cabi dana age li cabi gug eu madoin, 'O Ben, hina hinana cabina aig qee nesilec qelempo? Huhel me qee eu anadec?' doin," aden.

<sup>28</sup>"Odocobil maaden, 'Eu cad uqa odon,' aden. Odocob madoin, 'Hina madecemfi ege nui huhel me qee casili sagoqa?' doin. <sup>29</sup>Odocobil maaden, 'Qeoo! Huhel witca eu fecnu ihocihoc eunu age huhel cacasili li witha casiluwainnu cain odowain! <sup>30</sup>Culecebil osoben niniji wal meia. Wal mi hedoc saen euna getegina eundec maadigen, "Age casac huhel me qee qeti sagoiga eu manoqagannu, odimeig wit qeti sagumeig ijana jo bisna ehi ti haudoiga," adigen,' aden." Jisas je odi maaden.

*Mastet aignu galolo je*

(Mak 4.30-32; Luk 13.18-19)

<sup>31</sup>Jisas uqa galolo je haun oso maaden, "Sao cul jobon eu mastet aig cinigwe eu dana oso umei uqana cabina cehen. <sup>32</sup>Mastet aig eu nag bahic. Eu aig cunug wooladec. Euqa uqa wasi ben meceb uqa cabi ceteh wooladec gulguele caji tawena. Man fululec age humeig uqana batacnana agena teic megina!" aden.

*Jisnu galolo je*

(Luk 13.20-21)

<sup>33</sup>Jisas uqa galolo je haun oso maaden, "Sao cul jobon eu jis cinigwe caja oso umei plaua dram benna euca gabandumei ibuldocob uqadodoc iben," aden.

*Jisas uqa galolo jena himec je maaden*

(Mak 4.33-34)

<sup>34</sup>Jisas uqa je cunug eu galolo jena dih dana cajaca maaden. Uqa je oso galolo jeca qee euna qee maadel. <sup>35</sup>Uqa je hahun madec dana oso uqana jaqec je ihoc ligiannu odi odon. Jaqec je eu wele odi maaden:

"Ija galolo je conina maadigen.

Ija ceteh gug qoc saennadec jahuni leceb qila nijia eunu je saadigen," en. (Buk Song 78.2)

*Huhel me qeenu galolo jena silig*

<sup>36</sup>Jisas uqa dana cajaca cucleladi jona len. Odocob uqana malogom age Jisasca humeig madoin, "Hina huhel me qee cabina wasennu galolo je eu silignu sildigaga," doin.

<sup>37</sup>Odocobil Jisas jejenega hewi maaden, "Dana aig me helena eu Dana Melah. <sup>38</sup>Cabi eu mahamaha. Aig me eu dana cajaca age sao cul jobon bilegina. Huhel me qee eu Setenna dana cajaca. <sup>39</sup>Cad uqa huhel aig qelen eu Seten. Wal mi hedoc saen eu mahamaha bili cit qoc saen. Dana qeti sagogina eu ensel. <sup>40</sup>Age huhel meel u casili haudu jana maneginawé mahamaha bili cit qoc saenna odi bahic nijigian. <sup>41</sup>Dana Melah uqa uqana ensel suladeceb ni uqana culna cunug age dana cajaca odadecebil age silail mimi coboginaca, dana cajaca cunug age qisol meginaca cedi ehi li <sup>42</sup>ja amegna heladecbil noqagan. Euna age qada qaqqaji maimaga kicodudu biluqagan. <sup>43</sup>Odocobil dana cajaca Anut uqa dana cajaca ititom ec madena eu age Memegana culna cam odi fuladoc biluqagan. Oso dahigca je eu dah meiale!" aden.

*Gold meen maha osona jahunen nijianu galolo je*

<sup>44</sup>Jisas uqa galolo je haun oso maaden, "Sao cul jobon eu odi. Cabi osona dana oso cobimei euna maha dunuh gold meen jahuldoc oso ninijen gulucdon. Uqa eu mahana jahuldumei ceelimei li uqana ceteteh cunug cedimei meen qaignu idadumei li cabi eu faji on," aden.

*Gilolo meen qaig benna fajec eunu galolo je*

<sup>45</sup>Jisas uqa galolo je haun oso maaden, "Sao cul jobon eu odi. Idadoc dana oso uqa gilolo meen qaig benna fajecnu gale docob eundec wawali cobon. <sup>46</sup>Uqa gilolo oso meen qaig ben bahic wooldoc gulucdumei uqa uqana ceteteh cunug idadumei meen qaig eu umei li gilolo me bahic eu faji on," aden.

*Cimec bennu galolo je*

<sup>47</sup>Jisas uqa galolo je haun oso maaden, "Sao cul jobon eu cimec ben cinigwe age eu cul dool dewenega filfil cedoqagannu macasna helegina. <sup>48</sup>Cimec ben eu dool ihoc lecebil dana cecelimeig lanna megina. Odimeig age bibili dool me galelna tacegina qa me qee eundec helegina. <sup>49</sup>Odiwe mahamaha bili cit qoc saenna odi odoqagan. Anutna ensel age

belimeig dana cajaca qisol mec eu dana cajaca ititom gemonadec cedimeig<sup>50</sup> li ja amegna heladecebiloqagan. Euna age qada qaqaqji maimaga kicodudu biluqagan,” aden.

<sup>51</sup>Jisas je i cunug maadi hedumei sisiladi maaden, “Age je i dah meiga eu cunug dahiniga fogo doiafo?” aden. Odocob madoin, “Ese, ege dahinige fogo doia,” doin. <sup>52</sup>Odochobil Jisas maaden, “Jo gug uqa jo bisnadec ceteh weledecca haunca cedi ahumei camas menawe eu odi loo jenu iwaladec oso uqa sao cul jobonnu iwaldocobil don,” aden.

*Nasaret age Jisas hibemdooin  
(Mak 6.1-6; Luk 4.16-30)*

<sup>53</sup>Jisas uqa galolo je eu maadi hedumei cudun eu culimei nuen. <sup>54</sup>Nuimei uqana jobon gug calen. Odimej uqana agena cuha jona limei dana je iwaladeceb je eu wawaga qon. Age tumatumai madein, “Uqa cisdock silecca eu in iwaldocob don? Kobolkobol odona eu anadec on?” <sup>55</sup>Ege dogona, uqa jo cehecnu memei uqana mel. Uqa anag ijan eu Maria. Jemsca, Josefca, Saimonca, Judasca age uqa waliagul. <sup>56</sup>Uqa cepinagul age ene ege gemona bilegina. Dana i uqa ceteh eu cunug anadec on?” ein. <sup>57</sup>Age uqanu wawaga me qee meceb cecewudi bileyin. Euqa Jisas uqa maaden, “Je hahun madec dana oso uqana gug jobon qee euna age uqana je dumeig uqa saolal mudencu nijia. Euqa uqana hatuna, uqana eundec age uqa cewudegina,” aden. <sup>58</sup>Ono Nasaret age wawaga meleecca qeenu ono kobolkobol meca mati qee odol. Uqa nag himec odon.

## 14

*Herod uqa Jisasnu uqa Wa Joadec Jon ec cisdon  
(Mak 6.14-29; Luk 3.19-20; 9.7-9)*

<sup>1</sup>Saen euna gabman dana ben Herod\* Galili hatu cunug cofdoc uqa Jisasna odocnu hutan don. <sup>2</sup>Dumei uqana cabi dana eundec maaden, “Dana i uqa Wa Joadec Jon. Uqa cal mecnadec ceseli cajen eunu kobolkobol odocnu gagadic odocca odona,” aden.

<sup>3-4</sup>Ge, wele Herod uqa waliag Filip aideg, Herodias, on. Odocob Jon uqa li Herod madon, “Hina walien aideg om eu tutuc qee,” don. Eunu Herod uqana han dana suladeceb age li Jon hewi libimeig gihacdoc jona mudein. <sup>5</sup>Herod uqa Jon qocob cal mecnu waug nijen euqa dana cajaca age Jonnu madi, uqa je hahun madec dana, einnu uqa dana cajacanu cucuien.

<sup>6</sup>Herod uqa anag basen deelnu dana mati bahic cegulein. Age ceeli bibili sab jejegin Herodias ateg, eu dana osonadec, uqa hu dana amagana due duen. Oodon eu Herod gale docob<sup>7</sup> uqa je cagoc madon, “Anut amegna mahigina, cel cetehnu matecemfi ihigen,” don. <sup>8</sup>Odocob anag uqa ateg madocob toodu uqa Herod madon, “Hina qila bahic Wa Joadec Jon ilo bohna mimeg ahutaga!” don.

<sup>9</sup>Mel aid odi madocob Herod uqa waloc don. Euga Anut amegna je cagoc madigina cetehnu matecem ihigen don eunuca, dana hoin bibili dah mein eunuca cisdumei<sup>10</sup> uqa han dana suladeceb age gihacdoc jona limeig Jon be cagoin. <sup>11</sup>Cagumeig ahu bohna mi mel aid utecebiloqagan. Euga Anut amegna je cagoc madigina cetehnu matecem ihigen don eunuca, dana hoin bibili dah mein eunuca cisdumei<sup>10</sup> uqa han dana suladeceb age gihacdoc jona limeig Jon be cagoin. <sup>12</sup>Odocob Jonna malogom age humeig Jon deweg loton ehi li heel cisein. Odimeig age li je cunug Jisas sadoin.

*Jisas uqa dana 5,000 sab aden  
(Mak 6.31-44; Luk 9.10-17; Jon 6.1-13)*

<sup>13</sup>Jisas uqa je eu dumei jobon eu culimei wagna tobimei wa gad cagoc leti uqa cuhanuc cudun ono isec nuen. Euqa dana cajaca jobonjobon bileyin eu age Jisas wa gad cagoc leti nua ec dumeig age toodu jaimagana belein. <sup>14</sup>Odimei uqa lanna tonimei dana cajaca am ben tatawegin feciaden. Uqa agenu waug qocob agena hacga me maden.

<sup>15</sup>Witicna uqana malogom uqaca humeig madoin, “Aben i filec cagocna bahic, cam wele noia tu mena. Eunu dana cajaca am i age jobonnana belimeig agedodoc sab jecnu fajoqagannu suladaga,” doin. <sup>16</sup>Euga Jisas malogom maaden, “Eetanu age beloqagan? Age dana cajaca sab adeiga,” aden. <sup>17</sup>Odocob age jejeg hewi madoin, “Ege bred 5-pela cul dool lecisca himec hewoqa,” doin.<sup>†</sup> <sup>18</sup>Odochobil Jisas maaden, “Bred cul doolca cedimeig ahuteiga,” aden.

<sup>19</sup>Odimei Jisas uqa dana cajaca maadeceb age gigina bileyin. Odimei Jisas bred 5-pela cul dool lecisca cedi hewimei sao jobon tatiimei Anut hetaga doc je madon. Odimei bred fenifeni uqana malogom adeceb dana cajaca siwiadecebilein. <sup>20</sup>Age cunug jecebilei ihoc leceb malogom age sab jecefanaga eundec galel 12-pela tacecebilein am ben. <sup>21</sup>Dana sab jein eu 5,000, cajaca melca qee sanijelein.

\* **14:1:** Herod i uqa ijan fil osoca, eu Antipas. Uqa Galili hatu cofdon. Uqa King Herod uqa Maria Jisas basecon saenna king bilen eu uqa melah. Age Matju 2 feiga. † **14:17:** Bred eu Juda mudoloig eu ben qee, eu foloec. Bred 5-pela eu dana lecisca himec jecnu ihoc.

*Jisas Galili wa tatacan cobon*  
(Mak 6.45-52; Jon 6.16-21)

<sup>22</sup> Odocob Jisas uqana malogom cesusadeceb age wagna tobimeig age aqunitu Galili wa gad cagoc naha isec beloqagannu belein. Bebelegen uqa dana caja amam qaqacitegin cofaden. <sup>23</sup> Uqa dana cajaca qaciti hedocobil uqa cuhanuc Anut inondudu bielecnu aluh guhidocna ten. Witic memen uqa ono cuhanuc bilen. <sup>24</sup> Euqa saen euna malogom age wagna bebeleig age lan onoca bahic basai coboin. Odocob fufu ben olanagana isec honnu macas ben bahic caji qahen. <sup>25</sup> Odocob walag danigia oodon Jisas uqa wa tatacan cocobi ageca len. <sup>26</sup> Euqa malogom age uqa macasna cocobon fimeig qeleti filiciti madein, "Dol oso cobona," imeig cucuui euein. <sup>27</sup> Odi odocobil Jisas mahuc maaden, "Ija ihen. Age cain cucuiuwain! Age wawaga toogdoiale!" aden.

<sup>28</sup> Pita je eu dumei uqa Jisas jejeg hewi madon, "Tibud, hinafi matecem ija toni wa tatacan hinaca ligen," don. <sup>29</sup> Odocob Jisas madon, "Cois hogale," don. Odocob Pita uqa wagnadec tonimei wa tatacan cocobi Jisasca ligian odon. <sup>30</sup> Uqaqa fufu ben wawasen fimei cucuiimei gotoigia odon. Odi oodi eui Jisas madon, "Tibud, cahahatagale," don.

<sup>31</sup> Odocob Jisas uqa mahuc eben heli Pita hewimei madon, "Hina dana waug meleec nagca. Eetanu wawin lecisca meia?" don. <sup>32</sup> Ale lecis wagna tobi tecebile bibilegin fufu tilien. <sup>33</sup> Dana age wagna bibileig Jisas olana gob cecehi uqanu cuha fimeig madoin, "Hina mele Anut Melah," doin.

*Jisas dana cajaca geh bahic Genesaret hatuna me maden*  
(Mak 6.53-56)

<sup>34</sup> Age wa gad cagoc leti hu Genesaret hatuna hoin. <sup>35</sup> Age wag tobocobil dana onodec age Jisas wele fein eunu doin. Odimeig age hatu cunugna je suldocobil age dana caja hagca cunug ehadimeig Jisasca ahooin. <sup>36</sup> Odimeig agena hag me madigiannu ninidoin. Age uqana lotoc bibig himec qududocnu ninidoin. Odocob cunug age uqana lotoc qududoin eu me mein.

## 15

*Anutna loo je eu Juda jajanagail agena loo je wooldona*  
(Mak 7.1-13)

<sup>1</sup> Saen euna Farisica loo je iwaladec leihca Jerusalemdec Jisasca humeig sisildu madoin, <sup>2</sup> "Hinana malogom age ebenega qee wasacudec sab jegina. Eunu eetanu ege jajanigeil loo je igein eu tefacdolina?" doin.

<sup>3</sup> Odocobil Jisas jejenega hewi maaden, "Age eetanu jajanagail agena loo je saolal mumudi Anutna loo je gagadicca eu tefacdolina? <sup>4</sup> Ge, Anut je gatiti maden:

'Hina memen aninca lalan malagale,' en. *(Kisim Bek 20.12; Loo 5.16)*

'Oso memegfo, anagfo geuldecnu je madecebfi uqa cal migian,' en. *(Kisim Bek 21.17; Wok Pris 20.9)*

<sup>5</sup> Ageqa madeginia, 'Oso uqa memegfo, anagfo cesuldocnu meen qaig nijeceebfi uqa maalena, 'Ija cesulalecnu ceteh nijen eu Anut utigennu abes mem,' alena,' egina.

<sup>6</sup> Odocob dana eu uqa memeg lalan mudecnu qee nijel. Age eu odi madecna agena loo je saolal mumudi Anutna loo je cilehdudu tefacdolina," aden.

<sup>7</sup> "Me hihili coboc age! Je hahun madec dana, Aisaia, uqa agenu je tutuc bahic wele madi maden:

<sup>8</sup> 'Dana cajaca i age conogana binani sulegina  
age wawagaqa eu quisactec bilina.'

<sup>9</sup> Eu age dana agena loo je iwalaadegina eu Anutna loo je, egina.

Eunu age ijanu gauc cuha fegina,' en," aden. *(Aisaia 29.13)*

*Jisas uqa ceteh dana gegehin mudina eunu maden*  
(Mak 7.14-23)

<sup>10</sup> Odimei Jisas uqa dana cajaca utaadeceb hocobil maaden, "Je i dah mimeig du cuhadoigale. <sup>11</sup> Ceteh cona lena eu dana gegehin qee mudina. Ceteh conadec cali hona eu dana gegehin mudina," aden.

<sup>12</sup> Odocob malogom age Jisasca li madoin, "Hina Farisi je maadecem dumeig age hinana jenu gemanaga ben eu dogonafo?" doin.

\* <sup>15:2:</sup> Malogom age ebenega eu gegehin bahic qee age sab jein. Juda age ceteh oso eu Anut amegna gegehin nijen eu hewimeig ageha Anut amegna gegehinca calowainnu cucuiein. Eunu Farisica Juda dana cunugca age jajanagail agena kobol toodu ebenega casac cusimeig sab joloig. Age ebenega qee cusec sab qee joloig.

<sup>13</sup> Odi madocobil Jisas jejenega hewi maaden, “Na cunug ija Mei sao jobon bilia uqa qee cehel eu age caji loqagan. <sup>14</sup> Age dana eundec culadeigale. Farisi age amaga galuc mec, age cotogail ha amaga galuc mec iwaladi ehadi cobogina. Dana ameg galuc mec eu cotig ameg galuc mec iwalandu ehudi cobocobfi ale lecis odi helona toni aqaligian,” aden.

<sup>15</sup> Euqa Pita Jisas madudu madon, “Galolo je maadem eu sildigagale,” don. <sup>16-20</sup> Odocob Jisas maaden, “Ageha wawaga qee fogo dol eu adi? Dana waugnadec cisdoc qisol mec cali hona. Dana qocca, dana osona caja occa, wal kobel odocca, heje occa, um qoc madecca, lelanadecca eu dana waugnadec cali hona. Ceteh eu dana gegehin mudina. Euqa ebenega qee wasacudec sab jec euna dana qee gegehin mudina. Eunu ceteh cunug cona lena eu bigna nocob big ititacdocob bahu helegina eu qee feginaflo? Euqa conadec cali hona eu waugnadec cali beceb eu dana gegehin mudina,” aden.

#### *Kenandec caja uqa Jisasnu waug meleen*

(Mak 7.24-30)

<sup>21</sup> Jisas uqa cudun eu culime li Taia Saidonca alena hatuna nui bilen. <sup>22</sup> Ono Kenan caja oso hatu eunadec hu Jisas utadu madon, “O Tibud, Dewid Melah, hina ijanu walol heiale. Buga me qee eu ija ateni hewen me qee odudina,” don. <sup>23</sup> Odonqa Jisas uqa jejeg qee hewel. Uqa je oso qee madol. Odocob malogom age Jisasca li ninidudu madoin, “Caja uqa ege tootoogigi utaena. Eunu madocomc cululgii nuiiale,” doin.

<sup>24</sup> Odi madocobil Jisas maaden, “Isrel sihul sipsip fadalec cobogina cesuladecnu eunu himec Anut cabi itime li sultceeb hom,” aden. <sup>25</sup> Euqa caja uqa hu Jisas amegna gob cehi uqanu cuha fime li ninidudu madon, “O Tibud, cesultagale!” don. <sup>26</sup> Odocob Jisas uqa caja jejeg hewi madon, “Mel agena sab cawaladi qa joqagannu helec eu cois qee,” don. <sup>27</sup> Odocob caja madon, “Mele Tibud, euqa qa asagul sab jejen jecefam ugana cabalnadec golodocob qa age bisalu hu cedi jegina eu odi qeefo?” don. <sup>28</sup> Caja odi madocob Jisas madon, “O caja, hina wawin meleec eu caunca bahic! Hina madagana eu odihia,” don. Odocob caja uqa ateg saen euna bahic hag medon.

#### *Jisas uqa dana caja hagca mati me maden*

<sup>29</sup> Jisas onodec Galili wa gad cagocna isec humei uqa aluh osona timei ono bilen. <sup>30</sup> Bibilen dana cajaca mati bahic uqaca hoin. Ageha dana hagca mati bahic cedadi ahoin. Age dewenega laleg mecca, tefulunuga cogogecca, amaga galuc mecca, conoga cufa qocca, dana hag filfilca eu ehi li Jisas jaihna madeceb uqa cunug me maden. <sup>31</sup> Dana age conoga cufa qoc bilein eu je mamaidegin, tefulunuga cogogec coboin eu me madeceb bibilegin, laleg nec nijiein age caji cocobogin, amaga galuc mec bilein age mecieegin feciadein. Dana cajaca age ceteh eu fimeig tumatumaein. Odimeig age Isrel agena Anut binan sulein.

#### *Jisas uqa dana 4,000 sab aden*

(Mak 8.1-10)

<sup>32</sup> Jisas uqana malogom utaadeceb uqaca hocobil maaden, “Dana cajaca i age qila deel cijed ija gami biluquna age sab jecnuca qee. Eunu ija agenu walol tena. Ija age sab qee adec gauq ceseli beleiga adecnu culumen tena, age jicna wenene aqecel toni aqeaundainnu madigina,” aden. <sup>33</sup> Odocob malogom age Jisas jejeg hewi madoin, “Ege ene wadauna biluqa, dana cajaca mati bahic sab adecnu bred anadec oqan?” doin. <sup>34</sup> Odocobil Jisas sisiladi maaden, “Age bred ganic nijia?” aden. Odocob madoin, “Bred 7-pela, cul dool nagnag euha oosoos nijiega,” doin.

<sup>35</sup> Odocobil uqa dana cajaca maadeceb age mahana bilein. <sup>36</sup> Bibilegin uqa bred 7-pela cedimei cul doolha cedimei Anut hetaga dumei fenifeni malogom aden. Odocob malogom age ehi li dana cajaca siwiadecbil jein. <sup>37</sup> Dana cajaca cunug jeceb biliniga hon. Odocob age sab jecefamaga golodoin eu mahananadec cedimeig galel 7-pela taceceb iloh len. <sup>38</sup> Dana sab jein eu 4,000, cajaca melca qee sanjelein. <sup>39</sup> Odocobil Jisas uqa dana cajaca maadeceb qacitein. Uqadodoc wagna tobimei nui Magadan agena hatuna li bilen.

## 16

*Farisi Sadjusica age Jisasnu madi, gaga oso sao jobonnadec ihacgecem foqa, doin*  
(Mak 8.11-13; Luk 12.54-56)

<sup>1</sup> Saen euna Farisi Sadjusica age Jisasca humeig ege uqa temdu feqan imeig cesusdudu madoin, “Ege hina Anutna cabi ogonana gaga eunu kobolkobol oso oodom ihacgecem foqale,” doin. <sup>2</sup> Odocobil Jisas jejenega hewi maaden, “[Wesuna age sao mecidudu

† <sup>15:26:</sup> Jisas uqa caja i hibemdocnu qee gale dol. Euqa Isrel age Anutna dana cajaca, eunu Jisas uqa Anutna me je eu casac Isrelca leceb cunug docobil hibna dana caja fil age doqagannu gale don. Eunu Jisas uqa galolo je i maden. Isrel sihul eu mel, odocob dana caja fil age qa. Euqa Jisas uqa caja i uqana waug meleec fimei cesuldon.

madegina, ‘Sao galawac cijina, eunu uqadec cam me tawigian,’ egina. <sup>3</sup> Qasilna sao mecidudu madegina, ‘Sao gol teia waha guhudona, eunu jugu qocob qila wa hugian,’ egina. Sao madena eu age dogina. Euqa saen odocnu madena eunu gaga age qee dogina.] <sup>4</sup> Anut hibemdoc sihul i qisol megina age gaga oso fecnu walegina. Euqa age gaga abes oso qee fowain. Age gaga osol dih foqagan, eu je hahun madec dana, Jona, uqana gaga eu himec foqagan,” aden. Odi maadimei cuculadi nuen.

*Farisi Sadjusica agena jisnu galolo je  
(Mak 8.14-21)*

<sup>5</sup> Jisas uqa malogom gami Galili wa gad cagoc ono isec li bilein. Deel euna malogom age beloqaga bili bred tacecnu dahiniga celen. <sup>6</sup> Ono bibilegin Jisas uqa malogom galolo je madi maaden, “Dah meiga, age Farisi Sadjusica agena bred gug qoc ibuldocnu jis eu ageca hoiaunnu batut feigale,” aden. <sup>7</sup> Odi maadeceb malogom age togododu madein, “Ege bred qee cedi aholom eunu je magena,” ein. <sup>8</sup> Jisas uqa, age eunu togododogin dumei maaden, “O dana wawaga meleec nag, age eetanu bred qee cedi aholoin eunu togododu madegina? <sup>9</sup> Age qila wawaga qee fogo dolfo? Wele bred 5-pela ninijen dana 5,000 jein age deel euna jecefanaga galelna tacecebil ganic ihoc len eu qee cisdoginafo? <sup>10</sup> Qeefi, age bred 7-pela ninijen eu dana 4,000 ihoc jecefanaga galelna tacecebil ganic ihoc len euha qee cisdoginafo? <sup>11</sup> Ija brednu qee madelem. Eu adi wawaga qee fogo dol? Age Farisi Sadjusica agena bred gug qoc ibuldocnu jis eu ageca hoiaunnu batut feigale,” aden. <sup>12</sup> Odi maadeceb malogom age Jisas uqa age bred gug qoc ibuldocnu jis eu batut feigale ec qee madel euqa age Farisi Sadjusica agena iwaladec je eu batut feigale ec madeia eunu doin.

*Pita uqa Jisasnu Krais ec qasali maden  
(Mak 8.27-30; Luk 9.18-21)*

<sup>13</sup> Jisas uqa malogom gami Sisaria Filipai agena hatuna cobimeig Jisas uqana malogom sisiladi maaden, “Mateiga, dana age Dana Melahnu in egina?” aden. <sup>14</sup> Odocob jejeg hewi madoin, “Dana oso age madegina, uqa wa joadec dana Jon, egina. Leih madegina, uqa Ilaija, egina. Leih madegina, uqa Jeremaiago, uqa je hahun madec dana osofo, egina,” doin. <sup>15</sup> Uqa haun sisiladi maaden, “Ageqa, ijanu in egina?” aden.

<sup>16</sup> Odocob Saimon Pita Jisas jejeg hewi madon, “Krais eu hina. Cebac biley Anut uqa melah eu hina,” don.

<sup>17</sup> Odi madocob Jisas madon, “O Saimon, Jon melah, hina eelhec biliga. Mahanadec dana oso je eu qee camas mihel. Eu Mei sao jobon bilia eu uqa je i camas mihia. <sup>18</sup> Eunu ija je oso mahigina eu odi. Hina Pita,\* ija meen big gug i tatacan ija ijana tamanec cehigen. Odocob oloqanah uqana cebec gagadicca eu ijana tamanec qee wooldoiaun. <sup>19</sup> Ija sao cul jobon ki ihigen. Ceteh cunug hina mahana jelaga qa sao jobonna ha jelec biligian. Ceteh cunug hina mahana cufalaga qa eu sao jobonna ha cuualec biligian,” don. <sup>20</sup> Odimei Jisas uqana malogom cahabaadi maaden, “Ija Krais je eu leih cain maadi cobowain,” aden.

*Jisas uqa cal mimei ceseli cajigiannu je maden  
(Mak 8.31-9.1; Luk 9.22-27)*

<sup>21</sup> Saen euna Jisas uqa uqana cal necnu uqana malogom maadecnu sanan mimei maaden, “Dana Melah uqa Jerusalem ono teceb Juda agena matuca, ihanec dana benbenca, loo je iwaladecca, age madecebil deweg sogoeb ben gahidugian. Age uqa qocobil cal migian. Uqa deel cijeddocna Anut uqa tulidocb ceseli cajigian,” aden.

<sup>22</sup> Uqa eunu maadeceb Pita uqa Jisas ehudeceb filecna limesi Pita uqa Jisas cahacdudu madon, “O Tibud, Anut uqa ceteh eu dewenna hoiaundainnu cahacduhiale!” don. <sup>23</sup> Pita odi madocob Jisas falicdu madon, “Seten, hina Anut madena eu qee madelem. Hina dana mahanadec cisdock toodoo matagana. Hina jic cufa qutagana. Se, cuculti nuuga!” don.

<sup>24-27</sup> Odocob Jisas uqana malogom maaden, “Feiga, Dana Melah uqa Memegna kobilkobilca uqana ensel gami hoqagan. Deel euna uqa dana abesabes age odoinnu ameg wadacadiqian. Eunu dana oso mahamaha cehewan cunug oialumiqa uqana cebac biley qee moubmi cehewan on eunu me biloubfio? Qeefi, dana uqa cebac biley eu culecebfii cel cetehna uqana cebac biley ceseli besi ocnu fajjudian? Oso uqa uqana cebac biley cahahadugia odona eu uqa uqana cebac biley felacudigian. Odocob oso uqa ijana bilina eunu uqana cebac biley felacudecebfii eu uqana cebac biley ugian. Eunu oso uqa ijanu madi, ija uqa jaih ceen lahadudu toodugen, ena eu uqadodoc deweni me biligian ec cain madeiaun qa uqa uqana na babalec hewi gahidumei tooteiale. <sup>28</sup> Ija mele maadigina, leih age ene tawegina eu age qee cal nec ninijeb Dana Melah uqa uqana king culna hohob mecidoqagan,” aden.

\* **16:18:** Grik jena ijan Pita uqa hutan eu “meen” cinigwe.

**17**

*Jisas deweg fil ibuldon  
(Mak 9.2-13; Luk 9.28-36)*

<sup>1</sup> Deel 6-pela hedocob Jisas uqa Pitaca, Jemsca uqa waliag Jonca cedadimeei ehadi aluh ohis osona dana oso qee biley euna ti cuhanuc bilein. <sup>2</sup> Ono bibilegin Jisas uqa age amagana ibuldon. Uqa ola cam odi camalen, ugana lotoc senenec bahic fulacdon. <sup>3</sup> Odocob ugana malogom age Moses Ilaijaca ale hocobil Jisasca togododogin feciadein. <sup>4</sup> Odi bibileig Pita uqa fimei Jisas madon, "O Tibud, ege ene odi biley eu me bahic. Hina madecemfi ija ene talah jo cijed cehigen, oso hinana, oso Mosesna, odocob oso Ilaijana," don.

<sup>5</sup> Uqa je eu madudu bibilen taen oso fulacdoc bahic ni jahuladen. Taennadec jejeg oso camas mimei maden, "Ija melami nelugca, ija uqanu gale ben tena eu ihen. Age uqa jejeg toodu odoiga," en.

<sup>6</sup> Odocob malogom eu dah mimeig ni mahulein. Age ben bahic cucuiein. <sup>7</sup> Euqa Jisas ageca limei hewadi maaden, "Age cain cucuiuwain. Cajeiga," aden. <sup>8</sup> Age caji meciimeig dana oso qee felein, Jisas himec fein.

<sup>9</sup> Age aluhnadec totoni Jisas malogom cijed je gatiti maaden, "Qila feiga eu oso Cain saadowain. Dana Melah cal mecnadec qee cajec ninijeb je i oso Cain doiaun," aden.

<sup>10</sup> Odocob malogom age Jisas sisildu madoin, "Eunu eetanu loo je iwaladec age Ilaija uqa aquni hugian egina?" doin.\*

<sup>11</sup> Odocobil Jisas maaden, "Ilaija uqa mele hugian, humei ceteh cogogen eu cunug tutuc mudigan. <sup>12</sup> Euqa ija maadigina, Ilaija uqa wele hon. Hocob dana age uqanu qee doloin. Agedodoc wawaga maden eu age uqa odudein. Eu odiwe ageha Dana Melah odudecebil deweg sogoec ben gahidugian," aden. <sup>13</sup> Jisas odi saadeceb malogom age Jisas uqa wa joadec dana Jonnu mageia imeig wawaga fogo don.

*Jisas uqa mel oso buga me qee hewen eu me muden  
(Mak 9.14-29; Luk 9.37-42)*

<sup>14</sup> Jisas malogom cijedca age dana cajaca mati cemenega lecebile dana oso hu Jisas jaihna isec gob cehimeei madon, <sup>15</sup> "O Tibud, ija melami uqa titi hudec hag qona eu me qee bahic odudina. Saen matica janaca wanaca toni mahuli cosolena. Eunu hina uqanu walol heiale. <sup>16</sup> Ija ijana mel hina malogom cemenega mudecemin ageqa me mudecnu ihoc qee," don.

<sup>17</sup> Odocob Jisas uqa jegeg hewi madon, "O dana cajaca qila bileyina, age wawaga meleecca qee, age cisdockogogecca! Saen ganic ija ageca haun biligen? Saen ganic ija camuhulaadi cobigen? Mel eu cemeni ehudi ahoigale," don. <sup>18</sup> Odi odocobil Jisas uqa buga me qee eu cahacdudu madocob uqa mel eu cuculdi nueceb mel qila i medocob bilen.

<sup>19</sup> Odocob malogom age Jisasca jahuni humeig sisildu madoin, "Ege eetanu buga me qee eu ititacdoci ihoc qee lel?" doin.

<sup>20-21</sup> Odocobil maaden, "Agena wawaga meleec eu nag eunu ihoc qee lel. Ge, ija mele maadigina, age wawaga meleec eu nag bahic, eu mastet aig cinigwe tawecebfage aluh i madoubmiqa, 'Hina cajimeg onoca nuuga,' doumbiqa odocob uqa conoga toodu odoub. Ceteh odo oso odocwe qee eu qee nijaun. Odoc cunug ihoc ligian," aden.†

*Jisas uqa cal mimei ceseli cajigian ec madi lecisdon  
(Mak 9.30-32; Luk 9.43-45)*

<sup>22</sup> Age odi ono Galili hatuna bilimeig Jisas maaden, "Dana Melah eu dana ebenegana mudecebile <sup>23</sup> age uqa qocobil cal migian. Odocob deel cijeddocna Anut uqa tulidocob ceseli cajigian," aden. Uqa odi maadeceb wawaga me qee men.

*Jisas uqa tempel cabinu takis helen*

<sup>24</sup> Age haun ceselimeig Kapaneam jobon hoin. Bibilegin tempel cabinu takis helecebile cedein dana eundec oosooso Pitaca limeig sisildu madoin, "Agena iwaladec uqa tempel cabinu takis qee helenaf?" doin. <sup>25</sup> Pita uqa maaden, "Ese, ugaha takis helena," aden.

Hibna Pita ugana jona bibilen Jisas uqa Pita sisildu madon, "Saimon, hina eeta madagana? King mahadanadec age in takis helecebile ogina? Age agena mel helecebile oginafo, qee dana maha fildec helecebile oginafo?" don. <sup>26</sup> Odocob Pita madon, "King mahadanadec age dana maha fildec takis helecebile ogina, igina," don. Odocob Jisas madon,

\* **17:10:** Loo je iwaladec dana age cit qoc saennu je oso iwaladegina. Je ugana gug eu Malakai 4.5-6. Age Ilaija uqa Krais aquunitu cali hugian ec madegina. † **17:20-21:** Grik jaqec je hilah leihna age je oso tubdu jaqein eu odi: "Euqa Setenna eundec i cinigwe age gauc ititacdoci qee nijel. Eu sabnu qagu bilimeig inondumeig ha odocnu nijigian," aden.

“Odi mele, eunu kingna mel age takis helecnu je qee nijel. <sup>27</sup> Ageqa elenu gemanaga beiaunnu hina Galili wa cagoc lanna limeg cawil wana helagale. Hina odi odocon dool oso cawilna umeg didu ogale. Umeg uqa biahna meen qaig oso eu ninijeb cacawi umeg meen qaig eu tempel cabinu hinanuca ijannuca helagale,” don.

## 18

*Sao cul jobon ono in oso cunug wooladi ben biligian?*

(Mak 9.33-37; Luk 9.46-48)

<sup>1</sup> Saen euna malogom age Jisasca limeig sisildu madoin, “Sao cul jobon euna in oso cunug wooladi ben bilina?” doin.\*

<sup>2</sup> Odocobil Jisas uqa mel sim oso utadocab uqaca hocob uqa ehudi malogom gemona mudimei <sup>3</sup> maaden, “Ija mele maadigina, age tului qee falicdu mel i cinigwe ha qee ibuldufeig age sao cul jobon ono qee lowain. <sup>4</sup> Oso uqadodoc jogoiwei ija cotiel agena ben ec qee madigiaqa mel eu cinigwe eu cotugul cunug wooladi sao cul jobonna ben bilina,” aden.

<sup>5</sup> “Oso uqa mel sim eundec oso ija ijanina ehudimei eu eeldona eu uqa ija oitimei eltena,” aden.

*Silail mec kobel eu Cain hewowain*

(Mak 9.42-48; Luk 17.1-2)

<sup>6</sup> Jisas odi maadi maaden, “Euqa oso uqa mel sim i eundec oso uqa ijanu waug meleena eu odudeceb silail migiaqa eu meen culumenga bena qagi macas ameg nijia euna age helecebil wa jimei cal moubmi eu me odoub,” aden.

<sup>7</sup> “Faninadec mahana nijina, odocob faninadec eu gaid dana cajaca ageca hona, eu cunug qee mudencu qee nijel. Euqa dana cajaca age maha ina bilegina age leih faninadecbil silail megina eu age walocca! <sup>8</sup> Odocob hina eben lec исаа jaim lec исаа ja cijecib catanecna helicebil euna bilecnu eu me qee bahic. Euqa hina ebенca qee jaимca qee cebac biley catanec ogaga eu me. Eunu hina ebenfo, jaimfo silail mecnу mana tawecebfи hina qeti helagale. <sup>9</sup> Odocob hina amen lec исаа олоqanhi jana helicebil euna bilecnu eu me qee bahic. Euqa hina amenca qee euqa cebac biley catanec ogaga eu me. Eunu hina amen faninheceb silail mifeg amen seli helagale,” aden.

<sup>10-11</sup> “Ija maadigina, sim agena ensel age gaid Mei sao jobon bilia uqa ola mecidogina. Eunu batut feigale, age mel sim i age oso Cain cewudowain,” aden.†

*Sipsip fadalecnu odona eunu galolo je*

(Luk 15.3-7)

<sup>12</sup> Jisas je haun maaden, “Age je i maadigennu adi cisdogina? Dana oso uqana sipsip 100 cobogina eundec osol jahunen. Odocob dana eu dumei uqa 99 eu aluhna cuculadi jahunen eu wawali qee cobonafo? <sup>13</sup> Uqa eu gulucdufei, ija mele maadigina, uqa 99 aluhna me bilegina eu cunug wooladi osol cahabahadu on eunu waug ceelena. <sup>14</sup> Eu odi Mei‡ sao jobon bilia uqaha mel sim oso fadaleiaunu qee gale dona,” aden.

*Tutuc mudec kobolna cotin silail mihen eu tutuc mudoga*

<sup>15</sup> Jisas je haun maaden, “Hina cotin [dewenna] silail mecebfи hina uqaca limeg hina uqaca himec mecidodecna madogale. Madogona eu cotin dah mecebfи hina cotin haun ceseli ogona. <sup>16</sup> Euqa uqa hinana je dah mecnу culecebfи ‘je eu tutuc mudec dana lecисо, cijedfo amagana cabi ocnu’

(Loo 19.15)

hina dana osolfo, lecисо cedalecem age osoben li cotin madoigale. <sup>17</sup> Hina cotin dana eu agena je dah mecnу culecebfи hina je eu tamanec amegna camasac magale. Cotin uqa tamanecna je toodу odoc culecebfи hina uqa Juda dana qee eundecfo, takis cedec eundecfo hibemadeginawе hibemdogale,” aden.

<sup>18</sup> “Ija mele maadigina, age ceteh mahana jelegina eu sao jobon jelec biligian. Ceteh age mahana cufalegina eu sao jobonha cufalec biligian,” aden.

\* **18:1:** Je i je cecelac 5-pela Jisas maaden buk Matjuna nijen eundec 4-peladoc. Je cecelac i 18.3-35na nijen. Eu dana cajaca age Jisas toodoin eu age cel kobel agena gemona odoqagan eunu madena. † **18:10-11:** Je i, “mel sim i age,” but inaca, but 6naca, but 14naca nijia eu je Matju 10.42 cinigwe, eu odi “mel sim eundec oso uqa ijanu malogom bilina.” Jisas uqa mel sim dihnu qee madelwe fena. Uqa uqana malogomnuha maden. Odocob Grik jaqec je hilah leihna age je oso tubdu jaqein eu odi: “Ge, Dana Melah uqa fadaloqagannu odogina eundec cahabaadecnu mahana toni nen,” aden.

‡ **18:14:** Grik jaqec je hilah leihna age je fil oso jaqein eu odi: Memega.

19-20 “Je osoha maadigina, lecisco cijedfo ija ijaninu ceguli bilegina euna ija age gemona biligen. Eunu age eundec lecis mahana ceteh osonu Mei madocnu wawala osol meceb inondocobilfi ceteh eu Mei sao jobon bilina eu adigian,” aden.

*Cabi dana uqa cabi hijagna cub qee cagositol eunu galolo je*

21 Pita uqa Jisas cemenug limei sisildu madon, “O Tibud, coti uqa ija silail mecna culini gaid tudocob cagositoc sanijec ihoc leceb cagositugen? Cagositoc 7-pela ihoc lec eu ihocfo?” don.

22 Jisas uqa Pita jejeg hewi madon, “Ija mahigina, 7-pela ihoc lec eu ihoc qee, euqa hina cotin 70doc sanijec 7-pela ihoc leceb cagositoga,” don.

23 Odi madumei maaden, “Sao cul jobon uo odi king oso uqa ugana cabi dana agena cub oc tutuc mudecnu utaaden. <sup>24</sup> Eu age hocobil age gemona cabi dana oso camas men eu uqa kingna 10 milion kina wele on. Ugana cub oc eu ben bahic. <sup>25</sup> King uqa ameg itiga don qeenu king maaden, ‘Age ugaca uqa aidegca ugana melca ugana ceteteh cunuga idadumeig meen qaig iteiga,’ aden. <sup>26</sup> Odocob cabi dana eu uqa je eu king madeceb dumei uqa king amegna gob cecehi kingnu cuha fimei ninidudu madon, ‘O ijana Ben, hina susumitem ija isi meen qaig ameg cunug ihigen,’ don. <sup>27</sup> Odi odocob king uqa dana inu walol docob besitumei ugana cub oc cunug cagositon,’ aden.

28 “Euqa cabi dana eu nuimei uqa cabi hijag oso gulucdon. Eu uqa wele 100 kina uten. Uqa eu guludumei be doodool hewimei madon, ‘Meen qaig ihmek eu qila ameg itiga,’ don,” aden.

29 “Odi odudeceb cabi hijag eu uqa amegna gob cehimei ninidudu madon, ‘Sumitigale. Ija meen qaig ameg cunug isi ihigen,’ don. <sup>30</sup> Odocob uqa eu cuculi gihacdoc jona tacen meen qaig ameg itecem besihigen don,” aden.

31 “Uqa odi odocob uqa cabi hijagul je eu cunug dumeig wawaga me qee meceb age li king je eu cunug sadoin. <sup>32</sup> King je eu dumei uqa dana i utadocob hocob madon, ‘Hina cabi dana me qee bahic. Hinana cub oc ben bahic ninijen ninitecemnu cagashem. <sup>33</sup> Hina cabi cotin niniheceb hina eetanu ugana qee walol hel ija hinanu walol ten odi?’ don. <sup>34</sup> Odimei gemag madudu deweg tudocob gihacdoc jo cofdoc culiadon, meen qaig ameg cunug itecel besitoiga,” aden.

35 “Eunu age cotogail agena cahuldoc qee cagasi bahic adecebifil Mei sao jobon bilia eu uqaha king uqa cabi dana me qee odudenwe odadigian,” aden.

## 19

*Jisas uqa ocobocabec kobol cagocnu maden*

(Mak 10.1-12; Luk 16.18)

1 Jisas uqa je eu madi hedumei Galili hatu culimei Judia hatu Jodan Wa ono isec nui bilen. <sup>2</sup> Dana cajaca mati bahic toodu cobocbil uqa ono agena hagnu me maden.

3 Odocob Farisi age ege Jisas temdu feqan imeig uqa sisildu madoin, “Magaga, dana oso uqa aideg deweg je oso nijeceb uqa culdecnu eguna loo je cois ec madenafo?” doin.

4 Odocobil Jisas maaden, “Ifanec gug eu  
‘Anut uqa dana cajaca ifani malimei maden’

(Jenesis 1.27)

eunu Anutna jaqec jena qee sanijeleinfo? <sup>5</sup> Anut uqa odi maden:

‘Gug inu dana uqa memeg anagca culalimei aidegca gabanaceil biluwasan.

Odocob lecis ale deweg osol biluwasan,’ en.

(Jenesis 2.24)

6 Eunu ale lecis qee biluwasinqa ale deweg osol bilesina. Eunu Anut gabandon eu dana oso cain cagoiaun,” aden.

7 Odocob age Jisas jejeg hewi madoin, “Moses uqa eetanu loo je odi igen, agena caja cagoc ja jaqec utimeig culdecebil nuigian, gen?” doin.

8 Odi madocobil maaden, “Age wawaga tool ibuldon eunu Moses uqa caja culdecnu jic besiaden. Gug qocna odoc odi qee nijel. <sup>9</sup> Ija maadigina, dana oso uqa aideg dana osoca qee leceb nijesin euqa gauc dana caja sisi jelec wagalimei aideg culdi caja haun oso ona eu wal kobol odona,” aden.\*

10 Jisas odi maadeceb malogom age Jisas madoin, “Dana cajaca bilecnu je odi tawecebfii eu caja ocnu cois qee,” doin.

11-12 Odocobil Jisas maaden, “Dana osooso age caja ocnu dumant utec qee nijel age odi anagail basadein. Leih dana baminiga seladecebil age caja ocnu qee nijel. Leih age sao cul jobonnu cabi ocnu himec cisidumeig agedodoc dewenega cilehdumeig caja qee ogina.

\* **19:9:** Grik jaqec je hilah leihna age je oso tubdu jaqein eu odi: “Dana oso uqa caja gemug culden ona eu wal kobol odona,” aden.

Oso uqa je eu ocnu ihocfi ugian. Eunu je eu dana cunug ocwe qee. Oso je eu ocnu duman utec nijia eunu dahig fogo dugian,” aden.

*Jisas uqa mel sim culadecebile uqaca hoqagannu maaden  
(Mak 10.13-16; Luk 18.15-17)*

<sup>13</sup> Dana cajaca leih age Jisas uqa agena mel sim ebenna hewadi agenu inondugiannu mel sim Jisasca ehadi ahoin. Ahocobil malogom age ehadi ahoin eundec gagalaadi cahacadein. <sup>14</sup> Odocob Jisas eu fimei maaden, “Mel simwe eundecnu sao cul jobon muden nijiaido. Eunu cain cahacadowain. Culadecebile mel sim age ijaca hoigale,” aden. <sup>15</sup> Uqa odi maadimei eben mel ilomogana mimei eeladimei cuculadi nuen.

*Dana haun cehewanca uqa Jisasca hocob madesin  
(Mak 10.17-31; Luk 18.18-30)*

<sup>16</sup> Dana haun oso uqa Jisasca hu sisildu madon, “O Iwalgec, cebac biley catanec eu ocnu eta me odoc oso odigen?” don.

<sup>17</sup> Odocob Jisas jejeg hewi madon, “Hina me odocnu eetanu sisiltagana? Anut uqa himec me. Hina cebac biley lecnu madifeg Anutna loo je toodu odogale,” don.

<sup>18</sup> Odocob dana haun madon, “Cel loo jenu cisdu matagana?” don. Odocob Jisas madon:

“Hina oso Cain qagadogaun.

Hina dana cajaca dewenela osol mec Cain cagualegaun.

Hina oso uqana ceteteh Cain heje cedagaun.

Hina oso uqana uhulec je Cain madagaun.

Hina oso Cain um qudugaun.

<sup>19</sup> Hina memen aninca lalan malagale.

*(Kisim Bek 20.12-16; Loo 5.16-20)*

Odocob hina hinanel nalunin maganawee

odi hina utuqain biley<sup>†</sup> eundecnu nalug magale,” don. *(Wok Pris 19.18)*

<sup>20</sup> Odocob dana haun eu uqa Jisas madon, “Loo je eu cunug ija toodu odi hedom. Ceteh odocnu ija qee odolom eu oso nijiafo?” don.

<sup>21</sup> Odocob Jisas uqa jejeg hewi madon, “Hina dana tutuc bahic calegannu gale hecemfi hina nuimeg hina cehwain cunug idadumeg meen qaig eunadec umeg dana sawen eundec siwiadagale. Odi odimeg hina sao jobon ono cehewainca biley. Odimeg hu ija tootagale,” don. <sup>22</sup> Odocob dana haun eu uqana ceteh cehewan mati bahic nijen eunu Jisasna je eu dumei uqa waug culumen dodon Jisas cuculdi nuen.

<sup>23</sup> Odocob Jisas uqa malogom maaden, “Ija mele maadigina, dana cehewanagaca age sao cul jobon dunuh loqagannu eu cacanigca bahic! <sup>24</sup> Ija haun maadigina, kamel uqa lotoc gisec cese gigilona isec li nuecnu cacanigca, euqa dana cehewanica eu Anutna cul dunuh lecnu cacanigca eu wooldoc bahic,” aden.

<sup>25</sup> Malogom age je eu dumeig age tumatumai madein, “Mele odi nijceebfi innini Anut uqa caahahaadigian?” ein.

<sup>26</sup> Odi madecebile Jisas meciaadi maaden, “Dana age odi odocnu qee nijel. Euqa Anut ceteh cunug odocnu dona,” aden.

<sup>27</sup> Odocob Pita uqa Jisas jejeg hewi madon, “Faga, ege ceteteh cunug culimeb hina toohi coboqona. Ege isi eeta oso oqan?” don.

<sup>28</sup> Odocob Jisas maaden, “Ija mele maadigina, maha haun ibuldocna Dana Melah uqana king biley bahim kobolkobolcana bibileb ageha king biley bahim 12-pelana bibili Isrel sihil 12-pela gesiladoqagan. <sup>29</sup> Age abesabes oso uqa jofo, waliagulfo, cebinagulfo, memegfo, anagfo, uqana melfo, cabifo ija ijaninu ciliadecebfi uqa ceteh culden eu 100doc wooldoc ameg ben bahic ugian. Odocob uqa cebac biley catanec muguh ugian. <sup>30</sup> Euqa mati qila hib bahic taweqa eundec age isi aquni tawoqagan. Odocob mati qila aquni taweqa eundec age isi hib bahic tawoqagan,” aden.

## 20

*Wain cabi oc dananu galolo je*

<sup>1</sup> Jisas je haun maaden, “Sao cul jobon odiwe bilia. Jo gug uqa deel osona qasil cabi dana age uqana wain cabina cabi ocnu fajadigiannu waladi nuen. <sup>2</sup> Uqa dana gulucadimei kina osolnu qila cabi ocnu sisiladeceb cois ecebile uqa uqana wain cabina cabi oqagannu suladen. <sup>3</sup> Uqa 9 kilokna haun ceseli cobimei dana gauc idadec cudunna tatawegin feciadimei <sup>4</sup> maaden, ‘Ageha ijana wain cabina belimeig cabi oigale, ija agena cabi oc ameg ihoc adigen,’ aden. Odocob age cabi ocnu belimeig cabi oin. <sup>5</sup> Uqa cam gemo cehi

<sup>†</sup> **19:19:** Utuqain biley uqana gug eu odi. Agena loofo, agena kobolfo eu dana osonu nalug magale ec qee madel, cois hina dana eunu nalug magale.

tatawen haun cocobi li cabi dana haun ceden. Odimei cam waldocob 3 kiloknaca cocobi li odi ha odon,” aden.

<sup>6</sup> “Odimei uqa 5 kilokna cocobi li dana leihha gulucadimei maaden, ‘Age eetanu cahineg cunug ene gauc taweiga cabi oso qee oloin?’ aden. <sup>7</sup> Odocob age madoin, ‘Oso cabi ocnu qee hu magel,’ doin. Odocobil uqa maaden, ‘Ageha ijana wain cabina belimeig cabi oigale,’ aden.

<sup>8</sup> “Wesu meceb wain cabi gug eu uqa uqana cabi cofdoc dana madon, ‘Hina cabi dana utaadecm hocabil cabi oc ameg adagale. Hib hoiga euna sanan mimeg aadi aadi li qasil hoiga euna ihoc lec adagale,’ don. <sup>9</sup> Uqa utaadeceb hocabil cam waldoc 5 kilokna cabina lein eundec kina osol aden. <sup>10</sup> Odocob qasil cabina casac lein eundec age wawagana madein, ‘Uqa ege meca igigan,’ ein. Euqa ageha kina osol aden. Cabo cofdoc uqa kina osol adeceb <sup>11</sup> age wain cabi gugnu gonagona mimi madoin, <sup>12</sup> ‘Dana hib hoiga eu aua osol himec cabi oiga. Ege qasil sanan mimeb cam qiqigen cabi oqa. Hina hib hoigaca egeca ihocihoc igiga eu cois qee,’ doin,” aden.

<sup>13</sup> “Euqa wain cabi gug uqa dana eundec oso madon, ‘Ijana danah, ija hina qee wahelem. Faga, ija hina qasil kina osolnu cabi oganfo, ec sisilhemin cois qee telemfo? <sup>14</sup> Hinana meen qaig oga eu gad hewi nuuga. Ijadodoc ijana gale tecnu ija hib hoiga eundec hina ihiga odi ihocihoc adiga. <sup>15</sup> Ija ijana ceteteh wawi madec toodu siwecnu qee njelfo? Ija nelinica odigina hina eunu gumunitagana eu coisfo?’ don,” aden.

<sup>16</sup> “Eu odi milum hib hoin eundec matu ibuldoqagan, matu aquni hoin eundec milum ibuldoqagan,” aden.

*Jisas uqa cal mamei ceseli cajigian ec madi cijeddon*

(Mak 10.32-34; Luk 18.31-33)

<sup>17</sup> Jisas uqa Jerusalem ono ti cocoboi uqa uqana malogom abes utaadeceb hocabil maaden, <sup>18</sup> “Feiga, ege Jerusalem toqona. Ono age Dana Melah ihanec dana benben ebeneganaca loo je iwaladec ebeneganaha muduqagan. Age uqa cal migiannu geldumeig <sup>19</sup> Juda dana qee eundec ebenegana muduqagan. Odocobil age uqa lelandumeig qisadu na babalecna tuitu qumeig caqusecebil caculimei cal migian. Odocob deel cijeddocna Anut uqa tulidocob ceseli cajigian,” aden.

*In sao cul jobon ben biligian?*

(Mak 10.35-45)

<sup>20</sup> Saen euna Sebedi melahul lecis ale anala uqa Jisasca humei uqa amegna gob cehi uqanu cuha fimei je madugiannu bilen. <sup>21</sup> Odocob Jisas uqa sisildu madon, “Eetanu matecnu odogona?” don. Odocob caja madon, “Hinana cul camas meceb ija melamiel lecis oso hina eben meulana isec, oso eben ansena isec bilec meca eu alegannu je hahun itigale,” don.

<sup>22</sup> Odocob Jisas caja jejeg hewi maalen, “Ale cetehnu ninitesina eu uqana caun qee dosina! Wa gab ija jigen eu aleha jecnu ihofco?” alen. Odocob madosin, “Ese, ele jecnu ihoc,” dosin. <sup>23</sup> Odocobil Jisas maalen, “Mele, wa gab ija jigen eu aleha jowasan. Euqa bilec cudun ebeni meulana isecca ebeni ansena isecca alecnu eu ijana cabi qee. Eu Mei uqa bilec eu ocnu wele maden eu ale bahic owasan,” alen.

<sup>24</sup> Malogom 10-pela age je eu dumeg age dana lecis eu alenu wawaga me qee men. <sup>25</sup> Odocob Jisas uqa malogom utaadeceb hocabil maaden, “Juda dana qee eundec agena king age agena dana gagadic madegin, odocob mahana dana ben age dana cilehadegina eunu age dogina. <sup>26</sup> Euqa age gemona odi cain nijaun. Age gemona oso ija ben biligen ifei uqa cotugul cunug cewel uadeiale. <sup>27</sup> Odocob oso uqa ija matu biligen ifei eu agena begabeg meh cabi dana ibuldoiale. <sup>28</sup> Ge, Dana Melah ha dana age ija cewel utuqagan imei qee toni nel. Qeoo. Dana Melah uqa dana cajaca cewel uadecnu toni nen. Uqa ijana cebac bilec eu dana cajaca mati besiadec fajadecnu culigen imei eunu toni nen,” aden.

*Jisas uqa dana amala galuc mec lecis me malen*

(Mak 10.46-52; Luk 18.35-43)

<sup>29</sup> Jisas uqana malogomca age Jeriko taun cuculeig dana cajaca mati bahic tooadecebil coboin. <sup>30</sup> Cocobogin dana amala galuc mec lecis ale jic gesacna bilesin. Dana lecis eu ale Jisas hona ec mamadegin dah mimesi ale utai madesin, “O Dewid Melah, elenu walol heiale!” esin. <sup>31</sup> Dana cajaca age gagalaali maalein, “Cain utaowasin. Culesiale,” alein. Euqa ale feeadi conola suli u utai madesin, “O Tibud, Dewid Melah, elenu walol heiale,” esin.

<sup>32</sup> Jisas tului tawimei dana utaali maalen, “Ija ale eeta odaligennu matesina?” alen.

<sup>33</sup> Odocob dana amala galuc mec ale Jisas madosin, “O Tibud, ele amile meciecnu

odiligale,” dosin. <sup>34</sup> Odocobil Jisas alenu waug qocob amala qududocob mahuc amala fogo docob ale ceteh cunug fesin. Odimesi ale Jisas toodocobil belein.

## 21

*Jisas uqa kingwe Jerusalem dunuh len  
(Mak 11.1-11; Luk 19.28-40; Jon 12.12-19)*

<sup>1</sup> Jisas uqana malogomca age Jerusalem dodoldodogin Betfasi jobon Oliw Aluhna isec calimeig uqa malogom lecis sulaali <sup>2</sup> maalen, “Jobon amigena nijia euna lesia. Ale dunuh lelesi cesel anag uqana goman manahalca qagalec tatawecebil eu gulucdowasan. Ale eu cufalalimesi ehali ahutesiale. <sup>3</sup> Dana oso uqa ale eetanu cesel cufalalesina alecebfi ale madowasan, ‘Tibud cesel eu ocnu eu cabi osoca madena,’ dowasan. Odocobil dana eu cesel culaligan,” alen.

<sup>4</sup> Je hahun madec dana uqana je oso ihoc ligiannu odi odon. Je hahun madec dana uqa wele odi maden:

<sup>5</sup> “Age Saion dana cajaca odi maadeigale,  
‘Feiga, agena king ageca hona.

Uqa dana jogoi cobonawee cesel uqa guhadocob hona.

Cesel uqana nag goman guhadocob hona,’ adeigale,” en. *(Sekaraia 9.9)*

<sup>6</sup> Malogom ale limesi Jisas maalen odi odosin. <sup>7</sup> Ale cesel anag uqana gomanca ahocobil malogom agena lotoc cesel gogodohna duecebil cesel uqa Jisas guhadocob belein. <sup>8</sup> Dana cajaca mati age aquini belein eu agena lotoc jicna duein. Leih age celus qetimeig jicna duein. <sup>9</sup> Dana cajaca age aqunitutu hib toodudu age due sisili madein:

“Hosana!\* Ege Dewid Melah binan suluquna!

Tibud ijanna egeca hona eu uqa eeldoc biliale.

*(Buk Song 118.26)*

Anut Ohis Bahic uqa binan wasi nuiiale,” ein.

<sup>10</sup> Jisas uqa Jerusalem leceb dana cajaca age Jerusalem biley eu age tumatumai madein, “Dana i uqa in?” ein. <sup>11</sup> Odocobil dana cajaca toodoo coboin eu age madein, “Uqa Jisas, uqa je hahun madec dana Nasaret jobondec, Galili hatuna,” ein.

*Jisas uqa tempel jo soidon  
(Mak 11.15-19; Luk 19.45-48; Jon 2.13-22)*

<sup>12</sup> Jisas uqa tempel dunuh limei uqa ono dana ceteh fajeinca ceteh suldoinka eundec feciadimei cunug ititacadeceb maha gemo calein. Odimei dana age meen qaig maha filfilca meen qaig tempelca wadacwuducdoin eundec agena cabal sunduadeceb agena meen qaig golodon.<sup>†</sup> Uqa cuhudid fajec agena cabalha sundocob golodocob <sup>13</sup> maaden, “Anutna je jaqcna je oso nijia eu Anut odi madena:

Ijana jo eu Anut inondocnu jo oqagan,’ ena.

*(Aisaia 56.7)*

Ageqa agena odochna

age falicdocobil heje dana agena jahunec cudun ibuldon!” aden. *(Jeremaia 7.11)*

<sup>14</sup> Odocob dana amaga galuc mecca laleg mecca tempelna Jisas cemenug hocobil uqa me maden. <sup>15</sup> Euqa ihanec dana benbenca loo je iwaladecca age Jisas kobolkobol oodon fimeig mel sim ha tempelna Jisas binan susuli Hosana!<sup>‡</sup> Ege Dewid Melah binan suluquna! ec due sisilegin dah mimeig gemanaga jawe beceb <sup>16</sup> Jisas madoin, “Mel sim madegina eu hina dah maganafo?” doin. Odocobil Jisas jejenega hewi maaden, “Mele, dah migina. Age jaqc je Anutna je i qee sanijeleinfo?

‘Hina mel sim momodoca iwaladi cuhadom.

Age conoganaadec binan sulec je hinanu wasena,’ en,” aden.

*(Buk Song 8.2)*

<sup>17</sup> Odi maadimei uqa age tatawegin culadimei uqaha Jerusalem cuculi Betani jobon ono nui nijaug nijen.

*Jisas uqa na dan geldocob galalimei cal men  
(Mak 11.12-14; 11.2-24)*

<sup>18</sup> Jisas uqa qasil ceseli haun Jerusalem hugia hohon wen don. <sup>19</sup> Odocob uqa na dan oso filec tatawen fen. Odimei uqa ono gug cemenug limei me aigcafo fecnu len. Euqa na dan me aigca qee, eu bagac himec tatawen fen. Odimei uqa na dan madon, “Hinana aig oso haun qee qogaun!” don. Odocob na dan mahuc galalen.

\* <sup>21:9:</sup> Hibru jena uqana gug bahic eu “Anut caahagagale!” euqa saen euna eu Anut binan sulecnu je oso. <sup>† 21:12:</sup> Dana age tempel dunuhna ceteh fajecnu gale aden eu age tempelna meen qaigna himec fajecnu nijen. Age Romfo, Grikfo agena meen qaigna fajecnu ihoc qee nijel. Cuhididca ceteh filfilca dana fajadein age Anutna ihanadolig.

‡ <sup>21:15:</sup> Hibru jena uqana gug bahic eu “Anut caahagagale!” euqa saen euna eu Anut binan sulecnu je oso.

<sup>20</sup> Malogom age eu fimeig age tumatumai madein, “Na dan eu adi mahucwe galaleia?” ein.

<sup>21</sup> Odocobil Jisas maaden, “Ija mele maadigina, age wawaga meleec nijialumi wawaga lec исца qeemi age na dan eu oodom feiga eu himec qee odoubqa age aluh i hina caji macasna noga doubmi eu conoga toodoo odoub. <sup>22</sup> Age wawaga meleeccafi ceteh cunugnu inondufeig eu age oqagan,” aden.

*Age Jisas in cabi eu ocnu mahan odogona? ec sisildoin  
(Mak 11.27-33; Luk 20.1-8)*

<sup>23</sup> Jisas uqa haun tempel dunuh limei dana iwaladi tatawen ihanec dana benbenca Juda agena matuca age Jisascha hu sisildu madoin, “In ijanna hina eu odogona? In cabi eu ocnu mahan odogona?” doin. <sup>24</sup> Odocobil Jisas jejenega hewi maaden, “Ija age casac je oso sisiladigen. Age eu jejeni hewi matecebifli ija hibna ha in cabi iteceb ugina, in ijanna ceteh odigina eu camas mecemin doqagan. <sup>25</sup> Eu odi, Jonna wa joadec eu anadec? Eu sao jobondecfo, qee dananadecfo? Mateiga duga,” aden.

Odocob age fee dadani togodudu madein, “Ege madoqaqa wa joadec eu sao jobondec doqaga uqa ege eetanu uqanu wawaga mele qee el? gigian. <sup>26</sup> Ege madoqaqa wa joadec eu dananadec doqaga eu dana age adi odiguqagannu cucuiuquna. Ge, dana cajaca cunug age Jonnu uqa je hahun madec dana egina,” ein. <sup>27</sup> Eu togodu hedumeig age Jisas madoin, “Jonna wa joadec eu anadec ege qee doqona,” doin. Odocobil Jisas maaden, “Eunu ija ageha in cabi iteceb ugina, in ijanna ceteh i odigina eu qee maadigaun,” aden.

*Jisas uqa dana oso melahul leciscanu galolo je maden*

<sup>28</sup> Jisas uqa ihanec dana benbenca Juda agena matuca je haun maaden, “Age je inu eeta cisdogina? Dana oso ugana mel lecis bilesin. Memeg uqa mel matuca limei madon, ‘Melami, hina qila wain cabina limeg cabi ogale,’ don. <sup>29</sup> Odocob mel eu memeg madon, ‘Culadiga,’ don. Hibna uqa memeg feedonnu eu ija cois qee odolom imei waug me qee meceb uqa wain cabina limei cabi on. <sup>30</sup> Odocob dana eu uqa mel milumca limei uqa matu madonwe odi ha madon. Odocob mel eu memeg madon, ‘Ben, ija wain cabina nuigen,’ don. Odimei wain cabina qee nuel, cabi culen,” aden. <sup>31-32</sup> Jisas odi maadimei sisiladi maaden, “Mel lecis i in memeg maden eu toodoo odon?” aden. Odocob madoin, “Mel matu,” doin.

Odocobil Jisas maaden, “Jon uqa ageca hu age jic tutuc cobocnu ihacad, odocob age uqana jenu wawaga mele qee el. Euqā takis cedec danaca caja silailca eundec age uqana jenu wawaga meleen. Age ceteh eu fein qa age hibna eunu tului qee falicdoloin, age Jonnu wawaga mele qee el. Eunu ija mele maadigina, takis cedec danaca caja silailnu ijanagaca eundec age aquniaadi Anutna culna legina,” aden.

*Wain cabi oc dananu galolo je  
(Mak 12.1-12; Luk 20.9-19)*

<sup>33</sup> Jisas uqa ihanec dana benbenca Juda agena matuca je haun maaden, “Age galolo je oso dah meigale. Jo gug oso uqa wain cabi cehimei alildu meen gel tacimei wain aig afdocnu kunun cisimei wain cabi cofdoc biluqagannu bahim jo ben fala ohis tobi eit fec ihoc eu odi cehen. Odimei ugana wain cabi dana leih cabi oqagannu ebenegana mimei uqa hatu osona nuen. <sup>34</sup> Wain aig wal meceb cedec saen cali hocob wain cabi gug uqa cabi dana sulaadi maaden, “Age belimeig wain cabi oc eundec maadecebil age wain aig eu adecebil cedi ahuteigale,” aden. <sup>35</sup> Odocob dana age wain cabi cofdoeu age cabi dana hewadimeig oso deweg tudoin, oso qocobil cal men, oso meenna qoin. <sup>36</sup> Odocobil wain cabi gug uqa haun ceseli cabi dana matica suladen. Age wele odadeinwe odi odadein,” aden.

<sup>37</sup> “Cit qocna wain cabi gug uqa melah suldon. Ge, uqa maden, ‘Ija melaminu cumunuqagan,’ en. <sup>38</sup> Euqā wain cabi oc age wain gug uqa melah fimeig togodu madein, ‘I cabi gug huqaneh, uqa isi wain cabi ugian. Cois uqa muguh eu ege oqannu ege cajimeb qocomun cal mecnul’ ein. <sup>39</sup> Odimeig age mel eu hewi sundudu cabi gel hibilohu heludimeig qocobil cal men. <sup>40</sup> Wain cabi gug humei uqa wain cabi cofdoc dana eeta odadigian?” aden.

<sup>41</sup> Odocob dana age Jisas jejeg hewi madoin, "Uqa dana me qee eu me qee bahic aqeceb cal mecebil uqana wain cabi dana filfil cofdocnu adigian. Age uqa wain aig wal meceb utuqagan," doin.<sup>§</sup>

<sup>42</sup> Odocobil Jisas maaden, "Jaqec je oso Anutna jaqec jena nijia eu qee sanijeleinfo? Je eu odi madena:

'Meen oso meen gel cehec memei dana culein eu  
qila meen jo big gug jo hehdocnu calen.

Eu Tibud uqadodoc odi odon.

Ceteh eu foqona eu kobolkobolca,' ena," aden.

(Buk Song 118.22-23)

<sup>43-44</sup> Jisas odi maadimei maaden, "Eunu ija maadigina. Anut uqa uqana cul age cawaladimei dana sihul fil adigian. Age Anutna cul uqana aig qoc eu Anut utuqagan," aden.<sup>\*\*</sup>

<sup>45</sup> Ihanec dana benbenca Farisica age Jisasna galolo je eu dah mimeig age uqa je i agenu madena eunu wawaga fogo don. <sup>46</sup> Odocob age uqa heweagan ein euqa dana cajaca age Jisasnu madi, uqa je hahun madec dana, ein eunu age dana cajacanu cucuiein.

## 22

*King melah caja ocnu sab jec galolo je  
(Luk 14.16-24)*

<sup>1</sup> Jisas uqa haun ceseli galolo je oso maaden, <sup>2</sup> "Sao cul jobon eu odiwe nijia. King oso uqa melah caja ocobocobec deelnu uqana dana cunugnu ja qon. <sup>3</sup> Uqa dana wele ja qocna hoqagannu je sulduaden eu qila hoqagannu uqana cabi dana suladeceb li maadecebile ageqaa hocnu culein. <sup>4</sup> Odocobil king uqa wele hoqagannu maaden eundecnu cabi dana leih haun suladeceb belimeig age li kingna je odi maadein, 'Feiga, ijana sab ameg cilec eu wele ciluqa taweia. Ijana bulmakau dool laloca cunuga aqoqa nijeiga, ceteteh cunuga saciadic nijia. Ija melami caja ocnu sab jecna hoigale,' adein," aden.

<sup>5</sup> "King uqana dana eundec age je eu qee docwe mimeig oso uqana cabina nuen, oso idadocnu nuen. <sup>6</sup> Leih age kingna cabi dana hewadimeig walocca madimeig aqecebil cal mein. <sup>7</sup> Age odi odocobil king uqa gemag beceb uqana han dana suladeceb age limeig dana ebenega golca eu cunug aqimeig agena jobon ben mani hedoin," aden.

<sup>8</sup> "Odocobil king uqana cabi dana maaden, 'Ijana sab eu cunug saciadic nijiaqa dana ene hocnu maadem eu age hu jecnu culein. Agenel ceteh me ocnu ijana sab jec cewudein.

<sup>9</sup> Eunu age belimeig jicjic cocobi dana gulucadimeig eu cunug hu ija melami caja oc deelnu sab jecnu maadeigale," aden. <sup>10</sup> Odocob cabi dana age beladimeig gulucadein eundec cunug dana meca me qeeha ehadi ahoin. Odi odoinnu melah caja ocru jona bielec cudun eu cunug ihoc li hedon," aden.

<sup>11</sup> "Odocobil king uqa dana hu bilein eu cunug meciadiagiannu limei uqa dana oso fen. Dana eu uqa king melah caja ocnu cegulec lotoc qee tacec biled. <sup>12</sup> King uqa eu fimei uqa dana eu madon, 'Danah, hina adi ija melami caja ocnu cegulec lotoc qee tacec ene hu biligina?' don. Odocob dana eu hawai biled. <sup>13</sup> Odocob king uqa sab siwiadec dana maaden, 'Dana eu jaih ebena libimeig hewi jobon hahagum ehi li tu gagatuccana heleiga nuia. Ono age qada qaqqaji maimaga kicodudu biluqagan,' aden," aden.

<sup>14</sup> "Dah meiga, Anut uqa mati utaadena euqa uqa matica qee uqana cul dunuh hoqagannu nesili cedena," aden.

*Dana age Sisanu takis helecnu je  
(Mak 12.13-17; Luk 20.26)*

<sup>15</sup> Farisi age ege Jisas conadec uqa hagaldochun je oso oqan imeig togodoin. <sup>16</sup> Age agena malogomca Herodna sihulca je adecebile age li Jisas madoin, "Iwalgec, ege hinanu dogona, hina mele je madagana, hina Anutna jic mele iwaladagana, dana binanagaca eundecnu qee cucuiagana. Ge, hina dana saolal madec bilegina eundecnu qee jogoagana. <sup>17</sup> Eunu age Sisanu takis helecnu eu tutucfo, qee tutuc qeefo? eu adi cisdogona, magaga doqa," doin.

<sup>§ 21:41:</sup> Wain cabinu je i Jisas uqa Aisaia 5.1-2dec on. Eu Anut uqa adi Isrel dana cajaca odadennu galolo je. Galolo jena gug eu odi. But 33: Dana uqa wain cabi cehen eu Anut. Wain cabi eu Anutna cul. Dana age wain cabi cofdoin eu Isrel dana cajaca, Isrel dana benbenca. But 34-36: Wain cabi gugna cabi dana eu je hahun madec dana age wele Isrel dana cajaca Anutna je maadein. Isrel age Anutna je hahun madec dana mati aqecebil cal mein. But 37-39: Wain cabi gug melah eu Jisas Krais. But 41: Dana filfil wain cabi gug uqa wain cabi aden eu Juda dana qee. <sup>\*\* 21:43-44:</sup> Grik jaqec je hilah leihna age je oso tubdu jaqein eu odi: "Oso uqa meen euna toni qocob fadaligian. Meen eu dana oso dewegna toneceb eu tulohdugian," aden. Age Luk 20.18 feiga.

<sup>18</sup> Euqa Jisas uqa agena cisdock me qee ec dumei maaden, "Age me hihili coboc, eetanu temtegina? <sup>19</sup> Takis helec meen qaig ihacteiga figa," aden. Odocob age takis helec meen qaig oso ihacdoin. <sup>20</sup> Odocobil sisiladi maaden, "Meen qaig ina in hahun eu gaga qoc taweria? In ijanha jaqec taweria?" aden. <sup>21</sup> Odocob age madoin, "Eu Sisa uqana," doin. Odocobil maaden, "Eunu age Sisana ceteteh eu Sisa uteiga. Anut toinan eu Anut uteiga," aden.

<sup>22</sup> Age je eu maadeceb dumeig tumatumaein. Odimeig age Jisas cuculdi belein.

*Sadjusi age Jisas dana cal mein eundec ceseli cajec eunu sisildoin  
(Mak 12.18-27; Luk 20.27-40)*

<sup>23</sup> Deel euna Sadjusi age Jisasca hoin. Sadjusi age cal mein eundec ceseli qee cajowain egina. <sup>24</sup> Age Jisas je oso sisildu madoin, "Iwalgec, Moses uqa loo je oso igen eu odi magen, 'Dana oso caja umei mel qee basec cal mecebfii eu uqa waliag biah umei uqana sihul jahuncerdainnu uqana mel basowasan,' gen. <sup>25</sup> Aria, ege gemona waliagul 7-pela biloloig. Matu uqa caja on uqa ale melca qee cal meceb uqa biah waliag oso on. <sup>26</sup> Uqaha mel qee basec cal meceb uqa biah waliag oso on. Odi dih oodi waliagul 7-pela cunug ihoc lein. Dana 7-pela cal mi hedocobil <sup>27</sup> hibna caja euha cal men. <sup>28</sup> Eu fagale, cal mecnadec ceseli cajebele caja eu dana 7-pela eundec inna caja biligian? Mahana bilen uqa 7-pela cunug biliaden," doin.

<sup>29</sup> Odocobil Jisas jejenega hewi maaden, "Age Anutna jaqec je nijia eu qee dogina, age Anutna gagadic odocha qee dogina. Eunu age dadanecca bilegina! <sup>30</sup> Ge, cal mecnadec ceseli cajoqagan saen euna eu age dana caja ocobocob qee owain. Euqa age ensel sao jobon bileginawe odi biluqagan," aden.

<sup>31</sup> "Eu cal mecnadec ceseli cajecnu je oso nijia. Age jaqec je Anut maadena eu qee sanijeleinfo? Je eu odi Anut maden:

<sup>32</sup> 'Ija Ebrahamna Anut,  
ija Aisakna Anut,  
ija Jekobna Anut,' en.

*(Kisim Bek 3.6)*

Anut uqa cal mein eundec agena Anut qee, uqa cebac bilegina agena Anut," aden. <sup>33</sup> Dana cajaca age Jisasna je eu dah mimeig tumatumaein.

*Age Anutna loo je matunu Jisas sisildoin  
(Mak 12.28-31; Luk 10.25-28)*

<sup>34</sup> Euqa Farisi age Jisas uqa Sadjusi conoga cufa quadren je eu dumeig age cegulein.

<sup>35</sup> Age gemodec loo je iwaladec oso cajimei ija Jisas temdu figen imei sisildu madon,

<sup>36</sup> "Iwalgec, loo je gagadic caunca bahic Mosesna loo je oso cunug wooladec eu cel loo je nijia?" don.

<sup>37</sup> Odocob Jisas madon, "Loo je madena:  
Tibud, hinana Anutnu wawin cunugca, doloin cunugca, cisdock cunugca euna nalug magale,' ena.

*(Loo 6.5)*

<sup>38</sup> Eu loo je gagadic matu, eu caunca bahic. <sup>39</sup> Loo je gagadic oso nijia eu loo je matu uqana toodoc, eu odi madena:

'Hina hinanel nalunin maganawee

odi hina utugain bielec \* eundecnu nalug magale,' ena. *(Wok Pris 19.18)*

<sup>40</sup> Loo je gagadic lecis i ale loo je cunug agena caunca je hahun madec agena jeca eu agena gug nijia," don.

*Jisas uqa Farisi Kraisnu sisiladen  
(Mak 12.35-37; Luk 20.41-44)*

<sup>41</sup> Farisi age odi togodudu bibilegin Jisas uqa je oso sisiladi maaden, <sup>42</sup> "Age Anutna Krais eunu adi cisdogina? Uqa in melah?" aden. Odocob age madoin, "Eu Dewid Melah," doin.

<sup>43</sup> Odocobil Jisas maaden, "Dewid uqa Kis Gun dado mudeceb uqa Kraisnu madi, ijana Tibud, en eu adinu? Ge, uqa maden:

<sup>44</sup> 'Anut Tibud uqa ijana Tibud odi madon,

"Ijaca hu ebeni meulana isec bibilem

ija odocomin hinana cad cunug hu ninijebil

hina jaimna lahacadegan," don,' en.

*(Buk Song 110.1)*

<sup>45</sup> Eu feiga, Dewid uqa Kraisnu madi, uqa ijana Tibud, en, eunu adi uqa Dewid Melah bilina?" aden.

<sup>46</sup> Farisi gemona oso Jisas je jeg hewi madecnu ihoc qee nijel. Ageha deel euna dih sanan mimeig haun cetehnu sisildocnu hihibanaga qee tel.

\* 22:39: Age Matju 19.19 feiga.

## 23

*Jisas uqa Farisinu je maden  
(Mak 12.38-39; Luk 11.43, 46; 20.45-46)*

<sup>1</sup> Odocob Jisas uqa dana cajaca uqana malogomca Farisinu je odi maaden, <sup>2</sup> “Loo je iwaladecca Farisica age Mosesna cabi cudun wele oin. Eunu Moses loo je iwaladenwe age odi loo je iwaladegina. <sup>3</sup> Eunu age odocnu je maadegina eu cunug toodoo odoigale. Euqa agena odoc toodoo cain odowain. Ge, age dana cajaca je maadegina euqa age madeginawee agedodoc qee toodoo odogina. <sup>4</sup> Age ceteh culumen bahic sogimeig dana gahidoqagannu qatatomogana megina. Euqa sogec eu agedodoc nag bahic hewi fecnu culegina. <sup>5</sup> Age ceteh odogina eu cunug egena odoc eu dana foqagan imeig odogina. Ge, agena sai euna Anutna je jaqein age ilomoga domonnaca ebeneganaca taqegina eu bagalan mudeginia. Agena lotoc sucunna gos cecelacca mudeginia.\* <sup>6</sup> Age sab ben jecnu age dana ijanagaca agena bilecna bilecnu gawegina. Agena cuha jona cuha cegulecnu cofadec agena bilecna bilecnu gawegina. <sup>7</sup> Dana age fajec cegulec cudunna age lalan mamadi tabacunadecebile adena. Dana age Farisi maadi madeginia, ‘Meca,’ adecebile gale adena,” aden.

<sup>8</sup> “Ageqa dana ege ‘Meca,’ goqagan ec Cain owain. Agena Iwaladec osol bilina, ageha cotigcotig bilingina. <sup>9</sup> Age Memega osol bilina, eu uqa sao jobon bilina. Eunu age dana oso mahana bilina ‘Memige,’ Cain dowain. <sup>10</sup> Agena Ben osol bilina, eu Anutna Krais. Eunu dana age, age ‘Ben,’ geiga ec euha Cain owain. <sup>11</sup> Oso age gemona ben bilina eu uqa age cunug cewel uadec biligian. <sup>12</sup> Oso uqa culai ijanel lalan mumudi bilina euqa Anut uqa dana eu cilehdugian. Oso uquadodoc jogoi waug lal qocca bilina eu Anut uqa dana eu culaug u lalan mumudeb biligian,” aden.

*Jisas uqa loo je iwaladecca Farisica age kobol me qee odogina eunu maden  
(Mak 12.40; Luk 11.39-52; 20.47)*

<sup>13-14</sup> Jisas je haun maaden, “O loo je iwaladecca Farisica, age dana cajaca sao cul jobon lecnu jic cebec meniadegina. Euqa agedodoc lecnu culegina, odimeig leih sao cul jobon lecnu wawaga nijia euqa age cahacadegina. Eunu age me hihili coboc dana! Age walocca!” aden.<sup>†</sup>

<sup>15</sup> “O loo je iwaladecca Farisica, age dana osol Juda kobilnu falidugia iwaladecnu mahana jic cecelacca cobogina wagna ha cobogina. Dana eu Juda kobil ocob age uqa oloqaniih jana bilec dana bahic mudeginia. Uqa oloqaniih jana bilecnu age wooladena. Eunu age me hihili coboc dana! Age walocca!” aden.

<sup>16</sup> “Age dado madec qa amaga galuc mecca, age walocca! Age odi madeginia, ‘Dana oso uqa tempelna mele ohis ena eu ceteh gauc. Euqa dana oso uqa tempelna gold bibilenna madena eu uqa mele ohis ena, cois uqa maden odi odigian,’ egina. <sup>17</sup> Age gad amaga galuc mec, cel ceteh eu Anut amegna matu? Age madeginia, gold eu matufo, qee tempel eu matufo? Age dogina, gold eu tempelna bilina eunu tempel eu gold odudeceb gold eu Anutna qagu bilina. Eunu tempel eu gold wooldona. <sup>18</sup> Odocob age je madeginia, ‘Dana oso uqa ihanec cabal ijanna mele ohis ena eu ceteh gauc. Euqa uqa ihanec ceteh cabalna bibilen euna mele ohis ena, cois uqa maden odi odigian,’ egina. <sup>19</sup> Age amaga galuc mec, cel ceteh eu Anut amegna matu? Age madeginia, ihanec ceteh cabalna bilina eu matufo, qee ihanec cabal eu matufo? Age dogina, ihanec ceteh eu ihanec cabalna bilina eunu ihanec cabal eu ihanec ceteh odudeceb ihanec ceteh eu Anutna qagu bilina. Eunu ihanec cabal eu ihanec ceteh wooldona. <sup>20</sup> Eunu dana uqa ihanec cabalna mele ohis ena eu uqa ihanec cabalnaca ihanec ceteh cunug cabalna bilina eunaca mele ohis ena. <sup>21</sup> Odocob dana uqa tempelna mele ohis ena eu uqa tempelna Anut uqa tempelna bilina eunaca mele ohis ena. <sup>22</sup> Odocob dana uqa sao jobonna mele ohis ena eu uqa Anutna cabal bilecnaca Anut uqa uqana cabal bilecna bilina eunaca mele ohis ena,” aden.

<sup>23-24</sup> “O loo je iwaladec Farisica, age agena ceelum filfil cabinadec am 10-pela qatanadimeig am osol eu Anut utegina. Age Anutna loo je ceteh nagnu geh cisdogina euqa Anutna loo je ceteh caunca eunu qee cisdogina. Age dana gesiladecnu kobol tutucca, waug qocca, wawaga meleecca eunu qee cisdogina. Age ceteh caunca ceteh nagca osoben

\* 23:5: Eu Juda agena inondocnu kobol. Age Anutna jaqec je leih pepana jaqimeig pepa eu bokis nagna mimeig ilomoga domonnaca ebeneganaca taqoloig. Anutna jaqec je jaqaloig eu 4-pela eu odi: Kisim Bek 13.1-10; 13.11-16; Loo 6.4-9; 11.13-21. Juda ageha Anutna jaqec je eu Namba 15.37-41 euna nijia eu toodoloig. Age halu gothic cadibca agena lotoc sucunna jeloloig. Halu gothic eu Anutna loo je cunug toodoo bahic toodocnu cisdocnu cesuladena. † 23:13-14: Grik jaqec je hilah leihna age je oso tubdu jaqein eu odi: “O loo je iwaladec Farisica, age caja wij faninaadi agena jo heje cedegina. Age odi oodoig age dana amagana quauadi inondoc cecelacca madeginia. Eunu age me hihili coboc dana! Age Anut dana geladec saenna age ameg me qee bahic oqagan. Eunu age batut feigal!” aden. Age Mak 12.40 feiga.

odoubqa age qee odoloin. Age dado madec qa amaga galuc mecca! Age agena sabna galalec nag cedi helegina euqa kamel belucdocobil nona. Eunu age me hihili coboc dana! Age walocca!” aden.

<sup>25</sup> “O loo je iwaladec Farisica, age agena gabinca bohca hibo eu gaid wasacudegina euqa age wawaga dunuhna heje oc kobilca ija didih ecca njia. Eunu age me hihili coboc dana! Age walocca! <sup>26</sup> Hina Farisi, amen galuc mecca. Casac hina gabinca bohca waug dunuh wasacudagale. Odomoc hibo njia euha soidoc migian,” aden.

<sup>27-28</sup> “O loo je iwaladec Farisica, age odi qalqalna meen hatin uqana gelgel age camasac waia senenecna baial joidein cinigwe. Qalqal meen hatin eu gelgel camasac fecnu galeca qa dunuhna cal mec dana tob tefulunuga ceteh gegehinca njia. Eu odiwe ageha dana amagana meciadec eu tutuc odoc fegina qa wawaga dunuhna eu quaecca loo je tefacdoccia njia. Eunu age me hihili coboc dana! Age walocca!” aden.

<sup>29-31</sup> “O loo je iwaladec Farisica, age je hahun madec dana agena qalqal meen hatin cehegina, age dana cajaca ititom agena amege bala me bahic megina. Age odi oodoig madegina, ‘Jajanigeil bilein saen euna ege biloummiqa ege jajanigeil odoin eu ege qee odoun, ege je hahun madec dana aqocomun qee cal moub,’ egina. Eu madecnana age ege dana ebenega je hahun madec dana agena golanagaca eundec agena mel biluquna ec eu camasac megina. Eunu age me hihili coboc dana! Age walocca! <sup>32</sup> Eunu jajanagail age silail gumna o daneceil gemona tawen eu age o daneceil am bena. <sup>33</sup> Age man sononec me qee, age man sononec nag! Anut gesiladeceb eu adi oloqanah jana nucnu cagasogagan?” aden.

<sup>34-35</sup> “Eunu feiga. Dana cajaca ititom cunug mahana bilein eu age golanaga basecdocob age dewenegana hugian. Age wele dana cajaca ititom aqeceil cal mein eu Ebelna golac basecdoc sanijec euna sanan mimei ehi lili Sekaraiana golac basecdoc ihoc len. Sekaraia, uqa Berekiaia melah, age tempel hamol gunna ihanec cabalca gemona qocobil cal men. Wadacdoc eu cunug ititom sihul i dewenegana hugiannu ija je hahun madec danaca, Anutna doc silecca danaca, Anutna je iwaladecca suladecmin ageca loqagan. Eundec age leih aqeceil cal moqagan. Leih na babalecna tuitu aqimeig caqusadecebil caculimeig cal moqagan. Leih age agena cuha jonana qisaadimeig aqati tootoadoqagan. Jobon osona bibilebil ititacadeceb bilusali jobon osona li bibilebil tooadi li ititacadoqagan. <sup>36</sup> Ija mele maadigina, aqeceil cal mein eu uqana ameg me qee oc cunug dana caja qila bilegina i dewenegana hugian,” aden.

*Jisas uqa Jerusalemnu waloc don  
(Luk 13.34-35; 19.41-44)*

<sup>37</sup> Jisas je haun maden, “O Jerusalem, Jerusalem, Anut uqa uqana je hahun madec dana ageca suladecceb lein. Euqa age meennna aqeceil cal mein. Ija saen mati bahic mala anag uqana nag hojonna jahuladigen imei utaadenawne agena dana cajaca gabanimig ahutecnu gale tena, euqa age ijaca hocnu culein. <sup>38-39</sup> Ija maadigina, age ija qila haun qee mectiwain leceb age madoqagan:

‘Dana eu uqa Tibud ijanna hona Anut uqa eeldoiale,’ (Buk Song 118.26)  
odi madimeig mectiuqagan,” en. Eunu Anut uqa agena jobon culdina, odochob agena jo moti heleceb tawigian, dana euna qee biluwain.<sup>‡</sup>

## 24

*Jisas uqa age tempel wagaloqaganu maden  
(Mak 13.1-2; Luk 21.5-6)*

<sup>1</sup> Jisas uqa tempel culimei nunuen uqana malogom uqaca humeig age tempel uqa galeca kobolkobolca cehein taweia eu ihacdencu odoin. <sup>2</sup> Euqa uqa maaden, “Qila age eu cunug feginia. Ija mele maadigina, meen gel ulugedocob meen oso meen oso tatacanna cilehdockee biluia. Cunug wagaleceil mahana tonoqagan,” aden.\*

*Jisas uqa culumen mati caligiannu maden  
(Mak 13.3-13; Luk 21.7-19)*

<sup>3</sup> Jisas uqa hibna Oliw Aluhna bibilen uqana malogom cuhanuc uqaca limeig sisildu madoin, “Aadeb eu odi odigian? ec magaga doqa. Cel gaga odochob fimeb hinana ceseli hoc saen cali hona doqan? Adi odochob fimeb mahamaha bielec saen hedugia odona ec doqan?” doin.

<sup>‡</sup> **23:38-39:** Grik jaqc je hilah leihna age je i qee nijel eu odi: “Anut uqa agena jobon culdina,” en. \* 24:2: Je i je cecelac 5-pela Jisas maaden buk Matjuna nijen eundec 5-peladoc. Je cecelac i 24.2-25.46na nijen. Eu ceteteh eu cit qoc deelna caloqagan eunu madena.

<sup>4-5</sup> Odocob Jisas jejenega hewi maaden, "Matica age ija ijanina mamadi hoqagan, 'Ija Krais, ija dana Anut ugana dana caja cahahaadecnu wele nesili ehuden,'" ogagan. Eu age dana cajaca mati faninadi jic ceja qocna loqagannu dado madoqagan. Eunu oso hu faninadi dado madeceb agena jic ceja qocna lowainnu batut feigale. <sup>6</sup> Age han cadegina ec eunuca han hugian ec eunuca je hutan doqagan. Batut feigale. Ceteh eu cunug odigian. Eunu Cain filicituwain. Euqa qee migian ec madecnu qee nijel. Eu cit qoc qee. <sup>7</sup> Ge, dana hatuhatu age cajimeig cilehdhocobcilehdhocoboqagan. Ödocobil dana sihulsihul age cajimeig cilehdhocobcilehdhocoboqagan. Sabnu cahel biele saen ha hugian, mim ha maha filfilna nigian. <sup>8</sup> Eu odoc cunugqa caja mel basecnu dain donawee odi himec sanan migian," aden.

<sup>9</sup> "Odi odocob age dewenega tudocnu dana ebenegana madecebile eu age aqecebil cal moqagan. Mahamaha cunug agenu age ija ijani heweginha eunu age agenu gemanaga beceb sagagadoqagan. <sup>10</sup> Odi ödocobil mati age ijanu wawaga meleec eundec wawaga lecisca meceb age ob meceb ob meceb i cobimeig sagagdocobsagagdocobi biluqagan. <sup>11</sup> Uhulec je hahun madec dana matica ha camas mimeig age dana cajaca mati faninadi jic ceja qocna loqagannu dado madoqagan. <sup>12</sup> Saen euna Anutna loo je toodoo tutuc madec tonigian. Dana age loo je cilehdudu casisic odadec fulusdocob nalug mec eu dana mati wawagana daigian. <sup>13</sup> Euqa oso uqa waug gagadic mumudi hib cit qoc gadacna caligian eundec Anut cahahaadigian. <sup>14</sup> Anutna culnu me je eu mahamaha cunug qasali maadecebile ihoc lili ninijeb dana cajaca cunug dodobil hib cit qoc deel cali hugian," aden.

*Ihulahal mec ceteh bebesacca caligian*

(Mak 13.14-23; Luk 21.20-24)

<sup>15</sup> Jisas je haun maaden, "Age  
'ihulahal mec ceteh bebesacca'

(Daniel 9.27; 11.31; 12.11)

tempel gunna tataweb foqagan, je hahun madec dana, Daniel, eunu je wele maden eu camas meceb eunu batut feigale," aden. Dana uqa je i sanijina eu uqa je ugana gug doiale. <sup>16</sup> "Saen euna age ceteh eu fimeig dana cajaca age Judia hatuna bilegina age busali aluhnana toboqagan. <sup>17</sup> Oso jo ohis tatacan bielecnu cudunna bilina uqa tonimei ugana edud cedi jo dunuh lecnu cain cisoiaun. <sup>18</sup> Oso cabina bilina eu uqa ugana lotoc cecelac cedecnu jobon cain hoiaun. <sup>19</sup> Saen euna caja waugca coboc, caja mel sim su adeginha eundec walocca bahic biluqagan! <sup>20</sup> Busalec deel eu duan saenca cuha deelcal hoiaunnu Anut inondoigale. <sup>21</sup> Ge, saen euna culumen ben bahic hugian. Gug qoc saen maha ifanennadec hocob qila wele culumen eu odi oso qee calel. Hibna ha culumen eu odi oso haun qee caleiaun. <sup>22</sup> Anut saen i gothic qee mudoubmi dana cajaca cunug age fadaloub. Euqa dana cajaca Anut nesili ceden bilegina agenu saen eu gothic migian," aden.

<sup>23-24</sup> "Saen euna uhulec Kraisca uhulec je hahun madec danaca mati cali humeig age ihofci dana cajaca Anut nesili ceden bilegina euha faninadi jic ceja qocna lecnu dado madoqagan imeig gaga filfilca kobolkobol benbenca odoqagan. Eunu oso maadecebfi, 'Feiga, Krais ihen!' qee, 'Krais ono bilia!' adecebfi wawaga cain meleciaun. <sup>25</sup> Feiga, ceteh qee hoc ninijen ija ceteh eu hugiannu wele maadiga. <sup>26-27</sup> Amel faleec cam tobi becna sao ohis camas mimei iletet cam toni nocna ihoc lenawee Dana Melah uqa cali hocnu saen odi camas migian. Eunu age maadecebifli, 'Krais wadauna<sup>†</sup> bilia,' adecebifli age ono cain nui fowain, odocob 'Krais hamol bilia,' adecebifli age wawaga cain meleciaun," aden.

<sup>28</sup> "Dana cal mec deweg ganac huluec oso ninijen man fululec benben cababac cinigwe age euna ceguluqagan," aden.

*Cit qocna Dana Melah hugian*

(Mak 13.24-27; Luk 21.25-28)

<sup>29</sup> Jisas je haun maaden, "Feiga, saen euna culumen ben eu hedocob  
'cam tu meceb jagel qee fulacdoiaun.'

Odocab malaqa age saonadec casili tonoqagan,

odocab saona gagadic odoc eu caji leceb hocob qeleloqagan," aden. (Aisaia 13.10; 34.4)

<sup>30</sup> "Odocob Dana Melah ugana camas mec gaga saona camas migian. Odocab dana sihunugail cunug mahana bilegina age qada qaqaji biluqagan. Age Dana Melah gagadic odocab kobolkobol benca sao taenna neneb foqagan. <sup>31</sup> Uqa ugana ensel taul ben fuldochca suladeceb age belimeig ugana nesili cedec bilegina eu cunug cedoqagan. Age cam tobi becnadec cedadi ehadi li cam toni nocnadec ha ehadi ahu gabandoqagan," aden.

*Age na dannu doc ogagan*

(Mak 13.28-31; Luk 21.29-33)

† 24:26-27: Age je Matju 3.1na nijia eu feiga.

<sup>32</sup> Jisas je haun maaden, “Age na dan uqana odocnu cisoigale. Uqa haun majocob age wa hoc saen qila sanan mena egina. <sup>33</sup> Odiwe ha age ceteh eu cunug oodob fimeig Dana Melah hugiannu taun gel jic cebecna taweia eigale. <sup>34</sup> Ija mele maadigina, sihul i qila bilegina ceteh qee cali hoc ninijeb qee qee meiaun. <sup>35</sup> Saoca mahaca qee migian euqa ijana je qee qee meiaun,” aden.

*Dana oso ceteh eu cali hugiannu saen doc oso qee bilel  
(Mak 13.32-37; Luk 17.26-30, 34-36)*

<sup>36</sup> Jisas je haun maaden, “Ceteh eu cali hugiannu deelca auaca oso qee dona. Ensel sao jobon ono ha qee dogina. Dana Melahha qee dona. Memige Anut himec dona. <sup>37</sup> Noa bilen saenna dana cajaca bileyinwe Dana Melahna hoc saenna odi ha biluqagan. <sup>38</sup> Wa sil ben qee cajec age sab ji wain ji bibilegin dana caja ocobocabi bibilegin leceb Noa wag benna tobec deelna odi odooin, ageqa qee doloin. <sup>39</sup> Odocob wa sil ben cajimei dana cajaca cunug fadaladen. Eu odiwe dana cajaca ageha odi oodobil Dana Melah uqana deelna hugian. <sup>40</sup> Odocob saen euna dana lecis cabina biluwasan. Oso ehudi beloqagan, oso eu tacewudoqagan. <sup>41</sup> Caja lecis ale wit meenna ibuldudu biluwasan. Oso ehudi beloqagan, oso tacewudoqagan. <sup>42</sup> Age agena Tibud aadeb hugian eu age qee dogina. Eunu amaga cebac bileigale! <sup>43</sup> Euqa ceteh i doiga. Dana jo gug uqa heje dana aadeb hu ijana ceteteh heje ugian eu doialumi uqa us qee nijoub, cebac bibili cagucagdoub. Odimei uqa heje dana culdocab uqana jo qeih qatanimei dunuh qee loub. <sup>44</sup> Age Dana Melah uqa qila hugian qee ec saen euna mele hugian. Eunu age saciadoc susumudi bileigale,” aden.

*Cabi dana meca cabi dana me qeecanu galolo je  
(Luk 12.42-46)*

<sup>45</sup> Jisas je haun maaden, “Cel cabi dana uqa doc meca uqana cabi cofdu cuhadona? Eu oso uqa uqana meca uqana jo cofdoc muden. Uqa cabi dana cunug cofadigian. Agena sab saennana adigian. <sup>46</sup> Cabi dana eu saen uqana meca jobon ceseli humei odi oodob fecidumei uqa ben bahic ceeligion! <sup>47</sup> Ija mele maadigina, uqana meca uqana ceteh cunug cofdugiannu ebenna migian. <sup>48</sup> Euqa cabi dana me qee eu uqadodoc madimei, ‘Ijana meca uqana hocnu deel cecelac njija,’ imei <sup>49</sup> cabi dana hijagul eu uqa aqecnu sanan mamei dana eu cedecab osoben sab jiji wain jiji dalul aqecel cocobil <sup>50</sup> meca eu hibna deel osona hugian. Eu saen cabi dana uqa hugiannu qee cisdoc saen euna hugian ec qee doc ninijeb hugian. <sup>51</sup> Uqana meca eu odi fimei qeti susul faligianu ihoc bahic. Odimei cudun dana Anutnu wawaga qee meleec bileginana cabi dana me qee euna mudigan. Ono age qada qaqaq maimaga kicodudu biluqagan,” aden.

## 25

*Mel aid taula 10-pelanu galolo je*

<sup>1</sup> Jisas je haun maaden, “Saen euna sao cul jobon eu odiwe mel aid taula 10-pela bileyin agena dodo. Dana oso caja haun ocobocabec uqa hugiannu bilen. Mel aid taula eu age agena gowoc cedi li age jicna gulucdumeig ehudi ahoqagannu lein. <sup>2</sup> Mel aid taula 5-pela age dalawan mec, 5-pela age docca. <sup>3</sup> Mel aid taula dalawan mec eu age agena gowoc cedi ahoin qa age mool leih cedimeig qee holoin. <sup>4</sup> Euqa mel aid taula docca age mool agena gumna o danimeig gowocca hewadi ahoin. <sup>5</sup> Dana eu caja haun ocobocabec eu uqa mahuc qee hol. Odocob mel aid taula eu age amaga culumen teceb us nijein,” aden.

<sup>6</sup> “Odocob tu gemo dana oso odi utaeceb doin, ‘Dana eu uqa caja haun ocobocabec eu hona. Age hoiga, ege beli jicna gulucdumeb ehudi ahoqagan,’ en. <sup>7</sup> Mel aid taula eu age cunug cajimeig agena gowoc saciadoin. <sup>8</sup> Mel aid taula dalawan mec eu age mel aid docca eu odi maadein, ‘Egena gowoc cafuligia odona. Agena mool naha cesawigeiga,’ adein. <sup>9</sup> Odocob mel aid taula docca eu jejenega hewi odi maadein, ‘Qeo, ege mool eu egenuca agenuca ihoc qee. Eunu age cois stuana belimeig agedodoc agena fajeiga,’ adein. <sup>10</sup> Odocob mel aid taula dalawan mec 5-pela age mool fajecnu wele bebelegin dana caja haun ocobocabec eu hon. Odocob mel aid taula leih saciadu bileyin age uqaca jo dunuh ocobocabec sab ben lecebil dana age jic cebec menein,” aden.

<sup>11</sup> “Hibna mel aid taula leih age humeig madoin, ‘Tibud, Tibud, hu ege jic cebec hudigaga,’ doin. <sup>12</sup> Euqa uqa jejenega hewi maaden, ‘Ija mele maadigina, ija agenu qee dugina,’ aden.”

<sup>13</sup> Odimei Jisas je oso tubdu maaden, “Age qee dodobil cel deelna cel auana agena Tibud uqa hugian. Eunu amaga cebac bileigale!” aden.

*Cabi dana age meen qaig cofdoinnu galolo je  
(Luk 19.11-27)*

<sup>14</sup> Jisas je haun maaden, "Sao cul jobon eu odiwe nijia. Dana cehewanca oso uqa hatu oso nuigia bili ugana cabi dana utaadecceb hocobil ugana meen qaig age ebenegana men. <sup>15</sup> Uqa cabi dana dumanaganu cisdumei age dumanaga nijen eu odi toodu ugana meen qaig siwiaden. Oso uqa kina 5,000 uten, odimei oso uqa kina 2,000 uten, odimei oso uqa kina 1,000 uten. Uqa odi odimei nuen. <sup>16</sup> Nueceb dana uqa kina 5,000 on eu mahuc limei idadoc cabi megameg meceb kina 5,000 haun oso umei Ben ugana meen qaig euca gabandon. <sup>17</sup> Eu odiha dana kina 2,000 on eu uqa cabi ocna kina 2,000 haun ocob kina 4,000 men. <sup>18</sup> Euqa dana kina 1,000 on eu uqa nuimei maha heel hunimei ugana Bennna meen qaig jahunen," aden.

<sup>19</sup> "Saen meca giieceb dana ben uqa humei ugana cabi dana meen qaig aden eu agena cabi oc eunu togodoin. <sup>20</sup> Odi odimeig dana kina 5,000 on eu uqa humei dana ben madon, 'Ben fagale, hina kina 5,000 item. Ija cabi ocna kina 5,000 haun oso om ihen,' don. <sup>21</sup> Odocob ugana Ben madon, 'Cois, hina cabi dana megameg mec me bahic! Ija nag ebenna mem eu hina cofdu cuhadumeg cabi megameg mem. Ija mati bahic ebenna mihigen. Ceeli bilec hinana Ben uqa saciadon eu ocnu ijana jona lagale,' don," aden.

<sup>22</sup> "Odocob dana kina 2,000 on euha humei ugana Ben madon, 'Ben, ija hinanu hina dana gagadic, hina cehelo qee cehec euna limig aig comogona, cabina hina sab qee cehelem euna li cedi cili jagana eu ija dom. <sup>23</sup> Ija hina cucuihimig li hinana meen qaig mahana jahunem. Faga, hinana meen qaig ihen. Haun ogale,' don," aden.

<sup>24</sup> "Odocob dana kina 1,000 on eu uqa humei ugana Ben madon, 'Ben, ija hinanu hina dana gagadic, hina cehelo qee cehec euna limig aig comogona, cabina hina sab qee cehelem euna li cedi cili jagana eu ija dom. <sup>25</sup> Ija hina cucuihimig li hinana meen qaig mahana jahunem. Faga, hinana meen qaig ihen. Haun ogale,' don," aden.

<sup>26</sup> "Odocob ugana Ben madon, 'Hina cabi dana me qee, hina cabi ol! Ija cehelo qee cehelem euna limig aig comigina, ija cabi qee cehelem euna limig casili cili jigina eu hina dom. <sup>27</sup> Eu melefi eunu hina ijana meen qaig eu qaig mec jona moum eu nag odi meca moubum qila humig ijanaca nag haun sabijecca oum,' don. <sup>28</sup> Uqa maaden, 'Ugana kina 1,000 cawaldumeig ugana kina 10,000 niju uteigale,' aden. <sup>29</sup> Uqa maaden, 'Ge, oso ugana ceteteh nijia eu utecebil mati bahic ugana biligian. Euqa oso ugana cetehca qee bilina eu Anut uqa ugana nag nijia eu cawalduigan. <sup>30</sup> Cabi dana caunca qee eu helecebil jobon hahagum nui tu gagatuccana biligian. Ono age qada qaqaji maimaga kicodudu biluqagan,' en," aden.

#### *Dana Melah uqa dana cajaca cunug ege isi gesilgimei ameg wadacgigion*

<sup>31</sup> Jisas je haun maaden, "Dana Melah uqa isi kobolkobolca ugana ensel cunugca gami toni nimeig uqa ugana king bilec cabal kobolkobolca euna biligian. <sup>32</sup> Dana cajaca mahamahadec age cunug hu ceguli uqa amegna tawoqagan. Sipsip cofadec uqa sipsip mecmec amnadeq qagu madenawé ugaha cunug odi qagu madigian. <sup>33</sup> Odimei uqa sipsip eundec eben meulana isec madigian. Euqa uqa mecmec eundec eben ansena isec madigian. <sup>34-36</sup> King uqa odi odadimei dana cajaca ititom age eben meulana isec tawegin a eundec maadigian, 'Age ija wen teten biligian sab itein. Ija wa gab teten biligian wa itein. Ija jag biligian ehiti bilec cudun itein. Ija bical biligian age lotoc taqitein. Ija hagca biligian age hu soatein. Ija gihadoc jona biligian age hu mecitein. Eunu Mei eeladen age hoiga, Anut uqa maha gug men saen euna ugana cul agenu saciadon eu mugumuga men qila nijia eu oiga,' adigian," aden.

<sup>37</sup> "Uqa odi maadeceb dana cajaca ititom age madoqagan, 'O Tibud, ganih wen hehen mecihimeb sab ihom? Ganih wa gab hehen mecihimeb wa ihom? <sup>38</sup> Ganih jag bibilegen mecihimeb ehihom? Ganih bical bibilegen mecihimeb lotoc taqihom? <sup>39</sup> Ganih hagca bibilegenca gihadoc jona bibilegenca li mecihom?' doqagan," aden.

<sup>40</sup> "Odi madocobil king jejenega hewi maadigian, 'Ija mele maadigina, age ija cotiel i age ijanagaca qee odadein eu odi age ijaha oditein,' adigian," aden.

<sup>41-43</sup> "Odi maadimei dana cajaca age eben ansena isec tawegin a eundec odi maadigian, 'Age ija wen teten biligian sab qee itelein. Ija wa gab teten biligian wa qee itelein. Ija jag biligian qee ehitelein. Ija bical biligian lotoc qee taqitelein. Ija hagca biligianca gihadoc jona biligianca qee hu mecitein. Eunu Anut geladen age cucult ja cijeceb catanena euna nui bileiga. Eu Setennua ugana enseluca saciadon nijia,' adigian," aden.

<sup>44</sup> "Odi maadeceb madoqagan, 'O Tibud, ganih wenca, wa gabca, jag bibilegenca, bical bibilegenca, hagca bibilegenca, gihadoc jona bibilegenca mecihimeb qee cewel uholom?' doqagan," aden.

<sup>45</sup> "Odi madocobil jejenega hewi maadigian, 'Ija mele maadigina, age cotiel i age ijanagaca qee eundec qee odadein eu odi ijaha qee oditein,' adigian. <sup>46</sup> Odi maadeceb

dana cajaca eundec age dain adeceb catanec euna nui gaid biluqagan. Euqa dana cajaca ititom eu age cebac bilec catanec euna li gaid biluqagan,” aden.

## 26

*Juda dana ben age Jisas qocnu togodoin  
(Mak 14.1-2; Luk 22.1-2; Jon 11.45-53)*

<sup>1</sup> Jisas uqa je eu cunug maadi hedumei uqana malogom maaden, <sup>2</sup> “Eledec Pasowa Sab Jec Ben Deel hugian eu age dogina.” <sup>3</sup> Deel euna age Dana Melah Juda dana qee eundec ebenegana mudecebile age uqa na babalecnna tuitu qumeig caqusecebile caculimei cal migian,” aden.

<sup>3</sup> Saen euna ihanec dana benbenca Juda agena matuca age ihanec dana agena ilo, ijan Kaiafas, uqana jona cegulimeig <sup>4</sup> age Jisasnu qaqqahani jahuni hewi qocnu jic oso wali feqan imeig togodoin. <sup>5</sup> Euqa age madein, “Dana caji uqanu mimi ege cilehgowainnu Pasowa Sab Jec Ben cegulecnna cain odoquaun,” ein.

*Caja oso Jisas ilona mool dedeman me bahic joiden  
(Mak 14.3-9; Jon 12.1-8)*

<sup>6</sup> Jisas uqa Betani jobon ono Saimonna jona bilen. Saimon eu uqa wele deweg lepra hag heweceb coboloi. <sup>7</sup> Age ono sab jiji bibilegin caja oso meen gum eu mool dedeman me bahic fajecnu qaig ben bahic nijen eu ahumei mool eu Jisas ilona basecdon. <sup>8-9</sup> Euqa Jisasna malogom age eu fimeig qee gale adel, eunu gemanaga beceb madein, “Mool eu meen qaig ben bahicna idadoubmi meen qaig eu dana sawen bilec eundec siwiadoub eu me. Eunu eu meen qaig cusdoc eetanu odona?” ein.

<sup>10</sup> Jisas uqa malogom agena je dumei maaden, “Uqa me bahic oditia. Age eetanu caja eunu je madegina? <sup>11</sup> Ge, age gemona dana sawen bilec eundec gaid biluqagan. Ijaqa gaid age gami qee biluqaun. <sup>12</sup> Mool ilomina basecdoria euna uqa ija deweni heelna ciscenu saciadoia. <sup>13</sup> Ija mele maadigina, dana age me je maha cunug anaana qasali maadi cobimeig age caja eu oditia eu uqanu cisdooqagannu saadoqagan,” aden.

*Judas uqa Jisas ihanec dana benben ebenegana mudigiannu uh men  
(Mak 14.10-11; Luk 22.3-6)*

<sup>14</sup> Odocob malogom 12-pela eu gemodec oso, uqa ijan Judas Iskariot, uqa ihanec dana benben cemenegana limei maaden, <sup>15</sup> “Ija Jisas age ebenegana mudecemin eeta oso ituqagan?” aden. Odocob age uqa meen qaig silwana mudec 30 utein.<sup>†</sup> <sup>16</sup> Odocobil saen euna bahic Judas uqa Jisas dewegnu ob mimei age ebenegana mudigiannu jic oso walen.

*Jisas uqana malogomca gami sab jein  
(Mak 14.12-21; Luk 22.7-14, 21-23; Jon 13.21-30)*

<sup>17</sup> Odocob Pasowa ja qoc bred jisca qee jecnu uqana deel gun cali hon. Jisas uqana malogom uqaca humeig sisildudu madoin, “Ege ana hinaca Pasowa sab jegannu saciadcnu gale hena?” doin. <sup>18</sup> Odocob uqa jejenega hewi maaden, “Age taun benna limeig dana eu je madoiga, ‘Iwalgec maheia, ‘Ijana saen cali hoia. Ija ijana malogom gami Pasowa ja qoc hinana jona jegan,’ heia, ‘doiga,’ aden. <sup>19</sup> Odocob malogom belimeig Jisas jejeig toodoo. Age Pasowa ja qoc saciadcuin.

<sup>20</sup> Odocobil witic meceb Jisas uqana malogom 12-pela gami sab jec cabalna bielein. <sup>21</sup> Sab jiji bibileig Jisas maaden, “Ija mele maadigina, age oso ija cad ebenegana mitigian,” aden. <sup>22</sup> Odocob age je eu dumeig waloc adeceb abesabes sisildudu madoin, “Tibud, hina ija ec madaganafio?” doin. <sup>23</sup> Odocobil jejenega hewi maaden, “Oso uqa eben ija gami sab wehuc bohna tanoqa eu uqa ija cad ebenegana mitigian. <sup>24</sup> Dana Melah uqa wele Anutna jaqec je jaqen odi toodugian eunu je eu toodugian qa dana uqa ija cad ebenegana mitigian eu walocca biliale! Dana eu anag qee basoubmi eu me bahic niijoub,” aden. <sup>25</sup> Odocob Judas, uqa Jisas cad ebenegana muden, eu Jisas madon, “Meca, hina ija ec madaganafio?” don. Odocob Jisas madon, “Hina madaga odi,” don.

*Jisas uqa bred wainca malogom siwiadeceb jein  
(Mak 14.22-26; Luk 22.15-20; 1 Korin 11.23-25)*

<sup>26</sup> Age sab jejeig Jisas bred oso umei Anut hetaga dumei feni malogom siwiadimei maaden, “Eu ija deweni. U jeiga,” aden. <sup>27-28</sup> Odimei uqa wain gabin umei Anut hetaga dumei malogom adimei maaden, “Wain gabin i ija golani eu Anutna bal cehec je haun. Ija Anut uqa dana cajaca mati agena silail casagiadiigannu golani basecdugen. Age cunug

\* <sup>26:2:</sup> Age je Mak 14.1na njia eu feiga. † <sup>26:15:</sup> Meen qaig i silwana mudec ege qila qee foqona. Eu ceteh ben fajecnu ihoc. Cabi dana uqa jagel 5-pelafo, 6-pelafo cabi uefi uqa meen qaig i ugian. Age Matju 27.9-10 feiga.

wain eu jeiga.<sup>29</sup> Ija mele maadigina, ija wain qee jec li hibna ija age gami Meina culna haun jegan,” aden.<sup>30</sup> Odocob age binan sulec due silimeig age taun ben cuculi Oliw Aluhna belein.

*Jisas uqa Pita uqanu qee sasac qugian ec maden  
(Mak 14.27-31; Luk 22.31-34; Jon 13.36-38)*

<sup>31</sup> Odocob Jisas uqa malogom maaden, “Anutna jaqec je oso nijia eu ihen:  
Ija sipsip cofadec dana qocomin

sipsip cunug bilisadu beloqagan’ ec nijia.  
(*Sekaraia 13.7*)  
Eunu witic ina ceteh ijaca caleceb age cunug ijanu wawaga meleec tonigian.<sup>32</sup> Euqa hibna Anut uqa tuliteeb ija ceseli cajimiq aquniadi Galili ono nuigen,” aden.<sup>33</sup> Odocob Pita madon, “Leih cunug age ceteh hinaca caleceb fimeig hinanu wawaga meleec tonigianfo ija qee dugina, ijaqa qee bahic qee hinanu wawi meleec toneiaun,” don.<sup>34</sup> Odocob Jisas uqa Pita jejeg hewi madon, “Ija mele mahigina, witic ina mala manahal qee qoc ninijeb hina madegan, ‘Uqanu qee dugina,’ i cijeddogan,” don.<sup>35</sup> Odocob Pita madon, “Ija hinaca cal mewan eu nijecebf ija hinanu qee qee sasac qugaun,” don. Odocob malogom cunugha je odi madein.

*Jisas uqa Getsemani cabina Anut inondon  
(Mak 14.32-42; Luk 22.39-46)*

<sup>36</sup> Jisas uqana malogomca cocobi li cudun oso, Getsemani egina, euna calimeig maaden, “Age ene bibilebil ija eu usec limig Anut inondudu biligen,” aden.<sup>37</sup> Odimei uqa Pitaca Sebedi melahul lec исца ehadeceb limeig Jisas waug me qee meceb duman culeceb <sup>38</sup> malogom maaden, “Dumani culia, cal mecnu odi oditina. Age ene cebac bibili ija gami mecioqale,” aden.<sup>39</sup> Odi maadimei uqa nag odi qisacadi nuimei uqa ni mahuli ola maha mecidu njimei Memeg inondon, “Mei, gabin i ija wooltecnu jic nijecebf odocom woolti nuiale. Ija madigina eu qee odigaunqa hina madagana eu toodoo odigen,” don.

<sup>40</sup> Odimei uqa malogomca limei age us ninijegin feciadimei Pita madon, “Age eundec oso ijaca aua osol cebac bilecnu uen qee njelfo?”<sup>41</sup> Cebac bibili inondoigale, age temadecna lowainnu. Wawaga odigen ena euqua dewenega gagadic odocca qee,” don.

<sup>42</sup> Odi madumei uqa lecisdu ceseli li Memeg inondon, “Mei, gabin i woolti nuecnu jic qee nijecebf ija jigen, eu hina madagana eu ihoc ligian,” don.<sup>43</sup> Odimei caji haun ceseli malogom cemenega limei age us ninijegin feciadene. Ge, age amaga mumugcanu eu meciib bilecwe qee.<sup>44</sup> Uqa cuculadi haun ceseli li Memeg wele madon odi cijeddu inondon.

<sup>45</sup> Uqa malogomca ceseli humei maaden, “Age gaid jaen mumudi bileig us nijeigafo? Feiga, saen wele hoia! Age qila Dana Melah silail dana ebenegana muduqagan.<sup>46</sup> Cajeceil beloga. Feiga, dana ija deweninu balijigian eu wele hona,” aden.

*Judas uqa Jisas uqana cad ebenegana muden  
(Mak 14.43-50; Luk 22.47-53; Jon 18.3-12)*

<sup>47</sup> Uqana malogom maaaden Judas, malogom 12-pela eundec oso, uqa hon. Uqa gami dana mati bahic age han siginca han galabca hewi hoin. Ihane dana benbenca Juda agena matuca age suladeceb hoin.<sup>48</sup> Aria, dana uqa Jisas uqana cad ebenegana mudigianu maden eu uqa wele han dananu gaga oso mecnu maaden, “Dana ija cotdugen eu uqa heweiga,” aden.<sup>49</sup> Odocob Judas uqa mahuc Jisasca limei madon, “O Meca, feele!” don.<sup>‡</sup> Odimei uqa Jisas cordon.<sup>50</sup> Odocob Jisas madon, “Ijana danah, hina eeta odocnu hoga eu mahuc odoga,” don.<sup>§</sup> Odocob han dana age humeig Jisas eben gagadic hewein.

<sup>51</sup> Odocobil dana oso Jisasca gami tawein eu eben nocob han sigin umei ihanec dana ilona cabi dana qelimeci dahig cagon.<sup>52</sup> Odocob Jisas uqa madon, “Hinana han sigin uqana cudunna haun tacaga. Ge, cunug age han siginna cadegina eundec han siginna aqecebil cal moqagan.”<sup>53</sup> Ija ija Mei ninidocomin uqa mahuc ensel han am 12-pela wooldoc suladeceb humeig cesultecnu ihoc nijia eu qee dogonafo?<sup>54</sup> Euqa ija odi odocominfi jaqec je eu Anutna jaqec jena nijia eu ceteh i ihoc ligiannu ec maden eu adi ihoc ligian?” don.

<sup>55</sup> Saen euna Jisas dana am ben maaden, “Eetanu age han siginca han galabca heje oc dana cinigwe ija hewituqagannu hoiga? Ija deel cunugnana tempelna dana cajaca iwalaadi bilolig. Odocob age ija hewitecnu oso qee odoloim.<sup>56</sup> Euqa Anutna je hahun madec dana agena jaqec je ihoc ligiannu ceteh i cunug calen,” aden.

Odi maadeceb uqana malogom cunug qisacdu busali belein.

*Age Jisas gesildoin  
(Mak 14.53-65; Luk 22.54-55, 63-71; Jon 18.13-14, 19-24)*

<sup>‡ 26:49:</sup> Grik jaqec je hilah leihna age je fil oso jaqein eu odi: “O Iwalgec, feele!” don. <sup>§ 26:50:</sup> Grik jaqec je hilah leihna age je fil oso jaqein eu odi: “Ijana danah, hina eetanu ene hoga?” don.

<sup>57</sup> Odocob dana age Jisas hewein eu age ehudi ihanec dana agena ilo, Kaiafasna gunna mudein. Ono Juda agena loo je iwaladecca matuca cegulein. <sup>58</sup> Euqa Pita Jisas tabag hehewi toodu ihanec dana ilo uqana jo gel dunuh len. Uqa gel dunuh limei tempel cofdoc dana gami bileen. Uqa Jisas cel ceteh odudecebile figiannu cisdon.

<sup>59</sup> Aria, ihanec dana benbenca, Juda dana ben cunug age ceguleinca age Jisas dewegnu ob mec je amagana fec dahinigana doc eundec je walein. Oso camas meceb eu toodu geldocomun cal migian ein. <sup>60</sup> Odocobil dana mati bahic dewegnu ob mecnu cajimeig odi oodon fom, odi madamen dom, uhlili madein. Euqa age ob mec je oso qee guludoloin. Age odi odocobil dana lecis cajimesi <sup>61</sup> madesin, “Dana eu maden, ‘Ija Anutna tempel wagalimig deel cijedna haun cehecnu ihoc,’ en,” esin.

<sup>62</sup> Odocobil ihanec dana agena ilo tawimei Jisas madon, “Dana lecis i hina dewennu cel je balijesina? Hina jejenela je oso qee hewi madaganafa?” don. <sup>63</sup> Euqa Jisas uqa jejeg qee hewel. Odocob ihanec dana ilo uqa Jisas sisildu madon, “Ija Anut cebac billecca ijanna mahigina, hina Anutna Kraisfo? Hina Anut Melahfo? ec Anut amegna madaga doqa,” don.

<sup>64</sup> Odocob Jisas madon, “Hina madagana odi himec. Ijaqa maadigina, hibna age Dana Melah uqa Anut gagadic odocca eben meulana isec bibileb sao taenna hohob foqagan,” don. <sup>65</sup> Odocob ihanec dana ilo uqana lotoc hewi balahadumei maaden, “Uqa Anut lelandoia. Ege eetanu dewegnu je oso waleqan? Uqa Anut lelandoia eu age cunug dah meiga. <sup>66</sup> Age eeta madegin?” aden. Odocob age madein, “Uqa cal migiannu deweg je nijia,” ein.

<sup>67</sup> Age odi madecebile leih age Jisas ola cin qumeig deweg tudioin. Leih siho qaqahi <sup>68</sup> madoin, “Hina Anutna Krais. Eunu je hahun magaga! In dewen tudioia magaga doqa?” doin.

*Pita Jisasna malogom biley qee sasac qon*

(Mak 14.66-72; Luk 22.56-62; Jon 18.15-18, 25-27)

<sup>69</sup> Age Jisas geldodogin Pita uqa maha gumu bilen. Bibilen cabi mel aid oso cemenug humei madon, “Hinaha Jisas Galilidecca bileyin,” don. <sup>70</sup> Odocob Pita cunug amagana qee sasac qu mel aid madon, “Hina madagana eu ija dadanigina,” don. <sup>71</sup> Uqa gesacna jo gel jic cebecna isec leceb cabi mel aid oso ono mecidumei uqa ono tawein eundec maaden, “Dana i uqaha Jisas Nasarettdecca bileyin,” aden. <sup>72</sup> Pitaqa haun je cagocna qee sasac qu madon, “Anut amegna madigina ija dana eu qee dugina,” don. <sup>73</sup> Saen nag gieceb ono tawein eundec age hu Pita madoin, “Mele bahic hinaha eundec oso. Hinana jejen eu hina Galilidec camas mihina,” doin. <sup>74</sup> Odocob agena kobolna uqa mele bahic mamadi maaden, “Ija dana eu qee dugina,” aden. Madeceb mala manahal qon. <sup>75</sup> Odocob Pita Jisas wele madon, “Mala manahal qee qoc ninijeh hina ijana biligina eu qee sasac qu cijeddogan,” don eunu dahig fogo docob jo eu cuculi nui ben bahic qajen.

## 27

*Age Jisas ehudi li Pailat amegna mudein*

(Mak 15.1; Luk 23.1-2; Jon 18.28-32)

<sup>1</sup> Walag daneceb ihanec dana benbenca Juda agena matuca cunug gabandumeig age Jisas qocobil cal migiannu je togodoin. <sup>2</sup> Togodu hedumeig age Jisas eben libimeig ehudi limeig Rom gabman dana matu, Pailat, ebenna mudein.\*

*Judas fadalen*

(Aposel 1.18-19)

<sup>3</sup> Judas uqa Jisas dewegnu ob men eu uqa age Jisas qoqagannu geldocobil dumei uqa Jisasnu ob menuu deweg cijeceb waug tucien. Uqa meen qaig silwana mudec 30 ahu ihanec dana benbenca Juda agena matuca eundec ceseli adimei <sup>4</sup> maaden, “Ija silail migan. Ija dana deweg jeca qee uqanu ob migan,” aden. Odocob age uqa jejeg hewi madoin, “Eu eguna je qee. Eu hinana,” doin. <sup>5</sup> Odocobil Judas uqa tempelna meen qaig silwana mudec 30 eu heleceb nocob tempel cuculi nuimei uqa be qagi caculimei cal men.

<sup>6</sup> Euqa ihanec dana benben age meen qaig silwana mudec 30 eu cedimeig togodudu madein, “Meen qaig silwana mudec 30 eu golacca, eu dana qonnu fajec eunu ege tempel cabinu meen qaig gabandocnu eu cois qee,” ein. <sup>7</sup> Age togodu wawaga osol meceb nuimeig meen qaig silwana mudec 30 euna hal qagec dana uqana maha fajein. Maha eu dana ono jag bibili cal mein age heel cisadecnu qalqal biligliannu eu fajein. <sup>8</sup> Eunu

\* <sup>27:2:</sup> Pailat uqa Rom dana. Rom age uqa Juda agena cofadec dana ben mudein. Juda age Jisas qocobil cal mecnu ihoc qee nijel. Eu Rom himec age dana oso qocobil cal migiannu eu madecnu ihoc. Eunu Juda age Jisas ehudi limeig Pailat ebenna mudein.

maha eu ijan Golac Maha qoin. Eu qila ageha odi madegina.<sup>†</sup> <sup>9</sup> Eu odocna, je hahun madec dana Jeremaia, je maden eu ihoc len. Jaqec je eu wele odi madena:

“Age meen qaig silwana mudec 30 oin.

Eu Isrel dana caja age dana eu fajudecnu ameg odi gadac mein.

<sup>10</sup> Meen qaig euna age hal qagec dana uqana maha oso fajein.

Tibud maten odi odoin,” ena.

(*Sekaraia 11.12-13; Jeremaia 19.1-13; 32.6-9*)

*“Hina Juda agena kingfo?”*

(*Mak 15.2-5; Luk 23.3-5; Jon 18.33-38*)

<sup>11</sup> Jisas uqa gabman dana matu amegna tatawen gabman dana matu sisildu madon, “Juda agena king eu hinafa?” don. Odocob Jisas jejeg hewi madon, “Hina madagana eu odi himec,” don. <sup>12</sup> Euqa ihanec dana benbenca Juda agena matuca age dewegnu je um qu mamadegin jejenega qee hewel. <sup>13</sup> Odocob Pailat uqa Jisas madon, “Age dewennu je mati madegina eu qee dah melemfo?” don. <sup>14</sup> Euqa Jisas jejeg qee hewel. Uqa dewegnu je madec osol dihnu ha je qee wadacdu madel. Eunu gabman dana matu eu geh cisdon.

*Pailat uqa age Jisas na babalecna tuitu qoqagannu maaden*

(*Mak 15.6-15; Luk 23.13-25; Jon 18.39-19.16*)

<sup>15</sup> Pailat uqa Juda agena Pasowa Sab Jacenna gaid gihacdoc dana oso Juda dana age ceguli togodudu ijan madecebil uqa besituadoloi. <sup>16</sup> Saen euna dana oso gihacdoc jona bilen eu uqa me qee odocnu binanca eu ijan Barabas. <sup>17-18</sup> Pailat uqa Juda dana ben age Jisasnu macumac mimi uqa ebenna mudein eu don. Eunu Juda dana age ceguli bibilegin Pailat sisiladi maaden, “Qila in besituadigennu madegina, Barabasfo, qee Jisasfo age uqanu Krais egina?” aden. <sup>19</sup> Pailat uqa odi gesiladec cabalna bibilen uqa aideg je odi suldochob hu madoin, “Ija witic i bebelecna uqa ola codigannu culumen ben tena. Eunu hina dana ititon i ceteh oso cain odudugaun,” doin.

<sup>20</sup> Ihanec dana benbenca Juda agena matuca age Juda dana cajaca wawaga hunecebile age Pailat Barabas besitugagale, Jisas na babalecna qogale doqagannu jajahiladi hedoin. <sup>21</sup> Odocobil gabman dana matu haun hu maaden, “Dana lecis bilesina eu in besituadigen?” aden. Odocob age madoin, “Barabas,” doin. <sup>22</sup> Pailat sisiladen, “Ija Jisas age uqanu Krais egina eu eeta odudigen?” aden. Odocob age madoin, “Na babalecna tuitu qoga!” doin. <sup>23</sup> Odocobil uqa maaden, “Eetanu? Uqa cel qisol mec odon?” aden. Euqa age haun utai madoin, “Na babalecna tuitu qoga!” doin.

<sup>24</sup> Pailat uqa ija cilehadecwe qee age hihibanaga teceb figina imei uqa boh oso umei wa o danimei uqa age amagana eben cucusi maaden, “Ija dana i deweg jeca qee eu uqa golac ebenina qee fagdoiaun. Eu agena himec,” aden. <sup>25</sup> Odocob dana cajaca cunug age jejeg hewi madoin, “Uqa golac ege dewenigena ege begawigeil dewenegana ha gad hoiale,” doin. <sup>26</sup> Odocob Pailat uqa Barabas besiaden. Odimei uqa han dana maadeceb age Jisas ehudimeig qisadoin. Qisadu hedocobil uqa Jisas na babalecna tuitu qumeig caqusecebile caculimei cal necnu han dana ebenegana muden.

*Han dana age Jisas lelandoin*

(*Mak 15.16-20; Jon 19.2-3*)

<sup>27</sup> Gabman dana matu uqana han dana age Jisas ehudimeig jo gabman dana ben bilia euna lein. Age gabman dana ben uqana cudunna mudein. Odimeig age han dana am cunug utaadecbil humeig osoben cegulein. <sup>28</sup> Age lotoc hulitumeig lotoc golca oso eu king agena bala cinigwe tacitoin. <sup>29</sup> Odimeig age halu dud lalic qumeig king katakat mudimeig guludutoin. Odimeig age sih oso ebanna mimeig amegna gob cehimeig lelandudu madoin, “O Juda agena king, feele!” doin.<sup>‡</sup> <sup>30</sup> Odimeig age cin qudimeig sih u ilo qisadoin. <sup>31</sup> Age lelandu hedumeig lotoc golca hulitumeig uqana lotoc haun tacitoin. Odimeig age ehudi li na babalecna tuitu qocnu belein.

*Age Jisas na babalecna tuitu qoin*

(*Mak 15.21-32; Luk 23.26-43; Jon 19.17-27*)

<sup>32</sup> Age cali hohoig han dana age Sairinidec dana oso fein, uqa ijan Saimon. Age madocobil Jisasna na babalec gahidon. <sup>33</sup> Belimeig age cudun, ijan “Golgota,”<sup>§</sup> ono calein. Golgota ijan gug eu “Ilo gatic cudun.” <sup>34</sup> Age wain ceteh gulihinca gabandoc eu jecnu Jisas ueitein. Euqa uqa ji fimei eu culen. <sup>35</sup> Age Jisas na babalecna tuitu qumeig caqusecebile

† 27:8: Je i “qila” eu ege qila buk i sanijuquna eunu qee madena. Eu Matju uqana buk jaqen saen eunu madena.

‡ 27:29: Han dana age Jisas lelandocnu gale aden, eunu age kingwe tacudein. Saen euna king age lotoc golca, king katakatca bala hewoloig. Odimeig age king cabalna bibileig age kom hewoloig. § 27:33: “Golgota” eu Aram je.

caculeceb uqana lotoc agedodoc satu udodoig siwi cedein.<sup>\*\*</sup> <sup>36</sup> Odimeig age bilimeig ono mecidudu cofdoin. <sup>37</sup> Age dewegnu je ob mein uqa ilo ohisna jaqi qoin, "Dana i Jisas, uqa Juda agena King," ec jaqein.

<sup>38</sup> Age Jisas cemenug heje oc dana lecis na babalecna tuitu aqalimeig caquasecebil caculesin. Oso eben meulana isec caculen, oso eben ansena isec caculen. <sup>39</sup> Odocob dana cajaca age hu li i bileig age lelandudu ilomoga culidudu <sup>40</sup> madein, "Hina tempel wagalimig deel cijed hedocob haun cehigen em, hinadodoc cahahadoga! Hina Anut Melahfi na babalecnadec toni naga," ein. <sup>41</sup> Ihanc Dana benbenca, loo iwaladecca, Juda agena matuca ageha lelandudu madein, <sup>42</sup> "Uqa leih cahahaaden euqa uqadodoc cahahadocnu ihoc qee. Uqa Isrel agena King. Eunu uqa qila na babalecnadec toni neiale. Uqa odi odocobfi ege uqanu wawige meleigian. <sup>43</sup> Uqa Anutnu waug meleena. Uqa maden, 'Ija Anut Melah,' en. Eunu Anut uqanu gale docobfi Anut qila besitoiale," ein. <sup>44</sup> Odocob heje dana ale uqa gami na babalecna tuitu aqalein eu aleha odi lelandosin.

*Jisas cal men*

(Mak 15.33-41; Luk 23.44-49; Jon 19.28-30)

<sup>45</sup> Odocob cam gemo ceheceb cam tu qocob hatu cunug gagatuc menen, ninjen li 3 kilok wesu. <sup>46</sup> Odocob 3 kilok odi Jisas co suli u utai maden, "Eli, Eli, lama sabaktani?"<sup>††</sup> en. Je uqana gug eu odi:

"Ijana Anut, ijana Anut, eetanu qisactaga?" en.

(Buk Song 22.1)

<sup>47</sup> Dana leih age ono talildu tawein je eu dah mimeig madein, "Dana eu uqa Ilaija<sup>‡‡</sup> utadona," ein. <sup>48</sup> Age oso mahuc guguli gege oso umei wain gulihinca tanumei balac oso euna gihadumei suladu ehi li jecnu cona men. <sup>49</sup> Euqa leih madein, "Sumuduga. Culecem ege uqa Ilaija humei cahahadugianfo, qeefo ec feqan," ein.<sup>§§</sup> <sup>50</sup> Odocobil Jisas haun co suli u utaimei kis umei cal men.

<sup>51</sup> Odocob lotoc ben tempel hamol gunna caqusec tawoloi eu ohisdec baladu ni mahana cali lecisdon. Odocob mim neceb meen ulugedon. <sup>52</sup> Qalqal meen hatin eu hudeceb Anutna dana cajaca mati bahic wele cal mein qila i age cajein. <sup>53</sup> Age qalqal culimeig hibna Jisas ceseli cajeceb age Anutna jobon gun dunuhlein. Dana mati bahic age meciadein. <sup>54</sup> Odocob Rom agena han ilo dana 100 cofadecca age uqaca tatawi Jisas cofdoin eu age mim neceb ceteh caleceb eu fimeig cumuni madein, "Mele bahic, dana i uqa Anut Melah!" ein.

<sup>55</sup> Caja matiha onoca tatawi fein. Age Jisas cesuldudu Galilidec toodu cocobi hoin. <sup>56</sup> Age gemodec eu Maria Makdaladecca, Maria uqa Jems Josefca analaca, Sebedi melahul lecis analaca.

*Age Jisas deweg ganac hatin aluh qeihna hunein euna mudein*

(Mak 15.42-47; Luk 23.50-55; Jon 19.38-42)

<sup>57</sup> Cam toni nonon dana cehewanca oso, ijan Josef, uqa Juda agena jobon nag Arimatiaced, uqa hon. Uqa Jisasna malogom oso. <sup>58</sup> Uqa Pailat amegna limei Jisas deweg ganac ugiannu sisildon. Odocob uqa maadeceb age Jisas deweg utein. <sup>59</sup> Odocob Josef uqa Jisas deweg ganac umei lotoc senenec soidoc jeulden. <sup>60</sup> Odimei uqa uqana meen hatin aluh qeih hunein euna mudein. Heel eu dana oso qee mudec Jisas casac mudein. Uqa meen koldoc ben oso olodocob eu hatin jic cebec cufa qon. Odimei nuen. <sup>61</sup> Maria Makdaladecca Maria osoca ale hatin amegna onoca bilesin.

*Han dana age qalqal hatin cofdoin*

<sup>62</sup> Deel ceteh saciadoc hedocob deel osona ihanec dana benbenca Farisica age li Pailat fein.<sup>\*\*\*</sup> <sup>63</sup> Age odi madoin, "Dana Ben, ege je oso odi cisdoqona, uhulec dana i saen uqa cebac bilec je oso maden. Uqa odi maden, 'Hibna deel cijed hedocob ceseli cajigen,' en. <sup>64</sup> Eunu hina gad madecem age cois limeig deel cijed ihoc ligiannu qalqal hatin eu cufa qu cuhadoqagan. Qee dodomun uqana malogom age humeig deweg ganac heje u belimeig age dana cajaca uhulec je odi maadowain, 'Uqa cal mecnadec ceseli cajein,' adowain. Eu agena uhulec je haun eu, eu uhulec je wele maden eu wooldocdain," doin. <sup>65</sup> Odocobil Pailat odi maaden, "Age han dana cedi hewi belimeig maadeceb il qalqal hatin eu cofdu

\*\* 27:35: Grik jaqec je hilah leihna je oso fil njia, eu odi: Age Jisas na babalecna tuitu qumeig caquasecebil caculen. Odocob je hahan madec dana maden "Age ijana lotoc agedodoc satu udodoig siwi cedein," en (Buk Song 22.18 eu ihoc ligiannu uqana lotoc agedodoc satu udodoig siwi cedein). †† 27:46: Je madec i Aram je, age Galili hatuna madoloig, eu Jisas uqana je madec gug bahic. Grik jaqec je hilah leihna age nag fil jaqein eu odi: "Elo, Elo, lama sabaktani?" en. ‡‡ 27:47: "Eli, Eli" uqana hutan Aram jena eu "Ilaija" cinigwe. §§ 27:49: Grik jaqec je hilah leihna age je oso tubdu jaqein eu odi: Oso uqa sawal umei Jisas qeihna qon. Odocob golac waca cali hu busalen. \*\*\* 27:62: Deel osona eu Juda agena cuha deel, eu egena cuha deel nag.

tawoqagan. Age belimeig ceteh cunug age odocnu madegina eu qalqal hatin eu gagadic cufa qoiga,” aden. <sup>66</sup> Odocob age beli qalqal hatin cufa qu cuhadoin. Age gun mudecnu sisi mec oso meen heel cufa qocna tawen eu tatacan mein. Odimeig age han dana qalqal hatin cofdocnu madein.

## 28

### *Jisas ceseli cajen*

(Mak 16.1-10; Luk 24.1-10; Jon 20.1-18)

<sup>1</sup> Juda agena cuha deel hedocob cuhana deel osoldocna walag danigia oodon Maria Makdaladecca Maria osoca ale qalqal hatin fecnu belesin. <sup>2</sup> Odocob mim ben nen. Ge, Tibudna ensel oso sao jobondec nimei hu meen ben hatin jic cebec cufa qon eu olcdumei meen tatacan bilen. <sup>3</sup> Uqa ola eu amel faleecnu cinigwe. Uqana lotoc eu senenec bahic. <sup>4</sup> Odocob han dana age qalqal hatin cofdoin eu age uqanu cucuii qeqeli dana cal mec cinigwe ibuldoin.

<sup>5</sup> Euqa ensel uqa caja maalen, “Jisas age na babalecna tuitu qocobil cal men eu walesina eu dugina. Eunu cain cucuiuwasin. <sup>6</sup> Uqa madenwe uqa odi ceseli cajeia. Uqa ene qee biled. Humesi cudun nijen eu fowasan. <sup>7</sup> Fimesi mahuc ceseli limesi ale uqana malogom Jisas cal mecnadec ceseli cajeia ec maadesia. Uqa aquniadi nui Galili hatuna caligian. Ono age fecidoqagan. Fesia, eu ija maaliga,” aden.

<sup>8</sup> Eunu ale cucuii ben bahic ceeli qalqal hatin mahuc cuculesi uqana malogom saadowasannu guguli belesin. <sup>9</sup> Odocobil Jisas uqa jicna gulucalimei maalen, “Feele,” aden. Ale uga cemenug hu uqa jaih hewimesi gob cehi uqanu cuha fesin. <sup>10</sup> Odocobil Jisas maalen, “Cain cucuiuwasin. Ija cotiel age Galili hatuna beleiga ec maadesia. Age ono fecituqagan,” aden.

### *Juda agena uhulec je*

<sup>11</sup> Caja ale ensel maalenwe bebelesin Jisasna qalqal hatin cofdu bilein han dana eundec leih age Jerusalem humeig ihanec dana benben je cunug saadein. <sup>12</sup> Age Juda agena matu cunug utaadecibil age cegulimeig je eunu togodoin. Age wawaga osol meceb age han dana meen qaig mati adimeig maadein, <sup>13</sup> “Age dana cajaca cocobi maadeiga, ‘Ege us ninijuqun uqana malogom age humeig Jisas deweg ganac heje umeig ehi belein,’ je eu maadeiga. <sup>14</sup> Je eu gabnian dana matu dufei uqa age me qee odadeiaunnu co cufa qoqan,” adein. <sup>15</sup> Odocobil han dana age meen qaig umeig ihanec dana benben age maadein odi maadi coboin. Je eu Juda dana ha gaid mamadi li qilaha mamadi cobogina.

### *Jisas uqana malogom age cabi oqagannu maaden*

(Mak 16.14-18; Luk 24.36-49; Jon 20.19-23)

<sup>16</sup> Malogom 11-pela age cocobi Galili belein. Age aluh Jisas age wele euna loqagannu maaden eunalein. <sup>17</sup> Odocob euna Jisas fein. Age amegna gob cehimeig uqanu cuha fein. Euqa leih age cisdock lecisca. <sup>18</sup> Jisas uqa cemenega humei odi maaden, “Anut uqa ceteh cunug agena ilo miten. Uqa ceteteh cunug mahanca sao jobonnaca cofadecnu gagadic odocha iten. <sup>19</sup> Eunu age mahamaha cunug beladimeig dana cajaca ijana malogom madeiga. Age Memige Anut ijanna, uqa Melah ijanna, Kis Gun ijanna wa joadeiga. <sup>20</sup> Age je ija maadolig eu cunug age adem cunug iwaladecebile toodu odoqagannu maadeiga. Dogina, ija dudu age gami deel cunugna biluquna qila ina leceb mahamaha bielec saen deel euna qee migian,” aden.

## Me Je i Mak Jaqen Aqunec Je

Me je i cel dana bahic jaqen eu je oso qee nijel. Euqa Kristen tamanec cofadec dana age wele Jisas Krais mahana cobon saennadec li saen qila njija eu Jon Mak, Pitana danah, uqa me je i jaqen ec madein. Me je ina je mati eu Pita uqana me je madec euqa Mak jaqen. Jon Mak uqa Jisasna malogom oso. Uqa anagna jona Jerusalem ono wawaga meleec dana cajaca age ceguloig. (Aposel 12.12 feiga.) Pol Banabasca ale Jerusalemdec Antiok taunna ceseli belesin saenna Jon Mak aleca belein. (Aposel 12.25 feiga.) Mak uqa age Jisas hewudein eu fen. Dana haun i lotoc nag himec taqen uqa age hewudoqaga bili odoinqa uqa bical bubusali bilei lotoc eu culen eu uqa Jon Mak. (Mak 14.51-52 feiga.)

Makna me je sanan mec eu je i Jisas Kraisnu me je, uqa Anut Melah ec madena. Me je ina Mak uqa Jisas eu Kraisca, eu Anut Melahca eunu ihacena. Jisas uqa dana Anut uqa ugana gagadic odoc utimei gagadic odoc euca cabi on eunu ihacena. Uqa dana cajaca je iwaladen euca, uqa buga me qee dana cajaca deweneganadec ititacadeneuca, uqa dana cajaca agena silail casasiaden euca, ugana odoc eu cunug Jisas uqa dana Anut gagadic odocka bilen ec ihacena. Jisas uquadodocnu ija Dana Melah, ijana cebac bilec eu dana cajaca mati besiadec fajadecnu culigen imei eunu toni nem ec maden. (Mak 10.45 feiga.)

Mak uqa Jisas odi odonnu je mati jaqen. Uqa gaid Jisas odi odimei mahuc odi odon ec jaqen. Mak uqa Jisas dana cajaca je iwaladen eunu je mati qee jaqel. Euqa Mak uqa Jisas eu iwaladec dana je mati jaqen. Mak uqa casac Wa Joadec Jonnu jaqen. Odimei Jon uqa Jisas wa joudeceb Kis uqa Jisas u suldocob wadauna nueceb Seten temdon eunu jaqen. Odimei eu hedocob Jisas uqa dana cajaca me madecnu cabica, me je iwaladecnu cabica odon eunu jaqen. Casac Jisasna malogom age Jisas uqa in tutuc qee doloin, euqa cebitcebit uqanu dodoig li Pita uqa Jisas eu Anutna Krais ec maden. (Mak 8.29 feiga.) Euqa Juda dana benben age Jisasna cad mimeig age hibna uqanu gemanaga ben beceb uqa qocobil cal necnu togodoin ec feigale. Makna me je cit qoc age Jisas na babalecna tuitu qocobil cal mimei ceseli cajennu saena.

Makna me je cit qoc lecis njija eu [ ]na gadac men. Cit qoc je i docca dana age Mak eu qee jaqel, euqa dana fil oso jaqen, ec cisdoen.

### *Je Dunuhnu Dado Mec*

1. Jisas uqa ugana cabi oc sanan men (1.1-13)
  - A. Wa Joadec Dana Jon uqa Jisas aqunidon (1.1-8)
  - B. Jon uqa Jisas wa jouden (1.9-11)
  - C. Seten uqa Jisas temdu fen (1.12-13)
2. Jisas uqa Galili hatuna ugana cabi on (1.14-6.29)
  - A. Ugana cabi Galili hatuna sanan men (1.14-3.12)
    1. Uqana malogom aquniadec utaaideceb toodoin (1.14-20)
    2. Uqa kobolkobel odoc Kapaneam jobonna odon (1.21-34)
    3. Uqa Galili hatuna cocobi nuen (1.35-45)
    4. Uqa Kapaneam jobonna cabi on (2.1-11)
    5. Jisas Juda agena cuha deelna cabi qee oc eunu maden (2.23-3.12)
  - B. Uqa Galili hatuna ugana cabi haun on (3.13-6.29)
    1. Jisas aposel 12-pela nesili ehaden (3.13-19)
    2. Uqa Kapaneam dana cajaca iwaladen (3.20-35)
    3. Uqa Anutna culnu galolo je maden (4.1-34)
    4. Uqa Galili wa gad cagoc leti nuen (4.35-5.20)
    5. Uqa Galili ono kobolkobel odoc haun odon (5.21-43)
    6. Nasaretdec dana cajaca age Jisas hibemdoin (6.1-6)
    7. Jisas ugana malogom 12-pela lecislecis suladeceb belein (6.7-13)
    8. Herod uqa Jisasnu Wa Joadec Jon ec cisdon (6.14-29)
3. Jisas uqa Galili hatu culdimei cudun filfil nuen (6.30-9.32)
  - A. Uqa Galili wa gad cagoc leti uqa cudun ono isec nuen (6.30-52)
  - B. Uqa Galili wa gad cagoc ceseli leti uqa Genesaret hatuna nuen (6.53-7.23)
  - C. Uqa Fonia hatuna nuen (7.24-30)
  - D. Uqa Dekapolis hatuna nuen (7.31-8.10)
  - E. Uqa Sisaria Filipai ono isec nuen (8.11-9.32)
4. Jisas uqa Galili hatuna ugana cabi hedon (9.33-50)

5. Jisas uqa Judia hatunaca Peria hatunaca cabi on (dac 10)
  - A. Jisas uqa ocobocobec kobil cagocnu iwaladen (10.1-12)
  - B. Jisas uqa mel simnu iwaladen (10.13-16)
  - C. Dana haun cehewanca uqa Jisasca hocob madesin (10.17-31)
  - D. Jisas uqa cal mimei ceseli cajigian ec maden (10.32-34)
  - E. Jems Jonca ale Jisas je madowasannu bilesin (10.35-45)
  - F. Jisas dana oso, ijan Batimias, uqa ameg galuc mec me muden (10.46-52)
6. Deel 6-pela hedocob Pasowa Sab Jec Ben Deel caligiannu ninijen Jisas uqa age qocobil cal migiannu Jerusalem ono nuen (dac 11-15)
  - A. Jisas uqa kingwe Jerusalem dunuh len (11.1-11)
  - B. Jisas uqa tempel jo soidon (11.12-19)
  - C. Jisas uqa Juda dana benben gami fee dadani hedoin (11.20-12.44)
  - D. Jisas uqa Oliw Aluhna cit qoc saennu maden (dac 13)
  - E. Juda dana benben age Jisas qocnu jic walein (14.1-2)
  - F. Caja oso Jisas ilona mool dedeman me bahic joiden (14.3-11)
  - G. Age Jisas hewudi gesildumeig na babalecna tuitu qocobil cal men (14.12-15.47)
7. Jisas ceseli cajimeい leih age uqa fein (dac 16)

*Wa Joadec Jon Tibudna jic saciadon*

*(Matju 3.1-12; Luk 3.1-9, 15-17; Jon 1.19-28)*

<sup>1</sup>I Jisas Krais uqana me je\* sanan mec, uqa Anut Melah.

<sup>2</sup>Anutna je hahun madec dana, Aisaia uqa je jaqen eu odi calen:  
“Feiga, ija ijana sos suldocomin aqunihui nuigian.

Uqa hinana jic saciadugian.

*(Malakai 3.1)*

<sup>3</sup>Dana jejeg oso wadauna<sup>†</sup> bibili utai maadena,  
Tibudna jic saciadoiga.

Uqana jic tutuc mudeiga,’ adena,” en.

*(Aisaia 40.3)*

<sup>4</sup>Odochob Wa Joadec Jon uqa wadauna camasac men. Uqa dana cajaca je qasali maaden, “Agena silailnu tului falicdumeig wa joadec oiga. Odi odochobifli Anut uqa agena silail cagasiadigan,” aden. <sup>5</sup>Dana cajaca Judia hatuna bileginaca, dana cajaca Jerusalem bileginaca age cunug Joncalein. Limeig age agena silailnu je qasali madocobil Jon uqa Judan Wana wa joaden.

<sup>6</sup>Jon uqa kamel bagicna lotoc mudec tacoloi, odimei uqa wailohna dool ganacna oologam mudec taqoloi, odimei uqa sisca mehud uqana waca joloi.<sup>‡</sup> <sup>7</sup>Uqa dana cajaca je qasali maaden, “Dana oso uqa hib tooti hugian, uqana gagadic odoe ijana gagadic odoe wooldona. Uqa dana meca bahic. Ijaq a dana meca qee. Ija uqana cabi dana me bahic ihoc qee, ija jogoomig uqana jaih tacec halu cufalitocwe qee. <sup>8</sup>Ija age wana wa joadigina qa uqa age Kis Gunna wa joadigian,” aden.

*Jon uqa Jisas wa jouden*

*(Matju 3.13-17; Luk 3.21-22)*

<sup>9</sup>Saen euna Jisas Nasaretdec Galili hatuna hocob Jon Judan Wana wa jouden. <sup>10</sup>Odochob Jisas wanadec cali beceb mahucwe sao ohis jic cebec hudeceb Kis cuhudid cinigwe uqaca nenem tebandu fen. <sup>11</sup>Odochob jejeg oso sao ohisdec camas mi madon, “Hina ija melami nalunin migina. Ija hinanu wawi ben ceelena,” don.

*Seten uqa Jisas temdon*

*(Matju 4.1-11; Luk 4.1-13)*

<sup>12</sup>Saen euna bahic Kis uqa Jisas u suldocob wadauna nuen. <sup>13</sup>Uqa wadauna deel 40 cunug Seten temdodon bilen. Uqaha dool cusca ono bilen. Uqa odi bibilen ensel age cewel utoin.

*Jisas uqana cabi oc Galili hatuna sanan men*

*(Matju 4.12-17; Luk 4.14-15)*

<sup>14</sup>Aria, age Jon hu hewimeig gihacdoc jona mudi hedocobil Jisas Galili hatuna limei cocobi Anutna me je qasali mamadi maaden. <sup>15</sup>Uqa maaden, “Saen Anutna cul cali hoia nijia. Anutna cul eu age cemenega hona. Agena silailnu tului falicdumeig me jenu wawaga meleeiale,” aden.

\* <sup>1:1:</sup> Jisas uqa calenna uqa dana cajaca Anutna me je qasali maaden. Anut uqa Jisas uqana cebac bilecca, uqana cal mecca, uqana ceseli cajecca euna dana cajaca cahabaadecnu ihoc eu Anutna me je. † <sup>1:3:</sup> Age je Matju 3.1na nijia eu feiga. ‡ <sup>1:6:</sup> Age je Matju 3.4na nijia eu feiga.

*Jisas cul dool cedec dana 4-pela utaaadeceb toodooin  
(Matju 4.18-22; Luk 5.1-11)*

<sup>16</sup> Saen Jisas Galili wa gad cagocna cocobi dana oso waliagca facialen, eu Saimon uqa waliag Andruca. Ale cimec ben wana hehelesin fen. Ge, ale cul dool cedec dana. <sup>17</sup> Odocob Jisas maalen, “Hu tootecebil ija odalecemin ale dana cajaca cedadec dana calowasan,” alen. <sup>18</sup> Odocob mahuc bahic ale cimec ben cuculesi uqa toodu belesin.

<sup>19</sup> Uqa nag bahic onoca limei dana oso waliagca haun facialen, eu Jems uqa Sebedi melah, uqa waliag Jonca. Ale alena wagna bibilesti cimec ben tatalec eu haun wewegi bilesin. <sup>20</sup> Jisas mahucwe utaalen. Odocob ale memela Sebedi uqana cabi danaca wagna bibilegin cuculadi limesi Jisas toodu belesin.

*Jisas uqa dana osona buga me qee ititacdon  
(Luk 4.31-37)*

<sup>21</sup> Age Kapaneam jobon hoin. Odocobil mahucwe Juda agena cuha deelna Jisas uqa Juda agena cuha jo dunuh limei je maadi iwaladen. <sup>22</sup> Uqa agena loo je iwaladec dana oso cunug maadeinwe odi qee maadel qa uqa dana oso, Anutna gagadic odoccia madenaw, odi iwalaadi maaden. Eunu uqa je eu maadi mamaaden dana cajaca age wawaga cacaden bilein, uqana iwaladec je eu wawaga qon.

<sup>23</sup> Ono deel euna bahic dana oso uqa buga me qeeca bilen, buga eu gegehinca uqana jo ibuldon. <sup>24</sup> Uqa utai Jisas madon, “O Jisas Nasaretdec, hina eetanu odigigana? Hina fadalgecnu hogafa? Ija hina cel dananu dugina. Hina dana gun eu Anut suldocob nen,” don. <sup>25</sup> Euqa Jisas buga me qee eu cahacdudu madon, “Je culuge. Dana cuculdi qisacdoga,” don. <sup>26</sup> Odocob buga me qee gegehinca eu dana odudeceb uqa titi hudeceb qeelen. Odocob geh bahic euimei dana eu cuculdi qisacdona. <sup>27</sup> Odocob dana cajaca cunug tumatumaimieg agedodoc madocbmadocobi sisilein, “Eu eeta? Dana i je haun iwalgrena! Uqa Anutna gagadic odoccia buga me qee gegehinca eundec dih maadeceb age co toodu odogina,” ein. <sup>28</sup> Odocob Jisas hutan hatuhatu mahucwe ihoc len, Galili hatuna alildu bilein euha cunug doin.

*Jisas Pita momoig me muden  
(Matju 8.14-15; Luk 4.38-39)*

<sup>29</sup> Jisas mahucwe Juda agena cuha jo eu culdimei cocobi Saimon Andruca alena jona len. Uqa gami Saimon Andruca, Jems Jonca age jo dunuh lein. <sup>30</sup> Ono Saimon momoig uqa hag deweg dainaca hulen cabalna nijen. Odocob Jisas ono li caleceb mahucwe uqa caja hag nijennu madoin. <sup>31</sup> Odocobil Jisas caja cemenug limei eben hewi cesuldocob cajen. Odocob hag deweg daina hulen eu culdeceb caji sab saciadumei cewel uaden.

*Jisas dana caja matica me maden  
(Matju 8.16-17; Luk 4.40-41)*

<sup>32</sup> Odocob wesi men cam toneceb age hag aqecca buga me qee hewadecca eundec cedadi Jisasca ahoin. <sup>33</sup> Odocob dana cajaca age jobon ben euna bilein age cunug Jisas bilen jo eu amegna cegulimeig bilein. <sup>34</sup> Jisas uqa hag gug filfil nijein mati bahic me maden. Uqa buga me qee dana deweneganadec hewadein mati bahic ititacadeceb dana cuculadi belein. Buga me qee age Jisasna gug doin eunu uqa eundec cahacadeceb je qee madelein. §

*Jisas Galili hatuna cocobi nuen  
(Luk 4.42-44)*

<sup>35</sup> Qasil bahic walag qee danec tu ninijen Jisas caji jo culimei cudun tiliec bahicna, dana oso qee biley, euna nuimei ono uqa Anut inondudu bilen. <sup>36</sup> Odocob Saimon uqaca bilein eundecca Jisas wawali toodooin. <sup>37</sup> Uqa gulucdumeig madoin, “Dana cunug wawalhi cobogina,” doin. <sup>38</sup> Odocobil Jisas maaden, “Ija me je qasali maadigennu caji lem. Eunu ija jobon cunug alilgi bileyina eundec dana cajaca me je qasali maadigennu ege jobonjobon coboqale,” aden. <sup>39</sup> Odimei Jisas uqa Galili hatuna jobonjobon cocobi Juda agena cuha jonona me je qasali mamadi maadimei buga me qee eundec uqa dana deweneganadec ititacadeceb dana cuculadi belein.

§ **1:34:** Jisas uqa Anut Melah, odocob uqa dana Anut uqana dana caja cahabaadecnu wele nesili ehuden. Grik jena age dana eu Krais ein, odocob Hibru jena age dana eu Mesaia ein. Age Mak 1.1 feiga. Juda dana age Anut uqa dana eu suldocob hugian eunu doin. Euqa age dana eu kingwe calimei uqa Rom dana Juda agena hatunadec ititacadeceb Isrel age besiadec haun biluqagan ec cisdoein. Euqa Jisas uqa cabi oc i odi odocnu qee hol. Eunu uqa buga me qee age uqana gugnu madecebil dana cajaca age docnu qee gale dol.

*Jisas dana oso uqa lepra hagca me muden  
(Matju 8.1-4; Luk 5.12-16)*

<sup>40</sup> Saen euna dana oso deweg lepra hagca Jisasca humei uqa amegna gob cecehi Jisasnu cuha fefei ninidudu madon, “Hina ija me mitiga hecebfi ija me mitecem ijana hag culteceb ija Anut amegna cataniec bielecnu ihoc,” don. \*\* <sup>41</sup> Odocob Jisas dana eunu walol docob eben huledumei deweg qududodoi madon, “Ija me mihiqa tena. Me magal” don. <sup>42</sup> Saen eunadih lepra hag eu uqa dewegna culdeceb deweg hul hon. <sup>43-44</sup> Odocob Jisas uqa dana eu gagadic madon, “Dah maga, ceteh inu oso cain bahic sadudu cobogaun. Euqa li dewen nawel tawec ihanec dana eu hina dewen ihacdacom maleldugian. Odimeg Moses loo je wele maden eu toodumeg hina qila Anut amegna cataniec biliga dana cajaca cunug ihacadecnu Anut ihandogale,” don. Madu hedumei mahuc suldocob nuen. <sup>45</sup> Dana euqa uqa nunui feei je eu cunug saadi cobon, hatuhatu cunug je eu doin. Odonnu Jisas uqa camasac jobon osona lecwe qee. Uqa jobon hahagum maha danaca qee euna biloloi. Euqa dana cajaca age hatu nahahaha cunugdec uqa cemenug hoin.

## 2

*Jisas dana oso eben jaih laleg mecca me muden  
(Matju 9.1-8; Luk 5.17-26)*

<sup>1</sup> Deel leih hedocob Jisas ceseli Kapaneam jobon hu jona bibilen\* uqa hutan camas meceb dumeig <sup>2</sup> dana cajaca mati bahic hu cegulein. Jo cunug ihoc leceb cudun oso bielecnu ihoc qee. Jo cebecna ha ihoc len bibilegin Jisas me je qasali maaden. <sup>3</sup> Odi bibilegin dana 4-pela age dana laleg hagca oso gabagabna ninijen hehewi ehudi ahoin. <sup>4</sup> Dana cajaca age gitim bahic bibilegin age Jisas amegna ehi li mudecnu jicca qeenu age jo ohis tobein. <sup>5</sup> Tobimeig Jisas tawenna jo qab iwesdumeig gabagab dana nijen eu halu bagimeig Jisas tawen uqa amegna gulucuhdogin nen. <sup>6</sup> Odocobil Jisas age wawaga meleen fimei dana jaih ebenga laleg mec madon, “Melami, hinana silail cagasihiga qee meia,” don.

<sup>6</sup> Ono Juda agena loo je iwaladec eundec oosooso dana gemona bielein. Age Jisasna je uqa dana laleg mec eu madodon dumeig filiciti wawagana madein, <sup>7</sup> “Dana i adi je odi madena? Uqa Anut cewudec je madena! In silail cagasiadecnu ihoc? Eu Anut himec uqa ihoc,” ein. <sup>8</sup> Age odi wawagana mamadegin Jisas mahucwe agena cisdoc eu waugna dumei maaden, “Age wawagana eetanu je i madegina? <sup>9</sup> Cel je madecnu cakanica qee? Ija dana laleg hagca i madugen, ‘Hinana silail cagasihiga qee meia,’ dugenfo, qee ‘Cajimeg hinana gabagab u hewimeg jic coboga,’ dugenfo? <sup>10</sup> Euqa Dana Melah mahana silail cagasiadecnu gagadic odoc ebenna njia eu doqagannu ihacadigen,” aden. Odimei uqa dana laleg hagca madon, <sup>11</sup> “Ija hina mahicina, cajimeg hinana gabagab umeg gahidu jobon nuuga,” don. <sup>12</sup> Odocob uqa cajimei mahucwe age amagana uqana gabagab u hewi nuen. Dana cajaca ono age odi oodon fimeig age cunug tumatumaimieg Anut binan susuli madein, “Ege wele oso odi qee oodon folom,” ein.

*Jisas Liwai utadocob toodon  
(Matju 9.9-13; Luk 5.27-32)*

<sup>13</sup> Jisas haun ceseli Galili wa cagoc lanna nu bibilen dana cajaca mati bahic uqaca hocobil je maadi iwaladen. <sup>14</sup> Odimei uqa jic cobi nunui uqa Alfias melah, Liwai, takis cedec jona bibilen fen. Fimei madon, “Tootaga,” don. Odocob Liwai uqa cajimei Jisas toodo nuen.

<sup>15</sup> Odocob hibna Jisas uqa Liwaina jona sab jejei bilen. Bibilen takis cedec danaca, silail danaca, mati ageha Jisas uqana malogomca gami sab jejegin bielein. Ge, dana mati bahic Jisas toodo. <sup>16</sup> Odocob loo je iwaladec age Farisi sihul eundec age Jisas uqa silail danaca takis cedecca gami sab jejegin fimeig age uqana malogom maadein, “Uqa eetanu takis cedecca silail danaca eundec gami sab jegin?” adein. <sup>17</sup> Odocobil Jisas je eu dumei maaden, “Hagca qee age hag me madec danaca qee legina. Qeo. Hagca himec age hag me madec danaca legina. Ija ititom dana cajaca ‘Age agena silailnu wawaga tului falicdoigale,’ ec utai maadecnu qee holom. Euqa ija silail dana cajaca ‘Age agena silailnu wawaga tului falicdoigale,’ ec utai maadecnu hom,” aden.

\*\* **1:40:** Age je Matju 8.2na njia eu feiga. \* **2:1:** Jo eu inna jo ege qee doqona. Euqa Jisas uqa Kapaneam ono cali bilen saenna uqa jo euna bilen eu odi fena. Dana leih age jo eu Pita Andruca alena ec cisdogina. (Age Mak 1.29 feiga.)

† **2:4:** Juda age agena jo eu bokiswe ceholoig. Jo ohis eu tutuc, eu dana cobocnu ihoc. Jo eu lan qeihna tawein, eu dana ohis tobecnu ihoc.

*Jisas sabnu qagu bielec eunu maden  
(Matju 9.14-17; Luk 5.33-39)*

<sup>18</sup> Saen oso hibna Wa Joadec Jon ugana malogomca Farisi agena eundecca age Juda agena kobil toodu sabnu qagu bielein. Odocobil dana leih humeig Jisas sisildoin, “Eetanu Wa Joadec Jonna malogomca Farisi agena malogomca gaid esuesu sabnu qagu biegina qa hinana malogom eu qee sabnu qagu biegina?” doin. <sup>19</sup> Odocobil Jisas jejenega hewi maaden, “Age dana caja ocobocobecna cegulein biegina eunu age caja oc dana eu gami biegil adi sabnu qagu biluqagan? Qeoo, caja oc dana eu age gami biegil cain sabnu qagu biluwan. <sup>20</sup> Euqa saen oso hibna dana leih hu caja oc dana cawaladecebileel deel euna age sabnu qagu biluqagan,” aden.

<sup>21</sup> “Oso ugana lotoc hilah giloccanu eu eeldugia bili, uqa lotoc fan haun qee cusec tatacan qee gisena. Eu odi odoubmiqa age lotoc cusecebil fan haun eu nag meceb eu gesacna haun ceseli balahadu bendoub. Wele balahadon eu wooldu qatanoub. <sup>22</sup> Odihia oso uqa wain haun jool mecmec ganacna mudec hilahna qee o danena. Jool mecmec ganacna mudec eu galalec eunu odoubmiqa wain haun eu jool ganacna mudec hilah qatanoub, wain basecdyu cusdoub, odocob jool ganacna mudecha qatanu cusdoub. Qeoo, age wain haun jool mecmec ganacna mudec haunna o danegina,” aden.‡

*Jisas Juda agena cuha deelna cabi qee oc eunu maden  
(Matju 12.1-8; Luk 6.1-5)*

<sup>23</sup> Juda agena cuha deel osona Jisas ugana malogom gami cocobi wit cabi osoosona gemogemo li beli coboin. Bebeli cocobi ugana malogom age wit aig wal mec tawen qu u ehi lein. <sup>24</sup> Oodogin Farisi leih age Jisas madoin, “Faga, hinana malogom eetanu ceteh oso eguna cuha deelna loo je cahacgena eu odogina?” doin.§

<sup>25</sup> Odocobil Jisas jejenega hewi maaden, “Age Dewid odonnu je oso qee sanijeleinfo? Uqaca ugana eundec age gami coboinca age wele sabca qee bilimeig wen adeceb <sup>26</sup> uqa Abaiata ihanec dana ilo bibilen saen euna Anutna jona limei Anutnu ihanec bred oso u jen. Bred eu dana gauc jecnu Mosesna loo je cahacaden. Nawel tawec ihanec dana age himec jecnu cois ena. Dewidha dana age uqaca coboin bred eu adeceb osoben jein,” aden.

<sup>27</sup> Jisas odi maadimeei maaden, “Anut uqa cuha deel saolal mudigia bili dana eunu qee ifani madel qa Anut uqa dana me biluqagannu cuha deel muden. <sup>28</sup> Eunu Dana Melah uqa Tibud, uqaha cuha deel ugana ilo bilina,” aden.

### 3

*Jisas Juda agena cuha deelna dana oso eben cogogec me muden  
(Matju 12.9-14; Luk 6.6-11)*

<sup>1</sup> Jisas haun Juda agena cuha jo dunuh len. Ono dana oso uqa eben gatoc men bilen. <sup>2</sup> Dana leih oone bilein eu age Jisas uqa cuha deelna dana eben gatoc men me mudigianfo eunu cofdudu mecidoin. Uqa odi odocobfi ege dewegnu je um qoqan ec cisdoin. <sup>3</sup> Odocobil Jisas dana eben gatoc men eu madon, “Ene hogale,” don. <sup>4</sup> Odimei dana sisiladi maaden, “Cuha deelna ege dana me odadecnu loo je cois ec madenafo, qee ege dana waadecnu cois ec madenafo? Cuha deelna ege dana cahahaadecnu loo je cois ec madenafo, qee ege dana aqocomun cal mecenu cois ec madenafo?” aden. Uqa odi maadeceb age conoga culec bilein. <sup>5</sup> Odimei Jisas uqa talilaadi meciadimei gemag ben. Age wawaga tool ibuldun eunu waug me qee men. Odimei dana eu madon, “Hina eben heli huledoga,” don. Odocob uqa eben heli huledocob me men. <sup>6</sup> Odocob Farisi age cuculdi nuimeig Herodna dana eundecca mahuc cegulecebileel age Jisas qoqagannu jic wawali je togodoin.\*

*Dana cajaca mati bahic age Galili wa gad cagocna cegulein  
(Luk 6.17-19)*

<sup>7</sup> Jisas ugana malogom gami Galili wa gad cagocna ceseli belein. Dana cajaca am ben bahic Galili hatunadec tooadi belein. Leihha age Judia hatunadec, <sup>8</sup> leih Jerusalemdec, leih Idumia hatunadec, leih Jodan Wa ono isecdecca, leih Taia Saidonca alildu bilein eunadecca, dana cajaca mati bahic age Jisas uqa odi odona ec dumegnu uqaca hoin. <sup>9</sup> Dana cajaca mati bahicnu age Jisas gihacgihudowainnu uqa ugana malogom maadeceb uqa wag osona tobiginnu gaid saciadu mudecebileel tawen. <sup>10</sup> Ge, uqa mati bahic me maden. Eunu dana caja hagca eundec age Jisas deweg hewi feqan imeig uqa cemenug bahic lecnu gihacdodi gagadic bahic mein. <sup>11</sup> Buga me qee age dana cajaca

‡ **2:22:** Age je Matju 9.16-17na nijia eu feiga.  
§ **2:24:** Age je Matju 12.2na nijia eu feiga.  
12.14na nijia eu feiga.

\* **3:6:** Age je Matju

deweneganadec cali hu bebeli Jisas fecebil dana cajaca age amegna toni mahulimeig utai madein, "Hina Anut Melah!" ein. <sup>12</sup> Euqa Jisas uqa buga me qee age uqana gug camas mowainnu cahacaden.

*Jisas aposel 12-pela nesili ehaden  
(Matju 10.1-4; Luk 6.12-16)*

<sup>13</sup> Odocob Jisas aluh guhidocna ti bilen. Odimei dana age uqaca biluqagannu gale don eundec utaaideceb uqa cemenug hoin. <sup>14</sup> Uqa dana 12-pela age uqaca biluqagannu age suladeceb Anutna me je qasali maadecnuca nesili ehaden. Dana eu uqa aposel† ijan qon. <sup>15</sup> Uqa age buga me qee dana deweneganadec ititacadeccu cabi eu ebenegana men. <sup>16</sup> Aposel 12-pela ijanaga eu odi. Eu Saimon, Jisas uqa ijan oso Pita ijan qon. <sup>17</sup> Eu Jems Sebedi melah waliag Jonca, Jisas uqa ijanala oso Boanesis‡ ijanala qon. Ijanala gug eu qeli qocna mel. <sup>18</sup> Eu Andruca, Filipca, Batolomjuca, Matjuca, Tomasca, Jems uqa Alfias melahca, Tadiasca, Saimon uqa Selot§ agena amdecca, <sup>19</sup> Judas Iskariotca. Judas Iskariot uqa hibna Jisasnu balijimei uqana cad ebenegana muden.

*Age Jisas Bielsebulca cabi osina ec madein  
(Matju 12.24-32; Luk 11.14-23; 12.10)*

<sup>20</sup> Odocob Jisas jobon nuen. Dana cajaca mati bahic age haun cegulecebil Jisas uqana malogomca sab jecnu saenca qee. <sup>21</sup> Odocob Jisas uqana eundec age uqa sab qee jec cabi onanu dah mimeig madein, "Uqa gad quoia," ein. Eunu age uqa ehudoqagannu belein.

<sup>22</sup> Odocobil loo je iwaladec dana age Jerusalemdec nein eu age Jisasnu madein, "Bielsebul, buga me qee agena ben, uqa dana eu hewudena. Uqa Bielsebul uqana gagadic odocna buga me qee dana deweneganadec ititacadena," ein. \*\* <sup>23</sup> Odocobil Jisas dana eu utaaideceb uqaca hocobil galolo je maaden, "Seten uqana eundec adi ititacdugian? <sup>24</sup> Hatu osona mam cadecebifli cul eu gagadic tawecnu ihoc qee. <sup>25</sup> Sihul osona mam cadecebifli sihul eu gagadic tawecnu ihoc qee. <sup>26</sup> Odocob Seten uqana eundec age mam cadecebifli qatanec bilecebfli uqa gagadic tawecnu ihoc qee. Euqa uqa toni qocob qee migian," aden.

<sup>27</sup> "Oso uqa dana gagadicca uqana jona li uqana ud cawaldecwe qee, uqaqa casac li dana eu eben jaihca libimei uqana ud cawaldecnu ihoc," aden. ††

<sup>28</sup> "Ija mele maadigina, silail oso cunug dana megina eu Anut uqa dana agena silail cagasiadigian. Dana age Anutnu lelan madegina euha Anut uqa dana agena silail cagasiadigian. <sup>29</sup> Euqa Kis Gunnu lelan madec eu dana silail cagositocnu qee rijel. Oso Kis Gunnu je me qee madenafi silail eu saen qila inaca leceb saen biley catanecnaca silail cagasec qee gulucdoiaun. Euqa uqana silail deweg fagdocob catanigian," aden. #‡ <sup>30</sup> Ge, age Jisasnu madein, "Uqa buga me qeeca," ein. Eunu uqa odi maden.

*Jisas anag waliagulca eu in?  
(Matju 12.46-50; Luk 8.19-21)*

<sup>31</sup> Jisas uqa dana cajaca je maadi bibilen uqa anageca waliagulca gami calein. Age jo maha gumu tataweig je suldocobil dunuh len. Uqa ageca hugiannu utadoin. <sup>32</sup> Dana cajaca amemeg Jisas taldoin bibilegin madoin, "Faga, hina anin walinelca gami maha gumu taweiga. Age hina ageca legannu madegina," doin. <sup>33</sup> Odocobil Jisas jejenega hewi maaden, "Ija au in? Ija waliel an?" aden. <sup>34</sup> Odimei uqa dana cajaca age alildu bileyina eu uqa talilaadi meciadimei maaden, "Feiga! Ija au walielca ihen! <sup>35</sup> Oso uqa Anut co toodu odona eu uqa ija walica, ija cebinamica, ija auca," aden.

## 4

*Jisas dana oso wit aig cabina helennu galolo je maden  
(Matju 13.1-9; Luk 8.4-8)*

<sup>1</sup> Jisas haun Galili wa gad cagocna dana cajaca je iwaladi maaden. Dana cajaca age mati bahic uqaca humeig talildu cegulein. Eunu uqa wag oso tobi wag macas tatacan ninijen uqa euna bilen. Bibilen dana cajaca cunug age wa cagoc lanna tawein. <sup>2</sup> Tatawegin uqa je mati galolo jena iwaladi maaden.

† <sup>3:14:</sup> Age je eu Matju 10.2na nijia eu feiga. <sup>3:17:</sup> Boanesis eu Aram je. <sup>3:18:</sup> Selot agena am age Juda dana eu Rom dana Judiadec ititacadeccu egina. <sup>\*\* 3:22:</sup> Bielsebul eu Seten ijan oso. <sup>†† 3:27:</sup> Dana gagadicca eu Seten. Dana uqa Setenna ceteteh cawaldena eu Jisas. <sup>#‡ 3:29:</sup> Jisas uqa Kis Gunna gagadic odocna dana cajaca me maden. Euqa loo je iwaladec dana age uqa Setenna gagadic odocna me maden ec cisdoein. Eunu age cahulec bahic bilein. Age Kis Gun eu Seten ec cisdoein. Eunu Anut uqa agena silail cagasiadecnu ihoc qee rijel. Age je Matju 12.31-32na nijia euha feiga.

Uqa iwaladec je oso maaden,<sup>3</sup> “Dah meiga! Dana oso ugana cabina wit aig helecnu nuen.<sup>4</sup> Uqa aig hehelen aig osooso jic cobocna tonen. Odocob man fululec age humeig cedi ji hedoin.<sup>5</sup> Aig osooso maha eu meen baibaca maha meca qee euna tonen. Maha eu dunuh qee nol eunu aig eu mahuc qala qahimei nag wasen.<sup>6</sup> Odocob cam gagadic tawecel eu cijaden. Odocob bebeig dunuh qee nol eunu qala jajawalen.<sup>7</sup> Aig osooso dud geuna tonen. Dud eu mahuc caji ben mimei cetehe cilehdocobil mahulimei aig qee qol.<sup>8</sup> Aig osooso eu mulu mahana tonen. Odocob qala qahimei ben mi aig qon. Aig oso qoc 30 ihoc len, osooso 60 ihoc len, osooso 100 ihoc len,”<sup>9</sup> odi maadimei maaden, “Oso dah mecnu dahigca je eu dah meiale,” aden.

*Jisas uqa eetanu galolo jena madena eu malogom sildiaden  
(Matju 13.10-17; Luk 8.9-10)*

<sup>10</sup> Odocob dana cajaca mati bahic age buudu beladi hedocobil Jisas uqa cuhanuc bilen saen euna dana age Jisas gami coboinca ugana malogomca age ugana galolo je sildiadecnu sisildoin.<sup>11</sup> Odocobil uqa maaden, “Anut culadeceb age Anutna culnu ceteteh jahunec docnu nijia. Euqa dana cajaca age Anutna cul dunuh qee biley age hahagum bilegina eu age galolo jena je cunug dah megina. <sup>12</sup> Eunu ‘age tului falicdocobil Anut agena silail cagasiadeiaunnu age amagana mele feginaqa qee fogo adena,  
odimeig age dahinigana mele dah meginaqa  
qee dogina,’ en,” aden.

*(Aisaia 6.9-10)*

*Jisas wit aignu galolo je gug sildiaden  
(Matju 13.18-23; Luk 8.11-15)*

<sup>13</sup> Odimei Jisas maaden, “Age galolo je ina gugnu qee fogo adenafo? Qeefi, age galolo je osooso cunug adi fogo adigian?<sup>14</sup> Aig helecnu dana eu uqa Anutna je aig helena.<sup>15</sup> Aig eu jicna tonena eu odiwe dana age Anutna je dah mecebile Seten mahuc humeい je dana waugna tonen eu cedadi len.<sup>16</sup> Aig eu maha meen baibacana tonena eu odiwe dana age Anutna je dah mimeig wawaga ceelecca je eu mahuc ogina.<sup>17</sup> Euqa agedodoc bebeigca qee. Age saen nag himec culumen gahidogina. Odocob Anutna jenu aqati tootooadecca temadecca ageca hocob mahuc wawaga meleec tonena.<sup>18</sup> Aig eu dud geuna tonena eu odiwe dana age Anutna je dah mecebile<sup>19</sup> euqa maha biley jaen agecca, maha cehewan ocnua, cetehe filfi ocnua waug madec eu wawagana humeい Anutna je cilehdocob aig qee qogina.<sup>20</sup> Euqa aig mulu mahana tonena eu odiwe dana age Anutna je dah mimeig u hewi daugdu aig qogina. Eundec leih age aig qoc 30 ihoc legina, leih age aig qoc 60 ihoc legina, leih age aig qoc 100 ihoc legina,” aden.

*Dana age gowoc halna qee jahunegina  
(Luk 8.16-18)*

<sup>21-22</sup> Jisas je tubdu ugana malogom maaden, “Cel cetehe jahunecna nijia eu hibna camasac moqagan. Odocob cel cetehe dana age jahuldoen nijia eu hibna dana cunug foqagan. Eunu oso gowoc umei jo dunuh limei hal dunuh qee tacena, odimei uqa cabal bisul qee jahunina. Euqa uqa gowoc ohisna caqusema.<sup>23</sup> Dana oso dah mecnu dahigcafe je i dah meiale!” aden.

<sup>24-25</sup> Uqa je haun maaden, “Oso uqa docca nijia eu Anut uqa haun utigian. Euqa oso uqa docca qee eu Anut uqa ugana doc nag nijia eu cawaldugian. Eunu cel je dah megina eunu batut cisdoigale! Age dana cajaca gesili ganic dogina, gesiladec eu odi himec Anut ameg age wadacadigian. Odocob Anut uqa cetehe haun adigian,” aden.

*Qala qahi cajenanu galolo je*

<sup>26</sup> Jisas je haun maaden, “Anutna cul eu odiwe dana oso aig ugana cabina helena.<sup>27</sup> Uqa witic us nijina. Cahineg eu cajimei cabi ona. Odocob saen cunug qala qahi bibi bili cajena. Euqa uqa adi qala qahi cajena eu qee dona.<sup>28</sup> Maha ugqadodoc qala qahi bibi bili suldocob ben mi wasena. Casac bagac wasena, odocob bobog qona. Odocob bobog eu li aig ibuldonia. Odocob euna aig qona.<sup>29</sup> Aig wal meceb aig cedi haudocnu saen wele calennu dana eu uqa mahuc getena,” aden.

*Mastet aignu galolo je  
(Matju 13.31-32; Luk 13.18-19)*

<sup>30</sup> Jisas je haun maaden, “Ege Anutna cul eu cel cetehe cinigwe eqan? Cel galolo jena ugana gugnu sildeqan?<sup>31</sup> Anutna cul eu mastet aig cinigwe. Aig eu dana mahana ceheña saen euna eu nag bahic, eu mahana aig cunug wooladena.<sup>32</sup> Euqa dana ceheceb aig eu wasi ben mimei eu gulgulec caji tawena, eu ceheño cunug wooladena. Eu batac meca helena. Eunu man fululec limeig agena teic salafu euna mudeginia,” aden.

*Jisas galolo jena himec maaden*  
(*Matju 13.34-35*)

<sup>33</sup> Jisas uqa dana cajaca Anutna je maaden saen euna uqa galolo jena mati maaden. Dana cajaca age dah mimeig ocnu ihoc eundec doin. <sup>34</sup> Uqa galolo jena himec maaden. Euqa uqa ugana malogom gami cuhanuc biley saenna uqa je cunug sildiad.

*Jisas madeceb fufu ben tilien*  
(*Matju 8.23-27; Luk 8.22-25*)

<sup>35</sup> Deel euna dih wesu meceb Jisas ugana malogom maaden, “Gec, hoiga. Wa gad cagoc leti nahe isec loqale,” aden. <sup>36</sup> Odocob age dana cajaca am eu culadein. Odimeig Jisasna malogom wag tobein. Jisas uqa wele dunuh bibilen age odidih ehudi belein. Wag leihha age gami belein. <sup>37</sup> Odocob gugula ben caleceb fufu gagadic bahic fulududu macas qahi wag dunuh nuaden. Wag eu wa cali bigia odon. <sup>38</sup> Jisasqa uqa wag bigna ilo hetahet men us ninijen ugana malogom tulidumeig madoin, “Iwalgec, hina ege nag odi fadalecnu ec qee cisdolomfo?” doin. <sup>39</sup> Jisas cajimei fufu cahacdud madon. Odimei macas madon, “Malol biliga! Tiliagal!” don. Odocob fufu qee meceb macas tiliac bahic nijen. <sup>40</sup> Odocob Jisas ugana malogom maaden, “Age eetanu cucuiegina? Age wawaga meleeca qeefo?” aden. <sup>41</sup> Odocob age cumun bahic ein. Odimeig age madocobmadocobeeig madein, “I cel dana? Uqa fufu macas qahecca uqa co toodu odosina!” ein.

## 5

*Jisas dana oso uqa buga me qeeca me muden*  
(*Matju 8.28-34; Luk 8.26-39*)

<sup>1</sup> Age Galili wa gad cagoc leti ono isec belimeig Gerasa agena hatuna calein. <sup>2</sup> Jisas uqa wagnadec toni limei nunuen dana oso qalqal hatinnadec cali humei Jisas guludcon. Dana eu uqa buga me qeeca. <sup>3-4</sup> Dana eu uqa qalqal hatinna biloloi. Dana age saen mati hankapnaca sennaca qagoloig, euqa uqa sen didu cagumei hankap fuhudoloi. Uqa gagadic bahic, dana oso uqa cahacdow qee. Eunu oso uqa dana eu hewi qagecw qee. Senna ha qagecw qee. <sup>5</sup> Uqa saensa cahineg witicca qalqal hatinna bibili aluhha cocobi eui ugadodoc deweg meenна ququoloi.

<sup>6</sup> Uqa Jisas onoca hohon fimei guguli humei Jisas jaihna gob cehimei ugana cuha fen. <sup>7-8</sup> Odocob Jisas uqa buga me qee madon, “Buga me qee, hina dana eu culdimeig qisacdgal!” don. Eunu dana eu uqa co suli u eui Jisas madon, “Jisas Anut Ohis Bahic Melah, hina ija eeta oditegan? Ija Anut amegna mahigina, cain me qee mitigaun!” don. <sup>9</sup> Odimei Jisas sisildon, “Hina ijain in?” don. Odocob dana eu jejeg hewi madon, “Ija ijani ‘Mati.’ Ge, ege mati bahic biluquna,” don. <sup>10</sup> Odocob dana eu uqa Jisas ege hatu enedec cain ititacgagaun ec ninidudu madon.

<sup>11</sup> Aria, aluh qeihna onoca qee ho am ben oso sab jiji coboin. <sup>12</sup> Odocob buga me qee age Jisas ninidudu madoin, “Ho eu ageca sulgecem ege ho dewenega dunuh leqan,” doin. <sup>13</sup> Odocobil Jisas uqa cois odoiga aden. Maadeceb age dana culdimeig ho dewenegana lein. Odocobil ho eu 2,000 sanijec odi age cunug gad aqeceb age busali aluh qeihqeqi guguli nu Galili wa gad cagoc dunuh gotoimeig cunugca odi wa cedi ji cal mein.

<sup>14</sup> Odocobil dana ho cofadoloig age eu fimeig busali limeig taunca, jobonca, cabinaca cunug saaadi coboin. Odocobil dana cajaca cunug je eu dah mimeig age eu feqan imeig belein. <sup>15</sup> Age Jisasca humeig dana wele buga me qee mati agena jo bilen eu uqa qila lotoc tacecca dana cisdac meca bibilen fimeig cucuein. <sup>16</sup> Dana leih age Jisas dana buga me qeeca odudenh, ho odadenh amagana fein eundec je cunug saadein. <sup>17</sup> Saaadegin dana cajaca eu age Jisas hina eguna hatu i cculi nuuga ec ninidudu madoin.

<sup>18</sup> Jisas uqa wagna totobon dana wele buga me qeeca eu uqa Jisas ninidudu madon, “Cultecem hinaca belowal!” don. <sup>19</sup> Odocob Jisas uqa cahacdudu madon, “Odi cain. Hina hinana gunna nuimeig hinana eundec Tibud odihen, uqa hinanu waug qocob me mihen eu saadaga,” don. <sup>20</sup> Odocob dana eu uqa hatu eu jobon 10-pela bilein euna cunug cocobi Jisas kobilkobil ben bahic uqa oduden eu cunug saadi cobon. Odocob dana cajaca age je eu dumeig tumatumaein.

*Jairas uqa Jisas cesuldocnu madon*  
(*Matju 9.18-19; Luk 8.41-42*)

<sup>21</sup> Jisas uqa ceseli Galili wa gad cagoc haun leti wa nahe isec cali hocobil dana cajaca mati bahic uqa lan qee culec bibilen uqa cemenug limeig taliddoin. <sup>22</sup> Age bibilegin Juda agena cuha jo ilo oso, ijan Jairas, humei uqa Jisas fimei uqa jaihna toni mahulimei <sup>23</sup> ninidudu madon, “Ija ateni hag ben on, cal migia njija. Uqa medumei cebac biligiannu hina ijaca belimeu eben dewegna magale,” don. <sup>24</sup> Madocob Jisas ugaca belesin.

*Hagca caja oso Jisasna lotoc heweceb me muden  
(Matju 9.20-22; Luk 8.43-48)*

Belecebil dana cajaca mati bahic caji Jisas toodu belein. Age Jisas alildudu gesacgesac belein.<sup>25</sup> Odi bebelegin caja oso uqa hag golac necca bilen cabi gel 12-pela ihoc len.<sup>26</sup> Uqa gaid dana age uqana hag me mudituqaga bili ageca loloi, age cabi oin eu ihoc qee lel. Caja eu uqana meen qaig cunug hagnu ameg adecna cusdon. Euqa dana eu age qee me mudlein. Uqa hag gaid odi nijen, cehnana deweg me qee bahic men.<sup>27</sup> Uqa Jisasnu je dah menu uqa dana cajaca mati gemo cocobi Jisas hibilohuna isec humei uqana lotoc hewi fen.<sup>28</sup> Ge, uqadodoc maden, "Ija uqana lotoc dih qududocominfi ija hag metigian," en.<sup>29</sup> Uqa odi lotoc hewi feceb mahuc golac noloi gatidocob hag medon eu dewegna tebandon.<sup>30</sup> Odocab Jisas uqa gagadic odoc oso deweg cuculdi nueceb tebandumei mahuc falicdumei dana cajaca sisilaadi maaden, "In ijana lotoc qududolia?" aden.<sup>31</sup> Odocab uqana malogom age Jisas madoin, "Dana cajaca kitim bahic hina talilheiga taweiga hina cemeincemein legina ec fagana. Hinaqa in qudutia? ec sisilgagana," doin.<sup>32</sup> Odocabil Jisas uqa in odi odea eunu ameg cijawi coboc fen.<sup>33</sup> Ameg cijawen cocobon caja eu uqa deweg me men eu dumei uqa deweg qeelen cucuui hon. Odimei uqa Jisas jaihna toni mahulimej je cunug mele ija odiga ec sadon.<sup>34</sup> Odocab Jisas uqa caja madon, "Ateni, hina wawin meleec eu me mihia. Hina malol bilecca nuuga. Dewen mehec cobogale," don.

*Jisas Jairas ateg cal men eu madocob calen  
(Matju 9.23-26; Luk 8.49-56)*

<sup>35</sup> Jisas uqa caja je i madodon Juda agena cuha jo ilona gundec leih humeig madoin, "Hina aten cal meia. Hina eetanu iwalguc eu mulug cabi haun utugina?" doin.<sup>36</sup> Odocab Jisas uqa age je odi madodogin qee dah mecwememei Juda agena cuha jo ilo madon, "Cain cuciaguaun. Hina dih wawin meleeiale," don.<sup>37</sup> Odimei Jisas uqa dana cajaca uqa toodocnu cahacadimei Pitaca, Jemsca, Jems waliag Jonca, eudih cedadeceb ugaca belein.<sup>38</sup> Age cuha jo ilo uqana jona calimeig ono dana cajaca mati cegulein age dahoc fafali qada ben qaqqajegin feciaden.<sup>39</sup> Odimei uqa hamol limei maaden, "Eetanu dahoc fafali qada ben qaqqajina? Mel aid uqa qee cal mel. Uqa us nijia!" aden.<sup>40</sup> Odi maadeceb age asaldoin. Odocab Jisas uqa dana cajaca cunug ititacadeceb cali hocobil uqa mel aid memeg anagea malogom cijed ugaca hoin euca dih cedadeceb hamol mel aid nijen euna lein.<sup>41</sup> Odocabil Jisas uqa mel aid eben hewi madon, "Talita kumi,"\* don. Je euna gug eu odi, "Mel aid, ija mahigina, cajaga," don.<sup>42</sup> Madocob mel aid uqa mahuc cajimei cobon. Ge, mel aid eu uqa cabi gel 12-pela odi coboc ihoc len. Odocab age cunug tumatumaimage hahabanaga culeceb bilein.<sup>43</sup> Jisas uqa cahacaden, uqa odonnu je eu cain saadi cobowainnu je gagadic maadimei maaden, "Mel aid sab uteiga jeia," aden.

## 6

*Nasaretdec dana cajaca age Jisas hibemdoin  
(Matju 13.53-58; Luk 4.16-30)*

<sup>1</sup> Jisas cudun eu culimei uqana jobon gug nuen. Uqana malogom toodu belein.<sup>2</sup> Juda agena cuha deelna uqa Juda agena cuha jona limei iwaladen. Dana cajaca mati uqana je dah mimeig tumatumai madein, "Dana i uqana je cunug i anadec on? Uqana doc silecek in uten? Uqa ebenna adi kobolkobol ben odona?"<sup>3</sup> Ege doqona, uqa jo cehec memei mec. Uqa Maria melah. Jemsca, Josefca, Saimonca, Judasca age uqa waliagul. Uqa cebinagul age ene age gemona bileyina," ein. Age uqanu wawaga me qee meceb cecewudi bilein.<sup>4</sup> Odocabil Jisas uqa maaden, "Je hahun madec dana oso uqana gug jobon qee euna age uqana je dumeig uqa saolal mudencu nijia. Euqa uqana hatunaca, uqana gug jobonnaca uqana eundec age uqa cewudegina," aden.<sup>5</sup> Ono Nasaret jobon uqa kobolkobol meca qee odol. Euqa uqa eben leih hagca dewenega hewadeceb meaden.<sup>6</sup> Odimei uqa age wawaga meleecca qeenu tumatumae.

*Jisas uqana malogom 12-pela suladeceb belein  
(Matju 10.5-15; Luk 9.1-6)*

Jisas jobonnana nunui dana cajaca iwallaadi cobon.<sup>7</sup> Odimei Jisas uqana malogom 12-pela utaadeceb hocobil uqa buga me qee dana deweneganadec ititacadecnu cabi eu ebenegana men. Odimei uqa lecislicis suladeceb belein.<sup>8</sup> Odimei je gagadic maaden, "Age jic cobocnu ceteh oso cain hewowain. Euqa agena jic coboc komca himec coboiga. Sabca qee, badomca qee, oologamma meen qaigca qee eu odi jic coboiga.<sup>9</sup> Age jaimaga tacimeig qa lotoc lecis cain tacowain. Osol himec taceiga," aden.<sup>10</sup> Uqa maaadi maaden,

\* 5:41: Je madec i Aram je, eu Jisas uqana je madec gug bahic.

“Age jo casac dunuh loqagan jo osol euna himec bibileig li jobon eu culimeig beleiga. <sup>11</sup> Odocob jobon oso age oiadecnru agena je ha dah mecnru culecebilfi age cuculadi beloqaga bili comis jaimagana fagdon eu qoidu heleiga. Age eu fimeig age Anut amegna me qee odoin eu doqagannu odi odoiga,” aden. <sup>12</sup> Eunu age belimeig dana cajaca agena silailnu tului falicdqagannu je qasali maadein. <sup>13</sup> Odimeig age buga me qee mati dana deweneganadec ititacadimeig mool dana caja hage mati joiadecbil me madein.

*Herod uqa Jisasnu Wa Joadec Jon ec cisdon*

(*Matju 14.1-12; Luk 3.19-20; 9.7-9*)

<sup>14</sup> Saen euna Jisas uqana odocnru je eu hatu cunugna ihoc len. Eunu King Herod uqa Jisasna odocnru hutan don. Leih age madein, “Wa Joadec Jon uqa cal mecnadec ceseli cajen! Eunu gagadic odoc i uqa dunuh cabi ona,” ein. <sup>15</sup> Euqa leih age madein, “Uqa Ilaija,” ein. Leih madein, “Uqa Anutna je hahun madec dana eu odiwe je hahun madec dana weledec,” ein. <sup>16</sup> Euqa Herod je eu dah mimei maden, “Jon ija be cagom qa uqa haun ceseli cajen!” en.

<sup>17-18</sup> Ge, wele Herod uqa waliag Filip aideg, Herodias, on. Odocob Jon uqa li Herod madon, “Hina walin aideg om eu tutuc qee,” don. Eunu Herod uqana han dana suladeceb age li Jon hewi libimeig gihacdor jona mudein. <sup>19</sup> Odocob Herodias uqa Jon ameg me qeena wadacduigiannu cisdon. Qocob cal migiannu en qa uqa ihoc qee. <sup>20</sup> Ge, Herod uqa Jon dana me bahic, uqa dana ititon eunu don. Eunu Herod uqa Jonnu cucuien. Odimei uqa Jon me cofdon. Herod uqa Jon je madeceb dah men saen euna uqa geh cisdumei waug culumen doloi qa uqa Jonna je dah mudynecu gaid gale doloi.

<sup>21</sup> Hibna Herodias Jon qocob cal mecnru jic gulucedon. Herod uqa anag basen deel cali hon. Odocob Herod uqana cabi dana benbenca, uqana han dana agena iloiloca, Galili agena aqunec danaca agenu ja qon. <sup>22</sup> Odocob Herodias ateg dunuh limei due duen. Odocob Herod uqa uqana danahca mel aid eunu gale aden. Eunu Herod uqa mel aid eu madon, “Hina cel ocnu gale hena eunu sisiltaga, odocob ija ihigen,” don. <sup>23</sup> Odimei je hahun utimei madon, “Hina cel ceteh sisiltecemfi eu ihigen. Ijana cul naha ihoc lec euna gadac odi ihigen!” don.

<sup>24</sup> Odocob mel aid eu cali li anag sisildon, “Ija cel ceteh ocnu sisildugen?” don. Anag jejeg hewi madon, “Wa Joadec Jon ilo u itiga ec madoga,” don. <sup>25</sup> Odocob mel aid eu mahucwe ceseli kingca limei madon, “Ija hina qila bahic Wa Joadec Jon ilo bohna mimeg ahutaga tena!” don. <sup>26</sup> Mel aid odi madocob king uqa geh bahic waloc don qa uqana je cagocnru, uqana danah amagana odonna uqa je mel aid madon eu hawadocnru qee gale dol. <sup>27</sup> Odimei uqa mahuc uqana cofdoc han dana oso madu suldocob Wa Joadec Jon ilo uu ahugiannu nuen. Odocob uqana cofdoc nui gihacdor jona Wa Joadec Jon be cagon.

<sup>28</sup> Odimei uqa bohna mimei ehi limei mel aid uten. Odocob mel aid uqa ehi li anag uten. <sup>29</sup> Odocob Jonna malogom age je eu dah mimeig age hu Jon deweg loton u ehi li mein hatin qalqai osona mudein.

*Jisas dana 5,000 sab aden*

(*Matju 14.13-21; Luk 9.10-17; Jon 6.1-13*)

<sup>30</sup> Odocob aposel ceseli Jisasca humeig ceteteh cunug odoinnuca iwaladeinnuca sadoin. <sup>31</sup> Euqa dana cajaca mati bahic lili huhueegin Jisas uqana malogomca sab jecnu saenca qee. Eunu Jisas malogom maaden, “Hoiga, ege cuhanuc belimeb cudun leihna age nag odi jaen muduqagan,” aden. <sup>32</sup> Odocob age cuhanuc wag umeig cudun tiliecnra belein.

<sup>33</sup> Aria, dana cajaca mati bahic bebelegin meciadimeig age ail eu wele doin i age guguli taun cunug wooldodoig age casac maha toodoo cocobi cudun euna Jisas uqana malogomca medemega cagu calein. <sup>34</sup> Odocobil Jisas lanna tonimei dana cajaca am ben tatawegin fen. Odocob uqa age sipsip cofadecca qee cobogina odiwe bilein eunu agenu waug qon. Odimei uqa age ceteteh mati bahic iwaladecnru sanan men. <sup>35</sup> Saen wele hedodon uqana malogom uqaca humeig madoin, “Cudun i filec cagocna bahic, odocob saen wele hedonia. <sup>36</sup> Dana cajaca i age hatu alildoc belimeig jobon osonana agena sab jecnu fajqagannu suladaga,” doin. <sup>37</sup> Euqa Jisas malogom maaden, “Age sab jec adeiga,” aden. Odocob age jejeg hewi madoin, “Hina ege nui kina 200na bred fajimeb adocomun joqagannu madaganafo?” doin. <sup>38</sup> Odocobil Jisas maaden, “Age bred ganicca? Li feiga,” aden. Odocob age li fimeig madoin, “Bred 5-pela, cul dool lec исца himec bilia,” doin.

<sup>39</sup> Odocobil Jisas uqa dana cajaca age am qatanimeig gigisac mena bileiga ec maaden. <sup>40</sup> Odocob dana cajaca am qatanimeig bilein. Age am sanijec 100ca 50ca odi bilein. <sup>41</sup> Odocob Jisas bred 5-pela cul dool lec исца u hewimei sao jobon tatiimei Anut hetaga doc je madumei bred fenifeni malogom adeceb age dana cajaca siwiadein. Odimei uqa cul dool lec исца feni calcaldumei dana cajaca siwiadeceb cunug ihoc len. <sup>42</sup> Odocob age

cunug jecebile li ihoc len. <sup>43</sup> Odocobil malogom age bred cul doolca jecefanaga eundec galel 12-pela tacecebile am ben. <sup>44</sup> Bred jein eundec age cunug eu dana 5,000.

*Jisas Galili wa tatacan cobon  
(Matju 14.22-23; Jon 6.16-21)*

<sup>45</sup> Mahuc bahic Jisas uqana malogom cesusadecel age wagna tobimeig age aqunitu Galili wa gad cagoc na ha isecnu Betsaida jobon belein. Bebelegin uqa dana cajaca qaqqacitegin cofaden. <sup>46</sup> Uqa dana cajaca culadi hedocob uqa Anut inondudu bielecnu aluh guhidocna ten. <sup>47</sup> Wele tu hohon wag eu wa gad cagocna len. Jisas uqa cuhanuc mahana bilen. <sup>48</sup> Odimei fufu ben malogom olanagana isec fuludonnu uqa age wag culum hewecnu abuldodogin meciaden. Odimei walag danigia oodon Jisas uqa wa tatacan cocobi ageca len. Uqa age wooladigia odon. <sup>49</sup> Euqa age uqa macasna cocobon fimeig dol oso cobona imeig euein. <sup>50</sup> Ge, age cunug fecidumeig age qeleti filicitein. Euqa Jisas mahuc maaden, “Cain cucuiwain! Ija ihen. Age wawaga toogdoiale!” aden. <sup>51</sup> Odimei uqa wagna ageca tobi ten. Odocob fufu tilien. Uqana malogom tumatumaein. <sup>52</sup> Ge, age Jisas uqa dana cajaca bred siwiaden uqana gug qee fogo adel. Euqa age wawaga tool ibuldon.\*

*Jisas dana cajaca geh bahic Genesaret hatuna me maden  
(Matju 14.34-36)*

<sup>53</sup> Age wa gad cagoc leti hu Genesaret hatuna hoin. Ono age wag lanna qagein. <sup>54</sup> Age wag tobocabil dana cajaca age Jisas wele fein ec mahuc doin. <sup>55</sup> Odimeig age hatu cunugna guguli belimeig dana caja hagca agena gabagabna ninijegin hewadi li Jisas ana bilia ec doin euna uqaca ahoin. <sup>56</sup> Jisas anaanaa cocobon, eu jobon nagfo, jobon benfo, cudun gaucfo, age idadec cudunna dana caja hagca cedi hewi madecebile nijoloig. Odimeig agena hag me madigiannu ninidoloig. Age uqana lotoc himec qududocnu ninidoloig. Odocob cunug age uqana lotoc qududoin eu me moloig.

## 7

*Anutna loo je Farisica agena loo je wooldon  
(Matju 15.1-9)*

<sup>1</sup> Saen euna Farisica loo je iwaladec leihca Jerusalemdec humeig Jisasca cegulein. <sup>2-4</sup> Farisica Juda dana cunugca age jajanagail agena kobol toodu ebenega casac cusimeig sab jeginanu. Age ebenega qee cusec sab qee jeginanu. Odimeig age idadec cudunna limeig ceseli hu saen euna age ebenega qee cusifeig qee jegina. Juda age kobol geh bahic ha toodu odoginanu. Eu odi age gabin cusegina, hal cusegina, boh bronsna mudec cusegina.\* Odocob Farisica loo je iwaladecca age Jisas uqana malogom leih age ebenega gegehin wa qee cusec sab jejegin fein.† <sup>5</sup> Odimeig age Jisas sisildoin, “Eetanu hinana malogom kobol ege jajanagail iwalgein eu qee toodu odogina qa ebenega gegehinca sab jeginar?” doin. <sup>6</sup> Odocob Jisas jejenega hewi maaden, “Je hahun madec dana, Aisaia, uqa age me hihilci coboc dananu mele bahic madi maden. Uqana je odi jaqen:

‘Dana cajaca i age conogana binani sulegina  
age wawagaqa eu qisactec bilina.

<sup>7</sup> Eu age dana agena loo je iwaladegina eu Anutna loo je, egina.

Eunu age ijanu gauc cuha fegin,’ en.

*(Aisaia 29.13)*

<sup>8</sup> Anut uqa age odi odoiga ec gagadic maaden eu qisacdu bilimeig dana iwaladec gagadic hewegina,” aden.

<sup>9-13</sup> Jisas je haun maaden, “Moses maden:

‘Hina anin memanca lalan malagale,’ en

*(Kisim Bek 20.12; Loo 5.16)*

Odocob Mosesha maden:

‘Oso memegfo, anagfo geuldecnu je madecebfi uqa cal migian,’ en.

*(Kisim Bek 21.17; Wok Pris 20.9)*

Ageqa madegina, ‘Dana oso uqa anag memegca cesulalecnu cetehcafci euqa uqa maalena, “Ceteh i ija alecnu ihoc eu, ‘Koban,’‡ ija Anut utigennu wele qagu abes mem,” alena dana eu uqa anag memegca nag oso cesulalecnu cain odoiaun,’ egina. Eunu age kobol jajanagail oin eu odi toodu odoginana Anutna je cilehdogina. Agena kobolha dana leih haun iwaladegina. Age odoc eundec matiha odi odogina. Odimeig age dana agena

\* **6:52:** Malogom age Jisas uqa dana cajaca bred siwiaden eu fein, euqa age Jisas uqa Anutna Krais eunu qee wawaga meleecna bilein. Eunu age wawaga tool ibuldocbil age Jisas uqa macasna cocobon fimeig qeleti filicitein. \* **7:2-4:** Age je Matju 15.2na nijia eu feiga.

† **7:2-4:** Age je Matju 15.2na nijia eu feiga.

‡ **7:9-13:** Koban eu Aram je. Uqana gug eu “ija Anut utigen.”

iwaladec eu toodu odoqagannu age Anut je gagadic maaden eu culegina eu me bahic ec cisdogina!” aden.

*Jisas uqa ceteteh dana gegehinca mudina eunu maden  
(Matju 15.10-20)*

<sup>14</sup> Odimej Jisas uqa dana cajaca utaadeceb hocobil maaden, “Ija dah miteiga. Cunugca du cuhadoigale. <sup>15-16</sup> Ceteh oso dana hibilohu bilina eu dana dunuh limei gegehin qee mudina. Euqa ceteteh dana waug dunuhnadec cali hona eu dana gegehin mudina. [Dana oso dahigafi je i dah meiale!]” aden.

<sup>17</sup> Odimej uqa dana cajaca culadi jo hamol leceb uqana malogom age uqana galolo jenu sisildoin. <sup>18-19</sup> Odocobil Jisas maaden, “Ageha wawaga qee fogo donafo? Ceteh cunug dana hibilohudec dana dunuh limei eu uqa cul dunuh qee lena qa uqa waug big anag dunuh limei dana bahu nuecna cali hona. Eunu ceteh eu dana gegehin qee mudina eu qee feginaflo?” aden. Eunu je euna Jisas uqa Anut amegna sab cunug jecnu soidoc nijia ec maden. <sup>20</sup> Odimej je haun maaden, “Ceteh dana dunuhdec cali hona eu dana gegehin mudina. <sup>21</sup> Ge, dana waug dunuhnadec ceteh gegehinca cali hona eu odi, cisdoc me qeeca, wal kobol odochca, heje occa, dana qocca, dana osona caja occa, <sup>22</sup> ameg qocob ceteh occa, qisol mecca, uhulec jeca, wal kobol majagca qee odochca, um qoc madecca, deboi cobocca, osona ceteh feceb gale docca, gad odochca eu cali hona. <sup>23</sup> Odoc me qee eu cunug dana wawaga dunuhdec cali hona, odocob age dana gegehin mudadegina,” aden.

*Caja Finisiadec uqa Jisasnu waug meleen  
(Matju 15.21-28)*

<sup>24</sup> Odocob Jisas cali humei hatu eu culimei Taia Saidonca alena hatuna nui bilen. Odimej uqa jo oso dunuh hamol li bilen. Dana uqa ono bilia eu cain dowainnu gale don qa uqa jahuni bielecw qee. <sup>25</sup> Euqa mahuc caja oso uqa ateg buga me qeeca uqa Jisas bilennu dumei uqa Jisasca humei jaihna toni mahulen. <sup>26</sup> Caja eu Juda qee, uqa anag Finisia hatu ono basen. Siria age Finisia cofdoin. Odimej uqa Jisas buga me qee ateg deweg bilen eu ititacdocnu ninidon. <sup>27</sup> Odocob Jisas madon, “Mel agena sab cedi qa heliadec eu kobol me qee. Eunu ege mel casac sab adoqona,” don. § <sup>28</sup> Odocob caja jejeg hewi madon, “Mele Tibud, euqa mel sab jejegin jecefanganaga golodocob qa age cabal bisalu bilegina eu hu cedicedi jegina eu odi qeefo?” don. <sup>29</sup> Odocob Jisas caja madon, “Hina je me bahic wadacdutaga. Eunu gad ceseli nuugale. Buga me qee hina aten culdi qisacdoia eu fegan!” don. <sup>30</sup> Odocob caja jobon ceselimei uqa ateg cabalna us ninijen fen, buga me qee wele culaldi qisacdon.

*Jisas dana oso uqa dahig coca cufa qoc me muden*

<sup>31</sup> Jisas uqa Taia agena hatu culimei uqa Saidon taun isec hu jobon 10-pela agena hatuha gemona cocobi Galili wa gad cagocna ceseli hon. <sup>32</sup> Ono hon bibilen age dana oso ehudi uqaca hoin. Dana eu uqa dahig coca cufa qoc, je madecw qee. Age Jisasca humeig ninidudu madoin, “Hina eben uqa dewegna magale,” doin. <sup>33</sup> Odocob Jisas uqa dana eu ehudi filecna ehi li muden. Jisas dana euca dih bibilesti uqa eben gic dana dahigna mimei ebenha sahalic qumei dana beilah qududon. <sup>34</sup> Odimej uqa tatiimei hooli maden, “Effata,”\*\* en. Je eu uqana gug eu “Fogo heia,” en. <sup>35</sup> Jisas odi madeceb dana eu dahig fogo don. Uqa beilah qagecw bilen eu filihicdocob uqa je tutuc maden. <sup>36</sup> Jisas uqa oduden eu dana oso sadowainnu cahabaden. Jisas je eu saadecnu gagadic bahic cahabaden, euqa age feei dana cunug doqagannu saadi coboin. <sup>37</sup> Odocobil dana cajaca age je eu dah mimeig ben bahic tumatumai madein, “Uqa ceteteh cunug me odooin. Ge, dahiniga cufa qoc coboin eu uqa odocob dah megina! Conoga cufa qoc eu uqa odocob je madegina!” ein.

## 8

*Jisas uqa dana 4,000 sab aden  
(Matju 15.32-39)*

<sup>1</sup> Saen euna dana cajaca mati bahic haun hu cegulein. Age sab jecca qeenu Jisas uqana malogom utaadeceb uqaca hocobil maaden, <sup>2</sup> “Dana cajaca i age qila deel cijed ija gami biluquna age sab jecnu qee. Eunu ija agenu walol tena. <sup>3</sup> Ija age sab qee adec gauc agena jobon suladecemun belifeig jicna wenu lehanaga culigian. Ge, leih age jic cecelac bahic hoigan,” aden. <sup>4</sup> Odocob uqana malogom jejeg hewi sisildoin, “Wadau edi ene oso dana i age sab adi adeceb joqagan?” doin. <sup>5</sup> Odocobil Jisas sisiladi maaden, “Age bred ganic heweiga?” aden. Odocob madoin, “Bred 7-pela nijeiga,” doin.

§ 7:27: Juda sihul eu mel. Juda dana qee eundec age qa. Age je Matju 15.26na nijia eu feiga. \*\* 7:34: Je madec i Aram je, eu Jisas uqana je madec gug bahic.

<sup>6</sup> Odocob uqa dana cajaca am maadeceb mahana bielein. Odimei bred 7-pela cedimei Anut hetaga dumei fenifeni malogom dana cajaca siwiadecnu aden. Odocob malogom age ehi li dana cajaca siwiadein. <sup>7</sup> Age cul dool nag leihha hewein. Jisas Anut hetaga dumei uqana malogom maadeceb euha dana cajaca siwiadein. <sup>8</sup> Dana cajaca cunug jecebile biniga hon. Odimeig malogom age jecefanganag golodon eu mahanadec cedimeig galel 7-pela tacecebile am ben. <sup>9</sup> Dana cajaca cunug sab jein eu sanijec 4,000 odi.

<sup>10</sup> Odocobil Jisas uqa dana cajaca maadeceb qacitein. Odocobil uqa uqana malogom gami mahuc wagna tobimeig nui Dalmanuta agena hatuna li bielein.

*Farisi age Jisas kobolkobel oso odocob foqagannu madoin  
(Matju 16.1-4)*

<sup>11</sup> Saen euna Farisi leih age Jisasca hocobil uqaca fee dadanein. Age Jisasna cabi eu Anutnaadefo, qeqo fegan imeig temdochnu age uqa kobolkobel oso odocob gaga eu fegan ec madoin. <sup>12</sup> Odocobil Jisas deweg dologca cisdock cunug culumen dodon hooli maden, “Eetanu dana sihul qila bilegina age gaga oso fecnu walegina? Ija mele maadigina, dana cajaca i qila bilegina age gaga oso qee fowain!” aden. <sup>13</sup> Odi maadimei cuculadi wagna tobi ten. Odimei haun wagna ceseli wa gad cagoc naaha isec li bilen.

*Farisica Herodca agena jisnu galolo je  
(Matju 16.5-12)*

<sup>14</sup> Malogom age beloqaga bili bred tacecnu dahiniga celen. Odimeig bred osol himec hewein eu wagna nijen. <sup>15</sup> Jisas doqagannu je maaden, “Dah meiga, age Farisica Herodca agena bred gug qoc ibuldocnu jisnu ageca hoiaunnu batut feigale,” aden. <sup>16</sup> Odi maadecib malogom age togodudu madein, “Ege bredca qeenu mageia,” ein. <sup>17</sup> Jisas uqa age eunu togododogin dumei maaden, “Age eetanu bred qee hewelein eunu togodudu madegina? Age qila qee doginafo? Age wawaga qee fogo dolfo? Age wawaga tool ibuldonfo? <sup>18</sup> Age amagacaqa qee feginafa? Age dahinigacaqa qee dah meginafo? Odocob age qee cisdoloinfo? <sup>19</sup> Ija bred 5-pela fenimig dana 5,000 siwiadem saen euna age jecefanganag eundec galel ganic tacecebile am ben?” aden. Odocob jejeg hewi madoin, “Ege 12-pela tacom,” doin. <sup>20</sup> Odocobil Jisas haun sisiladen, “Ija bred 7-pela fenimig dana 4,000 siwiadem saen euna age jecefanganag eundec galel ganic tacecebile am ben?” aden. Odocob jejeg hewi madoin, “Ege 7-pela tacom,” doin. <sup>21</sup> Odocobil maaden, “Age qila qee fogo adelfo?” aden.

*Jisas dana oso uqa Betsaidadec, uqa ameg galuc mec me muden*

<sup>22</sup> Age Betsaida jobon ono calein. Odocobil dana cajaca leih age dana oso ameg galuc mec eu ehudi Jisasca humeig eu eben hewi figiannu ninidoin. <sup>23</sup> Odocobil Jisas dana eu eben hewi ehudi jobon hacna limesi sahalic u amegna mimei uqa eben ilona mimei sisildu madon, “Hina ceteh oso faganafa?” don. <sup>24</sup> Odocob dana eu camalimei madon, “Ija dana cocobogin feciadigina qa age na cinigwe feciaadigin cobogina,” don. <sup>25</sup> Odocob Jisas uqa dana eu haun ceseli eben amegna men. Odocob dana eu gagadic bahic mecieen ameg me fogo don. Ceteh cunug eu uqa cataniec fen. <sup>26</sup> Odocob Jisas uqa dana eu uqana gun nuigiannu suldudu madon, “Hina jobon ina cain lagaun,” don.

*Pita uqa Jisasnu Krais ec qasali maden  
(Matju 16.13-20; Luk 9.18-21)*

<sup>27</sup> Jisas uqana malogomca cocobi li Sisaria Filipai ono jobon osona belein. Jic cocoboig uqa malogom sisiladen, “Mateiga, dana age ijanu in egina?” aden. <sup>28</sup> Odocob age jejeg hewi madoin, “Leih age Wa Joadec Jon eu hina ec madegina. Leih age Ilaija eu hina ec madegina. Leih age je hahun madec dana oso eu hina ec madegina,” doin. <sup>29</sup> Uqa haun sisiladi maaden, “Ageqa, ijanu in egina?” aden. Odocob Pita jejeg hewi madon, “Krais eu hina,” don. <sup>30</sup> Odocob Jisas uqana malogom cahacaadi maaden, “Age ijanu leih Cain maadi cobowain,” aden.

*Jisas uqa cal mimei ceseli cajigian ec maden  
(Matju 16.21-28; Luk 9.22-27)*

<sup>31</sup> Saen euna Jisas uqa uqana cal mecen uqana malogom maadeecn sanan mimei maaden, “Dana Melah uqa deweg sogoeb ben gahidugian. Juda agena matuca, ihanec dana benbenca, loo je waladecca age Dana Melah hibemdumeig uqa qocobil cal migian. Odimei uqa deel cijed hedocob haun ceseli cajigian,” maaden. <sup>32</sup> Jisas uqa je eu camas

\* **8:29:** Casac jejeg oso sao ohisdecca (eu Mak 1.11 feiga), buga me qee leihca (eu Mak 1.24ca, 3.11ca, 5.7ca feiga eu age Jisas uqa in bahic ec ein). Euqa malogomca, dana cajaca age Jisas uqa cel dana eu qee doloin. Qilaqa malogom osol uqa Jisas eu Krais ec camas maaden. Uqa dana Anut uqana dana caja caahahaadecnu wele nesili ehuden.

maadeceb Pita uqa Jisas ehudeceb gesacna limesi uqa Jisas cahacdudu madocnu sanan men.<sup>33</sup> Euqa Jisas falicdu ugana malogom feciadimei Pita cahacdudu madon, “Se, Seten, hina Anut madena eu odi qee madelem. Hina dana mahanadec cisdoc toodu matagana. Eunu cuculti nuuga!” don.

<sup>34-38</sup> Odimei uqa dana cajaca ugana malogomca utaadebceq uqaca hocobil maaden, “Dana oso uqa ijanu ijana jenuca silail dana cajaca qila bilegina eu age Anut hibemdoein eu amagana majag docobfi saen Dana Melah uqa Memegna kobilkoblnaca ensel gunca humei uqa dana eunu majag dugian. Odocob dana oso mahamaha cehewan cunug oialumiqa ugana cebac biley qee moubmi cehewan on eunu me biloubof? Dana uqa ugana cebac biley eu culecebf cel cetehna ugana cebac biley ceseli besi ocnu fajudigian? Eunu oso uqa ugana cebac biley caahadugia odona eu uqa ugana cebac biley felacudigian. Odocob oso uqa ijana bilina eunuca me je qasali maadena eunuca ugana cebac biley felacudecebf eu uqa ugana cebac biley caahadugian. Eunu oso uqa ijanu madi, ija uqa jaih ceen lahadudu toodugen, ena eu ugadodoc deweni me biligian ec cain madeiaun qa uqa ugana na babalec hewi gahidumei tooteiale,” aden.

## 9

<sup>1</sup> Odocob Jisas maaden, “Ija mele maadigina, leih age ene taweginu eu age qee cal nec ninijeb Anutna cul gagadic odocca hohob mecidoqagan,” aden.

*Jisas deweg fil ibuldon  
(Matju 17.1-13; Luk 9.28-36)*

<sup>2</sup> Deel 6-pela hedocob Jisas uqa Pitaca, Jemsca, Jonca cedadimei ehadi aluh ohis osona dana oso qee biley euna ti cuhanuc biley. Ono bibilegin Jisas uqa age amagana ibuldon. <sup>3</sup> Uqana lotoc senenec bahic faleen, ugana senenec eu dana mahanadec age lotoc cuseginawee qee. <sup>4</sup> Odocob ugana malogom age Moses Ilaijaca ale hocobil Jisasca je togododogin feciadein. <sup>5</sup> Odi bibileig Pita uqa fimei Jisas madon, “O Meca, ege ene odi bileyne eu me bahic. Ege ene talah jo cijed ceheqan, oso hinana, oso Mosesna, odocob oso Ilaijana,” don. <sup>6</sup> Ge, uqa malogomca age geh bahic cucuiein eunu uqa cel je madena eu qee dol. <sup>7</sup> Uqa je eu madudu bibilen taen oso ni jahuladen. Odocob taennadec jejeg oso camas mimei maden, “Ija melami nelugca ihen. Age uqa jejeg toodu odoiga,” en. <sup>8</sup> Odocob mahuc age taliddu meciimeig oso ageca tatawen qee felein, euqa Jisas himec age cemenega tatawen fein.

<sup>9</sup> Age aluhnadec totoni Jisas malogom cijed je gatiti maaden, “Dana Melah cal mecnadec qee cajec ninijeb je ioso Cain doiaunn qila feiga eu oso Cain saadowain,” aden. <sup>10</sup> Age uqa co toodoin qa age gemona agedodoc ceteh eunu togodudu madein, “Cal mecnadec ceseli cajec eu eeta?” ein.

<sup>11</sup> Odimeig age Jisas sisildoin, “Eetanu loo je iwaladec age Ilaija uqa aquni hugian engina?” doin.\* <sup>12</sup> Odocobil Jisas jejenega hewi maaden, “Ilaija uqa mele aquni hugian, humei ceteh cogogen eu cunug tutuc mudigian. Euqa eetanu Anutna je age Dana Melahnu jaqein, uqa deweg sogoe mati bahic gahidocob dana cajaca cunug age cewudoqagan ec odi jaqein? <sup>13</sup> Euqa ija maadigina, Ilaija uqa wele hon. Hocob dana agedodoc wawaga maden eu age uqa odudein. Eu oduduqagan ec wele uqanu jaqeinwe odi odudein,” aden.

*Jisas mel oso buga me qeeca me muden  
(Matju 17.14-21; Luk 9.37-43)*

<sup>14</sup> Jisas malogom cijedca age malogom leih gami gabandumeig age dana cajaca mati bahic ceguli talilaadegin fein. Ono loo je iwaladec age malogom gami jena file dadaneegin fein. <sup>15</sup> Odocobil dana cajaca age Jisas caleceb fimeig age geh bahic filicitein. Odimeig mahuc age ugaca guguli limeig feele dudu madoin.

<sup>16</sup> Odocobil Jisas uqa sisiladen, “Age, age gami eeta togodoiga?” aden.

<sup>17</sup> Odocob dana oso dana cajaca amnadei Jisas madon, “Iwalgec, ija melami uqa buga me qeeca, uqa je madecwe qee. Eunu ija ehudi hinaca ahuga. <sup>18</sup> Buga me qee hu hewena saen euna qu ihu qocob mahana tonimei sahalic magmagdodoi maig kicodudu deweg kieceb gagadic mena. Ija hinana malogom ititacdoqaganu maadigaqa age ititacdocnu odoiga ihoc qee,” don.

<sup>19</sup> Odocob Jisas uqa je eu dah mimei maaden, “O dana cajaca qila bilegina, age wawaga meleecca qee! Saen ganic ija ageca haun biligen? Saen ganic ija camuhulaadi cobigen? Mel eu cemeni ehudi ahoigale,” aden.

\* **9:11:** Loo je iwaladec dana age cit qoc saennu je oso iwaladein. Je ugana gug eu Malakai 4.5-6. Age Ilaija uqa Krais aquuniti cali hugian ec madein.

<sup>20</sup> Odocob age mel eu Jisas amegna ehudi ahoin. Odocobil buga me qee eu Jisas fimei mahuc mel eu qu ihu qocob mahana tonimei coliwcolowi niniji sahalic magmagdon.

<sup>21</sup> Odocob Jisas mel memeg sisildon, "Cel saen bahic hag eu mel dewegna sanan men?" don.

Odocob memeg madon, "Mel nagna bahic saen euna sanan muden. <sup>22</sup> Saen mati mel eu deweg tudugianwu odudeceb jana lena, odime wana nuina. Euqa hina ceteh oso odocnu ihocfi hina egenu wawin qocob cesulgagale," don.

<sup>23</sup> Odocob Jisas madon, "Eetanu hina mataga, 'Hina odocnu ihocfi,' taga? Oso waug meleeccafi eeta cunug uqa odocnu ihoc," don.

<sup>24</sup> Odocob mahuc memeg utai bilei madon, "Ija wawi meleenaqa ijana wawi meleec eu gohic. Eunu ijana wawi meleec cesuldogale," don.

<sup>25</sup> Odocob Jisas uqa dana cajaca mati bahic hu gabandu alilaadegin fimei uqa buga gegehinca cahacduu madon, "Hina buga con dahinca cufa qoc, ija je gagadic mahigina, hina melnadec cali hu nuuga. Hina mel deweg dunuh eu haun cain lagaun," don.

<sup>26</sup> Odocob buga me qee qajimei mel eu hewi qu me qee mudi ihu qocob tonimei mahana ninijen cali hu nuen. Mel eu cal nec cinigwe nijen. Odocob dana cajaca cunug madein, "Mel cal meia," ein. <sup>27</sup> Euqa Jisas mel eu eben umei cesuldocob caji tawen.

<sup>28</sup> Odocob Jisas uqana malogomca age jo oso dunuh limeig uqana malogom jahuni sisildoin, "Eetanu ege buga me qee eu ititacdocwe qee?" doin.

<sup>29</sup> Odocobil Jisas jejenega hewi maaden, "Inondocna† himec buga me qee eundec ititacdocob cali hu nuina, ceteh osona ihoc qee," aden.

*Jisas uqa cal mimei ceseli cajigian ec madi lecisdon  
(Matju 17.22-23; Luk 9.43-45)*

<sup>30-31</sup> Odocob Jisas uqana malogom gami jobon eu culdi Galili hatu gemogemo coboin. Uqa uqana malogom iwalaadi bilei maaden, "Dana Melah eu dana ebenegana mudecebil age uqa qocobil cal migian. Cal mimei uqa deel cijed hedocob haun ceseli cajigian," aden. Eunu uqa dana age ono bilina ec docnu culen. <sup>32</sup> Euqa age je eu uqana gugnu wawaga qee fogo dol. Odimeig age je gugnu sildiadecnu sisildocnu cucuiein.

*In oso cunug wooladi ben biligian?  
(Matju 18.1-5; Luk 9.46-48)*

<sup>33</sup> Age Kapaneam jobon ono calimeig jo oso dunuh li bibileig Jisas uqa uqana malogom sisiladen, "Age cel je jicna togododigin duga?" aden. <sup>34</sup> Euqa age jicna agedodoc gemona in oso cunug wooladi ben bilinanu togodoin. Eunu age je madecnu culein. <sup>35</sup> Odocobil Jisas uqa bilimei uqana malogom 12-pela utaadimei maaden, "Oso uqa matu bielecnu waug nijinafi uquadodoc hib bahic mudigian. Odimei uqa cunugnu cewel dana migian," aden. <sup>36</sup> Odimei uqa mel sim oso u uqa age gemona mudeceb tatawen uqa eben u colowandumei maaden, <sup>37</sup> "Oso uqa mel sim eundec oso ija ijanina ehudimei eu eeldona eu uqa ija oitimei eeltena. Odocob oso uqa oitimei eeltena eu uqa ija dih qee oitinaqa ija sulten euha ehudimei eeldona," aden.

*Oso egena cad qee bilina eu uqa egena danah bilina  
(Luk 9.49-50)*

<sup>38</sup> Odocob Jon uqa Jisas madon, "Iwalgec, ege dana oso hina ijainna buga me qee eundec dana deweneganadec ititacaden fom. Uqa egena amnadeb qee biled. Eunu ege uqa cahacdom," don. <sup>39-41</sup> Euqa Jisas maaden, "Oso uqa ijanina kobolkobol odimei uqa saen nag giieceb ijanu je me qee madecnu ihoc qee. Oso uqa ege qee me qee migina eu egenu tawena. Ija mele madigina, oso age Kraisna eundecnu cesuladimei wa gab oso adena eu uqa hibna ameg me bahic ugian. Eunu age Cain cahacdowain," aden.

*Kobol me qee dana uqana waug meleec odocob qee migian  
(Matju 18.6-9; Luk 17.1-2)*

<sup>42</sup> Jisas odi maadi maaden, "Oso uqa mel sim i eundec oso uqa ijanu waug meleena eu odudeceb silail migiaqa eu meen ben culumenca bena qagi macas ameg nijia euna age heloubmi eu me odoub. <sup>43-44</sup> Odocob hina eben leciscia oloqaniih jana ja cijeceb catanena euna helihecebilecnu eu me qee bahic.‡ Euqa hina eben osolca qee cebac biley catanec ogaqa eu me. Eunu hina eben silail mecnu mana tawecebf hina eben qeti helagale. <sup>45-46</sup> Odocob hina jaim leciscia oloqaniih jana helihecebilecnu eu me qee bahic.§ Euqa

† **9:29:** Grik jaqe je hilah leihna age je oso tubdu jaqein eu odi: "sabnu qagu bileyacna" ‡ **9:43-44:** Grik jaqe je hilah leihna age je oso tubdu jaqein eu odi: "Cudun euna gumac dewenega gaid qu jegina, odocob ja dewenega gaid cijina," aden. § **9:45-46:** Grik jaqe je hilah leihna age je oso tubdu jaqein eu odi: "Cudun euna gumac dewenega gaid qu jegina, odocob ja dewenega gaid cijina," aden.

hina jaim osolca qee cebac biley catanec ogaga eu me. Eunu hina jaim silail mecnu mana taweceebfi hina jaim qeti helagale.<sup>47</sup> Odocob hina amen lecisca oloqanah jana helicebil biley eu me gee bahic. Euqa hina amen osolca himec Anutna cul lagaqa eu me. Eunu hina amen faninheeb silail mifeg amen seli helagale.<sup>48</sup> Cudun euna 'gumac dewenega gaid qu jegina,

odocob ja dewenega gaid cijina,' en," aden.

(Aisaia 66.24)

<sup>49</sup> "Ge, [age ceteh Anutnu ihanegina euna macas meceb Anut amegna cataniec nijina eu odiwe] ja euha Anut uqa dana dewenega cunugna mijian," aden.\*\*

<sup>50</sup> "Macas eu me bahic qa uqana tin tebandoc eu qee mecebfi age adi uqana tin tebandoc weledec eu haun muduqagan? Age dool cuhunugana macas meceb gaid me bilina eu odiwe age agedodoc wawagana macas meceb cotogailca malol bileigale," aden.

## 10

*Jisas uqa dana caja ocobocabec cagoc kobilnu iwaladen*

(Matju 19.1-12; Luk 16.18)

<sup>1</sup> Jisas uqa cudun eu culdimej Judia hatuna nuen. Odimej Jodan Wa letimei len. Ono dana cajaca mati bahic uqaca haun hoin. Odocob uqa gaid odonwe odi iwaladen.

<sup>2</sup> Odocob Farisi leih age ege Jisas temdu feqan imeig uqa sisildu madoin, "Magaga, dana oso uqa aideg culdecnu egena loo je cois ec madenafo?" doin. <sup>3</sup> Odocobil Jisas jejenega hewi maaden, "Cel loo je Moses uqa age gagadic maaden?" aden. <sup>4</sup> Odocob age odi madoin, "Moses uqa dana oso ocobocabec cagocnu je oso jaqimei aideg utimei suldocob nuigian eu cois ec magen," doin. <sup>5</sup> Euqa Jisas maaden, "Age wawaga tool ibuldon eunu Moses uqa agenu loo je i jaqimei aden. <sup>6</sup> Euqa ifanec gug qocna Anutna je odi madena: 'Anut uqa dana cajaca ifani malimei maden,' ena.

(Jenesis 1.27)

<sup>7</sup> Anutna je euha madena:

'Gug inu dana uqa memeg anagca culalimei aidegca gabanaleceb biluwasan.

<sup>8</sup> Odocob lecis ale deweg osol biluwasan,' ena. (Jenesis 2.24)  
Eunu ale lecis qee biluwasinqa ale deweg osol bilesina. <sup>9</sup> Eunu Anut gabandon eu dana oso Cain cagoiaun," aden.

<sup>10</sup> Odocob age jona ceselimeig uqana malogom age dana caja ocobocabec cagocnu je eunu haun sisildoin. <sup>11</sup> Odocobil Jisas maaden, "Dana oso uqa aideg culdi caja haun oso ona eu dana caja sisi jelec wagalimei uqa aideg wal kobol odudina. <sup>12</sup> Odocob caja eu uqa dana culdimej li dana haun oso ocobfi uqaha dana caja sisi jelec wagalimei wal kobol odona," aden.

*Jisas uqa mel sim culadeceb uqaca hoqagannu maaden*

(Matju 19.13-15; Luk 18.15-17)

<sup>13</sup> Dana cajaca leih age mel sim Jisas eben age ilomogana migiannu uqaca ehadi ahoin. Ahocobil malogom age ehadi ahoin eunu gagalaadi cahacadein. <sup>14</sup> Euqa Jisas uqa eu fimei uqana malogom galac maden, "Mel sim eundecnu Anutna cul muden nijiado. Eunu Cain cahacadowain. Culadeceb mel sim age ijaca hoigale. <sup>15</sup> Ija mele maadigina, oso uqa mel sim Anutna cul ona eu odiwe qee ona eu Anutna culna qee leiaun," aden. <sup>16</sup> Odimej uqa mel sim calawanadimej eben ilomogana mimei eeladen.

*Dana haun cehewanca uqa Jisasca hocob je madesin*

(Matju 19.16-30; Luk 18.18-30)

<sup>17</sup> Odocob Jisas uqana jic nuigia oodon dana oso uqaca guguli hu jaihna gob cehimei sisildon, "O Iwalgec Me, ija eeta odimig cebac biley catanec eu mugumi ugen?" don.

<sup>18</sup> Odocob Jisas madon, "Eetanu ija me taga? Dana cunug me qee. Anut himec uqa me bilina. <sup>19</sup> Hina Mosesna loo jena eu dogona:

'Oso Cain qagadogaun.

Dana cajaca dewenela osol mec Cain cagualegaun.

Oso uqana ceteteh Cain heje cedagaun.

Oso uqanu uhulec je Cain madagaun.

Oso uqana ceteteh Cain quudu cedagaun.

Hina anin memenca lalan malagale," ena," don. (Kisim Bek 20.12-16; Loo 5.16-20)

<sup>20</sup> Odocob dana eu uqa Jisas madon, "Iwalgec, ija simnadec cocobi Mosesna loo je eu cunug toodo odom," don. <sup>21</sup> Odocob Jisas uqa mecidumei uqanu nalug meceb madon, "Hina odic ihoc ligiannu odoc oso qee odolom eu odogale. Hina nuimeg hina cehewain cunug idadumeg meen qaig eunadec umeg dana sawen eundec siwiadagale. Odi odimeg hina

\*\* 9:49: Grik je i uqana gug bahic eu camasac qee. Age Wok Pris 2.13 feiga.

sao jobon ono cehewainca bilegan. Odimeg hu ija tootagale,” don. <sup>22</sup> Odocob dana eu ugana ceteh cehewanca mati bahic nijen eunu je eu dumei uqa waug me qee meceb waug culumen dodon Jisas cuculdi nuen.

<sup>23</sup> Odocob Jisas uqa qaallimei ugana malogom meciadimei maaden, “Dana cehewana-gaca eundec age Anutna cul dunuh loqagannu eu cacaniga bahic!” aden. <sup>24</sup> Odocob ugana malogom je eu dumeil filicitein. Euqa Jisas uqa je haun maaden, “Ijana mel, Anutna cul dunuh lecnu eu cacaniga bahic! <sup>25</sup> Kamel lotoc gisec cese gigilona isec li nuecnu eu cacaniga, euqa dana cehewanca eu Anutna cul dunuh lecnu cacaniga eu wooldoc bahic,” aden. <sup>26</sup> Odocob ugana malogom age geh bahic filicitein. Odimeig madoin, “Mele odi nijecebf oso caahadocnu eu adi?” doin. <sup>27</sup> Odocobil Jisas ugana malogom meciadimei maaden, “Dana age odi odocnu qee nijel euqa Anut uqa ceteh cunug odocnu ihoc. Eunu Anut ihoc odigian,” aden.

<sup>28</sup> Odocob Pita eunu mamadi Jisas madon, “Faga, ege ceteteh cunug culimeb hina toohi coboqona,” don. <sup>29</sup> Odocob Jisas maaden, “Ija mele maadigma, oso ijanuca me jenuca uqa jobonfo, waliagulfo, cebinagulfo, anag memegcafo, talaculfo, mahamahafo culina <sup>30</sup> eu uqa maha ina bibili wooldoc ameg ben bahic ugian. Uqa maha ina jobonjobonca, waliagulca, cebinagulca, anagulca, talaculca, mahamahaca haun cedadigian. Odocob uqa maha ina jabi tootoodocha guludugian. Odocob uqa saen hibna hugian euna cebac bileceb catanec ugian. <sup>31</sup> Euqa mati qila hib bahic taweiga eundec age isi aquni tawoqagan. Odocob mati qila aquni taweiga eundec age isi hib bahic tawoqagan,” aden.

*Jisas uqa cal mimei ceseli cajigian ec madi cijeddon*

(Matju 20.17-19; Luk 18.31-34)

<sup>32</sup> Age Jerusalem jicna tetegin Jisas aquniadi cobon. Cocoboig ugana malogom age filicitein. Dana hib tooadein eu age cucuein. Odocobil Jisas uqa haun malogom 12-pela ehadi gesacna limeig eeta uqaca caligian eunu maaden, <sup>33</sup> “Feiga, ege Jerusalem toqona. Ono age Dana Melah ihanec dana benbenca loo je iwaladeeca ebenelegana muduqagan. Age uqa cal migiannu geldumeig Juda dana qee eundec ebenelegana muduqagan. <sup>34</sup> Odocobil age uqa lelandumeig cin qudimeig qisadoqagan. Odimeig age uqa qocobil cal migian. Odocob deel cijed hedocob haun ceseli cajigian,” aden.

*Jems Jonca ale Jisas odaleceb ben biluwasanu madosin*

(Matju 20.20-28)

<sup>35</sup> Odocob Jems Jonca, Sebedi melahul lecis, ale Jisasca humesi madosin, “Iwalgec, ele ceteh osonu sisilhecnu gale lena. Odocob hina ceteh eu odilecnu gale lena,” dosin.

<sup>36</sup> Odocobil Jisas sisilali maalen, “Ija eeta odalecnu madesina?” alen. <sup>37</sup> Odocob jejeg hewi madosin, “Hina kobilkobilca bilegan saen euna ele oso eben meulana isec, oso eben ansena isec bilec ilegannu je hahan iligale,” dosin.

<sup>38</sup> Euqa Jisas maalen, “Ale ceteh eunu ninitesina eu caun qee dosina. Wa gab ija jigen eu aleha jecnu ihocfo? Wa joitec ija ugen eu aleha ocnu ihocfo?” alen. <sup>39</sup> Odocob ale madosin, “Ese, ele jecnu ihoc,” dosin.

Odocobil Jisas maalen, “Wa gab ija jigen eu aleha jowasan. Wa joitec ija ugen eu aleha owasan. <sup>40</sup> Euqa biley cudun ebeni meulana isecca ebeni ansena isecca adecnu eu ijana cabi qee. Eu Anut uqa biley eu ocnu wele maden eu ale bahic owasan,” alen.

<sup>41</sup> Odocob malogom 10-pela age je eu dumeil Jems Joncanu wawaga me qee men.

<sup>42</sup> Odocobil Jisas uqa utaadecib uqaca hocobil maaden, “Juda dana qee eundec agena ilo egina eu age agena dana gagadic madegina, odocob mahana dana ben age dana cilehadegina eunu age dogina. <sup>43</sup> Euqa age gemona odi cain nijiaun. Age gemona oso ija ben biligen ifei uqa cotugul cunug cewel uadeiale. <sup>44</sup> Odocob age gemona oso uqa ija matu biligen ifei eu uqa cunug agena begabeg meh cabi dana ibuldoiale. <sup>45</sup> Ge, Dana Melah ha dana age ija cewel utuqagan imei qee toni nel. Qeoo. Dana Melah uqa dana cajaca cewel uadecnu toni nen. Uqa ijana cebac biley eu dana cajaca mati besiadec fajadecnu culigen imei eunu toni nen,” aden.

*Jisas dana oso, ijana Batimias, uqa ameg galuc mec me muden*

(Matju 20.29-34; Luk 18.35-43)

<sup>46</sup> Age Jeriko taun ono calein. Jisasca ugana malogomca gami dana cajaca mati bahic Jeriko taun cuculdi cocobog ameg galuc mec dana oso uqa jic gesacna bilen. Uqa ijana Batimias uqa Timias melah, uqa gaid sabnu cesuldoqagannu niniadoloi. <sup>47</sup> Dana eu uqa Jisas Nasaretdec hona ec mamadegin dah mimei uqa utai maden, “O Jisas, Dewid Melah, ijana walol heiale,” en. <sup>48</sup> Dana cajaca mati age gagaldudu madoin, “Cain utaagaun. Culugale,” doin. Euqa uqa feeaadi co suli u haun utai madon, “Jisas, Dewid Melah, ijana walol heiale!” don. <sup>49</sup> Jisas tului tawimei dana cajaca maaden, “Utadocobil hoiale,” aden.

Odocab age dana ameg galuc mec eu utadu madoin, "Uqa hina utahena. Hina wawin toogdoiale. Cajaga," doin.<sup>50</sup> Odocobil dana eu uqana lotoc ben cagasi helimei busaci caji Jisasca len.<sup>51</sup> Odocab Jisas madon, "Ija hina eeta odihigennu matagana?" don. Odocab dana ameg galuc mec eu Jisas madon, "O Meca, ija ceteh fecnu madigma," don.<sup>52</sup> Odocab Jisas madon, "Hina wawin meleec eu me mihia! Gad nuugale," don. Odocab dana eu mahuc ameg fogo docob uqa ceteteh cunug fen. Odimei uqa Jisas toodocob belein.

## 11

*Jisas uqa kingwe Jerusalem dunuh len  
(Matju 21.1-11; Luk 19.28-40; Jon 12.12-19)*

<sup>1</sup> Jisas uqana malogomca age Jerusalem dodoldodogin Betfasi Betanica jobon ale Oliw Aluhna isec calimei uqana malogom lecis sulaali<sup>2</sup> maalen, "Jobon amigena nijia euna lesia. Ale dunuh lelesi cesel goman manahal oso qagec tataweb eu mahuc gulucdowasan. Cesel eu dana oso tatacan qee bielel. Ale eu cufalimesi ehudi ahosiale.<sup>3</sup> Dana oso sisilalecebfi, 'Eetanu odi odosina?' alecebfi ale madowasan, 'Tibud cesel eu ocnu eu cabi osoca madena. Uqa mahuc ene ceseli suldugian,' dowasan," alen.<sup>4</sup> Odocab uqa je odi maaleceb ale belimesi ono cesel goman manahal oso jicna jo cebecna qagec tatawen fesin. Cesel eu cucufalesin<sup>5</sup> dana leih ono gauc tawein eu age maalein, "Ale eeta odosina? Eetanu cesel goman manahal eu cuftalesina?" alein.<sup>6</sup> Odocobil ale Jisas maalen odi maadesin. Odocab dana eu age culaleceb bil cesel eu hewi belesin.<sup>7</sup> Belimesi cesel eu Jisasca ahosin. Odimesi alena lotoc cesel eu gogodohna duitocobil Jisas uqa ohis tobi bilen.<sup>8</sup> Dana cajaca mati bahic age agena lotoc jicna duein. Leih age celus cabina qetimeig jicna duein.<sup>9</sup> Dana cajaca age aquunitutu ha toodudu cocobi age conoga suli u madein:

"Hosana!"<sup>\*</sup> Tibud ijanna hona eu uqa eeldoc biliale! (Buk Song 118.25-26)

<sup>10</sup> Ege memige Dewidna cul hona eu eeldoc biliale!

Hosana!<sup>†</sup> Anut ohis bilina uqa binan wasi nuaile!" ein.

<sup>11</sup> Jisas uqa Jerusalem dunuh len. Ono tempel dunuh len. Ono uqa ceteteh cunug talilaadi miciadi cobon qa uqa hib len. Eunu uqa haun ceseli Betani jobon ono uqana malogom 12-pela gami belein.

*Jisas na dan geuldeceb haun aig qee qol  
(Matju 21.18-19)*

<sup>12</sup> Cojageceb age Betani jobondesce ceceselegin Jisas uqa wen don.<sup>13</sup> Uqa na dan bagacca onoca tatawen fen. Odimei uqa ono gug cemenug limei aig oso mogi u jige en. Euqa na dan me aigca qee, eu bagac himec tatawen fen. Ge, eu uqana aig qoc saen qee.<sup>14</sup> Odimei uqa na dan madon, "Oso hinana aig haun qee jieau!" don. Odocab uqana malogom age je eu doin.

*Jisas uqa idadoc dana age tempelna bibilegin ititacaden  
(Matju 21.12-17; Luk 19.45-48; Jon 2.13-22)*

<sup>15</sup> Age Jerusalem ono calimeig Jisas uqa tempel dunuh len. Ono uqa dana ceteh fajeinca ceteh suldoince eundec ititacadeceb maha gemo calein. Odimei meen qaig hatu filfil agena wadacwudecin eundec agena cabal sundocob agena meen qaig golodon. Uqa cuhudid suldoc agena cabalha sundocob golodon.<sup>16</sup> Odimei agena ceteh cunug cedeceb tempel gemogemo hewi lecnu cahacadan.<sup>17</sup> Odimei uqa dana ono iwalaadi maaden, "Anutna jaqec je i qee sanijeleinfo?

Ijana jo eu dana cajaca age hatuhatu cunug bibilegina eu agenu Anut inondocnu jo oqagan,' ena. (Aisaia 56.7)

Ageqa agena odocna

age falicdocobil heje dana agena jahunee cudun ibuldon!" aden. (Jeremaia 7.11)

<sup>18</sup> Odocab ihanec dana benbenca loo je iwalaadec age je eu dumieg uqa qagadoqagannu jic wali coboin. Ge, dana cajaca cunug uqana iwalaadecnu filicitein eunu age cucuidoin.<sup>19</sup> Wesu memen Jisas uqana malogom gami age Jerusalem culi belein.

*Dana uqa waug mele bahic eceb inondumei ceteh ona  
(Matju 21.20-22)*

<sup>20</sup> Malogom age qasil jicna bebeleig na dan eu bagacnaderc nu gugna calen cunug galalen eu fein.<sup>21</sup> Odocab Pita uqa Jisas na dan madonnai cisduemei Jisas madon, "Meca, faga! Na dan hina geuldegan eu galaleian," don.<sup>22</sup> Odocab Jisas uqa malogom maaden, "Age

\* **11:9:** Hibru jena uqana gug bahic eu "Anut cahahagagale!" euqa saen euna eu Anut binan sulecnu je oso. † **11:10:** Hibru jena uqana gug bahic eu "Anut cahahagagale!" euqa saen euna eu Anut binan sulecnu je oso.

Anutnu wawaga meleeiale. <sup>23</sup> Ija mele maadigina, oso waug meleec nijialumi waug leciscia qeefi uqa aluh i hina caji macasna tonoga doubmi eu co toodu odoub. Oso uqa eeta madena eu caligian eunu waug meleecbfi eu co toodu caligian. <sup>24</sup> Eunu ija maadigina, age cetehnu inondufeig age ceteh eu oqagannu wawaga meleecbfi ceteh eu oqagan,” aden.

<sup>25-26</sup> “Odocob Memega sao jobon bilia uqa agena silail dahig celigiannu age inondudu tataweig saen euna dana oso uqa hina silail mihen eunu cisdufeig uqana silailnu eu dahiniga celeiale,” aden.<sup>‡</sup>

*Age Jisas in cabi eu ocnu maheceb odogona? ec sisildoin  
(Matju 21.23-27; Luk 20.1-8)*

<sup>27</sup> Jisas uqana malogomca age Jerusalem ceseli lein. Odimeig Jisas uqa tempel dunuh cocobon ihanec dana benbenca, loo je iwaladecca, Juda agena matuca age uqaca humeig <sup>28</sup> sisildu madoin, “In ijanna hina ceteh eu odogona? In cabi eu ocnu maheceb odogona?” doin.

<sup>29</sup> Odocobil Jisas jejenega hewi maaden, “Ija casac je oso sisiladigen. Age eu jejeni hewi matecebil ija hibna ha in cabi i iteceb in ijanna ceteh i odigina eu camas mecemin doqagan. <sup>30</sup> Eu odi, Jonna wa joadec eu sao jobondecfo, qee dananadecfo? Mateiga duga,” aden.

<sup>31</sup> Odocob age fee dadani togodudu madein, “Ege madoqaqa wa joadec eu sao jobondec doqaga uqa ege eetanu uqanu wawaga mele qee el? gigian. <sup>32</sup> Ege madoqaqa wa joadec eu dananadec doqaga euha ihoc qee,” ein. Ge, dana cajaca cunug age Jonnu uqa je hahun madec dana mele bahic ein. Eunu age dana cajacanu cucuiein. <sup>33</sup> Eu togodu hedumeig age Jisas madoin, “Jonna wa joadec eu anadec ege qee doqona,” doin. Odocobil Jisas maaden, “Eunu ija ageha in cabi i iteceb ugina, in ijanna ceteh i odigina eu qee maadigaun,” aden.

## 12

*Cabi dana me qee age wain cabi cofdoinnu galolo je  
(Matju 21.33-46; Luk 20.9-19)*

<sup>1</sup> Odimei Jisas uqa galolo jena sanan mimei maaden, “Dana oso uqa wain cabi cehimei alildu gel faldumei wain aig afdocnu kunum cisimei wain cabi cofdoc biluqagannu jo ben ohis tobi eit fec ihoc eu odi cehen. Odimei uqana wain cabi dana leih cabi oqagannu ebenegana mimei uqa hatu osona nuen.” <sup>2</sup> Wain aig wal meceb cedec saen cali hocob wain cabi gug uqa cabi dana oso suldudu madon, ‘Hina nuimeg wain cabi oc eundec maadecem age wain aig leih eu ihecebil cedi ahutagale,’ don. <sup>3</sup> Odocob dana age wain cabi cofdoein eu age cabi dana hewimeig deweg tudumeig wain aig ameg oso qee utec suldocobil ceselen. <sup>4</sup> Odocob wain cabi gug uqa haun uqana cabi dana oso suldocob nuen. Odocob wain cabi cofdoein eu ageha cabi dana eu ilo qumeig me qee mudein. <sup>5</sup> Odocobil wain cabi gug uqa cabi dana oso suldocob nuen. Odocob age uqa qocobil cal men. Odocobil wain cabi gug uqa haun ceseli cabi dana matica suladen. Uqua ageha cabi dana cunug odi odadein. Age leih dewenega tudoin, age leih aqecebil cal mein. <sup>6</sup> Wain cabi gug uqa dana suldocnu osol bilen, uqa melah nalug men. Cit qocna uqa melah sulduaden. Ge, uqa maden, ‘Ija melaminu cumundoqagan,’ en. <sup>7</sup> Euqa wain cabi cofdoc age togodu madein, ‘I cabi gug huqaneh, uqa isi wain cabi ugian. Cois uqa muguh eu ege oqannu ege cajimeb qocomun cal mecnul’ ein. <sup>8</sup> Odimeig age mel eu hewi sundudu qocobil cal meceb wain cabi dunuhdec heludecebil maha gemo calen,” aden.

<sup>9</sup> “Wain cabi gug uqa wain cabi cofdoc dana eeta odadigian? Uqa humei wain cabi cofdoc fadaladeceb cal moqagan. Odimei wain cabi eu dana filfil adigian,” aden.

<sup>10</sup> “Jaqec je oso Anutna je jaqec tawena eu qee sanijeleinfo? Je eu odi madena: ‘Meen oso meen gel cehec memei dana age culein eu qila meen jo big gug jo hehdocnu calen.

<sup>11</sup> Eu Tibud uqadodoc odi odon.

Ceteh eu foqona eu kobolkobolca,’ ena,” aden.

*(Buk Song 118.22-23)*

<sup>12</sup> Odocob loo je iwaladecca, ihanec dana benbenca age Jisasna galolo je eu dah mimeig age uqa je eu agenu maden eunu wawaga fogo don. Eunu age uqa heweigan ein euqa age dana cajacanu cucuiein. Odimeig age Jisas cucului belein.

*Dana age Sisana takis helecnu je  
(Matju 22.15-22; Luk 20.20-26)*

<sup>‡</sup> **11:25-26:** Grik jaqec je hilah leihna age je oso tubdu jaqein eu odi: “Euqa age osona silail dahiniga qee celecebfi Memega sao jobon bilia uqaha agena silail dahig qee celeiaun,” aden. \* **12:1:** Age je Matju 21.33-41na nijia eu feiga.

<sup>13</sup> Ihanec dana benbenca, loo je iwaladecca, Juda agena matuca age Farisi leihca Herodna sihul leihca Jisas suladitocibil lein. Age ege Jisas cona je oso cahuldu madeceb uqa dewegnu geuldec je oso oqan imeig lein. <sup>14</sup> Age uqaca humeig madoin, “Iwalgec, ege hinanu doqona, hina mele je madagana, hina dana binanagaca eundecnu qee cucuiagana. Ge, hina dana saolal madec bilegina eundecnu qee jogoagana qa hina Anutna jic tutue iwaladagana. Ege Sisanu takis helecan eu tutucfo, qee tutuc qeefo? <sup>15</sup> Ege Rom agena takis heleqanfo, qee eu qee heloquaunfo?” doin.

Euqa Jisas uqa age me hihilu quaudion eu dumei maaden, “Age eetanu temtegina? Meen qaig oso ahutecebil ija figen,” aden. <sup>16</sup> Odocob age meen qaig oso ahu utein. Odocobil uqa sisiladi maaden, “Meen qaig ina in hahun eu gaga qoc taweria? In ijanha jaqec taweria?” aden. Odocob age madoin, “Eu Sisa uqana,” doin. <sup>17</sup> Odocobil Jisas maaden, “Age Sisana ceteteh eu Sisa uteiga. Anut toinan eu Anut uteiga,” aden. Odocob age je eu maadeceb dumeig tumatumaein.

*Sadjusi age Jisas dana cal mein eundec ceseli cajecnu sisildoin  
(Matju 22.23-33; Luk 20.27-40)*

<sup>18</sup> Sadjusi age Jisasca hoin. Sadjusi age cal mein eundec ceseli qee cajowain egina. Age Jisas je oso sisildu madoin, <sup>19</sup> “Iwalgec, Moses uqa loo je jaqec oso igen eu odi madena, ‘Dana oso uqa waliag cal mimei aideg culdigian qa melca qeefi dana eu uqa waliag cal men euna mel basituwasannu aideg eua ugian,’ ena. <sup>20</sup> Saen osona waliagul 7-pela biloloig. Matu eu caja on. Odimei uqa aideg mel qee basec cal men. <sup>21</sup> Odocob waliag lecisdoc uqa caja eu on. Uqaha aideg mel qee basec cal men. Odocob waliag cijeddoc uqaha odi odon. <sup>22</sup> Waliagul 7-pela cunug odi odimeig caja eu mel qee basec cunug cal mein. Hibna caja euha cal men. <sup>23</sup> Aria, waliagul 7-pela cunug uqa age osolosol agena caja bilen. Eunu ceseli cajec saenna caja eu in aideg biligian?” doin.

<sup>24</sup> Odocobil Jisas maaden, “Age Anutna jaqec je nijia eu qee dogina, age Anutna gagadic odiocha qee dogina. Eunu age dadanec bilegina. <sup>25</sup> Ge, age cal mecnadec ceseli cajoqagan saenna eu age dana caja ocobocob qee owain. Euqa age ensel sao jobon bileginawе odi biluqagan,” aden.

<sup>26</sup> “Cal mecnadec ceseli cajec eunu je oso nijia. Age Mosesna jaqec jena Moses uqa na nag ja cijennu jaqen eu qee sanijeinfo? Jaqec je cudun euna Anut uqa Moses madon: ‘Ija Ebrahamna Anut, ija Aisakna Anut, ija Jekobna Anut,’ don. *(Kisim Bek 3.6)*  
<sup>27</sup> Anut uqa cal mein agena Anut qee. Euqa uqa cebac bilegina agena Anut. Age dadanec bahic,” aden.

*Age Anutna loo je matunu Jisas sisildoin  
(Matju 22.34-40; Luk 10.25-28)*

<sup>28</sup> Loo je iwaladec dana oso uqa Sadjusi age Jisas je maaden eunu fee dadaneegin dah men. Odimei uqa Jisas wadacdoc je me bahic maaden eu fimei uqa limei Jisas sisildon, “Loo je meca bahic Mosesna loo je oso cunug wooldoc cel loo je nijia?” don. <sup>29</sup> Odocob Jisas jejeg hewi madon, “Loo je caunca bahic eu odi madena:

‘O Isrel dah meigale,

Tibud uqa eguna Anut,

Tibud uqa osol bilina.

<sup>30</sup> Odocob hina Tibud, hinana Anutnu wawin cunugca, doloin cunugca, hinana cisdoc cunugca, hinana gagadic cunugca euna nalug magale,’ ena. *(Loo 6.4-5)*

<sup>31</sup> Uqana toodoc eu odi madena:

‘Hina hinanel nalunin maganawе

odi hina utuqain bilec<sup>†</sup> eundecnu nalug magale,’ ena.

*(Wok Pris 19.18)*

Loo je oso loo je lecis i woolalec qee nijel,” don.

<sup>32</sup> Odocob loo je iwaladec uqa Jisas madon, “Iwalgec, hinana je eu tutuc bahic! Hina mele madaga, ‘Tibud uqa osol bilina, Tibud oso qee bilina,’ aga. <sup>33</sup> Odocob ege Anutnu wawige cunugca, agena doc cunugca, agena gagadic cunugca euna nalug moqonafi eu me bahic. Ege egedodocnu nalunige moqonave odi utuqanige bilegina agenu nalunuga moqonafi euha me bahic. Ege loo je lecis i toodu odoicomunfi kobil eu ihanec cunug age jana maneginaca ihanec filfil cunugca wooladena,” don.

<sup>34</sup> Odocob Jisas uqa loo je iwaladec eu je cisdoc silecca maden eu fimei madon, “Hina Anutna cul cemenug biliga,” don.

Odocob dana cunug ono bilein age Jisas je oso haun sisildocnu culein.

<sup>†</sup> **12:31:** Utuqain bilec uqana gug eu odi. Agena loofo, agena kobolfo eu dana osonu nalug magale ec qee madel, cois hina dana eunu nalug magale.

*Jisas uqa dana cajaca Kraisnu sisiladen  
(Matju 22.41-46; Luk 20.41-44)*

<sup>35</sup> Jisas uqa tempel dunuh dana cajaca iwalaadi bili je oso sisiladen, “Loo je iwaladec dana age adi madegina, ‘Krais eu Dewid Melah,’ egina? <sup>36</sup> Kis Gun uqa Dewid dado mudeceb uquadodoc maden:

‘Anut Tibud uqa ijana Tibud odi maden,  
“Ijaca hu ebeni meulana isec bibilem  
ija odocomin hinana cad cunug hu ninijebil  
hina jaimna lahacadegan,” en,’ Dewid odi maden.

*(Buk Song 110.1)*

<sup>37</sup> Dewid uquadodoc Kraisnu madi, uqa ijana Tibud, en, eunu adi uqa Dewid Melah bilina?” aden.

*Loo je iwaladec age kobil me qee odoin  
(Matju 23.1-36; Luk 11.37-54; 20.45-47)*

Dana cajaca mati bahic cegulein eu age Jisasna je docnu geh bahic gale aden. <sup>38</sup> Odocob Jisas uqa je iwaladec bili maaden, “Age loo je iwaladec dananu batut feigale. Loo je iwaladec age lotoc cecelac tacimeig cocobi nuecnu gale adena. Age ceteteh idadec cudunna age binanaga sulecnu gale adena. <sup>39</sup> Age cuha jona cabal me cudunna bielecnu gale adena. Odimeig age sab ben jec saenna biley binanca euna bielecnu gale adena. <sup>40</sup> Age caja wij agena jo heje cedegin. Odimeig age dana me bahic meciadecnu saen cecelac bahic inondogina. Dana eundec age agena cahuldocnu ameg me qee bahic oqagan,” aden.

*Caja wij sawen uqa Anutnu meen qaig nag lecis uten  
(Luk 21.1-4)*

<sup>41</sup> Jisas uqa meen qaig helecnu tempel bokis cemenug bilen. Odimei uqa dana cajaca humeig meen qaig bokisna hehelegin fen. Dana caja cehewanagaca mati age meen qaig ben helein. <sup>42</sup> Odocob caja wij sawen oso humei uqa meen qaig nag lecis helen eu toea osol ihoc. <sup>43</sup> Odocob Jisas ugana malogom utaadecib cemenug cegulecebil maaden, “Ija mele maadigina, caja wij sawen i uqa meen qaig nag heleiga eu dana cajaca age tempel bokisna meen qaig ben bahic heleiga cunug wooladena. <sup>44</sup> Ge, dana cajaca eundec age cehewanaga bennadec meen qaig heleiga qa caja wij i uqa sawen bahic, uqa ugana meen qaig cunug heleia. Uqa ugana ceteh cebac bielecnu oso qee culel,” aden.

## 13

*Jisas uqa tempel wagaloqagannu maden  
(Matju 24.1-2; Luk 21.5-6)*

<sup>1</sup> Odocob Jisas uqa tempelnadec cali hohon ugana malogom oso madon, “Iwalgec, faga! Meen joca me bahic taweiga!” don. <sup>2</sup> Odocob Jisas madon, “Hina jo ben i faganafa? Meen gel ulugedocob meen oso meen oso tatacanna cilehdock qee biliaun. Cunug wagalecebil mahana tonoqagan,” don.

*Jisas uqa culumen adec mati caligiannu maden  
(Matju 24.3-14; Luk 21.7-19)*

<sup>3</sup> Jisas uqa Oliw Aluh ohis bibilei tempel onoca fen. Bibilen Pitaca, Jemsca, Jonca, Andruca cuhanuc uqaca limeig jahuni sisildoin, <sup>4</sup> “Aadeb eu odi odigian ec magaga doqa. Cel gaga odocob fimeb ceteh i camasac caligiannu saen doqan?” doin.

<sup>5</sup> Odocob Jisas jejenega hewi maaden, “Oso hu faninadi dado madeceb agena jic ceja qocna lowainnu batut feigale. <sup>6</sup> Matica age ija ijanina mamadi hoqagan, ‘Ija uqa,’ oqagan. Eu age dana cajaca mati faninadi jic ceja qocna loqagannu dado madoqagan,” aden.

<sup>7</sup> “Age han cadeolina ec eunuca han hugian ec eunuca je hutan doqagan saen euna Cain filicituwain. Ceteh eu cunug odigian. Euqa qee migian ec madeceb qee nijel. Eu cit qoc qee. <sup>8</sup> Ge, dana hatuhatu age cajimeig cilehdocobcilehdocoboqagan. Odocobil dana silihulihul age cajimeig cilehdocobcilehdocoboqagan. Mim maha filiflina nigan, sabnu cahel biley saenhu hugian. Eu caligianqa caja mel basecnu dain donawe eu odi himec sanan migian,” aden.

<sup>9</sup> “Euqa dana age ehadi limeig agena cegulec amegna madoqagan. Eunu age age-dodocnu cofdoigale. Age Juda agena cuha jona dewenega tudoqagan. Age ija ijaninu ijana me je qasali maadecnu hatu cofdoccia kingca ehadi li amagana madoqagan. <sup>10</sup> Odocob Anutna me je eu casac hatuhatu cunug qasali maadecebil dana cajaca cunug dogagan. <sup>11</sup> Dana age ehadimeig gesiladecnu cegulec amegna madoqagan saen euna age cel je cel je madigen eu casac Cain aqeaiaun. Euqa age saen euna Kis Gun je adeceb je eu tutuc madoqagan. Ge, agedodoc je qee madowain, Kis Gun eu age uqa co tawecebil je madigian. <sup>12</sup> Saen euna dana age waliningailnu balijecebil aqecebil cal moqagan. Dana agena melnu

balijecebil aqecebil cal moqagan. Mel age memegail anagailcanu cajimeig aqoqagannu gesilec jona madoqagan.<sup>13</sup> Odocob age ija ijani hewegina eunu dana cajaca cunug age agenu gemanaga beceb sagagadoqagan. Euqa oso uqa waug gagadic mumudi hib cit qoc gadacna caligian eundec Anut uqa caahahaadigian,” aden.

*Ihulahal mec ceteh bebesacca caligian  
(Matju 24.15-28; Luk 21.20-24)*

<sup>14</sup> Jisas je haun maaden, “Age ihulahal mec ceteh bebesacca”<sup>14</sup> (*Daniel 9.27; 11.31; 12.11*) uqana cudun qee euna mudecebil tataweb eu camas meceb euna batut feigale,” aden. Dana uqa je i sanijina eu uqa je uqana gug doiale. “Saen euna dana cajaca age Judia hatuna bilegina age busali aluhnana tobogagan.<sup>15</sup> Oso jo ohis qab tatacan bilina cain toneiaun. Uqa uqana ud cedi nuecnu jona cain leiaun.<sup>16</sup> Óso cabina bilina eu uqa uqana lotoc ben cedecnu jobon ceseli cain hoiaun.<sup>17</sup> Saen euna caja waugca coboc, caja mel sim su adegina eundec walocca bahic biluqagan!<sup>18</sup> Busalec deel eu duan saenna cali hoiaunnu Anut inondoigale.<sup>19</sup> Ge, saen euna culumen ben bahic caligian. Saen maha haun ifanennadec hocob qila wele culumen eu odi oso qee calel. Hibna culumen eu odi oso haun qee caleiaun.<sup>20</sup> Tibud saen i gohic qee mudoubmi dana oso cahahadoc qee gulucdoub. Euqa dana cajaca Tibud nesili bilegina agenu saen eu gothic mudigian,” aden.

<sup>21</sup> “Saen euna oso maadecebf, ‘Feiga, Anutna Krais eu ihen!’ qee, ‘Feiga, Anutna Krais ono bilia!’ adecebf je eunu wawaga cain meleeriaun.<sup>22</sup> Uhulec Kraisca uhulec je hahun madec danaca mati cali humeig age dana cajaca Anut nesili cedaden bilegina euha faninadoqagan imeig kobolkobol odoc filfilca gaga ben matica odoqagan.<sup>23</sup> Euqa age batut feigale! Ceteh qee hoc ninijen ija ceteh eu hugiannu wele maadem,” aden.

*Cit qocna Dana Melah hugian  
(Matju 24.29-31; Luk 21.25-28)*

<sup>24</sup> Jisas je haun maaden, “Feiga, saen euna culumen ben eu hedocob ‘cam tu meceb jagel qee fulacdoiaun.<sup>25</sup> Odocob malaqa age saonadec casili tonoqagan, odocob gagadic odoc age saona bilegina caji leceb hocob qeleloqagan,’ en. (*Aisaia 13.10; 34.4*)

<sup>26</sup> Odocob Dana Melah uqana camas mec gaga saona camas migian. Age Dana Melah gagadic odoc gehca kobolkobolca taenna neneb foqagan.<sup>27</sup> Uqa ensel suladeceb age belimeig uqana nesili cedadec bilegina eu mahamaha cunugnadec cedoqagan. Age maha cunugnadec cedadi ehadi li sao jobon cunugnadec ha ehadi ahu gabanoqagan,” aden.

*Age na danno doc oqagan  
(Matju 24.32-35; Luk 21.29-33)*

<sup>28</sup> Jisas je haun maaden, “Age na dan uqana odocnu cisoigale. Uqa haun majocob age qila wa hugian odona egina.<sup>29</sup> Odiwe ha age ceteh eu oodob fimeig Dana Melah ceseli hocnu deel cemenug njija ec doqagan, uqa taun gel jic cebecna taweia doqagan.<sup>30</sup> Ija mele maadigina, sihul i qila bilegina ceteh qee cali hoc ninijeb qee qee meiaun.<sup>31</sup> Saoca mahaca qee migian euqa ijana je qee qee meiaun,” aden.

*Dana oso ceteh eu cali hugiannu saen doc oso qee biele  
(Matju 24.36-44)*

<sup>32</sup> Jisas je haun maaden, “Ceteh eu cali hugiannu deelca auaca oso qee dona. Ensel sao jobon bilegina ha qee dogina. Dana Melahha qee dona. Memige Anut uqa himec dona,” aden.

<sup>33</sup> “Dana Melah ceseli hocnu deel age qee dogina. Eunu batut feiga, age meciu cuhadoigale.<sup>34</sup> Dana Melah ceseli hoc deel eu odiwe njija. Dana cehewanca oso uqa hatu oso nuigia bili uqana cabi dana utaadecib hocobil uqana ceteteh age ebenegana men. Uqa cabi dana dumanaga nesili fimei age dumanaga nijen eu odi toodu uqana ceteteh siwiaden. Odimej uqa jic cebec cofdloc dana madon, ‘Hina ija hugennu gaid meciagale,’ don.<sup>35</sup> Eunu amaga cebac bileyale! Ge, age jo gug aadeb hugian eu age qee dogina. Uqa wesufo, tu gemofo, qasil bahicfo, cahinegfo hugian eu age qee dogina.<sup>36</sup> Age ququlubadi hufei us ninjebil cain gulucadeiaun.<sup>37</sup> Ija je i age maadigina eu ija dana cajaca cunugnu maadigina, age gaid mecieigale,” aden.

## 14

*Juda agena dana ben Jisas qocobil cal migian ec je cagoin  
(Matju 26.1-5; Luk 22.1-2; Jon 11.45-53)*

<sup>1</sup> Pasowa Sab Jec Benca, Bred Jisca Qee Sab Jecca deel lecis hedocob caligia ninijen ihanec dana benbenca loo je iwaladecca age Jisas jahuni hewi qocnu jic oso wali feqan i togodoin.\* <sup>2</sup> Euqa age madein, “Dana cajaca caji uqanu mimi ege cilehgowainnu Pasowa sab jecna cain odoqaun,” aden.

*Caja oso Jisas ilona mool dedeman me bahic joiden  
(Matju 26.6-13; Jon 12.1-8)*

<sup>3</sup> Jisas uqa Betani jobon ono Saimonna jona bilen. Saimon eu uqa wele deweg lepra heweceb coboloi. Jisas uqa ono sab jiji bibilen caja oso meen gum eu mool dedeman me bahic fajecnu qaig ben bahic nijen eu ahumei meen gum fuhudumei mool eu Jisas ilona basecdon. <sup>4</sup> Euqa dana leih ono tawein eu qee gale adeceb togodudu madein, “Uqa eetanu mool dedeman me bahic eu cusdoia? <sup>5</sup> Ge, mool eu meen qaig silwana mudec 300nu idadoubmi meen qaig eu dana sawen bahic eundec siwiadoubmi eu me,” aden. Odimeig age caja galac mudein. <sup>6</sup> Euga Jisas maaden, “Age culdeiga! Age eetanu caja eu culumen doc utegina? Uqa cteh me bahic oditja. <sup>7</sup> Ge, age gemona dana sawen biley eundec gaid biluqagan. Odocob age cel saen gale adecna cesuladoqagan. Ijaqa gaid age gami qee biluqaun. <sup>8</sup> Cteh i uqa odocnu nijeebnu odeia. Uqa mool ilomina basecdoa euna ija qee cal mec deweni heelna mudecnu joidia. <sup>9</sup> Ija mele maadigina, me je anaana maha cunug qasali maadi cobimeig age caja eu oditja eu uqanu cisoqaganu saadoqagan,” aden.

*Judas uqa jisasna cad ebenegana mudigiannu je cagoin  
(Matju 26.14-16; Luk 22.3-6)*

<sup>10</sup> Saen euna Judas Iskariot, uqa Jisasna malogom oso, uqa ihanec dana benben cemelegana limei Jisas age ebenegana mudigiannu maaden. <sup>11</sup> Age je eu dumeig wawaga ceeleceb age meen qaig utuqaganu je hahun madoin. Odocobil Judas uqa Jisas dewegnu ob mimei age ebenegana mudigiannu jic walen.

*Jisas uqana malogom gami sab jein  
(Matju 26.17-25; Luk 22.7-14, 21-23; Jon 13.21-30)*

<sup>12</sup> Odocob Pasowa sab jec bred jisca qee jecnu ugana deel gun cali hon. Deel euna Juda dana age sipsip nag Pasowana ihandoloig. Uqana malogom Jisas madoin, “Ege ana limeb hina Pasowa sab jegannu saciadocnu gale hena?” doin. <sup>13</sup> Odocobil uqana malogom lecis sulali maalen, “Ale taun benna lecebile dana oso uqa halon waca gahidu humei gulucaligian. Ale uqa toodtu lesi<sup>14</sup> uqa cel jona leceb toodosisa. Odimesi jo gug eu madosia, ‘Iwalgec maheja, ‘Jo hamol ija ijana malogom gami Pasowa ja qoc sab jecnu eu ai?’ heia,’ dosia. <sup>15</sup> Odocob uqa hamol ben ohis eu sab jec cabalca biley cabal cteh cunugca ihacaligian. Ale ege Pasowa ja qoc sab jecnu euna saciadosia,” aden. <sup>16</sup> Odocob malogom lecis ale leih culadimesi taun benna belesin. Odimesi ono ale Jisas maalen odi bahic gulucdosin. Euna ale Pasowa ja qoc sab jecnu saciadosin.

<sup>17</sup> Odocobil witic meceb Jisas uqana malogom 12-pela gami hoin. <sup>18</sup> Sab jiji cabalna bibileig Jisas maaden, “Ija mele maadigina, age oso uqa ija gami sab joqona eu ijana cad ebenegana mitigian,” aden. <sup>19</sup> Odocob age je eu dumeig uqana malogom waloc adeceb abesabes sisildudu madoin, “Hina ija ec madaganafu?” doin. <sup>20</sup> Odocobil Jisas maaden, “Eu ijana malogom 12-pela oso uqa ijaca gami bred bohna wehuc tanoqona eu odigan. <sup>21</sup> Ge, Dana Melah uqa wele Anut je jaqen odi toodugian eunu jic eu toodugian qa dana uqa ijana cad ebenegana mitigian eu walocca biliale! Dana eu anag qee basoubmi eu me bahic niijoub,” aden.

*Jisas uqa bred wainca malogom siwiadeceb jein  
(Matju 26.26-30; Luk 22.15-20; 1 Korin 11.23-25)*

<sup>22</sup> Age sab jejeig Jisas bred oso umei Anut hetaga dumei feni malogom siwiadimei maaden, “Eu ija deweni. Oiga,” aden. <sup>23</sup> Odimei uqa wain gabin umei Anut hetaga dumei malogom adeceb age cunug gabin euna gab jein. <sup>24</sup> Odocobil Jisas maaden, “Wain gabin i ija golani eu Anutna bal cehec je haun. Ija dana cajaca mati cesuladigennu golani

\* **14:1:** Wele Isrel dana cajaca age Isip agena cabi dana bega meh Isip hatuna biloloig. Saen euna Anutna ensel humei Isip agena matu cunug aqecel cal mein. Euqa ensel eu Isrel agena jojo tefacadimei agena matu qee aqel. Pasowa ugana gug eu “tefacdoc.” Eunu Juda dana cajaca age Pasowa Sab Jec Ben Deelna Anut uqa agena matu tefacadan eunu cisdoin. Age Kisim Bek 12.13, 23, 27 feiga. Bred Jisca Qee Sab Jec saen eu Pasowa Sab Jec Ben Deel toodon, eu deel 7-pela nijen Age Kisim Bek 12.15-20 feiga.

basecdugina. <sup>25</sup> Ija mele maadigina, ija wain aig qee jec li hibna ija age gami Anutna culna haun jeqan,” aden.

<sup>26</sup> Odocob age binan sulec due silimeig age taun ben cuculi Oliw Aluhna belein.

*Jisas uqa Pita uqanu qee sasac qugian ec maden*  
(Matju 26.31-35; Luk 22.31-34; Jon 13.36-38)

<sup>27</sup> Odocob Jisas uqa malogom maaden, “Age cunug ijanu wawaga meleec tonigian. Ge, Anutna jaqec je oso njija eu ihen:

‘Ija sipsip cofadec dana qocomin

sipsip cunug bilisadu beloqagan,’ ec njija.

(*Sekaraia 13.7*)

<sup>28</sup> Euqa hibna Anut uqa tuliteceb ija ceseli cajimig aquniadi Galili ono nuigen,” aden.

<sup>29</sup> Odocob Pita madon, “Leih cunug age wawaga meleec tonigianfa, ijaqa qee bahic qee wawi meleec toneiau!” don. <sup>30</sup> Odocob Jisas uqa Pita jejeg hewi madon, “Ija mele mahigina, witic ina mala manahal qee qu lecisdoc ninijeb hina madegan, ‘Uqanu qee dugina,’ i cijeddogan,” don. <sup>31</sup> Odocob Pita je gagadic madon, “Ija hinaca cal mewannu nijcecebf ija hinanu qee bahic qee sasac qugaun,” don. Odocob malogom cunughu je odi madein.

*Jisas uqa Getsemani cabina Anut inondon*  
(Matju 26.36-46; Luk 22.39-46)

<sup>32</sup> Age cocobi li cudun oso, Getsemani egina, euna calimeig Jisas ugana malogom maaden, “Age ene bibilebil Anut inondudu biligen,” aden. <sup>33</sup> Odimei uqa Pitaca, Jemsca, Jonca ehadeceb limeig Jisas waug me qee meceb duman culeceb <sup>34</sup> maaden, “Dumani culia, cal mecnu odi oditina. Age ene cebac bibili mecieigale,” aden. <sup>35</sup> Odi maadimei uqa nag odi qisacadi nu mahulimei inondon. Uqa jic oscocafi temdoc ben uqaca hona eu wooldocnu gale don. <sup>36</sup> Uqa Anut inondon, “Aba<sup>†</sup> Mei, hina ceteh cunug odocnu ihoc. Gabin i ija cagasitagale. Euqa ija gale tecna cain odogaun, hina gale hecna toodu odoga,” don.

<sup>37</sup> Odimei uqa malogomca limei age us ninjegin feciadimei Pita madon, “Saimon, hina us nijigafo? Hina aua osol cebac bibili meciecnu uein qee nijelfo? <sup>38</sup> Age temadecna lowainnu cebac bibili inondoigale. Wawaga odigen ena eu mele euqa dewenega gagadic odocca qee,” don.

<sup>39</sup> Odi madumei ceseli li Memeg inondon. Uqa je wele maden eu haun inondon.

<sup>40</sup> Odimei caji haun ceseli malogom cemenega limei age us ninjegin feciaden. Ge, age amaga mumugcanu eu meciibilecwe qee. Age cel je madocnu qee cisdoloin.

<sup>41</sup> Uqa saen cijedna ceseli humei maaden, “Age gaid jaen mumudi bibileig us nijeigafo? Eu ihoc, saen wele hoia! Feiga, age qila Dana Melah silail dana ebenegana moqagan. <sup>42</sup> Cajecebil beloqa. Feiga, dana ija deweninu balijigian eu wele hona,” aden.

*Judas uqa Jisas cad age ebenegana muden*  
(Matju 26.47-56; Luk 22.47-53; Jon 18.3-12)

<sup>43</sup> Uqana malogom maaaden Judas, malogom 12-pela eundec oso, uqa hon. Uqa gami dana mati bahic age han siginca han galabca hewi hoin. Ihane dana benbenca Juda agena matuca age suladeceb hoin. <sup>44</sup> Aria, dana uqa Jisas ugana cad ebenegana mudigiannu maden eu uqa wele han dana fogagannu gaga oso mecnu odi maaden, “Dana ija cotdugen eu uqa hewimeig me cofdudu ehudi beleiga,” aden.

<sup>45</sup> Odocob dana eu humei uqa mahuc Jisasca limei madon, “O Meca!” don. Odimei uqa Jisas cordon. <sup>46</sup> Odocob han dana age Jisas eben gagadic hewein.

<sup>47</sup> Euqa dana oso Jisasca gami tawein eu eben nocob han sigin umei ihanec dana ilona cabi dana qelimei dahig cagon. <sup>48</sup> Odocob Jisas maaden, “Eetanu age han siginca han galabca heje oc dana cinigwe ija hewituqagannu hoiga? <sup>49</sup> Ija deel cunugnana ageca tempelna bibileb iwaladolig. Odocob age ija hewitecnu oso qee odoloin. Euqa Anutna jaqec je ihoc ligiannu ceteh i cunug calen,” aden. <sup>50</sup> Odocob ugana eundec cunug qisacdumeig busalein.

*Dana haun oso busalen*

<sup>51</sup> Dana haun oso lotoc nag himec taqen uqa Jisas toodon. Age uqa hewoqaga bili odoin. <sup>52</sup> Euqa uqa bical bubusali bilei lotoc eu culen.

*Age Jisas Juda cegulec amagana gesildoin*

(Matju 26.57-68; Luk 22.54-55, 63-71; Jon 18.13-14, 19-24)

† 14:36: Je madec i Aram je, eu Jisas ugana je madec gug bahic. “Aba” ugana gug eu “Mei.”

<sup>53</sup> Odocob age Jisas ehudi ihanec dana agena ilo amegna mudein. Ono ihanec dana benbenca, Juda agena matuca, loo je iwaladecca age cunug ceguleuin. <sup>54</sup> Pita uqa tabag hehewi tooaden. Tooadimei uqa ihanec dana ilo ugana jona len. Uqa jo gel dunuh limei jo cofdoc dana gami deweg ja walac dodon bilen.

<sup>55</sup> Aria, ihanec dana benbenca, Juda dana ben cunug ceguleinca age Jisas dewegnu ob mec je amagana fec dahinigana doc eundec je walein. Oso camas meceb eu toodoo geldocomun cal migian ein. Euqa age oso qee guludolo. <sup>56</sup> Ge, dana mati bahic dewegnu ob mecnu cajimeig odi oodon fom, odi mamaden dom uhulii madein euqa agena je cunug ihocihoc qee camas mel. <sup>57</sup> Odocobil dana leih caji tawimeig Jisasnu ob mecnu je odi uhuli madein, <sup>58</sup> “Ege uqa, ‘Ija tempel i dana ebenegana cehein eu wagalimig deel cijedna tempel oso ebenegana qee cehec eu cehigen,’ eceb dom,” ein. <sup>59</sup> Age odi madeinqa ageha agena je ihocihoc qee camas mel.

<sup>60</sup> Odocobil ihanec dana ilo cegulec gemona tawimei Jisas sisildon, “Dana i age cel je hina dewennu madegina? Hina jejenega hewi je oso madecwe qeefo?” don. <sup>61</sup> Euqa Jisas uqa jejeg qee hewel, je oso qee madel.

Odocob ihanec dana ilo uqa Jisas haun sisildudu madon, “Krais eu hinafo? Hina Anut Binanca eu uqa Melahfo?” don. <sup>62</sup> Odocob Jisas madon, “Eu ija bahic! Age Dana Melah Anut gagadic odocca eben meulana isec bibileb sao taenna ha hohob foqagan,” don. <sup>63</sup> Odocob ihanec dana ilo ugana lotoc ben hewi balahadumei maaden, “Ege eetanu dana age dana inu je madoqagannu oso walopona? <sup>64</sup> Uqa Anutnu je me qee madeia. Eu age cunug dah meiga. Age eeta madegina?” aden. Odocob age cunug uqa cal migiannu deweg je nijia ec madein.

<sup>65</sup> Age odi madecibei leih age Jisas cin qoin. Leih age ameg jahuldumeig ola tududu madoin, “Je hahun magaga doqa!” doin. Odocobil ihanec dana ben ugana jona cofdoc dana age Jisas siho qaqa hihi ehudilein.

### *Pita Jisasna malogom biley qee sasac qon*

(Matju 26.69-75; Luk 22.56-62; Jon 18.15-18, 25-27)

<sup>66</sup> Age Jisas geldodogin Pita uqa jo gel dunuh bilen. Bibilen ihanec dana ilona cabi mel aid oso cemenu humei <sup>67</sup> Pita uqa deweg ja walac dodon mecidumei madon, “Hinaha Jisas Nasaretdecca bilein,” don. <sup>68</sup> Euqa Pita uqa qee sasac qu mel aid madon, “Hina madagana eu ija dadanigina, hina eetanu madagana eu qee dugina,” don. Madumei gesacna jic cebecka isec len. <sup>69</sup> Odocob cabi mel aid ono mecidumei uqa haun mamadi ono tawein eundec maaden, “Dana i uqa age eundec oso,” aden. <sup>70</sup> Pitaqa haun qee sasac qon.

Saen nag gieceb ono tawein eundec age hu Pita haun madoin, “Mele bahic hinaha eundec oso. Ge, hina Galilidec,” doin. <sup>71</sup> Odocob agena kobilna uqa mele bahic mamadi maaden, “Age dana inu madegina eu qee dugina,” aden. <sup>72</sup> Madeceeb mala manahal saen lecisdochna qon. Odocob Pita Jisas wele madon, “Mala manahal qee qu lecisdoch ninijeb hina ijana biligina eu qee sasac qu cijeddoggan,” don eunu dahig fogo docob waug cagocob qajen.

## 15

### *Age Jisas ehudi Pailat amegna mudein*

(Matju 27.1-2, 11-14; Luk 23.1-5; Jon 18.28-38)

<sup>1</sup> Walag daneceb ihanec dana benbenca, Juda agena matuca, loo je iwaladecca age gabandumeig je togodoin. Togodu hedumeig age Jisas eben libimeig ehudi limeig Pailat, Rom gabman dana matu, ebenna mudein.\* <sup>2</sup> Odocobil Pailat uqa Jisas sisildon, “Juda agena king eu hinafo?” don. Odocob Jisas jejeg hewi madon, “Hina madagana odi himec,” don. <sup>3</sup> Odocob ihanec dana benben age dewegnu je geh um qu madein. <sup>4</sup> Odocobil Pailat haun sisildon, “Faga, age dewennu je geh um qu madegina. Hina jejenega qee hewagaunfo?” don. <sup>5</sup> Euqa Jisas jejeg qee hewel. Eunu Pailat geh cisdon.

### *Pailat age Jisas na babalecna tuitu qoqagannu maden*

(Matju 27.15-26; Luk 23.13-25; Jon 18.39-19.16)

<sup>6</sup> Pailat uqa Juda agena Sab Jec Deel Ben ina gaid gihacdoc dana oso Juda dana age agedodoc dana eu besitugaga ecebili eu besituadoloi. <sup>7</sup> Saen euna age dana Rom gabmanca cadein eu gihacdoc jona madecebil bilein. Dana eundec oso, ijan Barabas, gihacdoc jona bilen uqa Rom gabmanca cadein saen euna dana qocob cal men. <sup>8</sup> Juda dana cajaca age ceguli bibileg Pailat ugana kobil gaid Juda dana odadoloi eu toodoo odigianu sisildudu madoin. <sup>9</sup> Odocobil Pailat sisiladen, “Ija Juda agena king besi uadecnu wawaga

\* 15:1: Age je Matju 27.2na nijia eu feiga.

nijiafo?" aden. <sup>10</sup> Ge, Pailat uqa ihanec dana benben age Jisasnu macumac mimi uqa ebenna mudein eu don. <sup>11</sup> Euqa ihanec dana benben age dana cajaca ceguli bilein eu sigaladecebile age Pailat Jisas besi uadecnu qee madein. Age Barabas besitugagale ec madein. <sup>12</sup> Odocobil Pailat haun sisiladi maaden, "Ija dana age Juda agena king egina eu eeta odudigen?" aden. <sup>13</sup> Odocob age haun utai madoin, "Na babalecna tuitu qogal!" doin. <sup>14</sup> Odocobil Pailat maaden, "Eetanu? Uqa cel qisol mec odon?" aden. <sup>15</sup> Eunu Pailat uqa dana cajaca wawaga me nijigia bili imei Barabas besiaden. Odimei uqa han dana maadeceb age Jisas ehudimeig qisadoin. Qisadu hedocobil uqa Jisas na babalecna tuitu qumeig caquseceil caculimei cal necnu han dana ebenegana muden.

*Han dana age Jisas lelandoin  
(Matju 27.27-31; Jon 19.2-3)*

<sup>16</sup> Han dana age Jisas ehudimeig jo gabman dana ben bilia eunalein. Age Rom gabman dana ben ugana cudun mudein. Odimeig age han dana am cunug utaadecebile humeig osobenca cegulein. <sup>17</sup> Age lotoc golca oso tacitoin. Odimeig age halu dud lalic qumeig king katakat mudimeig gulodutoin. <sup>18</sup> Odimeig age binan susuli lelandudu madoin, "O Juda agena king, feele!" doin.<sup>†</sup> <sup>19</sup> Odimeig age sih u ilo qagimeig cin qumeig amegna gob cehi uganan cuha fein. <sup>20</sup> Age lelandu hedumeig lotoc golca hulitumeig ugana lotoc haun tacitoin. Odimeig age ehudi li na babalecna tuitu qocnu cali li belein.

*Age Jisas na babalecna tuitu qoin  
(Matju 27.32-44; Luk 23.26-43; Jon 19.17-27)*

<sup>21</sup> Age bebeleig han dana age Saimon Sairinidec uqa bahudec taun ben dunuh hohon madocobil Jisasna na babalec gahidon. Saimon Sairinidec uqa Aleksanda Rufasca memela.

<sup>22</sup> Belimeig age cudun Golgota<sup>‡</sup> ein euna Jisas ehudi ehi tein. Golgota ijan gug eu "Ilo gatic cudun." <sup>23</sup> Age wain ceteh gulihinca gabandoc eu jecnu utein. Euqa uqa qee jel. <sup>24</sup> Age Jisas na babalecna tuitu qumeig caquseceil caculeceb ugana lotoc agedodoc siwiaidein. Age ugana lotoc inni siwi cedecnu satu udoin.

<sup>25</sup> Eu 9 kilok qasil age uqa na babalecna tuitu qoin. <sup>26</sup> Age dewegnu je madein eu jaqi qoin, "Uqa Juda agena King." <sup>27-28</sup> Age Jisas cemenug heje oc dana lecis na babalecna tuitu aqalimeig caqusalecebil caculesin. Oso eben meulana isec tuitu qoin, oso eben ansena isec tuitu qoin.<sup>§</sup>

<sup>29</sup> Odocob dana cajaca age hu li i bileig age lelandudu ilomoga culidudu je ilag madoin, "Se, hina tempel wagalimig deel cijedna haun cehigen em," <sup>30</sup> hinadodoc cahahadumeg na babalecnadec toni naga!" doin. <sup>31</sup> Ihanec dana benbenca, loo je iwaladecca ageha lelandudu madein, "Uqa leih cahahaaden euqa ugadodoc cahahadocnu ihoc qee." <sup>32</sup> Uqa Kraisfi, uqa Isrel egena kingfi uqa qila na babalecnadec toni neiale. Euna ege fimeb wawige meleigian," ein. Odocob dana ale ugaca gami na babalecna tuitu aqalein eu aleha lelandosin.

*Jisas cal men  
(Matju 27.45-56; Luk 23.44-49; Jon 19.28-30)*

<sup>33</sup> Odocob cam gemo ceheceb cam tu qocob hatu cunug gagatuc menen, ninjen li 3 kilok wesi. <sup>34</sup> Odocob 3 kilok odi Jisas co suli u utai maden, "Eloi, Eloi, lama sabaktani?"\*\* en. Je ugana gug eu odi:

"Ijana Anut, ijana Anut, eetanu qisactaga?" en. (Buk Song 22.1)

<sup>35</sup> Dana leih age ono talildu tawein je eu dah mimeig madein, "Feiga, dana eu uqa Ilaija utadona," ein.<sup>††</sup> <sup>36</sup> Age oso guguli gege oso umei wain gulihinca tanumei balac oso euna gihaqdumei sulecebile li cona mimei maden, "Sumudeiga. Culgeceb ege Ilaija uqa humei na babalecnadec casili toni mudiganfo, qeefo ec feqan," en. <sup>37</sup> Odocob Jisas gehca utai kis umei cal men.

<sup>38</sup> Odocob lotoc ben tempelna hamol gunna caqusec tawoloi eu ohisdec baladu ni mahana lecisdon. <sup>39</sup> Odocob Rom agena han dana 100 cofadec Jisas olana tawen uqa Jisas kis umei cal men eu odi fimei maden, "Mele bahic, dana i uqa Anut Melah!" en.

<sup>40</sup> Caja leihha onoca tatawi fein. Age gemodec eu Maria Makdaladecca, Maria uqa Jemsjomog Josefca analaca, Salomica. <sup>41</sup> Age Jisas Galili hatuna cobon saenna cesuldudu toodu coboin. Caja mati age Jisas gami Jerusalem bein eu ageha ono tawein.

† **15:18:** Age je Matju 27.29na nijia eu feiga. ‡ **15:22:** Golgota eu Aram je. § **15:27-28:** Grik jaegec je hilah leihna age je oso tubdu jaqein eu odi: Anutna jaqegec je eu odi maden, "Age uqa loo je tefadoc danaca osoben bibilegin meciadein," en eu ihoc len. (Aisaia 53.12) \*\* **15:34:** Je madec i Aram je, eu Jisas ugana je madec gug bahic.

†† **15:35:** Aram jena "Eloi, Eloi" ugana hutan eu "Ilaija, Ilaija" cinigwe.

*Age Jisas deweg ganac qalqal hatinna mudein  
(Matju 27.57-61; Luk 23.50-55; Jon 19.38-42)*

<sup>42-43</sup> Cam toni nonon Josef Arimatiadec hon. Uqa Juda agena cegulec eundec oso, uqana coboc hutan me. Uqaha uqadodoc Anutna culnu waliwali fen. Úqadec Juda agena cuha deel caligian. Odocob qila eu deel age ceteh sab jec bennu saciadoloig. Eunu uqa waug gagadic mudimei Pailat amegna limei Jisas deweg ganac ugiannu sisildon. <sup>44</sup> Odocob Pailat uqa Jisas wele cal meiafo, qeefo ec cisdon. Odimei uqa Rom agena han dana 100 cofadec utadocob hocob uqa Jisas cal meiafo, qeefo? ec sisildon. <sup>45</sup> Rom agena han dana 100 cofadec uqa Jisas cal meia ec Pailat madocob uqa age Josef Jisas deweg utecnu maaden. <sup>46</sup> Odocob Josef uqa deweg jeuldecnu lotoc senenec oso fajen. Odimei uqa Jisas deweg heweceb toneceb lotocna jeulden. Odimei uqa Jisas deweg qalqal hatin aluh qeihna hunein euna muden. Uqa meen koldoc oso olodocob eu hatin biah cufa qon. <sup>47</sup> Maria Makdaladecca Maria Josef anagca ale Jisas deweg ana mudein eu fesin.

## 16

*Jisas ceseli cajen  
(Matju 28.1-8; Luk 24.1-12; Jon 20.1-10)*

<sup>1</sup> Pasowa Sab Jec cuha deel hedocob Maria Makdaladecca, Maria Jems anagca, Salomica age Jisas dewegna mool dedeman meme joudoqaga bili belein. <sup>2</sup> Cuha deelna qasil wele bahic age walag dadanen qalqal hatinna belein. <sup>3</sup> Age jicna bebeli bileig madein, "In uqa meen hatin biah cufa qoc eu olodugeceb gesacna ligian?" ein. <sup>4</sup> Ge, meen eu ben bahic. Odocob age amaga teceb meen wele olodogin gesacna len fein. <sup>5</sup> Odimeig age qalqal hatin dunuhlein. Ono dana haun oso eben meulana isec lotoc senenec tacen bibilen fein. Odimeig age filiciti cucuein.

<sup>6</sup> Uqa maaden, "Cain filiciti cucuiuwain. Age Jisas Nasaretdec na babalecna qocobil cal men eu walegina. Uqa ene qee biled. Uqa wele ceseli cajeia! Feiga, cudun ina uqa mudecebil nijen. <sup>7</sup> Ageqa belimeig uqana malogom Pitaca maadeiga, 'Jisas Galili ono aquuniadi nuina. Uqa odi maadenwe age ono uqa foqagan,' adeiga," aden.

<sup>8</sup> Odocob age qeleeli dadaneinnu age qalqal hatinnadec cali humeig busali belein. Odimeig age cucueinno oso je qee madoloin.

[*Grik jaqec je hilah leihna age but i 16.9-20 eu qee nijel.*]

*Maria Makdaladec casac Jisas fen  
(Matju 28.9-10; Jon 20.11-18)*

<sup>9</sup> Cuha deelna qasil bahic Jisas ceseli cajimei uqa casac Maria Makdaladecca camas men. Jisas uqa wele buga me qee 7-pela Maria Makdalanaadec ititacadeceb belein. <sup>10</sup> Maria uqa dana caja age Jisasca coboin eu ageca limei age qada qaqaji bibilegin je saaden. <sup>11</sup> Maria uqa ija Jisas figa uqa cebac bilia adeceb doin qa age uqana jenu wawaga qee meelel.

*Malogom lecis ale Jisas jicna fesin  
(Luk 24.13-35)*

<sup>12</sup> Eu hedocob Jisasna malogom lecis ale jic bahu euna bebelesin uqa deweg fecnu fil odi aleca camas men. <sup>13</sup> Odocob ale ceselimesi malogom leih maadesin qa age alena jenu wawaga qee meelel.

*Jisas uqana malogom cabi aden  
(Matju 28.16-20; Luk 24.36-49; Jon 20.19-23)*

<sup>14</sup> Eu cunug hedocob Jisas uqana malogom 11-pela age sab jejegin uqa ageca camas men. Odimei age dana cajaca uqa ceseli cajeceb fimeig maadecebile age agena jenu wawaga qee meleelnu uqa age wawaga qee meleecceb wawaga tool ibuldonnu galac maden. <sup>15</sup> Odimei uqa maaden, "Age mahamaha cunugna beladimeig dana cajaca cunug Anut ifanen eu me je qasali maadeiga. <sup>16</sup> Oso me je eunu waug meleecceb wa joudec ocofbfi Anut cahahadugian. Euqa oso me je eunu waug qee meleeccebfi Anut uqa geuldigion. <sup>17</sup> Dana cajaca wawaga meleigian saen euna kobolkobol odoe i edi caligian. Age ijania buga me qee dana deweneganadec ititacadecebile beloqagan. Age beilamaga je haun filfil madoqagan. <sup>18</sup> Age man sononec me qee u hewoqagan. Age wa me qee oso jifeig age qee cal mowain. Age ebenega hag dana cajaca dewenegana mecebile age me moqagan," aden.

*Anut uqa Jisas ehudeceb sao ohis ten  
(Luk 24.50-53; Aposel 1.9-11)*

<sup>19</sup> Odocob Jisas Tibud uqana malogom gami je madi hedocob Anut uqa Jisas ehudeceb sao ohis timei uqa Anut eben meulana isec bilen. <sup>20</sup> Odocob uqana malogom age beladi

maha cunugnana me je qasali maadein. Age me je qasali maaadegin Tibud uqa ageca cabi ooig kobolkobol odoc eu agena me je madec gabalna calen euna agena je eu mele eunu ihacaden. Mele.]

[*Grik jaqec je hilah leihna age but 16.9-20 eu qee nijel euqa je fil oso nijia eu odi:*]

[ (9) Caja eu age limeig Pitaca dana age uqaca bileinca je cunug maaden eu mahuc saadein. (10) Eu hedocob Jisas uqadodoc malogom suladeceb age maha cam tobi becna isec, cam toni nocna isec belimeig me je qasali maadein. Me je eu gun, eu Anut uqana dana cajaca caahahaadecnu je, eu qee qee meiaun, eu gaid biligian.]

## Me Je i Luk Jaqen Aqunec Je

Me je i cel dana bahic jaqen eu je oso qee nijel. Euqa Luk buk i jaqen eunu ihacena eu ceteh mati njia. Lukna me jeca Aposel Agena Cabi occa ale caca. Dana osol buk lecis i jaqen. Aposel Agena Cabi ocna Luk uqa saen leihna “ege” ec jaqen, eu Aposel 16.10-17, 20.5-15, 21.1-18, 27.1-28.16 feiga. Eunu Luk uqa Aposel jaqen. Odocob Aposel bukna Luk uqa “O Tiofilas ijana buk casac jaqem,” ec jaqen. Buk uqa casac jaqen eu Lukna me je. Luk uqa Juda dana qee, uqaha dokta.

Me je Luk jaqenna ege Jisas uqa Isrel agena Cahahaadec eu Anut uqa ija suldocomin hugian ec wele maden eu foqona. Odocob Jisas uqa dana cajaca mahamaha cunug bilegina eundecha agena Cahahaadec eu foqona. Tibudna Kis uqa Jisas sawen dana cajaca me je maadecnu suldon eu Luk jaqen. (4.18 feiga.) Eu mele, Lukna me jena Jisas uqa dana cajaca age columen filfil gahidoginanu walol dodon cesuladen eunu je mati njia.

Ceteh Jisas odon eu gaid dana cajaca odadeceb age ceelein. Age buk sanan mecnal feiga, eu 1.42-48, 2.10. Eu odiha Jisas sao jobon ohis ten saenna dana age ceelein. Age buk cit qocna feiga, eu 24.52. Ceteh haun Luk jaqen. Uqa inondoc kobolca, Kis Gunna cabi occa, Jisas dana cajaca agena silail cagasiadence, caja age odoinca, talacunugaca eunu je ben jaqen.

Je mati eu Lukna me jena njia euqa buk fil osona qee nijel. Eu odi Jisas uqa mahana calennu saena (dac 1-2), uqa Sameria dana osonu galolo je eunu saena (dac 10), dana melah oso jahunec galolo je eunu saena (dac 15), odocob Sakiasna dodo eunu saena (dac 19).

Lukna me je eu Jisasna cabi oc sanan mec. Luk uqaha Aposel Agena Cabi oc jaqen. Eu Jisas uqa sao jobon ohis teceb aposel odoinnu dodo.

### *Je Dunuhnu Dado Mec*

1. Aqunec je (1.1-4)
2. Jisas mahana calen (1.5-2.52)
  - A. Jisas calecnu madec (1.5-56)
  - B. Wa Joadec Jon calen (1.57-80)
  - C. Jisas calimei mel ben men (dac 2)
3. Jisas uqana cabi ocnu saciadon (3.1-4.13)
  - A. Wa Joadec Jon uqa Jisas aqunidon (3.1-20)
  - B. Jon uqa Jisas wa jouden (3.21-22)
  - C. Jisas uqana sihil ijanaga (3.23-38)
  - D. Seten uqa Jisas temdu fen (4.1-13)
4. Jisas uqa Galili hatuna cabi on (4.14-9.9)
  - A. Uqana cabi Galili ono sanan men (4.14-41)
  - B. Uqana Galili hatuna coboc osoldoc (4.42-5.39)
  - C. Juda agena cuha deelnu je fee dadanec (6.1-11)
  - D. Jisas uqa aposel 12-pela nesili ehadan (6.12-16)
  - E. Uqa maha tutucna me je iwaladen (6.17-49)
  - F. Uqa Kapaneamnaca Nennaca kobolkobol odoc leih odon (7.1-18)
  - G. Wa Joadec Jon uqa Jisas je oso sisildon (7.19-29)
  - H. Jisas Farisica je madein (7.30-50)
  - I. Uqana Galili hatuna coboc lecisdoc (8.1-3)
  - J. Anutna culnu galolo je (8.4-21)
  - K. Uqa Galili wa gad cagoc leti nuen (8.22-39)
  - L. Uqana Galili hatuna coboc cijeddoc (8.40-9.9)
5. Jisas uqa Galili hatu culdimei cudun filfil nuen (9.10-50)
  - A. Uqa Galili wa gad cagoc leti uqa cudun ono isec nuen (9.10-17)
  - B. Uqa Sisaria Filipai taunna nuen (9.18-50)
6. Jisas uqa Judia hatu ono cabi on (9.51-13.21)
  - A. Uqa Sameria hatuna cocobi Judia hatu ono nuen (9.51-62)
  - B. Uqa dana 72 suladeceb belein (10.1-24)
  - C. Uqa Sameria dana oso uqa Juda dana cesuldonnu galolo je ec loo je iwaladec dana madon (10.25-37)

- D. Uqa Betani jobon li Mata Mariaca facialen (10.38-42)
- E. Uqa Judia hatu ono dana cajaca iwaladen (11.1-13.21)
- 7. Jisas uqa Peria hatu ono cabi on (13.22-19.27)
  - A. Jic cebec sosog (13.22-30)
  - B. Leih Jisasca limeig Herod qagahigia ec madon (13.31-35)
  - C. Jisas uqa Farisi oso ugana jona len (14.1-24)
  - D. Age Jisas toodocnu madifeig casac cisdu cuhadoiga (14.25-35)
  - E. Sipsip jahunecca, meen qaig oso jahunecca, dana melah oso jahunecca galolo je (dac 15)
  - F. Dana cabi cofdoc docnu galolo je (16.1-18)
  - G. Lasaras dana cehewanca (16.19-31)
  - H. Iwaladec je filfil (17.1-10)
  - I. Jisas dana 10-pela lepraca me maden (17.11-19)
  - J. Anutna cul hugian (17.20-37)
  - K. Caja wij dana gesilecca galolo je (18.1-8)
  - L. Farisica takis cedec danaca galolo je (18.9-14)
  - M. Jisas mel sim eeladen (18.15-17)
  - N. Dana ilo cehewanca uqa Jisasca hocob madesin (18.18-30)
  - O. Jisas uqa cal mimei ceseli cajigian ec maden (18.31-34)
  - P. Jisas dana ameg galuc mec me muden (18.35-43)
  - Q. Jisas uqa Sakias madon (19.1-10)
  - R. Cabi dana 10-pela age meen qaig oinnu galolo je (19.11-27)
- 8. Deel 6-pela hedocob Pasowa Sab Jec Ben Deel caligiannu ninijen Jisas uqa age qocobil cal migiannu Jerusalem ono nuen (19.28-23.56)
  - A. Jisas uqa kingwe Jerusalem dunuh len (19.28-44)
  - B. Jisas uqa tempel jo soidon (19.45-48)
  - C. Jisas uqa Juda dana benben gami fee dadani hedoin (dac 20)
  - D. Jisas uqa Oliw Aluhna cit qoc saennu maden (dac 21)
  - E. Jisas ugana malogom gami Pasowa sab jein (22.1-38)
  - F. Jisas Oliw Aluhna Memeg inondon (22.39-46)
  - G. Age Jisas hewudein (22.47-65)
  - H. Age Jisas gesildoin (22.66-23.25)
  - I. Age Jisas na babalecna tuitu qocobil cal men (23.26-56)
- 9. Jisas cal mecnadec ceseli cajen (24.1-53)
  - A. Jisas ceseli cajen (24.1-12)
  - B. Jisas ceseli caji hedocob cabi on (24.13-49)
  - C. Jisas sao jobon ohis ten (24.50-53)

*Luk uqa je i Tiofilas jaqiton*

<sup>1-4</sup> O Mei Tiofilas, je age sahecebil dom eu mele eunu jaqihigennu me bahic cisdom. Dana mati age ceteh i ege gemo calennu je jaqcnu odoin. Eu odiwe dana age Anutna jenu cabi dana ceteh i sanan mecnadec amagana fefegin hon ageha ceteh eunu je qasali maadein je eu suldugein. Eunu ijaha hahawannadec lili qila hon ceteh i cunugnu sisilimig gug domnu je tutuc himec jaqihigina.

*Ensel Sekaraia aideg Ilisabet Jon basigiannu madon*

<sup>5</sup> Odocab saen Herod uqa Judia hatu agena king bibilen nawel tawec ihanec dana oso, ijan Sekaraia, bilen. Sekaraia uqa Abaisa amnadec, eu ihanec dana agena am oso. Uqa aideg ijan eu Ilisabet. Uqa Eron ihanec dana sihulnadec. <sup>6</sup> Ale Anut amegna ititom bilesin. Ale Tibudna loo jeca, ugana jeca eu cunug toodu bibilesti cobosin. Eunu Tibud alenu jeca qee. <sup>7</sup> Euqa Ilisabet uqa goud. Uqa Sekaraia ale toia bahic. Eunu ale melca qee bilesin.

<sup>8</sup> Saen osona Sekaraia uqa ugana ihanec dana am age tempelna Anut amegna cabi oogin <sup>9</sup> agena cabi siwec saenna Sekaraia uqa Tibudna tempel gun hamol limei ja dedemanca hudecnu cabi eunu age satu udocna gesilimeig uqa utein. Odocab uqa ugana cabi muguh mec eu umei tempel dunuh len. <sup>10</sup> Odocab uqa ja dedemanca huhuden dana mati bahic age maha gumu inondudu tawein. <sup>11</sup> Saen euna Tibudna ensel ugaca hon. Uga ihanec cabal ja dedemanca nijen eu meulana isec tawen. <sup>12</sup> Odocab Sekaraia uqa eu fimei filiciti ben bahic cucuien. <sup>13</sup> Odocab ensel ugana madon, "Sekaraia, Anut hinana inondoc dah men. Eunu cain cucuiagaun. Hina aiden, Ilisabet, uqa mel oso basihigian. Odocab hina mel ijan Jon qogan. <sup>14</sup> Odocab hina ceelii celeboegan. Hina aiden mel eu baseceb dana mati bahic ceeloqagan. <sup>15</sup> Ge, uqa hibna dana binanca Tibud amegna cobigian. Uqa wainca ceuca qee jeiaun. Saen uqa anag waugna bibleb uqa Kis Gun cacawac mec biligian.

<sup>16</sup> Odocob uqa Isrel dana cajaca maadeceb age tului falicdumeig Tibud, agena Anut, uqaca ceseli hoqagan. <sup>17</sup> Odocob uqa memegail melemegailca gabanadigiannuca, feeec dana maadeceb age tului falicdumeig dana ittom agena cisdoc toodoqagannuca, Anutna dana cajaca Tibudnu qagu madeceb amaga mimi biluqagannuca uqa Ilajana dumanca, uqana gagadic odocca umei Tibud aqunitu cobigian,” don.

<sup>18</sup> Odocob Sekaraia uqa ensel sisildon, “Ija dana toia. Ija aideniha toia. Eunu hinana je eu melefo ija adi dugen?” don.

<sup>19</sup> Odocob ensel jejeg hewi madon, “Ija Gebriel, ija Anut cemenug tawigina. Anut ija sulteceb hina je me i mahigennu huga. <sup>20</sup> Faga, ijana je eu uqana saenna bahic fegan. Euqa hina je eunu wawin qee meleelnu hina con je madec eu qee migian. Hina con odi himec bibileb li saen ijana je hahun mahiga eu caligian,” don.

<sup>21</sup> Odocob dana cajaca age Sekaraia susumudi bileig age eetanu saen cecelac tempel gun hamol bilia? ec cisdon. <sup>22</sup> Odocob uqa dunuhdec calimej je madecnu co ihoc men len ihoc qee lel. Eunu age uqa tempel dunuhna codoc oso fen ec doin. Odocob uqa qee je madec ebenna dih dado maden.

<sup>23</sup> Odocob uqa tempelna cabi qee meceb uqa uqana jona ceseli nuen. <sup>24</sup> Odocob saen leih nueceb Ilisabet uqa waugca men. Eunu jagel 5-pela jona dih bilen. Uqa maden, <sup>25</sup> “Qila saen ina Tibud cesuliteia. Anut ija majani dana cajaca amagana bilen eu qu qeleia,” en.

#### *Ensel uqa Maria Jisas basigiannu madon*

<sup>26</sup> Odocob jagel 6-pelana Ilisabet waugca bibilen Anut uqa ensel Gebriel Galili hatu ono suldocob jobon oso, ijan Nasaret, ono nuen. <sup>27</sup> Uqa mel aid taula oso, uqa dana oso, ijan Josef, ugiannu bilen eu uqaca je hewi nuen. Josef uqa King Dewidna siluldec. Mel aid taula eu ijan Maria. <sup>28</sup> Odocob ensel uqaca humei madon, “Feeleo, hina Anut amegna me bahic biligina! Tibud hinaca bilina,” don.\*

<sup>29</sup> Euqa Maria uqa ensel odi madocob uqa waug ben bahic culumen don. Odocob uqana je eu cel gugnu? ec cisdon. <sup>30</sup> Odocob ensel madon, “Maria, hina Anut amegna me biley wele oga. Eunu cain cucuiagaun. <sup>31</sup> Faga, hina wawinca cobimeg mel oso basegan. Odimeg mel eu ijan Jisas qogan. <sup>32</sup> Uqa hibna dana binanca biligian. Odocob age Anut Ohis Bahic Melah doqagan. Anut Tibud odudeceb uqa king caligian. Uqa asag Dewid king bilen eu odi biligian. <sup>33</sup> Odocob uqa Jekobna silul agena king bileyceh catanigian. Uqana cul qee qee meiaun,” don.

<sup>34</sup> Odocob Maria ensel madon, “Ija dana oso qee olom. Eunu ceteh eu adi caligian?” don.

<sup>35</sup> Odocob ensel jejeg hewi madon, “Kis Gun hinaca humei u tacihigian. Odocob Anut Ohis Bahic uqana gagadic odoj jahulhigian. Eunu mel hina basigian eu age gun oqagan, age Anut Melah oqagan,” don.

<sup>36</sup> “Faga, hina cotin Ilisabetnu cisdoga. Uqa toia bahic. Uqa mel basecwé qee egina qa qila uqa jagel 6-pelana mel waugna bilia. <sup>37</sup> Ge, ceteh oso Anut uqa odocnu ihoc qee oso qee nijel,” don.

<sup>38</sup> Odocob Maria madon, “Faga, ija Tibudna cabi caja. Hina ija odi mataga eu ijaca caleiale,” don. Odocob ensel uqaca cuculdi nuen.

#### *Maria nuimei Ilisabet fen*

<sup>39</sup> Saeri eu odina Maria uqa taun oso aluhna nijen eu Judia hatuna ono mahucwe nuen. <sup>40</sup> Uqa nuimei Sekaraiana jona limei Ilisabet alalagdon. <sup>41</sup> Saen Maria uqa Ilisabet alalagdodon waugna mel sim uqa bicolen. Odocob Anut uqa Ilisabet Kis Gun cacawac meceb <sup>42</sup> uqa jejeg gagadicca utai madon, “Hinana eeldoc eu caja cunug agena eeldoc wooladec. Mel sim basegan eu Anut uqaha eeldugian. <sup>43</sup> Ija adec ijana Tibud uqa anag ija mecitigianu ijaca hoia? <sup>44</sup> Ge faga, saen ija dahini hinana alalagtec ec docob mel wawina bicolimeji alegeeia. <sup>45</sup> Tibudna je ensel mahan eu odi caligianu hina wawin meleen. Eunu hina ceelhec biligina,” don.

#### *Mariana due*

<sup>46</sup> Odocob Maria maden:

“Ija wawi Tibud binan sulina.

<sup>47</sup> Anut ijana Cahahatec.

Eunu ija doloni ceelenia.

<sup>48</sup> Ge, ija Tibudna cabi caja himec.

Euqa uqa ijanu dahig bilia.

\* <sup>1:28:</sup> Grik jaqec je hilah leihna age je oso tubdu jaqein eu odi: “Uqa hina eelheia!” don.

Gec faga, qila hibnaca dana cajaca cunug age ijanu mati eeladec oin toqagan.

<sup>49</sup> Anut Gagadicca uqa ceteh ben bahic ijanu odeia.

Uqa ijan eu gun.

<sup>50</sup> Dana cajaca wele bileyinca, qila bileyinaca cunug age Anutnu cumunegina eu  
Anut uqa agenu waug qona.

<sup>51</sup> Uqa uen gagadicca huledumei dana feeechewadi bilisaadeceb buadein.  
Agena cisdoc qee men.

<sup>52</sup> Uqa king benben ilo cudunnadec hewadeceb mahana nein.  
Odimei dana age mahana bileyin eu suli u binanagaca maden.

<sup>53</sup> Uqa dana wenca eundec ceteh me aden.

Odimei dana cehewanagaca age ceteh me oso qee adimei suladeceb cetehca qee  
bileyin.

<sup>54-55</sup> Uqa weleca Ebrahamca, ugana sihil eundecca je hahun maaden eunu cisdon.

Uqa agenu waug qocnu dahig bileyeb catanigian ec maaden.

Eunu uqa Isrel dana age Anutna cabi ogina cesuladen,” en.

<sup>56</sup> Odocob Maria uqa jagel cijed odi Iisabetca bilimesi uqa ugana jobon ceseli nuen.

#### *Iisabet uqa Jon basen*

<sup>57</sup> Odocob Iisabet ugana mel basecnu saen caleceb uqa mel oso basen. <sup>58</sup> Odocob  
utuqanelca, ugana silulca age Tibud uqa me bahic uqanu waug qon eu dumeig age ugaca  
celein.

<sup>59</sup> Odocob deel 8-peladoc caleceb age mel eu deweg cagu qocnu age hoin. Odimeig age  
ijan Sekaraia eu memeg jomog qoqaga bili odo. <sup>60</sup> Euqa anag maaden, “Cain! Uqa ijan  
Jon qoqagan,” aden.

<sup>61</sup> Odocob age madoin, “Hinana silulna eundec oso ijan edecca qee,” doin. <sup>62</sup> Odimeig  
age mel memeg ebenegana dado mumudeig cel ijan quom? ec sisildoin.

<sup>63</sup> Odocob Sekaraia uqa jamel oso jaqcencu maadeceb age utecebil uqa jaqiaden, “Uqa  
ijan eu Jon,” jaqen. Odocob age cunug tumatumaein. <sup>64</sup> Odocob saen euna dih Sekaraia  
uqa co je madec eu fihilicdon. Odocob uqa Anut binan sulen. <sup>65</sup> Odocob dana cajaca  
cunug age cemenug bileyina dumeig cucuiein. Odimeig age ceteh odi calennu je eu Judia  
hatuna dana cajaca cunug age doin. <sup>66</sup> Dana cajaca cunug age je eu dumeig age je eunu  
cocobi cisdoin, “Mel sim eu hibna adi biligian?” doin. Ge, Tibudna gagadic odoc ugaca  
bilen eunu doin.

#### *Sekaraiana due*

<sup>67</sup> Odocob Anut odudeceb Jon memeg Sekaraia uqa Kis Gun cacawac meceb uqa je  
hahun madec odi maden:

<sup>68</sup> “Ege cunug Anut binan suluqale, uqa Isrel eguna Tibud.

Uqa ugana dana cajaca caahahagecnu egeca hoia.

<sup>69</sup> Uqa ugana cabi dana Dewidna siluldec odocob

Caahahagec Dana gagadic oso calen.

<sup>70</sup> Weleca Anutna je hahun gun dana Anutna je eu conogana odi madein,

<sup>71</sup> ‘Anut uqa eguna cad eunadec caahahagigan.

Dana cunug age egenu gemanaga beceb sagaggegina age ebeneganadec caahahagi-  
gian.

<sup>72-73</sup> Eetanu odi odigian? Ege asigeil agenu waug qugian.

Odimej je cagoc Ebraham madon eu ugana gun bal cehec je uqa dahig biligian,’ ein.

<sup>74</sup> Eunu Anut magen, ‘Ija agena cad eunadec caahahaadigen.

Age cucuiecca qee ijana cabi dana bliuqagan.

<sup>75</sup> Eunu agena deel cunug cebac bileyec age ititomica gunca ija amina coboqagan,’ gen.

<sup>76</sup> ‘Melami, hina age Anut Ohisdec ugana je hahun madec dana hogqagan.

Hina Tibud ugana jic saciadocnu aquunitogan.

<sup>77</sup> Hina Anutna dana cajaca age docnu maadegan,

“Anut agena silailnu uqa qee wadacadeiaun.

Eunu uqa caahahaadigan,” adegan.

<sup>78</sup> Egena Anut uqa malolca. Uqa egenu waug qona.

Eunu uqa fulacdoc sao ohisdec suldocob egeca hugian.

<sup>79</sup> Odimei dana age cal mec ihoc tuna bileyina age sao ohisdec fulacdoc fulacadigian.

Fulacdoc eu malol jic cobocnu ege dado migigian,’ en,” en.

<sup>80</sup> Odocob mel eu deweg dologca osoben ben men. Uqa wadauna<sup>†</sup> bibilen leceb ugana  
saenna Isrel dana cajaca amagana camasac men.

<sup>†</sup> 1:80: Age je Matju 3.1na nijia eu feiga.

## 2

*Maria uqa Jisas basen  
(Matju 1.8-25)*

<sup>1</sup> Saen euna Sisa Ogastas, uqa Rom hatu cofdoc dana, uqa dana age maha cunugna bileyin age ijanaga jaqoqagannu loo je oso men. <sup>2</sup> Loo je eu hahawan calen saen euna Kvirinias uqa Siria agena hatu ilo bilen.\* <sup>3</sup> Eunu dana cunug age agena jobon gugna beli age ijanaga jaqein.

<sup>4</sup> Odocob Josef uqa Dewid sihulnadec. Dewidna sihul agena jobon gug eu Betlehem. Anag uqa Dewid ono basen. Eunu Josef uqa Nasaret jobon Galili hatudec culdimei Betlehem jobon ono Judia hatuna nuen. <sup>5</sup> Uqa Mariaca osoben ijanala jaqecnu belesin. Maria uqa Josef ugiannu col codoin qa uqa waugca cobon. <sup>6</sup> Odocob ale Betlehem jobon bibileis mel basecnu saen calen. <sup>7</sup> Odimei Maria mel matu basimei lotocna jeludimei ono nijec jo cudunca qeenu uqa bulmakau agena bohna mudeceb nijen.

*Ensel age sipsip cofadec dana maadein*

<sup>8</sup> Odocob hatu euna sipsip cofadec dana age witic sipsip cofaadi bileyig cabina bileyin. <sup>9</sup> Odi bibilegin Tibudna ensel dana age gemo caleceb age Tibudna kobolkobel iletadeceb ben bahic cucuiein. <sup>10</sup> Euqa ensel maaden, “Cain cucuiuwain! Ge feiga, ija age me je ahuadiga eu dana cajaca mahamaha cunug dumeig celeboogagan. <sup>11</sup> Qila deel ina Dewidna taun ono caja oso mel basegia. Uqa agena Cahahaadec. Uqa Krais† Tibud. <sup>12</sup> Age fecnu gadac oso eu odi nijigian. Age mel momo oso lotocna jelec uqa bulmakau agena bohna ninijeh fogagan,” aden.

<sup>13</sup> Odocob mahuc bahic sao ohisna ensel age Anutna han dana gagadic mati bahic ensel euca cali humeig age Anut binan susuli madein:

<sup>14</sup> “Sao ohis bahic Anut uqa kobolkobelca biliale.

Mahana dana age Anut uqa nalunuga menu eu malol bileyigale,” ein.‡

*Sipsip cofadec dana age nui Jisas fein*

<sup>15</sup> Odocob ensel age culadi sao jobon haun tecebile sipsip cofadec dana age togodudu madein, “Ge, ceteh caleia Tibud mageia eu fecnu Betlehem jobon ono belegale,” ein.

<sup>16</sup> Odimeig age mahuc belimeig Maria Josefca gulucalimeig mel momodo eu bulmakau agena bohna ninijen fein. <sup>17</sup> Fecidodoig ensel mel inu maaden je eu Maria Josefca saalein. <sup>18</sup> Odocob dana cajaca cunug age sipsip cofadec dana agena je doin eunu age tumatumaienie. <sup>19</sup> Euqa Maria uqa ceteh inu dahig bilen. Uqa ceteh i waugna mimei cisdoloi. <sup>20</sup> Odocob ceteh eu age ensel uqa sipsip cofadec dana maaden odi gulucdoin. Eunu age Anutna celeboeig Anut binan susuli bileyig ceseli belein.

*Jisas ijan qoin*

<sup>21</sup> Odocob deel 8-pela hedocob age Jisas deweg cagu qumeig ijan Jisas qoin. Eu Maria waugca qee mec ijan eu ensel uqa madon.

*Josef Mariaca Jisas tempelna ehudi belesin*

<sup>22</sup> Odocob Maria Jisasca soialecnu saen caleceb Josef Mariaca ale Mosesna loo je toodumesi ale Jisas ehudi tempelna Tibud amegna mudecnu Jerusalem ono belesin. <sup>23</sup> Tibudna loo je jaqec eu odi nijia:

“Mel manahal matu cunug basegina eu age Tibudnu gun egina,” en. (*Kisim Bek 13.2, 12*)

<sup>24</sup> Tibudna loo je jaqec oso ha nijia:

“Age cuhudid lecisfo, man fululec fil oso lecisfo Tibudnu ihaneiga,” en. (*Wok Pris 12.8*) Euha ale toodu odosin.

<sup>25</sup> Aria, dana oso Jerusalem ono biloloi. Uqa ijan Simion. Uqa dana ititom. Uqa Anut binan sulec dana. Uqa Anut uqa Isrel hulunuga cehigian saen susumudi bileyi bilen. Odocob Kis Gun uqaca bilen. <sup>26</sup> Odi bibilen Kis Gun madon, “Hina qee cal mec bibili li Tibudna Krais eu fegan,” docob don. <sup>27</sup> Odocob Kis Gun dado mudeceb tempel dunuh len. Odocob saen mel anag memegca ale loo je jaqein eu odi toodu odocnu mel eu tempelna ehudi lelesin <sup>28</sup> Simion uqa mel eu umei ebenna hehewi Anut hetaga don. Uqa maden: <sup>29-32</sup> “O Ben, ija amigulna hinana caahagec figa. Caahagec eu dana cunug age amagana saciadom.

Hinana jic coboc Juda dana qee eundec ihacadijannu eu fuladoc.

Eu hinana dana cajaca, Isrel, age binanaga benca madigian.

\* **2:2:** Saen euna Rom age Isrel agena hatu cofdoen. Isrel hatu eu Siria hatu ben dunuh nijen. Rom age agena king eu Sisa ein.

† **2:11:** Krais eu dana Anut uqana dana caja caahaaadecnu wele nesili ehuden. ‡ **2:14:** Grik jaqec je hilah leihna age je oso tubdu jaqein eu odi: “Anutna malol eeldocca dana cunug gemo bilesiale!” ein.

Hinana je matem eu aig cali hoia.

Eunu ija, hinana cabi dana, cultecem wawi malolca cal migale,” en.

<sup>33</sup> Odocob mel anag memegca ale Jisasnu je eu Simion maden eunu tumatumaezin. <sup>34-35</sup> Odocob Simion uqa eeladimei Maria, Jisas anag, madon, “Faga, Anut uqa Isrel dana cajaca mati bahic fadaladiġiannu, dana cajaca mati bahic cahahaadiġiannu mel eunu Anut neſili ehuden. Odocob mati agena cisdoc jahunec eu camas moqagannu mel i Anutna gadac caligian. Dana mati bahic uqanu je me qee madoqagan. Odocob hinanuha, sigen aigca oso hina culin qu wogoldugianwe waloc higian,” don.

<sup>36</sup> Odocob saen euna je hahun madec caja oso bilen. Uqa ijan Ana. Uqa Fanjuel ateg. Fanjuel uqa Asa sihulnadeč. Ana uqa caja toia bahic. Weleca uqa cabi gel 7-pela danaca bilen. <sup>37</sup> Odimej uqa cabi gel 84 odi danaca qee bilen. Uqa tempel qee culdoloi. Uqa witic cahinegca Anutnu inondudu cud biloloi. Eu odina uqa Anut cewel utoloi. <sup>38</sup> Saen euna dih uqaha ono tempelna calen. Uqa ono calimei Anut hetaga ec je madon. Odimej uqa dana cunug age Anut cahahaadiġiannu susumudi Jerusalem ono bilein mel eunu maaden.

### *Josef Mariaca ale Nasaret ceseli belesin*

<sup>39</sup> Odocob Josef Mariaca ale Tibudna loo je toodoc cabi hedocobil ale Jisasca alena jobon Nasaret ceseli Galili hatu ono belein. <sup>40</sup> Odocob hibna mel eu ben mi gagadic men. Uqa Anutna doc am bec biloloi. Uqa Anut amegna me bahic biloloi.

### *Jisas uqa mel lulu tempelna nuen*

<sup>41</sup> Odocob cabi gel cunugna Jisas anag memegca ale Juda agena ja qoc fecnu, ijan eu Pasowa, Jerusalem ono gaid belolosi. <sup>42</sup> Saen Jisas uqana ben mec gadac cabi gel 12-pela caleceb memeg anagca alena kobel toodumesi Jisas ehudi ja qoc ben fecnu belesin. <sup>43</sup> Odocob ja qoc ben saen hedocob ale haun jobon ceceselesin qa Jisas uqa Jerusalem ono bilen. Odimesi memeg anagca uqa ono bilen eu ale qee dolosin. <sup>44</sup> Ale Jisas uqa cotugul danahca leih gami belegina ec cisdosin. Eunu ale odi cocobi bebelesi deel eu leceb uqanu meci bilesi cotugul danahca sisiladi belesin qa qee felesin. <sup>45</sup> Odocob ale uqa qee gulucdolosin. Eunu ale haun Jerusalem ceseli uqa wawali cocobi belesin. <sup>46</sup> Odocob deel cijedna uqa tempel dunuh bibilen gulucdosin. Uqa Juda agena iwaladec dana je mamadegin dah madi sisilaadi bibilen fesin. <sup>47</sup> Cunug age uqana je wadacdoc dumeig eu docka bahic ein. Eunu filicitein. <sup>48</sup> Memeg anagca ale odi fimesi filicatesin. Odocob anag uqa sisildon, “Melami, hina ele eetanu odi odiliga? Faga, ija memenca ele hinanu wawile culumen leceb hina megħi cobowa,” don.

<sup>49</sup> Odocob uqa jejenela hewi maalen, “Ale eetanu ija megiti cobosia? Ale ija Meina jona bielecnu nijja eu qee dolfo?” alen. <sup>50</sup> Euqa memeg anagca ale uqana jenu wawala qee fogo dol.

<sup>51</sup> Odocob haun ale gami Nasaret jobon ceseli belein. Ono uqa gaid ale conola toodoloi. Odocob anag uqa ceteh i waugna mimei cisdoloi. <sup>52</sup> Oodon Jisas uqa ben men. Uqana dochha ben men. Uqa Anut amegnaca dana amaganaca me bahic biloloi.

## 3

### *Wa Joadec Jon me je qasali maaden*

(Matju 3.1-12; Mak 1.2-8; Jon 1.19-28)

<sup>1</sup> Saen euna cabi gel 15docna Taibirias Sisa uqa Rom agena cofdoc dana bilen. Saen euna ha Pontias Pailat uqa gabman dana Judia hatu agena ilo bilen. Odocob Herod uqa Galili hatu agena ilo bilen. Odocob uqa waliag, Filip, uqa Ituraia Trakonaitisca hatu alena ilo bilen. Odocob Laiseniaš uqa Abilini hatu nag agena ilo bilen. <sup>2</sup> Odocob Anas Kaiafasca ale ihanec dana agena ilo bilesin. Saen euna Jon, Sekaraia melah, uqa wadauna bibilen Anut uqana je uten. <sup>3</sup> Odocob Jon uqa cajimej Jodan wana isec hatu eu cunugca uqa cobimej maaden, “Agena silailnu tului falidumeig wa joadec oiga. Odi odocobilfi Anut uqa agena silail cagasiadigian,” aden. <sup>4</sup> Eu odi weleca je hahun madec dana Aisaia uqana bukna jaqen Jon uqa odi toodoo odon:

“Dana jejeg oso uqa wadauna bibili utai maadena,

‘Tibudna jic saciadoiga.

Uqana jic tutuc mudeiga.

<sup>5</sup> Asou cunug age wa wewel tahaloqagan.

Aluh berbenca aluh nagnagca eu cunug qetecebni ni tutuc migian.

Jic gongin eu cunug sosolaig muduqagan.

Odocob jic toni tobi eu jocosaig muduqagan.

<sup>6</sup> Odocob dana cajaca cunug age Anutna cahabaadec eu foqagan!’ adena,” en. (Aisaia 40.3-5)

<sup>7</sup> Odocob dana am mati bahic age Jon wa joadigiannu uqaca hoin. Odocob uqa maaden, “Age man sononec nag me qee! In Anutna gemag bec jawe hugia odona euna age busaleiga ec maadeia? <sup>8</sup> Agena silailnu mele bahic culimeig tului falidumeig Anutna je qee tefacdoginanufi me odoc oso odoiga eu ihacteiga. Euqa ija mele maadigina, Anut uqa meen ene nijegina cedime Ebrahim talacul euna madecnu ihoc. Eunu age cain sanan mimi madowain, ‘Ebrahim ege asige. Eunu Anutna gemag bec egeca qee hoiaun,’ owain. <sup>9</sup> Sapol na gug qetecnu wele taweria. Na cunug aig me qee qona age qetimeig jana heloqagan,” aden.

<sup>10</sup> Odocob dana cajaca am age sisildoin, “Eunu ege eeta odeqan?” doin.

<sup>11</sup> Odocob uqa jejenega hewi maaden, “In oso uqa lotoc lecisa uqa dana oso eundecca qee lotoc oso utigian. Odocob in oso sabca bilina uqa dana sabca qee eundec uqana sab cesasiadaga,” aden.

<sup>12</sup> Odocob takis cedec dana leih ageha wa joadecnu hoin. Odimeig age sisildoin, “Iwalgec, ege eeta odeqan?” doin.

<sup>13</sup> Odocob uqa jejenega hewi maaden, “Age um gauc cain cedowain. Age Rom agena loo je gadacna himec cedeiga,” aden.

<sup>14</sup> Odocob han dana ageha sisildoin, “Egenu eu adi? Ege eeta odeqan?” doin.

Odocob uqa jejenega hewi maaden, “Age cain uhuli um aaqi meen qaig cawaladowain. Agena cabi ameg ogina eu ihoc ec cidoiga,” aden.

<sup>15</sup> Odocob dana cajaca age saen euna Anutna Krais eu hugia agena cisdoc bibilen Jonnu geh bahic cisdoin. Odocob age Jonnu wawagana madein “Anutna Krais eu uqafa?” ein.

<sup>16</sup> Odocob Jon uqa cunug je maaden, “Ija age wana wa joadigina qa oso hib tooti hona, uqana gagadic odoc ijana gagadic odoc wooldona. Uqa dana ben meca bahic. Ijaqa uqana jaih tacec halu cufalitocu dana me bahic ihoc qee. Uqa age Kis Gunnaca janaca wa joadigian. <sup>17</sup> Uqa sawolca hona. Sawol euna wit aig cunug eeldocnua, wit aig uqana jo bisna mecnuka hona. Euqa uqa witna tetec ja qee cafulina euna manigian,” aden.

<sup>18</sup> Odocob jic mati bahicna Jon uqa dana cajaca me jena wawaga huhuni maaden.

#### *Herod uqa Jon gihacdoc jona muden*

<sup>19</sup> Euqa saen euna Herod gabman ilo uqa waliag aideg, Herodias, on. Odocob Jon uqa Herod galac mudi madon, “Hina walin aideg om. Hina cahuldom,” don. Uqa ceteteh me qee mati bahic odon eunu Jon uqaha galac mudi madon. <sup>20</sup> Odocob eu toodocob uqa me qee odoc ben oso haun odon. Uqa Jon gihacdoc jona tacen.

#### *Jon uqa Jisas wa jouden*

(Matju 3.13-17; Mak 1.9-11)

<sup>21</sup> Odocob Jon uqa dana cajaca cunug wa joadi hedumei uqa Jisasha wa jouden. Saen euna Jisas Anut inondodon sao ohis jic cebec huden. <sup>22</sup> Odocob Kis Gun cuhudid fecwe nimei Jisasca bilen. Odocob jejeg oso sao ohisdec camas mi madon, “Hina ija melami nalunin migina. Ija hinanu wawi ben ceelena,” don.\*

#### *Jisasna sihulnu ijanaga*

(Matju 1.1-17)

<sup>23</sup> Odocob Jisas uqana cabi sanan men saen euna uqana cabi gel gadac eu 30 odi. Dana age odi cisdooin uqa eu Josef melah.

Josef uqa Hilai melah.

<sup>24</sup> Hilai uqa Matat melah.

Matat uqa Liwai melah.

Liwai uqa Melkai melah.

Melkai uqa Janai melah.

Janai uqa Josef melah.

<sup>25</sup> Josef uqa Matataias melah.

Matataias uqa Emos melah.

Emos uqa Neam melah.

Neam uqa Eslai melah.

Eslai uqa Nagai melah.

<sup>26</sup> Nagai uqa Meat melah.

Meat uqa Matataias melah.

Matataias uqa Semen melah.

\* <sup>3:22:</sup> Grik jaqec je hilah leihna age je oso tubdu jaqein eu odi: “Qila hina ija melami maga,” en.

Semen uqa Josek melah.  
 Josek uqa Joda melah.  
 27 Joda uqa Joanan melah.  
 Joanan uqa Resa melah.  
 Resa uqa Serababel melah.  
 Serababel uqa Sialtiel melah.  
 Sialtiel uqa Nerai melah.  
 28 Nerai uqa Melkai melah.  
 Melkai uqa Edai melah.  
 Edai uqa Kosam melah.  
 Kosam uqa Elmadam melah.  
 Elmadam uqa Er melah.  
 29 Er uqa Josua melah.  
 Josua uqa Eliesa melah.  
 Eliesa uqa Jorim melah.  
 Jorim uqa Matat melah.  
 Matat uqa Liwai melah.  
 30 Liwai uqa Simion melah.  
 Simion uqa Juda melah.  
 Juda uqa Josef melah.  
 Josef uqa Jonam melah.  
 Jonam uqa Elaiakim melah.  
 31 Elaiakim uqa Melia melah.  
 Melia uqa Mena melah.  
 Mena uqa Matata melah.  
 Matata uqa Netan melah.  
 Netan uqa Dewid melah.  
 32 Dewid uqa Jesi melah.  
 Jesi uqa Obed melah.  
 Obed uqa Boas melah.  
 Boas uqa Salmon melah.  
 Salmon uqa Nason melah.  
 33 Nason uqa Aminadab melah.  
 Aminadab uqa Atmin melah.  
 Atmin uqa Anai melah.  
 Anai uqa Hesron melah.  
 Hesron uqa Peres melah.  
 Peres uqa Juda melah.  
 34 Juda uqa Jekob melah.  
 Jekob uqa Aisak melah.  
 Aisak uqa Ebrahim melah.  
 Ebrahim uqa Tira melah.  
 Tira uqa Neho melah.  
 35 Neho uqa Serak melah.  
 Serak uqa Reu melah.  
 Reu uqa Peleg melah.  
 Peleg uqa Ebe melah.  
 Ebe uqa Sela melah.  
 36 Sela uqa Kenan melah.  
 Kenan uqa Apaksat melah.  
 Apaksat uqa Siem melah.  
 Siem uqa Noa melah.  
 Noa uqa Lamek melah.  
 37 Lamek uqa Metusala melah.  
 Metusala uqa Inok melah.  
 Inok uqa Jaret melah.  
 Jaret uqa Mahalalel melah.  
 Mahalalel uqa Kenan melah.  
 38 Kenan uqa Inos melah.  
 Inos uqa Set melah.  
 Set uqa Adam melah.  
 Adam uqa Anut melah.

**4**

*Seten uqa Jisas temdon  
(Matju 4.1-11; Mak 1.12-13)*

<sup>1</sup> Odocob Jisas Kis Gun cacawac men uqa Jodan Wadec ceseli hon. Odocob Kis Gun iwaldocob wadauna\* nuen. <sup>2</sup> Ono deel 40 odi bibilen leceb Seten temdon. Saen eu cunug uqa ceteh oso qee jel. Eunu deel 40 hedocob uqa wen don.

<sup>3</sup> Odocob Seten uqa Jisas madon, "Hina Anut Melahfi meen i madocom sab ibuldocob jaga," don.

<sup>4</sup> Odocob Jisas jejeg hewi madon, "Anutna jaqec je eu odi madena:  
‘Sab jec himec dana cebac bielec qee adena,’ ena," don. (Loo 8.3)

<sup>5</sup> Odocob Seten uqa Jisas ehudeceb aluhna timesi uqa Jisas mahamaha cul cunug mahuc bahic ihacdon. <sup>6-7</sup> Odimei Seten madon, "Maha cul eu ija mugumi. Hina amina gob cehimig ijanu cuha fecemfi ijana gagadic odoc cunugca agena tumutum cahulecca ihigen. Dana oso gawifig ija uqa utigen. Age cehewanaga eu cunug hina ihecnu ihoc," don.

<sup>8</sup> Odocob Jisas jejeg hewi madon, "Anutna jaqec je odi madena:  
Tibud uqa hinana Anut uqanu cuha faga,  
uqa himec cewel utugale! ena," don. (Loo 6.13)

<sup>9-11</sup> Odocob Seten uqa Jisas ehudeceb Jerusalem ono belesin. Odimesi tempel qabna timesi mudeceb tawimesi madon, "Anutna jaqec je eu odi madena:  
‘Anut uqana ensel maadeceb

hina jaim meenna gee tudoiaunnu age hina ebenegana hewihi ehi ni mihuqagan,’ ena. (Buk Song 91.11-12)

Eunu hina Anut Melahfi ene bitacimeg tonoga," don.

<sup>12</sup> Odocob Jisas jejeg hewi madon, "Anutna jaqec je odi madena:  
‘Tibud, hinana Anut, eu cain temdu fagaun,’ ena," don. (Loo 6.16)

<sup>13</sup> Odocob Seten uqa Jisas jic filfilna temdu hedumei cuculdi haun saen me osona temdugiannu nuen.

*Jisas uqana cabi Galili hatu ono sanan men  
(Matju 4.12-17; Mak 1.14-15)*

<sup>14</sup> Odocob Jisas uqa Kis Gunna gagadic odoc uqaca bibilen Galili hatu ono ceseli nuen. Odocob uqanu je eu hatu alildogina eu cunugna ihoc len. <sup>15</sup> Odi cocobi Juda agena cuha jonana iwaladen. Oodon age cunug uqa binan solein.

*Dana cajaca Nasaretdec age Jisas hibemdo*  
(Matju 13.53-58; Mak 6.1-6)

<sup>16</sup> Odocob Jisas uqa Nasaret jobon calimei uqa ben menna ono nuen. Odocob Juda agena cuha deelna agena cuha jona len. Uqa gaid loloiwe eu odi len. Odocob Anutna jaqec je oso sanijecnu tawen. <sup>17</sup> Caji tatawen oso uqa je hahun madec dana Aisaiana buk ebenna men. Odocob buk eu qosodcumie je oso walimei sanijimei maaden:

<sup>18</sup> "Tibud sawen dana cajaca me je qasali maadecnu mool joiten.  
Eunu Tibudna Kis eu ijaca bilia.

Uqa dana cajaca gihacdocna bileyina eu age gihacdocnadec besiadecnu je maadigennu sulten.

Uqa dana amaga galuc mec bileyina haun mecioqagannu je maadigennu sulten.

Ija aaqati tootooadec dana cajaca caahahaadigennu sulten.

<sup>19</sup> Odimig ija qila saen ina Tibud uqana dana cajaca caahahaadecnu hoia ec maadigennu sulten," aden. (Aisaia 61.1-2)

<sup>20</sup> Odocob Jisas uqa buk eu menimei cesuldoc dana eu ceseli utimei toni bilen. Oodon dana cunug cuha jona bilein age amaga cunug Jisas himec mecidoin. <sup>21</sup> Odocob uqa maaden, "Anutna jaqec je i age dah memegin ija sanijiga eu qila mele ihoc caleia," aden.

<sup>22</sup> Odocob age uqanu je me bahic madimeig uqana je me bahic dodoig ben bahic odi tumatumaein. Odimeig age madein, "Uqa Josef melah qeefo?" ein.

<sup>23</sup> Odocob uqa maaden, "Mele, age doc me je i matoqagan, 'Hag me madec dana hinadodoc dewen eeldoga,' toqagan. Odocob ageha odi ija matoqagan, 'Ceteteh hina Kapaneam ono odom egina ene hinana jobon gugna ha odoga,' toqagan." <sup>24</sup> Ija mele maadigina, je hahun madec dana oso uqana jobon gugna age gaid qee dah mudeginna.

\* 4:1: Age je Matju 3.1na nijia eu feiga. † 4:23: Je i "Hag me madec dana hinadodoc dewen eeldoga" uqana gug eu odi. Dana uqa cabi oso ocnu ihoc ec madena eu uqa dana cajaca amagana cabi eu ugian. Odocob age uqana je eunu wawaga meleigian. Jisas uqa but 18-19na Anut uqa cabi ben uqa ebenna men ec maden. Eunu Jisas uqa dana cajaca age madoqagan, "Hina casac kobilkobil odocom ege hinana jenu wawige meleigian," doqagan ec cisdon.

25 Dah meigale, weleca, Ilajana saenna, cabi gel cijedca jagel 6-pela leceb wa qee hoc sabnu cahel ben hatu cunug ihoc li nijoloi. Saen euna caja wij mati bahic age Isrel hatuna biloloig eu mele. <sup>26</sup> Euqa Anut uqa Ilaija caja wij eundec ageca oso qee suldocob lel. Euqa caja wij oso uqa Sarefat jobon Saidon taun ono biloloi uqadih suldocob nuen. <sup>27</sup> Odocob weleca, je hahun madec dana Ilaisana saenna, dana lepraca mati bahic age Isrel hatuna biloloig qa Ilaisa uqa eundec oso qee me mudel. Euqa Neman, uqa Siria hatunadec dana, uqadih me muden,” aden.

<sup>28</sup> Odocob dana cunug cuha jona bilein age je eu dumeig gemanaga ben. <sup>29</sup> Odimeig age cajimeig Jisas taun dunuhdec didodoig ehudi age aluh gesacna taun cehein euna isec ehi tein. Aluh igocna timeig age u helecebil agafecna toni qugian ein. <sup>30</sup> Euqa dana cajaca age gemogemo cocobi wooladi uqana jic nuen.

*Jisas uqa dana oso buga me qeeca buga me qee eu ititacdon  
(Mak 1.21-28)*

<sup>31</sup> Odocob Jisas uqa jobon oso, ijan Kapaneam, ono Galili hatuna nuen. Ono uqa Juda agena cuha deelna dana iwaladoloi. <sup>32</sup> Uqa je Anutna gagadic odoccia iwalaadi maaden. Eunu age ugana iwaladec jenu tumatumaein. <sup>33</sup> Odocob Juda agena cuha jo eu dunuh dana oso buga me qeeca bilen, buga eu gegehinia uqana jo ibuldon. Uqa jejeg benna utai Jisas madon, <sup>34</sup> “Se Jisas Nasaretdec, hina eetanu odigegan? Hina fadalgecnu hogaf? Ija hina cel dananu dugina. Hina dana gun eu Anut suldocob nen,” don.

<sup>35</sup> Euqa Jisas buga me qee eu cahacdudu madon, “Je culuga. Dana cuculdi qisacdoga!” don. Odocob buga me qee eu dana eu amagana u qeleceb mahana tonen. Odi ninijen dana eu cuculdi qisacdon. Uqa dana eu me qee oso qee odol.

<sup>36</sup> Odocob age cunug eu fimeig ben bahic tumatumaein. Odimeig age madocobmadocobi sisilein, “Eu cel je bahic madeia? Ge, uqa dana benwe Anutna gagadic odoccia buga me qee maadeceb cali hu belegina!” ein. <sup>37</sup> Odocob Jisasna cabinu je eu hatu alildu bilein cunug ihoc len.

*Jisas uqa Pita momoig me muden  
(Matju 8.14-15; Mak 1.29-31)*

<sup>38</sup> Odocob Jisas uqa Juda agena cuha jo culdimei Saimonna jona len. Ono len eu Saimon momoig hag deweg daincaca hulec ninijennu Jisas madoin. Age uqa cesuldocnu ninidoen. <sup>39</sup> Odocob Jisas uqa hagca caja ninijen uqa limei cabal qeihna tawimei hag eu cahacdu madon, “Hag, qila culduga,” don. Odocob hag deweg dainca hulen eu culdeceb cajimei sab jec saciadumei cewel uaden.

*Jisas uqa dana cajaca mati bahic me maden  
(Matju 8.16-17; Mak 1.32-34)*

<sup>40</sup> Odocob cam totonen dana cajaca cunug age cotogail hag gug filfilca cedadeceb il Jisasca ahoin. Odocob uqa eben dewenegan meceb age cunug me mamadien. <sup>41</sup> Buga me qee ha age dana cajaca leih deweneganadec cali hu bebeli Jisas feceb dana cajaca age amegna toni mahulimeig utai madein, “Hina Anut Melah!” ein.

Euqa age uqa Anutna Krais eu doinnu Jisas uqa age eu madecnu cahacadan.

*Jisas uqa Juda agena cuha jona me je maaden  
(Mak 1.35-39)*

<sup>42</sup> Odocob qasil cojageceb Jisas jo eu cuculdi cudun tiliec bahicna, dana oso qee biley, euna nuen. Odocob dana cajaca age waludein. Waludodoi age gulucdumeig uqa qee culadeiaunnu cahabdoiga odoen. <sup>43</sup> Euqa uqa maaden, “Ija Anutna culnu me je jobon ben filfil maadigen. Ge, Anut uqa cabi inu sulten,” aden.

<sup>44</sup> Odimei uqa Juda agena cuha jonana Judia hatuna<sup>†</sup> me je qasali maadi cobon.

## 5

*Jisas Pita madocob uqa dool macasnadec geh bahic ceden  
(Matju 4.18-22; Mak 1.16-20)*

<sup>1</sup> Saen osona Jisas uqa Genesaret\* wa coolna tatawen dana cajaca am age Anutna je uqa maadeceb dah mecnu age uqa alildodoig bein. <sup>2</sup> Tatawei uqa wag lecis age dialeceb hilosin lanna tatawesin facien. Euqa dool cedec dana age culalimeig cimec cucuseig bilein. <sup>3</sup> Odocob Jisas wag osona tobi ti bilen. Wag eu Saimonna. Odimei Saimon cesusdocob uqa nag sundocob wana leceb Jisas wag euna bilimei dana am iwaladi je maaden.

<sup>†</sup> 4:44: Grik jaqec je hilah leihna age je fil jaqein eu odi: Galili hatuna \* 5:1: Genesaret eu Galili wa gad cagoc ijan oso.

<sup>4</sup> Saen uqa je saadi hedumei uqa Saimon madon, “Haun wag sundocom wa amegna leceb hina cabi cotinelca age cimec heladecebil wana nocobil dool leih cedoqagan,” don.

<sup>5</sup> Odocob Saimon jejeg hewi madon, “O Ben, ege witic cunug cabi ogan qa dool oso qee cedolom! Euqa hina madaganu ege cimec heladeqan,” don. <sup>6</sup> Odocob age cimec heladecebil wa dunuh nocobil age dool geh bahic cedein. Odimeig cimec tataloqagan odoin <sup>7</sup> age cabi cotogail wag osona bilein age dunugana himec hocnu maadecebil hu cesuladecebil dool cedein. Age cotogailca wag lecisa dool geh bahic tacecebil am ben. Wag lecis adih wa dunuh gotoub. <sup>8</sup> Saen Saimon Pita ceteh eu fimei gob cehi Jisas olana bilen. Odimei Jisas madon, “O Tibud, ija silail dana! Cuculti nuuga,” don.

<sup>9</sup> Ge, uqa cabi cotugulca dool odi geh bahic cedimeig age ben bahic tumatumaein. <sup>10</sup> Saimon cabi cotugul Jems Jonca, ale Sebedi melahul, aleha fimesi tumatumaesin. Odocob Jisas uqa Saimon madon, “Cain cucuiagaun. Qila leceb hibna hina dana odi cedadogan,” don.

<sup>11</sup> Odocob age wag diaadegin lanna tecebil age ceteteh cunug culadimeig Jisas toodoin.

*Jisas dana oso lepraca me muden*

(Matju 8.1-4; Mak 1.40-45)

<sup>12</sup> Saen osona Jisas taun osona bilen. Ono dana oso lepra dewegna ihoc lec uqa hon. Uqa Jisas fimei uqa toni mahuli ninijei Jisas cesusdu madon, “O Tibud, hina ija me mitiga hecebfi hina me mitecem ijana hag culteceb ija Anut amegna cataniec bielecnu ihoc,” don.<sup>†</sup>

<sup>13</sup> Odocob Jisas eben huleldumei deweg qududodoi madon, “Ija me mihiaga tena. Me maga!” don. Saen eunadiah lepra hag eu uqa dewegna culden. <sup>14</sup> Odocob Jisas cahacdu madon, “Dah maga, ceteh inu oso cain sadudu cobogaun. Euqa li nawel tawec ihanec dana eu hina dewen ihacdacom maleldugian. Odimeg Moses loo je wele maden eu toodumeg hina qila Anut amegna cataniec biliga dana cajaca cunug ihacadecnu Anut ihandogale,” don.

<sup>15</sup> Euqa Jisas kobolkobel odon eunu je eu hatuhatu cunug ihoc len. Odocob dana cajaca mati bahic gabandumeig uqana je doqagannuca, uqa agena hag me madigiannuca uqaca hoin. <sup>16</sup> Euqa uqa cuhanuc wadauna li ono Anut inondudu biloloi.

*Jisas dana laleg mec oso me muden*

(Matju 9.1-8; Mak 2.1-12)

<sup>17</sup> Deel osona Jisas uqa iwalaaden Farisi dana leihca loo je iwalandec dana leihca age jobon filfil Galili hatu ono Judia hatudec hu bilein. Leih Jerusalemdec hoin euha bilein. Odocob hag dana me madecnu Tibudna gagadic odoc Jisasca bilen. <sup>18</sup> Odocob dana leih age dana laleg hacga gabagabna ninijen Jisasca hehewi ehudi ahoin. Age hag dana jo hamolna ehudi limeig Jisas cemenugna mudecnu temdoin ihoc qee. <sup>19</sup> Euqa dana kitim bahicnu jic oso jo hamolna hewi lecnu qee felein. Qeenu age ehudi lanna jo ohis tobimeig jo ohis jo batawimeig hehwegin gabagabna ninijen haluna qagimeig culecebil cebitnana toni nunu dana am gemo Jisas tatawen uqa olana toni nijen. <sup>20</sup> Saen Jisas agena wawaga meleec eu ben bahic fimei laleg dana eu madon, “Dana, hinana silail cagasihiga qee meia,” don.

<sup>21</sup> Odocob loo je iwalandec danaca, Farisica age togodudu madein, “Dana i uqa in? Uqa Anut cewudec je madena. In silail cagasiadecnu ihoc? Eu Anut uqadid ihoc,” ein.

<sup>22</sup> Odocob Jisas uqa agena cisdoc dumei maaden, “Age wawagana eetanu je i madegina?

<sup>23</sup> Cel je madec cakanigca qee ija madigen? Ija madigen, ‘Hinana silail cagasihiga qee meia,’ ecfo, qee ‘Cajimeg coboga,’ ec madigenfo? <sup>24</sup> Euqa Dana Melah mahana silail cagasiadecnu gagadic odoc ebenna nijia eu doqagannu ihacadigen,” aden. Odimei uqa dana laleg men madon, “Ija mahigina, cajimeg hinana gabagab eu qahimeg hewi hinana jobon nuuga,” don.

<sup>25</sup> Odocob mahucwe age amagana dana eu cajimei uqana nijec gabagab qahimei Anut binan susuli jobon nuen. <sup>26</sup> Odocob dana onto cegulein age ben bahic odi tumatumaimieig cukiein. Odimeig Anut binan susuli madein, “Ceteh fil bahic oso qila foqa,” ein.

*Jisas uqa Liwai utadocob toodon*

(Matju 9.9-13; Mak 2.13-17)

<sup>27</sup> Odocob ceteh i hedocob Jisas uqa cali li takis cedec dana oso, ijan Liwai,<sup>‡</sup> uqa takis cedec jona bibilen fen. Fimei madon, “Tootaga,” don. <sup>28</sup> Odocob Liwai cajimei uqana ceteteh cunug cuculi Jisas toodoin.

<sup>29</sup> Odocob Liwai uqa sab ben uqana jona Jisasnu saciadon. Odocob dana mati bahic sab jecnu bielec bahimna cegulecebil age Jisas gami sab jein. Leih eu takis cedec dana. Leih eu

<sup>†</sup> 5:12: Age je Matju 8.2na nijia eu feiga. <sup>‡</sup> 5:27: Liwai eu Matju ijan oso eu odi fena. Age Matju 9.9 eu feiga.

dana fil.<sup>30</sup> Odocob Farisica agena loo je iwaladecca age gonagona mimi Jisasna malogom maadein, "Eetanu age takis cedec dana silail danaca gami sab wainca jegina?" adein.<sup>§</sup>

<sup>31</sup> Odocob Jisas jejenega hehewi maaden, "Hagca qee age hag me madec danaca qee legina. Qeoo. Hagca himec age hag me madec danaca legina." <sup>32</sup> Ija ittom dana cajaca utai maadecnu 'Age agena silailnu wawaga tului falicdoigale,' adecnu qee holom. Euqa ija silail dana cajaca utai maadecnu 'Age agena silailnu wawaga tului falicdoigale,' adecnu hom," aden.

*Age Jisas cud kobolnu sisildoin  
(Matju 9.14-17; Mak 2.18-22)*

<sup>33</sup> Odocob dana leih age Jisas madoin, "Jonna malogom age gaid esuesu sabnu qagu bileginanu, odocob age inondoginanu. Farisi agena malogom ageha odi odogina. Euqa hinana malogom age sab wainca jegina," doin.

<sup>34</sup> Odocob Jisas maaden, "Age dana caja ocobocobecna cegulein bilegina eunu age caja oc dana eu gami bibileig adi maadoqagan, 'Age sabnu qagu bileiga,' adoqagan?" <sup>35</sup> Euqa saen oso hibna dana leih hu caja oc dana cawaludadecebil deel euna age sabnu qagu biluqagan," aden.

<sup>36</sup> Odocob Jisas uqa galolo je oso ha maaden, "Oso uqana lotoc hilah giloccanu lotoc haun eu qee baladu cufa qona. Eu odifei uqana lotoc haun eu baladugian. Euha lotoc haun cufa qoc fan eu lotoc hilahwe qee. Eu fecnu galeca qee." <sup>37</sup> Eu odiha oso uqa wain haun jool mecmec ganacna mudec hilahna qee o danena. Jool mecmec ganacna mudec eu galalec eunu odoubmiqa wain haun eu jool ganacna mudec hilah qatanoub, wain basecdru cusdoub, odocob jool ganacna mudecha qatani cusdoub. <sup>38</sup> Qeoo, age wain haun jool mecmec ganacna mudec haunna dih o danegina. <sup>\*\*</sup> <sup>39</sup> Odocob oso uqa casac wain hilah jena qa hibna wain haun qee jena. Ge, dana eu madigian, 'Wain hilah uqa wain haun wooldoc,' igian," aden.

## 6

*Juda agena cuha deelnu je  
(Matju 12.1-8; Mak 2.23-28)*

<sup>1</sup> Juda agena cuha deel osona Jisas uqana malogomca age wit cabi osoosona gemogemo li beli coboin. Bebeli cocobi malogom age wit aig qu u ehi limeig ebenegana nunusimeig ganac waceceb aig eu jijiein. <sup>2</sup> Oodogin Farisi leih age maadein, "Eetanu age ceteh oso eguna cuha deelna egena loo je cahacgena eu odogina?" adein.\*

<sup>3</sup> Odocob Jisas jejenega hewi maaden, "Age Dewid odonnu je oso qee sanijeinfo? Saen uqaca uqana eundec age gami coboinca age wen ben adeceb" <sup>4</sup> uqa Anutna jo dunuh limei Anutnu ihanec bred oso u jen. Eu odonqa eguna loo je bred eu nawel tawec ihanec dana himec eu jecnu cois ena. Dewidha dana age uqaca coboin bred eu adeceb osaben jein," aden.

<sup>5</sup> Odimei Jisas cit qoc je maaden, "Dana Melah uqa Tibud, uqa cuha deel uqana ilo bilina," aden.

*Juda agena cuha deel osona Jisas dana eben laleg mec me muden  
(Matju 12.9-14; Mak 3.1-6)*

<sup>6</sup> Juda agena cuha deel osona Jisas Juda agena cuha jona len. Ono me jenu dana iwaladen. Odocob dana oso uqa eben meulana isec gatoc men eu bilen. <sup>7</sup> Odocob loo je iwaladec dana leihca Farisi dana leihca ageha bilein. Age Jisas dewegnu um qu madecnu, "Uqa cahuldona," madecnu uqa cuha deelna hag dana oso me mudeceb fecnu imeig cofidudu mecidoin. <sup>8</sup> Euqa Jisas uqa agena cisdoc wele dumie dana eben gatoc men eu madon, "Cajimeg ene ija cemeni hogale," don. Odocob dana gatoc men eu cajimei Jisas olana li tawen. <sup>9</sup> Odocob Jisas maaden, "Ija sisiladigma, cuha deelna ege dana me odadecnu loo je cois ec madenafo, qee ege dana waadecnu cois ec madenafo? Cuha deelna ege dana cahabaadecnu loo je cois ec madenafo, qee ege dana fadaladecnu cois ec madenafo?" aden. <sup>10</sup> Odimei Jisas dana cunug talilaadi meciadiimei dana eben gatoc men eu madon, "Hina eben heli huledoga," don. Odocob dana eu toodu odocob eben me men.

<sup>11</sup> Euqa Farisi dana age gemanaga ben bahic ben. Odimeig age togodu madein, "Ege Jisasnu cel oso odeqan?" ein.

§ 5:30: Age je Matju 9.11na nijia eu feiga.    \*\* 5:38: Age je Matju 9.16-17na nijia eu feiga.    \* 6:2: Age je Matju 12.2na nijia eu feiga.

*Jisas uqa aposel 12-pela nesili ehaden  
(Matju 10.1-4; Mak 3.13-19)*

<sup>12</sup> Saen euna Jisas Anut inondugiannu aluh ohisna ten. Odimei tu osol cunug ono Anut inondudu bilen. <sup>13</sup> Odocob cojageceb uqana malogom utaadec hoin. Odimei uqana malogom eundecnadec 12-pela nesili ehaden. Eu age aposel<sup>†</sup> ijan qon. <sup>14</sup> Aposel eu age ijanaga eu odi. Eu Saimon, Jisas uqa Pita ijan qon, uqa waliag Andruca. Eu Jems Jonca, Filipca, Batolomjuca, <sup>15</sup> Matjuca, Tomasca, Jems, uqa Alfias melah, uqaca, Saimon, uqa Selot<sup>‡</sup> egina, uqaca, <sup>16</sup> Judas, uqa Jems melah, uqaca, Judas Iskariotca. Judas Iskariot uqa hibna balijec dana ibuldocob Jisas uqana cad ebenegana muden.

*Jisas uqa dana cajaca mati bahic iwalandenca me maaden  
(Matju 4.23-25)*

<sup>17</sup> Odocob Jisas uqana malogom gami aluhnadec ceseli maha tutucna necebile malogom mati bahic dana cajaca mati bahicca gulucadein. Leih age Judia hatunadec, leih Jerusalemdec, leih Taia Saidonca lanna isecdcecca age humeig Jisas uqana je dah mecnuka, uqa agena hag me madecnuka cegulein. <sup>18</sup> Odocobil leih age buga me qee gegehinca hewadein eundec Jisas uqa me madein. <sup>19</sup> Anutna gagadic odoc Jisasnadec limei dana age me mamaden fein. Eunu dana cajaca cunug qududocnu odoin.

*Jisas uqa dana ceeligiannu qajigiannu maaden  
(Matju 5.1-12)*

<sup>20</sup> Odocob Jisas uqana malogom meciaadi bilei maaden:

“Age sawen dana, Anutna cul eu agena.  
Eunu age eeladecca bilegina.

<sup>21</sup> Age qila wen adena, hibna age am boqagan.  
Eunu age eeladecca bilegina.

Age qila qada qajegina, hibna age asaloqagan.  
Eunu age eeladecca bilegina.

<sup>22</sup> Age Dana Melah toodoqagannu dana age fimeig age agenu gemanaga beceb sagagadoqagan, age ititacadogagan, odocob age cewadoqagan.

Age agenu dana me qee ec madoqagan.  
Saen euna age eeladecca biluqagan,” aden.

<sup>23</sup> “Ceteteh eu ageca hocobfi saen euna ceeleigale. Ge feiga, age ameg ben bahic sao jobonna oqagan. Eunu celeboi dueigale. Ge, dana eu age asagail wele je hahun madec dana kobel me qee eu odi odadoloig.

<sup>24</sup> Euga age dana qila cehewanagaca age hulunuga cehecnu wele oiga.  
Eunu walocca bilegina!

<sup>25</sup> Age qila sabnu am becca hibna age wen adigan.  
Eunu walocca bilegina!

Age qila asalegina hibna age qada qajoqagan.  
Eunu walocca bilegina!

<sup>26</sup> Dana eu age asagail wele age je hahun madec dana age je cahuldoloig agenu ha je me bahic odi madoloig.

Eunu age agenu dana je me bahic madegina eu walocca bilegina!” aden.

*Jisas agena cadnu nalunuga meigale ec maaden  
(Matju 5.38-48)*

<sup>27</sup> Jisas je haun maaden, “Ijaqa dana dah mitegina eu maadigina. Agena cadnu nalunuga meigale. Age agenu gemanaga beceb sagagadegina eu age me odadeigale.

<sup>28</sup> Dana age geladegina age eeladeigale. Dana age je ilag maadegina age agenu Anut inondoigale. <sup>29</sup> Oso sihom oso naha qahecebfi sihom hina naha ha ihacdole. Dana oso hinana lotoc ben ocobfi culitocabil hinana lotoc nagha oiale. <sup>30</sup> Oso ninihecebfi eu ceteh utugale. Oso hinana ceteteh heje ocobfi haun cain ceseli ocnu madogaun. <sup>31</sup> Dana filfai age agenu odadecebile gale adenawe eu odi age dana filfilnu ha odadeigale,” aden.

<sup>32</sup> “Silail dana age agenu nalunuga megina eundecnu nalunuga megina. Eunu ageha dana age agenu nalunuga megina eundecnu himec nalunuga mecebifli age cel ameg me oso oqagan? <sup>33</sup> Silail dana age agenu me odegina eundecnu himec me odocobilfi age cel ameg me oso oqagan? <sup>34</sup> Silail dana age dana age ceteteh ceseli iguqagan imeig ceteteh adegebifli age cel ameg me oso oqagan? <sup>35</sup> Qeelo, age agena cadnu nalunuga meiga. Age agena cad me

† 6:13: Age je eu Matju 10.2na nijia eu feiga. ‡ 6:15: Selot agena am age Juda dana eu Rom dana Judiadec ititacadeucu ein.

odadeiga. Ceteteh adimeig age haun ceseli ocnu cain cisdownain.<sup>§</sup> Age odi odocobilfi Anut uqa ameg me ben adigian. Dana age hegaga ec qee madegina euca qisol mec dana euca Anut uqa agenu me odona. Eunu age odi odocobilfi Anut Ben Ohis uqa age uqa melahul madigian.<sup>36</sup> Age Memega uqa dana cunugnu waug qona. Eunu ageha cunugnu wawaga qoiale,” aden.

*Jisas age dana oso Cain gesildowain ec maaden*

(Matju 7.1-5)

<sup>37</sup> Jisas je haun maaden, “Age dana oso kabol gesildumeig cain camasac mimi cewudec je madowain. Age odi odocobilfi Anut ugaha agena kabol gesildumeig qee camasac mimi cewudec je madeiaun. Age dana oso uqa me qee ec cain madowain. Age odi odocobilfi Anut ugaha age me qee ec qee madeiaun. Dana oso age me qee odadecebf me qee odoc eunu dahiniga celeiale. Age odi odocobilfi Anut ugaha agena me qee odadec eunu dahig celigian.<sup>38</sup> Age dana oso ceteteh uteigale. Age odi odocobilfi Anut ugaha age ceteteh adigian. Uqa ceteteh basecdocob ebenegana numei am bigian. Anut uqa ceteteh cunug hewecnu ihoc adigian. Ge, age ihoc mec ceteteh dana ihoc adegina ihoc mec euna ha Anut uqa ceteteh age ihoc ceseli adigian,” aden.

<sup>39</sup> Odocob Jisas uqa galolo je oso maaden, “Ameg galuc mec dana oso uqa ameg galuc mec dana oso dado mudencu ihocfo? Qee, uqa ihoc qee. Uqa odocobfi ale lecis odi heelna toni aqaligian.<sup>40</sup> Malogom oso uqana iwaldoc eu wooldocnu ihoc qee. Saen uqa uqana iwaldocob du hedumei eu uqana iwaldocca ihocihoc,” aden.

<sup>41</sup> “Eetanu hina cotin amegna hilican nag eu fagana qa hinadodoc amenna fan ben nijina eu qee fagana?<sup>42</sup> Qeefi, hina cotin adi madogana, ‘Coti, culitecem hilican nag amenna nijia eu u helihigen,’ dogana qa hina amenna fan ben nijina eu qee fagana? Hina me hihili coboc dana! Casac fan ben eu hina amenna fagdoc nijia eu cagati helagale. Odocob hilican nag cotin amegna nijia eu u helecnu ihoc fegan,” aden.

*Jisas na uqana aigcanu maaden*

(Matju 7.16-20; 12.33-35)

<sup>43</sup> Jisas je haun maaden, “Ge, cehelo gug me eu aig me qee eundec qee qona, odocob na gug me qee eu aig me eundec qee qona.<sup>44</sup> Na cunug age agena aig qogina euna doqona. Ge, age dan aig oso na dudcanadec qee ogina, odocob age halu wain aig oso halu gonagonnадec qee ogina.<sup>45</sup> Dana me oso uqana kabol me waugna nijina eunadec me odona. Dana me qee oso uqana kabol me qee waugna nijina eunadec me qee odona. Ge, kabol am bec waugna nijninawe eu odi co toodoo madena,” aden.

*Jisas jo cehecnu kabol lecisnu maaden*

(Matju 7.24-27)

<sup>46</sup> Jisas je haun maaden, “Age eetanu ija ‘Tibud, Tibud,’ teginaqa age ijana je eu qee toodoo odogina?<sup>47</sup> Oso uqa ijaca humei ijana je dah mimei eu toodoo odona, eu uqa dana i edi ihacadigen.<sup>48</sup> Uqa dana jo oso cehen cinigwe. Dana i uqa maha dunuh bahic hunimei meen casac tatac men. Jo eu meenaha gagadic cehen. Eunu saen wa cue ben nen eu jo qumei wa qee qeleceb tonel.<sup>49</sup> Euqa oso uqa ijana je dah mimei qee toodona eu uqa dana oso uqa jo maha gauc meenca qee euna cehen cinigwe. Saen wa cue ben neceb eu jo qumei hewi wiliwili docob jo eu cabaten. Odimei jo cabati nui me qee bahic muden,” aden.

## 7

*Jisas uqa han 100 cofadec dana uqana cabi dana me muden*

(Matju 8.5-13)

<sup>1</sup> Saen Jisas je eu cunug dana cajaca maadi hedumei uqa haun Kapaneam jobon ono nuen.<sup>2</sup> Ono Rom agena han 100 cofadec dana oso uqana cabi dana eu uqa hag ben bahic on, cal mecnug cemenug hon. Rom agena han 100 cofadec dana uqa cabi dana eunu nalug moloi.<sup>3</sup> Saen han 100 cofadec dana Jisas hon eu dumei uqa Juda agena matu leih suladimei maaden, “Age Jisasca nuimeig ninidudu madoiga, ‘Hina egeca limeb Rom agena han 100 cofadec dana uqana cabi dana me mudeganfo?’ doiga,” aden. Odimei suladeceb belein.<sup>4-5</sup> Belimeig age Jisasca humeig je eu madumeig cesusdudu haun madoin, “O Meca, dana eu me bahic. Uqa ege Juda dana cajaca eundecnu gale dona. Odimei uquadodoc eguna cuha jo oso cehigen. Eunu hina cesuldoumda,” doin.

<sup>6</sup> Odocob Jisas osoben age gami belein. Jo cemenug cacalegin han 100 cofadec dana uqana danah leih suladeceb age Jisas madoin, “O Tibud, egena danah mahena, ‘Cain cabi

§ 6:35: Griek jaqec je hilah leihna age je oso tubdu jaqein eu odi: “Age dana cunug adeiga,” aden.

culumen ogau. Hina ijana jo dunuh hocnu ija dana me bahic ihoc qee. <sup>7</sup> Euha ija hinaca lecnu dana me bahic ihoc qee. Odi cain. Hina dih je madecemfi ijana cabi dana medugian. <sup>8</sup> Ge faga, ijaha ijadodoc han dana ilo oso bisalu biligina, age ija odi mitein. Odocab ijaha han dana leih ija bisalu billegina. Ija oso nuuga ecemin nuina. Ija oso hog a ecemin hona. Odocab ija ijana cabi bega meh dana odi odoga ecemin uqa coni toodu odona,’ hena,” doin.

<sup>9</sup> Odocab Jisas je eu dumei dana eunu filiciten. Uqa falicdumei dana cajaca am uqa toodoiu eu maaden, “Ija maadigina, ija waug meleec uqana bilina cinigwe Isrel gemona oso qee guludolom!” aden.

<sup>10</sup> Odocab suladec dana sos age Rom agena han 100 cofadec dana uqana jona ceseli limeig age cabi bega meh dana eu medon bibilen fein.

*Jisas uqa Nendec caja wij melah cal mecnadec tulidocab cajen*

<sup>11</sup> Deel oso hedocob Jisas jobon oso, ijan Nen, ono nuen. Uqana malogomca dana caja mati bahicca age Jisas gami belein. <sup>12</sup> Belimeig jobon eu cebeccna cacalen dana age dana cal mec oso gahidoi hohogin gulucadein. Dana cal men eu caja wij uqana mel osol dih. Dana cajaca mati bahic jobon eunadec ha osoben caja euca toodu hoin. <sup>13</sup> Saen Tibud uqa caja wij fimei uqa waug qocob madon, “Cain qajagaun,” don. <sup>14</sup> Odimeig Jisas li dana cal mec uqana gabagab qududon. Oodon dana gabagab gahidoi eu tilii tawein. Odocab Jisas dana cal mec eu madon, “Dana, ija mahigina, haun cajaga!” don. <sup>15</sup> Odocab dana cal mec eu caji bilimej ie maden. Odocab Jisas dana cebac men eu umei anag uten.

<sup>16</sup> Dana cajaca ono cunug age odi fimeig cucuein. Odimeig age Anut binan susuli madein, “Je hahun madec dana ben ege gemo caleia,” mamadi madein, “Anut ege uqana dana cajaca cesulgigliannu hoia,” ein.

<sup>17</sup> Odocab Jisasna odocnu je eu Judia hatu cunugca, hatu alildoc cunugca leceb dana cunug doin.

*Wa Joadec Jon uqa uqana malogom lecis Jisasca sulalen  
(Matju 11.2-19)*

<sup>18</sup> Odocab Wa Joadec Jon uqana malogom ceteh i cunugnu madoin. Odocab malogom lecis utaaeceb cemenug lecebil <sup>19</sup> Tibudca sulalimei maalen, “Ale Jisasca limesi sisildosia, ‘Hina i himec hocnu Anut sulhenfo, qee ege osonu amige meqanfo?’ dosia,” alen. Odimeig sulaliceb lesin.

<sup>20</sup> Limesi ale Jisas madosin, “Wa Joadec Jon sulleceb hina sisilhecnu howa, ‘Hina i himec hocnu Anut sulhenfo, qee ege osonu amige meqanfo?’ hecnu howa,” dosin.

<sup>21</sup> Oodosin saen euna bahic Jisas uqa dana cajaca mati dewenega me qeeca, dana cajaca mati hagca, dana cajaca mati buga me qeeca me maden. Dana cajaca mati amaga galuc mec uqa haun fecioqagannu maden. <sup>22</sup> Odimeig uqa Jon uqana sos jejenela hewi maalen, “Ceseli belimesi ceteh fesiaca, je dah mesiaca Jon madosia. Dana amaga galuc mec haun feciegina. Dana laleg mec haun cobogina. Dana lepraca dewenega cataniecca calena. Dana dahiniga cit qoc haun je dah megina. Oso dana cal mec tuladecib haun cebac megina. Oso uqa sawen dana me je qasali maadeceb age dah megina.” <sup>23</sup> In oso uqa ijanu waug meleec qee felacudel eu Anut uqa eeldugian,” alen.

<sup>24</sup> Odocab Jon uqana sos ale ceseli beleceb Jisas uqa dana cajaca cegulec ben eu Jonnu maaden, “Age Jon wadauna uqaca belein saen euna eeta foqagannu belein? Age balac fufu heweceb gulaeeb foqagannu beleinfo?” <sup>25</sup> Qeefi, age eeta foqagannu belein? Dana lotoc me bahicca tagen foqagannu beleinfo? Feiga, dana age lotoc tumutum tacegina age bilec me bahic billegina, age kingna jona billegina. <sup>26</sup> Mateiga, age eeta foqagannu belein? Age Anutna je hahun madec dana oso foqagannu beleinfo? Ija mele maadigina, uqa je hahun madec dana qa uqa je hahun madec dana cunug wooladena. <sup>27</sup> Jon uqanu Anutna jaqec je oso odi madena:

‘Anut madena, “Feiga, ijana sos suldocomin aqunihi nuigian.

Uqa hinana jic saciadugian,” ena,’ Anutna jaqec je odi madena. (Malakai 3.1)

<sup>28</sup> Ija maadigina, Wa Joadec Jon uqa dana mahana cunug wooladena. Euqa dana oso uqa nag bahic Anutna culna bilina eu uqa Jon wooldona,” aden.

<sup>29</sup> Odon dana cunugca, takis cedec dana ageca, Jon uqa wele wa joaden eu age Jisasna je dumeig age madein, “Ao, Anutna kobil eu ititom,” ein. <sup>30</sup> Euqa Farisica loo je iwalandec dana ageca age Jon wa joadecnu culein. Eunu age jic me coboqagannu Anut ihacadene hibemdoine.

\* 7:22: Age je Matju 11.5na nijia eu feiga.

<sup>31</sup> Odocob Jisas haun maaden, "Dana qila bilegina eu age adec? Age eetanu ihocihoc madigen? <sup>32</sup> Age i ediwe. Age mel simsim idadec cudunna ududu bibileig cotogail utai madecebmadecebegina:

'Ege agenu cololo fuldoqonaqa  
age qee due duelein.

Ege cal mec due siluqunaqa  
age qada qee qajelein,' adegina.

<sup>33</sup> Ge, Wa Joadec Jon uqa sabca wainca qee jejen hol qa age madein, 'Uqa buga me qee hewen bilia!' ein. <sup>34</sup> Odocob Dana Melah uqa sabca wainca jejen hon qa age madein, 'Dana i feiga! Uqa sab muhna jec dana. Uqa wain jeceb dalul qoc dana. Uqa takis cedec danaca, silail danaca agena danah bilina,' ein. <sup>35</sup> Euqa dana age Anutna doc silecca toodu odogina eu age tutuc odogina eunu dana cajaca cunug age fimeig madein, 'Anutna doc silecca eu ititon,' ein," aden.

#### *Silail caja uqa Jisas jaihna mool dedeman me bahic basecdon*

<sup>36</sup> Odocob Farisi dana oso uqa wesu hocob Jisasca sab jowasannu cesusdon. Jisas uqana jona limei sab jigiannu bilen. <sup>37</sup> Ono caja oso taun euna bilen. Uqa silail caja. Odocob uqa Jisas Farisi dana eu uqana jona sab jena ec don. Eunu uqa gum mool dedeman me bahiccali bec ehi len. <sup>38</sup> Odimei Jisas sab jiji ninijen uqa Jisas hibiloh tawimei uqa qaqajen amulig Jisas jaihna toocooi qon. Odimei Jisas jaih uqa gosicna cacumei jaih cotdudumei mool dedeman me bahic basecdocob non. <sup>39</sup> Odocob Farisi uqa Jisas madocob len eu fimei uqa waugna maden, "Caja eu silail caja. Eunu dana i mele bahic je hahun madec danami cel caja qududona eu doubl!" en.

<sup>40</sup> Odocob Jisas je madimei madon, "Saimon, ija je oso mahigen," don.

Uqa madon, "Cois Iwaltec, mataga dugen," don.

<sup>41</sup> Odocob Jisas sanan mi madon, "Dana lecis ale cubca bilesin. Wele ale cub dana osona meen qaig cedesin. Dana oso uqa 500 kina ceden. Oso uqa 50 kina ceden. <sup>42</sup> Odocob ale lecisca alena cub odi wadacdowcwe qee. Eunu cub dana eu uqa alena meen qaig wadacdowcnu culen. In uqanu nalug bahic migian?" don.

<sup>43</sup> Odocob Saimon jejeg hewi madon, "Ija cisdegina, cub dana uqa meen qaig ben bahic wadacdowcwe qee uqa culen uqa uqana nalug bahic migian," don.

Odocob Jisas madon, "Hinana cisdoc eu tutuc," don. <sup>44</sup> Odimei caja euca waldumei Saimon madon, "Hina caja i fagafo? Ija hinana jona hocomin hina ija jaimi wasacitecuwa oso qee itelem qa uqa amuligna ija jaimi wasacitia. Odimei gosicna cacoia. <sup>45</sup> Hina ija cotteteg qee ehitelem qa uqa ija huganadec jaimi cotdodoi qee culel. <sup>46</sup> Hina ija ilomi moolna qee joidelem qa uqa mool dedeman me bahicna ija jaimi joidia. <sup>47</sup> Eunu ija mahigina, caja i uqa Anutnu nalug bahic menanu uqana silail eu mati bahic qa Anut uqana silail casagisitoa. Euqa oso uqana silail nag Anut casagisiton eu uqa Anutnu nalug nec eu nag," don.

<sup>48</sup> Odimei Jisas caja eu madon, "Hinana silail ija casagisigina," don.

<sup>49</sup> Odocob dana age sab jec cabalna bilein eu age madocobmadocobein, "I cel dana uqa silail casasiadene?" ein.

<sup>50</sup> Euqa Jisas caja eu madon, "Hina wawin meleec eu me caahahaeria. Hina wawin malolca nuugale," don.

## 8

#### *Caja age Jisas toodu coboin*

<sup>1</sup> Saen oosooso hedocob Jisas taun nagca, jobon nagca Anutna culnu me je maadi cobon. Malogom 12-pela age gami belein. <sup>2</sup> Oodogin caja leih buga me qeeca, hagca eundec me maden euha tooadecebile belein. Caja eu age Maria, Magdaladec, uqanadec buga me qee 7-pela dewegnadec ititacadan, uqaca, <sup>3</sup> Joana, uqa Susa aideg, uqa Herodna jona dana cofdoc, uqaca, Susanaca, caja mati agedodoc agena ceteteh euna Jisas uqana malogomca cesuladein,\* ageha Jisas gami belein.

#### *Dana uqa aig cabina helen*

(Matju 13:1-9; Mak 4:1-9)

<sup>4</sup> Odocob dana cajaca jobon cunugnadec odi huhuein. Jobon alildoc toodocobtoodocob hoin. Odocob saen dana cajaca geh bahic cegulecebile Jisas galolo je maaden.

<sup>5</sup> Uqa maaden, "Dana oso uqana cabina uqana wit aig helecnu nuen. Uqa aig hehelen aig oosooso jic cobocna tonen. Odocob dana age aig eu lahadocobil man fululec age

\* **8:3:** Grik jaqec je hilah leihna age "Jisas uqana malogomca cesuladein," ec qee jaqelein, euqa age je fil jaqein eu odi: "Jisas cesuldoein"

humeig cedi ji hedoin. <sup>6</sup> Aig osooso maha meen baibaca euna tonen. Odocob maha ganac euna waca qeenu qala bimeei galalen. <sup>7</sup> Aig osooso dud geuna tonen. Aig ceteh dudca gami ben memegin ceteh dudca cilehdocobil aig qee men. <sup>8</sup> Aig osooso mulu mahana tonen. Odocob leih qala qahimei ben mi aig qon. Gug osolna aig oso qoc 100 ihoc len,” aden.

Odi maadimei Jisas utai maaden, “Oso dah mecnu dahigca je eu dah meiale,” aden.

*Galolo je uqana gugnu maaden*

(*Matju 13.10-17; Mak 4.10-12*)

<sup>9</sup> Odocob Jisasna malogom uqa galolo je maaden eu gugnu sisildoin. <sup>10</sup> Odocobil uqa maaden, “Anut culadecel age Anutna culnu cetehet jahunec docnu eu nijia. Euqa dana cajaca leih

age amagana foqaganqa

      qee fowain,

odocob age dahinigana dah moqaganqa

      qee fogo adeiaun.

(*Aisaia 6.9*)

Eunu age galolo jena je cunug dah megina,” aden.

*Dana aig cabina helennu galolo je uqana gug*

(*Matju 13.18-23; Mak 4.13-20*)

<sup>11</sup> Jisas je haun maaden, “Galolo je i uqana gug eu odi. Aig eu Anutna me je. <sup>12</sup> Aig eu jicna tonena eu odiwe dana age Anutna je dah mecebil Seten humei age wawaga meleecel Anut caahahaadecdainnu uqa je dana waugna tonen eu cedadi len. <sup>13</sup> Aig eu maha meen baibaca tonen eu odiwe dana age Anutna je dah mimeig wawaga ceelecca je eu ogina. Euqa age aig bebeig qee mel. Age saen nag odi himec wawaga meleecel temadec saen hocob toni aqena. <sup>14</sup> Aig dud geuna tonennu madiga eu odiwe dana age je dah megina, euqa age mahana bibileig mahana bilecnu jaen aqecca, maha cehewan ocnuca, amaga qocnu cetehca eu wawagana humei Anutna je cilehdocob agena aig qee wal megina. <sup>15</sup> Aig mulu mahana tonennu madiga eu odiwe dana age Anutna je dah mimeig u hewi daugdu wawaga tutuc mecanca mimeig gagadic tatawi aig qogina,” aden.

*Gowoc halna jahuldoc galolo je*

(*Mak 4.21-25*)

<sup>16</sup> Jisas je haun maaden, “Oso gowoc madacdumei hal dunuh qee tacena, odocob cabal bisalu qee mena. Euqa uqa gowoc ohisna caqusena. Eunu dana cunug age hamol hogina eu age gowoc camas foqagan. <sup>17</sup> Ge, cel ceteh oso jahunecna nijia eu hibna camasna ahu moqagan. Odocob cel ceteh dana age jahuldoein nijia eu hibna dana cunug fimeig doqagan,” aden.

<sup>18</sup> “Ge, oso uqa docca nijia eu Anut uqa haun utigian. Euqa oso uqa docca qee eu uqa ija docca cisdonia eudihha Anut uqa cawaldugian. Eunu age adi dah megina eunu batut cisdoigale,” aden.

*Jisas anag waliagulca age Jisas fecnu hoin*

(*Matju 12.46-50; Mak 3.31-35*)

<sup>19</sup> Odocob Jisas anag waliagulca age Jisas fecnu hoin qa dana cajaca geh bahic talildoin. Eunu age uqaca lecnu ihoc qee. <sup>20</sup> Odocob dana oso Jisas madon, “Hina anin walinelca hoiga. Age mecihuqagannu maha gumu taweiga,” don.

<sup>21</sup> Odocob Jisas dana cunug maadi maden, “Eu age Anutna je dah mimeig toodu odogina eundec eu ija au walielca,” aden.

*Jisas fufu ben madocob tilien*

(*Matju 8.23-27; Mak 4.35-41*)

<sup>22</sup> Odocob deel osona Jisas uqana malogomca wag tobimeig bibili bileig maaden, “Gec, hoiga. Wa gad cagoc leti naha isec loqale,” aden. Eunu age wagna naha isecnu leti belein.

<sup>23</sup> Age wa gad cagoc gemo lelegin Jisas us nijen. Odocob gugula ben wa gad cagocna neceb fufu gagadic bahic fulududu macas qahi wag dunuh nuaden. Wag eu wa cali bigia odon. Eu ehi li fadalec jicna maden. <sup>24</sup> Odocob malogom Jisasca limeig tulidudu madoin, “Ben, Ben! Ege fadalecnu odoqonal!” doin.

Odocob Jisas cajimei fufu gagadic wa hilidoc gagadic qaqqahen cahacaadi je maadeceb qee mimeig tiliec bahic nijen. <sup>25</sup> Odimei malogom maaden, “Agena wawaga meleec eu ai?” aden.

Euqa age dumanaga culeceb cucuiein. Odocob age tumatumai madocobmadocobeeig madein, “I cel dana? Uqa fufuca wa qahecca euha maaleceb uqa co toodu odosina!” ein.

*Jisas dana uqa buga me qee matica eu me muden*

(*Matju 8.28-34; Mak 5.1-20*)

<sup>26</sup> Odocob age wagna nui Gerasa agena hatuna calein. Eu Galili wa gad cagoc naha isec. <sup>27</sup> Odocob Jisas wagnadec mahana toneceb dana oso taun bennadec buga me qee age hewudein uqa Jisas gulucdon. Uqa bical saen cecelac bahic coboloi. Odocob uqa jobon qee biloloi qa uqa qalqal hatinna niji u coboloi. <sup>28-29</sup> Saen geh bahic buga me qee eu uqa gagadic hewoloi. Euqa Gegesa dana age uqa cofdu cuhadocnu eben jaihca senna qagecebil nijoloi qa uqa sen cagocob buga me qee eu cisdoc ihulahaldutumei odudeceb wadauna nuoloi. Eunu Jisas uqa buga me qee uqa dana dewegnadec nuuga ec madon. Odocob saen uqa Jisas fimei gagadic eumei uqa olana toni mahuli njimej jejeg u suli u madon, “Jisas, Anut Ohis Bahic Melah! Hina ija cel oditegan? Ija ninihigina, ija deweni cain dain tec itigaun!” don.

<sup>30</sup> Odocob Jisas sisildon, “Hina ijain in?” don.

Odocob buga me qee mati bahic uqa dewegna lein eunu uqa jejeg hewi madon, “Ija ijanji ‘Mati,’” don. <sup>31</sup> Odocob buga me qee Jisas ititacadeceb maha heel ben eu dumuh bahic non gugca qee euna cain belowainnu ninidoin.

<sup>32</sup> Aria, aluh qeihna onoca qee ho am ben oso sab jiji coboin. Odocob buga me qee culadecceb ho dewenegana loqagannu Jisas ninidoin. Odocob Jisas cois aden. <sup>33</sup> Odocob dana eu cuculdeig ho dewenegana lein. Odocobil ho cunugca aluh qeihqeih guguli nu Galili wa gad cagoc dunuh gotoimeig cunugca odi wa jimeig cal mein.

<sup>34</sup> Odocobil dana ho cofadoloig eu age eu caleceb fimeig busali limeig taunca, jobonca, cabinaca dana cajaca maaadi coboin. <sup>35</sup> Odocobil dana cajaca cunug je eu dah mimeig age eu fegan imeig belein. Age Jisasca humeig dana dewegnadec buga me qee ititacdron eu Jisas jaihna bibilen fein. Uqa lotoc tacecca, dana cisdoc meca bibilen fimeig cucuein. <sup>36</sup> Dana age amagana fein eundec dana uqa buga me qee hewudein eu Jisas adi dewegnadec buga me qee ititacadeceb dana qila me men bilen eunu dana cajaca hoin saadein. <sup>37</sup> Odocob dana cajaca Gegesa agena mahanaadec cunug age cucui bahic ein eunu Jisas cuculadi nuigiannu ninidoin. Eunu Jisas wag tobocab cuculadi ceseli belein. <sup>38</sup> Dana buga me qeeca Jisas ititacdton eu Jisas ninidudu madon, “Cultecem hinaca belowa!” don.

Euqa Jisas madudu madon, <sup>39</sup> “Hina hinana gunna nuimeg Anut me mihihanu saadaga,” dodoi suldocob nuen.

Dana eu taun ben cunug ono Jisas me mudennu cunug maaadi nuen.

*Jairas uqa Jisas cesuldocnu madon  
(Matju 9.18-19; Mak 5.21-24)*

<sup>40</sup> Saen Jisas wa gad cagoc naha isecnu leceb dana am age uqa sumudi bilein. Eunu wawaga ceelecca ehudein. <sup>41-42</sup> Oodogin Juda agena cuha jo ilo oso, ijan Jairas, humei uqa ateg osol bahic uqana cabi gel 12-pela eu uqa cal migia odonnu uqa Jisas jaihna toni mahulimei uqana jona belowasannu ninidon.

*Caja oso uqa Jisasna lotoc heweceb me muden  
(Matju 9.20-25; Mak 5.25-34)*

Jisas uqaca cocobi lelesin dana cajaca geh bahic age Jisas alildudu gesacgesac belein. <sup>43</sup> Jisas cocobi lelen caja oso ono cabi gel 12-pela golac nenen odi hewi coboloi euqa dana oso qee me mudel† <sup>44</sup> eu uqa dana cajaca cegulec gemo limei Jisas hibilohu isec ben. Odimei Jisasna lotoc bibig qududon. Odocob uqa golac noloi eu gatidon. <sup>45</sup> Odocob Jisas sisilaadi maaden, “Info qudutia?” en.

Cunug ija qee ija qee ein. Odocob Pita madon,‡ “O Ben, dana cajaca kitim bahic hina talilheiga taweiga hina cemeincemein legina,” don.

<sup>46</sup> Euqa Jisas maden, “Ija gagadic odo oso deweg cuculdi nueceb tebanduga eunu oso ija qudutia,” en. <sup>47</sup> Caja eu uqa cetehe odon camasac meia eu dumei uqa deweg qeilei Jisasca timei jaihna toni mahulimei nijen. Odimei dana cajaca cunug amagana uqa eetanu Jisas qududoia, odocob uqa mahuc bahic hag medoia eu saaden. <sup>48</sup> Odocob Jisas madon, “Ateni, hina wawin meleec eu me mihiia. Wawin malolca nuugale,” don.

*Jisas uqa Jairas ateg cal mecnadec tulidocob cajen  
(Matju 9.23-26; Mak 5.35-43)*

<sup>49</sup> Jisas uqa caja je i madodon dana oso Juda agena cuha jo ilona jonadec humei Jairas madon, “Hina aten cal meia. Iwalgec mulug cabi haun Cain utugaun,” don.

<sup>50</sup> Euqa Jisas dah mimei Jairas madon, “Cain cucuiagaun. Hina dih wawin meleeciale. Odocob aten haun me migian,” don.

† 8:43: Grik jaqec je hilah leihna age je oso tubdu jaqein eu odi: Uqa uqana meen qaig cunug dana uqana hag me mudituqaga bili adoloi. Uqa uqana cetehe cunug qee muden. ‡ 8:45: Grik jaqec je hilah leihna age je fil jaqein eu odi: Pita age uqaca tawein ageca madoin

<sup>51</sup> Odocob Jisas uqa Jairasna jona limei osoca qee culdeceb uqa Pita Jon Jemsca himec, odocob mel aid eu memeg anagca gami hamol lein. <sup>52</sup> Dana cajaca cunug ono cegulein eu age mel aid eunu qada qaqaieig sogoi bilein. Jisas maaden, “Mel aid i qee cal mel. Uqa us nijia! Cain qajowain,” aden.

<sup>53</sup> Odocob age mel aid cal meia eu doinu age asaldoin. <sup>54</sup> Euqa Jisas eben u hewimei utai madudu madon, “Mel aid, cajaga!” don. <sup>55</sup> Uqana cebac bilec kis ceseleceb mahuc bahic cajen. Odocob Jisas sab oso utecebil jigiannu maaden. <sup>56</sup> Mel aid eu memeg anagca tumatumaezin euqa Jisas cethet odi calen eunu oso cain madowasinnu cahacalen.

## 9

*Jisas ugana malogom 12-pela suladeceb belein*

(Matju 10.5-15; Mak 6.7-13)

<sup>1</sup> Odimei Jisas ugana malogom 12-pela utaadceeb uqaca hocobil uqa buga me qee dana deweneganadec ititacadeccnuca, dana hag filfil aqecca me madecnuca gagadic odoc adimei cabi eu ebenegana men. <sup>2</sup> Odimei uqa age dana cajaca cunug Anutna culnu je gasali maadoqaganuca, hag me mudiadoqaganuca suladeceb belein. <sup>3</sup> Uqa maaden, “Jic cobocnu cethet oso cain hewowain. Jic coboc komca qee, badomca qee, sabca qee, meen qaigca qee eu odi jic coboiga. Lotoc lec исца Cain hewi belowain. Osol himec taceiga. <sup>4</sup> Age jo casac dunuh loqagan jo osol euna himec bibileig li jobon eu culimeig beleiga. <sup>5</sup> Odocob jobon oso age oiadecnu culecebifli age cuculadi beloqaga bili comis jaimagana fagdon eu qoidu heleiga. Age eu fimeig age Anut amegna me qee odoin eu doqagannu odi odoiga,” aden.

<sup>6</sup> Odocob malogom 12-pela bebeleig jobonjobon Anutna me je mamadeig hag eundec me mamadi jobon cunugna coboin.

*Herod uqa Jisasnu je dumei dadanen*

(Matju 14.1-2; Mak 6.14-16)

<sup>7</sup> Odocob Herod Galili hatu cunug cofdoc cethet calen eu cunug uqa dah men. Leih mamadiein, “Wa Joadec Jon uqa cal mecnadec haun ceseli cajen!” ein. Eunu uqa eu dadaneb ben bahic dadanen. <sup>8</sup> Leih age madein, “Ilaija camasac men,” ein. Oodogin leih madein, “Je hahun madec dana oso weleca bilen uqa haun ceseli cajen,” ein. <sup>9</sup> Herod maden, “Ija Jon be cagom qa i cel dana ija uqanu je i dah migina?” en. Odocob uqa Jisas figiannu temduduoloi.

*Jisas dana 5,000 sab aden*

(Matju 14.13-21; Mak 6.30-44; Jon 6.1-13)

<sup>10</sup> Odocob aposel ceseli Jisasca humeig ceteteh cunug odoinu sadoin. Odocob uqa ehadeceli uqa gami age cuhanuc jobon nag ijan Betsaida ono belein. <sup>11</sup> Dana cajaca geh bahic age Jisas uqa Betsaida jobon bilen eu dah memeig toodoin. Uqa meme mamadi Anutna culnu je maaden. Odimei hagca eundec me maden.

<sup>12</sup> Odocob cam wele nonon malogom 12-pela age Jisasca humeig madoin, “Ege aben filec cagocna bahic biluquna. Eunu dana cajaca am i age hatu alildoc belimeig age jobonnana sab cehec cudunnanaca limeig sabca us nijec cudun wali foqagannu suladaga,” doin.

<sup>13</sup> Euqa Jisas maaden, “Age sab jec adeiga,” aden.

Odocob age jejeg hewi madoin, “Ege bred 5-pelaca, cul dool lec исца Cain hewoqa. Sab oso haunca qee. Qeeq, ege dana cajaca am ben i agena sab li fajecnu magaganafao?” doin. <sup>14</sup> Ge, dana eu age 5,000 odi bilein.

Odocob Jisas ugana malogom maaden, “Dana cajaca i age sanijec am 50 50 odi madecebile billeiga,” aden.

<sup>15</sup> Odocob malogom eu odi odimeig cunug maadecebile billein. <sup>16</sup> Odocob Jisas bred 5-pela cul dool lec исца Cain hewimei sao jobon tatiimei Anut hetaga doc je madon. Odimei sab eu fenifeni ugana malogom adeceb dana cajaca siwiadecebile jien. <sup>17</sup> Age cunug jecebile ihoc leceb malogom age sab jecefana galel 12-pela tacecebile am ben.

*Pita uqa Jisas Krais ec eu qasali maden*

(Matju 16.13-19; Mak 8.27-29)

<sup>18</sup> Saen osona Jisas uqa himec Anut inondudu bibilen malogom age gami bilein. Odocob uqa sisiladen, “Dana cajaca eu age ijanu in egina?” aden.

<sup>19</sup> Odocob age jejeg hewi madoin, “Leih age Wa Joadec Jon eu hina ec madegina. Leih age Ilaija eu hina ec madegina. Oodogin leih age je hahun madec dana oso weleca bilen uqa haun cebac meia eu hina ec madegina,” doin.

<sup>20</sup> Odocob uqa sisiladen, “Aqeqa, ijanu in egina?” aden.

Odocob Pita jejeg hewi madon, “Hina Anutna Krais,” don.

*Jisas uqa cal mimei haun ceseli cajigian ec maden*  
*(Matju 16.20-28; Mak 8.30-9.1)*

<sup>21</sup> Odimei Jisas uqa Anutna Kraisnu oso Cain bahic madowainnu je gagadic bahic cahacaden. <sup>22</sup> Odimei je maadi maaden, “Dana Melah uqa deweg sogoec ben gahidugian. Juda agena matuca, ihanec dana benbenca, loo je iwaladecca age Dana Melah hibemdumeig uqa qocobil cal migian. Odocob Anut tulidocob deel cijeddocna haun ceseli cajigian,” aden.

<sup>23-26</sup> Odocob cunugca maaden, “Dana oso uqa ijana ijana jenuca majag docobfi saen Dana Melah uqa uqana kobolkobolnaca, Memige Anutca ensel gunca, agena kobolkobolnaca humei uqa dana eunu majag dugian. Odocob dana oso mahamaha cehewan cunug oialumiqa uqana cebac biley culdimei fadaloubmi cehewan on eunu me biloubfo? Qeeo! Oso uqa uqana cebac biley cahahadugia odona eu uqa uqana cebac biley felacudigian. Odocob oso uqa ijana bilina eunu uqana cebac biley felacudecebfu eu uqa uqana cebac biley cahahadugian. Eunu oso uqa ijana madi, ija uqa jaih ceen lahacdu du toodugen, ena eu uqadodoc deweni me biligian ec Cain madeiaun qa uqa deeldeelna uqana na babalec hewi gahidumei tooteiale. <sup>27</sup> Ijaqa mele maadigina, leih age ene taweginha eu age qee cal nec ninijeb Anutna cul cali hohob mecidoqagan,” aden.

*Jisas deweg fil ibuldon*  
*(Matju 17.1-13; Mak 9.2-13)*

<sup>28</sup> Odocob Jisas je eu odi maaden eu deel 8-pela hedocob uqa Pitaca, Jonca, Jemsca cedadimei ehadi Anut inondugianu aluh gaticna ti bilein. <sup>29</sup> Uqa Anut inondudu bibilen ola fil ibuldon. Uqa lotoc senenec fililaec odi calen. <sup>30</sup> Odocob uqana malogom age dana lecis ugaca je togododogin feciadein. Dana lecis eu ale Moses Ilaijaca. <sup>31</sup> Ale sao jobondec kobolkobolca camasac mesin. Odocobil Jisas isi Jerusalem ono cal mimei Anutna odoc toodu eu cunug ihoc ligiannu ugaca je togododu madein. <sup>32</sup> Oodogin Pita uqa malogom lecis euca age amaga us adein euqa age camalimeig Jisasna kobolkobolca dana lecis ugaca tawein euca feciadein.\* <sup>33</sup> Dana lecis eu ale Jisas cuculdesin Pita madon, “O Ben, ege ene odi bileyneu eu me bahic. Ege talah cijed ceheqan, oso hinana, oso Mosesna, odocob oso Ilaijana,” don. Pita uqa qee dudu je maden.

<sup>34</sup> Uqa je mamaden taen oso nimei jahuladen. Odocob taen jahuladeceb malogom cucuiein. <sup>35</sup> Odocob je jeg taennadec cali humei maaden, “Ija melami eu ihen, uqa ija nesili ehudem.† Age uqa jeg jeg toodu odoiga,” aden.

<sup>36</sup> Saen jeg jeg qee meceb ono Jisas cuhanuc tawen. Odocob malogom ceteh cunug calen eu fimeig tiliein. Odocob saen euna age itah oso ceteh caleceb feinnu qee madolooin.

*Jisas mel oso buga me qeeca me muden*  
*(Matju 17.14-21; Mak 9.14-29)*

<sup>37</sup> Deel eu culdimeig deel osona age aluh gaticnadec ceseli noin. Odocob dana cajaca am bencia hu Jisas gulucdoein. <sup>38</sup> Odocob dana oso dana cajaca eunadec utai madon, “Iwalgec, ija ninihigina, ija melami nui fagale. Ija melami osol bahic! <sup>39</sup> Faga, buga me qee hu heweceb eueceb eu sahalic magmagdodon eu qu ihu qocob mahana tonena. Uqa deweg dain doc uteei mahuc culdecwe qee! <sup>40</sup> Ija hinana malogom ititacdooqagannu niniadigaqa age ititacdocnu odocwe qee,” don.

<sup>41</sup> Odocob Jisas jeg jeg hewi maaden, “O dana cajaca qila bileygina, age wawaga meleecca qee, age cisdic cogogecca! Saen ganic ija ageca haun biligen? Saen ganic ija camuhulaadi cobigen?” aden. Odimei dana eu madon, “Hina melem ehudi ahoga,” don.

<sup>42</sup> Mel eu cocobi hohon buga me qee qu ihu qocob toni mahulimei jaimagana nijen. Odocob Jisas buga gegehinca eu cahacdu madocob culdon. Odimei mel me mudimei memeg ceseli uten. <sup>43</sup> Odocob dana cajaca cunug Anutna gagadic odoc fimeig tumatumaein.

*Jisas uqa cal mimei ceseli cajigian ec madi lecisdon*  
*(Matju 17.22-23; Mak 9.30-32)*

Dana cajaca age Jisas ceteteh cunug odon eu fefeig geh cisdodoig togododu bibilegin Jisas uqana malogom maaden, <sup>44</sup> “Ija je qila maadigen eu Cain dahiniga celeiaun. Dana Melah eu dana ebenegana mudugagan,” aden. <sup>45</sup> Euqa je eu uqanu gug age wawaga fogo docdainnu age docnu jahunec nijen. Odocob age uqa je eunu sisildocnu cucuiein.

*In uqa ben biligian?*  
*(Matju 18.1-5; Mak 9.33-37)*

\* <sup>9:32:</sup> Ceteh eu tuna calen eu odi fena. † <sup>9:35:</sup> Grik jaqec je hilah leihna age je oso tubdu jaqein eu odi: “Ija uqanu naluq migina,” aden.

<sup>46</sup> Odocob fee dadanec malogom gemona cali hon. Eu age in uqa cunug wooladi ben bilina eunu fee dadanein. <sup>47</sup> Oodogin Jisas agena cisdock dumei uqa mel sim oso umei uqa geihna isec mudimei <sup>48</sup> maaden, “Oso uqa age gemo nag bilina eu age cunug wooladimei ben bilina. Eunu oso uqa mel i ija ijanina ehudimei eeldona uqa ija oitimei eeltena. Odocob oso uqa ija oitimei eeltena eu uqa ija sulten euha ehudimei eeldona,” aden.

*Oso egena cad qee bilina eu uqa egena danah bilina  
(Mak 9.38-40)*

<sup>49</sup> Odocob Jon jejeg hewi madon, “O Ben, ege dana oso hina ijainna buga me qee eundec dana deweneganadec ititacaaden fom. Uqa egena amnadec qee. Eunu ege uqa cahacdom,” don.

<sup>50</sup> Odocob Jisas uqa Jon malogom gami maaden, “Oso uqa age qee me qee madena eu agenu tawena. Eunu age cain cahacdowain,” aden.

*Sameria jobon oso age Jisas qee feele doloin*

<sup>51</sup> Jisas uqa sao ohis tecnu deel wele dodoldodon uqa Jerusalem nuigiannu cisdock osol tawecib nuen. <sup>52</sup> Odocob uqa dana sos suladeceb aqunitu belein. Age belimeig uqanu Sameria jobon ono ceteteh cunug saciadoqagannu lein. <sup>53</sup> Euqa uqa Jerusalem himec nuigiannu cisdock osol tawen. Eunu dana onodec age qee ehudelein.<sup>‡</sup> <sup>54</sup> Saen malogom lecis Jems Jonca eu odi timesi madosin, “Tibud, ele sao jobondec ja utadocohul nii cijadigiannu<sup>§</sup> wawin nijiafo?” dosin.

<sup>55</sup> Odocobil Jisas falicdumei cahacalen.\*\* <sup>56</sup> Odocob age jobon osona lein.

*Dana age Jisas toodocnu gale adena  
(Matju 8.19-22)*

<sup>57</sup> Odocob age jic cocobi bebelegin dana oso Jisas madon, “Hina anaana nunuem ija toohigen,” don.

<sup>58</sup> Odocob Jisas madon, “Qa cus age helona nijegina, odocob man fululec agena teicna nijegina. Euqa Dana Melah uqa us nijec cudunca qee,” don.

<sup>59</sup> Odocob uqa dana oso madon, “Tootaga,” don. Euqa dana eu madon, “O Tibud, cultecem ija casac ceseli nuimig mei heel cisigen,” don.

<sup>60</sup> Odocob Jisas jejeg hewi madon, “Cal mec dana culadecem cal mec eundec agena heel ciseigale. Hinaqa nuimeg Anutna culnu je qasali maadaga,” don.

<sup>61</sup> Odocob dana oso madon, “O Tibud, ija hina toohigenqa casac cultecem ija cotiel odio decemin,” don.

<sup>62</sup> Odocob Jisas madon, “Oso uqa culumna hehewi nunui bilei hibiloh isec gaidgaid mecienna uqa Anutna culna lecnu cabi ocwe qee,” don.

## 10

*Jisas uqa dana 72 suladeceb belein*

<sup>1</sup> Eu hedocob Tibud uqa dana 72 haun nesili ehadimei lecislecis suladeceb taun jobon abesabes cunug uqa ugadodoc euna ligia bili uqa aqunitu belein.\* <sup>2</sup> Uqa maaden, “Cabina ceteh mati bahic cedi haudocnu wal men nijia, euqa cabi dana mati ceteteh cedi jo bisna mecnua qee bilingina. Eunu sab cedi haudocnu gug uqa cabi dana suladeceb sab haudocnu inondoigale.” <sup>3</sup> Feiga, ija age suladigina odi sipsip age qa cus gemo leginawe suladigina. Agena jic beleiga. <sup>4</sup> Age badomca, meen qaig tacecca, jaimaga tacecca Cain u hewi belowain. Dana oso jicna gulucdufeig Cain jejeg hewowain. <sup>5</sup> Odocob age jo osona hamol limeig casac madeiga, ‘Malol bilec jo ina biliale,’ eiga. <sup>6</sup> Dana uqa malol bilec je ocnu ihoc jo euna bilecebfli agena malol bilec feele ec je dana deweg fagdgugian. Qeefi, malol bilec feele ec je eu haun ceseli ageca hugian. <sup>7</sup> Cabi dana uqa cabi ameg qaig ugian eunu jo osonadec osona Cain leti lowain. Jo osol euna dih bileiga, sab jecnuca wa gab jecnuca cesuladegina eu himec jeiga. <sup>8</sup> Cel saen age jobon nag osona lecebile ehadifeig cel sab jec age olanaga moqagan eu jeiga. <sup>9</sup> Jobon nag euna hag me madeiga. Odimeig dana cajaca ono maadeiga, ‘Anutna cul age cemenega hoia,’ adeiga. <sup>10</sup> Euqa age jobon nagna

<sup>‡</sup> **9:53:** Sameria age Gerisim aluhna cuha ben fefeig ihanogaqannu ceguloloig. Euqa Juda age Jerusalem ono cuha ben foqagannu toloig. Age Jon 4.20 feiga. Sameria age Juda cuha fecnu kobel tutuc qee odogina ec cisdoin, eunu saen euna age Jisas cesulocnu qee gale adel.      <sup>§</sup> **9:54:** Grik jaqeç je hilah leihna age je oso tubdu jaqein eu odi: “odiwe Ilaija odon”      <sup>\*\*</sup> **9:55:** Grik jaqeç je hilah leihna age je oso tubdu jaqein eu odi: “Age age cel kisnadec qee dogina. Dana Melah uqa dana fadaladecnu qee hol qa dana cahahaadigiannu hon,” aden.      <sup>\*</sup> **10:1:** Grik jaqeç je hilah leihna age Jisas uqa dana 72 suladen ec qee jaqelein, eu age uqa dana 70 suladen eu odi jaqein. Eunu dana 70 eu but 1na nijcebfli eu odiha dana 70 eu but 17na nijigian.

lecebil qee ehadecebifli jobon nag euna maha gemona limeig maadeiga,<sup>11</sup> ‘Comis agena jobon nag ina ege jaimigena fagdona eu ege qoidu helocomun ageca lena. Euqa age i doiga! Anutna cul age cemenega hoia!’ adeiga.<sup>12</sup> Ija maadigina, dana cajaca Sodom bilein eu age Gesiladec Deel Benna ameg me qee oqagan. Euqa jobon eu agena je hibemdogina eu agena ameg me qee eu Sodom agena ameg me qee wooldugian,’ aden.

*Taun leih age wawaga qee meelel*

(Matju 11.20-24)

<sup>13</sup> Jisas je haun maaden, “O Korasin Betsaidaca, odoc kobolkobolca agena calen odi Taia Saidonca hatu caloubmi wele bahic dana cajaca ono age agena silail hibemdogina ihacadencu lotoc me qee tacimeig bibili comis agedodoc dewenenga weti heheli biloub. Eunu Korasin age walocca! Betsaighada age walocca!<sup>14</sup> Euqa Gesiladec Deel Benna Anut uqa Korasin Betsaidaca ameg me qee wadacadijan eu Taia Saidonca ameg me qee wadacadijan eu wooldoc hugian.<sup>15</sup> Odocob Kapaneam agenu! Age Anut uqa sao jobon ohis ehadi tigian ec cisdoginafo? Qeelo, Anut uqa heladeceb oloqaninha noqagan!” aden.

<sup>16</sup> Odocob Jisas uqana malogom maaden, “Oso uqa age dah madena uqa ija dah mitina. Oso uqa age dah madecnu culina uqa ijanu ha culina. Odocob oso uqa ijanu culina uqa oso ija sultennu ha culina,” aden. Uqa dana 72 suladeceb belein.

*Dana 72 age ceseli hoin*

<sup>17</sup> Odocob dana 72 cunugca wawaga ceelecca ceseli hoin. Eu age madoin, “Tibud, buga me qee eu ege hina ijainna ititacadocomun egena je toodoin!” doin.

<sup>18</sup> Odocob Jisas jejenega hewi maaden, “Ija Seten amel faleecwe sao jobondet totonen figa.<sup>19</sup> Feiga, ija ijanu gagadic odoc adem. Eunu age man sononecca labaiaca lalan ihoc cobogina. Odocob cad uqana gagadic odoc cunug age wooldocnu ihoc cobogina. Odocob ceteh oso dewenega qee tudoiaun.<sup>20</sup> Eu odiqa buga me qee agena je toodoginanu cain ceelowain. Euqa age ijanaga sao jobon jaqec taweianu cois ceeleigale,” aden.

*Jisas ceeli Mei hetaga don*

(Matju 11.25-27; 13.16-17)

<sup>21</sup> Saen euna dih Kis Gun odudeceb Jisas uqa waug ceelimei je odi maden, “Mei, saoca mahaca alena Tibud, hina ceteh eu dana cisdoc silecca docca eundecnu jahunem. Dana cajaca age mel sim bileyinawie bileyinage eundec amagana je eu camas mem. Mele, Mei, hina hinana gale hec me bahic toodoo odi odom. Eunu ija hina hetaga higina,” en.

<sup>22</sup> “Mei uqa ceteteh cunug ija ebenina men. Dana oso uqa Anut Melah uqana gug qee du cuhadona. Euqa Memige Anut himec uqa Anut Melah uqana gug du cuhadona. Dana oso uqa Memige Anut uqana gug qee du cuhadona. Euqa Anut Melah himec uqa Memige Anut uqana gug du cuhadona. Odocob Anut Melah eu uqana gale docna dana oso Memige Anut uqana gug du cuhadona euha Memige Anutna gug du cuhadugian,” en.

<sup>23-24</sup> Odimeci Jisas waldumei uqana malogom himec je jahuni maaden, “Ija maadigina, je hahun madec danaca kingca wele bilein mati age ceteh age qila fegina eu fecnu wawaga ben hoolen euqa age ceteh eu qee felein. Dana eundec age je age qila dah megina eu dah mecnu wawaga hoolen euqa age je eu qee dah melein. Eunu age amaga Anutna ceteh fena eunu age eeladecca bileyinage,” aden.

*Sameria dana oso uqa Juda dana cesuldon*

<sup>25</sup> Odocob loo je iwaladec dana oso tawimei Jisas bolobna mudigiannu temdu sisildon, “Iwalgec, ija cebac bileyec catanec eu mugumi ugennu eeta odigen?” don.

<sup>26</sup> Odocob Jisas jejeg hewi madon, “Mosesna loo je jaqec adi madena? Hina jaqec je eu uqana sildec adi eu madaga?” don.

<sup>27</sup> Odocob dana eu jejeg hewi madon, “Loo je odi madena:

Tibud, hinana Anutna wawin cunugca, doloin cunugca, hinana gagadic odoc cunugca, hinana cisdoc cunugca euna nalug magale,’ ena. (Loo 6.5)

‘Odocob hina hinanel nalunin maganawie

odi hina utuqain bileyec<sup>†</sup> eundecnu nalug magale,’ ena,” don.

(Wok Pris 19.18)

<sup>28</sup> Odocob Jisas jejeg hewi madon, “Hinana jejeni hewec eu ihoc. Hina odi odimeci cebac bileyec organ,” don.

<sup>29</sup> Euqa loo je iwaladec ija ijana sisildon je eu tutuc ihacadigen ec cisduu Jisas sisildon, “Ija utuqani eu in?” don.

<sup>30</sup> Odocob Jisas jejeg hewi madon, “Dana oso uqa saen osona Jerusalemdec Jeriko ono nonon heje dana jic sahu qoin. Lotoc cagasi baladoin. Deweg nana ququein geh bahic odi

<sup>†</sup> **10:27:** Utuqain bileyec uqana gug eu odi. Agena loofo, agena kobolfo eu dana osonu nalug magale ec qee madel, cois hina dana eunu nalug magale.

qocobil cul himec mamaden nijen.<sup>31</sup> Oodogin saen euna dih nawel tawec ihanec dana oso uqa jic eu toodu non. Odimei uqa dana eu ninijen fimei jic gesac naha isecnu hawadudu wooldon.<sup>32</sup> Odocob jic euna himec Liwai dana ugaha hon. Odimei dana eu ninijen fimei jic gesac naha isecnu hawadudu wooldon.<sup>33</sup> Euqa Sameria dana oso jic eu toodu ni dana eu fen. Odocob uqa dana eu feceb waug qon.<sup>34</sup> Odimei dana eu njenna limei mool wainca deweg qu me qee mudeinna jouditon. Odimei jeliton. Odimei uqa uqana ceselna mudimei jaen mudec jona ehudi len. Ono uqa cofdon.<sup>35</sup> Odocob deel osona uqa qaig silwana mudec lecis umei jo eu cofdor dana uten. Uqa cofdor dana madon, ‘Cofdodom. Odocob ija haun isec ceseli humig cofdogannu qaignu ameg fajihigen,’ don,” don.

<sup>36</sup> Odimei Jisas loo je iwaladec dana eu sisildon, “Hinana cisdocna dana cijed eu age in oso dana eu heje dana qoin eu uqa utuqan?” don.

<sup>37</sup> Odocob dana eu jejeg hewi madon, “Dana uqa waug qocob cesuldon eu,” don.

Odocob Jisas madon, “Hina nuimeg eu odi odoga,” don.

### *Jisas uqa li Mata Mariaca facialen*

<sup>38</sup> Odocob Jisas uqana malogom gami jic cocobi bebelegin jobon osona caja oso, ijan Mata, Jisas uqana jona ligiannu madon.<sup>39</sup> Uqa caja waliag, ijan Maria, uqa Tibud jaihna bilimei iwaladec je dah memei bilen.<sup>40</sup> Odocob Mata uqa cabi cunug uqa dih odiodi oodon uqana cisdor filfil nuen. Eunu uqa humei madon, “Tibud, ija wali uqa ija cuhanuc cabi uginanu cultia ec cisdogonafo? Madocom hu cesulteia!” don.

<sup>41</sup> Odocob Tibud uqa jejeg hewi madon, “Mata, Mata! Hina ceteteh geh bahicnu cisdor eunu wawin me qee mena<sup>42</sup> qa ceteh osol himec eunu cisdoum. Maria uqa ceteh me bahic nesilia. Odocob oso eunu uqanadec ocnu qee nijel,” don.

## 11

### *Jisas inondocnu adi iwaladen*

(Matju 6.9-15; 7.7-11)

<sup>1</sup> Saen osona Jisas uqa cudun osona Anut inondudu bilen. Uqa inondu hedocob malogom oso madon, “O Tibud, Jon uqana malogom inondocnu iwaladen odi ege iwalgaga,” don.

<sup>2</sup> Jisas maaden, “Age inondodoig odi madeiga:

‘O ege Memige,  
hina ijain gun biliale.

Hinana cul egeca hoiale.

<sup>3</sup> Egena sab jecnu deel abesabesnu igigale.

<sup>4</sup> Ege dana age ege silail migeginanu dahinige celena.

Eunu hina egena silailnu dahin celeiale.

Hina ege temgecna Cain ehi li migigaun,’ eiga,” aden.

<sup>5-6</sup> Odimei Jisas uqana malogom maaden, “Agenadec oso limei tu gemo bahic uqana danah sisildugianfi, ‘O danah, ijana danah oso qila bahic jobon onocadec hu ijana jona caleia. Odocob ija uqa sab oso utecnu qee! Eunu hina bred cijed itecem hibna ceseli ihigeno?’ dugianfi,<sup>7</sup> odocob uqana danah hamoldec je ceseli madugianfi, ‘Cain dodo mitigaun! Jic cebec wele meniga. Odocob ijana mel ijaca wele cabalna nijuqa. Ija cajimig ceteh oso ihecw qee,’ dugianfi,<sup>8</sup> eunu cel oso? Ija maadigina, uqa uqana danahnu qee cajimei bred utiaunfiqa majagca qee sisildaiaunnu uqa cajimei cetehnu sisildaia eu cunug utigian.<sup>9-10</sup> Odocob ija maadigina, cunug age cetehnu Anut sisildogina eu ceteh ogina. Odocobil oso ceteh walena eu ceteh gulucedona. Odocob oso jic cebec gohugohudonu eu Anut huditung. Eunu age Anut cetetehnu inondocbil ceteh eu adigian, odocobil age wawali cobimeig ceteh walegina eu gulucedoqagan, jic cebec gohugohudocibil Anut hudiadigian.<sup>11</sup> Age gemona dana oso uqana mel uqa memeg cul dool itiga jiga docobfi memeg uqa cul dool qee utina qa man sononec utinafo?<sup>\*</sup> <sup>12</sup> Age gemona dana oso uqana mel uqa memeg mala waqanu itiga jiga docobfi memeg uqa mala waqa qee utina qa lacbaina utinafo?<sup>13</sup> Feiga, age dana gug me qee qa age agena mel ceteh me adecnu dogina. Eunu age mele dogina, Memega sao jobon bilia eu uqa age Kis Gunnu sisildogina eundec Kis Gun adigian!” aden.

### *Jisas uqa Bielsebulca cabi osinanu madein*

(Matju 12.22-30; Mak 3.20-27)

\* <sup>11:11</sup>: Grik jaqec je hilah leihna age je oso tubdu jaqein eu odi: “Age gemona dana oso uqana mel uqa memeg sab itiga jiga docobfi memeg uqa sab qee utina qa meen utinafo?” aden.

<sup>14</sup> Aria, dana oso buga me qee hewen bilen, uqa co cufa qon. Odocob Jisas uqa buga me qee dana dewegnadec ititacdon. Saen buga me qee eu qisacdocab dana eu je maden. Odocob dana cajaca eu odi fecebil wawaga tumatumaein. <sup>15</sup> Euqa dana leih madein, “Uqa Bielsebul, buga me qee agena ben, uqana gagadic odocna buga me qee dana deweneganadec ititacadena,” ein.

<sup>16</sup> Leih uqa temdu feqan imeig age uqa Anutna cabi onana gaga eunu hina kobolkobol oso oodom faga gena ec sisildoin. <sup>17</sup> Euqa Jisas agena cisdoc fimei maaden, “Hatu osona mam cadecebil qatanec bilecebfí age gaus danoqagan. Odocob sihulshul cunug age mam cacadi qocobqocobimeig toni aqigian. <sup>18</sup> Age ijanu madi, uqa buga me qee Bielsebulna gagadic odocna dana deweneganadec ititacadena, egina. Eunu Setenna cul age mam cacadi qocobqocobimeig am qatanec filfil bileginafi uqana cul eu adi biluqagan? <sup>19</sup> Ija buga me qee Bielsebulna gagadic odocna dana deweneganadec ititacadigina eu melefi agena malogom euha inna gagadic odocna buga me qee dana deweneganadec ititacadigina? Eunu agena malogom agena odoc eu Farisi agena je cahuldoc eunu ihacadigian. <sup>20</sup> Ijaqa Anutna gagadic odocna buga me qee dana deweneganadec ititacadiginafi Anutna cul ageca wele hoia,” aden.

<sup>21</sup> “Dana gagadic uqana han qalicca cunug saciadu uqana jo cofdudu tawena saen euna uqana ceteteh cunug tutuc bilina. <sup>22</sup> Euqa dana gagadic bahic uqana wooldoc humei uqaca cacadi han wooldona saen euna wooldoc dana uqa dana gagadic uqana han qalic jo gug eu hannu hewen hewi ehi nuina, odocob uqa dana gagadic uqana ceteteh heje ceden euha hewi ehi nuimei siwi adena,” aden.<sup>†</sup>

<sup>23</sup> “Oso uqa ijana danah qee eu uqa ija cad mitina. Oso ija cesultimei dana cajaca Tibud cemenug qee hauadena eu dana cajaca bilisaadena,” aden.

*Buga me qee ceseligion  
(Matju 12.43-45)*

<sup>24</sup> Jisas je haun maaden, “Saen buga me qee dana dewegnadec cali hona uqa jaen mudec cudun wawali hatu galalecna cobona. Uqa cudun oso qee fifei eu madena, ‘Ijana jo cuculi hom euna ceseli nuigen,’ ena. <sup>25</sup> Uqa ceseli humei jo gegehinca qee, cunug eeldoc ninijen fena. <sup>26</sup> Odimei uqa haun ceseli nuimei buga me qee 7-pela cedi ahocob uqa gami bilegina. Buga me qee 7-pela eu agena odoc me qee uqana odoc me qee wooldoc. Eunu dana eu uqana bilec qila euna me qee bahic mena. Uqana bilec weledec wooldona,” aden.

*Ceelec mele bahic*

<sup>27</sup> Saen Jisas eu odi madi hedocob caja oso dana am eunadec co helimei Jisas madon, “Caja hina basihimei su ihen uqa waug ceelceelen!” don.

<sup>28</sup> Euqa Jisas je jeg hewi madon, “Eu odi qee. Dana Anutna je dah mimeig toodu odogina eu age ceelcelegina!” don.

*Age Jisas kobolkobol odocob foqagannu sisildoin  
(Matju 12.38-42; Mak 8.12)*

<sup>29</sup> Dana cajaca am age Jisas taliddodogin maaden, “Dana sihul i qila bilegina age qisol megina. Age gaga oso fecnu walegina. Euqa age gaga oso qee fowain. Age gaga osol dih foqagan, eu je hahun madec dana, Jona, uqana gaga eu himec foqagan. <sup>30</sup> Ge, wele Jona uqa Niniwa dana agenu gaga calen. Eunu eu odiwe Dana Melah uqa dana sihul qila bilegina agenu gaga caligian. <sup>31</sup> Weleca Kwin sautdec uqa Solomonna cisdoc sileccia je dugen imei hatu onoca bahic cocobi niniji hu je dah men. Ijaqa maadigina, oso eu Solomon wooldoc ene bilia! Eunu Kwin sautdec uqa Gesiladec Benna dana qila iene bilegina eundec gami cajimeig uqa dana i bilegina deweneganu geladec je madigian. <sup>32</sup> Weleca Niniwa dana age Jona me je qasali maadeceb agena silailnu tului falicdoin. Ijaqa maadigina, oso eu Jona wooldoc ene bilia! Eunu Niniwa dana age isi Gesiladec Benna dana sihul qila iene bilegina eundec gami cajimeig age dana i bilegina deweneganu geladec je madoqagan,” aden.

*Dewenegana fulacdoc  
(Matju 5.15; 6.22-23)*

<sup>33</sup> Jisas je haun maaden, “Oso gowoc madacdumei jo bisalu qee mena, odocob hal dunuh qee tacena. Euqa uqa gowoc ohisna caqusena. Eunu dana cunug age hamol hogina eu age gowoc camas foqagan. <sup>34</sup> Dewenna fulacdoc eu hina amen. Hina amen me nijinafi hina dewen cunug fulacdocca nijina. Euqa hina amen galuc mecebfí dewen tu mena. <sup>35</sup> Eunu fulacdoc hina dewenna nijina eu cafuleceb wawin tuca meiaunnu hina batut cofdogale. <sup>36</sup> Hina dewen eu cunug fulacdoc leceb gagatucna qee bielecebfí euna uqana

<sup>†</sup> 11:22: Dana gagadic bahic eu Seten. Uqana wooldoc eu Jisas.

fulacdoc cunug ihoc ligian. Gowoc uqana fulacdoc cudun cunug ihoc lenaweu fulacdoc eu hina dewen cunug odi fulacdonia,” aden.

*Jisas uqa Farisi loo je iwaladecca age me qee odogina ec maaden  
(Matju 23.1-36; Mak 12.38-40; Luk 20.45-47)*

<sup>37</sup> Saen Jisas je maadi hedocob Farisi oso uqaca sab jowasannu cesusdon. Eunu uqa hamol limei sab jigiannu bilen. <sup>38</sup> Saen Jisas eben qee wasacudec sab jejen fimei Farisi uqa tumatumena. <sup>39</sup> Eunu Tibud uqa madon, “Farisi age gabinca bohca hibo eu gaid wasacudegina euqa age wawaga dunuhna heje oc kobilca, qisol mec kobilca nijia. <sup>40</sup> Age gad! Anut uqa dewenega muden uqa wawagaha qee mudelfo? <sup>41</sup> Euqa cel ceteh oso agena gabin bohca dunuh bilia eu sawen adeiga. Odocob agena dewenega ganacca wawagaca cunug eu soidoc biligian,” don.

<sup>42</sup> “O Farisi age agena ceelum filfil cabinadec am 10-pela qatanadimeig am osol eu Anut utegina. Euqa age tutuc odoc dana qee odadegina, odocobha age dana cajaca Anutnu nalug mecna qee nalunuga megina. Loo je i age toodu odoub qa sab Anut utecnu loo je ha qee dahiniga caloub. Eunu age walocca!” don.

<sup>43</sup> “O Farisi age dana ben agena biley cudun Juda agena cuha jona gale ben adena. Odocob ceteteh fajec cudunna age binanaga sulecnu gale ben adena. Eunu age walocca! <sup>44</sup> Age qalqal dana qee feginawe, odocob dana qee docdoc lalan cobogina. Eunu age walocca!” don.

<sup>45</sup> Odocob loo je iwaladec dana oso madon, “Iwalgec, hina je odi madagana eu egenu ha je me qee madagana!” don.

<sup>46</sup> Odocob Jisas jejeg hewi madon, “O loo je iwaladec dana age ceteh culumenca dana gogodomogana megina eu gahidocwe qee qa agedodoc bahic ebenega gic osol hululecdumeig ceteh culumenca eu gahidocnu qee cesuladegina. Eunu ageha walocca! <sup>47</sup> Age Anutna je hahun madec dana age agena sihul weledec dewenega tudocobil cal mein age agena qalqal meen hatin cehegina. Eunu age walocca! <sup>48</sup> Agena sihul weledec age je hahun madec dana aqeceil cal mein, odocob age je hahun madec dana agena qalqal meen hatin cehegina. Eunu agedodoc kobil eu odoginana age qasali madegina, ‘Egena sihul weledec odooin eu cois,’ egina. <sup>49</sup> Je gug eunu Anutna doc maden, ‘Ija je hahun madec dana sos cabi danaca suladigen. Odocob eu age leih aqeceil cal moqagan. Odimeig leih aqati tootooadqagan,’ en. <sup>50</sup> Eunu sao mahaca ifanen saennadec li qila saenna je hahun madec dana cunug age aqeceil cal meinu Anut dana qila bilegina wadacadigian. <sup>51</sup> Ebelna golac basecdoc sanijec euna sanan mamei ehi lili Sekaraiana golac basecdoc ihoc len. Sekaraia uqa age tempel hamol gunna ihanec cabalca gemona qocobil cal men. Ija mele maadigina, aqeceil cal mein eu uqana ameg me qee oc cunug dana caja qila bilegina i dewenegana hugian,” don.

<sup>52</sup> “O loo je iwaladec dana age Anutna culnu doc ocnu jo jic cebec hudecnu ki hehewi hoin. Agedodoc age qee dunuh lelein. Odocob age leih dunuh loqaga odogina eu ageha cahabadegina! Eunu age walocca!” aden.

<sup>53</sup> Saen Jisas cudun eu culden nunuen loo je iwaladec dana Farisica qesaldooin. Odimeig ceteteh geh bahicnu sisildoin. <sup>54</sup> Je oso cakuldu madeceb euna hewoqaga bili temdoin.

## 12

*Uhulec jenu cofdoiga  
(Matju 10.26-27)*

<sup>1</sup> Dana cajaca am mati bahic hu cegulen. Eunu age jaimaga lahacdocobdocobein. Jisas uqana malogom casac maaden, “Age Farisi agena bred gug qoc ibuldocnu jisnu ageca hoiaunnu batut feigale. Farisi agena jis eu agena uhulec je. Age madegina, ‘Kobil i toodoiga,’ egina qa agedodoc qee toodogina eunu ija maadigina. <sup>2</sup> Ceteh cunug jahuldoc nijina eu isi camasac migian. Odocob ceteh cunug jahunec nijina eu isi cunug doqagan. <sup>3</sup> Cel je tuna madein eu cahinegna dah moqagan. Odocob cel je age hamol tuna jahnana maadecebile dah mein eu age jo ohisna tatawi utai maadecebile dana cajaca cunug doqagan,” aden.

*In cucuidocnu  
(Matju 10.28-31)*

<sup>4</sup> Jisas je haun maaden, “Ijana danah, ija maadigina, leih dana dewenega qocobil cal megina, odocob hibna ceteh me qee oso odocwe qee eundecnu cain cucuiuwain. <sup>5</sup> Euqa ija age in cucuidoqagan eu ulauladigen. Anut cucuidoiga. Uqa aqeceb cal mecnu ihoc. Cal

<sup>‡</sup> **11:38:** Juda dana age kobil gun osoca. Saen age sab joqaga bili dewenega cunug wa jogina.

mecebil uqa hibna oloqanh jana heladecnu gagadic odocca nijia. Mele bahic maadigina, uqa cucuidoiga!" aden.

<sup>6</sup> "Man fululec nag eundec 5-pela eu toea lecisna idadogina. Eu agena osolosolnu Anut qee dahig celena. <sup>7</sup> Age gosiniga ilomogana nijia euqa cunug Anut wele sanjen bilia. Eunu cain cucuiuwain. Agena fajec eu man fululec nag mati agena fajec wooldoc nijia," aden.

### *Ija Jisas uqana ec madec*

(*Matju 10.32-33; 12.32; 10.19-20*)

<sup>8</sup> Jisas je haun maaden, "Ija maadigina, oso uqa dana amagana tatawi ijanu madi madena, 'Ija Jisas uqana malogom,' ena eu uqanu Dana Melah Anutna ensel amagana madigian, 'Eu ijana,' igian. <sup>9</sup> Osoqa uqa dana amagana tatawi ijanu qee sasac qu madena, 'Ija Jisas uqana malogom qee,' ena eu uqanu Dana Melahha Anutna ensel amagana madigian, 'Dana i ijana qee,' igian!" aden.

<sup>10</sup> "Oso uqa Dana Melahnu je me qee madena eu Anut uqa dana eu uqana silail casagositugian. Euga oso uqa Kis Gunnu lelan madenafi Anut uqa dana eu uqana silail qee casagisitoiaun," aden.

<sup>11-12</sup> "Saen age ehadi lecebil Juda agena cuha jonafo, hatu kingnafo, loo je cofdoc dananafa ono gesiladoqagannu amagana madecebile Kis Gun saen euna dih je adi madoqagannu iwaladigian. Eunu age casac cel je cel je jejenega hewi maadigen cain jaen aqeaiaun, o je adi madoqagannu cain cisdownain," aden.

### *Dana cehewanca galolo je*

<sup>13</sup> Odocob dana oso am dunuh eunadec madon, "Iwalgec, ija wali madocom ceteteh memile cuculi cal men eu cesawi cedewan," don.

<sup>14</sup> Odocob Jisas jejeg hewi madon, "Coti, in ale gesilalecnu cabi iten? In ceteteh cesawialecnu cabi iten?" don. <sup>15</sup> Odimei uqa cunug odi gabaniadi maaden, "Age batut feiga! Dana osoqa uqa cehewan ben bahiccafi uqa cebac biley bahic eu uqana ceteteh cunugna qee bilina. Eunu ceteteh mati bahic cedecnu cain cisdownain," aden.

<sup>16</sup> Odimei Jisas galolo je i maaden, "Dana cehewanca uqana maha sab masuaden.

<sup>17</sup> Odocob uqadodoc cisdon, 'Ijana sab meadecnu cudunca qee. Ija adi odigen?' cisdon.

<sup>18</sup> Odimei uqa maden, 'Ija odi odigen. Ijana sab tacec jo eu wagaladimig nag meca cehadigen. Euna ijana sab ijana ceteteh cunugca migen. <sup>19</sup> Odimig ijadodocnu madigen, "Ijana jaen qitec qila hedoa! Ijana ceteteh meme cunug cabi gel matinuca. Cebac biley maha ina ilag bahic cain odigaun. Sab jejemina wain jejemina celeboii biliga!" igen,' en.

<sup>20</sup> Euqa Anut madon, 'Hina dana gad! Witic ina dih cebac biley maha inadec culegan. Odocob hina cehewain wele saciadom eu in cedigian?' don," aden.

<sup>21</sup> Odimei Jisas je eu tubdu maaden, "Eu odiwe dana cehewanaga agedodocnu haudogina qa Anut amegna eu age cehewanagaca qee," aden.

### *Jaen qoc kobil*

(*Matju 6.25-34*)

<sup>22</sup> Odimei Jisas uqana malogom maaden, "Eunu ija age maadigina, age mahana cebac biley cain jaen aqeaiaun. Eeta sab jegan cain owain. Age deweneganu ha cain jaen aqeaiaun. Eeta taceqan cain owain. <sup>23</sup> Ge, agena cebac biley eu sab jec wooldona. Odocob dewenega lotocha wooldona. <sup>24</sup> Calog meciadeigale. Age ceteteh qee cehegina. Ageha sab wal meceq qee jajadogina. Age jo bisca qee, age sab haudoc johaca qee. Euqa Anut uqa moot madena! Age agena fajec eu man fululec agena fajec wooldoc bahic bileyqina! <sup>25</sup> Age info uqa uqana cebac biley cain qonana uqa uqana maha biley saen nag cecelacca mudecnu ihoc? <sup>26</sup> Hina ceteh nag eu odi odocwe qeefi eetanu ceteh leihnu ha jaen aqena? <sup>27</sup> Age ceteh sal qoc wasena eu feiga. Age qee cabi ogina, agena lotocha qee mudegin. Euqa ija maadigina, Solomon uqa lotoc tumutumca bahic taci tawen eu sal qoc bahunadec tawena i oso qee wooldol. <sup>28</sup> Euqa Anut uqa ceteh gigisac gami tacec balaca adena, ceteh eu qila tawena uqadec jana helecebil cijina. O age wawaga meleec meca qee, age dogina, Anut uqa age gigisac wooldudu tacecnu adigan. <sup>29</sup> Eunu age eeta sab jegan, eeta gab jegan eu cain cisdownain. Age cain jaen aqeaiaun. <sup>30</sup> Ge, dana cajaca age mahamaha cunugna bileyqina age ceteh eundecnu gaid jaen aqena. Odocob age Memega uqa age ceteh euca qeefi age maha ina bileyce qee eu uqa dona. <sup>31</sup> Euqa age Anut mudecebile uqa agena king bliale. Oodobil ceteh mahanaadec eu toodu ageca hugian," aden.

### *Cehewan saona nijeiga*

(*Matju 6.19-21*)

<sup>32</sup> Jisas je haun maaden, "Dana am tootec nag bahic, age Memega uqa cul adecnu gale dona. Eunu cain cucuiuwain. <sup>33-34</sup> Age toinanaga haudoc nijina eunu age wawaga

cisdocha nijina. Eunu agena ceteteh cunug suldumeig meen qaig eu dana sawen eundec adeigale. Agedodoc agena meen qaig tacec badom qee qee mena eundec oiga. Odimeig age cehewanagaca sao jobonna biluqagannu saciadoiga. Ono cehewanaga eu qee qee meiaun. Ono heje dana oso euna lecwe qee. Susul ha me qee mudecwe qee,” aden.

*Cel cetehe oso ququlubadecdainnu saciadudu bileiga*

<sup>35</sup> Jisas je haun maaden, “Cel cetehe oso ququlubadecdainnu saciadudu bileiga. Agena lotoc taqi cuhadocca gowoc tuldumeig bileiga. <sup>36</sup> Cabi dana agena dana meca ocobocabec deelna sab jecnadec ceseli hohob sumudi biloubwe. Age odi biluqaganfi saen uqa humei jic cebec gohugohudocob age ugana jic cebec mahuc bahic huditoqagan. <sup>37</sup> Cabi dana age agena dana meca ugana ceselec saenna odi saciadu bibilebil uqa age meciadecebfi age bahic eu ceelecca biluqagan! Ija mele maadigina, ugana lotoc taqec halu taqimei maadecab cabalna bileycebil sab adigian. <sup>38</sup> Uqa tu gemofo, nag isicafo ceseli humei eu age saciadocca sumudi bileycebil meciadifei agena ceelec ben bahic nijigian! <sup>39</sup> Euqa cetehe i doiga. Dana jo gug uqa heje dana aadeb hu ijana ceteteh heje ugian eu doialumi [uqa us qee nijoub. Odimeil] uqa heje dana culdocob ugana jo qeih qatanamei dunuh qee loub. <sup>40</sup> Ageha saciadoc susumudi bileigale. Ge, Dana Melah uqa qila hugian qee ec saen euna mele hugian,” aden.

*Cabi dana meca cabi dana me qeeca*

(Matju 24.45-51)

<sup>41</sup> Odocob Pita madon, “O Tibud, hina i galolo je magaganafa, qee dana cunugnu odi maadaganafa?” don.

<sup>42</sup> Odocob Tibud jejeg hewi madon, “Cel cabi dana uqa doc meca ugana cabi cofdu cuhadona? Eu oso uqa ugana meca ugana jo cofdoc mudigian. Uqa cabi dana cunug cofadigian. Agena sab saennana adigian. <sup>43</sup> Cabi dana eu saen ugana meca jobon ceseli humei odi oodob fecidocob uqa ben bahic ceeligion! <sup>44</sup> Ija mele maadigina, ugana meca uqa ugana cetehe cunug cofdugiannu ebenna migian. <sup>45</sup> Euqa cabi dana eu ugadodoc madifei, ‘Ijana meca ugana hocnu deel cecelac nijia,’ ifei cabi dana cajaca hijagul eu uqa aqecnu sanan mimei sab jiji wain jiji dalul aqeceb cocobil <sup>46</sup> meca eu hibna deel osona hugian. Eu saen cabi dana uqa hugian eu qee dodecob saen euna hugian ec qee doc ninijeb hugian. Ugana meca eu odi fifei qetii susul falecnu ihoc bahic. Odimei cudun dana Anutnu wawaga qee meleec bileygina cabi dana euna mudigian,” don.

<sup>47</sup> “Cabi dana ugana meca cel cabi ocnu uten eu uqa dona eu qee saciadumei ugana meca madon odi qee odel uqa eu geh bahic qisadugian. <sup>48</sup> Euqa cabi dana uqa ugana meca cel cabi ocnu uten eu qee dona qa uqa qisadocnu cahuldoc oso odocobfi uqa nag odi dih qisadugian. Dana oso Anut uqa cetehe geh utina Anut uqa madugian, ‘Ceteh gehca ceseli itiga,’ dugian. Dana oso cetehe geh bahic utegina age uqa madoqagan, ‘Ceteh gehca ceseli igiga,’ doqagan,” don.

*Jisas uqa dana cajaca cesawadigian*

(Matju 10.34-36)

<sup>49</sup> Jisas je haun maaden, “Ija mahana ja hudecemin ciji olic danigiannu hom. Ija wawi madec nijina odi mahuc bahic wele hudia! <sup>50</sup> Ija dain tec ben oso umig cal migen. Eu wa joitec oso ugen cinigwe. Ija jaen qiqiteb saen hedugian! <sup>51</sup> Age ija mahana malol biley igeclu horn ec cisdoginafo! Cain odi cisdowan. Ija malol biley mahana ahu mecu qee holom qa ija maadigina, age am osol biley eu filfil qatanadigennu hom. <sup>52</sup> Qila odi sanan mena. Sihul osolna age 5-pela filigandoqagan. Cijed age lecis gami cadoqagan. Lecis ale cijed gami cadowasan. <sup>53</sup> Age qatanadec biluqagan. Memegail age melemegail gami cadoqagan, odocob melemegail age memegail gami cadoqagan. Anagail age atagail gami cadoqagan, odocob atagail age anagail gami cadoqagan. Momogail age atagail gami cadoqagan, odocob atagail age momogail gami cadoqagan,” aden.

*Ceteteh hibna caligian saen eu docnun*

(Matju 16.2-3)

<sup>54</sup> Odocob Jisas dana cajaca am je oso ha maaden, “Saen age taen cam tonec isec beben fefeig mahuc bahic madegina, ‘Wa hugian,’ egina. Odocob mele bahic wa hona. <sup>55</sup> Odocob saen fufu sautdec qaheceb age madegina, ‘Cudun dain cahuligian,’ egina. Odocob eu mele bahic odi odona. <sup>56</sup> Age me hihili coboc dana! Age maha saoca ugana odoc fimeig eu cel gugnu eu dogina. Euqa saen qila biluqa eu eetanu age gug qee dogina?” aden.

*Oso hina dewennu je madena eu ugaca je tutuc mudesiale*

(Matju 5.25-26)

<sup>57</sup> Jisas je haun maaden, "Age agedodoc eetanu ceteh ititom odocnu eu qee gesilegina? <sup>58</sup> Dana oso hina dewennu um qocobfi hinana cad gesilec dana euna ehihi nunueb uqa gesilec dana amegna mihiavnun, odocob gesilec dana uqa gesilec jona cofadec dana ebenna miheceb cofadec uqa gihacdoc jona mihiavnun eunu hina gesilec jona nunuesi dana euca je eu tutuc mudesiale. <sup>59</sup> Ija mahigina, hina ameg qaig ihoc lec qee helecemfi qee bahic besihuwanin," aden.

## 13

### *Age agena silailnu qee tului falicdufeig age cal moqagan*

<sup>1</sup> Saen euna dana ono bilein age Galili dana age dool ihandodogin Pailat uqa ugana han dana maadeceb aqeceil age cal mein. Age golanagan ihandoc dool golaccia ihuldosin eunu Jisas madoin. <sup>2</sup> Odocob Jisas jejenega hewi maaden, "Galili dana eu odina cal meinu agena cisdock eu Galili dana eu age agena silail eu Galili dana cunug wooladec eginaflo? <sup>3</sup> Qee bahic! Ijaqa maadigina, age agena silailnu qee tului falicdufeig age cunug ageha odiwe fadalooqagan. <sup>4</sup> Qeefi, dana 18 cunugca Siloam jo cecelac ohisdec toni cilehadeceb cal mein eu adi? Age cisdogina, eu agena silail Jerusalem dana cunug wooladec eginaflo? <sup>5</sup> Qee bahic! Ijaqa maadigina, agena silailnu qee tului falicdufeig age cunug ageha odiwe fadalooqagan," aden.

### *Na dan aigca qee eunu galolo je*

<sup>6</sup> Odocob Jisas galolo je i maaden, "Dana oso ugana wain cabina na dan cehen. Odocob hibna uqa dan eu limei aig cedecnu fen qa osol oso qee fel. <sup>7</sup> Eunu ugana cabi dana madon, 'Faga, cabi gel cijed cunugca ija ene humig dan euna dan aig cedigennu waladem qa oso qee felem. Eetanu odi tatawi maha gauc ji hedona? Codoga nua!' don. <sup>8</sup> Euqa cabi dana jejeg hewi madon, 'O Meca, culuga taweia. Cabi gel osol himec ija maha huni talдумig bulmakau ugana bujec gugna tacecemin cali bigian. <sup>9</sup> Odocob dan eu aig gisecebfai cabi gel oso euna eu me bahic. Qeefi, cois codogon,' don," aden.

### *Jisas caja oso buga me qeeca me muden*

<sup>10</sup> Juda agena cuha deel osona Jisas uqa Juda agena cuha jona iwalaadien <sup>11</sup> caja oso ono bilen. Buga me qee hacga eu hewuden. Uqa gaid odudeceb cabi gel 18 hag euca cobon. Uqa hoh qahen eu haun tutuc mewc qee. <sup>12</sup> Odocob Jisas caja eu fimei utadocob hocob madon, "Caja, hinana hag ija besihiginal!" don. <sup>13</sup> Odimei uqa eben deweg qududocob mahuc bahic uqa hoh eu tutuc mceeb Anut binan ben sulen.

<sup>14</sup> Odocob cuha jo eu ugana cabi dana ilo cuha deelna Jisas hag me mudeceb gemag bennu uqa madimei dana am maaden, "Egena cabi oc deel eu 6-pela. Eunu deel euna hocobil agena hag me madena eu cois. Euqa cuha deelna cain!" aden.

<sup>15</sup> Odocob Tibud uqa jejeg hewi madon, "Age me hihili coboc dana! Age eundec oso ugana bulmakafo, ceselfo cufaldumei sal jecnu boh cudunnadec cuha deelna iwaldudu ehi nueceb wa qee jenafo? <sup>16</sup> Qila caja i Ebrahamna sihulnadec oso uqa Setenna buga me qee ugaca cabi gel 18 jelec bilen. Uqa Setenna buga me qeenadec cuha deelna ugana jelec qee cufaldugaunfo?" don. <sup>17</sup> Odocob uqa jejenega hewebeb ugana cad eundec age odadeceb cunugca agedodoc majanaga aden. Oodon dana cajaca age cunug Jisas ceteteh gagadic odocca cunug odonnu wawaga ceelen bilein.

### *Mastet aignu galolo je*

(Matju 13.31-32; Mak 4.30-32)

<sup>18</sup> Odocob Jisas maaden, "Anutna cul eu adep? Cel ceteh eu ale caca ec madigen? <sup>19</sup> Eu mastet aig cinigwe eu dana oso umei ugana cabina cehen. Mastet eu wasi ben mimei na ben ibuldon. Odocob man fululec age humeig batacnana agena teic mein," aden.

### *Jisnu galolo je*

(Matju 13.33)

<sup>20</sup> Odocob Jisas haun maaden, "Cel ceteh eu Anutna cul euca caca ec madigen? <sup>21</sup> Eu jis cinigwe caja oso umei plaua dram benna euca gabandumei ibuldocob ugadodoc cunug iben," aden.

### *Jic cebec sosog*

(Matju 7.13-14, 21-23)

<sup>22</sup> Odocob Jisas taun nagnana jobonnana iwalaadi nui Jerusalem caligliannu nuen. <sup>23</sup> Odocob dana oso sisildon, "O Tibud, dana Anut caahahaadigian eu osooso himecfo?" don.

Odocob Jisas jejeg hewi maaden, <sup>24</sup> "Ija maadigina, dana cajaca geh bahic jic cebec sosogna lecnu temdoqagan qa ihoc qee lowain. Eunu age jic cebec sosogna lecnu gagadic

meigale. <sup>25</sup> Dana jo gug eu cajimej jic cebec menigian. Odimeig maha gemo tataweig jic cebec gohugohududu madoqagan, ‘O Tibud, hu ege jic cebec hudigaga!’ oqagan. Odocob uqa jejenega hewi maadigian, ‘Ija age anadec eu qee dugina,’ adigian. <sup>26</sup> Odocob age jejeg hewi madoqagan, ‘Ege hinaca osoben sabca wa gabca jom. Hina eguna jobon ono iwalgem!’ oqagan. <sup>27</sup> Odocob uqa haun maadigian, ‘Ija age anadec eu qee dugina! Age silail dana! Ija cuculti qisacteiga!’ adigian. <sup>28</sup> Ono age Ebrahim, Aisak, Jekobca age je hahun madec dana age cunugca Anutna culna bibilebil meciadoqagan. Meciaadebil Anut age ititacadecel beloqagan saen euna age qada qajec bencra maimaga kicodudu biluqagan. <sup>29</sup> Dana age cam tobi becnadecca, cam toni nocnadecca, notdecca, sautdecca, hatuhatu cunugnadech humeig Anutna culna sab jecnu cabalna biluqagan. <sup>30</sup> Odocob feiga, leih qila hib bahic taweiga eundec age isi aquni tawoqagan. Odocob leih qila aquni taweiga eundec age isi hib bahic tawoqagan,” aden.

*Jisas uqa Jerusalemnu walol don  
(Matju 23.37-39)*

<sup>31</sup> Saen euna dih Farisi leih Jisasca limeig madoin, “Herod qagahigia madeia. Eunu hina enedec isa qoga. Cudun osona nuuga,” doin.

<sup>32</sup> Odocob Jisas jejenega hewi maaden, “Nui faninadec dana eu madoiga, ‘Ija qila uquadecca buga me qee dana deweneganadec ititacaadig dana caja hagca me madigen. Odocob deel cijeddocna ijana cabi oc qee migian,’ doiga. <sup>33</sup> Euga je hahun madec dana eu cudun ilagnana qee aqowain, eu Jerusalem ono himec aqecebil cal megina eu odi nijia. Eunu qila uquadec eledecca eu ijana jic coboc eu cobigen,” aden.

<sup>34</sup> “O Jerusalem, Jerusalem, Anut uqa uqana je hahun madec dana ageca suladeceblein. Euga age meennaa aqecebil cal mein. Ija saen mati bahic agena dana cajaca gabanimig ahutecnu gale tena eu odiwe mala anag uqana nag hojonna jahuladigen imei utaadena, euqa age ijaca hocnu culein. <sup>35</sup> Feiga, Anut uqa agena jobon culdina. Ija maadigina, age ija qila haun qee mecituwain leceb madoqagan:

‘Dana eu uqa Tibud ijanna hona Anut uqa eeldoiale,’  
odi madimeig mecituqagan,” aden.

*(Buk Song 118.26)*

## 14

*Jisas dana oso uqa eben jaihca gomahin taec eu me muden*

<sup>1</sup> Juda agena cuha deel osona Jisas Farisi agena iwaladecna jona wesu sab jigiannu len. Odocob dana ono bilein age Jisas cofcofdoin. <sup>2</sup> Odocob dana oso jaih ebenga gomahin taec ono bilen. <sup>3</sup> Odocob Jisas loo je iwaladec dana Farisica sisiladen, “Egena loo je cuha deelna dana hagca me madecnu cois ec nijiafo, qeefo?” aden.

<sup>4</sup> Odocob age jejeg oso qee hewelein. Jisas dana eu ehudimei hag qee muditumei suldocob nuen. <sup>5</sup> Odimei uqa maaden, “Age dana oso uqa melahfo,\* uqana bulmakaufu eu wa helona dunuh toneceb cuha deel i edina mahuc bahic helonadec didocobil qee cali beiaunfo?” aden.

<sup>6</sup> Odocob age sisilec uqana eu jejeg wadacdocnu ihoc qee.

*Dana oso ija didih qee ena*

<sup>7</sup> Odocob Jisas uqa dana age maadeceb hoin leih agena gawecna bileyk cudun binanca nesili cecedegin meciaden eunu uqa galolo je i maaden, <sup>8-11</sup> “Oso uqa culai ijanel lalan mumudi bilina eu Anut uqa dana eu cilehdugian. Oso uqadodoc jogoi waug lal qocca bilina eu Anut uqa dana eu cilaug u lalan mumudebil biligian. Eunu saen oso ocoacobec deelna sab cicileig maheceb lifeg dana oso uqa ijanca ben hina woolhec uqa ha saen euna madocob leiaundainnu, odocob alena jec sab cofdoc ale leciscia odi howasannu maalen humei maheiaun, ‘Cudun i culticom hu bilia,’ heiaunnu, odocob hina majain heheb cudun mahana bahic euna biledaunu hina cudun binanca euna cain biligaun. Eu odinu hina je sulduhecebifli limeg cudun mahana bahic umeg biliga. Eunu dana uqa maheceb hom eu limei mahigian, ‘Tjana danah, cudun binanca ina tobi biliga!’ higian. Eu odina hina ijain dana cunug amagana me bahic organ,” aden.

*Dana age sab jecnu utaader uqana kobol*

<sup>12</sup> Odocob Jisas uqa Farisi dana madocob hon eu madon, “Saen hina cahineg sabfo, wesu sab benfo jejeg hinana danah cain cedi ahogaun. Hina walinelfo, hinana sihul eundecfo, hina mudubainel bilingina cehewanagacafu ha Cain cedi ahogaun. Eu age haun je sulduhecebifli jecnu legan jic eu odina hina cel odadecem eu wadacdoc ameg organ.

<sup>13</sup> Eu odi Cain. Saen hina sab ben cicileg dana sawenca, jaimaga cogogecca, laleg mecca,

\* **14:5:** Grik jaqec je hilah leihna age “melahfo” ec qee jaqelein, uqana age je fil jaqein eu odi: “uqana ceselfo”

odocob amaga galuc mecca cedi ahoga.<sup>14</sup> Eu age hina ameg wadacduhecwe qee. Eunu hina eelhec organ. Odocob saen dana ititom cal mecnadec ceseli cacajebil hina Anut ameg ihigian,” don.

*Ja bennu galolo je*  
(*Matju 22.1-10*)

<sup>15</sup> Odocob dana oso sab jec cudunna Jisasca biblesin je eu dah mimei Jisas madon, “Dana Anutna culna sab jec cudunna biluqagan age ceeli biluqagan!” don.

<sup>16</sup> Odocob Jisas madon, “Dana ben oso uqa sab ben cilgia bili dana geh bahic hoqagannu je suldu maaden.<sup>17</sup> Sab ben cilec deelna ugana cabi dana eu uqa ehadigia bili suldochob nui maaden, ‘Sab jec cunug saciadoc taweria. Hoigale!’ aden.<sup>18</sup> Euqa age cunug lecnu culimeig cagasec je madoin. Oso uqa cabi dana eu ninidudu madon, ‘Ija cabi ben oso fajiga eu nuimig figen. Ija lecwe qee,’ don.<sup>19</sup> Oso ninidudu madon, ‘Ija bulmakau 10-pela cabi cesultecnu fajadiga eu ija nuimig temadigen. Ija lecwe qee,’ don.<sup>20</sup> Oso ha madon, ‘Ija cum bahic caja ugan. Ija lecwe qee,’ don.<sup>21</sup> Odocob cabi dana eu ceseli nuimei ugana meca je cunug sadon. Odocob ugana meca je eu odi dah mimei gemag ben bahic ben. Odocob uqa cabi dana madon, ‘Mâhuc bahic nuimeg jic anagnanaca, jic nagnanaca, taun bennaca age dana sawerca, jaimaga cogogeca, laleg mecca, amaga galuc mecca ehadi cedi ahoga,’ don.<sup>22</sup> Uqa nueceb nag odi susumuden cabi dana ceseli humei madon, ‘O Meca, hinana je eu cunug tooduga euqa dana haunnu cudun nijia,’ don.<sup>23-24</sup> Eunu meca ugana cabi dana madon, ‘Ija maadigina, dana cunug ija hoqagannu maadem age ijana sab nag qee qududu fowain! Eunu ijana jo ihoc ligiannu jic benna, jic sosogna, bahuna nuimeg dana cajaca hoqagannu cesusadoga,’ don,” don.

*Age Jisas toodocnu madifeig casac cisdu cuhadoiga*  
(*Matju 10.37-38*)

<sup>25</sup> Dana cajaca am matica age Jisas gami belein. Odocob uqa waldumei maaden,<sup>26-32</sup> “Age oso uqa jo ben cecelac odocob ohis bahic cehigiannu cisdonafi uqa casac bilimei ceteteh qaigna fajadigiannu qaig hahun odi bahic ec temdu fena. Eu odi eu uqa jo eu qee mudigliannu meen qaig ihofco? eu cisdu figian. Gadgad uqa eu odica qeefi uqa jo ben ohis bahic eu sanan mimei hibna qee muddec ihoc qee. Odocob leih age eu fimeig uqa lelandowaindain. ‘Dana i jo cehec sanan men qa qee muddecwe qee!’ odi madoqagan. Qeefi, king oso ugana han dana 10,000ca king osoca cadowasa lifei ge king eu uqa han dana 20,000ca ugaca hoqagan eu uqa casac bilimei uqa cadigiannu gagadic odoc ihofco? ec cisdugian. Uqa ihoc qeefi ugana dana sos suladeceb belimeig king oso eu ceguldumeig saen uqa jic onoca bibileb malol bilecnu cahadoc je madoqagan. Eunu oso uqa ija tootecnu ijaca honafiqi uqa anag memegca, uqa aideg, melahul, waliagul, cebinagulca, odocob ugadodoc cebac bielec euca qee sagagadena eu uqa ijana malogom bielecwe qee. Odocob oso uqanagul na babalec gahidu ija tooti cobocnu culinafi eu uqa ijana malogom bielecwe qee,” aden.<sup>† 33</sup> Odimei Jisas cit qu maaden, “Jic eu odi nijia eunu age cunug agena ceteteh cunug qee hibemdufeig age ijana malogom bielecwe qee,” aden.

*Macas eu tebandocwe qee*  
(*Matju 5.13; Mak 9.50*)

<sup>34</sup> Jisas je haun maaden, “Macas eu me bahic qa ugana tin tebandoc eu qee mecebfí age adi ugana tin tebandoc weledec eu haun muduqagan?<sup>35</sup> Eu mahaca, dool bujec euca gabandumeig cabina mecnu ihoc qee. Eu helecebil nuina. Oso dahigca uqa je i dah meiale,” aden.

## 15

*Sipsip jahunec galolo je*  
(*Matju 18.12-14*)

<sup>1</sup> Saen osona takis cedec dana silail danaca Jisas dah muduqaga bili geh bahic cegulimeig Jisas talildoin. <sup>2</sup> Odocob Farisica loo je iwaladec danaca age galac mumudi madein, “Dana i silail dana maadeceb hocobil uqa gami ha sab jeginal” ein.

<sup>3</sup> Eunu Jisas uqa galolo je i maaden,<sup>4</sup> “Age dana oso ugana sipsip 100 cobogina eundec osol jahunigan uqa adi odigian? Uqa sipsip 99 eu maha wadauna culadeceb tatawebil jahunen eu waligian. Uqa wawali li gulucdugian.<sup>5</sup> Uqa gulucdumei uqa ceelec ben bahiccanu qatona migian.<sup>6</sup> Odimei gahidu jobon ehi nuigian. Odimei uqa ugana danahdanahca, uqa utuqanel bileyina euca age maadeceb ceguleceb il maadigian, ‘Tjana sipsip jahunen ija gulucduga celebo bahic iginia. Eunu ege celeboii sab nag odi cilecnu!’

† 14:26-32: Age je Matju 10.38na nijia eu feiga.

adigian. <sup>7</sup> Ija maadigina, eu odiwe, sao jobonna ono silail dana osol uqa silailnu tului falicdona eunu age celeboooqagan. Odocob agena celeboec eu 99 age ititom ihoc age silailnadec haun falicdocnu qee nijelnu celeboec wooldugian,” aden.

*Meen qaig oso jahunec galolo je*

<sup>8</sup> Jisas je haun maaden, “Odi ha caja oso uqa meen qaig silwana mudec 10-pela hewena qa osol jahunifei uqa adi odigian? Uqa gowoc madacdumei bahim cabal sigeldumei odocob mecihi cuhadudu cudun cunugna mecihi fifi li gulucdugian. <sup>9</sup> Saen uqa gulucdumei uqana danahdanahca, uqa utuqanel bilegina euca maadeceb cegulecebil maadigian, ‘Ija meen qaig jahunen haun gulucduga ceelingina. Eunu ceelii sab nag odi cilecnu!’ adigian. <sup>10</sup> Ija maadigina, eu odiwe Anutna ensel age silail dana osol uqana silailnu tului falicdonanu agena ceelec ben calena,” aden.

*Dana melah oso jahunec galolo je*

<sup>11</sup> Jisas mamadi maaden, “Dana oso biloloi. Uqa melahul lecisca. <sup>12</sup> Milum uqa cajimei memeg madon, ‘O Mei, qila hina cehewain naha cesawitaga ijana itiga,’ don. Eunu dana eu cehewan melahul lecisca odi cesawialen. <sup>13</sup> Hibna deel leih hedocob melah milum eu uqa cehewan naha sulddozi meen qaig umei jobon cuculi nuen. Odocob uqa hatu onoca bahic nuen. Ono uqa wal kobil mati odon. Euna uqa meen qaig uqana biley me qeena cunug qee muden. <sup>14</sup> Uqana meen qaig cunug qee muden. Odon hatu eu sabnu cahel ben qoc sanan men. Odocob uqa cetetehca qee bahic bilen. <sup>15</sup> Eunu uqa li hatu eunadec dana osona cabi on. Suldocab nui uqana ho cofadolai. <sup>16</sup> Uqa ho agena sab macin ganac eu jigianmu waug ben bahic nijoloi qa sab jecnu oso qee utoloi. <sup>17</sup> Odocob hibna uqa cahuldoc odon ec fogo docob maden, ‘Ija meina cabi dana agena sab ji hedocwe qee. Odocob ene ija wennu cal migen odigina! <sup>18</sup> Ija caji nuimig mei madugen, “O Mei, ija Anut hinaca amalana silail mem. <sup>19</sup> Ija hina melem eu odi bileyce qee. Eunu cois hinana cabi dana odi cabi ugen,” dugen, <sup>20</sup> Eunu uqa cajimei memegca ceseli nuen,” aden.

“Odocob uqa onoca hohon memeg fen. Fimei uqa waug qocob ceelen. Odimei uqa gudugudui nui melah colowandumei cordon. <sup>21</sup> Odocob melah madon, ‘O Mei, ija hina amegnaca silail mem. Ija hina melem eu odi bileyce ihoc qee,’ don.\* <sup>22-24</sup> Euqa memeg uqana cabi dana utaaideceb hoin. Odi maaden, ‘Ija melami i cal menwe qa qila haun cebac bilia. Uqa jahunen qa qila haun gulucdoqa! Eunu mahuc bahic, lotoc me bahic oso u ahumeig tacitoiga. Sai ebenna mimeig jaih tacec u ahumeig qagadoiga. Odocob ege feele ec sab cili jimeb celeboogale!’ aden. Eunu age sab ben bahic cicileig celeboecnu sanan mein,” aden.

<sup>25</sup> “Saen euna age odi oodogin melah matu uqa cabina bilen. Odimei uqa cabinadec cecesadi jic sahu jo cemenuh huhu ududu duduegin dah men. <sup>26</sup> Odimei uqa cabi dana oso utadocab hocob sisildon, ‘Eu cel odogina?’ don. <sup>27</sup> Odocob cabi dana jejeg hewi madon, ‘Hina walin haun jobon ceseli hoia. Odocob hina memen uqa melah me bahic uqaca hu caleia eunu bulmakau nag lalo cacawacca taweia eu qagadoia,’ don. <sup>28</sup> Odocob waliag matu eu gemag gagadic beceb jo hamol lecnu qee gale dol. Eunu memeg jonadec humei melah dunuh ligiannu ninidon. <sup>29</sup> Euqa uqa memeg madon, ‘Faga, cabi gel i cunugca ija hinanu cabi uu begabeg meh cinigwe hom. Odocob ija hinana je qee felaculdolig. Hina cel oso item? Mecmec osoha cilecnu qee itecem sab ijana danah gami celeboelem! <sup>30</sup> Euqa hina melem i hinana meen qaig cunug wal caja fajadecna cusdon. Odocob saen uqa ceseli hocob hina bulmakau nag lalo cacawacca eu qagadumeg cilitoga!’ don. <sup>31</sup> Odocob memeg jejeg hewi madon, ‘Melami, hina saen cunug ijaca biluwuna. Odocob ceteteh cunug ijana eu hinana. <sup>32</sup> Euqa hina walin eu cal menwe qa qila uqa cebac bilia. Uqa jahunen qa qila uqa haun gulucduga. Eunu ege sab cilimeb celeboogona eu tutuc,’ don,” aden.

## 16

*Dana cabi cofdoc docnu galolo je*

<sup>1</sup> Odocob Jisas uqana malogom maaden, “Dana cehewanca uqa cehewan cofdocnu dana osoca. Odocob age dana cehewanca madoin, ‘Hinana cofdoc dana uqa hina cehewain cusdonia,’ doin. <sup>2</sup> Odocob uqa utadocab leceb madon, ‘Eu cel je ija hinanu dah migi? Hina ija cehewani cofdoc dana haun qee biligaun. Eunu hina ija cehewani adi cofdogona eu jaqimeg itiga,’ don. <sup>3</sup> Odocob cabi dana eu uquadocnu maden, ‘Ijana meca ijana cabinadec qee mitigian. Ija eeta odigen? Ija maha hunecnu cabi ocnu gagadic odocca qee. Odocob ija dana ceteh iteiga ec niniadecnu majanica. <sup>4</sup> Ija eeta odigen eu qila

\* **15:21:** Grik jaqec je hilah leihna age je oso tubdu jaqein eu odi: “Hinana cabi dana odiwe mataga,” don.

dugina! Ija ijadodocnu danah madigen. Eunu ijana meca ijana cabinadec qee mitigian saen euna ija ijana danah age agena jobonna ehitil loqagan,” en.<sup>5</sup> Eunu uqa dana cunug dana cehewanca euna ceteteh suldogina uqanu wadacdutocnu bilingina eu age maadeceb cegulein. Odocob uqa dana oso sisildon, ‘Hina ganic bahic ijana meca wadacdok utugan?’ don.<sup>6</sup> Odocob uqa jejeg hewi madon, ‘Mool dram 100 gadac,’ don. Odocob cehewan cofdoc dana eu uqa madon, ‘Hinana meen qaig hahun ihec. Bilimeg mahuc 50 jaqaga,’ don.<sup>7</sup> Odocob uqa haun oso sisildon, ‘Odocob hina ganic wadacdok utugan?’ don. Odocob uqa jejeg hewi madon, ‘Wit bek 100 gadac,’ don. Odocob cabi cofdoc dana madon, ‘Hinana meen qaig hahun ihec. Euna 80 jaqaga,’ don.<sup>8</sup> Dana maha inadec age agedodocnu cabi ocobocobecnu du cuhadogina qa dana fulacdonaed age agedodocnu cabi maha inadec odocnu qee du cuhadogina. Hibna dana cehewanca uqa uqana cabi dana odi odonnu don. Eunu uqa binan sulen,” aden.

<sup>9</sup> Odimej Jisas madimej maaden, “Odocob ija maadigina, agedodocnu maha ina cehewan me qee euna danah meiga. Eunu cehewan hewecnu saen eu qee meceb age ehadecebile age bileyeb catanec jobon euna loqagan.”<sup>10</sup> Oso uqa cehewan nagnag cofdu cuhadona uqa cehewan benben ha cofdu cuhadugian. Odocob oso uqa cehewan nagnag uhuli cofdona uqa cehewan benben ha uhuli cofdugian.<sup>11</sup> Age maha ina cehewanaga me qee eu qee cofdu cuhadufieg age cehewanaga mele bahic eu adi cofdoqagan?<sup>12</sup> Odocob age oso cehewan qee cofdu cuhadocbilfi in uqa age cehewanaga eu adigian?” aden.

<sup>13</sup> “Cabi dana oso uqa dana ben lecis alena cabi ocwe qee. Ge, uqa oso sagagduduqa osoru nalug migian. Qeefi, uqa osoru waug nijigian qa oso cewudigian. Odiwe ha age Anutca maha cehewanca alena tibud mumudi osoben cabi u calecnu qee nijel,” aden.

#### *Loo jeca Anutna culnu mадec*

<sup>14</sup> Odocob Farisi age meen qaig gale ben aden eu age Jisasna je eu cunug dah mein. Odocob age Jisasnu udoc je madein.<sup>15</sup> Odocob Jisas maaden, “Dana ceteh binanca ec cisdogina qa Anut uqa fena eu ceteh bebesacca. Eunu agedodoc age dana amagana mediadeginia eu age ititon ec egina qa Anut age wawagana cisdogina eu uqa dona,” aden.

<sup>16</sup> “Mosesna loo jeca, je hahun madec dana agena jaqec jeca bibili hu Wa Joadec Jon uqana saenna Anutna je himec bilen. Eunadec sanan men eu Anutna culnu me je sildiadecnu cali hon. Odocob dana cajaca cunug age euna sundu lecnu odogina.<sup>17</sup> Sao mahaca eu qee mecnu ihoc nijina, euqa loo je jaqec je nag bahic eu oso qee mecnu ihoc qee nijina,” aden.

#### *Ocobocob cagoc kobil*

(Matju 5.31-32; Mak 10.11-12)

<sup>18</sup> Jisas je haun maaden, “Dana oso uqa aideg culdi caja haun oso ona eu dana caja sisi jelec wagalimei uqa aideg wal kobil odudina. Odocob dana oso uqa caja oso gemug culden ona uqaha dana caja sisi jelec wagalimei wal kobil odona,” aden.

#### *Lasaras dana cehewanca*

<sup>19</sup> Jisas je haun maaden, “Dana oso uqa cehewan gehca biloloi. Uqa lotoc meen qaig benbennadec himec tacoloi. Lotoc eu golca sosologca. Odocob uqa deel cunug uqana bileyec eu me bahic. Sab me bahic joloi.<sup>20</sup> Saen euna sawen dana oso, uqa ijan Lasaras, ha biloloi. Uqa isoh deweg ganacna cunug ihoc len. Uqana sawen danah age ehudi dana cehewanca euna gel cebecna ahocabil biloloi.<sup>21</sup> Sab susul dana cehewanca eu jiji culeceb jec cabalna tonoloi eu jigiannu ehudi ehitocnu cisadoloi. Odocob qa ageha humeig isoh beluhdoloig.<sup>22</sup> Odocob hibna sawen dana eu cal meceb ensel gahidu ehi li Ebrahim cemenugna mudein. Odocob dana cehewanca euha cal meceb heel cisein.<sup>23</sup> Uqa deweg dain tebandudu oloqanihna bilen. Odocob uqa mecieceb ti Ebrahim onoca bibilen fen eu Lasaras cemenugna bilen.<sup>24</sup> Eunu uqa utai madon, ‘O Mei, Ebrahim! Ija ja ben inu gisi cagugina! Ijanu waloc heceb Lasaras suldocom ni wa eben mamogna tanumei beilami qududocob daeia,’ don.<sup>25</sup> Euqa Ebrahim madon, ‘Melami, cisdogia, hinana cebac bileyec saenna hina ceteteh meme cunug cedem. Odocob Lasaras ceteteh me qee ceden qa qila uqa ene ceelii bilia. Odon hina ono gisi cacagu biliga.<sup>26</sup> Odocob leih age enedec ono hinaca egeca leti loqaganfi ihoc qee o leih age onodec ene leti hoqaganfi ageha ihoc qee, eunu maha heel dunuh bagalanca bahic gemo nijia,’ don.<sup>27-28</sup> Odocob dana cehewanca madon, ‘O Mei, ono ija waliel 5-pela bileiga. Lasaras culdecem uqa nuimei ulauladec je ija odom eunu maadigian. Eunu ija ninihigina, ageha cudun dewenega dain tebandocna ene cain howainnu Lasaras suldocom ija meina jona leiale,’ don.<sup>29</sup> Odocob Ebrahim madon,

\* **16:9:** Je i uqana gug eu camasac bahic qee. Doc dana leih age danah eu sawen dana cajaca ec cisdogina. Eunu age sawen dana cajaca cesuladecebile age hibna ehadecebile age bileyeb catanec jobon euna loqagan eunu ceeloqagan.

'Hina walinel age Mosesna loo jeca, je hahun madec dana agena jaqec jeca ulauladec jenu eu bilia. Hina walinel culadecem age eu dah moqagan,' don.<sup>30</sup> Odocob dana cehewanca jejeg hewi madon, 'O Mei Ebrahim, eu himec ihoc qee! Euqa oso uqa cal mecnadec ceseli cajimei eu ageca lifei wawaga meleigian. Odocob agena silailnu tului falicdqagan,' don.<sup>31</sup> Euqa Ebrahim madon, 'Age Mosesna loo jeca, je hahun madec dana agena jaqec jeca maadecebifli wawaga qee meleel. Eunu dana oso cal mecnadec ceseli cajime li maadecebifli ha wawaga qee meleeliaun,' don," aden.

## 17

### *Silail*

(*Matju 18.6-7; Mak 9.42*)

<sup>1</sup> Odocob Jisas uqa ugana malogom maaden, "Ceteteh dana odadecebifli silail megina eu gaid hogina qa dana eu uqa odadeceb age silail meginanu uqa walocca biligian! <sup>2</sup> Uqa mel sim i eundec oso odudeceb silail migiaqa eu meen culumenca bena qagi macas ameg nijia una age helecebifli wa jimei cal moubmi eu me odoub. <sup>3</sup> Agedodocnu cofdoigal!" aden.

"Hina cotin silail mecebifli cahacdu madoga. Odocob ugana silailnu tului falicdocabifli ugana odoc eunu dahin celeia. <sup>4</sup> Uqa hinanu silail mi 7-peladumei deel osolna odocab eu saen cunug odi odona hinaca humei mahifei, 'Ija ijana silailnu tului falicduga,' hifei hinaha eunu cunug dahin celeia," aden.

### *Dana waug meleec*

<sup>5</sup> Odocob aposel age Tibud madoin, "Ege cesulgecem eguna wawige meleec meca mi dugian," doin.

<sup>6</sup> Odocob Tibud uqa jejenega hewi maaden, "Age wawaga meleec ugana meca eu aig mastet cinigwefi na sikamoia i madoubmiqa, 'Hinadodoc cacalimeg bebeig cunugca nui macasna limeg cehalag!' doumbiqiqa odocob uqa conoga toodu odoub," aden.

### *Cabi banana cabi duman*

<sup>7</sup> Jisas je haun maaden, "Age oso ugana cabi dana madocob uqa maha ulam onafo, qee madocob sipsip cofadena eu saen uqa cabi cudunnadec ceseli hocob age madoginafo? 'Mahuc li sab jaga,' doginafo? <sup>8</sup> Qee bahic! Euqa age madogina, 'Ija wesu sab jec sciadutaga. Odimeg sab cewel ocnu lotoc tacimeng sab qaditecem ija sab wa gabca ji hedocomin hina jegan,' dogina. <sup>9</sup> Cabi dana uqa je toodu cabi onanu hetaga doc madoginafo? Qeo! Qee madogina. <sup>10</sup> Ageha eu odi himec. Saen age ceteh odoqaganu maadecebifli je toodu odimeig madeiga, 'Ege cabi dana ameg me ocnu ihoc qee nijel. Ege eguna cabi mugumige mec himec odom,' eiga," aden.

### *Jisas dana 10-pela lepraca me maden*

<sup>11</sup> Odocob Jisas ugana jic qaqqahi Jerusalem nunui uqa Sameria hatuca, Galili hatuca gemogemo nuen. <sup>12</sup> Odi nuimei uqa jobon gemo lili cobocob dana 10-pela lepra hagca gulucdoin. Age nag onoca tawein. <sup>13</sup> Tataweig utai madoin, "O Jisas, Ben! Egenu walol heia!" doin.

<sup>14</sup> Odocob Jisas meciadimei maaden, "Nuimeig nawel tawec ihanec dana age dewenega eu ihacadecebifli meciadeiga," aden.

Odocob jic sahu bebelegin agena hag cunug qee men. <sup>15</sup> Odocob age oso ugana hag me mudceeb fimei utai Anut binan susulei ceseli hon. <sup>16</sup> Humei ugadodoc Jisas jaihna toni mahulimei hetaga don. Dana eu uqa Sameriadec. <sup>17</sup> Odocob Jisas maden, "Dana 10-pela agena hagnadec me meiga. Dana 9-pela eu age ana?" <sup>18</sup> Eu eetanu cele dana i uqadih Anut hetaga dugia ceseli hoia?" en. <sup>19</sup> Odocob Jisas dana eu madon, "Cajimeg nuuga. Hinana wawin meleec eu hag me mudihia," don.

### *Anutna cul hugian*

(*Matju 24.23-28, 37-41*)

<sup>20</sup> Odocob Farisi leih age Jisas Anutna cul cel saen hugian ec sisildoin. Odocob Jisas uqa jejenega hewi maaden, "Anutna cul edi hohob qee fowain. <sup>21</sup> Oso madigan, 'Feiga, ihec hona!' igianfo, qee oso madigan, 'Euhec hona!' igian eu ihoc qee. Gec feiga, Anutna cul eu age gemo bilia,"\* aden.

<sup>22</sup> Odimei ugana malogom maaden, "Saen hugian eu saen age Dana Melah uqa mahana cobocna deel oso fecnu hooloqagan qa age deel eu qee fowain. <sup>23-24</sup> Leih ha maadoqagan, 'Feiga, euhec hona!' adoqagan. Odocob leih maadoqagan, 'Feiga, ihec hona!' adoqagan. Euqa amel faleimei sao nahadec naha fulacdu ehi tenawie Dana Melah [ugana deelna]

\* **17:21:** Dana leih age je i odi falicdoin. "Gec feiga, Anutna cul eu age dunuhna bilia," aden.

odi camas migian. Eunu age cain tooadi cobowain.<sup>25</sup> Euqa casac Dana Melah uqa deweg dain doc ben bahic ugian. Odocob dana cajaca qila bileyina eu age uqa hibemdoqagan.<sup>26</sup> Noa bilen saenna dana cajaca bileyinwe Dana Melah uqana saenna odi ha biluqagan.<sup>27</sup> Saen euna dana cajaca age sab ji wain ji bibilegin dana caja ocobocobi bibilegin leceb Noa wag benna tobec deelna odi odooin, odocob wa sil cajimeciunug fadaladen.<sup>28</sup> Eu odiweha Lotna saenna age bileyinwe age odi biluqagan. Lotna saenna dana cajaca age sab wainca jiji bibileig cetetehfafajeig suldodoig sab cecheheig jo cecheheig bileyin.<sup>29</sup> Euqa deel Lot Sodom culaden euna ja meen jan daina sao jobondec nimei dana cajaca cunug fadaladen.<sup>30</sup> Eu odiwe Dana Melahna camas mec deelna eu odi caligian,” aden.

<sup>31</sup> “Deel euna dana oso uqa jo tatacan tataweb uqana ceteteh jo dunuh ninijeb uqa toni numei uqana ceteteh cain cedeaun. Eu odiha dana oso cabina cocobob saen euna uqa haun jona cain ceseleiaun.<sup>32</sup> Age Lot aidegnu cisoigoa.<sup>33</sup> Oso uqa uqana cebac biley sosogon ona eu uqa uqana cebac biley felacudigian. Oso uqa uqana cebac biley felacudecebfu eu uqana cebac biley hewigian.<sup>34</sup> Ija maadigina, witic euna dana lecis ale cabal osolna us nijuwasan. Oso ehudi beloqagan, oso eu tacewudoqagan.<sup>35-36</sup> Caja lecis ale wit meenaha ibuldudu biluwasan. Oso ehudi beloqagan, oso tacewudoqagan,” aden. [Dana lecis ale cabina sab cehowasan. Oso ehudi beloqagan, oso tacewudoqagan.]†

<sup>37</sup> Odocob malogom sisildoin, “Tibud, cetehe i ana caligian?” doin.

Odocob Jisas galolo je i jegenega hewi maaden, “Dana cal nec deweg ganac huluec oso ninijen man fululec benben cababac cinigwe age euna ceguluqagan,” aden.

## 18

### *Caja wij dana gesilecca galolo je*

<sup>1</sup> Odimej Jisas galolo je i gaid saen cunugna inondoqagannuca, cain dumanaga ciliaunnuca iwaladecnu maaden,<sup>2</sup> “Je gesilec dana oso uqa taun ben osona biloloi. Uqa Anut qee cucuidoloi. Uqa dana cunug mahamadecha cewadoloi.<sup>3</sup> Odocob caja wij oso uqaha taun eunadiah biloloi. Uqa je gesilec dana euca uqa gaid hahuoloi. Uqa gaid inondudu madoloi, ‘Tjana cadnua gesillec saenna cesultaga!’ doloi.<sup>4</sup> Saen cecelac bahic je gesilec dana uqa cesuldocnu qee cisdoloi qa hibna uqadodoc maden, ‘Ija Anut qee cucuidugina. Dana cunugha cewadigina<sup>5</sup> qa caja wij i culumen cunug itina eunu ija cesuldugen. Qeefi, uqa odi dih oodob deweni cunug alal doiaundain! en,’ aden.

<sup>6</sup> Odocob Tibud uqa je tubdu maaden, “Je gesilec dana me qee je maden eu dah meiga.

<sup>7</sup> Eunu Anut uqana dana cajaca nesili cedaden eu agena culumennu cesuladigianu witic cahinegca qajudegina eu mahuc bahic cesuladlena ec age mele dogina. Uqa qee daleeiaun.<sup>8</sup> Ija maadigina, uqa agena culumennu cesuladigian. Odocob uqa mahuc bahic cesuladigian qa Dana Melah uqa camas nec saenna mahana nimei wawaga meleec gulucdugianfa?” aden.

### *Farisica takis cedec danaca galolo je*

<sup>9</sup> Odocob Jisas galolo je osoha dana age ija dana ititom bahic ec cisdodoig agedodoc binanaga susuleig dana cunug cewadegina eundec maaden,<sup>10</sup> “Dana lecis tempelna inondowasannu tesin. Oso uqa Farisi dana. Oso uqa takis cedec dana.<sup>11</sup> Odocob Farisi uqa cuhanuc tatawi inondudu maden, ‘Dana cunug odogina ija odi qee odigina eunu Anut ija hetaga higina. Age cunug culunuga qanfo, ititom qeefo, age dana oso uqa aideg oginafo eu odi. Ija takis cedec i bilina chinigwe qee eunu hetaga higina.<sup>12</sup> Ija cuha cunugna deel lecis cud biligina. Odocob ija meen qaig cunug ugina eu am 10-pela qatanimig osol hinana cabinu migina,’ don.<sup>13</sup> Euqa takis cedec dana eu onoca tawimei sao jobon ha ola suli utatiqwe qee qa uqa muguhna eben foidudu madon, ‘O Anut, ija silail dana! Ijanu walol heia,’ don,” aden.<sup>14</sup> Odocob Jisas maaden, “Ija maadigina, oso uqa culai ijanel lalan mumudi bilina euqa Anut uqa dana eu cilehdugian. Oso uqadodoc jogoi waug lal qocca bilina eu Anut uqa dana eu culaug u lalan mumudeb biligian. Eunu takis cedec dana iqqa uqa mele bahic Anut amegna ititom bibilen jona nuen, oso eu qee,” aden.

### *Jisas mel sim eeladen*

(Matju 19.13-15; Mak 10.13-16)

<sup>15</sup> Odocob dana caja leih age Jisas uqa eben agena mel sim ilomogana migiannu uqaca ehi lein. Euqa malogom meciadimeig age gagalaadi cahacadein.<sup>16</sup> Euqa Jisas mel sim utaadecib uqaca lein. Odocob maaden, “Mel sim eundecnu Anutna cul muden nijiado. Eunu cain cahacadowain. Culadeceb mel sim age ijaca hoigale.<sup>17</sup> Ija mele maadigina, oso uqa mel sim Anutna cul ona eu odiwe qee ona eu Anutna culna qee leiaun,” aden.

† 17:35-36: Age Matju 24.40 feiga.

*Dana ilo cehewanca uqa Jisasca hocob madesin  
(Matju 19.16-30; Mak 10.17-31)*

<sup>18</sup> Odocob Juda dana agena ilo oso uqa Jisas sisildon, “O Iwalgec Me, cebac biley catanec eu mugumi ocnu ija eeta odigen?” don.

<sup>19</sup> Odocob Jisas madon, “Eetanu ija me taga? Dana cunug me qee. Anut himec uqa me bilina. <sup>20</sup> Hina Mosesna loo jena eu dogona:

‘Dana dana cajaca dewenela osol mec cain cagualegaun.

Oso Cain qagadogaun.

Oso uqana ceteteh Cain heje cedagaun.

Oso uqanu uhulec je Cain madagaun.

Hina anin memanca lalan malagale,’ ena,” don. *(Kisim Bek 20.12-16; Loo 5.16-20)*

<sup>21</sup> Odocob dana eu uqa Jisas madon, “Ija simnadec cocobi Mosesna loo je eu cunug toodoo odom,” don.

<sup>22</sup> Saen Jisas eu dah mimei dana eu madon, “Hinana odoc ihoc ligiannu odoc oso qee odolom eu odogale. Hina nuimeg hina cehewain cunug idadumeg meen qaig eunadec umeg dana sawen eundec siwiadagale. Odi odimeg hina sao jobon ono cehewainca bilegan. Odimeg hu ija tootagale,” don. <sup>23</sup> Euqa dana eu cehewanca bahic eunu uqa je eu dumei waug me qee bahic men.

<sup>24-25</sup> Odocob Jisas dana eu waug me qee meceb fimei maden, “Kamel lotoc gisec cese gigilona isec li nuecnu cacanigca, euqa dana cehewanca eu Anutna cul dunuh lecnu cacanigca eu wooldoc bahic. Eunu dana cehewanagaca eundec age Anutna cul dunuh loqagannu eu cacanigca bahic!” aden.

<sup>26</sup> Odocob dana dah mudein eundec sisildoin, “Mele odi nijecebfí oso cahahadocnu eu adi?” doin.

<sup>27</sup> Odocob Jisas jejenega hewi maaden, “Dana age odi odocnu qee nijel. Eu Anut ihoc odigian,” aden.

<sup>28</sup> Odocob Pita madon, “Faga, ege egena jobon culdimeb hina toohi coboqona,” don.

<sup>29</sup> Odocob Jisas maaden, “Ija mele maadigina, oso uqa Anutna culnu jobonfo, aidegfo, waliagulfo, memeg anagfo, talaculfo culina <sup>30</sup> uqa maha ina bibili ceteteh mecacu ugian. Odocob uqa saen hibna hugian euna cebac biley catanec ha ugian,” aden.

*Jisas uqa cal mimei ceseli cajigian ec madi cijeddon  
(Matju 20.17-19; Mak 10.32-34)*

<sup>31-33</sup> Odocob Jisas uqana malogom 12-pela gesacna cedi ehi limei maaden, “Feiga, ege Jerusalem toqona. Age ono Dana Melah Juda dana qee eundec ebenegana muduqagan. Odocobil age uqa lelandumeig je me qee madumeig cin quidoqagan. Odimeig age uqa qisadumeig qocobil cal magian qa deel cijeddochna haun ceseli cajigian. Eunu Jerusalem ono je hahun madec dana age Dana Melahnu je jaqein eu cunug ihoc ligian,” aden.

<sup>34</sup> Euqa malogom ceteh eunu agena cisdoc qee fogo dol. Je gug eu cunug eu jahunec bilen. Odocob age Jisas je maden eunu qee doloin.

*Jisas dana ameg galuc mec me muden  
(Matju 20.29-34; Mak 10.46-52)*

<sup>35</sup> Odocob Jisas uqa Jeriko taun dodoldodon ameg galuc mec dana oso uqa sabnu cesul-dogagannu niniaadi biley jic gesacna bilen. <sup>36</sup> Uqa dana cajaca mati bahic wooldodogin dah mimei sisiladen, “I cel?” aden.

<sup>37</sup> Odocob age madoin, “Jisas Nasaretdec woolhi nuina,” doin.

<sup>38</sup> Odocob uqa utai madon, “Jisas, Dewid Melah, ijanu walol heiale!” don.

<sup>39</sup> Odocob dana cajaca aquini tawein eu age gagaladudu madoin, “Cain utaagaun. Culugale,” doin.

Euqa uqa feeaadi co suli u haun utai madon, “O Dewid Melah, ijanu walol heia!” don.

<sup>40</sup> Jisas tului towimei dana ameg galuc mec eu uqa cemenug ehi loqagannu gagadic maaden. Dana ameg galuc mec eu uqa cemenug hocob Jisas sisildon, <sup>41</sup> “Ija hina eeta odihigennu cisdogona?” don.

Odocob uqa jejeg hewi madon, “O Tibud, ija ceteh fecnu madigina,” don.

<sup>42</sup> Odocob Jisas madon, “Hina wawin meleec eu me mihiya. Meciaga!” don.

<sup>43</sup> Odocob dana eu mahuc bahic ameg fogo docob uqa ceteteh cunug fen. Odimei Anut hetaga dudu Jisas toodon. Dana cajaca eu fimeig age cunug Anut binan sulein.

<sup>1</sup> Odocob Jisas Jeriko taun limei gemogemo nuen. <sup>2</sup> Ono takis cedec dana agena ilo biloloi. Uqa ijan Sakias. Uqa cehewanca. <sup>3</sup> Uqa Jisas cel dana adec eu figia oodon qa uqa dana gohic. Eunu dana amha ceguleinnu Jisas fecwe qee. <sup>4</sup> Eunu uqa aquni guguli nuimei na sikamoa oso Jisas eusec ligian ec dumei figiannu tobom. <sup>5</sup> Odocob Jisas cudun euna limei mecieceb na ohis teceb Sakias fimei madon, “Sakias ija qila hina naguc nijigen. Eunu mahuc tonoga,” don.

<sup>6</sup> Odocob Sakias mahucwe tonimei waug ceelecca Jisas ehuden. <sup>7</sup> Odocob cunug fein eundec age gonagona mimeig madein, “Dana i silail danana jona nijoug nijecnu leia!” ein.

<sup>8</sup> Odocob Sakias caji tawimei Tibud madon, “O Tibud, dah maga! Ija cehewani gemo cesawimig na ha sawen adigen. Odocob ija oso uhldomfi eu odi meen qaig eu sanijec 4-peladoc wadacdguna,” don.

<sup>9-10</sup> Odocob Jisas madon, “Dana Melah uqa fadaladigiannu billein eundec waladi caahahaadecnu nen. Eunu dana iha uqa Ebrahamna sihulnadeecnu qila Anut uqa dana cajaca age jo ina bilegina eu caahahaadeia,” don.

*Cabi dana 10-pela age meen qaig oinnu galolo je*

*(Matju 25.14-30)*

<sup>11</sup> Dana eu dah memegin Jisas uqa Jerusalem wele cemenug mumuden age Anutna cul nag odi camas migian ec cisdoinnu uqa tubdu galolo je maaden. <sup>12</sup> Eunu uqa maaden, “Dana oso uqa ijan bencu uqa hatu onoca uqa king caligliannu, uqa hibna uqana hatu king billecnu ceseligiannu nuen. <sup>13</sup> Uqa culadi nuigia bili uqana cabi dana 10-pela cunugca utaadeceb ceguleceb uqa kina 20 20 cunug filfil aden. Odimei maaden, ‘Age meen qaig ina idadeebil leceb ija isi ceseli humig figen,’ aden. <sup>14</sup> Odonqa dana age uqana hatunadec age dana ijan bencanu gemanaga beceb sagagdoin. Eunu age sos dana uqa eu agena king billecnu culadoqa ec madoqaga bili suladeceb hib toodoin,” aden.

<sup>15</sup> “Odocob dana ijan bencu king mudecebil ceselen. Odocob uqana cabi dana meen qaig aden eu age meen qaig eunadec agena idadecna meen qaig haun ganic calen eu dugiannu je gagadic maadeceb uqa amegna osolosol lein. <sup>16</sup> Odocob dana aquneccna tawen eu limei madon, ‘Meca fagale, hina kina 20 item ija meen qaig euna idadecmin kina 200 haun mudem,’ don. <sup>17</sup> Odocob uqa madon, ‘Hina cabi dana me bahic! Hina cabi oc nag me cofdoga eunu taun ben 10-pela cunugca cofdoc dana mihiigen,’ don. <sup>18</sup> Odocob cabi dana lecisdoc len eu madon, ‘Meca fagale, hina kina 20 item ija meen qaig euna idadecmin kina 100 haun mudem,’ don. <sup>19</sup> Odocob eu uqa madon, ‘Hina taun ben 5-pela cunugca cofdogan,’ don. <sup>20-21</sup> Odocob cabi dana oso eu limei madon, ‘Meca, kina 20 item ihec. Hina dana gemainca bahic eunu ija hinanu cucuiem. Hina ceteh ocnu qee cabi ogona eu ogona. Odimeg ceteh hina qee cehangana eu jagana. Eunu hinana meen qaig eu musul cacoc lotoc nagna ija jahunem,’ don. <sup>22</sup> Odocob uqa madon, ‘Hina cabi dana me qee! Hinana je euna gesilihigen. Ija dana gemanica, ija ceteh ocnu qee cabi ugina eu ugina odocob ceteh ija qee cehingina eu jingina ec dogona. <sup>23</sup> Eunu eetanu ijana meen qaig eu qaig mec jona qee melem? Odocob ija ceseli humig meen qaig nag haun sabijeceb ceseli cedoum,’ don. <sup>24</sup> Odimei uqa leih ono tawein eu age maaden, ‘Uqana kina 20 cawaldumeig uqana kina 200 nijen uteigale,’ aden. <sup>25</sup> Odocob eu age madoin, ‘Meca, uqa kina 200 wele oia!’ doin. <sup>26</sup> Odocob uqa jejenega hewi maaden, ‘Ija maadigina, cunug age cetehca bilegina eu Anut uqa ceteh haun adigian. Euqa oso uqa cetehca qee bilina eu Anut uqa uqana nag nijia eu cawaldugian. <sup>27</sup> Odocob qila ijana cad i agenu age ija agena king billec culadein eu ene cedi ahumeig ija olanina qagaadeigal’ aden,” aden.

*Jisas uqa king cinigwe Jerusalem dunuh len*

*(Matju 21.1-11; Mak 11.1-11; Jon 12.12-19)*

<sup>28</sup> Jisas odi maadimei cculadi uqa aquni Jerusalem ono ten. <sup>29</sup> Tetei uqa Betfasi Betanica jobon doldolaalei Oliw Aluhna ono malogom lecis sulaleceb aqunimesi <sup>30</sup> maalen, “Jobon amigena nijia euna lesia. Ale dunuh lelesi cesel goman manahal oso qagec tataweb gulucdowasan. Cesel eu dana oso tatacan qee biled. Ale eu cufalimesi ehudi ene ahosiale. <sup>31</sup> Dana oso sisilalecebfi, ‘Eetanu cufalesina?’ alecebfi madowasan, ‘Tibud cesel eu ocnu eu cabi osoca madena,’ dowasan,” alen. Odimei sulaleceb belesin.

<sup>32</sup> Eu ale jic toodu belimesi ceteh cunug Jisas maalen odi gulucdosin. <sup>33</sup> Ale cesel goman manahal eu cufufalesin uqana cofdoc hu sisilalein, “Eetanu cesel goman manahal eu cufalesina?” alein.

<sup>34</sup> Odocob ale jejenega hewi maadesin, “Tibud uqa cesel eu ocnu eu cabi osoca madena,” adesin. <sup>35</sup> Odimesi cesel goman manahal eu Jisas ehi litosin. Odocob alena lotoc dool gogodohna mimesi Jisas cesuldodosin tobi gogodohna bilen. <sup>36</sup> Uqa cesel goman manahal gogodohna bibili nunuen eu age agena lotoc duitotigin eu lalagan nuen.

<sup>37</sup> Odimei uqa Jerusalem cemenug lelen jic Oliw Aluh gololecna ono ugana malogom mati bahic Anut kobolkobol odoc odocob amagana feinnu celeboeeig binan susuli ooig jejenega suli uutai madein:

<sup>38</sup> "King uqa Tibud ijanna hona Anut eeldoiale!"

(*Buk Song 118.26*)

Sao jobonna malol biliale!

Anut ohis bilina uqa kobolkobolca biliale!" ein.

<sup>39</sup> Oodogin Farisi leih am ben dunuh eunadec Jisas madoin, "Iwalgec, hinana malogom ca hacadecem tilieiga!" doin.

<sup>40</sup> Odocob Jisas jejenega hewi maaden, "Ija maadigina, eu age tiliecebilfi meen agedodoc sanan mi utaoqagan!" aden.

### *Jisas Jerusalemu qajen*

<sup>41</sup> Odocob uqa Jerusalem cudun ben eu cemenug bahic mudimei ameg mudeceb leceb fimei ugana qajen. <sup>42-44</sup> Odimei maden, "Hina qila himec cel odimeg malol biligina ec doummei eu me bahic! Euqa hina Anut ca hahahigianu hon saen eunu qee dolom. Eunu qila hina jic malol fecwe qee. Odocob saen caleceb hinana cad maha huhuni talilhuqagan. Odimeig age hinana gelna maha am ben goimdumeig jic muduqagan. Odocob qeih cunugnana ququlubaadi loqagan. Eu age hinana dana gel dunuh bilegina hinaca fadalaadi mahana qeladoqagan. Meen oso ha ugana bilec cudunna qee culdowain," en.

### *Jisas fajec dana age tempel dunuhnadec ititacaden*

(*Matju 21.12-17; Mak 11.15-19; Jon 2.13-22*)

<sup>45</sup> Odocob Jisas tempel dunuh limei dana ono ceteteh suldudu bielein eu sanan mi ititacaadi <sup>46</sup> maaden, "Anutna je jaqecna je oso nijia eu Anut odi madena:

'Tjana jo eu Anut inondocnu jo tawigian' ena.

(*Aisaia 56.7*)

Ageqqa agena odocan

age falidocobil heje dana agena jahunec cudun ibuldon!" aden.

(*Jeremaja 7.11*)

<sup>47</sup> Odocob Jisas tempelna deel cunugna iwaladoloi. Ihane dana benbenca, loo je iwaladec dana ageca, dana caja agena benbenca age qagadoqagannu jic wali coboin.

<sup>48</sup> Euqa dana cajaca cunug age uqa dah mudoloig eu je osol bahic ha wooldocnu culoloig. Eunu age adi bahic odocnu ec jic qee felein.

## 20

### *Age Jisas ugana cabi ocnu gadac eu in uten ec sisildoin*

(*Matju 21.23-27; Mak 11.27-33*)

<sup>1</sup> Odocob deel osona saen Jisas uqa tempelna iwalaadi me je maaaden ihanec dana benbenca, loo je iwaladecca. Juda agena matuca age ugaca humeig <sup>2</sup> sisildoin, "Magaga, in ijanna hina eu odogona? In cabi eu ocnu maheeb odogona?" doin.

<sup>3</sup> Odocob Jisas jejenega hewi maaden, "Ija age casac je oso sisiladigen. Mateiga, <sup>4</sup> Jonna wa joadec eu sao jobondecfo, qee danadecfo?" aden.

<sup>5</sup> Odocob age agedodoc togodudu madein, "Ege madoqaqa wa joadec eu sao jobondec doqaqa uqa ege eetanu ugana wawaga mele qee el? gigian. <sup>6</sup> Ege madoqaqa wa joadec eu dananadec doqaqa eu dana cajaca eu age cunug Jonnu uqa je hahun madec dana ec wawaga ben bahic meleena. Eunu age mein qeli qigeceil cal meqan," ein. <sup>7</sup> Eunu age jejeg hewi madoin, "Jonna wa joadec eu anadec ege qee doqona," doin.

<sup>8</sup> Odocob Jisas maaden, "Eunu ija ageha in ijanna ceteh i odigina eu qee maadigaun," aden.

### *Cabi dana wain cabi cofdocnu galolo je*

(*Matju 21.33-46; Mak 12.1-12*)

<sup>9</sup> Odimei Jisas galolo je i dana cajaca maaden, "Dana oso wain cabi cehen. Dana leih age ugana wain cabi cofdocnu ebenegana meceb meen qaig mumudegin uqa jobon cuculi nui saen cecelaccia bahic bilen. <sup>10</sup> Wain aig wal meceb cedec saen cali hocob wain cabi gug uqa cabi dana oso suldudu madon, 'Hina nuimeg wain cabi oc eundec maadecem age wain aig leih eu iheceil cedi ahutagale,' don. Euqa dana age wain cabi cofdoeu age cabi dana qumeig wain aig ameg oso qee utec suldocobil ceselen. <sup>11</sup> Odocob wain cabi gug uqa haun cabi dana oso suldocob nuen. Euqa wain cabi cofdoeu age cabi dana euha qumeig me qee mudimeig suldocobil gauc ceselen. <sup>12</sup> Odocob wain cabi gug uqa cabi dana cijeddoc eu suldocob nuen qa dana eu age ugaha qetudein. Odimeig wain cabinadec heludeceil calen. <sup>13</sup> Odocob wain cabi gug maden, 'Adi odigen? Ija melami nelugca i suldocomin nuigian. Acahna age uqa cumundoqagan,' en. <sup>14</sup> Euqa saen dana eu age uqa lelen fimeig madocbmadocobein, 'I cabi gug huqaneh, uqa isi wain cabi ugian.

Cois, uqa muguh eu ege oqannu ege cajimeb qocomun cal mecnul' ein. <sup>15</sup> Eunu age wain cabinadec heludecebil cacalen qagadoin," aden.

Odimei Jisas sisiladen, "Wain cabi gug uqa wain cabi cofdoc dana eu eeta odadigian? <sup>16</sup> Uqa humei dana eu age fadaladeceb cal moqagan. Odimei wain cabi eu dana filfil adigian," aden.

Saen dana eu odi dah mimeig madein, "Eu odi calecwe qee!" ein.

<sup>17</sup> Odocob Jisas meciadimei sisiladen, "Eu odi calecwe qeefi cel oso eu Anutna jaqec je i gug bahic sildina?

'Meen oso meen gel cehec memei dana culein eu

qila meen jo big gug jo hehdocnu calen.'

(Buk Song 118.22)

<sup>18</sup> Dana cunug meen euna toni qoin eu age qetadi susul faladigian. Odocob meen eu oso toni cilehdocabfi comis ibuldugian," aden.

<sup>19</sup> Odocob loo je iwaladeca, ihanec dana benbenca age Jisas uqa galolo je i agenu maden ec doin. Eunu age saen euna himec Jisas hewoqaga odooin qa eu age dana cajaca cucuadeinu qee hewudelein.

#### *Age Jisas Sisa takis helecnu kobolnu sisildoin*

(Matju 22.15-22; Mak 12.13-17)

<sup>20</sup> Eunu loo je iwaladec dana, ihanec dana benbenca age saen euna Jisas mecidudu cofdoin. Eu age cijawi coboc dana leih age dana meme cinigwe suladecebile belein. Odimeig Jisas agena sisilecna uhuldumeig aisais hewoqagannu cabi adein. Odocob age ihoc uqa ehudi li gesilec jona mudimeig hatu cofdoc dana ebenna moqagannu cisdo. <sup>21</sup> Odocob uhulec dana i age Jisas sisildoin, "Iwalgec, hina iwalgigi madagana eu mele, ege doqona. Hina dana ijan meca ec qee cisdogona qa hina Anutna kobil eunu je mele himec dana cajaca iwaladegana euha doqona. <sup>22</sup> Ege Sisanu takis helecnu eu tutucfo, qee tutuc qeefo?" doin.

<sup>23</sup> Euqa Jisas agena uhulec je eu fimei maaden, <sup>24</sup> "Meen qaig oso eu ihacteiga. In hahun eu gaga qoc taweia? In ijanha jaqec taweia?" aden.

Odocob age jejeg hewi madoin, "Eu Sisa ugana," doin.

<sup>25</sup> Eunu Jisas maaden, "Eunu age Sisana ceteteh eu Sisa uteiga. Anut toinan eu Anut uteiga," aden.

<sup>26</sup> Odocob age je oso cahuldu madeceb euna ono dana cajaca amagana aisais hewi ocwe qee. Euqa age je eu maadeceb dumeig tumatumaimig uqa jejeg hewecwe qee. Eunu age tiliec bahic bilein.

#### *Age Jisas dana cal mimei ceseli cajigiannu sisildoin*

(Matju 22.23-33; Mak 12.18-27)

<sup>27</sup> Odocob Sadjusi dana leih Jisasca hoin. Sadjusi age cal mein eundec ceseli qee cajowain egina. Age Jisas je oso sisildu madoin, <sup>28</sup> "Iwalgec, Moses uqa loo je gadac i jaqigen, 'Dana oso uqa waliag cal mimei aideg culdigian qa melca qeefi dana eu uqa waliag cal men euna mel basituwasannu aideg eu ugian,' odi jaqigen. <sup>29</sup> Saen osona waliagul 7-pela biloloig. Matu eu caja on. Odocob waliag eu aideg mel qee basec uqa cal men. <sup>30</sup> Odocob waliag lecisdoc uqa caja eu on. [Uqaha aideg mel qee basec cal men.] <sup>31</sup> Odocob waliag cijeddoc eu waliagul 7-pela cunugca eu odi odoin. Caja euca mel oso qee basec cal mein. <sup>32</sup> Hibna bahic caja eu cal men. <sup>33</sup> Odocob waliagwaliag 7-pela cunug uqa age osolosol agena caja bilen. Eunu cal mec ceseli cajec saenna uqa in aideg biligian?" doin.

<sup>34</sup> Odocob Jisas jejenega hewi maaden, "Dana cajaca cebac biley maha ina ocobocbegina. <sup>35-36</sup> Euqa dana cajaca cal mecnadec ceseli cajimeig cebac biley cul hibnanu Anut gesiladec bilia euna biluqagan eu age Anut talacul biluqagan, age ensel ihocihoc tawoqagan. Odocob age cal mecnadec ceseli cajoqagan. Age cal mecw qee. Eunu age ocobocob qee owain. <sup>37</sup> Odocob Mosesna je jaqec cal mecnadec haun ceseli cajoqagan eunu camasac bahic ihacadena. Na nag ja cijec ugana je euna jaqec taweia eu Moses uqa Tibudnu odi jaqen:

'Uqa Ebrahamna Anut, uqa Aisakna Anut, odocob uqa Jekobna Anut,' en. (Kisim Bek 3.6)

<sup>38</sup> Eunu dana cunug age uqa amegna cebac bileyinu Tibud uqa cebac bileyinu agena Anut, uqa cal mec agena qee," aden.

<sup>39</sup> Odocob loo je iwaladec dana leih madoin, "Iwalgec, hinana je jejenega hewec eu me bahic!" doin. <sup>40</sup> Odocob je oso haun sisildocnu cucuiein.

#### *Jisas uqa Farisi Kraisnu sisiladen*

(Matju 22.41-46; Mak 12.35-37)

<sup>41</sup> Odocob Jisas sisiladen, "Age adi madegina, 'Krais eu uqa Dewid Melah,' egina? <sup>42</sup> Ge, Dewid uquadodoc buk Samna jaqen:

'Anut Tibud uqa ijana Tibud odi madon,

"Ijaca hu ebeni meulana isec bibilem

<sup>43</sup> ija odocomin hinana cad cunug hu ninijebil  
hina jaimna lahacadegan," don,' en.

(Buk Song 110.1)

<sup>44</sup> Eu feiga, Dewid uqa Kraisnu madi, uqa ijana Tibud, en, eunu adi uqa Dewid Melah bilina?" aden.

*Loo je iwaladec dananu cofdoiga*

(Matju 23.1-36; Mak 12.38-40; Luk 11.37-54)

<sup>45</sup> Dana cajaca cunug dah mumudegin Jisas uqana malogom maaden, <sup>46</sup> "Age loo je iwaladec dananu cofdoiga. Loo je iwaladec age lotoc cecelac tacimeig cocobi nuecnu gale adena. Age ceteteh idadec cudunna age binanaga sulecnu gale adena. Age cuha jona cabal me cudunna bielecnu gale adena. Odimeig age sab ben jec saenna bielec binanca euna bielecnu gale adena. <sup>47</sup> Eu age caja wij agena jo heje cedegina. Odimeig age dana me bahic meciadecnu saen cecelac bahic inondogina! Dana eundec age agena cahuldocnu ameg ben bahic oqagan," aden.

## 21

*Caja wij Anut meen qaig nag lecis uten*

(Mak 12.41-44)

<sup>1</sup> Odocob Jisas qaalimei uqa cehewanagaca age meen qaig helecnu tempel bokis meen qaig memegin meciaden. <sup>2</sup> Odimei uqa caja wij sawen osoha meen qaig nag lecis memen fen. <sup>3-4</sup> Odocob uqa maaden, "Dana caja cehewanagaca age cehewanaga bennadec meen qaig heleiga qa caja wij i uqa sawen bahic, uqa uqana ceteh cebac bielecnu meen qaig cunug heleia. Eunu ija mele maadigina, caja wij sawen i uqa meen qaig nag heleia eu cehewanagaca age tempel bokisna meen qaig ben bahic heleiga cunug wooladena," aden.

*Jisas age tempel wagaloqagan ec maden*

(Matju 24.1-2; Mak 13.1-2)

<sup>5</sup> Odocob dana leih age tempel uqana meen soidocca fecnu me bahic, odocob bagol gagaca mudein euha fecnu me bahic eunu mamaedegin Jisas maaden, <sup>6</sup> "Ceteteh i cunug feginia eu saen caleeteb meen gel ulugedocob meen oso meen oso tatacanna cilehdock qee biliaun. Cunug wagalecebil mahana tonoqagan," aden.

*Jisas culumen mati bahic caloqagan ec maden*

(Matju 24.3-14; Mak 13.3-13)

<sup>7</sup> Odocob eu age sisildoin, "Iwalgec, aadeb eu odi caligian? Odocob cel gaga casac camas meceb saen wele dodoldona eu ege docnu ihoc?" doin.

<sup>8</sup> Odocob Jisas maaden, "Matica age ija ijanina mamadi hoqagan, 'Ija uqa,' oqagan. Odocob ageha madoqagan, 'Saen wele hoia,' oqagan. Euqa cain tooadowain. Eunu oso hu faninadi dado madecebat jic ceja qocna lowainnu batut feigale. <sup>9</sup> Han ben saen falicfuluc eu casac caloqagan. Euqa cit qoc eu mahuc qee toodu hoiaun. Eunu age ceteh eu hona ec dah moqagan saen euna cain cucuiuwain," aden.

<sup>10</sup> Odocob uqa odi maaden, "Dana hatuhatu age cajimeig cilehdocobcilehdocoboqagan. Odocobil dana sihulsihul age cajimeig cilehdocobcilehdocoboqagan. <sup>11</sup> Mim benben mahana nigian. Sabnu cahel bielec saen maha filfilna cali hugian. Odocob hag gug filfil mahamaha ihoc ligian. Sao jobondec ono gaga meca caca cetehe filfil cacaleb foqagan eunu ben bahic cucuiuwagan. <sup>12</sup> Euqa ceteh eu cunug qee caleet ninijeb age hewadimeig me qee madoqagan. Age Juda agena cuha jo dunuh um aqimeig gihadoc jona madoqagan. Age ija ijaninu kingca, hatu cofdocca ehadi li amagana madoqagan. <sup>13</sup> Saen eu age ijana me je qasali maadecnu saen. <sup>14-15</sup> Ijadodoc je adi madoqagan eu conogana migen. Odocob doc meca je madoqagan eu agena cad eundec age je mele qee madegina ec madecwe qee, age jejenega hewi maadecwe qee. Eunu age amagana agedodoc cesuladec je adi madoqagannu Cain casac saciadownain. <sup>16</sup> Age memegailca, anagailca, walinigailca, agena sihul eundec agena danahca eu age agena cad ebenebegan madoqagan. Eu age agenadec leih dewenega tudocobil age cal moqagan. <sup>17</sup> Age ija ijani hewegina eunu dana cajaca cunug age agenu gemanaga beceb sagagadoqagan. <sup>18</sup> Euqa age dewenega cunug Anut uqa cahahadugian. Gosiniga osol himecha age ilomoganadec qee fadaleiaun. <sup>19</sup> Age wawaga gagadic tawoqaganna agena cebac bielec catanec oqagan," aden.

*Jisas age Jerusalem fadaldoqagan ec maden  
(Matju 24.15-21; Mak 13.14-19)*

<sup>20-22</sup> Jisas je haun maaden, "Saen euna eu 'Fileec Ameg Oc Saen,' je cunug Anutna jaqec jena taweia eu aig ihoc ligian. Eunu saen age han dana am Jerusalem alildocobil fifeig age taun ben eu nag odi fadaldoqagan ec ihoc cисdoqagan. Eunu leih Judia hatuna bilegina age busali aluhnana toboigale. Leih Jerusalem dunuh bilegina age taun ben eu culdoigale. Odocob leih cabina cobogina age taun benna cain ceseli belowain. <sup>23</sup> Saen euna caja waugca coboc, caja mel su adegina eundec age walocca bahic biluqagan! Ge, saen euna culumen ben bahic mahana caligian. Odocob Anut olohon dana cajaca i age oqagan. <sup>24</sup> Leih age han signna cal moqagan. Odocob leih gihadoc dana cingwe hatu cunugna ehadi beloqagan. Odocob Juda dana qee eundec age jaimagana Jerusalem lahacdoqagan odi tatawebil li agena saen ihoc ligian," aden.

*Dana Melah ceseli nigian  
(Matju 24.29-31; Mak 13.24-27)*

<sup>25</sup> Jisas je haun maaden, "Gaga filfil camna, jagelna, malaqana caligian. Odocob hatunana dana caja cunug jaen ben aqigian. Odocob macas silca qaqahi udududoc eunu cucuiuqagan. <sup>26</sup> Saona gagadic odoc eu caji leceb hocob qeleloqagan. Eunu dana cajaca age cucuieig maha ina ceteh caligiannu geh cисdoqagan. Odocob amaga ha waldugian. <sup>27</sup> Eu odi cali hedocob Dana Melah uqa gagadic odoc kobolkobolca bahic uqa taen osona neneb foqagan. <sup>28</sup> Aria, ceteteh eu odi sanan mi cacaleb saen euna Anut age cahaahaadecnu saen dodoldonanu age caji tawimeig ilomoga suleiga," aden.

*Na dan fifeig saen doqagan  
(Matju 24.32-35; Mak 13.28-31)*

<sup>29</sup> Odimei uqa galolo je oso maaden. Uqa maaden, "Age na dannu cисdoiga. Na cunugnu ha cисdoiga. <sup>30</sup> Saen age cilonca feginu eu cam saen me bahic caligian dodoldona ec dogina. <sup>31</sup> Eu odi himec age ceteteh eu odi cacaleb fifeig age Anutna cul wele dodoldona eu doqagan," aden.

<sup>32</sup> "Ija mele maadigina, sihil i qila bilegina qee cal mi hedoc ninijeb ceteteh eu cunug caligian. <sup>33</sup> Sao mahaca qee migian euqa ijana je qee qee meiaun," aden.

*Malogom cunug age cofdoiga*

<sup>34</sup> Jisas je haun maaden, "Euqa ceteteh maha inadecnu cain cисdowain. Cain ja ben qowain. Cain dalul aqeaun. Maha ina cebac bielecnu cain jaen aqeaun. Agedodocnu cofdoiga. Qeefi, Gesilec Deel Ben eu mahuc ageca bolob cingwe hugian. <sup>35</sup> Deel eu dana cajaca maha cunugna bilegina ageca caligian. <sup>36</sup> Saen cunugna saciadoc bileiga. Odocob gaidgaid Anut gagadic odoc adigliannu sisidoiga. Eu odina age ceteh cunug ageca caligian eu ihoc wooldoqagan. Odocob age Dana Melah olana tawoqagan," aden.

<sup>37</sup> Odocob deel cunugna Jisas dana cajaca tempelna iwaladoloi. Wesuna uqa nui Oliw Aluhna ono us nijoloi. <sup>38</sup> Odocob dana cajaca cunug qasil wele cajimeig tempelna ono uqana je dah moqaganu uqaca lolioig.

## 22

*Jisasna cad age uqa qagadocnu jic oso walein  
(Matju 26.1-5; Mak 14.1-2; Jon 11.45-53)*

<sup>1</sup> Odocob Bred Jisca Qee Sab Jec deel gun, age Pasowa ein, eu dodoldon.\* <sup>2</sup> Odocob ihanec dana benbenca loo je iwaladec danaca age dana cajacanu cucuiein. Eunu age Jisas qagadocnu jic oso walein.

*Judas uqa Jisas ugana cad age ebenegana mudigian ec maden  
(Matju 26.14-16; Mak 14.10-11)*

<sup>3</sup> Odocob saen euna Seten uqa Judas, age Iskariot doloig, uqa waug dunuh len. Judas uqa malogom 12-pela agenadec oso. <sup>4</sup> Odimei uqa ihanec dana benbenca, tempel cofdoc han danaca ageca len. Odimei uqa Jisas cel jicna age ebenegana migiannu age gami togodoin. <sup>5</sup> Age eu dumeig wawaga ceeleceb age je gabandumeig meen qaig utecnu je cagoin. <sup>6</sup> Judas meen qaig fimei eu agena jenu cois en. Odocobil Judas uqa dana cajaca qee cegulec saenna Jisas dewegnu ob mimei age ebenegana mudigiannu jic walen.

*Pita Jonca ale Pasowa ja qoc joqagannu saciadosin  
(Matju 26.17-25; Mak 14.12-21; Jon 13.21-30)*

\* <sup>22:1:</sup> Age je Mak 14.1na nijia eu feiga.

<sup>7</sup> Odocob Bred Jisca Qee Sab Jec deel gun cali hon. Deel euna Juda dana age sipsip nag Pasowa ja qocna joqagannu qagadoloig.<sup>8</sup> Eu odinu Jisas uqa Pita Jonca odi maali sulalen, “Ale belimesi egena Pasowa ja qoc ege jecnu saciadosia.”

<sup>9</sup> Odocob ale jejeg hewi madosin, “Ele ana saciadiocnu gale hena?” dosin.

<sup>10</sup> Odocob uqa jejenela hewi maalen, “Fesia, ale taun benna limesi dana oso halon waca gahidu humei jicna gulucaligian. Ale uqa toodoo lesi jo uqa hamol ligian euna toodoo lesia.

<sup>11</sup> Odimesi ale dana jo eu gug madosia, ‘Walgec maheia, “Jo hamol ija ijana malogom gami Pasowa ja qoc sab jecnu eu ai?” heia,’ dosia. <sup>12</sup> Odocob hamol ben bahic ohis eu sab jec cabalca, bilec cabal cetehe cunugca ihacaligian. Ale Pasowa ja qoc sab jecnu euna saciadosia,” alen.

<sup>13</sup> Odocob ale belesin. Odimesi ale Jisas maalen odi bahic gulucdosin. Euna ale Pasowa ja qoc sab jecnu saciadosin.

*Jisas uqana malogom bred wainca aden*

(Matju 26.47-56; Mak 14.43-50; Jon 18.3-11)

<sup>14</sup> Odocob saen eu caleceb Jisas sab jec cabalna bilen. Odocob aposel ha lecebil uqa gami bileen. <sup>15-16</sup> Odimei uqa maaden, “Ija maadigina, ija haun Pasowa ja qoc qee jec<sup>†</sup> li hibna Anutna culna aig qoc saenna ihoc ligian. Eunu ija casac Pasowa ja qoc i age gami jimeb isi ija deweni dain tec gahidugen eunu hooligina,” aden.

<sup>17-18</sup> Odimei uqa gabin oso on. Anut hetaga doc je madumei maaden, “Ija maadigina, ija wain aignadec haun qee jec li Anutna cul ihoc ligian. Eunu age eu umeig age agedodoc cesawi jeiga,” aden.

<sup>19-20</sup> Odimei bred oso umei Anut hetaga dumei uqana malogom aadi maaden, “I ja deweni ganac [eu ija agenu Anut utigina. Age ijanu cisoqagannu odi odogina,” aden. Hibna eu ji hedumeig uqa wain gabin euha eu odi himec odimei maaden, “Wain gabin i eu Anutna bal cehec je haun eu ija gololina gabandocob agenu basecdugian,” aden.]

<sup>21</sup> Odimei Jisas maaden, “Euqa feiga! Dana ija cad ebenegana mitigia odona eu uqa ijaca jec cabal ina biluwa. <sup>22</sup> Mele bahic, Dana Melah uqa wele Anut jic maden odi toodugian eunu jic eu toodugian qa dana cad ebenegana mudigian uqa walocca biligian,” aden.

<sup>23</sup> Uqa odi maadeceb agedodoc sisildocbsisildocobimeig madein, “In uqa kobol odi odigian?” ein.

*Malogom age gemona in uqa ben biligian eunu fee dadanein*

<sup>24</sup> Odocob malogom age gemona in uqa ben biligian eunu fee dadanein. <sup>25</sup> Odocob Jisas maaden, “King maha ina bilegina age agena dana cajaca gagadic odo ilo bilegina. Odocob age agena ilo dananu egena cesulgec egina. <sup>26</sup> Euqa age odi cain odowain. Cain bahic. Dana age gemona ben bilina uqa dana milum bahic cinigwe biliale. Odocob agena ilo dana uqa cewel uadec odi cinigwe biliale. <sup>27</sup> In uqa ben, acahna dana sab jecnu bilina uqafo, qee dana sab qumei ahutona uqafo? Eu dana sab jecnu bilina uqa himec. Euqa ija age gemona agena cewel uadec biliga,” aden.

<sup>28</sup> “Wele age ijaca biloloig temtec cetehe holoi eu qee culti qisactoloig. <sup>29-30</sup> Odocob ija Mei cul osonu ilo miten. Eu odiwe age ijana culna ijana sab jec cabalna bibileig sab jejeig wa gab jejeig biluqagannu, odimeig biley cabal ben kobolkobolcana bilimeig Isrel sihul 12-pela gesiladoqagannu ija ageha cul osonu ilo madigina,” aden.

*Jisas uqa Pita uqanu qee sasac qugian ec madon*

(Matju 26.31-35; Mak 14.27-31; Jon 13.36-38)

<sup>31</sup> Odocob Tibud uqa Pita madon, “Saimon, Saimon! Dah maga! Seten uqa wit cabi oc dana wit me ganacca filiganalecnu fohidonawe odi age temadigianu cois ec Anutna je wele oia. <sup>32</sup> Euqa hinana wawin meleec qee toneiaunnu ija hinanu wele inonduga. Odocob saen ijaca falidcumeg hina cabi hijinel gagadic odo adaga,” don.

<sup>33</sup> Odocob Pita jejeg hewi madon, “O Tibud, ija hinaca cal mecnuka, gihacdoc jona neecnuka cois wele saciadioc biliga!” don.

<sup>34</sup> Odocob Jisas uqa Pita madon, “Pita, ija mahigina, witic ina mala manahal qee qoc ninijeb hina qee sasac ququ madegan, ‘Uqanu qee dugina,’ i cijeddogan,” don.

*Meen qaig tacecca badomca han cadec siginca galolo je*

<sup>35</sup> Odimei Jisas uqana malogom sisiladen, “Saen age meen qaig tacecca, badomca, jaimaga tacecca qee suladem eu nuimeig cetehe qee coboinfo?” aden.

Odocob age jejeg hewi madoin, “Cetehe osol osoca qee eu qee cobolom,” doin. <sup>36</sup> Odocob Jisas maaden, “Euqa qila in oso uqa meen qaig taceccaf, badomcafo eufi cois ahewigian.

<sup>†</sup> 22:15-16: Griek jaqec je hilah leihna age je fil jaqein eu odi: “Ija Pasowa ja qoc haun qee jigaun,” aden.

Odocob oso uqa han signica qeefi ugana lotoc ben suldumei oso fajigian. <sup>37</sup> Eunu ija edi maadigina. Anutna jaqec je oso edi maden:

'Age uqa loo je wooldoc dana osoben bibilegin meciadein,' eu mele bahic ijaca hona.  
(Aisaia 53.12)

Ge, ijanu Anutna jaqec je tawena eu mele bahic ihoc lena," aden.

<sup>38</sup> Odocob malogom age madoin, "O Tibud faga, han signin lecis ihec," doin.

Odocob uqa maaden, "Eu ihoc!" aden.

### *Jisas Oliv Aluhna inondon*

(Matju 26.36-46; Mak 14.32-42)

<sup>39</sup> Odimei Jisas ugana kobel toodumei uqa cudun eu cuculdi Oliw Aluhna ten. Uqa gaid odoloi odi odocob ugana malogom hib toodocobil tein. <sup>40</sup> Cudun euna ti calimeig uqa maaden, "Temadecna qee lowainnu inondoiga," aden.

<sup>41</sup> Odimei uqa cuculadi dana oso meen geleceb nui tonena eu odi timei gob cehimei Anut inondon. <sup>42</sup> Odocob uqa madon, "O Mei, hina gabin i cawalitecnu cisdoc nijecebfci cawalitiga. Euqa ijana cisdoc cain toodoga, hinana cisdoc toodoga," don. [ <sup>43</sup> Odocob ensel oso sao jobondes gagadic odoc utigiannu nen. <sup>44</sup> Odocob Jisas deweg culumen doc tebandumei gagadic bahic Anut inondon. Odimei musul golac gagadic cinigwe mahana toocooi tonen.]

<sup>45</sup> Uqa inondu hedumei caji ugana malogom ageca ceseli non. Odimei wawaga culumen adeca us ninijegin meciaden. <sup>46</sup> Uqa maaden, "Age eetanu us njegina? Cajimeig temadecna qee lowainnu inondoiga," aden.

### *Judas uqa Jisas ugana cad ebenegana uqa muden*

(Matju 26.47-56; Mak 14.43-50; Jon 18.3-11)

<sup>47</sup> Ugana malogom je maaaden dana am ben bahic tein. Dana aquneceb tein uqa ijan Judas uqa malogom 12-pela eundec oso. Uqa Jisas cotdugiannu cemenug ten. <sup>48</sup> Euqa Jisas madon, "Judas, hina cotechna Dana Melah ugana cad amagana camasac mudugunafo?" don.

<sup>49</sup> Saen malogom Jisasca tawein eu age ceteh caligia oodon fimeig sisildoin, "Tibud, eguna han signinna cois cadecnuso?" doin. <sup>50</sup> Odocob malogom oso ugana han signinna ihanec dana ilona cabi dana qelimei dahig meulana isec caguton.

<sup>51</sup> Euqa Jisas maadimei, "Eu odi cain! Kobol eu culeiga!" adimei uqa qududocob dahig me muden.

<sup>52</sup> Odimei Jisas uqa ihanec dana benbenca, tempel cofdoc han danaca, Juda agena matuca age uqa hewoqaga lein eu maaden, "Eetanu age han signica han galabca heje oc dana cinigwe hewoqagannu hoiga? <sup>53</sup> Ija ageca tempelna gaidgaid bilolob. Odocob age saen euna ija hewitecnu oso qee odoloin. Euqa qila eu agena gagadic odoc saen. Eu tu ugana gagadic odoc gagadic bahic mena," aden.

### *Pita ija Jisasnu qee dugina ec maaden*

(Matju 26.57-58, 69-75; Mak 14.53-54, 66-72; Jon 18.12-18, 25-27)

<sup>54</sup> Eu age Jisas hewimeig ihanec dana agena ilona jona ehi lein. Odocob Pita Jisas tabag hehewi tooaden. <sup>55</sup> Jo eu gel dunuh ja hudein. Odocob Pita leceb leih ja cudun bilein gami bilein. <sup>56</sup> Odocob cabi mel aid oso ono ja cudun bibilen fimei deei maden, "Dana i ha ugaca bilein!" en.

<sup>57</sup> Euqa Pita uqa qee sasac qu madon, "Caja, ija uqanu qee dugina!" don.

<sup>58</sup> Odocob saen nag giaceb dana oso fecidumei madon, "Hina agenadec oso!" don.

Euqa Pita jejeg hewi madon, "Dana, ija qee iel!" don.

<sup>59</sup> Odocob aua osol odi hedocob dana oso gagadic bahic maden, "Dana i uqaha Galilidec. Eunu mele bahic, ugaca bilesin," en.

<sup>60</sup> Euqa Pita jejeg hewi madon, "Dana, hina eetanu madagana eu ija qee dugina!" don.

Saen uqa je mamaden bahic mala manahal qon. <sup>61</sup> Odocob Tibud qaalimei Pita fen. Odocob Pita Tibud je madonnu cisdon, "Mala manahal qee qoc ninijeb hina qee sasac ququ ijanu qee dogona ec madi cijeddogan," don. <sup>62</sup> Odocob Pita jo eu cuculi cali limei ben bahic qajen.

### *Age Jisas asaldodoig qoin*

(Matju 26.67-68; Mak 14.65)

<sup>63</sup> Odocob dana Jisas cofdu tawein eu age cih je madodoig ququein. <sup>64</sup> Ameg qagimeig sisildoin, "Je hahun magaga doqa! Info qihia?" doin. <sup>65</sup> Odimeig je quesaldec geh bahic madoin.

*Age Jisas Juda agena cegulecna ehi lecebil amagana tawen  
(Matju 26.59-66; Mak 14.55-64; Jon 18.19-24)*

<sup>66</sup> Walag daneceb Juda agena matuca, ihanec dana benbenca, dana loo je iwaladeca cegulein. Odocob Jisas eu agena gesilecnu tamanec euna ehudi ehilein. <sup>67</sup> Age madoin, "Hina Anutna Krais eu melefi magaga," doin.

Odocob uga jejenega hewi maaden, "Ija maadeceminf i jana jenu wawaga qee meleeriaun. <sup>68</sup> Odocob ija je oso sisiladeceminf age jejeni qee hewowain. <sup>69</sup> Euqa qila nuceeb hibna ha Dana Melah Anut gagadic odocca bahic eben meulana isec biligian," aden.

<sup>70</sup> Eu age cunug madoin, "Hina mele bahic Anut Melah?" doin.

Odocob uqa jejenega hewi maaden, "Age madeginu eu odi," aden.

<sup>71</sup> Odocob eu age madein, "Ege je dana i maden qasali magecnu dana leih qee cedoquaun. Egedodoc bahic uqa cona madeceb dah moqa!" ein.

## 23

*Jisas uqa Pailat amegna tawen  
(Matju 27.1-2, 11-14; Mak 15.1-5; Jon 18.28-38)*

<sup>1</sup> Odocob cunug odi cajimeig Jisas uqa Pailatca ehudi ehilein. <sup>2</sup> Odimeig age Pailat amegna um qudec je geh bahic madein, "Dana i eguna dana cajaca cunug kobil me qee iwalaaden hewoqa. Uqa takis Sisa cain helowain ec maaden. Odocob uqadodoc madena, 'Ija Krais, ija king biligen,' ena," ein.

<sup>3</sup> Odocob Pailat uqa sisildon, "Juda agena king eu hinafo?" don.

Odocob Jisas jejeg hewi madon, "Hina madagana eu odi himec," don.

<sup>4</sup> Odocob Pailat ihanec dana benbenca dana cajaca gelgel amagana maaden, "Ija dana i dewegna cahuldoc oso qee felem," aden.

<sup>5</sup> Euqa eu age gagadic mimeig madein, "Dana eu uqa dana cajaca je maadeceb olohonoga ben. Judia hatu cunugna eu odi odon. Uqa Galili hatu ono sanan mimei huene calen," ein.

*Jisas Herod amegna tawen*

<sup>6</sup> Odocob Pailat eu odi dah mimei oso sisildon, "Dana i uqa Galilidecfo?" don. <sup>7</sup> Saen Pailat uqa Jisas eu Herod maha cul cofdonanadec ec dumei uqa Herodca suldon. Saen euna Herod uqaha Jerusalem ono ilo bibili bilen. <sup>8</sup> Herod uqa Jisas hutan dah men. Odimei saen cecelac bahic figiannu cisdudu bilen. Uqa Jisas kobolkobil odoc oso odocob figiannu cisdon. Eunu uqa Jisas fimei waug ceelen. <sup>9</sup> Eunu Herod sisilec geh bahic Jisas sisildon qa Jisas uqa jejeg qee hewel. <sup>10</sup> Odocob ihanec dana benbenca, loo je iwaladec danaca cemenugca timeig uqanu um qudec je madein. <sup>11</sup> Odocob Herod uqana han danaca age Jisas cih je madodoig ququein. Lotoc gaga me bahic king taqeginawie u taqitumeig suldocobil Pailatca ceselen. <sup>12</sup> Herod Pailatca ale wele cad bilolosi. Euqa deel euna dih danah mesin.

*Pailat uqa age Jisas na babalecna tuitu qoiga ec maden*

*(Matju 27.15-26; Mak 15.6-15; Jon 18.39-19.16)*

<sup>13</sup> Odocob Pailat uqa ihanec dana benbenca, iwaladec danaca, dana cajaca maadeceb cegulein. <sup>14</sup> Odimei maaden, "Age dana i ija amina ehudi ahumeig uqa dana cajaca age Rom agena ilo qee tooadecnu iwaladi cahuldona eiga. Qila ene age amagana ija uqa sisilduga qa age uqana cahuldoc um qu madeiga eu mele bahic oso qee felem. <sup>15</sup> Herodha uqana cahuldoc oso qee fel. Eunu uqa egeca haun suldocob ceseleia. Dana i uqana cahuldocca qee, gauc cal necnu ihoc qee. <sup>16-17</sup> Eunu ijana han dana oso uqa geh bahic qisadocob ija culdecemin nuigian," aden. [Odocob kobil oso bilen. Pasowa sab jec saen cunugna Pailat gihacdoc dana osol gihacdoc jonadec besitoloi.]\*

<sup>18</sup> Odocob dana cajaca am cunug age utaadi madein, "Qagadoga! Barabas gihacdocnadeb besitoga!" ein. <sup>19</sup> Odocob Barabas uqa taun benna ono han tulidumei dana qagadocob gihacdoc jona mudein.

<sup>20</sup> Euqa Pailat Jisas suldocob nuigianu odon. Odinu uqa dana cajaca am age haun utaadi maaden. <sup>21</sup> Euqa age haun ceseli utai madoin, "Na babalecna tuitu qoga! Na babalecna tuitu qoga!" doin.

<sup>22</sup> Odocob Pailat maadi cijeddon, "Eetanu? Uqa cel qisol mec odon? Ija uqa cal necnu ihoc dewegna cahuldoc oso qee felem! Ija gehca bahic qisadumig culdecemin nuigian," aden.

\* **23:16-17:** Age Mak 15.6 feiga.

<sup>23</sup> Euqa eu age jejenega ohisna Jisas na babalecna tuitu qocnu utaai madein. Odocob cit qocna bahic agena utaec aig qon. <sup>24</sup> Eunu Pailat eu agena je toodoo Jisas na babalecna tuitu qocnu cois en. <sup>25</sup> Odimei eu age dana gihacdochadec beseccnu madein eu besiton. Uqa dana han tulidumei taun benna ono dana oso qagadon. Uqa odimei agena je toodumei Jisas deweg na babalecna tuitu qoqaganu ebenevaga men.

*Age Jisas na babalecna tuitu qoin*

(Matju 27.32-44; Mak 15.21-32; Jon 19.17-27)

<sup>26</sup> Odocob Jisas ehudi belein. Saen eu age bebeli bileig jicna dana oso, ijan Saimon Sairinidec, taun benna ono nunuen ceguldoin. Odimeig cahacdodoig na babalec qatona mitocabil gahidu Jisas toodon.

<sup>27</sup> Odocob dana cajaca am ben bahic Jisas Saimonca tooalein. Dana cajaca am eunadec caja leih age Jisasnu qaqaigej due walocca sisili toodoin. <sup>28</sup> Odocob Jisas waldumei maaden, "Jerusalem caja, age ijanu cain qajowain qa agedodocnu agena melnu cois qaqaigeja. <sup>29</sup> Deel hona euna dana madoqagan, 'Caja melca qee, mel qee basegina eu age, odocob mel qee su adegina eu age ceeli bileigale!' oqagan. <sup>30</sup> Saen euna dana age aluh madoqagan, 'Toni cilehgaga!' oqagan.

(Hosea 10.8)

<sup>31</sup> Ge, age saen na cebac tatawen ceteh i edi odoginafi na galaleeb saenna age adi odoqagan?" aden.

<sup>32</sup> Loo je wooldoc dana lecis ha cedali ehi tein eu Jisasca osoben aqoqaganu cedali ehi tein. <sup>33</sup> Odimeig age cudun, ijan "Ilo Gatic," ono ti calimeig Jisas dana lecis loo je wooldoc eu aleca na babalec cijedna tuitu aqimeig caqusadecebile caculein. Oso Jisas eben meulana isec na babalecna tuitu qoin, odocob oso eben ansena isec na babalecna tuitu qoin. <sup>34</sup> Jisas maden, "O Mei, age eeta odogina eu qee dogina. Eunu agena silail cagasiadaga," en.

Odimeig uqana lotoc agedodoc satu udodoig siwi cedein. <sup>35</sup> Odimei dana cajaca ono tawein mecieegin Juda dana agena ilo eu age Jisasnu lelanec je mamadiein, "Uqa leih caahahaaden. Uqa Anutna Kraisfi uqa uqadodoc caahahoadia!" ein.

<sup>36</sup> Odimeig han dana ha uqanu lelanec je mamadeig uqa cemenug cocobi timeig wain gad qugiannu uutiein. <sup>37</sup> Odimeig maduduein, "Hina Juda agena kingfi hinadodoc caahahadoga!" ein.

<sup>38</sup> Odocob je i uqa ilona<sup>†</sup> jaqi qoin, "Dana i Juda agena king."

<sup>39</sup> Odocob loo je wooldoc dana lecis na babalecna tuitu aqalein oso uqa Jisas lelandudu madon, "Hina Anutna Kraisfi hinadodoc caahahadumeg eleha caahahalaga!" don.

<sup>40</sup> Euqa dana oso eu odi dah mamei cahacdu madon, "Hinana nun qoc eu odiwe ijana nun qoc. Ele dain ben leccaca ogona. Eunu hina Anut qee cucuidogonafo? <sup>41</sup> Elena cahuldoc ameg owona eu cois qa uqa cahuldoc osoca qee," don. <sup>42</sup> Odimei uqa Jisas madon, "Jisas, saen hina king calimeg ijanu cisdogale!" don.

<sup>43</sup> Odocob Jisas madon, "Ija mele mahigina, qila hina ijaca paradaisna bilewan," don.

*Jisas cal men*

(Matju 27.45-56; Mak 15.33-41; Jon 19.28-30)

<sup>44</sup> Odocob cam gemo ceheceb cam tu qocob hatu cunug gagatuc menen, ninijen li 3 kilok wesi. <sup>45</sup> Odocob cam tu lelen jajahulen lotoc ben tempelna hamol gunna caqusec tawoloi eu baladu lecidosn. <sup>46</sup> Odocob Jisas jejeg suli u utaai madon, "O Mei! Ija doloni hina ebenna migina!" don. Uqa eu odi dih madimei kis umei cal men.

<sup>47</sup> Han 100 cofadec dana eu odi odocob fimei Anut binan sulen. Odimei maden, "Mele bahic, dana i uqa dana ititom bahic!" en.

<sup>48</sup> Odocob dana cajaca ceteh calen eu foqaga cegulein eu age odi fimeig qada qaqaigej mugumuga fohifohidodoig ceselein. <sup>49</sup> Cunug osolosol Jisasnu doloig eu ageca, caja Galilidec Jisas toodoo hoin eu ageca nag onoca qisacdu tataweig ceteh i calen eu fein.

*Age Jisas deweg meen hatinna mudein*

(Matju 27.57-61; Mak 15.42-47; Jon 19.38-42)

<sup>50-51</sup> Aria, dana oso, ijan Josef, bilen. Uqa Juda agena jobon nag Arimatiadec. Uqa dana ititom. Uqa Anutna cul hoc saen susumudi bilen. Uqaha Juda agena gesilec tamanec qa uqa agena Jisas qagadocnu je madec odocca eunu cois qee el. <sup>52</sup> Uqa Pailat amegna limei Jisas deweg ganac ugiannu sisildon. <sup>53</sup> Odimei Jisas deweg ganac na babalecnaadec hewen toneceb lotoc senenec jeuldeceb ehi nui hatin aluh qeih hunein euna mudein. Heel eu dana oso qee mudec Jisas casac mudein. <sup>54</sup> Deel eu saciadoc deel odocob Juda agena cuha deel gun sanan migia oodon.

<sup>†</sup> 23:38: Grik jaqec je hilah leihna age je oso tubdu jaqein eu odi: Grik jaqec jena, Latin jaqec jena, Hibrus jaqec jenaca

<sup>55</sup> Odocob caja Jisas Galilidec toodoin eu age Josef toodocobil nuimeig Jisas deweg ganac hatinna adi mudein eu fein. <sup>56</sup> Odimeig age jobon ceseli belimeig mool dedeman meme Jisas deweg ganac joudoqaga bili saciادoin.

Juda agena cuha deel gunna age jaen mudecnу loo je cagoc gagadic madena odi odoин.

## 24

### *Jisas ceseli cajen*

(*Matju 28.1-10; Mak 16.1-8; Jon 20.1-10*)

<sup>1</sup> Cuhana qasil wele bahic caja eu age mool dedeman meme saciادoin eu cedi heheweig heel Jisas deweg ganac mudein ono belein. <sup>2</sup> Beli calimeig meen heel cebec cufa qoc eu oloclu fil mec ninijen fein. <sup>3</sup> Euna age dunuh lein qa Jisas Tibud deweg ganac qee felein. <sup>4</sup> Age dadanii tatawegin dana lecis lotoc senenec seeccca bahic wele cemenega tawesin. <sup>5</sup> Odocob cucuiеcca caja eu age jogoii maha mecidoin. Oodogin dana eu ale maadesin, "Age eetanu cal mec agena cudunna dana cebac bilia eu megegina? <sup>6</sup> Uqa ene qee nijel. Uqa wele ceseli cajeia. Galili hatu ono bibili maadennu cisoiga. <sup>7</sup> Dana Melah uqa dana silailca ebenegana mecebil na babalecna tuitu qocobil cal migian. Odocob deel cijeddochna haun ceseli cajigian," aden," adesin.

<sup>8</sup> Odocob caja eu age uqana jenu wawaga fogo don. <sup>9</sup> Hatin onodec haun ceselimeig malogom 11-pela eu ageca lein. Odocob ceteh amagana fein eu dana cajaca cunug ha maadein. <sup>10</sup> Caja age eu Maria Magdaladecca, Joana odocob Maria, Jems anag, eu age caja leihca ceteh eunu malogom maadein. <sup>11-12</sup> Euqa malogom caja age gad je madegina ec cisdoin. Odimeig agena jenu wawaga qee meleel. [Euqa Pita cajimei guguli Jisas deweg ganac mudein heelna nuen. Uqa jogoimei ceteh oso qee fel qa Jisas deweg ganac jelein lotoc eu himec fen. Odimei uqa adi odon ec waug cacaden ceselen.]

### *Dana lecis ale Emeas jicna cocobosi Jisas fesin*

(*Matju 16.12-13*)

<sup>13</sup> Deel euna himec eu ale togca odi Emeas jobon belesin, uqana cecelac Jerusalemdec eu 11-pela kilomita eu odi. <sup>14</sup> Odocob ale ceteh cunug calen eunu togodudu belesin. <sup>15</sup> Saen ale je mamadesi togodudu bebelesin Jisas uqadodoc cemenela leceb osoben cocobi belein. <sup>16</sup> Ale fesin qa uqa Jisas ec qee fogo alel. <sup>17</sup> Odocob Jisas maalen, "Ale eetanu je togodudu belesina?" alen.

Eu ale olanala gulucqecca tului tawesin. <sup>18</sup> Odimesi oso uqa ijan Kliopas sisildon, "Acahna, hina cele dana eundec osoldih uqa ono Jerusalem ceteteh cali hon qila deel leih hedoia eu qee dolfo?" don.

<sup>19</sup> Odocob Jisas sisilalen, "Cel ceteteh?" alen.

Odocob eu ale jejeg hewi madosin, "Ceteteh Jisas Nasaretdecnu calen eu. Dana eu uqa je hahun madec dana. Odocob uqa Anutca dana cajaca amagana cabi gagadic uu je gagadic mamadi cobon. <sup>20</sup> Egena ihanec dana benbenca, cofgec danaca cal migianuu madecebil na babalecna tuitu qoin. <sup>21</sup> Euqa wele bahic eguna wawige madec eu odi tawen eu uqa himec Isrel dana cajaca cahahagigian ec cisdom. Odocob je oso ha eu ceteh calen eunadec hocob qila eu deel cijed hedoian. <sup>22</sup> Eu himec qee. Caja leih eguna amnadec quqlubgeeigan. Eu age cocojagen heelna noigan. <sup>23</sup> Euqa uqa deweg ganac qee felein. Eu age ceseli bimeig ensel lecis amagana camasac mimesi maadesian eu uqa haun ceseli cajeia ec madeigan. <sup>24</sup> Egena amnadec leih heelna limeig caja madeigan odi bahic gulucdoigan qa uqa qee felein," dosin.

<sup>25</sup> Odocob Jisas maalen, "Ale gad! Je hahun madec dana agena jenu wawala meleecnu culumencu! <sup>26</sup> Anutna Krais uqa dain ben doc i edi uu li uqana kobolkobol ugian ec qee dosinafo?" alen. <sup>27</sup> Odimei Jisas uqanu Anutna jaqec je cunuguna madenanu sildialen, uqa Mosesna loo jena sanan mimej je hahun madec dana agena jaqec je cunug odi maalen.

<sup>28</sup> Eu age wele jobon cacali dana lecis eu ale lowasannu lesin eu dodoldoin. Odocobil Jisas uqa jobon eu cuculdi soeceb nuigiannu odon. <sup>29</sup> Euqa eu ale cahacdudu madosin, "Cam wele nonon tu hona. Hoga, eleca ene nijuqa," dosin. Eunu uqa leceb eu ale gami nijein. <sup>30</sup> Uqa eu aleca sab jec cabalna bilimeig bred umei eeldoc je maden. Odimei uqa bred fenadimei alen. <sup>31</sup> Amala fogo docob Jisas fesin qa eu ale amalana jausen. <sup>32</sup> Odocob eu aledodoc togodudu madesin, "Saen jic cuhul je malili Anutna jaqec je sildilelen ele wawile ceeleial!" esin.

<sup>33</sup> Odimesi eu ale mahuc bahic cajimesi Jerusalem ceseli belesin. Ono ale malogom 11-pela leih gami cegulein bibilegin cali lesin. <sup>34</sup> Cali ono leceb odi maalein, "Tibud eu mele bahic haun ceseli cajeia! Uqa Saimon amegna camasac meial!" alein.

<sup>35</sup> Odocob dana lecis eu ale jic cuhul cocobosin aleca calennu saadesin. Odocob Tibud bred fenialeceb amala fogo docob fesinnu ha sildiadesin.

*Malogom age Jisas fein**(Matju 28.16-20; Mak 16.14-18; Jon 20.19-23)*

<sup>36</sup> Saen eu ale eu odi maaadi tatawesin mahuc bahic Tibud age gemo li tawimei [maaden, "Malol ageca biliale," aden].

<sup>37</sup> Euqa age cucuiecca qeleleeg eu dol oso foqona ec cisdoin. <sup>38</sup> Euqa uqa maaden, "Age etanu geh cisdogina? Age eetanu wawaga dadanec ben bahic? <sup>39</sup> Ija jaimi ebenica feiga. Odocob fimeig dol age culunugaca tefulunugaca qee. Eunu ija bahic wawaga meleeiale. Euqa ija odica eu feiga. Hewitimeig tebandoiga. Odimeig doqagan," aden.

<sup>40-41</sup> [Uqa odi mamadi jaih ebenca ihacaden.] Euha age wawaga qee meleel eu age ceelecca dadanecca tawein eunu uqa sisiladen, "Age ene sab jecnu osocafo?" aden. <sup>42</sup> Age cul dool jana golin oc utein. <sup>43</sup> Eu umei uqa amagana jen.

<sup>44</sup> Odimei maaden, "Ceteteh inu bahic saen ija ageca cocobi hilob maadem. Ceteh cunug ijanu Mosesna loo jena jaqeinca, je hahum madec dana agena jaqechna jaqeinca, odocob Samna jaqeinca eu mele ihoc caligian," aden.

<sup>45</sup> Odimei uqa Anutna jaqec jenu wawaga fogo dugiannu cisdoc fogo duaden. <sup>46</sup> Odimei maaden, "Anutna jaqec je edi madena, 'Anutna Krais eu dain ben doc umei cal mecnadec deel cijeddocna haun ceseli cajigian. <sup>47</sup> Odocob eu uqa ijanna dana cajaca agena silailnu tului falicdocobil Anut agena silail cagasiadecnu je qasali maadoqagan. Age Jerusalem ene sanan mimei mahamaha cunug ihoc ligiannu age me je qasali maadoqagan,' ena. <sup>48</sup> Age eu ceteteh i wele fein eunu qasali maadeiga. <sup>49</sup> Dah meiga, ceteh oso Memige Anut suldocob ageca nigian ec je hahum maden eu ija sulduadigina. Euqa age ene taun benna sumudi bibilebil gagadic odoch ohisdec ageca nigian," aden.

*Anut Jisas ehudi sao jobon ceseli ten**(Mak 16.19-20; Aposel 1.9-12)*

<sup>50</sup> Odimei uqa ehadi taun ben eu cuculdi Betani jobon odi nuein, odimei uqa eben suli umei eeladen. <sup>51</sup> Uqa ono eelaaden [Anut ehudeceb cuculadi sao jobon ten.] <sup>52</sup> Eu age [gob cehi uqanu cuha fimeig] haun Jerusalem celii ceseli belein. <sup>53</sup> Odocob age saen cunugna tempelna Anut hetaga doc je madoloig.

## Me Je i Jon Jaqen Aqunec Je

Me je i cel dana bahic jaqen eu je oso qee nijel. Euqa Jon uqa me je i jaqen. Malogom oso Jisas uqa culaug ona eu Jon. (Age 13.23, 19.26, 20.2, 21.7, 20, 24 feiga.)

Me je ina Jon uqa Anutna Je cebac bileyeb catanena eu Jisas, odocob Cebac Bilec Catanec Je eu dana deweg ibuldumei ege gemona jo cehi bilen ec jaqen (1.14). Jon uqa dana cajaca age Jisas uqa Anut Melah eunu dumeig uqanu wawaga meleigiannu gale dona. Odimei Jisas uqa Anutna Krais uqa Anutna dana caja cahahaadecnu wele nesili ehuden eunuhu dana cajaca wawaga meleigiannu gale dona. Dana cajaca age Jisasnu wawaga meleecib uqa ijanna cebac bileyec oqagan ec jaqen. (Age 20.31 feiga.)

Jon uqa Anutna Je cebac bileyeb catanena eu Jisas ec casac jaqimei Jisas uqa kobolkobol odoo filfil odon eunu jaqen. Kobolkobol odon eu Jisas uqa Anut Melah, uqa Anutna Krais eunu ihacena. Odimei Jon uqa Jisas kobolkobol odon eu agena gugnu sildiaden. Odimei saen euna dana cajaca leih age Jisasnu wawaga meleecib toodoin, euqa leih Jisasnu wawaga qee meleel ec jaqen.

Jon uqa dac 13-17na Jisasna cad age uqa hewogaga bili odoin witic euna Jisas uqana malogom sab jejegin Jisas cesuladecnu je maaden ec jaqen. Jaqec je hedocob Jon uqa age Jisas hewudi gesildumei na babalecna tuitu qocobil cal men, odimei Jisas ceseli cajimei uqana malogomnu camasac calen ec jaqen.

Me je ina je leih eu ben nijia, eu odi. Je oso eu cebac bileyeb (1.4). Jisas uqa cebac bileyeb dana cajaca adena (10.28), odimei cebac bileyeb eu Jisas (14.6). Je oso eu fulacdoc (1.4). Dana cajaca agena fulacdoc eu Jisas (8.12). Je oso eu je qasali madec (1.7). Wa Joadec Jon uqa Jisasnu je qasali maaden (1.6-9). Je oso eu wawaga meleec (1.7, 20.31). Je oso eu mele gug. Mele gug eu Jisas (14.6). Je oso eu Anut Melah. Anut Melah eu Jisas (1.49), odocob Jisas uqa gaid Anut "Mei," en.

### *Je Dunuhnu Dado Mec*

1. Aqunec je (1.1-18)
2. Jisas uqana cabi oc sanan men (1.19-51)
  - A. Wa Joadec Jon, Jisas aqunidoc, uqana cabi on (1.19-34)
  - B. Jisas malogom 4-pela ceden (1.35-51)
3. Jisas dana cajaca amagana cabi on (dac 2-11)
  - A. Uqa wa odoo cob wain ibuldon (2.1-11)
  - B. Uqa tempel jo soidon (2.12-25)
  - C. Uqa Nikodimasca je madesin (3.1-21)
  - D. Wa Joadec Jon Jisasnu qasali madec malogom age Jisasca belein (3.22-4.3)
  - E. Jisas Sameria hatuna cocobon Sameriadec cajaca je madesin (4.4-42)
  - F. Jisas uqa kingna cabi dana oso eu melah me muden (4.43-54)
  - G. Uqa Jerusalem Juda agena sab ben jecnu ono nuen (dac 5)
  - H. Uqa dana 5,000 sab adimei cebac bileyeb bred eunu je iwaladen (dac 6)
  - I. Uqa Jerusalem talah jo sab jec benna ono nuen (dac 7-8)
  - J. Uqa dana ameg galuc mec calen eu me muden (dac 9)
  - K. Uqa sipsip cofadec me bahic galolo je maaden (10.1-21)
  - L. Uqa Jerusalem wele tempel eeldoin deel eunu cisdocnu ceguleinna ono Juda danaca fee dadanein (10.22-39)
  - M. Uqa Peria hatuna cabi on (10.40-42)
  - N. Uqa Lasaras cal mecnadec tulidocob cajen (dac 11)
4. Deel 6-pela hedocob Pasowa Sab Jec Ben Deel caligiannu ninjen Jisas uqa age qocobil cal migiannu Jerusalem ono nuen (dac 12-19)
  - A. Maria uqa mool dedemanca Jisas jaihna baseedu qon (12.1-11)
  - B. Jisas uqa kingwe Jerusalem dunuh len (12.12-19)
  - C. Gril dana leih age Jisas walein (12.20-36)
  - D. Juda dana cajaca mati bahic age Jisasnu wawaga qee meleel (12.37-50)
  - E. Jisas uqa uqana malogom isi culadigen ec maaden (dac 13-17)
    1. Jisas Pasowa sab jecna uqana malogom je maaden (dac 13-14)
    2. Jisas Getsemani Cabina nunuen uqana malogom je maaden (dac 15-16)
    3. Jisas uqadodocnuca, uqana malogomnuca, dana cajaca uqanu wawaga meleigian eu cunugnuca Anut inondon (dac 17)

- F. Judas uqa Jisas cad ebenegana mudeceb age Jisas hewudein (18.1-12)  
 G. Age Jisas gesildoin (18.13-19.15)  
 H. Age Jisas na babalecna tuitu qocobil cal meceb uqa heel cisein (19.16-42)  
 5. Jisas ceseli cajen (20.1-29)  
 6. Buk i ugana gug (20.30-31)  
 7. Cit qoc je (dac 21)

*Cebac bielecnu je*

<sup>1</sup> Wele gug qocna sao mahaca qee ifanecna je eu wele bilen. Je eu uqa Anutca bilen. Je eu Anut ijom. <sup>2</sup> Gug qocna bahic je eu uqa Anutca bilen. <sup>3</sup> Je euna dih Anut ceteteh cunug ifanen. Ceteh oso ugaca qee Anut ifanen eu qee bilel. <sup>4</sup> Je eu uqa cebac bielecnu gug. Cebac bielec eu dananu fulacdoc iletien.

<sup>5</sup> Fulacdoc eu tuna fulacdonia. Odocob tu eu fulacdoc cafuli qelecwe qee. <sup>6</sup> Anut uqa dana oso suldocob hon, ijan eu Jon. <sup>7</sup> Uqa dana cajaca me je qasali maadecnu hon. Uqa fulacdocnu qasali maadeceb uqa umna fulacdoc eunu wawaga meleigiannu hon. <sup>8</sup> Dana eu uqadodoc fulacdoc qee, uqa fulacdocnu qasali maadecnu hon. <sup>9</sup> Fulacdoc mele bahic dana cajaca cunug wawaga fulacadena eu mahana cali hugia odon.

<sup>10</sup> Aria, je eu mahana bilen. Anut uqa je euna maha ifanen qa dana cajaca cunug mahana bilein age uqanu qee doloin. <sup>11</sup> Uqa ugana gunna cali hon euqa ugana eundec age uqa qee oidelein. <sup>12</sup> Euqa leih age uqa oidein age uqa ijannu wawaga meleen. Eunu uqa Anutna mel ibuldocnu gagadic odoc aden. <sup>13</sup> Age Anutna mel cali hoin eu dana gale adecnafo, age dewenega gale docnafo anagail memegail golanagana qee basadelein euqa Anut uqadih odocna cali hoin.

<sup>14</sup> Je eu dana deweg ibuldocnu ege gemona jo cehi bilen. Uqa Anut amegna me bilecca mele bilecca am bec. Ege ugana kobolkobol fom. Kobolkobol eu Memige Anut Melah osol ugana, Memige Anut uqa suldocob nen.

<sup>15</sup> Jon uqa uqanu je qasali madi utaen, “Ija qee cali hoc bibiligin uqa wele bilen. Eunu dana inu ija mamadi maadem, ‘Uqa ija hib tooti hona eu ija wooltec,’ adem,” en.

<sup>16-17</sup> Anut uqa loo je Moses umna igen qa Anut uqa amegna me bilecca mele bilecca eu Jisas Krais umna igen. Eunu ugana Anut amegna me biley am bec eunadec ege cunug eelgen. Eeldoc me bahic eu filfil igen. <sup>18</sup> Dana oso Anut qee fel. Anut Melah osol, eu ugaha Anut, uqa Memige Anut wowogonu bilina, uqa Anutnu mageceb dom.

*Wa Joadec Jonna je*

(Matju 3.1-12; Mak 1.7-8; Luk 3.15-17)

<sup>19</sup> Jon ugana qasali maadec eu odi. Juda agena ilo dana Jerusalemdec age dana leih ihanec danaca Liwaica suladecebile Jonca li sisildu madoin, “Hina in?” doin.

<sup>20</sup> Odocobil Jon je qee jahunadel qa uqa camasac qasali maaden, “Anutna Krais\* eu ija qee,” aden.

<sup>21</sup> Odocob age sisildoin, “Odiqa eeta odeia? Hina Ilaijafo?” doin.

Odocobil uqa jejenega hewi maaden, “Qeeo, ija Ilaija qee,” aden.

Odocob age sisildoin, “Hina je hahun madec dananu ege sumuduquna eufo?” doin.

Uqaqa jejenega hewi maaden, “Eu qee,” aden.

<sup>22</sup> Odocob age haun sisildoin, “Odi qeefi hina in bahic magaga. Dana age sulgecebile hoqa eu hinadodocnu cel je magecem ege ageca ceseli li maadecnu madoqona,” doin.

<sup>23</sup> Odocobil Jon jejenega hewi maaden:

“Ija jejeg oso uqa wadauna<sup>†</sup> bibili utai maadena,  
 Tibudna jic tutuc mudeiga!” adena.

Eu odi weleca je hahun madec dana Aisaia uqa maden,” aden. (Aisaia 40.3)

<sup>24</sup> Aria, dana age Jon sisildoin eu Farisi suladecebile hoin. <sup>25</sup> Odocob age Jon sisildoin, “Hina Anutna Krais qeefi, hina Ilaijaha qeefi, hina je hahun madec dana euha qeefi eetanu dana cajaca wa joadagana?” doin.

<sup>26</sup> Odocob Jon jejenega hewi maaden, “Ija wana wa joadigina qa age gemona dana oso biliya eu age qee dogina. <sup>27</sup> Eu uqa hib tooti hugian. Ija ugana cabi dana me bahic ihoc qee, ija uqa jaih tacec cufalitocwe qee,” aden.

<sup>28</sup> Ceteteh i cunug Betani jobon Jodan wa naha ono isecna calen. Ono Jon dana cajaca wa jojoaadien.

*Jisas uqa Anutna Sipsip Nag*

\* <sup>1:20:</sup> Krais eu dana Anut ugana dana caja cahaaadeecn wele nesili ehuden. † <sup>1:23:</sup> Age je Matju 3.1na nijia eu feiga.

<sup>29</sup> Deel osona Jon uqa Jisas uqaca hohon fimei maaden, “Feiga, Anutna Sipsip Nag ihen. Uqa dana cajaca cunug mahana bilegina agena silail casagiadecnu hon.” <sup>30</sup> Dana inu ija wele maadem, ‘Ija qee cali hocna uqa bilen. Eunu dana oso ija hib tooti hona eu ija wooltec,’ adem. <sup>31</sup> Ijadodoc uqanu bahic qee dolom qa Isrel dana cajaca uqanu dogagannu ija wa jojoadiem hom,” aden.

<sup>32</sup> Odimei Jon uqa je iha qasali maaden, “Ija Kis Gun cuhudid cinigwe sao jobonnadec ni uqaca bibilen fem. <sup>33</sup> Ijadodoc uqanu qee dolom qa Anut ija dana cajaca wana wa joadecnu sulteceb hom eu uqa maten, ‘Hina Kis Gun nimei dana osoca bibileb fimeg eu uqa Kis Gunna wa joadigian,’ ten. <sup>34</sup> Eu oodon femnu dana i uqa Anut Melah eunu wele qasali maadem,” aden.

#### *Jisas malogom 4-pela ceden*

<sup>35</sup> Deel osona Jon uqa uqana malogom lecis gami tawein. <sup>36</sup> Tataweig uqa Jisas cocobi nunuen fimei maalen, “Fesia, Anutna Sipsip Nag ihen!” aden.

<sup>37</sup> Odocob malogom lecis eu ale odi maaleceb dosin eunu ale Jisas toodocobil belein.

<sup>38</sup> Bebeleig Jisas qaalimei eu ale toododosin facialimei sisilalen, “Eeta walesina?” aden.

Odocob ale Jisas jejeg hewi madosin, “Rabai, (uqana gug eu ‘Iwaladec’) hina cel jona nijigina?” dosin.

<sup>39</sup> Odocobil Jisas maalen, “Belimeb fesiale,” aden. Odocob ale uqaca belimeig uqa bibilen fimesi eu wesu 4 kilok odinu deel eu uqaca bilein.

<sup>40</sup> Dana lecis ale Jon uqa Jisasnu maalen dah mimesi Jisas toodosin eundec oso eu Andru, uqa Saimon Pita waliag. <sup>41</sup> Odocob uqa Jisas cuculdi limei uqa waliag Saimon gulucdumei madon, “Ege wele Mesaia gulucdoqan,” don. (“Mesaia” uqana gug eu Anutna Krais uqa Anutna dana caja cahaaadecnu wele nesili ehuden.) <sup>42</sup> Odimei uqa ehudeceb Jisasca hosin.

Odocobil Jisas uqa Pita mecidudu madon, “Hina ijain Saimon, Jon melah. Hibna age Kifas hoqagan,” don. (“Kifas” eu Aram jena. Age Grik jena falicdocabilfi eu “Pita.”)†

#### *Jisas uqa Filip Natanielca utaaeleceb toodosin*

<sup>43</sup> Deel osona Jisas Galili hatu ono nuigia bili caji nuen. Nuimei uqa Filip gulucdumei madon, “Hina ija tootaga!” don. <sup>44</sup> Filip uqa Betsaidadec, eu Andru Pitaca alena jobondec.

<sup>45</sup> Odocob Filip uqa Nataniel gulucdumei madon, “Moses uqa loo jenaca je hahun madec dana ageca dana oso cali hugiannu jaqein eu ege gulucdoqan. Uqa Jisas Nasaretdec, Josef melah,” don.

<sup>46</sup> Odocob Nataniel sisildon, “Cel ceteh me oso Nasaretdec hugianfo?” don.

Odocob Filip madon, “Ono limeu fegan,” don.

<sup>47</sup> Odocob Jisas uqa Nataniel uqaca hohon fimei uqanu maaden, “Feiga, eu dana Isreldec bahic, uhulec oso uqa waugna qee nijel!” aden.

<sup>48</sup> Odocob Nataniel uqa Jisas sisildu madon, “Hina adi ija dumaninu dumeg madagana?” don.

Odocob Jisas jejeg hewi madon, “Filip qee li mahec ninijen hina na dan saluna bibilegen mecihem,” don.

<sup>49</sup> Odocob Nataniel uqa Jisas jejeg hewi madon, “O Meca, hina Anut Melah! Hina Isrel agena king!” don.

<sup>50</sup> Odocob Jisas madon, “Hina na dan saluna bibilegen mecihem ec mahigannu wawin meleenafo? Hina isi ceteh qila fagana eu wooldoc ceteteh caloqagan eu fegan!” don.

<sup>51</sup> Odi madumei maaden, “Ija je mele maadigina, age sao jobon hudec tataweb Anutna ensel age Dana Melahca toni tobi eebil foqagan,” aden.

## 2

#### *Kena jobon ono dana oso caja on*

<sup>1</sup> Tu lecis hedocob Kena jobon Galili hatuna dana oso caja ocobocabecnu agena kobel toodu cegulimeig sab wainca jein. Jisas anag Maria uqaha ono li bilen.\* <sup>2</sup> Euha Jisasca uqana malogom gami ono hoqagannu je sulduadecebil ageha hu bilein. <sup>3</sup> Bibilegin wain jecnu qee meceb Jisas anag uqa madon, “Agena wain qee meia,” don.

<sup>4</sup> Odocob Jisas uqa anag jejeg hewi madon, “Au, hina eetanu odi matagana? Ijana saen eu qee hoc nijia,” don.

<sup>5</sup> Odocob Jisas anag cabi dana maaden, “Uqa cel je maadeceb eu toodoo odoigale,” aden.

† <sup>1:42:</sup> “Kifas Pitaca” alena gug eu “meen.” \* <sup>2:1:</sup> Jisas kobolkobel odonnu je mati eu Jonna bukna nijen. Age 2.11ca, 2.23ca, 3.2ca, 4.54ca, 6.2ca, 6.14ca, 6.26ca, 9.16ca, 11.47ca, 12.18ca, 12.37ca eu feiga.

<sup>6</sup> Aria, ono age wa halon meenna mudec 6-pela mecebil tawoloi. Juda dana dewenega soidocnu kobil Mosesna loo je nijen eu odocnu meen halon tawoloi. Meen halon osolosol age wa 100 lita odi ilanocnu ihoc. <sup>7</sup> Odocob Jisas cabi dana maaden, “Age meen halon eu wa o daneiga,” aden. Odocob age meen halon wa o danecebile bi am ben. <sup>8</sup> Odimei maaden, “Qila wa naha wetimeig sab cilec cofdoc ehi li utecebile jeia,” aden. <sup>9</sup> Age odi odocobil wa eu wain ibuldon eu uqa ji fen. Uqa wain anadec eu qee dol, cabi dana wa wetein eu ageqa doin. Odocob sab cilec cofdoc eu uqa dana caja oc eu utadocob hocob <sup>10</sup> madon, “Dana cunug age wain me bahic casac adecebile jegina, me eu geh ji hedocobil hibna me bahic qee eu adecebile jegina. Hinaqa me odoga, hina wain me bahic gesac mimeg qila i hewi ahoga!” don.

<sup>11</sup> Eu Jisasna kobolkobil odoc matu eu Kena jobon Galili hatu ono odon. Eu odocna uqa uqana kobolkobil ihacadene. Odocobnu uqana malogom uqanu wawaga meleen.

<sup>12</sup> Eu hedocob Jisasca, anag waliagulca, malogom gami Kapaneam jobon ni belein. Odimeig deel leih ono bileen.

*Jisas uqa idadec dana tempelnadec ititacadene  
(Matju 21.12-13; Mak 11.15-17; Luk 19.45-46)*

<sup>13</sup> Aria, Juda agena Pasowa Sab Jec Ben Deel cali hugia oodon, Jisas Jerusalem ono ten.<sup>†</sup> <sup>14</sup> Jisas uqa tempel dunuhna dana age idadeegin gulucaden. Age bulmakaucha, sipsipca, cuhudidca fafajegin dana ageha meen qaig wadacwuducdodogin feciaden. <sup>15</sup> Odimei uqa halu matica cedime luc cubusime danaca, sipsipca, bulmakaucha, tempelnadec qisaaadi ititacadene. Uqa meen qaig wadacwuducdoc dana agena cabal suli geleceb agena qaig golodon. <sup>16</sup> Odimei uqa cuhudid fajec dana maaden, “Meina jo idadec cudun cain muduwain! Ceteh i cedadi ehi beleiga,” aden. <sup>17</sup> Jisas uqa odi odocob uqana malogom age Anutna jaqec jena je oso nijia cisdoin eu odi,

“Hinana jonus ija deweni ninijec eu ji hedona,” en. *(Buk Song 69.9)*

<sup>18</sup> Jisas odi odocob Juda dana age Jisas sisildoin, “Hina odi odocnu nijiafo eu cel kobolkobil odoc ihacgecem feqan?” doin.

<sup>19</sup> Odocob Jisas jejenega hewi maaden, “Age tempel i wagalecebile tonecebile ija deel cijedna haun cehigen,” aden.

<sup>20</sup> Odocob Juda dana age sisildoin, “Tempel i cehecnu sanan mimeig cabi oogin cabi gel 46 ihoc leceb hedumeig culein. Hina adi deel cijednadil tempel haun cehegan?” doin.

<sup>21</sup> Euqa Jisas tempeln qee madel, eu uqa dewegnu maden. <sup>22</sup> Eunu hibna uqa cal mecnadec ceseli cajeceb uqana malogom age Jisasna je inu dahiniga fogo docob age Anutna jaqec jenua, Jisas je maden eunuca wawaga meleen.

*Jisas uqa dana cunug dumanaga wele don*

<sup>23</sup> Odocob Jisas uqa Jerusalem ono Pasowa Sab Jec Ben saen bibilen dana matica age uqa kobolkobil oodon fimeig uqa ijannu wawaga meleen. <sup>24</sup> Euqa Jisas uqa dana cunug dumanaga don. Eunu uqa dana eundecnu deweg qee nijel. <sup>25</sup> Jisas uquadoc dana wawaga dunuhna ninijen don. Eunu uqa oso uqa hu dana agena gugnu je mateceb dugen odi madecnu qee nijel.

### 3

*Jisas Nikodimasca je madesin*

<sup>1</sup> Ono Juda agena ilo oso ijan Nikodimas bilen. Uqa Farisi am eundec oso. <sup>2</sup> Dana eu witic osona uqa Jisasca humei madon, “O Meca, hina kobolkobil odogona eu oso odocwe qee, euqa oso Anutna uqaca bilecebfu eu odocnu ihoc. Eunu hina iwalgec dana Anut sulheceb hom eu ege doqona,” don.

<sup>3</sup> Odocob Jisas uqa jejeg hewi madon, “Ija je mele mahigina, oso uqa haun qee basudecebile uqa Anutna cul qee feiaun,” don.

<sup>4</sup> Odocob Nikodimas sisildon, “Dana ben mi hedocob eu adi haun basudigian? Uqa anag waug dunuh leceb haun basudecw qee!” don.

<sup>5</sup> Odocob Jisas jejeg hewi madon, “Ija je mele mahigina, oso uqa wanaca kisnaca qee basudecebile uqa Anutna cul dunuh lecwe qee. <sup>6</sup> Oso dana cajaca gug tatawi basecebile cali hona eu dana deweg cebac ona. Oso Kis baseceb cali hona eu kis cebac ona. <sup>7</sup> Ija age cunug haun basadecnu ec mahiga eunu Cain tumatumagaun. <sup>8</sup> Fufu uqa ana isec nuigiannu gale dona eu odi nuina. Hina uqa fulufulueceb tebandogona qa anadec hona, ana nuina hina qee dogona. Dana cunug age kis basadeceb cali hogina euha odi bahic,” don.

<sup>9</sup> Odocob Nikodimas sisildon, “Ceteh i mataga eu adi cali hugian?” don.

<sup>†</sup> 2:13: Age je Mak 14.1na nijia eu feiga.

<sup>10</sup> Odocob Jisas jejeg hewi madon, "Hina Isrel agena iwaladec osoqa, hina eu qee dogona, eu adi? <sup>11</sup> Ija je mele mahigina, ege doqona eunu maadoqona, ege fom eunu qasali maadoqona, euqa eguna qasali maadec docnu culegina. <sup>12</sup> Ija ceteh mahanadecnu maadecemin wawaga mele qee el. Ija ceteh saonadecnu maadeceminfì adi wawaga meleigian? <sup>13</sup> Oso sao jobonna qee ti calel. Dana Melah himec uqa sao jobonnadec toni nen," don.

<sup>14-17</sup> "Anut uqa Melah mahana dana agena silailnu gesiladijannu suldocob qee nel qa mahana dana cahahaadeceb demico biluqagannu suldocob nen. Odocob Anut uqa dana cunug mahana bileyina nalunuga mimei cunug age uqanu wawaga meleigian eu age qee fadalowain qa age cebac biley catanec eu oqagannu uqa melah osol himec culiadon. Eunu Moses uqa wadauna\* man sononec ihicon qoc suli u caqusenwe dana cunug age uqanu wawaga meleena eundec age cebac biley catanec eu oqagannu Dana Melah age odi suli u caqusuqagan," don.

<sup>18</sup> "Oso uqa Melahnus waug meleena eu uqa gesildoc qee gulucdoiaun. Euqa oso uqa waug qee meleena uqa Anut Melah osol ijannu waug qee meleelnu eu uqa wele gesildoc oc bilina. <sup>19-20</sup> Gesiladecnu silig i edi. Fulacdoc mahana wele nen. Dana ageqa age cunug me qee odogina eu age fulacdoc sagagdogina. Odimeig age egena odoc camasac meiaun imeig fulacdocna qee hogina. Eunu agena odoc me qee nijianu fulacdoc eu cewudimeig tuna biley gawegina. <sup>21</sup> Osoqa uqa mele kobol odona eu fulacdocna hona. Eunu Anut cesuldocob uqa Anutna kobol toodu odona eu dana age camasac foqagan," don.

### *Wa Joadec Jon Jisasnu qasali maden*

<sup>22</sup> Saen eu hedocob Jisas uqana malogom gami Judia hatuna belimeig bileyin. Ono bibili Jisas dana wa joaden. <sup>23</sup> Jon ugaha Ainan jobonna wa mati bahic nijieinnu ono dana wa jojoaadi bilen. Ainan eu Salim jobon ono isec nijen. Dana cajaca uqaca liliein, uqa wa jojoaadien. (<sup>24</sup> Saen euna Jon gihacdoc jona qee mudec bibilen.)

<sup>25</sup> Saen euna Jonna malogom age Juda dana osoca age Juda agena kobilan age dewenega gegehin medcainnu wa joc ololg eunu togodudu fee dadanein. <sup>26</sup> Odimeig age Jonca humeig madoin, "Meca, dana uqa wele, hina Jodan wa gesacna ono isec bibilegan, hinaca hon, hina uqanu je qasali magem eu uqadodoc dana wa joadena. Odocob dana cajaca cunug age uqaca legina!" doin.

<sup>27</sup> Odocob Jon jejenega hewi maaden, "Anut uqa sao jobon bilia uqa dana oso ceteh oso qee utecebfì dana eu ocwe qee. <sup>28</sup> Ija wele maadem, ija Anutna Krais qee. Anut sulteceb ija uqana aquunitoc hom eu agedodoc ijanu qasali mamadegin doin. <sup>29</sup> Dana oso uqa caja ocob dana eu uqa caja eu gemug. Dana caja ona eu uqana danah eu tatawi caja gemug je madeceb dah mamei waug ceel bahic ena. Eunu ijaha qila ijana ceeli biley ihoc lena. <sup>30</sup> Uqa ijan eu meca caligian. Odocob ija ijani eu mahana tonigan," aden.

<sup>31</sup> Dana ohisdec nen uqa dana cunug wooladec ohis bilina. Oso mahanadec hon eu mahanadec dana, uqa ceteh mahana nijia eunu je madena. Euqa oso sao jobonnadec nen uqa dana cunug wooladec ohis bilina. <sup>32</sup> Uqa wele fifi dudu en eunu je qasali madena euqa dana cajaca cunug age uqana qasali maadec culegina. <sup>33-34</sup> Dana eu Anut suldocob nen eu uqa Anutna je madena. Ge, Anut uqana Kis eu ihoc lec utina. Eunu oso uqa ohisdec uqana qasali maadec dah mimei gagadicca hewena eu uqa je sis mec odi madena, "Anut uqa mele bahic," ena. <sup>35</sup> Memige Anut uqa Melahnus nalug mena, uqana ceteteh cunug uqa ebenna muden nijia. <sup>36</sup> Oso uqa Anut Melahnus waug meleena eu uqa cebac biley catanec eu wele on. Oso uqa Anut Melah je madena eu toodu qee odona eu cebac biley catanec qee feiaun qa Anutna gemag bec eu uqa deweg fagdona.

## 4

### *Jisas Sameriajdec cajaca je madesin*

<sup>1-3</sup> Saen euna Farisi age Jisas uqa Jon wooldoc dana mati bahic uqana malogom ibuldogina, mati bahic wa joadena ec doin. Euqa Jisas uqadodoc dana qee wa joadel, uqana malogom agedih dana wa joadein. Odocob Tibud uqa je eu dumei Judia hatu culdimei Galili hatu ono ceseli nuen. <sup>4</sup> Aria, uqana jic nuigiannu eu Sameria hatu gemona idi nuen.

<sup>5</sup> Uqa Sameria hatu gemona nuimei uqa taun oso hacna calen, ijan eu Sikar. Sikar isec maha oso nijen, maha eu weleca Jekob uqa melah Josef uqana bahic biligiannu uten. <sup>6</sup> Ono ha wa hunec oso nijen, eu ijan Jekobna wa hunec. Odocob Jisas uqa jic cobonnu siw muduga docob uqa wa hunecna isec bilen, saen eu cam tutuc cehec tatawen.

\* **3:14-17:** Age je Matju 3.1na nijia eu feiga.

<sup>7-8</sup> Jisasna malogom age sab fajoqagannu taun ono wele belein. Odocobil Sameriadec caja oso wa wetigiannu hocab Jisas madon, "Wa wetitaga jiga," don. <sup>9</sup> Odocob Judaca Sameriaca age sagagdocobdocob bileinnu caja eu madon, "Hina Juda dana, ija Sameriadec, adi wa wetihencu matagana?" don. <sup>10</sup> Odocob Jisas jejeg hewi madon, "O caja, hina bagol Anut uqa dana caja adena eu doummiqa, hinaha in maheia, 'Wa wetitaga jiga,' heia euha doummiqa hina uqa sisildoum, 'Wa itiga,' doum, uqa cebac bilec wa oso iheceb joun," don. <sup>11</sup> Odocob caja uqa madon, "Dana Ben, hina wa wetecnu halonca qee. Wa hunec euha dunuh bahic nijia. Hina cebac bilec wa eu anadec organ? <sup>12</sup> Ege jajanige Jekob uqa wa hunec i igen. Uqaca, melahulca, uqana bulmakau sipsipca wa i joloig. Hina uqa wooldoc madaganafao?" don. <sup>13</sup> Odocob Jisas jejeg hewi madon, "Cunug wa i jegina eu age haunhaun wa gab adena. <sup>14</sup> Osoqa wa ija utecemin jigiaqa eu haun wa gab qee doiaun. Wa ija utecemin jigian eu ibuldumei uqa dunuhna cebac wa eu fifiji bibi nijigian. Wa euha cebac bilec catanec ocnu silig tawigian," don. <sup>15</sup> Odocob caja madon, "Dana Ben, ija haun wa gab teiaunnu, ijaha ene humig wa wetigaunnu wa eu ija itecim jiga!" don.

<sup>16</sup> Odocob Jisas uqa caja madon, "Cois, hina limeg gemun madocom ceseli hosiale," don. <sup>17-18</sup> Odocob caja jejeg hewi madon, "Ija gemunica qee," don. Odocob Jisas madon, "Hina dana 5-pela cedadem. Qila dana osoca bilesina eu hina gemun qee, eu mele madaga. Eunu hina ija gemunica qee tagana eu tutuc madaganafao," don. <sup>19</sup> Odocob caja jejeg hewi madon, "O Dana Ben, hina je hahun madec dana eu dugina. <sup>20</sup> Ege memigeil age aluh ene tawena euna Anutnu cuha foloig, odocob age Juda dana madegina, 'Jerusalem dih eu Anutnu cuha fecnu cudun,' egina. Eu adi?" don.\*

<sup>21</sup> Odocob Jisas madon, "Caja, ijana jenu wawin meleeiale. Saen oso hona, saen euna dana age Memige Anutnu ene aluhna himec qee cuha fowain, odimeig Jerusalem ono himech qee cuha fowain. <sup>22</sup> Age Sameria dana cuha fec qa feginha, uqua cuha feginha eu uqana gug qee dogina. Cahaaadec silig eu Judadec cali hona. Eunu ege Juda dana ege cuha foqona, eu uqana gug doqona. <sup>23</sup> Euqa saen oso hugian, saen euha wele hon nijia, saen ina dana mele cuha feginha age Memige Anutnu Kisnaca mele jenaca cuha foqagan. Dana eundec Memige Anutnu cuha feginha eu uqa gale dona. <sup>24</sup> Anut uqa kis. Odocob age uqanu cuha feginha eu age kisnaca, mele jenaca cuha fec bahic foqagan," don. <sup>25</sup> Odocob caja uqa Jisas jejeg hewi madon, "Mesaia uqa hona, age Krais dogina, eu ija dugina. Uqa humei uqa eu odocnu cunug iwaligigan," don. <sup>26</sup> Odocob Jisas madon, "Dana eunu madaganafao eu ija. Ija hina mahigina eu uqa ijom," don.

<sup>27</sup> Odi madodon uqana malogom cali hoin. Odimeig age Jisas caja ica je mamadesin fimeig tumatumaein. Euqa age hina eeta gale hena, eetanu caja ica je madesina oso qee sisildu fel. <sup>28</sup> Odocob caja eu uqana wa halon wa hunecna culimei ceseli taun limei ono dana maaden, <sup>29</sup> "Belimeig wa hunecna dana oso feigale, uqa ija ceteh cunug odom eu qasalteia. Uqa Anutna Kraisfa?" aden. <sup>30</sup> Odocob dana age taun culimeig Jisascalein.

<sup>31</sup> Lelegin Jisasna malogom age Jisas cesusdudu madoin, "Meca, hina sab jagale!" doin. <sup>32</sup> Odocob uqa maaden, "Ija sab jec osoca age eunu qee dogina," aden. <sup>33</sup> Odocob malogom agedodoc togodudu madein, "Oso hu sab uteceb jieafo?" ein. <sup>34</sup> Odocobil Jisas maaden, "Oso sulten uqa madena eu odocnuca, uqana cabi u hedocnuca eu ijana sab jec," aden.

<sup>35</sup> "Age jagel 4-pela hedocob cabina ceteteh wal meceb cedeqan ec qee madeginafo? Ija maadegina, age didii feiga, cabina ceteteh cedeqnu wele wal migia odona! <sup>36</sup> Oso wele ceteh cehen uqaca, oso wal men eu ceden uqaca osoben wawaga ceeleceb biluqagannu oso uqa cabinadec ceteh wal mec cedimej jo bisna menu eu cabinu ameg ona. Odimei uqa wal men eu cebac bilec catanecna ehi li mudina. <sup>37</sup> Feiga, ene je oso ihoc lena, je eu ihen, 'Oso cabi umei ceheceb, oso hu wal meceb cedena,' je eu ihoc lena. <sup>38</sup> Ija age ceteh age cabi qee oloin, qee ceheleinca cabi eunadec cedoqagannu suladem. Leih age ono cabi cehein. Ageqa euna limeig agena cabi gagadic odocna cehein euna sab cedeiga," aden.

<sup>39</sup> Caja uqa Jisasnu qasali maaden, "Uqa ija ceteh cunug ija odom eu qasalten," aden eunu Sameria taundec dana matica age Jisasnu wawaga meleen. <sup>40</sup> Eunu Sameriadec age Jisasca humeig ninidudu madoin, "Hina nag egeca biluqale," doin. Odocobil Jisas uqa deel lecis ageca biley. <sup>41</sup> Odocob dana cajaca mati age Jisasna jenu wawaga meleen. <sup>42</sup> Odimeig caja eu madoin, "Hina je magem eunu himec wawige meleec qee ihoc lel. Egedodoc uqana je dah mom. Uqa dana cajaca cunug mahana bileyina agena cahahahaadec eu ege qila doqona," doin.

*Jisas uqa kingna cabi dana oso eu melah me muden*

\* **4:20:** "Aluh ene tawena" caja uqa eunu maden eu Gerisim aluh, eu Sameria hatuna tawen. Sameria age Gerisim aluhna cuha ben fefeig ihanogqagannu ceguloloig. Age Luk 9.53 feiga.

<sup>43-44</sup> Jisas uqadodoc qasali maden, “Je hahun madec dana uqa ugana gug hatuna binanca qee,” en. Eunu uqa deel lecis Sameria gami bilimeig cuculadi Galili hatu ono nui cobon.

<sup>45</sup> Odocob Galili eundec ageha Jerusalem ono Pasowa Sab Jec Ben Deelna nui bilimeig kobolkobol cunug oodon fein. Eunu uqa Galili hatu ono caleceb uqa feele dumeig ageca bielecnu madoin.

<sup>46</sup> Odocob Jisas uqa haun ceseli Kena jobon Galili hatuna calen. Jobon euna wele uqa madeceb wa eu wain ibuldon. Kapaneam jobon ono kingna cabi dana oso bilen. Uqa melah hag ben umei nijen. <sup>47</sup> Odocob uqa Jisas Judiadec Galili ene hon ec dumei melah uqa cal migia odonnu uqa Jisasca limei ninidudu madon, “Hina ijaca numeu ija melami me muditagale,” don. <sup>48</sup> Odocob Jisas uqa jejeg hewi madon, “Age kobolkobol odochca gaga odocca qee fifeig age wawaga qee meleecaun,” don. <sup>49</sup> Odocob cabi dana eu Jisas madon, “O Dana Ben, nowale, melami qee cal mec ninijeb ono calowale,” don. <sup>50</sup> Odocob Jisas madon, “Nugale, hina melem eu cebac biligian!” don. Dana eu Jisasna je waug meleecub non.

<sup>51</sup> Uqa jobon nunu jicna ugana cabi dana bebegin gulucadeceb madoin, “Hina melem medoia cebac bilia!” doin. <sup>52</sup> Odocobil uqa sisiladi maaden, “Cel saenna melami hag medoian?” aden. Odocob age madoin, “Eu cum wesu 1 kilokna ugana hag medoian,” doin. <sup>53</sup> Age madeceb bil mel memeg uqa saen euna bahic Jisas maten “Hina melem cebac biligian,” ten ec cisdon. Odimei ugaca ugana eundec cunugca Jisasnu wawaga meleen. <sup>54</sup> Jisas uqa Judiadec Galili hatu ono limei odon eu kobolkobol odoch lecisdon.

## 5

### *Jisas Betesda wa fifiji bec gudocna dana oso me muden*

<sup>1</sup> Eu hedocob Juda agena cuha fec deel gun oso cali hugia oodon Jisas uqa Jerusalem ono ten.\*

<sup>2</sup> Aria, Jerusalem meen gel alildocna jic cebec oso nijen, eu ijan Sipsip Jic Cebec. Euna isec wa fifiji bec gudoc nijina, eu Aram jena Betesda egina.† Eu qeihna isec jo hamol 5-pela cehec tawen. <sup>3-4</sup> Jo hamol euna dana caja hagca mati ono nijein. Eu age amaga galuc mecca, laleg mecca, dewenega me qee mecca nijein. [Saen esuesu Tibudna ensel oso ni wa mulodon. Wa mulodocob oso cunug wooladi aquni wana toni wa jacob eu hag medoc on. Hag filfil aqen eu meaden. Eunu age cunug wana mulodoc saennu susumudi nijein.]

<sup>5</sup> Ono dana oso bilen eu hag umei cabi gel 38 ihoc lec gaid hag nijoloi. <sup>6</sup> Jisas uqa dana eu ninijen fimei uqa hag saen odi cecelacca nijina dumei sisildu madon, “Hina hag mehecnu gale henafo?” don.

<sup>7</sup> Odocob hag dana eu Jisas jejeg hewi madon, “Dana Ben, ija cesultec oso qee bilina. Wa mulodocob ija mahuc tonecwe qee. Tonecnu odocomin oso mahuc hu woolti tonimei wa jona,” don. <sup>8</sup> Odocob Jisas madon, “Hina cajimeg hinana taeg umeg coboga,” don. <sup>9</sup> Mahuc bahic dana hag medocob caji ugana taeg umei jic cobon.

Aria, deel Jisas uqa me muden eu Juda agena cuha deel. <sup>10</sup> Euqa Juda dana age dana hag medon eu madoin, “Qila cuha deel, hina eetanu hinana taeg gahidogona? Egena loo je eu odi odocnu cain ec madena,” doin. <sup>11</sup> Odocobil uqa maaden, “Dana uqa me mitia uqa mateceb ijana taeg umig cobigina,” aden. <sup>12</sup> Odocob age sisildoin, “Dana eu hinana taeg umeg coboga heia eu in?” doin. <sup>13</sup> Dana mati bahic cudun euna beleinnu Jisas uqa filec isec nuen. Eunu dana hagca eu in uqa me muden eu qee dol.

<sup>14</sup> Hibna Jisas uqa dana eu tempelna cocobon gulucdumei madon, “Faga, hina hag mehen. Ceteh me qee bahic eu wooldoc hinana hag dewenna hoiaunnu haun silail cain magauna,” don. <sup>15</sup> Odocob dana eu nuimei Juda dana maaden, “Me miten eu Jisas,” aden.

<sup>16</sup> Odocob Juda dana age Jisas uqa Juda agena cuha deelna eu odonnu aqati toodoin. <sup>17</sup> Odocob Jisas uqa Juda dana maaden, “Ija Mei gaid cabi oloi, qila ha cabi ona eunu ija ha cabi odi ugina,” aden. <sup>18</sup> Age madein, “Cuha deelna loo je gadac tefacdon eu himec qee, uqa ha madena, ‘Anut uqa ija Mei,’ ena eunu uqadodoc uqa Anutca ele ihocihoc biluwuna ena,” ein. Odi madecebnu age Jisas qocnu geh cisdoein.

### *Jisas uqa Anut Melah ugana gugnu Juda dana je maaden*

<sup>19-20</sup> Eunu Jisas uqa Juda dana maaden, “Ija je mele maadigina, Anut Melah uqadodoc dih ceteh oso odocwe qee. Uqa Memige Anut oodon fena eu himec uqa odona. Memige

\* <sup>5:1:</sup> Jonna buk ugana naha ina Jisas uqa Juda agena cuha fec deel gunnaca, agena cuha fec bennaca ceteteh odon eunu je mati nijia. Age 5.1ca, 5.9ca, 6.4ca, 7.2ca, 10.22ca eu feiga. Doc dana mati age Jon uqa Jisas eu Juda agena cuha fec deel cunugnu gug eu odi ihacadecnu gale don ec cisdogina. † <sup>5:2:</sup> Doc dana mati age wa fifiji bec gudoc eu Betsaida ec cisdogina.

Anut uqa Melahnu nalug menu. Uqa ceteteh cunug uqadodoc odona eu Melah ihacdonia. Mele, age fimeig tumatumaoqagannu Memige Anut uqa ceteteh qila fegina eu ceteteh wooladec ihacdugian. Eunu Memige Anut odona eu himec Anut Melah odona.<sup>21</sup> Memige Anut uqa cal mein eundec tuliadimei cebac biley haun adenawе, odi Melah osooso uqadodoc cisdock toodu cebac biley haun aden.<sup>22-23</sup> Ge, Memige Anut uqa oso qee gesildona qa cunug age Memige Anut ijan saulal mudeginawе age Melah ijan ha odi saulal muduqagannu, uqa Melah gesiladigianu cabi cunug culiton. Oso Melah saulal qee mudina eu uqa Memige, uqa Melah suldon, euha saulal qee mudina,” aden.

<sup>24</sup> “Ija je mele maadigma, oso ijana je dugiaqqa, sulten eu uqana jenu waug meleigiaqa, eu uqa cebac biley catanec wele on. Uqa gesildocna qee leiaun qa uqa cal mecnadec cebac biley nana wele leti len,” aden.

<sup>25</sup> “Ija je mele maadigma, saen eu wele hon bilia. Saen ina cal mein eundec age Anut Melahna jejeg dah moqagan. Dah mimeig eu age cajimeig cebac bliuqagan.<sup>26</sup> Ge, Memige Anut uqadodoc cebac biley gug bilina. Odiwe ha uqa Melah cebac biley gug biley culiton.<sup>27</sup> Odocob Melah eu uqa Dana Melah eunu Memige Anut uqa Melah madon, ‘Cois, hina dana cunug gesiladecnu hina ebenna migina,’ don.<sup>28</sup> Age inu cain tumatumawain. Saen hugian, saen euna cunug age qalqalna njiegina uqa jejeg dah moqagan.<sup>29</sup> Dumeig age cali hoqagan. Agena me odo nijina eundec age cebac biley catanec oqagan, me qee odo nijina eundec age gesiladec me qee oqagan,” aden.

#### *Dana age Jisasnu qasali maaden*

<sup>30</sup> Jisas je haun maaden, “Ija ijana cisdock toodu qee odigina qa sulten eu uqana cisdock toodu odigina. Eunu ija cuhanuc ceteh oso odocwe qee. Memige mateceb dah migina eu toodu dana dewenega je ila mi gesiladigma. Deweneganu je eu madigma eu tutuc,” aden.

<sup>31</sup> “Ijanel ijana gugnu je qasali maadigmifi dana age qasali maadec inu meleecwe qee.<sup>‡</sup>  
<sup>32</sup> Euqa oso ijana gugnu je qasali maaden. Uqa ijanu je qasali maaden eu mele je ija dugina,” aden.<sup>§</sup>

<sup>33</sup> “Agedodoc wele dana sos leih Jonca suladecebili sisidocobil uqa ijanu je mele qasali maaden.<sup>34</sup> Euqa ijana gugnu qasali maadec eu dana osonadec qee. Ijaqa je eu Anut age caahahaadecnu maadigma.<sup>35</sup> Jon uqa gowoc, eu ileten. Age saen nag odi fulacdoc uqanadec cali hon euna celeboi cobocnu gale aden,” aden.

<sup>36</sup> “Euqa ceteh oso ijana gug camasac menu eu Jon ijana gugnu je qasali maadec wooldona. Eu ijana odo Memige Anut uqa odi hedocnu maten, odo eu ija gaid odigina eu uqa sulten eunu camas menu.<sup>37</sup> Memige Anut ija sulten, uqadodoc ijana gugnu qasali maaden. Age uqa jejeg qee dah melein, uqa deweg ha qee felein.<sup>38</sup> Age uqa suldocob hon eu maadeceb wawaga qee meleel. Eunu uqana je ha wawagana qee bili cuhadona,” aden.<sup>\*\*</sup>

<sup>39</sup> “Feiga, age Anutna jaqcet je euna cebac biley catanec oqan eginanu sasaniji uqana caun megegina. Euqa Anutna jaqcet je eu ijana gugnu qasali madena.<sup>40</sup> Euqa age cebac biley catanec eu ocnu cemeni hoqagannu culegina,” aden.

<sup>41</sup> “Ija dana binani sulecnu qee madegina.<sup>42</sup> Euqa agenu dugina, age Anutnu nalug nec eu wawagana qee nijel.<sup>††</sup> <sup>43</sup> Ija Mei ijanna ageca hom, eu age ija qee oitelein. Oso uqadodoc ijanna hocobfi age eu oidoqagan.<sup>44</sup> Age dana filfil age binanaga sulegina qa binanaga caunca osol Anutnaadec ageca hocnu nijia eu ocnu wawaga qee hoolena. Euna adi wawaga meleec ihoc ligian?” aden.

<sup>45</sup> “Age ija Memige Anut amegna agenu um qigen ec Cain cisdowain. Oso uqa age deweneganu um qona eu Moses, uqa cesuladigian ec cisdogina.<sup>46</sup> Moses uqa ijanu je jaqcet nijia. Eunu age Mosesna loo jenu wawaga meleecialumi age ijana jenu ha wawaga meleoub.<sup>47</sup> Euqa age je Moses jaqcet nijia eunu wawaga qee meleecebfi age ijana jenu adi wawaga meleigian?” aden.

## 6

#### *Jisas uqa dana 5,000 sab aden*

(Matju 14.13-21; Mak 6.30-44; Luk 9.10-17)

<sup>1</sup> Eu hedocob Jisas uqa Galili wa gad cagoc leti lan ono isec nuen. Wa gad cagoc eu ageha Taibirias egina.<sup>2</sup> Eu dana cajaca mati bahic age Jisas dana hagcanu kobolkobol oodon feinnu uqa toodu belein.<sup>3</sup> Jisas uqa ono aluh osona timei uqana malogom gami ono bilein.<sup>4</sup> Aria, Juda agena Pasowa Sab Jec Ben Deel wele cali hugia odon.<sup>5</sup> Jisas

‡ 5:31: Age Loo 19.15 feiga. § 5:32: “oso” eunu Jisas maden eu Anut. \*\* 5:38: “uqa suldocob hon” eu Jisas.

†† 5:42: Grik jenadec eu falidocnu je osoha nijia eu odi: “Anut agenu nalunuga nec eu wawagana qee nijel” aden.

uqa dana cajaca mati bahic uqaca hohogin feciadimei uqa Filip madon, “Ege bred age joqagannu ana fajeqan?” don. <sup>6</sup> Uqa je eu Filip temdu figiannu madon. Uqadodoc odiodi odigen imei bilen.

<sup>7</sup> Odocob Filip madon, “Ege 200 kina odi bred fajiadocomunfi abesabes fan nag himec ocnu ihoc qee leiaun,” don.

<sup>8</sup> Odocob uqana malogom oso Andru, uqa Saimon Pita waliag, madon, <sup>9</sup> “Mel haun oso ihen bilina, uqana bred 5-pela, cul dool lecisca nijia. Euqa nag bahic, dana matica adi ihoc ligian?” don.

<sup>10</sup> Odocob Jisas maaden, “Age dana cajaca maadecebile bileiga,” aden. Ono gigisac geh bahic nijennu dana euna bielein. Eu age dana 5,000 ihoc len. <sup>11</sup> Bibilegin Jisas uqa bred eu umei Anut binan sulimei dana bielein eu siwiaden. Odimei cul doolha age jaga adenwe ihoc adecebile jein. <sup>12</sup> Age cunug ihoc jecebile uqa uqana malogom maaden, “Jecefanaga culeiga nijia eu cain cusdowain. Cunug cedi gabandoigale,” aden. <sup>13</sup> Odocob age bred 5-pela jimeig jecefanaga culein eu gabandu cedimeig galel 12-pela tacecebin ihoc len.

<sup>14</sup> Odocob dana cajaca age Jisas kobolkobol eu oodon fimeig madein, “Je hahun madec dana uqa mahana hugian ein eu uqa mele bahic ihen!” ein. <sup>15</sup> Jisas uqa age hu colowandu hewimeig gagadic mumudi eguna king muduqa ecebile fimei uqa cculadi cuhanuc aluhna ti bilen.

### *Jisas macas tatacan cobon*

(*Matju 14.22-23; Mak 6.45-52*)

<sup>16</sup> Wesu memen Jisasna malogom Galili wa gad cagocna noin. <sup>17</sup> Odimeig age wag tobimeig ceseli wa gad cagoc leti Kapaneam jobon ono belecnu odooin. Jisas ageca qee hoc ninjen witic men. <sup>18</sup> Odocob fufu gagadicca hohon wa caji qahen. <sup>19</sup> Malogom eu age wagna wa gemo 5-pela o 6-pela kilomita odi falandoig age Jisas wa tatacan cocobon wag cemenug hohon fein. Odocob age cucuein. <sup>20</sup> Euqa Jisas maaden, “Ija ihen. Age cain cucuiuwain,” aden. <sup>21</sup> Odimeig age cois uqa wag tobigian ec madecebile mahuc bahic wag eu cudun ono legan einna wele calen.

### *Dana cajaca age Jisas wawali coboin*

<sup>22</sup> Uqadec odi dana cajaca wa gad cagoc hagen nahe isec bielein eu age wag osol himec cum odi ono tatawen fein. Age Jisas uqa wag qee tobel qa uqana malogom himec wag tobi belein eu feciadein. <sup>23</sup> Euqa wag leih age Taibiriasdec age ono sab Tibud uqa Anut binan suleceb jein cudun euna cemenuq hoin. <sup>24</sup> Eunu dana cajaca age Jisasca uqana malogomca age ono qee meciadimeig age wag leih euna tobimeig wa gad cagoc leti Kapaneam jobon ono humeig Jisas wawali coboin.

### *Jisas uqa cebac bielecnu bred*

<sup>25</sup> Dana cajaca age Jisas wa cagoc lan ono isec gulucdumeig sisildu madoin, “Meca, hina cel saenna ene hom?” doin.

<sup>26</sup> Odocob Jisas jejenega hewi maaden, “Ija je mele maadigina, age ija kobolkobol oodigin fein eunu qee walitelein qa age bred jimeig wawaga ihoc len eunu walitegina. <sup>27</sup> Age sab qee miigliannu nijia eu cain cabi owain qa age sab eu cebac bielec catanecka gaid bilina eu cabi oigale. Sab eu Dana Melah adigian. Ge, Memige Anut uqa Melahna uqana sisi mec men. Uqa Melahna madi maden, ‘Melami ihen, uqa ijana odoc eu odona,’ en,” aden.

<sup>28</sup> Odocob age sisildu madoin, “Ege cel cabi oc oso Anut ege odocnu gale dona eu odeejan?” doin.

<sup>29</sup> Odocobil Jisas maaden, “Oso Anut suldon eu uqanu wawaga meleeliale odoc eu Anut gale dona,” aden.

<sup>30</sup> Odocob age haun sisildu madoin, “Hina cel kobolkobol oso eu odocom ege fimeb hinanu wawige meleigian? Hina cel cabi organ? <sup>31</sup> Ege jajanigeil age wadauna\* manna jein. Ge, Anutna jaqec je eu odi tawena:

‘Uqa sao jobonnadec bred adeceb jein,’ ec tawena,” doin. (*Kisim Bek 16.4; Nehemaia 9.15; Buk Song 78.24-25*)

<sup>32-33</sup> Odocobil Jisas maaden, “Ija je mele maadigina, Anutna bred eu Anut uqa suldochob sao jobonnadec nimei mahana bielegina eundec cebac bielec adena. Eunu Moses uqa bred sao jobonnadec qee adel. Ija Mei uqa sao jobonnadec bred mele bahic adena,” aden.

<sup>34</sup> Odocob age sisildoin, “O Tibud, gaidgaid bred eu igiga joqa,” doin.

<sup>35</sup> Jisas maaden, “Ija cebac bielecnu bred. Oso ijaca hugiaqa haun wen qee doiaun. Oso ijana waug meleeceb haun wa gab qee doiaun. <sup>36</sup> Euqa age ija mecitein qa wawaga qee meleel ec maadem. <sup>37</sup> Dana cajaca cunug Memige Anut itina eu ijaca hoqagan. Oso uqa

\* **6:31:** Age je Matju 3.1na nijia eu feiga.

ijaca hocob eu ija qee ititacdugaun. <sup>38-40</sup> Ija Mei uqa sulten eu uqana cisdoc eu odi. Cunug age Melah fecidumeig uqanu wawaga meleecceb eu age cebac biley catanec eu oqagan. Odocob ija cit qoc deelna tuliadecemin caji cebac biluqagan. Uqana cisdoc euha odi. Dana cunug uqa iten eu ija oso qee culdugaun qa ija cunug cit qoc deelna tuliadecemin caji cebac biluqagan. Eunu ijana cisdoc toodu odocnu qee nelem qa uqa sulten eu uqana cisdoc toodu odocnu ija sao jobonnadec toni nem,” aden.

<sup>41</sup> Uqa ija bred sao jobonnadec toni nem ec maadeceeb Juda dana age gonagona mi madein, “Eetan uqa madena?” ein. <sup>42</sup> Odimeig age madein, “Dana i uqa Jisas qeefo? Eu Josef melah, uqa anag memegcanu doqona. Eu adi uqa qila madena, ‘Ija sao jobonnadec toni nem,’ ena?” ein.

<sup>43-44</sup> Odocobil Jisas jejenega hewi maaden, “Oso uqadodoc ijaca hocnu ihoc qee nijel. Memige Anut uqa ija sulten, uqa himec dana cecel qudobob ijaca hona. Qeefi, oso ijaca hocnu ihoc qee. Eunu age cain gonagona mecebmecebawain. Odocob dana eu ija cit qoc deelna tulidocomin caji cebac biligian. <sup>45</sup> Ge, je hahun madec dana age agena jaqec je odi jaqein:

‘Anut uqa cunug iwaladigian,’ ein. (Aisaia 54.13)

Age abesabes Memige Anut iwaladeceb doin eu age ijaca hogina. <sup>46</sup> Euqa dana oso uqa Memige Anut qee fel. Oso uqa Anutnadec hon eu uqa himec Memige Anut fen. <sup>47</sup> Ija je mele maadigma, oso ijanu waug meleena eu uqa cebac biley catanec wele on. <sup>48</sup> Ija cebac biley catanecnuy bred. <sup>49</sup> Age jajanagail wadauna manna jein qa age cal mein. <sup>50</sup> Euqa bred sao jobonnadec nena eu edi, oso uqa jigian eu uqa qee cal meiaun. <sup>51</sup> Ija cebac biley bred eu sao jobonnadec nen. Oso bred i jifei uqa cebac biley catanigian. Bred ija adigina eu ija deweni, eu dana mahana bilegina age jimeig cebac biluqagannu bred,” aden.

<sup>52</sup> Odi maadeceeb Juda dana age fee dadani madein, “Dana i adi uqa deweg eu jegannu igigianfo?” ein.

<sup>53</sup> Odocobil Jisas maaden, “Ija je mele maadigma, age Dana Melah deweg golacca qee jifeig age cebac biley wawagana qee biley. <sup>54-56</sup> Ija deweni eu sab bahic, ija golani eu wa gab jecnu bahic. Eunu oso ija deweni golanica jena eu uqa ija dunuhna bilina. Odocob ija uqa dunuhna biligina. Oso deweni golanica jifei uqa cebac biley catanec uqanu njija. Odocob cit qoc deelna tulidocomin caji cebac biligian. <sup>57</sup> Memige Anut cebac biley gug bilina, uqa ija sulteceb ijaha uqanu cebac biligina. Eu odiwe oso uqa jeitina eu uqa ijanu cebac biligian. <sup>58</sup> Bred sao jobonnadec toni nen eu ihen. Eu age jajanagail jimeig cal mein cinigwe qee. Oso uqa bred i jigiaqa uqa cebac biley catanigian,” aden.

<sup>59</sup> Je eu Jisas uqa Juda agena cuha jona Kapaneam ono iwalaadi biley maaden.

#### Cebac biley catanecnuy je

<sup>60</sup> Jisasna malogom mati bahic age je eu dumeig madein, “Je eu dudca bahic. In je eu dah mecnu gale dona?” ein.

<sup>61</sup> Euqa Jisas uqa qee dah mec uqana malogom age uqana jenu gonagona memegin dumei maaden, “Se, je eunu wawaga cacaden bileginafo? <sup>62</sup> Age Dana Melah wele biloloi euna haun ceseli teteb fifeig age adi cisdoqagan? <sup>63</sup> Kis uqa cebac biley adena, deweg ganac uqadodoc cebac qee biley. Je ija maadiga eu kisca cebac bileycca. <sup>64</sup> Euqa age gemona leih biley age wawaga qee meleec njija,” aden. Ge, Jisas uqadodoc hahawannadec dana wawaga qee meleec njija, age uqa uqana cad ebenegana men eu uqa don. <sup>65</sup> Odimei uqa haun maaden, “Gug odi nijianu ija maadem, oso uqadodoc ijaca hocnu ihoc qee nijel. Mémige Anut odudeceb ijaca hocnu ihoc eu ijaca hugian,” aden.

<sup>66</sup> Je i madecebnu uqana malogom mati age Jisas culdimeig Jisas ceseli haun qee toodu coboloin. <sup>67</sup> Odocobil Jisas uqa malogom 12-pela sisiladi maaden, “Ageha cuculti beloqagango?” aden.

<sup>68-69</sup> Odocob Saimon Pita uqa jejeg hewi madon, “O Tibud, hina cebac biley catanecnuy je magagana. Ege qila hina Anutna Gundec eunu wawige meleena, eu ege du cuhadoqona. Eunu ege inca belecnu?” don.

<sup>70</sup> Odocobil Jisas jejenega hewi maaden, “Ija age 12-pela ijana malogomnu wele nesiladi qee cedelempo? Euqa age oso eu Setenna eundec!” aden. <sup>71</sup> Uqa Judas eu Saimon Iskariot melahnu maaden. Ge, uqa malogom 12-pela oso hibna Jisas uqana cad ebenegana men.

gale dona eu jahuncna qee cobona. Hina ceteteh i odogona eu dana cajaca amagana camasac odogale! Hinana malogom age hina kobolkobol oodom foqagannu hina cajimeg Judia hatuna nuuga,” doin. <sup>6</sup> Odocob Jisas uqa jejenega hewi maaden, “Ija odocnu saen qee cali hol euqa age odocnu saen ilag nijia. <sup>7</sup> Mahanadec eundec age sagagadecnu qee nijel. Euqa ija mahanadec age agena odoc casisic nijia eu amemeg qasali maadiginanu ija sagategin. <sup>8</sup> Ijana saen qee ihoc lel. Ija cegulec euna qee tigaun. Euqa agedodoc gad sab jec bennu teigale,” aden. <sup>9</sup> Uqa odi maadimei Galili hatu ono bilen.

<sup>10</sup> Euqa uqa walialgul sab jec bennu tecelb uqaha ten. Eu camasac qee cobol uqa jahuni cobon. <sup>11</sup> Juda dana age sab jec bennana Jisas wawali cocobi madein, “Dana eu ana bilia?” ein. <sup>12</sup> Dana cajaca mati bahic age uqanu gehgeh jahjahilein. Leih madein, “Uqa dana me bahic,” ein qa leih madein, “Qeelo, uqa dana cajaca jic cahuldocna iwaladenanu,” ein. <sup>13</sup> Euqa age Juda dananu cucuiimeig uqanu amemeg qee mamadielein.

<sup>14</sup> Sab jec ben eu nahe isec qee migiannu oodon Jisas uqa tempelna timei iwaladi maaden. <sup>15</sup> Uqa je maadeceb dumeig Juda dana age tumatumai madein, “Meca oso dana i qee iwalold. Eunu dana i adi loo je jaqec sildiadecnu fena?” ein. <sup>16</sup> Odi maadeceb Jisas maaden, “Ija iwaladigma eu ijana je qee, sulten eu uqana je madigina. <sup>17</sup> Oso uqa Anut madena eu ija toodu odigen ena eu uqa ija madigina eu Anutnadecefo, qee ijanadec eu cel gugnu du cuhadugian. <sup>18</sup> Oso uqa uqana je madena eu ugadodoc binan wasigiannu odona. Osoqa uqa suldon eu binan wasigiannu odona eu uqa je mele madena, uqa uhulec je qee madena,” aden.

<sup>19</sup> “Moses age loo je aden. Euqa age eundec oso uqa loo je eu qee toodu odona. Age eetanu ijanu madi qoqan egina?” aden. <sup>20</sup> Odocob dana am age madoin, “In hina qihencu madena? Buga me qee oso hinaca bilia,” doin. <sup>21</sup> Odocob Jisas jejenega hewi maaden, “Ija kobolkobol osol ene odocom age cunug eunu tumatumaeingina. <sup>22</sup> Moses uqa age melemegail dewenega cagu qoc kobil eu aden. (Mele, kobil eu Mosesnadec qee qa eu jajanagailnadec.) Odocob eu toodu melemegail cuha deelna dewenega cagu qoginanu. <sup>23</sup> Age Mosesna loo je tefacdoquaqna imeing mel cuhana dewenega gaga qoginafi age eetanu ijanu ija dana deweg cunug cuhana me mudem eunu gemanaga bena? <sup>24</sup> Amagana dih fimeig odoc eu me qee ecnuca odoc eu me ecnuca cain gesiluwain. Odocna silig tutuc fimeig eu mefi cois eigale, me qee fimeig eu cois qee eigale, eu odi gesileiga,” aden.

*Dana age Jisasnu madein, “Uqa Anutna Kraisfo?” ein.*

<sup>25</sup> Odocob dana leih Jerusalemdec madein, “Dana i age qoqan egina eu uqa qeefo? <sup>26</sup> Feiga! Uqa amemeg tatawi je madena, oso qee cahadona! Dana ben age uqa Anutna Krais eu mele bahic doginafo? <sup>27</sup> Euqa dana i uqa anadec hon eu ege doqona. Anutna Krais hocob uqaga anadec hon eu oso qee doiaun,” ein.

<sup>28</sup> Odocob Jisas tempelna iwalaadei utai maaden, “Mele, age ijanu dogina, ageha ija anadec hom ec doginafo? Euqa ijadodoc ene qee holom. Sultec uqa mele bahic bilina, uqa ija sulten eu age qee dogina. <sup>29</sup> Ija uqanadec hom, eu uqa ija sulten. Eunu ija uqa dugina,” aden.

<sup>30</sup> Odocob age uqa hewecnu togodoin. Euqa uqana saen qee ihoc lelnu oso uqa hewecnu qee odol. <sup>31</sup> Euqa dana cajaca am gemogemo mati age Jisasnu wawaga meleec oin. Age madein, “Anutna Krais uqa humei uqa kobolkobol odoc dana i odon wooldu odigianfo?” ein.

*Age tempel cofdoc Juda dana leih Jisas hewoqagannu suladein*

<sup>32</sup> Farisi age dana am jahjahili Jisasnu je odi togododogin dah mein. Eunu ihanec dana benbenca, Farisi ageca age tempel cofdoc Juda dana leih Jisas hewoqagannu suladein. <sup>33</sup> Oodogin Jisas uqa dana maaden, “Saen gothic bahic ija age gami bilimig ija sulten eu cemenug ceseli ligen. <sup>34</sup> Odocomin age ija waltimeig qa qee guluctuwain. Ija nuigen euna age lecwe qee,” aden. <sup>35</sup> Odocob Juda dana age togododogin madein, “Ege uqa qee guluctuqannu uqa ana nuimei biligian? Uqa Juda dana age Grik agena hatuna budu belein bilegina euna nui bilimei Grik dana je iwaladigianfo? <sup>36</sup> Uqa madena, ‘Age ija waltimeig qa qee guluctuwain. Ija nuigen euna age lecwe qee,’ ena je eu cel gug?” ein.

*Jisas uqa cebac biley wanu maaden*

<sup>37</sup> Sab Jec Ben Deel cit qocna sab jec ben eu uqana deel cunug wooladi saulal mudein, deel euna Jisas tawi utaadi maaden, “Oso wa gab docob uqa ijaca humei jeiale. <sup>38</sup> Eu odi Anutna jaqec je madenaw, ‘Oso uqa waugnaedec cebac biley wa eu nigian,’ enawe oso ijanu waug meleena eu uqa odi odigian,” aden. <sup>39</sup> Jisas uqa je eu Kis Gunnu maden. Saen euna Jisas uqa Anut cemenug uqana kobolkobol ocnu qee tel. Eunu Kis Gun eu age Jisasnu wawaga meleec age oqagan eu Anut qee adel.

*Dana cajaca age am lecis qatanein*

<sup>40</sup> Odocob dana age je eu dah mimeig eundec leih madein, "Dana i uqa je hahun madec dana ege sumuduquna eu mele bahic," ein. <sup>41</sup> Odocobil leih madein, "Uqa Anutna Krais," ein. Euqa leih madein, "Anutna Krais uqa Galilidec hugianfo?" <sup>42</sup> Anutna jaqec je eu Anutna Krais uqa Dewid sihulnadec, Betlehem jobondec ono Dewid bilen eunadec cali hugian ec madena," ein. <sup>43</sup> Eunu dana cajaca age Jisasnu wawaga filigandu tawein. <sup>44</sup> Leih age uqa hewecnu cisdoin, euqa oso uqa hewecnu qee odol.

*Juda dana agena iloilo age Jisasnu wawaga qee meleel*

<sup>45</sup> Tempel cofdoc dana ihanec dana benbenca Farisica suladein eu age ihanec benbenca Farisica gauc ageca ceseli hoin. Odocob agena ben sisiladi maaden, "Eetanu age uqa qee hewi aholoin?" adein. <sup>46</sup> Odocobil tempel cofdoc dana maadein, "Dana i je madena eu wele oso uqa ihoc qee madel," adein. <sup>47</sup> Odocob Farisi age dana eu maadein, "Uqa ageha quauadeiafo?" <sup>48</sup> Juda dana ben osoca, Farisidec dana osoca uqanu wawaga meleenfo? Qeoo! <sup>49</sup> Dana cajaca am gauc iq'a age loo je qee dogina, age Anut geladen bilegina," adein.

<sup>50</sup> Odi madecebile Farisi dana oso, Nikodimas, uqa wele witic osona Jisasca leceb je madesin, eu uqa maaden, <sup>51</sup> "Egena loo je odi qee madel, 'Dana oso gauc gesildoiga,' el. Uqa madena, 'Dana oso age um qudeginas casac uqana je madeceb gesileiga. Age uqa eta odon ec sisildu feiga,' ena," aden. <sup>52</sup> Odi maadeceb age madoin, "Hinaha Galilidecfo? Loo je jaqec sasanji megagale. Odimeg je hahun madec dana Galilidec qee hoiaun eu fegan," doin.

[*Grik jaqec je hilah leihna age but i 7.53-8.11 eu qee nijel.*]

*Jisas uqa caja oso silailcanu je maaden*

[<sup>53</sup> Odi madimeig qaciti agena gunna beladi hedoin.

## 8

<sup>1</sup> Euqa Jisas Oliw Aluhna nui bilen. <sup>2</sup> Uqadec qasil walag dadanen uqa tempelna haun nuen. Odocob dana cajaca cunug uqaca hocobil uqa bilimej je iwaladen. <sup>3</sup> Odocob loo je iwaladec dana Farisica age caja oso ehudi ahoin. Caja eu age uqa gemug culdimei dana oso silail mecen fanindodon gulucdoin. Age caja eu Jisas amegna mudimeig <sup>4</sup> madoin, "Iwalgec, caja i uqa dana osoca silail memesin age gulucdoiga. <sup>5</sup> Egena loo jena Moses maden caja i odeiwae odogina eundec meen qeli aqecibil cal meiga ena. Hina eeta madagana?" doin. <sup>6</sup> Je eu uqa temdochru madoin. Age uqa je oso Mosesna loo je tefacdochru madeceb dewegnu um qoqan ein. Odocobil Jisas uqa du qahimei ebenna maha gaga qon.

<sup>7</sup> Age haunhaun sisildocbil uqa caji tawimei maaden, "Age oso silailca qee eu li meen hewi caja eu qocnu sanan meiale," aden. <sup>8</sup> Maadimei uqa haun bilimei ebenna maha gaga qon. <sup>9</sup> Jisas je eu maadeceb dumeig age abesabes besibesi belein. Matu casac nueceb oso ageha toodu beladi hedoin. Jisas uqa caja ica lecis himec culalecebile bilesin.

<sup>10</sup> Odocobil Jisas caji tawimei caja sisildu madon, "Dana eu age ana? Oso hina qee gelihelfo?" don. <sup>11</sup> Odocob caja madon, "Tibud, qeoo, oso qee gelitel," don. Odocob Jisas madon, "Ijaha qee gelihellem. Nuimeg silail haun cain magaun," don.]

*Jisas uqa mahamahanu fulacdoc*

<sup>12</sup> Jisas uqa Farisi haun je maaden, "Ija mahamahanu fulacdoc. Oso ija tooti cobona eu uqa tuna qee cobaiaun qa cebac bileyecnu fulacdoc uqana biligian," aden. <sup>13</sup> Odocob Farisi age madoin, "Hina hinadodocnu je qasali madagana! Hinana qasali madec eu meleca qee," doin.\* <sup>14</sup> Odocobil Jisas jejenega hewi maaden, "Ija anadec hom, ana nuiginaca eu dugina. Ageqa ija anadec hom, ana nuiginaca eu qee dogina. Eunu ijanelnu je qasali madiginafiqa ijana qasali madecha mele tawena." <sup>15</sup> Age mahana kobilna dana gesiladegin. Ijaqa dana oso qee gesildugina. <sup>16</sup> Euqa ija oso uqana odoc eu mefo, qee me qeefo ec madiginafi ija cuhanuc qee je gesiligina. Euqa Memige Anut uqa sulten uqa ijaca je gesiluwuna. Eunu ija je gesilec tutuc madigina. <sup>17</sup> Agena loo jena je oso nijia eu odi, dana lecis ale dana oso gesiladec jona tawena uqana odocnu je wawala osol qasali madecebile alena je qasali madesina eu meleec taweia en. <sup>18</sup> Ija ijanelnu je qasali madigina. Memige Anut uqa ija sulten uqaha ijana je qasali madena," aden.

<sup>19</sup> Odocob age sisildoin, "Hina memen ana bilia?" doin.

Odocobil Jisas maaden, "Age ijana gugnuca Meinuca qee dogina. Age ijanu doubmiqa ija Meinu ha doub," aden.

<sup>20</sup> Jisas je eu meen qaig helecnu cudaug euna hamol tatawi tempelna iwalaadi maaden. Euqa uqana saen eu qee holnu oso qee hewi gihadoc jona mudel.

\* **8:13:** Age Loo 19.15 feiga.

*Jisas uqa dana cajaca ija nui biligen euna age belecnu ihoc qee ec maaden*

<sup>21</sup> Jisas uqa je haun ceseli dana maaden, "Ija li nuigen. Age ija waliti cobimeig qa age dewenega silail fagadec eunu cal moqagan. Ija nui biligen euna age belecnu ihoc qee," aden. <sup>22</sup> Odocob Juda dana madein, "Uqa maden, 'Ija nui biligen euna age belecnu ihoc qee,' en. Uqa adi? Uqadodoc deweg qu cal migian imeifo eunu madena?" ein. <sup>23</sup> Odocobil Jisas maaden, "Age mahadanadec, ija ohisdec. Age maha qila bilina eunadec qa ija maha inadec qee. <sup>24</sup> Age ija uqa eunu wawaga qee melecebfi age dewenega silail fagadec eu odi cal moqagan. Eunu ija age dewenega silail fagadec eu odi cal moqagan ec maadiga," aden.<sup>†</sup>

<sup>25</sup> Odocob age madoin, "Hina in?" doin. Odocobil Jisas jejenega hewi maaden, "Ija sanan mecnadec maadem eu haun ceseli madigina. <sup>26</sup> Ija agenu je mati bahic maadecnuca, agenu je gesiladecnuca nijia. Euqa ija sulten uqana je eu mele bahic. Ijaqa uqa mateceb dom eu dana cajaca mahana bilegina eu amagana maadigina," aden.

<sup>27</sup> Juda dana age Jisas uqa Memige Anutnu maaden eunu wawaga qee fogo dol. <sup>28</sup> Eunu Jisas haun maaden, "Age Dana Melah caqusecebil caculeceb age ija ijanu ec madigina eu wawaga camasac fogo dugian. Age ijadodoc cisdock toodu ceteh qee odigina qa ija Memige Anut iwalten eu odi himec je madigina eunu ha wawaga fogo dugian. <sup>29</sup> Ija sulten eu ijaca biluwuna. Uqa gale dona eu ija gaid odigina eunu uqa ija cuhanuc qee cultel," aden. <sup>30</sup> Jisas uqa je odi maadeceb dana mati uqanu wawaga meleen.

*Mele je eu dana cajaca besiadigian*

<sup>31</sup> Odocob Jisas uqa Juda dana age uqanu wawaga meleen eundec maaden, "Ija age je maadigina je eu toodu gaid biluqagaqa age mele ijana malogom biluqagan, <sup>32</sup> age mele jenu wawaga fogo dugian, odocob mele je eu besiadigian," aden. <sup>33</sup> Odi maadeceb age madoin, "Ege Ebrahim sihuldec. Ege osona begabeg meh qee bilolom. Hina eetanu magagana, 'Age besiadec biluqagan' agana?" doin.

<sup>34</sup> Odocobil Jisas jejenega hewi maaden, "Ija je mele maadigina, oso uqa silail mena eu uqa silailna begabeg meh cabi dana. <sup>35</sup> Begabeg meh uqa gaid uqana benna jona qee biliaun qa benna mel uqa uqana jona gaid bilina. <sup>36</sup> Eunu Anut Melah uqa age begabeg meh biluwainnu besiadeccebi age mele bahic besiadec biluqagan," aden.

<sup>37</sup> "Ija age Ebrahimna sihuldec ec dugina euqa ijana je wawaga qee fagdona eunu age ijanu madi qoqan egina. <sup>38</sup> Mei ihacteceb fem eunu maadigina. Ageha age memega iwaladeceb doin eu age odigina," aden.<sup>‡</sup>

<sup>39</sup> Odocob age jejeg hewi madoin, "Ebrahim uqa ege memige," doin. Odocobil Jisas maaden, "Age mele bahic Ebrahimna mel bilegalumi age Ebrahim odon eu odiwe odoub. <sup>40</sup> Ija mele je eu Anut metaten dom eu maadem. Qilaqa age ijanu madi qocomun cal migian egina. Ebrahim uqa odi qee odol. <sup>41</sup> Age memega bahic odon eu ageha odigina," aden. Odocob age madoin, "Ege sasail caja uqa melahul qee! Ege memige osol bilina eu uqa Anut himec," doin. <sup>42</sup> Odocobil Jisas maaden, "Ija Anutnadec hom, ene biligina. Ija ijadodoc odocna qee holom qa uqa sulteceb hom. Eunu Anut uqa mele age memega bilialumi age ija naluni moub," aden.

<sup>43</sup> "Age eetanu ija je maadigina eunu wawaga qee fogo dona? Age je ija maadigina eu dah mecnu culegina eunu wawaga qee fogo dona. <sup>44</sup> Ageqa memega Setenna mel bilegina. Memega eu waug gale dona eundec age toodocnu gale adena. Gug qoc saennadec uqa dana aqecnu tawena. Mele je madec eu uqa waugna qee tawel. Eunu uqa mele je qee madena. Uqa uhulec je madec dana, cunug age uhulegina eu agena memega. Eunu uqa uhulec je madena eu uqadodoc duman toodu madena. <sup>45</sup> Ijaqa mele je maadigina eunu age ijana jenu wawaga qee meleena. <sup>46</sup> Age eundec oso in ija silail mimigin meciten uqa ene hu madeia? Ija je mele maadigina, eetanu age wawaga qee meleena? <sup>47</sup> Oso uqa Anutnadec eu uqa Anutna je dah mena. Ageqa Anutnadec qee eunu ijana je qee dah megina," aden.

*Jisas uqa Ebrahim qee cali hoc ninijen ija bilem ec maaden*

<sup>48</sup> Odocob Juda age Jisas madoin, "Ege hina Sameriadec dana buga me qee oso hinaca bilina ec hoqona eu mele qeefo?" doin. <sup>49</sup> Odocobil Jisas jejenega hewi maaden, "Buga me qee ijaca qee bilina. Ija Mei binan suligina, ageqa ija cewitegina. <sup>50</sup> Ijadodocqa ija binani wasigliannu qee odigina. Oso ija binani wasigliannu odona eu uqa ija gesilitigian. <sup>51</sup> Ija je mele maadigina, oso ijana je waugna tacena eu cal mec bahic qee feiaun," aden.

† 8:24: Kisim Bek 3.14na Anut uqa Moses madon, odimei uqa uqanu odi maden, "Ija uqa," en. Qila i Jisas uqa uqanu Anutwe maden. Euqa dana cajaca age uqana je eunu qee fogo adel. ‡ 8:38: Grik jaqcet je hilah leihna age je fil oso jaqein eu odi: "Ageha ege Memige iwaladeceb doin eu age odigina," aden.

<sup>52</sup> Odocob Juda madoin, “Ege qila buga me qee hinaca bilina ec mele doqona! Ebraham wele cal men, je hahun madec dana ageha wele cal mein. Hinaqa madagana, ‘Oso ijana je waugna tacena eu cal mec qee feiaun,’ agana. <sup>53</sup> Hina ege memige Ebraham wooldoc biliginafo? Uqa cal men, je hahun madec dana ageha cal mein. Hina cel dana ec madagana?” doin.

<sup>54</sup> Odocobil Jisas jejenega hewi maaden, “Ija ijadoc binani suliginafi ija binani gauc suligina. Eu ija Mei, uqanu age uqa eguna Anut egina, eu ija binani sulina. <sup>55</sup> Euqa age uqanu qee doloin qa ija uqa dugina. Ija uqa qee dugina ec madoummiqa age uhulec dana bileyinawa ijaha odi uhulec dana biloum. Euqa ija uqa dugina, uqana je hewi toodu odigina,” aden.

<sup>56</sup> “Age memega Ebraham uqa ijana saen cali hocob figiannu ceelen. Uqa fimei celeboen,” aden. <sup>57</sup> Odi maadeceb madoin, “Hina cabi gel 50 qee ihoc lel, hina Ebraham femfo?” doin. <sup>58</sup> Odocobil Jisas maaden, “Ija je mele maadigina, Ebraham qee cali hoc ninijen ija bilem,” aden.

<sup>59</sup> Jisas uqa odi maadeceb age meen qeli qoqan imeig meen cedein qa Jisas uqadodoc jahunimei tempel culdimei nuen.

## 9

### *Jisas uqa dana ameg galuc mec me muden*

<sup>1</sup> Jisas uqa cocobi nunui bilei uqa dana oso uqa anag waugnadec ameg galuc men odi cocobi ben men bibilen fen. <sup>2</sup> Uqana malogom Jisasca li sisildu madoin, “Meca, dana i uqa anag waugnadec ameg galuc mec cali hon eu in silail meceb odi odon? Uqa silail menfo, qee memefgo anagfo silail mesin eunu uqa ameg galuc mec cali hon?” doin.

<sup>3</sup> Odocobil Jisas maaden, “Dana eu anag waugnadec ameg galuc mec cali hon eu uqa silail mecebnu qee, memeg anagca alena silailnu ha qee. Anutna cabi oc uqa dewegna camas migiannu eunu ameg galuc mec cali hon. <sup>4</sup> Cahineg nijia eunu ege sulten eu uqana cabi ege odoc bahic odoqan. Witic migian, saen euna cabi ocnu oso qee nijiaun. <sup>5</sup> Saen ija mahana bibili ija mahamaha fulacdoc biligina,” aden.

<sup>6</sup> Jisas odi maadimei uqa maha cin qumei sahalicna olig ibuldumei u dana amegna cucusimei <sup>7</sup> madon, “Hina Siloam wa cagocna limeg hina amen wasacudagale,” don. (Siloam uqana gug eu “Suldon.”) Odocob dana eu li ameg wasacudeceb ameg fogo docob ceseli hon.

<sup>8</sup> Odocob dana age dana eu muduban biley ageca, wele uqa niniadi bibilen mecidoin euca madein, “Dana i uqa wele bibili sabnuca qaignuca ninigoloi eu qeefo?” ein. <sup>9</sup> Leah madein, “Eu uqa,” ein qa leih madein, “Qee, eu uqa qee qa uqa fecnu eu uqa cinigwe,” ein. Odocob dana eu uqadodoc maaden, “Ija dana eu ijom,” aden.

<sup>10</sup> Odocob age sisildoin, “Amen adi fogo doia?” doin. <sup>11</sup> Odocob uqa maaden, “Dana uqa ijan Jisas uqa olig mimei ija amina cucusimei maten, ‘Hina Siloam wa cagocna limeg hina amen wasacudagale,’ ten. Mateceb ija li ami wasacudecemin ami fogo docob qila me feciinga,” aden. <sup>12</sup> Odocob age sisildoin, “Dana eu ana?” doin. Uqa maaden, “Ija qee dugina,” aden.

### *Farisi age dana ameg galuc mec me muden eu fein*

<sup>13</sup> Odocob age dana uqa wele ameg galuc mec bilen eu ehudi Farisi cemenega mudein. <sup>14</sup> Aria, Jisas olig mimei dana eu ameg me mudeceb fogo don eu Juda agena cuha deelna. <sup>15</sup> Ono Farisi ageha dana eu hina amen adi fogo doia ec sisildoin. Odocobil uqa maaden, “Uqa olig amina cucuseceb ija limig ami wasacudecemin qila me feciinga,” aden. <sup>16</sup> Odocob Farisi leih madein, “Dana eu uqa cuha deel qee mudina. Eunu uqa Anutnadec qee hol,” ein. Euqa leih age madein, “Dana silail mec adi kobolkobol eu odocnu ihoc?” ein. Odimeig age am qatani lecisdoin.

<sup>17</sup> Odimeig age dana ameg galuc mec me muden eu haun sisildoin, “Uqa hina amen me mudeceb fogo doiannu hina uqanu eeta madagana, uqa in?” doin. Odocob uqa maaden, “Uqa je hahun madec dana oso,” aden.

<sup>18</sup> Juda dana age dana eu uqa wele ameg galuc mec bilen, qila ameg me feciena ec eunu wawaga qee meleel, age feeecnu odi odooin. Eunu dana eu memeg anagca utaacebibil hocobil <sup>19</sup> sisilali maalein, “Dana eu ale melemelafo, ale uqa anag waugnadec ameg galuc mec cali hu bilen ec madesina? Eu melefli adi qila fecienna?” alein. <sup>20</sup> Odocobil memeg anagca maadesin, “Uqa ele melemile eu dowona. Uqa ameg galuc mec cali hon euha dowona. <sup>21</sup> Euqa uqa qila adi odocob feciena, in odudeceb ameg fogo duton eu ele qee dowona. Uqa sim qee, uqadodoc saadecnu ihoc. Age uqa sisildu feiga,” adesin. <sup>22</sup> Juda age wele madi cagoin ec madein, “Oso Jisasnu uqa Anutna Krais ec madecebfi ege uqa cuha jonadec ititacdacomun tamanecna qee biliaun,” ein. Eunu uqa memeg anagca ale

Juda dananu cucuiesinnu odi madesin. <sup>23</sup> Eunu uqa memeg anagca maadesin, “Uqa sim qee, age uqa sisildu feiga,” adesin.

<sup>24</sup> Odocobil Juda dana age haun lecisdu dana uqa ameg galuc mec bilen eu utadocobil hocob madoin, “Ege dana eu uqa silail mec dana eu doqona. Hina Anut amenna je tutuc magecnu madagale!” doin. <sup>25</sup> Odocobil uqa maaden, “Uqa silail mec danafo ija qee dugina. Euqa ija wele ami galuc mec bilem, qila ija me feciigina eu ija dugina,” aden.

<sup>26</sup> Age haun sisildu madoin, “Uqa adi odihen? Adi amen fogo duhen?” doin. <sup>27</sup> Odocobil uqa maaden, “Ija age wele maadiga. Euqa age qee dah melein. Age eetanu haun magecem doqa tegina? Ageha uqana malogom ibuldoqaganfa?” aden.

<sup>28</sup> Odocob age cewudodoig madoin, “Hina uqana malogom, egeqa Mosesna malogom. <sup>29</sup> Anut Mosesca je madesin eu egeha doqona, euqa dana eu uqa anadec hon eu ege qee doqona!” doin. <sup>30</sup> Odocobil uqa jejenega hewi maaden, “Eu adi bahic! Age uqa anadec hon eu ege qee doqona egina euqa uqa ija ami fogo duten! <sup>31</sup> Anut uqa silail dana agena je qee dah mena eu ege doqona. Euqa oso uqa Anut binan susuli uqa jejeg toodudu odona eu uqa Anut je madocob dah mena. <sup>32</sup> Anut maha ifanen euna gug qumeig cisidudu hu qila calimeig dana oso anag waugnadeec ameg galuc mec cali hon eu dana oso hu ameg fogo duton cocobon oso qee dogina. <sup>33</sup> Dana eu Anutnadec qeemi uqa ceteh oso odocwe qee,” aden.

<sup>34</sup> Odi maadeceb age madoin, “Hina silail jahulheceb anin basihen. Hina ege iwalgeganfo?” dumei cuha jonadec ititacdocabil nuen.

#### *Dana age wawaga qee meleel eu dana amaga galuc mec cinigwe*

<sup>35</sup> Juda age dana eu cuha jonadec ititacdoinnu Jisas dah mimei uqa dana eu wawali gulucdumei sisildon, “Hina Dana Melahnu wawin meleenafo?” don. <sup>36</sup> Odocob dana Jisas jejeg hewi madon, “O Tibud, ija uqanu wawi meleigannu Dana Melah eu in?” don. <sup>37</sup> Odocob Jisas madon, “Hina eu fem. Úqa je mahena eu uqa,” don. <sup>38</sup> Odocob dana uqa Jisas madon, “O Tibud, ija wawi meleena!” don. Odimei uqa Jisas amegna gob cehimai uqanu cuha fen.

<sup>39</sup> Odocob Jisas je odi maden, “Ija dana amaga galuc mec eundec amaga fogo doc oqagannuca, dana age me feginu eu amaga cufa qugiannuca mahana nem. Eunu ija dana gesiladecnu mahana nem,” en. <sup>40</sup> Farisi leih age Jisas je eu mamaden dah mimeig madoin, “Egeha amige galuc menfo?” doin. <sup>41</sup> Odocob Jisas maaden, “Age amaga galuc mec biloubmi silail oso dewenega fagdoc qee tawoub. Ageqa ege me foqona egina eunu agena silail dewenega fagdocob cobogina,” aden.

## 10

#### *Jisas uqa sipsip cofadec me bahic*

<sup>1</sup> Jisas maaden, “Ija je mele maadigina, dana oso uqa sipsip agena jona jic cebecna qee lenaqa, filna leti lena, eu uqa heje dana, uqa dana agena ceteteh heje cedena. <sup>2</sup> Dana uqa sipsip agena jona jic cebecna lena, eu uqa sipsip cofadec dana. <sup>3</sup> Jic cebec cofdoc uqa dana i jic huditona. Sipsip age uqa jejeg dah megina. Uqa uqana sipsip ijanaga uutaadimei ehadimei aquiniaadi calena. <sup>4</sup> Uqa uqana sipsip cunug ehadi maha gumuna madimei uqa aquiniaadi cobona. Odocob age uqa jejeg doginanu age uqa toodudu hogina. <sup>5</sup> Sipsip age dana filna jejeg qee dogina. Eunu age dana fil qee toodogina, euqa age uqa cucului busalegina,” aden. <sup>6</sup> Jisas uqa galolo je i odi maaden ageqa je eu silig qee doloin. <sup>7</sup> Eunu Jisas haun maaden, “Ija je mele maadigina, ija sipsip agena jic cebec. <sup>8</sup> Ija qee hoc ninijen cunug hoin eu age heje dana, age dana agena ceteteh heje cedegina. Euqa sipsip age jejenega qee dah melein. <sup>9</sup> Ija jic cebec. Oso ijaca hu dunuhna lena eu Anut uqa caahadugian. Odocob uqa dunuh leceb maha gumu cali hocob uqa eu odi lili huhui sab guludugian,” aden.

<sup>10</sup> “Heje dana uqa heje ocnua, aqecnuca, fadaladecnuca hona. Ijaqa sipsip age cebac bilec umeig agena cebac bilec ihoc lec eu gulucdoqaganu hom. <sup>11</sup> Ija sipsip cofadec me. Cofadec me uqa uqana cebac bilec uqana sipsipnu culina. <sup>12</sup> Cabi dana qaig ocnu cabi ona, sipsip age uqa toinan qee, eu uqa qa cus hohon fimei sipsip cululadi busalena. Odocob qa cus sipsip hewadi bilisaadena. <sup>13</sup> Dana i uqa qaig ocnu cabi ona, uqa sipsipnu qee cisidona eunu uqa busalena,” aden.

<sup>14-15</sup> “Ija sipsip cofadec me. Memige Anut ijanu dona, ija Memige Anut ha dugina eu odiwe ija ijana cunug dugina, ijana age ijanu dogina. Odocob ija ijana cebac bilec ijana sipsipnu culigen. <sup>16</sup> Ijana sipsip filfilha bilingina age jo inadec qee. Eu ija ageha cedi ehadigen. Ageha ija jejeni dah moqagan. Hibna age tamanec osol cofadec osolca meceb biluqagan. <sup>17</sup> Ija ijana cebac bilec culimig haun ceseli ugen. Eunu gug inu Memige Anut ijanu nalug mena. <sup>18</sup> Ijana cebac bilec oso qee cawaltina, ijadodocqa eu culigina. Cebac

bilec culecnuca, haun ceseli ocnua eu ijadodoc ebenina nijia. Mei odoc eu odogan ec gatiti maten,” aden.

<sup>19</sup> Jisas je odi maadecebnu Juda dana age haun togodudu am qatanai lecisdoin. <sup>20</sup> Leigh matica age madein, “Buga me qee uqaca bilina! Uqa gad qona! Eetanu uqa jejeg dah moqona?” ein. <sup>21</sup> Euqa leih madein, “Je dah moqona eu dana buga me qeeca bilina eundec uqa madenawee qee dah moqona. Dana buga me qeeca bilina eu uqa dana ameg galuc nec ameg fogo dutocnu ihocfo?” ein.

### *Juda dana age Jisas cad mudein*

<sup>22</sup> Saen leih gieceb age Jerusalem ono wele tempel eeldoin deel eunu cisdocnu cegulein. Eu duan saen nijen. <sup>23</sup> Jisas uqa tempel cegulec hamolna eu ijan Solomonna hamol euna cocobon <sup>24</sup> Juda dana age cegulimeig uqaca hu alildu tatawi madoin, “Hina ege hinanu dadani tawec aadeb cagasicegan? Hina Anutna Kraisfi camasac magecem doqale,” doin.

<sup>25</sup> Odocobil Jisas jejenega hewi maaden, “Ija eu wele maadem qa age wawaga qee meleel. Cabi ija Mei ijanan ugina eu ijana gug camasac mena. <sup>26</sup> Euqa age ijana sipsip sihil qeenu wawaga qee meleena. <sup>27</sup> Ijana sipsip ija jejeni dah megina, ija agenu dugina. Odocob age ija tootegina. <sup>28</sup> Ija age cebac bilec catanec eu adigina. Age qee fadalowain. Oso uqa age ebeninadec qee cawaltiaun. <sup>29</sup> Mei uqa sipsip eu iten eu ceteh cunug wooldoc ben. Oso uqa Memige Anut ebennadec cawaladecwe qee. <sup>30</sup> Memige Anut ijaca ele osol,” aden.

<sup>31</sup> Odocob Juda dana age haun Jisas qoqan imeig meen cedi ahoin. <sup>32</sup> Odi oodogin Jisas haun maaden, “Ija age amagana Memige Anutna me odoc mati bahic odom. Cel odoc eundec osonu age ijanu madi, meenna qoqan, egina?” aden.

<sup>33</sup> Odocob Juda age uqa jejeg hewi madoin, “Hina me odom eunu qee meenna qihuqaun qa hina Anut lelandogona! Hina dana oso himec qa hinadodoc hina Anut agana eunu meenna qihcqan!” doin.

<sup>34</sup> Odocobil Jisas maaden, “Agena loo jena jaqc oso tawen eu odi Anut maden:  
‘Age anut bilegina,’ en (Buk Song 82.6)  
eunu dogina. <sup>35</sup> Anutna jaqc je madena eu mele gaid tawena eu doqona. Odocob Anut uqa dana uqana jaqc je aden eundecnu maden, ‘Age anut bilegina,’ en. <sup>36</sup> Memige Anut uqa ija qagu mitimei suliteeb mahana toni nem. Eunu age adi madegina, ‘Ija madigina, ‘Ija Anut Melah,’ iginanu Anut lelandugina,’ egina?’ aden.

<sup>37</sup> “Ija Meina cabi oc qee odiginafi ijanu wawaga cain meleeliaun. <sup>38</sup> Euqa ija cabi oc eu odiginafi, age ijanu wawaga qee meleenaqa, age ijana cabi oc eunu wawaga meleiale. Eunu Memige Anut ija dunuhna bilina, ija Memige Anut dunuhna biligina ec du cuhadoigale,” aden. <sup>39</sup> Odocob age haun ceseli hewecnu odoin qa uqa ebenegana abulisdocibil nuen. <sup>40</sup> Odimei Jisas uqa ceseli Jodan wa letimei hatu wele Jon dana cajaca wa joaden euna limei ono saen nag meca bilen. <sup>41</sup> Dana caja matica uqa mecidoqagannu hoin. Age togodudu madein, “Jon uqa kobolkobol oso qee odol qa ceteh cunug uqa dana inu maden eu mele calen,” ein. <sup>42</sup> Odocob dana cajaca mati ono uqanu wawaga meleen.

## 11

### *Lasaras cal men*

<sup>1</sup> Aria, dana oso, ijan Lasaras, uqa Betani jobon ono bilina uqa hag nijen. Betani jobon eu Maria uqa waliag Mataca ono bilesin. (<sup>2</sup> Caja oso uqa Tibud jaihna mool dedemanca basecdru joudimei uqa gosicna cacuton eu Maria. Uqa cebinag Lasaras hag nijen.) <sup>3</sup> Hag ninijen cebinagul lecis ale Jisasca je suldu madosin, “O Tibud, dana hina uqanu nalug magana eu uqa hag nijia,” dosin. <sup>4</sup> Odocob Jisas je eu dah mimei maden, “Hag eu Lasaras cal miiglianu qee qona. Eu age Anut uqana kobolkobol fecnu hag qona. Eunu ceteh ina Anut Melah uqana kobolkobol camasac migian,” en.

<sup>5</sup> Jisas uqa Matanuca Marianuca ale cebinamala Lasarasnuca nalunuga men. <sup>6</sup> Eunu uqa Lasaras hag nijia je eu dumei uqa tu lecis haun ono bilen. <sup>7</sup> Tu lecis eu hedocob uqa malogom maaden, “Ege haun ceseli Judia hatuna beleqan,” aden. <sup>8</sup> Odocob malogom age madoin, “Meca, saen qee giel hina ono cocobogon Juda dana age meenna qihcnu odoin. Hina haun ceseli Judia hatuna beleqan agana eu adi?” doin. <sup>9</sup> Odocobil Jisas maaden, “Cahineg osol eu aua 12-pela qeefo? Oso cahineg cobonafi uqa mahana fulacdoc fenanu uqa deweg qee toni qona. <sup>10</sup> Euqa oso uqa witic cobonafi fulacdoc uqaca qee bilinanu uqa deweg toni qona,” aden.

<sup>11</sup> Uqa odi maadimei haun maaden, “Egena danah Lasaras uqa wele us nijian, euqa ija nuimig tulidocomin cajigian,” aden. <sup>12</sup> Odocob uqana malogom madoin, “Tibud, uqa us nijecebfi hag medugian,” doin. <sup>13</sup> Jisas uqa Lasaras cal meiannu maadena, malogom ageqa uqa us nijia himec eunu madena ec cisdoein. <sup>14</sup> Odocobil Jisas camasac maaden,

"Lasaras uqa cal meian. <sup>15</sup> Ija agenu cisdudu madigina, 'Ija ono qee bilelem eunu ceeligma,' igin. Age wawaga meleec duuigiannu eunu madigina. Gec, ege qila uqaca beleqan," aden.

<sup>16</sup> Tomas (uqa Mel Gahca egina) uqa malogom cotugul maaden, "Gec, ege cunug Iwalgec gami belecnu eunu ege cunug uqaca cal mecnu!" aden.

#### *Ceseli cajecnu gugca cebac bielecnu gugca eu Jisas*

<sup>17</sup> Jisas uqa ono calimei Lasaras uqa deel 4-pela heelna nijen je eu don. <sup>18</sup> Betani jobondes Jerusalem lecnu eu kilomita cijed odi nijen. <sup>19</sup> Juda dana cajaca mati age Lasaras cal menu cebinagul Mata Mariaca wahohogalecnu hoin.

<sup>20</sup> Mata uqa Jisas hona ec madecebil dumei uqaca jicna gulucdadanewan imei nuen qa Maria jo hamol bilen. <sup>21</sup> Mata uqa Jisasca limei madon, "Tibud, hina ene biloummiqa ija cebinami qee cal moub! <sup>22</sup> Euqa ija qila ha dugina, hina Anut cteh osonu je sisildogaqa eu uqa ihigian," aden.

<sup>23</sup> Jisas uqa madon, "Hina cebinam uqa ceseli cajigian," don. <sup>24</sup> Odocob Mata uqa Jisas jejeg hewi madon, "Uqa deel cit qocna cajec benna ceseli cajigian eu ija mele dugina," don. <sup>25</sup> Odocob Jisas madon, "Ceseli cajecnu gugca cebac bielecnu gugca eu ija! Oso ijanu waug meleena eu uqa cal migiaqa uqa cebac biligian. <sup>26</sup> Oso uqa cebac bibili ijanu waug meleena eu qee cal meiaun. Hina eunu wawin meleenafo?" don.

<sup>27</sup> Odocob Mata madon, "Ese Tibud! Hina Anutna Krais, hina Anut Melah uqa mahana nem eu ija wawi meleena," don.

#### *Jisas uqa Lasarasnu walol docob qajen*

<sup>28</sup> Mata je eu Jisas madumei uqa nuimei waliag Maria jahuni utai madon, "Iwalgec hoia. Uqa hina cemeni hoga hena," don. <sup>29</sup> Odocob Maria je eu dumei uqa mahuc caji Jisasca len. (<sup>30</sup> Jisas jobon qee calel qa uqa Mata uqaca limei gulucdon euna bilen.) <sup>31</sup> Juda dana cajaca age Maria wahohogdocnu uqaca jona bielein eundec age Maria mahuc caji nunuen fimeig age uqa qalqalna qajigia nuina imeig age uqa toodu belein.

<sup>32</sup> Odocob Maria uqa Jisas tatawen euna li Jisas fimei uqa jaihna tonimei madon, "Tibud, hina ene biloummiqa ija cebinami qee cal moub!" don.

<sup>33</sup> Odocob Jisas uqa Maria qaqqajen Juda dana cajaca age uqaca hoin eu ageha qaqqajegin feciadimei eu waug qocob walol don. <sup>34</sup> Odimei uqa sisilidi maaden, "Age ana heelna mudein?" aden. Odocob madoin, "Tibud, hu fagale," doin. <sup>35</sup> Odocobil Jisas uqa qajen. <sup>36</sup> Odocob Juda dana cajaca age eu fimeig madein, "Feiga, uqa Lasaras culaug ona!" ein. <sup>37</sup> Leihqa madein, "Uqa dana ameg galuc mec coboloi eu ameg fogo duton, uqa Lasaras cal meiaunnu odi qee cesulldolfo?" ein.

#### *Jisas uqa Lasaras cali hoga ec madocob ceseli cajen*

<sup>38</sup> Odi mamadegin agena je Jisas haun waug qocob walol don. Odimei uqa heel Lasaras mudein euna len. Lasaras mudein eu meen hatin. Meen ben oso hatin heel cebecna cufa coin. <sup>39</sup> Odimei Jisas maaden, "Meen eu besi oiga!" aden. Odocob Mata cal mec dana cebinag uqa Jisas madon, "Tibud, ege heel cisom eu qila deel 4-pela ihoc lena! Uqa wele tul wasena," don. <sup>40</sup> Odocob Jisas madon, "Ija hina, hina wawin melecebfi hina Anutna kobolkobol fegan ec qee mahelemfo?" don. <sup>41</sup> Eunu Jisas odi madocob age meen besi oin. Odocob Jisas uqa tatii Memeg madon, "Mei, ija je mahecemin dah mitem eunu ija hetaga higina. <sup>42</sup> Ija hina jejeni gaid dah mitigina eu dugina qa dana cajaca alilti taweginna agenu age hina sultem eunu wawaga meleigianu je i mahigina," don.

<sup>43</sup> Jisas odi madimei uqa utai Lasaras madon, "Lasaras cali hoga!" don. <sup>44</sup> Odocob dana cal men eu jaih ebenga lotoc jelecca uqa ola lotoc jahuldocca uqa cali hon. Odocob Jisas maaden, "Lotoc cufaldimeig culdecebli nuiale," aden.

#### *Juda iloilo agena cegulec benna ege Jisas qocomun cal migian ec madein (Matju 26.1-5; Mak 14.1-2; Luk 22.1-2)*

<sup>45</sup> Eunu Juda dana cajaca mati age Mariaca hoin eundec age Jisas odon eu fimeig Jisasnu wawaga meleen. <sup>46</sup> Leihqa age Farisi ageca belimeig Jisas odon eu cunug saadein.

<sup>47</sup> Odocobil Farisi age je eu docobil ihanec dana benbenca, Farisi ageca age cegulecnu uteadein. Cegulimeig age togodudu madein, "Dana eu kobolkobol odoc mati bahic odona! Ege eeta odeqan? <sup>48</sup> Ege uqa gaid eu odocnu qee cahacdocumunni dana cajaca cunug uqanu wawaga meleigian. Odocob Rom dana age hu agena tempel wagalimeig agena dana cajaca cunug fadalooqagan!" ein.

<sup>49</sup> Age gemodec osoqa, ijan Kaifas, uqa cabi gel euna ihanec dana agena ilo bilen, eu uqa maaden, "Age cteh calena eu qee dogina! <sup>50</sup> Dana osol uqa dana cajaca cunug fadalowainnu uqa age hehuladi cal migian eu cois eunu qee fogo adena!" aden.

<sup>51</sup> Je eu uqadodoc cisdocna qee madel qa uqa cabi gel euna ihanec dana agena ilo bilen eunu uqa Jisasnu je hahun maden, “Uqa dana cajaca hehuladi cal migian,” en. <sup>52</sup> Uqa Juda dana cajaca dih hehuladi qee cal meiaunqa Anutna talacul age mahamaha bilisadoc bilegina eu tamanadigiannu euha maden.

<sup>53</sup> Juda dana agena benben age eunu deel euna Jisas qocnu jic wawali togodoin. <sup>54</sup> Eunu Jisas uqa Juda dana amagana camasac qee coboloi qa uqa malogom gami hatu wadauna\* isee euna belimeig jobon Efraim ono li nag meca bileyin.

<sup>55</sup> Juda agena Pasowa Sab Jec Ben Deel cali hugia oodon dana cajaca mati age jobonnanadec dewenega soidocnu kobol odoch Pasowa Deel Ben qee cali hoc Jerusalem ono ti bileyin. <sup>56-57</sup> Ihanec dana benben Farisica age dana wele je cagu maadein, “Oso uqana bileyin fena eu uqa hu mageceb ege li heweegan,” adein. Eunu age ono Jisas wawali tempelna maha gumu tatawi togodudu madein, “Age eeta cisdogina? Uqa sab jec benna qee hoiaunfo?” ein.

## 12

*Maria uqa mool dedemanca Jisas jaihna baseedu qon  
(Matju 26.6-13; Mak 14.3-9)*

<sup>1</sup> Deel 6-pela hedocob Pasowa Sab Jec Ben Deel caligiannu ninijen Jisas uqa Betani jobon nuen. Lasaras Jisas uqa cal mecnadec tulidocob cajen eu uqa jobon euna bilen. <sup>2</sup> Ono age uqana sab saciadutoin. Mata uqa sab qocnu cesulaaden Lasaras uqa agenadec oso cabalna Jisas gami bileyin. <sup>3</sup> Odoch Maria uqa mool dedeman meca uqana lita naha cunug uqana qaig eu ohis bahic umei Jisas jaihna baseedu jouden. Odimej jaih eu uqa gosicna cacon. Mool uqana dedeman me bahic eu wasimei jo euna ihoc len. <sup>4</sup> Euqa Jisasna malogom oso, Judas Iskariot, uqa hibna Jisas uqana cad ebenegana migian eu maden, <sup>5</sup> “Age eetanu mool dedeman meca eu 300 kinanä suldumeig qaig eu umeig sawen dana qee adelein?” en. <sup>6</sup> Uqa odi madenga uqa sawen dananu qee cisdumei madel. Euqa uqa heje dana, uqa cudaugna age qaig tacoloig eu gahidumei uqa eunadec uqadodocnu cesuldudu coboloi eunu uqa odi maden.

<sup>7</sup> Odochob Jisas madon, “Caja eu culdoga! Ija cal mecemin heel cisitoqagannu deel euna uqa odoch eu cois heheweb li caligiannu culdoga! <sup>8</sup> Age sawen dana gaid age gami bileyinanu qa ija gaid age gami qee biluqaun,” don.

*Farisi age Lasaras qocnu madein*

<sup>9</sup> Juda dana cajaca mati bahic age Jisas Betani jobon ono bilina mamadegin dah mimeig age ono hoin. Age Jisas feqan ec himec qee holinqa age Lasaras, Jisas uqa eu cal mece tulidocob cajen, euha feqan imeig hoin. <sup>10-11</sup> Juda dana mati age Lasarasnu cisdumeig ihanec dana benben cculadi Jisasnu wawaga meleecab uqa toodoin. Eunu ihanec dana benben age Lasarasha qocomun cal migian ec madein.

*Jisas uqa king cinigwe Jerusalem dunuh len*

<sup>12</sup> Uqadec Juda dana cajaca mati bahic age Pasowa sab jecna hoin eu age Jisas Jerusalem hohon dumeig <sup>13</sup> age hinahin cedimeig uqa gulucdoqaga bili belimeig utai madein:

“Hosana!\* Tibud binan suluqale!” ein.

“Oso uqa Tibud ijanna hona Tibud eeldoiale!” ein.

*(Buk Song 118.25-26)*

“Tibud Isrel agena king eeldoiale!” ein.

<sup>14</sup> Jisas uqa cesel haun oso umei lalan bilen. Eu Anutna jaqec jena taweia odi toodon. Jaqec je eu odi maden:

<sup>15</sup> “Dana cajaca age Saion taunna bileyina eu Cain cucuiuwain!

Feiga, agena king ageca hona!

Uqa cesel uqana nag goman guhadocob hona!” en.

*(Sekaraia 9.9)*

<sup>16</sup> Saen euna uqana malogom age eunu wawaga qee fogo dol qa hibna Anut uqa Jisas tulidocob cajimei uqa Anut cemenug kobolkobol ocnu teceb age Anutna jaqec jena uqanu je eu maden, age uqanu odoin euha maden eunu cisdoein.

<sup>17</sup> Dana cajaca age Jisasca tatawegin uqa Lasaras utadocob cal mecnadec tulidocob meen heel dunuhnadec cajen eu age uqana odoch qasali maadein. <sup>18</sup> Dana cajaca age uqa kobolkobol eu odonnu dah mein gug eunu age belimeig gulucdoin. <sup>19</sup> Odochob Farisi agedodoc togodudu madein, “Feiga, ceteh ege odeqa eu ihoc qee leiaun! Dana cajaca cunug qila uqa toodoqagannu wele beleiga!” ein.

*Grik dana leih age Jisas walein*

\* **11:54:** Age je Matju 3.1na njia eu feiga. \* **12:13:** Hibru jena uqana gug bahic eu “Anut caahagagale!” euqa saen euna eu Anut binan sulecnu je oso.

<sup>20</sup> Dana age Pasowa Sab Jec Ben Deelna Anutnu cuha foqagannu hoin eu gemona Grik dana leih bilein. <sup>21</sup> Age Filip, uqa Betsaida jobon Galili hatunadec, eu cemenug limeig ninidudu madoin, "O Ben, ege Jisas fecnu madoqona," doin. <sup>22</sup> Odocob Filip uqa li Andru madon. Odocobil Filip Andruca ale li Jisas madosin. <sup>23</sup> Odocobil Jisas maalen, "Dana Melah uqa Anut cemenug kobolkobol ocnu tigiannu saen cali hoia." <sup>24</sup> Ija je mele maadigina, wit aig mahana qee tonifei eu gauc bilina qa wit aig mahana tonimei cal mifei eu wasimei aig mati hanona. <sup>25</sup> Oso uqadodocnu cebac nalug mena eu uqa ugana cebac biley eu culina. Oso maha ina ugana cebac biley sagagdona eu uqa ugana cebac biley eu cebac biley catanec eu ugiannu gaidgaid hewena. <sup>26</sup> Oso uqa ijana cabi hewecnu gale dona eu uqa ija gad tooteiale. Odocob ija biligenna ijana cabi dana ugaha ijaca ono bilewan. Oso uqa ijana cabi ona eu Memige Anut uqa ugana binanca mudigian," alen.

#### *Jisas ugana cal mecnu je maden*

<sup>27</sup> Jisas je haun maalen, "Qila ija wawi culumenga gaid cisdugina. Ija cel je madigen? Ija odi madigenfa, 'Mei, saen ina cahahataga,' igenfa? Qee! Ija gug inu saen ina hom. <sup>28</sup> O Mei, hina ijain sulecem ohis teial!" alen. Odi maaleceb sao jobonnadec jejeg oso maden, "Ija ijani wele ohis sulem, ija haun suligen," en. <sup>29</sup> Dana cajaca ono tawein eu jejeg dah mein. Leih age madein, "Eu udududoia," ein. Euqa leih madein, "Anutna ensel oso uqa je madioa!" ein.

<sup>30</sup> Euqa Jisas maaden, "Jejeg i madeceeb dah meiga eu ija cesultigannu qee calel qa eu age cesuladigiannu caleia. <sup>31</sup> Anut uqa dana cajaca mahana bileyina eu gesiladigiannu saen eu qila hoia. Anut uqa qila dana ben uqa mahamaha cunug cofdona eu ititacdocab nuigian. <sup>32</sup> Saen ija mahananadec sulitecebil ohis titi bilig dana cajaca cunug age diiadecemin ijaca hoqagan," aden.<sup>†</sup> (<sup>33</sup> Uqa adi cal migiannu camasac mecnu odi maden.)

<sup>34</sup> Dana caja amca madoin, "Egena loo je eu Anutna Krais uqa cebac bileyeb catanigian ec maden. Hina adinu age Dana Melah suldocobil ohis tigian ec madaga? Dana Melah eu in?" doin.

<sup>35</sup> Odocobil Jisas jejenega hewi maaden, "Fulacdoc uqa ageca nag odi biligian. Tu ageca hu jahuladeiaunnu age fulacdocca bibilebil jicna coboiga. Oso uqa tuna cobona eu ana nuina ec qee dona. <sup>36</sup> Age fulacdocca bibilebil age fulacdocna dana cajaca ibuldoqagannu fulacdoc eunu wawaga meleelieale," aden.

#### *Juda dana cajaca mati bahic age Jisasnu wawaga qee meleel*

Jisas odi madi hedumei nui uqadodoc jahunen. <sup>37</sup> Uqa amagana kobolkobol mati odongqa age uqanu wawaga qee meleel. <sup>38</sup> Eunu je hahun madec dana Aisaia maden eu ihoc len. Aisaia odi maden:

"O Tibud, in uqa ege je madom eu waug meleen?

Tibud uqa ugana gagadic odoc eu innu camasac men?" en.

(Aisaia 53.1)

<sup>39</sup> Eunu age wawaga meleecwe qee. Ge, Aisaia uqa je oso ha maden:

<sup>40</sup> "Anut odadecelb age amaga galuc men.

Anut odadecelb age wawaga tool ibuldon.

Eunu age amaga meciecwé qee, age wawaga fogo docwe qee.

Anut maden, 'Eunu age ijanu qee falicdocobilfi ija age qee me madigaun,' en," je eu odi maden.

(Aisaia 6.10)

<sup>41</sup> Aisaia uqa Jisas ugana kobolkobol ugian eu fen eunu uqanu je eu maden.

<sup>42-43</sup> Age odoinqa Juda dana iloilo mati age Jisasnu wawaga meleen. Euqa age Anut agenu me adena eu qee gale adel, age dana age agenu me adegina eu gale aden. Eunu age Farisi dana eu agenu cucueinnu cuha jonadec ititacadowainnu age uqanu camasac qee madelein.

#### *Jisasna je dana cajaca cunug gesiladen*

<sup>44</sup> Jisas co suli u maaden, "Oso ijanu waug meleena eu uqa ijanu dih qee meleena qa uqa sulten eunu ha waug meleena. <sup>45</sup> Odocob oso ija mecitena eu uqa sulten euha mecidona.

<sup>46</sup> In oso uqa ijanu waug meleigian eu uqa tuna qee biliaunnu ija mahana fulacdowainnu nem. <sup>47</sup> Ija dana mahana bileyina eu gesiladecnu qee nelem qa dana mahana bileyina eu caahahaadigennu nem. Eunu oso ijanu je dah mimei qee waugna tacecebf ija uqa qee gesildugaun.

<sup>48-50</sup> Ija ijadodoc ijanu qee madelem qa Memige Anut uqa sulten eu uqa ija cel je madigennu gatiti maten. Memige Anutna je eu, dana age eunu wawaga meleena eu uqa cebac biley catanec adena eu ija dugina. Je ija madigina eu Memige ija madigennu gatiti maten eu odi madigina. Eunu oso ija hibemtimei ijana je qee hewi daugdona eu oso uqa gesildugiannu nijia. Je ija madem eu cit qoc deelna uqa gesildugian," aden.

<sup>†</sup> **12:32:** Jisas uqa age na babalecnia tuitu qumeig caqusuqagan eunu maden. Jic euna Anut uqa suldocob uqa sao jobon timei ohis bahic biligian. (Age Filipai 2.9-11 feiga.)

## 13

### *Jisas uqana malogom jaimaga cusiaden*

<sup>1</sup> Pasowa Sab Jec Ben Deel qee calec ninijen Jisas uqa maha i culimei Memige Anutca nuigiannu saen eu wele hoia ec don. Uqa uqana, mahana gaid biloloig eu age gaid nalunuga moloi. Uqa nalunuga memen li uqana cal mec calen.

<sup>2</sup> Jisas uqana malogomca age sab jecna bileyin. Seten uqa uqana cisdock Judas Iskariot, Saimon melah, wele Jisas uqana cad ebenegana mecnu waugna men. <sup>3</sup> Jisas uqa Memige Anut uqa ceteh cunug uqa ebenna men, uqa Anut suldocob nen, uqa haun ceseli Anutca ti caligian eu cunug don. <sup>4</sup> Eunu age sab jogaqabibilegin Jisas uqa cajimei uqana lotoc me eu hulimei cabi lotoc u wailohna taqen. <sup>5</sup> Odimei uqa wa bohna o danimei malogom jaimaga wasacudiadimei cabi lotoc taqen euna cacuaden.

<sup>6</sup> Uqa odi oodadi Saimon Pitaca hon. Euqa Pita madon, "Tibud, hina ija jaimi wasacudecnu madaganafa?" don. <sup>7</sup> Odocob Jisas jejeg hewi madon, "Ija odigina eunu hina qila qee fogo henaqa, hina hibna fogo higian," don. <sup>8</sup> Odocob Pita madon, "Hina jaimi qee bahic wasacuditagaun!" don. Odocob Jisas jejeg hewi madon, "Ija hina qee wasacudihigeqa hina ijaca qee biluwaun," don. <sup>9</sup> Odocob Saimon Pita madon, "Tibud, ija jaimi himec qee wasacuditagaun qa ija ebeniha ilomiha wasacuditagale!" don. <sup>10</sup> Odocob Jisas uqa Pita jejeg hewi madon, "Oso deweg wa jon eu deweg soidoc nijia, eu jaih himec wasacudigian. Ageha dewenega soidoc bileyina, euqa cunug qee," don. <sup>11</sup> Ge, uqa dana uqa uqana cad ebenegana mecnu mamadi bilen eu camasac don. Eunu uqa maden, "Age cunug dewenega soidoc qee bileyina," en.

<sup>12</sup> Jisas uqa malogom jaimaga wasacudi hedumei uqa uqana cabi lotoc hulimei lotoc me haun tacimei cabalna uqana bileyina li bibili maaden, "Ija qila odadiga eunu wawaga fogo doiafo? <sup>13</sup> Ija agena Iwaladec Tibudca biligina. Eunu age ijana madi, Iwalgec Tibudca tegina eu age tutuc madegina. <sup>14</sup> Ija, agena Tibud Iwaladecca, age jaimaga wasacudiadiga eunu ageha jaimaga wasacuditobtocabi bileyale. <sup>15</sup> Ge, ija qila kobil odocnu gug madiga eunu age kobil eu toodu odoigale. <sup>16</sup> Ija je mele maadigina, cabi dana oso uqana memeg qee falic wooldu ben bilina. Dana oso uqa suldon euha uqana suldoc eu qee falic wooldu ben bilina. <sup>17</sup> Qila age eunu dahiniga fogo dona. Eunu age eu toodu ha odoqagaqa age eeladec biluqagan!" aden.

<sup>18</sup> "Ija age cunugnu qee madigina. Ija dana ija nesili cedadem eundecnu dugina. Euqa Anutna jaqec je oso tawena eu ihoc ligiannu ceteh oso caligian. Je eu odi madena: 'Oso uqa ijana sab jena eu uqa lahacteun jaih sulina,' ena. (Buk Song 41.9)

<sup>19</sup> Ija eu qila eu qee calec ninijen odigiannu maadigina. Eunu isi caleceb age ija uqa eu mele bahicnu wawaga meleigian. \* <sup>20</sup> Ija je mele maadigina, oso uqa ija suladigina eundec oso ehudi bileyi cudun utina eu ija ehitibileyi cudun itina. Oso uqa ija ehitibileyi cudun itina eu uqa ija sulten eu ehudi bileyi cudun utina," aden.

### *Jisas uqana malogom oso uqa uqana cad ebenegana mudigian ec maden (Matju 26.20-25; Mak 14.17-21; Luk 22.21-23)*

<sup>21</sup> Jisas odi madimei hedocob uqa waug culumen docob uqa camasac maaden, "Ija je mele maadigina, age oso uqa ijana cad ebenegana mitigian," aden. <sup>22</sup> Odocob malogom age filiciti mecidocobdocobein. Uqa innu madena imeig dadanein. <sup>23</sup> Malogom oso Jisas uqa culaug ona eu Jisasca duculdot bilesin. <sup>24</sup> Odocob Saimon Pita uqa malogom eu ihohdumei madon, "Uqa innu madena ec sisildoga," don. <sup>25</sup> Eunu malogom eu Jisasca duculdot bilesin eu qaalimei Jisas sisildu madon, "Tibud, hina innu madaga?" don. <sup>26</sup> Odocob Jisas jejeg hewi madon, "Ija sab oso wehucna tanumig utigen eu," don. Odimei uqa sab oso wehucna tanumei Judas, Saimon Iskariot melah, uten.

<sup>27</sup> Judas sab eu i jecob Seten uqa waugna len. Odocob Jisas madon, "Hina odigen agana eu mahuc odoga!" don. <sup>28</sup> Cabalna bileyin eu age cunug Jisas eeta odocnu madona eu qee doloin. <sup>29</sup> Leih age Judas cudaug qaigca hewen eunu Jisas uqa Judas madon, "Sab jec bennu sab fajaga," donfo, qee "Hina qaig leih sawen dana adaga," don ec cisdoin. <sup>30</sup> Odocob Judas sab fan eu i jimei mahuc cali li nuen. Eu tu ninijen nuen.

### *Jisas uqa uqana malogom loo je haun aden*

<sup>31</sup> Judas nueceb Jisas uqa malogom maaden, "Qila Dana Melah uqana kobolkobol ona. Qila Anut uqa Dana Melah odocna kobolkobol ona. <sup>32</sup> Anut uqa Dana Melah odocna kobolkobol onafi Anut uqadoc Dana Melah kobolkobol utigian. Mele, uqa eu mahuc Dana Melah kobolkobol utigian. <sup>33</sup> O melamiel, ija saen gothic bahic ageca bileyan. Eu hedocob age ija walituqagan qa, ija wele Juda dana maadem, eu ija qila maadigina, 'Ija nuigina euna age lecw qee,' adigina. <sup>34</sup> Ija qila age loo je haun adigina,

\* <sup>13:19:</sup> Age je Jon 8.24na nijia eu feiga.

age nalug mudeceb mudecebi coboigale. Ija age nalunuga mem eu odi ageha nalug mudeceb mudecebi bileigale.<sup>35</sup> Age odi nalug mudeceb mudecebi biluqagaqa dana cunug age ijana malogom bilingina eu camasac doqagan,” aden.

*Pita uqa Jisasnu qee sasac quqian eunu Jisas uqa madon  
(Matju 26.31-35; Mak 14.27-31; Luk 22.31-34)*

<sup>36</sup> Odocob Saimon Pita uqa Jisas sisildon, “Tibud, hina ana nuuguna?” don. Odocob Jisas madon, “Ija qila nuigina euna hina tootecnu qee nijel qa hibna tootegan,” don. <sup>37</sup> Odocob Pita madon, “Tibud, eetanu ija qila toohi cobocnu qee nijel? Ija hina hehulhi cal migen,” don.

<sup>38</sup> Odocob Jisas jejeg hewi madon, “Hina ija hina hehulhi cal migen tagana eu mele bahicfo? Ija je mele mahigina, mala manahal qee qoc ninijeb hina ijana biligina eu qee sasac qu cijeddogan!” don.

## 14

*Jisas uqa Memigeca nuecnu jic*

<sup>1</sup> Jisas uqa maaden, “Age wawaga cain qeleteiaun, cain cucuiuwain. Age Anutnu wawaga meleiale, ijanu ha wawaga meleiale. <sup>2</sup> Meina jona biley hamol mati nijadeiga. Eu odi qee nijoubmi ija qee maadoum, ‘Ija ono agena biley cudun eeldocnu nuigen,’ adoum. <sup>3</sup> Ija nui agena biley cudun eeldu hedumig ija ceseli humig ija biligina euna age ijaca bileyqanna age cedadi ehadigen. <sup>4</sup> Ija nuigina eu age jic eu fegin,” aden.

<sup>5</sup> Odocob Tomas uqa madon, “Tibud, hina ana nuuguna, eu ege qee doqona. Eunu jic eu adi feqan?” don. <sup>6</sup> Odocob Jisas uqa jejeg hewi madon, “Jic eu ija, mele gug eu ija, cebac biley silig eu ija. Oso Memige Anutca qee leiaun, ija dih odocomin Memige Anutca loqagan. <sup>7</sup> Age ijanu wawaga fogo doialumi Meinu ha wawaga fogo doub. Age qila uqanu wawaga fogo dona, age Mei ha fein,” aden.

<sup>8</sup> Odocob Filip madon, “Tibud, Memige Anut ihacgecem feqan eu ihoc,” don. <sup>9</sup> Odocob Jisas madon, “Filip, ija saensaen ageca biluqunaqa hina ijanu wawin qee fogo dolfo? Hina adi Memige Anut ihacgaga foqqa tagana? Oso ija meciteia, eu uqa Memige Anut mecidoia. <sup>10</sup> Ija Memige Anut dunuhna biligina, Memige Anut ija dunuhna bilina eunu wawin qee meleelfo? Je ija maadigina eu ijana je qee. Memige Anut uqa ija dunuhna bilina eu uquadodoc uqana kobolkobol odona,” don. <sup>11</sup> “Ija Memige Anut dunuhna biligina, Memige Anut ija dunuhna bilina ec maadigina eunu ijanu wawaga meleiale. Age ijanu jenu qee wawaga meleceebfi age ija kobolkobol odigina eunu himec ijanu wawaga meleiale,” don.

<sup>12</sup> “Ija je mele maadigina, oso ijanu waug meleena eu ija kobolkobol odigina euha odigian. Ija Memige Anutca tigennu uqa ija wooltec kobolkobol odigian. <sup>13</sup> Memige Anut binan eu Melah odocna ben migiannu age ija ijanina ceteh osonu inondooqagaqa eu ija odigen. <sup>14</sup> Age ija ijanina ceteh osonu inontecebilfi eu ija odigen,” aden.

*Jisas uqa Kis Gun suldocob nigianu sahunaden*

<sup>15</sup> Jisas je haun maaden, “Age ija naluni moqagaqa age ijana loo je toodu odoqagan. <sup>16</sup> Odocobil ija Memige Anut inondocomin uqa Tutuanaga Oc oso sulduadigian. Eu uqa ageca bileyceh catanigian. <sup>17</sup> Eu mele jenu Kis. Mahanadec age uqa qee fifi dudu egina. Eunu age uqa ocnu qee nijel. Euqa uqa ageca bilina, uqa age dunuhna biligian. Eunu age uqanu dogina,” aden.

<sup>18</sup> “Ija age mel bega cinigwe qee tegeladi nuigaun. Ija ageca ceseli hugen. <sup>19</sup> Saen gohic odi giiceb mahanadec dana age ija haun qee mecituwain. Ageqa mecituwagan. Ija cebac biliginanu ageha cebac biluqagan. <sup>20</sup> Saen euna ija Mei dunuhna biligina, age ija dunuhna bilingina, ija age dunuhna bilingina eunu age wawaga fogo dugian. <sup>21</sup> Oso ijanu loo je umei toodu odona eu uqa ija naluni mena. Mei uqa dana eu ija naluni mena eunu nalug migian. Odocob ija uqanu nalug mimig ijana gugnu camasac mudigen,” aden.

<sup>22</sup> Odocob Judas, eu Judas Iskariot qee, uqa Jisas sisildu madon, “Tibud, eetanu hina hinana gugnu ege amigena camasac megan qa dana mahanadec amagana qee camasac migau agana?” don. <sup>23</sup> Odocob Jisas jejeg hewi madon, “Oso uqa ija naluni mena eu ijana je toodu odigian. Odocob Mei uqa dana eunu nalug migian. Odocob Meica ijaca ele limeu dana eu elena jo biley uqa dunuhna bileywan. <sup>24</sup> Oso ija naluni qee mena eu uqa ijana loo je ha qee toodu odona. Je i maaadigin dah megina eu ijana qee qa eu Memige Anut ija sulten ugana je,” don.

<sup>25</sup> Odimei maaden, “Je eu ija ageca bibili maadem. <sup>26</sup> Agena Tutuanaga Oc eu Kis Gun, Memige Anut uqa ija ijanina sulduadigian eu humei uqa ceteteh cunug iwaladigian. Odimei uqa je cunug ija age maadem eu tulidocob dahiniga qolocijigian,” aden.

<sup>27</sup> “Ija ijana malol biled adigina, wawaga malol biled eu culiadigina. Mahanadec malol biled adeginawe odi qee ija adigina. Wawaga cain qeleleiaunle, dumanaga ha cain culiaunle. <sup>28</sup> Ija maadem, ‘Ija nuimig ageca ceseli hugen,’ adem eu age doin. Memige Anut uqa ija wooltec bilia. Eunu age ija naluni moubmiqa age ija Memige Anutca tigen ec adem eunu wawaga ceeloub. <sup>29</sup> Isi ceteh eu caleceb age wawaga meleigiannu ija eu qee calec ninijen je eu wele maadiga,” aden.

<sup>30</sup> “Maha i ugana dana ben uqa hona. Eunu ija je mati bahic ageca haun qee madoqaun. Dana eu uqa ija mateceb odigen eu gagadic odocco qee. <sup>31</sup> Euqa mahanadec dana age ija Memige Anutnu nalug miginanu dogina eunu Memige uqa je maten eu toodu odigina. Ege jo i qisacdumeb beleqan. Cajeiga,” aden.

## 15

### *Jisas uqa na wain bahic*

<sup>1</sup> Jisas je haun maaden, “Ija na wain gug bahic. Mei uqa na wain cabi cofdoc dana. <sup>2</sup> Uqa ijana batac abesabes age aig qee qogina eu qeti heladena. Odocob uqa ijana batac abesabes age aig qogina eu aig meca haun qoqagannu ceteh me qee cunug batacna nijegina eu soiadena. <sup>3</sup> Ijana je ija maadem uqa odadeceb age wele soidoc bilegina. <sup>4</sup> Age ija fagtec bileigale, odocob ija age fagadec biligen. Batac uqa wain gugna qee fagdoc tawecebil aig qocwe qee. Eu odiwe age ija qee fagti tawecebil ageha aig qocwe qee,” aden.

<sup>5</sup> “Ija na wain gug, age wain batac. Age ijaca qee cuhanuc bibili ceteh caunca oso odocwe qee. Eunu oso uqa ija fagtec bilina, odocob ija uqa fagdoc biligina eu uqa aig matica qugian. <sup>6</sup> Oso uqa ija fagtec qee biligiaqa eu wain batac gauc heleginawe odi uqa helecebil nuigian. Odocob uqa galaligian. Odocob age eu cedi haudumeig jana helecebil cijigian,” aden.

<sup>7</sup> “Age ija fagti biluqagaqa, ijana je ha wawaga fagdoc biligiaqa, wawaga cetehnu madena eu age inondocibil Anut adigian. <sup>8</sup> Age aig matica qoqagaqa, ijana malogom bahic ha ibuldoqagaqa eu odi odocna ija Mei binan ben wasigian. <sup>9</sup> Memige Anut uqa ija naluni menawie ija age nalunuga migina. Age ija agenu nalunuga mec euna bileigale. <sup>10</sup> Age ijana loo je toodu odoqagaqa age ija agenu nalunuga mec euna biluqagan. Eu odiwe ija Meina loo je toodu odiginanu uqa naluni mec euna biligina. <sup>11</sup> Je eu ija wawi ceeli biled ageca ligiannu, age wawaga ceeli biled ihoc bahic ligiannu maadem. <sup>12</sup> Ijana loo je eu age adigina eu ihen, ‘Ija age nalunuga memwe age nalug mecebmecebi bileigale,’ adigina. <sup>13</sup> Oso uqa ugana danah hehuladi cal menu, nalug mec eu wooldoc oso qee nijel. <sup>14</sup> Age je ija maadigina eu toodu odoqagaqa age ijana danah biluqagan. <sup>15</sup> Cabi dana age agena dana ben odona eu age qee dogina. Eunu qila ija age maadi cabi dana ec qee adigina. Euqa je cunug Mei mateceb dom eu cunug ija age maadecemin doin. Eunu ija age ijana danah ec maadigina,” aden.

<sup>16</sup> “Age ija nesili qee ehitelein qa age belimeig aig qoqagannuca, agena aig qoc eu catanigannuca nesili ehadem. Odimig age Memige Anut uqa age ijanina ceteh osonu inondoqagaqa eu cunug adigianu ija age nesili ehadem. <sup>17</sup> Ijana loo je adigina eu ihen, ‘Age nalug mecebmecebi bileigale,’ adigina,” aden.

### *Mahanadec dana age malogom cad madoqagan*

<sup>18</sup> Jisas je haun maaden, “Mahanadec dana eundec age sagagadoqagaqa eu age ija casac sagagtein eunu cisdoigale. <sup>19</sup> Age mahanadec biloubmiqa mahana eundec age, age agenagulwe nalunuga moub. Euqa age mahanadec qee bilinginaqa ija age mahanadec bibilegin hu nesili cedem. Eunu mahanadec eundec age sagagadegina. <sup>20</sup> Ija wele maadem:

‘Cabi dana uqa ugana ben qee falic wooldu bilina,’ aden.

(Jon 13.16)

Je eunu cisdoigale. Age ija aqati tootootein eunu age ageha aqati tootooadoqagan. Age ijana je toodu odooin eunu eundec age agena jeha toodu odoqagan. <sup>21</sup> Age uqa ija sulten eu qee dogina. Eunu age eu cunug age ija ijaninu odadoqagan,” aden.

<sup>22</sup> “Ija qee hu maadoummiqa agena silail eu dewenega fagdoc bilia ec eu qee doub. Euqa ija hu maadem eunu agena silail jahuldocnu gelac oso qee nijel. <sup>23</sup> Oso uqa sagagtena eu uqa Meiha sagagdona. <sup>24</sup> Ija age gemona dana oso wele qee odol eu qee odoummiqa agena silail dewenegana qee biloub. Qilaqa age ijaca Meica feliclimeig sagaglein. <sup>25</sup> Eu je oso agena loo je jaqcena nijina eu ihoc ligiannu age odi odooin. Je eu odi maden:

‘Age sagagtecnu je silig qee nijel euqa sagagtein,’ en,” aden. (Buk Song 35.19; 69.4)

<sup>26</sup> “Euqa Tutuanaga Oc ija Memige Anutna gundec sulduadigen eu mele je madecnu Kis eu humei uqa ijana gugnu je qasali maadigian. <sup>27</sup> Age age gug qocnadec ijaca bilomnu ageha ijana gugnu je qasali maadoqagan,” aden.

**16**

<sup>1</sup> “Je eu age agena wawaga meleec eu cain culuwainnu ija maadem. <sup>2</sup> Juda dana age egena cuha jona qee biluwain imeig ititacadi agena gel hibilohu isec madoqagan. Mele, saen oso hugian, saen euna dana age aqegina eundec ege eu odocna Anutna cabi oqona ec cidoqagan. <sup>3</sup> Age Memige Anutnu wawaga qee fogo dol, ijanu ha age wawaga qee fogo dol eunu odi odadoqagan. <sup>4</sup> Euqa age ceteh isi cali hocob ija wele maadem, eunu dahiniga cidoqagannu ija ceteh eu qee hoc ninjen iiña maadem,” aden.

*Jisas uqa Kis Gunna cabinu maaden*

Jisas je haun maaden, “Ija ageca bilomnu ija je eu age sanan mecnä qee maadelem. <sup>5</sup> Qilaqä ija sulten ugaca nuigina, euqa age oso ana nuuguna? ec qee sisiltena. <sup>6</sup> Qee, ija je i maademnu age dumanaga culec bilegina. <sup>7</sup> Ija maadigaqa ija mele je maadigina, ija qee nuecemfini Tutuanaga Oc ageca qee hoiaun. Ijaqa ono nuifig suldochmin ageca hugian. Eunu ija nuigina eu age me madecnu njija. <sup>8</sup> Odocob uqa humei uqa mahadanadec eundec amaga hulelduadigian. Odocob age silailnuca ititom cobocnuca Anutna gesiladecnuca ulauladigian. <sup>9</sup> Age ijanu wawaga qee meleena eunu silailnu ulauladigian. <sup>10</sup> Ija Memige Anutca tigina, age ija haun qee mecituwain eunu ititom cobocnu ulauladigian.\* <sup>11</sup> Maha i uqana dana ben eu dewegnu Anut wele gesildon eunu Anutna gesiladecnu ulauladigian,” aden.<sup>†</sup>

<sup>12</sup> “Ija age je matica maadecnu njija qa age qila gahidocwe qee. <sup>13</sup> Euqa mele jenu meleecnu Kis eu humei ugadodocnadec je qee maadeiaun qa uqa dah mena eu maadigian. Odimei ceteh hibna caligian euha maadigian. Eunu uqa mele je cunug doqagannu dado madigian. <sup>14</sup> Uqa je ijana njija eu umei age maadigian. Eunu uqa ija binani suli ugian. <sup>15</sup> Cunug eu Memige Anutna njija eu ijana njija. Eunu uqa je ijana njija eu umei age maadigian ec maadiga,” aden.

*Qila waloc saen caleceb isi waug celec saen caligian*

<sup>16</sup> Jisas je haun maaden, “Saen nag odi gieceb age ija qee mecituwain. Odocob eu haun nag odi gieceb age ija haun mecituqagan,” aden. <sup>17</sup> Odocob uqana malogom leih age togodudu madein, “Uqa madena, ‘Saen nag odi gieceb age ija qee mecituwain. Odocob eu haun nag odi gieceb age ija haun mecituqagan,’ ena, ‘Ija Memige Anutca tiginanu,’ ena eu cel je madena?” ein. <sup>18</sup> Age madein, “Uqa madena, ‘Saen nag odi gieceb’ ena eu uqana gug ege qee doqona,” ein.

<sup>19</sup> Odocobil Jisas uqa age, age uqa sisildocnu cisdodogin feciadimei eunu uqa maaden, “Ija maadiga, ‘Saen nag odi gieceb age ija qee mecituwain. Odocob eu haun nag odi gieceb age ija haun mecituqagan,’ adiga. Age je eu cisdudu togodoginafo? <sup>20</sup> Ija je mele maadigina, age qada u qajoqagan, mahadanadec agega ceeli biluqagan. Age dumanaga culigian. Euqa age dumanaga culec eu ceeli bilec ibuldugian. <sup>21</sup> Saen caja mel basigliannu deel cali hocob uqa culumen dodon bilina. Euqa mel basimei uqa mel on eunu waug ceelenan uqa culumen doc eu dahig celena. <sup>22</sup> Ageha odi qila culumen adec bilegina. Ijaqa haun ceseli meciadigen. Odocob age wawaga celigian. Agena ceeli bilec eu oso qee cawaladeiaun. <sup>23</sup> Deel euna age sisilte je oso qee matowain. Ija je mele maadigina, age Memige Anut ceteh osonu inondocobil uqa eu ija ijanina adigian. <sup>24</sup> Age lili saen qila bilegina ija ijanina Memige ceteh osonu qee inondoloin. Age agena ceeli bilec ihoc ligiannu inondocobil eu adeceeb oigale,” aden.

*Jisas uqa mahadanadec gagadic odoc wooldon*

<sup>25</sup> Jisas je haun maaden, “Ija je i age galolo jena maadem. Saen oso hugian saen euna ija galolo jena qee maadigaun. Euqa saen euna ija age Memige Anutnu je camasacna maadigen. <sup>26-27</sup> Deel euna age ija ijanina Memige Anut je inondoqagan. Age ija naluni meginanuca, age uqa ija Anutnadec hom eunu wawaga meleena euca eunu Memige Anut ugadodoc age nalunuga mena. Eunu ija agenu mimig Memige Anut je inondugen eu qee maadigina. <sup>28</sup> Ija Memige Anutnadec humig mahana nem. Qila ija maha qisacdumig Memige Anutca ceseli tigina,” aden.

<sup>29</sup> Odocob malogom age Jisas madoin, “Faga, qila hina camasac madagana, hina galolo jena qee madelem! <sup>30</sup> Ege qila hina ceteh cunug dogona, oso sisilhecnu hina age adi

\* **16:10:** Dana mahadanadec age Jisas geuldimeig age uqa ititom kobol qee odel eunu uqa cal migian ec madein. Euqa Anut uqa odudeceb uqa cal mecnadec ceseli cajeceb ehudeceb Jisas uqa Anutca bilen. Odon euna Anut uqa dana cajaca cunug Jisas ititom kobol himec odon eunu ihacadena. † **16:11:** Dana mahadanadec cunug age Jisas cal men eu fimeig age Anut uqa geulden ec cisdoin. Euqa Jisas uqa Anut amegna qee geuldec bilina. Anut uqa Jisas cal menna Seten geuldimei uqana gagadic odoc eu cilehdon.

cisdogina docnu qee nijel eu ege doqona. Eunu hina Anutnadec hom eu ege wawige meleena," doin.

<sup>31</sup> Odocobil Jisas uqa maaden, "Age qila wawaga meleenafo? <sup>32</sup> Feiga, saen hugian, mele saen eu wele bilina, saen euna age cunug ija cuhanuc tawigennu qisacti agena gunna budu beladoqagan. Euqa Memige Anut uqa ijaca tawowona, eunu ija cuhanuc qee tawigina. <sup>33</sup> Ija je i age ija dunuhna bibili malolca biluqagannu maadem. Age mahana bilecnana wawaga sogoecca biluqagan. Euqa ija maha wooldom eunu age wawaga toogdoiale," aden.

## 17

### *Jisas uqadodocnu Anut inondon*

<sup>1-3</sup> Jisas uqa je eu madi hedumei uqa sao jobonna tatii imei Anut inondon:

"O Mei, saen eu wele cali hoia. Hina dana mahamaha biledina cunug Melem ebenna madem. Odimeg cunug uqa ute mudec age cebac biled catanec eu adecmu gagadic odic ihoc ute. Cebac biled catanec uqana gug eu ihen. Age hinanu, hina himec mele Anut eunuca, Jisas Krais hina suldom eu uqanuca wawaga fogo doc biledina. Eunu hina Melem uqa kobolkobol ihigianu kobolkobol utugale," don.

<sup>4</sup> "Ija hina mahana kobolkobol ihm, cabi ija ocnu item, eu ija u hedem. <sup>5</sup> O Mei! Qila hina amenna kobolkobolca biled itigale, kobolkobol eu maha qee ifanec ninijen ija hinaca biloh saen euna ijana bilen eu haun itigale!" don.

### *Jisas uqa uqana malogom cesuladecnu Anut inondon*

<sup>6</sup> Jisas haun inondon:

"Dana hina mahanadec ija item eundec ija hina ijain camasac mudiadem. Age hina toinain bileyin, euqa hina age ija item. Age hina jejein toodoo odoin. <sup>7-8</sup> Je hina item eu ija age maadem. Age je eu oin, age, ija hinanadec hom eunu mele wawaga fogo don. Age, hina ija sultem eunu wawaga meleena. Eunu qila age ceteh hina item eu cunug hinanadec hon eunu wawaga fogo don," don.

<sup>9</sup> "Age hina toinain. Eunu ija agenu mimig je inonhigina. Ija mahanadec eundecnu qee inonhigina qa hina item agenu bahic inonhigina. <sup>10</sup> Ija toinani cunug eu hina toinain. Hina toinain eu ija toinani. Agena odocna ijana kobolkobol camasac mena," don.

<sup>11</sup> "Qila ina ija mahana qee biligaun. Euqa age mahana biledina. Ija hinaca ligen. O Mei Gun, hina ijain eu ija item. Eunu ija hinaca ele osol biluwunawe age hina ijain euna wawaga osol biluqagannu hewadagale. <sup>12</sup> Saen ija age gemona bibili ija hina ijain item euna biluqagannu hewadem. Ija cofadem. Age eundec oso qee fadalelqa Anutna jaqec je nijia eu ihoc ligianu dana fadalec eu himec uqa fadalec bilina. <sup>13</sup> Qilaq ija hinaca tige bili odigina. Odimig ija wawi ceeli biled ageca ligianu, age wawaga ceeli biled ihoc bahic ligianu je i mahana tatawi mahigina," don.

<sup>14</sup> "Ija hinana je adem. Ija mahanadec qeewe eu odi ageha mahanadec qee. Eunu age mahanadec qeenu mahanadec eundec age sagagadegina. <sup>15</sup> Ija hina, age mahana biluwainnu cedadaga ec qee inonhelem qa hina qisol mec dana eu ageca hu waadeiaunnu hewadagale higina. <sup>16</sup> Ija mahanadec qeewe eu odi age mahanadec qee. <sup>17</sup> Hinana je eu mele bahic. Eunu hina hinana jena hinanu qaguadaga. <sup>18</sup> Hina ija mahana necnu sultemwe eu odi ija ageha mahamaha beloqagannu suladem. <sup>19</sup> Age mele jena hinanu qagu biluqagannu ija ijadodoc hinanu qagugina," don.

### *Jisas uqa dana cajaca wawaga meleecca cunug cesuladecnu Anut inondon*

<sup>20</sup> Jisas haun inondon:

"Ija age qila ene tawegina agenu himec qee inonhigina. Euqa hibna age je maadecebile dana filfil ijanu wawaga meleigian eundecnu ha inonhigina. <sup>21</sup> Mei, hina ija dunuhna biligina, ija hina dunuhna biliginae eu odi age ele dunuhna bilimeig age cunug wawaga osol migianu inonhigina. Eunu age odi wawaga osol mi biledcnana mahanadec eundec age hina ija sultem eunu wawaga meleigian. <sup>22</sup> Hina ijaca osol biluwunawe age cunug osol biluqagannu kobolkobolca biled hina ija item eu ija age adem. <sup>23</sup> Ija age dunuhna biligen, hina ija dunuhna biledan, age deweg osol bahic moqagannu adem. Eu odocna mahanadec eundec age, hina ija sultem eunuca hina ijana eundec nalunuga magana, hina ija naluni maganaw eunu wawaga fogo dugian," don.

<sup>24</sup> "O Mei! Hina ija item eu ageha ija biligina euna ija gami biledan eunu ija gale hena. Eunu hina maha qee ifanec ninijen ija naluni memnu kobolkobol item eu age foqagan.

<sup>25</sup> O Mei, hina ititom bahic! Hinana gug bahicnu mahanadec age qee dogina. Ijaqa

hinanu dugina. Ene taweginha ageha hina sultem eu age dogina. <sup>26</sup>Ija hina ijain camasac iwaladem. Odimig hina naluni mec item eu age wawaga dunuhna biligiannuca, ijaha age dunuhna biligennuca ija hibna camasac iwaladigen,” don.

## 18

*Judas uqa Jisas ugana cad ebenegana muden  
(Matju 26.47-56; Mak 14.43-50; Luk 22.47-53)*

<sup>1</sup>Jisas uqa inondoc i madi hedumei uqa ugana malogom gami Kidron ugana wa sasac leti belein. Cudun euna cabi oso nijen. Odocob Jisas ugana malogom gami dunuh euna lein. <sup>2</sup>Saen mati Jisas ugana malogom gami ono gulucdadanolioig. Eunu Judas uqa Jisas ugana cad ebenegana men eu cabi eu ana isec don. <sup>3</sup>Eunu Judas uqa Rom agena han dana leih cedadi tempel cebec cofdoc dana leih eu ihanec dana benben Farisica age suladecebile uqa age cedadimei cabi euna ehadi len. Age cejal gowocca hannu cetetehca hewechewec lein. Age cabi duhuh lein. <sup>4</sup>Jisas uqa cetehe cunug ugaca caligian eu dumei uqa cemenega limei sisiladen, “Age in wali cobogina?” aden.

<sup>5</sup>Odocob age jejeg hewi madoin, “Ege Jisas Nasaretdec waloqona,” doin. Odocob Jisas maaden, “Ija uqa,” aden. Judas uqa Jisas ugana cad ebenegana men uqa ono age gami tawein. <sup>6</sup>Odocob Jisas maaden, “Ija uqa,” aden saen euna age bicbic limeig mahana toni aqen.

<sup>7</sup>Odocobil Jisas uqa haun sisiladen, “Age in wali cobogina?” aden. Odocob age madoin, “Ege Jisas Nasaretdec waloqona,” doin. <sup>8</sup>Odocobil Jisas maaden, “Ija wele maadi ija uqa adiga. Age ija waliteginafi dana i age ijaca tawoqa age culadecibile beleiga,” aden. <sup>9</sup>Jisas uqa je oso wele maden:

“O Mei, age hina item eundec oso qee fadalel,” en  
je eu ihoc ligiannu uqa je odi maden.

(Jon 6.39)

<sup>10</sup>Odocob Saimon Pita uqa han sigin uqa ugana cudunnadec umei uqa ihanec dana ilo ugana cabi dana qelimei dahig meula isec qeli caguton. Cabi dana eu ijan Malkas. <sup>11</sup>Odocob Jisas uqa Pita madon, “Hina han sigin ugana cudunna tacaga! Hina wa gab i Memige Anut ija iten eu qee jigaun ec cisdogonafo?” don.

*Age Jisas Anasca ehudilein*

<sup>12</sup>Odocob Rom agena han danaca, agena iloca, Juda agena jic cebec cofdoc danaca age Jisas hewi eben libein. <sup>13</sup>Odimeig age casac Anasna gunna ehudi li mudein. Ge, Anas uqa Kaiafas tanaig. Kaiafas uqa cabi gel euna ihanec dana agena ilo bilen. <sup>14</sup>Kaiafas uqa wele Juda dana maaden, “Dana osol uqa dana cajaca cunug uqa age hehuladi cal migian eu cois,” aden.

*Pita uqa Jisasnu qee sasac qon*

(Matju 26.69-70; Mak 14.66-68; Luk 22.55-57)

<sup>15</sup>Odocob Saimon Pita uqa malogom osoca ale Jisas toodu cobosin. Malogom oso eu uqa ihanec dana agena ilo eu uqanu du cuhadon. Eunu uqa Jisasca ihanec dana agena ilo ugana gel duhuh lesin. <sup>16</sup>Ale lelesin Pita uqa jic cebec maha gumu isec tawen. Eunu malogom oso ihanec dana agena ilo uqa uqanu du cuhadon eu uqa ceseli calimei jic cebec cofdoc caja eu uqa Pita madon. Odocob uqa Pita ehudi dunuh len. <sup>17</sup>Ale lelesin jic cebec cofdoc caja eu uqa Pita madon, “Hina dana eu ugana malogom osofa?” don. Odocob Pita uqa jejeg hewi madon, “Qeelo, ija ugana malogom oso qee,” don. <sup>18</sup>Eu duan saenna. Eunu cabi dana jic cebec cofdoc danaca age ja hudein. Age dewenega ja walac aaden talildu tawein. Pita ugaha euna limei age gami uqa deweg ja walac dodon tawein.

*Ihanec dana agena ben uqa Jisas gesildon*

(Matju 26.59-66; Mak 14.55-64; Luk 22.66-71)

<sup>19</sup>Odocob ihanec dana agena ilo uqa Jisas ugana malogomnuca, ugana je uqa dana iwaladennuca eunu sisildon. <sup>20</sup>Odocob Jisas madon, “Ija dana cunug amagana je maadolig. Ija cuha jonanaca tempelnaca Juda dana cunug cegulegina euna iwaladolig. Ija jahynecna je oso qee madelem. <sup>21</sup>Hina eetanu sisiltagana? Dana ija maadecemin doin eundec sisiladi fagale. Eeta ademun sisiladaga, age dogina,” don.

<sup>22</sup>Jisas uqa odi madocob jic cebec cofdoc dana eu agenadec oso cemenug tatawei uqa siho qahimei madon, “Se, hina eetanu ihanec dana ilo je udi madoga?” don. <sup>23</sup>Odocob Jisas madon, “Ija maduga eu me qeefi qasali madaga duga. Euqa ija tutuc madugafi eetanu qitiga?” don.

<sup>24</sup>Odocob Anas uqa Jisas libein eu odi tatawen suldocob ihanec dana agena ilo Kaiafasca len.

*Pita uqa haun Jisasnu qee sasac qon  
(Matju 26.71-75; Mak 14.69-72; Luk 22.58-62)*

<sup>25</sup> Pita uqa ono ja walac dodon tawen. Odocob age madoin, "Hinaha dana eu ugana malogom osofa?" doin. Euqa Pita qee sasac qu maaden, "Qeeo, ija qee," aden.

<sup>26</sup> Odocob ihanec dana agena ilo ugana cabi dana oso, dana Pita uqa dahig caguton eu uqa waliag oso, uqa Pita sisildu madon, "Ija hina ugaca cabina tatawesin qee feichelemfo?" don. <sup>27</sup> Odocob Pita haun qee sasac qu madon, "Qeeo," don. Odocob saen euna dih mala qon.

*Jisas uqa Pailat amegna tawen*

<sup>28</sup> Odocob qasil bahic age Jisas ehudimeig Kaiafasna gunnadec jo gabman dana ben bilia eunalein. Juda age ege gabman jo locomun Juda dana qee agena gegehin dewenige qageceb Pasowa sab jecwee qee imeig age jona qee telein.\* <sup>29</sup> Eunu Pailat uquadodoc maha gumu cali numei sisiladi maaden, "Age dana i dewegnu adi um qogina eu madeiga duga," aden. <sup>30</sup> Odocob age jejeg hewi madoin, "Uqa qisol mec kobil qee odoubmiqa ege hina ebenna qee moum," doin.

<sup>31-32</sup> Odocobil Pailat maaden, "Cois, age dana eu ehudi belimeig agedodoc agena loo jena gesildu feiga," aden. Odocob Juda age madoin, "Dana oso qocnu eu ege ebenigena qee nijel," doin.† (Jisas wele uqa adi cal migiannu je maden eu ihoc ligian odon.

<sup>33</sup> Odocob Pailat ceseli ugana jona timei Jisas utadocob ten. Uqa sisildon, "Hina Juda agena Kingfo?" don. <sup>34</sup> Odocob Jisas jejeg hewi madon, "Sisilec je i hinana cisdochfo, qee leih age ijana maheinfo?" don. <sup>35</sup> Odocob Pailat madon, "Hina ija Juda ec cisdogonaf? Agena sihulca ihanec dana benbenca age ija ebenina miheiga. Hina cel kobil oso odom?" don.

<sup>36</sup> Odocob Jisas jejeg hewi madon, "Ijana cul eu maha inadec qee. Ijana cul maha ina njoubmiqa ijana tootec age ija Juda ebenegana qee mituwainnu han cadoub. Ijana culqa maha inadec qee!" don. <sup>37</sup> Odocob Pailat uqa sisildon, "Eu odifiqa hina king osofo?" don. Odocob Jisas jejeg hewi madon, "Hina ija king ec madagana. Gug inu ija basiten, gug inu ija maha ina nem. Ija mele je eu himec qasali maadigennu hom. Mele je madec dana abesabes ija dah mitegina," don. <sup>38</sup> Odocob Pailat madon, "Mele je eu eeta?" don.

*Pailat uqa age Jisas na babalecna tuitu qoqagan ec maaden*

*(Matju 27.15-31; Mak 15.6-20; Luk 23.13-25)*

Pailat uqa odi madi hedumei Juda dana age maha gumu tatawegin ageca cali limei maaden, "Ija uqa cahuldoc oso qee felem." <sup>39</sup> Euqa agena kobil oso njia eu ija Pasowa sab jec saenna gihacdoc dana oso gaid besituadiginanu. Ija Juda agena King besituadigenfo?" aden. <sup>40</sup> Odocob age utai madoin, "Qee, dana i qee! Hina Barabas besitugaga!" doin. (Barabas uqa heje dana eu uqa dana leih aqecib cal mein.)‡

## 19

<sup>1</sup> Odocob Pailat uqa han dana maadeceb age Jisas ehudimeig lotoc hulitumeig qisadoin.

<sup>2</sup> Odimeig han dana eu age halu dud lalic qumeig king katakat mudimeig gulodutoin. Odimeig age lotoc golca oso tacitumeig <sup>3</sup> age ugaca limeig lelandudu madoin, "O Juda agena king, feele!" doin. Odimeig uqa siho qahein.\*

<sup>4</sup> Odocobil Pailat uqa Jisas ehudi haun cali limei Juda dana maaden, "Feiga, ija dana i ehudi age ija uqa cahuldoc oso qee felem eu doqagannu age cemenega mudiga," aden.

<sup>5</sup> Odocob Jisas uqa lotoc golca dud lalicca king katakat tacitobil cali hon. Odocob Pailat maaden, "Feiga, dana eu ihen!" aden.

<sup>6</sup> Saen ihanec dana benbenca tempelna cofdoc danaca age Jisas fimeig hihibanaga teceb eui madoin, "Na babalecna tuitu qoga! Na babalecna tuitu qoga!" doin. Odocobil Pailat maaden, "Ija uqa cahuldoc oso qee felem! Age ehudimeig agedodoc na babalecna tuitu qoigale," aden. <sup>7</sup> Odocob Juda age jejeg hewi madoin, "Uqa maden, 'Ija Anut Melah,' en. Eunu engena loo je oso njia, eu cal migian ec maden!" doin.

<sup>8</sup> Age je eu madocobil Pailat eu dah mimei uqa ben cucuien. <sup>9</sup> Odimei uqa haun ceseli ugana jona limei Jisas sisildon, "Hina anadec hom?" don. Odocob Jisas uqa Pailat jejeg

\* **18:28:** Gabman ilo dana Pailatca, ugana eundecca age Rom dana. Age Juda age Anut amegna cataniec bilecnu kobil qee toodu odoloin. Eunu Juda age Rom dana gami bilimeig age Anut amegna gegehinca calowainnu age gabman agena jona qee telein. † **18:31-32:** Rom age Juda agena hatu cofdoin. Odocob Juda age agena gesilec jona je tutuc mudecnu eu cois nijen. Euqa Rom age Juda agena gesilec jona dana oso qocobil cal migiannu je madecnu eu cahacadein. Na babalecna tuitu qocobil cal mecnu kobil eu Rom agena kobil himec. ‡ **18:40:** Doc dana mati age Barabas eu dana age Rom Judia hatunadec ititacadeceu gale aden eundec oso ec cisdogina. \* **19:3:** Age je Matju 27.29 feiga.

qee hewel.<sup>10</sup> Odocob Pailat madon, "Hina jejeni qee hewagaunfo? Ija maadecemin age na babalecna tuitu qihimeig caqusihcebil caculimeg cal megan eu ebenina nijia. Ija maadecemin age cufalihoqagan euha ebenina nijia, eu qee dogonafo?" don.

<sup>11</sup> Odocob Jisas uqa Pailat jejeg hewi madon, "Gagadic odic eu Anut qee ihoubmiqa hina maadeceb na babalecna tuitu qee qitoub. Eunu dana uqa ija hina ebenna miten eu ugana silail hinana silail wooldona," don.<sup>12</sup> Je eu madocob uqa Jisas besitocnu jic walens. Euqa Juda dana age eui madoin, "Oso uqanel ija king ena eu uqa Sisana cad. Eunu hina dana eu cufaldufeg hina Sisana danah qee biligaun," doin.

<sup>13</sup> Age je eu madocobil Pailat dumei uqa Jisas ehudimei cudun ijan "Cobocnu Meen," age Aram jena Gabata egina euna limei gesildocnu bielecna bilen.<sup>14</sup> Deel eu Pasowa ja qocnu saciadoc deel, cam wele ohis ten. Uqa Juda dana maaden, "Agena king ihen!" aden.<sup>15</sup> Odocob age utai madoin, "Qocom cal meia! Qocom cal meia! Na babalecna tuitu qogal!" doin. Odocobil Pailat sisiladen, "Ija agena king na babalecna tuitu qugenfo?" aden. Odocob ihanec benben jejeg hewi madoin, "Egena king osol bilia, eu Sisa," doin.<sup>16</sup> Odocobil Pailat uqa Jisas age na babalecna tuitu qumeig caqusecebile caculimei cal miigliannu ebenegana culiaden.

*Age Jisas na babalecna tuitu qumeig caqusecebile caculen  
(Matju 27.32-44; Mak 15.21-32; Luk 23.26-43)*

Eunu age Jisas na babalecna tuitu qoqagannu oin.<sup>17</sup> Jisas uqa ugana na babalec gahidumei cali li nuen. Nuimei uqa "Ilo Gatic Cudun," egina, age Aram jena "Golgota," egina euna len.<sup>18</sup> Ono age uqa na babalecna tuitu qumeig caqusecebile caculen. Age dana lecisha ale Jisas cemenug na babalecna tuitu aqalimeig caqusecebile caculesin. Oso naaha isec caculen, oso naaha isec caculen. Jisas uqa ale gemona caculen.

<sup>19</sup> Pailat je osoha jaqen. Odimei uqa na babalec ohisna qon. Jaqec je eu maden, "Jisas Nasaretdec, uqa Juda agena king," en.<sup>20</sup> Cudun age Jisas na babalecna tuitu qoin eu Jerusalem cemenug nijen. Odocob age je eu Hibruca, Latina, Grikca agena jena jaqein. Eunu Juda dana cajaca mati age je eu sanijein.<sup>21</sup> Odocob Juda ihanec dana benben age Pailat madoin, "Hina 'Juda agena king' ec cain jaqagaun qa hina 'Dana i maden,' 'Ija Juda agena king,'" en', je eu odi jaqaga," doin.

<sup>22</sup> Odocobil Pailat jejenega hewi maden, "Je eu ija jaqiga ija jaqiga," aden.

<sup>23</sup> Odocob han dana age Jisas na babalecna tuitu qu hedumeig age ugana lotoc ceteteh cedimeig age am 4-pela mein. Han dana cunug age osolosol siwiadein. Odimeig age ugana lotoc bagac cecelac tacen euha siwiadaqaga bili odoindang eu lotoc osol mudein. Ilonadec nu jaihna calen eu giseccqa qee.<sup>24</sup> Eunu age togododu madein, "Gec, ege cain baladoqaun. Ege satu qelimeb in uqa ugian eu fecnu," ein. Anutna jaqec je oso ihoc ligiannu age odi odoindang. Anutna jaqec je eu odi maden:

"Age ijana lotoc agedodoc gemona qatani siwiadein.

Odimeig ijana lotoc ocnu satu qelein," en.

*(Buk Song 22.18)*

Eunu han dana age odi odoindang.

<sup>25</sup> Euqa Jisasna na babalec cemenug eu uqa anagca anag waliagca, Maria eu Klopas aidegca, Maria Makdaladecca age tawein.<sup>26</sup> Odocob Jisas uqa anagca ugana malogom uqa culaug on ugaca ale cemenug tatawesin fimei uqa anag madon, "O caja, faga, uqa hina melem," don.<sup>27</sup> Odimei uqa ugana malogom eu madon, "Faga, uqa hina anin," don. Saen euna malogom eu uqa ehudeceb beli ugana gunna ugaca bilesin.

*Jisas uqa cal men  
(Matju 27.45-56; Mak 15.33-41; Luk 23.44-49)*

<sup>28</sup> Eu hedocob Jisas uqa ceteh cunug eu qee mi hedon eu dumei uqa Anutna jaqec je eu ihoc ligiannu maden, "Ija wa gab tena," en.<sup>29</sup> Boh oso wain gulihinca am bec eu ono bilen. Eunu age gege oso umeig eu bohna wain gulihinca tanumeig na oso, ijan hisop, euna gihacdumeig sulecebile ti uqa cona mein.<sup>30</sup> Odocob Jisas uqa wain eu sugudu jimein maden, "Eu qee meia," en. Odimei uqa ilo du qahimei kis umei cal men.

*Han dana oso Jisas qeih sawalna qon*

<sup>31</sup> Deel eu Juda cuha deel saciadocnu deel. Cuha deel eu gun bahic. Eunu Juda dana age deel euna dewenega ganac eu na babalecna caculi tawoqagannu qee gale adel. Odocob Juda dana age Pailat uqa culadeceb han dana age dana age na babalecna aqein eu jaimaga qahecebile mahuc cal mecebile age dewenega ganac na babalecnadec cedi mahana tonimeig ehadi nuecnu cesusdoin.<sup>32</sup> Odocob han dana age lineig dana oso age Jisas gami na babalecna aqein eu casac jaih qahitoin. Odimeig age dana osoha jaih qahitoin.<sup>33</sup> Euqa age Jisas cemenug humeig uqa wele cal men eu fein. Eunu age uqa jaih qee qahelein.<sup>34</sup> Euqa han dana eundec oso uqa ugana sawal Jisas qeihna qon. Odocob mahuc golac

waca cali hu busalen. <sup>35</sup> Dana oso uqa eu odi caleceb fimei uqa eunu amagana qasali maaden. Uqana qasali maadec eu mele bahic. Ageha wawaga meleigiannu uqa je mele madena eu uqa dona.<sup>†</sup> <sup>36</sup> Anutna jaqec je oso ihoc ligiannu age odi odoin. Jaqec je eu odi maden:

“Age ugana teful oso qee qahitowain,” en. (*Kisim Bek 12.46; Namba 9.12; Buk Song 34.20*)  
<sup>37</sup> Anutna jaqec je osoha eu odi maden:

“Age dana uqa sawal qeihna qoin eu mecidoqagan,” en (Sekaraia 12.10)  
 eu ihoc ligiannu age odi odoin.

*Age Jisas deweg ganac meen hatin haun osona heel cisein*  
*(Matju 27.57-61; Mak 15.42-47; Luk 23.50-56)*

<sup>38</sup> Eu hedocob Josef uqa Arimatiadec uqa Jisas deweg ganac ehi nuigannu Pailat sisildon. Josef uqa Jisasma malogom oso qa uqa Juda dana agenu cucuiennu uqa malogom oso jahuni bilen, camasac Jisas qee toodol. Odocob Pailat cois ec madocob uqa limei ugana deweg ganac ehi nuen. <sup>39</sup> Nikodimasha, uqa wele witic osona Jisasca leceb je madesin, uqa gilic dedeman meca na ganac cucusec euca ahewi hon. Uqana culumen eu 30 kilo odi.<sup>‡</sup> <sup>40</sup> Dana lecis eu ale Jisas deweg ganac umesi Juda agena kobilna dana heel cisadogina eu odi toodu odosin. Ale deweg ganac lotoc senenecna jeludodosi gilic dedeman meca na ganac cucusecca deweg joudesin.

<sup>41</sup> Cudun age Jisas na babalecna qoin euna cabi oso nijen. Cabi euna meen hatin oso age dana oso qee heel ciselein eu nijen. <sup>42</sup> Eunu Juda Pasowa Sab Jec Ben Deel saciadocnuca meen hatin heel cisec eu cemenug nijen eunu ha ale Jisas deweg meen hatin euna madesin.

## 20

*Jisas ceseli cajen*  
*(Matju 28.18; Mak 16.1-8; Luk 24.1-12)*

<sup>1</sup> Pasowa Sab Jec Ben cuha deel hedocob cuhana deel osahidocna Maria Makdaladec uqa qasil bahic cam mamahon meen hatin age Jisas deweg mudein euna hon. Uqa meen koldoc ben age meen hatin gubodoin meen eu wele qosocdon ninijen fen. <sup>2</sup> Uqa eu fimei ceseli gudugudui Saimon Pitaca malogom osoca Jisas uqa culaug oloi aleca limei maalen, “Age Tibud meen hatinnadec oigan. Age uqa ana mudeigan eu qee doqona!” alen.

<sup>3</sup> Odocob Pita uqa malogom osoca calimesi meen hatinna belesin. <sup>4</sup> Ale lecis guguli nunuesin qa malogom oso uqa mahuc gugulimei Pita wooldon. Odimei uqa casac meen hatinna calen. <sup>5</sup> Uqa jogoimei lotoc senenec jeldoin eu ninijen fen qa uqa dunuh qee lel. <sup>6</sup> Odocob Saimon Pita uqa hib toodu hon. Odimei uqagul meen hatin dunuh len. Uqa lotoc senenec jeldoin eu ono ninijen fen. <sup>7</sup> Lotoc nag age Jisas ilo jeldoin eu lotoc senenec deweg jeldoin euca ninijesin qee facialel qa lotoc nag eu col qu filec ninijen fen. <sup>8</sup> Odocob malogom oso, uqa uqa casac meen hatinna calen eu, ugaha dunuh len. Uqa ceteh cunug fimei waug meleen. (<sup>9</sup> Ge, age saen euna Anutna jaqec jena oso taweia eu uqa cal mecnadec ceseli cajigian ec madena eu age wawaga qee fogo dol.) <sup>10</sup> Odocob malogom eu ale ceseli jobon belesin.

*Maria Makdaladec uqa Jisas fen*  
*(Matju 28.9-10; Mak 16.9-11)*

<sup>11</sup> Euqa Maria uqa maha gemo meen hatin cemenug qaqaji tawen. Uqa qaqaji bili jogoi meen hatin eu dunuh mectien. <sup>12</sup> Odimei ensel lecis lotoc senenec tacesin ale Jisas deweg ganac njenna bibilesin eu facialem. Oso Jisas ilo njenna bilen, oso Jisas jaih njenna bilen. <sup>13</sup> Odocob ale uqa sisildu madosin, “O Caja, hina eetanu qajagana?” dosin. Odocobil jejenela hewi maalen, “Age ijana Tibud hewi ahudi beleigannu qajigina. Age uqa ana mudeigan eu qee dugina!” alen. <sup>14</sup> Odi mamadi falicdumei uqa Jisas ono tatawen fen qa uqa Jisas eu qee dol.

<sup>15</sup> Odocob Jisas uqa sisildu madon, “O Caja, hina eetanu qajagana? Hina in walagana?” don. Uqa, uqa cabi cofdoc dana imei madon, “O Ben, hina uqa hewi ahudi belifeg uqa ana mudegan eu mataga. Odocom jja nuimig uqa ugen,” don. <sup>16</sup> Odocob Jisas uqa madon, “Maria!” don. Uqa falicdumebi Aram jena madon, “Rabonail!” don. (Uqana gug eu “Iwalgec.”) <sup>17</sup> Odocob Jisas uqa madon, “Ija Memige Anutca ceseli ohis qee tec njija. Ija cain hewitigaun. Euqa ija cotielca limog maadaga, ‘Ija Meica age Memegaca, ijana Anutca agena Anutca cemenug tigina,’ adaga,” don.

† 19:35: Jon 19.26-27 eu malogom Jisas uqa culaug on eu uqa na babalec cemenug tawen ec madena. Eunu dana uqa golac waca cali hu busalen eu fen eu malogom i eu odi fena. ‡ 19:39: Eu culumen ben bahic. Juda age gilic dedeman meca ben eundec dana uqa king heel cisoloig.

<sup>18</sup> Odocob Maria Makdaladec nuimei malogom maaden, "Ija Tibud figa," adimei uqa je cunug Jisas uqa madon eu maaden.

### *Jisas uqana malogom age Jisas fein*

<sup>19</sup> Deel eu cuha deel osahicdocna wesi euna malogom age osoben gabandumeig age Juda dananu cucuieinnu jo jic cebec menadein tatawen bilein. Saen euna Jisas uqa humei age gemona tawen. Uqa maaden, "Malol ageca biliale," aden. <sup>20</sup> Odi mamaidei uqa ebena qeihca ihacaden. Odocob malogom eu age Tibud feinnu wawaga ceelen. <sup>21</sup> Odocob Jisas uqa haun maaden, "Malol ageca biliale. Memige Anut ija sultenwe eunu ija age suladigina," aden. <sup>22</sup> Odi madi hedumei uqa agena siw umei fuaadi maaden, "Kis Gun oigale. <sup>23</sup> Age dana cajaca agena silail dahiniga celecebfi Anut uqaha dana cajaca agena silail dahig celigion. Ageqa dana cajaca agena silail qee dahiniga celecebfi Anut uqa dana cajaca agena silail qee dahig celeiaun," aden.

### *Tomas uqa Jisas fen*

<sup>24</sup> Malogom 12-pela eundec oso, Tomas (age Didimas egina),\* uqa Jisas hon euna uqa age gami qee bilelein. <sup>25</sup> Eunu malogom leih age madoin, "Ege Tibud fom!" doin. Euqa Tomas maaden, "Ija tuitu age ebenna qoin eu hulufan qee fifig ija ebeni hulufan euna qee hewi fifig ija ebeni uqa wailoh hulufan euna qee hewi fifig ija wawi qee meleeliaun," aden.

<sup>26</sup> Cuha osol hedocob malogom age haun jo euna cegulein. Tomas uqa age gami bilein. Jic cebec cunug eu jic menadein tatawegin qa Jisas hu age gemona tawimei maaden, "Malol ageca biliale," aden. <sup>27</sup> Odimei uqa Tomas madon, "Hina eben ahu ija ebeni hulufanina hewiti fagale. Hina eben ahu ija wailomi hulufanina hewi fagale. Wawin meleec cain felacudugaun, euqa wawin meleelia!" don. <sup>28</sup> Odocob Tomas uqa jejeg hewi madon, "O ijana Tibud! Ijana Anut!" don.

<sup>29</sup> Odocob Jisas uqa madon, "Hina ija fecitaganu wawin meleeliafo? Age ija qee fecitec bibileig wawaga meleena eu age wawaga ceelec biluqagan!" don.

### *Buk i uqana gug*

<sup>30</sup> Jisas uqa uqana malogom amagana kobolkobol odoc matica filfil odon eu ija buk ina qee jaqelem. <sup>31</sup> Euqa Jisas uqa Anutna Krais uqa Anut uqana dana caja cahahaadecnu wele nesili ehudennuca, uqa Anut Melahnuka wawaga meleigian eunu ija ceteteh inu je jaqadiga. Eunu age wawaga meleecub uqa ijanna cebac biley oqagan.

## 21

### *Jisasna malogom 7-pela age Jisas fein*

<sup>1</sup> Eu hedocob Jisas uqa uqana malogom Taibirias macas lanna amagana haun camasac men. Uqa odi camasac men. <sup>2</sup> Saimon Pitaca Tomas, age Mel Gah egina, uqaca, Nataniel, uqa Kena jobondes Galili hatuna, uqaca, Sebedi melahul leciscia, malogom lecishaca age osoben bilein. <sup>3</sup> Odi bibileig Saimon Pita uqa malogom eu maaden, "Ija cul dool cedigennu cobigen," aden. Odocob age madoin, "Odocomfi ege hinaca cedecnu cobeqan," doin. Age odi belimeig wag tobi macasnadec cul dool cedecnu cabi oin. Euqa witic euna cunug cabi oogin cul dool osol oso qee oloin.

<sup>4</sup> Qasil walag dadanen Jisas lanna tawen. Ageqa Jisas tutuc qee felein, age uqa ec qee doloin. <sup>5</sup> Odocob uqa maaden, "Melamiel, age cul dool oso cedeinfo?" aden. Odocob age madoin, "Qeoo," doin. <sup>6</sup> Odocobil uqa maaden, "Agena cimec ben wag eben meulana isec heleiga. Odimeig age leih cedoqagan," aden. Odocob age cimec ben helecebil gotoen. Odocob age cul dool mati bahic cimec ben euna lecebile age cimec ben didocobil becwe qee.

<sup>7</sup> Malogom oso Jisas uqa culaug on eu Pita madon, "Tibud ono taweia!" don. Pita uqa Tibud ono taweia ec madeceb dumei uqa uqana lotoc cecelac taqimei tefacdu wana tonen. Ge, uqa cabi ocnu lotoc cecelac hulimei lotoc nag taqen. <sup>8</sup> Malogom leih age wagna li cimec ben cul dool am bec eu didudu lan cemenuq ceceli ahoin. Ge, age wag hatai tatawen bibileig cul dool cedein, eu 100 mita odi.

<sup>9</sup> Age wagnadec lanna tonimeig age calos jana cul dool manec ninijen bred ha ono fein. <sup>10</sup> Odocob Jisas maaden, "Age cul dool qila cedeiga eundec osooso cedi ahoiga," aden.

<sup>11</sup> Odocob Saimon Pita uqa wag tobimei cimec ben didocob lanna hon. Cimec eu cul dool benben am bec. Cul dool cedein eu sanijein eu 153 odi cedein. Eu mati bahic mele euqa cimec ben eu qee tatalel.

\* **20:24:** Didimas ijanna gug eu "Mel Gah."

<sup>12</sup> Odocob Jisas maaden, "Age humeig sab jeigale," aden. Uqa maadecebqa age uqa sisildu hina in docnu oso qee cisdol. Age cunug eu Tibud age du cuhadoin. <sup>13</sup> Jisas uqa age cemenega limei bred eu umei feni siwiaden. Odimei cul doolha siwiaden.

<sup>14</sup> Jisas saen euna malogom amagana camasac men eu cal mecnadec cajimei uqana camasac mec cijeddon.

*Jisas uqa Pita madon, "Hina ijana sipsip sab joqagannu cofadagale," don.*

<sup>15</sup> Age sab ji hedocobil Jisas uqa Saimon Pita madon, "Saimon, Jon melah, hina ene bilegina eundec cunug wooladi ija naluni maganafo?" don.\* Odocob Pita uqa Jisas jejeg hewi madon, "O Tibud, mele, ija hina nalunin migina eu hina dogona," don. Odocob Jisas madon, "Hina ijana sipsip sab joqagannu cofadagale," don.

<sup>16</sup> Odimei Jisas uqa Pita sisildu lecisu madon, "Saimon, Jon melah, hina ija naluni maganafo?" don. Odocob Pita uqa Jisas jejeg hewi madon, "O Tibud, mele, ija hina nalunin migina eu hina dogona," don. Odocob Jisas madon, "Hina ijana sipsip ben moqagannu cofadagale," don.

<sup>17</sup> Odimei Jisas uqa Pita sisildu cijeddu madon, "Saimon, Jon melah, hina ija naluni maganafo?" don. Odocob Pita uqa Jisas sisildu cijeddu madon, "Saimon, Jon melah, hina ija naluni maganafo?" donnu waug culumen docob madon, "O Tibud, hina ceteteh cunug dogona, ija hina nalunin migina eu hinaha dogona," don. Odocob Jisas madon, "Hina ijana sipsip sab joqagannu cofadagale," don.

<sup>18</sup> "Ija je mele mahigma, hina mel haun bilem saen euna hinadodoc hinana oologam tacimeg euna euna cobigen imeg euna cobom. Euqa hina toia memem hina eben suladecem oso hinana oologam taqihimeig cudun hina qee gale hen a ehi li mihuqagan," don. <sup>19</sup> (Jisas uqa Pita adidihna cal mimi Anut binan suligian eunu nijen eu dado mudecnu je i madon.) Odi madumei Jisas madon, "Hina ija tootaga!" don.

*Malogom oso Jisas uqa culaug oloi eu uqana je*

<sup>20</sup> Odocob Pita uqa qaalimei malogom oso Jisas uqa culaug on eu uqa Jisas toodu hohon fen. Malogom eu uqa Pasowa sab jecna Jisasca duculdot bilimesi uqa Jisas sisildu madon, "O Tibud, in hinana cad ebenegana mihibigan?" don. <sup>21</sup> Pita uqa eu fimei Jisas sisildon, "Tibud, dana i eeta oduduqagan?" don. <sup>22</sup> Odocob Jisas uqa Pita madon, "Ija madeceminfi uqa bibileb li ija ceseli hoc saenna biligian eu ijana himec, hinana qee. Hina ija tootaga!" don. <sup>23</sup> Jisas uqa Pita madonnu malogom cunug age malogom eunu madi, uqa qee cal meiaunnu maden eu doin. Euqa Jisas uqa malogom inu uqa qee cal meiaun ec qee madel, uqa madon, "Ija madeceminfi uqa bibileb li ija ceseli hoc saenna biligian eu ijana himec, hinana qee," don.

<sup>24</sup> Malogom eu uqa ceteteh inu amagana qasali maadena. Uqa ceteteh inu jaqena. Ege uqana je qasali maadec eu mele ec doqona.

*Cit qoc je*

<sup>25</sup> Jisas uqa ene jaqec je nijina eu himec qee odol, uqa ceteteh mati bahic odon. Age Jisas odon eu osolosol cunug bukna jaqoubmiqa ija cisdugina mahamaha ege biluquna cunugna buk mati bahic eu mudecnu cudun ihoc qee.

---

\* **21:15:** Grik jenadec falicdocnu je osoha nijia eu odi: "Saimon, Jon melah, hina ija naluni magana eu ene bilegina eundecnu nalunuga magana wooldonafu?" don.

## Aposel Agena Cabi Oc Aqunec Je

Buk i, Aposel Agena Cabi Oc, eu Lukna Me Je tubdona. Luk buk iha jaqen. Buk ina Kis Gun uqa aposel jic dado madeceb age Jerusalem onodec Judiaca Sameriaca li hatuhatu cunugna dana cajaca Jisasnu me je qasali maadein (1.8 feiga) eunu Luk jaqen.

Buk Aposel i Jisasna tamanec eu Juda dana cajaca gemona sanan mimei eu hibna li dana cajaca age hatuhatu cunugna bilegina euna ben calen eunu dodo saena. Luk uqa ceteh oso ha ihacecu gale dona. Eu Jisas Kraisna cabica, dana cajaca age Jisas toodogina agena cobocca eu wele Anut uqa Isrel dana cajaca je hahun oso maaden eu ihoc lena eunu ihacena. (Age 2.14-36 feiga.) Buk Aposel i ceteh ben osonu saena, eu Kis Gun, Anutna Kis ugana cabi. Pentikos Deel Bennna Kis Gun nimei Jisasna malogomca bilen. (Age 2.1-4 feiga.) Odimei Kis Gun uqa Anutna gagadic odoc aposel adimei uqa aposelna cisdoc gaid dado meceb age agena cabi oin.

Buk ina me je qasali madec cecelac mati nijia, age 2.14-41, 3.11-26, 4.8-12, 7.2-53, 10.34-48, 13.16-41, 17.22-31, 22.1-21, 24.10-21, 26.1-23, 28.23-28 feiga. Dana cajaca mati bahic age me je inu wawaga meleeceb Jisasna tamanec ben calen.

Buk i aposel cunugnu saena, euqa aposel lecis odosinnu je mati saena, eu Pita Polca. Pita uqa aposel age Jisas gami coboin eundec oso. Pol uqa casac Jisas qee toodol, uqa Jisasna cad oso bilen. Uqa Jisasna tamanec cilehadecnu cabi gagadic oloí. Euqa uqa Damaskas jicna Jisas gulucdon. Odocob uqa Jisasna aposel ben eundec oso calen.

Saen osona Luk uqa Polca jic cobosin. Luk ina cudun leihna Luk uqa Pol odonnu saena uqa egenu madena. (Age 16.10-17, 20.5-21.18, 27.1-28.16 feiga.) Eunu Luk uqa Pol cabi hijagul oso.

### *Je Dunuhnu Dado Mec*

1. Pitana cabica Kristen tamanec sanan menca (dac 1-12)
  - A. Aposel age Jisasnu me je Judiaca, Galilica, Sameriaca euna qasali maadein (1.1-9.31)
    1. Aqunec je (1.1-2)
    2. Krais ceseli cajimei cabi on (1.3-11)
    3. Aposel age Kis Gun ocnu sumudein (1.12-26)
    4. Aposel age Kis Gun oin (dac 2)
    5. Pita Jonca ale dana jaih laleg mec me mudecebil age Pita Jonca gihadoc jona malein (3.1-4.31)
    6. Kristen tamanec age agena ceteteh eu osoben utecebuteceb ein (4.32-5.11)
    7. Age aposel 12-pela gihadoc jona madein (5.12-42)
    8. Age dana 7-pela age aposel cesuladecnu nesiladein (6.1-7)
    9. Juda dana age Stiwen cegulec amagana mudecebil je maadeceb age Stiwen meenна qocobil cal men (6.8-7.60)
    10. Wawaga meleec dana cajaca Jerusalemdec age bilisadu belein (8.1-4)
    11. Filip ugana cabi (8.5-40)
      - a. Uqa Sameria hatuna cabi on (8.5-25)
      - b. Uqa dana Itiopiadec me je madon (8.26-40)
    12. Sol Jisasnu waug meleer (9.1-31)
  - B. Aposel age Fonisia hatunaca, Saipras nuinaca, Antiok taunnaca me je qasali maaden (9.32-12.25; 11.19 feiga)
    1. Pita uqa Mediterenian Macas lanna cabi on (9.32-11.18)
      - a. Uqa Inias me mudimei Dokas cesuldron (9.32-43)
      - b. Uqa Koniliyas jona me je qasali maaden (10.1-11.18)
    2. Juda dana qee eundec tamanec Antiokna calen (11.19-30)
    3. Herod uqa Kristen tamanec me qee odadimei cal men (dac 12)
2. Pol ugana cabica, odocob Kristen Antiokdec Rom ono li ben fulusdon (dac 13-28)
  - A. Aposel age Frigia hatunaca, Galesia hatunaca me je qasali maaden (13.1-15.35; 16.6 feiga)
    1. Pol uqa me je maadecnu cabi cocobi hatu filfil nuen (dac 13-14)
    2. Tamanec ugana cegulec ben Jerusalem ono calen (15.1-35)
  - B. Pol uqa Masedonia hatuna macas leti nuen (15.36-21.16; 16.9 feiga)
    1. Pol ugana me je maadecnu cabi coboc lecisdoc odon (15.36-18.22)
    2. Pol ugana me je maadecnu cabi coboc cijeddoc odon (18.23-21.16)
  - C. Pol uqa Rom ono nuen (21.17-28.31; 28.14 feiga)

1. Age Jerusalem ono tempelna Pol hewudein (21.17-23.35)
  - a. Rom agena han dana Pol hewudein (21.17-22.29)
  - b. Pol Juda agena cegulec benna amagana je maaden (22.30-23.11)
  - c. Han dana ilo Pol suldocob uqa Sisaria taun ono nuen (23.12-35)
2. Pol gihacdoc jona Sisaria ono bilen (dac 24-26)
  - a. Pol uqa Filiks amegna je madon (dac 24)
  - b. Pol uqa Festas amegna je madon (25.1-12)
  - c. Pol uqa Festas King Agripaca amalana je maalen (25.13-26.32)
3. Pol uqa macasna Rom nuen (27.1-28.15)
4. Pol uqa cabi gel lecisna Rom ono uqana jona gihacdoc bilen (28.16-31)

*Jisas uqa Kis Gun suldocob malogom ageca hugian ec maaden*

<sup>1</sup>O Tiofilas, ijana buk casac jaqem euna ceteh cunug Jisas odonca, iwaladenga saen uqa cabi sanan mennadec <sup>2</sup>hocob li Anut uqa Jisas ehudeceb enedec sao ohisna ten eunu jaqem. Uqa sao ohisna qee tec uqa Kis Gun odochna aposel\* dana uqa nesili cedaden eundec uqa je gatitina ulicaadi doda maden. <sup>3</sup>Saen uqa dain ben umei cal meceb li deel 40 hedocob uqa ceteteh ihacadec uqa cebac bilia ec doqagannu uqa uqana aposel eu amagana saen mati bahic camas men. Age uqa fefegin uqa Anutna culnu age gami togodoin. <sup>4</sup>5 Saen age uqaca gabandu bibileig uqa je i maaden, “Jon wana wa joaden qa deel osooso hedocob Anut age Kis Gunna wa joadigan. Eunu age Jerusalem cain culuwain. Ceteh me Memige Anut adigiannu maden maadem eu sumudi bileiga,” aden.

<sup>6</sup>Saen aposel age Jisas gami gabandu bibileig age sisildoin, “O Tibud, hina qila saen ina Isrel cul agena cofdoc haun ceseli Isrel adeganfo?” doin.<sup>†</sup>

<sup>7</sup>Odocob Jisas maaden, “Ceteh i cel saen cali hugian eu Memige Anut ebengulna odocob cali hugian. Age saen euna caligian ec docnu qee nijel. <sup>8</sup>Euqa saen Kis Gun ageca neceb age gagadic odocca biluqagan. Odocob age dana cajaca cunug ijanu je qasali maadoqagannu Jerusalem onodec Judiaca Sameriaca li hatuhatu cunug olom danigian,” aden.

*Jisas sao jobon ceseli ten*

<sup>9</sup>Uqa je i madi hedumei Anut uqa ehudeceb sao jobon teten medicu tawein. Oodogin ti taen dunuh li jebuc daneceb amagana haun qee felein.

<sup>10</sup>Age amaga uqa sao ten odi tatiaein tatawegin mahuc odi dana lecis lotoc senenec himec tacimesi age cemenega ni tawimesi <sup>11</sup>maadesin, “Galilidec dana, age eetanu sao jobonna tatii ene tawegina? Jisas i Anut uqa ehudeceb enedec sao jobon teia uqa teten feiga odi ceseli tonigian,” adesin.

*Dana oso Judasna cabi ugiannu age nesildoин*

<sup>12</sup>Odocob aposel age Oliw Aluh eunadec haun ceseli Jerusalem belein. Eu Jerusalem taundec hocnu eu nag bahuca qee, eu kilomita osol odi. <sup>13</sup>Age taun benna limeig jo hamol ohis age njoloina tein. Aposel eu age ijanaga odi, Pita, Jon, Jems, Andruca, Filip, Tomasca, Batolomju, Matjuca, Jems, uqa Alfiyas melah, uqaca, Saimon, uqa Selot‡ dana, uqaca, odocob Judas, uqa Jems melah uqaca. <sup>14</sup>Aposel ageca, caja age Jisas toodoloig ageca, Maria Jisas anagca, uqa waliagulca age cunug inondoqagannu wawaga osolca gaid ceguloloig.

<sup>15</sup>Deel osooso hedocob euna wawaga meleec cotogail 120 odi cegulein. Odocob Pita je maadigiannu caji tawen. <sup>16</sup>Uqa maaden, “O cotiel, je oso eu Anutna jaqec je weledecna nijia. Wele bahic Kis Gun odocob Dewid uqa je oso Judasnu maden. Judas uqa Jisasna cad jic dado madimei uqa age ebenegana Jisas mudigian eunu je maden. Odocob je i wele aig qon. <sup>17</sup>Ge, Judas uqa eguna eundec oso eunu uqa eguna cabina cabi oso muguh mein,” aden.

<sup>18</sup>“Judas uqana cabi oc me qeenu meen qaig on eu maha oso fajen. Euna uqa toni qocob cal men. Uqa big fugudocob big anag maliogca cunug basecon. <sup>19</sup>Odocob dana cajaca cunug Jerusalem bilein eu dah mimeig age agena jena maha eu ‘Akeldama’ ein. Uqana gug eu odi ‘Golac Maha,’ aden.

<sup>20</sup>“Ge, Buk Songna je oso age jaqein eu odi madena:  
Uqana biley gauc nijiale.

Dana oso euna qee biliaun,’ ena.

(Buk Song 69.25)

\* <sup>1:2:</sup> Age je eu Matju 10.2na nijia eu feiga. † <sup>1:6:</sup> Wele bahic Isrel age agena eundec oso uqa agena king biloloi. Euqa Jisasna saenna Rom age Isrel hatu cofdoin. Odocob Jisas calen saenna dana mati age uqa Rom ititacadimei Isrel cul haun sanan migian ec cisdoin. ‡ <sup>1:13:</sup> Selot agena am age Juda dana eu Rom dana Judiadek ititacadecnu ein.

Odocob je oso ha edi madena:

‘Uqana cabi cudun eu oso oiale,’ ena,” aden.

(Buk Song 109.8)

<sup>21</sup> “Eunu egenadec dana oso uqa Jisas Tibud cal mecnadec ceseli cajen eu fen uqa ege gami gabandoc bilom dana i uqa nesili ehudecnu. Uqa saen cunug Jisas Tibud ege gami cobom,<sup>22</sup> saen hahawan Jon uqa wa joadecnu je maaaden li deel Jisas uqa egecadec ehudi sao jobonna ehi ten eu gadac. Odocob dana i uqa egeca gami Jisas cal mecnadec ceseli cajennu je qasali maadec cabi ogale,” aden.

<sup>23</sup> Eunu age dana lecis ijanalna madein, Josef uqa Basabas doloig, uqa ijan oso ha Jastas doloig, Mataiasca. <sup>24-25</sup> Odimeig age inondun madoin, “O Tibud, hina cunug agena cisdock dogona eunu dana lecis i alenadec in eu uqa aposel cabi cudun Judas uqa cuculi uqana gucna nuen eu ugiannu hina nesili ehudem ege ihacgaga,” doin. <sup>26</sup> Odimeig age ijanalna meen lecis jaqimeig hal oso tacimeig lahidocobil meen oso toni non. Mataias ijan calen. Uqa ageca gabanaadeceb uqa aposel biley 11-pela odi age gami bileyin. §

## 2

### Kis Gun nen

<sup>1</sup> Saen Pentikos Deel Ben cali hon euna\* age cunug cudun osolna ceguli bileyin. <sup>2</sup> Odocob saen nag bahic odi udududoc sao jobondec fufu ben bahic fuludoc cinigwe nimeji hamol bileinna eu cunug ihoc len. <sup>3</sup> Odocob age ja belican cinigwe cagucagu dana filfil ilomogana taldu ninijen fein. <sup>4</sup> Kis Gun nimeji dana ono bileyin eu dewenegana cunug ihoc len. Age cunug beilamaga falicdocob je filfil madecnu Kis Gun ihoc cesuladen eu odi madein.

<sup>5</sup> Odocob saen euna Juda dana leih Jerusalem ono bileyin. Age cuha fecnu dana ittom hatu filfilnadec cegulein. <sup>6</sup> Saen age hutan eu dah mimeig dana am ben cegulein. Age osolosol je madec gug filfil mamadegin dah madeinna age cunug dadanein. <sup>7</sup> Tumatumaeig wawaga cadaden madein, “Dana je madegina i age cunug Galilidec. <sup>8</sup> Euqa ege cunug eguna je gul mamadegin egedodoc ihoc dah madoqona eu adi? <sup>9</sup> Ege Patiadec, Midiadec, Ilamdecca. Ege Mesopotemiadec, Judiadec, Kapadosia decca. Ege Pontasdec, Esiadec. <sup>10</sup> Frisiadec Pamfiliadec, Isipdec, Libia hatuna Sairini cemenugca. Ege leih Romdec dana. <sup>11</sup> Ege leih eu Juda dana bahic, ege leih eu Juda dana ibuldum. Ege Krit nuidet Arebiadecca. Euqa ege cunug eguna je gulna Anutna gagadic odocobin, “I eu cel gugnu?” ein. <sup>12</sup> Odocob age cunug wawaga cadaden dadanecca sisildocobsisildocobein, “I eu cel gugnu?” ein. <sup>13</sup> Euqa leih age dana wawaga meleec eundecnu elanec je madein, “Dana i age ceu tinca jecebil dalul aqeia!” ein.

### Pita je maaden

<sup>14</sup> Odonqna Pita uqa aposel 11-pela gami caji tawimeig seeci dana am ben ninijen maaden, “Cotiel, Juda dana age, cunug Jerusalem bileyina ageca cehna ija dah mimitebil i cel gugnu ceteh i calena eu maadigen. <sup>15</sup> Age dana i age eu dalul aqeia ec cisdogina. Euqa qila i 9 kilok qasil himec. Eunu dana i age eu dalul qee aqel.† <sup>16</sup> Euqa ceteh i caleia eunu je hahun madec dana, Joel, wele maden:

<sup>17</sup> ‘Anut madena, “Deel cit qcorna ija ijana Kis dana cajaca cunugna basecdocomin nugian. Age melemegail atagailca je hahun madec danawe ijana me je madoqagan.

Agena dana haunhaun eu age majaudocnu foqagan.

Agena dana toiatopia age bebelecna foqagan.

<sup>18</sup> Mele, ijana cabi dana cajaca ha ijana Kis deel eunu agena basecdocomin neceb age je hahun madec danawe ijana me je madoqagan.

<sup>19</sup> Ija gaga odoc sao ohisnaca, kobolkobol odoc mahanaca odigen.

Saen euna golacca, jaca, ja casuc benca caloqagan

<sup>20</sup> Tibudna deel ben eu camasac migianu dodoldodob casac cam eu tu ibuldugian.

Odocob jagel eu golacwe golca ibuldugian.

<sup>21</sup> Odocob saen euna dana oso uqa Tibud ijanna utadocobfi Tibud uqa dana eu cahadugian,” ena, “en,” aden. (Joel 2.28-32)

<sup>22</sup> “Isrel dana, je i dah meigale! Jisas Nasaretdec, Anut uqa dana i nesili ehuden, uqana gadac eu odi. Age gemo uqa gagadic odoc mati odon, uqa kobolkobol odoc ha mati odon, uqa gaga odoc mati ihacaden. Eu Anut uqa Jisas ebenna age gemo odi odon agedodoc dogina. <sup>23</sup> Age Jisas i uqa dana age Mosesna loo je bisalu qee bileyina eu ebenegana

§ 1:26: Age Anut uqa dana oso nesili ehudeceb uqa Judas Iskariotna cudun ocnu gale aden. Eu Juda agena kobol age wele odi odoloig. Age 1 Stori 26.13-16 feiga. \* 2:1: “Pentikos Deel Ben” eu “Cabinadec Sab Ocnu Ceelec Deel Ben” ijan oso. Age Wok Pris 23.15-22 feiga. Deel ben i Pasowa Sab Jec Ben Deel caleceb deel 50 hedocob eu calen.

Juda age qasili bahicna sab waca qee joloig. Eunu Pita uqa je i maden. † 2:15:

mudecebil age na babalecna tuitu qocobil cal men eunu Anut uqa wele don, Anut uqa wele eunu cois maden.<sup>24</sup> Euqa cal mec uqa gihadocwe qee. Cal mec<sup>†</sup> uqana gagadic odoc qee mudimei haun ehuden. Eunu Anut cal mecnadec haun tulidocob cajen.<sup>25</sup> Euha Dewid uqa Jisasnu maden:

'Ija dugina, Tibud uqa ijaca gaid bilina.

Uqa ija ebeni meulana isec bilina eunu culumen oso ijaca hocobfi ija qee qelegaun, qee cucuiigaun.

<sup>26-27</sup> Eunu ija wawi celeboen. Ija conina ceelec je madem.

Anut hina ija doloni cal mecna<sup>§</sup> qee culdugaun.

Hinana cabi dana gun eu hina culdocom uqa deweg qee huluoiaun.

Eunu ija cal mec dana qa ija jaen mudecnu gaid wawi madena odi.

<sup>28</sup> Hina cebac coboc jic wele ihactem.

Odochob saen hina ijaca bilimeg ija wawi celeboecnu itegan,' en," aden. (Buk Song 16.8-11)

<sup>29</sup> "Cotiel, age du cuhadocnu ija saluqi u maadigen. Egena sihul gugnadec dana, King Dewid, wele bilen uqa cal meceb heel cisein, euqa uqana qalqal eu ene egeca deel ina bilia.<sup>30</sup> Uqa Anutna je hahun madec dana, odochob uqa Anut je cagoc oso madon, 'Ija dana hinana sihulnadec hibna caligian hinana king cudunna mudigen,' don eu don.<sup>31</sup> Eunu Dewid uqa Anut hibnanu ceteh oso odochob caleceb fen. Odimei Anut uqana Krais eu cal mecnadec ceseli cajigiannu maden:

'Anut cal mecna<sup>\*\*</sup> uqa qee culdol.

Uqa deweg ganac ha heelna qee huluel,' en," aden.

<sup>32</sup> "Anut uqa Jisas i cal mecnadec haun tulidocob cajen eunu ege cunug fimeb qasali maadoqona.<sup>33</sup> Uqa Jisas suli u sao ohis ehi ti eben meulana isec muden. Odimei Memige Anut uqa wele maden odi Kis Gun uten. Odochob Jisas Kis Gun basedocob nen eu ceteh qila i feginia, dah megina.<sup>34</sup> Eu odi ha Dewid uqa Jisas sao jobonna ten odi qee tel qa uqa maden:

'Anut Tibud uqa ijana Tibud odi madon,

"Ijaca hu ebeni meulana isec bibilem

<sup>35</sup> ija odocomin hinana cad cunug hu ninjebil

hina jaimna lahacadegan," "don," ec maden," aden.

(Buk Song 110.1)

<sup>36</sup> "Eunu Isrel dana cunug age doiga, Jisas i age na babalecna tuitu qocobil cal men eu Anut uqa Tibud Kraisca mudeceb uqa ege Cahahagec calen bilia!" aden.

*Dana mati age tului falicdumeig wa joc oin*

<sup>37</sup> Dana age odi dah mimeig age wawaga qon. Odochob age Pita aposel leihca maadein, "Cotigeil, ege qila aidi odochnu?" aden.

<sup>38</sup> Odochob Pita maaden, "Age osolosol agena silailnu tului falicdumeig Jisas Krais ijanna wa joc ocobil Anut agena silail cagasiadigian. Odochob Anut uqa Kis Gun bagolwe adigian.

<sup>39</sup> Eu odi ha Anut uqa wele maaden odi agenuca, age talacunugailnuca Kis Gun adigian. Odochob dana leih onoca bileyinu ha adigian. Cunug Tibud, egena Anut, utaaideceb hoqagan eu uqa Kis Gun adigian," aden.

<sup>40</sup> Pita haun maadimei dahiniga hewec je maaden, "Anut uqa qisol dana qila bileyina wadacadec ben bahic adigian. Eunu age wadacadec owainnu agedodoc caahahaadec adecnu agena qisol kobol culeigal!" aden. <sup>41</sup> Odochob geh bahic uqana jenu wawaga meleecab wa joc oin eu 3,000 odi casacdecca gabandoen.

*Kristen kobol me bahic calen*

<sup>42</sup> Odochob age aposel agena iwaladec je dah mecnu galeadoloi. Age cegulecnuca, bred feni jecnuca, inondocnuca gaid odoloig.<sup>††</sup> <sup>43</sup> Oodogin Anutna kobilkobil geh bahic gaga odoc ha geh bahic aposel ebenegana odooin eunu cunug age cucuiein.<sup>44</sup> Cunug age wawaga meleecca age wawaga osol meceb bilein. Agena ceteteh eu agena dih qee elein eu cunug agena.<sup>45</sup> Age cehewanagaca agena mahaca sulddodoig meen qaig eu umeig dana filfil age sabca qee cetetehca qee eu siwiadoloig.<sup>46</sup> Deel cunug age tempelna age wawaga osolna gabandu biloloig. Odimeig age agena jonana bred feni jejeig age wawaga meca celeboeca sab gabandu joloig.<sup>47</sup> Age Anut binan susulegin dana cunug agenu culunuga oin. Odochob deel cunugna Tibud uqa caahahaadi dana cajaca am haun eu cedi ahu gabanaadien.

‡ 2:24: Grik je i bahic eu "oloqanh"    § 2:26-27: Grik je i bahic eu "oloqanihna"    \*\*\* 2:31: Grik je i bahic eu "oloqanihna"    †† 2:42: Doc dana mati age odi cisdogina. Saen euna Kristen age cunug cegulimeig sab joloig. Ji hedumeig age Jisas deweg golaccanu cisdocnu sab joloig.

**3***Pita Jonca dana jaih laleg mec me mudesin*

<sup>1</sup> Deel osona Pita Jonca wesi 3 kilok odi inondoc saenna ale tempelna tesin. <sup>2</sup> Tetesin ono Jic Cebec Nege Bahic odi madoloig euna dana oso uqa simnadec jaih laleg mec bilen. Deel cunugna uqa dana age tempel dunuh lelebil meen qaigu niniadigiannu gahidu ehi li tempel jic cebecna mudoloig. <sup>3</sup> Saen uqa Pita Jonca dunuh lelesin mecialimei uqa ceteh oso utuwasanu ninialen. <sup>4</sup> Ale gugca mecidosin. Odimesi Pita madon, "Hina ele mecilaga!" don. <sup>5</sup> Odocob uqa ceteh oso utuwasan ec cisduemei uqa mecialen. <sup>6</sup> Euqa Pita madon, "Ija meen qaigca qea qia ija ceteh osoca eu hina ihigen. Jisas Krais Nasaretdc ijanna mahigina cajimeg coboga!" don. <sup>7</sup> Odimei uqa eben meulana hewi suldocob cajen. Mahuc bahic dana eu jaih cabal jaih katka gagadic men. <sup>8</sup> Uqa bitacimei caji tawen. Odimei cobocnu temdon. Uqa tooalimei cocobi bitacii Anut binan susulen tempel hamollein. <sup>9</sup> Oodon dana ono bilein eu uqa cocobi Anut binan susulen fein. <sup>10</sup> Odimeig uqa dana jaih laleg mec tempel Jic Cebec Nege Bahic eginanu meen qaigu ninii bilina eu wele fein. Age cunug dana jaih laleg mec cocobon fimeig filicitimeig dadanein.

*Pita tempelna me je qasali maaden*

<sup>11</sup> Saen dana eu Pita Jonca hewalen tatawen Solomonna hamol eu odi madoloig euna dana dadanimeig guguli fecnu agecalein. <sup>12</sup> Saen Pita meciadimei maaden, "Isrel dana, age etetanu ceteh i edinu filiciteiga? Eetanu gugca mécigegina? Age elena gagadic odocnafo, elena ititon cobocnafo odi odudocohul coboia ec cisdoginafo? Eu odi qee. <sup>13</sup> Ebrahim Aisak Jekobca agena Anut, ege jajanigeil agena Anut, uqa uqana cabi dana, Jisas, ijan meca gagadic odocca uten. Jisas i age Pailat ebenna mudimeig, uqa Pailat culdeceb nuigiannu wele cisdon, age Pailat amegna uqanu je me qee madein. <sup>14</sup> Euqa age Dana Gun Bahic, Dana Ititom Bahic uqanu je me qee madein. Odimeig Pailat agena gale adec toodugiannu sisildocobil uqa han dana qagaadec eu gihacdoc jonadec besiton. <sup>15</sup> Age madecebel age Dana Cebac Bilecnuauecnu jic dado migec eu qoin. Euqa Anut cal mecnadec tulidocob cajen. Ele eu fimeu qasali madowona. <sup>16</sup> Jisas ijanna gagadic odoc dana i amagana feginu age dana i uqa Jisas ijannu waug meleec euna gagadic meia ec dogina. Uqana Jisasnu waug meleec age amagana me mudia," aden.

<sup>17</sup> "O cotiel, ija age agena iwaladecca age Jisasnu qee doloin, eunu age odi odoin ec mele dugina. <sup>18</sup> Euqa Anut wele bahic ceteh i cali hugiannu maaden. Uqana je hahun madec dana conogana maden, 'Age Anutna Krais eu dain ben umei gahidugian,' en eu odi mele bahic ihoc len. <sup>19-21</sup> Tibud uqa agena silail casagiadigiannu gale dona. Odocob Tibud uqa age dolonoga gagadic odoc ocnu saen dodoldobob uqa cemenugnadec ageca suldocob nigiannu gale dona. Uqa uqana Krais uqana dana caja cahaaadecnu wele nesili ehuden, eu Jisas, eu suldocob nigiannu gale dona. Jisas uqa sao jobon bibileb saen maha ina ceteh haun cali hugiannu eu odi Anut uqana je hahun madec dana gun welewewe bilein eu conogana maden. Eunu Anut uqa odi odigiannu silailnu tului falicdoiga. <sup>22</sup> Weleca Moses maden:

'Anut Tibud ija ageca sultceeb homwe eu odi uqa je hahun madec dana oso hibna age gemonadec ageca suldocob hugian.

Uqa je maadeceb age jejeg toodu odoigale.

<sup>23</sup> Odocob oso uqa jejeg qee toodu odigiaqa uqa geldocob fadaligian.

Odocob uqa Isrel agena sihil qee biliaun,' en.\*

(Loo 18.15, 18-19)

<sup>24</sup> Anutna je hahun madec dana cunug Samjuelnadec leceb uqa toodoin eundec ageha qila deel ina ceteh adi cali hugian euha madein. <sup>25</sup> Age je hahun madec dana talaculunugail. Agenu je hahun eu madein. Anut uqa bal cehec je age jajanagail weledec maaden eu age mugumuga njija. Uqa Ebrahim madon:

'Hibna hinana sihulna dana cajaca cunug maha ina biluqagan age eeladec oqagan,' don.  
(Jenesis 22.18; 26.4)

<sup>26</sup> Eunu Anut uqana cabi dana ehudimei uqa age eeladec age abesabes agena qisol mec kobilnu tului falicdoqagannu uqa casac ageca suldocob nen," aden.

**4***Age Pita Jonca gihacdoc jona malein*

<sup>1</sup> Pita Jonca ale dana je maaadesin, ihanec dana ageca, tempel cofdoc han dana agena ilo uqaca, Sadjusi ageca age alecalein.\* <sup>2</sup> Age Pita Jonca dana iwaladesi Jisas uqa cal

\* **3:23:** Hahun je madec dana i Anut suldocob hugian eunu Pita maden, eu Jisas. \* **4:1:** Tempel cofdoc han dana agena ilo eu ihanec dana oso. Liwai sihil age dana cajaca age tempel dunuh lein eu cofadein. Odocob cofdoc han dana i uqa Liwai sihil agena ilo dana.

mecnadech haun ceseli cajen je eunu dana cunug age cal mecnadec ceseli cajecnu ihoc eu qaqaqasali maaadesinnu gemanaga ben.<sup>3</sup> Odocob age hewalimeig cedali ehi li gihacdoc jona malein. Eu wesu mecebnu ono bibilestin deel osol hedon.<sup>4</sup> Euqa mati bahic age me je dah mein eundec wawaga meleene eu 5,000 odi ihoc len.

*Pita Jonca Juda agena cegulec amagana tawesin*

<sup>5</sup> Deel osona Juda agena iloiloca, agena matumatuca, loo je iwaladecca Jerusalem ono cegulein.<sup>†</sup> <sup>6</sup> Age ihanec dana agena ilo Anasca, Kaiafasca, Jonca, Aleksandaca, dana cunug age ihanec dana agena ilo agena sihul eundecca gami cegulein. <sup>7</sup> Age Pita Jonca malecebil amagana tatawesin sisilalein, “Ale ceteh i adi odesian? Ale cel gagadic odocnafo, qee in ijanna odesian?” alein.

<sup>8</sup> Odocob Pita Kis Gun am bi cacawudeceb jejenega hewi maaden, “O Juda agena iloiloca, agena matumatuca age<sup>9</sup> qila ele dana jaih laleg mec me mudewan, me mudec euna dana eu me tawena eunu sisillifeig<sup>10</sup> age doiga. Isrel dana cunug ageha doiga. Dana laleg mec qila age amagana tawena eu uqa Jisas Krais Nasaretdec uqa ijanna me mudec tawena. Age Jisas Krais eu na babalecna tuitu qocobil cal men, euqa Anut haun tulidocob cajen.<sup>‡</sup>

<sup>11</sup> Jisas uqanu Anutna jaqec je maden:

‘Meen oso age meen gel cehec memei dana culein eu  
qila meen jo big gug jo hehdocnu tawena,’ en.

(Buk Song 118.22)

<sup>12</sup> Anut uqa cahahagecnu oso ijan hatu i cunugna qee igel. Uqa himec ege Cahahagec. Osoca qee,” aden.

<sup>13</sup> Odocob cegulec age Pita Jonca ale je saluqi u mamadesin eu dah mein. Odocob aleha dana gauc, ale Farisi agena doc qee iwalalein eu doin. Eunu age tumatumaein. Odocob ale Jisasca coboloig eu doin. <sup>14</sup> Euqa ale dana me mudesian eu Pita Jonca gami tatawegin fein eunu je oso madecwe qee. <sup>15</sup> Odocob age maalecebil ale cegulec cudun eunadec cuculadi cali hosin. Odimeig age himec je togodoin. <sup>16</sup> Age madein, “Ege dana lecis i alenu adi odeejan? Jerusalem ene dana cajaca cunug dana i ale kobolkobol odosian ec dogina. Eunu ege qee ecwe qee. <sup>17</sup> Euqa je i hatuhatu leceb dana cajaca cunug dowainnu ege je gatiti maalecnu, ‘Dana i ijanna je cain madowasin,’ alecnu,” ein.

<sup>18</sup> Eunu age haun utaaecebil hocobil maalein, “Ale haun Jisas ijanna dana oso je cain madowasin. Jisas ijanna oso Cain iwaldowasin,” alein. <sup>19</sup> Euqa Pita Jonca jejenega hewi maadesin, “Ele Anut amegna age conoga toodocnu eu coisfo, qee ele Anut co toodocnu eu cois, eu age agedodoc gesileiga. <sup>20</sup> Euqa Jisasna ceteteh cunug ele foh, dah moh eunu qasali madecnu culecwe qee,” adresin. <sup>21</sup> Odocob cegulec age haun je gatiti maalimeig culalecebil belesin. Dana cajaca cunug age kobolkobol fein eunu Anut binan sulein. Eunu age ameg alecnu jic oso qee felein. <sup>22</sup> Dana i ale kobolkobolna me mudesin eu uqa cabi gel 40 wooldoc eu odi.

*Kristen age me je madec gagadic odoc oqagannu Anut cesuladigiannu inondoin*

<sup>23</sup> Saen age Pita Jonca culalecebil ale dana cajaca wawaga meleec tamanec bileinna belesin. Ono ale je cunug ihanec agena iloiloca Juda agena matumatuca maalein eu saadesin. <sup>24</sup> Wawaga meleec dana cajaca age dah mimeig age cunug Anut inondocnu wawaga osolca cegulein. Age madoin, “O Ben, hina sao, maha, macasca ifanem. Hina age cunug euna bilegina euha ifanadem. <sup>25</sup> Wele hina Kis Gunna ege jajanige Dewid hinana cabi dana Kis Gun cona mesomec je maden:

‘Etanu Juda dana qee eundec age gemanaga ben?

Etanu dana cajaca cunug age ege Tibud me qee odudeqan imeig qa odocwe qee?

<sup>26</sup> King mahanaadec cunug age Tibudca uqana Kraisca aqalecnu saciادoin.

Mahamaha agena ilo age Tibudna Kraisca han cadecnu cegulein,’ en. (Buk Song 2.1-2)

<sup>27</sup> Eu mele bahic, taun ina Herodca, Pontias Pailatca, Juda dana qee eundec ageca, Isrel dana ageca age gabandumeig age Jisas hinana cabi dana gun, hina wele Krais mudem, eu deweg tudocnu cegulein. <sup>28</sup> Age ceteh cunug cali hugiannu hina wele madem eu odocnu cegulein. Eu hinana gagadic odocna hinana cisdocnaca odi odooin. <sup>29-30</sup> O Tibud, qila agena cahacgec dah maga. Hinana gagadic odoc ihacaadi dana cajaca me madaga. Oodog kobolkobol filfilha hinana cabi dana gun, Jisas, uqa ijanna odoga. Odimeg gagadic odoc euna ege, hinana cabi dana, hinana me je saluqi u maadecnu cesulgagale,” ein.

<sup>31</sup> Age inondu hedumeig bibilegin cudun euna mim neceb gelelen. Age cunug Kis Gun am beceb age Anutna me je haun saluqi u maadein.

† 4:5: Dana i age cegulein eu Juda agena gesilec ben. Age Juda agena cuha fecnu ceteh cunug cofdoin. <sup>‡</sup> 4:10: Juda agena cegulec age Pailat hina Jisas qocom cal migian ec madein. Age Luk 22.66-23.5 feiga. Odocob Jisas cal mi hedocob age dana cajaca uqanu wawaga meleecnu qee gale adel.

*Kristen dana cajaca age wawaga osol tawein*

<sup>32</sup> Wawaga meleec tamanec eundec age wawaga osolca, cisdock osolca bilein. Oso ugana ceteh eu ugana himec ec qee madoloi, qa age cunug agena ceteteh eu osoben utecebuteceboleig.<sup>33</sup> Odocob aposel age gagadic odocka Jisas Tibud cal mecnadec ceseli cajennu dana cajaca je madein. Odocob Anut age cunug eeladen.<sup>34-35</sup> Leih age mahaca joca eu cunug idadumeig meen qaig eunadec umeig aposel adoloig. Odocob meen qaig eu age agenadec oso sabca qee cetetehca qee eundec meen qaig eu cesawimeig utoloig. Eunu sien euna age eundec oso cetehtu qee jaen qoloi.

<sup>36</sup> Odocob saen euna Josef, uqa Liwai sihuldec, uqa Saipras nuidec, eu bilen. Aposel age ijan Banabas dogina, ijan eu ugana gug odi “oso uqa jic ihacadec, hulunuga cehec dana,” en. <sup>37</sup> Odimei ugana maha eu idadimei meen qaig eunadec eu ehi li aposel jaimagana men.

## 5

*Ananaias Safairaca*

<sup>1</sup> Euna dana oso, ijan Ananaias, uqa aideg Safairaca alena maha oso idadimesi meen qaig osin. <sup>2</sup> Odocob uqa aidegca je qeel qetimesi uqa meen qaig na ha hehewi li na ha himec aposel aden. <sup>3</sup> Euga Pita madon, “Ananaias, hina eetanu Seten culdocom cisdock me qee iheceb Kis Gun uhuldudu meen qaig na ha maha idademnadec hewaga? <sup>4</sup> Hina maha qee idadec ninijen eu hinana bilen. Hibna hina idadem eu hina adinu fajedom meen qaig hinana bilouh eu cois. Eetanu kobil me qee i odochru cisdoga? Hina maha inadec dana qee uhuladelem qa hina Anut uhuldogal?” don. <sup>5</sup> Saen Ananaias je eu dah mimei cal mimei toni mahulen. Cunug eu dah mimeig ben bahic cucuiein. <sup>6</sup> Odocob dana haunhaun age hamol humeig uqa deweg lotoc jeuldimeig hewi ehi nui heel cisein.

<sup>7</sup> Odocob aua cijed odi hedocob uqa aideg qee docdoc li hamol len. <sup>8</sup> Odocob Pita sisildon, “Mataga, meen qaig gadac iqqa himec hina gemunca maha idadesianadecfo?” don.

Uqa jejeg hewi madon, “Ese, meen qaig cunug iqqa,” don.

<sup>9</sup> Odocob Pita madon, “Hina hina gemunca eetanu Tibudna Kis temdocnu je qeel getesin? Faga, dana hina gemun heel ciseiga eu age qila jic cebecna taweiga. Age hina ha gahili caloqagan!” don. <sup>10</sup> Mahuc bahic uqa jaihna toni mahulimei cal men. Dana eu age hamol humeig uqaha cal men eu fein. Eunu age hewi ehi nui gemug nijen qeihna heel cisein. <sup>11</sup> Odocob tamanec cunugca dana caja leihca je eu dah mimeig ben bahic cucuiein.

*Kobolkobol mati bahic cali hon*

<sup>12</sup> Odocob aposel age kobolkobol odocka, gaga odocka mati bahic dana cajaca gemona odoin. Odocob tamanec cunug age Solomonna hamolna ono ceguloig.<sup>13</sup> Leih maha gemo coboin eu cucuiimeig age li gabaneadecnu qee cisdoloin, qa dana cajaca cunug tamanec binanaga solein. <sup>14</sup> Euqa dana cajaca mati bahic age Tibudnu wawaga meleen ugana tamanec eunalein. <sup>15</sup> Eunu aposel age odi oodogin dana age Pita hu woolaadeb uqa hahun aqceeb me madigannu age hagca gahidi jicna agena cabalna agena taegna cedi ehi li madoloig. \* <sup>16</sup> Odocob mati bahic dana caja hagca eundec jobon nagnag Jerusalem alildoc onodec buga me qeeca eundec cedi ahocobil age cunug me madein.

*Age aposel gihacdoc jona madein*

<sup>17</sup> Odocobil ihanec dana age ugaca tawein eundecca age heel mec je madein. Eunu age aposelnu age ceteh oso odadecnu cisdoin. <sup>18</sup> Age aposel hewadimeig dana cunug agena gihacdoc jo euna madein. <sup>19</sup> Euga witic euna Tibudna ensel oso nimei gihacdoc jo cebec hudimei aposel ehadi ehi limei maaden, <sup>20</sup> “Belimeig tempel hamol li taweiga. Odimeig cebac biley haun inu dana cajaca cunug maadeiga,” aden. <sup>21</sup> Aposel je toodumeig cocojagen age tempel jo hamollein. Odimeig me je iwaladein.

Ihanec dana iloca dana age ugaca tawein eundecca age Juda agena cegulec cegulecnu maadecebile hu cegulein. Odimeig age aposel cedadi ahocobil cegulec euna age amagana madoqagannu je suldocki gihacdoc jona len. <sup>22</sup> Saen tempelnadec cabi dana lein eu aposel ono qee gulucadelein. Eunu age cegulecca limeig maadein, <sup>23</sup> “Saen ege gihacdoc jona limeb jic cebec eu gagadic bahic menec tatawen foqa. Gihacdoc jo jic cebec cofdock dana ha tatawegin meciadoqa qa saen ege jic cebec hudimeb dunuh loqa eu ono danaca qeel!” adein. <sup>24</sup> Saen tempel uqa han qalic iloca, ihanec dana benben ageca odi dah mimeig age dadanii aposel dewenega cel ceteh caleia ec cisdoin. <sup>25</sup> Oodon dana oso humei maaden, “Doiga! Dana age gihacdoc jona madeigan eu tempelnadec dana me je iwaladi

\* <sup>5:15:</sup> Dana cajaca i age Pita hahun eu hagca aqceebfi cois, hagca age meadoqagan eunu wawaga meleen.

tawega!" aden. <sup>26</sup> Odocob tempel han qalic iloca, uqana han qalic dana ageca belimeig aposel cedadi ahoin. Age dana meenna aqowainnu cucuiein. Eunu age hihibaganaga qee cedadi aholoin.

### *Aposel age me je madecnu qee cucuielein*

<sup>27</sup> Age aposel cedadi hamol ehi limeig cegulec amagana madecebile tawein. Odocob ihanec dana ilo uqa sisiladen, <sup>28</sup> "Ege age je gatiti maadom, dana i ijanna cain iwaladowain ec maadom qa feiga, age eeta odoin? Dana cajaca iwaladein eu Jerusalem i cunug ihoc len. Odocob age dana i uqana cal mecnu ha ege um qiguqagannu gale adena!" aden.

<sup>29</sup> Odocob Pita aposel leihca jejenega hewi maadein, "Ege maha inadec dana jejenega qee toodoqan. Anut jejeg himec toodoqan. <sup>30</sup> Ege jajanigeil agena Anut uqa Jisas uqa age na babalecna tuitu qumeig caquseceil caculimei cal meceb cal mecnadec tulidocob cajen. <sup>31</sup> Anut uqa dana i tulidocob cajimei eben meulana isec ten bilia. Uqa ege iwalgecca caahagecca bilina. Uqa Isrel dana agena silailnu tului falidocnu silail cagasiadigianu ihoc bilina. <sup>32</sup> Ege Anut ceteh eu odon eu ege fom eunu qasali maadoqona. Kis Gunha ceteh eu maadena. Anut uqa dana age uqana je toodu odogina eu Kis Gun adena," adein.

### *Gameliel uqa cegulec aposel hihibaganaga cain odadowainnu maaden*

<sup>33</sup> Saen cegulec dana age je eu dah mimeig age gemanaga gagadic bahic beben aposel qagaadoqagannu cisdoin. <sup>34</sup> Euqa agenadec oso, Farisi ijan Gameliel,<sup>†</sup> uqa loo je iwaladec dana cunug age uqa bisalu himec jejeg dogina eu caji tawimei aposel cedi caloqagannu maaden. <sup>35</sup> Odimei cegulec maaden, "Isrel dana, dana i agenu ceteh oso odadoqagannu batut cisoigale. <sup>36</sup> Ge, saen osona Tiudas cali hon. Odimei uqa ija meca ec maden. Odocob dana 400 odi uqaca gabandoin qa uqa qagadogin cal men. Dana uqa toodu coboloig eu filfil buadein. Odocob uqana cabi sanan men eu gauc cal mi qee men. <sup>37</sup> Eu hedocob Judas Galilidec, dana cajaca cunug sanijadec saenna cali hon uqa dana mati bahic diiajedecib toodoin qa uqaha qocobil cal meceb dana uqa toodoloig eu filfil buadein. <sup>38-39</sup> Eunu ija maadigina, dana i agena cabi eu maha inadec dana agena oginafi isi jausigian. Euqa eu Anutnu cabi oginafi age wooladecwe qee. Agedodoc Anutca cadoqaga odowainnu dana i agenu ceteh oso cain mahuc odowain. Culadi qisacadeiga!" aden.

Odocob cegulec age Gamelielna je toodu odoin.

### *Aposel age Jisasnu majanaga hewecnu ceelen*

<sup>40</sup> Eunu age uqa jejeg toodumeig aposel utaaeceil hamol lein. Odocob age han qalic dana maadeceil age geh bahic qisaadimeig Jisas ijanna me je cain bahic dana maadowainnu cahacadimeig culadeceil belein. <sup>41</sup> Odocob aposel age cegulec culadein. Anut uqa age Jisasnu majanaga hewecnu eu ihoc ec cisdon eunu bebeli bileig age wawaga ceelen. <sup>42</sup> Odocob deel cunugna tempelnaca, agena jo cunugnaca Jisas uqa Anutna Krais eunu me je maaadi coboain.

## 6

### *Age dana 7-pela age aposel cesuladecnu nesili ehadein*

<sup>1</sup> Saen oosooso hedocob malogom sanijec ohis teten Juda dana Grik je madegina eu madein, "Egena caja wij eu age deel cunug sab siwiadec saenna age gaid hawaadegina," ein. Eunu Juda dana Grik je madegina, Juda dana Hibrue je madeginaca fee dadanein. <sup>2</sup> Odocob aposel 12-pela eu age malogom cunugca maadeceil ceguleceil maadein, "Ege cewel ocnu cabi u Anutna me je maadecnu cabi culecnu eu cois qee. <sup>3</sup> Eunu, cotigeil, age dana 7-pela Kis Gun am becca, docca bilegina agenadec nesili ehadeceil ege caja wij sab siwiadecnu cabi cofdocrin madocomun biluqagan. <sup>4</sup> Egeqa, ege inondocnu, me je maadecnu cabi oqan," adein.

<sup>5</sup> Dana am eu age cunugca aposel agena cisdoc aquni madeinnu wawaga me bahic nijen. Eunu age Stiwen, Kis Gunca waug meleec dana, uqa nesili ehudein. Odocob age Filip, Prokoras, Naikena, Taimon, Pamenas, Nikolasca nesili ehadein. Nikolas uqa Juda dana qee, uqa dana Antiokdec. Wele uqa Juda sihul ibuldon. <sup>6</sup> Dana am nesili ehadein eu age aposelca cedi ehi lein. Odocob age ebenega ilomogana mimeig inondoin.

<sup>7</sup> Eunu Anutna je ihoc len. Malogom age Jerusalem bilein agena sanijadec ohis ten. Odocob ihanec dana mati bahic me jenu wawaga meleecib me je toodu odoin.

### *Juda dana age Stiwen ehudimeig cegulec amagana mudein*

† 5:34: Pol uqa Kristen qee calec Gameliel uqa uqana iwaldoc bilen. Age Aposel 22.3 feiga.

<sup>8</sup> Stiwen uqa Anut amegna me bilecca, gagadic odocca am bec bibilei uqa kobolkobol odoc gaga odocka benben dana cajaca gemona muden. <sup>9</sup> Euqa dana leih uqa gami fee dadanein. Age Juda am osonadec, age Cuha Jo Dana Besiadec ein.\* Leigh age Sairinidec, leih age Aleksandriadec. Ageca odocob Juda dana leih age Silisiadecca, Esiaca age Stiwen gami fee dadanec sanan mein. <sup>10</sup> Euqa Kis uqa cisdoc silecca utennu uqa je maadeceb age uqana uhulec je oso qee felein. <sup>11</sup> Eunu age dana leih Stiwenne je me qee madecnu fajadein. Age madein, “Ege uqa Moses Anutcanu je me qee mamaden dah mom,” ein. <sup>12</sup> I edina age dana cajaca, Juda agena matuca, loo je iwaladecca gemanaga aig metein. Age hu Stiwen hewimeig cegulec amagana ehudilein. <sup>13</sup> Odimeig age dana leih Stiwenne uhulec je madoqagannu hamol cedi ehi lein. Age madein, “Dana i uqa saen cunug tempel gun ica, Mosesna loo je gun eunuka je me qee gaid madena. <sup>14</sup> Ege uqa dah mumudeqan madi, Jisas Nasaretdec uqa jo ben i wagalimei loo je weledec Moses ebenigena men euha qee mudimei haun odi igian en,” ein. <sup>15</sup> Cunug ono cegulecna bilein eu age amaga Stiwen himec deedoin. Odimeig age uqa ola eu ensel ola cinigwe fein.

## 7

*Stiwen cegulec je maaden*

<sup>1</sup> Odocob ihanec dana agena ilo uqa Stiwen sisildon, “Dana i age madegina eu melefo?” don.

<sup>2</sup> Stiwen jejeg hewi maaden, “Cotiel memielca, ija je maadigina dah meiga! Wele ege memige Ebraham Mesopotemia bililen Haran qee nuec Anut kobolkobolca ono uqaca camasac men. <sup>3</sup> Odimei madon:

‘Hinana sifulca hinana mahaca culimeg maha ija ihachigenna nuuga,’ don. (*Genesis 12.1*)

<sup>4</sup> Eunu uqa Kaldia agena hatu culimei nui Haran hatuna bilen. Hibna Ebraham memeg cal meceb Anutna odudeceb hu hatu i qila age bileyinana bilen. <sup>5</sup> Anut odonqa uqa maha naha uqana bahic oso qee utel, maha mita osahic bahicha qee utel. Euqa Anut utigianu je hahun maden. Anut uqa Ebraham melca qeqa eu uqana bahicca uqana sihil hibna biluqagan eu ageca agena biligian ec je hahun maden. <sup>6</sup> Anut uqa edi madon:

‘Hinana sihil age hatu filna cele dana biluqagan.

Ono age gahidoc cabi oqagan,

odocob age qisaadibil cabi ooig cabi gel 400 ono biluqagan.

<sup>7</sup> Euqa dana me qee madoqagan eu ija wadac me qee adigen.

Eu hedocob hibna age hatu eu culimeig hu ene bibileig ija binani suluqagan,’ don. (*Genesis 15.13-14*)

<sup>8</sup> Odocob Anut uqa Ebraham bal cehec jenu deweg cagu qoc kobil uten. Odocob Aisak cali hon. Deel 8-pela hedocob Ebraham uqa Aisak deweg cagu qon. Odocob Aisak hibna melah Jekob cali hon. Odocob hibna Jekob melahul 12-pela cal hoin. Dana 12-pela i age egena sihil gug 12-pela memigeil bahic,” aden.

<sup>9</sup> “Jekob melahul age walini Josefnu heel memeig age Isip hatu ono gihadoc cabi ugianu suldoen, euqa Anut uqaca bilen. <sup>10</sup> Odimei uqana culumen cunugnu besiton. Saen Josef uqa Isip agena king amegna bilen Anut uqa duman meca, cisdoc meca uten. Odocob king hatu eu cofdoc biligianu muden. Uqaha uqadodoc jo cofdoc biligianu muden. <sup>11</sup> Odocob saen euna Isip hatuca, Kenan hatuca ono sabnu cahel aqen. Odocob dana cajaca mel cunug wen bilein. Ege jajanigeil age sab ocnu cabi bahic. <sup>12</sup> Odocob Jekob Isip hatu ono sabca ec dumei uqa melahul ege jajanigeil age casac suladeceb wele age qee lecna lein. <sup>13</sup> Odocob age Isip ono li lecisdocobil Josef uqa walini ec maadeceb doin. Odocob Isip agena king uqa Josefna sifulnu dugia bili hon. <sup>14</sup> Eunu Josef uqa memeg Jekobna je suldon. Odimei madon, ‘Sihunel cunug dana caja 75 cunugca age Isip ene hoqagan,’ don. <sup>15</sup> Odocob Jekob Isip nuen. Ono uqaca uqa melahulca cal mein. <sup>16</sup> Age Josef Jekobca dewenela ganac Sekem ono ehi nui Ebraham heel eu Hemo sihil agenadec qaig silwana fajen euna heel cisalein,” aden.

<sup>17</sup> “Saen Anut uqa Ebraham je hahun madon eu wele dodoldodon egena sihil ha Isip hatuna ono fulusdon. <sup>18</sup> Saen euna king oso uqa Josefna qee doc Isip ono calimei hatu eu cofdon. <sup>19</sup> Uqa egena sihil uhuladimei uqa qisaadi maadeceb age agena mel sim basoloig eundec cal mecnu ehadi nui maha gemo culadoloig. <sup>20</sup> Saen euna Moses uqa cali hon. Uqa mel galeca bahic, uqa jagel cijed memegna jobon bilen. <sup>21</sup> Odocob saen uqa jobondes ehi nui fil mudein euna king ateg uqa umei melah bahic cinigwe cofdodon ben men. <sup>22</sup> Uqa Isip agena kobil docca iwalddodogin ben men, eu uqana je madec odocka eu gagadic men,” aden.

\* **6:9:** Juda dana i age wele dana agena cabi dana bega meh bilein, euqa saen ina age besiadec bilein.

<sup>23</sup> "Saen Moses uqana cabi gel 40 odi uqa cotugul Isrel eu ono li feciadigiannu cisdon. <sup>24</sup> Ono nuimei uqa Isipdec dana oso Isreldec oso qoqon fimei eunu uqa li Isreldec wadacdocnu cesuldumei Isipdec qocob cal men. <sup>25</sup> Uqa Isrel dana eu age Anut besiadigiannu cabi uten ec odi doqagan ec cisdon qa eu age odi qee cisdoloin. <sup>26</sup> Deel osona uqa Isreldec dana lecis cacadesin mecialimei uqa cahacalimei tanawaligiannu odon. Odimei maalen, 'Se, dana lecis ale Isreldec himec. Odi eetanu cadesina?' aden.

<sup>27</sup> Euqa oso uqa cotig wadon eu Moses gesac sundumei madon:

'In hina ege cofgecca gesilgecca mihen?' don.

Uqa sisildon, <sup>28</sup> 'Hina cum Isipdec qagadoganwe odi ijaha qagateganfo?' don. (*Kisim Bek 2.14*)

<sup>29</sup> Moses je eu dah mimei uqa Isipdec busali nui Midia mahana ono bilen. Ono uqa aideg mel manahal lecis basalen," aden.

<sup>30</sup> "Cabi gel 40 hedocob Tibudna ensel na nag oso ja cijec belicanna tatawen fen, wadauna\* Sainai aluh cemenug. <sup>31</sup> Moses eu odi fimei tumatumaen. Odimei cisdudu fi cuhadugia eunu na nag eu cemenugca len. Euqa dodododon uqa Tibud jejeg dah men.

<sup>32</sup> 'Ija hina jajaninel agena Anut, ija Ebrahim, Aisak, Jekobca agena Anut,' en. (*Kisim Bek 3.6*)

Odocab Moses qelelimei jejeg cali honna isec feciecnu culen. <sup>33</sup> Odocab Tibud Moses madon:

'Cudun hina tawaga eu maha gun.

Eunu hina jaim tacec eu huluga.

<sup>34</sup> Isip dana age ijana dana cajaca me qee odadegina eu ija figina.

Ija agena sogoeç eu dah migina eunu ija besadigennu nig.

Qila, ija hina sulhecemin Isip hatuna nuegan,' don," aden. (*Kisim Bek 3.5, 7-8, 10*)

<sup>35</sup> "Moses i Isrel dana age uqanu cuculeig sisildoin, 'In hina ege cofgecca gesiligecca mihen?' doin. Euqa Anut uqa ensel na nag oso ja cijec belicanna tatawen fen uqa ebenna besiadimei cofadigiannu suldon. <sup>36</sup> Uqa Isrel dana Isipdec ehadi nuen. Uqa kobolkobol gagadic odocca Isip onoca macas golcana odon. Odocab cabi gel 40 leceb wadauna ha odon. <sup>37</sup> Moses i uqa Isrel dana maaden:

'Anut ija ageca sulteceb homwe eu odi uqa je hahun madec dana oso hibna age gemonadec ageca suldochob hugian,' aden. (*Loo 18.15*)

<sup>38</sup> Moses uqa Isrel tamanecca wadauna ono bilein, saen euna uqa ege jajanigelca bibilegin ensel uqa Sainai aluhna ono je madon eu uqa cebac bilec je igecnu uten," aden.

<sup>39</sup> "Euqa ege jajanigel Mosesna je qee toodoloin. Uqa gesac sundodoig age haun Isip ceseloqagannu cisdoin. <sup>40</sup> Eunu age Eron madoin:

'Ege kadan tibud mudadigecem ege jic aqunigeiga.

Ege dana Moses egina uqa Isipdec ehigi ahon eu ana nuia qee doqona,' doin. (*Kisim Bek 32.1*)

<sup>41</sup> Eunu age uhulec kadan tibud eu bulmakau nag ihicon qu mudein. Uqa ihandoein. Odimeig sab ben cicileig uhulec kadan tibud agedodoc mudeinnu celeboein. <sup>42-43</sup> Eunu Anut age hibemaden. Odimei Anutna je hahun madec dana agena jaqec jena taweia eu madenawae:

'O Isrel dana caja! Age cabi gel 40 wadauna cocoboig dool aqimeig ihanoloig saen euna age ijanu ihanoloig ec cisdoginafo?

Age Molekna jo talahca Refan tibud uqana malaqa ihiconca gahialein.

Eu uhulec kadan tibud himec age eunu cuha foqagannu mudein.

Eunu ija age Babilon hibilohu isec suladecem in beli biluqagan,' madenawae (*Amos 5.25-27*)

odi Anut uqa malaqa sao ohis binan suluqagannu ahawaaden," aden.<sup>†</sup>

<sup>44</sup> "Ege jajanigel age wadauna bibileig talah jo eu Anut ageca bilen eu ihacad. Anut Moses mudigiannu madon odi mudein, uqana hahun Moses fen eu odi mudein. <sup>45</sup> Hibna ege jajanigel talah jo memegail mudein eu gahidumeig Josua toodocobil belimeig maha hatu Anut dana eunadec cunug qee maden eu oqagannu belein. Odocab talah jo eu maha euna bibilen leceb Dewid king cali hon. <sup>46</sup> Dewid uqa Anut amegna me bileeç Anut uqa

\* **7:30:** Age je Matju 3.1na nijia eu feiga. † **7:42-43:** Molek eu kadan tibud oso dana caja sihul fil age eunu cuha fein. Refan eu malaqa oso ageha eunu cuha fein. Je i Siwien maden uqa je hahun madec dana, Amos, uqana buk 5.25-27nadec on. Amos uqa odi maden. Isrel wele bilein age Anutna cuha fecnu bahic qee felein. Euqa age Anutna je hibemdumeig age sihul fil agena kadan tibudnu cuha fein. Hibna Anut uqa Isrel age uqa hibemdoin eu fen. Eunu uqa Babilon culadeceb age humeig Isrel han cadi cilehadimeig ehadecebilek Isrel age beli Babilon hatuna gihacdona bilein. Age 2 King 24.10-16 feiga.

Dewidnu gale don. Uqa Jekobna Anut sisildon, ‘Hina cois tecemfi ija jo hina biledannu cehihigen,’ don. <sup>47</sup> Euqa Solomon uqa jo eu cehiton,” aden.

<sup>48</sup> “Euqa Anut Ohis Bahic uqa jo dana ceheginana qee bilina. Ge, Anutna je hahun madec dana odi maden:

<sup>49</sup> ‘Tibud madena, “Sao jobon eu ijana biled bahim.

Odocob maha eu ija jaimi mec cabal.

Cel jo adec bahic ija cehitegan? Cel cudunna ija biligen?

<sup>50</sup> Ceteteh cunug i ija ebenina mudem,” ena,’ en,” aden.

(Aisaia 66.1-2)

<sup>51</sup> “Age Anutna je toodoc dana qee! Age wawaga eu haiden dana cinigwe! Age dahiniga me je dah mecwé qee! Age jajanagail Kis Gun cahacdoloigwe eu odi age ha Kis Gun gaidgaid cahacdolina. <sup>52</sup> Age jajanagail Anutna je hahun madec dana cunug dewenega tuadein. Je hahun madec dana eu age madein, ‘Hibna Anut uqa uqana Dana Ititom Bahic egeca suldugian,’ ein eu age aqein. Odocob qila age Dana Ititom i age balijimeig qoin.

<sup>53</sup> Anutna ensel Mosesna loo je adein eu age oin. Euqa age qee toodoloin,” aden.

*Age Stiwen meenna qocobil cal men*

<sup>54</sup> Odocob cegulec dana je eu dah mimeig age gemanaga geh bahic beceb maimaga kicododoig gemanagaca mecidoin. <sup>55</sup> Euqa Stiwen Kis Gun waugna am beceb sao jobon tatiimei Anutna kobolkobel fimej Jisas Memeg eben meulana isec tatawen fen. <sup>56</sup> Odimei Stiwen maaden, “Feiga! Ija sao jobon cebec hudeceb Dana Melah Anut eben meulana isec tatawen figinal!” aden.

<sup>57</sup> Uceldodoig cegulec dana ebenegana dahiniga cit qoin. Odimeig age cunug bahic gulu qahi cemenuglein. <sup>58</sup> Hewi qelecebilek taun ben hibiloh isec leceb meen heli qoin. Dana age Stiwenne je dah mein eu age agena lotoc dana haun oso, ijan Sol, jaihna olomdoein. <sup>59</sup> Meenna odi ququ ninijegin Stiwen uqa Tibud inondudu madon, “Jisas Tibud ija doloni oga!” don. <sup>60</sup> Uqa mahana gob cehimeti gehca utai madon, “Tibud! Hina i agena silail inu dahin celeiale!” don. Uqa eu odi dih mamadi ha cal men.

## 8

<sup>1</sup> Odocob dana age Stiwen qocobil cal men eunu Sol eu tutuc ec cisdon.

*Wawaga meleec dana cajaca eundec Sol uqa gihacdoc jona madecnu aaqati tooaden*

Age gihacdoc jona madecnu saen euna sanan mimeig wawaga meleec tamanec Jerusalem bilein aaqati tooadein. Eunu dana wawaga meleec eundec cunug budu Sameria hatuca, Judia hatunaca beladein qa aposel age qee budoloin. <sup>2</sup> Dana ititom coboc leih age Stiwen heel cisein. Age geh bahic qadaug utein.

<sup>3</sup> Euqa Sol uqa wawaga meleec tamanec fadaldocnu cabi on. Uqa jojo cijawdudu cocobi dana cajaca wawaga meleecca eundec diiadi ehi nui gihacdoc jona qeladeceb lein.

*Age Sameria hatu ono me je madein*

<sup>4</sup> Dana wawaga meleecca eundec buadein eu cudun cunugna beladein. Odimeig me je qaqasali maaadec coboin. <sup>5</sup> Odocob Filip uqa Sameria hatu uqana taun benna nuimei ono dana cajaca Anutna Kraisnu me je maaden. <sup>6-7</sup> Buga me qee dana geh bahic deweneganadec ititacadeceb cali huhu bebeleig geh bahic uteain. Odocob dana mati age ebeneba jaimaga cal mecca laleg mecca me mamaden fein. Eunu dana cajaca mati bahic Filip je maaden eu age cunug uqa dah mumudeig odoc kobolkobel odon eu fimeig dah moqagannu dahiniga cehi cuhadoin. <sup>8</sup> Odocob taun ben eunu geh bahic ceelein.

<sup>9</sup> Odocob ceeh dana oso, ijan Saimon, ono biloloi. Uqa saen cecelac dana Sameriacdec amagana mahanadec odoc kobolkobel oodon age tumatumaoil. Ija binanica adoloi. <sup>10</sup> Odocob taun ben eunadec dana ijanagaca, dana ijanagaca qee age cunug uqa je mamaden cehna dah mudi biloloig. Age odi madein, “Dana i eu Anutna gagadic odocca uqa Gagadic Odoc Ben odoccia egina,” ein. <sup>11</sup> Uqa uqana mahanadec odoc kobolkobel saen cecelac bahic oodon tumatumaein eunu age uqa je mamaden cehna dah mudi biloloig. <sup>12</sup> Euqa saen Filip uqa me je Anutna culnuca, Jisas Kraisnuqa qasali maaden eunu dana cajaca cunug wawaga meleecca wa joc oin. <sup>13</sup> Saimon uqadodoc ha waug meleen. Hibna uqa wa joc umei Filip cemenug bahic bilen. Odocob uqa Filip odoc kobolkobel odochob fimei filicen.

<sup>14</sup> Aposel Jerusalem ono bibileig Sameria dana cajaca Anutna me je oinnu dah mimeig eunu age Pita Jonca sulalecebilek ono belesin. <sup>15-16</sup> Saen ale ono li calimesi ale wawaga meleecca eundec age Kis Gun ageca qee nec ninijen Jisas Tibud ijanna dih wa joc oinnu

<sup>‡ 7:58:</sup> Isrel agena loo je eu odi maden, “Dana oso uqa kobol me qee bahic oso odocobfi age ehudi taun ben hibiloh isec limeig ono meen heli qocobil cal migian,” en. Age Wok Pris 24.13-16ca, Namba 15.35ca feiga.

ale Kis Gun oqagannu inondosin.<sup>17</sup> Inondodosi Pita Jonca ebenela ilomogana mecebile Kis Gun ageca nen.

<sup>18</sup> Saimon uqa Pita Jonca ebenela ilomogana mecebile Kis Gun ageca nen eu fimei Pita Jonca meen qaig aali<sup>19</sup> maalen, “Ijaha ebeni ilomogana mecemine Kis Gun oqagannu gagadic odoc i itesia,” alen.

<sup>20</sup> Euqa Pita jejeg hewi madon, “Ceteh Anut bagol igece hina meen qaigna fajecnu ihoc cisdogonanu hinana meen qaig hinaca oloqanihna nuesia!<sup>21</sup> Hina wawin meleec eu Anut ameaga tutuc qee. Eunu hina ege cabi oqona i ocnu ihoc qee.<sup>22-23</sup> Anutna bagol igece amen qona. Ceteh i ocnu heel magana. Silail calwau mihina eu ija figina. Eunu falicdumeg hinana cisdoc me qeenu Tibud uqa ihocfi hinana silail cagasihigianu inondoga,” don.

<sup>24</sup> Odocob Saimon Pita Jonca maalen, “Odi cain. Ale madesia odi ijaca qee hoiaunnu ijanu Tibud inondosiale,” alen.

<sup>25</sup> Odocob ale alena gugnu madimesi Jisas Tibudnu doc euha Tibudna me je madi hedumesi Pita Jonca haun Jerusalem ceseli belesin. Ale Jerusalem ceceseli bilesi jicna Sameria jobon mati bahic me je qaqqasali maaadi belesin.

### *Filip dana Itiopiadec me je madon*

<sup>26</sup> Odocob Tibudna ensel Filip madon, “Hina saciadumeg fufu saut isec jic Jerusalemdec Gasa jobon nuce eu toodoo nuuga,” don. Jic eu wadau\* gemona nuina.<sup>27</sup> Eunu Filip saciadumei nuen. Nuimei dana Itiopia hatudec jic nunuen fen. Uqa dana bamig selec, uqa Itiopia agena kwinna ilo dana oso. Uqa kwinna meen qaig cofdoc dana. Wele uqa Jerusalem ono Anutnu cuha figia len<sup>28</sup> qa qila uqa karisna ceseli jobon nuen. Uqa karisna guguli bili uqa Anutna je hahun madec dana Aisaiana buk jaqen eu sanijen.<sup>29</sup> Odocob Kis Gun Filip madon, “Karis i cocobi cemenug laga,” don.<sup>30</sup> Odocob Filip cemenug limei uqa je hahun madec dana, Aisaia, uqana buk eu sasanijen dah men. Odimei uqa sisildon, “Hina jaqec je sanijigina eu wawin fogo donafo?” don.

<sup>31</sup> Odocob dana eu Filip jejeg hewi madon, “Oso uqa qee silditecebfi ija adi wawi fogo dugian?” don. Odimei uqa Filip karis ohis uqaca teceb biluwassanu cesusdon.<sup>32</sup> Anutna jaqec je dana eu uqa sanijina eu odi maden:

“Uqa sipsip age qocnu ehi leginawee,

sipsip nag dana bagic cacagogin tilii jeca qee tawenawee,  
eu odi uqa je oso qee madel.

<sup>33</sup> Saen age cewudodoig tutuc qee gesildolooin.

Uqana cebac bilec maha ina eu gothic men

Eunu dana oso uqana sihulnu ihoc qee sildiaun,” en.

*(Aisaia 53.7-8)*

<sup>34</sup> Odocob dana eu Filip sisildon, “Mataga, je hahun madec dana je i innu madena? Uqqadodocnufo, qee dana osonu madena?” don.<sup>35</sup> Odocob Filip uqa Aisaiana jaqec je sanan mimei me je weledec jaqec je cunugnadec uqa Jisasnu me je eu silditon.<sup>36-37</sup> Odocob ale jic eu toodoo numesi wa osona calesin. Odimesi dana eu madon, “Faga, wa ene nijia. Ija wa joitec oga tenafi in oso ija cahactigian?” don. [Odocob Filip madon, “Hina Jisasnu wawin cunug meleecebfi wa joc ihoc organ,” don. Odocob uqa jejeg hewi madon, “Jisas Krais eu Anut Melah ija wawi meleena,” don.]

<sup>38</sup> Odocob dana bamig selec eu uqa karis cofdoc dana madocob karis tuluen. Odocob Filip dana bamig selec euca wana numesi Filip dana eu wa joudien.<sup>39</sup> Odocob saen ale wanadec cali becebile Tibudna Kis Filip u hewi nuen. Dana eu Filip haun qee fel qa haun jic eu celeboii toodoo nuen.<sup>40</sup> Odocob Filip uqa ija Asdod ene biliga ec maden. Odimei uqa jobon nagnagna nui me je qaqqasali mamadi cocobi nui Sisaria taunna calen.

## 9

### *Sol Jisasnu waug meleen*

*(Aposel 22.6-16; 26.12-18)*

<sup>1</sup> Oodogin Sol uqa haunhaun maden, “Ija Tibudna malogom eu aaqigen,” en. Odimei uqa ihanec dana iloca limei<sup>2</sup> jaqec je Sol uqa Juda agena cuha jonana Damaskas ono agena cofadec ihacadigiannu utennu sisildon. Jaqec je eu maden, “Sol uqa danafo, cajafo Jisasna Jic eu toodogina eu gulucadifei hewidat jeladimei cedadi Jerusalem ene ahugian eu cois,” en. Odocob uqa jaqec je eu uteceb Damaskas ono nuen.

<sup>3</sup> Uqa Damaskas nunu bili taun ben eu cemenug hohon nag odi bahic fulacdok sao jobondec uqa falei talildon. <sup>4</sup> Odocob uqa mahana toni mahulimei jejeg oso madocob dah men, “Sol, Sol! Hina eetanu ija jabiti tooototagana?” don.

\* 8:26: Age je Matju 3.1na nijia eu feiga.

<sup>5</sup> Odocob Sol sisildon, "Tibud, hina in?" don.

Odocob uqa jejeg hewi madon, "Ija Jisas, hina jabi tootoodogona eu. <sup>6</sup> Euqa cajimeg taun benna laga. Ono oso hina eeta odogannu eu mahigian," don.

<sup>7</sup> Mamadesinqa dana Sol gami belein eu age je oso mamadi qee tawelein. Age tiliein. Age jejeg dah mein qa dana oso qee felein. <sup>8</sup> Odocob Sol mahanadec cajimeei ameg huledon qa meciecwé qee. Eunu age eben hewalimeig qagasadudu nui Damaskas taun dunuh lein. <sup>9</sup> Odocob deel cijed hedocob uqa meciecwé qee eu odi bilen. Odocob deel eu dunuhua wa gab sabca ha qee jel.

<sup>10</sup> Odocob saen euna malogom oso, ijan Ananaias, uqa Damaskas taunna bilen. Odocob Tibud uqa majaudocna madon, "Ananaias!" don.

Odocob uqa jejeg hewi madon, "Tibud, ija ihen," don.

<sup>11</sup> Odocob Tibud madon, "Cajimeg jic ijan Tutuc euna nuimeg Judasna jona limeg sisilaga, 'Dana oso, ijan Sol, uqa Tasasdec ene biliafo?' aga. Faga, uqa inondudu bilia. <sup>12</sup> Uqa majaudocna dana, ijan Ananaias, uqaca hocob haun meciigiannu eben tatacan meceb mecieia," don.

<sup>13</sup> Euqa Ananaias jejeg hewi madon, "Tibud, dana inu je mati bahic uqa hinana qagu coboc dana cajaca Jerusalem ono bibilegin ihulahaladena ec matein. <sup>14</sup> Odocob uqa jaqec je oso ihanec dana benben agenadec hewi ene hon. Jaqec je eu dana cajaca cunug age hina binain sulegina hewadi jeladimei cedadi Jerusalem ono ehi nuigiannu cois en," don.

<sup>15-16</sup> Euqa Tibud madon, "Juda dana qee ageca, agena king ageca, Juda dana ageca ija ijani hewi ageca nuecnu ija cabi inu nesili ehudem. Odocob ijadodoc uqa ija ijaninu dain doc ganic ugiannu ihacdugen. Eunu nuuga," don.

<sup>17</sup> Eunu Ananaias cocobi nui jona limei eben Sol tatacan mimei uqa madon, "O coti Sol, Jisas Tibud jic homna hina camas men uqadodoc hina haun meciegannuca, Kis Gun am bec ogannuca sulteceb huga," don. <sup>18</sup> Odocob mahuc bahic ceteh oso dool gonon cinigwe Sol amegnadeccagati toneceh meciimei ceteteh meciaden. Uqa caji taweceb Ananaias wa jouden. <sup>19</sup> Odocob hibna uqa sab jimei uqana gagadic odoc haun ceseli on.

### *Sol Damaskas ono me je maadec cabi on*

Odocob Sol uqa malogom gami age Damaskas ono deel osooso ageca bilein. <sup>20</sup> Uqa Juda agena cuha jonana limei Jisasnu me je maaden, "Jisas uqa Anut Melah," aden.

<sup>21</sup> Odocob cunug uqa je eu madeceb dumeig tumatumaein. Odimeig sisilein, "Dana i uqa qeefo Jerusalem ono dana cajaca age ijan i binan sulegina eu aqena? Odocob uqa dana caja enedec hewadi jeladimei ihanec dana benben ageca ehadi Jerusalem ono ehi ligiannu ene qee holfo?" ein. <sup>22</sup> Euqa Solna me je madec eu gagadic odocca bahic haun men. Odocob uqana je madec Jisas uqa Anutna Krais eu mele bahic fimeig Juda dana Damaskas bilein age uqa jejeg hewi madocwe qee.

### *Juda dana age Sol cad mudecebil busalen*

<sup>23</sup> Odocob hibna deel mati hedocob Juda dana cegulimeig Sol qoqagannu je togodoin.

<sup>24</sup> Euqa age uqa Juda dana age qihugagannu je togodogina ec doin. Juda age cahineg witicca uqa qoqagannu taun ben uqana jic cebec ben eu cofdoloig. <sup>25</sup> Euqa witic osona uqana malogom age ehudimeig gel ohis isec cebec nag osona mudegin leceb galelna tacimeig halu hehewegin maha gemo tonen.

### *Sol Jerusalem ono bilen*

<sup>26</sup> Odocob Sol uqa Jerusalem ono limei Jisasna malogom gabananigiannu odon. Euqa age uqa malogom oso ec mele qee elein. Odimeig age cunug uqa cucuidoin. <sup>27</sup> Euqa Banabas uqa Sol cesuldumei je maadigia ehudi aposelca ehi len. Uqa Damaskas jicna Tibud Solca camas mimei je madonnus sildiaden. Odimei Sol uqa Damaskas ono Jisas ijanna me je saluqi u maadennu saaden. <sup>28</sup> Odocob Sol uqa age gami Jerusalem ono cudun cunugna me je Jisas Tibud ijanna saluqi u mamadi coboin. <sup>29</sup> Odocob uqa Juda dana Grik je madoloig eundecca ha je madoloig. Odimei fee dadanoloi. Eunu qoqagannu odoin. <sup>30</sup> Saen wawaga meleec cotugul age dumeig Sol umeig ehudi Sisaria taun ono numeig suldocobil Tasas taunna nuen.\*

<sup>31</sup> Odocob eunu tamanec Judia hatunaca, Galili hatunaca, Sameria hatunaca malol bibileig age gagadic tawein. Age Tibud binan susuli cocobogin Kis Gun cesulaaden dana cajaca me jenu meleec fulusdon.

### *Pita Inias me muden*

\* <sup>9:30:</sup> Hibna Banabas uqa Sol ehudi Antiok ono nuigiannu gale don. Odimei uqa waludecnu Tasas ono nuen. Age Aposel 11.25 feiga.

<sup>32</sup> Odocob Pita hatu cunugna cobon. Odocob saen osona uqa Anutna qagu coboc dana cajaca leih age Lida jobon ono bilein eu meciadiigianu non. <sup>33</sup> Ono uqa dana oso ijan Inias gulucdon. Inias uqa jaih ebenga laleg necnu ugana cabalnadec cabi gel 8-pela odi oso qee toni coboloi. <sup>34</sup> Odocob Pita uqa madon, “Inias, Jisas Kris hina me mihia. Cajimeg hinana cabal eeldoga,” don. Odocob mahuc bahic Inias cajen. <sup>35</sup> Odocob dana cajaca cunug Lida jobonca, Saron hatunaca ono bilein uqa fimeig falicdumeig Tibudnu wawaga meleen.

### *Pita uqa Tabita tulidocob ceseli cajen*

<sup>36</sup> Odocob Jopa taun ono malogom caja oso ijan Tabita bilen. Uqa ijan Grik agena jena eu Dokas. Uqa saen cunugna meme mamadi dana sawen cesuladolo. <sup>37</sup> Saen euna uqa hag umei cal men. Odocob uqa deweg ganac wa joudimeig jo hamol ohisna mudecebil nijen. <sup>38</sup> Odocob Jopa taun eu Lida jobon cemenug nijen eunu saen malogom Jopadec Pita uqa Lida ono bilia ec dumeig age dana lecis je osoca sulalecebile belesin. Ale cesusdudu madosin, “Cain culugaun! Eleca hocom beloqa!” dosin. <sup>39</sup> Eunu Pita saciadocob dana lecis eu ale gami ceseli belein. Saen uqa hu Jopa caleceb ehudi jo hamol ohis ono ehi tein. Caja wij cunug ceguli Pita talildu tawein. Saen Dokas uqa cebac bibili biley lotoc mudiaden eu age qaqqaji biley hewi Pita ihacdoin. <sup>40</sup> Euqa Pita cegulein eundec cunug ititacadimei uqa gob cehi inondon. Odimei Pita uqa walдумei deweg ganac mecidiumadon, “Tabita cajaga!” don. Odocob uqa ameg camalimei Pita fecidon. Odimei caji bilen. <sup>41</sup> Pita eben hewimei cesuladocob cajen. Bibilen Anutna qagu coboc dana cajaca, caja wijca maadeceb tecebil cajeia cebac bilia aden. <sup>42</sup> Odocob je Jopa cunug nui ihoc len. Odocob dana cajaca mati bahic Tibudnu wawaga meleen. <sup>43</sup> Pita uqa deel mati Jopa taun ono dana ijan Saimonca bilesin. Saimon uqa dool ganac lotoc cinigwe mudec cabi oc dana.

## 10

### *Ensel cali humei Koniliyas je oso madon*

<sup>1</sup> Odocob dana oso, ijan Koniliyas, uqa Sisaria taun ono biloloi. Uqa Rom agena han dana am 100 agena ilo oso. Ugana am ijan eu “Hannu Am Italidec.” <sup>2</sup> Uqa cuha fec dana. Ugaca, uqa aidegca, uqa talaculca age cunug Anut himec gaid binan suloloig. Uqa Juda dana sawen eundec geh bahic cesuladolo. Odimei uqa Anut gaid inondoloi. <sup>3</sup> Odocob wesi osona 3 kilok eu odi uqa majaudocna Anutna ensel ugaca camasac mimei madon, “Koniliyas!” don.

<sup>4</sup> Odocob uqa cucui bahic imei ensel gugca mecidumei madon, “O Tibud, adi odeia?” don.

Odocob ensel jejeg hewi madon, “Anut hinana inondoc dah meia, hina dana sawen cesuladagana eu feia. Eunu hinanu dahig bilia. <sup>5</sup> Odocob dana oso, ijan Saimon age Pita egina, uqa Jopa ono bilia. Dana leih uqa ene ehudi ahocnu suladecem beleiga. <sup>6</sup> Uqa dool ganac lotoc cinigwe mudec cabi oc dana, ijan Saimon, ugana jona macas\* cool ono bilia,” don. <sup>7</sup> Odimei ensel Koniliyas je madu hedumei haun jausen. Odocob Koniliyas ugana jo cofdoc cabi dana lecisa, uqa han dana oso uqa cuha fec dana ugaca utaa deceb hoin. Han dana i uqa han dana gaid Koniliyas cofdoloig eundec oso. <sup>8</sup> Odimei Koniliyas uqa majaudocna madonnu saadimei suladeceb Jopa ono belein.

### *Pita ceteh oso majaudocna fen*

<sup>9</sup> Belimeig deel osona age wele Jopa cemenug dodoldodogin Pita jo qab ohis cam gemo cehen tatawen odi inondugianu ten. <sup>10</sup> Odimei uqa wen docob sab jigianu cisdon. Odocob age sab wele saciadodogin uqa majaudocna fen. <sup>11</sup> Odocob uqa sao jobon jic cebec hudeceb ceteh oso lotoc ben cinigwe sucun 4-pelana halu qagec hewen mahana nenen fen. <sup>12</sup> Odimei uqa dool filfil mahana coboginaca, man sononec filfilca, man fululec filfil saona coboginaca lotoc ben euna bibilegin feciaden. <sup>13</sup> Odocob jejeg oso madon, “Pita! Cajaga, aqimeg jagal!” don.

<sup>14</sup> Euqa Pita madon, “O Tibud, qeeo. Ija wele ceteh qee eeldoc gegehinca oso qee jelem,” don.

<sup>15</sup> Odocob jejeg eu haun madon, “Ceteh oso Anut eeldon gegehinca qee eu hina qee eeldoc Cain agauna,” don. <sup>16</sup> Eu odiodi cijeddon. Odocob ceteh eu haun sao jobon ceseli ten.

<sup>17</sup> Odocob Pita uqa majaudocna fen eu ugana gugnu jaen qoqon bilen. Saen euna dana Koniliyas suladen eu age Saimonna jonu sisilaadeig age li jic cebec benna tawein. <sup>18</sup> Odocob age utai sisilein, “Dana oso, ijan Saimon age Pita egina, jo ina biliafo?” ein.

\* 10:6: Macas eu Mediterenian Macas.

<sup>19</sup> Odocob Pita uqa majaudocna fen eu uqana gugnu gagadic cisdodon Kis uqa madon, “Faga! Dana cijed hina walihegina age ene hoiga taweiga.” <sup>20</sup> Hina saciadumeg toni nog. Eu age ija suladecemin hoiga eunu hina age gami nuecnu cain culumen heiaun,” don. <sup>21</sup> Odocob Pita toni numei maaden, “Dana age walegina eu ija ihen. Age eetanu hoiga?” aden.

<sup>22</sup> Odocob jejeg hewi madoin, “Koniliyas, uqa Rom agena han 100 agena ilo, uqa sulgeia. Uqa ititom dana Anut binan sulinanu Juda dana cunug eu age uqa jejeg toodoo cuhadogina. Odocob Anutna ensel oso Koniliasca humei odi madon, ‘Hina Saimon Pitana je oso suldoga. Uqa hinana jona hocob uqana je dah megan,’ don. Odocob eunu sulgeceb ene hoqa,” doin. <sup>23</sup> Eunu Pita dana cijed eu age maadeceb lecebil witic osol jo euna nijein.

Odocob deel osona uqa saciadocob uqa age gami belein. Odocob wawaga meleec cotugul leih Jopadec toodocobil osoben belein.

#### *Pita Koniliyasna jona nuen*

<sup>24</sup> Odi belimeig deel eu toodocob age li Sisaria taun ono calein. Ono Koniliyas sumadi bibilen lein. Uqa uqana silulca danahca maaden hocobil osoben bilein. <sup>25</sup> Saen Pita jo hamol ligia oodon Koniliyas uqa hu ceguldon. Odimei Pita olana gob cehi jaihna toni mahulimei Pitana cuha fen. <sup>26</sup> Euqa Pita uqa madon, “Ijaha dana mahanadec himec. Caji tawaga,” docob cajen. <sup>27</sup> Odocob Pita uqa Koniliyas je madodon jo hamol lesin. Odimei dana geh bahic cegulein bibilegin meciaden. <sup>28</sup> Odocob Pita maaden, “Agedodoc eu dogina, Juda agena loo je odi madena, ‘Juda dana age Juda dana qee eundec agena jona cain lowain, age gami cain ihol mowain,’ ena. Euqa Anut ija dana oso hina qee eeldoco, gegehinaca ec cain madagaunnu eu ihacten. <sup>29</sup> Eunu age ija ehitecnu suladein eunu huga, ija jeca qee. Ija age sisiladegina, age eetanu ijanu suladecebile leigan?” aden.

<sup>30</sup> Odocob Koniliyas madon, “Deel cijed hedoa saen i edina 3 kilok wesu odi euna ija ijana jona inondudugin mahuc bahic dana lotoc fulacdocca tacimei hu ija olanina tawen. <sup>31</sup> Odimei maten, ‘Koniliyas! Anut hinana inondoc dah meia, hina dana sawen cesuladagana eu feia. <sup>32</sup> Dana oso, ijan Saimon, age Pita egina uqa Jopa ono bilia. Uqa dool ganac lotoc cinigwe mudec cabi oc dana, ijan Saimon, uqana jona macas cool ono bilia. Eunu dana leih uqa ene ehudi ahocnu suladecem beleiga,’ ten. <sup>33</sup> Odocob eunu ija hinanu mahuc bahic suladem. Hina hoganu ege hegaga mahoqona. Odocob qila ege cunug Anut amegna ceguluqa. Ege susumihi eeta magegannu Tibud hina maheia eu dah mecnu biluqa,” don.

#### *Pita uqa dana cajaca Koniliyasna jona bilein eu je maaden*

<sup>34</sup> Odocob Pita co suli umei maaden, “Anut uqa jic osolna dana cunug maha ina cofadena eu mele bahic ija qila dugina. <sup>35</sup> Juda danafo, qee Juda dana qeefo, in oso uqa Anut cumundonaca uqa kobil tutuc odonaca uqa Anut amegna me bilina. <sup>36</sup> Me je Anut uqa Isrel dana ageca suldon eu age dogina. Me je eu qila Jisas Kraisna dana cunug age Anutna malol euca bileyin ihoc en. Jisas uqa dana cunug agena Tibud. <sup>37</sup> Age dogina, Jon uqa wa joadecnu me je maaden. Odocob hibna odoce benben Galili hatu ono sanan mimei Isrel maha cunugna ihoc len. <sup>38</sup> Age dogina, Anut uqa Kis Gunca gagadic odocka Jisas Nasaretdec ilona basecdocob nen. Anut uqaca bilen. Eunu uqa cudun cunugna dana cunug age Seten cilehaden eu me mamadi kobil me oodi cobonnu eu age dogina. <sup>39</sup> Odocob uqa Juda agena hatunaca, Jerusalemca odoce cunug ooden ege fimeb qasali maadogona. Age uqa na babalecna tuitu qumeig caquesecebile caculimei cal men <sup>40</sup> qa Anut deel cijeddoccna tulidocob cal mecnadec ceseli cajimei amagana camasac men. <sup>41</sup> Uqa dana cunugnu qee camasac mel qa dana leih himec amagana camasac men. Ege Anut uqana odoce fecnu nesili cedigen, ege uqa cal mecnadec ceseli cajeceeb uqa gami wa gab sabca jom ege eundec himec amigena camasac men. <sup>42</sup> Odimei Jisas uqa ege dana cajaca me je qasali maadecnu magen. Jisas uqa dana cebac bileyinaca dana cal meinca gesiladigiannu Anut uqa wele nesili ehuden eunu dana cajaca sildiadecnu magen. <sup>43</sup> Je hahun madec dana cunug age Jisasnu madein, cunug age Jisasnu wawaga meleena Anut uqa Jisas ijanna agena silail casagiadigian ec madein,” aden.

#### *Juda siluldec qee age Kis Gun oin*

<sup>44</sup> Saen Pita uqa je mamaden ono bibili me je dah mein ageca cunug Kis Gun toni nen. <sup>45</sup> Odocob Juda dana wawaga meleec Pita gami Jopadec hoin age Anut Kis Gun bagolwe suldocob neceb Juda dana qee ageha oin eu fimeig tumatumaein. <sup>46</sup> Ge, age beilamaga filfilna Anut uqana gagadic odochnu binan susulegin dah madein. Odocob Pita jejeg suli u maden, <sup>47</sup> “Ege Kis Gun omwe dana i age odi Kis Gun oiga. In uqa wana wa joadecnu cahacadigian?” aden. <sup>48</sup> Odocob uqa Jisas Krais ijanna wa joadecnu je gatiti maaden. Odimeig age deel leih uqa gami biluqagannu ninidoin.

## 11

*Pita tamanec Jerusalem bilegina Juda sihul eundec qee ageha Kis Gun oin ec maaden*

<sup>1</sup> Aposel wawaga meleec cotogailca age cunug Judia hatu ono ilag bilegina age Juda dana cajaca qee ageha Anutna me je wele oin ec doin. <sup>2</sup> Saen Pita Jerusalem teceeb Juda dana wawaga meleec age leih Juda dana qee eundec dewenega cagu qocnu gale adena eu age Pita jajabi madoin, <sup>3</sup> “Hina eetanu Juda dana qee age naguc lecem deel leih nijimeig osoben sab jein?” doin.

<sup>4</sup> Euqa Pita mamadi gug qumei je cunug saaden, <sup>5</sup> “Ija Jopa taunna ono inondudugin majaudocna ihacten. Ija ceteh oso lotoc ben cinigwe sao jobondec sucun 4-pelana halu qagec hewen mahana nenen fem. Nimei ija cemeni tilien. <sup>6</sup> Ija gugca fecidumig dool filfil mahana coboginaca, man sononec filfilca, man fululec filfil saona coboginaca lotoc ben euna bibilegin fem. <sup>7</sup> Odocob jejeg oso maten, ‘Pita! Cajimeg oso qocom cal meceb jagal’ ten. <sup>8</sup> Euqa ija madom, ‘Tibud, qee bahic! Sab gegehinca qee eeldoc oso ija qee jelem,’ dom. <sup>9</sup> Odocob jejeg sao jobondec haun maten, ‘Ceteh oso Anut eeldon eu hina qee eeldoc ec cain madagaun,’ ten. <sup>10</sup> Eu odiodi cijeddocob ceteh cunug haun sao jobon ceseli ten. <sup>11</sup> Saen euna bahic dana cijed Sisariadec Koniliyas uqa ijaca suladen eu jo ija bilem eunalein. <sup>12</sup> Odocob Kis eu uqa age gami nuecnu geh cain cisdogau ec maten. Ija wawaga meleec cotiel 6-pela Jopadec i age gami osoben Sisaria taun ono belom. Odimeb Koniliyasna jona li bilom. <sup>13</sup> Odocob uqa ensel uqana jona li tawimei madonnu sagen. Ensel uqa madon, ‘Oso suldochom Jopa ono nuimei dana, ijan Saimon age Pita egina, ehudi ahoia. <sup>14</sup> Uqa age je maadigian euna hinaca, age cunug hinana jona bileginaca Anut cahahaadigian,’ don. <sup>15</sup> Odocob saen ija je sanan mi maaadigin Kis gun gug qocna egeca toni nenwe eu odi ageca toni nen. <sup>16</sup> Odocob ija Tibud maden, ‘Jon uqa wana wa joaden qa age Kis Gunna wa joadec oqagan,’ en eunu cisdom. <sup>17</sup> Weleca ege Jisas Krais Tibudnu wawige meleceeb Anut Kis Gun bagolivegen. Odocob qila Anut uqa bagol i ege igenwe dana i ageha aden. Eunu ija cel dana Anut cahacdocwe ihoc?’ aden.

<sup>18</sup> Saen age eu odi dah mimeig age Pitana je madein eu culein. Odimeig Anut binan susuleig madein, “Anut odadeceb Juda dana qee eundec ageha agena silailnu tului falidcumeig cebac biley catanec oqagan!” ein.

*Antiok ono tamanec haun calen*

<sup>19</sup> Juda dana wawaga meleecca age saen Stiwen qoinna age jajabi tootooadcebil buadein eundec leih age Finisia hatuca, Saipras nuica Antiok taun isec age cocobi li Juda dana eundec dih me je maaadi belein. <sup>20</sup> Euqa Juda dana wawaga meleecca leih Saipras Sairinicadec Antiok taunna belimeig Juda dana qee eundechha Jisas Tibudnu me je qasali maadein. <sup>21</sup> Tibud uqana gagadic odoc eu ageca bilen. Odocob dana am matica Jisasnu wawaga meleceeb Tibudca falidcoint.

<sup>22</sup> Odocob je eundec ti Jerusalem tamanecna caleceb dah mimeig age Banabas suldochobil Antiok ono non. <sup>23-24</sup> Banabas uqa dana me bahic, uqa Kis Gun am bec waug meleec ben bahic. Saen uqa ono li calimei dana cajaca age Anut amegna me bibilegin fimei uqa waug celeboeceb hulunuga cecehi maaden, “Age wawaga culunuga cunugca Tibudnu meleelin eunu dahiniga hewegin,” aden. Eunu dana caja geh bahic Tibudnu wawaga meleen.

<sup>25</sup> Odimei Banabas Sol waligiannu Tasas ono nuen. <sup>26</sup> Odimei uqa ono li guludcumei ehudi Antiok ehi hon. Cabi gel osol cunugca tamanec onodecca gabandumeig am ben Jisas Tibudnu me je iwaladesin. Eu Antiok ono malogom age casac Kristen adein.

<sup>27</sup> Saen euna odi je hahun madec dana leih Jerusalemdec Antiok ono noin. <sup>28</sup> Agenadec oso eu ijan Agabus caji tawimei Kis odcnna nag odi bahic maha cunugna sabnu cahel qugian ec maaden. Odocob saen Klodias uqa Rom agena king, Sisa, bibilen sabnu cahel qon. <sup>29</sup> Odocob malogom age je oso cagoin. Age osolosol agena meen qaig ganic besecwe ihoc cisdumeig age wawaga meleec cotogail Judia hatu ono bileyina cesuladecnu meen qaig leih sulduadoqagan ein. <sup>30</sup> Odi odimeig age meen qaig Banabas Solca alecebil ehi nui Judia hatu ono tamanec matu adesin.

## 12

*Herod Jems qocob cal men odocob Pita gihadoc jona muden*

<sup>1</sup> Saen euna odi King Herod\* wawaga meleec tamanec dana leih hewi aqeeb qee moqagannu sanan men. <sup>2</sup> Uqa uqana han dana maadeceb age Jems, uqa Jon waliag, han siginna qocobil cal men. <sup>3</sup> Saen Herod uqa uqana odoc Juda dana gale aaden fimei uqa

\* <sup>12:1:</sup> King Herod i uqa Herod eu Maria Jisas basecon saenna king bilen eu asag. Eu King Agripa memeg.

uqana han dana maadeceb age Pita gihacdoc jona mudoqagannu hewein. Uqa Juda dana age bred jisca qee jec saenna odi odon.<sup>4</sup> Odocob age Pita hewimeig gihacdoc jona mudein. Odimeig age Pita han dana am 4-pela 4-pela ebenehana mudecebil cofdoin. Herod uqa Pasowa ja qoc saen hedocob dana gelgel amagana Pita gesildumig qocomin cal migian ec cisdon.<sup>†</sup> <sup>5</sup> Eunu age Pita gihacdoc jona cofdodogin bilen. Euqa dana cajaca tamanec age gagadic bahic Pitana Anut inondoin.

#### *Ensel Pita gihacdoc jonadec ehuden*

<sup>6</sup> Odocob witic euna han dana cofdoc lecis ale tatawesi Pita gemo mudecebil us nijen, cojageceb Herod uqana han dana suladeceb age ehudimeig gesilec cudunna mudecebil qoqagannu. Uqa sen lecinsa qagein. Odocob gihacdoc jo cebech han dana cofdoc ageha cofdu tawein.<sup>7</sup> Nag odi bahic Tibudna ensel ono tawecel fulacdoc ono hamol cujawen. Odocob ensel Pita qeih tudocob cajeceb madon, "Mahuc cajaga!" don. Odocob sen Pita ebennadec mahuc bahic filicidhu tonen.<sup>8</sup> Odocob ensel madon, "Hinana lotoc haluca, jaim tacec haluca qagaga," don. Odocob Pita lotoc halu jaih haluca qageceb ensel haun madon, "Hinana duan lotoc tacimeg tootaga," don.<sup>9</sup> Odocob Pita ensel toodocob gihacdoc hamolnadec cali hosin. Euqa ensel hu ehuden eu uqa bebeligina ec cisdon. Eu mele uqa qee dol.<sup>10</sup> Odocob gihacdoc jo cofadec dana taweginha aqunec tawein cudun eu wooldosin. Odimesi tesi oso eu toodoc ha wooldosin. Odocob qila eu cit qoc cebec ben ainha mudein taun benna nuen eu gulucdosin. Odocob cebec ben eu uqadodoc hudeceb cali lesin. Limesi ale jic nag eu toodou numesi ensel Pita culden.

<sup>11</sup> Odocob Pita qila ensel culdi qisacdocob cisdoc fogo don. Odimei maden, "Eu mele bahic qila ija dugina! Tibud uqana ensel suldocob nimei Herod ebennadec Juda dana ija adi odituqagannu, cisdoginanadecca cacawitia," en.

<sup>12</sup> Odocob uqa gihacdoc jonadec cali honnu cisidu uqa Maria, Jon uqa ijan oso eu Mak anagna jona nuen. Uqana jo euna dana cajaca mati bahic inondudu cegulein bibilegin len.<sup>13</sup> Odocob Pita jic cebec maha gemo isec gohugohudon. Odocob cabi mel aid, ijan Roda, uqa in gohugohudona figiannu len.<sup>14</sup> Odimei mel aid Pita jejeg dah mimei waug celeboceb Pitana jic cebec qee huditoc guguli ceseli limei Pita maha gemo taweia ec maaden.<sup>15</sup> Euqa age madoin, "Hina gad," doin. Euqa uqa eu mele bahic mele ec cesusaadi maaden. Odocob age madoin, "Eu uqa dolog," doin.<sup>‡</sup>

<sup>16</sup> Odogin Pita tawimei jic cebec haun gohugohudon. Odocob age jic cebec hudi age uqa fimeig filicitein.<sup>17</sup> Euqa uqa ebenna cahacaden. Odimei uqa Tibud adi cesuldu gihacdoc jonadec ehudi cali hoianu sildiadon. Odimei uqa maaden, "Je i Jems wawaga meleec cotugulca maadeiga," aden.<sup>§</sup> Odimei uqa culadi cudun osona nuen.

<sup>18</sup> Cojageceb gihacdoc jo cofdoc dana ben bahic dadanein. Age mamadiein, "Pita ana isec nuian?" ein.<sup>19</sup> Odocob Herod Pita waloqagannu je gatiti maaden qa age fecwe qee. Eunu uqa gihacdoc jo cofdoc dana sisiladeceb qee fecebilfli aqecebil cal moqagannu je gatiti maaden.

Odimei uqa Judiadec Sisaria taun numei ono nag odi bilen.

#### *Herod cal men*

<sup>20</sup> Herod uqa dana cajaca Taia Saidondeccanu gemag gagadic bahic ben. Eunu age gabandumeig amnana Herod foqaga lein. Hahawan age Blastas cesusdocobil agena isec hon. Uqa kingna jo bennu ilo. Odimeig agena taun ben cunugca King Herodna hatunadec sab oloignu age Herodca limeig malol bielecnu sisildoin.

<sup>21</sup> Odocob gesilec deel osona Herod uqana kingnu lotoc tacimei uqana bielec cabal balabalacana bilimei dana je maaden.<sup>22</sup> Odocob age utai madein, "Eu dana qee madel. Eu anut oso madeial?" ein.<sup>23</sup> Euqa Herod uqa Anut qee binan sulel. Eunu mahuc bahic Tibudna ensel Herod qocob tonen. Odimei uqa gumac qu jejegin cal men.

<sup>24</sup> Euqa Anutna me je ben dumeti hatuhatu cunug nuen.

<sup>25</sup> Odocob Banabas Solca alena cabi Jerusalem onodec odoc eu cunug ihoc leceb ale Jerusalemdec Jon uqa ijan oso eu Mak ehudecebil Antiok ono ceseli belesin.

## 13

### *Age Banabas Solca tamanec gug cehecnu cabinu nesili ehalimeig sulalein*

<sup>† 12:4:</sup> Age je Mak 14.1na nijia eu feiga. <sup>† 12:15:</sup> Saen euna Juda mati age odi wawaga meleen. Dana cunug age osolosol ensel oso uqana bilina, eu dana cofdona. Odimei saen osona eu dana ola fecnu cinigwe camasac calena.

<sup>§ 12:17:</sup> Jems i uqa Jisas waliag, uqa Jerusalem tamanec cofadec dana oso. (Age Gal 1.19 feiga.) Jems uqa Jon waliag age qocobil cal men. (Age but 2 feiga.)

<sup>1</sup> Antiok tamanecna je hahun madec dana iwaladec dana leihca bielein. Eu age Banabas, Simion age Naija<sup>\*</sup> dogina, Lusias uqa Sairinidec, Manejen uqa Herod gabman dana uqana begabeg meh, Solca. <sup>2</sup> Odocob saen age Tibud binan susuli cud bibilegin Kis Gun maaden, "Banabas Solca cabi mugumula mem eu ija aligennu qagualeiga," aden.

<sup>3</sup> Odocob age cud bibilegin inondoin. Odimeig ebenega ilomolana mimeig sulalecebil belesin.

*Ale Saipras nui ono me je maadesin*

<sup>4</sup> Odocob Kis Gun Banabas Solca sulaleceb Selusia taun ono numesi onodec wag umesi Saipras nuina macas gemo ono lesin. <sup>5</sup> Saen age Saipras taun Salamis ono calimeig Juda dana agena cuha jona Anutna me je maadesin. Ale Jon gami cabinu cesulaligiannu osoben belein.

<sup>6</sup> Odocob age Saipras nui cunug cobimeig Pafos taunna calein. Ono age ceeh dana oso gulucdoin. Eu ijan Ba-Jisas. Uqa Juda dana agena je hahun madec dana uhulec. <sup>7</sup> Uqa Saipras nui agena ilo Segias Polasca gami bilesin. Segias Polas uqa doc dana. Odocob uqa Banabas Solca ale uqaca hocnu je oso suldualen. Uqa Anutna me je dah mecnu gale don.

<sup>8</sup> Euqa ceeh dana eu, uqa Grik jena ijan Elimas, uqa Banabas Solca cahacaligia odon. Uqa Saipras ilo dana waug meleecdainnu fanindugia odon. <sup>9</sup> Odonqa Sol, uqa ijan oso Pol,<sup>†</sup> Kis Gun am bec uqa ceeh dana eu gugca mecidon. <sup>10</sup> Odimei madon, "Hina Seten melah! Hina ititom coboc cunug agena cad. Hina wawin uhulec je quaudocca cacawac. Hina Tibudna tutuc coboc siho qocnu gaidgaid temdogona! <sup>11</sup> Faga, Tibud eben qila hinaca nigan. Odocob hina amen galuc migian. Odocob hina cahineg camajac nag qee fagaun," don.

Odocob mahuc bahic huduhut gagatucca cinigwe ni ameg jahuldodon Elimas tebandon. Odocob uqa oso jic gimdugiannu megen. <sup>12</sup> Odocob dana ilo uqa Tibudna kobolkobol iwaladecnu fimei filiciten. Eunu uqa feceb waug meleen.

*Ale Antiock ono Pisidia hatu nagna cabi osin*

<sup>13</sup> Odocob Pol uqa dana gami beleinca wagna Pafosdec Pega taunna belein, eu Pamfilia hatu nag ono. Euqa Jon ono culadi Jerusalem ceseli nuen. <sup>14</sup> Odocob age cocobi Pegadec belimeig Antiok Pisidia taun ono hu calein. Odocob Juda agena cuha deelna age Juda agena cuha jona li bielein. <sup>15</sup> Odocob age Mosesna loo je gunnadec sanijimeig je hahun madec dana agena jaqec je ha sanijimeig cuha jona ilo dana agena je oso sulduadein. Eu odi madein, "Cotigeil, age dana cajacanu cesuladec je oscocafi maadeiga," ein. <sup>16</sup> Odocob Pol caji tawimei eben suli u maaden.

"Isrel dana age, Juda dana qee age Anut binan sulegina, ageha doiga! <sup>17</sup> Isrel dana agena Anut ege jajanigeil nesili cedadimei uqana odocna Isrel dana Isip hatuna bibileig sihul ben bahic fulusdon. Odocob Anut uqana gagadic odocna Isipdec ceseli cedaden. <sup>18</sup> Odimei cabi gel 40 odi wadauna camuhulaadi coboloj.<sup>‡</sup> <sup>19</sup> Odocob uqa sihul benben 7-pela Kenan hatuna odadeceb fadalecebil agena hatu eu uqa Isrel dana mugumuga maden. <sup>20</sup> Cabi gel 450 lelen age ceteteh eu cunug odooin," aden.

"Hibna uqa gesiladec dana aadi li je hahun madec dana Samuelna saen calen. <sup>21</sup> Odocob Isrel dana age kingnu sisildoin. Eunu uqa Sol agena king muden. Uqa Kis melah, Benjaminna sihulnadec. Odocob uqa Isrel agena king cabi gel 40 bilen. <sup>22</sup> Odocob Anut uqa Sol qee mudimei Dewid uqa Isrel agena king muden. Anut Dewidnu je oso edi maden, 'Dewid Jesi melah dana eundecnu ija gale tena. Dana i ija je madocominfi odi toodu odigian,' en. <sup>23</sup> Odocob wele Anut uqa je hahun oso Jisasnu maden. Anut odudeceb Jisas uqa Dewidna sihulnadec hibna caligian. Anut uqa Isrel dana cahahaadigiannu Jisas i Isrel aden. <sup>24</sup> Jisas uqa cabi qee sanan mec ninijen Jon uqa Isrel dana agena silailnu tului falicdumeig wa joc oqagannu me je maaden. <sup>25</sup> Odocob saen Jon uqana cabi oc qee migia oodon uqa dana maaden, 'Age ija in ec cisdogina? Dana age sumudegina eu ija qee. Euqa dana oso uqa ija tootec hib hona, uqa ija wooltec, uqana jaih tacec eu ija hulitocnu me bahic ihoc qee,' aden.

<sup>26</sup> "O cotiel, Ebrahamna sihul, Juda dana eundec qee age Anut binan sulegina eu, me je i Anut dana cahahaadecnu eu Anut egeca suldon! <sup>27</sup> Anut cahahaadecnu je eu dana Jerusalem bilegina agenu dana Jerusalem bilegina agena iloca age uqa agena cahahaadec eu qee felein. Age je hahun madec dana agena jaqec je cuha deelna gaid sanijegina euha

\* **13:1:** Ijan Naija uqana gug eu "Cudu Dana." Eunu dana leih age Simion eu Afrikadec ec cisdogina. <sup>†</sup> **13:9:** Ijan Sol eu Hibru jenadec, odocob ijan Pol eu Grik jenadec. Dana leih age odi cisdogina. Sol uqa Grik je madec eundec me je qasali maadecnu cabi sanan men. Eunu uqa saen euna uqa ijan Grik jena ibuldon. <sup>‡</sup> **13:18:** Dana leih age but i odi madena, "Odimei cabi gel 40 odi wadauna cofaadi coboloj," ena ec cisdogina.

wawaga qee fogo dona. Euqa age jaqec je eu toodumeig Jisas um qudein.<sup>28</sup> Uqa dewegnu balijimeig qocobil cal mecnu je qee felein qa age Pailat qocob cal migiannu sisildoin.<sup>29</sup> Odocob age Anutna jaqec je uqanu madena ihoc ligiannu odi toodu hedocobil age na babalecnadec umeig ehi nui heelna mudein.<sup>30</sup> Euqa Anut cal mecnadec haun tulidocob cajen.<sup>31</sup> Odocob deel mati bahic dana uqa gami Galilidec Jerusalem tein age amagana camasac mimien. Age uqa feinnu qila Isrel dana cajaca qasali maadegina.<sup>32</sup> Eunu ege ene me je i maadecnu hoqa. Je hahun Anut wele ege jajanigeil maaden eu<sup>33</sup> qila egena saenna Anut odocob je hahun eu egenu camasac men. Anut Jisas cal mecnadec haun tulidocob cajen. Eu odi Buk Song dac lecisdocna jaqec je taweiawе madena:

'Hina ija melami.

Qila ija hina memen caliga,' ena.

(Buk Song 2.7)

<sup>34</sup> Anut Jisas cal mecnadec tulidocob cajen eu deweg qee huluoiaunnu uqa je odi maden: 'Eeldoc je gagadic odochca ija wele Dewid je hahun madom eu ihigen,' en. (Aisaia 55.3)

<sup>35</sup> Eunu Anut uqa je osoha Buk Song jaqec je osona maden:

'Hina hinana dana gun culdochum deweg qee huluoiaun,' en.

(Buk Song 16.10)

<sup>36</sup> Ge, Dewid uqa bilen saenna Anut gale doc eu toodu odon. Odime cal meceb uqa jajanagail qehemegana isec heel cisein. Odocob cal mecnia deweg huluun.<sup>37</sup> Euqa dana eu Anut cal mecnadec tulidocob cajen eu deweg qee huluun. <sup>38</sup> Cotigeil, dah meiga. Ija me je i maadigina. Dana ina himec Anut uqa agena silail cagasiadena.<sup>39</sup> Odocob age Mosesna loo je toodoginana dih Anut uqa agena silail cagasiadecwe qee. Euqa age dana inu wawaga meleceebfi uqa ihoc agena silail cagasiadigian.<sup>40</sup> Eunu je hahun madec dana madein eu ageca calecdainnu batut feiga. Age odi madein:

<sup>41</sup> 'Age Anut madena cewudegina eu feiga!

Agena saenna odoc oso ija odigina.

Eunu wawaga dadaneceb cal meiga!

Dana oso odoc inu sildiaecebfu age wawaga qee meleeliaun!' ein," aden. (Habakuk 1.5)

<sup>42</sup> Odocob Pol Banabasca cuha jonadec cajesin nuuwasa oodosin dana age cuha deel osona humesi me je haun madeceb il doqagannu cesusaali maalein.<sup>43</sup> Odocob dana cegulec eunadec wele budocobil Juda danaca Juda dana qee eundec age Juda agena kobil toodoginaca mati bahic age Pol Banabasca tooalein. Pol Banabasca waldumesi dahiniga hewec je maadimesi Anutna eeladec uqa uum aden euna bielecnu cesusaadi maadesin.

<sup>44</sup> Odocob cuha deel osona dana cajaca cunug bahic odi age taun euna bielein Anutna je dah moqagannu cegulein.<sup>45</sup> Euqa saen Juda dana eu age dana am ben cegulein eu meciadimeig age Polnu heel mimeig je eu mele qee ec mamadeig Polnu je me qee mamadiein.<sup>46</sup> Odocob Pol Banabasca ale je saluqi u maadesin, "Ele casac Anutna me je maadouhqa age je eu hibemdogina. Odocob agedodoc madegina ege euna cebac biley catanec eu ocwe qee egina. Eunu ele age cculadi Juda dana qee eundecca lowona.<sup>47</sup> Ge, eu odiwe Tibud uqa ege je gatiti magen:

'Ija Juda dana qee eundecnu hina fulacdocwe mihgina.

Hina dana mahamahda cunug bileygina eundec

Anut cahahaadijannu cesuladegan,' gen," adesin.

(Aisaia 49.6)

<sup>48</sup> Saen euna Juda dana qee eundec age je eu dah mimeig age celeboeeig Tibudna je binan solein. Odocob leih Anut cebac biley catanecnu nesiladen eundec age wawaga meleec dana ibuldoin.

<sup>49</sup> Odocob Tibudna me je hatu cunug ihoc len.<sup>50</sup> Euqa Juda dana age caja age ijanagaca, eundec age Anut binan suloloig euca, dana ben age taun ben euna bileyinaca jajahil adecebilem age Pol Banabasca me qee odalimeig age hatu ben uqana gadacna ititacalein.

<sup>51</sup> Odocob kobil me qee odooin eundec ihacadecnu Pol Banabasca ale jaimalana comis foidocobil Aikoniam taun ono belesin.<sup>52</sup> Odocob malogom Antiok ono bileyin eundec Kis Gun wawaganu ihoc leceb age celeboein.

## 14

### Ale Aikoniam ono cabi osin

<sup>1</sup> Odocob Pol Banabasca ale Antiok Pisidia ono cabi osin odiwe Aikoniam taunna cabi osin. Ale Juda dana agena cuha jona ono limesi me je maadecebilem Juda dana Juda dana qee eundecca mati bahic age Jisasnu wawaga meleel. <sup>2</sup> Euqa Juda dana leih wawaga qee meleel eundec age Juda dana qee eundec wawaga ihulahaladecbil me je madesin eunu me qee cisdoim.<sup>3</sup> Eunu Pol Banabasca ale Aikoniam ono saen cecelacca bilesin. Bibilesi ale Tibudnu saluqi u mamadiesin. Tibud uqa ale madi, Tibud eelgena esin je eu mele ihacadimei uqana gagadic odoc aleceb kobolkobol gagaca oodiesin.<sup>4</sup> Euqa dana cajaca

age taun benna bilegina age qatani lecisdoin, leih Juda danaca tawein, leih aposelca tawein.

<sup>5</sup> Odocobil Juda danaca, Juda dana qee eundecca agena ilo gami aposel ilag oodaleig meenна aqaloqagannu cisdoin. <sup>6</sup> Saen aposel age eu odoqagan ec dumesi ale Listra Debica ono busali belesin. Listra Debica ale taun ben lecis Likonia hatu nagna nijesin. Taun ben lecis nijesia euna belimesi hatu eu gadac taldu jobonca, cudun nagnagca cunug cobosin. <sup>7</sup> Ono ale me je qasali maadi cobosin.

#### *Ale Listra ono cabi osin*

<sup>8</sup> Odocob dana oso cobocnu ihoc qee Listra taun ono bilen. Uqa jaih laleg mealen, uqa anag basennadec qee coboloi. <sup>9</sup> Odimei uqa ono Pol je mamaden dah mimi bilen. Pol dana eu gugca mecidumei uqa waug meleen eunu uqa me mudencu ihoc Pol eu fimei <sup>10</sup> uqa jejeg mecania madon, “Caji tawimeg jaim tutuc muduga!” don. Odocob dana eu bitaci caji jic cobon. <sup>11</sup> Odocob dana am ben cegulen eu fimeig age agena Likonia jena jejenega utai madein, “I ale anut dana ibuldumesi egeca nesia!” ein. <sup>12</sup> Odimeig Banabas ijan Sus tibud qoin. Odocob Pol uqa je madec dana eunu uqa ijan Hemis tibud qoin.\* <sup>13</sup> Odocob Sus tibudna cuha jo eu taun ben gesacna tawen. Odocob Susna nawel tawec ihanec dana bulmakau manahal bobogca cedi jic cebec benna ahon. Uqa dana am ben cegulein eu ageca aposel ihanaloqagannu odoin.

<sup>14</sup> Odoqagaqa Banabas Polca eu odi odoqagan ec dumesi ale alena lotoc baladumesi utaii guguli dana am ben cegulein gemogemo lelesi maadesin, <sup>15</sup> “O dana, age eetanu edi odogina? Eleha dana mahadanec, ele age cinigwe! Ele ceteh caunca qee i culimeig Anut cebac biley catanec uqaca falicdu loqagannu ene me je maadewa hoh. Anut eu saoca mahaca macasca ceteteh cunug euna nijia uqa ifanen. <sup>16</sup> Saen wele uqa culadeceb dana mahamaha bilegina agedodoc agena cisdock toodoo coboin. <sup>17</sup> Odonqa uqa gaid uquadocnu ihacadoloi. Uqa ceteh me dana cunug age agehaadoloi. Uqa wa sao ohisdec suldocob neceb sab saenna wal moloi. Uqa age sab jecnu igimei wawaga celeboecnu ha igoloi,” adesin. <sup>18</sup> Je eu odi maadesin euna cahacadecwe mecebil ihanalecnu odoin eu culein qa eu cabi bahic.

#### *Age Pol meen heli qoin*

<sup>19</sup> Oodosin Juda dana leih age Antiockdec, Aikoniamdecca Listra ono hoin. Humeig age dana cajaca am ben eu cesusadecebil cunug ageca li gabandumeig Pol meenna qoqoig ceceli ehi li taun benna gel ono isec euna qisadcu cal meia ec cisdumeig culdein. <sup>20</sup> Euqa saen malogom age uqaca hu taldu tawecebil uqa cajimei taun ben euna ceseli len. Odocob deel oso uqa Banabasca Debi taun ono belesin.

<sup>21</sup> Odocob Pol Banabasca Debi ono me je qasali maadesin. Odimesi dana mati bahic wawaga meleecab age malogom cabi oin. Odocob Debidec Listra isec ceseli belesi Aikoniam calimesi eunadec Aikoniamdec belesi Antiock Pisidia ono calesin. <sup>22</sup> Ale bebelesi malogom hulunuga cehi aadesi wawaga meleec eu duuec tawigianu dahiniga hewimesi ale ulicaadi maadesin, “Ege Anutna me cul ocnu culumen mati bahic gisi cacagu gemo euna odi leqan,” adesin. <sup>23</sup> Odocobil ale tamanec cunugna inondudu cud bileyen aquniadec dana matu ale nesiladimesi Tibud eunu age wawaga meleen uqa ebenna madesin.

#### *Ale Antiock Pisidia ono ceseli belesin*

<sup>24</sup> Odocob ale Pisidia hatu nagna cunug cobi hedumesi hibna ale Pamfilia hatu nagna calesin. <sup>25</sup> Odimesi ale me je Pega ono dana cunug maadimesi onodec Atalia taunna nosin. <sup>26</sup> Ale haun wag umesi onodec Antiock ceseli belesin. Ono ale wele cabi u hedosin eunu Anutna eelalecuum alen cofaaleb cobowasannu Anut ebenna malein.

<sup>27</sup> Odimesi ale Antiock ceseli humesi ale tamanec cunugca gabananadimesi Anut cabi cunug ale gami cabi oinnu saadesin. Juda dana qee Anut jic hudeceb uqanu wawaga meleennu ha saadesin. <sup>28</sup> Odocob ale ono malogom gami saen geh bahic bileyen.

## 15

#### *Tamanec uqana cegulec ben Jerusalem ono calen*

<sup>1</sup> Odocob dana leih Judiadec Antiock limeig wawaga meleec cotogail iwalaadeig maadein, “Age Mosesna loo jena toodoo odi dewenega cagu qee qufeig Anut age cahaa-decnu ihoc qee,” adein. <sup>2</sup> Eu odi odocobil Banabas Polca gami fee dadanein. Eunu

\* **14:12:** Grik dana cajaca age anut mati bahic bileyen wawaga meleen. Sus uqa agena anut agena king bilen, odocob Hemis uqa anut agena sos dana cinigwe.

Banabas Polca dana leih Antiokdecca age Jerusalem ono belimeig je fee dadanec ein eundec aposel tamanec agena matuca maadoqagannu madein.

<sup>3</sup> Odocob tamanec suladeceb jic cocobi belein. Odocob saen age Finisia Sameriac a ono li calimeig age Juda dana qee Anutnu wawaga meleennu saadein. Odocob wawaga meleec cotogail cunug je eu dah mimeig age ceelein. <sup>4</sup> Saen age Jerusalem li caleceb il tamanecca, aposelca, tamanec agena matumatuca alalagadeceb il age cabi cunug Anut uqa age gami cabi oinnu saadein. <sup>5</sup> Euqa dana wawaga meleec age Farisi agena amnadec cajimeig madein, "Age dewenega cagu qocnu Mosesna loo je toodoo odochnu age odo bahic odoqagan," ein.\*

<sup>6</sup> Odocob aposel dana matuca age je eu tutuc mudoqagannu cegulein. <sup>7</sup> Odimeig saen cecelac bahic togodumeig Pita cajimei maaden, "O cotiel, ija Juda dana qee me je maadechnu weleca Anut age gemonadec ija nesili ehitin. Eunu Juda dana qee age dah meceb il wawaga meleigiannu eu dogina. <sup>8</sup> Odocob Anut uqa dana wawaga meleecnu dona eu uqa Juda dana qee eundec ageha uqanu wawaga meleecnu ihoc eu ihacadimei uqa Kis Gun egeca suldocob nenwe eu odi uqa ageca ha suldocob nen. <sup>9</sup> Odocob uqa egeca ageca eu gug fil qee odel. Euqa age uqanu wawaga meleen. Odimeig age wawaga meleecna age wawaga soidon. <sup>10</sup> Eunu qila age eetanu Anut temdogina? Age culumen i ege jajanigeil egeca gahidocnu ihoc qee eu malogom adecwe qee. <sup>11</sup> Anut uqa Jisas Tibud uqana uum igechna cahahaadigianwe uqa odi egeha Jisas Tibud uqana uum igechna cahahagian eunu wawige meleena," aden.

<sup>12</sup> Odocob dana am euna cunug tiliein. Age Banabas Polca ale Anut Juda dana qee gemona ebenelana kobolkobol gagaca odon eunu saadesinu dah mein. <sup>13</sup> Ale je madi hedocbil Jems co suli u maaden, "O cotiel, ija dah miteiga! <sup>14</sup> Saimon uqa wele sildigia, Anut hawahuan Juda dana qee eundec age cahahaadecnu limei gemonadec leih uqanagul bilituqagannu cedaden. <sup>15</sup> Odocob je hahun madec dana agena jaqec je ica caca bahic madena odi:

<sup>16-17</sup> "Tibud madena, "I hedocob hibna dana cajaca saen euna blegenaca Juda dana qee age ijanagul biliteginaca age cunug Tibud walutuqagannu ija ceselimig Dewidna jo qahen eu haun sulecemin cajigian.

Jo teful qahaden eundec ija cisindugen," ena.

(Amos 9.11-12)

<sup>18</sup> Tibud eu odi madena,

uqa wele bahic je i edi madeceb hu li madeceb doin,' ena," aden.

<sup>19</sup> "Eunu ijana cisdoc eu odi. Juda dana qee age Anutca falicdogina eu ege culumen i qee adoquaun. <sup>20-21</sup> Euqa jajanagail saennadec dana age Mosesna loo je taun ben cunugna Juda agena cuha jona cuha deel cunugna ha sanijimeig me je maadeceb il doqona. Eunu ege jaqec je oso sulduadoum. Je odi maadoum, 'Age kadan tibud ihanecnadec sab eundec Cain jowain. Sab eu gegehinka. Dana uqa caja qee oc cajaca Cain nijuwasin. [Dool benega coldocobil cal men eu Cain jowain.] Ceteh golacha Cain jowain,' adoum," †

*Age Kristen silih fil agena je oso sulduadein*

<sup>22</sup> Odocob aposelca, tamanec matumatuca, tamanec cunugca age je madi cagoin. Odocob age dana leih gemonadec Judas Basabas dogina uqaca Sailasca nesili cedalimeig ale Pol Banabasca gami Antiock suladecbil beloqagan ein. Judas Sailasca ale wawaga meleec cotolail aquniadec dana. <sup>23</sup> Jaqec je i edi sulduadein:

"Ege, aposelca tamanec matuca, age Juda dana qee, age ege wawige meleec cotigil Antiock, Siria hatuca, Silisia hatu nagca blegenca, egena feele adec je sulduquna," adein.

<sup>24</sup> "Ege dana leih egena amnadec belimeig age je ihulahal maadeceb il wawaga me qee men odi dah mom. Euqa ege age odi odochnu qee maadolom. <sup>25</sup> Eunu ege ceguli togodumeb dana sos lecis nesili cedalimeb ageca suladecnu ege cunug cois oqan. Ale egena danah lecis Banabas Polca gami loqagan. <sup>26</sup> Dana i ale Jisas Krais Tibud ijannu cabi oosin dana age aqaleceb il mowasa odooin. <sup>27</sup> Eunu ege Judas Sailasca ale conolagulna je jaqoqa i edi maadowasan sulaloqona. <sup>28</sup> Kis Gun egeca culumen haunhaun oso qee adoquaun qa gadac i himec wooldocnu ihoc qee adoqona eunu wawige osol moqan. <sup>29</sup> Age kadan tibud ihanecnadec sab Cain jowain. Ceteh golacca eu Cain jowain. Dool benega coldocobil cal men eu Cain jowain. Dana uqa caja qee oc cajaca Cain nijuwasin. Age ceteteh i ilag qee odifeig eu age me odoqagan. Odio," adein.

\* <sup>15:5</sup>: Age je Aposel 11.2na nijia eu feiga. † <sup>15:20-21</sup>: Juda age Isrel hatuna himec qee bilelein. Weleca age budu beladimeig hatu cunug ono nijein euna ilag bilein. Odocob agena cuha jo eu taun cunugna bilein euna tawein. Age Aposel 2.5-11 feiga. Eunu dana cajaca age taun euna bilein age Mosesna loo jenu je mati dah mi hedoin.

<sup>30</sup> Odimeig age dana sos suladecebile Antiok belein. Ono age dana wawaga meleecca cunug gabanadimeig jaqc je eu adein. <sup>31</sup> Odocob age jaqc je eu sanijimeig age hulunuga cehec je eunu celeboein. <sup>32</sup> Judas Sailasca, ale je hahun madec dana, saen cecelac bahic wawaga meleec cotogail je mati bahic hulunuga cehi maadecebile agena wawaga meleec gagadic men. <sup>33-34</sup> Odimeig hibna ono saen leih age gami bilimeig Antiok tamanec dana age dana sos sulalein age malolca ceseli sulalecebile belesin. [Euqa Sailas uqana cisdock ibuldumei Antiok ono nijigiannu maden.]

<sup>35</sup> Odocob Banabas Polca Antiok ono nag odi bilesin. Ale dana matica osoben tamanec ono Tibudna me je iwaladein.

#### *Pol Banabasca fee dadanimesi filigandosin*

<sup>36</sup> Odocob deel leih hedocob Pol Banabas madon, "Hoga, cotileil taun ben cunugna bilegina ele Tibudna me je maadoh eu haun ceseli belimeu age adi cabi ogina eu fewan," don. <sup>37</sup> Odocob Banabas uqa Jon age Mak ein age gami beloqagannu cisdon. <sup>38</sup> Euqa wele uqa age gami bilimeig beli me je iwaladec cabi qee olo, odimei uqa Pamfilia hatu nagna culali Jerusalem ono ceseli nuen. Eunu Pol uqa ehudi nuecnu culen. <sup>39</sup> Odocob aledodoc fee dadan bahic imesi filfil filigandu belesin. Banabas Mak ehudeceb wagna Saipras nuina belesin. <sup>40</sup> Euqa Pol Sailas nesili ehuden. Bebelesin wawaga meleec cotelail age Tibudna waug qoc cofaaleb cobowasannu Anut ebenna mein. <sup>41</sup> Odimei uqa Siriaca Silsiaca hatu eu gemogemo nuen. Nunuei tamanec cesuladi maadeceb agena wawaga meleec gagadic men.

## 16

#### *Timoti Polca belesin*

<sup>1</sup> Odocob Pol cocobi nui Debi Listraca ono cobon. Odocob malogom oso, ijan Timoti, ono biloloi. Uqa anag ha waug meleecca Judadec qa memeg Grikdec. <sup>2</sup> Wawaga meleec cotogail age Listra Aikoniamca bilein age gaid Timotinu je me dih saoloig. <sup>3</sup> Odocob Pol Timoti ehudeceb osoben belowasannu cisdon. Euqa Juda dana cunug ono bilein eu age Timoti memeg Grikdec eu age doloig. Eunu Pol uqa Timoti deweg cagu quten. <sup>4</sup> Odocob ale taun benbenna bebeli bilesi ale cagoc je aposelca, tamanec matumatuca Jerusalem ono bilein age je jaqimeig Juda dana qee age Antiock, Siria hatuca, Galesia hatuca ono bilegina sulduadein eu siwiaadi age toodu odocnu maadi belesin. <sup>5</sup> Eunu tamanec ono eu agena wawaga meleec gagadic mimei deel abesabes cunug dana sanijadec fulusdoloi.

#### *Pol dana oso Masedoniadec ola codocna fen*

<sup>6</sup> Odocob Kis Gun Esia hatuna me je maadecnu cahacaden. Eunu Pol uqa age gami coboin eu age Frisia Galesiaca hatuna isec belein. <sup>7</sup> Odocob saen age Maisia hatu gadacna li calimeig age Bitinia hatuna lecnu cisdon qa Jisasna Kis qee culadel. <sup>8</sup> Eunu age tutuc Maisia hatu gemo belimeig li Troas taunna calein. <sup>9</sup> Odocob witic euna Pol ola codocna bebelimei Masedoniadec dana oso cesusdudu tatawen fen, "Masedonia ene humeg cesulgaga!" don. <sup>10</sup> Pol ola codocna bebelimei eu odi feceb ege Anut dana Masedonia hatu ono bilegina eu me je maadecnu mageia eu dom. Eunu Masedonia belecnu sciadiom.\*

#### *Lidia Kristen men*

<sup>11</sup> Odocob Troas ono wag tobimeb tutuc qeti li Samotres nui too quidi numeb deel osona waldu li Niapolis taunna calom. <sup>12</sup> Onodec Masedonia hatuna taun ben Filipai taun ben ono belom. Filipai eu Rom cofdoloi. Odocob ege deel leih taun ben ono bilom. <sup>13</sup> Odocob cuha deelna ege taun ben eu uqana fele cehec cuculdi wa gesacna lom ege Juda dana agena inondoc cudun on ec cisdom. Odimeb ege ono limeb caja ono cegulein bibilegin eu ege ono bilimeb je maadom. <sup>14</sup> Caja oso uqa cegulec euna bilen uqa egena je dah men eu ijan Lidia. Uqa Taiataira taun bendec, lotoc golca idadu suldoloi. Uqa Anut binan suloloi. Odocob Tibud uqa odudeceb Lidia uqa waug fogo docob Pol je mamaden dah mudi bilen. <sup>15</sup> Odocob uqaca, age uqana jona bileinca age wa joadec oin. Odimei cesusgi ege magen, "Ija mele bahic Tibudnu wawi meleen ec cisdufeig humeig ijana jona bileigale," gen. Odimei uqa ege uqana jona lecnu bahic magen.

#### *Age Filipai ono Pol Sailasca gihadoc jona malein*

<sup>16</sup> Deel osona ege inondoc cudunna bebeli bilob ege begabeg meh mel aid osoca gulucdadananom. Uqa buga me qee hewuden. Buga me qee eu odudeceb ceteh hibna

\* **16:10:** Cudun ina Luk uqa "ege" madec sanan men. Age aqunec je feiga. Saen ina Luk uqa Polca cocobosi belesi Filipai ono calesin. Odocob Pol uqa Filipai culdi hedocob Luk uqa "ege" qee madel. Age Aposel 16.40 feiga. Eunu dana age Luk uqa Filipai bilen ec cisdogina.

caligianu dado moloi. Uqa dado mec je mamadi meen qaig geh bahic dana uqa cofdoloig agena mudiadoloi.<sup>17</sup> Odocob uqa Pol ege gami tooigigi utaen, "Dana i age Anut Ohis Bahic uqana cabi dana! Age adi Anut cahaaadecnu je maadegin!" en.<sup>18</sup> Uqa deel mati eu odi odon. Odocob Pol uqa gemag beceb waldumei buga me qee madon, "Ija Jisas Krais ijanna je gatiti mahigina, mel aid eu culdi qisacdgal!" don. Odocob buga me qee saen euna dih qisacdon.<sup>19</sup> Euqa dana uqa cofdoloig eu age Pol agena meen qaig oc jic cagocob fimeig age Pol Sailasca hewalimeig ceteteh fajecnu cudunna diali ehi nu Rom je gesilec dana amagana malein.<sup>20</sup> Odimeig age Rom je gesilec danaca ehali limeig madein, "Dana i ale Judadec ale egene taun ben ene cetehe qee suluwasannu odosina."<sup>21</sup> Ege Rom eguna kobil eu qee odoqaunnu cahacgenu eu i ale odocnu iwalgesina. Kobol eu umeb qee ihoc moquaun," ein.<sup>22</sup> Odocob dana am ben ageha aqaloqaga bili cegulein. Odimeig Rom je gesilec dana age Pol Sailasca alena lotoc baladumeig geh bahic qisaaloqannu je gatiti maadein.<sup>23</sup> Odimeig age geh qisaali hedumeig gihacdoc jona helalecebil lesin. Odimeig age gihacdoc jo cofdoc dana cofali cuhadugianu je gatiti madoin.<sup>24</sup> Odocob uqa je gatiti odi umei gihacdoc jo cofdoc dana uqa hehaleceb cudun dunuh bahicna lecebil jaimala na culumenga gemo mamei gagadic qagalen.

<sup>25</sup> Euqa witic tu gemo bahic Pol Sailasca inondodosi Anut binan sulec due sisilesin gihacdoc dana age dah mali nijein.<sup>26</sup> Oodogin nag odi bahic mim ben nen. Odimei gihacdoc jo eu uqana big gug lugudocob jic cebec cunug hudaden. Odocob sen gihacdoc dana cunug agena cufaladen.<sup>27</sup> Odocob gihacdoc jo cofdoc dana caji meciimei jic cebec cunug hudec fimei gihacdoc dana cunug busaleiga ec cisdon. Eunu uqana han sigin cecelac uqana cudunnadec umei uqadodoc qocob cal migia odon.<sup>28</sup> Euqa Pol jejeg suli u utai madon, "Ege cunug ihen! Hinadodoc cain dewen tudogaun!" don.

<sup>29</sup> Odocob gihacdoc jo cofdoc dana uqa cejalnu utaimei guguli limei cucuii Pol Sailasca jaimalana toni geleli nijen.<sup>30</sup> Odimei uqa ehali cali humei sisilalen, "Dana ben lecis, Anut cahaatigiannu ija eeta odigen?" alen.

<sup>31</sup> Odocob ale jejeg hewi madosin, "Jisas Tibudnu wawin meleeia. Odocob Anut hinaca, age cunug hinana jona bileyinaca cahahaadigian," dosin.<sup>32</sup> Odimesi ale uqaca, leih age cunug uqana jona bileyinca Anutna me je maadesin.<sup>33</sup> Odocob uqa witic saen euna dih ehali li isomola wasacudialen. Odocob uqaca, age cunug uqana jona bileyinca age wa joadec oin.<sup>34</sup> Odimei uqa Pol Sailasca uqana jona ehali ehi timei sab aleceb jesin. Odocob uqaca age leih cunug uqana jona bileyinca age Anutnu wawaga meleennu ceelein.

<sup>35</sup> Deel osona qasil wele Rom agena je gesilec dana age dana eu ale cois culacebil belesia ec polis dana maadimeig suladecebilein.

<sup>36</sup> Eunu gihacdoc jo cofdoc dana je eu Pol madon, "Rom je gesilec dana age hina Sailasca ale culacecemin gihacdoc jonadec belowasannu je gatiti sulduteiga. Odocob ale wawala malolaca cois belesiale," don.

<sup>37</sup> Euqa Pol polis dana maaden, "Ele cahuldoc elena oso qee felein qa cunug amemeg qisaleigan. Euqa elena gug jobon eu Rom!<sup>†</sup> Adinu age gihacdoc jona ehili tacileigan? Odocob qila age jahuni sulcebil nuewannu odogina? Qee bahic! Rom je gesilec dana age bahic humeig ehili tecebilewan," aden.

<sup>38</sup> Odocob polis dana age ceseli belimeig Rom je gesilec dana Polna je maadein. Odocob age Pol Sailasca alena gug jobon eu Rom ec dumeig age cucuiein.<sup>39</sup> Eunu age belimeig eu cahuldom ec maalein. Odimeig age gihacdoc jonadec ehali ahumeig ale taun ben eu culdi belowasannu ninialein.<sup>40</sup> Eunu Pol Sailasca gihacdoc cudun culimesi Lidiana jona lesin. Ono ale wawaga meleec cotolail gulucadimesi dahiniga hewec je maadimesi belesin.

## 17

### Tesalonaikadec dana age Pol Sailasca aqalecnu gale aden

<sup>1</sup> Ale tutuc Amfipolis taun gemogemo limesi onodec Apolonia taun gemogemo odi nui Tesalonaika taunna calesin. Ono Juda dana agena cuha jo oso tawen.<sup>2</sup> Odocob Pol uqa gaid odoloiwe uqa odi cuha jo euna len. Ono cuha deel cijed uqa dana gami Anutna jaqec jenu fee dadanein.<sup>3</sup> Anutna jaqec yenadec sildiaadi agena cisdoc tutuc mumudi age Anutna Krais uqa dain ben umei cal mecnadec ceseli cajennu sildiadon. Odimei Pol maaden, "Jisas uqanu ija je maadiga eu uqa Krais," aden.<sup>4</sup> Odocob Pol uqa leih cesusaadi

<sup>†</sup> **16:37:** Saen euna Rom agena king, age Sisa ein, uqa hatu cunug eu Mediterenian Macas cemenu nijein eu cofaden. Eunu Rom dana cunug age binanca bilein. Odocob Rom agena loo je eu dana age Rom dana gihacdoc jona gauc madecnu cahacaden. Saen osona Rom age culadeceb Rom dana qee eundec age Rom dana calein. Pol memeg eu dana eundec odi fena. Eunu Pol anag basecdon saenna Pol uqaha Rom dana calen. Age Aposel 22.24-29 euha feiga.

maadeceb wawaga meleceb Pol Sailasca tooalein. Eu odi Grik dana mati bahic ageha Anut binan suloloig, ageca qam caja mati ageha wawaga meleen.

<sup>5</sup> Euqa Juda dana age Polnu heel mimeig dana gauc jicna loldoc dana eundec cedi gabanaadecebil dana geh bahic doin. Age odadecbil taun ben cunug euna uceldodoig je alalac beceb age Pol Sailasca walali hewalimeig dana ebenegana moqagannu Jesonna jo talildudu tawimeig kokodoin. <sup>6</sup> Odocob age qee fesialimeig Jeson wawaga meleceb cotugul leihca gami ceceladi taun ben eu cofdoc cabi danaca cedi ehi limeig utai madein, "Dana i age hatuhatu cunug sibenega qaqaq cocobi qila age egena taun benna hoiga. <sup>7</sup> Odocob Jeson uqana jona ehadi nijen. Age cunug Sisa uqana loo jeha sibeg qahegina, odimeig age king oso ijan Jisas bilina ec madegina," ein. <sup>8</sup> Age je eu madimeig dana am ben taun ben cofdoc cabi danaca age uceldodoig je alalac ten. <sup>9</sup> Odocob cabi cofdoc dana eu age Jeson dana leihca meen qaig gadac eu odi je gesilec fajimeig beloqagan ec maadecebil fajein. Odocobil culadecbil belein.

#### *Pol Sailasca Beria ono cabi osin*

<sup>10</sup> Witic memen wawaga meleec cotelail age Pol Sailasca sulalecebil Beria taun ono belesin. Ale Beria ono li calimesi Juda dana agena cuha jona lesin. <sup>11</sup> Juda dana ono age me je dah mecnu dahinga qolocijecib bilein. Age Tesalonaika dana cinigwe qee. Age me je dah mi cuhadodoig deel cunugca Pol mele madenafo eundecnu doqagannu Anutna jaqec je sanijoloig. <sup>12</sup> Eunu agenadec mati bahic wawaga meleen. Odocob Grik caja qam leihca, Grik dana leihca ageha wawaga meleen. <sup>13</sup> Euqa saen Juda dana Tesalonaika ono bilein age Pol Beria taun ono me je maaden ec dumeig age ono limeig age dana am ben ihulahaladecbil je alalac ten. <sup>14</sup> Odogin wawaga meleec cotugul age Pol suldocobil lanna non. Euqa Sailas Timotica himec Beria ono bilesin. <sup>15</sup> Dana Pol ehudi ehi belein eu age Atens taun ben ono ehi beli cuculdeig ceselein. Age saen ceselein hohogin Pol uqa Sailas Timotica maaelecebil mahuc bahic toodoo Atens lowasannu maaden.

#### *Pol Atens ono me je maaden*

<sup>16</sup> Odocob Pol uqa Sailas Timotica Atens taun ben ono sumali bibili uqa uhulec tibud agena kadan mati bahic taun ben eu cunug ihoc len eu odi feceb waug me qee men. <sup>17</sup> Eunu uqa Juda agena cuha jona Juda danaca, Juda dana qee eundecca age Anut binan suloloig age gami fee dadanoloig. Odocob fajec cudunna dana holoig eu deel cunugna age gami ha fee dadanoloig. <sup>18</sup> Odocob iwaladec dana leih age Epikurian Stoikca amnadec\* gulucadeceb fee dadanein.

Pol uqa Jisas cal mecnadec ceseli cajennu me je maaden.<sup>†</sup> Eunu leih madein, "Je lawilawi madec dana i eetanu madigia odona?" ein. Euqa leih madein, "Uqa tibud filfilnu madenaf?" ein. <sup>19</sup> Eunu age Pol ehudi Ariopagas cegulecmu ono ehudi ehi limeig madoin, "Iwaladec je haun hina maadagana eu magecem doqale. <sup>20</sup> Ge, ceteteh leihnu hina je madagana eu ege ceteh haun odi dah moqona. Eunu ege eu uqana gug docnu wawige njija," doin. <sup>21</sup> Odocob Atensdec danaca, dana hatu filfilnadec ono bilein ageca saen cunugna age ceteh haun hon eu dah mamadi je togodocnu wawaga ben bahic nijen.

<sup>22</sup> Eunu Pol Ariopagas cegulec eu amagana gemo ono caji tawimei maaden, "Dana Atensdec! Age jic cunugna cuha fegina eu ija fem. <sup>23</sup> Ge, saen ija taun benna cocobig age tibud agena kadan eu binanaga sulegina eu fem. Ija ihanec cabal euha fem eu jaqec je odi maden, 'Tibud ana bilia qee dogona eu uqana,' en. Tibud i age binan sulegina qa qee dogina eunu ija qila maadigina. <sup>24</sup> Anut maha cunugca ceteteh cunug mahana bileyinaca muden eu uqa sao jobonca mahacanu Tibud. Odocob uqa cuha jo nag dana mudeginca euna qee bilina. <sup>25</sup> Odocob uqa ceteh osoca qee qee bilel. Dana age uqa cesuldocwe ha qee. Uqadodoc himec maha ina cebac bilecca kisca ceteteh cunug dana cunug adena. <sup>26</sup> Uqa dana osolnadec himec dana sihil filfil mahana cunug bileyinaca eu ifanadem. Age mahana biluqagannu saenha hatu agena gadacha uquadodoc wele siwiaden. <sup>27</sup> Age uqa waloqagannu uqa eu odi odon. Age uqa megimeig guludoqagannu eu odi odon. Euqa Anut uqa ege cemenige bilina. <sup>28</sup> Ge, dana oso odi maden, 'Uqa odigeceb ege cebac biluquna, coboqona, eu odinu ege dana caja biluquna,' en. Eu agena galolo je dana leih madein odiwe, 'Egeha uqa talacul biluquna,' ein.<sup>‡</sup> <sup>29</sup> Ege Anut talacul eunu ege Anut uqa goldfo, silwafo, meenfo cinigwe, danana docna mudec kadan tibud cinigwe ec odi cain

\* **17:18:** (naha osoldoc) Grik gemona dana mati age dana doc silecca age wele bilein agena je toodoin eu bilein. Dana eundec agena sihil lecis eu Epikurian Stoikca. † **17:18:** (naha lecisdock) Grik jena je "cal mecnadec ceseli cajen" age Anastasis ein. Grik age dana cal mecnadec ceseli cajecnu eu ihoc qee ec cisdoein. Agenu cisdoe eu fil bahic. Eunu Pol uqa Anastasis ec madeceb age uqa tibud filfilu maden ec cisdoein. ‡ **17:28:** Pol uqa je eu Grikna galolo je dana lecis wele jaqesin eu umei Grik dana age fogo adecnu maden, eu odi fena. Galolo je dana lecis i ale Epimenides Aratasca.

cisdoqaun. <sup>30-31</sup> Odocob saen wele dana age Anutna loo je qee doc bibilegin Anut uqa qee wadacadel. Euqa uqa maha ina dana cunug gesiladijannu eu uqa dana oso ugana ittom cobocna wele cabi eu odigiannu ehudimei deel oso gadac men nijia. Uqa eu mele bahic dana cunug doqagannu wele dana i cal mecnadec tulidocab cajen! Eunu qila Anut uqa dana cunug age mahana cunug biledina eu agena qisol mec kobilnadec falicdoqagannu maaden,” aden.

<sup>32</sup> Odocob Pol cal mecnadec ceseli cajen ec madeceb dumieg leih age lelandoin qa leih age madoin, “Ege hina magaga eu haun magecem doqan,” doin. <sup>33</sup> Odocob eunu Pol cegulecnadec cculadi nuen. <sup>34</sup> Euqa dana leih age ugaca gabandumeig age je eunu wawaga meleen. Agenadec eundec dana oso Daionisias, uqa Ariopagas cegulecnadec dana oso, caja oso ijan Damaris. Odocob dana leihha ageca gabandoin.

## 18

### *Pol Korin ono cabi on*

<sup>1</sup> Odi hedocob Pol Atens culdimei Korin taun benna nuen. <sup>2</sup> Ono uqa dana oso Judadec ijan Akwila gulucdon. Uqa anag Pontas hatu ono basen. Uqa aideg ijan Prisila Italidec ale saen euna hosin. Rom agena King, Klodias, uqa Juda dana cunug age Rom ono biloloig eu age Rom culdimeig beloqagannu je gatiti maaden eunu hosin. Odocob Pol eu ale mercialigia bili len. <sup>3</sup> Odocob Pol uqa talah jo mudec dana. Aleha talah jo mudec lotoc eu mudimesi euna meen qaig olosin. Eunu Pol ale gami ninjeig cabi oin. <sup>4</sup> Odocob uqa Juda agena cuha jona cuha deel cunugna dana gami fee dadanolioig. Odimei uqa Grikca Judaca mati bahic cesusaadi je maadeceb wawaga meleen.

<sup>5</sup> Saen Sailas Timotica ale Masedoniadec hosin Pol uqa saen cunug eu me je qasali maadecnu odon. Uqa Juda dana Anutna Krais eu Jisas ec sildiadon. <sup>6</sup> Odocob age me je eu cahacdoc sanan mena imeig uqanu je me qee madeceb il uqa ugana lotocnadec comis foidudu maaden, “Age fadalifeig agedodoc agena cahuldoc! Eu ijana cabi qee. Qila sanan mimig Juda dana qee eundec gami himec ligen,” aden. <sup>7</sup> Eunu uqa culadimei li Juda dana qee eundec osona jona nuen, ijan Tisias Jastas. Uqa gaid Anut binan suloloi. Ugana jo eu Juda agena cuha jo nag cemenug. <sup>8</sup> Krispas uqa Juda agena cuha jo ilo ugaca, ugana jona billeinca Tibudnu wawaga meleen. Odocob dana cajaca mati bahic Korin taun benna bilein age Polna je dah mimeig wawaga meleeceb wa joadec oin.

<sup>9-10</sup> Odocob witic osona Pol ola codocna bebelen euna Tibud Pol madon, “Ija hinaca biligina. Mati bahic taun ben ina eu ijana biledina. Eunu oso uqa hina dewen tudenocu qee hoiaun. Eunu cain cucuiagaun, cain me je madecnu culogaun. Euqa me je odi dih mamadiaga,” don. <sup>11</sup> Eunu Pol cabi gel osolca oso na ha himec ono bilen. Bibilei dana Anutna me je iwalaadien.

<sup>12</sup> Odocob saen Galio uqa Rom gabmanna ilo Grik hatuna bibilen Juda dana gabandumeig wawaga osolna Pol hewi ehudi je gesilec cudunna ehi lein. <sup>13</sup> Odimeig madein, “Dana i uqa dana cesusaadieceb Anut binan suluqagannu eu Mosesna loo je madena gadac eu wooldona!” ein.

<sup>14</sup> Euqa Pol je madigia oodon bahic Galio uqa Juda dana maaden, “O Juda dana, dana i uqa cahuldoc odoc osofo, qisol mec odochfo odoubmi agena um qoc je dah moum. <sup>15</sup> Euqa agena jeca, ijanagaca, agena loo jeca eunu himec fee dadaneginanu ija ceteh i edinu je gesilec dana qee biligaun. Agedodoc tutuc mudeiga,” aden. <sup>16</sup> Odimei uqa je gesilec cudunnadec ititacadeceb cali hoin. <sup>17</sup> Odocob eu age cunug Sostenis cuha jo ilo ehudimeig je gesilec cudun cemenug qoin.\* Euqa eu Galio adih oso odoch qee cisadol.

### *Pol Antiok Siria hatuna ono ceseli nuen*

<sup>18</sup> Odi hedocob Pol Korin ono wawaga meleec cotugul gami deel mati bahic billein. Odimei uqa cotugul eu culadimei Akwila Prisilaca gami Korindec wagna Siria hatuna ono belein. Uqa macas gemo qee lec ninjen uqa Anutnu je cagoc madennu Senkria ono ilona gosic cunug cocdon.<sup>†</sup> <sup>19</sup> Belimeig age Efesas taun ben ono calein. Ono uqa Akwila aideg Prisilaca culalen. Euqa uqa Juda agena cuha jona leceb Juda dana gami fee dadanein. <sup>20</sup> Odocob uqa ageca saen nag cecelacca biluqagannu ninidoen qa uqa age gami bielecnu qee cois adel. <sup>21</sup> Euqa uqa odi maaadi cculadi nuen, “Anutna waug odi niyecebf ija ageca haun ceseligen,” aden. Eunadec Efesas ono wag umei Sisaria taun nuen.

\* **18:17:** Cel dana age Sostenis qoin, eu Grik danafo, Juda danafo ege qee doqona. Grik jena gug eu camasac qee. Dana leih age Juda himec age Sostenis gemanaga beceb uqa qoin ec cisdoen. † **18:18:** Juda dana oso uqa Anutnu je cagoc hedon eunu ihacadecnu uqa ilona gosic cunug cocdoloi. Eu agena kobil oso. Age Namba 6.1-21 feiga.

<sup>22</sup> Uqa Sisaria calimei Jerusalem tamanec feele adigiannu ten. Odimei Antiok ono non. <sup>23</sup> Odimei Antiok ono saen leih bilimei cuculadi Galesia Frisiaca agena hatuna jobonjobon cocobi nui malogom cunug agena wawaga meleec gagadic mudiaadi cobon.

### *Apolos Efesas ono je maaden*

<sup>24</sup> Odocob Judadec dana oso, ijan Apolos, uqa anag Aleksandria taun ben ono basen saen euna uqa Efesas taun ben ono len. Uqa je madi cuhadoc dana. Uqaha Anutna jaqec jenu du cuhadon. <sup>25</sup> Uqa Tibudna jicnu iwaldooin. Odocob uqa waug Tibud toodocnu gagadic tawen. Jisas uqana odocnu tutuc maaadi iwaladoloi. Euqa uqa Jon wa joadennu himec don. <sup>26</sup> Odocob uqa Juda ono agena cuha jona me je saluqi u maaden. Euqa Akwila Prisilaca dah mudimesi ehudi alena jona ehi limesi Anutna jicnu je tutucna silditosin. <sup>27</sup> Odocob Apolos Grik hatuna nuigia madecb wawaga meleec cotugul age cesuldumeig age malogom ono bilein agena je jaqimeig uqa ono leceb feele dumieig ehudoqagannu suldoin. Uqa ono li calimei dana cajaca Anut uqa eeladec uum adeceb wawaga meleen eundec age geh bahic cesuladen. <sup>28</sup> Ge, uqana je gagadic madecna uqa Juda dana age gami file dadanimeig uqa dana caja amemeg wooladen. Uqa mele bahic Anutna jaqec je Anutna Krais eu Jisas ec madena eu ihacaden.

## 19

### *Pol Efesas ono cabi on*

<sup>1</sup> Apolos uqa Korin ono bibilen Pol jic cocobi aluhna isec nu Efesas calen. Ono uqa malogom leih gulucaden. <sup>2</sup> Odimei sisiladen, "Age wawaga meleec Kis Gun oinfo?" aden.

Odocob age jejeg hewi madoin, "Qee, ege Kis Gunca ec oso qee dolom," doin.

<sup>3</sup> Odocob Pol haun sisiladen, "Age cel wa joc oin?" aden.

Odocob age jejeg hewi madoin, "Wa Joadec Jon uqana wa joadec eu om," doin.

<sup>4</sup> Odocob Pol maaden, "Jonna wa joadec eu dana agena silail hibemodoqagannu. Odocob uqa Isrel dana age dana oso uqa hib toodu honanu wawaga meleigiannu maaden eu uqa ijan Jisas," aden.

<sup>5</sup> Age eu odi dah memegin Jisas Tibud uqa ijanna wa joadec oin. <sup>6</sup> Odocob Pol eben ilomogana meceeb Kis Gun ageca nen. Odocob age beilamaga falidocob je filfil mamadeig je hahun madec danawe Anutna me je madein. <sup>7</sup> Dana eu age sanijec 12-pela cunug eu odi.

<sup>8</sup> Odocob Pol Juda agena cuha jona limei jagel cijed me je saluqi u maaden. Uqa age gami fee dadaneeig Anutna me culnu sildiadon. <sup>9</sup> Euqa leih age dahiniga qutum qu bilimeig wawaga mele qee el. Odocob am cegulein eu amagana Tibud uqana jicnu qisol je madein. Eunu Pol malogom cedadecb cuha jonadec cali hoin. Odimei deel cunugna Tiranas iwaladec jo ben euna je togodoloig. <sup>10</sup> Eu cabi gel lecis eu odi odoin. Odocob dana cunug Esia hatuna biloloig Juda dana Juda qeeca osoben Tibudna me je dah mein.

### *Siwa melahul*

<sup>11</sup> Odon Anut odudeceb Pol uqa kobolkobol filfil bahic ebenna men. <sup>12</sup> Eunu Pol uqana lotoc qetec nag mede cacoc jamelca age ehi li Pol dewegna mimeig ahu dana hagca dewenegana mecebile agena hag qee memen buga me qee ha qisacadoloig. <sup>13</sup> Odocob Juda dana leih cocobi hileig age dana age buga me qeeca eu deweneganadec buga me qee ititacadoloig aghera Jisas Tibud ijanna buga me qee ititacadecnu temdoin. Age buga me qee maadein, "Ija Jisas eu Pol uqa uqanu me je madena uqa ijanna je gatiti maadigina, age dana i deweg culimeig busaleiga," adein. <sup>14</sup> Odocob Juda dana ihanec dana ben, ijan Siwa, uqa melahul 7-pela age odi odoloig.

<sup>15</sup> Euqa buga me qee jejenega hewi maaden, "Ija Jisasnu dugina, Polnu ha dugina, ge age an?" aden.

<sup>16</sup> Odimei dana buga me qeeca eu gagadic odocca age gami cadimeig wooladen. Eu age cunug uqana jonadec lotoc baladocca golanagaca bical busali belein. <sup>17</sup> Odocob Juda danaca, Juda dana qee eundecka cunug Efesas biloloig je eu dah mimeig age cunug cucuiein. Odocob Jisas Tibud ijan meca bahic mudein. <sup>18</sup> Odocob dana wawaga meleecca geh bahic humeig amemeg agena me qee odoc qasali madein. <sup>19</sup> Odimeig mati bahic age ceeh jelec cas mecca odoloig eu cunugca buk eu haudumeig dana cajaca amagana jana manein. Age buk fajein uqana ameg qaig gadac eu sanijec 50,000 kina. <sup>20</sup> Eunu gagadic odoc jic euna Tibudna me je gagadic mimei hatuhatu cunug ihoc len.

### *Efesas dana age Tibudna jicnu gemanaga ben*

<sup>21</sup> Hibna ceteteh eu hedocob Kis Gun odudeceb Pol uqa Masedonia Grikca hatuna limei hibna Jerusalem isec nuigiannu cisdon. Uqa odi maden, "Hibna ija ono limig Rom

ha figen,” en. <sup>22</sup> Odocob uqa Timoti Erastasca ugana cesuldoc lecis eu ale Masedonia sulaleceb belesin. Odimei uqa saen nag cecelacca Esia hatuna ono bilen.

<sup>23</sup> Saen euna bahic Efesas ono Tibudna jicnu cacadi utai madein. <sup>24</sup> Silwa mudec dana oso, ijan Demitrias, uqa Atemis caja tibudna cuha jo nag ihicon qoc silwana mudoloi. Odocob silwa mudec dana age cabi inu meen qaig ben bahic didoloig. <sup>25</sup> Eunu uqa silwa mudec dana cunugca leih age cabi eundec ololig ageca maadeceb cegulein, Odimei maaden, “O dana, age dogina, ege cehewanige eu cabi ina hona. <sup>26</sup> Agedodoc dudu fifi egina dana Pol i dana cajaca mati bahic quauada uqa kadan tibud dana ebenevaga mudegina eu anut qee ec madena. Odocob dana mati bahic uqa je madennu wawaga meleecelb hibengimeig ugaca lein. Efesas eneca odocob Esia hatu cunugnaca age hatuhatu cunugnuca odi eu odon. <sup>27</sup> Eunu egena meen qaig oc cabi jic cagocdainnu nijia. Eu himec qee, osoha eu Atemis caja tibud ben ugana cuha jo qee mecdainnu nijia. Odocob caja tibud i Esia age hatu cunugna binan sulegina eu uqa ijan ben eu me qee mudugagan!” aden.

<sup>28</sup> Odocob dana cegulein eu je odi dah mimeig age gemanaga geh beceb utai madein, “Atemis Efesas egena eu uqa ben bahic!” ein. <sup>29</sup> Eunu taun ben eu cunugca je alalac ben. Dana am ben Gaias Aristakasca, dana lecis Masedoniadec Polca coboin, eu ale hewalimeig udock jona diaali ehi lein. <sup>30</sup> Odocob Pol uqa cuhanuc dana am ben amagana ligia odocob malogom age cahacdoen. <sup>31</sup> Esia dana meca leih age Polna danah ageha je suldutoin, hina udock jona euna cain camasac magaun ec ninidoin. <sup>32</sup> Odocob dana leih age ceteh osonu utaaeegin leih age fil tuliaein. Odimeig dana eundec mati bahic age cel gugnu cegulein eu qee doloin. Eunu dana age udock jona cegulein age ucelduduein. <sup>33</sup> Odocob cegulec euna Juda dana age Aleksanda uqa agena je maadecnu madon. Eunu dana leih age Aleksanda madocobil uqa aquynecna ten. Odimei Aleksanda ebenna cahacaadi age amagana eetanu odi ceguleginanu je maadigia odon. <sup>34</sup> Euqa age uqa Judadec dana camasac fimeig age cunug je osol eu aua lecis odi utai mamadiein, “Atemis Efesas egena eu uqa ben bahic!” ein.\*

<sup>35</sup> Odocob hibna taun benna kuskus limei dana am ben maadeceb tiliein. Odimei uqa maaden, “Efesas dana! Efesas taun ben eu Atemis Ben Bahicna cuha joca, meen gun sao ohisdec tonen euca alena cofalec age cunug dogina. <sup>36</sup> Oso uqa ceteteh inu mele qee ecwe qee. Eunu age gemanaga bodoeia, ceteteh ihulahal edi cain odowain. <sup>37</sup> Ge, age dana i ale cedali ene hoiga qa eu ale cuha jona ceteteh qee heje cedalesin, egena caja tibudnu ha je me qee oso qee madalesin. <sup>38</sup> Demitrias silwa mudec danaca age osonu jecafi je gesilec deelna je gesilec dana amagana age saen euna je balijimeig ono qocob leceb qocob hocob eigale. <sup>39</sup> Euqa age je menu cisdufeig age Efesas agena cegulec benna je tutuc mudugagan. <sup>40</sup> Ge, egenu qila je alalac bec i odoqanu balijec je cali hocdainnu nijia. Je alalac ben eunu ege je wasacudecwe qee. Odocob Rom cofgec dana age eunu sisilgecebil je me oso maadecwe qee,” aden. <sup>41</sup> Odimei uqa je eu madi hedumei dana cegulein eu age maadeceb budoin.

## 20

### *Pol Masedonia hatuca Grik hatuca ono cobon*

<sup>1</sup> Hibna je alalac bec eu cunug qee meceb Pol malogom je sulduadeceb hocobil cegulein. Odocobil uqa hulunuga cehec je maaadi odio aden. Odimei uqa Masedonia hatu ono nuen. <sup>2</sup> Odocob uqa hatu cunugna cobimei dana hulunuga cehec je filfil maaden. Odimei Grik hatu ono hon. <sup>3</sup> Odimei uqa ono jagel cijed bilen. Uqa Siria hatu nuigiannu saciadudu bili Juda dana age uqa qocomun cal migian ec don. Eunu uqa haun Masedonia hatu gemogemo cocobi nuigiannu cisdon. <sup>4</sup> Dana leih age Pol gami belein. Eu age Sopata uqa Piras melah Beriadec ugaca, Aristakas, Sekandasca ale Tesalonaikadec aleca, Gaias Debidec ugaca, Timotica, Tikkicas Trofimasca Esiadec aleca age Pol gami belein. <sup>5</sup> Age casac aquni belimeig Troas ono sumigtein. <sup>6</sup> Euqa bred jisca qee ugana saen hedocob ege wag umeb Filipaidec waeg beli cocobi deel 5-pela hedocob Troas calom. Ono age ceguladimeb cuha osol bilom.\*

### *Pol Troas ono Jutikas tulidocob uqa ceseli cajen*

<sup>7</sup> Odocob Sarere wesuna ege cunugca bred fenoqa bili cegulom.† Odimeb Pol uqa uqadec odi culadigiannu dana me je maaden. Odimei je maaaden tu ibuldon. <sup>8</sup> Odocob

\* **19:34:** Juda ageha Atemisnu qee cuha felein, eunu Grik dana age Atemis ijan suli u utai madein. \* **20:6:** Luk uqa haun “ege” jaqen. Eunu doc dana age Pol uqa Filipai ono Luk haun gulucdon ec cisdoen. Age Aposel 16.10 eu feiga.

† **20:7:** Doc dana age Pol ugana eundecca age Jisas deweg golaccanu cisdoch sab jein ec cisdoen.

jo cabalu ohis isecna hamol euna gowoc mati bahic ono cegulomna bilein. <sup>9</sup> Odocob dana haun oso ijan Jutikas uqa fufu oc cebec qahein euna bilen. Odocob Pol je gehgeh mamaden Jutikas us don. Odimei uqa us dahig celeceb jo cabalu cijed ohis onodec mahana toni qon. Nu hewi suladoin qa wele cal men. <sup>10</sup> Odocob Pol jo ohisdec toni numei dana haun deweg lalan cosolimei cogadon. Odimei uqa maaden, “Cain geh cisdownain. Uqa cebac nijial!” aden. <sup>11</sup> Odimei uqa haun jo cabalu cijed docna ceseli timei bred feni jen. Odimei age gami je mamaadegin cam beceb Pol cuculadi nuen. <sup>12</sup> Odocob dana haun jo ohisdec toni mahana qon eu cebac meceb ehudi jobon beleinnu wawaga me bahic nijen.

*Pol Troas culdimei Mailitas ono nuen*

<sup>13</sup> Odocob ege aquni wagna limeb onodec Asos taun ono waeg belom. Pol uqa jic cocobi ono nuigiannu magen. Eunu ono wagna ehudegannu magen. <sup>14</sup> Odocob uqa Asos ono cegulgeceb ehudocomun Mitilimi taunna waeg belom. <sup>15-16</sup> Pol uqa mahuc bahic Jerusalem caligliannu umnana saen cusdocnu culen saen ihocfi uqa Pentikos Deel Benna<sup>‡</sup> caligliannu cisdon. Eunu uqa Esia hatuna saen qee cusdoiaunnu uqa wagnagul Efesas cuculdi macas tutuc nuigiannu cisdon. Eunu belimeb ege onodec wagna nui deel osona Kaios taunna calom. Deel oso hedocob Samos taunna hom. Odocob deel eu toodocna Mailitas taun ono calom.

*Pol uqa Efesas tamanec cofadec odio ec maaden*

<sup>17</sup> Odocob Pol ono Mailitas bibili Efesas agena tamanec matu uqa hu foqagannu je sulduaden.<sup>§</sup> <sup>18</sup> Odimei eu age hu caleceb uqa maaden, “Saen ija hahawan Esia hatuna hom hocob qila ija dumani age gemo bilem eu age dogina. <sup>19</sup> Juda dana age gaid ija qocomun cal migian oloig. Eunu ija cewel uadec danawee amulini nenen culumen mati teten ija Tibudna cabi om. <sup>20</sup> Ija ceteteh age cesuladecnu eu qee jahuniadelem eundec saen ija agena jonanaca, dana cunug amaganaca je maaadiem iwalaadiem eu age dogina. <sup>21</sup> Ija Juda dana Grikca agena silailnu tului falidumeig Anutca logagannuca, age egena Tibud Jisasnu wawaga meleigannuca ulauladiem. <sup>22</sup> Odocob qila Kis Gunna cisdoc toodu Jerusalem ono nuigina. Ono ijaca cel culumen oso cali hugian eu qee dugina. <sup>23</sup> Odigeqa taun ben cunugna age ija qisatimeig gihacdoc jona mituqagan eunu Kis Gun ultiçena. <sup>24</sup> Euqa ija deweni eu ceteh gauc cinigwe figina. Eunu ija ijana me je madec cabi Jisas Tibud iten eu qee mudigennu gale tena. Anut uqa dana cajaca eeladec me bahic uum aden eunu me je qasali maadecnu cabi eu,” aden.

<sup>25</sup> “Qila feiga, ija wele age gemo cocobig Anutna culnu je maaadig cobom age haun ija olani qee fowain eu ija dugina. <sup>26-27</sup> Eunu ija Anut uqana cisdoc cunugnu je maadecnu qee jahuniadelemu deel ina age dahiniga heweginna agena eundec oso fadalecebfi eu ijana cahuldoc qee. <sup>28</sup> Agedodocnuca, Kis Gun uqa tamanec age ebenegana men eunuca cofdu cuhadoiga. Tamanec eu Tibud uqa Melah uqadodoc golacna ehaden eunu cofadi cuhadoigale. <sup>29</sup> Ija culadecmin hibna dana age qa cus cinigwe age tamanec gemo humeig waadecbil wawaga dain ben adigian eu ija dugina. <sup>30</sup> Saen caleceb dana leih agena amnadeccajimeig cuhulec je madimeig malogom age diadecbil tooadoqagan. <sup>31</sup> Eunu cofdoiçale. Ija amulini nenen witic cahinegca cabi gel cijed dahiniga hewemnu cisdoiga,” aden.

<sup>32</sup> “Odocob qila ija maadi Anut ebenna adigina igina, uqa eelgec uum igennu je eu cofadeiale. Anut eelgec uum igec je eu agena wawaga meleec gagadic mudecnu ihoc. Euna Anut uqa cahahaadec dana cajaca cunug qagu madena adigian eu ageha adecnu ihoc. <sup>33</sup> Ija osona golnu, silwanu, lotocnu ami qee qol. <sup>34</sup> Agedodoc dogina, ija odi cabi uug ceteh ijaca qee eundec ijadodoc cesuladecnu cabi om. Dana ija gami bilom eundec cesuladecnu ha odom. <sup>35</sup> Ege dana agedodoc cabi ocwe qee eundec ege cabi gagadic ocnu cesuladecnu ija ceteh cunug iwaladem. Age Jisas Tibud uqana je madec eu cisdoigale, ‘Oso uqa ceteteh utina uqana ceelec eu oso uqa ceteteh ona eu uqana ceelec eu wooldona,’ en,” aden.

<sup>36</sup> Odimei Pol je eu madi hedocob cunugca gob cehimeig inondoin. <sup>37</sup> Odocob eu age cunug qaqaieig cogadu cotdoin. <sup>38</sup> Eu age uqa ola haun qee fowain ec je maaden eunu wawaga me qee men. Odocob age cunug Pol gami wagna lein.

## 21

*Pol Jerusalem nuigiannu wagna non*

<sup>1</sup> Ege dana odio aadeb culadom. Wagna macas gemogemo qeti li Kos taun ono calom. Deel osona ege wagna bebeleb Rouds nui calimeb Rouds nuidec Patara taun ono belom.

<sup>‡ 20:15-16:</sup> Age je Aposel 2.1na nijia eu feiga.

<sup>§ 20:17:</sup> Mailitas eu Efesasdec onoca nijen, eu odi 50 kilomita.

<sup>2</sup> Ono wag oso Finisia nuigiannu tatawen fom ege wag eu tobimeb belom. <sup>3</sup> Ege Saipras nui fecidudu anse isec waldumeb ege Siria hatuna calom. Onodec Taia ono li hewimeb age wagna ceteteh leih ononu tacein eu hidein. <sup>4</sup> Odocob ege malogom leih ceguladom. Odocob ege age gami ono cuha osol bilom. Kis odocna age Pol Jerusalem qee nuaunnu cahacdoein. <sup>5</sup> Ege eu ageca biley saen hedocob cuculadi belom. Eu age cunug age aidagailca, talaculunugailca toogecebil taun ben eu cuculdi belimeb ege cunug lanna numeb ono gob cehimbe inondom. <sup>6</sup> Odocob euna ege cunug odio adimeb ege li wag tobogon malogom aidagailca, talaculunugailca haun jobon ceseli belein.

*Sisaria ono je hahun madec dana oso ijan Agabus uqa Pol je oso madon*

<sup>7</sup> Ege wagna Taia culdimeb belimeb Tolemes taunna calom. Ege wawaga meleec cotigeil leih ono feele adimeb ege age gami deel osol ono bilom. <sup>8</sup> Cojageceb ege wawaga meleec cotigeil eu age culdimeb nui Sisaria taunna calom. Ono ege me je maadec dana Filipna jona lom. Odocob uqa gami nijom. Filip dana 7-pela Jerusalem ono caja wij agena sab siwiadec cabinu ehadein eundec oso. <sup>9</sup> Uqa ategul 4-pela danaca qee. Age je hahun madec danawe Anutna me je maadolig. <sup>10</sup> Odocob ege ono deel oosoosu bibiluqun je hahun madec dana oso ijan Agabus uqa Judiadec nen. <sup>11</sup> Odimei uqa egeca limei Polna lotoc tapec halu umei uqadodoc jaib ebanca qagalimei magen, “Kis Gun edi madeia, ‘Lotoc tapec halu i gug uqa Jerusalem ono Juda dana edi qagoqagan. Odimeig Juda dana qee eundec ebenegana moqagan,’ eia,” gen.

<sup>12</sup> Ege odi dah mimeb eu egeca, leih ono bileinca ege Pol Jerusalem Cain lecdainnu cesusdom. <sup>13</sup> Euqa Pol jejenige hewi magen, “Age eetanu edi qaqajeig wawi qatanegina? Ija Jerusalem ono age jaimi ebenica qagalecnu saciaduga euqa Jisas Tibud ijannu ono cal migennu ha ija saciaduga,” gen.

<sup>14</sup> Odimei uqa mageceb culecwe qeenu ege culimeb madom, “Tibudna waug nijec eu ihoc leiale,” om.

*Jerusalem ono Pol cofadec cabinu je saaden*

<sup>15</sup> Odocob ono saen leih hedocob ege ceteteh saciadumeb Jerusalem ono tom. <sup>16</sup> Sisariadec malogom leih ege gami tom. Odimeb age ehihi dana oso uqana jona nijeqannu uqaca lein. Dana eu ijan Neson, uqa Saipras nuiduc. Uqa sanan mecnadec malogom bibili hon.

<sup>17</sup> Odimeb ege Jerusalem li calocomun wawaga meleec cotigeil ono celeboi alalaggein. <sup>18</sup> Odocob deel osona Pol ege gami Jems feqannu lom. Odocob tamanec agena matucaca eundec cunug cegulein. <sup>19</sup> Odocob Pol feele adimei uqa Anut uqana odoc Juda dana qee eundec gemo Anut uqa Pol ebenna cabi osolosol onnu saaden.

*Pol cofadec agena je dah mimei tempelna nuen*

<sup>20</sup> Odocob uqa dah mumudegin je madi hedocob Anut binan sulein. Odimeig age Pol madoin, “O cotige, hina dogona, Juda dana mati bahic age wawaga meleen. Odocob age cunug Mosesna loo je toodocnu gagadic megina. <sup>21</sup> Leih age hinanu madecebile doin. Hina Juda dana cunug Grik hatuna bileyina age Mosesna loo je hibemdocnu maadagana. Hina Juda dana age melemegail dewenega cagu cain qowain, age agena kobil Cain toodowain ec euha dah mein. <sup>22</sup> Hina ceseli hogannu euha age wele doiga. Eunu ege eeta odocnu ihoc? <sup>23</sup> Ege cel je mahocomun eu hina odoga. Dana 4-pela ene bileyga age Anutnu je cagoc oin. <sup>24</sup> Hina dana eu age ehadi lecem hinadodoc age gami soidoc biluqagan kobil toodoo doiga. Odimeg agena meen qaig ceteteh eunu gadac fajiadaga. Eunu age ihoc gosiniga cocdoqagan. Hina odi odocomfi age hinanu je doin eu mele qee qa hinadodoc Mosesna loo je toodoo odogona eu doqagan.\* <sup>25</sup> Euqa Juda dana qee eundec wawaga meleen ege egena jaqec je sulduadom. Jaqec je eu odi maden, ‘Age kadan tibud ihanecnadec sab Cain jowain. Ceteh golacca Cain jowain. Dool benega coldocobil cal men eu ha Cain jowain. Odocob dana uqa caja qee oc cajaca Cain nijuwasin,’ en,” doin.

<sup>26</sup> Hibna Pol uqa deel osona dana eundec ehadeceb soidoc biluqagan kobil eu uqa age gami odoin. Odimei uqa tempelna limei deel ganic hedocob age soidoc biluqagannu maadigia bili len. Odimei age osolosol agena ihanec odoqagannu saen euha maaden.

*Juda dana age tempelna Pol hewein*

<sup>27</sup> Odocob agena ihanec odoqagannu saen deel 7-pela eu hedugia oodon Juda dana Esia hatunadec age Pol tempel hamol ono fimeig age dana am ben eu ihulahalaadeig Pol hewein. <sup>28</sup> Odimeig age utai madein, “Isrel dana! Cesulgeiga! Dana i hatu cunugna cocobi uqa dana cunug Isrel dana cajaca Mosesna loo jeca tempelca hibemdocnu maaadiena. Euha qila uqa Juda dana qee tempelna cedadi ehi limei gun jo i gegehin mudia!” ein. <sup>29</sup> Ge,

\* <sup>21:24:</sup> Age je Aposel 18.18na nijia eu feiga. Ageha Namba 6.1-21 feiga.

age Trofimas Efesasdec uqa Polca taun benna mecialein. Odimeig age Pol uqa ehudeceb tempelnal lesia ec cisdoin. Eunu age eu odi madein.

<sup>30</sup> Odocob taun ben euna cunug dadanein. Odocob dana cunug osoben guguli li Pol hewimeig tempelnadec didu maha gemo calein. Odimeig mahuc bahic age tempel jic cebec ben eu menein.<sup>†</sup>

### *Rom han dana ilo uqa Pol cahahadon*

<sup>31</sup> Odimeig dana am ben Pol qagadoqaga oodogin age Jerusalem cunugca je alalac benanu je suldocobil Rom agena han iloca ten. <sup>32</sup> Mahuc bahic han ilo uqa ugana han dana 100 agena ilo leihca han dana leihca cedadimei dana am ben cemenug guguli nen. Odocob age han ilo ugana han danaca fimeig Pol qudi dadandoin eu culein. <sup>33</sup> Odocob han ilo Polca limei hewen. Odimei sen lecisia qagoqagannu je gattit maaden. Odimei uqa sisiladen, "Dana i indec? Uqa eeta oidea?" aden. <sup>34</sup> Odocob dana am ben eunadec leih cetehe osoru utaaeegin leih age fil utaaeiein. Eunu je alalac becnu han ilo uqa cel gugnu cetehe odi cali hon eu docwe qee. Odocob uqa ugana han dana maadeceb Pol ehudi agena cabi jona ehudi ehi tein. <sup>35</sup> Odimeig age ugaca wadowad gugna ono tein qa dana am ben eu age hihibananaga teinnu han dana age Pol ilomoga cehimieig gahidumeig wadowadna jo ohis tein. <sup>36</sup> Ge, dana am eu age cunug toodudu utaein, "Qagadoiga!" ein.

### *Pol Juda dana age ugana waug meleec gugnu maaden*

<sup>37</sup> Odimeig han dana Pol jo ohis ono ehudi ehi tetegin uqa han dana eu agena ilo madon, "Ija hina je oso mahecnu coisfo?" don.

Odocob han ilo Pol madon, "Hina Grik je dogona. <sup>38</sup> Hina Isipdec dana osofo uqa wele nag han dana 4,000 ihulahaladimei age Romca cadecnu aquniadimei wadauna nuen? Hina dana eu qeefo?" don.

<sup>39</sup> Odocob Pol jejeg hewi madon, "Ija Juda dana, ija Tasas taun ben Silisia hatu nagna ono cali hom. Ijana gun eu taun meca. Eunu cultecem dana cajaca je maadigale," don.

<sup>40</sup> Odocob han ilo Pol cois ec madocob caji wadowad igocna tatawi ebenna tiliuqagannu maadeceb tiliecebil Hibru jena maaden:

## 22

<sup>1</sup> "Dana, cotielca memielca eetanu ija odi odiginanu maadigen eu dah meiga!" aden. <sup>2</sup> Odocob uqa Hibru jena maaden dah mimeig age tilitili bahic ein.

Oodogin Pol je maaden, <sup>3</sup> "Ija Juda dana Tasas taun ono Silisia hatu nagna cali hom qa Jerusalem ene Gameliela iwaltec uu uu ben mem. Ija ege jajanigeil agena loo jenu iwaltec gagadic om. Odocob ija Anutnu cabi oqagannu cagucag cobolig odiha age qila odogina. <sup>4</sup> Ija dana jic eu toodoloig eundec hewadimig dewenega tudioomin cal moloig. Ija dana cajaca hewadimig gihacdoc jona madolig. <sup>5</sup> Ihanec dana ilo ugaca, Juda agena matumatuca, cunug agena cegulec benbenca age ihoc ija qila mele madigina ec qasali maadoqagan. Ija agena jaqec je wawaga meleec cotigeil Damaskas bilein sulduadecnu om. Dana cajaca age Damaskas bilein age jic eu toodoloig ija eu age hewadimig senna qagaadimig Jerusalem cedadi ehi becemin dewenega tudioqagannu sultecibil nom," aden.

### *Pol uqa adi Kristen mennu maaden*

(Aposel 9.3-19; 26.12-18)

<sup>6</sup> "Odimig ija jic cocobi Damaskas cemenug mumudigin cahineg cam gemo odi fulacdoc ben mahuc bahic sao jobondec ileftimei alilten. <sup>7</sup> Odocob ija mahana toni ninijig jejeg mateten dah mem. Uqa maten, 'Sol, Sol! Eetanu ija jabiti toootootagana?' ten. <sup>8</sup> Odocob ija sisildom, 'Tibud, hina in?' dom. Odocomin uqa jejeni hewi maten, 'Ija Jisas Nasaretdec hina jabi toootoodogona eu,' ten. <sup>9</sup> Odocob dana ijaca cobom age fulacdoc fein qa jejeg ija je maten eu qee dah melein. <sup>10</sup> Odocobil ija sisildom, 'Tibud, ija qila eeta odigen?' dom. Odocomin Tibud maten, 'Cajimeg Damaskas ono laga. Odocom ono hina Anut cabi mugum men eu mahogagan,' ten. <sup>11</sup> Fulacdoc gagadic bahic eunu ija ami galuc men. Eunu dana ijaca jic cobom eu ija tootec ebeni hewimeig jic gimtetergin li Damaskas calom," aden.

<sup>12</sup> "Ono dana oso, ijan Ananaias, uqa cuha fec dana uqa Mosesna loo je toodoloi. Odocob Juda dana Damaskas biloloig uqa co toodu cuhadoloig. <sup>13</sup> Odocobil uqa ijaca hu cemeni tawimei maten, 'Coti Sol, meciaga!' ten. Saen euna dih ija meciimig mecidom. <sup>14-15</sup> Odimei

<sup>†</sup> **21:30:** Meen gel ben eu tempel maha gemo cunug talilden. Odocob Juda dana qee eundec age meen gel eu maha gemo talilden eu dunuh lecnu ihoc. Je i "dana cunug osoben guguli li Pol hewimeig tempelnadec didu maha gemo calein" eu maha gemo meen gel ben eu taliddonnu maden. Odimei je i "tempel jic cebec ben eu menein" eu tempel jonu maden. Juda dana qee eundec age tempel jo dunuh lecnu ihoc qee, Juda himec age lecnu ihoc. Rom han dana agena jo eu meen gel ben ohisna tawen. Odocob wadowad oso eu tempel maha gemo cudunnadec han dana agena jona toben.

uqa maten, ‘Hina Jisasnu dana cunug Jisasna ceteteh cunug amenna femica, dahinna dah memca eu qasali maadegan. Eunu ege jajanigeil agena Anut hina ugana odoc cisdocnuca, ugana dana ititom fecnuca, dana ititom eu uqa jejeggul je mamadeb hina dah mecnuca nesili ehihia. <sup>16</sup> Hina qila cain daleagaun. Cajecem oso wa joihiea. Odimeg uqa ijanna utadocom Anut hinana silail cagasihigian,’ ten,” aden.

*Anut Pol suldocob Juda dana qee eundec me je maaden*

<sup>17</sup> “Odochob ija Jerusalem ceseli bem. Odimig ija tempelna inondudugin majauten. <sup>18</sup> Euna ija Tibud fifigin maten, ‘Dana ene hina ijanu je qasali maadecem qee dah mowain. Eunu mahuc Jerusalem culdi nuuga,’ ten. <sup>19</sup> Odochob ija jejeg hewi madom, ‘Tibud, age ija Juda agena cuha jonana limig dana hinanu wawena meleen eundec hewadimig gihacdoc jona madimig geh qisaadolig eunu dogina. <sup>20</sup> Odochob age hinanu qasali maadec dana Stiwen age qocobil cal mennu ijadodoc wawi me ninijen tatawigin odoin. Odimig dana qocobil cal migianmu agena lotoc huli mein eu cofduadem. ‘Eu cunug age ijanu du cuhadogina,’ dom. <sup>21</sup> Odoocomin Tibud maten, ‘Ija hina sulhecemin ene qee onoca bahic Juda dana qee eundec gemona nuegan. Eunu nuuga!’ ten,” aden.

*Rom han dana ilo Pol cofdon*

<sup>22</sup> Pol uqa dana am ben je maaaden age dah mein qa uqa Juda dana qee eundecnu gemona nuegan ten je i madeceb age conoga suli u utaein, “Dana eundec uqa cebac bileyu ihoc qee. Ehudi nueiga! Qagadoiga!” ein. <sup>23</sup> Odimeig age lotocna ebelaclodoig bagaiiein comis ohis bilisadocobil titien. <sup>24</sup> Odochob Rom agena han ilo ugana han dana je gatiti maadeceb Pol agena cabi jo hamol ehudi ehilein. Odimei han ilo uqa Pol sisildobobil uqa Juda dana cel gugnu heweiu eu qasali madigiannu geh qisadocnu je gatiti maaden. <sup>25</sup> Euqa saen age geh qisadoqagannu haluna qagein tatawen han dana 100 agena ilo oso ono cemenug tawen eu madon, “Hina dana oso ugana gug jobon eu Rom geh qisadocnu gadac cois ec oso taweafo, uqa cahuldoc oso ha qee felein?” don.\*

<sup>26</sup> Odochob han dana 100 agena ilo eu dah mimei han iloca limei madon, “Dana i ugana gug jobon eu Rom! Hina eeta oodoga odogona?” don.

<sup>27</sup> Eunu han ilo Polca limei sisildon, “Mataga, hinana gug jobon eu Romfo?” don.

Odochob Pol jejeg hewi madon, “Ese, ijana gug jobon eu Rom,” don.

<sup>28</sup> Odochob han ilo madon, “Ija meen qaig gadac meca fajimig ija dana ugana gug jobon eu Rom odi calem,” don.

Odochob Pol jejeg hewi madon, “Euqa ija Rom hatuna basiten,” don.

<sup>29</sup> Odochob mahuc bahic dana age Pol je oso sisildoqagannu tawein eu age bicbic ceselein. Odochob han ilo uqa Pol Rom hatunadec ec dumei uqa senna qageinnu ugaha cucuien.

<sup>30</sup> Odochob han ilo uqa eetanu bahic Juda dana age Polnu um qoin eunu jic megen. Eunu deel osona Polna sen cufalitumei ihanec dana benbenca, Juda agena cegulec benben cunugca ceguluqagannu je gatiti maaden. Odimei uqa Pol ehudi ehi nu amagana muden.

## 23

*Pol Juda agena cegulec benna je maaden*

<sup>1</sup> Odochob Pol cegulec ben eu ameg gugca meciaadi je maaden, “O cotiel! Ijana wawina cisdoc eu camasac bahic Anut amegna cocobi hu deel i gadacna biliga,” aden. <sup>2</sup> Odochob ihanec dana ilo Ananaias leih Pol cemenug tawein eu age Pol cona qelecnu maaden. <sup>3</sup> Odochob Pol Ananaias madon, “Anut hina bahic qihigian, hina gel age baial senenec tatacan joudein, age ceteh me qee dunuh fecwe qee! Hina Mosesna loo je eu toodudu gesiltecnu biliga qa hina qitecnu je maadagana eu loo je wooldogona,” don.\*

<sup>4</sup> Odochob dana Pol cemenug tawein eu age madoin, “Hina Anutna ihanec dana ilonu je me qee madaganal!” doin.

<sup>5</sup> Odochob Pol jejenega hewi maaden, “O cotiel, Anutna loo je madena:

‘Hina qisol je hinana dana cajaca cofdoc ilonu je cain madagaun,’ ena,” aden. (*Kisim Bek 22.28*)

Uqa ihanec dana ilo eu ija qee dolom.

<sup>6</sup> Euqa Pol uqa am leih age Farisidecca, am leih age Sadjusidecca eu uqa fen eunu cegulec euna utai maaden, “Cotiel! Ija Farisidec. Ija Farisi age melemega. Cal mec

\* <sup>22:25</sup>: Age je Aposel 16.37na nijia eu feiga. Rom agena loo je eu dana age Rom dana qisadocnu cacahaden. \* <sup>23:3</sup>: Wok Pris 19.15 eu gesilec dana uqa gesilec jona kobil tutuc odigian ec maden. Acahna Pol uqa je eunu cisdumei ihanec dana ilo uqa je eu tefadon eu cisdon.

dana age cal mecnadec ceseli cajoqagannu wawi meleec hewi sumudigina eunu ija ene je gesilec amagana tawiga!" aden.

<sup>7-8</sup> Sadjusi dana age dana cal mecnadec ceseli cajecwe qee, odocob age ensel kisca eu mele qee ec madegina. Euqa Farisi age je cijed eu cunug mele ec madegina. Eunu Pol uqa odi maaden bahic Farisi Sadjusica am lecis age fee dadanein. Odocob dana age am lecisid qatani tawein. <sup>9</sup> Odocob dana agena utaec li ben don. Odocob loo je iwaladec dana leih Farisi agena amnadec caji tawimeig culec bahic culein. Age madein, "Ege dana inu cetech cahuldoc oso qee folom! Acahna enseloo, qee kisfo mele bahic je madoial!" ein.

<sup>10</sup> Odocob je fee dadanec li ben bahic docobil age Pol qu tatali susul falecnu ihoc oodogin fimei han ilo uqa cucuien. Eunu uqa han dana suladeceb numeig Pol dana am dunuhdec umeig agena cabi jona ehudi ehi tein.

<sup>11</sup> Odocob witic euna Tibud Pol qeihna tawimei madon, "Cisdoc fifil cain ogau! Hina ijanu Jerusalem ene qasali maadaga. Eunu Rom ono ha odi bahic ijanu qasali maadegan," don.

#### *Juda dana age Pol qagadocnu madein*

<sup>12</sup> Cojageceb qasil wele Juda dana leih cegulimeig cisdock gabandooin. Age wa sabca qee jec bibileig Pol qagadocnu je cagooin. <sup>13</sup> Dana cegulimeig je gabandoin agena sanijec eu 40 wooldoc. <sup>14</sup> Odimeig age ihanec dana benbenca, Juda agena matumatuca ageca limeig maadein, "Ege wa sabca qee jec bibileb Pol qagadocnu je cagoqa eu gagadic muduqa. <sup>15</sup> Odocob qila age cegulec ben ageca je suldock Pol han iloca teceb Pol suldock ageca nigiannu, uqana je mele bahic eu sisildumeb doqan ec mimeig je suldoiga. Euqa uqa ene qee calec ninijeb umna qagadocnu sumudeqan," adein.

<sup>16</sup> Odocob Pol cebinag melah Pol qagadocnu madein je eu don. Eunu uqa han dana agena cabi jona timei Pol madon. <sup>17</sup> Odocob Pol han dana 100 agena ilo oso utadocob hocob madon, "Dana haun i han iloca ehudi ehi laga. Uqa je oso madugian," don. <sup>18</sup> Eunu han dana aquniadec eu ehudi han iloca ehi len. Odimei madon, "Dana haun i uqa hina mahecnu je osoca. Eunu gihadoc dana Pol dana haun i hinaca ehudi ahocnu niniteceb ehudi ahuga," don.

<sup>19</sup> Odocob han ilo uqa dana haun eu eben umei ale cuhanuc limesi sisildon, "Cel je ija mategan?" don.

<sup>20</sup> Odocob uqa madon, "Juda age uqadec hina Pol ehudi cegulec amagana nocnu sisilhuqagannu je wele cagooin. Uqana je mele bahic eu sisildumeig doqagannu euna memeig je sulduhuqagan. <sup>21</sup> Euqa dana am euna agena sanijec eu 40 wooldoc age jahunimeig uqa sumudi biluqagan. Age je cagoc oso madein eu odi age wa sabca qee jec bibileig Pol qagadoqagan ein. Eunu agena je cain dogaun. Age qila odoqagannu saciadoiga billeiga. Odocob hinana je adi dah moqagannu dih sumudegina," don.

<sup>22</sup> Odocob han ilo je gatiti madon, "Hina in oso je ija mataga eu cain madogaun," don. Odimei dana haun eu suldock ceseli nuen.

#### *Han dana ilo Pol suldock uqa gabman ilo Filiksca nuen*

<sup>23</sup> Odimei han ilo uqana han dana 100 agena ilo lecis utaaeceb leceb il maalen, "Han dana 200 Sisaria beloqagannu saciaadesia. Hos dana 70ca sawal dana 200ca witic 9 kilok beloqagannu ageha saciaadesia. <sup>24</sup> Hos leih Pol euna nuigiannu saciaadesia. Odocob cofdu cuhadodosi ehi nui gabman dana Filiksca Sisaria ono mudesia," alen. <sup>25</sup> Odimei han ilo je oso jaqen eu i edi:

<sup>26</sup> "Ija Klodias Lisias, hina dana meca bahic Filiks, Sisaria gabman ilo feele higina," don.

<sup>27</sup> "Dana i ija sulduhigina Juda dana hewimeig qagadoqagan odoin. Age oodogin fimig uqa Rom hatunadec eu dumieig eunu ija ijana han danaca numeb dana ebeneGANADEC cacawudom. <sup>28</sup> Odimig ija uqa eetanu hewein eu gug dugennu ehudi agena cegulec benna ehi nom. <sup>29</sup> Odimig age agena loo jenu balijimeig hewein eu fem qa uqa ameg oc cal mecnuka, gihadoc jona lecnuka dewegna cahuldoc eu oso qee felem. <sup>30</sup> Odocob saen ija Juda dana leih uqa qagadocnu saciadogina ec dumignu hinaca mahuc suldockin hoia. Ija dana age uqanu um qoin eu age eetanu uqa hewudein eu hina amenna madoqagannu je gatiti maadem," don.

<sup>31</sup> Eunu han dana je toodu saciادoin. Age Pol ehudimeig witic euna Antipatris ono calein. <sup>32</sup> Cojageceb han dana jic coboin age haun agena cabi jona ceceselegin hos dana age uqaca belein. <sup>33</sup> Numeig age ehudi nui Sisaria ono calein. Gabman ilo jaqec je eu uuteig Pol uqa ebenna mein. <sup>34</sup> Odocob gabman ilo Filiks jaqec je sanjimei Pol uqa cel hatunadec ec sisildon. Saen uqa Silisiadec ec dumie <sup>35</sup> uqa madon, "Dana age hina dewennu um qoin eu age caleceb ilija hinana je dah mihigen," don. Odimei uqa jo King Herod bilia euna cofdodobil biligiannu je gatiti maaden.

**24**

*Juda dana age Filiks amegna Polnu je me qee madein*

<sup>1</sup> Deel 5-pela hedocob ihanec dana ilo, Ananaias, Juda agena matu leihca, agena je gesilec saenna cesuladec dana, ijan Tetallas, uqaca age Sisaria ono nimeig Filiks amegna limeig Pol dewegnu balijein.

<sup>2</sup> Odocob Tetallas ijan ocob limei Pol dewegnu odi um qu maden, "Dana meca! Hinana me odocna egena hatu i cofdodogon saen cecelac bahic malol bibili hom. Odocob ceteteh meme geh bahic egena hatu ijan menu mudein." <sup>3</sup> Ege ceteh i edi geh bahic saen cunugna gale gena. Eunu ege cunug hegaga oqona. <sup>4</sup> Ija hinana saen geh cusduhaga qee tel qa eunu ija ninihigina egena je saecnu nag odi dah mecnu wawin qoia. <sup>5</sup> Ege dana i uqa duman me qee bahic eu foqona. Uqa Juda dana cunug hatu cunugna bilegina sisgaladi cobona. Odimei uqa Juda dana am oso Nasaret egina agena iwalaadec ilo oso bilia. <sup>6-8</sup> Uqa tempel ha ceteteh me qee ehi li gegehin mudigia oodon hewom. [Ege egedodoc egena loo je gadacna uqana odoc gesilecnu je gabandoum qa han ilo Lisias dana am ben dunuh limei gagadic odocna ege ebenigenadec ehuden. Odimei Lisias uqana um qoc dana hina amenna hoqagannu je gatiti maaden.] Hina dana i sisildufeg hina hinadodoc ege eetan dewegnu um qoqona eu dogan," en. <sup>9</sup> Odocob Juda dana cunug limeig je eu mele bahic ein.

*Pol Filiks je oso madon*

<sup>10</sup> Odocob gabman ilo Pol ebenna je madecnu iohdochob Pol maden, "Hina hatu ina je gesilecnu cabi gel mati bilem eu ija dugina. Eunu ijadodocnu hina amenna je wadacduhecnu wawi ceelena. <sup>11</sup> Hinadodoc sisiladecem mahecebil docnu ihoc deel 12-pela qee hedoc ninijen ija Anutnu cuha figennu Jerusalem ono tem. <sup>12</sup> Odocob Juda dana age ija osoca tempelna fee dadanoowon qee fecitelein. Odimeig age tempelnaca agena cuha jonaca, taun bennaca dana ihulahalaadigin ha qee fecitelein. <sup>13</sup> Odimeig age qila ija deweninu um qoginanu ha je mele oso qee mahowain. <sup>14</sup> Euqa ija je i mele mahigina. Ija jic eu toodugina eu age cahuldogina egina euna ija ege jajanigeil agena Anut binan suligina. Ija ceteh cunug Mosesna loo je madenanuca, je hahun madec dana agena jaqec jenuca eunu ha wawi meleena. <sup>15</sup> Ija Anutnu wawi meleec hewi sumudigina odi i ageha hewi sumudegina eu dana cunug meca me qeeca cunug age cal mecnadec ceseli cajoqagan. <sup>16</sup> Eunu ija Anutca, danaca, amagana ijana kobilca, ijana wawina cisdochca, jic coboc me himec foqagannu gagadic migina," en.

<sup>17</sup> "Odocob cabi gel leih ija Jerusalem ono qee bilelem. Odocob hibna ija Jerusalem ono ceseli limig ijana dana cajaca ono bilegina agena meen qaig sawen eundec siwiadecnu ehi li aadig ihanii hetaga docnu ono tem. <sup>18</sup> Ija saen euna tempelna tatawigin fecitein. Ija Juda agena soidoc kobil odi hedom.\* Ono dana am ber qee cedi ehi lelemon. Odocob ija qee odudecemin je alalac tel. <sup>19</sup> Euqa Juda dana leih Esiadec age ono bilein. Age ijana jecafi agedodoc hina amenna hu tawimeig ija deweninu um qocnu biloub. <sup>20</sup> Qeffi, dana i age ene bileyina culadecem agedodoc ija cegulec benna amagana tawem cel cahuldoc ija odom fein eunu mahoqagan. <sup>21</sup> Ija ceteh osol himec amagana tatawi qasali maadem, 'Ija qila ijana je gesiliginia ija dana cunug cal mecnadec ceseli cajecnu wawi meleena ec maden eunu hina amenna tawiga!' adem," en.

<sup>22</sup> Odocob Filiks uqa Jisasna jic eu odinu du cuhadon je gesilecnu menen. Uqa maaden, "Isi han ilo Lisias hocob ija ceteteh i gesili maadigen," aden. <sup>23</sup> Odimei uqa han dana aquniadec Pol cofdociu je gatiti madon. Euqa uqa Pol gihadoc jona biligianqa uqa ceteteh uqana danah cois ahu utuqagannu ec madon.

*Filiks Pol gihadocna mudeceb cabi gel lecis bilen*

<sup>24</sup> Odocob hibna deel leih hedocob Filiks uqa aideg Drusilaca hoshin. Aideg uqa Judadec. Uqa Polnu je suldocob ehudi ehi lecebil uqa Pol Krais Jisasnu waug meleecnu mamaaden Filiks dah mudi bilen. <sup>25</sup> Euqa Pol uqa ititom kobil odocca, me cobocca Anut deel hib cit qocna humei gesilgigi tutuc migeceu madeceb Filiks uqa cucuiimei madon, "Hina qila cois nuugale. Ija saencafi haun mahecemin hogan," don. <sup>26</sup> Saen euna himec uqa maden Pol meen qaig utigian ec uqaha cisdon. Eunu uqa Pol utadocob hocob je madolosi.

<sup>27</sup> Odocob cabi gel lecis hedocob Posias Festas uqa Filiksna cabi cudun on. Odimei Filiks Juda dana age uqanu gale adigiannu Pol gihadoc jona culdeceb bilen.

\* **24:18:** Tetallas uqa Pol eu tempel Anut amegna gegehin mudigia oodon ec maden. Pol uqa jejeg hehewi uqa soidoc kobil odi hedumei tempel dunuh len ec maden.

## 25

*Pol uqa Sisa Juda dana agena balijec je eu haun dah migiannu sisilin*

<sup>1</sup> Odocob Festas uqa Judia hatu cofdochru humei deel cijed hedocob uqa Sisariadec Jerusalem ono ten. <sup>2-3</sup> Ono ihanec dana benbenca, Juda aquniadec dana ageca age Festasca limeig Pol dewegnu balijein. Odimeig age jicna hohob Pol qagadoqagannu wele saciadoinnu Festas agena gale adec toodumei Pol Jerusalem suldocob ceseligiannu ninidoin <sup>4</sup> Festas jejenega hewi maaden, “Pol uqa Sisaria ono gihacdoc jona mudein bilia. Ijadodoc ono nag odi ceseli nugen. <sup>5</sup> Eunu agena iloilo culadecebile ija gami numeb uqa cetehe cahuldoc oso odonfi dewegnu um qoiga,” aden.

<sup>6</sup> Odocob Festas ageca deel 8-pelafo, 10-pelafo eu odi bilimeig Sisaria ono non. Cojageceb deel osona uqa je gesilec cudunna bilimei Pol hamol ehudi ehi loqagannu je gatiti maaden. <sup>7</sup> Odocob Pol hamol leceb Juda dana Jerusalemdec noin eu age talildu tawimeig age dana i uqa cetehe me qee mati bahic odonnu madein qa um qoc je eu age mele je oso madocwe qee. <sup>8</sup> Euqa Pol uqadodoc cahahadoc je maden, “Ija Juda agena loo jeca tempelca Sisaca age cunugnu cahuldoc oso qee odolom,” en.

<sup>9</sup> Euqa Festas uqa Juda dana agena gale adec toodugia cisdon euna uqa Pol sisildon, “Hina Jerusalem ono timesgum qoc je inu ija amina haun madecem gesiligenfo?” don.

<sup>10</sup> Euqa Pol jejeg hewi madon, “Ija Sisana je gesilec cudunna tawiga eu ene hina temtoum. Ija Juda dana i age cahuldoc oso qee odadelem eu du cuhadogona. <sup>11</sup> Eunu ija cahuldoc oso odonfi ija cal mec ameg ocnu ihoc ija eu wooldocnu qee sisilelem. Euqa agena je meleca qee ija um qitecebifli oso ija eu age ebenegana mitecwae qee. Ija Sisa amegna je haun madigennu sisilhigina,” don.\*

<sup>12</sup> Odocob Festas uqana dado mudec dana gami togodumeig jejeg hewi madon, “Hina Sisa amegna je haun madecnu madaganu hina euna nuegan,” don.

*Festas uqa Agripa Polnu sisildon*

<sup>13</sup> Odocob saen leih hedocob King Agripa<sup>†</sup> aideg Benaisica Sisaria ono Festas feele dowasa hoshin. <sup>14</sup> Odimesi ale ono deel leih bilimesi Festas Polna je gesilen eunu Agripa sildi madon, “Dana oso ene uqa Filiks gihacdoc jona culden bilina. <sup>15</sup> Saen ija Jerusalem tecemin ihanec dana benbenca, Juda agena matumatuca uqa dewegnu balijein. Odimeig uqa cal mec ameg ocnu ija cois igennu sisiltein. <sup>16</sup> Euqa ija Rom agena kobil eu odi qee ec maadem. Ege dana oso uqa dewegnu balijecibile uqa age ebenegana deweg tudocnu mahuc qee moquaun. Euqa casac dana uqa um qudec dana eu age uqaca mecidodii um qudec je eunu madocobil uqa uqadodoc cahahadoc je maadigian. <sup>17</sup> Eunu saen eu age ene hu gabandoi euna ija qee daleeleem qa cojageceb deel osona ija je gesilec cudunna bilimig dana eu hamol ehudi ehi lecnu je gatiti maadem. <sup>18</sup> Odocob um qoc dana eu age caji tawein qa dana eu uqana cahuldoc me qee bahic oso madoqagan ec cisdom age eu odi oso qee madelein. <sup>19</sup> Euqa agena um qoc je cunug eu agena cuha fecnu kobilnuca dana oso ijan Jisasnuca himec. Odocob Jisas i uqa wele cal men qa Pol uqa cebac bilia ec madena. <sup>20</sup> Ija jic osona je mele bahic je i gesilecnu oso qee felem. Eunu ija Pol Jerusalem ono leceb je i haun ono gesilecnu ihocfo ec sisildom. <sup>21</sup> Euqa Pol uqa Sisa amegna je haun madigannu sisilten. Uqa ene cofdodobil bibileb Sisa je eu gesiligiannu sisilten. Eunu age cofdodobil leceb ija Sisaca ihoc suldocmin nuigian eunu je gatiti maadem,” don.

<sup>22</sup> Odocob Agripa Festas madon, “Ijadodoc dana i dah mudecnu gale tena,” don.

Odocob Festas jejeg hewi madon, “Hina uqadec dah mudegan,” don.

<sup>23</sup> Odocob deel osona Agripa aideg Benaisica cegulecna hocobil bala hewalecebile udockifi bileyinana jo ben hamol euna han dana mecacca ageca taun ben aquane dana gami lein. Odocob Festas je gatiti maadeceb Pol hewi hamol ehudi ehi lein. <sup>24</sup> Odimei Festas maden, “King Agripa, cunug qila ene egeca biluqa, age dana i feginja Juda dana cunug Jerusalemca ene bileyinaca uqa dewegnu uh megina, age uqanu je ahui ija matein. Age gemanaganu uqa maha ina cebac geh Cain bileydin eu odi utaein. <sup>25</sup> Euqa ija uqa ameg oc cal mecnu cetehe oso qee felem. Odocob uqadodoc Sisa amegna haun tawecnu sisilten. Eunu ija uqa suldocnu cisdom. <sup>26</sup> Euqa ija cetehe oso mele bahic uqanu Sisa jaquocnu oso qee felem. Eunu ija uqa ene age amagana hewi ahuga. Odocob King Agripa, hinaca bahic, hewi ahuga! Eunu hibna uqana je eu wali fimig ija cetehe eunu jaqigen. <sup>27</sup> Ge, ijana cisdoc eu odi. Ija gihacdoc dana oso Sisaca suldugenqa uqanu um qoc je uqana gug oso qee camasac mudigaun eu tutuc qee,” en.

\* <sup>25:11:</sup> Rom agena loo je oso eu Rom dana oso uqa gesilec dana eu uqana je qee dah mi cuhadol ec cisdufei uqa Sisa amegna uqana je madocob Sisa gesildagiannu gesilec dana sisildocnu ihoc ec maden. Sisa eu Rom cunug agena king ijan.

† <sup>25:13:</sup> King Agripa uqa King Herod i uqa Jon waliag, Jems, qocob cal men eu uqa melah. Age Aposel 12 feiga.

**26***Pol Agripa amegna je sildi madon*

<sup>1</sup> Odocob Agripa Pol madon, "Hina qila cois hinadodocnu hinanu je madaga," don. Odocob Pol eben suli umei uqadodoc uqanu je odi maden, <sup>2-3</sup> "King Agripa! Hina Juda agena kobilu sisilecnuca cunug du cuhadogona. Eunu ija ijadodoc ijanu mele je himec qila hina amenna Juda dana ceteteh cunugnu ija balijitein eunu ha madigen eu me bahic. Eunu ija hina cehna dah miti bibilem mahigen," en.

<sup>4</sup> "Juda dana cunug age ija wele mel haunna adi bilem eu dogina. Ija simnadec sanan mimig ijana hatuna bahicca Jerusalemca bibili cocobi hom adi bilem eu age dogina." <sup>5</sup> Wele bahic age dudu hoin eu age ija deweninu je qasali madecnumi eu casac bahic ija egena am gun bahic euna bilem eu Farisi, agena jic coboc toodu cuhadom age gaid dooloig. <sup>6</sup> Odocob Anut uqa je hahun ege jajanigeil maaden eunu wawi meleecna eunu qila ija eue temtecnawiga. <sup>7</sup> Je hahun eue Juda dana agena siluh 12-pela cunug ocnu wawaga ben bahic ninijen age Anut witic cahinegca binan suloloig. O King, wawi meleec eunu Juda dana age balijitegina. <sup>8</sup> Eetanu Juda age madegina, 'Anut uqa cal mecnadec tuladiceb cajecnu wawige qee meleeciau,' egina?" en.

<sup>9</sup> "Ija jic filfilna Jisas Nasaretdec ijan me qee mudigen ihoc ec cisdom. <sup>10</sup> Jerusalem ono eu odi odom. Ija je cois ec ihanec dana benben cabi iteceil Anutna qagu coboc dana cajaca mati bahic gihacdok jona madem. Saen age euna aqeceil cal meceil ija eunu cois olig. <sup>11</sup> Saen geh bahic Juda agena cuha cunug jonana culumen adolig. Agena wawaga meleec hibemdoqagannu odadolig. Ija eu agenu gemani gagadic beben taun ben hatu filfilna njoloig han mige bili jabadi tooadolig," en.

*Pol adi Kristen mennu sadon*

(Aposel 9.3-19; 22.6-16)

<sup>12</sup> "Odocob ija eu odi odigennu ihanec dana benben agena je gatiti matiti cabi iteceil Damaskas nuem. <sup>13</sup> O King, nunuigin jicna cahineg cam gemo cehen tatawen saonadec fulacdoc camna iletet wooldoc ijaca dana osoben belom gami ilet talgen fem. <sup>14</sup> Odocomin ege cunug toni mahulom ninijuqun je jeg oso Hibru jena ija mateten dah mem. Uqa maten, 'Sol, Sol! Hina eetanu jabiti tooottagana? Hinadodoc ceteh aiga tohol qocom jeihina eu bulmakau cingife colum hewec dana uqa kom aiga ihocdocob jaih toholeceb uqadodoc qonawee qihina,' ten. <sup>15</sup> Odocob ija sisildom, 'Tibud, hina in?' dom. Odocob Tibud maten, 'Ija Jisas, hina jabi toootdogona eu. <sup>16</sup> Euqa caji tawaga. Hina ijana cabi dana ehihigennu hinaca camasac miga. Hina qila ijana odoc fimeg qasali maadegan. Odocob hibna ceteh ihachigen eunu ha qasali maadegan. <sup>17</sup> Ija Isrel danaca Juda dana qee eundecca age ebeneganadec cacawilhi oihimig eu ageca sulhigen. <sup>18</sup> Hina eu age amaga hulelduadecem age tu hibemdumeig fulacdocna falicdqagan. Odocob Setenna gagadic odoc culimeig Anutca hoqagan. Eunu ijanu wawaga meleecab agena silail cagasiadecemin agena cudun Anut dana qagu maden ageca oqagan,' ten," en.

*Pol uqana misin cabinu Agripa madon*

<sup>19</sup> "Eunu, O King Agripa, ija saonadec majaudoc amina calen eu qee wooldolom. <sup>20</sup> Ija casac Damaskas me je maadimig hibna Jerusalemca Judia hatu cunugnaca Juda dana qee eundec ageha maadem. Agena silail hibemdumeig Anutca falicdoiga ec maadem. Odimeig age agena silailnu tului falicdoin uqana odoc eu ihacecu ec maadem. <sup>21</sup> Eu odi odomnu Juda dana tempelna hewitimeig qagatoqaga odo. <sup>22</sup> Weledec hocob deel ina bahic Anut ija cesulteten ija dana ijanagaca ijanagaca qeeca je qasali maaadi ene tawiga. Ija madigina je hahun madec dana ageca Mosesca odi cali hugian ein eunu himec maadigina. <sup>23</sup> Je eu odi Anutna Krais uqa dain ben dugian. Odocob uqa cal mecnadec aquiniadi ceseli cajigian. Uqa Juda dana Juda dana qee eundecca fulacdocna je Anut age cahahaadecnu ihoc ec maadeceb doqagan," en.

*Pol Agripa hina wawin meleecnu bahic ec madon*

<sup>24</sup> Odocob Pol eu odina uqadodoc uqanu je mamaden Festas gagaladon, "Pol, hina gad! Hinana doc ben bahic odiheceb hina gad magana!" don.

<sup>25</sup> Odocob Pol je jeg hewi madon, "Festas meca! Ija gad qee. Ija je madigina eu mele bahic, docnu me bahic. <sup>26</sup> King Agripa uqa ceteteh i agenu dona. Eunu ija je cunug saluqi u madugina. Ceteteh i eu jahunec sucunua qee caele. Eunu ceteteh i cunug dona eu ija dugina," don. <sup>27</sup> "O King Agripa, hina je hahun madec dana agena jenu wawin meleenafo? Hina wawin meleena eu ija dugina!" don.

\* **26:4:** Pol uqa sim bilen saenna uqa Tasas taun ono Silisia hatu nagna bilen. Age Aposel 22.3 feiga.

<sup>28</sup> Odocob Agripa Pol madon, "Saen gohic ina hina oditecem Kristen dana migen ec cisdogonafó?" don.

<sup>29</sup> Odocob Pol jejeg hewi madon, "Saen gohicfo, saen cecelacfo ijana Anutnu inondoc eu hinaca dana qila ene ija dah miteginaca eu age ija cinigwe ibuldoqagan. Sen iqa agenu Cain biliau!" don.

<sup>30</sup> Odocob kingca gabman iloca Benaisica cunug age gami bilein age caji tawein.

<sup>31</sup> Odocob age hamol osona belimeig togodudu madein, "Dana i ameg oc cal mecnua gihacdoc jona mudencnu caeteh oso odocnu qee nijel," ein. <sup>32</sup> Odocob Agripa uqa Festas madon, "Dana i uqa Sisa amegna je haun madecnu qee sisiloubmi ege gihacdoc jonadec besitoum," don.

## 27

### *Age Pol wagna mudecebil Rom ono nuen*

<sup>1</sup> Odocob ege wagna Itali hatuna nuecnu je nijeceb eu age Pol gihacdoc leihca han dana 100 agena ilo oso ebenna mudein.\* Uqa ijan Julias. Uqana han am age "Sisa Ogastasna han am" doloig. <sup>2</sup> Odocob ege wag Adramitiadec eu taun Esia lan toodu njeginana nuigiannu saciadon tatawen euna tobi belom. Aristakas uqa Masedonia dana Tesalonaikadec uqa egeca osoben belom. <sup>3</sup> Cojageceeb ege Saidon taun ono calom. Odocob Julias uqa Polnu waug qocob uqa Pol cois ec madocob uqa uqana danah eundecca limei meciadeceb ceteteh utoin. <sup>4</sup> Odocob ege onodec haun wag tobimeb belom qa fufu medemige cagu qahi ege nom odi becebnu ege Saipras nui hibilohu isec qaqla belom. <sup>5</sup> Odimeb ege Silisia Pamfiliaca macasna qeti limeb Maira taun ono calom, eu Lisia hatu ono. <sup>6</sup> Ono han dana 100 agena ilo Aleksandriadec wag Itali ono nuigiannu tatawen fimei wag euna cedi migen.

<sup>7</sup> Odimeb ege macas launa deel mati cebitnana cobom. Cabi memeb hibna taun Naidas ono calom. Fufunu ege macas eu gemogemo odi toodu nuecwe qeenu ege Krit nui hibilohu isec qaqla Salmoni cemenug mumudi cululdeb macas lan toodu belom.

<sup>8</sup> Odimeb ege lan toodu belom. Cabi memeb wagnu macas sucun qoc cudun me bahic egina ono calom, eu Lasia taun cemenug nijia.

<sup>9</sup> Odocob ege ono saen cecelac bahic cusdom. Juda agena Cud Bilec Saen eu hedon.<sup>†</sup> Eunu wag cobocnu saen me qee calen. Odocob Pol uqa cisdon eu maaden, <sup>10</sup> "O dana, ege wagna nuecnu saen me qee bahic eu ija figina. Ceteteh wagca cunug fadaligian. Dana agena cebac biley ha felacudoqagan," aden. <sup>11</sup> Euqa han dana 100 agena ilo wag hewec dana wag gugca je madesin eu hewen qa Polna je eu qee hewel. <sup>12</sup> Odocob wag tawec cudun macas sucun qoc eu duen saenna ono tawecnu me qee. Eunu dana matica age cisdoin, wag macas gemo lecnu cois ein. Odimeig Finiks ono nuecnu ihofci belegannu cisdoin. Finiks eu wag cudun macas sucun qoc Krit nuina eu cam noc anse meulaca isec macas mecidoc tawoloi. Odocob age ono wag ehi li duen saenna mecebile tawecnu ihoc ein.

### *Fufu ben hocob macas qahen*

<sup>13</sup> Odocob tim me bahic cam noc ansena isec fulufuluen. Odocob dana eu age agena cisdok ihoc ligian ec cisdoin. Age anka heweceil teceb Krit nui lan cemenug bahiclein.

<sup>14</sup> Euqa nag odi bahic fufu gagadic Jawalti egina eu cam bec anse isec fulufuluen cajen. Fufu nuina isec cajimee macas qahen. <sup>15</sup> Fufu caji wag qocob wag fufu amegna bahic nonnu hewecwe qee ege culdochum fufu u hewi nuen. <sup>16</sup> Odocob ege Koda nui nag

macas gemo leceb qaqla cobom. Ono wag nag wag ben uqa didon eu wag benna cabalu mecnua odom qa cabi bahic. <sup>17</sup> Eu age didocobil wag benna ten. Odocob age halu gagadic heleceil wag ben bisalu leceil diadimeig wag ben qataneiaunn qagein. Eu age Libia hatu lanna ono gadgad esic of qowainain cucuein eunu age lai hewegin toneceb wag culdeceil fufu fulufuluaaden belein. <sup>18</sup> Odocob fufu ben bahic odi huhu nijen eunu deel osoma eu age ceteteh wagnadec cedi helec sanan mein. <sup>19</sup> Odocob deel eu toodocob eu age wag uqana cabi ceteteh age ebenegagulna cedi helein.<sup>‡</sup> <sup>20</sup> Deel mati bahic ege cam malagaqa qee folom. Odocob fufu odi huhu nijen. Euna ege cahahagecnu qee cisdolom qa ege fadaleqannu cisdom.

\* <sup>27:1:</sup> Luk uqa "ege" haun jaqen, eunu Pol uqa Rom taun ono nuen saenna Luk uqa gami belesin eu odi fena. Age Aposel 16.10ca, 21.17ca euha feiga. † <sup>27:9:</sup> Cud Bilec Saen eu Anut Dana Cajaca Cunug Agena Silail Cagasiadennu Deel. Age Wok Pris 25.9 feiga. Saen euna eu Septemba leceb Oktoba odi fufu gagadic eu Mediterenian Macasna fulufuluen cajen. Odocob wag age macas eu alildudu beloloig. ‡ <sup>27:19:</sup> Cabi ceteteh eu wagna haluna hewen. Eunu wag eu cabi ceteteh macas dunuhna didocob wag eu mahuc qee nuel.

<sup>21</sup> Odocob hibna dana eu age saen cecelac bahic sab qee jecelib Pol amagana tawimei maaden, "O dana, age ijana je doubmi wagna Krit nui qee culdi hoummi age ceteteh qee fadaloub. <sup>22-24</sup> Euqa qila ija maadigina, witic ensel oso ijana Anut ija binan suligina uqa suldocob ijaca hoia. Odimei uqa mateian, 'Pol, cain cucuiagaun! Hina Sisa amegna tawec bahic tawegan. Odocob Anut uqana waug qocna dana cunug wagna hinaca cobogina i cahahaadeceb cebac biluqagan,' teian. Eunu cisdu cuhadoigale! Agenadec oso qee fadaleiaun, wag himec fadaligian. <sup>25</sup> Dana age cisdu cuhadoiga! Anut mateian odi dih cali hugian eu ija wawi meleena. <sup>26</sup> Euqa ege nui oso uqana lanna ono eli li heligian," aden.

<sup>27</sup> Saen euna witic 14 ege fufu fulugegen Mediterenian macasna cobom. Witic tu gemo eu odi wagna cabi dana agena cisdock madein lanna cedec muduquna ein. <sup>28</sup> Eunu age halu cetehe culumenga qagec culdegin nocob macas ameg eu 40 mita eu odi fein. Nag odi gieceb haun eu odi odimeig macas ameg eu 30 mita eu odi fein. <sup>29</sup> Odimeig age wag meen tobocdai ec cisdumeig cucuiein. Odimeig anka 4-pela felaculdecebil wag bigna isecdec macas dunuh non. Odimeig mahuc cojagigia bili inondoin. <sup>30</sup> Oodogin wagna cabi dana busaloqaga odoin. Age wag nag macasna hewecebil nocob uhulec eundec anka wag mededec culdecebil nugiannu euna memeig tein. <sup>31</sup> Euqa Pol han dana 100 agena ilo uqana han danaca maaden, "Wagna cabi dana i age wagna qee bilecebifl ege cunug cahahagecnu ihoc qee," aden. <sup>32</sup> Odocob han dana age halu wag nag hewecebil tawen eu cagocobil wag nag eu nuen.

<sup>33</sup> Cam mamahon Pol uqa cunug sab jecnu maaden, "Qila age deel 14 sanijadec bahic sab qee jec bilein. Age cetehe oso qee jelein. <sup>34</sup> Eunu ija maadigina sab leih jeiga. Age sab i jimeig cebac biluqagannu. Age dewenegana cetehe nag osoha qee fadaleiaun," aden. <sup>35</sup> Je eu madi hedumei Pol bred leih cedimei Anut inondumei eu age cunug amagana fenimei jecnu sanan men. <sup>36</sup> Odocob age gagadic cisdumeig cunug sab jein. <sup>37</sup> Dana 276 cunugca wag euna toboin. <sup>38</sup> Hibna cunugca odi ihoc jimeig age wag hetec mudencu wit cedimeig cunugca macasna helecebil non.

### *Wag lanna qocob qatanen*

<sup>39</sup> Cojageceb wagna cabi dana age macas lan fimeig qa lanna hoqa ec qee doloin. Euqa age macas sucun qoc esicca eu fimeig wag euna esic qumeig salali tobigan ec cisdoin. <sup>40</sup> Eunu age anka cagocobil macas dunuh non. Odocob saen euna himec age halu culum qagec eu cufalein. Odimeig lai medena hewegin ten, fufu wag fuludocob medena isec gagadic migiannu. Odimeig cesawi lannalein. <sup>41</sup> Euqa wag mede esic qatani ti of qocob maha heweceb tawen. Oodon bigna isec macas gagadic bahic qahimei qonqon qatani susul falen.

<sup>42</sup> Odocob han dana age gihacdoc age agenadec oso cesawi lanna limei busaledainnu qagaadoqaga bili je madi cagoin. <sup>43</sup> Euqa han dana 100 agena ilo Pol cahahadugia cisdon. Eunu uqa eu odi cain odowainnu cahacaden. Odimei uqa dana cunug ihoc wa cesawoqagan eundec age aquni wagnadec bitacimeig cesawi lanna loqagannu je gatiti maaden. <sup>44</sup> Odimei dana leih wagna culadein age hib wag qatanen fan eundec cedi mugumuga tacimeig cesawi lanna loqagannu maaden. Odocob eu odina ege oso fadalecca qee me himec wa cesawi lanna hom.

## 28

### *Pol uqa Molta nuina bilen*

<sup>1</sup> Saen ege me bahic cesawi hu lanna calimeb ege nui eu ijan Molta egina odi dom. <sup>2</sup> Odocob dana jobon onodec egene wawaga qocob egeca danah mimbet cetehe loo igein. Wa hoc sanan memen duancaca hulen eunu age ja hudimeig ja cudun li bielecnu magein. <sup>3</sup> Pol ja sognadec cedimei jana memen man sononec ja ededannu cali humei eben qu ji caculi nijen. <sup>4</sup> Dana jobon nui onodec man sononec Pol ebenna caculen fimeig togodudu madein, "Dana i eu acahna qagaadec dana. Cois, macasnadec busalen qa waug madec eu dana qagaadecnu njija eunu cam geldocab cal migian," ein. <sup>5</sup> Euqa Pol eben filifilidocob man sononec jana tonen. Odimei uqa man qee qu jecwe tawen. <sup>6</sup> Odocob age Pol eben waluijanfo, qee mahulimei cal migianfo eu feqan imeig sumudein. Euqa hibna saen cecelac sumudi bilimeig cetehe eu odi qee caleceb fimeig agena cisdock ceseleceb madein, "Uqa tibud oso!" ein.

<sup>7</sup> Maha oso cudun i cemenug nijen eu dana uqa nui inadec ilo uqana, uqa ijan Pabllos. Uqa ehti uqana jona leceb deel cijed uqa nijoug nijom. <sup>8</sup> Odocob Pabllos memeg cabalna ninijen deweg dain cahuleceb fojecca waug golca nuen. Odocob Pol uqana hamol nagna li inondumei eben ilona meceb hag medon. <sup>9</sup> Odocob cetehe odoc ben odi caleceb fimeig hag dana cunug nuina bilein eu ceguleceb hag me maden. <sup>10</sup> Odocob age ege ceteteh wawige

ceelianni mati bahic igein. Odocob saen ege wagna ceceseloqon wagna nuecnu ceteteh igein.

*Pol Rom ono nuen*

<sup>11</sup> Wag qatanec saenna hibna jagel cijed hedocob Aleksandriadec wag ijan, "Tibud Gahca," nuina ono tatawen duen saen hedocob euna belom. <sup>12</sup> Ege Sairakus taun benna calimeb taun benna ono deel cijed nijom. <sup>13</sup> Onodec haun wagna belimeb Rigiam taun benna calom. Deel osa fufu qahec sanan men fufu saut isec odocob deel lecis dunuhna Putiolai taunna calom. <sup>14</sup> Odimeb ege ono wawaga meleec cotigeil leih ceguladocomun cuha osol eu age gami nijecnu cesusgein. Odocobnu eunadec ege Rom hom. <sup>15</sup> Ege Rom qee calec jic bebeleb wawaga meleec cotigeil age egenu dah mimeig Apiasna Fajec Cudunna odi humeig ege meciguagannu hoin. Leihha age Loo Dananu Jo Cijed egina euna humeig ege meciguagannu hoin. Pol meciadimei Anut hetaga ec je madumei waug duen.

*Pol Rom dana me je maaden*

<sup>16</sup> Odocob saen ege Rom hu calocomun Pol cuhanuc han dana oso cofdodob nuecnu cois ec madoin.

<sup>17</sup> Deel cijed hedocob Pol Juda dana taun ben dunuh bilein agena iloilo maadeceb cegulein. Saen age ceguleceb uqa maaden, "O cotiel! Ija Juda dana cajacaf, ege jajanigeil agena kobilbo qee cahuldolom euqa Jerusalem ono gihacdoc jona mitein odocob Rom gabman ebenna sultecebilem. <sup>18</sup> Rom age sisiltmeig age ameg oc ija cal mecnu dewenina cahuldoc qee feleinnu gihacdoc jonadec besutuqaga odoin. <sup>19</sup> Saen Juda dana je eunu cois qee ecebil Sisa amegna je haun madecnu sisilemqa ija ijana dana cajacanu um qoc je oso madecwe qee. <sup>20</sup> Eu odinu ija Isrel dana cajaca agena gaunanaga mamani sumudi bileyina eunu bahic sen i dewenina ninijen biliga. Gug eunu ija age meciadecemin je i togodocnu niniadiga," aden.

<sup>21</sup> Odocob eu age uqa madoin, "Ege Judiadec hinanu jaqec je oso qee olom. Cotigeil onodec hoc ha hinanu je me qee oso qee ahu magelein. <sup>22</sup> Euqa ege hatu cunugna dana am i hina eundecnu cahuldogina ec madegina eu doqona. Eunu ege hinana cisdoc madecem docnu wawige nijia," doin.

<sup>23</sup> Eunu age Pol gami cegulecnu jagel deel oso gadac mein. Odocob dana am ben bahic Pol ono bibilen cegulein. Qasildec je maaadi Anutna Me Culnu sildiaaden witic men. Uqa Mosesna loo jeca je hahun madec dana agena jeca alenadec Jisasnu sildiaadi wawaga meleigianni temduduen. <sup>24</sup> Odocob leih age ugana jenu wawaga meleen qa leih age eunu wawaga qee meleel. <sup>25</sup> Eunu age agedodoc cois qee eeig buadein qa age qee buadec Pol je osol i maaden, "Kis Gun je hahun madec dana Aisaia cona age jajanagaij je maaden eu mele!" <sup>26-27</sup> Uqa odi maden:

'Dana cajaca i age ilohonoga cisdocnu eu cal mec bahic.

Age dahiniga cufa qoin.

Odocob age amaga amusein.

Eunu nuimeg dana cajaca i age odi maadaga,

"Age dah moqagan qa qee dowain.

Age foqagan qa wawaga qee fogo doiaun," adaga.

Qeefami age amagana fimeig fogo adoub,

age dahinigana dah mimeig doub,

age wawaga fogo doub.

Odocob age ijaca falicdocobil me madoum,' en," aden.

(Aisaia 6.9-10)

<sup>28-29</sup> "Eunu age doigale. Anutna cahahaadecnu me je eu Juda dana qee eundec agenu suldochob nuen. Eu age dah moqagan!" aden. [Odocob Pol je i madi hedocob Juda dana buadein. Age gemanaganu agedodoc fee dadanii belein.]

<sup>30</sup> Odocob cabi gel lecis Pol uqa ono bilen\* eu jo uqadodoc deel abesabes fafaji biloloi. Odocob cunug fecidoqagannu holoig eu alalagadoloi. <sup>31</sup> Uqa Anutna Me Culnu je maadoloi. Odimei Tibud Jisas Kraisnu iwaladoloi. Uqa oso cahacdoci qee nijel qa uqa je saluqi u maadoloi.

\* **28:30:** Luk uqa cabi gel lecis i hedocob eeta Polca calen eunu qee madel. Dana leih Rom age Pol gihacdocnadec culdochob uqa Spen hatu ono nuimei me je qasali maaden ec cisdo. Euqa dana leih Rom age Pol qocobil cal men ec cisdo.

## Pol Uqa Jaqec Je Oso Rom Tamanec Jaqiaden Aqunec Je

Pol uqa Kristen tamanec Rom bilegina eu nui feciadecnu gale don. Eunu uqa jaqec je i jaqiaden. Uqa nui feciadimei saen nag ageca bilimei Spen hatuna nui me je ono qasali madigiannu gale don. Pol uqa jaqec je ina Kraisnu me jeca wawaga meleec cobocca eunu ugana cisdoc eu camas sildi jaqen.

Casac Pol uqa feele adec je jaqimei uqa Rom tamanec eunu saen cunug Anut inondona ec jaqen. Odimei ugana je gug jaqen, eu odi, "Eu wawige meleen jic euna himec ege dana cajaca ititom Anut amegna tawoqona," en. (Eu 1.17 feiga.) Odimei Juda danaca, Juda dana qee eundecca age cunug silail dana himec bilegina ec jaqen. Odimei Anutna kobil ititom eu dana Jisas Kraisnu waug meleena eu uqa Anut dana ititom ec maden. Odocob dana cunug Jisas Kraisnu wawaga meleena age ijanaga dana ititom adegina ec jaqen. (Eu 3.22 feiga.) Odimei dana Jisas Kraisnu waug meleecbfi uqa Kis Gun umei cebac bilec jic haun toodocnu Anut tulidocob cajena ec jaqen. (Eu 6.4 feiga.) Odimei Kis Gun dana eu cesuldocob silail kobilca, cal mecca ale dana eu cilehdu cofdocnu gagadicca qee nijina ec jaqen. (Eu 6.14 feiga.) Odimei dana eu uqa Anut melah osoca, Krais waliag osoca calena ec jaqen. (Age dac 8 feiga.) Dac 5-8na Pol uqa Anutna loo jena gugca, Kis Gun uqa dana cajaca Jisas Kraisnu wawaga meleena eu agena cebac bilec dunuh bilinaca eunu jaqen.

Dac 9-11na Pol ugana culumen osonu jaqen. Pol uqa Juda dana oso. Wele Anut uqa Juda dana cajaca age ugana ec maden. Euqa Juda mati bahic age Jisas hibemdoein. Odocobil Juda dana caja qee eundec mati bahic age Jisasnu wawaga meleecbfi ugana calein. Pol uqa Juda age cahuldoein ec jaqen. Jisas uqa agena Krais, uqa agena Cahahaadec, euqa Juda age ceteh eu Anut uqa agenu muden eu qee felein. Euqa Pol uqa Juda dana cajaca ageha hibna Jisasnu wawaga meleecbfi age ugana caloqagan eu cisdon.

Jaqec je i ugana cit qocna Pol uqa Kristen age adi coboqagannu jaqen. Kristen age wawaga meleecna cotogail nalunuga megina eu age mele bahic wawaga meleecna cotogail nalunuga meigale ec jaqen. (Eu 12.9 feiga.) Odimei uqa Anut cewel utocca, gabman ilo bisalu bilecca, wawaga meleec age cesuldocob docobeigale euca eunu jaqen.

### *Je Dunuhnu Dado Mec*

1. Aqunec je (1.1-15)
2. Gug je: Ititom kobil eu Anutnaadec (1.16-17)
3. Dana caja cunug age ititom qee (1.18-3.20)
  - A. Juda dana qeenu je (1.18-32)
  - B. Juda dananu je (2.1-3.8)
  - C. Libec je: Dana caja cunug (3.9-20)
4. Anut uqa dana cajaca age ititom ec maden (3.21-5.21)
  - A. Dana age ititom kobil eu Kraisna himec ogina (3.21-26)
  - B. Dana oso uqa Kraisnu waug meleena uqa dana ititom (3.27-4.25)
    1. Dana age loo je toodu odocna ijanaga ititom qee ogina, age wawaga meleecna himec ijanaga ititom eu ogina (3.27-31)
    2. Anut uqa Ebrahim dana ititom ec maden (dac 4)
  - C. Dana ititom adi bilina (5.1-11)
  - D. Libec je: Dana age ititom qee, euqa Anut uqa dana cajaca ititom bagol adena (5.12-21)
5. Anut uqa dana cajaca ititom adeceb age Kraisca cebac bilegina (dac 6-8)
  - A. Silail kobil eu dana cajaca ititom biley qee cilehadena (dac 6)
  - B. Anutna loo je eu dana oso uqa dana silail ec madena, euqa uqa Kraisca bilinafi uqa Anut amegna dana ititom bilina (dac 7)
  - C. Dana cajaca ititom age Kis Gunna gagadic euna cebac bilegina (dac 8)
6. Anutna kobil eu ititom: Uqa Juda dana cajaca hibemaden (dac 9-11)
  - A. Anut uqa Juda dana cajaca hibemaden eu ceteh tutuc (9.1-29)
  - B. Anut uqa Juda dana cajaca hibemaden eu ugana gug (9.30-10.21)
  - C. Anutna hibemaden eu culumen ben bahic qee (dac 11)
    1. Anut uqa Juda dana cunug qee hibemadel (11.1-10)
    2. Anut uqa saen cunugna Juda dana qee hibemadeiaun (11.11-24)
    3. Anut uqa dana cajaca cunugnu waug qugian (11.25-36)
7. Dana cajaca ititom agena coboc (12.1-15.13)

- A. Wawaga meleec age cotogail nalunuga meigale (dac 12)
- B. Wawaga meleec age dana cunug nalunuga meigale (dac 13)
- C. Wawaga meleec gagadicca age wawaga meleec gagadicca qee eu nalunuga meigale (14.1-15.13)
- 8. Cit qoc je (15.14-33)
- 9. Feele adec je (dac 16)

*Pol uqa uqana aposel uqa cabinu gug maaden*

<sup>1</sup> Ija Pol, ija Krais Jisasna cabi dana. Anut uqa ija aposel cabi ocnu utati maten. Uqa Anutna me je maadec cabi ocnu abes miten.

<sup>2</sup> Wele bahic Anut uqana je hahun madec dana maadeceb age me je i jaqein. Me je i Anutna jaqec je gunna bilen. <sup>3</sup> Eu Anut Melahnus me je. Melah uqa Dewidna sihulnadec eu dana calen. <sup>4</sup> Odocob Anut uqa cal mecnadec tulidocob cajeceh Kis Gun uqa euna Anut Melah gagadic odocca eu ihacgen. Eu uqa Jisas Krais eguna Tibud. <sup>5</sup> Ege Jisas Krais umna ege ijannu wawige meleecab dana cajaca age mahana cunug bilegina eu me je maadocomun uqanu wawaga meleecab uqa jejeg toodoqagannu eelgec uum igeccca aposel cabi occa om. <sup>6</sup> Ahega am eu dunuh bilegina. Age Jisas Kraisna utaec dah mimeig age jejeg toodoin.

<sup>7</sup> Romdec dana age Anut agenu nalunuga mena eu age utaaideceb uqanu dana cajaca qagoc bilegina, eu age ija je i jaqidigina. Anut ege Memigeca Jisas Krais Tibudca alena elgec uum igeccca malol billecca adesiale.

*Pol uqa Rom tamanec meciadecnu waug nijen*

<sup>8</sup> Ija je i casac maadigen. Dana cajaca age maha cunugna bilegina, age cunug wawaga meleecca bilegina eunu dogina. Eunu ija agenu Jisas Krais umna ijana Anut hetaga dugina. <sup>9</sup> Ija Anutna cabi gagadic ugina, eu Melahnus me je maadec cabi. Eu Anut uqa dona, saen cunug ijana inondocna age ijanaga ugina. <sup>10-11</sup> Ija dolonoga eeldocnu ceteh oso age wawaga gagadic mudigiannu ageca ehi ligennu gale tena. Eunu ija age meciadecnu wawi ben bahic njija. Eunu Anut uqa cois ifei uqa ihoc jic ihactebeb ageca qila li caligen eunu ija gaid inondugina. <sup>12</sup> Ijana cisdock eu odi. Agena wawaga meleec uja wawi gagadic mudigian. Odocob ija wawi meleec uja age wawaga gagadic mudigian.

<sup>13</sup> O wawaga meleec cotiel, age du cuhadoqagannu wawi njija, saen geh bahic ija ageca ono lecnu madem. Euqa saen cunugna ceteh ijana jic aqatitolo. Ijana cabi oc ija Juda dana cajaca qee eundec cesuladecemin age wawaga meleen, ija cabi eu age gemona odocnu age am leihha odi caloqagannu wawi njija. <sup>14</sup> Anut uqa cabi iten, eu ija Grik danaca Grik dana qee eundecca, dana doc silecca ageca dana doc silecca qee ageca eu cunug cesuladoum. <sup>15</sup> Eunu ija Rom dana cajaca ageha me je qasali maadecnu wawi njija.

*Me je eu Anutna gagadic odo*

<sup>16</sup> Ge, me je eu Anutna gagadic odo dana cunug age wawaga meleec eundec cahahaadiigianu. Eu Juda dananu casac ihoc leceb Juda dana qee eundecnuha ihoc ligian. Eunu ija me jenu qee majani tena. <sup>17</sup> Ge, Jisasnu me jena Anut uqa ege dana cajacanu ititom ena eu adi odona eu ihacgena. Eu wawige meleen jic euna himec ege dana cajaca ititom Anut amegna tawoqona. Eunu ege wawaga meleen eunu Anut uqa ege dana cajaca ititom ecnu ihoc. Eu odi Anutna jaqec je madena:

“Dana cajaca age Anutna wawaga meleecab

Anut uqa dana cajaca eu ititom ec madeceb age cebac biluqagan,” ena. *(Habakuk 2.4)*

*Dana cajaca cunug age Anut hibemdumeig silail mein*

<sup>18</sup> Ege doqona, Anut gemag bec eu sao jobondec nimei camasac mena. Uqa dana cunug age silail mimi kobol me qee odogina eundec wadacdoc ameg me qee adenau. Dana eu age silail megina euna mele je cilehdogina. <sup>19</sup> Anut uqa uqana kobol dana cunug wele ihacaden. Eu ageca camasac men. Eunu dana eundec cunug age Anutna kobol mati wele doin. Anut uqadoc wele ihacaden. Euqa age uqa hibemdoin. Eunu uqa wadacdoc ameg me qee aden. <sup>20</sup> Wele bahic Anut uqa ceteteh cunug ifanen saen eunadec hocob qila dana age uqa ceteteh ifanen eu feginia. Ifan euna age Anutna jahunec kobol leih dana age docwe qee ec docnu ihoc. Eu Anutna ifan gug bahic odi feginia. Uqa uqana gagadic odo odi billeceb catanena, uqa Anut bilia eu age docnu ihoc. Odinu dana eundec age agena cahuldoc jajahuni madi ija Anut qee hibemdolum, ija Anutna qee dugina ecebifli agena je eu cesuladecnu ihoc qee.

<sup>21</sup> Ge, age Anutnu dogina qa age uqa Anut bahic ec qee cisdolooin. Odimeig binan qee sululein. Odimeig age hegaga qee doloin. Age dalawan agen. Odocob age agena cisdoc eu silecca qee mimi lecebil tu kauaden. <sup>22</sup> Age deboii madein, "Ege cisdochca," ein qa eu age wele dalawan aqec jicnalein. <sup>23</sup> Odimeig age Anut bileceb catanenana binan sulegina eu hibemdooin. Odimeig age wadacdumeig dana cal menana kadan tibud hahunuga oin, odocob man fululec hahunuga oin, odocob dool hahunuga oin, odocob man sononec hahunuga oin, ceteteh eu binanaga sulein.

*Dana cajaca cunug age kobil me qee mati bahic odooin*

<sup>24-25</sup> Eunu dana cunug age Anutnu mele je culimeig uhulec je oin. Odocob eu age Anut hibemduemeig ceteih Anut ifanen eu binan sulegina, odimeig ceteih eu cewel utogina. Euqa Anut ceteteh cunug ifanen eunu dana ege Anut binan sulocomun cataneiale! Mele. Eunu Anut uqa felacadeceb agena gale adec me qee wawagana nijia eu diadeceb age silail mimi coboin, odocob agedodoc dewenegana kobil gegehinca mudein.

<sup>26</sup> Dana age Anut hibemdooin eunu Anut uqa felacadeceb age agena gale adec me qee toodudu kobil gegehinca odogina. Agena caja age danaca nijec kobil me eu culimeig age wadacwuducdumeig cajaca nijec kobil me qee eu oin. <sup>27</sup> Odocob danaha age cajaca nijec kobil me eu culimeig age danaca nijec kobil me qee eu wawaga dunuh ja cinigwe cajeceb odi odooin. Dana age kobil majanagaca dana gami odogina. Odimeig agedodoc ameg me qee agena kobil me qeenu wadacdocihc ogina.

<sup>28</sup> Agena cisdocna Anut hewecnu culadein, odocobnu Anut felacadeceb agedodoc agena cisdoc me qee toodogina. Age kobil filfil dana odocwe qee eu odogina. <sup>29</sup> Age kobil cunug odogina eu me qee himec. Kobil me qee eu cunug dana wawagana am ben. Odocob age kobil qisol mec bahicha odogina, dana osona ceteteh ocnu amaga qona, cad kobolha sulegina. Odocob age dana ceteteh gehca eundec waug me qee miigianna isec odogina, age dana qagadogina, gaucgauc gemanaga bena. Odocob age uhulecna dana osona ceteh ogina, age dana me qee mudencu cabi ogina. Odocob age dananu je me qee hibilemiga madegina. <sup>30</sup> Odocob oso ijan me qee mudencu je amemeg qasali madegina. Age Anut sagaggdogina, odimeig lelandudu cobogina, deboeeig agedodoc binanaga sulegina. Age kobil me qee ifanegina. Age memegail anagailca agena je qee toodogina. <sup>31</sup> Age cisdochca qee. Age madegina qaa agedodoc agena je qee toodogina. Agena sihil eundecnu wawaga lal qocca qee. Age dana osonu qee waloc adena. <sup>32</sup> Age Anutna loo je dana eundecnu maden eu dogina, "Dana kobil eu odi odogina age cal moqagan," en. Dana eu age loo je eu odi maden ec du cuhadogina qa age kobil me qee eu odi oodi nijeginna. Age eu odi himec qee odogina qa age leih odogina ha binanaga sulegina.

## 2

*Anutna gesilec eu tutuc bahic*

<sup>1</sup> Eunu dana cunug age dana gesiladegina, age agena cahuldoc jajahuni madi, ija Anut qee hibemdomol ecebifli agena je eu cesuladecnu ihoc qee. O dana, ija age osolosol maadigina. Dah maga, hina dana oso gesildogona eu uqana kobil hina himec kobil eu odi odogona. Eunu hina gesildoc dana eu odi odogona eu hinadodoc dewen jeca muduguna.

<sup>2</sup> Ege doqona, Anut uqa ameg me qeena dana kobil odi odogina eundec wadacadena. Odocob Anut dana eundec ameg me qee wadacadena eu gesildec tutuc bahic. <sup>3</sup> Odocob hina dana leih kobil odi odogina eu gesiladagana qa hinadodocha odi odogona hina adi cisdogona? Hina Anut ameg me qee wadacdooqee gulucdogau ec cisdogonafo? Qee bahic! Hina Anut ameg me qee wadacdooqee gulucdogan. <sup>4</sup> Anut uqa hina me bahic odihina odimei saen cecelac sumihina, odocob ameg me qee mahuc qee ihina. Anutna kobil me bahic eu ceteh gauc himec ec cisdogonafo? Anutna kobil me bahic eu hina wawin tului falicdocihna acahna eu hina qee dogonafa? <sup>5</sup> Euqa hina wawin eu gagadic bahic odocob hina wawin qee tului falicdogona. Kobil eu odina hinana wadachec ameg me qee haudocwe magana. Odocob Anutna gemag bec camasac migian deelna uqana gesilec tutuc deel euna hinana wadachec ameg me qee organ. <sup>6</sup> Anut uqa

"dana cunug agena odochnana gesiladimei ameg wadacadigan," en. *(Buk Song 62.12; Sindaun 24.12)*

<sup>7</sup> Leih age kobil me eu gagadic hewegina oodoig kobilkobilca ijanaga bencal biluqaganuca cebac biley qee mecw qee eu megegina. Dana eu agen Anut uqa cebac biley gaid biley cebat catanigian eu adigian. <sup>8</sup> Odocob leih age agedodocnu himec cisdogina, odimeig mele je eu hibemdogina, odimeig kobil me qeena jic eu toodogina Anut uqa dana eundecnu gemag beceh ameg me qee bahicna wadacadigan. <sup>9</sup> Culumen ben sogoecca eu dana kobil me qee odogina eundec cilehadigian. Juda dana age casac ocobil Juda dana qee eundec ageha oqagan. <sup>10</sup> Euqa dana cunug age kobil me odogina eu Anut uqa

kobolkobolca binan benca wawaga malol bilecca eu adigian. Juda dana eu age casac adeceb Juda dana qee eundec ageha adigian.<sup>11</sup> Ge, mele Anut uqa dana ijancanu cisdudu qee gesilina. Uqa dana cunug age ijanagacafo, qee ijanagaca qeefo ihocihoc cisdudu gesilina.

<sup>12</sup> Eu odi. Dana cunug age Mosesna loo je qee dodoig silail megina eu age loo je qee dodoig fadalooqagan. Odocob dana cunug age loo je dodoig qa silail megina eu Anut uqa loo jena gesiladigan.<sup>13</sup> Dana age loo je gauc dah megina age Anut amegna ijanaga dana ittom qee. Dana loo je toodu odogina age dana ittom ijanaga eu oqagan.<sup>14</sup> Juda dana qee eundec age Mosesna loo jeca qee, sihul euqa age leih loo je toodu odogina. Dana eu age loo jeca qee age odi odocobil agena toodu odoc eu agedodocna loo je cinigwe.<sup>15</sup> Agena odocna loo jenu odoc Anut wawagana jaqen taweia eu camasac men. Odocob agena cisdoc silec ihulahal calena odocob saen leih kobol odogina eunu cois ec madeginafo, qee cois qee ec madeginafo.<sup>16</sup> Eunu ija me je madigina euna deel osona hibna Anut uqa Jisas Krais umna dana cunug agena cisdoc jahunec nijina eu gesiladigan.

### *Juda dana age loo je himec cesuladigiannu cisdogina*

<sup>17</sup> Euqa hina Juda danafin hina adi biliga? Hina loo jenu wawin meleecca eu hina gesilhec saenna ihoc cesulahigian eu odi cisdogona. Hinadodoc binain susuleg madagana, "Ija Anutna dana," agana.<sup>18</sup> Hina Anutna cisdoc gale doc eu dogona. Hina loo je eu wele iwaldom eunu hina kobil me himec gale hena.<sup>19-20</sup> Hina gaid odi cisdogona, "Ija wele loo je iwaldom, odocob ija doc gug mele jeca ha om. Eunu ija ihoc dana amaga galuc mec jic iwalandigen. Ija dana tucana biley agena fulacdoc. Ija dana docca qee eundec iwalandec dana. Ija mel simsim agena iwalandec," dogona.<sup>21</sup> Mele hina dana leih iwalandagana qa hinadodoc ha qee iwaldoginafo? Hina oso heje cain ogau ec madodog qa hina heje ogonafo?<sup>22</sup> Hina oso hina dana osona cajaca cain niuwasin ec madodog qa hinadodoc dana osona cajaca nijesinafo? Hina uhulec kadan tibud qee gale hena qa hiná kadan tibud agena cuha jonana ceteh heje cedaganafo?<sup>23</sup> Hina hinadodoc binain susuli madagana, "Ija Anutna loo je dugina," agana qa hinadodoc loo je tefacdugina, odocob kobol euna hina Anut ijan me qee mudugunafo?<sup>24</sup> Mele eu Anutna jaqec je odi madena: "Juda dana age agena cahuldocna himec Juda dana qee am gemona Anut ijan qesadogina," ena.  
*(Aisaia 52.5; Esekiel 36.22)*

### *Deweg ganac cagoc kobol tutuc eu odi*

<sup>25</sup> Hina Mosesna loo je toodu odifeg hinana dewen cagu qoc kobol eu kobol me bahic. Euqa hina loo je tefacdugef dewen cagu qoin eu kobol dewen cagu qee qoc cinigwe.<sup>26</sup> Eunu dana deweg cagu qee qoc uqa loo je gadaat uqana kobol ittom bahic toodufei dana eu uqana deweg cagu qee qoc eu deweg cagu qoc kobolwe caligianfo?<sup>27</sup> Odocob dana age dewenega cagu qee qoc qa loo je toodu odogina eu age hina dewen cagu qocca loo jeca qa loo je qee toodu odogona eu gesilhoqagan.<sup>28</sup> Dana oso uqa deweg himec uqa Judafi uqa eu Juda bahic qee. Odocob dewenega cagu qoc kobol eu dewenegana ceteh himec qee.<sup>29</sup> Dana uqa waugna uqa Juda ena eu uqa Juda bahic. Odocob dewenega cagu qoc kobol eu wawagana ceteh. Eu loo je jaqec gadac himec toodocnu ceteh qee. Eu Anutna Kis ceteh jaqune. Dana uqa waugna uqa Juda ena eu uqa dana amagana binan sulec qee ona qa uqa Anut amegna binan sulec ona.

## 3

### *Kobol me qee eu kobol me wooldoc ihoc qee*

<sup>1</sup> Juda dana age cel jicna Juda dana qee eundec wooladegina? Cel ceteh me eu dewenega cagu qoc kobolna calena?<sup>2</sup> Ese, ceteh me bahic mati calen. Casac ceteh me bahic oso eu odi, Anut uqana je Juda cofdoqagannu aden.<sup>3</sup> Mele, leih age je eu qee toodolooin. Euqa eu adi? Age Anutna je qee toodolooini Anut uqaha uqana je qee toodoiaunfo?<sup>4</sup> Qee bahic! Anutna jaqec je odi madena:

"O Anut, hinana je cunug eu mele bahic  
danna cunug eu fegin."

Odocob hinana je eu gesilifeig

hinana je eu tutuc himec foqagan," ena.

*(Buk Song 51.4)*

Eunu dana cunug age uhulegina qa Anut uqa himec saen gaid je mele madena.

<sup>5</sup> Odocob eu adi? Egena kobol tutuc qee eu Anutna kobol tutuc bahic eu camasac mudecebfii ege adi madeqan? Ege madi, Anut ameg me qee wadacgena eunu uqana kobol eu tutuc qee, eqanfo? (Ija danana cisdoc himec toodudu madiga.)<sup>6</sup> Qee bahic! Anut uqa ittom qeefi dana cajaca agena kobol adi gesiligan?<sup>7</sup> Dana leih age madegina, "Ijana

uhulec je Anutna je mele camasac mudecebfí odocob eu uqa binan sulec mahamaha ihoc lifei uqa cain gesiltimei ija silail dana imei ameg me qeena wadacteiaun,” egina.<sup>8</sup> Odocob dana oso madigian, “Ege kobil me qee odoqa qa odocob kobil me euna caligian,” igian. Eu dana leih age ijanu um qu mamadi ijana me je madec eunu je me qee i ec madegina. Dana eu age wadacadec ameg me qee oqagan eu mele bahic.

*Dana ititom oso qee bilel*

<sup>9</sup> Odocob eu adi? Ege Juda dana Juda dana qee eundec wooladecfo? Qee bahic! Ija wele maadiga, silail ege dana cunug cilehgen, Juda danaca Juda dana qee eundecca cunug.

<sup>10</sup> Anutna jaqec je odi madena:

“Ititom coboc dana oso maha ina qee bilel.

<sup>11</sup> Dana oso uqa fogo docca qee.

Oso uqa Anut megec cabi qee ona.

<sup>12</sup> Cunug age jic me eu culein.

Cunugca odi age dana me qee bahic calein.

Osol oso ha kobil me qee odona.

(Buk Song 14.1-3; 53.1-3; Saveman 7.20)

<sup>13</sup> Age conoga eu qalqal heel cebec cinigwe.

Age beilamaga age uhulec je madegina.

(Buk Song 5.9)

Age bihamaga dunuh eu man sononc agena ceeh sahalic me qeeca. (Buk Song 140.3)

<sup>14</sup> Age je me qee gulihinca conogana gaid madegina.

(Buk Song 10.7)

<sup>15</sup> Age dana qagadocnu mahuc bahic gugulegina.

<sup>16</sup> Saen cunug age ceteteh me qee murmudi culumen geh dana adegina.

<sup>17</sup> Age dana malol biley kobil qee toodogina.

(Aisaia 59.7-8)

<sup>18</sup> Age Anutnu cumunec nag odi qee dogina,” ena.

(Buk Song 36.1)

<sup>19-20</sup> Odocob ege doqona, Mosesna loo je eu uqa eguna silail eu himec ihacgena, eunu dana oso uqa ija dana ititom ec madecwe qee. Eunu cel je loo je madena eu dana cunug age je madecwe qee bilimeig dana maha cunugnadee ege Anut amegna cahuldocca biluquna ec madoqagannu eu dana loo je bisalu bilegina eu age maadena.

*Dana oso uqa Kraisnu waug meleen uqa dana ititom*

<sup>21</sup> Qilaqa Anutna kobil uqa ege dana cajaca ititom ec madena eu camasac men. Eu loo je toodoc jicna qee calel. Eu jic filna calen. Odon qa je eu je hahun madec danana jaqec jenaca Mosesna jaqec jenaca nijia eu Anutna kobil ititom inu je camasac madena.

<sup>22</sup> Anutna kobil ititom eu odi. Dana Jisasnu waug meleena eu uqa Anut dana ititom ec madena. Odocob dana cunug Jisasnu wawaga meleena age ijanaga dana ititom adegina. Anut uqa dana am cunug odi odona eu odoc filna qee odona.

<sup>23</sup> Ge, ege dana cunug ege silail mom eunu ege Anutna fulacdoc ben eu ocwe qee.

<sup>24</sup> Anut uqa eelgec uum igna. Uqa Jisas Krais golacna ege fajigen euna himec uqa ege dana ititom gena.

<sup>25</sup> Anut uqa gemag bec gondocnu Jisas Krais ihandon. Eunu uqa cal meceb uqa golacna dana uqanu wawaga meleena eundec agena silail casagiadigianni nesili ehuden. Anut uqa dana weledec camuhulaadei agena silailnu mahuc ameg wadacadecnu qee cisdoloi. Eunu Anut uqa odonna uqana kobil ititom eu camasac ihacgen.

<sup>26</sup> Qilaqa uqa dana agena silailnu cisdona. Eunu uqa uqana kobil ititom eu qila camasac mudigia odona. Eu odina Anut uqa uquadodoc eu ititom bahic ihacgena, odocob dana Jisasnu waug meleena uqaha Anut dana ititom dona.

<sup>27</sup> Eunu egdedodoc binanige sulecnu ihocfo? Qee bahic! Jic eu wele menen. Eetana jic eu menen? Acahma loo je toodoo odoc kobil euna jic eu menenfo? Qee bahic! Wawige meleec euna jic eu menen.

<sup>28</sup> Ge, ege odi cisdqona, wawige meleecna himec dana uqa ijan ititom eu ona.

Uqa loo je toodoo odocna ijan ititom qee ona.

<sup>29</sup> Eu adi? Anut uqa Juda dana agena himecfo? Uqaha Juda dana qee agena Anut qeefo? Ese, uqaha Juda dana qee eundec agena Anut.

<sup>30</sup> Anut uqa osol himec. Odocob Anut uqa dana age deweg cagu qoc agena wawaga meleecna age dana ititom ec adigian.

Odocob uqa dana age deweg cagu qee qoc agena wawaga meleecna ageha dana ititom ec adigian.

<sup>31</sup> Eunu ege wawige meleeanifi ege loo je hibemdoqonafo? Qee bahic! Ege wawige meleeanifi ege loo je eu hehdocomun gagadic tawena!

## 4

*Anut Ebrahim dana ititom ec maden*

<sup>1</sup> Ebrahim uqa dana ege cinigwe odocob uqa ege Juda jajanige. Eunu ege uqanu cel ecnu?

<sup>2</sup> Ebrahim uqana tutuc cobocna Anut uqa dana ititom ec madoubumi uqa cetehnu culaecnu ihoc qa Anut amegna culaecnu ihoc qee.

<sup>3</sup> Anutna jaqec je adi madena? Eu odi madena:

“Ebrahim uqa Anutna jenu waug meleen.

Odocob Anut uqa uqana waug meleec fimei dana i ititom ec maden,” ena. (*Genesis 15.6*)

<sup>4</sup> Odocob dana oso uqa cabi uu cabi ameg onafi ameg eu ege bagol himec qee oqona. Uqa cabi ona eunu cabi ameg ona. <sup>5</sup> Euqa dana oso uqa ititom coboc cabi qee ona qa uqa Anutnu waug meleena, Anut eu uqa silail mec dana eu uqa dana ititom ec madena. Dana eu uqana waug meleec Anut fena eunu uqa dana ititom ec madena. <sup>6</sup> Odocob Dewid uqaha dana eunu je maden. Dana uqa ititom coboc cabi qee ona qa uqa waug meleena eunu Anut uqa dana eunu dana ititom ec madena eu uqa ceelecca biligian. <sup>7</sup> Dewid uqa odi maden:

“Dana cunug Tibud agena cahuldoc cagasiadimei  
agena silail jahunaden eu age ceelecca biluqagan.

<sup>8</sup> Dana oso Tibud uqa uqana silail qee sanijaun  
eu ceelecca biligian,” en. (*Buk Song 32.1-2*)

<sup>9</sup> Ceelec eu dana dewenega cagu qoc eundec agena himecfo? Qee bahic! Eu dana dewenega cagu qee qocol eundec agena ha. Ege Anutna jaqec je wele madom eu odi madena, “Ebrahim uqa Anutna jenu waug meleen. Odocob Anut uqa waug meleec fen eunu uqa dana ititom ec maden,” ena. <sup>10</sup> Aria, Ebrahim adi bibilen Anut uqa dana ititom ec maden? Uqa deweg cagu wele qonfo, qee cagu qee qolfo? Eu mele, Ebrahim uqa deweg cagu qee qoc bibilen Anut uqa dana ititom ec maden. <sup>11</sup> Wele bahic saen uqa deweg cagu qee qoc bibilen uqa Anutnu waug meleen, eunu Anut uqanu dana ititom ec maden. Odocob eu uqana gadac Anutnadec on sisi mec eu dewenega cagu qoc kobil. Eunu Ebrahim uqa dana cunug age dewenega cagu qee qoloin qa age Anutnu wawaga meleecel Anut uqa eu age dana ititom ec maden eu agena aquniadec memega. <sup>12</sup> Odocob Ebrahim uqa dana dewenega cagu qoc euha uqa memega. Euqa dana dewenega cagu qoc himecha qee. Uqa eu dana dewenega cagu qocca, odocob uqa jaih ceen toodudu wawaga meleena saen uqa wele deweg cagu qee qoc bibili odon odi.

*Anutna je hahun uqa wele maden eu uqana ameg dana cajaca cunug age wawaga meleena eu age oqagan*

<sup>13</sup> Anut uqa Ebrahim muguh mec je madi madon, “Hinaca asinel hibna bahic cali hoqaganca age mahamaha cunug oqagan,” don. Ebrahim uqa loo je toodon eunu Anut odi qee madel qa uqa Anutnu waug meleecel Anut uqa dana ititom ec maden eunu age mahamaha cunug oqagan ec maden. <sup>14</sup> Eu odi. Dana age loo je toodogina eu himec mahamaha cunug ufeig wawaga meleec kobil eu gugca qee, odocob Anutna muguh mec je maden euha uqana gagadic odoccia qee. <sup>15</sup> Ege doqona, dana age loo jeca bileginafi age loo je tefacdogina. Eunu Anut uqa gemag bena. Euqa Moses uqa loo je qee jaqecebfii dana age loo je qee tefacdogina.

<sup>16</sup> Je hahun Anut Ebrahim madon gug eu waug meleec. Eunu je hahun eu uqana aig qoc eu gagadic odocob bibileb Anut uqa eelguc uum igec bagolwe Ebrahim uqana sihil cunug hibna cali hoqagan eu mahamaha cunug adigian. Je hahun eu dana cajaca age loo je heweginia eu agena himec qee qa dana cajaca Ebrahamna waug meleec jic toodogina eundec cunug agena. Ebrahim uqa ege memige matu. <sup>17</sup> Anutna jaqec je eu odi madena: “Ija dana am hatuhatunadec age memega mihiga,” ena. (*Genesis 17.5*)

Je hahun eu Anut amegna bahic taweia.\* Odocob Ebrahim uqa Anutnu waug meleen. Anut eu uqa cal mec dana cebac biley kis haun adena, odimei uqa ceteh qee calet eundec utaadecelb eu calena.

<sup>18</sup> Ebrahim uqa Anut ceteh odigiannu maden eu jic qee fel qa dana jic wele fen cinigwe uqa waug mele bahic en. Eunu uqa dana am hatuhatunadec agena memega matu caligian eunu waug meleen. Eu odiwe Anut madon:

“Hinana sihil age hibna odi cali hoqagan,” don.

(*Genesis 15.5*)

<sup>19</sup> Ebrahim uqana cabi gel eu cabi gel 100 odi, eunu uqa deweg ganac eu cal necwe ec cisdon. Odocob Sera uqa goud bilen. Ebrahim uqa eunu cisdon qa uqana waug meleec eu gagadic bahic tawen. <sup>20</sup> Anut uqa ceteh hil cali hugiannu maden qa Ebrahim uqa je hahun eunu waug leciscia qee mel. Uqana waug meleec eu gagadic hewen. Odocob uqa Anut binan sulec qee culoloi. <sup>21</sup> Odocob uqa Anut madon eu odocob aig camasac migian eu wele don. <sup>22</sup> Eunu Anut uqa Ebrahamna waug meleec euna uqa dana ititom ec maden. <sup>23</sup> Euqa je eu Anutna jaqec je taweia Anut uqa uqanu maden eu, “Uqa dana ititom,” en eu uqa Ebrahamnu himec qee madel. <sup>24</sup> Jaqec je eu egenu ha madena. Ege Anut uqa Jisas eguna Tibud cal mecnadec tulidocob cajennu wawige meleena euha Anut egenu dana cajaca ititom ec madena. <sup>25</sup> Anut uqa Jisas suldocob nimei eguna silailnu cal

\* **4:17:** Grik je i uqana gug eu camasac bahic qee. Falicdoc je fil osoha nijia eu odi: Uqa Anut amegna ege memige bilia.

men. Odocob Anut ege dana cajaca ititom ec magigiannu uqa Jisas cal mecnadec haun tulidocob cajen.

## 5

### *Anut qila ege dana cajaca ititom ec madena*

<sup>1</sup> Egena wawige meleecna Anut ege dana cajaca ititom ec madena. Eunu Jisas Krais Tibud odigeceb ege Anutca malol biluquna. <sup>2</sup> Ege Jisas Kraisnu wawige meleennu uqa Anutna eelguc uum igechna ehigi ahon. Odocob ege Anutna eelguc uum igec euna qila biluquna. Odocob ege Anutna kobilkobil ohannu wawige meleebus susumudi biluquna eunu ege culaoqona. <sup>3-5</sup> Odocob ege eunu himec ceelecnu qee nijel. Odocob Anut uqana Kis Gun ege igina eu odigeceb Anut nalunige mec ege wawigena basecdona. Eunu ege culumen egeca caleginanu ha culaoqona. Ege culumen eu ege wawige gagadic mudina eu doqona. Odocob ege wawige eu gagadic tawecebf ege dana temdochna gagadic tatawi culumen gahidoc kobil camasac mudina eu doqona. Odocob ege culumen gahidu wooldufob ege wawige meleecb Anut ceteh cunug igigiannu saciadon eu susumudi biluquna. Eunu ege ceteh saciadon eunu wawige meleecb ceteh eu susumudi bilifob ege eunu gauc qee susumudi biluquna.

<sup>6</sup> Wele ege egdedodoc cesulgencu gagadic odocca qee bibiluqun saen Anut maden euna himec Krais uqa ege dana Anut hibemdom eundec ceseli cedgigiannu cal men. <sup>7</sup> Dana oso uqa dana ititom coboc cesuldugianu cal mecnu qee nijel. Mele, ege oso acahna ihoc waug gagadic mudimei dana me oso cesuldocnu cal migianfa. <sup>8</sup> Euqa ege silail dana biluqun Krais cesulgigianu cal men. Odoc euna Anut ege nalunige mena eu ihacgenna. <sup>9</sup> Krais uqa cal meceb uqa golacna Anut ege dana cajaca ititom ec ijanige wele qon. Eunu ege qila tutuc bahic doqona, eu ege gehgeh cesulgigian, odocob ege Anutna gemag bec qee gulucdogona. <sup>10</sup> Ge, wele ege Anutca cad biluqun saen euna Anut Melah cal men euna uqa cad kobil eu qee mudimei Anut egeca tanawigen. Eunu qila ege Anutca tanawigec biluqna euna Anut uqa Melah cebac bileyca ege cahahagigian eu tutuc bahic doqona! <sup>11</sup> Eu odi himec qee. Egena Tibud Jisas Krais uqa odigeceb ege Anutca tanawigen eunu qila ege Anutna ceeloqona.

### *Adam uqa cal mec gug qa Jisas uqa cebac biley gug*

<sup>12</sup> Ege doqona, dana osol uqa silail men, odocob kobil euna silail maha ina calen. Odimei cal mec u ahon. Eunu dana cunug age silail meinu cal mec dana cunug cedena. <sup>13</sup> Mele, loo je qee calec saen euna silail maha ina nijen. Euqa loo je euca qeefi Anut uqa silail osolosol qee sanijina. <sup>14</sup> Euqa Adamna saennadec ninjen hu Mosesna saenna cal mec eu dana cajaca cunug agena cilehadec bilen. Mele, dana cajaca leih age Adam loo je tefacdon odi qee tefacdoloin qa cal mec eu ageha agena cilehadec bilen.

Adam uqa eu dana hib caligian uqanu hahun ihoc men. <sup>15</sup> Euqa Anutna eelguc uum igecca Adamna silail mecca ceteh lecis eu ale eu caca qee. Eu mele, dana eu uqana silail mennu dana cajaca mati bahic age cal mein. Euqa Anut uqana eelguc uum igece eu wooldona. Odocob dana osol, Jisas Krais, uqana eelguc uum igechna Anut uqa dana cajaca mati bahic uqana bagol adena. <sup>16</sup> Odocob Anutna eelguc uum igec eu dana osol eu uqana silail mec cinigwe qee. Dana eu uqa silail osol meceb Anut uqa dana cajaca cunug gesiladi maaden, "Age cunug silailca," aden. Euqa Anutna eelguc uum igec eu odi. Dana cajaca age silail mati meceb Anut agenu maden, "Age dana cajaca ititom," en. <sup>17</sup> Eu mele, dana osol uqa silail men. Odocob dana osol eu uqana silailnu cal mec dana cajaca cunug cilehadena. Euqa dana osol, Jisas Krais, uqana odoc eu wooldon! Dana cajaca age Anutna eelguc uum igecca Anutna ititom eu bagolweca ogina eu cunug age Krais odonna cebac biley umeig kingwe biluqagan.

<sup>18</sup> Eunu dana osol uqana silail mec eunu Anut uqa dana cajaca cunug gesiladi maaden, "Age cunug silailca," aden. Eu odiwe dana osol uqana ititom odoc eunu Anut uqa dana cajaca cunug maaden, "Age dana cajaca ititom," adeceb age cebac bileyca. <sup>19</sup> Odocob dana osol uqa Anutna je tefacdon, odocob euna dana cajaca mati bahic age silailca calein. Eu odiwe dana osol uqa Anutna je toodon, odocob euna dana cajaca mati bahic age ititom caloqagan.

<sup>20</sup> Odocob je tefacdoc ben bahic calecnu Anut uqa dana cajaca loo je aden. Odocob silail kobil eu ben bahic calena qa Anutna eelguc uum igec eu silail kobil wooldon, odimei ihoc len. <sup>21</sup> Eunu cal mec eu silail kobil cesuldocob ohis bahic calen, eu kingwe bilen. Eu odiwe ititom kobil eu Anutna eelguc uum igec cesuldocob ohis bahic calena, eu kingwe bilina. Odocob Jisas Krais, egena Tibud, uqana cabi ocna ege cebac biley catanec oqan.

**6***Ege Kraisca cal mom*

<sup>1</sup> Eunu ege eeta ec madecnu? Ege Anutna eelgec uum igec egeca ihoc ligiannu silail kobilna himec cois bileqan ec madeqan eu coisfo? <sup>2</sup> Qee bahic! Ege cal mecwé mimeb silail kobil eu wele culom. Odocob eu adi ege silail kobilna gaid biluquna? <sup>3</sup> Ege Krais Jisasca gabandumeb wa joigec om kobil euna ege cunug ugana cal mecca gabandumeb wa joigec om. Age eunu qee doginafo? <sup>4</sup> Odocob Memige Anut uqa ugana kobilkobilna Krais Jisas cal mecnadec tulidocob cajen. Eu odiwe egeha sanan mi cebac biley jic haun toodocnu Anut ege cal mecnadec tuligeceb cajeqannu wa joigecna ege Krais Jisasca gabandom, odocob Anut ege Krais Jisasca osoben qalqalna heel cisigen.

*Ege Jisasca cebac biluquna*

<sup>5</sup> Ege Kraisca gabandumeb uqa cal men eu odi cal mom. Eunu ege ugaca gabandumeb uqa ceseli cajen eu odi egeha ceseli cajeqan. <sup>6</sup> Ege odi doqona, silail ugana kobil ege dewenigena cabi ona eu qee mudigiannu, odocob silail kobil eu ege ugana cabi dana haun cain biluqaunnu ege wawige hilah eu wele Krais Jisasca gabandumeig na babalecna tuitu qocobil cal mesin. <sup>7</sup> Ge, dana wele cal men silail kobil eu uqa qee iwaldona eunu uqa silail kobil haun qee odona.

<sup>8</sup> Eu mele, ege Kraisca cal mom eunu ege wawige meleceeb egeha ugaca cebac biley. <sup>9</sup> Ege doqona, Krais cal mecnadec wele ceseli cajen eunu uqa haun qee cal meiaun. Cal mec eu uqa cilehdocnu gagadicca qee. <sup>10</sup> Ugana cal mec eu uqa saen osolna himec wele cal men, odimei silailna gagadic odoc wooldon. Euqa qila uqa cebac bilina eu uqa Anutna cebac bilina. <sup>11</sup> Eunu ageha agedodoc wele cal mein, odocob silailna gagadic odoc Cain cilehadecdaiannu odi cisoigale. Odocob age Krais Jisasca gabandumeig Anutna cebac bileyecna ec cisoigale.

<sup>12</sup> Silail kobil eu age dewenega eu cal mena cain culdocbil cilehadeiaun. Age dewenegana gale doc me qee eu Cain toodowain. <sup>13-14</sup> Qila age loo je bisalu qee bileyecna qa age Anutna eelgec uum igec bisalu bileyecna. Eunu silail eu agena cilehade haun qee biluwain. Odimeig age ebenegaja jaimagaca dewenega amihilon filfil cunugka kobil me qee odocnu silail kobil haun Cain utuwain. Euqa age dana eu cal mecnadec ceseli cajen cebac bilia cinigwe age dewenegaca agena cisdocka cunug eu Anut uteiga. Odimeig age dewenega amihilon cunug eu ititom kobil odoqagan Anut uteiga.

*Ege ititom kobilna cabi dana biluqa*

<sup>15</sup> Eunu ege eeta odocnu? Ege qila loo je bisalu qee biluquna qa ege Anutna eelgec uum igec bisalu biluquna eunu ege silail cois mecnufu? Qee bahic! <sup>16</sup> Age wele dogina, age dewenega dana oso utimeig uqa co himec toodufeig eu age ugana cabi dana bileyecna. Age silail kobil ugana cabi dana bileyecna age euna cal mec gulucdoqagan. Eu odi qeefi age Anutna je toodoc kobil ugana cabi dana bileyecna Anut age dana cajaca ititom ec madigian. <sup>17</sup> Mele, wele age silail kobilna cabi dana bileyecna qabibna age Anutna je gadac dah mimeig age wawaga meleceeb je eua qila tutuc bahic toodogina. Eunu ege Anut hegaga doqale! <sup>18</sup> Anut uqa age silail kobil ugana cilehadeecnadeb begesaden. Odimeig age ititom kobilna cabi dana maden. <sup>19</sup> Agena cisdocka eu mahadanadec eunu ija dana eguna cisdocka toodumig maadigina. Wele age dewenega amihilon cunug kobil gegehinca ugana cabi dana biloloig, odimeig age eunu qisol mec kobil gehgeh odoloig. Qilaqa age dewenega amihilon cunug ititom kobilna cabi dana mudeiga. Odimeig age kobil gun odocnu oodi bileyecna.

<sup>20</sup> Wele age silail kobil ugana cabi dana biloloig saen euna age ititom kobil ugana cabi dana qee biloloig. <sup>21</sup> Euqa saen euna cel ceteh me qila majanaga adena eunadec oin? Ceteh eu agena aig qoc eu cal mec himec! <sup>22</sup> Qilaqa Anut uqa silail ugana gagadic odocnadec wele begesaden. Odimeig uqa ugana cabi dana odi maden. Odocob eu ugana aig qoc eu odi. Age Anutna gun cocoboig li cebac biley catanec oqagan. <sup>23</sup> Ge, silail kobil eu ugana ameg eu cal mec himec. Euqa Anut ugana eelgec uum igec eu cebac biley catanec. Ege eguna Tibud, Jisas Kraisca gabandumeb cebac bilocomun cataneqan.

**7***Ege qila wawige kobil haunna cabi oqona*

<sup>1</sup> O wawaga meleec cotiel, age loo je du cuhadogina. Eunu ija je maadecemmin fogo adigian. Dana uqa cebac bilina saen euna himec eu uqa loo je bisalu bilina. <sup>2</sup> Ge, caja oso uqa dana ocob uqa gemug cebac bibileb saen euna himec loo je gadac ale gemo bilina. Euqa caja eu gemug uqa cal meceb loo je gadac ale gemo bilen eu qee mena. <sup>3</sup> Dana uqa cebac bibileb caja uqa dana oso ufei caja danaca biley me qee mudec caja doqagan. Euqa

dana cal mecebfi loo je gadac ale gemo bilina eu qee mena. Eunu uqa dana oso ocobfi eu uqa dana cajaca biley qee me qee mudina.

<sup>4</sup> Eu odiwe cotiel, age dana oso uqa cal mecnadec ceseli cajen eu ebennalein, eu ege Anutna kobil me bahic toodoo dodoqannu age wele Krais deweg ganacca gabandocibil cal mein. Eundec age loo je bisalu qee bilegina. <sup>5</sup> Wele ege dewenige kobil hilahna himec bilom saen euna loo je odigecib egena gale gec me qee silail mecnu sililoloi. Odocob cabi eu ege dewenigena cunug ihoc len. Odocob eu cal mec himec cabi euna caloloi. <sup>6</sup> Qilaqa ege wele cal mimet ceteteh gagadic gihacgen eunadec ege besigec biluquna. Eunu ege loo je eu bisalu qee biluquna. Eunu ege loo je jaqecna kobil hilahna qee cabi oqona qa ege qila wawige Kis kobil haunna cabi oqona.

#### *Silail kobil qigeceb cal mom*

<sup>7</sup> Eunu ege eeta ec madecnu? Loo je eu silail odi madecnu? Qee bahic! Euqa loo je uqa ija silail mecnu qee ihactoubmi ija silailnu qee doum. Eu odi, loo je jaqec madena: "Hina osona cetehnu cain amen qoiaun," ena. *(Kisim Bek 20.17; Loo 5.21)*

Eu odi qee madoubmi ija ami qoc kobilnu qee doum. <sup>8</sup> Euqa silail mec kobil eu loo jena jic memegi oodi ami qoc kobil filfil wawina calena. Eu mele, loo jeca qee mi silail eu uqa cal mec dana cingewe himec nijoub. <sup>9</sup> Wele ija loo jeca qee saen euna ija cebac bilem. Euqa hibna loo jena je ijaca hocob silail kobil cebac men. <sup>10-11</sup> Odocob silail kobil eu loo jena jic memegi oodi uhulten. Odimei loo je euna qiteceb cal mem. Eunu loo je eu ija cebac biley ocnu niyen eu qiteceb cal mem eu fem.

<sup>12</sup> Eunu ege doqona, loo je eu gun bahic. Je cunug eu loo je jaqecna bilina euha eu gun, eu tutuc, eu me bahic. <sup>13</sup> Eunu ceteh me eu qiteceb cal mem eu odifo? Qee bahic! Silail kobil eu ceteh me qee bahic eu camasac migiannu silail kobil eu ceteh me eu umei euna qiteceb cal mem. Odocobnu loo je jaqec eu age cain silail mowain ec madena eu silail kobilna gug bahic eu ceteh me qee bahic ihactena.

#### *Dana eu waug lecisna*

<sup>14</sup> Loo je eu dolonigenu ceteh eu ege doqona. Euqa ija dana dewegca. Silail kobil eu ija u taciteceb ija ugana cabi ugina. <sup>15</sup> Ija kobil odigina eu ugana gug qee dugina. Ge, kobil odocnu ija gale bahic tena eu ija qee odigina. Euqa kobil ija sagagdugina eu ija gaidgaid odigina. <sup>16</sup> Odocob kobil ija gale qee tena eu ija odigina eunu ijana kobil euna ija odi madigina, "Loo je eu me," igina. <sup>17</sup> Eunu qila ijadodoc qee odigina qa silail kobil eu ija wawina bilina eu odi odona. <sup>18</sup> Ija wawina ceteh me oso qee biley eu ija dugina, eu ija dewenina madigina. Ija wawi hilahna himec madigina. Ija kobil me odocnu ihoc gale tena qa ija kobil me eu odocnu ihoc qee odigina. <sup>19</sup> Kobil me eu odocnu gale tena eu qee odigina qa kobil me qee odocnu gale qee tena eu odigina. <sup>20</sup> Ija gale qee tena eu odiginafi eunu ijadodoc eu qee odigina qa silail kobil eu ija wawina bilina eu odona.

<sup>21</sup> Eunu ija kobil odi gulucdudu biligina. Ija kobil me odocnu gale tena qa kobil me qee odocnu eu ija wawina bilina. <sup>22</sup> Mele, ijana cisdocna Anutna loo jenu gale bahic tena. <sup>23</sup> Euqa ija dewerina loo je fil bilina eu odi figina. Eu Anutna loo je ijana cisdocna bilina eu ija gale tena euca cadesina. Odocob eu uqa silail loo je ija dewerina bilina eu ugana gihactec mitina. <sup>24</sup> O waloc! Ija me qee mec dana bahic! In uqa ija cal mec deweni inadec besitigian? <sup>25</sup> Ija Anut uqa besitigian hetaga dugina! Jisas Krais egena Tibud uqa eu odigian! Eunu ijadodoc ijana cisdocna ija Anutna loo jena cabi ugina igina qa ija wawi hilahna silail ugana loo jena cabi ugina.

## 8

#### *Krais egena silail casgasimei Kis Gun igen*

<sup>1-8</sup> Eunu dana ege Krais Jisasca gabandom ege silail ameg ocnu ec je oso qee nijel. Dana ugana cisdoc eu waug hilah ugana kobil toodufei uqa Anutna loo je qee toodoo odona. Uqa odi odocnu ihoc qee. Eunu dana eu uqa Anut cad mudina. Odocob dana wawaga hilah ugana kobilna cobogina age kobil Anut gale dona eu odocwe qee. Eunu dana wawaga hilahna kobilna cobogina eu agena cisdoc eu ceteteh wawaga hilahna eundecnu himec cisdogina. Euqa dana Kisna kobilna cobogina agena cisdoc eu ceteteh Kisna kobilnu himec cisdogina.

Odocob dana ugana cisdoc eu waug hilahna kobilna himec tawenafi dana eu uqa cal migian. Euqa dana ugana cisdoc eu Kisna kobilnu himec cisdonafii dana eu uqa malol bileyceca cebac bileyceca ugian. Eunu ege wawige hilah eu gagadic odocca qee eunu ceteh eu loo je odocwe qee Anut uqa odon. Loo je eu dana cajaca age kobil ititom odoiga ec madena eu ege wawige hilahna jic coboc kobilna qee coboqona qa Kisna jic coboc kobilna coboqona eu ege kobil ititom ihoc odocnu Anut uqagul Melah suldocob uqa silail

deweg eu egena silail dewenigewe u tacime ni ena silail eu wawige hilahna mena eu qee mecnu odon. Odocob cebac biley Kisna loo je uqa ege cunug Krais Jisasca gabandoc biluquna eu cebac biley igen eu silail cal mecca alena loo jenadec besiten. Odocob eunu dana ege Krais Jisasca gabandom ege silail ameg ocnu ec je oso qee nijel.

<sup>9</sup> Euga age wawaga hilah uqana kobilna qee bileyina. Age Kisna kobilna bileyina, eu mele Anutna Kis age dunuhna bileyebfi. Euqa dana oso uqa Kraisna Kisca qeefi uqa Kraisna dana qee. <sup>10</sup> Silalnu age dewenega wele cal men eu mele. Euqa Krais age dunuhna bileyebfi age wele dana cajaca ititom calein. Eunu age dolonoga eu cebac bilina. <sup>11</sup> Anut uqa Jisas cal mecnadec tulidocob ceseli cajen eu uqana Kis eu age dunuhna bileyebfi Anut uqa Jisas cal mecnadec tulidocob ceseli cajen eu uqa Kis eu age dunuhna bilina euna age cal mec dewenegaha cebac biley adigian.

#### *Kis Gun ege Anut uqana mel migen*

<sup>12</sup> Eunu wawaga meleec cotiel, ege walagca biluquna qa eu wawige hilahnau qee, eu ege wawige hilahna kobilna cobocnu qee. <sup>13</sup> Age wawaga hilah uqana kobilna cobifeig age cal moqagan. Euqa age Kis uqana gagadic odocna dewenegana kobol me qee eu qee mudifeig age cebac biluqagan. <sup>14</sup> Dana cunug age Anutna Kis iwalaadi cobona dana eu age, age Anutna mel odi bileyina. <sup>15</sup> Kis eu Anutnadec oin eu age Anutna begabeg meh cabi dana qee madel, odocob age cucuiec danaha qee madel. Euqa Kis age oin eu uqa age Anutna mel ibuldoin. Odocob Anutna gagadic odocna ege utaai madoqona, “Aba!\* Mei!” oqona. <sup>16</sup> Anutna Kis uqadodoc ege dolonige utadocob ege Anutna mel odi bileyin qasali magena. <sup>17</sup> Odocob ege Anutna mel ibuldufeb egeha Anut huqanehul. Odocob hibna ege Anutna ceteteh me bahic cunug eu oqan. Ege Kraisca osoben ceteteh me bahic eu oqan. Euqa ege uqaca osoben hibna kobilkobil oqannu ege qila uqaca osoben culumen sogoecca gahidoqonafi ege uqaca Anutna ceteteh me bahic oqan.

#### *Hibna ege sao jobon cebac biley oqan*

<sup>18-25</sup> Ege doqona, ceteteh cunug Anut ifanen eu caja mel basigia bili dain dona odi dain tebandogina. Odocob ifanec cunug odi qada qaqaji bibilegin leceb eu qila saen ina calena. Anut uqa ifanec ceteh cunug agena me qee mec gel gihacadec eunadec besiadigian. Odocob ifanec ceteh cunug eu ege Anutna mel ibuldom egeca osoben Anutna ceteh me bahic umeb gihacgec qee himec bileyin. Eunu Anut ceteteh cunug eu me qee bilimeig me qee moqagan ec maden. Eu ifanec ceteteh agena gale adecna eu odi qee calel. Euqa Anut uqa ifanec ceteteh me qee moqagan ec maden eu uqaha ageca ceteh me caligian ec maden. Eunu ceteteh cunug Anut ifanen eu uqa ola suli u meciil ege Anutna mel ibuldumeb camasac mecnu sumudegin.

Odocob ceteteh Anut ifanen eu himec qada qaqaji qee bileyina. Ege Kis wele om. Kis eu Anut uqa sab cabina casac wal mena eu odi bagolwe casac igen. Odocob egeha dain tebandudu qaqaji ege Anut uqa uqana mel mudigiannu susumudi biluquna, saen eu ege dewenige ibuldocob haun caleqan. Anut uqa ege wele ceseli oigen. Odocob egena aig qoc euna ihoc ligiannu sumuduquna. Euqa ceteh sumudom eu wele fom eu ege haun sumudecnu ihoc qee. Dana oso uqa ceteh wele fenfi eetanu haunhaun sumudina? Euqa ceteh ege qee folom eu ege ocnu geh cisidob sumuduqunafi ege wawige meleec gagadic tawecnu sumuduquna. Eunu ijana cisidoc eu odi, kobilkobil eu hibna egeca camasac migian eu qila culumen sogoecca gahidoqona eu wooldoc bahic.

<sup>26</sup> Eu odiwe ege cel cetehnu bahic inondocnu eu qee doqona. Eunu Kisha ege dana gagadicca qee eundec cesulgena. Odimei Kis uqadodoc ege cesulgecnu Anut inondona. Kis uqa dana egena jena madecwe qee eu odi sogoi inondona. <sup>27</sup> Odocob Kis uqa Anutna cisidoc toodudu dana cajaca qagoc cesuladecnu inondona. Eunu Anut uqa dana wawaga memegi camasac fena eu uqa Kisna cisidoc euha camasac fena.

<sup>28-30</sup> Uqa Melah age walininga matu biliqiannu uqa dana cajaca Anut ceseli cedecnu wele maden eu ageha uqa Melah cinigwe caloqaganu nesili ehaden. Odocob uqana mel gehca biluqagan. Odocob dana cajaca age uqana wele nesili ehaden eu ageha utaaden. Dana cajaca utaaden eu ageha dana cajaca ititom ec maden. Dana cajaca ititom ec maden ageha uqana kobilkobil aden. Eunu ege doqona, Anut uqa ceteh cunugna dana cajaca age Anutna nalunuga megina, eu age Anut ceseli cedecnu wele maden, odimei utaaden eu age me madena.

#### *Krais uqana nalunige mec qee culigiaun*

\* **8:15:** Aram jena age memeg eu aba ein. Aram je eu Jisasna je madec gug. Anut uqa Jisas memeg, eunu Jisas uqa Anut inondodoi uqa Aba ec maden. Age Mak 14.36 feiga.

<sup>31</sup> Eunu Anut ceteh i cunug odona eunu ege eeta ec madecnu? Anut ege cesulgenafu in uqa eguna cad? <sup>32</sup> Uqa ugagul Melah qee sosogon ol euqa ege cunug cesulgianu suldocob nen. Uqa Melah wele igen eunu uqa ceteh cunugha qee igiaunfo?

<sup>33</sup> Dana cajaca Anut uqa ugana nesili cedaden eu age in oso uqa deweneganu balijigian? Anut uqadodoc ege dana cajaca ititom ec madena. <sup>34</sup> In oso uqa ege dewenigenu balijec je madecnu ihoc? Eu Krais Jisasfo ege dewenigenu balijigian? Qeeo! Uqa cal men, odimei Anut tulidocob ceseli cajen, uqa qila Anut eben meulana bilina oodi cesulgecnu ha inondona. <sup>35</sup> Krais ege nalunige menu. In oso uqa Kraisna nalunige mecnadec besigigian? Culumen egeca calecebfi qee ege dain tebandocomunfi qee dana age tootoogi qigecebifil qee ege wen gecebfi qee lotocnu gohic mimeb bical bilocomunfi qee ceteh oso ege me qee migigia odocabfi qee han cadec egeca calecebfi ceteh eu cunug age Kraisna nalunige mecnadec besigecnu ihocfo? Qee bahic! Ceteh eu cunug ihoc qee! <sup>36</sup> Eu mele, ceteh eu odi eu egeca calena eu Anutna jaqec je odi madena:

“Ege hinana dana cajaca biluquna eunu deel cunugna qigecebil cal moqona.

Age ege sipsip qagaadecnu himec odiwe mecigeginia,” ena. *(Buk Song 44.22)*

<sup>37</sup> Eu odi qee! Ege ceteteh i cunug egeca calecebfi dana uqa nalunige menu cesulgeceb ege ceteteh i cunug wooldoqan. <sup>38</sup> Eunu ija odi wawi mele bahic ena, ceteh oso ege Anutna nalunige mecnadec besigecwe qee. Eu cal mecfo, qee cebac bilecfo, qee Anutna enselvo, qee buga gagadiccafo, qee ceteh qila biliafo, qee ceteh hib caligianfo, qee gagadic odoc filfilfo, qee <sup>39</sup> ohisdec cetehfo, qee maha dunuhnadec cetehfo, qee ceteh cunug Anut ifanen eundec osoko, qee ceteh cunug eu Anutna nalunige mecnadec besigecwe qee. Anut uqa nalunige mec eu egena Tibud, Krais Jisasna igina.

## 9

### *Pol Isrelnu waug qon*

<sup>1</sup> Ija Kraisna dana eunu je mele madigina. Ija qee uhuligina. Odocob Kis Gun uqa ijana cisdoc silec cofdona eunu ija qee uhuligina ec ha madena. <sup>2</sup> Eu mele, ijana dana cajacanu ija waloc teten saen cunug ija wawi dain tena. <sup>3</sup> Eu age ijaca golanige osol bahic. Eunu ija cotiel agenu eu mele ija odoc jiccamai Krais inondocomin ititactceb agena cudun umig fadaloum. <sup>4</sup> Age Isrel sihul, Anut uqa ugana mel maden, uqa ugana fulacdoc ben aden. Anut uqa ageca bal je cehaden, uqa ugana loo je aden. Odocob age Anutna cuha fec kobilca Anutna je hahun madecca oin. <sup>5</sup> Isrel dana weledec ijanagaca matu eu age jajanagail himec. Odocob agena sihulnadec himec Krais uqa dana ibuldon. [Krais uqa cunug agena ilo, uqa Anut.]<sup>\*</sup> Ege binan sulocomun cataneiale! Mele!

### *Pol uqa Anut Isrel dana cajaca adi cofadennu maden*

<sup>6</sup> Ija Isrel dana cajacanu saen cunugna waloc tena qa dana cajaca Isrel sihulnadec calein eu age cunug eu age Isrel bahic qee. Eunu ija Anutna je hahun madec qee aig qolnu qee cisadegina. <sup>7</sup> Eu odiha Ebrahamna sihulnadec calein eu age cunug eu age Ebrahim melahul ategul asagul bahic qee. Wele Anut uqa Ebrahim madon:

“Hina sihulel toohi caloqagan age Aisak sihulna himec caloqagan,” don. *(Genesis 21.12)*

<sup>8</sup> Eu ugana gug eu odi. Mel mel aid age golanaga madec kobilna himec calegina eu age Anutna mel mel aidca bahic qee. Euqa mel mel aidca age Anutna je hahun madecna kobilna calegina eu age himec Ebrahim melahul, ategul, asagul caloqagan. <sup>9</sup> Ge, Anut uqa je hahun madecna eu odi madena:

“Ija saen euna ceseli hugen ec wele madem,

odocob saen euna Sera uqa mel manahal basigian,” ena. *(Genesis 18.10, 14)*

<sup>10</sup> Eu odi himec qee. Rebekaha ugana mel lecis ale memela osol, eu Aisak ege jajanige.

<sup>11</sup> Euqa Anut uqa ugana cisdoc himec toodona. Eunu uqa ugana dana cajaca biluqagannu ugana cisdoch himec ugadodoc dana cajaca gesiladi ehaden. Uqa danana cabinu qee cisdonia. Ugadodoc dana utaadena. Eunu wele mel lecis eu ale qee cali hocna kobil meca me qeeca eu qee odolosin, <sup>12</sup> saen euna uqa Rebeka madumei madon:

“Matu eu milum bisalu biligian,” don. *(Genesis 25.23)*

<sup>13</sup> Eu odiwe Anutna jaqec je odi madena:

“Ija Jekobnu nalug mem qa ija Iso sagagdom,” ena. *(Malakai 1.2-3)*

<sup>14</sup> Eunu ege eeta ec madecnu? Anut uqa Jekob nesili ehuden qa Iso qee nesili ehudelnu, “Anut uqa kobil ititom qee odi odon ecnu,” odi madecnufo? Qee bahic! <sup>15</sup> Ge, uqa Moses madon:

“Ija dana osonu wawi nijecebfi

eu uganan wawi quqian.

\* 9:5: Grik je eu gadac ina [ ] nijia eu falicdoc je fil osoha nijia, eu odi: Anut uqa cunug agena ilo.

Ija dana osonu wawi qocobfi

eu uqanu waloc tigian," don.

(Kisim Bek 33.19)

16 Eunu Anut uqa dana osoosofo gesildon eu danana cisdocnaca danana cabi ocnaca eu odi qee odona. Euqa Anut uqa uqana waug qocna himec dana gesildon. <sup>17</sup> Eu mele, Anutna jaqec jena Anut uqa Fero madon:

"Ija hina dewenna eu ijana gagadic odoc dana cunug foqagannuca, odocob dana cajaca mahamaha cunugna bilegina eu age ija ijani doqagannuca odihecemin king calem," don.

(Kisim Bek 9.16)

18 Eunu Anut uqa osonu waug nijina eu uqanu waug qona. Odocob uqa oso waug menecnu cisdonu eu waug menena.

*Anutna gemag becca uqana waug qocca*

19 Euqa age eundec oso odi matigian, "Eu odifi eetanu Anut uqa danana odoc me qeenu wadacadiyen ec madena? In oso uqa Anutna cisdock toodocnu ihoc qee?" tigian. <sup>20</sup> Euqa hina cel dana hina Anutna je wadacdu madogona? Hal eu dana muden uqa madona:

"Hina eetanu ija edi muditem?" dona (Aisaia 29.16; 45.9)

eu odi qee nijel. <sup>21</sup> Hal mudec dana uqa maha cudun osolnadec umei hal lecis mudina, oso eu hal me bahic odocob cabi me ocnu deel benna, oso eu hal gauc cabi ocnu deel cunugna. Eu odi eu cois qee aganafo?

<sup>22-24</sup> Anut uqa ugana kobolkobol gagadicca egenu uqa waug qoc camasac mudencnu gale don. Ege ugana kobolkobol ceteh me bahic amca ocnu uqa wele hanoigen. Egeha uqa utagen, ege Juda sihulnadec himec qee utagel qa ege Juda dana qee eundec silihulnadec euha utagen. Eunu Anutna odoc eu odiodi odon. Uqa uqana gemag bec camasac mudencnuca, uqana gagadic odoc dana cunug fecnuca eu gale don. Eunu agenu gemag bena uqa fadaladecnu mudaden eu camuhulaadi saen cecelac fadaladecnu sumaden. <sup>25</sup> Uqaha Hoseana je hahun jaqecna odi maden:

"Dana cajaca ijana qee eu age ijana dana cajaca adigen.

Odocob sihul eu agenu ija nalunuga qee melem eu ija agenu nalunuga mec adigen. (Hosea 2.23)

26 Odocob cudun ono euna age maaden, 'Age ijana dana cajaca qee,' aden  
cudun euna bahic age Cebac Bilec Anut melahul adoqagan!" en. (Hosea 1.10)

<sup>27</sup> Odocob Aisaia Isrelnu utai maden:

"Isrel sihul eu lanna esic nijina odi fulusdocobfi cois Anut am nag odi himec cahahaadi-gian.

<sup>28</sup> Eu mele, Tibud uqa uqana je gesilec eu qee mudimei mahuc bahic dana cajaca mahananadec agena ameg wadacadiyan," en. (Aisaia 10.22-23)

<sup>29</sup> Odocob Aisaia uqa eunu wele je hahun maden eu odi:

"Tibud Gagadicca uqa eguna mel mel aidca am nag odi qee culadeceb biloubmi ege fadalgoub eu odiwe uqa Sodom Gomoraca fadaladoub," en. (Aisaia 1.9)

*Isrel age me jenu wawaga qee meelel*

<sup>30</sup> Eunu ege eeta ec madecnu? Ege odi madecnu. Juda dana qee eundec age Anutna ititom kobil ocnu cabi qee melein eu age Anutna ititom kobil wele oin. Anutna ititom kobil eu wawaga meleecna oin. <sup>31</sup> Euqa Isrel age Anutna ititom kobil ocnu loo je euna toodooin eu age Anutna ititom kobil qee gulucdoloin. <sup>32</sup> Eu eetanu? Age wawaga qee meleecebnu Anutna ititom kobil qee oloin. Eu age cabi ocna odochnudih wawaga nijen. Eunu age jaimaga meennna qeti aqeceb toni mahulein. <sup>33</sup> Anutna jaqec je oso eu odi madena:

"Feiga! Ija Saion ono meen oso migina.

Meen eu dana qeti aqeceb toni mahuluqagan.

Dana age uqanu wawaga meleigian eu ija agenu majani qee teiaun," ena. (Aisaia 8.14; 28.16)

## 10

*Pol Isrelnu inondon*

<sup>1</sup> O wawaga meleec cotiel, Anut Isrel dana cajaca cahahahaadecnu wawi ben nijia, odocob saen cunugna ija Anut agenu inondugina! <sup>2</sup> Ija eu agenu du cuhadugina eunu qasali madigina. Eu age Anutna kobil toodocnu gagadic bahic megina. Euqa age odi odogina eu fogo adecca qee. <sup>3</sup> Age Anutna kobilna ege dana cajaca ititom gena eunu age qee dogina. Odocob agedodoc agena ititom kobil camasac mudec cabi ogina. Age Kraisnu wawaga qee meleel. Eunu age Anutna kobil ege dana cajaca ititom ec madena eunu qee johoeginia.

<sup>4</sup> Ege doqona, Krais uqa loo je eu ihoc toodoo li hedon. Eunu dana cajaca cunug Kraisnu wawaga meleena age ijanaga dana cajaca ititom eu ogina.

*Cunug age Anutnu wawaga meleena Anut cahahaadigian*

<sup>5</sup> Moses uqa Anut age dana cajaca ititom ecnu loo je toodoc kobil eu dana cajaca age odi odocnu je jaqen. Uqa odi maden:

“Dana oso uqa loo je eu toodoo odona eu uqa loo jena jic cobona,” en. (*Wok Pris 18.5*)

<sup>6</sup> Euqa dana waug meleebec Anut dana cajaca ititom ec madec kobil eunu je odi madena:

“Hina wawin odi cain madagaun, ‘In uqa sao jobon tigian?’ agaun. (*Loo 30.12*)

Hina Krais ehudi ehi nigiannu odogona. <sup>7</sup> Odocob hina odi cain madagaun:

‘In uqa maha heel ben eu dunuh bahic non gugca qee euna toni nugian?’ agaun. (*Loo 30.13*)

Hina Krais ehudi ehi nu cal mec cudunnadec bigiannu odogona,” ena. <sup>8-9</sup> Euqa hina connna Jisas uqa Tibud ec qasali madaganafi hina wawinna Anut uqa cal mecnadec tulidocob ceseli cajen ec wawin meleefni Anut hina cahahahaegian. Eunu je eu uqana gug eu odi madena:

“Je eu hina cemein bahic bilina.

Eu hina connaca wawinnaca bilina,” ena. (*Loo 30.14*)

Je eu ege wawige meleec je ege qasali madoqona. <sup>10-13</sup> Eu odi je hahun jaqec madena:

“Dana cunug age Tibud ijan uutaeginu e Anut uqa cahahaadigian,” ena. (*Joel 2.32*)

Odocob Juda danaca Juda dana qee eundeca eu age caca himec. Tibud osol himec uqa ege cunug eguna Tibud. Uqa uqana eeldoc me bahic dana cunug uqa cesuladecnu utadogina eu age adena. Odocob Anutna jaqec je odi madena:

“Dana cunug age uqanu wawaga meleena

eu age majanaga qee adeiaun,” ena. (*Aisaia 28.16*)

Eunu ege wawige meleec qasali madocomun Anut cahahagigian.

<sup>14</sup> Euqa age uqanu wawaga qee meleecbfi adi uqa ijan utadoqagan? Odocob age uqana je qee dufeig eu adi uqanu wawaga meleigian? Odocob oso uqa me je qee qasali maadecebfli eu adi doqagan? <sup>15</sup> Odocob Anut uqa je qasali madec dana qee suladecebfli eu adi je qasali maadoqagan? Eu odi Anutna jaqec je madena:

“Dana age me je ahogina saen euna dana cajaca age me bahic celeboegina!” ena. (*Aisaia 52.7*)

*Isrel dana cajaca cunug age me je qee oloin*

<sup>16</sup> Euqa cunug age me je eu qee oloin. Aisaia uqa odi maden:

“O Tibud, in uqa egena je eu dah meceb waug meleen?” en. (*Aisaia 53.1*)

<sup>17</sup> Eunu oso Kraisnu qasali maadecebfli age me je dah megina. Odocob dana cajaca age me je dah mimeig wawaga meleena.

<sup>18</sup> Euqa ija sisilicina, age me je eu qee dah meleinfo? Qee bahic! Age wele dah mein. Anutna je odi madena:

“Age jejenega eu maha cunugna ihoc len.

Odocob agena je eu wele jobon cunugna ihoc len,” ena. (*Buk Song 19.4*)

<sup>19</sup> Euqa ija haun sisilicina, Isrel dana cajaca age me je eunu qee fogo adenafo? Qee bahic!

Age wele fogo aden. Moses uqa casac maden:

“Ija dana cajaca sihul oso cedigen.

Eu age ijanagaca qee, age cetehe gauc, age docca qee.

Ija kobil eu odigen, odocob age eunu amaga qocob gemanaga bigian,” en. (*Loo 32.21*)

<sup>20</sup> Odocob Aisaia uqaha Anutna je gagadic odi maden:

“Dana cajaca ija qee walitelein eu age ija wele guluctein.

Dana cajaca age ijanu leih qee sisiladelein eu ija age amagana camasac calem,” en. (*Aisaia 65.1*)

<sup>21</sup> Euqa Aisaia uqa Isrelnu odi maden:

“Cahineg cunug ija dana cajaca feeii je me qee wadacdu mamadi coboc eundec agenu age cahahahaadecnu ebeni mem,” en. (*Aisaia 65.2*)

## 11

*Anut uqa Isrelnu waug qon*

<sup>1</sup> Eunu ija sisilicina, Anut uqana dana cajaca wele hibemadenfo? Qee bahic! Ijaha Isrel dana. Ija Ebrahim jajanig oso. Ija Benjamin sihulnadec. <sup>2</sup> Anut uqa uqana dana cajaca wele don uqa qee hibemadel. Age Ilaijana dodonu Anutna jaqec je njija eunu qee doginafo? Ilaija uqa Isrel agena odoc me qeenu Anut odi inondon:

3 "O Tibud, age hinana je madec dana aqeceil cal mein.  
Age hinana ihanec cabal eu wagaladein.

Euqa ija himec biliga.

Eu age ijaha qituqagannu walitegina," don.

(1 King 19.10, 14)

4 Euqa Anut uqa cel je ceseli madon? Uqa odi jejeg hewi madon:

"Ija dana 7,000 eu age Baal tibud amegna gob qee cehelein eu ijadodoc hewadem bileiga,"  
don. (1 King 19.18)

5 Eu odiha qila saen ina am nag oso bileiga Anut uqa ugana eelgec uum igecka nesili  
cedaden. 6 Euqa uqa age loo je toodoinnu qee ehadel. Uqa age loo je toodoinnu ehadecebfi  
ugana eelgec uum igecka nesili igec eu uum igecka mele bahic qee.

7 Eunu adi? Isrel dana cajaca age Anutna ititom kobil eu oqagannu walein eu age qee  
oloin. Dana cajaca Anut nesili cedaden eu age himec oin. Odocob leih wawaga eu menen.

8 Anutna jaqc je odi madena:

"Anut uqa odadeceb amaga amusein.

Uqa odadeceb amaga qee mecielein, odocob dahiniga qotum qoin.

Odocob eu age odi bibilegin hu qila deel i calen," ena.

(Loo 29.4; Aisaia 29.10)

9 Odocob Dewidha odi maden:

"Agena ja qoc saenna  
aisais hewadeceb tonoqagan.

Age heel benna tonoqagan,

eu agena wadac ameg odi aig quqian.

10 Age amaga tu hocob qee meciowain.

Odocob hina cois homoga akuldocom odi himec bieleceil catanigian," en. (Buk Song  
69.22-23)

#### *Anut uqa Juda dana sihul qee eundec ceseli ceden*

11 Eunu ija sisiligina, age wele toni aqen odimeig odoc eu odina wele me qee meinfo?  
Qee bahic! Age Anutna me je hibemdoein eunu jic euna Anut uqa Juda dana sihul  
qee eundec caahahaaden, odocob Isrel age sihul fil eu Anutna caahahaadec ocobil fimeig  
wawaga me qee migian. 12 Isrel age Anutna me je hibemdoein saenna Anut uqa dana  
cajaca filfil me bahic cesuladen! Odocob age silail meina Anut uqa Juda dana qee  
eundec me bahic cesuladen. Eunu Anut uqa Isrel dana cajaca cunug caahahaadi egeca  
babangigian saen euna uqa ege dana cunug me bahic cesulgi cuhadugian!

13-14 Euqa ija qila Juda dana qee eundec age je maadigina. Ija Anutna aposel Juda  
dana qee eundec age gemo cabi ocnu Anut gesilten. Ija ijana Juda sihul eu age amaga  
qocomin Anut age leih caahahaadijanna ijana cabi oc sulecemin ohis tena. 15 Ge, Anut  
uqa Isrel ititacaden, odocob eu odocna uqa dana cajaca maha cunugnadec cedadeceb eu  
age uqaca tanawadeceb wawaga osol mein. Eunu Anut uqa Isrel haun ceseli cedifei eu  
cal mecnadec haun ceseli cajecwe moqagan.

16 Age bred mudencu ooldodoig saen euna age casac ooldoc ceteh eu manecnu cagu  
umeig am naha oso Anutnu qagu bielecnu abes megina. Eu odi odifeig ooldoc ceteh cunug  
eu Anutnu qagu bilia. Odocob na bebeig eu Anutnu qagu bielecebfni na batac euha cunug  
Anutnu qagu bilia. 17 Isrel age na oliw manan cinigwe. Odocob Anut uqa batac leih na  
oliw eunadec qahadi helen. Odimei uqa age Juda dana qee eundec oliw batac cus euna  
na oliw manan eu tubadeceb agena cudunna bilingina. Odocob age na oliw bebeignadec  
lalo oliw batac leih gami ogina. 18 Eunu age oliw batac Anut qahadi helen eu age Cain  
fileadowain. Age fileeiga adecebfni casac cisdu cuhadumeig age bebeig eu qee gahidogina  
qa bebeig age gahiadena.

19 Euqa age madegina, "Anut uqa batac eu agena cudunna ege tubigianu qahaden,"  
egina. 20-21 Eu mele qa age wawaga mele qee el eunu qahaden. Euqa age wawaga  
meleena euna gagadic taweiga. Anut uqa na oliw batac bahic eu qee culadel. Eu odiwe  
uqa ageha qee culadeiaun. Eunu age Cain fileowain. Age cois cumuneiga. 22 Eunu age  
batut feigale. Anut uqa waug susumulka qaa ugaha kobolkobol gagadicca odadegina. Euqa Anut uqa agenu  
waug qona, eu age ugana waug qoc euna bilifeig. Qeefi, ageha Anut qahadi qeladigian.  
23 Odocob Isrel age wawaga qee meleec kobol eu culifeig Anut uqa ihoc ceseli tubadigian.  
Eunu Anut uqa euna ceseli tubadigian. 24 Age Juda dana qee eundec, age na oliw cuswe.  
Odocob Anut uqa age batacwe qetadimei na oliw mananna tubaden. Na eu agena sihul  
qee bahic. Odocob Isrel dana age na oliw manan cinigwe. Eunu na oliw manan eu agena  
sihul bahicnu Anut uqa age batacwe na oliw manan euna ceseli tubadecnu cabi hetec  
bahic.

*Anut uqa dana cajaca cunugnu waug qon*

<sup>25</sup> O wawaga meleec cotiel, age je jahunec i fogo adigiannu ija wawi nijia, age Juda dana qee eundec agedodocnu cisdu du madowain, "Ege cisdoc silecca," owainnu ija je jahunec i qasali maadigina. Eu odi, Isrel am naha age wawaga meneceb kobil eu ageca biligian, lecebleceb saen Juda dana qee eundec agena sihul eu limei agena wawaga meleec am sanijec eu ihoc ligian. <sup>26</sup> Odocob eunu kobil eu odina Anut uqa Isrel sihul cunug cahahaadigian. Anutna jaqec je odi madena:

"Saion gemo ono cesuladec caligian.

Anut uqa Jekob sihul odudeceb age Anut hibemdoc kobil eu culuqagan.

<sup>27</sup> Odocob ija agena silail cunug cagasiadigen saen euna ija age gemo bal je cehigen," ena. (*Aisaia 59.20-21; 27.9; Jeremaia 31.33-34*)

<sup>28-29</sup> Isrel age Anutna me je hibemdogina eunu agenu, Juda dana qee eundec, age Anutna cad bileyina. Euqa Anut uqa age wele bahic nesili cedaden. Anut uqa age wele utaadon, uqa wele eeladec uum aden. Odocob uqa uqana cisdoc haun hibna qee falicdoiaun. Eunu Anut uqa Isrel jajanagailnu cisdumei Isrel dana cajaca nalunuga mena.

<sup>30-32</sup> Anut uqa dana cajaca cunug age uqana loo je tefacdoginanu uqa ameg me qee wadacadien ec maden. Eunu uqa dana cajaca cunugnu waug qona. Eunu age Juda dana qee eundec, age wele Anut filedoin. Qilaqa Isrel age Anut filedoinnu Anut agenu waug qoc ageca bilen. Eu odiwe Anut agenu waug qoc ageca bilennu Isrel age Anut agenu waug qoc oqagannu age qila Anut filedogina.

#### *Ege Anut binan sulecnu*

<sup>33</sup> Anut uqana kobil me bahic,

uqana cisdoc silec,

uqana doc eu dunuh bahic,

eu macas ameg gemona cinigwe!

Dana ege uqana cisdoc gug cunug fecwe qee bahic.

Dana ege uqana jic cunug bahic ha toodocwe qee.

<sup>34</sup> Anutna je eu odi madena:

"In uqa Tibudna cisdoc wele fen?

In uqa cisdoc uten?

<sup>35</sup> In uqa casac ceteh utennu ceteh eu wadac haun ceseli utigian?" ena.

(*Aisaia 40.13*) (*Job 41.11*)

<sup>36</sup> Qee bahic! Anut uqa ceteh cunug ifanen.

Eunu ceteh cunug bileyina.

Odocob ceteh cunug eu Anutnu himec bileyina.

Ege uqa binan sulocomun cataneiale! Mele!

## 12

#### *Ege dewenige eu ihanecwe Anut utecnu*

<sup>1</sup> O wawaga meleec cotiel, gug eunu ija niniadigina. Age Anut agenu waug qona, eunu age dewenega Anutnu ihanec cebacca ninjeb odiwe uteigale. Ihanec eu gunca Anut gale docca nijiale. Eu agena Anut cewel utoc bahic nijiale. <sup>2</sup> Odocob age dana mahanaadec cobogina odi cain tooadi cobowain. Euqa age Anut culdecebil agena cisdoc isindocob agena coboc haun ibuldugian. Odocob age Anut eeta gale dona eu doqagan. Euha cel ceteh eu me, eeta odocomun Anut egenu waug nijigian euha doqagan. Cel kobil eu ihoc bahic ege odocnu euha doqagan.

#### *Ege Anut wawige meleec igenna cabi ocnu*

<sup>3</sup> Odocob Anut eeltoc uum itecna ija age cunug osolosol maadigina, age abesabes agedodocnu ija dana binanica wooladec ija meca ec wawaga cain madeiaun. Qee bahic! Age abesabes agedodocnu odi cisdoiga, ija dana binanica wooladec qee biligina ija meca qee ec cisdoiga. Age cunug Anut age wawaga meleec osolosol aden euna agenu ihoc nana cisdu cuhadoiga. <sup>4</sup> Ege deweg osolna biluquna, odocob deweg eu amihilon mati bahicca. Odocob amihilon mati bahic eu age cabi filfil ogina. <sup>5</sup> Eu odiwe, ege mati bahicha, ege cunug eu Kraisca gabandoc deweg osol biluquna. Odocob deweg amihilon mati bahic age gabandoc bililia eu odi egeha cunug osolosol gabandoc biluquna.

<sup>6</sup> Anut uqa egenu waug qocob dumanige igeet filfil igen eu uqana eelgec uum igeecna igen. Eunu dana oso uqa je hahun madecnu duman uteccafi eu uqa cois uqa duman utec ihocna waug meleec ihocna je hahun madigian. <sup>7</sup> Dana oso uqa dana cotugul cewel uadecnu duman uteccafi eu uqa cois dana cotugul cewel uadec cabi hewigian. Dana oso uqa iwaladecnu duman uteccafi eu uqa cois mele bahic iwaladec cabi hewigian. <sup>8</sup> Dana oso uqa dana cotugul wawaga gagadic tawecnu duman uteccafi eu uqa cois uqa dana cotugul wawaga gagadic tawec cabi hewigian. Dana oso uqa cotig ceteh utinafi waug

lal qocca utigian. Dana oso uqa cabi cofdoc danafu uqa cofdoc cabi eu megameg mimi odigian. Dana oso uqa cotignu waug qocob cesuldonafu eu uqa ceelecca cesuldugian.

*Ege wawige meleecna cotigeil nalunuga mecnu*

<sup>9</sup> Age wawaga meleecna cotogail nalunuga megina eu age mele bahic wawaga meleecna cotogail nalunuga meigale. Qisol mec kobil eu sagagdoiga. Kobol me bahic eu heweigale. <sup>10</sup> Age wawaga meleecna cotoga eunu age waliagwaliagwe nalug mecebmecebeigale. Age saolal mudecebmudefebecnu megameg meigale. <sup>11</sup> Age megameg mec eu cain toneiaun. Kis Gun age wawaga dunuh bilia eunu age wawaga Tibud toodocnu gagadic taweiale. Age Tibud cewel utoigale. <sup>12</sup> Ege ceteh hibna ocnu sumigi bilina eunu cisduumeig wawaga ceeleiale. Culumen ben oso ageca calecebfi age duuec taweigale. Anut inondoc kobil eu Cain culuwain gaidgaid hewi cuhadoigale.

<sup>13</sup> Anutna dana cajaca qagoc leih cocooch ihoc qee lec eundec cesuladecnu cain culuwain age loo cahulec bileigale.

<sup>14</sup> Age tootooadi coboc eundec eladeigale. Mele, cain geladowain! Eeladeiga. <sup>15</sup> Age ceeli bilingina eundecca ceeleigale. Age qaqqaji bilingina eundecca qajeigale. <sup>16</sup> Age wawaga osol meceb coboigale. Cain deboii cobowain, age jogoii coboigale. Age agedodocnu ege dahinigeq qolocijec cahulec cain owinai.

<sup>17</sup> Dana oso uqa kobil me qee odadecebfi age kobil me qeena cain wadacdown. Odoc me dana fimeeq saolal mudugina eu odocnu cisoigale.

<sup>18</sup> Agena odocna jiccafi dana cunug gami wawaga osol mimeig bilinga. <sup>19</sup> O ijana danah bahic, agedodoc cahuldoc age odadegina eu ameg cain wadacdown. Je cunug Anut culitoigale. Uqa gemag beceb ameg wadacadigian. Ge, loo je jaqec odi nijia, Tibud madena:

“Cahuldoc kobil wadacdoc eu ijana cabi.

Ijadodoc ameg me qee wadacdugen,” ena ec nijia.

(Loo 32.35)

<sup>20</sup> Euqa loo je jaqec odi madena:

“Hinana cad uqa wen docobfi hina sab utugale.

Uqa wa gab docobfi wa utugale.

Eunu hina odi odocomfi eu hina ja sogca ilona haudocwe Megan,

odocob uqa kobil me qee odonnu majag dugian,” ena. (Sindaun 25.21-22)

<sup>21</sup> Qisol mec eu culdecem cain woolheiaun. Qisol mec eu kobil mena wooldogale.

## 13

*Ege cunug gaid gabman ilo bisalu bilingan*

<sup>1</sup> Dana cunug age gabman ilo bisalu gaid bilingale. Eu mele, gabman ilo eu gauc qee calena. Gabman ilo uqana cabi cunug eu Anut ebenna himec calen. Odocob gabman ilo cunug bilinga eu Anut uquadodoc madennu bilinga. <sup>2</sup> Eunu dana oso uqa gabman ilo jejeg wooldona eu uqa cetehe Anut men wooldona. Odocob dana eu age gabman ilo jejeg wooldogina eu age agedodoc agena ameg me qee oqagan. <sup>3-4</sup> Ge, dana kobil me odogina eundec age gabman ilo cucuiadoqagannu qee odogina. Euqa dana kobil me qee odogina eundec age gabman ilo cucuiadecnu biloub. Hina gabman ilo cucuidoga qee henafu? Uqa Anutna cabi dana uqa hina cesulheheb me bilingan. Eunu cucuidoganfi hina kobil me himec odoga, odocob hina binain suligian. Euqa uqa han sigin eu uqa ebenna bilina eu uqa gauc qee hewena. Uqa Anutna cabi dana dana kobil me qee odona eu ameg me qeena wadacdown bilina. Eunu hina kobil me qee odifeg hina uqanu cucuiegan. <sup>5</sup> Eunu ege uqa bisalu bilingcu. Ege Anutna ameg me qee wadacdoc qee oqaunnu himec uqa bisalu biluquna qa ege wawigena doqona kobil eu me bahic ec madimeb toodu odoqona eunu uqa bisalu biluquna.

<sup>6</sup> Gug eunu himec agena takis fajec qaig helegina. Eu eetanu? Gabman ilo age Anutna cabi dana bilingina, odocob saen gaid age cabi eu himec cofdocnu gagadic megina. <sup>7</sup> Age ceteteh filfil dana adecnu cabica eu odi himec dana cunug adeiga. Takis cedec dana filfil eu age qaig adeiga. Dana uqa bisalu bilingina eu uqa bisalu bilinga. Dana age binan sulegina eu uqa binan suleiga.

*Ege dana cajaca cunug nalunuga mecnu*

<sup>8</sup> Dana oso uqa cotignu nalug mena eu uqa loo je bahic toodona. Eunu dana osona ameg age dewenegana cain nijiaun. Ameg osol eu himec saen cunug nijina, age nalug mecebmecebegina. <sup>9</sup> Loo je leih eu odi gagadic madena:

“Hina dana osona cajaca Cain ugaca nijuwasin.

Hina dana oso Cain qocom cal meiaun.

Hina Cain heje magaun.

Hina osona cetehnu cain amen qoiaun,” ena. (*Kisim Bek 20.13-15, 17; Loo 5.17-19, 21*)  
 Loo je eu odocob loo je leihca eu cunug ilo osol himec eu je odi madena:  
 “Hina hinanel nalunin maganawee

odi hina utuqain bielec \* eundecnu nalug magale,” ena.

(*Wok Pris 19.18*)

<sup>10</sup> Dana oso uqa nalug mena eu uqa utuqannu kobil me qee qee odona. Eunu dana uqa nalug mena eu uqa loo je bahic toodona.

### *Ege tutuc coboc bahic cobegan*

<sup>11</sup> Eetanu ija kobil eu odi odoqagannu maadigina? Saen qila bilia eunu age wele doin. Qila us nijec cuculeb cajecnu saen. Age dogina, ege wele wawige meleec dana calom, odocob Anut cahahagecnu saem cecelaccia nijen. Qilaqa saen i wele gothic mena. <sup>12</sup> Witic eu qee memen odi cujedugia odona. Eunu tuna kobil eu culecnu. Odimeb han lotoc tacimeb fulacdoc kobilna bielecnu. <sup>13</sup> Ege ititom coboc dana cam fulacdocna cobona odi cobocnu. Ege cain fileii deboii gad ceu jecomun dalul qigiaun. Ege cecenec kobil cain oodi wal kobil majagca qeena ilag uduqaun. Ege cain fee dadanii dana osona cetehnu amige qoiaun. <sup>14</sup> Euqa age Krais Jisas Tibud umeig han lotoc cinigwe taqeiga. Odimeig dewenegana gale doc me qee toodocnu cain cisdowain.

## 14

### *Age dana oso uqana coboc Cain gesiluwain*

<sup>1</sup> Odocob dana waug meleena qa uqana waug meleec eu gagadic qee, eu uqa tamanec dunuh ehudi ehi leiga. Euqa age uqa gami cisdock filfilna cain fee dadanowain. <sup>2</sup> Dana oso uqa waug meleecnu gagadic bahic, odocob uqa ceteteh filfil cunug jena. Euqa dana cotig oso uqana waug meleec eu gagadic qee eunu uqa cuhun qee jena.\* <sup>3</sup> Odocob dana ceteteh filfil cunug jena uqa dana cuhun qee jena eu Cain cewudeiaun. Odocob dana cuhun qee jena uqa dana ceteteh filfil cunug jena eu Cain gesildaiaun. Ge, Anut uqa dana euha ehuden. <sup>4</sup> Hina dana adecnu dana oso uqana cabi dana dumannu gesildogona? Uqana cabina gagadic tawifei qee cabi eu toni qufei eu uqana tibudna ceteh himec. Tibud uqa himec eu ihoc gagadic mudeceb tawigian. Eunu uqa gagadic tawigian.

<sup>5</sup> Dana oso uqa deel oso eu uqa meca bahic cisdona, deel leih wooladec bilina ena. Odocob dana oso uqa deel cunug uqa caca dih bilina ec cisdona. Dana osolosol cunug agedodoc tebandoigo cisdu cuhadoigale. <sup>6</sup> Dana uqa deel oso me bahicnu cisdona dana eu uqa Tibudnu cisdudu odi odona. Odocob dana uqa ceteteh cunug jena dana eu uqa Tibudnu cisdudu ceteteh cunug jena. Ge, uqa Anut hetaga dumei ceteteh eu jena. Odocob dana uqa cuhun qee jena eu uqa Tibudnu cisdudu sab leihnu cud bilina. Odocob uqaha Anut hetaga dona.

<sup>7</sup> Ege dogona, ege gemona dana oso uqana cebac bielecnu qee cisdona eu uqadodoc uqana ceteh himec. Odocob oso uqa uqana cal mecen qee cisdona eu uqadodoc uqana ceteh himec. <sup>8</sup> Ege cebac bilifeb ege Tibudnu biluquna. Odocob ege cal mifeb ege Tibudnu cal moqona. Eunu ege cebac bilifeb qee cal mifeb ege Tibudna himec. <sup>9</sup> Eu gug inu himec Krais cal mimei haun ceseli cajen. Eunu uqa dana age cal meinca dana age cebac bieginaca eu cunug agena Tibud biligianu.

<sup>10</sup> Odocob hina eetanu cotinna jic coboc gegesileg je me qee madogona? Odocob hina eetanu cotin cewudogona? Age dogina, ege cunug Anut amegna tawocomun gesilgigian.

<sup>11</sup> Ge, Anutna jaqec je odi madena:

“Tibud odi madena, ‘Ija cebac bibilig mele bahic madigina, dana cunug ija amina gob cehoqagan.

Odocob dana cunug conogana Anut binan suluqagan,’ ena,” je hahun jaqec odi madena. (*Aisaia 45.23*)

<sup>12</sup> Eu odinu ege osolosol cunug egdedoc egene coboc Anut amegna qasali madeqan.

### *Ege ceteh oso Cain odocomun cotige tonimei silail meiaun*

<sup>13</sup> Eunu ege gesildocobdocobec kobil eu culecnu. Ege jaih qeti qocnu ceteh oso odocomun cotige tonimei silail migiannu Cain odoqau ec odi cisdocnu. <sup>14</sup> Ija Jisas Tibudca gabandoc biligina eu iwalteceb ija ceteh cunug agedodoc amagana gegehinca qee eunu do cuhadugina. Euqa dana uqa cel cetehnu gegehinca eu odi cisdona uqa cisdonana himec ceteh eu gegehinca. <sup>15</sup> Ceteh hina jagana euna cotinna cisdoc me qee mudinafi hina nalug mec kobilna qee cobogona. Dana eu Krais uqa cahahadocnu cal men eunu hinana jec sab euna Cain me qee mudugaun. <sup>16</sup> Eunu agena ceteteh memeca eu ceteteh me qee

\* **13:9:** Utuqain bielec uqana gug eu odi. Agena loofo, agena kobilfo eu dana osonu nalug magale ec qee madel, cois hina dana eunu nalug magale. \* **14:2:** Age je 1 Korin 8.1na nijia eu feiga.

egina cain culuwain. <sup>17</sup> Ge, Anutna culna gug eu sab jec wa gab jecca kobil qee nijel. Uqana gug eu ititom cobocca malol bilecca ceelec Kis Gun iginaca njia. <sup>18</sup> Dana uqa ceteh eu odina Krais cewel utona Anut uqanu gale dugian. Odocob dana age uqa dana me bahic ec cisdoqagan.

<sup>19</sup> Eunu ege kobil cunug euna malol biluquna eu toodocnu. Odocob kobil cunug cotige waug meleec gagadic mudencu euha cesuldocobdocoboqale. <sup>20</sup> Hina sab jecnu himec cisdodog Anutna cabi cain me qee mudugaun. Ceteteh cunug eu jecnu me himec. Euqa hinana sabna dana oso qocom tonimei silail mifei eu hinana kobil me qee. <sup>21</sup> Hina cuhun jejegfo, qee wain jejegfo qee ceteh oso oodog cotin odudecem toni qona hina ceteh eu odi cain odogaun. Kobil eu odi qee odifeg eu kobil me bahic. <sup>22</sup> Hina hinana wawin meleecnu cisdoga hina wawin meleec eu hina Anutca alena ceteh himec hewaga. Dana uqa ceteh me bahicnu cisdona, odocob uqa waug ceteh eunu qee leciscra mena uqa ceelecca biligian! <sup>23</sup> Euqa dana oso uqa ceteh osonu waug leciscra meceb u jena euqa uqa eunu waug meleecca qee jenanu Anut uqa dana eunu silail dana ec madena. Ceteh cunug dana uqa waug meleecca qee odona eu silail.

## 15

### *Ege Kraisna cisdoc dumanca toodoc bahic toodoqan*

<sup>1</sup> Ege wawige meleec gagadicca ege dana wawaga meleec gagadic qee eundec cesuladecnu cabi oum. Agena culumen agedodoc gahidocwe qee eu ege gahidocnu. Egedodoc eguna gale gec cain toodoqaun. <sup>2</sup> Ege osolosol cunug ege utuqanige uqadodoc dana me caligliannu uqana gale doc toodocnu. Odocob utuqanige uqana waug meleec duuec tawigian. <sup>3</sup> Ege doqona, Krais uqadodoc uqana gale doc qee toodol. Euqa uqanu Anutna jaqec je odi madena:

“Dana hina je me qee mahein je me qee eu hu ija jahulten,” ena. *(Buk Song 69.9)*

<sup>4</sup> Me je cunug wele Anutna jaqec jena jaqein eu ege iwalgecnu jaqein. Eunu me je jaqein eu odigeceb ege wawige meleec gagadic tatawi gaid biligian. Odocob euna Anut cahahagigiannu susumudi biluquna. <sup>5</sup> Odocob Anut uqa wawige meleec gagadic tawecca wawige meleec gaid bilecca uqa cesuladeceb age Krais Jisasca gabandoc Kraisna cisdoc toodudu wawaga osol bileigale. <sup>6</sup> Eu odina age wawaga osol memeig conoga gabandumieig Anut binan suleigale, Anut uqa egena Jisas Krais Tibud Memeg.

### *Krais uqa Juda danaca Juda dana qee eundecca cesuladen*

<sup>7</sup> Krais ege cedigen. Eu odiwe age cunug Anutna kobil kobilnu cotogail cedi wagoadecibil wawaga osol mimeig bileigale. <sup>8</sup> Ge, ija odi madigina, Anut uqa Juda dana jajanagail ijanganaga wele bilein eu je hahum maaden. Eunu Krais uqa Anut ija odigen ec maaden Anut eu uqa hibna odi odon eu mele ihacgecnu uqa dana ibuldumei Juda dana cewel uaden. <sup>9</sup> Eu odihia Juda dana qee eundec age Anut agenu waug qon eunu Anut binan sulecnu uqa odi odon. Eu odi Anutna jaqec je odi madena:

“Eunu ija Juda dana qee eundec age gemona binain suligen.

Odimig hina ijainnu due sisilg binain suligen,” ena. *(2 Samjuel 22.50; Buk Song 18.49)*

<sup>10</sup> Odocob Anutna jaqec je osoha odi madena:

“O Juda dana qee eundec age Anutna dana cajaca gami ceeleigale,” ena. *(Loo 32.43)*

<sup>11</sup> Odocob Anutna jaqec je osoha madena:

“Juda dana qee eundec cunug Tibud binan suleigale.

Dana cajaca cunug Tibud saolal mudeigale,” ena.

<sup>12</sup> Odocob Aisaiah maden:

“Citah eu Jesena na gugna caligian.

Dana eu uqa Juda dana qee eundec agena king biligian.

Dana eu age uqanu wawaga meleecceh cahahaadijanu sumudi biluqagan,” en. *(Aisaia 11.10)*

<sup>13</sup> Anut uqa cahahagecnu sumudi biluquna uqa uqanu wawaga meleecna odadeceb age ceelecca malol bilecca wawagana ihoc leiale. Eunu Kis Gunna gagadic odocna Anutna saen me ageca hugiannu sumudeginu eu age wawagana cunug ihoc ligian.

### *Pol uqa me jenu je gagadic jaqiaden*

<sup>14</sup> O wawaga meleec cotiel, ijana wawi meleec eu age wawagana kobil meme geh bahic am ben. Odocob age doc filfilha ihoc am ben. Eunu agedodoc ihoc iwaldocobdocobeeig cotogail cisdoc me bahic adoqagan. <sup>15</sup> Euqa je leih jaqiadem euna cacaingca. Anut uqa nesili ehitimei uqana cabi me bahic ija iten. Eunu jaqecnu qee jaen qitel. Je eunu ija age dahiniga hewem. <sup>16</sup> Cabii eu ija Krais Jisasna cewel dana Juda dana qee eundeccu cabi ugina. Ija nawel tawec ihanec danawe Anutna me je qasali maadigina. Eunu Juda dana

qee eundec age ihanec caloqagan eu Anut gale dugian. Odocob Kis Gun uqa age Anutnu qaguadeceb age Anutna dana cajaca bahic caloqagan.

<sup>17</sup> Eunu ija Krais Jisasca cabi owona eu Anutna cabi hewiginanu culaigina. <sup>18</sup> Krais uqa ijana cabina Juda dana qee eundec odadeceb age Anutnu wawaga meleeceb uqana je toodoo odoin. Cabi eu ija je madecnaca odocnaca odom eu himec qasali madecnu wawi taweia. Ija ceteh osonu qee qasali madigaun. <sup>19</sup> Ija cabi eu gaga odocnaca kobilokol odocnaca Kis Gunna gagadic odocnaca odom. Eunu ija Jerusalem ono sanan mimig Kraisna me je cunug qasali mamadig cocobi nui Ilirikam hatu cunugna nuem. <sup>20</sup> Cabi ina hatu euna Kraisnu me je qasali maadecnu wawi ben taweia. Dana osona jo nah ohis ijana jo cehigaunnu ija Krais ijan qee doc bilinginana me je qasali maadigina. <sup>21</sup> Euqa Anutna jaqec je odi madena eu gale tena:

“Dana am uqa ijannu oso qee maadel eu age eu foqagan.

Odocob dana uqana je qee dah melein eu age wawaga fogo dugian,” ena. (Aisaia 52.15)

#### *Pol Rom fecnu cisdom*

<sup>22</sup> Saen geh bahic cabi i ijana jic cadawiten. Odocob ija ageca lecwe qee. <sup>23</sup> Euqa qila ija hatu inu ene biligina eu cabica qee. Odocob cabi gel madi ija ageca lecnu bahic cisdom. <sup>24</sup> Eunu hubna ija Spen hatuna nuigen saen euna age casac li meciadimig nuecnu cisdugina. Odocob ija age gami saen nag odi bibilomun wawi me meceb age ehiti Spen hatu jicna ehi nui cultuqagan.

<sup>25</sup> Euqa qila ija Jerusalem ono Anutna dana cajaca qagoc cesuladigennu nuigina. <sup>26</sup> Ge, Masedonia Akaiaca tamanec age agena qaig leih cedi gabandumeig Jerusalem ono Anutna dana cajaca qagoc cetetehnu sawen bilingina sulduadoqagannu je wele cagoin. <sup>27</sup> Age ceteh me odocnu cisdoein. Eu me bahic qa eu ageha Jerusalem agena ameg deweneganina. Ge, Juda dana qee eundec age Juda agena dolonoga eeldoc ceteteh wele cedein. Eunu Juda dana qee eundec age Juda dananu ceteteh ceseli adecnu ameg eu oso njija.

<sup>28</sup> Eunu ija qaig cunug age cedein eu Jerusalem dana cajaca adigen, ija cabi i casac qee mudi hedumig saen euna ija ageca nui calimig Spen hatuna nuigen. <sup>29</sup> Odocob ija ageca lelemin Kraisna eeldoc eu ijaca ihoc lec ageca caligen ec dugina.

<sup>30</sup> O wawaga meleec cotiel, ija niniadigina. Age eguna Tibud Jisas Kraisnu Kis Gunna nalug mecnua age ijaca gabanducobil ege Anut ija cesultigianu gagadic inondoqan eunu sisiladigina. <sup>31</sup> Age Anut uqa Judia dana age wawaga mele qee ec ebeneganadec cagasingianu inondoiga. Odimeig ijana cabi Jerusalem ono odigen eu dana cajaca qagoc ono bilingina eu age cabi eunu gale adigan eunuha inondoiga. <sup>32</sup> Eunu Anutna cisdomna ija wawi ceelecca li ageca caligen. Odocob ageca ono nag odi jaen mudigen.

<sup>33</sup> Anut uqa eguna malol biley uqa ageca cunug biliale. Mele.

## 16

#### *Pol dana cajaca feele ec maaden*

<sup>1</sup> Age Fibi, ege cebinamige, lalafan oqagannu wawi njija. Uqa Senkria tamanec cesuladec cabi caja. <sup>2</sup> Age Anutna dana cajaca qagoc Tibud ijannu cisdomdoig Fibi ehudecebile age gemo biligianu wawi taweia. Ege Anutna dana cajaca kobil odi odoum eu me. Odocob uqa dana cajaca geh cesuladen, odimei ijaha cesulten. Eunu uqa ceteh osonu culumencaj age cesuldoiga.

<sup>3</sup> Priska Akwilaca ale Krais Jisasna cabi hijiel eunu age ijana feele ec aleiga. <sup>4</sup> Eu ale cal mec dodolaalen cesultesin. Eunu ija himec hetesin qee alelem qa Juda dana qee agena tamanec cunugha hegein alesina.

<sup>5</sup> Odocob ijana feele ec tamanec eu alena jona cegulegina eu ageha adeiga. Age ijana feele ec Epinitias uteiga, ijana danah bahic. Uqa Asia hatu gadac nagnadec dana eu casac Kraisnu waug meleecca calen.

<sup>6</sup> Age ijana feele ec Maria uteiga. Uqa age cesuladecnu cabi gagadic on.

<sup>7</sup> Age ijana feele ec Andronakas Juniasca aleiga, eu ale ijana sihuладec, eu ale ijaca gihacdoc jona bilom. Ale aposel gemona ijanalaca, odocob ija Kraisca qee lec eu ale Kraisca casac lesin.

<sup>8</sup> Age ijana feele ec Amplietas uteiga, uqa Tibudna kobilna eu ijana danah bahic bilia.

<sup>9</sup> Age ijana feele ec Eben uteiga, uqa Kraisna cabinu cabi hi. Odimeig Stekisha ijana feele ec uteiga, uqa ijana danah bahic bilia.

<sup>10</sup> Age ijana feele ec Apelis uteiga, uqa Krais toodocnu ijanca.

Age ijana feele ec Aristobjulas uqana jo osol eu age adeiga.

<sup>11</sup> Age ijana feele ec Herodion uteiga, uqa ijana sihuладec.

Age ijana feele ec Nasisasna jo osol eu age adeiga, eu age Tibudna bilingina.

<sup>12</sup> Age ijana feele ec Traifina Traifosaca aleiga, eu ale Tibudna cabinu cabi gagadic esina.

Age ijana feele ec Pesis uteiga, uqa ijana caja danah bahic. Uqa Tibudnu cabi gagadic bahic on.

<sup>13</sup> Age ijana feele ec Rufas uteiga, uqa Tibud toodocnu dana me bahic. Odocob uqa anag euha feele ec uteiga, uqa ija au odi bilina.

<sup>14</sup> Age ijana feele ec Asinkritasca Fligonca Hemisca Patrobasca Hemasca, odocob cotiel eu ageca bilegina eu age cunugca odi adeiga.

<sup>15</sup> Age ijana feele ec Filologas Juliaca aleiga, odocob Nerias cebinagca Olimpiasca Anutna dana cajaca qagoc eu age gami bilegina eu cunugca feele ec adeiga.

<sup>16</sup> Anutna dana cajaca eguna kobel age osolosol cunug cotogail cotec gunna cotdocobdo-cobeigale.

Kraisna tamanec cunug age feele ec adegina.

*Dana leih age tamanec qatanegina*

<sup>17</sup> O wawaga meleec cotiel, ija cesusadigina. Dana leih age tamanec qatanegina. Age wawaga meleec dana cajaca je iwaladein eu hibemdocnu sigaladein. Age agena wawaga meleec wagalegina. Eunu age dana eundec hibemadeiga. <sup>18</sup> Dana eundec eguna Tibud Krais qee cewel utogina. Age agedodoc agena gale adec dewenega eu himec toodogina. Odimeig je tincana dana diadec jenaca dana wawaga meleec eu gagadicca qee eundec wawaga meleec temdocwe megina. <sup>19</sup> Rom tamanec, age Anutna me je toodu odogina ec eu dana cunug wele dah mein. Eunu ija agenu ceelingina. Euqa age kobel me bahic eu doqagannu wawi taweia, odocob kobel me qeenu qee cisdowain. <sup>20</sup> Odocob Anut uqa malol bielec eu saen nag odi Seten lahadocob jaimaga bisalu nugian.

Egena Tibud Jisas Krais uqana eelgec uum igec eu ageca biliale.

*Dana leih age Rom dana cajaca feele ec maadecnu suladein*

<sup>21</sup> Ija cabi hi Timoti uqa uqana feele ec ageca suldona. Odocob Lusiasca Jesonca Sasipataca eu age ijana sihulnadec ageha agena feele ec ageca suldogina.

<sup>22</sup> Ija Tetias, ija Pol cogulna je uganu je i jaqigina, ija Tibud ijanna feele ec ageca suldugina.

<sup>23-24</sup> Gaias uqa feele ec ageca suldona. Uqa uqana jona me bahic coftena, odimei uqa tamanec cunugha odi cofadena.

Erastas uqa taun ben ene uqana kuskus uqaca ege cotige Kwotasca eu ale feele ec ageca suldosina. [Krais Jisas uqana eelgec uum igec ageca biliale. Mele.]

*Ege Anut binan sulec bahic suleqan*

<sup>25</sup> Me je ija qasali madigina eu Jisas Kraisnu me je. Me je eu wele bahic jahunec bilen eu qilaqa Anut uqa camasac muden. Anut uqa me je euna agena wawaga meleec gagadic tawigiannu ihoc odona. <sup>26</sup> Qilaqa Anut odocob je hahun madec dana agena jaqec jena me je eu camasac caligian. Anut uqa bileceb catanena uqa madeceb dana cajaca mahana cunug bilegina eu age me je eu dah mein. Eunu dana cajaca cunug age wawaga meleecb me je eu toodoin. <sup>27</sup> Anut eu uqa osol himec uqa docca bahic. Uqa ceteh cunug Jisas Krais umna odon eunu ege binan sulocomun cataneiale! Mele!

## Pol Uqa Jaqec Je Osoldoc Korin Tamanec Jaqiaden Aqunec Je

Pol uqana saenna Korin eu taun ben oso eu Akaia hatuna nijen. Akaia eu Grik agena hatu naha oso. Pol uqa Korinna Jisasnu me je qasali madec dana ben, odocob uqa Krais tamanec oso ono sanan men. Euqa uqa tamanec eu culadi nuimei hatu osona cabi on saen euna culumen filfil Korin tamanec gemona calen. Odocob Pol uqa agena cisdoc dado mudecnuca, culumen eu tutuc mudecnuca jaqec je i jaqiaden.

Pol uqa Korin tamanec agena wawaga meleec an daneiaunnuca, agena me odoc me qee meiaunnua jaen qon. Eunu uqa tamanec age qatanadec cain biluwain, age wal kobil Cain odowain, ec jaqiaden. Odimei uqa dana cajaca ocobocabec eunuca, sab dana age kadan tibudnu ihanein eunuca, cuha fec kobil eunuca, Kis Gunna dumanaga adec eunuca, Kristen age cal mecnadec ceseli cajoqagan eunuca je jaqec.

Jaqec je i uqana naha oso Kristen age gale adena, eu dac 13. Dac 13na Pol uqa nalunuga mec kobilu madena. Eu bagol me bahic Anut uqana dana cajaca adena. Eu Kis Gunna dumanaga adec cunug wooladena.

### *Je Dunuhnu Dado Mec*

1. Aqunec je (1.1-9)
2. Korin tamanec age qatanadec bilingina (1.10-4.21)
  - A. Pol uqa Korin tamanec age qatanadec bilingina ec don (1.10-17)
  - B. Tamanec qatanadec bilingina uqana gug (1.18-4.13)
    1. Korin tamanec age Kraisna me je qee du cuhadogina (1.18-3.4)
    2. Korin tamanec age Kraisna cabi oc qee du cuhadogina (3.5-4.5)
    3. Korin tamanec age Kristen coboc qee du cuhadogina (4.6-13)
  - C. Pol uqa Korin tamanec age qatanadec cain biluwain ec jaqena (4.14-21)
3. Wal kobilca, kobil tutuc qeeca eu Korin tamanec dunuh bilia (dac 5-6)
  - A. Korin tamanec agena dana oso uqa wal kobil odona, euqa tamanec age cois egina (dac 5)
  - B. Kristen dana uqa cotig gesilec jona muden (6.1-11)
  - C. Kristen dana cajaca age wal kobil Cain odowain (6.12-20)
4. Dana cajaca ocobocabecnu dado madec je (dac 7)
  - A. Gemugailca aidagailca eunu dado madec je (7.1-7)
  - B. Dana cajaca ocobocabec bilingina agena culumen (7.8-24)
  - C. Dana cajaca ocobocabec qee bilingina agena culumen (7.25-40)
5. Kobil leih eu coisfo, qeefo eunu dado madena (8.1-11.1)
  - A. Sab kadan tibudnu ihanein eunu dado madena (dac 8)
  - B. Pol uqa uqana kobilu madena (dac 9)
  - C. Age Isrel wele odooin eu Cain odowain (10.1-22)
  - D. Ege cel ceteh odoqona eu ege Anut binan sulecnu odoqale (10.23-11.1)
6. Cuha fec kobilu dado madec (11.2-14.40)
  - A. Pol uqa cuha fec ilomoga jahuldoc kobilu madena (11.2-16)
  - B. Tibudna bred wain gabanca jecnu dado madec (11.17-34)
  - C. Kis Gunna dumanaga adec (dac 12-14)
    1. Age Kis Gunna dumanaga adec temadeiga (12.1-3)
    2. Ege cabi ocnu dumanige igec filfil nijia qa dumanige igec Kis eu uqa osol bilia (12.4-11)
    3. Krais tamanec eu osol qa dumanige igec eu filfil (12.12-31a)
    4. Ege dana cajaca cunug dumanige igecna nalunuga moqale (12.31b-13.13)
    5. Je hahun madecnu dumanige igec eu beilah fil osona je madecnu dumanige igec wooldona (14.1-25)
  6. Cuha fecnu cabi cunug eu tutuc caligian (14.26-40)
7. Cal mecnadec ceseli cajecnu je dado madena (dac 15)
  - A. Kristen dana cajaca age mele bahic cal mecnadec ceseli cajoqagan (15.1-34)
  - B. Leih age dana cal mein adi tuliadeceb ceseli cajoqagan? egina eunu Pol jejenega hewi maadena (15.35-57)
  - C. Age gagadic taweigale (15.58)
8. Cit qoc je: Pol uqana cetehnu sisiladimei feele adena (dac 16)

<sup>1</sup> Ija Pol, Anut uqana cisdocna utateceb ija Krais Jisasna aposel calem. Ijaca ege wawige meleec cotige, Sostenisca <sup>2</sup> ele Anutna tamanec Korin bilegina eu age jaqiadowona. Anut uqa ageca dana cajaca age mahana cunug egena Tibud Jisas Krais inondudu ijannu cuha feginaca age Anutna dana cajaca qagu biluqagannu utaaden. Jisas Krais uqa agena Tibud, eu egena Tibudha. Krais Jisas age uqaca gabanadeceb age qagu bilegina. <sup>3</sup> Memige Anutca Jisas Krais Tibudca alena eelgec uum igecca malol bielecca adesiale.

#### *Pol uqa Anut hetaga don*

<sup>4-9</sup> Age Kraisca gabandoc euna uqa je madec cunugca doc cunugca eunu osoben cehewanagaca maden. Uqa age ceteh cunugnu cehewanagaca maden. Odocob Kraisnu je eu age wawaga dunuh wele gagadic men bilia. Eunu qila age egena Tibud Jisas Krais camasac miigiannu susumudi bilegina. Susumudi bibileig age Kis Gun uqana bagol adec eunu oso qee gothic melein. Jisas Krais uqa agena wawaga meleec gagadic mudeceb li qee mec gadacna age egena Tibud Jisas Kraisna deelna age cahuldocca qee tawoqagan. Anut uqa age Melah Jisas Krais egena Tibudca gabandu biluqagannu utaaden. Odocob Anut uqa ceteh odocnu maden uqa odi odigian. Eunu Anut uqa Krais Jisas umna uum aden eunu ija gaid agenu Anut hetaga dugina.

#### *Anutna tamanec qatanadec bilen*

<sup>10</sup> Ija wawige meleec cotiel, ija egena Tibud Jisas Krais ijanna age gemona cel je madegina eu age wawaga osol miigiannu niniadigina. Eunu age gemona qatani nahanaha doc cain biluwain. Age cisdoc osolca wawaga osolca gabandoigale. <sup>11</sup> Ge, ege caja cotige Klowi uqana tal leih age qatanadec biled Korin tamanec gemona nijia ec matein. <sup>12</sup> Ija age qatanadec biled age gemona nijia eunu maadigina uqana gug eu odi. Age oso madena, "Ija Pol toodugina," ena. Odocob oso madena, "Ija Apolos toodugina," ena. Odocob oso madena, "Ija Pita toodugina," ena. Odocob oso madena, "Ija Krais toodugina," ena. <sup>13</sup> Krais uqa nahanaha qatanadec bilia eginafo? Eu Pol uqa agenu na babalecna tuitu qocobil cal men eginafo? Age Pol ijanna wa joaden eginafo? <sup>14-15</sup> Dana oso age ija ijanina wa joc adem ec madeiaunnu, ija Krispas Gaiasca dih wa joalem. Euqa ija agenadec oso qee wa joudelem eunu ija Anut hetaga dugina. (<sup>16</sup> Eu mele, ija Stefanas uqana talca gamiha wa joadem qe ija in oso wa joudemfa eu ija cisdocwe qee.) <sup>17</sup> Ge, Krais ija wa joadecnu qee sultel, ija me je qasali maadecnu sulten. Odocob Kraisna na babalec uqana gagadic odoc qee mudigaunnu ija dana agena cisdoc sileccana me je qasali maadecnu qee sultel.

#### *Krais uqa Anutna gagadic odochca cisdoc silecca*

<sup>18-19</sup> Anutna jaqec je odi madena:  
"Ija cisdoc dana agena cisdoc silecca qee mudigen.  
Odimig dana docnus gesis agena doc eu gesacna migen," ena. (Aisaia 29.14)  
Eunu dana age fadaladecnu dodeladena eu agenu na babalecnu je eu gad je ec cisdogina qa ege Anut caahahagecnu odona eu egenu na babalecnu je eu Anutna gagadic odoc bilia ec doqona. <sup>20</sup> Aria, dana age cisdoc silecca eu adi bilegina? Loo je iwaladec dana age Anutna jaqec je du cuhadogina eu adi bilegina? Dana age mahanaadec jena cadegina eu adi bilegina? Anut uqa maha ina cisdoc silecca eu ceteh gad ec ihacaden.

<sup>21-25</sup> Anutna gad je eu dana agena cisdoc silecca wooldona. Odocob Anutna lasdoc eu dana agena gagadic wooldona. Anut uqana cisdoc sileccana dana cajaca odadeceb age uqanu docnu eu agena cisdoc sileccana agedodoc docnu ihoc qee. Eunu ege me je eu age gad je egina eu qasali maadoqona euna Anut uqa dana cajaca wawaga meleena eu caahahadecnu cisdon. Juda age kobolkobol odoc fecnu gagadic megina. Odocob Grik age cisdoc silecca wallegina. Euqa ege age Krais na babalecna tuitu qocobil cal men eunu je qasali maadoqona. Je eu Juda agenu eu mein cinigwe age jaimagana geti aqecel toni aqena. Odocob je eu Juda dana qee eundec agenu eu gad je. Euqa leih Anut utaaden, eu Juda Grikca osoben agenu, je eu Krais, uqa Anutna gagadic odoc, odocob uqa Anutna cisdoc silecca.

<sup>26</sup> Ija cotiel, Anut utaaden saen euna age adi bilein eunu qila cisoiga. Age mati age dana mahanaadec amagana docca qee biloloig. Age mati age dana mahanaadec amagana gagadic odochca qee biloloig. <sup>27</sup> Euqa Anut uqa mahanaadec dana cisdoc silecca eu majanaga hewadigianu dana eu gad egina eu nesili cedaden. Odocob Anut uqa mahanaadec dana gagadic odochca eu majanaga hewadigianu dana eu lasdoc egina eu nesili ehaden. <sup>28</sup> Anut uqa dana maha ina ijaganaga qee nesili cedaden. Dana mahanaadec age dana eundec eu dana gauc ec cisdogina. Dana mahanaadec age dana eundec cewadegina. Anut uqa dana ijaganaga gagadic odochca eu qee moqagannu odi odon. <sup>29</sup> Anut uqa dana oso uqa binan eu Anut amegna qee suliaunnu odi odon. <sup>30</sup> Odocob Anut uqa age Krais Jisasca gabanadeceb

bilegina. Odimei Anut uqa Krais Jisas eu eguna cisdock silecca muden. Odimei uqa Krais Jisas umna ceseli fajigen. Odimei uqa Krais Jisas umna ege dana cajaca ititom ec maden. Odimei uqa Krais Jisas umna ege dana cajaca qagu biluquna ec maden.<sup>31</sup> Eunu Anutna jaqec je odi madena:

“Dana oso uqadodocnu culai madecnu gale dona eu uqa Tibudnu culai madeiale,” ena  
(*Jeremaia 9.24*)  
eu odi ege odoqale.

## 2

*Pol uqa Korin agena wawaga meleec eunu maden*

1-2 Ija cotiel, ija ageca bibileb saen euna ija je cunugnu dahini celigiannu cisdom qa Jisas Kraiscu uqa na babalecna tuitu qocobil cal menca eunu je dih cisdom. Eunu ija ageca hom saen euna ija Anutna je jahunec qaqasili mamadig ija doc ben dogina euna isec je qee maadelem. <sup>3</sup> Odimig ija ageca hom saen euna ija lehani culeceb cucuiem, odocob ija qeleti bilem. <sup>4</sup> Odimig ijana iwaladec jeca, ijana me je maadecca, eu dana doc ben doccana qee qasali maadelem. Ija dana agena cisdock falicduadecb age ijanu cisoqagannu qee gale tel. Euqa ija Anutna Kis eu gagadic odocka eu ihacadi qasali maadem. <sup>5</sup> Ija mahanaadec dana agena doc eu agena wawaga meleec camas mudigiannu qee gale tena. Ija Anutna gagadic odocka eu agena wawaga meleec camas mudigiannu gale tena. Eunu ija odi je qasali maadem.

*Anutna Kis uqa doc meca cisdock silecca igen*

6 Euqa ege age Anutna kobel doc gesis dana eu je cisdock silecca maadocomun dogina. Euqa je cisdock silecca age ogina eu mahanaadec qee, odocob eu mahana iloilo bilegina eu agena qee. Mahana iloilo bilegina eu age qee moqagan. <sup>7</sup> Euqa je cisdock silecca ege maadoqona eu Anutna je jahunec, eu dana cajaca amagana jahunec bilia. Anut uqa maha qee ifanec ninijen ege wawige meleec ege binanigeca uqaca bileqannu je jahunec eu maden. <sup>8</sup> Mahana iloilo bilegina oso cisdock silecca inu qee dol. Age inu doubmi age Tibud gagadic odocka fulacdochca umeig na babalecna tuitu qocobil qee cal moub. <sup>9</sup> Euqa eu Anutna jaqec je madena eu odi nijina:

“Anut uqa dana cajaca age Anutna nalug megina agenu  
ceteh me bahic mati saciadon bilia.

Ceteh me bahic eu dana amagana qee felein.

Odocob eu dana dahinigana qee dah melein.

Odocob eu dana agena cisdock ha qee calel,” ena. (Aisaia 64.4)  
10-11 Euqa dana uqa dana osona cisdock qee dona. Dana uqadodoc dolog eu uqana cisdock cunug du cuhadona. Eu odiha Anutna Kis uqa dih Anutna cisdock du cuhadona. Odocob Anutna Kis eu ceteh cunug wali fena. Odocob uqa Anutna cisdock jahuni nijia euha wali fena. Eunu Anut uqa uqana Kisna uqana je jahunec ihacgeceh eu egenu camasac men. <sup>12</sup> Odocob ege mahanaadec kis qee olom, ege Anutna Kis om. Ege bagol igec Anut igen eu doqannu uqa Kis igen. <sup>13</sup> Odocob ege dana cajaca age Kisca bilegina eu Kisna mele je sildiadoqona. Ege odi oodob ege je dana cisdock silecca age iwalgein euna qee sildiadoqona qa ege je Kis iwalgen euna sildiadoocomun dogina.

<sup>14</sup> Odocob bagol igec Anutna Kis ege igina eu dana uqa Kisca bilina eu himec fogo docnun ihoc. Dana uqa Kisca qee bilina eu Kisna bagol igec eunu fogo docnun ihoc qee. Bagol igec eu age uqanu ceteh gad ena. Eunu dana oso uqa Anutna Kisca qee bilina eu uqa bagol Anutna Kis ege igina eu qee ona. <sup>15-16</sup> Anutna jaqec je madena eu odi nijina:

“In uqa Tibudna cisdock dona?

In uqa Tibud iwaldecnu ihoc?” ena.

(Aisaia 40.13)

Eunu dana oso uqa Kisca bilina eu uqa ceteh cunug eu mefo, me qeefo gesiladecnu ihoc qa oso uqa dana Kisca eu gesildocnu ihoc qee nijel. Euqa ege Kraisna cisdocka biluquna.

## 3

*Tamanecna cabi dana eu Anutna cabi dana*

1 Ija cotiel, wele age mel simwe Kraiscu gabandoc biloloig. Eunu saen euna ija dana Kisca eundec Anutna je maadolig eu ija age Korin maadecwe qee. Euqa ija dana age dewenega hilahna kobel toodogina eundec madigina eu odiwe ija wele maadolig. <sup>2</sup> Age sab gagadicca ocnu saciadu qee bilelein. Eunu ija age su adolig, sab gagadicca qee adolig. Odocob qilaha age sab gagadicca ocnu saciadu qee bilegina. <sup>3</sup> Ge, age fee dadanii cotogantu macumac megina eunu age qila gaid dewenega hilahna kobel toodogina. Age odi oodoig age dewenega hilahna kobel toodogina eu odi mahanaadec dana odoginawee odogina. <sup>4</sup> Ge,

saen agenadec oso madena, "Ija Polna," ena, odocob oso, "Ija Apolosna," ena, kobol ina eu age dana mahanadec cinigwe bilegina.

<sup>5</sup> Age eunu cisdu cuhadoiga. Apolos uqa eeta? Ija Pol, ija eeta? Ele Anutna cabi dana dih. Tibud uqa ele cabi filfil ilen, odocob elena cabi euna age Anutnu wawaga meleen. <sup>6</sup> Ija sab aig cehem. Apolos uqa wa bilisadon. Euqa Anut uqa odocob sab wasen. <sup>7</sup> Eunu dana sab aig cehem, dana wa bilisadonca eu ale ijanalaca qee. Euqa Anut uqa odocob sab wasena eunu uqa dih ijanca. <sup>8-9</sup> Ele dana Anutna cabi hihiqag, ele Anutnu osobenca cabi owona. Odocob Anutna cabi eu age. Eunu dana sab aig cehenaca, dana wa bilisadonaca eu ale ihocihoc. Odocob ale filfil cabi osin eu odi ameg owsan.

### *Tamanecnu cabi dana eu uqa jo cehec dana*

Odocob Anutna jo eu ageha. <sup>10-11</sup> Anut uqa uqana jo cehecnu duman uum iten. Eunu ija jo cehecnu memei danawe jo big gug mem. Odocob dana oso uqa eu tatacanna cehegina. Euqa Anut uqa big gug osol men nijia eu Jisas Krais. Eunu oso uqa big gug fil mecnu qee nijel. Eunu dana cunug leih age adi jo cehec cabi eu tatacan cehi cuhadoigale. <sup>12</sup> Aria, dana age big gug eu tatacanna cehoqagan saen euna leih age goldna cehoqagan, odocob leih age silwana cehoqagan, odocob leih age meen ameg ben fajec euna cehoqagan, odocob leih age na cultuna cehoqagan, odocob leih age gigina cehoqagan, odocob leih age cinimna cehoqagan. <sup>13</sup> Odocob Anut uqa dana cajaca cunug agena cabi temdugiannu deel euna agena cabi eu jana gesiladigian. Ja eu agena cabi temadigian. Eunu dana cunug agena cabi eu hibna camasac migian. Odocob dana cajaca cunug agena cabi eu mefo, me qeefo ec foqagan. <sup>14</sup> Dana oso uqa big gug eu tatacanna jo cehen eu uqana cabi tawecebfi dana eu uqa ameg ugian. <sup>15</sup> Euqa oso uqa jo fil cehen eu jana cijecebfu uqa ameg qee oiaun. Anut uqa dana eu cahahadugian, euqa dana uqa ceteh janadec sigali onawe Anut uqa dana eu janadec sigali u cahahadugian.

### *Anutna cuha jo gun eu age*

<sup>16</sup> Anutna cuha jo eu age, odocob Anutna Kis age wawagana bilia ec qee doginafo? <sup>17</sup> Anutna cuha jo eu gun. Odocob Anutna cuha jo gun eu age. Eunu dana oso Anutna cuha jo fadaldocobfi Anut uqa dana eu fadaldugian.

### *Ege dana binanaga cain suluqaun*

<sup>18-20</sup> Anutna jaqec je eu odi madena:  
"Anut uqa dana cisdoc silecca agena cisdoc sileccana cedadena eu odi dool bolobna cedadenawe," ena. (Job 5.13)

Odocob Anutna jaqec je oso madena:

"Tibud uqa dona, dana cisdoc silecca agena cisdoc eu ceteh gauc dih," ena. (Buk Song 94.11)

Eunu mahanadec cisdoc silecca eu Anut amegna eu kobol gad. Odocob Anut uqa dana cajaca age uqana cisdoc silecca oqagannu gale dona. Eunu dana oso uqadodoc cain uhuldoiaun. Age gemonadec oso uqa mahanadec kobolna ija cisdoc silecca ec cisdonafi uqa mahanadec dana amagana dana gad ibuldoiale.

<sup>21-23</sup> Ceteh cunug eu Korin agena. Eu Polfo, Apolosfo, Pitafo, maha ifo, cebac bileyfo, cal mefco, ceteh qila biliyaf, ceteh hibna cali hugianfo ceteh cunug eu agena. Odocob age Krais uqana, odocob Krais uqa Anut uqana. Eunu oso uqa dana oso ijan cain suliaun.\*

## 4

### *Tibud uqadodoc uqana cabi dana gesildona*

<sup>1</sup> Age egenu eu Kraisna cabi dana, ege Anutna ceteteh jahunec cofdoqona ec cisoigale. <sup>2</sup> Ceteh osoha egenu nijia. Cabi dana uqa uqana dana bennu cabi ona eu uqa uqana benna cabi cofdu cuhadugian. <sup>3</sup> Ijaqa age ijana kobol gesiluqaganfi, odocob dana oso ijana kobol gesiligiannu eu ija ceteh eu gauc ec cisdigina. Ija ijadodoc ijana kobol qee gesiligina. <sup>4</sup> Ija ijana cahuldoc osoca ec qee dugina qa ijadodoc eunu qee madigaun, "Ija dana tutuc," igaun. Tibud uqa dih gesiltina, uqa ija dana tutucfo, qeefo ec madena. <sup>5</sup> Eunu deel Tibud qee ceseli hoc ninijeb age dana oso cain gesiliduwain. Tibud uqa ceseli humei uqa ceteh cunug qila jahunec tucana nijina eu cedadimei fulacdocna madigan. Odimei uqa dana

\* **3:21-23:** 1 Korin 1.12naca, 3.4naca Pol uqa Korin tamanec age qatanadec bibileig oso madena, "Ija Pol toodugina," ena, odocob oso madena, "Ija Apolos toodugina," ena. Euga je eundec eu dana mahana bileyina eu agena cisdoc toodona. Korin age Anutna cisdoc eu camasac fogo adecebfu age Anut uqa Polca, Apolosca, ceteh leihka eu Korin cesuladecebif age Krais agena bahic caloqaganu maden eu doqagan. Eunu age madoqagan, "Pol eu egena," ecebil madoqagan, "Apolos eu egena," oqagan. Age 1 Korin 3.1-9 eu feiga.

agen a cisdock qila jahuni nijina eu camasac mudigian. Odocob saen euna dana cajaca cunug Anut uqa agena cabi eu mefo, me qeefo ec eu uqa maadigian.

*Korin agedodoc ijanaga sullein*

<sup>6</sup> Ija cotiel, ija age deboimeig dana oso ijan sulimeig dana oso ijan cain cewudowainnu gale tena. Eunu agena cisdock cesuladecnu ija je i ija Apoloscanu maadem. Odocob age elenu cisdumeig tutuc bielecnu kobol eu Anutna jaqec jena nijia eu toodoqagannu je i maadem. <sup>7</sup> In uqa hina dana ben mihen? Hina cel ceteh eu hina Anutnadec qee olom? Eu mele, hina Anutnadec dih omfi eetanu hinadodoc eu ceteh i gugwe odi hinadodoc ina binain sulgugna?

<sup>8</sup> Age wele ceteh me bahic am bec bilegina! Age wele ceteh cehewanagaca bilegina! Ege king qee calolom qa age king calein! Euqa ija agenu lelanec je madigina. Age mele king bileginanu gale tena. Age odi biloumbi ege age gami osoben king biloum! <sup>9</sup> Age ege ensel dana cunugca osoben amagana qigecebil cal moqona, eu odiwe ege dana age cal mecen ec je madein. Eunu ija Anut uqa ege Kraisna aposel dana cunug eu hib bahic migen ec cisdugina. <sup>10</sup> Ege Krais ijannu dana gad biluquna qa age Kraisca gabandoc eu age dana cisdock silecca bilegina! Ege lehanige culec biluquna qa age hihibanganaca bilegina! Age binanagaca bilegina qa ege binanigeca qee biluquna! <sup>11</sup> Weleca oodi huhu qila saen ina ege wenca wa gabca gegen biluquna. Ege lotoc ihoc qee biluquna. Age ebenega qahimeig qigegina. Ege aben osonadec li osona cocobi beloqona. <sup>12</sup> Egedodoc ebenigena cabi gagadic oqona. Age egenu je me qee mamadegin ege eeladiignu Anut inondoqona. Age jabigi tootoogegegin ege culumen eu gahidoqona. <sup>13</sup> Age egenu um qoc je mamadegin ege je me himec wadacduadoqona. Ege odi bibili hu saen ina maha cunugna tetec bahic cinigwe calom. Ege eu dana cunug agena gegehenega cinigwe biluquna.

*Pol uqa Korin age uqa cicilon ocnu niniaden*

<sup>14-15</sup> Jisas Kraisna kobol eu ija dih ija agena memega bilingina. Age ija me je qasali maademna ijana mel ibuldoein. Odocob age Kraisna kobol toodocnu age dado madecnu dana mati bahiccafi, eu cois ihoc qa age memega gehca qee. Eunu ija age majanaga hewadecnu je i qee jaqidigina qa ija ulauladecnu ijana mel sim ija nalunuga miginawen odi jaqidigina. <sup>16</sup> Eunu age ija ciciloni ocnu niniadigina. <sup>17</sup> Gug inu ija Timoti suldochomin ageca len. Timoti uqa ija melami cinigwe, ija uqana nalug migina. Uga Tibudna kobol gaid toodu odona. Uqa agena cisdock tulidocob age ija Kraisna kobol tamanec cunugna anaana iwaladigina eunu haun cisoqagannu sulduadem.

<sup>18</sup> Age ija li ono qee meciadigaun ec cisdoin. Eunu age leih age deboegina. <sup>19-20</sup> Euqa Tibud gale docobfi ija ageca mahuc odi ligen. Odocob Anutna cul eu je madecnu ceteh himec qee, eu gagadic odocnu ceteh. Eunu ija dana je deboi madegina eundec age je himec madeginaf, qee age gagadic odooccafo ec figen. <sup>21</sup> Age ija cel kobol odigennu gale adena? Ija kom hewimig ageca cali tutuc madecnu gale adenafo, qee ija wawi eu nalunuga mecca susumulca euna ageca ligennu gale adenafo?

## 5

*Wal kobol eu Korin tamanec dunuh bilia*

<sup>1</sup> Ija je oso agenu dah mem eu odi. Wal kobol oso Korin tamanec dunuh bilia ec matein. Odocob eu wal kobol fil, eu haiden qee odogina. Eu dana oso uqa memegna caja on ec matein. <sup>2</sup> Euqa age dana cunug wooladoqona ec cisdogina. Age eetanu agedodoc ijanaga sulegina? Age deboec eu culimeig qajeiga, eu me bahic. Odimeig dana uqa wal kobol i odona eu ititacdocobil uqa age gami tamanecna cain biliaun.

<sup>3-4</sup> Ge eu mele, ija deweni eu agenu onoca bahic bilingina qa ija doloni eu ageca bilia eu odiwe ija ageca biluquna. Ija dana wal kobol me qee i odon eu uqana je wele Jisas Tibud ijanna gesildom. Eunu age odi odoqagan. Age osoben ceguluqaganna ija doloni ageca bibileb age eguna Tibud Jisas uqana gagadic odocna <sup>5</sup> age dana i Tibudna ceseli hoc deelna uqa dolog eu Anut cahahadugiannu Seten ebenna mecebil uqa deweg me qee mudigian.

*Korin tamanec age dana age kobol me qee odogina eu ititacadoqagan*

<sup>6</sup> Age agedodoc ijanaganu deboegina eu cois qee! Age jis nag bahic eu odocob bred cunug diena ec qee doginafo? <sup>7</sup> Anut uqa age bred haun jisca qee cinigwe caloqagannu gale dona. Eunu age silailna jis weledec eu u geleiga. Odocob age cunug cataniec caloqagan. Krais, uqa agena Pasowa ja qoc sipsip nag, dana age wele ihandoin. Eunu eu mele age qila cataniec bilingina ec ija dugina. <sup>8</sup> Eunu ege agena Pasowa sab jec foqale. Euqa ege jis weledec, eu silailna kobol qisol mecca, toodu agena Pasowa sab jec cain

foqaun qa ege bred jisca qee, eu cataniec kobil meleca, toodu egena Pasowa sab jec foqale.\*

<sup>9</sup> Ija wele ijana jaqec jena age wal dana eundecca cain ihol mi cobowain ec jaqiadem. <sup>10</sup> Euqa age dana cunug maha inadec age wal kobilca, osuna ceteh ocnu amaga qoc kobilca, heje oc kobilca, kadan tibudnu cuha fec kobilca odogina eu age gami cain ihol mi cobowain eunu qee jaqiadelem. Age odi odoubmiqa age maha i cunug culoub. <sup>11</sup> Euqa je ija jaqiadem ugana gug eu odi. Dana oso ija wawige meelee cotige ena eu uqa wal kobil odonafi, uqa osuna ceteh ocnu ameg qonafi, uqa kadan tibudnu cuha fenaf, uqa dana agenu je um aqenafi, uqa ceu jeceb dalul qonafi, uqa heje onafi, age dana eundec gami cain ihol mi cobowain. Age dana eundec gami sabha cain jowain. <sup>12-13</sup> Anutna jaqec je odi madena:

“Age dana me qee age gemona bilingina eu ititacadeiga,” ena.      (*Loo 17.7; 19.19; 21.21; 22.21, 24; 24.7*)

Euqa dana age tamanec dunuh qee bilingina eu Anut gesiladigian. Eunu dana age tamanec dunuh qee bilingina eu gesiladecnu cabi eu ija ebenina qee nijel. Euqa dana age Korin agena tamanec dunuh bilingina eu gesiladecnu cabi eu Korin tamanec agena bahic.

## 6

### *Kristen dana uqa cotig gesilec jona cain mudiaun*

<sup>1</sup> Dana oso age gemona uqa Kristen cotignu jecafi adi uqa Anutna dana cajaca qagoc tutuc mudencu ninijeb wooladimei gesilec jona dana mahanaadec ititomca qee eu age gesildocnu mudigan? <sup>2</sup> Anutna dana cajaca qagu biley age dana cajaca cunug mahanaadec eu gesiladoqagan ec qee doginafo? Eunu age dana cajaca maha inadec gesiladoqagannu adinu age je nag i edec eu gesilecwe qee? <sup>3</sup> Ege ensel ha gesiladeqan ec qee doginafo? Ege odi odocumunfi ege maha inadec cetehnu je gesiladecnu ihoc biluquna. <sup>4</sup> Eunu age maha inadec ceteh osonu jecafi adinu age dana tamanecna ijanca qee eu gesiliqianu cabi utegina? <sup>5</sup> Ija age majanaga adigiannu je i madigina. Age gemona dana cisdoc silecca uqa dana cotigca ale gemona je eu gesilecnu ihoc qee bilina eu melefo? Qee, dana oso ihoc bilina. <sup>6</sup> Euqa age gemona dana oso uqa cotig gesiladec jona mudina, odocob dana Kraisna wawaga qee meleena eu amagana gesildogina.

<sup>7</sup> Eu mele, age tamanecna dana cajaca gesiladec jona ehadi legina. Age kobil euna age Kraisna kobil toodocnu toni aqen euna fegin. Eetanu age qee culadecebile age me qee madegina? Eetanu age qee culadecebile agena ceteh didu cawaladegin? <sup>8</sup> Euqa age kobil me i qee odogina. Age agedodoc dana waadegin, odocob age agedodoc danana ceteh didu cawaladegin. Age kobil i himec age wawaga meleec cotogail bahic eu odadegin.

<sup>9</sup> Dana qisol megina eu age Anutna cul qee mugumuga owain ec qee doginafo? Age agedodoc wawaga cain uhuldowain. Dana age cajaca wal kobil odoginaca, dana age kadan tibudnu cuha feginaca, dana age osuna cajaca njeginaca, dana age dana osoca kobil me qee majanagaca odoginaca, <sup>10</sup> dana age heje oginaca, dana age dana osona ceteh amaga gugca feginaca, dana age ceu jeceb dalul aqenaca, dana age dana leihnu je um aqeginaca, dana age dana agena ceteh didu cawaladeginaca, dana eundec cunug age Anutna cul qee mugumuga owain. <sup>11</sup> Age Korin tamanec leih age dana eundecwe odi biloloig. Euqa Anut uqa agena silailnu soiaden, odimei uqa age qagu maden, odimei uqa Krais Jisas Tibud ijannaca Anutna Kisanca age dana cajaca ititom maden.

### *Ege dewenige eu Kis Gunna cuha jo*

<sup>12</sup> Age oso madena, “Ija eeta oso odigen eu cois himec,” ena. Eu mele, qa ceteh cunug eu hinana cesulhec qee. Ijaha madigina, “Ija eeta oso odigen eu cois himec,” igin qaa ija eeta oso culdecemin ija ugana cabi dana qee caligau. <sup>13</sup> Age oso madena, “Sab eu ija wawinu, odocob wawi eu sabnu,” ena. Eu mele, qa Anut ale lecis odi qee maligian. Age dewenega eu cajaca wal kobil odocnu qee ifanel, age dewenega eu Tibud binan sulecnu ifanen, odocob Tibud uqa dewenegana ilo bilia. <sup>14</sup> Anut uqa Tibud cal mecnadec tulidocob cajen. Odimei uqa egeha ugana gagadic odocna cal mecnadec tuligeceb cajeqan.

<sup>15</sup> Age dewenega eu Krais deweg amihilon ec qee doginafo? Eunu ija Krais deweg amihilon umig wal caja deweg amihilon migenfo? Qee bahic! <sup>16</sup> Anutna jaqec je madena eu odi calena:

“Dana caja lecis ale dewenela osol caligian,” ena.

(*Jenesis 2.24*)

\* **5:8:** But 6-8 Pol uqa Bred Jisca Qee Jec Deel eunu cisdonia. Sab jec eu Pasowa Sab Jec Ben Deel toodona. Pol uqa galolo je madena. Jis eu kobil me qee, eunu Kristen dana cajaca age kobil i cain toodu odowain. Ageha je Mak 14.1na nijia eu feiga.

Eunu dana uqa deweg wal cajaca fagdona eu uqa caja euca dewenela osol calesina ec age qee doginafo? <sup>17</sup> Euqa dana oso uqa Tibudca fagdona eu uqa Tibudca alena Kis osol calowasan. <sup>18</sup> Silail leih cunug dana odogina eu dewenega maha gumu nijia. Euqa dana wal kobil odona eu uqadodoc dewegna silail mena. Eunu age wal kobil eu culdimeig busaleiga. <sup>19-20</sup> Age dewenega eu Kis Gunna cuha jo gun ec age qee doginafo? Anut uqa age wele Kis Gun aden eu uqa age dunuh bilia. Ge, Anut uqa age ameg benna bahic fajadi ceden. Age dewenega eu agena bahic qee. Eunu age dewenegana Anut binan suleigale.

## 7

*Pol uqa dana cajaca ocobocob ecnu maden*

<sup>1</sup> Qila ija je age jaqitein eunu wadacdu jaqidigen. Dana uqa caja qee ocobfi eu me bahic. <sup>2</sup> Euqa cajaca wal kobil filfil odoc nijina eunu dana cunug age aidagaicla osolosol bielecebifli eu me. Odocob caja cunugha age gemugailca osolosol bielecebifli euha me. <sup>3-4</sup> Dana uqa uqadodoc dewegnu ilo qee biled qa uqa aideg eu dana dewegnu ilo bilina. Odocob dana uqa deweg eu aidegna eunu gemug Cain cahacdoiaun. Eu odiha caja uqa uqadodoc dewegnu ilo qee biled qa uqa gemug eu caja dewegnu ilo bilina. Odocob caja uqa deweg eu gemugna eunu aideg Cain cahacdoiaun. <sup>5</sup> Ale ocobocobesin oso uqa oso hibemduwei deweg Cain sosogon oiaun. Eu melega ale wawala osol meceb ale dewenela saen gohnicna inondoc cabinu sosogon owasanfi eu cois. Euqa isi ale dewenela gabandowan, gagdad aledodoc dewenela qee cofdu cuhadocobil Seten ale silul mecnu temaleiaunn. <sup>6</sup> Ija je i maadigina eu je gatiti qee maadigina, euqa ija je i cesuladecu maadigina. <sup>7</sup> Ija age cunug ija biligina cinigwe biluqagannu gale tena. Euqa Anut uqa dana cunug filfil age dumanaga aden. Dana oso uqa duman oso i uten. Dana oso uqa duman oso eu uten.

<sup>8</sup> Dana cajaca ocobocob qee eleinca caja gemunuga wele cal meinca eunu ija maadigina, "Age cuhanuc ija biligina we biluqagannu eu me," adigina. <sup>9</sup> Euqa age wawaga ilag wasecdainnu age ocobocobeginfa eu me bahic. Eunu agedodoc wawaga dewenegaca cofdocnu ihoc qeefi age ocobocoboqagan.

<sup>10</sup> Ija dana cajaca ocobocobein eundec je gatiti oso maadigen. Euqa ija bahic je gatiti qee maadigaun, eu Tibud uqa je gatiti maadigian. Je eu odi. Dana aideg uqa gemug Cain culdeiaun. <sup>11</sup> Euqa caja uqa gemug culdifei uqa cuhanuc biligian. Qeefi, uqa haun ceseli limei gemugca tanawecebil wawala osol biluwasan. Odocob eu odiha gemug uqa aideg Cain cagasudiaun.

<sup>12</sup> Ija dana cajaca leihha je oso maadigen. Euqa Tibud qee maadeiaun, eu ijadodoc je i maadigen. Wawaga meleec dana oso cajacafi, odocob caja eu waug qee meleena, caja uqa danaca bielecnu waug nijceebfi dana eu caja Cain cagasudiaun. <sup>13</sup> Odocob wawaga meleec caja oso danacafi, odocob dana eu waug qee meleena, dana uqa cajaca bielecnu waug nijceebfi caja eu dana Cain cagasudiaun. <sup>14</sup> Ge, age dogina, dana waug qee meleena uqa waug meleec aideg ufei uqa euna Anut amegna qagu bilina. Odocob caja waug qee meleena uqa waug meleec gemug ufei uqa euna Anut amegna qagu bilina. Qeefi, agena mel eu qee qagu bilingina. Euqa qila age qagu biluwan. <sup>15</sup> Euqa ege malol bilinganu Anut utagen. Eunu oso waug qee meleena uqa hijag waug meleena eundec culdifei eu cois culdigan. Kobol eu odi calecebifli danafo, cajaflo waug meleena eu uqa fagdoc qee bilina. <sup>16</sup> Dana, hina ihoc aiden cesuldocom uqa waug meleecca caligianfo, qeefo ec qee dogona. Caja, hina ihoc gemun cesuldocom uqa waug meleecca caligianfo, qeefo ec qee dogona.

*Ege cobocnu Anut utagen euna coboqale*

<sup>17</sup> Euqa coboc Tibud uqa ege filfil siwigen eu ege osolosol cunug coboc euna coboqale. Odocob Anut uqa ege filfil cobocnu utagen eu ege osolosol cunug coboc euna coboqale. Cobocnu loo je i ija tamanec cunugna iwaladigina. <sup>18-19</sup> Dewenega cagu qocnu kobil eu ceteh gauc himec. Odocob dana deweg cagu qee qona kobil euha ceteh gauc himec. Euqa Anutna loo je toodoo odocnu kobil eu ceteh bahic. Eunu dana uqa deweg cagu quteinuu ninijen Anut uqa utadonfi uqa deweg tutuc mudimeei eu Cain jahuniaun. Dana uqa deweg cagu qee quteek ninijen Anut uqa utadonfi age uqa deweg cagu Cain qutuwain. <sup>20</sup> Dana uqa bielec osona tatawen Anut uqa utadon eu uqa bielec euna himec biligian. <sup>21-23</sup> Dana uqa osona bega meh cabi dana bibilen Tibud uqa utadon eu uqa qila Anut amegna Tibudna besitoc dana bilina. Eu odiwe dana uqa osona bega meh cabi dana qee bibilen Tibud uqa utadon eu uqa qila Anut amegna Kraisna bega meh cabi dana bilina. Anut uqa age ameg benna bahic fajadi ceden. Eunu age dana agena bega meh cabi dana Cain calowain. Eunu hina bega meh cabi dana bibilegen Anut hina utahenfo? Cois, Cain cisdogauq qa

hina bega meh cabi culecnu jic calecebf hina jic eu toodoga. <sup>24</sup> Ija cotiel, dana filfil uqana bileyca bilen Anut utadon eu uqa bileyca euna dih Anutca biliale.

*Pol uqa dana cajaca ocobocob qee elein eunu maaden*

<sup>25</sup> Qila ija dana cajaca ocobocob qee elein eunu je madigen. Ija Tibudna loo je osoca qee euqa ija Tibud uqa ijana waug qocob ija Tibudna mele je gaid madigina eunu ija ijana cisdoc maadigen. <sup>26</sup> Culumen ben bahic calena eunu dana age bileyca odi dih biluqagan eu me ec cisdegina. <sup>27</sup> Hina cajacaf? Odifi hina culdeecnu Cain cisdegina. Hina cajaca qeef? Odifi hina cajana Cain meci cobogaun. <sup>28</sup> Euqa hina caja organfi hina silail qee magaun. Odocob caja uqa dana ugianfi uqa silail qee meiaun. Euqa dana cajaca ocobocobein eu age deel gaid culumen maha ina oqagan. Odocob ija ceteh i ageca caligiannu qee gale tena.

<sup>29-31</sup> Ija cotiel, cel gugnu odi madiga, maha i falicdocob fil bahic caligian. Odocob saen geh bahic qee leiaun, eu saen nag qila ina himec bilina. Dana age aidagailca eu age aidagailca qee cinigwe bileyigale. Odocob dana age qada qajegina eu age qada qajecca qee cinigwe bileyigale. Odocob dana age ceelegina eu age ceelecca qee cinigwe bileyigale. Odocob dana age ceteh idadecnu cabi ogina eu age cetehca qee cinigwe bileyigale. Odocob dana age maha cetehna cabi ogina eu age agena maha cabi culein cinigwe bileyigale.

<sup>32</sup> Age mahananadec culumen eunu jaen aqigiannu qee gale tena. Dana cajaca qee eu uqa Tibudna cabinu geh cisdonia. Uqa Tibudna gale doc toodoo odona. <sup>33</sup> Euqa dana cajaca bilia eu uqa maha inadec cetehna geh cisdonia. Uqa aideg gale dugiannu cabi ona. <sup>34</sup> Odocob eunu ugana cisdoc qatanec bilia. Odocob caja haunfo, caja gemugca qeefu eu uqa Tibudna cabinu geh cisdonia. Uqa dewegnaca dolognaca gun biligiannu geh cisdonia. Euqa caja danaca bilia eu uqa maha inadec cetehna geh cisdonia. Uqa gemug gale dugiannu cabi ona. <sup>35</sup> Ija age Tibud toodocnu wawaga lecis qee biliaunnal gale tena. Eunu ija cesuladecnu je i maadigina. Odimig ija age cahacadeecnu qee maadigina qa age tutuc biluqagannu, age gaid Tibudna cabi oqagannu je i maadigina.

<sup>36-38</sup> Dana oso uqa ateg dana qee ona eunu kobil tutuc qee odona ec cisdonafi, odocob uqa dana ugiannu saen wooldonafi, uqa jic osoca qee eu fenafi, eu uqa cois ugana cisdoc toodugianufi, uqa culaceeb ale cois ocobocobesiale. Eu ale silail qee mowasin. Euqa dana oso uqa waugna gagadic mecebfi, odocob ceteh oso uqa mahuc odigiannu qee nijecebf, ugana gale doc cofdocnu ihofci, uqa wele waugna madi, eu uqa ateg dana qee oiaun ec madecebf, uqa me bahic odigian. Eunu dana uqa ateg culdeeb dana ona eu uqa kobil me odona. Odocob dana uqa ateg culdeeb dana qee ona eu uqa kobil me bahic odona.\*

<sup>39</sup> Caja uqa gemug gaid cebac bibileb caja eu uqa gemugca gabandoc biluwasan. Euqa uqa gemug cal mecebfi caja uqaca haun qee gabandowasin. Uqa dana oso haun ugiannu gale dufei eu uqa cois ugian. Euqa uqa dana Tibudna waug meleena eundec ugian. <sup>40</sup> Euqa ijana cisdocna caja eu uqa gauc bilifei uqa geh bahic ceeligian ec cisdegina. Odocob ijaha Anutna Kis ijaca bilia ec cisdegina. Eunu ija je i maadigina.

## 8

*Pol uqa age sab kadan tibudnu ihaneinnu maden*

<sup>1</sup> Qila ija sab dana age kadan tibudnu ihaneinnu maadigen.\* Dana leih age madegin, "Ege cunug docca," egina. Je eu meleqa dana agena doc eu deboec kobilnu tuliadena. Euqa ege wawige meleec dana nalug mecebmecebebil ege wawige osol gagadicca tawoqona. <sup>2</sup> Dana oso uqa ija ceteh osonu wele duga ec cisdonafi dana euna doc eu ihoc bahic qee. <sup>3</sup> Euqa dana Anutnu nalug menafi Anut uqa dana eunu du cuhadona.

<sup>4</sup> Eunu sab dana age kadan tibudnu ihaneinnu ija je oso maadigen. Ege doqona, kadan tibud eu ceteh mele bahic qee, eu ceteh gauc himec. Egehna doqona, anut mati bahic qee bileyca, Anut osol dih bilina. <sup>5</sup> Eu mele, ceteh mati bahic saona bileyca eu age anut

\* **7:36-38:** Grik je i ugana gug eu camasac bahic qee. Falicdoc je fil osoha nijia eu odi: Dana oso uqa ugana caja haun uqa ugiannu madein eunu kobil tutuc qee odona ec cisdonafi, odocob uqa caja ugiannu saen wooldonafi, uqa jic osoca qee eu fenafi, eu uqa cois ugana cisdoc toodugianufi, ale cois ocobocobesiale. Eu ale silail qee mowasin. Euqa dana oso uqa waugna gagadic mecebfi, odocob ceteh oso uqa mahuc odigiannu qee nijecebf, ugana gawec cofdocnu ihofci, uqa wele waugna madi, eu uqa caja uqa ugiannu madein eu uqa gauc biligiannu gale don ec madecebf, uqa me bahic odigian. Eunu dana uqa caja haun ugiannu madein eu ona uqa kobil me odona. Odocob dana caja qee ona eu uqa kobil me bahic odona. \* **8:1:** Saen euna haiden age dool ehadi agena kadan tibudna cuha jona limeig dool aqimeig kadan tibud eunu dool ihanadolig. Odimeig hibna age dool cuhunuga umeig idadec cudunna belimeig cuhunuga eu suldoloig. Kristen age eunu jaen aqen eu odi fena. Odocob age Pol ege dool cuhunuga eundec jegan eu coisfo, qeef? ec sisildoin.

egina, odocob mati bahic mahana bilegina eu age tibud egina. Euqa ceteh i ohisnaca mahanaca bilegina eu age anut egina eu agenu melefi<sup>6</sup> egenu Anut osol bilina, ege Memige. Uqa ceteh cunug ifanec gug, odocob uqanu ege biluquna. Tibud osol dih bilina, uqa Jisas Krais. Uqa ceteh cunug ifanen, odocob ege uqanadec cebac biley oqona.

<sup>7</sup> Euqa dana cajaca cunug age doc eu qee dogina. Dana leih age wele kadan tibudna kobol toodoloig, agena cisdoc eu gagadicca qee. Odocob age sab eu kadan tibudnu ihanec jeginia saen euna age sab eu kadan tibudnu ihanecin ec cisdogina. Odocob age sab jeginia eu age kobol gegehinca odoqona ec tebandogina. <sup>8</sup> Euqa ege sab eu qee jifeb kobol eu odigecceb ege Anut amegna me bahic qee tawoqaun. Odocob ege sab eu jifeb kobol eu odigecceb ege Anut amegna me qee qee tawoqaun. Sab uqa ege Anut cemenug qee ehigi leiaun. <sup>9</sup> Euqa age batut feigale. Kobol eu agedodoc odocnu ihoc eu dana cajaca leih age wawaga meleec nag eu cain odadecebile silailna toni aqeaun.

<sup>10</sup> Gadgad hina dana uqa kadan tibud eu tibud mele qee ec dona, hina kadan tibudnu cuha jona lifeg sab jiji bibilem dana uqana cisdoc gagadicca qee uqa fecihecebf hinana kobol eu uqa waug tulidocob uqa sab kadan tibudnu ihanecin jecnu waug gagadic migianfa? <sup>11</sup> Eunu hinana doc eu hinana kobolna dana uqa cisdoc gagadicca qee eu fadaldugian. Dana eu uqa cotin, uqanu Krais cal men. <sup>12</sup> Doiga, wawige meleec cotigel leih agena cisdoc eu gagadicca qee. Eunu age kobol i odoginafi age wawaga meleec cotogail agena cisdoc silec wadogina, odocob aqeha Krais silail mudeginia.

<sup>13</sup> Eunu ija sab eu jecemin wawige meleec coti oso toni qu silail mecebf ija coti odudecemin silailna toni qoiaunnu ija sab eu haun qee jigaun.

## 9

### *Pol uqa aposelna cabi ameg qee ol eunu ceelen*

<sup>1</sup> Ija besitec dana. Ija cel cabi ugennu cisdigina eu ihoc odigen. Ija aposelfo, qeefo? Ija Jisas egena Tibud wele fem. Eu mele, eunu ija aposel. Ija Tibudna cabi ocomin age ijana cabi aigcaleinfo, qeefo? Eu mele, age ijana cabi aig. <sup>2</sup> Age wele Jisasnu wawaga meleen sisi mec eu ija Tibudna aposel ec ihacen. Eunu Korin tamanec agenu eu mele, ija Jisasna aposel ec dogina! Dana leih age ija Jisasna aposel ec qee cisteginafi eu odi feia.

<sup>3</sup> Dana leih age ijana kobol gesilegina eu ija je i edi wadacduadigina. <sup>4</sup> Ija aposel ijana cabinu amegwe sab waca ocnu eu cois qeefo? <sup>5</sup> Aposel leihca, Tibud waliagulca, Pitaca age osolosol waug meleec caja oin. Age aidagail age gami jic cobocna belegina. Ija ijana jic cobocna waug meleec caja oso ocomin nuecnu eu odi aposel eundec odoginaweu cois qeefo? <sup>6</sup> Ija Banabasca eledih elena cebac bileyecnu cabiowan, odocob aposel leih age agena cebac bileyecnu cabi qee waininfo? <sup>7</sup> Cel dana uqa han cadec cabi umei uqadodoc uqana cabinadec wain aig qee jena? Cel dana uqa sipsip cofadena eu uqadodoc agena su qee jena?

<sup>8</sup> Age ija dana agena cisdoc himec toodumig je i edi madigina ec cain cisdowain. Qeefo! Mosesna loo jeha eu odi madena. <sup>9</sup> Moses uqa je oso uqana loo jena odi jaqen:

“Age bulmakau uqa wit ceteh lahacdocnu cabi ona eu uqa biah cain cufa qowain,” en.  
(Loo 25.4)

Anut uqa bulmakaunu cisdonafo? Qeefo. <sup>10</sup> Anut uqa egenu bahic cisdudu bili eu maden. Dana cabina maha qatanenaca, dana wit ganac cagasenaca ale aledodoc alena sab naha ocnu cabi osina eunu uqa egenu je eu jaqen. <sup>11</sup> Ege me je qasali maadom saen euna ege Kisna aigwe age gemona cehom. Eunu age ege ceteh dewenige cesuldocnu igifeig eu odiwe ege ceteh cehom eunadec sab oqona eu ceteh tutuc qeefo? Qeefo, eu tutuc. <sup>12</sup> Age dana leih Korin agenadec ceteh i oqagannu cois ifeig egeha ceteh i oqannu cois bahic ec madoqagan.

Euqa ceteh i ege agenadec oqannu cois ec njija eu ege qee olom. Odocob ege culumen fil gahidoqona. Ege Kraisna me jena jic cufa qoqauunu odi odoqona. <sup>13</sup> Nawel tawec ihanec dana age tempelnalna cabi ogina eu agena sab tempelnadec ogina, odocob dana age dool ihanecnu cabalna cabi ogina eu agena dool ihanecnu cabalnadec naha ogina ec qee doginafo? <sup>14</sup> Eu odiwe Tibud uqa maden, leih age me je qasali maadeginia eu agena cebac biley me jenadec oqagan ec maden.

<sup>15</sup> Euqa ceteh i ija agenadec ugennu cois ec njija eu ija oso qee olom. Odocob qilaha ija ceteh i ugennu je i qee jaqigina. Ija casac cal mimig ceteh oso agenadec ugen! Dana oso ija binani suleecnug gug casagitecnu qee gale tena. <sup>16</sup> Ija me je qee qasali maadifig ija me qee bahic biligen! Ija odocnu himec odigen. Ija jic osoca qee. Eunu ija me je qasali maadiginafi ija binani suleecnug gug eu qee njiel. <sup>17</sup> Ge, ija ijana cisdocna cabi i ufig ija ameg oso ocnu cois igen. Euqa ija ijana cisdocna cabi i qee ugina. Anut uqa cabi i ebenina men eunu ija cabi i ugina. <sup>18</sup> Odocob cel ameg eu ija ugen? Ijana ameg eu odi. Ceteh ija ocnu

ihoc eu me jena cabinu ija qee olom. Ija me je qasali maadigina eu ija dana gauc adigina. Eu ijana ameg.

*Pol uqa dana cajaca cunug agena bega meh cabi dana bilia*

<sup>19</sup> Ge, ija besitec biligina. Odocob ija dana osona bega meh cabi dana qee biligina. Ija ijana gale tecna ija dana cajaca cunug agena bega meh cabi dana mem. Ija dana cajaca mati bahic haun Kraisnu wawaga meleigiannu odi odem. <sup>20</sup> Eunu ija Juda age Kraisnu wawaga meleigiannu Juda gami cabi u bibileb ija Juda bileginawe bilem. Ija Mosesna loo je bisalu qee biligina, euqa ija dana cajaca age loo je bisalu bilegina age Kraisnu wawaga meleigiannu ija age gami cabi u bibileb ija age amagana dana uqa loo je bisalu bilinawe bilem. <sup>21</sup> Odocob ija dana cajaca age Mosesna loo je bisalu qee bilegina age Kraisnu wawaga meleigiannu ija age gami cabi u bibileb ija age amagana dana uqa loo je bisalu qee bilinawe bilem. Euqa ija Anutna loo je qee culelem, ija Kraisna loo je bisalu bilem. <sup>22</sup> Odocob ija dana cajaca agena wawaga meleec eu gagadicca qee eundec age Kraisnu wawaga meleigiannu ija age gami cabi u bibileb ija age amagana dana uqa waug meleec gagadicca qee eu bilinawe bilem. Ija dana leih cahahahaadecnu jic cunug temdom. Eunu ija dana cunug agena kobol om. <sup>23</sup> Ceteh me bahic Anut uqa dana cajaca cunug age me jenu wawaga meleena eu adigian ijaha ijana naha ugennu gale tena. Eunu ija dana cajaca cunug me je qasali maadem.

*Ege ameg me ocnu tutuc guguli gadacna caloqale*

<sup>24</sup> Dana age dana leih wooladecnu guguli gadacna belegina euna dana osol dih ameg me bahic ona ec qee doginafo? Eunu age ameg me bahic ocnu tutuc guguli qee mec gadacna beleigale. <sup>25</sup> Odocob dana cunug age gugulecna wooladoqagannu gale adena eu age agedodoc deweneganadec gale adec eu cilehdogina. Dana eundec age bala me bahic oqagannu odoqona, euqa bala eu me qee migian. Euqa ege bala me bahic qee me qee meiaun eu oqannu odoqona. <sup>26</sup> Eunu ija gauc qee guguligina qa ija tutuc guguli qee mec gadacna nuigina. Ija ebni ilag qelintig fufu gauc qee qugina. Eunu ija boksen dana me cinigwe odigina. <sup>27</sup> Euqa ija deweni ijana gale tec eu toodugiannu deweni ququ cilehdugina. Gadgad ija dana leih me je qasali maadimig hibna ija ameg me bahic qee ugaun.

## 10

*Gadgad ege temgecna toni qigiaun*

<sup>1</sup> Ija wawige meleec cotiel, eguna sihul weledec eu age Moses toodoin eu eeta ageca calennu du cuhadoqagannu gale tena. Age cunug taen agena jic dado madecnu Anut muden eu cofaaden bisalu bilein. Odocob age Macas Golcana cocobi hu age cunug leti li belein. <sup>2</sup> Odocob age cunug taenna macasnaca wa joc cinigwe oin. Odocob wa joc eu odadeceb age Mosesna sihul calein. <sup>3</sup> Odocob age cunug sab Anutna Kis adeceb jein.\* <sup>4</sup> Odocob age Kisna meen tooadeceb age gami belein euna wa gab jein.† Meen eu Krais uqa dih. Eunu age cunug wa Anutna Kis adeceb jein. <sup>5</sup> Euqa Anut uqa dana cajaca eu mati bahic agena kobol qee gale dol. Eunu age cal mecebil dewenega ganac wadauna ilag miadi fadalein.

<sup>6</sup> Ege silail mec kobol Cain gale geiaun eu odiwe age gale aden. Eunu ceteh i cunug ulaulgecnu calen. <sup>7</sup> Age kadan tibudnu Cain cuha fowain eu odiwe dana cajaca age wadauna bilein eu age leih kadan tibudnu cuha fein. Eu odi Anutna jaqec je madena: "Dana cajaca age bilimeig sab waca jein."

Odimeig age cajimeig dana age cajaca wal kobol odooin," ena.‡ (Kisim Bek 32.6)

<sup>8</sup> Ege wal kobolha Cain odoqaun eu odiwe age leih odooin. Eu deel osol dunuhna 23,000 agenadec toni cal mein.§ <sup>9</sup> Ege eguna Tibudha Cain temdoqaun eu odiwe age leih odooin. Eu age man sononec aqiqeceil cal mein. <sup>10</sup> Ege gonagona Cain moqaun eu odiwe age leih odooin. Ensel dana qagaadena eu qagaadeceb fadalein.

<sup>11</sup> Aria, ceteh i cunug dana cajaca ulauladecnu ageca calen. Euqa age dado migeccnu jaqein. Eunu ege dana qila biluquna eu saen wele qee migian odonanu cisdoc igina.

\* **10:3:** Wele Isrel dana cajaca age saonadec sab oin, sab ijan eu "manna." Age Kisim Bek 16.2-36 eu feiga. † **10:4:** Mosesna buk 5-pela euna Isrel dana cajaca age meennadec wa oinnu dodo lecis njija. Oso eu Kisim Bek 17.1-7 euna njija, oso eu Namba 20.1-13 euna njija. Juda dana leih age je lecis i mean osol himec eunu madena ec cisdogina. Odocob Isrel dana cajaca cocobogin mean i tooadena ec cisdogina. ‡ **10:7:** Wele Isrel dana cajaca age bulmakau nag goldna mudimeig age eunu cuha fein. Age kadan tibud eunu ceteh ihanimeig sab wainca jejeig wal kobol odooin. Age Kisim Bek 32.1-6 eu feiga. § **10:8:** Wele Isrel dana cajaca age kadan tibud, ijan Baal, eunu cuha fein. Eunu Anut uqa dana cajaca 23,000 aqceeb cal mein. Age Namba 25.1-9 eu feiga.

<sup>12</sup> Eunu dana oso uqadodocnu madi, ija gagadic tawigina, ena eu uqa toni qoiaunnu batut feiale. <sup>13</sup> Temadec Korin ageca hon eu temadec dana cajaca cunug ageca hon cinigwe, eu temadec fil bahic qee. Euqa Anut uqa uqana je hahun madec toodu odona. Eunu uqa culeceb temadec oso ageca hocob eu gahidocnu culumen wooldoc oso qee nijel. Euqa uqa age temadecna ehi li madimei uqa age temadecna hatawowaainnu jic me ihacadeceb temadec eu gahidumeig wooldoqagan.

*Ege Anutnu kadan tibudnuca osoben cuha fecnu ihoc qee*

<sup>14</sup> Eunu, ijana danah bahic, age kadan tibudnu cuha fec kobil hibemdumeig busaleiga. <sup>15</sup> Age cisdoc silec dana eunu ija maadigina. Agedodoc ijana je gesileiga. <sup>16</sup> Gabin Anut eeldona ege eunu Anut hegaga doqona. Ege gabin euna joqona saen euna ege Krais golac ila moqona. Bred ege fenimeb eu ege joqona saen euna ege Krais deweg ila moqona. <sup>17</sup> Bred ege fenogona eu osol eunu ege dana cajaca mati, ege cunug bred osol eu ila mi joqona. Eunu ege dewenige osol biluquna. <sup>18</sup> Age Isrel agena kobilnu cisdoiga. Age dool ihanec cabal tatacan manegina eu jegina saen euna Isrel dana cajaca age Anutnu ihanegina eunu ceguli cuha feginna.

<sup>19</sup> Age ija sab age kadan tibudnu ihaneginaca kadan tibud euha eu ceteh mele ec madigina eu odi cain cisdowain. <sup>20</sup> Qee bahic! Ija je odi qee madigina! Haiden dana age Anutnu qee ihanegina agena ihanec bu buga me qeenu ihanec ec ija madigina. Korin age buga me qee agena gabandocnu qee gale tena. <sup>21</sup> Age Tibudna gabinnadec wa jiji cuculi li buga me qee agena gabinnadecwa jijiecnu qee nijel. Age Tibudna cabalnadec sab jiji cuculi li buga me qee agena cabalnadecwa sab jijiecnu qee nijel. <sup>22</sup> Ege Tibud olohon wasigiannu gogoludeqanfo? Egena gagadic odoc eu Tibudna gagadic odoc wooldocfo?

*Ege Anut binan gaid suluqale*

<sup>23</sup> Leih madegina, “Ege eeta oso odeqan eu cois himec,” egina. Eu mele, qa ceteh cunug eu agena cesuladec qee. Leih madegina, “Ege eeta oso odeqan eu cois himec,” egina. Eu mele, qa ceteh cunug eu ege wawige osol gagadicca tawecnu qee cesulgena. <sup>24</sup> Dana oso uqadodoc me biliqianu jic Cain waleiaun qa uqa cotig me biliqianu jic waleiale.

<sup>25-26</sup> Anutna jaqc je odi madena:

“Mahaca ceteh cunug mahana bileginaca eu Tibud uqana himec,” ena. (*Buk Song 24.1*) Eunu age ceteh oso deel fajec cudunna suldogina eu age cuhun age kadan tibudnu ihanenin ec geh Cain cisdodoig ilag sisiluwain. Age cuhun fajimeig jeiga. Age jecnu ihoc ec cisdoiga.”\*\*

<sup>27</sup> Odocobha dana oso waug qee meleena uqa age utaadeceb li uqaca osoben sab jecnu madenafi, odocob age nuecnu cois ec cisdufeig age joqagannu ceteh saciadoia eu jeiga. Age geh Cain cisdodoig ilag sisiluwain. <sup>28-29</sup> Euqa dana oso odi maadecebf, “Sab i age kadan tibudnu ihanenin,” adecebf age dana eunu cisdufeig gadgad cahuldowainnu sab eu Cain jowain. Ija age agedodoc amagana cahuldoqagan ec qee madigina. Euqa dana eu uqa je maadigian uqa amegna age cahuldoqagan ec madigina.

Euqa dana oso madigian, “Eu mele, qa eetanu dana oso ijadodoc jecnu ihoc ec sisiltina? Eetanu dana oso ijana kobil uqadodoc uqana cisdocna gesiltina?” <sup>30</sup> Ijana sabnu Anut hetaga dufiq eetanu dana oso ija sabnu Anut hetaga duga eunu je me qee matena?” igian.

<sup>31</sup> Eunu age sab jeginaf, age wa gab jeginaf, age ceteh fil odoginaf, cel ceteh odogina eu age Anut binan sulecnu odoigale. <sup>32</sup> Age Judanuca, Griknuca, Anutna tamaneecnua cisdoiga. Odimeig age kobil osonu age jaimaga qeti qocob silailna toni aqciaunnu Cain odowain. <sup>33</sup> Anut uqa dana cajaca cunug cahahaadiqianu gale tena. Eunu ijaha dana cunug ija kobil cunug odigina eunu gale adigianu odigina. Ijadodoc me mitecnu cabi qee ugina. Ija dana mati age me madecnu cabi ugina.

## 11

<sup>1</sup> Age ija ciciloni oiga eu odi ija Krais cicilon uginawee.

*Pol uqa cuha fec ilomoga jahuldoc kobilnu maden*

<sup>2</sup> Age gaid ijanu cisdogina, odocob iwaladec je ija age ebenegana mem eu age toodu odogina. Eunu ija age binanaga suligina. <sup>3</sup> Euqa age je inu cisdu cuhadoqaganu gale tena. Dana cunug agena ilo eu Krais. Odocob cajana ilo eu uqa gemug. Odocob Kraisna ilo eu Anut. <sup>4-7</sup> Eunu dana oso uqa ilo jahuldoc tatawi inondonafo, je hahun madenafo uqa Krais majag hewena. Krais uqa ilo. Odocob caja oso uqa ilo qee jahuldoc tatawi inondonafo, je hahun madenafo uqa gemug majag hewena. Gemug uqa ilo. Caja eu odiwe

\*\* <sup>10:25-26:</sup> Age je 1 Korin 8.1na nijia eu feiga. Pol uqa age dool cuhunuga eu idadec cudunna fajegina eunu Cain cisdowain ec madena. Age cuhunuga eu jifeig age cahuldoc qee odogina ec madena.

caja age ilo gosic cocdocobil majag dona. Ge, caja uqa ilo qee jahuldoc bilinafi uqa gosic cagocob gohicdugian. Euqa caja uqa gosic cagu gohicdoc bilinaf, ilo cocdoc bilinaf, eu majag docobfi uqa ilo jahuldugian. Dana uqa Anut ihicon qon, uqa Anutna gagadic odoc fulacdocca. Eunu dana uqa ilo jahuldoc qee biliaun. Euqa caja uqaha gemugna gagadic odoc fulacdocca.\*

<sup>8</sup> Ge, Anut uqa dana cajanadec qee ifanel qa uqa caja dananadec ifanen. <sup>9</sup> Odocob Anut uqa dana eu caja cesuldugianu qee ifanel. Euqa uqa caja eu dana cesuldugianu ifanen. <sup>10</sup> Dana uqa cajana ilo bilina eunu caja uqa ilo jahuldoc biligian, odocob ensel eu foqagannu.

<sup>11</sup> Ege Tibudca gabandoc biluquna eu caja uqa cuhanuc qee bilina, odocob dana uqa cuhanuc qee bilina. Euqa caja uqa danana cesuldoc bilina, odocob dana uqa cajana cesuldoc bilina. <sup>12</sup> Ge, qila dana uqa cajanadec cali hona eu odiwe Anut uqa caja dananadec muden. Odocob ceteteh cunug eu Anutnadec cali hogina.

<sup>13</sup> Agedodoc je i gesileiga. Caja uqa ilo qee jahuldoc tatawi Anut inondona eu coisfo? <sup>14</sup> Dana cajaca egena kobel eu dana gosic cecelac eu fecnu galeca qee eu ihacgena. <sup>15</sup> Euqa Anut uqa caja gosic cecelac eu uqa lotoc ilo jahuldocwe uten. Eunu caja uqa gosic cecelac eu uqana bala me. <sup>16</sup> Euqa oso uqa eunu jena fee dadanechnu odonafi ija je osol madigen. Egeca Anutna tamanec cunugca ege cuha fecnu kobel fil oso qee odoqona, qa ege cuha fecnu kobel i himec odoqona.

#### *Korin age Tibudna bred wain gabinca jecnu qee tutuc odolooin*

<sup>17</sup> Euqa age ceguli cuha fegin auna kobel me oso qee calena. Kobol me qee eu calena. Eunu ija qila je maadigenna ija age binanaga qee suligaun. <sup>18</sup> Ija je oso casac madigen. Ija je odi dah migina. Age cuha fecnu cegulegina saen euna age ilag qatanegina ec dah migina. Odocob ija je eu nag odi wawi meleena. <sup>19</sup> Anut uqa dana cajaca leih age gemo bileyina, age uqa amegna tutuc odogina, eu age camasac moqagannu gale dona. Eunu agena cegulecna qatanec bileyina eu mele bahic ec cisdugina. <sup>20-21</sup> Age osoben cegulegina saen euna age jejeig age cunug filfil agedodoc agena sab cedimeig jegin. Odocob oso wen dona, oso ceu jeceb dalul qona. Eunu age Tibudna bred wain gabinca jecnu sab eu tutuc qee jegin. <sup>22</sup> Eu adinu! Age agena jona sab waca euna jecnuca qeefo? Qeefi, age Anutna tamanec eu ceteh gauc ec cisdoginafo? Odimeig age cotogail sabca qeenu majanaga hewadegina. Eunu ija age adi maadigen? Ija kobel eunu age binanaga suligenfo? Qeefi, ija age binanaga qee suligaun.

#### *Jisas Tibud uqa bred wain gabinca ugana malogom adeceb jein (Matju 26.26-29; Mak 14.22-25; Luk 22.14-20)*

<sup>23</sup> Ge, je i ija age adem eu ija Tibudnadec om. Eu odi Jisas Tibud Judas dewegnu balijen witic euna uqa bred umei <sup>24</sup> Anut hetaga dumei feni siwiaadi maaden, "I ija deweni eu agenu Anut ihandon nijia. Cedi jeiga. Age odi oodoig ijanu dahiniga cisoigale," aden. <sup>25</sup> Uqaha Pasowa Sab Jec Ben hedocob wain gabin oso umei Anut hetaga dumei eu aadi maaden, "Wain gabin i bal cehec je haun. Eu ija golani ugana gaga nijia. U jeiga. Age odi jejeig ijanu dahiniga cisidudu odi odoigale," aden. <sup>26</sup> Ge, age bred inadec wain gabin inadecca jiji bileyig age Tibudna cal mec eunu mamadi bileyina. Eu odi dih oodi bibilebil uqa ceseli hugian.

#### *Ege egena wawige cisdocca gesili cuhadumeb Tibudna bred wain gabinca jeqan*

<sup>27</sup> Eunu oso uqa bred eunu qee cisdoc gadgad jifei, uqaha wain gabin eunu qee cisdoc gadgad jifei, eu Tibud deweg golacca cewudina. Odimei uqadodoc cahuldonanu ameg me qee ugian. <sup>28</sup> Euqa dana uqadodoc gug temdoiale. Odimei uqa bredca wain gabinca jeiale. <sup>29</sup> Ge, oso eu Tibud deweg ugana gug bahic eunu batut qee cisidudu jifei eu uqa uqadodoc geuldechnu jigion. <sup>30</sup> Gug eunu agena eundec mati age hagca, mati age gelelanagaca qee, cobogina. Odocob leih age wele cal mein. <sup>31</sup> Euqa egdedodoc gug casac temduduc cisdommu Anut ege qee gesilgeialu. <sup>32</sup> Euqa ege mahananadec eundecca osoben gesilgec oqaunnu Tibud uqa gesilgena euna uqa ulaulgena.

\* **11:4-7:** Grik je i ugana gug eu camasac bahic qee. Falicdoc je fil osoha nijia eu odi: Eunu dana oso uqa gosic cecelacata tatawi inondonafo, je hahun madenafo uqa Krais majag hewena. Krais uqa ilo. Odocob caja oso uqa ilo gosic qee jahuldoc tatawi inondonafo, je hahun madenafo uqa gemug majag hewena. Gemug uqa ilo. Caja eu odiwe caja age ilo gosic cocdocobil majag dona. Ge, caja uqa gosic ilo qee jahuldoc bilinafi uqa qila gosic gohic biligian. Euqa caja uqa gosic cagu gohicdoc bilinaf, ilo cocdoc bilinaf, eu majag docobfi uqa gosic haun wasigian. Dana uqa Anut ihicon qon, uqa Anutna gagadic odoc fulacdocca. Eunu dana uqa gosic cecelacca qee biliaun. Euqa caja uqaha gemugna gagadic odoc fulacdocca.

33-34 Eunu, ija cotiel, age cegulecebil Anut gesiladoiaunnu oso wen docobfi uqa uqana jona jeiale. Odocob age Tibudna bred wain gabinca jecnu cegulegina saen euna age oso sumudecebsumudecebeigale.

Je naha ninijeb eu ija ageca humig tutuc mudigen.

## 12

### *Pol uqa Kis Gunna dumanaga adec filfilnu maden*

<sup>1</sup> Aria, qila ija Kis Gunna dumanaga adec eunu maadigen. O cotiel, age Kis Gunna dumanaga adec eunu du cuhadoqagannu ija gale tena. <sup>2</sup> Age dogina, age haiden bilein saen euna ceteh oso diadecebfí age kadan tibud conogaca qee ageca lein. Euqa age eeta diadecebfí age tooadecnu himec lein. <sup>3</sup> Eunu age ceteh i doqagannu gale tena. Dana oso uqa Anutna Kis cesusdocob uqa Jisasnu madi, geuldec je madecwe qee. Odocob dana oso uqa Kis Gunca qee eu uqa je madena, "Jisas uqa Tibud," je madecwe qee.

<sup>4</sup>Ege cabi ocnu dumanige igec filfil nijia qa dumanige igec Kis eu uqa osol bilia. <sup>5</sup>Odocob cewel uadec filfil nijia qa ege cunug Tibud osolnu cewel utuquuna. <sup>6</sup>Odocob cabi oc filfil nijia qa Anut eu osol, uqa odigeceb ege cunug cabi ocnu ihoc lena. <sup>7</sup>Kis Gun uqa ege cunug tamanec cesuldacnu osolosol dumanige igecebfí camasac mena. <sup>8</sup>Kis uqa dana oso je cisdac silecca maadecnu duman utina. Odocob Kis uqa dana oso doc meca maadecnu duman utina. <sup>9</sup>Odocob Kis eu dih uqa dana oso uqa waug meleecnu duman utina. Odocob Kis osol eu uqa hag me madecnu duman utina. <sup>10</sup>Odocob Kis uqa dana oso kobolkobol odocnu duman utina. Odocob uqa oso je hahun madecnu duman utina. Odocob uqa oso kis eu melefo, qeefo docnu duman utina. Odocob uqa oso beilah filfil madecnu duman utina. Odocob uqa oso beilah filfil falicdu sildi madecnu duman utina. <sup>11</sup>Euqa dumanige igec filfil cunug eu Kis osol dih odigeceb odoqona. Kis eu uqa uqana cisdacna dumanige igec filfil ege osolosol siwi igena.

### *Deweg eu osol qa uqana nahahaha eu mati*

<sup>12</sup>Dana deweg eu osol, odocob uqa cabi ocnu nahahaha mati nijadegina. Euga deweg nahahaha eu mati, odocob cunug age deweg osol. Eu odiwe Krais uqana eundec egeha deweg osol. <sup>13</sup>Ge, ege Judaca, Juda qee eundecca, cabi bega mehca, cabi bega meh qee eundecca, ege Kis osolna wa joc om, ege cunug deweg osol biluquuna. Egeha Anut uqa Kis osol eu wa jecnu igen.

<sup>14</sup>Ge, deweg eu cabi ocnu na ha osol qee, uqa cabi ocnu nahahaha mati nijadegina. <sup>15</sup>Hina jaim mahoubmi, "Ija eben qee, eunu ija dewenna na ha qee," houbmi uqa madec toodu dewenna na ha qee biloubfo? Qeoo, jaim eu dewenna na ha biloub. <sup>16</sup>Odocob hina dahin mahoubmi, "Ija amen qee, eunu ija dewenna na ha qee," houbmi uqa madec toodu dewenna na ha qee biloubfo? Qeoo, dahin euha dewenna na ha biloub. <sup>17</sup>Hina dewen cunug eu amen himec tawoubumi hina adi je dah moum? Hina dewen cunug eu dahin himec tawoubumi hina adi cahug moum? <sup>18</sup>Euqa deweg uqa eu odi qee. Anut uqadodoc cisdacna dewegna nahahaha cabi ocnu bielec cudun maden. <sup>19</sup>Deweg cunug eu na ha osol himec tawoubumi eu adi deweg tawoub? <sup>20</sup>Qilaqa eu cabi ocnu dewegna nahahaha mati eu deweg osol gabandu bilegina.

<sup>21</sup>Ameg uqa eben madona, "Hina qee bielecmi ija cuhanuc ihoc biligen," eu odi madocwe qee. Odocob ilo uqa jaih madona, "Hina qee bielecmi ija cuhanuc ihoc biligen," eu odi madocwe qee. <sup>22</sup>Qeoo! Dewenige na ha osooso gagadicca qee ec cisoqona eundec deweg me bielecnu cesuldacnu. <sup>23</sup>Odocob dewenige na ha osooso majagca eundec ege jahuldoqona. <sup>24-25</sup>Eu odi dewenige nahahaha galeca eundec jahuldoqona silig qee nijel. Euqa Anut uqa dana deweg uqa cisdu cuhadumei nahahaha cunug tubdu madec osol bilina. Uqa dewegna nahahaha cain fee dadanowainnu, cesuldacnboc biluquagannu odi muden. Uqa deweg na ha osooso ege ijanaqaca qee ec cisoqona eu uqa saolal maden. <sup>26</sup>Dewegna na ha oso dainnu sogoecebfí dewegna nahahaha cunug dainnu sogoeqina. Dewegna na ha oso hu saolal mudecebfí dewegna nahahaha cunug osoben ceelegina.

<sup>27</sup>Age osoben Krais deweg bilegina, age abesabes deweg euna agena bielec cudugna bilegina. <sup>28</sup>Odocob Anut uqa uqana tamaneccu cabi dana nesili ehaden. Uqa casac aposel nesili ehaden, odocob uqa je hahun madec dana nesili ehaden, odocob uqa me je iwaladec dana nesili ehaden, odocob uqa kobolkobol odoc dana nesili ehaden, odocob uqa hagnu me madec dana nesili ehaden, odocob uqa cesuladecnu cabi dana nesili ehaden, odocob uqa cofadecnu cabi dana nesili ehaden, odocob uqa beilah filfil madecnu dana nesili ehaden. <sup>29</sup>Age cunug aposelfo? Age cunug je hahun madec danafo? Age cunug me je iwaladec danafo? Age cunug kobolkobol odoc danafo? <sup>30</sup>Age cunug hagnu me

madeginaflo? Age cunug beilamaga filfilna madeginaflo? Age cunug beilamaga filfil je falicdu sildi madeginaflo? <sup>31</sup> Euqa age dumanaga adec meca ocnu megameg meigale.

*Ege dana cajaca cunug nalunuga moqale  
Ija age jic me bahic oso ocnu ihacadigen.*

## 13

<sup>1</sup> Ija dana agena je madecnu, ensel agena je madecnuca duginafi, euqa nalug mec eu ijana qee nijinafi, ija belo ain qetec mahulec cinigwe, ija gilim gauc cadum cagoc cinigwe. <sup>2</sup> Ija je hahun madecnu duginafi, odocob ija Anutna cisdoc cunug jahunec nijia eunu duginafi, odocob ija doc silecca cunug duginafi, odocob ija wawi meleec cunugca ija aluh maadecemin ono isec lecnu ihocfi, euqa nalug mec eu ijana qee nijinafi, ija tetec gauc himec. <sup>3</sup> Ija ijana ceteteh qaigca cunug dana agena coocooh ihoc qee eundec loo adiginafi, [ija deweniha ja cijigiannu ihanduginaflo,]<sup>\*</sup> euqa nalug mec eu ijana qee nijinafi, ija ijana odoc eu cunugnu ameg me ocnu qee nijel.

<sup>4</sup> Dana nalug mena uqa mahuc gemag qee sera, uqa lalafadena, uqa qee gumunadene, uqa uqadodocnu qee culaena. <sup>5</sup> Dana nalug mena uqa qee deboena, uqa osoru je me qee qee madena, uqa ija didih ec qee madena, uqa dana sibeni qaheceb gemani qee sera, uqa deweg tudocobil hewihewi qee cobona. <sup>6</sup> Dana nalug mena uqa age silail mecebil waug qee ceelena. Euqa age mele je toodocobil waug ceelena. <sup>7</sup> Dana nalug mena uqa ceteh culdeceb qee cilehdona, uqa ceteh cunugnu waug meleena, uqa osora odoc me ibuldugiannu ameg mimi bilina, uqa ceteh culumen doc ben gahidona.

<sup>8</sup> Nalug mec uqana saen qee qee meiaun. Euqa je hahun madec eu jausigian. Beilamaga filfil madec eu qee migian. Doc silecca eu jausigian. <sup>9</sup> Ge, eguna doc silecca eu naha himec, odocob eguna je hahun madec eu naha himec. <sup>10</sup> Euqa saen oso hugian, saen euna ceteh cunug ihoc li hedugian. Odocob naha himec doc eu qee migian. <sup>11</sup> Ija mel sim biled saen euna ija mel sim je madeginawje je madem. Saen euna ija mel sim cisdoginawje cisdom. Saen euna ija mel sim gesili feginawje gesili fem. Odocob ija dana ibuldumig ija mel bibili odoc eu culem. <sup>12</sup> Ge, ege qila Anutna ceteh camasac bahic qee foqona, eu odi ege wa dodna tuca foqonawje odi foqona. Euqa hibna ege Anut ola bahic feqan. Qila ija naha dih dugina. Odocob hibna ija Anutna du cuhadugen eu odiwe uqa ijanu du cuhadon. <sup>13</sup> Qilaqra ceteh cijed nijia. Eu wawige meleecca, ceteh ege ocnu sumudi biluqunaca, nalug mecca. Euqa nalug mec eu meca bahic, eu ceteh cunug wooladena.

## 14

*Kis dumanige igec matu eu je hahun madecnu dumanige igec*

<sup>1</sup> Age nalunuga mecnu kobel ocnu cabi oiga. Ageha Kis dumanaga adec cunug ocnu wawaga waseia. Euqa age Kis dumanaga adec matu age gisi cagu ocnu wawaga waseia, eu Anutna je hahun madecnu duman. <sup>2</sup> Ge, dana uqa beilah fil osora je madena eu dana oso uqana jenu waug qee fogo dol. Eunu uqa dana je qee madena qa uqa Anut je madona. Uqa Kisna gagadic odocna ceteteh jahunec eunu madena. <sup>3</sup> Euqa dana uqa Anutna je hahun madena eu dana agena wawaga meleec gagadic mudecnuca, age kobel me odoqagannu tuliadecnuca, wawaga wahogduadecnuca je maadena. <sup>4</sup> Dana uqa beilah fil osora je madena eu uqadodoc waug meleec gagadic mudecnu odona. Euqa dana uqa Anutna je hahun madena eu tamanec agena wawaga meleec gagadic mudecnu odona. <sup>5</sup> Ija age cunug beilamaga filfilna je madoqagannu gale tena qa age Anutna je hahun maadoqagannu gale ben tena. Dana oso uqa dana beilah filna je madena eundec falicdu sildi maadecnu bileyebfi, eunu tamanec dana cajaca age dumieg wawaga meleec gagadic mecnu, eu cois. Euqa beilah filna je falicdu sildi maadecnu dana qee bileyebfi dana uqa Anutna je hahun madena eu uqa dana beilah filna je madena eu wooldona. <sup>6</sup> O cotiel, ija ageca limig beilami filna je maadifig ija adi cesuladigen? Ija cesuladecnu ifig ija je jahunec osofo, doc silecca osofo, je hahun madec osofo, je iwaladec osofo, eu Anut ihacten eundec ageca ehi limig je maadigen.

<sup>7</sup> Ceteh cebac qee bilina eu odi cololofo, gitaflo eundec age cecewaug filfil camasac qee mudecebifli dana age due silec adi doqagan? <sup>8</sup> Odocob taul qee eui cuhadocobi in uqa han cadec saciadugian? <sup>9</sup> Ageha eu odi, age beilamaga filfilna je mamadebil agena je dana eunu qee docobilfi age je eu uqana gug adi fogo adigian? Agena je eu gauc fadaligian. <sup>10</sup> Eu mele, maha ina beilamaga filfil mati bahic agena je nijadena. Je oso gauc qee nijina. Je cunug agena gugca dih. <sup>11</sup> Euqa dana oso uqana je madec ija je uqana gug qee docominfi dana eu uqa ijanu cele dana ec cisdogian. Odocob ija uqanu cele dana ec

\* 13:3: Grik jaqec je hilah leihna age but i [ ] gemo nijia eu je fil nijia, eu odi: ija culaignennu deweniha culigenfi

cisdugen.<sup>12</sup> Ageha eu odi dih. Age Kis dumanaga adec ocnu gale ben adena. Eunu age dumanaga adec eu tamanec agena wawaga meleec gagadic mudecnu cabi gisi cacagu u cuhadoigale.

*Pol uqa beilamagana filfil je madec dumanaga adec eunu maden*

<sup>13</sup> Eunu dana uqa je beilah filna madena eu uqa je falicdu sildi madecnu duman ocnu inondugian. <sup>14</sup> Ge, ija je beilami filna inondufig ija doloni inondona qa ijana cisdoc eu dana leih qee cesuladena. <sup>15</sup> Eunu ija adi odigen? Ija dololinaca ijana cisdocnaha inondugen. Ija dololinaca ijana cisdocnaha due siligen. <sup>16</sup> Qeefi, hina doloinna dih Anut hetaga dufeg, dana docca qee oso uqa cegulecna bilina eu uqa hina je madagana ec qee donafi, uqa adi hina hetaga docom mele igian? <sup>17</sup> Eu mele, hina Anut hetaga doc eu me bahic qaa hinana je eu dana oso i uqana waug meleec gagadic muditocnu cesuldocca qee. <sup>18</sup> Ija beilami filfilna je madecnu kobel eu age cunug wooladigma eunu ija Anut hetaga dugina. <sup>19</sup> Euqa dana cajaca age cuha jona cuha fecnu cegulecina euna ija ijana cisdocna ija beilami filna je but 10,000 maadigen eu cesuladecwe qee eu qee gale tena. Odocob ija je but 5-pela madecemin dana cajaca age fogo adeceb iwaladigennu eu me bahic gale tena.

<sup>20</sup> Ija cotiel, age mel sim cinigwe agena cisdocna cain biluwain. Age qisol mec kobel euna age mel sim cinigwe bileigale. Euqa age agena cisdocna age dana ben cinigwe bileigale. <sup>21</sup> Age Anutna loo je eu odi jaqein:

“Tibud maden, ‘Ija dana beilamaga filna age je madegina euna ijana dana cajaca je maadigen.

Odocob ija cele dana fildec age conogana ijana dana cajaca je maadigen qa ijana dana cajaca ija qee dah mituwain,’ en,” ein. (Aisaia 28.11-12)

<sup>22</sup> Eunu ege dogona, beilamaga filna je madecnu kobel eu dana Anutnu wawaga meleena agenu gaga qee nijel. Kobol eu dana age Anutnu wawaga qee meleena agenu gaga nijia. Euqa je hahun madecnu kobel eu dana age Anutnu wawaga qee meleena agenu qee nijel. Kobol eu dana Anutnu wawaga meleena agenu nijia.

<sup>23</sup> Eunu tamanec dana cajaca cunug osobenga cegulimeig age cunug beilamaga filfilna je madifeig, odocob dana docca qee leihfo, dana leih wawaga qee meleenafo age dunuh hufeig, eu mele ec age madoqagan, “Dana cajaca cunug eu age gad!” oqagan. <sup>24</sup> Euqa tamanec dana cajaca cunug age je hahun madifeig, odocob dana docca qee osofo, dana oso waug qee meleenafo uqa dunuh hufe, uqa agena je eu waugna leceb uqana silailnu dugian. <sup>25</sup> Uqana cisdoc jahuneecna bilina eu camasac migian. Odimei uqa olana jogomei Anutnu cuha figian. Odimei odi madigian, “Mele bahic, Anut uqa ene age gemona bilina!” igian.

*Cuha fecnu cabi cunug eu tutuc caligian*

<sup>26</sup> Ija cotiel, ijana je uqana gug eu odi. Age cuha fecnu cegulecina saen euna oso uqa due silecca hona, oso uqa iwaladecnu jeca hona, oso Anut uqa je jahunec camasac muditon euca hona, oso uqa beilah filna madecnu jeca hona, oso uqa je falicdu sildiadecnu jeca hona. Ceteh cunug odoqagan eu Anutna dana cajaca agena wawaga meleec gagadic mecen odoigale. <sup>27</sup> Leih age beilamaga filfilna je madecnu lecisfo, cijedfo dih odi madoqagan. Euqa cijed Cain wooladowain. Odocob age je osobenga Cain madowain. Oso casac madeceb oso madigian. Odocob dana oso uqa je falicdu sildi maadigian. <sup>28</sup> Euqa dana oso uqa je falicdu sildiadecnu qeefi dana beilah filna je madigian eu uqa cegulecna co cufa qugian. Odimei uqadodocnuca Anutnuca je madigian. <sup>29-33</sup> Anut uqa ege kobel ilagna bielecnu qee gale dona. Uqa kobel ilag ihulahaldoc dana qee. Uqa malol bielecnu gug. Eunu Anutna je hahun madec dana eu lecisfo, cijedfo odi je madoqagan. Odocob dana cajaca leih age adi madegina eunu gesili foqagan. Odocob dana cegulecna bilina uqa Anut je oso madecnu camasac ihacdufei dana uqa casac je madeia eu uqa co cufa qugian. Ge, kobel ina age cunug Anutna je hahun osolosol madoqagan. Eunu dana cunug age je eu doqagan. Odimeig cunug wawaga gagadic mudoqagan. Odocob dana Anutna je hahun madegina eu agedodoc conoga cofdoqagan. Odocob age agena saennana je madoqagan.

Caja age Anutna qagu coboc dana cajaca agena cuha jona cunug tilii bileygina. <sup>34</sup> Eunu agena cegulecna caja age tilii biluqagan eu odiwe cuha jona cunug caja age tilii bileygina. Ge, age je madecnu ihoc qee, age dana bisalu biluqagan eu odiwe Mosesna loo je madena.

<sup>35</sup> Eunu caja cuha jona je madena eu majanigeca. Age je osonu gug doqagnuhi age agena jona gemugil sisiladoqagan. <sup>36</sup> Eu adi? Anutna jena gug eu Korin agenadecfo? Qeefi, Anutna je eu ageca dih len, odocob dana cajaca leih ageca qee lelfo?

<sup>37</sup> Dana oso uqa uqadodocnu uqa Anutna je hahun madec dana ec cisdonafi, odocob uqa uqadodocnu uqa Kisna cisdocca ec cisdonafi, uqa je i ija jaqidigina eu Tibud uqana loo je ec doub. <sup>38</sup> Euqa dana oso uqa je i ija jaqidigina eu Tibud uqana loo je ec qee docobfi

ageha dana eu uqa Anutna je hahun madec dana ec cain owain. <sup>39</sup> Eunu, ija cotiel, age beilamaga filfilna je madecnu kobel eu cain cahacadowain. Odimeig age Anutna je hahun madecnu cabi gagadic oigale. <sup>40</sup> Odimeig age cabi cunug iwaldu cuhadumeig odocobil tutuc meia.

## 15

### *Krais uqa cal mimei ceseli cajen*

<sup>1</sup> Ija cotiel, qila ija agena cisdock tulidocomin age me je ija wele qasali maadem eunu haun cisdoqagannu gale tena. Age me je eu oin euna tawegina. <sup>2</sup> Age me je ija qasali maadem eu gagadic hewifeig Anut uqa me je euna himec cahahaadigian, euqa age wawaga gauc mele qee elfi.

<sup>3</sup> Ge, me je ija wele om eu je mele bahic ija adem. Me je eu odi. Krais uqa eguna silail cunug cagasingiannu cal men, eu odiwe je eu Anutna jaqec jena nijia. <sup>4</sup> Odocob age heel cisecebil deel cijedna Anut tulidocob ceseli cajen, eu odiwe je eu Anutna jaqec jena nijia. <sup>5</sup> Odimei uqa Pita amegna camasac men. Odimei hibna uqana malogom 12-pela amagana camasac men. <sup>6</sup> Odimei hibna uqa wawige meleec cotigeil 500 wooldoc odi amagana osobon camasac men. Cotigeil leih age wele cal mein qa mati eu qila bilingina. <sup>7</sup> Odimei uqa Jems amegna camasac men. Odimei hibna uqa uqana aposel cunug amagana camasac men.

<sup>8</sup> Odimei cit qocna uqa ija mel sim au me qeewe basiten, ija aminaha camasac men. <sup>9</sup> Ija Anutna tamanej jabaadi tootooadem. Eunu ija Kraisna aposel gemona nag bahic. Dana age ija Kraisna aposel tecnu ihoc qee. <sup>10</sup> Euqa Anut uum itec iten. Odocob uqa uqana uum itecna oditeceb ija aposel calem eu odiwe qila bilingina. Odocob uqana uum itec eu aig qon. Ija cabi gagadic bahic umig aposel cunug wooladem. Euqa eu ijadodoc qee cabi olom. Anut uum itec itimei ija cabi i ocnu gagadic odoc iten. <sup>11</sup> Euqa ija me je qasali maademfo, qee aposel leih age me je qasali maadeinfo eu odi fena. Ege cunug Kraisnu me je qasali madoqona. Ege qasali mamadoqon age wawaga meleen.

### *Hibna dana cunug cal mein eu ceseli cajoqagan*

<sup>12</sup> Aria, ege Krais cal meceb Anut tulidocob ceseli cajennu me je gaid qasali madoqona. Eunu adi age leih odi madegina, "Dana wele cal men eu uqa ceseli cajece qee," egina? <sup>13</sup> Euqa dana age cal mein eu ceseli cajece qee eu melefí eunu ege madegan, "Anut uqa Kraisha tulidocob ceseli qee cajel," eqan. <sup>14</sup> Odocob Anut uqa Krais tulidocob ceseli qee cajel eu melefí eunu me je ege qasali madoqona eu ceteh gauc, odocob agena wawaga meleec euha ceteh gauc. <sup>15</sup> Euqa ege Anut uqa Krais tulidocob ceseli cajennu qasali madom. Odocob Anut uqa dana cal mein tuliaideceb ceseli qee cajegina eu melefí uqa Krais tulidocob ceseli qee cajel. Eunu ege Anut odonnu uhulec je madoqona. <sup>16</sup> Ge, Anut uqa dana cal mein eu tuliaideceb ceseli qee cajowain eu melefí eunu Anut uqa Krais tulidocob ceseli qee cajel. <sup>17</sup> Anut uqa Krais tulidocob ceseli qee cajel eu melefí agena wawaga meleec eu ceteh gauc, odocob agena silail gaid ageca fagaden bilia. <sup>18</sup> Odocob dana age wele Kraisnu wawaga meleecib cal mein euha age wele fadalein. <sup>19</sup> Ege Kraisnu wawige meleecib cebac biley ocnu sumudi biluquna. Euqa ege cebac biley qila maha ina bileyocnū himec sumudi biluqunafī ege am i walocca bahic. Odocob ege am walocca biluquna dana cunug mahana bileyina eu wooladoqona.

<sup>20</sup> Euqa Anut uqa mele bahic Krais tulidocob cal mecnadec ceseli cajen. Uqa dana cal mein eundec agena matu ibuldon, eu odi aqunec sab cajena cinigwe. <sup>21</sup> Ge, cal mec eu dana osol odocna cali hon, eunu eu odiwe cal mecnadec ceseli cajec euha dana osol odocna cali hon. <sup>22</sup> Ge, dana cajaca cunug age Adamca gabandoc bileyina euna cebac biley oqagan. <sup>23</sup> Euqa dana cunug osolosol agena saennana ceseli cajoqagan. Krais uqa casac matu ceseli cajen. Odocob uqa ceseli hugian saen euna Krais uqana eundec ceseli cajimeig cebac biley oqagan.

<sup>24</sup> Odocob cit qoc deel hugian. Saen euna Krais uqa gabman cabi cunugca, ensel cunug age ilo bileyinaca, ensel cunug age gagadic odocka, eu cunug qee madigan. Eu hedocob uqa Anutna cul eu Memige Anut ebenna migian. <sup>25</sup> Ge, Krais uqa cofadec dana bibileb lili Anut uqa uqana cad cunug cilehaadi jaih bisalu madigan. <sup>26</sup> Uqa cad cunug fadaladi hedumei cit qocna cal mecha fadalidugian. <sup>27</sup> Anutna jaqec je eu odi madena:

"Anut ceteh cunug uqa jaih bisalu meceb agena ilo biley," ena.

(Buk Song 8.6)

Anut uqa ceteh cunug eu Krais bisalu men. Euqa ege doqona, "ceteh cunug" eu Anut uquadodoc eu age gami Krais bisalu qee mel. <sup>28</sup> Anut uqa casac ceteh cunug Melah bisalu men. Odocob hibna ceteh cunug Krais bisalu biluqagan saen euna Melah uquadodoc Anut

bisalu biligian. Euqa Melah uqadodoc Anut bisalu biligian saen euna Anut uqa ceteh cunugnu ilo bahic biligian.

<sup>29</sup> Aria, eetanu dana leih age cal mec dana cesuladoqaganu wa joc ogina? Dana cal mein eu age ceseli qee cajecebifl dana leih age adi cal mec dana cesuladoqaganu wa joc ogina? <sup>30</sup> Odocob ege aposelha adi? Dana mati bahic ege me je cabi oqonanu gemanaga bena. Odocob age gaidgaid qigecnu gale adena. Dana cal mein eu age ceseli qee cajecebifl eetanu ege dana cajaca dana cal mein eu age ceseli cajoqaganu je mamadi coboqona? <sup>31</sup> Ija cotiel, ija deel cunug cal mec guludugina! Ija je mele maadigina, ege cunug Krais Jisas eguna Tibudca gabangec biluquna eunu ija agenu culaina. <sup>32</sup> Age ija dana himec ijana cisdoc toodumig cabi i om ec cisdoginafi eu cabi i adi cesultena? Ija Efesas ene dool cus gami cadomfi\* euna ija cel ceteh me oso om? Dana cal mein eu age ceseli qee cajowainfi eunu age madegina:

“Uqadec ege cal meqan.

Eunu ege sab jimeb ceu jocomun dalul qigeceb ceeloqale,” egina eu odi toodu odoqale  
eu me bahic. *(Aisaia 22.13)*

<sup>33</sup> Dana age madegina, “Ege dana me qee gami osoben cobifeb age eguna kobol me eu me qee mudiguqagan,” egina<sup>†</sup> ec age dogina. Gadgad dana age quaudowain. <sup>34</sup> Age leih age Anutnu qee doc nijia. Ija je i age majanaga hewadecnu maadigina. Age haun silail cain mowain. Age gad kobol culimeig tutuc cisdoiga.

#### *Deweg ceseli cajec eu fil bahic*

<sup>35</sup> Euqa dana oso madigian, “Dana cal mein eu adi tuliaideceb ceseli cajoqagan? Age cel dewenegaca ceseli cajoqagan?” igian. <sup>36</sup> Hina dana gad! Hina aig mahana cehagana eu qee cebac mena qa casac huluqian. <sup>37</sup> Odocob isi deweg haun migian eu qee cehagana. Hina wit aigfo, aig fil osofo cehaganafi hina cabina goman isi wasigian eu qee cehagana qa aig himec cehagana. <sup>38</sup> Euqa Anut uqadodoc cisdocna aig osolosol qala qahecca goman deweg filifl aden. <sup>39</sup> Dewenegaha ihocihoc qee oloin. Dana deweg fil nijia, odocob dool cusca mananca deweg uqa fil oin cobogina, odocob man fululec deweg uqa fil oin cobogina, odocob dool wanadec deweg uqa fil oin cobogina. <sup>40</sup> Anut ifanimei mahana isec maden eu fil foqona. Uqa ceteteh fil ifanimei sao ohisna isec maden eu fil foqona. Ohis nijadegina eu dooadec fil, mahana nijadegina eu dooadec fil. <sup>41</sup> Cam eu iletet fil, jagel eu iletet fil, malaqa eu iletet fil. Odocob malaqa oso iletet eu malaqa oso iletet wooldona.

<sup>42</sup> Dana cal mecnadec ceseli cajoqagan saen euna euha odi camasac migian. Ceteh cehegina eu moligianu nijia. Ceteh ceseli cajigian eu geg. <sup>43</sup> Deweg heel cisegina saen euna deweg eu fecnu galeca qee. Deweg ceseli cajigian saen euna eu kobolkobolca. Deweg heel cisegina saen euna eu lasdocco. Deweg ceseli cajigian saen euna eu gagadic odocca. <sup>44</sup> Deweg heel cisegina saen euna eu maha deweg. Deweg ceseli cajigian saen euna eu kis deweg.

Ge, maha deweg nijia ec doqona, eunu kis deweg nijia echa doqona. <sup>45</sup> Anutna jaqec je eu odi madena:

“Dana matu Adam uqa dolog umei cebac men,” ena.

*(Jenesis 2.7)*

Adam cit qoc uqa kis, uqa cebac biley igina.<sup>‡</sup> <sup>46</sup> Euqa kis deweg eu matu qee. Maha deweg eu matu. Ege casac maha deweg umeb isi kis deweg oqan. <sup>47</sup> Dana matu eu Anut maha umei muden. Eunu uqa mahanaadec. Dana lecisdoc eu uqana gug sao jobonnadec. <sup>48</sup> Dana mahanaadec cunug age mahanaadec eu odiwe dana matu uqa mahanaadec. Dana sao jobonnadec cunug age sao jobonnadec eu odiwe dana lecisdoc uqa sao jobonnadec. <sup>49</sup> Ege dana mahanaadec i ihicon qoc om coboqonaw, odiha ege dana sao jobonnadec i ihicon qoc umeb cobeqan.

<sup>50</sup> O cotiel, ija age mele maadigina, dana maha inadec uqa Anutna cul eu muguh ocwe qee. Odocob ceteh qee mena eu ceteh qee qee meiaun eu muguh ocwe qee. <sup>51</sup> Dah meiga! Ija je oso jahunec nijia eu qila maadigina. Ege cunug qee cal moqua qaa ege cunug ibuldoqan. <sup>52</sup> Eu mahuc bahic amesige qumeb mecioqonaw, taul eueceb ege ibuldoqan. Ge, taul jejeg cobigian, odocob mahucwe cal mein eundec age cebac biley catanec oqagannu ceseli cajoqagan, odocob ege ibuldoqan. <sup>53</sup> Ge, dewenige calua i lotoc u tacoonaw dewenige cebac biley catanec u tacigian. Dewenige cal mec i dewenige qee cal mec eu u tacigian. <sup>54</sup> Eunu dewenige calua i dewenige cebac biley catanec u tacigian

\* **15:32:** Dana leih age Pol uqa dool cus bahicnu maden ec cisdogina. Rom age dana oso uqa kobol me qee odon eunu doqagannu gale aden saen osona age dana eu odudeceb uqa dool cus eu laion odi gami cadesin. Euqa dana mati age Pol uqa dool cus bahicnu qee madel ec cisdogina. Age uqana cadnu galolo je maden ec cisdogina. † **15:33:** Je i Grik agena galolo je dana oso, ijan Menanda, uqa jaqen. ‡ **15:45:** Adam cit qoc uqa Krais. Age 15.21-22ca Rom 5.14-19ca feiga.

saenna, dewenige cal mec i dewenige qee cal mec eu u tacigan saen euna Anutna jaqec jena je oso ihoc ligian. Je eu odi madena:

"Krais uqa cal mec wooldoia.

Cal mec eu fadaleia," ena.

(Aisaia 25.8)

<sup>55</sup> "O cal mec, hinana gagadic odoc dana cajaca cilehadecnu eu ai?

O cal mec, hinana jal aig dana cajaca aqeceb fadalecnu eu ai?" ena. (Hosea 13.14)

<sup>56</sup> Cal mec uqana jal aig eu silail. Odocob loo je eu silail gagadic odoc utina. <sup>57</sup> Euqa egena Tibud Jisas Krais cesulgeceb ege cal mec wooldoqona eu Anut igina. Eunu ege Anut hegaga doqona.

<sup>58</sup> Eunu ija cotiel, ija agenu nalunuga migina. Age gagadic mimi duuec taweigale. Age Tibudna cabi ocobil hunawigiannu. Ge, age dogina, Tibud ageca bibileb cabi ocna uenega gauc qee seildowain, cabi ihoc ligian.

## 16

*Dana cajaca age Jerusalem tamanec cesuladecnu meen qaig leih suldoqagannu gale aden eunu Pol maden*

<sup>1</sup> Qila ija meen qaig age Anutna dana cajaca qagoc Jerusalem ono bilegina cesuladecnu gabandumeig suldoqagannu gale aden eunu maadigen. Ija tamanec Galesia hatuna bilegina eu age cabi i adi oqagannu maadem. Korin ageha eu odi odoiga. <sup>2</sup> Cuha deel cunugnana age cunug abesabes cuha osona qaig oin eunu ciscoiga. Odimeig qaig na ha culimeig na ha agedodoc agena jonana mi cuhadoiga. Eunu qaig eu hunawoqagan. Odocob ija isi calecemin age qaig walecnu cabi qee owain. <sup>3</sup> Hibna ija humig ija dana leih agedodoc nesiladein eu jaqec je adimig suladecmin agena bagol adep i Jerusalem ono hewi beloqagan. <sup>4</sup> Ija cisdu simig eu ijaha nuigen ifig age ijaca osoben belegan.

*Pol uqa cocobi Korin tamanec feciadigiannu cisdon*

<sup>5</sup> Ija Masedonia gemogemo cobigen ec cisdugina. Eunu ija casac Masedonia gemogemo odi cocobi nui ageca caligen. <sup>6</sup> Ija acahna ageca nag odi bileqanfa, ija qee dugina. Acahma ija age gami bibilomun li duan saen qee migia. Odocob hibna ija jobon osona nuigen. Odocob age ija anaana nuecnu jicna ehi li mituqagan. <sup>7</sup> Tibud uqa odi madifei ija saen nag cecelacca age gami bileqan ec cisdugina. Eunu age dogina, qila ija meci himec adimig mahuc odi nuecnu qee gale tel. <sup>8-9</sup> Odocob ijana cad matiha bilegina. Euqa jic cebec ijanu wele hudec taweia. Odocob ija cabi benca aig mati qugiannu ihoc. Eunu ija Efesas ene bibilemin li Pentikos saen caligian.\*

<sup>10</sup> Timoti uqa Tibudna cabi ona eu odi ija cabi uginawe. Eunu uqa agena jicna hufei age feele docobil age gemona biligianu ciscoiga. <sup>11</sup> Odocob age uqa dana gauc dih imeig cain hibemdownai.† Ija uqa wawige meleec cotigeil leihca age ijaca ceseli hoqagannu sumadigina. Eunu age cesuldocobil uqa uqana jicna malolca nuigianu odoigale. Odocob uqa ijaca mahucwe haun ceseli hugian.

<sup>12</sup> Ege wawige meleec cotigeil Apolosnu, ija uqa wawige meleec cotigeil leih gami ageca loqagannu geh tulidom qa qila uqa lecnu qee gale dol. Hibna uqadodoc lecnu saen me bahic tebandufei uqa ligian.

*Cit qoc je*

<sup>13</sup> Age meciu cuhadumeig wawaga meleecnu gagadic taweigale. Age dana bahic taweiga. Odimeig duuec taweiga. <sup>14</sup> Age cabi cunug oso nalunuga mecca cabi oigale.

<sup>15</sup> Ija cotiel, age Stefanas uqana sihul age casac Kristencalein eu age dana cajaca Akaia hatunna bilegina eu cunug aquiniadi Kristencalein ec dogina. Odocob Stefanasna sihul agena gale edecna Anutna qagoc dana cajaca cesuladecnu cabi oin. Ija Korin niniadigina, <sup>16</sup> age dana i edec bisalu bileigale. Odocob age dana cunug age Anutna dana cajaca cesuladeginaca, age cabi inu gagadic meginaca eundec bisalu bileigale.

<sup>17</sup> Age cunug ene humeig fecitecnu ihoc qee.‡ Eunu ija Stefanasca, Fotjunetasca, Akaikasca, age ijaca hoinnu ceelingina. <sup>18</sup> Age ija wawi walasa dutein eu odiwe age ageha wawaga walasa duadein. Age dana i edec eu age binanaga suleigale.

<sup>19</sup> Esia hatunanaed tamanec agena feele edec Korin sulduadeginaca. Akwila Priskaca, tamanec age gami alena jona ceguleginaca agena feele edec mati bahic Tibud ijanna sulduadeginaca. <sup>20</sup> Wawige meleec cotigeil ene cunug feele edec sulduadeginaca. Age Anutna dana cajaca osolosol cunug cotogail cotec gunna cotdocobdcobeigale.

\* **16:8-9:** Pentikos uqana gugnu age je Aposel 2.1 euna nijia eu feiga. † **16:11:** Timoti uqa dana haun. Odocob gug eunu dana leih age uqa hibemdoen. Age 1 Timoti 4.12 feiga. ‡ **16:17:** Cudun ina Grik je uqana gug eu camasac bahic qee. Grik je bahic eu odi madena: Ceteh age qee itelein eu dana i age itein.

<sup>21</sup> Ija Pol ijadodoc ebenina feele adec jaqigina. §

<sup>22</sup> Dana oso Tibudnu nalug qee menafi Anut uqa dana eu geuldeiale! Egena Tibud hoiale!

<sup>23</sup> Jisas Tibud uqana eelgec uum igece ageca biliale. <sup>24</sup> Ija Jisas Kraisca gabandocna ijana nalunuga mec eu age cunugca biliale.

---

§ **16:21:** Pol uqadodoc uqana je qee jaqoloi. Uqa je mamaden dana oso jaqoloi. Euqa je but ina nijia Pol uqa ebengulna jaqen.

## Pol Uqa Jaqec Je Lecisdoc Korin Tamanec Jaqiaden Aqunec Je

Korin tamanec dana cajaca leih age Polnu je me qee madein. Odocob Pol eunu waug qon. Uhulec iwaladec dana leih age tamanec dunuh limeig age Pol eu aposel bahic qee ec madegina, odocob ageha Pol meen qaig Korin tamanec age Jerusalem tamanec eunu utein eu uqa sosogon on ec madegina. Odocob wele Pol uqa Korin tamanec feciadecnu ageca nui lecisdugian ec maaden. Euqa uqa qila ageca nui osol dih dugian ec je sulduaden. Eunu uhulec iwaladec age Pol uqana je eu tutuc qee egina. Eunu Pol uqa je tutuc mecnuka, uqa Korin tamanecca wawaga osol bielecnuca jaqec je i jaqiaden.

Jaqec je i sanan mecna Pol uqa je gagadic wele Korin tamanec maaden eunu madena. (Age 2.4 feiga.) Uqa je gagadic maadecnu qee gale dol, euqa age Polnu je me qee madein. Odocob age Polna je dumeig agena kobel tutuc mein, eunu qila Pol uqa waug ceelenia.

Dac 1-7na Pol uqa eetanu uqana jic nuecnu cisdoc ibuldon eu silliadiena. Dac 8-9na Pol uqa Korin tamanec age Judia Kristen dana cajaca cesuladecnu meen qaig gabandu hedoqagannu cesusadena. Dac 10-13na Pol uqa aposel bahic eu maadena. Odimei uqa Korin tamanecca nuec bahic nuimei uqana aposel cabi Krais uten eu ugian ec jaqen. (Age 13.10 feiga.) Uqa ageca hugian euna uqa dana silail megina eundec gauc qee culadeiaun qa ulauladigian. (Age 13.2 feiga.)

### *Je Dunuhnu Dado Mec*

1. Pol uqa uqana aposel cabinu madena (dac 1-7)
    - A. Feele adec je (1.1-2)
    - B. Pol uqa Anut cesuldon eunu hetaga don (1.3-11)
    - C. Pol uqa Korin ono qee nuel eunu silliadien (1.12-2.4)
    - D. Korin age dana cahuldona eu uqana silail dahiniga celigian (2.5-11)
    - E. Anutna gagadic odocna aposel age cabi ogina (2.12-17)
    - F. Korin tamanec age Kraisnadec jaqec je oso (3.1-11)
    - G. Anutna kobolkobol eu cataniec feginia (3.12-4.6)
    - H. Aposel age hal cetehe meca dunuh bilina cinigwe (4.7-16a)
  - I. Kristen ege dewenige eu talah jowe mahana biluquna, eu bataweceb ege jo oso saona nijia euna bieleqan (4.16b-5.10)
  - J. Dana cesuladeceb age Anutca wawaga osol migiannu Kristenna cabi (5.11-6.10)
  - K. Pol uqa Korin tamanec uqana simwe je camasac maadena (6.11-7.4)
  - L. Taitas Polca humei uqa Korinnu jena Pol wahohogdon (7.5-16)
2. Pol uqa Korin tamanec age Judia Kristen dana cajaca cesuladecnu meen qaig gabandu hedoqagannu cesusadena (dac 8-9)
    - A. Pol uqa Korin tamanec age meen qaig ben adoqagannu cesusadena (8.1-15)
    - B. Pol uqa Taitas cabi hijagulca age Korin meen qaig gabandochnu cesuladoqagannu suladen (8.16-9.5)
    - C. Dana oso uqa meca cehena eu uqa meca cedigian (9.6-15)
  3. Pol uqa aposel bahic ihacadimei uhulec aposel age uqana cabi cilehdocknu odoin eunu je wadacduadene (dac 10-13)
    - A. Pol uqa uhulec aposel age uqa agena gadac dunuh len ec madein eunu je wadacaden (dac 10)
    - B. Pol uqa uqadodoc binan sulecnu gad je madena (dac 11-12)
    - C. Pol uqa Korin age agena wawaga meleec temdoiga ec madena (13.1-10)
    - D. Cit qoc je (13.11-14)

<sup>1</sup> Ija Pol, ija Jisas Kraisna aposel. Ija Anut uqana cisdochna aposel calem. Ija ege wawige meleec cotige Timotica ele Anutna tamanec age Korin ono bileginaca, Anutna dana cajaca qagoc cunug age Akaia hatu cunugna bileginaca jaqidowona. <sup>2</sup> Memige Anutca Jisas Krais Tibudca alena eelgec uum igece malol bielecca ageca biliale.

### *Pol uqa Anut cesuldon eunu hetaga don*

<sup>3</sup> Ege egena Tibud Jisas Krais uqa Memeg Anut binan suluqale! Uqa ege Anut Memige, odocob uqa egenu waug qoc cesulgeccia gug. <sup>4</sup> Uqa culumen cunug egeca calena euna wahohoggene. Eunu ege leih age culumen filfilna bilegina eu wahohogadecnu ihoc eu odiwe Anut wahohoggene. <sup>5</sup> Ge, sogoech ben Krais gahidon eu egeha gahidoqona. Eu odiwe ege Kraisca gabandoc biluquna euna Anut gehca wahohoggene. <sup>6</sup> Ege wahohogadecnuca

Anut cahahaadecnuca eunu culumen gahidoqona. Anut uqa age wahohogadecnu ege wahohoggena. Eunu age culumen ege gahidoqona eu gahidogina saen euna age gagadic tawecnu Anut cesuladena. <sup>7</sup> Ege doqona, Anut age egeca wahohoggigian eu odiwe age egeca culumen gahidoqona. Eunu age gagadic tawoqagannu ege wawige meleena.

<sup>8</sup> O wawige meleec cotiel, culumen Esia hatuna egeca hocob gahidom ec doqagannu gale gena. Ge, culumen ben bahic egene gagadic odoc wooldoc ege cilehgen. Culumen eu cilehgegen ege cal mecnu himec cisdom. <sup>9</sup> Eu mele, ege gesilgec dana ege cal mecnu wele maden ec tebandom. Euqa ege egene gagadic odocnu cain cisdoqaun, ege Anut, uqa dana cal mecnadec tuliadecib ceseli cajegina, eu uqana gagadic odocnu cisdoqannu culumen eu egeca calen. <sup>10</sup> Culumen me qee i qigecib cal mecnu ihoc qa Anut cahahagen. Odocob hibna Anut uqa haun cahahagian. Ceteh me qee fadalgecnu egeca hohob Anut uqa gaid cahahagian ec wawige gagadic tatawi meleena. <sup>11</sup> Eunu age Anut egenu inondodoig cesulgegina. Odocob Anut uqa egenu inondoc mati wadacdugian. Odocob Anut uqa ege eelgigion. Odocob mati age jejenega suli u egenu Anut hetaga doqagan.

#### *Pol uqa Korin ono qee nuel eunu sildiadien*

<sup>12</sup> Ija ceteh inu culai madigina, ija dana cajaca cunug Anutna kobil tutucnaca kobil gunnaca odadem ec wawi madena. Ija dana agena cisdock silecna qee odadelem qa Anutna eelgec uum igecka odadem. Odocob ija kobil ina Korin age wooladi odadem. <sup>13-14</sup> Ge, ija je jaqiadecmin dogina saen euna age je sanijimeig uqana gug du cuhadoqagannu eu himec jaqiadigina. Ija je fil qee jaqiadec. Eu mele, je leih ija jaqiadem eu age uqana gug qee fogo adel. Euqa age ijana je jaqiadec cunug uqana gug fogo adigian eunu wawi meleena. Odocob Jisas Tibud uqana ceseli hoc deelna age ija kobil odadem eunu culinige oqagan eu odiwe ija agenu culunuga ugen.

<sup>15</sup> Kobil ija odadigina eu age gale adena eunu wawi gagadic meleen. Odocob gug inu age eeladec lecis oqagannu ija age casac li feciadigen ec cisdom. <sup>16</sup> Ija age casac li feciadimig cuculadi Masedonia hatuna nuigen ec cisdom. Odinim onodec cesulcebil ija cuculadi Judia hatuna nuigen ec cisdom. Odecemin age ijana jic cesulteceb ilia cuculadi saen euna ija dana mahanadecwe cisdugina ec cisdoginafo? Ija jic cobocnu cisdugina saen euna ija osolna ihocihoc madigina ec cisdoginafo? Qee bahic! <sup>18</sup> Anut uqana je cunug madena eu toodu odona. Eu odiwe ijaha je cunug maadem eu odi “Ese, qee,” ecca osobon qee maadelem. Ija je mele himec maadem. <sup>19</sup> Ge, ijaca, Sailasca, Timotica ege age gemona Anut Melah, Jisas Krais uqana je qasali maadom. Odocob age dogina, Krais uqa “Ese, qee,” ecca osobon madec dana qee. Euqa Krais uqa ese ec madecebfu eu ese ec himec madena. <sup>20</sup> Anutna je hahun mati njija. Odocob Krais uqa Anutna je hahun cunugnu “Ese” ec madena. Eunu ege Anutna je du hedumeb ege Krais ijanna dih ege “Mele” imeb Anut binan suluquna. <sup>21</sup> Odocob Anut uqa ege ageca osobon gagadic migimei ege Jissasca gabangeceb gagadic tawoqona. Odocob Anut uqa ege nesilgeceb uqana aposel biluquna. <sup>22</sup> Odimei uqa uqana sisi mec egeca migen. Odimei uqana Kis ege wawigena igen. Kis Gun eu Anut hibna ceteh igigiannu gale dona eu uqana naha matu. Eunu ege gaga inu Anut uqa hibna ceteh i igigian ec mele bahic doqona.

#### *Pol uqa mahucwe Korin ono qee nuel*

<sup>23</sup> Ija Anut ijanna maadigina. Ija uhuladifig Anut uqa ijana uhulec eu camasac mudigan. Eu mele bahic, ija je haun maadimig culumen adecnu qee gale tel, eunu ija mahucwe Korin ono qee nuel. <sup>24</sup> Ege agena wawaga meleec euna ilo biluquna ec qee madoqona. Age agena wawaga meleecna gagadic tawegina. Eunu age ceeloqagannu ege ageca osobon cabi oqona.

## 2

<sup>1-2</sup> Ija age wawaga culumenca madifig inni age ija oditecebile ija wawi ceeligion? Eu age ija odadecmin wawaga me qee men. Eunu ija wawina ageca haun limig wawaga culumenca qee madigaun eu odi wele ija ageca limig wawaga culumenca mademwe eu me bahic ec madem. Eunu ija ageca qee lelem. <sup>3</sup> Age dana cajaca ija oditecebile ija wawi ceelena. Odocob ija ageca lecemin wawi me qee miyanu qee gale tel. Gug eunu himec ija jaqiadec eu wele jaqiadimig sulduadem. Ija dugina, ceteh osonu ija ceeligiona age cunugha ceteh eunu himec ceeloqagan. <sup>4</sup> Eu mele, ija wele jaqiadem saen euna ija jaen qiqiten wawi qajen. Ija amulini nenan jaqiadem. Ija age wawaga culumenca madecnu qee jaqiadec qe ija agenu nalunuga geh bahic migina eunu doqagannu jaqiadem.

#### *Korin age dana cahuldona eu uqana silail dahiniga celigion*

<sup>5</sup> Dana eu uqa oso waug culumenga mudenfi uqa ija wawi culumenga qee mitel. Uqa age cunug wawaga culumenga maden. Euqa ija ceteh inu galac mec je madecwe qee madigaun. Eunu ija je nag madigen, uqa age leih wawaga culumenga maden. <sup>6</sup> Mati age dana i tamanecnadeititacdoeu uqa ameg ihoc on. <sup>7</sup> Qilaqa age falicdoqagannufi eu me bahic. Odimeig uqa waug me qee bahic mec eu cileh bahic doiaunnage uqana silail dahiniga celeceb wahohogdogale. <sup>8</sup> Eunu ija niniadigina, age uqanu nalug megina ec eu madocobil doiale. <sup>9</sup> Ge, jaqec je ija wele jaqiadem eu ija temadecnu dih jaqiadem. Age ijanage ceteh cunug eu gaid toodoginafo, qeefo ec dugennu odi odom. <sup>10</sup> Odocob age dana oso uqana silail dahiniga celecebfija uqana silail dahini celigian. Odocob dana oso uqa cahuldon eu ija uqana silail dahini celigian ec mele nijecebfieunu ija Krais amegna age cesuladigennu dana i uqana silail dahini celigian. <sup>11</sup> Seten uqa ege uqana cisdoc kabolca eu wele doqona. Eunu cilehgigi woolgeiaunnu ija odi jaqiadem.

### *Pol uqa Taitas fecnu gale don*

<sup>12</sup> Euqa ija Troas ono Kraisnu me je qasali maadecnu calem euna Tibud uqa cabinu jic ono qaheceb fem. <sup>13</sup> Euqa ija wawi meleec coti Taitas ono wali fecwe qee. Eunu ija wawi ben bahic me qee men. Odocob ija Troas dana cajaca ono odio adimig ija hu Masedonia hatuna calem.

### *Anutna gagadic odocna aposel age han wooldogina*

<sup>14</sup> Qilaqa ija Anut hetaga dugina! Ge, Krais uqa na babalecna tibud me qee gagadic odocca agena gagadic odoc cagasi qee mudimei hannu wooladen. Krais hannu wooladen eunu Anut uqa ege uqana gihadoc dana iwaligii ehigina. Odocob Anut uqa ege odigeceb Kraisnu me je madocomun dana cajaca cunug Kraisnu dogina. Kraisnu doc eu dedeman tinca cinigwe anaana cunugna nuina.\* <sup>15-16</sup> Ge, Krais uqa ihanecib cijeceb dedeman tinca wasi Anutca tena eu ege. Dedeman tinca eu dana cajaca age fadalec jic tabag megina eu gemogemo nuina. Dana cajaca age fadalec jicna cobogina eu agenu dedeman i cal mec uqana dedeman cinigwe. Odocob dedeman eu agenu cal mec cali hugian. Odocob dedeman tinca eu dana cajaca Anut cahahaadena euha gemogemo nuina. Euqa dana cajaca Anut cahahaadena eu agenu dedeman i cebac biley uqana dedeman cinigwe. Odocob dedeman eu agenu cebac biley cali hugian. In uqa cabi i ocnu ihoc? <sup>17</sup> Ge, ege dana mati bahic cinigwe qee, mati age cocobi Anutna je madecnu cabiwe eu meen qaig ocnu cabi ibuldogina. Euqa ege cabi i Anutnadec om, ege Anutna sos. Ege dana wawige tutucca, Kraisca wawige osol mimi Anut amegna je i Anut igen eu tutuc qasali madoqona.

## 3

### *Aposel age bal cehec haunna cabi dana*

<sup>1</sup> Ege je i madoqona euna ege qila egdedodoc binanige sulecnu haun sanan moqonafo? Qeefi, dana leih age ege dana me bahic tutucca ec jaqec je oso jaqimeig Korin tamanec sulduadecnu gale adena. Odocob egeha qila dana i age cinigwe odi jaqec je oso sulduadecqonafo? Qeefi, ege age Korin jaqec je i edj oso cesulgecnu jaqeiga ec maadeqanfo? Eu odi qee nijel? <sup>2</sup> Age dih jaqec je cinigwe bilegina age ege dumanigenu dana cajaca maadecebileb dogina. Jaqec je eu ege wawigena nijia eunu dana cajaca cunug age sanijimeig dogina. <sup>3</sup> Krais jaqec je oso jaqen odi age camasac bilegina. Ege jaqec je i Kraisnadec umeb suldocomun ageca len. Krais uqa jaqec je i inkca qee jaqel qa uqa Anut Cebac Bilec uqana Kis euna jaqen. Odocob uqa jaqec je i meen fanna qee jaqel qa uqa dana wawaganja jaqen.

<sup>4</sup> Ege je i eetanu madoqona? Eu age jaqec je oso Krais jaqen eunu ege wawige meleena. Eunu age ege aposel cabi i Anutnadec umeb tutuc odom eunu camasac ihacegina. Odocob Anut uqa cabi i Krais umna igen eu mele bahic. <sup>5</sup> Eu mele, ege egdedodoc cabi i ocnu ihoc qee. Eunu ege egdedodoc ceteh oso odom ec qee madoqona. Anut uqa dih odigeceb ege cabi ocnu ihoc. <sup>6</sup> Anut uqa odigeceb ege bal cehec je haunna cabi dana biluquna. Loo je jaqec eu dana aqeceb cal megina qa Kis eu cebac biley dana adena. Eunu Anut uqa bal cehec je haun i loo jena qee jaqel qa uqa Kisna jaqen.

<sup>7</sup> Cisoiga. Loo je dana adecnu cabi Anut on eu odocob dana cajaca cunug age cal mec calen. Euga Anut uqa loo je meen fanna jaqimei dana aden saen euna loo je eu fulacdoc bencen hon. Eunu Moses ola eu iletan. Odocob Isrel dana cajaca age Moses ola fecwe qee. Odocob hibna fulacdoc eu qee men. <sup>8</sup> Eunu Anut uqa Kis dana adecnu cabi oc eu uqa loo je dana adecnu cabi oc eu wooldumei fulacdoc ben bahicca hugian. <sup>9</sup> Ge, loo je Anut dana aden eu dana age silailca fadaloqagan ec ihacaden eunu cabi eu fulacdoc ben bahic. <sup>10</sup> Eu mele

\* **2:14:** But ina leceb 7.4na Pol uqa galolo je odi maden. Uqa uqana jic cobocnu je eu 7.5na haun saen.

bahic, cabi haun i uqana fulacdoc eu cabi weledec uqana fulacdoc geh bahic wooldon. Eunu cabi i wele fulacdocca bilen eu qila fulacdocca qeewe bilia.<sup>11</sup> Cabi weledec i gaid bielecnu ihoc qee, eu odocob qee men. Euqa cabi weledec eu fulacdocca hon. Eunu cabi haun eu fulacdoc ben bahicca hu bieleceb catanigian.

<sup>12</sup> Ege cabi haun i fulacdoc ben bahicca hugiannu wawige meleecab sumudi biluquna eunu ege qee cucuiolom. Ege eunu camasac qasali madoqona.<sup>13</sup> Ege Moses cinigwe qee odoqona. Uqa Isrel dana cajaca age ola iletet qee mena eu fowainnu uqa lotoc nahana ola jahuldon.<sup>14</sup> Euqa age wagawana tool men. Odocob huhu qila deel ina age bal cehec je jaqc weledec sasaniji bibileig lotoc naha eu dih gaid agena cisdockahuldon. Krais uqa himec lotoc naha eu cagaseba eunu age bal cehec je eu qee fogo adena.<sup>15</sup> Eu mele, qila deel ina cel saen age Mosesna loo je mele sanijegina qa euna lotoc naha eu gaid agena cisdockahuldon.<sup>16</sup> Euqa dana oso uqa waug tului Tibudnu falidocobfi Anut uqa lotoc naha uqana cisdockahuldon eu cagaseba.<sup>17</sup> Aria, ija Tibud ec madigina eu Kis. Odocob Tibudna Kis eu dana osoca bielecebi dana eu uqa besitoc bilina.<sup>18</sup> Odocob ege cunug, ege olanige jahuldocca qee biluquna, ege Tibud fulacdoc gagadic odocca foqona. Odocob Tibudna fulacdoc eu ege too qigimei fulacdocca ibulgenna. Odocob ege fulacdoc eu haunhaun umebe Tibudwe caloqona. Ge, fulacdoc gagadic odocca eu Tibudnadec hona, odocob Tibud uqa Kis.

## 4

### *Aposel age hal cinigwe*

<sup>1</sup> Anut uqa egenu waug qocob uqa cabi i ebenigena men, eunu ege cabi i ocnu lehanige qee culiaun. Qeoo.<sup>2</sup> Ege kobil me qee jahunecnader majanige gecca eu wele hibemdom. Ege quaqadec kobolna qee coboqona. Odocob ege Anutna je qee falidocqona. Qeoo. Ege mele je qasali maaadi camasac muduquna. Eu odcorna ege Anut amegna coboqona eu dana age egena cabi oc eunu dewenega nijigiannu kobil tutuc ihacadoqona.<sup>3</sup> Euqa qila i me je cataniec maadoqona dana leih eu hut maha cilehdockahuldon eu feginati eu dana fadalecnu dodoladec cobogina age himec odi odadene.<sup>4</sup> Seten, uqa mahadanadec uhulec tibud, uqa iletet eu Krais gagadic odoc fulacdoccanu me je maadecnader cali hona fowainnu uqa dana eundec age wagawana qee meleena agena cisdockahuldon eu feginati. Krais uqa Anut wican bahic.

<sup>5</sup> Ge, ege me je qasali maadoqona eu egedodoc ijanige ben qee muduquna. Euqa ege odi madoqona, "Jisas Krais uqa egena Tibud. Ege Jisasna je toodoqona, odocob ege Jisasna agena cabi dana biluquna," oqona.<sup>6</sup> Ge, Anut uqa wele maden:

"Fulacdoc tu gemonader cali hoiale!" en.

(*Genesis 1.3*)

Uqa madecebi ege wawigena fulacdoc bahic iletet. Eunu ege Krais ola fimeb ege Anutna gagadic odoc fulacdocca om.

<sup>7</sup> Euqa ceteh meca ege aposel hewoqona eu odi ege hal teehugca qeewe tatawoqon Anut uqa euna uqana cehewan caunca tacigeceb coboqona. Anut uqa dana cunug age gagadic odoc i feginati eu Anutnadec doqagannu odi odon, eu egenader qee.<sup>8</sup> Ege anaana cocoboqon culumen egeca calegina qa culumen eu qee cilehgena. Eu mele, wawige cacaden biluquna qa dumanige qee culina.<sup>9</sup> Egena cad mati bahic tootoogegina qa Anut, uqa egena cesulgec, qee qisacgena. Age ege qigeceb toni qigina qa age ege qee fadaleggena.<sup>10</sup> Ege gaid Jisasna cal mec eu dewenigena gahidoqona. Odimeb Jisas cal menwe odi cal meqa bili coboqona. Euqa ege cebac biluquna. Eunu Jisasna cebac biley euha ege dewenigena camasac mena.<sup>11</sup> Ge, ege cebac coboqona ege gaidgaid Jisas ijanu cal meca ehi li migegina. Eunu Jisasna cebac biley euha ege cal mec dewenigena camasac migiannu.<sup>12</sup> Eu odi cal mec eu ege dewenigena cabi ona qa cebac biley eu age deweneganu cabi ona.

<sup>13</sup> Ege Kraisna wawige meleena. Odocob Anutna jaqc je odi madena:

"Ija Anutna wawi meleen. Eunu ija je maden," ena. (*Buk Song 116.10*)  
Kis dana eu cesuldockahuldon jaqc eu uqa egeha cesulgeceb wawige meleecab je qasali madoqona.<sup>14</sup> Ege doqona, Anut uqa Jisas Tibud tulidocob ceseli cajen eu uqa egeha Jisasna tuligeceb ceseli cajeqan, odocob uqa ege ageca cemenug ehi li migecab bileyqan.<sup>15</sup> Ge, ceteh i cunug eu age cesuladigianu odona. Eunu Anut uqa dana cajaca mati bahic eleladec uum aadi cahahahaadi ihoc lelen conoga mati bahic Anut hetaga doqagan, odocob Anut binan ben wasigian.

### *Wawige meleecna biley*

<sup>16</sup> Eunu ege gug eunu lehanige qee culina. Ge, ege dewenigena camasac eu me qee mena qa dewenigena dunuh eu deel gaid haun ibuldona.<sup>17</sup> Ge, egena culumen gahidoc eu saen nag bahic. Euqa culumen gahidoc i ceteh oso biley cahulecca

oqannu saciadugena. Ceteh oqan eu ceteteh ben cunug wooladena.<sup>18</sup> Ge, ceteh ege amigena fec eu saenca qa ceteh ege amigena qee fec eu bileebeb catanigian. Eunu ege ceteh amigena fec eunu ege qee gugca mecioqona qa ege ceteh amigena qee fec eunu gugca mecioqona.

## 5

<sup>1</sup> Ege doqona, ege dewenige eu talah jowe mahana biluquna, eu bataweceb ege jo oso saona nijia euna bileejan.\* Anut uqa jo eu cehen, eu dana ebenegana qee cehelein, eu bileebeb catanigian. <sup>2</sup> Ege qila jo maha ina bibileb sogoi qaqaji biluquna. Ege eguna jo saona nijia eu lotocwe tacecnu eunu hoologona. <sup>3</sup> Ge, ege jo eu tacimeb ege Anut amegna bical qee biluqaun eunu. <sup>4</sup> Ge, ege jo maha ina bibili bileebe culumen tebandumeb sogoi qaqaji biluquna. Ege dewenige weledec culdecnu qee hoologona qa ege dewenige haun saonadec eu lotoc haunwe tacecnu eunu hoologona. Eunu dewenige i cal migian, odocob uqa cebac bilee bahic ugian. <sup>5</sup> Anut uqadib ege cebac bilee haun ocnu wele saciadugen. Odocob uqa Kis Gun igen. Kis Gun eu Anut uqa cebac bilee haun igigian eu uqana gaga.

<sup>6</sup> Eunu ege gaid wawige gagadicca biluquna. Ege doqona, ege qila dewenige ica mahana biluquna saen ina ege Tibudca uqana jobon qee biluquna. <sup>7</sup> Ge, ege uqanu wawige meleecna coboqona, ege uqa fecidocna qee coboqona. <sup>8</sup> Ege wawige duuec tawoqona. Odimeb ege dewenige i ene culimeb beli Tibudca osoben gug jobonna me bileechnu gale gena. <sup>9</sup> Eunu ege dewenige i ene biluqunafo, qee Tibudca osoben gug jobonna biluqunafo uqa egenu gale dugiannu gagadic cabi oqale. <sup>10</sup> Ge, ege cunug Krais amegna uqa ege gesiligiannu camasac meqan. Odocob ege dewenige mahana coboc saen euna odom eu uqa egena me odoch, me qee odoch eu odi toodoo ameg igeceb oqan.

### *Dana cesuladeceb age Anutca wawaga osol migiannu eguna cabi*

<sup>11</sup> Ege Tibud cumundocnu kobil eu doqona, eunu ege dana age Tibudnu wawaga meleigiannu tuliodoqona. Euqa Anut uqa eguna wawige cisdoocca eu tutuc eunu du cuhadona. Odocob ageha ija cabi tutuc uginanu age wawagana odi du cuhadogina eunu ija wawi meleena. <sup>12</sup> Ege je ina egdedoc binanige qee suluquna, odocob age ege dana me ec cisdoqagannu qee odoqona. Qeero. Ege age culinige helecnu gug madoqona. Eunu age dana age dana ijanaganu dih culaegin, odocob age dana dumanaganu qee culaegin eundec je me bahic wadacduadecnu ihoc. <sup>13</sup> Ege dana gad egina eu melef, odi fena, ege Anutnuha dana gad. Egena cisdoc eu tutuc eu melef ege cesuladechnu cisdoc tutuc. <sup>14</sup> Ge, dana osol uqa dana cunug hehuladi dana cunugnu cal men, eunu uqana cal mecna dana cunug cal mein ec du cuhadogona. Eunu Krais uqa nalunige mena eu egdedoc binanige suluqaunnu cahabcena. <sup>15</sup> Odocob dana cebac bileechna age agedodoc cebac qee biluwainnu Krais uqa hehuladi cal men. Euqa age Kraisnu cebac biluqagannu uqa cal meceb Anut uqa tulidocob ceseli cajen.

<sup>16</sup> Eunu ege qila dana oso dewegna odona eu fimeb uqana odoc eu mef, me qeefo ec qee gesili madoqona. Eu mele, ege wele Krais dewegna cocobon fimeb uqana odoc ege gesili madom qa qila ege uqanu odi qee gesili madoqona. <sup>17</sup> Eunu dana oso Kraisca gabandoc bilina eu uqa dana haun. Weledec eu jausen, odocob uqana bilee cunug haun ibuldon.

<sup>18</sup> Haun ibuldoc eu Anut odon. Ge, uqa Krais odoch ege, Anutna cad, uqadodoc tanawigen. Uqa egeha dana cunug age Anutna danah mecnu cabi igen. <sup>19</sup> Je i uqana gug eu odi. Anut uqa Krais umna bibili uqa mahamaha cunug uqadodoc dana cajaca tanawadecnu odona. Uqa agena silail sanjek cunug eu cagasiadema. Uqa aposel ege Anut danan tanawadecnu je eu camasac mimi maadecnu cabi igen. <sup>20</sup> Eunu ege Krais ijanna sos tatawoqon Anut uqa dana cajaca cunug ege conigena utaadema. Ege Krais hehuldi niniadoqona, age hu, cois ecebil ege age Anutca tanawadeqan. <sup>21</sup> Ge, Anut uqa Krais, uqa silail osol qee mel, eu ege hehulgi egena cudunna silailcawe tawigianmu muden. Eunu ege Kraisca gabandoc bileechna Anutna dana ititom ibuldocnu odon.

## 6

### *Cabi euna aposel age culumen mati bahic oin*

<sup>1-2</sup> Anut uqa odi madena:

“Saen ija nesili ehadem euna ija agena je dah mimig cesuladem.

Cesuladechnu saen ija nesili ehadem euna ija age caahahaadem,” ena. (Aisaia 49.8)

Dah meiga! Qila i eu Anutna cesuladech ocnu saen. Dah meiga! Qila i eu Anutna caahahaadec ocnu saen. Eunu ege Anutca osoben cabi u biluquna ege cesusaadi

\* <sup>5:1</sup>: Je i “ege jo oso saona nijia euna bileejan” eu dewenige haun ege euna sao jobon bileejan eunu maden.

maadoqona, "Age Anutna eelgec uum igece wele oin eu age gauc cain cusdowain," adoqona.

<sup>3</sup> Ege dana oso eguna cabina cahuldoc Cain feiaunnu gale gena. Eunu ege ceteh oso dana jaimaga tataqal aqecen toni aqecnu qee odoqona. <sup>4</sup> Euqa ceteh cunug ege odoqona euna ege Anutna cabi dana eunu ihacadoqona. Ege culumen filfil egeca caleginaca, ceteh ege me qee odigeginaca, ceteh ege calawamigecnu odoginaca eu cumugna ege gagadic tawoqona. <sup>5</sup> Age qigimeig gihadoc jona migein. Eguna cad age jabigimeig geh sewgein. Ege cabi witic cunug om, odocob ege usca qee sabca qee bilom. <sup>6</sup> Ege kobil cataniec dih odom, odocob ege doc cisdoccab bilom. Ege mahuc qee galac molom. Ege dana me odadom. Ege Kis Gunna gagadic odoc om. Ege nalunuga mec kobil tutuc odom, ege nalunuga mec kobil conigena dih qee madolom. <sup>7</sup> Ege mele je dih madom. Odocob ege Anutna gagadic odocna cabi om. Ege kobil tutuc hewom eu eguna han cadec ceteh cinigwe ebenige meulanaca anserenaca hewom.

<sup>8</sup> Dana leih age ege binanige solein. Odocob dana leih age cewigein. Dana leih age ege hibilemige je me qee magein. Odocob dana leih age ege kobil me odoin ec leih maadein. Dana leih age ege uhulec je madec dana ec cisdoin qa ege mele je dih madom. <sup>9</sup> Dana leih age egenu qee doloin cinigwe odigegin qa dana mati age egenu doin. Ege dana cal meginawie bilom qa ege gaid cebac biluquna. Dana leih age ege gehca qisagein qa age ege qee qagagelein. <sup>10</sup> Ege waloc gen. Euqa ege gaid ceeloqona. Ege sawen bilom qa ege dana mati cehewanagaca madom. Ege cetehca qee bilom qa ege mele bahic ceteh cunugnu ihoc biluquna.

<sup>11</sup> O Korin age, ege je camasac maadoqona. Ege agenu nalunuga gehca moqona. <sup>12</sup> Ege agenu wawige qee gagimadolom. Euqa age egenu wawaga gagimdogina. <sup>13</sup> Eunu begawiel ija age maadigina. Age kobil mena odigeiga eu odiwe ege age kobil me odadom. Age egenu nalunige gehca meigale.

*Ege Anutna tempel gun biluquna*

<sup>14</sup> Age dana wawaga qee meleena eundecca ihol mimi ceteh sol jelegina eu Cain gahidowain. Ge, Anutna loo je toodoo cobocca loo je tefacdudu cobocca eu adi coboc osol? Odocob fulacdona bilecca tuna bilecca eu adi biley osol? <sup>15</sup> Odocob Kraisna culca Setenna culca eu adi cul osol? Odocob dana Kraisna waug meleenaca dana Kraisna waug qee meleenaca eu adi wawala osol bilesina? <sup>16</sup> Anutna tempelca kadan tibudna bahimca eu adi gabandosina? Ge, Anut cebac bilina uqana tempel eu ege! Anut uqa odi madena: "Ija age gemo bilimig cobigen.

Ija agena Anut biligen.

Odocob age ijana dana cajaca biluqagan," ena. (*Wok Pris 26.12; Jeremaia 32.38; Esekiel 37.27*)

<sup>17</sup> Odocob Tibud Gagadic Odocca uqaha madena:

"Eunu age haiden qisacadi beleiga.

Age filiganadec biluqagan.

Age ceteh gegehinca eundec oso Cain qududowain.

Age odi odocobil ija age ehadigen.

(*Aisaia 52.11; Esekiel 20.34, 41*)

<sup>18</sup> Ija memega biligen.

Odocob age ija melamiel atielca biluqagan," uqa odi madena.

(*2 Samjuel 7.14*)

## 7

<sup>1</sup> O ijana danah bahic, je hahun i Anut maden eu ege wele om. Eunu ege kobil gegehinca cunug ege dewenige dolonigeca euna nijia eu wasacudimeb Anut cumundudu uqanu qagu coboqale.

*Korin age tului falicdoin eunu Pol ceelen*

<sup>2</sup> Age egenu nalunige meigale. Ege dana oso calua qee mudolom. Ege dana oso odudocomun silail qee mel. Ege dana oso qaudumeb uqana ceteh qee qidauolom. <sup>3</sup> Ija je i age um aqecnu qee madelem. Ge, ija wele madem, ege agenu nalunuga moqona. Eunu ege ageca osoben gaid bileyqan. Eu odiha ege ageca osoben cal meqan. <sup>4</sup> Ija age je tutuc maadecnu ihoc dugina. Ija agenu culaina! Ija wawi me nijia. Culumen i ege ageca gemo calen qa odi fena, ija gehca ceeligna!

<sup>5</sup> Ege Masedonia hatuna calom euna ha ege qee jaen mudolom. Cudun euna culumen filfil egeca gaid calen. Dana age egeca fee dadanom. Odocob ege wawige cucuien.

<sup>6</sup> Euqa Anut, uqa dana dumanaq culen eu wahohogadena, uqa Taitas suldocob egeca hon. Uqa odon euna ege wahohoggen. <sup>7</sup> Anut uqa Taitas suldocob egeca hon euna dih qee wahohoggel. Age Taitas uqa wahohogtei ec magen euha wahohoggen. Uqa age ija fecitecnu hoolegina ec magen. Odimei uqa age waloc adena ec magen. Odimei uqa

age ijaca osoben wawige osol mi bilecnu geh cisdogina ec magen. Eunu ija qila gehca ceeligina.

<sup>8</sup> Ge, ijana jaqiadec eu odadeceb age wawaga me qee menfi ijaja jaqiademnu ija wawi qee me qee mel. Odocob ijana jaqiadec eu odadeceb wawaga me qee men ec fem, euqa age saen nag odi wawaga me qee men. Eunu ija jaqiademnu wawi me qee men. <sup>9</sup> Qilaqa ija ceeligina. Age wawaga me qee mennu qee ceeligina qa age wawaga tucieceb age agena kobilnu tului falicdoinnu ceeligina. Ge, age wawaga tucien eu Anut uqa odaden. Eunu egena je eu age nag odi me qee qee madel. <sup>10</sup> Wawaga tucieb Anut gale dona eu dana ege odigeceb tului falicdoqona. Odocob kobil ina Anut uqa cahahagena. Wawaga tucieb Anut gale dona eu wawige cain me qee meiaun. Euqa wawaga tucieb mahana dec eu uqana aig eu cal mec. <sup>11</sup> Age cisdu cuhadoiga. Wawaga tucieb Anut aden eu odadeceb age kobil me filfil odogina. Eu tuliadeceb age mahucmahuc agena je tutuc mudecnu odoin. Eu tuliadeceb age qee cahuldoloin eunu ihagcenu odoin. Age ceteh calennu gemanaga ben, odocob ceteh hibna caligiannu cucuiein. Eu tuliadeceb age ija fecitecnu hoolein. Eu tuliadeceb age ijanu je me madein, odocob age dana eu ijanu je me qee maden eu gesildoin. Age ceteh cunugna je i tutuc mudecnu odogina eu agena kobil eu odi camasac ihacena, age cahuldocca qee.

<sup>12</sup> Eu mele, wele ija jaqec je i jaqiadem. Euqa ija dana i uqa cahuldonnu cisumig qee jaqiadelem. Odocob ija dana oso eu dana i uqa me qee mudennu cisumig qee jaqiadelem. Ija alenu dih cisumig qee jaqiadelem. Agena kobil me camasac caligiannu gale tena. Odocob age egenu gehca nalunige megina ec Anut amegna age du cuhadoqagan eunu ija jaqec je i jaqiadem. <sup>13</sup> Odocob qila agena kobil i ege wahohogceeb wawige lal qu njija.

Odocob ege wawige lal qu njija eunu himec qee ceeloqona. Age cunug Taitas uqana jaen qoc eu odocobil qee men eunu waug ceelen. Eunu ege Taitasnu ha ceeloqona. <sup>14</sup> Wele ija agena kobil menu Taitas madudug Taitas amegna agenu culai madem. Odimig ijana je eunu majani qee tel. Euqa je cunug ege maadom eu mele. Eunu qila Taitas uqa dona, je i ege agenu culai madom ec uqa amegna madom eu mele. <sup>15</sup> Taitas uqa ageca hocob age filicitimeig cucuiein. Odocob age uqa ehudimeig uqana je cunug toodoo odoin. Uqa agena kobil i cisumeli agenu waug qon. <sup>16</sup> Odocob age kobil tutuc himec odogina ec wawi meleena. Eunu ija ceel bahic igina.

## 8

*Kristen cunug age Judia Kristen dana cajaca cesuladecnu meen qaig gabandoi*

<sup>1</sup> O cotigel, Anut uqa tamanec Masedonia hatuna bilegina eeladec uum adimei cesuladen ec docnu gale gena. <sup>2</sup> Culumen ben eu ageca caleceb age wawaga geh bahic temdon. Odocob age sawen bahic bileyin qa agena ceelec eu am bec ihoc len. Odocob age Anutna dana cajaca Judia hatuna bilegina eunu cisdumeig dana eu age cesuladecnu meen qaig gabandoi. <sup>3</sup> Ija camasac madigen, agedodoc agena gale adec toodumeig meen qaig i mein. Age ceteh adecnu ihoc eu age adein. Age i wooldumeig gehca haun adein. <sup>4</sup> Age ege cois adocomun age Anutna dana cajaca qagoc eu dana leih gami osoben cesuladi cabi oqagannu gehca ninigein. <sup>5</sup> Ege age meen qaig adoqagan ec casac cisdom qa agena odoc eu egene cisdoc wooldon. Age casac agedodoc Tibud utein. Odimeig age Anutna gale doc toodumeig age agedodoc egeha igein.

<sup>6</sup> Wele Taitas uqa meen qaig gabandochnu cabi tulidocob calen. Eunu ege uqa cabi i uqa Korin gemo sanan men eu qee mudigiannu cesusdocomun uqa ceseli ageca len. <sup>7</sup> Age ceteh cunug odi cuhadogina. Age Anutna wawaga gagadic meleena, odocob age wawaga meleecnu je eunu cabi gagadic ogina, odocob age doc silecca bahic, odocob age Anutna cabi ocnu nalug megina, odocob age egenu nalunige gehca megina. Odocob eunu age qila age uum adecnu kobil iha u cuhadogagannu cabi oigale.

<sup>8</sup> Ija age toodoo odocnu bahic loo je qee miadelem. Euqa Masedonia tamanec age meen qaig adecnu cabi me bahic oin eunu camasac maadem. Odimig Masedonia cabi oin euna ija Korin gesiladi figina, agena nalunuga mecnu kobil eu mele bahic ec figennu odigina. <sup>9</sup> Ge, egena Tibud Jisas Krais uum igec igen eu age dogina. Uqa cehewan ben tumutumca biloloi, euqa uqa agenu ceteh cunug cuculi sawen dana ibuldon. Eunu uqa sawen dana biley euna age cehewanagaca biley adigliannu odi odon.

<sup>10</sup> Qila ija meen qaig gabandochnu ijanu cisdoc maadigen. Age cabi gel osona wele cabi i sanan mein, odocob age cabi i qee muduqagannu gauc dih qee odoloin qa age qee muduqagannu bahic gale aden. Eunu age qila cabi i qee muduqagan eu me bahic.

<sup>11</sup> Aria, qila age gad odocobil qee meiale. Eu kobil me bahic. Age wele mahuc bahic cabi i oqagannu odoloig. Eunu age qila cabi i mahuc bahic qee mudoqagannu ha agena meen

qaig ihocna adecnu odoiga. <sup>12</sup> Ge, dana uqa ceteh adecnu bahic gale dufei Anut uqa kobil inu gale ben bahic dona. Euqa dana uqa cetehcä qee, uqa adecnu ihoc qee, Anut uqa dana eu qee gesildona.

<sup>13</sup> Ija dana leih age culumenga qee bibilegin qa Korin age culumenga bilegina ec qee madigina. <sup>14</sup> Euqa qila saen ina age cetehcä matica bilegina, odocob dana leih age cetehcä qee bilingina. Eunu age dana cetehcä qee eundec cetehcä leih adecebile ihocihoc biluqagan eu kobil tutuc. Odocob dana cetehcä qee eundec age hibna cetehcä matica biluqagan, odocob Korin age cetehcä qee biluqagan saen euna dana eundec age Korin cesuladecnu ihoc. Odocob kobil ina dana eundec age eu ageca ihocihoc biluqagan. <sup>15</sup> Eu odiwe Anutna jaqec je madena:

“Dana uqa sab geh cedi gabandon eu ugana hal gadac qee wooldol.

Odocob dana uqa sab geh qee cedi gabandon eu uqa sabnu qee gohic mel,” ena. (*Kisim Bek 16.18*)

*Pol uqa cabi hijagul age Korin meen qaig gabandocnu cesuladoqagannu suladen*

<sup>16</sup> Ege Anut hetaga doqona. Uqa Taitas tulidocob waug cajen. Odocob uqa ege cisoqonaw eodi cisdoma. Uqa age cesuladecnu bahic gale dona. <sup>17</sup> Ge, ija uqa Korin nuegan ec cesusdudu madocomin ageca ligian. Eu himec qee, ija qee madoc uqa ija Korin ono nuigennu gale ben bahic tena ec maden. Eunu uqa ugana gale doc toodumei ageca lecnu odona. <sup>18</sup> Ege uqaca wawige meleec cotige oso osoben sulaloqona. Cotige eu uqa tamanec cunugnana me je qasali maadecnu binanca. <sup>19</sup> Eu himec qee. Tamanec cunug age cotige i uqa ege gami cocobi meen qaig gabandocnu cabi i cesuligiannu nesili ehudein. Ege Tibud binan sulecnu cabi i oqona. Odocob ege cabi i ocnu gale ben gena eunu dana ihacadecnu cabi i oqona. <sup>20</sup> Ege bagol adec ben i tutuc cofdocnu odoqona eunu dana oso cetehcä inu je me qee madecnu qee gale geiaun. <sup>21</sup> Ge, ege kobil me eu odocnu cisoqonaw. Ege Tibud amegna dih qee odoqona qa ege dana amagana ha odoqona.

<sup>22</sup> Eunu ege wawige meleec cotige osoha aleca osoben suladoqona.\* Ege uqa saen matina temdom, odocob uqa cesuladecnu gagadic mena eu fom. Odocob qila uqa age cabi i oqagannu waug meleena eunu uqa cesuladecnu gagadic bahic mena.

<sup>23</sup> Taitasnu, uqa ija age cesuladecnu cabi hijani, uqa ijaca cabi owona. Wawige meleec cotigeil lecis i ale sulaloqona, eu ale tamanec agena sos. Odocob ale alena cabina Krais binan sulesina. <sup>24</sup> Eunu age dana i kobil me odadoqagan. Odocob tamanecna dana cajaca cunug age eu fimeig agena nalunuga mecnu kobil du cuhadoqagan. Odocob ege dana i age Korin agena nalunuga mecnu kobil eu me bahic ec culai maadom, odocob tamanecna dana cajaca cunug age je eu gauc qee euna foqagan.

## 9

*Korin age Anutna dana cajaca cesuladecnu bagol adec oso adoqagan*

<sup>1</sup> Bagol adec i ege Anutna dana cajaca qagoc cesuladecnu gabandom age eunu wele dogina. Odocob ija cetehcä inu je jaqiadecnu qee nijel. <sup>2</sup> Ge, age cesuladecnu gale adenau ija dugina. Odocob ija age binanaga susuli Masedonia amagana agenu culai maadem. Ija odi maadem, “Wele cabi gel osona tamanec Akaia hatuna bilingina eu age cabi i sanan mecnu wele saciadoin,” adem. Odocob Masedonia age Korin age cabi i ocnu gagadic megina ec dah mimeig age mati cabi i ocnu ha wawaga calen. <sup>3</sup> Euqa ija age cabi i ocnu wele saciadoin bilingina ec madem eu culaec je gauc caleiaunnu qee gale tena. Age cetehcä adecnu wele saciadoin bilingina eunu gale tena odi ija maademwe. Ija eunu cisdomig cotigeil i suladecemin ageca beloqagan. <sup>4</sup> Age cetehcä adecnu saciadoin bilingina eunu ege wawige meleena. Euqa Masedonia leih age ijaca osoben limeb age qee saciadoc ninjebil feciadowainnu cisduqina. Odocob ege agenai majanaga geiaun, odocob ageha osoben ege saciadocan ec madeinnu majanaga adeiaun. <sup>5</sup> Eunu ija cotigeil eu maadecemin aquni belimeig ageca caloqagan. Odimeig age bagol adec eu age adecnu wele madein eu casac saciadocnu cesuladoqagan eu odi nijia ec cisdom. Odimig ija ageca hocomin dana leih age, age bagol adecnu gale ben adigian eu foqagan. Odocob eu cetehcä agenadec ege didu ocwe qee.

<sup>6</sup> Age inu cisoiga. Dana oso ugana cabina sab cetehcä nag himec cehena eu uqa cetehcä wal meceb nag himec cedigian. Dana oso uqa meca cehena eu uqa meca cedigian. <sup>7</sup> Eu odiha, age abesabes wawaga cisdom toodoo loo adeiga. Age wawaga culumenga Cain, dewenega tiecna ha Cain odowain. Ge, oso waug ceelecca loo adena eu uqanu Anut gale dona. <sup>8</sup> Odocob uqa eeladec me gehca bahic üüm adecnu ihoc, odocob age cetehcä meca wooldu

\* **8:22:** Ege wawaga meleec cotola lecis Pol uqa Taitas gami suladen eu ijanala qee doqona.

biluqagan. Eunu age eeta odocnu ceteh cunugca odocnu ihoc. Odocob age cabi me cunug ocnu ihoc cesuldoqagan.<sup>9</sup> Eu odiwe Anutna jaqec je madena:

“Dana uqa ceteh matica uqa sawen dana loo adena eu uqana ititom kobil eu bieleceb catanena,” ena. (Buk Song 112.9)

<sup>10</sup> Anut uqa sab qaig cehecnu adena, odocob sab jecnu adena eu uqa age ceteh adeceeb ihoc ligian. Odocob ceteh eu wasimei geh bahic fulusdoqagan. Odocob age Anutna dana cajaca cesuladecnu ihoc biluqagan. Odocob agena ititom kobil eu bendudu wasigian eu odiwe dana uqa sab qaig cabina ceheceb hibna sab geh bahic wasena.<sup>11-12</sup> Cabi i age ogina eu Anutna dana cajaca cesuladigian. Eu himec qee, eu odadeceb Anutna dana cajaca qagoc age Anut hetaga ec geh bahic madoqagan. Eunu Anut uqa ceteh geh bahic adigian, odocob age cotogail leih ceteh geh bahic adeceu ihoc biluqagan. Odocob eguna cabina, agena bagol adec eunu dana cajaca age madi, ege Anut hegaga, doqona oqagan.<sup>13</sup> Cabi i age cotogail cesuladecnu ogina eu agena kobil me camasac mudiadigian. Cotogail age, agenu Anutna je toodoo cuhadogina ec doqagan. Odimeig agheda doqagan, age Kraisna me je eu mele oin, eunu age uqana me je toodoo odogina. Odocob cotogail age, age dana leihca Anutna dana cajaca cunug ceteh geh adeginanu fimeig age Anut binan suluqagan.<sup>14</sup> Cotogail age Anutna eeladec uum adec eu Korinca ihoc lec nijia ec doqagan. Odimeig age agenu gale ben adigian, age Anut uqa eeladecnu inondoqagan.<sup>15</sup> Bagol igec i Anut uqa igen eu ben bahic. Odocob ege cunug eunu je madecnu ihoc qee. Ege bagol igec inu Anut hegaga doqale.

## 10

*Pol uqa uhulec aposel age uqana cabi cilehdocnu odooin eunu je wadacduaden*

<sup>1</sup> Dana leih age ija odi um qiteginanu. Age madegina, “Pol uqa ege gami biluquna euna uqadodoc cogohi ege amigena cobona qa uqa onoca bilina saen euna uqa ege je gagadic magena,” egina. Euqa ija Pol, ija age Krais uqa jogoi lal qu cobimei uqa dana cajaca cunug waug jocosaigca odaden eunu cisdoqagannu gale tena. Odocob age je ija maadigina eunu cisdu cuhadoigale.\* <sup>2</sup> Ija niniadigina, ija ageca hugen saen euna ija je gagadic Cain maadigaun igina. Eu mele, ija dana leih i age ege mahanaadec kobil toodoqona egina eu age je gagadic cois maadigen.<sup>3</sup> Mele ege mahana biluquna, euqa ege dana mahanaadec cingwae han qee cadoqona.<sup>4</sup> Egena han cadecnu ceteh ege hewoqona eu mahanaadec qee, qa eu age Anutna gagadic odocca, age Anutna cad agena gel jelec gagadic eu wagalecnu ihoc.<sup>5</sup> Ege cisdoc filkuluhulec jeca dana age Anutna docnu odogina eundec agena jic cadawadiegina eu cilehadechnu odoqona. Ege dana agena cisdoc cunug gihaedocomun Kraisna je toodoqagannu odoqona.<sup>6</sup> Odocob ege Korinnu sumadoqona. Age eguna je cunug toodoo odocobilfi ege dana cunug je tefacdogina eundec ege ameg me qee wadacadecnu saciadc biluquna.

<sup>7</sup> Age ceteh amaganina nijia eundec fi cuhadoiga. Dana oso uqa Kraisna dana bahic ec uqadodoc cisdonafi uqa cisdu cuhadugian, odocob uqa dugian, egeha Kraisna dana biluquna.<sup>8</sup> Jisas Krais Tibud uqa age ege ebenigena maden. Uqa ege fadaladeqannu cabi qee igel qa uqa ege agena wawaga meleec gagadic mecnu cabi igen. Eunu ege cabi i oqona eunu ija ege binanige nag suliginifi ija eunu majani qee tena.<sup>9</sup> Euqa age Cain cisdownain, ija dana age cucuiecnu jaqiadigina.<sup>10</sup> Eu mele, dana leih age cilehtecnu ijanu je odi madegina, “Polna jaqec eu je gagadic mati bahic nijia qa uqadodoc ege cemenige humei je mageceb foqona, uqa gagadicca qee, odocob uqa je saluqi madec dana qee oqona,” egina.<sup>11</sup> Dana cunug age je eundec madegina eu age cisdu cuhadumeig odi doqagan, ege onoca biluquna saen euna eguna je jaqecnu kobil eu ege age gami bileqan saen euna eguna je madecnu kobil odiwe tutuc toodoqan.

*Pol uqa uhulec aposel age uqa agena gadac dunuh len ec madein eunu je wadacaden*

<sup>12</sup> Ege dana agedodoc binanaga sulegina eunu madecwe qee. Ege agena kobil agena kobilca gesilecnu ihoc qee. Dana eundec age agena kobil agedodoc agena gesili fec gadacna gesilegina. Dana eundec oso uqana kobil eu osoma kobilca caca mumudi gesilina. Dana age odi gesilegina eu age docca qee.<sup>13</sup> Euqa ege binanige sulec ohis gadac wooldumeb onoca Cain toqaun. Ege Anut uqa gadac gesilimei siwigen eu uqana gadac toodoqan. Odocob agena cabi Anut uqa siwigen uqana gadac eu Korin gemona lecnu ihoc.<sup>14</sup> Odocob Korin age ijana cabi Anut iten eu uqana gadac dunuh bileqina, eunu

\* **10:1:** Je eu dac 10-13na nijia eu je 2 Korin dac osoosona nijia cingwae qee. Dac 9na Pol uqa Korin agena kobilnu ceelen ec maden. Euqa dac 10na uqa je gagadic maaden. Gug eunu doc dana leih age je dac 10-13na nijia eu wele 2 Korin je jaqecna qee nijel, euqa eu je jaqec fil Pol uqa saen osoma jaqiaden euna nijia ec cisdogina. Odocob dana age hibna je jaqec eu 2 Korinna tubdoin ec cisdogina.

ija hahawan ageca humig Kraisna me je maadem saen euna ija gadac eu qee wooldolom.  
<sup>15</sup> Ege cabi leih dana leih oin eundec egene gadac wooldoc nijima eunu egedodoc binanige gee suluquna. Euqa ege cabi i Anut igen uqana gadac dunuh himec cabi oqona. Odocob ege agena wawaga meleec eu gagadic migiannu gale gena. Odocob egene cabi eu agena gemona ben bahic wasigian. <sup>16</sup> Odocob ege age hibilemegana maha leih me je ehi li qasali maadecnu odoqona. Odimeb ege cabi dana leih age wele oin euna qee beloqaun. Odimeb ege cabi dana leih age wele oin eunu binanige ocnu qee loquaun.<sup>†</sup>

<sup>17</sup> Euqa odiwe Anutna jaqcje madena:  
 "Dana oso uqadodocnu culai madecnu gale dona eu uqa Tibudnu culai madeiale," ena.  
*(Jeremaia 9.24)*

<sup>18</sup> Ge, dana uqa uqadodocnu binan sulina eu uqa Anut amegna binanca qee. Euqa Tibud uqa dana oso binan sulina eu uqa Anut amegna dana binanca.

## 11

### *Pol uqana kobol eu uhulec aposel agena kobol cinigwe qee*

<sup>1</sup> Age ija cultecebil ija nag odi cois gad je madigen eunu gale tena. Mele, age ija gad qiteceb culteigale! <sup>2</sup> Anut uqa age uqana dana cajaca dih bilegina eunu gale ben dona. Odocob ijaha Anutna gale docwe age Krais dih mele bahic toodoqagannu gale tena. Ija age Kraisna sihul caloqagannu nesili ehadem. Odocob ija Krais age utigennu gale tena eu odiwe ija mel aid haun cataniecca umig dana osol dih uqa mel aid eu ocobocobowasanu utigina. <sup>3</sup> Euqa ija agena cisdock eu me qee meceb age cataniec kobol odoc Kraisnu dih cisdocka culuwainnu cucuiigina eu odiwe man sononec Iw quadocob Anutna jic siho qon. <sup>4</sup> Eetanu cucuiigina? Age dana oso culdecebil humei Jisas fil osonu qasali maadena eu Jisas ege wele uqanu qasali madom eunu qee. Odocob age Kis fil ogina eu Kis Gun age wele oin eundec qee. Odocob age me je fil ogina eu me je age wele egenadec oin eundec qee. Odocob ija dugina, dana eundec age ageca humeig kobol i odogina saen euna age agena je dah mecnu dana eu saciadoc bilegina.

<sup>5</sup> Doiga, ija "aposel matu" eundec age bisalu qee biligina ec cisdockina. <sup>6</sup> Eu mele, ija je saluqi madecnu kobol qee duginafiqa ijana cisdock silecca eu qee gohic mena. Kobol cunug ege odoqonana ege saen cunugna doc i age ihacadi hedom.

<sup>7</sup> Ija Anutna me je qasal maadem saen euna ija ameg oso iteiga ec qee maadelem. Ija kobol euna ijadodoc jogoi lal qumig age ijanagaca madem. Ija meen qaig qee diduadecem eu cahuldomfo? <sup>8</sup> Ija age gemona cabi u bibiligin tamanec leih age ija fajitoloig. Ija Korin kobol ina cesuladecem, eunu tamanec leih kobol euna cesulaadig heje om igma. <sup>9</sup> Odocob ija age gami bibileb ija cetehnu gothic mem saen euna ija dana oso culumen qee utelem. Ge, cotiel Masedonia hatuna bilingina eu age ceteh cunug ija itecnu nijen eu cedi ahutein. Odocob ija isi hibna ceteh cunugnu culumen nag oso qee adigaun eu odiwe ija wele culumen qee adelem. <sup>10</sup> Krais uqa je mele gaid maden eunu ijaha je mele gaid madigina. Eunu dana oso age Akaa hatuna anaana bilingina eu age ija kobol i odiginanu culai madecnu cahactecnu ihoc qee. <sup>11</sup> Eetanu ija odi culai madigina? Ija agenu nalunuga qee miginafo? Qee! Anut uqa dona, ija agenu nalunuga migina.

<sup>12</sup> Ija qila odigina eu odiodi odigen. Aposel fil eundec age agedodoc binanaga sulecnu walegina, odimeig age agena cabi oginana age egeca osol mecnu dana amagana caloqagannu odigina, ija eunu cadawadigen. <sup>13</sup> Dana eundec age uhulec aposel, age cabi dana gaeuc. Age agena cabinu uhulegina, odimeig agena kobol falicdumeig dewenega dih age Kraisna aposel cinigwe calegina. <sup>14</sup> Cois age agena kobolnu Cain filicituwain! Setenha uqa uqana kobol falicdumei deweg dih ensel fulacdoccia cinigwe calenanu. <sup>15</sup> Eunu Seten uqana cabi danaha agena kobol falicdumeig dana amagana age ititom kobolna cabi dana calecebifli ege eunu geh Cain filicituqaun. Hibna agena cabinu ameg ihoc oqagan.

### *Pol uqa aposel cabi ona saen euna culumen geh gahidon*

<sup>16</sup> Ija casac madigawe eu odi haun madigen, dana oso uqa ija gad ec Cain cisoiaun. Euqa age je i dumeig ija gad ec cisdockabilu eu cois odi fena, age ija gad ec cois cisoqagan. Eunu age ija cois cultecebil ijaha nag odi binani suligen. <sup>17</sup> Ija qila je madigina eu Tibud ija madecnu cois ec qee madel. Euqa ija binani sulecnu je euna ija dana gadwe je madigina igma. <sup>18</sup> Dana mati age mahanadee kobol toodoo odigina eunu gaid culai madegina. Eunu ijaha eu odi culai binani sulecnu odigen.

<sup>19-20</sup> Dana oso uqa age diadeceb uqana bega meh cabi dana caleginafi, odimei uqa agena ceteh cunug qee mudiadenafi, odimei uqana uhulecna age heje cedadenafi, odimei uqa

<sup>†</sup> **10:16:** Je i "age hibilemegana maha leih" Pol uqa cudun eu Korin ono cam toni noc isecna nijen eunu maden eu odi fena. Cudun eu taun ben Romca, hatu onoca bahic Spenca. Age Aposel 19.21ca, Rom 15.24-28ca feiga.

dana benwe cofadenafi, odimei uqa age sihomoga qahenafi age eunu culdecebil odona. Eunu age dana doc silecca bahic! Age dana gad culadecel age uhulec je maadegina!<sup>21</sup> Kobol i uhulec aposel odogina eu ege odocnu gagadic ihoc qee. Eunu ija majani teten je i maadigina!

Euqa ija qila dana gadwe je madigina, dana oso uqana kobolnu gagadic mimei uqadodoc binan sulinafi ijaha gagadic mimig ijadodoc binani suligen.<sup>22</sup> Dana eundec age Hibrú danafo? Eufi ijaha Hibrudec. Age Isrel danafo? Eufi ijaha Isreldec. Age Ebrahim sihulfo? Eufi ijaha Ebrahim sihul.<sup>23</sup> Age Kraisna cabi danafo? Euqa ija Kraisna cabi age cunug wooladec cabi om. Qila ija dana gad jewe bahic madigina. Ijana cabi gagadic odocna wooladem. Ija age wooladec bahic gihadco jona bilem. Dana age ija geh bahic qisatein euna ija wooladem. Ija saen mati bahic cal mec dodolten.<sup>24</sup> Juda age ija fal hojugna deel abesabes qisati 39 39 tein, eu odi qisatein eu deel 5-pela cunug.\*<sup>25</sup> Rom age ija sihna qisati cijedtein. Odocob saen osona ija meen jaug ji osoldom. Ija macasna cobolig saen euna wag fadali cijeddon. Witic osol cahineg osolca macasna cacasawi cobom.<sup>26</sup> Deel mati bahic ija jic qiqihcana cobolig. Wa letecna fadalec dodolten, heje dana ebenegana gihactec bilem, Juda gemoca Juda dana qee eundec gemoca jobonjobon cocobigin ha qitec dodolten, wadaunaca macasnaca fadalec dodolten, cotiel wawige meleec uhulec gemo jaigel qitec dodolten.<sup>27</sup> Ija cabi culumen bahic filfil gahidolig. Ija witic mati cebac bilolig. Ija wenca wa gabca toli saen mati sabca qeeca bilolig. Ija duan teten lotoc tacecnu ihoc qee bilolig.<sup>28</sup> Eu odi dih qee. Deel cunugna culumen mati qila haun cilehtegina. Eu odi, ijaha deel gaid tamanec cunug moot madecna hohom lelemca ninijen biligina.<sup>29</sup> Kristen dana oso uen culecebf ijava ueni culina eu odi tebandugina. Oso uqa Kristen dana odudeceb silailna toni qona ija eunu gemani bec ja cijecwe odi oditina.

<sup>30</sup> Jic osoca qeenu ijadodoc binani suligennufi ija gagadic odocca qeenu camasac culai madigen. <sup>31</sup> Anut uqa Jisas Tibud Memeg ege binan sulocomun catanena eu uqa ija qee uhuligina ec dona. <sup>32</sup> Ija Damaskas ono bilem saen euna taun cofadec dana, uqa King Aretas bisalu biled eu, uqa dana leih Damaskas jic cebec cofdoqagannu maden. Uqa ija gihadco jona mitigiannu odon.<sup>33</sup> Euqa cotiel wawige meleec leih age ija ehitimeig gel ohis isec cebec nag osona mitecebil lecemin ija galelna tacitimeig halu hehwegin maha gemo tonem. Euna ija king eben cuculi busalem.

## 12

### *Anut uqa bebelecna Pol ceteh mati ihacd*

<sup>1</sup> Ija jic osoca qee. Ija ijadodoc binani sulecnu bahic suligen. Mele, kobol i ege ageca cesulgecnu ihoc qee. Euqa odi fena, ija bebelec leihca je jahunec leihca Tibud uqa camasac miten eunu madigen.<sup>2</sup> Ija dana Kraisca gabandoc osonu dugina,\* uqa wele cabi gel 14na Anut ehudeceb sao jobon cijeddocna ten. Dana eu uqa deweg cunug ohis tenfo, qee uqa bebelecna ohis tenfo eunu ija qee dugina. Euqa Anut uqa dona.<sup>3</sup> Dana eu Anut uqa ehudeceb paradaisna ten eunu ija dugina. Uqa deweg cunug ohis tenfo, qee uqa bebelecna ohis tenfo eunu ija qee dugina. Euqa Anut uqa dona.<sup>4</sup> Odocob ono uqa je dana madecwe qee eu dah men, uqa ceteh dana saadecwe qee eu dah men.<sup>5</sup> Ija dana i binan suligen qa ija ijadodocnu binani qee suligaun. Ija gagadic odocca qee ec madigen. Ija eunu himec binani suligen.

<sup>6</sup> Euqa ija je mele madigina eunu ijadodoc binani sulecnu gale tecebf ija dana gad qee. Euqa ija binani sulecnu qee gale tel. Eunu dana oso uqa ijanu eu ija dana me bahic ec qee cisdioiaun. Uqa kobol ija odomca je ija maadecemin dah menca eunu dih uqa ijanu tutuc cisdugian.

### *Ceteh eu tuitu cinigwe Pol dewegna qona*

<sup>7</sup> Je i Anut uqa camasac ihacten eu ceteh ben bahic ijadodoc binani gehca sulecnu cahabectnu Anut uqa ija ceteh oso tuitu cinigwe ija deweni quigiannu iten. Tuitu eu Setenna sos eu ija qitigiannu iten. Eu ija hunutigiannu, ijadodoc binani gehca qee suligaunnu iten.<sup>8</sup> Ija Tibud ceteh inu uqa eu u qeligiannu ninidu cijeddom.<sup>9</sup> Euqa Tibud uqa je wadacdti maten, “Ijana gagadic odoc eu dana uqa gagadicca qee euna gagadicca bahic caligian. Eunu ijana eelhec uum ihec eu cesulhecnu ihoc,” ten. Ija gagadicca qee ec eu haun culai madigennu gale bahic tena. Eunu Kraisna gagadic odoc eu ijaca biligian.<sup>10</sup> Eunu Kraisna cabi inu ija gagadicca qee, odocob dana age ijanu je

\* **11:24:** Je eu Loo 25.1-3na nijia eu odi maden, “Isrel age dana osonu nun je madimeig qisadocobilf age qisadu 40 dih doiga,” en. Euqa Isrel age saniji cahuldumeig 40 gadac tefadcowainnu age dana oso qisadogina saenna age qisadu 39 himec doloiq. \* **12:2:** Pol uqadodocnu madena. Age but 7 feiga.

me qee madegina, odocob ija cabi giagi mudigina, odocob dana age jabiti tooototegina, odocob ija culumen ben bahic gahidugina. Ge, ija gagadicca qee biligina saen euna ija gagadicca.

*Pol uqa Korin agena wawaga meleec gagadic migiannu gale don*

<sup>11</sup> Ija dana gadwe odigina qa age oditecebil odigina. Ge, age ija binani suloubmi eu kobol tutuc. Euqa age eu odi qee odoloin. Mele, ija ceteh gauc himec qa ija agena aposel meca eundec agena bisalu qee biligina. <sup>12</sup> Ija age gemona bilem saen euna ija aposel bahic ec ihacadecnu ceteh mati odom. Ija lalafaadig gaga filfilca, kobolkobol odoc filfilca, gagadic odoc filfilca amagana odom. <sup>13</sup> Ija kobol age odadem eu odiwe tamanec leilha kobol odadem. Ceteh osol dih ija age qee odadelem. Ija age cesultecnu agena ceteh oso qee didolom. Ija cahuldoc ec cis dugina! Age ijana cahuldoc eunu dahiniga celeiale!

<sup>14</sup> Qila i ija hu age feciadi cijeddugennu saciadugina. Odimig ija agena ceteh qee diduadigaun. Dah meiga. Ija agenadec ceteh oso ocnu qee gale tel. Ija age cedadigennu himec gale tena. Age dogina, mel sim age anagail memegailca ceteh hauduadecnu cabi qee ogina. Anagail memegailca age ceteh mel sim cesuladecnu hauduadegina. <sup>15</sup> Ija ijana ceteh cunug age culiadeccu ceeligina, odocob ijadodocha deweni cisdocco culimig age cesuladigennu ceeligina. Ija agenu nalunuga gehca migina eunu age ijanu naluni nag himec moqaganfo?

<sup>16</sup> Euqa leih age ijanu je odi madegina, "Eu mele, uqa eguna ceteh camasac qee ol qa uqa ege fanningimei uhulek kobolna uqa ege medemige qahimeei euna odi digi cawalgina," egina. <sup>17</sup> Ija adi faninadem? Ija wele dana leih suladecemin agecalein eu oso ebenegana ija uhuladimig agena ceteh oso didomo? <sup>18</sup> Ija Taitas ageca ligiannu gehca madom. Odimig ija wawige meleec coti oso uqaca suldom. Taitas uqa uhuladimei agena ceteh oso didu on ec madeginafo? Ija uqaca Kis osol ina dih gagadic qee cobolohfo? Ele jic coboc osolna dih qee cobolohfo?

<sup>19</sup> Ija odi cis dugina, age je i cunug jaqiadiga eu sanijimeig cisoqagan, age amagana eguna je tutuc mudecnu jaqoqona ec cisoqagan. Euqa qeenacin! Ege dana Kraisca gabandoc biluquna, odocob ege je i Anut amegna jaqoqona. Odimeb ija ijana danah bahicca ege je i cunug age wawaga meleec gagadic mudecnu jaqoqona. <sup>20</sup> Ge, ija ono ageca calimig feciadigen saen euna age qila bilingina odi biluqagannu gale tena eu age fil bahic biluwain eunu cucuiigina. Odocob age ija facituqagan eu ija qila biligina odi biligennu calecnu gale adena ija fil bahic biligaun eunu cucuiigina. Odocob ija ageca calimig ija jena fee dadaneca, cotigcotignu waug me qee mecca, gemanaga becca, ija didih ecca, osonu je me qee madecca, hibiloh je me qee madecca, deboecca, ihulahalca kobol eundec figaunnu cucuiigina. <sup>21</sup> Ija ageca haun lecemin ijana Anut age amagana mahana hewiteceb tonigaun. Odocob ija dana cajaca mati wele silail mein eunu qajigaun. Age kobol gegehinka, cajaca silail mecca, wal kobol majagca qeeca silail mein eunu wawaga qee tului falicdoloin. Ija eunu cucuiigina.

## 13

*Pol uqa Korin age wawaga meleec cofdu cuhadoqagannu inondon*

<sup>1</sup> Qila ija ageca li feciadi cijeddugen odigina. Anutna jaqec je odi madena:  
"Dana lecisfo, cijedfo age dana oso cahuldocob fein eunu je osol madecebifl, cois ege je tutuc mudeqan," ena. (Loo 19.15)

<sup>2</sup> Ija ageca hu feciadi lecisdom saen euna ija dana age wele silail meinca dana cunugha eu je ulauladem. Odocob ija wele ageca hu feciadi lecisdom saen euna ulaulademwe ija qila ageca qee bilec odi haun ulauladigina. Ija ageca hugen euna ija dana silail megina eundec gauc qee culadigaun qa ulauladigen. <sup>3</sup> Age Krais uqa ija conina je madena ec mele oginafa, qeefo? eunu gale adena. Aria, ija kobol i odigenna age doqagan. Doiga. Krais uqa agena kobol tutuc mudecnu deweg qee lasdona. Uqa uqana gagadic odoc age gemona ihacadigian. <sup>4</sup> Mele, wele uqa lasdocco euna age na babalecna tuitu qocobil cal men. Euqa qila uqa Anutna gagadic odocna cebac bilina. Ge, ege uqaca gabandocna egeha lasdocco qa ege gagadic i age gemona ihacadecnu ege Anutna gagadic odocna Kraisca gabandu cebac bileqan.

<sup>5</sup> Age agena wawaga meleec eu hewginafo, qeefo ec foqagannu agedodoc temdu cuhadoigale. Agedodoc gesili feiga. Jisas Krais uqa age dunuh bilina eunu qee doginafo? Uqa ageca qee bilecebfi age temadec euna toni aqena. <sup>6</sup> Age ege Kraisna cabi oqona eunu doqagannu gale tena. Odocob age ege temgec euna qee toni qigel eunu doqagan. <sup>7</sup> Age cahuldoc oso qee odowainnu ege Anut inondoqona. Age ege aposel bahic ec foqagannu qee cisoqona. Qeefo. Age ege aposel qee ec cisoqaganfi eu odi fena. Euqa age kobol tutuc odoqagannu eu himec gale gena. <sup>8</sup> Ege mele je cilehdocku ceteh oso odocnu ihoc qee.

Ege mele je cesuldocnu himec cabi ocnu ihoc odoqona. <sup>9</sup> Ege lasdocca qa age gagadicca eunu ege ceeleoqona. Odimeb ege agena wawaga meleec eu haun gagadic tawigiannu Anut inondoqona. <sup>10</sup> Tibud uqa ija uqana cabi cofdocnu miten, odimei uqa ija cabi i ihoc ugennu gagadic odoc iten. Ija agena wawaga meleec gagadic mudecnu Tibud uqa cabi i iten. Ija age fadaladecnu uqa cabi i qee itel. Eunu ija ageca humig ija agena kobol tutuc mudecnu je gagadic qee maadigaunnu qila ija onoca bibilic je i jaqiadigina.

*Pol odio ec maden*

<sup>11</sup> O cotiel, ceeleigale! Age cabi ooig kobol tutuc bahic odoigale. Age ijana je dah meiga. Age cisdoc osol dih hewimeig wawaga malolca bileigale. Odocob Anut nalunuga mecca malol bilecca uqa ageca biligian.

<sup>12</sup> Age Anutna qagoc dana cajaca age osolosol cunug cotogail cotec gunna cotocabdoco beigale. <sup>13</sup> Anutna dana cajaca cunug age feele adec sulduadegina.

<sup>14</sup> Egena Tibud Jisas Kraisna eelgec uum igecca, Anutnu nalunuga mecca, eu ageca cunug hu biliale. Odocob Kis Gun uqa ageca osoben bileigale.

## Pol Uqa Jaqec Je Oso Galesia Tamanec Jaqiaden Aqunec Je

Casac Jisasna malogom eu Juda himec. Euqa hibna Jisas uqana aposel Pol suldocob uqa Juda dana qee eundec me je qasali maaden. Odocob dana cajaca i age Jisasnu wawaga meleen. Euqa saen euna culumen oso calen. Wele dana cajaca i age Juda qee, eunu age Mosesna loo je qee toodoloig. Eu Juda himec Mosesna loo je toodoloig. Euqa Juda dana caja qee eundec age Kristen calein saenna Kristen Juda leih age dana caja eu Mosesna loo je toodogagan eunu cisdoin.

Eunu Kristen Juda leih age Kristen Juda dana qee eundec dewenega cagu qocnu madein. Odimeig Kristen Juda dana qee eundec age Mosesna loo je cunug toodocnu madein. Euqa Pol uqa qee ec madena. Uqa madena, "Ege doqona, Anut uqa dana oso uqa Mosesna loo je toodu odonanu uqa dana ititom ec qee madena qa uqa dana oso uqa Jisas Kraisnu waug meleenanu eu himec uqa dana ititom ec madena," ena. (Age 2.16 feiga.) Eunu Kristen eguna odoc eunu ege Anut amegna ititom qee tawoqona, eguna wawige meleec eunu himec ege Anut amegna ititom tawoqona. Ege Jisasnu wawige meleec ebeb cebac bilec haun oqona. (Age 2.20 feiga.) Pol uqa odi madena.

Aria, Kristen Juda leih age Galesia hatu ono belimeig Kristen cunug age Mosesna loo je cunug toodocnu odadoqaga odoin eu odi fena. Odocobil Pol uqa ceteh i calennu je dumei uqa Galesia agena wawaga meleecca, agena Kristen kobilca tutuc mudecnu jaqec je i jaqiadi sulduaden.

Pol uqa casac Anut uqadodoc odudeceb uqa aposel calen ec madena. (Eu 1.11-24 feiga.) Euqa uqa aposel Jerusalem bileyina agena gale adec qee toodol. (Eu dac 2 feiga.) Anut uqa Pol utadumei uqana aposel cabi uteceb uqa Juda dana qee eundec Kraisnu me je qasali maaden. Odimei dana caja cunug age Jisas Kraisnu wawaga meleec euna himec age Anut amegna dana caja ititom tawegina ec madena. Cit qoc jena (eu dac 4-6) Pol uqa odi madena. Krais uqa ege Kristen dana odigeceb ege qila besigec biluquna. Odimei Kis Gun uqa eguna coboc dado migeceb ege kobil me bahic dana cunug odadoqona ec madena.

### *Je Dunuhnu Dado Mec*

1. Aqunec je (1.1-9)
  - A. Feele adec je (1.1-5)
  - B. Me je osol dih bilia (1.6-9)
2. Pol uqa aposel bahic, odimei uqana me je madec eu Anutna bahic (1.10-2.21)
  - A. Jisas Krais uqa Pol guludocob aposel calen (1.10-12)
  - B. Pol uqana me je Jerusalem aposelca Kristen dana osoca eunadec qee ol (1.12-2.21)
    1. Uqa Kristen casac calen euna uqa aposel aquni calein eu age sisiladecnu Jerusalem ono qee tel eunu (1.13-17)
    2. Cabi gel cijed hedocob uqa Pita Jemsca gauc fecialecnu Jerusalem ono ten eunu (1.18-24)
    3. Cabi gel 14 hedocob uqa haun Jerusalem timei aposel leih ono bileyina uqana me je jahuni sildiadene eunu (2.1-10)
    4. Pol uqa Antiokna Pitana cahuldoc eunu ulauldon eunu (2.11-21)
  3. Wawige meleecca besigec bileyina mele (dac 3-4)
    - A. Galesia age adi me je oin (3.1-5)
    - B. Ebrahamna coboc (3.6-9)
    - C. Dana cajaca age ititom coboc ocnu loo je toodu odogina eu age Anutna geladec bisalu bileyina (3.10-14)
  - D. Anutna loo je eu Anutna muguh mecnu je hahun ititadocwe qee (3.15-18)
  - E. Eetanu loo je calen (3.19-25)
  - F. Ege begabeg meh qee, ege Anut melahul (3.26-4.11)
  - G. Pol uqa Galesia age loo je toodocnu kobil culimeig Kraisna besiadec biley loqagannu niniadena (4.12-20)
  - H. Hega Seraca alena dodo eu galolo je cinigwe (4.21-31)
4. Wawige meleecca besigec bileyina adi odeqan (5.1-6.10)
  - A. Ege gaid besigec biluqale (5.1-12)
  - B. Ege dewenige gale doc toodu cain odoqaun, ege Kisna dado migecka jic coboqale (5.13-26)
  - C. Kristen ege cesuldocobdocoboqale (6.1-10)

### 5. Cit qoc je (6.11-18)

<sup>1</sup> Ija Pol, ija aposel. Dana age ija qee sultlein, odocob dana oso ija utatimei aposel qee mitel. Euqa Jisas Kraisca Memige Anut uqa Jisas Krais cal mecnadec tulidocob cajen uqaca utatimesi aposel mitesin. <sup>2</sup> Ijaca wawige meleec cotiel age cunug ijaca gabangi biluquanca ege tamanec age Galesia hatuna bilegina ageca feele ec sulduadocqona.

<sup>3</sup> Memige Anutca Jisas Krais Tibudca alena uum igecca malol bilecca adesiale. <sup>4</sup> Jisas Krais uqa Memige Anutna cisdock toodon. Odime iqa qisol mec saen i qila bilina ege saen ina uqana gagadic odoconadec besigecnu eguna silailnu uqadodoc deweg ihandumei cal men. <sup>5</sup> Eunu ege Memige Anut binan gaid sulocomun cataneiale! Mele.

#### *Me je osol dih bilia*

<sup>6</sup> Ija age kobil i odogina eunu filicitigina! Krais uqa eeladec uum aden. Odimei Anut uqa Kraisna eeladec uum adecna age uqana dana cajaca biluqagannu utaaden. Euqa age mahucwe utaadec eu culdimeig me je fil oso toodogina. <sup>7</sup> Ija me je fil oso ec madigina qa me je fil oso qee bille. Euqa dana leih age Galesia agena wawaga ihulahaldumeig Kraisna me je ilag falicdogina eunu ija odi madigina. <sup>8</sup> Euqa egefo, saonadec ensel osofo age me je fil oso maadoqagan eu me je ege wele maadom cinigwe qeefi dana eu odi madena eu uqa ja benna fadaligian. <sup>9</sup> Ege i wele maadom odi qila ija haun maadigina, dana oso uqa me je fil oso maadena eu me je ege wele maadocomun oin cinigwe qeefi dana eu odi madena eu uqa ja benna fadaligian.

<sup>10</sup> Age adi cisdogina? Je i qila ija madigina eu dana age ijanu wawaga me nijigiannu odi odigina ec cisdoginafo? Qee bahic! Ija Anut uqa ijanu waug me nijigiannu gale tena. Ija dana age ijanu wawaga me nijigiannu ija qila odi odiginafi ija Kraisna cewel utoc dana qee biloum.

#### *Pol adina isec aposel calen*

<sup>11</sup> O wawige meleec cotiel, ija je oso maadecemin doqagan. Me je ija qasali maadigina eu dana oso odocob qee calel. <sup>12</sup> Ija dana osonadec qee olom, dana oso eu ija qee iwaltei. Euqa Jisas Krais uqa ija ihacteceb camasac fogo ten.

<sup>13</sup> Ge, age ija wele cobolig ec maadecebile doin. Saen euna ija Juda agena kobol toodolig. Ija Anutna tamanec qagaadecnu jabab tootooadolig, ija fadaladecnu cabi olig. <sup>14</sup> Ija Juda agena kobol bahic toodu odom. Odocob ija Juda cotiel dana haunhaun mati ijaca cabi gel am osol ija age gemona cabi om eu cunug ija wooladem. Ija Juda jajaniel agena kobol cunug toodocnu gagadic bahic megamieg mem eunu.

<sup>15</sup> Euqa Anut uqa au ija qee basitec saen euna uqa eeltec uum itimei nesili ehiten, odocob uqa cewel utocni utaten. Odocob ija calecemin Anut uqa uqana cisdocnu <sup>16</sup> uqa Melah ihacteceb fogo ten, ija Juda dana qee eundec Anut Melahnu me je qasali maadecnu. Saen euna ija eeta odigennu dana leih qee sisiladelem. <sup>17</sup> Odocob ija Jerusalem ono timig dana age aposel aquni calein eu age sisiladecnu qee nuelem. Euqa ija Arebia hatuna nuem. Odocob hibna ija ceseli Damaskas taunna nuem. <sup>18</sup> Odocob hibna cabi gel cijed hedocob ija Pitaca je madewan bili Jerusalem ono tem. Odocob ija uqaca deel 15 biloh. <sup>19</sup> Saen euna ija aposel dana leih qee feciadelem. Ija Jems uqa Tibud waliag eu dih fem. <sup>20</sup> Ija je i qila jaqidigina ija Anut amegna je mele maadigina, ija qee uhuladigina.

<sup>21</sup> Eu hedocob ija Siriaca Silisiaca hatunana nuem. <sup>22</sup> Saen euna Kraisna tamanec age Juda hatuna bilein eu age ija olani qee fec bilein. <sup>23</sup> Age je i edi dih maadecebile dah mein, "Dana i uqa wele ege wawige meleec dana cajaca jabig tootoogoloi, wawaga meleec uqa fadalecnu cabi oloiu eu qila uqa wawaga meleec eunu me je qasali mamadiena," ein. <sup>24</sup> Odocob age Anut uqa ija odi oditennu dah mimeig Anut binan sulein.

## 2

#### *Pol aposelca wawaga osol bilein*

<sup>1</sup> Odocob cabi gel 14 hedocob ija Taitas ehudimig ija Banabasca ele Jerusalem ono ceseli toh. <sup>2</sup> Anut uqa uqana camasac mecna ija Jerusalem ono tigen ec ihactennu tem. Ija ono wawige meleec cotigeil agena cofadec, age ijanagaca egina, eu ageca jahuni cegulimeb ija me je Juda dana qee eundec qasali maadigina eunu sildiadem. Ija cabi wele omca cabi qila uginaca eu gauc fadaleiaun ec cisdom eunu odi odom. <sup>3</sup> Taitas uqa ijaca biloh uqa Juda dana qee. Euqa cegulec eu age uqa deweg cagu qocnu ec qee madelein. <sup>4</sup> Eu mele qa leih age uqa deweg cagu qocnu ec madein. Dana eundec age uhulec wawige meleec cotigeil jahuni agena cegulec dunuh hoin. Ege Jisas Kraisca gabangec biluquana ege Juda agena loo jenu gihadoc jona qee biluquana eunu age cijawi coboc danawe dunuh humeig fecigein. Age Juda agena loo jenu gihadoc jona migechnu gale aden. <sup>5</sup> Euqa ege age Taitas

deweg cagu qoqagannu je cois ec qee maadolom. Ege agena je nag odi qee toodolom. Me jena mele je eu age Galesianu tutuc tawigiannu odi odom.

<sup>6</sup> Cofadec eu age ijanagaca egina eu age wawige meleec cotigeil cofadein. Eetanu ija age ijanagaca egina ec madigina? Age ijanagacafo, qeefo ija eunu qee cisdolom. Anut ugaha dana age ijanagacafo, qeefo ec qee cisdona. Uqa dana cunug gug osolna ihocihoc odadene. Aria, cofadec age ijanagaca eginanu madigina eu age ijana je haun oso qee tubdolo. <sup>7</sup> Euqa age Anut uqa ija Juda dana qee eundec me je qasali maadecnu cabi ebenina men eu fein. Eu odiwe Anut uqa Pita Juda dana eundec me je qasali maadecnu cabi ebenna men. <sup>8</sup> Ge, Anut uqa Pita odudeceb uqa Juda dana agenu aposel calen. Eu odiwe Anut uqa oditeceb ija Juda dana qee eundec agenu aposel calen. <sup>9</sup> Odocob Jemsca, Pitaca, Jonca, age tamanecna cofadec ijanagaca egina, age Anut uqa eeltec uum itimei cabi iiten eu fimeig age ija Banabasca sekan milein, ege cabi hihi jagwe. Ege ija Banabasca Juda dana qee eundec gemona cabi owannu ec je cagom. Odocob age Juda dana gemona cabi oqagannu ec je cagoin. <sup>10</sup> Age je osol dih madi, age sawen dana age eguna tamanecna bilegina eunu cisdu cuhadoqagan, ein. Ceteh i dih ija eu odocnu megameg mem.

### *Pol uqa Pitana cahuldoc eunu ulauldon*

<sup>11</sup> Euqa Pita uqa Antiok ene hocob uqa cahuldon eu camasac bahic. Eunu ija dana cajaca amemeg ulauldom.

<sup>12</sup> Ge, wele Jems uqa dana leih suladeceb ono belein. Age qee calec ninijen Pita uqa Juda dana qee eundec gami osoben sab joloig. Euqa dana i age caleceb uqa qee sasac qu ceselimei uqa Juda dana qee eundec gami osoben sab qee jel. Eetanu uqa uhulec kobol i odon? Uqa dana age wawaga meleec Juda dana qee eundec dewenega cagu qocnu madegina eunu cucuiaden. <sup>13</sup> Odocob wawaga meleec Juda dana leihha age ugaca osoben qee sasac qu uhulec kobol i odoin. Odocob hibna agena uhulec kobol i Banabas cel qudob uqaha tooaden. <sup>14</sup> Euqa ija age me je ugana mele jena jic tutuc qee cobocobil feciadimig ija age cunug amemeg Pita madom, "Hina Juda dana qa hina wele Juda dana qee eundec bileginawe bilog, hina Juda dana bileginawe qee bilelem. Hina adi Juda dana qee eundec gagadic madecem Juda dana cinigwe biluqagan?" odi madom.

### *Anut uqa Juda danaca Juda dana qee eundecca gami wawaga meleecna cahahaadena*

<sup>15</sup> Eu mele, ege Juda ege Juda sihulnadec cali hom. Ege Juda dana qee eundec age silail dana egina euna qee cali holom. <sup>16</sup> Euqa ege doqona, Anut uqa dana oso uqa Mosesna loo je toodu odonanu uqa dana ititom ec qee madena qa uqa dana oso uqa Jisas Kraisnu waug meleenenanu eu himec uqa dana ititom ec madena. Odocob Anut uqa ege Kraisnu wawige meleennu ege dana ititom ec madiglianni egeha Krais Jisasnu wawige meleen. Odocob Anut uqa dana oso uqa Mosesna loo je toodu odonanu uqa dana ititom ec qee madel. Eunu Anut uqa ege dana ititom ec madiglianni ege Mosesna loo je qee toodu odolom. <sup>17</sup> Euqa ege Kraisca gabangec biluquna euna Anut ege dana ititom ec magecnu odoqonafi, odocob Mosesna loo je madi, ege silail dana gena, eunu Krais uqa silailna cabi danafo? Qee bahic! Uqa silailna cabi dana qee. <sup>18</sup> Ija Mosesna loo je toodu odoc kobol wele wagalem eu haun cehecnu sanan mifig ija ijadodoc loo je tefadoc dana ihacadigina.\* <sup>19</sup> Ge, ija loo jenu cal mem. Ija Anutnu cebac biligennu loo je ugadodoc ija qiteceb cal mem. Ija Kraisca wele na babalecna tuitu qilimeig caqusecebil caculimei cal men eu fecwe fein eunu maadem. <sup>20</sup> Ija je oso himec sisiladigen. Age Mosesna loo jena cabi ocna Kis oirfo, qee age me je dah mimeig wawaga meleenna Kis oirfo? <sup>3</sup> Age adi gad bahic aqena! Age Kiswa sanan mein qilaqa age dewenega gagadic odocna qee moqaganfo? <sup>4</sup> Culumen sogoe wele

## 3

### *Mosesna loo je toodu odoc kobolca wawaga meleec kobolca*

<sup>1</sup> O Galesia age gad! In uqa humaladeceb age qila gad megina? Ija age amagana age Jisas Krais na babalecna tuitu qumeig caqusecebil caculimei cal men eu fecwe fein eunu maadem. <sup>2</sup> Ija je oso himec sisiladigen. Age Mosesna loo jena cabi ocna Kis oirfo, qee age me je dah mimeig wawaga meleenna Kis oirfo? <sup>3</sup> Age adi gad bahic aqena! Age Kiswa sanan mein qilaqa age dewenega gagadic odocna qee moqaganfo? <sup>4</sup> Culumen sogoe wele

\* <sup>2:18:</sup> Grik je i ugana gug eu camasac qee. Grik je bahic eu odi madena, "Ceteh ija wagalem eu haun cehefig ija ijadodoc loo je tefadoc dana ihacadigina" ena. Pol uqa odi madecnu gale dona eu odi fena. Dana uqa Kristen calimei uqa Juda agena loo je bisalu qee bilina. Euqa Kristen dana uqa Kristen cunug age Juda agena loo je toodu odocnu odoqagan ec cisdufei uqa silail dana calena, eu odiwe dana age loo je bisalu bilegina.

ageca calen eu age gauc gahidoinfo? Euqa ija age gauc qee gahidogina ec cisdugina. <sup>5</sup> Anut uqa age loo je toodoo odoginanu Kis adimei age gemona kobolkobol odonafo, qee age me je dah mimeig wawaga meleenanu Kis adimei age gemona kobolkobol odonafo?

<sup>6</sup> Age Ebrahamna cobocnu ciscoiga. Anutna jaqec je eu uqanu odi madena:

“Uqa Anutna jenu waug meleen.

Odocob Anut uqa uqana waug meleec fimei dana i ititom ec maden,” ena. (*Genesis 15.6*)

<sup>7</sup> Eunu Ebrahamna sihul bahic eu age dana cajaca wawaga meleec gug tawena ec age dogina. <sup>8</sup> Odocob Anutna jaqec je eu Anut uqa Juda dana qee eundec agena wawaga meleecnu age dana cajaca ititom ec madigian eunu wele fen. Eunu Anutna jaqec je eu wele me je Ebraham madon. Anut uqa odi madon:

“Hinanu dana cajaca age mahamaha cunugna bilegina eu eeladigian,” don. (*Genesis 12.3; 18.18; 22.18*)

<sup>9</sup> Odocob Ebraham waug meleec Anut eeldon. Eunu cunug age wawaga meleena eu age Anut uqa eeladena, eu odiwe uqa Ebraham eeldon.

<sup>10</sup> Anutna je odi jaqec nijia:

“In oso uqa loo jena buk jaqec nijina eu cunug gaid qee toodu odona eu uqa Anutna geuldec bisalu bilinal!” ec nijia. (*Loo 27.26*)

Eunu dana cajaca age ititom coboc ocnu loo je toodu odogina eu age Anutna geladec bisalu bilegina. <sup>11</sup> Aria, Anutna je odi jaqech nijia:

“Dana cajaca age Anutnu wawaga meleecb

Anut uqa dana cajaca eu ititom ec madeceb age cebac biluqagan,” ec nijia. (*Habakuk 2.4*)

Eunu dana oso uqa loo je toodu odonanu Anut uqa dana ititom ec qee madena eu camasac nijia. <sup>12</sup> Euqa Anutna je odi jaqec nijia:

“In oso uqa loo je toodu odona uqa loo je euna cebac biley ugian,” ec nijia. (*Wok Pris 18.5*)

Eunu Mosesna loo je gug biley eu wawaga meleec qee.

<sup>13</sup> Odocob Anutna je odi jaqec nijia:

“Dana oso age nana caqusecebil caculimei cal mena eu geldoc on,” ec nijia. (*Loo 21.23*)

Eunu ege, loo je ege geligen bibiliqun Krais uqa ege geligec euna qee biluqaunnu uqa hehulgimei eguna geligec cudunna tawecel Anut uqa geulden, eu odina ceseli fajigi oigen.

<sup>14</sup> Eeldoc Anut uqa Ebraham uten ec maden eu Anut uqa Jisas Krais odocna Juda dana qee eundec adigiannu Krais uqa odi odon. Eunu ege eguna wawige meleecnu Kis Anut uqa eu igigian ec maden eu oqannu odi odon.

*Anutna loo je eu Anutna muguh necnu je hahun ititacdocwe qee*

<sup>15</sup> Ija wawige meleec cotiel, ija qila dana eguna kobolna je ihoc migina. Dana lecis ale je oso togodumesi bal cehi hedosin eu dana oso uqa bal cehec je eu qatanecwe qee, eu je leih haun tubdocwe qee. <sup>16</sup> Aria, Anut uqa uqana muguh necnu je hahun Ebraham uqana sihul hibna caligianca maaden. Anutna jaqec je eu

“Sihunugail,” ec qee madel,

uqana gug eu dana cajaca mati bahic. Euqa Anutna jaqec je eu

“Sihul,” ec maden, (*Genesis 12.7; 13.15; 24.7*)

uqana gug eu dana osol, eu Krais. <sup>17</sup> Ijana je ija madigina uqana gug eu odi. Anut uqa Ebrahamca gami bal cehec je mesin. Odocob hibna cabi gel 430 hedocob Mosesna loo je calen. Eunu bal cehec je eu Anut casac madennu loo je eu bal cehec je qatanecel

bal cehec je eu cethet gauc qee calel. <sup>18</sup> Ge, oso uqa loo je toodu odonanu uqa Anutna mugumige migec uefi uqa Anutna je hahunnu Anutna mugumige migec qee ol. Euqa Anut uqa Ebraham muguh necnu je hahun madon eunu uqa Ebraham mugumige migec eu uten. <sup>19</sup> Aria, eetanu loo je calen? Eu eguna silail camasac ihacgecnu jabajab hon.

Odocob loo je eu odi bibileb li Ebrahamna sihul cali hugianu, sihul eu Anut uqa muguh necnu je hahun madon. Anut uqa loo je eu ensel adeceb age dana osol gemona tawen eu ebenna mudein. Odocob dana gemo tawen eu uqa Juda dana cajaca loo je maaden.

<sup>20</sup> Aria, dana gemo tawecelbi dana lecisha tawesina. Euqa Anut uqa osol, uqa cuhanuc je hahun maden.

*Loo je uqana gug*

<sup>21</sup> I uqana gug eu loo je uqa Anutna muguh necnu je hahunnu cadfo? Qee bahic! Eu odi qee! Ge, Anut uqa loo je oso eu ege cebac biley igecnu igoubmi ege loo je toodu odoqona euna ititom coboc ocnu ihoc. <sup>22</sup> Euqa Anutna jaqec je madi madena, dana cajaca age mahamaha cunug bilegina eu silail cilehadena, ena. Eunu dana cajaca age Jisas Kraisnu wawaga meleena eu age Anut uqa je hahun maden eu adigiannu odi nijia.

<sup>23</sup> Aria, ege wawige meleec qee calec ninijen loo je eu ege gihacgen. Eu ege gihacgegen li wawige meleec saen i humei camasac muden. <sup>24</sup> Eunu loo je uqa ege cofgegen li Krais hon, eu ege Kraisnu wawige meleec Anut uqa ege dana cajaca ititom ec madigiannu. <sup>25</sup> Qilaqa wawige meleec wele hon eunu loo je qee cofgena.

<sup>26</sup> Age Galesia cunug wawaga meleecbnu age Jisas Kraisca gabanaadimeig Anut melahul ibuldoin bilegina. <sup>27</sup> Ge, age Kraisca gabanaadecnu wa joadec oin eu cunug age lotoc tacecw Krais duman oin. <sup>28</sup> Eunu qila Juda danaca Juda dana qee eundeca age fil qee, begabeg meh coboc besiadiac danaca age fil qee, dana cajaca age fil qee. Age cunug Krais Jisasca gabanaadec osol bilegina. <sup>29</sup> Age Kraisca gabanaadec bilegina eunu age Ebrahama sihul, odocob age mugumige migechnu Anut uqa Ebrahim je hahun madon eu oqagan.

## 4

### *Ege Kraisna cabi ocna ege uqana cabi dana Anut melahul ibuldon*

<sup>1</sup> Ija odi madigina, dana oso uqa huqaneh eu, uqa mel bilia saenna, memeg begabeg mehwre odudina. Eunu uqa begabeg meh qee wooladena. Euqa ceteh cunug eu memegna eu huqanehha uqana. <sup>2</sup> Uqa mel sim bibilen dana leih age uqa cofdogina, odocob uqa odi bibileb li memeg uqa ceteh cunug utina saenna gadac. <sup>3</sup> Eu odiwe egeha ege mel simwe bilolob saen euna kadan tibud age maha saoca cofadegina eu age cofgoloig, ege agena begabeg mehwre bilolob. <sup>4</sup> Euqa Anut uqa, saen euna odigen en, saen eu hedocob uqa Melah suldocob nen. Eu caja uqa basen, odocob uqa loo je toodu odigiannu mudeceb bilen. <sup>5</sup> Uqana loo je bisalu biley euna uqa dana cajaca age loo je bisalu bilegina eundec besiadiigia bili ceseli fajadi cedadiigianu hon. Eunu ege Anut melahul biley oqannu odi odon.

<sup>6</sup> Odocob age Anut melahulnu Anut uqa Melahna Kis wawigena biligiannu suldugeceb nen, Kis eu uqa cesulgeceb ege Anut utadudu, Abal!\* Mei! doqona. <sup>7</sup> Eunu Anut odonnu qila hina begabeg meh qee biligina qa hina Anut melah biligina. Odocob hina Anut melah biliginafi hinaha Anut huqaneh biligina, hina Anut mugumige migechnu eu organ.

### *Pol uqa Galesia tamanechnu geh cisdon*

<sup>8</sup> Wele bahic age Anutnu qee doloig age mahanadec kadan tibudna begabeg meh cabi dana biloloig, euqa kadan tibud eu age tibud qee. <sup>9</sup> Euqa qila age Anutnu dogina, ec ija maadigen, qila Anut uqa agenu dona. Age adinu mahanadec kadan tibud lasdoc gelelanca qee haun cofadiigianu ceselegina? Age adinu agena begabeg meh cabi dana haun calecnu odogina? <sup>10</sup> Age deel benca, jagel haunca, saen ibuldocta, cabi gel haunca gaid cuha feginia. <sup>11</sup> Gadgad cabi cunug ija agenu odem eu gauc fadaleiaunnu ija agenu cisdnurni cucuiigina!

<sup>12</sup> O wawige meleec cotiel, ija Juda agena loo je culimig age cinigwe calem. Age ija me qee qee oditelein. Eunu ija niniadigina, age ija cinigwe caleigale. <sup>13</sup> Age dogina, ija hag qiten eunu ija casac me je qasali maadem. <sup>14</sup> Ijana hag eu age temadec cinigwe euqa age ija cecewiti qee cultilein. Ageqa ija oiteinwe odi Anutna ensel oidein, age ija oiteinwe odi age Krais Jisas oidein. <sup>15</sup> Age geh bahic celebooloig! Qila eeta odaden? Ija mele maadigina, age geh bahic cesultoub, odocob agedodoc amaga casasi ihoc mimeig ija itoub. <sup>16</sup> Ija mele je maadem eunu qila agena cad ibuldugafo?

<sup>17</sup> Dana age me je fil iwalandegina eundec age faninadecnu cabi ogina qa dana eundec age me gee odadecnu faninadegina. Age dana eundec cesuladecnu age faninadegina. Eunu age ijanu filiganadecnu odogina. <sup>18</sup> Aria, age dana me odadecnu cabi oginafi eu ceteh me bahic. Ija ageca biluquna saen ina himec qee, saen cunugna kobil i odoginafi eu ceteh me bahic. <sup>19</sup> O age ijana mel sim! Ija agenu dain gahidodomin li Krais duman age wawaga dunuhna cali hedugian, odi caja mel basigia oodon dain donawe. <sup>20</sup> Ija qila age gami bileyqanna wawi nijia. Ija age gami biloumimi ija je filna bodoi maadoum. Ija agenu geh cisdigina!

### *Hega Seraca alena dodo je saaden*

<sup>21</sup> Age leih loo je bisalu biluqagannu wawaga nijia eundec ija je oso sisiladigen, age loo je madena eu du cuhadoginafo? <sup>22</sup> Loo je odi madena, Ebrahim uqa melahul lecisca. Oso uqana begabeg meh caja uqa basen, oso besitoc caja uqa basen.<sup>†</sup> <sup>23</sup> Mel uqa begabeg meh caja basen eu dana cajaca agena cisdochna basen. Euqa mel uqa besitoc caja basen eu Anutna je hahunna basen. <sup>24</sup> Aria, ija dodo i saadigen eu galolo je. Caja lecis i ale bal cehec je lecis ihoc mec cinigwe. Bal cehec je oso eu Mosesna loo je eu Sainai Aluhnadec, eu mel age begabeg meh bileyqanna basadena. Caja oso eu Hega. <sup>25</sup> Hega uqa Sainai Aluh,

\* 4:6: Age je Rom 8:15na nijia eu feiga. † 4:22: Begabeg meh caja uqana mel eu Ismel. Besitoc caja uqana mel eu Aisak.

eu Arebia hatu ono bilia. Odocob Jerusalem qila bilia eu uqa uqana mel gami osoben begabeg mehwe bilegina. Eunu Hega uqa Jerusalem eu ihoc mec bilesina. <sup>26-27</sup> Euqa Jerusalem oso eu sao ohis bilia eu uqa besitoc bilia.<sup>‡</sup> Anutna jaqec je eu odi madena: "O caja goud, caja uqa gemug qisacdon eu uqa mel mati bahic basadigian,

euqa uqa caja gemug qee qisacdol eu wooldugian.

Eunu hina mel qee basagana, celeboogale!

Hina caja mel basecnu dain qee hena, qaqqaji ceelagale!" ena. *(Aisaia 54.1)*

Eunu Jerusalem sao ohis bilia eu uqa ege arige.

<sup>28</sup> Aria, ija wawige meleec cotiel, age Anutna je hahunnu Anutna mel ibuldoin bilegina, eu odiwe Aisak bilen. <sup>29</sup> Saen euna mel uqa dana cajaca agena cisdochna basen eu uqa mel oso Anutna Kis odockna basen jabidudu tootooduduen. Eu qilaha odi dih nijina. Dana age Mosesna loo je toodogina eu age wawaga meleec dana jafiaadi tootooaadiegina. <sup>30</sup> Euqa Anutna jaqec je eu adi madena? Eu odi madena:

"Begabeg meh cajana mel eu, besitoc cajana mel uqana muguh mec osoben qee ila mi owasin. Eunu begabeg meh caja uqana melca ititacalecem belesia," ena. *(Jenesis 21.10)*

<sup>31</sup> Eunu, ija wawige meleec cotiel, ege begabeg meh cajana mel qee qa ege besitoc cajana mel.

## 5

### *Ege gaid besigec biluqale*

<sup>1</sup> Krais uqa ege besigec bileyannu besigen! Eunu age besiadec dana cajaca taweigale. Age uhulec iwaladec eu culadecebilegina age haun cain ibuladowain.

<sup>2</sup> Dah meiga! Ija Pol, ija maadigina, age culadecebilegina dewenega cagu qocobilfi uqana gug eu Kraisna cabi eu cesuladecnu ihoc qee. <sup>3</sup> Ija haun maadigina, dana oso uquadodoc culadeceb deweg cagu qocobilfi eu uqa Mosesna loo je cunug toodu bahic toodu odigian. <sup>4-6</sup> Ege Krais Jisasca gabangec biluquna eu ege dewenige cagu qocfo, qee dewenige cagu qee qocfo eu cesuladecnu ihoc qee. Euqa ege Kraisna wawige meleena eunu dana cajaca nalunuga moqona eu ceteh tutuc bahic. Odocob egenu Anut uqa amegna ege dana cajaca ititom migiannu sumudi biluquna. Susumudi bibiluqun Anutna Kis uqa ege wawige meleecna cesulgena. Eunu dana eu age loo je toodu odogina euna Anut amegna dana ititom calecnu egina eu agedodoc Krais felaculdooin. Age Anutna eelgec uum igec eu culdi qisacdoin.

<sup>7</sup> Age wele Kraisna jic me bahic coboloig! Age mele je toodocnu eu in cahacadeceb age qila uqana jic qee cobogina? <sup>8</sup> Cahacadec eu Anut uqa qee odel. Anut age uqaca lecnu utaadena. <sup>9</sup> Age dogina, bred jis nag bahic eu odocob bred cunug taecnu ihoc. Eu odiwe uhulec iwaladec nag bahic eu odocob age cunug ihoc ligian. <sup>10</sup> Euqa ege Tibudca gabangec biluqunanu ija gaid agenu wawi meleena. Tibud uqa cesuladecb age cisdock fil oso qee hewowainnu ija wawi meleena. Odocob cel dana uqa age wawaga me qee mudina eu Anut uqa dana eu geludigian.

<sup>11</sup> Euqa ijanu, ija wawige meleec cotiel, ija dana age dewenega cagu qoqagannu gaid je qasali maadiginafi adinu dewenega cagu qocnu madec dana eundec age gaid ija jabiti tooototegina? Ija dana age dewenega cagu qocnu je qasali maadiginafi ija Krais na babalecna tuitu qumeig caqusecebilegina cal menuq qasali maadigina eu dewenega cagu qocnu madec dana agena cisdock me qee mudecwe qee. <sup>12</sup> Ija cisdigina, dana age Galesia agena cisdock ihulahalduadegina eu agedodoc dewenega himec cain cagu qowain qa agedodoc baminiga ha seleigale!

<sup>13</sup> Agenu, ija wawige meleec cotiel, Anut uqa age besiadec bileyannu utaaden. Eunu qila age besiadec bileyannu, odocob Mosesna loo je qee cofadena. Euqa gadgad age besiadec bileyannu culdecebilegina age adec Cain cecel aqejau. Eu agena nalunuga mec eu culdecebilegina age wawaga meleec cotigcotig cewel utocobutocobeigale. <sup>14</sup> Ge, loo je cunug eu loo je osolna gabandoc nijia. Loo je eu odi madena:

"Hina hinanel nalunin maganawee odi hina utuqain bileyannu \* eundecnu nalug magale," ena. *(Wok Pris 19.18)*

<sup>15</sup> Euqa age dool cus cinigwe galac mudecebmudecebi qocobqocobecifeig eu age fadaldo-cobdocobowainnu age feigale.

### *Kisna kobilca wawige hilah uqana kobilca*

<sup>‡ 4:26-27:</sup> But 22na Pol uqa Saranu "besitoc caja" en. Galolo je ina Sara eu Anutna je hahun madec, odocob uqana mel, Aisak, eu Kristen dana cajaca. <sup>\*</sup> **5:14:** Utuqain bileyannu gug eu odi. Agena loofo, agena kobilfo eu dana osunu nalug magale ec qee madel, cois hina dana eunu nalug magale.

16-18 Aria, ija odi maadigina, age dewenega gale doc toodu cain odowain. Dewenige gale doc eu Kis feedudu ameg qona. Odocob Kis uqa dewenige gale doc feedudu dahinige hewena. Ale gaid cadesinanu. Eunu age ceteh odocnu cisdogina eu age odocwe qee. Euqa Kis uqa age iwalaaden toodoginafi age Mosesna loo je bisalu qee biledina. Eunu age Kisna dada madecna jic coboigale.

19 Dewenigena odoc eu gug camasac nijia, eu odi. Eu cajaca silail mec, eu amaga gegehin, eu wal kobil majagca qee odoc, <sup>20</sup> eu kadan tibudnu cuha fec, eu ceeh jelec, eu cad coboc, eu je gicodec, eu ceteh falian cadec, eu gemag bec, eu ija didih ii coboc, eu feedodec, eu am qatani filigandodec, <sup>21</sup> eu osona cetehnu gale doc, eu ceu jecel dalul qoc, eu ja qoc, eundec cunug odi nijia euca. Ija wele ulaulademwe ija odi qila ulauladigina, dana age odoc eundec odogina eu age Anutna cul qee mugumuga owain, adigina.

22 Euqa Kis uqana dado madec aig qoc eu ihen. Eu cotigeilnu nalunuga mec, eu wawige ceeli bilec, eu wawige malol bilec, eu lalafanigeca, eu wawige susumuca, eu me odadec, eu tutuc cobocca, <sup>23</sup> eu gemanige jocosaigca, eu egedodoc dumanige cofdoccoa. Eu odoc eundecnu loo je cahacadecnu qee tawel. <sup>24</sup> Odocob dana cajaca age Krais Jisasna biledina eu age dewenega gale docca, golanaga me qeenu sililecca eu na babalecna tuitu qocobil cal men.

<sup>25</sup> Kis uqa ege cebac bilec igen eunu culdocun eguna jic coboc ha uqa dado mudigan. <sup>26</sup> Egedodoc ege binanigeca ec cain madoqaun, oso waug me qee migian imeb Cain odudecebodudeceboqaun, ege osona ceteh ocnu amige Cain qocobqocbecoqaun.

## 6

### *Cel sab age cehegina eundec himec wal meceb oqagan*

<sup>1</sup> Ija wawige meleec cotiel, age wawaga meleec dana oso silail memeb fifeig Kis age dado maaden toodogina eu age dana gemanaga jocosaigca cesuldudu tutuc mudeigale. Hina temhec hinaca hocob cosologaunnu tutuc mumudi hinadocnu cofdogale. <sup>2</sup> Culumen adec nijia eu cesuldudu gahidutocobtobecigale, eu odocna age Kraisna loo je eu cunug toodu odoqagan. <sup>3</sup> Ge, dana oso uqa caunca qee eu uqanel waugna madi, ija ijanci biligina, ena eu uqadodoc qaudona. <sup>4</sup> Euqa age abesabes agedodocnu odoc mefo, me qeefo eu gesili feigale. Eunu oso odi odona eu uqa uqana odoc eu me bahicfi uqa eunu dih culaigian, odocob uqa uqana odoc eu dana osona odoc wooldochnufo, qeefo ec figian eu odi qee nijel. <sup>5</sup> Ge, age abesabes agena culumen adec gahidocnu nijigian.

<sup>6</sup> Dana Anutna me jena iwaldoc ona eu uqana ceteh meme cunug naha uqana iwaldoc utigian.

<sup>7-8</sup> Oso uqadodoc dewegna cehimei dewegna gale doc toodona eu uqa dewegnadec cal mec aig ugian. Oso Kisna cehimei Kisna gale doc toodona eu uqa Kisnadec cebac bilec catanec aig ugian. Odocob oso uqa Anut qee cewudina. Dana oso cel sab cehen eu dih wal meceb ugian. Eunu agedodoc Cain qaudowain. <sup>9</sup> Odocob me odoc qee culifeb ceteh me wal meceb cedeqan. Eunu ege me odadecnu Cain dewenige tolocab biluqaun. <sup>10</sup> Eunu ege walocca bilec acahnana gulucadimeb dana cajaca cunug me odadoqale. Ege wawige meleec cotigeil leih eundec ege wooladi me bahic madoqale.

### *Pol uqana ulauladec feele adecca cit qoc*

<sup>11</sup> FEIGA, IJA JAQEC JE BEN IJADODOC EBENINA QILA JAQIADIGINA! \* <sup>12</sup> Dana eu age, age dewenega cagu qoqaga bili gagadic megina eundec age dana amagana deweneganu deboocqagannu gale adena. Age cucuimeig cisdogina, "Dana leih age ege Kraisna na babalecna wawige meleena ec dumeig jabigi tootoogowainnu ege dewenige cagu qoc kobil toodu odoqona," egina. <sup>13</sup> Ge, leih age dewenega cagu qogina eu ageha loo je qee toodu odogina. Euqa age Galesia age dewenega cagu qoqagannu gale adena eunu age dana amagana deweneganu culai madoqagan, "Galesia age dewenega cagu qoin," oqagan. <sup>14</sup> Euqa ijanu, ija ceteh osunu qee culaigina, ija Jisas Krais eguna Tibud eunu himec culaigina. Uqa na babalecna tuitu qocobil cal men eunu culaigina. Krais uqa na babalecna odoc euna oditeceb ijana cisdoc eu mahananadec kobil cunugnu cal men. Odocob ija mahananadec kobil cunug haun toodocwe qee. <sup>15</sup> Dana dewenega cagu qocfo, qee dana dewenega cagu qee qocfo eu caunca qee. Euqa Anut uqa ege odigeceb ege haun ibuldon eu caunca bahic. <sup>16</sup> Dana cajaca cunug age iwalaadec je i toodu cobogina eu Anut uqa malol biledina waug qocca eu ageca biliale, dana cajaca eundec age Anutna dana cajaca.

<sup>17</sup> Ija ye cit qoc madigen, dana age ija qitein, eunu hulufani dewenina nijia, eu ija Jisasna cabi dana ec ihacadena. Eunu dana oso ija culumen haun Cain itiaun.

\* <sup>6:11:</sup> Age je 1 Korin 16.21na nijia eu feiga.

<sup>18</sup> O wawige meleec cotiel, egena Tibud Jisas Krais ucana eelgec uum igec eu age dolonogaca biliale. Mele.

## Pol Uqa Jaqec Je Oso Efesas Tamanec Jaqiaden Aqunec Je

Pol uqa jaqec je i jaqen saenna uqa Rom ono uqana jona gihacdoc bilen. (Eu Aposel 28.16-31 feiga.) Jaqec je i uqana gug eu odi. Anut uqa ceteteh cunug ifanen eu saona gunnadec mahanaadeca eu Kraisca gabanaadeceb Krais uqa cunugnu ilo biligiannu gale dona. (Eu 1.10 feiga.) Odimei Anut uqa uqana dana cajaca age wele agena silailna cal mec biloloig eu age qila Kraisca gabanaadeceb cebac bilegina eunu cisdoqagannu gale dona. (Eu 2.4-6 feiga.) Odimei Kristen cunug age wawaga osol biluqagannu gale dona. (Eu 2.19-22 feiga.)

Jaqec je ina dac 1na Pol uqa Anutna eeladec uum adec eunu je mati jaqena. Eeladec uum adec eu odi. Anut uqa Juda dana qeeca, Juda danaca gami nesili ehadeceb age cunug Kraisna wawaga meleec eb gabandumeig sihunegul osol bilegina. Eu Jisasna cabi. Anut uqa Kraisna cal mecna ugana dana cajaca ceseli fajaden. Odimei uqa Kis Gun aden. Kis Gün eu ceteh me bahic Anut uqa uqana dana cajaca adigiannu mugumuga mec je maden eu cunug ogagannu gihin adec. (Eu 1.14 feiga.) Dac 2na Pol uqa Kristen cunug age Kraisca gabandu bilegina, eunu age wawaga osol bilimeig Anutna kobil cunug toodu odoqagannu jaqena.

Jaqec ina Pol uqa Kristen dana cajaca age Kraisca gabanaadec bilegina eunuca, age sihunegul osol bilegina eunuca camasac ihacadecnu galolo je mati madena. Uqa Anutna dana cajaca age deweg osol bilegina, odocob Krais uqa deweg eu uqana ilo eunu galolo je oso madena. (Eu 4.1-16 feiga.) Odimei uqa Anutna dana cajaca age jo osol bilegina, odocob Krais uqa jo eu uqana nah man nohinoh eunu galolo je oso madena. (Eu 2.19-22 feiga.) Odimei uqa Anutna dana cajaca age aideg oso, odocob Krais uqa aideg eu uqana gemug eunu galolo je oso madena. (Eu 5.22-32 feiga.) Jaqec je ina ege ceteteh me bahic Anut uqa uqana dana cajaca odadecnu gale dona eu fi cuhadoqona.

### *Je Dunuhnu Dado Mec*

1. Feele adec je (1.1-2)
2. Anutna cisdoc: Krais uqa kobolkobolca, uqa ilo bilina (1.3-14)
3. Pol uqa Kristen age Anutna cisdocca, uqana gagadic odocca eunu du cuhadoqagannu inondona (1.15-23)
4. Anut uqana cisdoc toodona eu odi (dac 2-3)
  - A. Anut uqa uqana eeladec uum adecna uqana dana cajaca caahahaadena (2.1-10)
  - B. Krais uqa Juda danaca Juda dana qee eundecca uqana na babalecna tanawaden (2.11-18)
  - C. Juda danaca Juda dana qee eundecca age qila sihunegul osol bilegina (2.19-22)
  - D. Anut uqa je jahunec camasac men eu Kraisna tamanecna Juda dana qee eundec ageha Anut huqanehul bilegina (3.1-13)
  - E. Pol Anut uqa uqana gagadic odoc Kristen adeceb age Anutna Kisna wawaga gagadic tawigiannu inondona (3.14-21)
5. Krais tamanec adi wawaga osol biluqagan (4.1-6.20)
  - A. Age Kis Gunna cisdoc osol biluqagan (4.1-6)
  - B. Age dana cajaca wasimeig Kraiswe caloqagan (4.7-16)
  - C. Kristen age agena cisdocca, wawaga madecca waticduadeceb haun ibuldugian (4.17-5.20)
  - D. Age cotogail agena je toodocobtoodocoboigale (5.21-6.9)
    1. Krais binan sulecnu age cotogail agena je toodocobtoodocoboigale (5.21)
    2. Gemugail aidagailca adi osol biluqagan (5.22-33)
    3. Mel simca age anagail memegailca adi osol biluqagan (6.1-4)
    4. Begabeg meh cabi danaca agena cofadec danaca adi osol biluqagan (6.5-9)
  - E. Seten cadecnu age Anutna gagadic odoc umei uqa uenna tatawi gagadic meigale (6.10-20)
6. Cit qoc je: Feele adecca eeladec jeca (6.21-24)

<sup>1</sup> Ija Pol, ija Krais Jisasna aposel. Anut uqana cisdocna ija Krais Jisasna aposel miten. Ija Anutna dana cajaca qagoc age Efesas bilegina, age Krais Jisasna jic tutuc cobogina eu age je i jaqidigina. <sup>2</sup> Memige Anutca Jisas Krais Tibudca alena eelgec uum igecca malol bilecca adesiale.

*Anut uqa ege eeldoc cunug Kraisna igen*

<sup>3</sup> Anut ege Kraisca gabangi biluquna eunu eelgen, uqa eeldoc cunug eu saona gunnadec ege dolonige cesuldocnu igen. Eunu ege eguna Tibud Jisas Krais uqa Memeg Anut binan suluqale! <sup>4</sup> Anut maha qee ifanec ninijen uqa ege uqana bilitoqannu Kraisca gabandoc biley euna wele nesili ehigen. Uqa ege gun bileyecnuca, cahuldocca qee uqa amegna bileyannu nesili ehigen. Anut uqa nalunige menanu <sup>5</sup> uqa casac wele odi cisdon, uqa Jisas Krais umna ibulgeceb ege uqa melahul bileyannu ec cisdon. Ceteh eu uqana cisdoc gale docca. <sup>6</sup> Anut uqana eelguc uum igec eu binanca bahic! Uqa Melah uqa nalug mena eu ege uqaca gabandu biluquna eunu Anut eelguc uum igec bagolwe igen. Eunu ege Anut binan suluqale!

<sup>7</sup> Anutna eelguc uum igec eu ben bahic! Krais ege ceseli fajigecnu cal men. Uqa eguna silail cagasigecnu uqa golac basecdocob nen. Eunu ege Kraisca gabandu biluqunanu ege besigec biluquna. <sup>8</sup> Anut uqa uum igec eu geh bahic igen! Anut uqa uqana doc meca, uqana cisdoc silec cunugca eu igen. <sup>9</sup> Anut uqa ceteh odigiannu Krais cabi ocna odigian ec wele cisdon. Euqa uqana cisdoc eu jahuni bilen. Odimei qila Anut uqa uqana gale doc toodumei uqana cisdoc jahunec eu ihacgeceb dom. <sup>10</sup> Uqana ceteh eu odigiannu cisdon eu odi. Uqa ceteteh cunug ifanen eu dado mumudeb lili saen uqa wele gadac menna uqa ceteteh cunug, eu saona gunnadec mahanadecca, Kraisca gabandocob Krais uqa cunugnu ilo biligian ec cisdon.

<sup>11</sup> Anut uqa uqana cisdoc gale docca toodona, eu uqa ceteh oso odocnu cisdoma euha uqa odocob calena. Odimei wele bahic gug qoc saenna uqa uqana gale docna ege Juda uqa ege Kraisca gabandoqannuca, ege uqana dana cajaca bileyannuca nesili ehigen. <sup>12</sup> Ege Juda, ege aquinadiet Kraisnu wawige meleceeb toodom eu ege uqa binan fulacdocca, gagadic odocca sulecnu nesili ehigen.

<sup>13</sup> Ageha age mele je wele dah mein, eu me je euna Anut caahahaaden. Odocob age Kraisnu wawaga meleceeb Anut age Kraisca gabanadimei uqana je hahun wele maden eu toodumei Kis Gun aden, Kis Gun eu Anut uqa uqana dana cajaca ceteh me adigian ec maden eu ege oqan uqana sisi nec. <sup>14</sup> Ege ageca Kis Gun wele om. Eunu ege doqona, hibna egeha ceteh me bahic Anut uqa uqana dana cajaca adigiannu mugumuga nec je maden eu cunug oqan. Ege Anut uqa ege cahahageceb ceteh me bahic eu umebe ege uqaca besigec bileyannu sumudi biluquna. Eunu uqa binan suluqale!

*Pol uqa Anut Efesas tamanec doc silecca adigiannu inondon*

<sup>15</sup> Ageha me je dah mimeig Kraisnu wawaga meleceeb Kis Gun oin gug inu ija agenu inondugina. Odocob ija age Jisas Tibudnu wawaga meleecca age Anutna dana cajaca qagoc cunugnu nalunuga mecca ec dah mem. <sup>16</sup> Eunu ija agenu Anut gaid hetaga dugina. Ija ijana inondocna agenu gaid cisdigina. <sup>17</sup> Ija agenu Jisas Krais eguna Tibudna Anut, uqa Memige fulacdoc bencia gagadic odocca, odi inondugina. Anut uqa doc silecca cisdoc fogo adecca adeiale, odocob age uqan du cuhadoqagannu ec inondugina. <sup>18</sup> Ija Anut agena cisdoc fogo duadeceb eu age fulacdocca foqagannu gale tena. Eunu age uqana dana cajaca bileyina eu age cel ceteh me age ocnu utaaden eunu sumudi bileyina ec doqagan. Odocob age Anutna dana cajaca qagu bileyina eu cehewanaga me bahic hibna adigian ec mugumuga nec je maden eunu doqagan. <sup>19</sup> Odocob ege Anutna wawige meleena uqana gagadic odoc euna cesulgena eu gagadic bahic ec doqagan. Anutna gagadic odoc ege sanijecnu ihoc qee. Uqa uqana cabi eu ege uqana gagadic odocna oqona. <sup>20</sup> Anut uqa uqana gagadic odoc euna wele uqana cabi eu Kraisna u hedon. Uqa Krais cal mecnadec tulidumei saona gunna ehudi ti uqa eben meulana isec mudeceb bilen saen euna uqa uqana cabi u hedon. <sup>21</sup> Odocob Krais uqa ohis bahic bilia. Uqa king biley cunugca, ilo biley cunugca, gagadic odoc cunugca, cofadec cunugca eu saona mahanaca bileyina wooladec ohis bilia. Odocob uqa dana qila saen ina ijanagaca bileyina isi saen hibna ijanagaca biluqagan eu cunug wooladec bilia. <sup>22</sup> Anut uqa ceteteh cunug Krais jaih bisalu men. Odimei uqa tamanec cunugnu ceteteh cunug agena ilo bahic biligianu muden. <sup>23</sup> Tamanec eu Krais deweg. Krais uqa ceteteh cunug am beceb asaneginaweu odi tamanec eu Krais am beceb asanen.

## 2

*Ege dana cajaca cal nec bilolob eu Anut uqa ege Kraisca gabangeceb cebac biluquna*

<sup>1</sup> Wele age silailca kobil cahuldocca eu odololoig, odocob eu aqecceb cal nec biloloig. <sup>2</sup> Saen euna age maha uqana qisol nec kobilna coboloig. Age buga me qee saona bileyina eu agena ilo toodoloig. Kis me qee gagadicca eu uqa dana cajaca age Anutna je tefacdogina eu wawaga dunuh cabi ona. <sup>3</sup> Eu mele, ege cunug wele dana cajaca eundec gemo bilolob, odocob ege dewenigena gale gec me qee eu toodolob. Ege dewenigenaca

egena cisdocnaca gale gec me qee eu toodu odolob. Eunu ege Anut ameg me qee wadacgec ocnu ihoc bilolob. Ameg me qee wadacadec eu Anut saciadon nijia, uqa dana cajaca cunug ugana je tefacdögina eu wadacadiğiannu nijia.

<sup>4</sup> Euqa Anutna waug qoc eu am bec bahic, odimei uqa egenu nalunige mec eu ben bahic. <sup>5</sup> Ege egena silailna cal mec bibiluqun uqa oigimei Kraisca gabangeceb cebac biluquna. Anut uqa ugana eelgec uum igeceña cahahaaden. <sup>6</sup> Odocob uqa ege Krais Jisasca gabangi ugaca tuligimei ehigi ti ugaca saona gun ohis migeceb ege ugaca king biluquna. <sup>7</sup> Uqa etanu odi odon? Uqa ege Jisas Kraisca gabangec biluquna eu ugana eelgec uum igeceña uqa egenu nalunige mecca eu me bahic cunug amagana hibna saen cunugna ihacadiğiannu odi odon. <sup>8</sup> Ge, Anut uqa ugana eelgec uum igeceña age wawaga meleecceb cahahaaden. Odocob eu agena odochna qee, eu Anutna bagol igeç himec. <sup>9</sup> Eu dana agena odochna qee, eunu dana oso uqa culai madi, Anut uqa ijana odochna cahahaten, odi cain madeiaun. <sup>10</sup> Ge, Anut ugadodoc ege migen. Uqa ege Krais Jisasca gabangec cabi me oqannu migen. Anut uqa wele cabi me oc eu ege jic euna cobeqannu saciadon.

### *Krais uqa Juda danaca Juda dana qee eundecca sihul lecis gabanaleceb ale osol mesin*

<sup>11</sup> Age cidoiga, Juda dana age dewenega cagu qoc kobil odogina eu Efesas age dewenega cagu qee qoc egina. Je madegina eu kobil eu dana age himec dewenegana odogina. Eunu age wele adi biloloignu cidoiga. <sup>12</sup> Age saen euna Krais qisacdoc bilein. Age Isrel sihulha qisacdoc bilein. Anut uqa ugana bal ceheç je mamadien euna ugana je hahun qee dah melein. Age maha ina Anutca qee bilelein, odocob age Anut uqa cahahahaadecnu qee susumudi bilelein. <sup>13</sup> Wele age Anut qisacdoc bahic bilein. Euqa qila Krais uqa agena silail cagasiadecnu uqa golac basecdocob ren. Eunu Anut age Krais Jisasca gabanadimei ehadeceb age Anut cemenug bahic bileyina. <sup>14</sup> Ge, Krais uqa malol biley egeca ahon. Wele Juda danaca Juda dana qee eundecca sihul lecis ale cadolosi. Cadec eu hih ceheç benwe gemona tawoloi. Euqa Krais ugadodoc dewegna hih ceheç ben eu wagalimei Juda danaca Juda dana qee eundecca gabanaleceb sihul osol qila bilia. <sup>15</sup> Uqa Mosesna loo jeca Juda agena loo je cunugca cacu qelen. Uqa sihul lecis eu gabanaleceb alena cudunna ugadodoc dewegna dana haun oso ifanigiannu odi odon. Eunu uqa malol biley muden. <sup>16</sup> Uqa na babalecna cal mennu sihul lecis eu Anutna tanawaleceb ege deweg osol bileyqannu odon. Eunu uqa na babalecna cad mudeceb mudecebek kobil eu qocob cal migiannu odon. <sup>17</sup> Odocob Krais humei uqa malol biley sihul osol qasali maaden. Uqa Juda dana qee eundec age qisacdoc bahic biley sihul osol qasali maaden. Uqa Juda dana cemenug biley euha qasali maaden. <sup>18</sup> Ge, ege sihul lecis Kraisnu Kis osolna Memigje Anut cemenug hocnu ihoc oqona.

### *Ege Kristen cunug Anutna jo bahic*

<sup>19</sup> Eunu qila age jag dana cajaca age mahaca qee bileyinawé qee bileyina. Age Anutna dana cajaca qagoc sihul osol. Age qila Anutna tal bileyina. <sup>20</sup> Age Anut jo cehenwe odi. Uqa ege apostolca je hahun madec danaca jo i ugana nah cehen. Odocob Krais Jisas ugadodoc uqa jo i ugana nah man nohinoh bahic! <sup>21</sup> Uqa dih uqa jo eu ugana teful cunug hewena, odocob jo eu cuha jo ben caligian odona, eu Tibudnu cuha jo ben gun bilina. <sup>22</sup> Ageha age Kraisca gabanadec bileyina, odocob Anut uqa age ugana dana cajaca leih gami osoben gabanadena, eu age Anutna jo bahic tawegina, jo euna Anutna Kis biligiannu.

## 3

### *Pol uqa Juda dana qee eundec me je qasali maadecnu cabica*

<sup>1</sup> Anut uqa Juda danaca Juda dana qee eundecca tanawadi gabanadeceb ege Krais deweg osol biluquna gug inu ija agenu inondugina. Ija, Pol, ija Krais Jisasna cabi dana, ija age Juda dana qee eundec cesuladecnu cabi ugina eunu gihadoc jona biligina. <sup>2</sup> Anut uqa eeltec uum itimei uqa cesuladecnu cabi i ugennu iten ec dah mein eu melece cisdigina. <sup>3</sup> Je i Anut uqa ceteh i odigiannu eu wele jahunec bilen eu Anut uqa ija mateceb dom. Eunuwe ija je eu wele nag odi jaqidiga. <sup>4</sup> Odocob age je i ija jaqidiga eu sanijuqagan saen euna age ija cabi i Krais odonnu je jahunec eu du cuhadugina ec doqagan. <sup>5</sup> Wele bahic Anut uqa dana cajaca je jahunec i oso qee camasac mudi maadel. Qilaqa uqa ugana apostol gunca je hahun madec danaca je jahunec i Kisna camasac mudi maaden. <sup>6</sup> Je jahunecna gug eu odi. Age Juda dana qee eundecnu me je eu age egeca sihul osol, dewenige osol, odi calom. Odocob ege cunug ege Krais Jisasca gabangec ege ugana mugumige mec Anut uqa eunu je hahun maden eu oqan. <sup>7</sup> Anut uqa eeltec uum iteceb ija me je qasali maadecnu cabi dana calem. Uqa ugana eelgec uum igeceña ugana gagadic odocca ija cabi i ugennu gagadic mitecnu iten. <sup>8</sup> Ijaqa ija Anutna dana cajaca qagoc cunug agena bisalu biligina.

Euqa Anut ijanu waug qocob uqa Juda dana qee eundec me je qasali maadecnu cabi i ija ebenina men. Me je i eu Kraisna ceteteh me bahicnu madena, me je eu cehewanca bahic, ege dana cajaca sanijecnu ihoc qee. <sup>9</sup> Anut uqa ceteteh cunug ifanen. Uqa ceteh cunug odigiannu casac uqana cisdoc jahunen. Uqana cisdoc eu wele saensaen cunugna jahunec bilen. Qilaqa Anut uqa uqana cisdoc jahunec adi caligian eu dana cajaca cunug qasali maadecemin foqagannu cabi i iten. <sup>10</sup> Wele Anut uqa ceteh oso jahunen, euqa qila uqa uqana tamanecna uqana cisdoc silecca filfil bahic eu camasac muden, king billecca ilo gagadic odochage sao hisna bilegina eu age doqagannu. <sup>11</sup> Wele bahic Anut uqa ceteh oso qee ifanel saen eunadec ceteh i cunug odigiannu cisdon. Odimei qila uqa Krais Jisas, egena Tibud, uqana cabina odocob ceteh i camasac men. <sup>12</sup> Odocob ege Krais Jisasnu wawige meleceeb uqaca gabangec biluquna. Eunu ege Anut cemenug lecnu ihoc eu du cuhadoqona, ege odi odocnu qee cucuiquna. <sup>13</sup> Eunu ija niniadigina, ija agenu sogoigina eunu cain dumanaga culiaun. Ija cesuladigina eunu age binanagaca bilegina.

#### *Pol uqa Efesas tamanec gagadic tawigiannu Anut inondon*

<sup>14</sup> Anut uqa Juda danaca Juda dana qee eundecca tanawadi gabanadeceb ege Krais Jisasnu wawige meleceeb ege uqaca gabangec Anut cemenug lecnu ihoc ogona gug inu ija Memige Anut amegna gob cehimig inondugina. <sup>15</sup> Uqa sihul cunug age saona mahanaca bilegina eu age Memega. Odocob uqa sihul cunug age ijanaga aqen. <sup>16</sup> Ija gob cehimig Ondan odi inondugina, uqana kobolkobol cehewanca bahic eunadec gagadic odoc adeceb age Anutna Kisna wawaga gagadic tawigiannu inondugina. <sup>17</sup> Odocob age Kraisnu wawaga meleecna Krais uqa age wawaga dunuh biligannu inondugina. Odocob agena dana cajaca cunugnu nalunuga mec eu age wawagana wasimei duuec tawigiannu inondugina, eu odiwe na bebeig eu maha gagadic heweceb na duuec tawena. <sup>18</sup> Eunu age Anutna dana cajaca qagoc osoben cunug age Kraisna nalug mec eu docnu gagadic odochca ihoc. Kraisna nalug mec eu bagalan ben bahic, eu cecelac ben bahic, eu ohis tec bahic, eu mahana dunuh noc bahic. <sup>19</sup> Odocob age Kraisna nalug mec eu du cuhadoqagan, euqa dana egena cisdoc cunug eu wooldoc. Odocob Anutna duman me bahic cunug eu Anut uquadodocnu am bec eu agenuha am bigian.

<sup>20</sup> Aria, Anutna gagadic odoc eu ege wawige cabi ona eu egena cisdoc wooldocnu ihoc odona. Anutna gagadic odoc eu ege Anut odochca cisdogona, ege Anut odochnu inondoqona eu cunug wooladecnu cabi ona. <sup>21</sup> Ege Anutna tamanec dana cajaca cunug saen qila hibecha gaidgaid Anut Krais Jisasca binanala sulocomun cataneiale! Mele.

## 4

#### *Ege Kristen ege Krais deweg*

<sup>1</sup> Ija Tibudna cabi dana, ija gihadoc jona biligina. Age Anut toodumeig tutuc cobocnu utaaden. Eunu Anut uqa agenu ceteh cunug Kraisna odonnu ija age tuliadecemin coboc i toodu cobocnu niniadigina. <sup>2</sup> Age jogoi cobocca, gemanaga jocosaigca, lalafanagaca odi coboigale. Age cotoga oso uqa me qee odadecebfai age ameg me qee cain wadacdownain. Age nalug mecebmecebeigale. <sup>3</sup> Kis uqa ege wawige osolna bielecnu kobil igina, odocob kobil i ege haluna cinighe libigecebil ege sihul osolna malol biluquna. Eunu age kobil i hewecnu gagadic meigale. <sup>4</sup> Ege dewenige osolca Kis osolca eu bilia. Eu odiwe age ceteh osol dih ocnu sumudi bilegina eunu Anut utaaden. <sup>5</sup> Eu Tibud osol bilia, eu wawige meleec osol nijia, eu wa joigec osol nijia, <sup>6</sup> eu Anut osol bilia. Uqa ege dana cajaca cunug Memige, uqa dana cajaca cunug agena ilo bilia, uqa dana cajaca cunug gemo cabi ona, uqa dana cajaca cunug dunuh bilina.

<sup>7</sup> Krais uqa ege eelgecuum igec oso abesabes siwigen. Eu odiwe Anut uqana eelgecuum igec ege abesabes siwigen. <sup>8</sup> Anutna jaqec je odi madena:

“Uqa ohis bahic ten eu uqa gihadoc dana mati bahic cedadecceb osobenga tein.

Odocob uqa dana cajaca bagol adec eu aden,” ena.

(Buk Song 68.18)

<sup>9</sup> Aria, je i “Uqa ohis bahic ten,” eu cel gugnu? Uqana gug eu uqa casac maha dunuh bahic toni non. <sup>10</sup> Eunu uqa toni non eu uqa saona gun ohis bahic ten. Uqa uqadodoc ceteteh cunug am bigiannu odi odon. <sup>11</sup> Odocob uqana bagol igec eu odi. Dana leih age aposel cabi aden, odocob leih age je hahun madec cabi aden, odocob leih age me je qasali maadec cabi aden, odocob leih age tamanec cofadec cabi aden, odocob leih age me je iwaladec cabi aden. <sup>12</sup> Uqa Anutna dana cajaca qagoc age Anutna cabi ocnu saciaadugia bili eu odi odon. Odocob uqa tamanec, eu Krais deweg, ceheceb gagadic tawigiannu odi odon.

<sup>13</sup> Uqa odiodi odon li ege cunug wawige osol gabandu bileyannu, odocob egena wawige meleec eu osol migiannu, odocob ege Anut Melahnu du cuhadoqannu, odocob ege dana ben meqannu eu odi Krais uqa dana ben menwe. <sup>14</sup> Eunu ege mel sim cinigwe haun qee biluqaun, odocob je i faninadec dana age iwaladegina eu ege macas qahimei wagna

cinigwe cain cecelgi lili huhu eiaun. Faninadec dana agena iwaladec je eu uhulec, eu dana agena cisdoc himec. Eu fufu cinigwe ege fulugeceb filfil ilag cain coboqaun.<sup>15</sup> Euqa ege nalug mecca mele je eu maadoqale. Odocob ege dana cajaca wasimeb Kraiswe caleqan, uqa eguna ilo.<sup>16</sup> Uqa uqana deweg cunug cofdona. Uqa deweg amihilon filfil tubadi sogeceb gagadic tawena. Krais uqa amihilon filfil eu meceb deweg gagadic hehdona. Odocob amihilon filfil cunug eu agena cabi me oegin deweg me bahic ben mena, odocob deweg eu uqadodoc nalug mecna ben mena.

*Ege wawige meleec dana cajaca Kraisna cebac bilec haunna coboqale*

<sup>17-18</sup> Aria, ija Tibud ijanna je i ulauladigina, age haiden dana agena kobolna cain cobowain. Haiden age wawaga eu tahac qon. Eunu agena cisdoc eu ceteh gauc, agena cisdoc eu tuca. Eunu age Anutnu docca qee bilegina, odocob age Anut cebac bilec igina euna qee bilegina.<sup>19</sup> Age kabol me qee odoginanu majanaga qee adena. Age wal kabol majanagaca qee odocnu gale adena, age kabol me qee filfil gegehinca odocnu wawaga cajena.

<sup>20</sup> Eu Kraisna iwaladec qee! Efesas age kabol i Kraisnadec qee oloin!<sup>21</sup> Eu mele bahic cisdigina, age Kraisnu dah mein, odocob age uqana dana cajawe bileyne mele je Jisasnina nijina euna iwaladein.<sup>22</sup> Wele ageha deweg hilah uqadodoc golac me qeenu sililec eu toodu odoloig, eu agenel quaaadi me qee bahic moloi. Euqa qila age deweg hilah uqana kabol eu huli heleiga.<sup>23</sup> Age Anut culdecebil agena cisdocca, wawaga madecca waticduadeceb haun ibuldugian.<sup>24</sup> Age Anut deweg haun taceigale, eu Anut uqadodoc hahun qo muden nijia, eu ititomca, eu gunca, eu mele bahic.

<sup>25</sup> Eunu age uhulec je cuculeig wawige meleec cotigcotigca mele je madeigale. Ge, ege deweg osol uqana nahanaha biluquna.

<sup>26</sup> "Age gemanaga bebeb cain silail mowain," en. (Buk Song 4.4)  
Age gemanaga bebeb cam qee caji lec ninijeb gemanaga bodoeiale. <sup>27</sup> Gemanaga bec eu Setenna biley cudun cain mudecebil nijiaun.<sup>28</sup> Oso heje on eu haun cain heje oiaun. Euqa oso ihocca qee eu loo utecn uqa gagadic mimi uqadodoc ebenna cabi ocob ceteh me cali hoiale.<sup>29</sup> Socaec je conoganadec cain cali hoiauna. Ceteh oso cogogec nijecebf tutuc miigliani je himec madeigale. Je eu eeladec oqagannu age dah mecebil cesuladigian.<sup>30</sup> Kis Gun eu age Anutna dana cajaca bileyne uqana gaga, eu Anut uqana besiadec deelnu qagu madec bileyne uqana sisi mec. Eunu ageha Anutna Kis Gun waug me qee mudecebil cain waloc doiaun.<sup>31</sup> Age je me qee gulihinca, olohon becca, gemanaga becca, eu cunug qisacdu hibemdoigale. Age dana cajaca cain galac madowain, cain socaadowain, cain sagagadowain.<sup>32</sup> Age cotigcotignu wawaga nelugca, culunuga occa odudecebodudecebeigale. Anut age Kraisca gabanadec agena silail dahig celenwe eu odi age cotigcotigna silailha dahig celecebcelebeigale.

## 5

*Ege Tibudna fulacdona biluqale*

<sup>1</sup> Age Anutna mel sim uqa nalunuga mena, eunu age Anutna kabol toodu odimeig Anut cicilon ogiale. <sup>2</sup> Age wawaga meleec cotogailnu nalunuga mecna coboigale. Eu odiwe Krais uqa eguna nalunige mimei uqadodoc cebac bileyne culimei Anutnu ihandon. Ihandoc eu dedeman me bahic wasena.

<sup>3</sup> Age wal kabolca, kabol me qee gegehinca, osona ceteh ocnu gale adecca eu cain odowain. Age Anutna dana cajaca qagoc eunu oso age kabol eundec odocnu je cain madeiaun. <sup>4</sup> Age Anutna dana cajaca ititomca age je gegehinca, udoc je me qeeca, lelandoc jeca eu cain madowain. Euqa age Anut hegaga ec himec madeigale.<sup>5</sup> Oso uqa wal kabolca, uqa kabol me qee gegehinca, uqa osona ceteh ocnu gale docca eu Kraisna culca Anut mugumige mecca naha oso qee oiaun, eu mele bahic. Dana eu uqa osona ceteh ocnu gale dona eu uqa kadan tibudnu cuha fenawe.

<sup>6</sup> Silail kabol inu dih Anutna gemag bec eu dana age uqana loo je tefacdolina eu ageca hona. Eunu age dana oso cain culdecebil je gaucna quauadeiaun. <sup>7</sup> Odimeig age dana eundec age gami cain ihol mowain. <sup>8</sup> O Efesas, age wele tucana biloloig, qilaqa age Tibud uqa uqana fulacdona madeceb euna bileyne. Eunu age dana cajaca fulacdona bileyne coboigale. <sup>9</sup> Ge, ceteh eu me bahic, ceteh eu ititom, ceteh eu mele bahic eundec cunug eu fulacdona aig qoc.<sup>10</sup> Age Tibud uqa kabol adec gale dona eu docnu cabi oiga.<sup>11</sup> Dana tucana kabol odogina eu ageca cain ihol mowain. Kabol tuca i edec uqana aig qoc eu gauc himec. Euqa age kabol tuca i dana cajaca cunug ihacadeceb camasac meia.<sup>12</sup> Ge, dana kabol i jahunevna odogina eunu ege je madecnu majanigeca.<sup>13</sup> Euqa age cetehcedadimeig fulacdona madeceb uqana gug camasac caleceb dana cajaca cunug

age fecnu ihoc.<sup>14</sup> Odocob ceteteh cunug camasac mena eu fulacdoc ibuldona. Eunu leih age je i madegina:

“O dana us niijigina, hina camali cajaga!

Hina cal mecnadec cajecem

Krais uqa fulacdoc ihigian,” egina.

<sup>15</sup> Age agena cobocnu meciu cuhadoiga. Age dana cisdock silecca qee cinigwe cain cobowain. Age dana cisdock silecca cinigwe coboigale.<sup>16</sup> Age Anutna kobil odocnu cabi oiga, ge saen qila eu me qee.<sup>17</sup> Eunu age cain gad mowain qa Tibud uqa age adi odocnu gale dona eu wali feiga.

<sup>18</sup> Ceu jeceb dalul qoc eu kobil me qee, eunu age ceu jeceb bilal Cain aqeaiaun. Euqa age Kis culdecebil uqa wawagana am bi ihoc ligiannu odoigale.<sup>19</sup> Age samnaca, kalamnaca, due Kis Gun iwaladenea eunaca je madocobmadocobeigale. Age conogana wawaganaca Tibudnu due sileigale.<sup>20</sup> Age saen cunugnu ceteteh cunugnu egena Tibud Jisas Krais ijanna Anut Memige gaid hegaga doigale.

### *Pol uqa gemugail aidagailca maaden*

<sup>21</sup> Age Krais binan sulimeig age cotogail agena je toodocobtoodocoboiqale.

<sup>22-23</sup> Krais uqa tamanecna ilo bilina. Tamanec eu Krais deweg, odocob Krais uqa ugana cahaahaadec. Eunu Krais uqa tamanecna ilo bilinawe eu odi gemug uqa aidegna ilo bilina. Odocob age Tibudna je toodu odoginawe eu odi aidagail age gemugail agena je toodu odoigale.<sup>24</sup> Tamanec uqa Kraisna je toodu odonawe eu odi aidagail ageha gemugail agena je cunug toodu odoigale.

<sup>25</sup> Krais uqa tamanecnu nalug mimei uqa tamanec cesuldocnu ugana cebac biley culenue eu odi dana age aidagailnu nalunuga meigale.<sup>26</sup> Uqa tamanec Anutna jena wa joudimei soidocob Anutnu qagu biligiannu eu odi odon.<sup>27</sup> Eunu uqa tamanec eu u ahumei uquadodoc amegna me bahic tawigiannu odi odon. Odocob tamanec eu gegehinca qee, gononca qeeca, ceteheu cinigwe ecca qee eu odi biligiannu odon. Odocob tamanec eu cahuldocba qee, uqa gun biligiannu odon.<sup>28</sup> Eunu dana agedodoc deweneganu nalug meginaweu odi age aidagailnu nalunuga meigale. Dana uqa aidegna nalug mena eu uquadodocnu nalug mena.<sup>29</sup> Ge, dana oso uquadodoc deweg sagagdona eu odi qee nijel. Euqa Krais uqa tamanec cofdonaweu odi dana uqa deweg sab utimei me cofdona.<sup>30</sup> Ege Krais dewegna amihilon eunu uqa odi odona.<sup>31</sup> Anutna jaqec je eu odi madena:

“Gug inu dana uqa memeg anagca culaimei aidegca gabanalecebile biluwasan.

Odocob lecis ale deweg osol biluwasan,” ena.

(Genesis 2.24)

<sup>32</sup> Jahunec gug ben eu Anutna jaqec je ina bilia. Ija cisdigina, ugana gug eu Krais ugana tamanecca ec madena.<sup>33</sup> Euqa ageha odi odoigale. Dana cunug age agedodocnu nalunuga meginaweu odi age aidagailnu nalunuga meigale. Odocob caja cunug age gemugail agena je toodu feigale.

## 6

### *Pol uqa mel sim anagail memegailcanu maden*

<sup>1</sup> Mel sim age anagail memegailca je madecebile toodu odoigale. Age cunug Tibudca gabanadec bileyina eunu kobil tutuc i odoiga.<sup>2</sup> Loo je ugana je gagadic oso eu odi madena, “Hina anin memenca je madecebile toodu odogale,” ena. Je gagadic eu je hahun oso tubdoc aquniadec nijia.<sup>3</sup> Je hahun eu odi tubdu madena:

“Eunu cunug hinanu me biligian,

odocob hina maha ina saen cecelacca biley,” ena.

(Loo 5.16)

<sup>4</sup> Memegail age agena mel sim elalenadecebile gemanaga bigiannu Cain odowain. Euqa age cofadi cuhadumeig Tibudna je ihoc mecnacca iwaladeigale.

### *Pol uqa begabeg meh cabi dana agena cofadec danaca eunu maden*

<sup>5</sup> Begabeg meh cabi dana age agena cofadec dana maha ina bileyina eu age conoga toodu odoigale. Age cucuietca, qeleleccca, wawaga osolca cabi oiga, eu odi age Kraisnu cabi ogina.<sup>6</sup> Age cofadecible age quaaadi amagana himec cabi me ogina eu age cabi me ogina ec madecnu odi cain odowain. Euqa age Kraisna cabi dana eu odi cabi oiga, age Anutna gale doc toodocnu wawaga ceeleiale.<sup>7</sup> Age wawaga mena cabi oiga. Age eu dana agena cabi himec Cain odowain, ge eu age Tibudna cabiha ogina eu odi oiga.<sup>8</sup> Age dogina, dana oso uqa me odona, eu begabeg meh cabi danafo, qee cofadec danafo, Tibud uqa dana eundec cunug ameg mena wadacadigian, eu agena me odo ihocihoc mumudi adigian.

<sup>9</sup> Odiha age cofadec agena begabeg meh cabi dana mena odadeigale, age cucuiuqaganu kobilna Cain odadowain. Age dogina, begabeg meh cabi dana agena Ben,

cofadecca agena Ben uqa saona gunna bilina, odocob uqa begabeg meh cabi danaca cofadec danaca cunug gug osolna dih ihocihoc gesiladena.

*Kristen age han dana cinigwe*

<sup>10</sup> Ija cit qoc je oso maadigen. Age Tibudca gabanadec bilimeig uqana gagadic odocnu cисдоига. Уqa uenna tatawi gagadic meigale. <sup>11</sup> Age Anutna han cadec bala cunug taceigale. Euna age Seten nawel cocobi wooladecnu hohob age uqana cisdoc me qee euna tiec tawecebil ihoc ligiannu. <sup>12</sup> Ge, ege age dana dewenega golanagaca eundecca qee cadoqona qa ege tibud me qee eundecca, kis ilo gagadic odoc eundecca, maha cofadec age tu saen ina maha cunug cofadegina eundecca, buga me qee mati bahic age sao ohisna isec cobogina eundecca eu age gami cadoqona. <sup>13</sup> Eunu age Anutna han cadec bala eu umeig cunug taceigale. Eunu Setenna qisol mec deel hocob age agena mahana tiec tawecnu ihoc. Odocob age han cadie hedumeig tawecnu ihoc.

<sup>14</sup> Gagadic taweiga. Odocob age umunugana mele je oologamca taqeiga. Odimeig age hannu jamel ititomca culunugana jahuldoci be cawi taweigale. <sup>15</sup> Age malol bielecnu me je hewi cobocnu eu jaimaga tacecna taci taweigale. <sup>16</sup> Age wawaga meleec eu agena gelac cacudocnu heweiga, eu cain bahic dahiniga celeiaun. Gelac eu qisol mec gug uqana jalaig jaca guseceb hu qocob cunug cafuligianu ihoc. <sup>17</sup> Age caahahadec katakat eu age ilomoga jahuldoci umeig taceigale. Age Kisna han sigin, eu Anutna je, umeig ebenevana heweigale. <sup>18</sup> Age Kis wawaga ihoc leceb je madocnaca ninidocnaca saen gaid inondoigale. Gug inu age mecii cuhadoigale. Age cain jaen mudowain. Age gaid Anutna dana cajaca qagoc cesuladecnu inondoigale. <sup>19</sup> Aheha ija me je uqana jahunec gug camasac mecnu madige bili saciadugen euna Anut uqa je iteceb ija me je saluqi u maadigennu ijanu inondoigale. <sup>20</sup> Ija me je i saadecnu dana sos, ija gug inu gihadoc jona senna qagitec biligina. Ija me je saluqi u maadigen eu odi maadoum igina eunu Anut inondoiga.

*Cit qoc feele adec je*

<sup>21</sup> Tikikas eguna wawige meleec cotige eu ege nalug moqona, uqa Tibudna cabi tutuc ona, uqa ijanu je cunug saadigian. Eunu age ija adi biligina, adi odigina eunu doqagan. <sup>22</sup> Ija gug inu age ege adi biluquna doqagannu, odocob uqa age wawaga gagadic mudadigiancu ageca suldochmin lena.

<sup>23</sup> Malol bielec ageca biliale. Memige Anutca Jisas Krais Tibudca ale cesuladecebile age wawaga meleec wawige meleec cotigeil nalunuga meigale. <sup>24</sup> Cunug age eguna Tibud Jisas Kraisnu nalug mecebile catanena eu Anutna eelgec uum igec eu ageca biliale.

## Pol Uqa Jaqec Je Oso Filipai Tamanec Jaqiaden Aqunec Je

Pol uqa casac macas wana nuimei Grīķ hatuna calen saen euna uqa Masedonia hatuna taun ben Filipai ono me je qasali maaden. (Eu Aposel 16.8-15 feiga.) Odimei ono Kristen tamanec sanan men. Hibna Filipai tamanec eu age Pol uqa Rom ono gihacdoc jona bilia ec dumeig meen qaig cesuldacnu suldon. Aria, Pol uqa jaqec je i Filipai tamanec heteiga ec maadecnu jaqiadimei sulduaden. (Eu 1.5, 4.10-19 feiga.) Eu jaqec je i ugana gug bahic. Euqa Pol uqa je filha jaqen eu odi. Uqa adi bilina eunu madena. (Eu 1.12-26, 4.10-19 feiga.) Uqa Filipai tamanec age agena cadrinu Cain cucuiuwain. Euqa age gaid gagadic meigale, age gaid Krais Jisasna ceeleigale ec madena. (Eu 1.27-30 feiga.) Uqa Filipai tamanec age Krais Jisas ugana kobilnu cisdodoig age cotoga bisalu bilimeig cotoga ugana kobil me eu agena kobil me wooldoc ec cisdooigale ec madena. (Eu 2.1-11 feiga.) Uqa Filipai tamanec age wawaga osol bileigale ec madena. (Eu 4.2-5 feiga.) Uqa Timoti Epafroditasca ale cabi dana me bahic eunu sulaleceb Filipai ono belowasan ec madena. (Eu 2.19-30 feiga.) Uqa Juda dana leihnu meciū cuhadoiga ec madena. (Eu 3.2-11 feiga.) Dana eundec age Kristen dana dewenega cagu qocnu cesusadegina. Uqa dana leihnuha ulauladena. (Eu 3.17-4.1 feiga.) Dana eundec age Kristen uqa Kraisna besitoc bilina eunu uqa wain sabca geh bahic jecnu eu cois egina.

Jaqec je ina Pol uqa Kristen adi bileyecu madena. Kristen dana uqa cotugul bisalu bilina (2.1-4), uqa cebac bileyec haun eu ocnu tutuc guguli qee mec gadacna nuina (3.13-14), uqa ceteh osonu jaen Cain qoiaun (4.6), odoceb uqa ceteh cunug odoceb ihoc (4.13). Odimei Pol uqa Kristen dana cajaca age ceelecca bileyecina ec gaid madena. Kraisnu je oso eu 2.5-11 euna nijja eu Krais ugana kobil bahic.

Aria, ege jaqec je i sanijuquuna saenna ege Pol uqa Filipai tamanecnu nalunuga bahic men ec doqan.

### *Je Dunuhnu Dado Mec*

1. Feele adec je (1.1-2)
2. Pol uqa Filipai tamanecnu Anut hetaga dona, odimei Filipainu inondona (1.3-11)
3. Pol uqa adi bilina eunu madena (1.12-26)
4. Jesusadecnu je (1.27-2.18)
  - A. Agena coboc eu Kraisna me je toodoiale (1.27-30)
  - B. Age Krais Jisas ceban eu age oigale (2.1-18)
5. Pol ugana me je cabi hijagul (2.19-30)
  - A. Cabi hijag Timoti (2.19-24)
  - B. Cabi hijag Epafroditas (2.25-30)
6. Pol uqa dana leihnu ulauladena (3.1-4.1)
  - A. Juda dana leih age Kristen dana dewenega cagu qocnu cesusadegina eunu batut feigale (3.1-16)
  - B. Dana leih age Kristen uqa Kraisna besitoc bilina eunu uqa wain sabca geh bahic jecnu eu cois egina eunu batut feigale (3.17-4.1)
7. Jesusadecnu jeca, Hetaga ec jeca, Cit qoc jeca (4.2-23)
  - A. Kristen agena cobocnu je filfilnu madena (4.2-9)
  - B. Pol uqa Filipai tamanec haun heteiga ec madena (4.10-20)
  - C. Feele adecca, eeladec jeca (4.21-23)

<sup>1</sup> Ele Pol Timotica, ele Krais Jisasna cabi dana. Ele Anutna qagoc dana cajaca age Krais Jisasna gabadecca, tamanec cofadecca cesuladecca ono Filipai bileyecina eu jaqiadowona. <sup>2</sup> Ege Memige Anutca agena Tibud Jisas Kraisna alena eelgoc uum igecca malol bileyecca adesiale.

### *Pol uqa Anut hetaga don*

<sup>3</sup> Ija saen cunug ija agenu cisdugina eu agenu ijana Anut hetaga dugina. <sup>4</sup> Odoceb ija saen cunug age cunugnu inondugina ija ceelecca inondugina. <sup>5</sup> Ija eetanu agenu ceelgina? Age me je wawaga meleen deel hahawannadec hahu qila ina me je qasali maadec cabinu cesulstein. <sup>6</sup> Odoceb Anut uqa cabi me i age dunuh sanan men eu gahidodob lili Jisas Krais ceseli hoc deelna qee migiannu ija du cuhadugina. <sup>7</sup> Age gaid ija wawi cisdochna bileyecina! Eunu ija agenu odi tebandugina eu tutuc. Age cunug cabi i Anut ija ebenina miten eu osobenca om. Eu qila ija gihacdoc jona biligina, odoceb wele me je

sildiadecemin gagadic tawen saen euna ha cabi i ija osobenca om. <sup>8</sup> Ge, ija Anut amegna mele je maadigina, ija wawi agenu geh hoolena eu Krais Jisas uqadodoc waugnadec hona.

<sup>9</sup> Odocob ija agenu inondugina, agena nalug mec eu gaid ben migiannu, odocob agena doc silecca cisdock fecca euha ben migiannu eu odi inondugina. <sup>10</sup> Eunu age ceteh eu me bahic eu age nesili cedoqagan. Odocob age Krais ceseli hoc deelna age gegehinca qee, cahuldocca qee biluqagan. <sup>11</sup> Odocob agena coboc eu ceteh me bahic gehca Jisas Kraisnadec hona eu agenu am bigian. Odocob agena me coboc eu Anut binan uteceb binan suleqan.

### *Bilecnu eu Krais*

<sup>12</sup> O wawige meleec cotiel, ija ceteteh ijaca calen eu me je cesuldocob gehca nuen eunu age doqagannu gale tena. <sup>13</sup> Eu odocobnu han cadec dana cunug Sisana jo cofdoginaca dana cunug age ene bileginaca age ija Kraisnu gihacdoc jona bilihina eunu wele doin. <sup>14</sup> Odocob ija gihacdoc jona bilihina eunu wawige meleec cotigel mati age gagadic odoc umeig agena Tibudnu wawaga meleec eu gagadic tawena. Odocob age cucuiec culimeig Anutna je saluqi u maadecnu gehca gagadic mein.

<sup>15</sup> Eu mele, leih age ija cabi omnu wawaga me qee men, odocob age ija wooltecnu gale adena eunu age Kraisnu me je qasali maadeginna. Euqa leih age wawaga meca eunu Kraisnu me je qasali maadeginna. <sup>16</sup> Dana i wawaga meca age Anut uqa me je sildiadecnu cabi ija ebenina mitennu dogina, age ijanu naluni megina eunu age odi odogina. <sup>17</sup> Euqa dana leih age ija wooltecnu Kraisnu me je qasali maadeginna eu agedodoc ijanaga ohis suleecnu cabi ogina. Age wawaga tutuc qee ninijen eunu odi odogina. Age ijanu gihacdoc jona biley eu culumen leih haun tubdutuqagan bili odogina. <sup>18</sup> Eu odi fena! Ija eunu galegina. Age jic leih cunugnana Kraisnu himec qasali maadeginna. Age conogana himecfo, qee wawaganadecfo Kraisnu qasali maadeginna eunu ija wawi ceelena.

<sup>19</sup> Ija eetanu wawi ceelena? Age Anut ijanu inondoginaca, odocob Jisas Kraisna Kis cesulitenaca euna age besituqagannu ija dugina. <sup>20</sup> Ija odoc tutuc qee odecemin qee majani teiaunnu gale ben tena. Euqa saen cunugnaca qila bahicca ija wawi duueceb kobil tutuc odigen eu odi ija gaid odiginawe eunu gale tena. Eunu ija cebac bilifig ija cal mifig ija dewenina Krais binan caligian. <sup>21</sup> Cebac biley gug eu eeta? Ijanu gug eu ija Kraisca osoben cobowona. Ija cal mifig ija uqaca bilocohul catanigan. <sup>22</sup> Euqa ija dewenina gaid cebac bilifig ijana cabi eu aig quqian. Euqa ija cel jic toodugen? ec qee dugina. <sup>23</sup> Ija jic lecis gemo hewitina. Ija cebac biley i culimig Kraisca biley gale tena, eu me bahic. <sup>24</sup> Euqa ija mahana gaid bilifig eu age cesuladecnu eu me bahic wooldoc. <sup>25</sup> Ija inu du cuhadugina. Eunu ija biligen eu dugina. Ija age cunug cesuladigennu gami bileyqan. Ija age wawaga meleec gagadic tawigiannu, wawaga ceeligiannu cesuladigen. <sup>26</sup> Odocob ija ageca haun li caligen, eunu age ijanu culai Krais Jisas binan suluqagan.

### *Anut uqa Filipai me madimei culadeceb dain adec gahidoin*

<sup>27</sup> Ceteh oso ben njija. Agena coboc eu Kraisna me je toodoiale. Age odi odocobilfi eu ceteh me bahic. Eunu ija li age feciadigenfo, qee ija qee ligaunfo ija agenu je dih suldocobil dah migale, age wawaga osolna taweginaca, age cisdock osolna wawaga meleec uqana me jenu osoben eb li cabi gagadic oginaca ec dah migale. <sup>28</sup> Ageha agena cadin cucuiuwain, age gaid gagadic meigale. Odocob age odi odocobilfi agena cad age fadaloqagan ec doqagan. Odimeig agena caahahaadec eu Anutnadec eunu age Anut caahahaadigian echa doqagan. <sup>29</sup> Eetanu? Anut uqa age Krais cewel utoc cabi aden. Odocob cewel utoc cabi eu odi. Age uqanu wawaga himec qee meleena qa age uqanu wawaga meleecib age uqa ijannu dain adecha gahidogina. <sup>30</sup> Qila age ijaca osoben han cadoqona. Han cadec eu wele ija han cacadigin age fein, qila ija han cadigina ec dah megina.

## 2

### *Ege wawige osol bileyeb wawige meleec cotigelnu me odoqale*

<sup>1</sup> Age Kraisca gabanaadec bileyina eu odadeceb gagadic megina, odocob uqana nalunuga mec eu wahohogadena. Age Kisca wawaga osol bileyina, odocob age wawaga meleec cotogailnu wawaga qocob cesuladegina. <sup>2</sup> Eunu ija niniaadi maadigina, age cisdock osol bileygale, age nalug mec osol meigale, age wawaga cisdocka osol bileygale. Age odi odocobilfi ija ben bahic ceeligen. <sup>3</sup> Age ija didih ii ceteh oso Cain odowain, age ija didih ii Cain deboowain. Agena kobil me eu cotoga uqana kobil me wooldoc ec Cain cisdowain. Euqa age cotoga bisalu bilimeig cotoga uqana kobil me eu agena kobil me wooldoc ec

cisdoqagan. <sup>4</sup> Odocob age agena ceteteh dih cain cofdowain, age cotogail agena ceteteh ha cofdoigale, odocob ageha me biluqagan.

<sup>5</sup> Krais Jisas ceban nijia, uqa ceban eu ageha oigale.

<sup>6</sup> Uqa Anut ihoc bilen, euqa uqa Anutwe bielecnu hewihewidocnu waug qee bilel.

<sup>7</sup> Uqa Anut bielec culimei uqadodoc begabeg meh ibuldon.

Uqa dana ihicon qu cali hon.

<sup>8</sup> Uqa dana coboginawe odi cocobon fein.

Uqa lal qumei uqadodoc binan qee mumudi Memeg co toodu oodi cal men.

Mele, na babalecna cal men.

<sup>9</sup> Eunu Anut uqa ehudi ehi ti ohis bahic muden.

Uqa ijan oso uten, eu ijanaga cunug wooldoc tawena.

<sup>10</sup> Eunu Jisas ijan eu binanca bahic,

odimei cunug age saona gunnaca, mahanca, maha dunuh nocnaca bilegina eu age  
gob cehimeig ijan eu binan suluqagan.

<sup>11</sup> Odimeig age cunug beilamaga osol mi Jisasnu madi madoqagan, Jisas Krais uqa eguna  
Tibud, oqagan.

Age Memige Anut binan wasigiannu odi odoqagan.

### *Ege dana cajaca gemona fulacdocwe bieleqan*

<sup>12-13</sup> Eunu, ijanan danah bahic, ija ageca ono bilom saenna age ija coni gaid toodoloigwe  
eu odi qilaha ija ageca qee biluquna saenna ija coni toodu bahic toodoigale. Anut uqa  
wele cahahahaaden. Anut uqa age dunuh gaid cabi ona, age uqana cisdock toodocnu gale  
adena eunu gaid cabi ona, odocob uqana cisdock toodu odocnu ihoc eunu ha cabi ona.  
Eunu age cucuui qeleti agena me bielecnu cabi eu gagadic oiga.

<sup>14</sup> Ceteteh cunug age odogina eu gonagona mecca jena fee dadanec eu culimeig odoigale.  
<sup>15</sup> Eunu cahuldocca qee, cataniecca biluqagan, odocob age Anutna mel sim eu gegehinca  
qee eundecwe age silail dana cajaca kobil me qee odogina eu age gemona biluqagan. Age  
gemo fulacdocwe dana cajaca mahana bilegina eu cujawadeceb <sup>16</sup> age cebac bielecnu je  
eu u adoqagan. Age odi odocobilfi ija agenu cabi gagadic om eu gauc qee cusdugaunnu  
ija Krais ceseli hoc deelna culunuga ugen.

<sup>17</sup> Agena wawaga meleec eu ihanecwe age Anut utegina. Euqa age ija golani wainwe  
ihanec euna basecdqagannu ija galeigina, ija ageca osoben ceeloqona. <sup>18</sup> Eu odi himec  
ageha galeeiga, age ijaca osoben ceeleqan.

### *Pol uqa Timoti Epafroditasca sulaleceb Filipai belowasan ec maden*

<sup>19</sup> Jisas Tibud uqa gale dufei nag odi ija Timoti suldochomin ageca ligian. Odocob uqa  
ceseli hu agenu je mateceh ija wawi ceeligan. <sup>20</sup> Uqa himec ijaca osoben tebandowona  
eu uqa age adi bilegina ec cisdona. <sup>21</sup> Dana leih cunug age agena ceteteh dih cofdogina.  
Odocob age Jisas Kraisna cabinu qee cofdogina. <sup>22</sup> Euqa age Timoti uqa dana me ec  
dogina. Uqa ija me je cabina melah memeg cesuldonawee cesulten. <sup>23</sup> Ceteh cunug ijaca  
adi calena eu casac dumig ija uqa ageca mahucwe suldochomin ageca ligian. <sup>24</sup> Odocob  
Tibud uqa gale dufei ija jic qahiteceb nag odi ijaha ageca ligen.

<sup>25</sup> Ija Epafroditas suldochomin ageca ligiannu cisdom. Uqa ija wawige meleec cotica,  
uqa me jena cabi hijenica, uqa ijaca osoben han dana. Wele age Filipai uqa suldochobil  
ijaca hon, odocob uqa age ijanaganu ija cesulten. <sup>26</sup> Uqa age feciadecnu waug hoolena.  
Odocob age uqa hagca ec dah meinu waug culumen dona. <sup>27</sup> Mele, uqa wele hag qon,  
odocob uqa cal migiannu odon. Euga Anut uqanu waug qon. Odocob uqa uqanu dih waug  
qee qol, uqa ijanu ha waug qon. Uqa ija culumen ben haun Cain jahulteaunnu waug  
qon. <sup>28</sup> Eunu ija uqa suldochomin ageca leceb age uqa haun fecidumeig ceeloqagannu gale  
ben tena. Odocob ijana jaen qitec qee migian. <sup>29-30</sup> Eunu age Tibud ijanna ceeli bahic  
ehudeiga. Odocob uqa Kraisna cabinu wele cal migiannu odon. Uqa cebac biligianu qee  
cisdol. Age ija cesultecni cabi ebenna mein eu u hedocnu cisdumei eu odi odon. Eunu  
age dana eundec binanaga suleigale.

## 3

### *Dana uqa Kraisnu waug meleena eu dana ititom*

<sup>1</sup> O wawige meleec cotiel, ija je i edi ijana jaqiadec qee mudigen. Age Tibudca gabanaadec  
eunu ceeleigale. Ija wele jaqiadem eu haun jaqiadecnu wawi culumenca qee. Ija odi  
odocominfii age gagadic tawoqagan.

<sup>2</sup> Age dana qisol megina eunu meciit cuhadoiga. Dana eundec age qa cinigwe, age dana dewenega cagu qumeig me qee mudencu cesusadegina.\* <sup>3</sup> Ege dih dewenige cagocnu kobil mele bahic eu egeca. Ege Anutna Kisna Anutmu cuha fifi Jisas Krais binan suluquna. Dewenige cagu qoc kobil eu ege cesulgigion ec wawige qee meleel. <sup>4</sup> Euqa dewenega cagu qoc kobil eu dana cesuladecnu ihofci ijaha dewenige cagu qoc kobil eu ija cesultecnu ihoc bahic. Dana eundec leih age dewenega cagu qoc kobil eu ihoc cesuladijannu wawaga meleena euqa dewenige cagu qoc kobil eu wooladi ben bahic cesultigianu ihoc. <sup>5</sup> Deel 8-peladocna age ija deweni cagu qoin. Ija Isrel agena dana cajacanadec silhul. Ija Benjamin sihulnadec. Ija Hibru dana bahic, Hibru golanaganadec. Loo jenu ija Farisi dana loo je toodoc dana bahic. <sup>6</sup> Cabi megameg mecnu eu ija Kraisna tamanec tootoodadlig. Loo je bisalu ititom cobocnu eu ija cahuldocca qee. <sup>7</sup> Euqa ija wele cel ceteh me oso om ec cisdugina eu Kraisnu ceteh gauc ec cisdom. <sup>8-9</sup> Eu mele, ija Krais Jisas ijana Tibud ec dugina eu ceteh cunug wooladec bahic. Eunu ija ceteh cunug om eu tageladec igina. Ija Krais dih ocnua ija uqaca gabalec bilewannu odigina. Eunu ija Kraisnu ceteh cunug tageldom, eu tetec gaucwe ec cisdugina. Ija qila ijanel ititom qee, ititom eu loo je toodu odigina euna om. Ijana ititom qila hewigina eu Kraisnu wawi meleena euna om. Ititom eu Anutnadec, dana cajaca age Kraisnu wawaga meleecib Anut uqa agena dana cajaca ititom ec madena. <sup>10</sup> Ija Kraisnu, uqana gagadic odoocnua du cuhadugennu odigina. Gagadic odooc eu uqana cal mecnadec tulidocob ceseli cajen. Odochob uqana waug sogoec eu ija uqaca osoben gahidowannu odigina. Odochob ija uqana cal mecnua uqa cicilon ugennu odigina. <sup>11</sup> Adi odoocomin Anut uqa ija cal mecnadec tuliteceb ceseli cajimig cebac biley haun ugen eunu cisdugina.

#### *Age guguli nui qee mec gadacna calecnu temdoiga*

<sup>12</sup> Euqa ija cal mecnadec tuliteceb cebac biley haun eu wele om ec qee madigina. Odochob ija qila silailca qee bilingina ec qee madigina. Euqa ija cebac biley haun eu ugennu Krais Jisas ija uqadodocnu wele oiten. Eunu ija cebac biley haun eu ocnu licdudu gaid nuigina. <sup>13</sup> O wawige meleec cotiel, ija eu wele om ec qee cisdugina. Euqa ceteh osol ija odigina, eu ceteh ija hibilemi nijia eu dahini celeceb ceteh olanina nijia eu ocnu gagadic licdudu nuigina. <sup>14</sup> Eunu ija cebac biley haun eu ocnu tutuc guguli qee mec gadacna nuigina. Cebac biley haun eu ameg me bahic Anut uqa ija Krais Jisasca gabalec bilewannu utateceb ija jobon ohis euna ti cebac biligen.

<sup>15</sup> Ege cunug dana cisdoc sileccawe cisoqona eundec ege ija cisduginawe odi cisdoqale. Euga age leih agena cisdoc eu filfi Anut uqa agena cisdoc tutuc mudigian. <sup>16</sup> Euqa ege ceteh wele dom eu gaid hewi toodu odoqale.

<sup>17</sup> O wawige meleec cotiel, age cunug ija ciciloni oigale. Dana eu age ege odoqonaw e odi odigina eundec feciadi cuhadumeig tooadeiga. <sup>18</sup> Ija je i saen mati wele maadem, odochob qila ija amulini nenen haun maadigina, dana mati agena biley eu odadeceb age Kraisna na babalecna cal mecnu cad mudein. <sup>19</sup> Age dewenega gale doc eu agena tibud. Age majanagaca qa agedodoc binanaga sulegina. Odochob age mananadec cetehnu dih cisdogina. Eunu age hibna ja benna fadalooqagan. <sup>20</sup> Euqa ege je hahunige uqana jobon eu saona nijia. Onodec ege Cahahagec Jisas Krais Tibud ege caahahagiannu toni nigian imeb uqa susumudi biluquna. <sup>21</sup> Uqa ege dewenige calua qila eguna jo taweeceb coboqona eu ibuldocob Krais uqadodoc deweg kobolkobolca nijina odiwe caligian. Eu odoocnua gagadic odooc eu uqa ceteh cunug odadeceb uqa bisalu bileyha euna ihoc odigian.

## 4

#### *Ege wawige osol meceb ceelimeb cisdoc me oqale*

<sup>1</sup> Eunu, ija wawige meleec cotiel, ija agena nalunuga migina, ija feciadecnu hooligina! Ija agena ceeligm, ija culunuga ugina. Ija cotiel, age Tibudca gabanaadec bileyha euna odi gagadic tawiegale.

<sup>2</sup> O Juodia Sintikica, ale Tibudca gabaniadi wawala osol mesiale ec ninialigina. <sup>3</sup> O Sisigus,\* hinaha, ijana cabi hijeni bahic, hina caja lecis i cesulalagale ec ninihigina. Ge, ale me je fulusdugian bili ijaca cabi gagadic om. Aleca, Klementca, ija cabi hijeniel leihca age ijanaga Anutna cebac biley bukna nijia eu age osoben cabi eu gagadic oin.

<sup>4</sup> Age Tibudca gabaniadi bibili wawaga ceeleiale. Ija haun maadigina, ceeleigale.

<sup>5</sup> Age dana cunug wawaga jocosaigca odadeigale. Eunu age agena kobil eu me bahic ec doqagan. Tibud ceseli hoia dodolgena. <sup>6</sup> Age ceteh osonu jaen cain aqeaun. Age Anut

\* <sup>3:2:</sup> Dana leih age dana cajaca odi maaden, "Age Kristen calegina saenna age Juda agena kobil toodu odimeig age dewenega cagu qoiga," aden eu odi fena. Pol uqa dana eu qa en, odimei uqa dana cajaca age dana eundecnu ulauladen.

\* <sup>4:3:</sup> Ijan i uqana gug eu "cabi hijag bahic."

agen Culumen wawaga hoolecca cunugnu gaid ninidudu inondoigale. Odimeig age Anut ceteh cunugnu cesuladecnu inondodoig hetaga doc madeigale.<sup>7</sup> Odi odocobil Anutna malol biele eu, ege dana cajaca ugana gug docnu ihoc qee, age wawaga cisdocca Jisasca gabaniadi biligiannu cofdugian, odocob wawaga cisdocca jaen qee aqeaun.

<sup>8</sup> Ija wawige meleec cotiel, ija cit qoc je oso maadigen. Age ceteteh eu mele, ceteteh eu binanca bahic, ceteteh eu tutuc, ceteteh eu cataniec, ceteteh eu fecnu galeca, ceteteh eu meca bahic, ceteteh eu binan sulecnu ihoc, ceteteh eundecnu gaid cisdoigale.<sup>9</sup> Ceteh ija iwaladecmin oinca, ceteh ija odom ec doinca, ceteh ija odom ec feinca eu cunug odoigale. Odi odocobil Anut uqa malol bielecca eu ageca biligian.

*Filipai age bagol utec oso Polca suldocobil hon eunu Pol ceelen*

<sup>10</sup> Age saen cecelac giieceb qila agena cisdoc tulidocobil ijanu haun cisdoin. Eunu ija Tibudca gabani bilili ceelowona. Age mele wele cistein euqa age cesultecnu jicca qee.<sup>11</sup> Ija cetehnu gothic mitina imig qee madelem. Ija adi biligina ec figina eu cunug ija wawi cois ena. Kobol eu ija wele dom.<sup>12</sup> Ija sawen bielecnu ihoc igina, odocob ija ceteteh mati hewecnu ihoc igina. Ija doc oso dugina eu odi. Ija sab gehcafo, ija sabca qeefo, ija ceteteh maticafao, ija cetetehca qeefo, eu saen cunugnana anaana biligina ija cunugnu cois igina.<sup>13</sup> Ija Kraisca gabani biluwuna eunu gagadic odoc Krais itina euna ceteh cunug odochnu ihoc.

<sup>14</sup> Euqa age ijana culumennu cesultecbil osoben gahidom eu kobol me bahic odoin.<sup>15</sup> Saen hahawan ija me je mamadig ija Masedonia hatu culdem euna age Filipai agedodoc tamanec oosooso ijana cabi cesultecnu meen qaig qee suldutelein ec dogina. Age himec ijana cabi cesultecnu meen qaig sultein.<sup>16</sup> Eu mele, ija Tesalonaika taun ono bilem saen eunaha age ija saen osolna cesultec suldutein. Odocob hibna age ija haun cesultec suldutein.<sup>17</sup> Ija bagol itec ocnu qee waligina. Euqa ija age agena kobol me eu gehca caligiannu gale tena, odocob Anut uqa ameg me bahic adigian.<sup>18</sup> Ceteteh cunug ihocca geh bahic eu ija agenadec wele cedem. Ija wele am bem. Age bagol itec Epafradaitas ebenna ija suldutein eu ija wele om. Bagol itec eu, eu ihanec dedeman me wasenawe age Anut utegina. Anut uqa ihanec i cois imei ona. Anut uqa ihanec i cinigwe ona eunu uqa waug ceelena.<sup>19</sup> Odocob ijana Anut ege dana cajaca Krais Jisasca gabangec biluquna eu ceteteh kobolkobolca geh bahic igeecnu wele men. Uqa eunadee wawaga hoolec cunug adeceb ihoc ligian.<sup>20</sup> Ege Memige Anut binan sulocomun cataneiale! Mele.

<sup>21</sup> Age Krais Jisasna dana cajaca qagoc cunug eu feele adeigale. Wawige meleec cotiel age ijaca biluquna eu age feele adec sulduadegina.<sup>22</sup> Anutna dana cajaca qagoc cunug age feele adec sulduadegina. Leih age Sisana jona cabi ogina eu ageha feele adec sulduadegina.

<sup>23</sup> Jisas Krais Tibud uqana eelgec uum igec eu age dolonogaca biliale.

## Pol Uqa Jaqec Je Oso Kolosi Tamanec Jaqiaden Aqunec Je

Kolosi eu taun oso Esia hatuna nijen. Eu Efesas taun cemenug nijen. Pol uqadodoc Krais tamanec Kolosi ono qee sanan mel. Uqa Pol uqa Efesas bilen saenna uqa dana oso, ijan Epafras, me je maadecnu suldocob Kolosi ono nuen. (Eu 1.7-8, Aposel 19.10 feiga.)

Pol uqa jaqec je i jaqen saenna uqa Rom ono uqana jona gihacdoc bilen. (Eu Aposel 28.16-31 feiga.) Uqa Rom ono bibilei Kolosi tamanecnu je eu don. Uqa dana leih age tamanec uhuli iwaladegina ec don. Dana eu age tamanec sab leih cain jowain ec maadegina, age deel leih eu gun bahic, odocob jagel haun eu gun bahic, odocob Juda agena cuha deel eu gun bahic ec maadegina. Age ceteteh leih cain hewowain, cain ji fowain, cain qududowain ec madegina. Age enselnu cuha fegina. Age Krais uqa ohis bahic qee ec madegina. Age dana uqa jahunec je dona eu uqa dana docca ec madegina. Age dana agena cisdock toodogina. Uhulec iwaladec eu Filipai tamanec agena wawaga meleec me qee odona eunu Pol uqa tamanecna wawaga meleec tutuc mudecnu jaqec je i jaqiaden.

Pol uqa uhulec iwaladec eu mele qee ec madena. Eetanu eu mele qee? Krais uqa Anut. Ege Krais foqona eu odi ege Anut foqonawé (1.15). Krais uqa ceteteh cunug Anut ifanen eu agena matu bilia (1.15). Uqa ceteteh cunug qee calec ninijen uqa aquniadi bilen (1.17). Krais uqa uqana tamanecnaca, uqa ceteteh cunugca agena ilo bilina (1.18). Eu Krais himec uqana tamanec ceseli fajadi besaden (1.13). Jic oso cesulgecnu qee nijel. Krais uqa cal mecnadec ceseli cajec matu (1.18). Anut uqana cebac bilecca, uqana kobel cunugca eu Krais dewegna am bec bilina (1.19, 2.9). Krais uqa ceteteh cunug saona mahanaca bilegina eu Anutca tanawadena (1.20). Eunu dana cajaca age Kraisca gabandoc bilegina euna himec Anut uqa caahahaadecnu ihoc (1.21-22). Odimei Pol uqa dac 2 leceb 4na Krais uqana gug inu Kristen dana cajaca age adi biluqagannu maadena.

Pol uqa jaqec je i jaqimei dana lecis alen. Odocob dana lecis ale ehi li Kolosi tamanec aden. Dana i ale oso eu Tikikas. Oso eu Onisimas. Pol uqa Onisimasnu je mati jaqimei jaqec je i Failimon suldon.

### *Je Dunuhnu Dado Mec*

1. Aqunec je (1.1-14)
  - A. Feele adec je (1.1-2)
  - B. Hetaga ec je (1.3-8)
  - C. Inondoc je (1.9-14)
2. Krais uqa ceteteh cunug agena ilo bilina (1.15-23)
3. Pol uqa Kraisna tamanecnu cabi ona (1.24-2.7)
  - A. Uqa Kolosi tamanec cesuladen (1.24-29)
  - B. Uqa Kolosi tamanec agena wawaga meleec eunu cisdona (2.1-7)
4. Ege Kraisca gabandoc cebac biluquna eunu ege dana agena uhulec je toodocnu qee nijel (2.8-15)
  - A. Age uhulec iwaladec dananu meci cuhadoigale (2.8-15)
  - B. Uhulec iwaladec dana cain toodowain (2.16-19)
  - C. Pol uqa uhulec je uqana gug eu fena (2.20-23)
5. Tutuc cobocnu loo je (3.1-4.6)
  - A. Cebac biley haun hilahca (3.1-17)
  - B. Kristen talnu loo je (3.18-4.1)
  - C. Ege gagadicca inondudu jic tutuc coboqale (4.2-6)
6. Feele adec cit qoc je (4.7-18)

<sup>1</sup> Ija Pol, ija Krais Jisasna aposel. Ija Anut uqana cisdocna aposel calem. Ija ege wawige meleec cotige Timotica, <sup>2</sup> ele Anutna dana cajaca qagoc age Kolosi ono bilegina eu ele wawile meleec cotileil age Kraisca gabanadec bilegina eu jaqadowona. Memige Anut uqana eelgec uum igec malol bilecca ageca biliale.

*Kolosi tamanec age Jisasnu wawaga mele bahic meleena*

<sup>3</sup> Ele agenu Anut inondowona saenna ele Anut uqa egena Tibud Jisas Krais Memeg gaid helaga dowonanu. <sup>4</sup> Ge, ele age Krais Jisasnu wawaga meleena ec doh. Odocob age Anutna dana cajaca qagoc cunugnu nalunuga megina ec ha doh. <sup>5</sup> Mele je eu me je ageca hahawan hocob age Krais Jisasnu wawaga meleecb age ceteh me Anut uqa agenu

saona gun hewi cofdona eunu dah mein. Ceteh me eu age ocnu sumudi bilegina. Eunu agena wawaga meleecca agena nalunuga mecca alena gug eu ceteh me age ocnu sumudi bilegina.<sup>6</sup> Me je eu ageca hon. Dana cajaca ageha mahamaha cunug me je maadec cabi ogina. Odocob dana cajaca mati bahic age me je dah mimeig wawaga meleen. Me je eu dana cajaca mati bahic age gemona li hunawi ihoc lena. Kolosi ageha hahawannadec Anutna eelgec uum igec eu mele bahic ec dah mimeig me je eu age gemona li hunawi ihoc lenwe.<sup>7</sup> Age Anutna uum igec eu mele bahic eunu Epafrafs wele iwaladeceb oin, uqa ele cabi hijile bahic, uqa Kraisna cabi dana me, uqa ele cesullimei Kraisna cabi me cofdona.

<sup>8</sup> Odocob uqa agena nalunuga mec kobil eu Kis Gun uqa aden ec malen.

<sup>9</sup> Gug inu ele deel hahawannadec agena kobil menu dah moh eu gaid li Anut agenu inondocnu qee culolah. Ele Anut agenu odi inondowona, Anut uqa uqana cisdock age wawagana meceb du cuhadoqagannu, Anut uqana Kis ugaha Anutna cisdock silec fogo adecca eu cunug adecnu ec inondowona.<sup>10</sup> Odocob age Tibud gale dona eu odi cobocnu ihoc. Odocob ceteh uqa waug me nijigun eu gaid odoqagan. Agena cebac bilec eu cabi me hanoqagan. Odocob age Anutnu doc silecca eu ben dugian.<sup>11</sup> Anut uqana gagadic odock fuladoccanadec gagadic cunug eu odadecab age gagadic meigale. Eunu age ceteh cunugna gagadicca tawimeig culumen gahidoqagan. Odocob age ceelecca<sup>12</sup> Memige Anut hegaga doqagan, uqa cesuladeceb Anutna mugumuga mec Anutna dana cajaca qagoc eu age cul fuladocca euna bilegina eu oqagan age oqagannu eu ihoc odon.<sup>13</sup> Uqa tuna gagadic odocnadeb besigi ehigimei uqa Melah uqa nalug mena eu uqana culna migen.<sup>14</sup> Ege Anut Melahca gabandu biluqunananu Anut Melah uqa ege fajigi besigen, odimei egena silail cagasigen.

### *Krais dumanca uqana cabica*

<sup>15</sup> Ege Anut fecwe qee euqa Anut Melah ege fecnu ihoc qa uqa Anut. Uqa ceteteh cunug Anut ifanen eu agena matu bilia.<sup>16</sup> Ge, Anut uqa ceteteh cunug Melah ebenna ifanen. Uqa ceteh saona nijiaica, ceteh mahana nijiaica, ceteh foqonaca, ceteh qee foqonaca, kisna gagadic odock, tibud eundecca, king bilecca, gabman cofadecca, eu cunug Melah ebenna ifanen. Anut uqa ceteteh cunug Melahnua ifanen.<sup>17</sup> Anut Melah uqa ceteteh cunug qee calec ninijen uqa aquniadi bilen. Odimei uqa ceteteh cunug heweceb bilegina. Uqa ceteteh cunug agena gug bahic, age uqanu agena cudun bahic oin.<sup>18</sup> Uqa tamanecna ilo, tamanec eu uqa deweg. Uqa gug qoc, uqa cal mecnadec ceseli cajec matu. Eunu Anut uqa ceteteh cunug agena aquniadec biligannu muden.<sup>19</sup> Eetanu? Anut uqa uqana cebac bilecca, uqana kobil cunugca eu Melah am bigannu gale don. Eunu uqa mitocob bilen.<sup>20</sup> Odocob Anut uqa Melahnua uqa ceteteh cunug saona mahanaca bilegina eu Anut uquadodocka tanawoqagannu cisdon. Odocob uqa Krais golac na babalecna basecdon euna malol mudeceb ceteteh cunug saona mahanaca bilegina eu uqaca tanawaden.

<sup>21</sup> Ageha age saen osona Anut cemenug qee bileyin. Age qisol mimi age cisdock me qee cisdoloig eunu age uqana cad onoca bahic bileyin.<sup>22</sup> Euqa qila uqa Melah deweg na babalecna cal men euna Anut uqa tanawadeceb uqaca osoben wawaga osol men. Melah uqa age ehadeceb Anutca loqagannu, odocob age gunca, tutuc odocka, cataniecca uqa amegna biluqagannu uqa eu odi odon.<sup>23</sup> Euqa age wawaga meleec gagadic hewimeig duuec taweiga. Odocob ceteh oso age diadeiaunnu age ceteh me ocnu sumudi bilegina eunu me je wele doin eu dahiniga cain celeiaun. Ija Pol, ija me je uqana cabi dana calem. Odocob me je eu, age dana cajaca cunug mahamaha bilegina eu qasali maadein.

### *Pol uqa Kolosi tamanec cesuladen*

<sup>24</sup> Qila ija agenu culumen gahidugina eunu ceeligma. Ija dewenina culumen gahidugina euna Kraisna culumen gahidoc leih nijia eu ihoc ligiannu odigina. Ija tamanec cesuldocknu odigina, tamanec eu Krais deweg.<sup>25</sup> Odocob Anut uqa ija tamanecna cabi dana miten. Uqa ija cesuladigennu cabi i iten. Cabi i ija Anutna je cunug dana cajaca maadecemin doqagannu iten.<sup>26</sup> Anutna je eu wele saen cunugna jahuni bilen, eu dana cajaca cunug qee doloin. Euqa qila Anut uqa je jahunec eu uqana dana cajaca qagoc eu ageca camasac meceb doin.<sup>27</sup> Anutna cisdock eu odi, uqa uqana je jahunec eu odocob uqana dana cajaca doqagan. Je jahunec eu cehewanca, eu gagadic odock fuladocca eu dana cajaca mahamaha cunug bilegina agenu bilia. O Kolosi, je jahunec uqana gug eu odi, Krais uqa age wawagana bilina. Odocob age uqana gagadic odock fuladocca adigiannu sumudi bilegina.<sup>28</sup> Eunu ege Kraisna me je dana cajaca cunug qasali maadoqona. Ege cisdock silecca cunug dana cajaca ulaulaadi iwaladoqona, ege dana cunug osolosol ehadocomun age wawaga meleec dana bahic Kraisna gabanadec bilegina eu odi bahic Anut cemenug caloqagannu.<sup>29</sup> Eunu ija cabi i odocnu gisi cagugina. Gagadic odock Krais itina eu ija wawina cabi ona euna cabi ugina.

**2***Ege wawige meleecceb duueceb uhulec je bitidocnu*

<sup>1</sup> Ija agenuca dana cajaca Leodisia bileginanuca, dana cajaca cunug ija olani qee feleinncuca cabi gagadic om eu adi cultecebil maadiga. <sup>2</sup> Age hulunuga cehecnuca, age gabandumeig dana cajaca ititom cunug wawaga osolna nalunuga moqagannuca ija cabi geh om. Eunu age cisdock me umeig me je eu mele bahic ec fogo adigian. Eu odina age Anutna je jahunec gug eu Krais ec doqagan. <sup>3</sup> Anutra cisdock silecca docca me bahic cunug eu Kraisna jahuni bilina.

<sup>4</sup> Age Kolosi, dana oso uhulec jena quauadeiaunnu ija eunu odi maadigina. Euqa uhulec je eu docnu me bahicfi Cain dah mowain. <sup>5</sup> Ge, ija dewenina ageca qee biluquna qa ija gaid dolonina ageca biluquna. Odocob age cabi eb li tutuc u bibileig Kraisnu wawaga meleec gagadic mena echa feciadigina eunu ceeligna.

*Ege Krais fagdumeb cebac biley bahic ocnu*

<sup>6</sup> Age Krais Jisas Tibud wele oin eunu age uqaca gabandoc coboigale. <sup>7</sup> Agena bebeig uqa dunuh bahic ceheiga, agena cebac biley uqa lalan ceheiga. Odocob agena wawaga meleecna odi age iwaladeinwe gagadic bahic meiga. Odocob age gaid Anut hegaga doigale.

<sup>8</sup> Gadgad dana oso uqa danana je docca uhulec je gaucca euna quauadeceb age uqana je toodu odowainnu age meciu cuhadoigale. Je doc eu dana wele bahic biley eu agena, eu mahanaadec tibud age dana eu iwaladein, odocob je doc eu ege qila biluquna egeca hoin. Euqa je doc eu Krais uqana je qee bahic.

<sup>9</sup> Ge, Anutna cebac biley cunug eu Krais dewegna am bec bilina. <sup>10</sup> Odocob age uqaca gabandocna agena cebac biley ha am bec bahic men. Krais uqana gagadic odoc eu tibud meca me qeeca cunug agena gagadic odoc wooladena. Krais uqa cunug agena ilo bilina. <sup>11</sup> Age uqaca gabandocna age dewenega cagu qoin, eu dana dewenega cagu qogina eundec qee qa Krais uqadodoc uqana dewenega cagu qoc euna dewenega cagu aqen. Krais uqa dewenega cagu aqeeceb age dewenega hilah eu culein. <sup>12</sup> Odocob age wa joc oin saen euna age Kraisca heel cisadein. Odocob age wa jocna ha age Kraisca ceseli cajein, eu Anut uqa Krais tulidocob cal mecnadec ceseli cajen eu uqana gagadic odiodiecnu wawaga meleecna age ceseli cajein. <sup>13</sup> Wele age agena silail mecca, age Juda dana qee eundec dewenega cagu qee qocca eunu cal mec biloloig. Euqa qila Anut uqa age Kraisca gabanadecceb cebac biley euna bileyina. Anut uqa eguna silail cunug cagasigen. <sup>14</sup> Loo je uqana gagadic odoc eu cilehgen. Loo je eu ege gelgimej eguna silail cahuldocca cunug eu Cain odowain ec magen. Odocob Anut uqa loo je uqana magecca, uqana gagadic odocca eu Krais uqana na babalecna tuitu qumei cunug eu qee mudi hedon. <sup>15</sup> Odocob Krais uqa na babalecna tibud me qee agena iloiloca tibud me qee gagadic odocca agena gagadic odoc cagasi qee muden. Odimej uqa age wooladimej iwalaadi ehadeceb age dana cunug amagana ceteh gauc cinigwe toodu coboin.

<sup>16</sup> Eunu dana oso culdecebil age sab waca qagu jeginanuca, deel gunnuca, jagel haunnuca, Juda agena cuha deelnuka loo je oso Cain mowain. <sup>17</sup> Ceteh i cunug eu ceteh hibna caligian hahun qoc qa ceteh bahic eu Krais. <sup>18</sup> Dana oso uqa ceteh oso codocna fenaca, uqa enselnu cuha fenaca, uqa uqadodoc ijan mahana uhuli mudinaca age dana eundec oso culdecebil age deweneganu je Cain um aqimej agena ameg me oiaun. Dana eundec uqa deweg hilahna cisdock toodona, odocob uqanel cisdock eu tutuc bahic ec cisdona. <sup>19</sup> Dana eundec uqa Krais, ege tamanec eguna ilo, hewec culen. Krais uqa ilowe deweg cunug cofldudu sab waca utina. Odocob deweg cunug uqana gomahin hilimanagana fagdu libec bilia eu ben mena, odiwe Anut uqa eu ben mecnu gale dona.

<sup>20</sup> Age Kraisca wele cal mein, odocob uqa mahanaadec tibud me qee agena gagadic odocnadek besiaden. Eunu age eetanu qila maha inadec dana cinigwe cobogina? Age eetanu mahanaadec loo je toodogina? <sup>21</sup> Loo je eu odi, ceteh eu Cain hewowain, odocob ceteh eu Cain ji fowain, odocob ceteh eu Cain qududowain. <sup>22</sup> Loo je eu ceteh cunug ege euna cabi ogona eu me qee mananu madena. Eu dana age dih loo je eu ifanimeig ege iwalgegina. <sup>23</sup> Eu mele, loo je agena gug eu cisdock silecca fec cinigwe. Loo je eu ensel cuha fecnu gagadic madena, odocob uhuli jogoi cobocnu madena, odocob dewenega qocnu madena eunu cisdock silecca fec cinigwe. Euqa uqa ege cesulgeceb dewenige hilahna kobil cilehdocnu ihoc qee.

**3***Ege Kraisca osoben cal mecnadec ceseli cajom*

<sup>1</sup> Age Kraisca osoben cal mecnadec ceseli cajein. Eunu age ceteh sao ohisna isec nijia eu ocnu ebebaceigale. Ono Krais kingna cabalna bilina, uqa Anut eben meulana isec bilina. <sup>2</sup> Mele, ceteh mahana nijia eu ocnu cain cisdownain. Ceteh sao ohisna nijia eu ocnu cisoigale. <sup>3</sup> Ge, age cal mein, odocob agena cebac biley eu Kraisca gami Anut dunuhna jahunec nijia. <sup>4</sup> Krais uqa eguna cebac biley gug, uqa isi camasac migian. Saen euna age uqa gami kobolkobolca camas moqagan.

#### *Cebac biley haun hilahca*

<sup>5</sup> Eunu age kobil me qee mahanaadec wawagana cabi ogina eu qocobil cal meia. Wal kobolca, kobil gegehin odocca, belicanaga me qeeca, gale adec me qeeca, odocob ceteteh mati bahic ocnu amaga qona. Ge, ceteteh mati bahic ocnu kobil eu odi kadan tibudnu cuha fec kobil cinigwe. <sup>6</sup> Dana age kobil i odoginanu Anut uqa dana age uqa feedogina eu ameg me qee wadacadijan. <sup>7</sup> Wele age kobil i toodu odoloig saenna ageha kobil ina coboloig.

<sup>8</sup> Euqa qila age kobil i edec cunug u qeleiga. Age gemanaga becca, olohonoga becca, sagagadecca u qeleiga. Age conogana um qoc jeca socaec jeca cain madowain. <sup>9-10</sup> Age wawaga hilah eu uqana kobolca wele culein, odocob age wawaga haun taqein. Anut uqa wawaga haun eu ifanen, odimeu uqa gaid waticdodoi Anut uqadodoc wiculdonia. Uqa age Anutnu du cuhadocnu odi odona. Eunu age oso uhuldocobdocob Cain owain. <sup>11</sup> Gug inu dana age qila silih filfil qee bilingina. Age Juda danaca, Juda dana qee eundecca, dana dewenega cagu qocca, dana dewenega cagu qee qocca, dana je filfil madecca, dana jobon qee biley, dana bega mehca, dana besiadecca, eu cunug age Krais himec. Dana cajaca cunug age wawaga haun taqein agenu ceteteh cunug eu Krais himec, Krais uqa dana cajaca eundec dunuh bilina.

<sup>12</sup> Age Anutna dana cajaca qagoc, uqa nalunuga mimei age uqana bilituqagannu nesili cedaden. Eunu age wawaga qocca, me odadecca, jogoi cobocca, gemanaga jocosaigca euca, lalafanagaca, eu age taqeigale. <sup>13</sup> Age cotoga oso uqa me qee odadecebfai age ameg me qee Cain wadacadowain. Age cotoga uqa oso kobil me qee odudennu jecafi uqa cotoga eu uqana me qee odo eu dahig celeiale. Tibud uqa agena silailnu dahig celen eunu age agena silailnuha dahiniga celecebcebeigale. <sup>14</sup> Ceteteh i cunug oso eu wooladec bilia, eu nalunuga mec. Age nalunuga mec taqeigale, eu ceteteh cunug jeladeceb osol me bahic bilingina. <sup>15</sup> Krais malol biley igina eu culdecebil age wawaga me cofdoiale. Ge, Anut uqa age malol biley i umeig age deweg osol biley utaaden. Odocob age Anut gaid hegaga doigale. <sup>16</sup> Kraisna je eu cehewanca bahic, eunu age culdecebil wawagana gagadic biliale. Age cisdoc silecca iwaldocobdocobii biley, dahiniga hewecebhewebeigale. Age samnaca, kalamnaca, due Kis Gun iwaladena eunaca Anut hegaga dudu biley wawagana binan soleigale. <sup>17</sup> Ceteteh cunug age odoginaca je madeginaca eu Jisas Tibud ijanna odoiagle. Age odi odoiagle age Jisas umna Anut ege Memige hegaga doigale.

#### *Pol uqa Kristen talnu maden*

<sup>18</sup> Aidagail, age Tibudna je toodu odoginawe eu odi age gemugailna je toodu odoiagle. <sup>19</sup> Dana, age aidagailnu nalunuga meigale, odocob age cabi cajaw Cain waadowain.

<sup>20</sup> Mel sim, age anagail memegailca jejenega cunug gaid toodu odoiagle. Ge, age odi odogina eu Anut gale dona. <sup>21</sup> Memegail, age dumanaga culiaunn agena mel mel aidca Cain gagaladowain.

#### *Pol uqa cabi dana bega meh cofadecanu maden*

<sup>22</sup> Begabeg meh cabi dana, age agena cofadec mahana bilingina agena je cunug toodu odoiagle. Age cofaadecbil quauadi age amagana cabi me ogina eu age cabi me ogina ec madecnu odi Cain odowain. Euqa age Tibudnu cucuieeg age wawaga osolna jejenega toodu odoiagle. <sup>23</sup> Age cel cabi ogina eu odocnu megameg meigale. Age dananu cabi oginawe Cain odowain qa Tibudnu cabi oginawe odi odoiaga. <sup>24</sup> Age dogina, Tibud uqa mugumuga mec uqana dana cajacanu hewena eu adigian. Age Krais Tibud cewel utogina. <sup>25</sup> Odocob dana cahuldoc odona eu Anut uqa uqana cahuldocnu ameg me qee wadacugian. Ge, Anut uqa begabeg meh cabi danaca cofadec danaca gug osolna dih ihocihoc gesiladene.

## 4

<sup>1</sup> Cofadec, agena cofadec eu saona gun bilina ec dogina. Eunu age agena begabeg meh cabi dana kobil me tutucna odadeigale.

#### *Ege gagadicca inondudu jic tutuc coboqale*

<sup>2</sup> Age inondocnu kobil gagadicca heweigale. Agena inondocna age cisdu cuhadumeig Anut hegaga doigale. <sup>3</sup> Saen euna dih age egenuha inondoiga, Anut uqa ege jic qahigeceb

uqana je dana cajaca maadecnu. Eunu ege Kraisna je jahunec sildiadi madeqan. Ge, ija Anutna je qasali maadem eunu gihacdoc jona bilingina. <sup>4</sup> Ija je jahunec eu sildiadi madecemin camasac migiannu inondoigale, odocob ija me je qasali maadigen eu odi Anut Gale dona.

<sup>5</sup> Dana cajaca age wawaga qee meleec bilegina eu age gemona agena cobocnu cisdu cuhadoiga. Age saen cunugna Kraisna coboc ihacadecnu saciadu bilingale. <sup>6</sup> Agena je eu gaid me bahic tinca madeigale. Odocob age dana cajaca cunug agena sisilec tutuc wadacduadoqagannu ihoc bilouh.

*Pol uqa Tikikas Onisimasca sulaleceb Kolosi ono belesin*

<sup>7</sup> Tikikas ege wawige meleec cotige bahic, uqa Tibudna cabi dana me bahic, uqa ege cabi hijige, uqa ijana je cunug saadigian. <sup>8</sup> Ija gug eunu ege adi biluqunanu doqagannuca, odocob uqa age wawaga gagadic mudiadigiannuca, uqa sulduadigina. <sup>9</sup> Odocob ija Onisimas<sup>\*</sup> Tikikasca osoben sulaligina. Onisimas uqa agena wawaga meleec cotoga me bahic, uqa agena cotogail amdec. Ale ceteh cunug ene calen eunu maadowasan.

<sup>10</sup> Aristakas uqa ijaca gihacdoc jona biluwuna uqa feele adec sulduadena. Odocob Mak, uqa Banabas gainag, uqaha feele adec sulduadena. (Ija Maknu je wele sulduademu, uqa ageca calecebfi age ehudeiga ec maadem.) <sup>11</sup> Josua age Jastas egina uqaha feele adec sulduadena. Ijana Anutna cul cabi hijel gemonadec dana cijed i age feele adec sulduadegina age himec Judadec. Odocob age ija geh bahic cesultein.

<sup>12</sup> Epafras uqaha age cabi cotoga oso, uqa Krais Jisasna cabi dana, uqa feele adec sulduadena. Uqa gaid Anut age cesuladecnu uqana inondocna cabi gagadic ona. Uqa Anut cesuladecb age wawaga meleec dana bahic tawoqagannu, odocob age Anutna gale doc cunug du cuhadoqagannu inondona. <sup>13</sup> Ija uqanu je i mele maadigina. Uqa ageca, wawaga meleec dana cajaca age Leodisia Hirapolisca ono bilinginaca cesuladigiannu cabi gagadic bahic ona. <sup>14</sup> Luk<sup>†</sup> egena dokta uqanu nalug moqona, uqa Dimasca ale alena feele adec sulduadesina.

<sup>15</sup> Age ijana feele adec cotigeil age Leodisia ono bilingina eu ageha adeigale. Odocob age Nimpaca tamanec uqana jona cegulegina euca ijana feele adec adeigale. <sup>16</sup> Odocob age jaqiadec i saniji hedumeig age suldocobil Leodisia tamanecna leia, age Kolosiha eu saniji doqagannu. Odocob jaqiadec ija Leodisia tamanec sulduademu ageha sanijuqagan. <sup>17</sup> Odocob age Akipas odi madoigale, “Cabi i hina Tibudnadec om eu odi me bahic odogale,” ec doigale.

<sup>18</sup> Ija Pol, ijadodoc ebenina feele adec i jaqiadigina.<sup>‡</sup> Age ija gihacdoc jona gaid bilingina eunu ijana cisoigale. Anutna eelgec uum igec eu ageca biliale.

---

\* **4:9:** Onisimas uqa Failimonna bega meh cabi dana. Age Pol uqa Failimon je jaqiton eu feiga. † **4:14:** Dana mati age Luk i uqa Lukna Me Jeca, Aposel Agena Cabi Occa jaqalen ec cisdogina. ‡ **4:18:** Age je 1 Korin 16.21na nijia eu feiga.

## Pol Uqa Jaqec Je Osoldoc Tesalonaika Tamanec Jaqiaden Aqunec Je

Tesalonaika eu taun ben oso Masedonia hatuna nijen. Masedonia eu Grik agena hatu euqa Rom age cofdon. Pol uqa Filipai culden saen euna uqa Tesalonaika nuimei ono Krais tamanec oso sanan men. (Age Aposel 17.1-9 feiga.) Euqa Juda age dana cajaca mati age Polna me je dumeig Kristen calein eu fimeig age Polnu gemanaga beceb Pol Tesalonaiknadec ititacdocobil Beria taun ono nuen. Hibna Pol uqa Korin bilen cabi hijag oso, Timoti, uqa humei uqa Kristen age Tesalonaika bilein eu ageca ceteh calennu Pol sadon.

Pol uqa Timotina je docob Pol gami Sailas Timotica age Tesalonaika tamanec agena wawaga meleec cesuldocnu jaqec je i jaqimeig sulduadein. Me je docca dana mati age jaqec je i Pol jaqen eu uqana jaqec je cunug Baibel bukna bilein eu aquniadena ec cisdogina.

Pol uqa Kristen haun age culumen gahidoc bilegina eu agena wawaga meleec gagadic mudecnu jaqen (3.3-5). Uqa Kristen age coboc soidoc cataniec biluqagannu jaqen (4.1-8), odimei Kristen leih agena cebac biley cabi oqagannu jaqen (4.11-12). Odocob Kristen leih age Krais uqa adi ceseli hugian eunu qee fogo adel. Age Krais qee ceseli hocna Kristen cal mein eu ageha cebac biley catanec oqaganfo? ec sisilegina. Odimeig age cel saen Krais ceseli hugian? ec sisilegina. Eunu Pol uqa ceteh eunu jejenega hewi maadena. Odimei uqa Tesalonaika Kristen age jic tutuc cocobi li Jisas Krais ceseli hoc deelna age tutucca cahuldocca qee eu camasac migian ec niniadena.

### *Je Dunuhnu Dado Mec*

1. Pol uqa Tesalonaika tamanecnu Anut hetaga dona (dac 1)
  - A. Tesalonaika agena wawaga meleec eunu hetaga dona (1.1-4)
  - B. Agena wawaga meleec eu mele bahic (1.5-10)
2. Pol uqa eetanu Tesalonaika tamanec odaden eunu madena (dac 2-3)
  - A. Uqa Tesalonaika ono cabi onnu madena (2.1-16)
  - B. Uqa eetanu Tesalonaika qee ceseli nelnu madena (2.17-3.10)
  - C. Uqa Anut cesuldocob Tesalonaika tamanecca lecnu inondona (3.11-13)
3. Pol uqa Tesalonaika tamanec age tutuc cobocnu niniadena (4.1-5.22)
  - A. Age wal kobil Cain odowain ec madena (4.1-12)
  - B. Tibud uqa ceseli humei gabangigian eunu madena (4.13-5.11)
  - C. Anut uqa Kristen tamanec cesuladeceb kobil me bahic oqagan eunu madena (5.12-22)
4. Inondoca, feele adecca, eeladecca (5.23-28)

<sup>1</sup> Ege Polca Sailasca, Timotica tamanec age Tesalonaika bilegina je i jaqiadoqona. Ageca, Memige Anutca, Jisas Krais eguna Tibudca gabanadec bilegina. Anut uqana eelgec uum igecca, malol bilecca eu ageca biliale.

### *Pol uqa Tesalonaika agena wawaga meleecnu ceelen*

<sup>2</sup> Ege age cunugnu gaid Anut hegaga doqonanu. Egena inondocna gaid age ijanaga oqonanu. <sup>3</sup> Age Jisasnu wawaga meleecceb kobil me bahic odogina euca, age Jisas nalug meginanu cabi me ogina euca, age Jisas Krais eguna Tibud uqa haun ceseli hocnu sumudi biley eu hewihewi tawegina euca eu cunug egena Anut ege Memige amegna gaid cisdudu inondoqonanu. <sup>4</sup> O wawige meleec cotigel, Anut age nalunuga mena. Odocob uqa nesili cedaden eu ege doqona.

<sup>5</sup> Ge, me je eu ege ageca ehi lom eu jena himec qee holom qa eu gagadic odoecnaca, Kis Gunnaca, ege me je cunug eu mele bahic ec doqona eu odi ageca ehi lom. Ege age gami bilom saen euna ege adi bilom eunu age adi bileyceu iwaladom eu age dogina.

<sup>6</sup> Odocob age geh sogoein age me je eu ceelecca Kis Gunnadec hocob oin. Eunu age egeca Tibudca toogi coboc dana ibuldoein. <sup>7</sup> Eunu Masedonia Akaiaca dana cajaca cunug wawaga meleen eu agena ihacadec calein. <sup>8</sup> Eu Tibudnu je madec eu cali humei agenadec himec Masedonia Akaiaca qee lel qa agena Anutnu wawaga meleecnu je eu cudun cunugnana nuen. Eunu ege je madecnu njija eu qee biley. <sup>9</sup> Dana cajaca cunug age adi ege oigein eunu magegina, ege li age feciadom saen euna. Eu odiha age adi kadan tibud culimeig falicdu Anut cewel utogina ec magegina. Odocob age mele cebac biley Anut cewel utogina gegina. <sup>10</sup> Odocob ageha Anut Melah uqa wele cal men eu Anut tulidocob

ceseli cajen eu sao jobonnadec haun ceseli camas migiannu sumudi bilegina gegina. Eu Jisas uqa Anut ege dana cajacanu gemag jawe beiaunnu cahahagigian.

## 2

### *Pol Tesalonaika ono cabi onnu maden*

<sup>1</sup> Ege wawige meleec cotigeil, age agedodoc ege meciadecnu ageca lom eu qee qolcodolom ec doin. <sup>2</sup> Ege ageca Tesalonaika ono qee calec ninijen age wele Filipai ono qigimeig je me qee magein ec doin. Euqa ege ageca hocomun eguna Anut wawige gagadic mudigecib ege engena cadnun qee cucuolom. Euqa ege Anutna me je qasali maadom. <sup>3</sup> Ge, ege qasali maadom saen euna ege quauadecca uhladecca qee maadolom. Odocob ege qee dadanadolom. <sup>4</sup> Euqa Anut uqa me je madec cabi eu ebenigena men eunu uqa cois maden. Eunu ege gaid Anut ege madecnu gale dona eu madom. Odocob ege dana mahaadec gale adigiannu cabi qee oqona qa ege Anut gale dugiannu cabi oqona, uqaha engena gug temdu fena. <sup>5</sup> Egeha je laloca quauadec jeca madecnana qee holom, ege cehewanaga ocnu jahuni qee odolom, eu ageha doin. Anut uqaha fen. <sup>6</sup> Ege agefo, dana leihfo egdedodocha binanige suluqagannu qee walolom. <sup>7</sup> Mele, ege Kraisna aposel dana eunu ege gale goubmi age cesulgeiga ec maadoum. Euga ege age gemona bibileb anag uqana melnu nalunuga mimi golaladenawe odi bilom. <sup>8</sup> Eunu ege agenu wawige cal menu ege agenu nalunuga mimi Anutna me je maadecnu eu himec qee saciadolom qa egdedodoc dewenige age adecnu wawige nijen.

<sup>9</sup> Ege wawige meleec cotigeil, ege Anutna me je qasali maaadeb jaenjaen cabi om, eu mele age dahiniga qee celel. Age cesulgecnu sab oso qee igilein ege witic cahinegca sab facnu cabi gagadic om.

<sup>10</sup> Ege age gemo bibileb enga kobil age wawaga meleec dana cajaca odadom eu gun bahic, eu ititom bahic, eu cahuldocta qee eu ageha Anutha fein. <sup>11</sup> Age dogina, memeg oso uqa melnu me odudanewe eu odi ege agenu me odadom. <sup>12</sup> Ege agenu cisdoc diuiec tawecnuca age wawaga gagadic mecnuka je maadom. Age cebac biley Anut uqa gale dona eu cobocnu je gagadic maadom. Anut eu uqa age uqana culna limeig Anut agena king bileyku uqana me biley ocnua utaaden.

### *Kristen age wawaga mele bahic eceb gagadic tatawi culumen gahidoin*

<sup>13</sup> Ege ceteh osonuha gaid Anut hegaga dudu inondoqonanu. Uqana gug eu odi. Ege Anutna me je maadocomun dah mein saen euna age je dananadec himec qee oloin qa age mele je eu Anutnaadec oin. Odocob je eu uqa age wawaga meleec dana cajaca eundec wawaga dunuhna cabi gagadic ona. <sup>14</sup> Ege wawige meleec cotigeil, Anutna tamanec age Judia hatu ono bileyina agena jic ageha toodoo coboin. Tamanec eu age Jisas Kraisca gabaniadi bileyina. Juda dana age tamanec eu dewenega tudocobil sogoein. Eu odi age cotogail agena hatuna bileyina ageha dewenega tudocobil sogoein. <sup>15</sup> Juda eu age Jisas Tibud qocobil cal men, age je hahun madec danaha aqeceil cal mein. Odocob age egeha aaqati tootoogein. Anut uqa agena odoc gale bahic qee dona! Age dana cunug agena cad tawegin. <sup>16</sup> Age Anut Juda dana qee eundec cahahaadecnu me je ege maadoqona euqa cahacgegin. Age eu odocna silail mec gaid am mi ihoc lena eu wadacadecc oqagannu odogina. Euqa Anut gemag bec wadacadecca eu qila i ageca hona!

### *Pol uqa Tesalonaika haun meciadecnu gale bahic don*

<sup>17</sup> Ege wawige meleec cotigeil, Juda dana age saen nag odi age gami filigandom. Eu engena cisdochna qee filigandolom qa ege dewenigena himec filigandom. Eunu ege agenu hoolom, age haun feciadecnu wawige gagadic nijen. <sup>18</sup> Ege ageca ceseli lecnu gale gena. Ija Pol, ijadodoc haun ceseli geh dom qa Seten cahacgen. <sup>19</sup> Ge, isi Jisas engena Tibud ceseli hocob cel cabi omnu ege ceeli bili uqa amegna gagadic taweqan? Eu age himec! Ege age cahahaaden eunu culai celeboeqan! <sup>20</sup> Mele, ege agenu wawige ceelena, age ege ijanigeca migegin.

## 3

### *Pol Timoti uqa Tesalonaika tamanec gagadic madecnu suldochob nuen*

<sup>1</sup> Age adiadi bileyina eunu hoolom qa ege docnu haun sumudecw qee. Eunu ege togodudu odi madom ele cuhanuc eu Atens taun ben ono bileywan ec madom. <sup>2</sup> Odocob ele Timoti suldochul uqa ageca len. Timoti uqa ege wawige meleec cotige, uqaha Anutna cewel utoc dana, uqa Kraisnu me je qasali maadec dana. Uqa age wawaga meleec cesuladecnuca, wawaga gagadic mudencnuca, suldochul len. <sup>3</sup> Qila age culumen gahidoc biley saenna oso waug guleliaunnu uqa age homoga cehigannu suldoh. Agedodoc dogina, Anut uqa wawige sogoecca, culumen gec gahidocca, ege wawige meleec dana

cajaca egeca suldona eu nijia. <sup>4</sup> Ge, ege ageca bilom saen euna ege maadom, "Wawige sogoecca, culumen gec gahidocca, eu egeca hugian," adom. Odocob ceteh eu calen eu age feginia. <sup>5</sup> Gug eunu ija haun sumudecwe qee. Eunu agena wawaga meleec adiadi nijia eu fecnu Timoti suldochomin ageca len. Wawige meleec temgec dana uqa hu age osooso faninadeceb egene cabi, ege age gemona om, eu gauc qee meiaunnu ija odi cisdom.

*Timoti je me bahic ahocob Pol waug ceelen*

<sup>6</sup> Qilaqa Timoti uqa nui feciadimei uqa ceseli hu je me bahic magen. Uqa age wawaga meleecca, age nalug mecebmecebecca, age egenu ha gaid cisdudu bileig ege haun mecigecnu cisdogina, ege age meciadecnu cisdogonawe eu fimei hu magen. <sup>7</sup> Eunu cotigie, agena wawaga meleec eunu mageceb dumeb egedodoc culumen gahidoc biluquna, culumen eu hetec migeceb wawige me men. <sup>8</sup> Eetanu? Age agena wawaga meleec eu Tibudca gabanadi tawegina eunu ege haun cebac me bahic biluquna. <sup>9</sup> Ege qila agenu Anut hegaga doqale. Ege agenu egene Anut amegna ceeloqona eunu hegaga doqona. <sup>10</sup> Ege witic cahinegca Anut uqa ege age olanaga fecnuca, age wawaga meleec naha ihoc qee lenafi eu cesuladecnuca, jic qahigeceb ege ono leqan ec ninidudu inondoqona.

*Pol Anut cesuldocob ageca lecnu inondon*

<sup>11</sup> Ege Memige Anutca Jisas egene Tibud uqa ege ageca nui feciadecnu jic qahigesiale. <sup>12</sup> Odocob ege agenu nalunuga moqonawe Tibud uqa odadeceb age cunug nalug mecebmecebecca, dana cajaca cunug nalunuga mecca, ihoc ligiannu adeiale. <sup>13</sup> Jic euna uqa age wawaga gagadic mudadigan. Eunu hibna egena Jisas Tibud gami uqana dana cajaca qagoc cunug hocobil age dewenega jeca qee qagoc bahic Memige Anut amegna tawoqagan.

## 4

*Ege wal kobil Cain odoqaun*

<sup>1</sup> O wawige meleec cotigeil, age Tibudca gabanadec bilingina eunu ege niniadoqona. Ege adiadi cobocomun, Anut uqa egene odoc fimei gale dugian, eu ege dado madocomun doin. Age jic tutuc odi cobogina eu mele. Euqa age jic tutuc coboc haunhaun odoigale eu odiwe age qila odogina.

<sup>2</sup> Ge, dado madec je ege Jisas egene Tibud ijanna adom eu age dogina. <sup>3</sup> Anutna gale doc eu odi. Agena coboc eu qagoc bahic nijigianu, age wal kobil hibemdoqagannu Anut gale dona. <sup>4</sup> Eunu age dana abesabes kobil soidoc bilingina age belicanaga cilehdoiga.\* <sup>5</sup> Haiden age Anutna qee dogina age golanaga me qeenu sililec toodu cotogail agena cajaca cobocnu sisi jeled wagalegina, eu agena odoc odiwe Cain bahic nijaun. <sup>6</sup> Silail mec ina dana oso uqa cotig fanindumei kobil me qeena Cain odudeiaun. Ege wele ceteh inu cunug Tibud uqa ameg me qee wadacadigan ec gagadic maadocomun doin. <sup>7</sup> Ge, Anut uqa wawige gegehinca cobocnu qee utagel qa uqa egene coboc eu soidoc cataniec migiannu utagen. <sup>8</sup> Eunu oso je eu cewudina eu uqa danana je qee cewudina eu uqa Anutna je cewudina. Anut eu uqa uqana Kis Gun age adena ec cisdoiga.

*Ege kobil me odoc cunug gagadic tawigiannu odoqale*

<sup>9</sup> Wawaga meleec cotigcotignu nalug mecnu iwaladigen ija odi jaqiadecwe qee. Ge, Anut uqadodoc nalug mecebmecebeccnu iwaladen. <sup>10</sup> Eu mele, age cotogail Masedonia hatu cunugna bilingina eunu nalunuga megina. Euqa ege niniadoqona, cotogail cunugnu nalunuga mec haunhaun odoigale eu odiwe age qila odogina. <sup>11</sup> Age cebitna bilingina, agena ceteh cofadecnuca, gagadic cisdoigale. Odocob agena cebac bilingina age wele cal mein eu cel ceteh agenu caligian eu doqagannu gale gena. <sup>14</sup> Ege Jisas cal mimei haun ceseli cajennu wawige meleena eunu ege doqona, leih age Jisasnu wawaga meleecab cal mein eu Anut uqa cedadimei Jisasna gabanadecab age uqa gami ceseli hoqagan.

*Tibud uqa ceseli humei gabangigian*

<sup>13</sup> Ege wawige meleec cotigeil, wawaga qee meleec dana cajaca age waloc adenawe odi age qee waloc adeiaunnu gale gena. Dana cajaca eundec age Anut cal mecnadec tuliadecab haun cebac biluqagannu qee sumudegina. Eunu age dana cajaca age wele cal mein eu cel ceteh agenu caligian eu doqagannu gale gena. <sup>14</sup> Ege Jisas cal mimei haun ceseli cajennu wawige meleena eunu ege doqona, leih age Jisasnu wawaga meleecab cal mein eu Anut uqa cedadimei Jisasna gabanadecab age uqa gami ceseli hoqagan.

\* **4:4:** Grik je ina uqana gug eu camasac qee. Dana leih age odi falicdogina. Eunu age dana abesabes caja umeig cajaca kobil soidoc nijia odiwe bilingale. Age dana osona caja cajaca Cain nijuwan.

<sup>15</sup> Ge, je ege qila iwaladoqona eu Tibudna iwaladec je, ege Tibud ceseli hoc deel euna cebac coboqona ege dana cajaca wele cal mein eundec qee aquniadogoqan. <sup>16</sup> Ge, Anut uqa gagadic maadeceb ensel matu uqa jejeg ben utaeceb Anutna taul fuldocob Tibud uqadodoc sao jobondes toni nigian. Odocob leih age Jisasnu wawaga meleeces cal mein eu age casac ceseli cajimeig cebac biluqagan. <sup>17</sup> Odocob ege qee cal molom cebac biluquna eu cajocomun eundec age gami taenna gabandumeb ege sao ohisna Tibudca gulucdadaneqan. Euna ege Tibudca odi bilocomun catanigan. <sup>18</sup> Eunu age je euna wahohogdocobdocobi bileigale.

## 5

### *Tibud ceseli hugiannu saciadu biluqale*

<sup>1</sup> O wawige meleec cotigeil, ege cel deelna, cel saenna ceteh eu cali hugiannu je jaqiadeqan ec madecnu qee nijel. <sup>2</sup> Heje dana uqa witic tuna honawe eu odi Tibudna deel hugian, eu agedodoc ha du cuhadogina. <sup>3</sup> Saen dana cajaca madoqagan, “Ege qila tiliec malol me bahic biluquna,” oqagan saen euna himec fadalec eu quqahiu ageca hugian. Eu caja waugca cobona dain ben dodon ugana mel basec saen cali hocob isabudi ququlubdonawe odadigian, eu busalecn jic oso qee nijiaun. <sup>4-5</sup> Euqa ege wawige meleec cotigeil, age cunug fulacdona dana, age cahinegna coboc dana. Ege witicna dana qee, ege tucana qee biluquna. Eunu deel eu heje dana uqa oso ququlubdonawe odi age filicitadecnu qee nijel eunu age tucana qee bilinga. <sup>6-7</sup> Dana age us njegina age witic us njegina. Odocob dana age ceu jecebile dalul aqena age witic ceu jecebile dalul aqena. Eunu leih age us njeginaw ege odi cain us nijuqaun. Euqa ege amige cebac biluqale, ege dumanige cofdoqale. <sup>8</sup> Euqa ege cahineg coboc dana eunu ege dumanige cofdoqale, ege cisdocko doc biluqale. Ege Anutnu wawige meleeciale, ege Anutnu nalug moqale. Ege odi odoqonanu ege han bala gagadic tacqonaw. Ege Anut caahahagecnu sumuduqale. Ege odi odoqonanu ege han katakat gagadic gubodogonaw. <sup>9</sup> Anut uqa ege uqa gemag bec ocnu qee madel. Euqa Anut uqa Jisas Krais egena Tibud uqa caahahigian ec maden. <sup>10</sup> Jisas uqa ege cebac biluqunafo, qee ege cal mec biluqunafo ege uqaca cebac bileqannu egenu cal men. <sup>11</sup> Eunu age dahig heweceb heweceb cesuldocobdocobi bileigale. Age wele odoloig eu odi odoigale.

### *Anut uqa Kristen cesuladeceb kobil me bahic oqagannu ihoc*

<sup>12</sup> O wawige meleec cotigeil, ege niniaqoqona, age gemo Tibudna cabi ogina, eu agena cofadec bibili agena jic tutuc cobocnu iwaladegina eundec conoga toodu odoigale. <sup>13</sup> Age cabi ogina eu agenu nalunuga mimi saolal madeigale. Odocob age wawaga osolna malol bileigale.

<sup>14</sup> Ege wawige meleec cotigeil, ege cesusaadi maadoqona, cotogail age alal adena eundec tutuc maadeigale, cotogail wawaga cucuiena eundec wawaga gagadic mudiadeigale, cotogail gagadicca qee eundec cesuladeigale. Cotogail cunugnu lalafan adeigale.

<sup>15</sup> Oso casasic odadeces casasic odudecna wadacdocnu cain cisdowain. Euqa age gaidgaid wawaga meleec cotogailnuca, dana cunugnuca, kobil me odadecnu jic waleigale.

<sup>16</sup> Age gaid ceeli bileigale. <sup>17</sup> Age Anutnu gaidgaid inondoigale. <sup>18</sup> Age adiadi oodadeb biluqagaqa age Anut hetaga dudueigale. Age Jisas Kraisca gabanaadec bilinga eu odi odoqagannu Anut madena.

<sup>19</sup> Kis Gun ja gowocob eu cain cafalowain. Saen Kis Gun uqa age suladeceb ceteh oso odocun age cain cahacdowain. <sup>20</sup> Dana Kis Gun cesuladeceb je maadeginna eundec cain cewadowain. <sup>21</sup> Euqa ceteh cunug temdu feiga. Me dih nesili heweiga. <sup>22</sup> Qisol mec kobil cunug qisacdoiga.

<sup>23</sup> Anut uqa malol biley gug uqa agena wawaga cunug soidudu eeladeiale. Uqa agena kisca age dolonoga dewenegaca eu cofdudu heweiale. Odocob egena Tibud Jisas Krais ceseli hoc deelna age tutucca cahuldocca qee eu camasac migian. <sup>24</sup> Utaaden eu uqa nalug mecca. Uqa wawagana cabi oc sanan men, uqa cabi eu qee ihoc lec qee culiaun.

<sup>25</sup> Ege wawige meleec cotigeil, age egenu inondoiga.

<sup>26</sup> Age wawaga meleec cotogail cunug cotadec gunna feele adeigale.

<sup>27</sup> Ija Tibud amegna maadigina, jaqiadec i wawige meleec cotigeil cunug doqagannu sanijiadeigale.

<sup>28</sup> Egena Tibud Jisas Kraisna eelgec uum igec eu ageca biliale.

## Pol Uqa Jaqec Je Lecisdoc Tesalonaika Tamanec Jaqiaden Aqunec Je

Tesalonaika tamanec age Krais ceseli hugian saenna cel ceteh bahic caligian eunu geh cisdoen eu odi fena. Leih age Tibudna deel wele hon ein. Eunu Pol gami Sailas Timotica age tamanec agena cisdoc tutuc mudecnu jaqec je i jaqiadein.

Pol uqa Tibudna deel eu qee hol ec madena. Uqa Tibudna ceseli hoc deel eu hugia oodob casac Anutnu wawaga meleec felacudec ben caligian, odocob loo je wooldoc danaha camasac migian ec madena. (Eu 2.1-12 feiga.)

Pol uqa tamanec age agena wawaga meleecna gagadic tataweig culumen gahidoqagan ec madena. (Eu 1.4-10 feiga.) Age wawaga duuiiale, wawagaha me odocnua je me madecnua odeigale ec madena. Odimei wawaga meleec cotogail leih age alal adena, age cabi qee ogina. Pol uqa cotogail eu age tutuc cabi oigale, age sab age ebenega cabi ocna camas mena eu jeigale ec madena. (Eu 2.13-3.15 feiga.)

### *Je Dunuhnu Dado Mec*

1. Aqunec je (dac 1)
  - A. Feele adec je (1.1-2)
  - B. Pol uqa Tesalonaika tamanec agena wawaga meleecca, agena nalunuga mecca, agena culumen gahidocca eunu Anut hetaga ena (1.3-10)
  - C. Uqa Tesalonaika agena wawaga meleec eu gagadic mudigiannu Anut inondona (1.11-12)
2. Pol uqa agena cisdoc tutuc mudina (dac 2)
  - A. Tibudna deelnu je (2.1-12)
  - B. Anut uqa Tesalonaika age cahaahadecnu ehadennu je (2.13-15)
  - C. Uqa age cabi me ocnua, me je madecnua inondona (2.16-17)
3. Pol uqa tamanec age eeta odoqagannu je (dac 3)
  - A. Age inondoqagan (3.1-3)
  - B. Age leih alal adena, cabi qee ogina eu tutuc madoqagan (3.4-15)
  - C. Cit qoc jeca, feele adecca, eeladecca (3.16-18)

<sup>1</sup> Polca, Sailasca, Timotica ege tamanec Tesalonaika bilegina eu age jaqiadoqona. Age Anut ege Memigena Jisas Krais eguna Tibudnaca tamanec. <sup>2</sup> Memige Anutca Jisas Krais eguna Tibudca alena eelgec uum igecca malol bilecca adesiale.

### *Tesalonaika age gagadic tawein saen culumen oin euna*

<sup>3</sup> O wawige meleec cotigeil, age Anutnu wawaga meleec eu meca mena, odocob age cotigcotignu nalug mec euha meca mena. Eu oso qee odona ec qee nijel. Eunu ege agenu Anut gaigaid hegaga docnu cabi eu dewenigena njija. Eu odocnu silig mele njija.

<sup>4</sup> Eunu egedodoc Anutna tamanec filfil amagana age ijanaga saolal mumudi agenu culai maadoqona. Age aaqati tootooadecnaca, gihacadec bilecnaca agena wawaga meleec eu duuec taweginna eunu ijanaga saolal mumudi agenu culai maadoqona.

### *Anut uqa ege kobol mena gesililgecnu dona*

<sup>5</sup> Ceteh eu cunug ageca calegina euna Anut uqa odi ihacgena, uqa ititom kobolna gesiligina, odocob uqa eguna kobol temdu fena. Age Anutna cul dunuh lecnu gale adena eunu age culumen adec gahidogina. Odocob Anut age uqana cul dunuh limeig biluqagannu ihoc odadena. <sup>6</sup> Anut uqa kobol tutuc eu odigian. Oso age odadecebile culumen gahidoen eu Anut uqa age odadeceb culumen gahidoqagan. <sup>7</sup> Odimei uqa age qila dewenega tudoc gahidogina, age egeca jaen mudec igigian. Eu Jisas Tibudca uqana ensel age gagadic odocca age ja belanca camas mecnana sao jobondec noqagan saen euna Anut odi odigian. <sup>8</sup> Odimei uqa dana age Anutnu qee doginaca age Jisas Tibudna me je qee toodoginaca ameg me qee wadacadijan. <sup>9</sup> Odocob age ameg fadalec catanec oqagan. Age Tibudna fulacdoc ben biley gagadic odocca euna qee biluwain, odocob uqa cemenug qee biluwain. <sup>10</sup> Uqa deel euna ceseli hocob uqana dana cajaca qagoc cunug age camasac mecebile uqa euna binan ben ugian, odocob wawaga meleen dana cajaca cunug age binan suluqagan. Age je ege maadomnu wawaga meleen eunu ageha eu age gemo biluqagan.

### *Age Tesalonaika gagadic madigiannu Anut inondoin*

<sup>11</sup> Ceteh eu caligiannu egena cisdoc nijia eunu ege agenu gaid inondoqona. Ege age ititom coboc biluqagannu utaaden eu uqa agenu madi, age eu ititom cobocnu ihoc bilegina, igiannu gaid egena Anut jena inondoqona. Uqa uqana gagadic odocna age me odocnu gale adenaca, agena wawaga meleec cabi onaca, eu cunug ihoc ligiannu inondoqona. <sup>12</sup> Jic euna age egena Jisas Tibud ijan binan ben utuqagan, odocob uqa age binanaga ben adigian. Odocob egena Anutca Jisas Krais Tibudca alena eelgec uum igecka odadecebilet eu cunug caligian.

## 2

### *Loo je wooldoc dana uqana saennuje*

<sup>1</sup> O wawige meleec cotigteil, egena Tibud Jisas Kraisna ceseli hoc deelnuka, ege uqaca gabangecnuca qila je i maadecnu gale gena. Age dahiniga qolocjeiga. <sup>2</sup> Age Tibudna deel wele honnu ec je oso dah mifeig age dahiniga cisdoc cain ihulahal meiaun, age cain mahue filicituwain ec niniadoqona. Age je hahun madec dana osofo, me je qasali madec dana osofo je i maden ec cisdoginafa? Age ege je i jaqidam ec cisdoginafa? Eu odifi je i wawaga cain meleeciaun. <sup>3</sup> Tibudna ceseli hoc deel eu hugia oodob casac Anutnu wawaga meleec felacudec ben caligian, odocob loo je wooldoc danaha camasac migian. Dana eu uqa oloqanhina fadaligian. Eunu age cel jicna oso culdecebile humei cain quadeiaun. <sup>4</sup> Uqanel culaimei ceteh cunug dana age tibud egina, ceteh cunugnu dana age cuha fegina uqa agenu teigian. Odocob uqa Anutna tempel dunuh limei Anutna cabal bielecna bilimei madi, ija Anut, igian.

<sup>5</sup> Ija wele ageca bibili je eu cunug maadem, je eu dahiniga qee cisdoginafa? <sup>6</sup> Ceteh oso eu loo je wooldoc dana eu qila bahic caleiaunnu cahacdonu eu ageha dogina. Uqa uqana saenna bahic camasac migian. <sup>7</sup> Ge, qila loo je gesac mumudi filei odoc jahunec nijia. Eu jahunec niji li Anut uqa oso ceteh eu caleiaunnu cahacdonu eu jic isa qutugian. <sup>8</sup> Odocob loo je wooldoc dana camasac migian. Euqa Jisas Tibud ceseli humei uqa dana eu co kisna fadaldugian, uqana camasac mec iletceeb qee migian. <sup>9</sup> Loo je wooldoc dana eu Seten odocob camasac migian. Seten uqa uqana gagadic odoc cunug uteceb uqa uhulec kobolkobol odoc dana cajaca ihacadigian, uqa euna dana cajaca ququadigian. <sup>10</sup> Odocob uqa dana cajaca fadaloqagan eu uhulec filiflin ququadigian. Eetanu dana cajaca eundec age fadaloqagan? Age mele jenu nalug qee mimeig Anut caahahaadecnu culein. <sup>11</sup> Age odi odoinnu Anut uqa faninadec je ageca hugia oodon eu qee cahacol. Faninadec je eu gagadic odocca hocob eunu age uhulec je eunu wawaga meleigian. <sup>12</sup> Eu odinu dana cajaca cunug age mele jenu wawaga qee meleel qa silail mec kobolnu gale aden eu Anut uqa maadigian, “Age silail dana cajaca,” adigian.

### *Anut uqa casac age caahahaadecnu ehaden*

<sup>13</sup> O wawige meleec cotigteil, Anut uqa casac age caahahaadecnu nesili cedaden. Eunu egena Tibud uqa age nalunuga manetu ege gaidgaid Anut hegaga doqale. Uqa Kis Gunna gagadic odocna odadeceb age Anutna dana cajaca ititom ibuldoinnaca, age mele jenu wawaga meleenaca, caahahaadecnu ehaden. <sup>14</sup> Age odi biluqagannu Anut uqa age ege me je maadecna utaaden. Eunu age Jisas Krais egena Tibud binan ben eu oqagan. <sup>15</sup> Eunu ege wawige meleec cotigteil, age gagadic taweigale, me je ege conigena maadocomun oinca ebenigena jaqidocomun oinca iwalandom eu hewihewi taweigale.

<sup>16</sup> Egena Tibud Jisas Kraisca Anut ege Memigeca ale nalunige mesina. Anut uqa eelgec uum igimei wahohoggeceb catanena, ege uqa caahagecnu sumudi biluquna. <sup>17</sup> Age eunu wawaga duuiale, wawagaha me odocnuca je me madecnuca cesuladeiale.

## 3

### *Egenu inondoigale*

<sup>1</sup> Ege wawige meleec cotigteil, ege je osoha maadoqona. Age Anut cesulgeceb Tibudna je agena gemona memeli cunug ihoc lenwe odi Tibudna je memeli mahucwe mahamaha cunug ihoc ligiannu, odocob age Tibudna je binan suluqagannu inondoigale. <sup>2</sup> Age Anut ege qisol mec dana me qee bahic eundec ebeneganadec caahagigiannu Anutha inondoigale. Ge, dana leih age wawaga meleecnu dumanaga qee nigel.

<sup>3</sup> Euqa egena Tibud uqa nalug mecca, uqa kobol mele odona. Eunu ege uqanu himec wawige meleigian. Uqa age gagadic odoc adigian, uqa qisol mec dana waadeiaunnu cofadigian. <sup>4</sup> Odocob Anut cesuladeceb age qee abusildowain ec cisdoqona. Je ege maadom, odocob je ege maadoqona, age odi toodu odogina eu mele doqona.

<sup>5</sup> Tibud uqa age wawaga dado madeiale. Odocob age Anut uqa ugana dana cajaca cunug nalunuga menaca Krais uqa culumen sogoec gahidudu duuec tawenaca eunu du cuhadoigale.

*Dana cunug age cabi oqagan*

<sup>6</sup> Ege wawige meleec cotigil, egena Tibud Jisas Krais ijanna ege je gatiti maadoqona. Age wawaga meleec cotoga oso uqa kobil me odocnu dado mudec je age egenadec oin eu cuculi qee toodoo odona, uqa alal dona, cabi qee ona. Cotoga eu qisacdoiga. <sup>7</sup> Ge, age agedodocha dogina, ege wele coboc ihacadom odi ageha coboqagan. Ege age gemona bibileb ege qee alal gel, ege cabi om. <sup>8</sup> Ege agena sab gauc qee jolom, agena sab cunug fajom. Ege witic cahinegca cabi doot bahic om, eu age ege ceteh igechnu culumen adeiaunnu odi odom. <sup>9</sup> Egeha agena sab cetehceteh gauc oummiqa eu odi odocnaha silail qee moum. Ege gauc ocnu eu cois bahic. Euqa ege age me odo ihacadec age eu odo toogi odoqagannu odom.

<sup>10</sup> Ege ageca bibili je gatiti odi maadolob, "Oso cabi oc culina eu ugaha sab qee jeiaun," adolob. <sup>11</sup> Ge, je oso age gemodec egeca cali hon, je eu odi. Age leih cabi oc cuculi alal adena, age je ilag mamadi cobogina ec mamadegin dah mom. <sup>12</sup> Ege Jisas Krais Tibud ijanna dana odi odogina eundec je gatiti maadoqona, age tutuc cabi oigale, age sab age ebenega cabi ocna camas mena eu jeigale.

<sup>13</sup> O wawige meleec cotigil, me odocnu Cain dewenige tolocob belogaun. <sup>14</sup> Dana oso uqa je ege jaqec ina jaqiadom cewududu toodoo qee odocobfi age camas mudimeig ugaca Cain cobowain. Odocob uqa majag dugiannu hibemdoigale. <sup>15</sup> Euqa dana eundec agena cad ec qee cisdogina qa age cotogawe uqa haun tutuc miigliannu dado mudeigale.

*Pol uqa cunug feele aden*

<sup>16</sup> Tibud uqa malol biley gug, uquadodoc age saen cunugnana jic cunugnana malol biley adeiale. Tibud uqa age abesabesca li biliale.

<sup>17</sup> Ija Pol, ijadodoc ebenina ha feele adec jaqigina eu ihen. Jaqec je eu fimeig age, mele Pol jaqen eu camasac foqagan. Ija ebenina ijana feele adec jaqec je cunugna jaqigina odi jaqiginanu.

<sup>18</sup> Egena Tibud Jisas Kraisna eelgec uum igec eu ageca hu biliale.

**Pol Uqa Jaqec Je Osoldoc  
Timoti Jaqiton  
Aqunec Je**

Timoti uqa Kristen dana haun oso, uqa Listra taundec. Listra eu Galesia hatuna nijen. Uqa anag eu Juda, uqa memeg eu Juda qee, eu Griek. Pol uqa Timoti ehudeceb uqa Pol gami hatuhatu cocobosi me je qasali maadesin. (Age Aposel 16.1-3 feiga.) Pol uqa uqana cabi coboc 4-peladocna Masedonia hatuna nunuei uqa Timoti Efesas tamanec cofadigiannu madon. Hibna uqa mahuc Efesas ono qee ceseli nuaun ec cisdumei uqa Timoti jaqec je i jaqiton.

Ceteh osonu Pol uqa Timoti jaqiton eu odi. Dana leih tamanecna bilegina agena cisdoc eu tutuc qee. Age ceteteh cunug maha ina bilegina eu me qee ec iwaladegina. Odimeig dana uqa cebac biley catanec ocnu gale dona eu uqa sab leih cain jieau, uqa caja cain oiaun ec iwaladegina. Eunu dana eundec age tamanecna wawaga meleec me qee meiaundainnu Pol uqa dana eundecnu Timoti ulauldona.

Ceteh osonu ha Pol uqa jaqiton eu odi. Uqa tamanec age cuha fec tutuc odoqagannuca, tamanecna cabi me oqagannuca Timoti jaqiton. Odimei uqa cel dana tamanec cofadecfo, cesuladec cabi danafo caligiannu jaqiton.

Cit qoc jena Pol uqa Timoti Jisas Kraisna cabi dana me bahic biligiannuca, Timoti uqa tamanec dana cajaca cofadi cuhadugiannuca jaqiton.

*Je Dunuhnu Dado Mec*

1. Feele adec je (1.3-11)
2. Pol uhulec iwaladec dananu ulauldona (1.3-11)
  - A. Uqa uhulec iwaladec gug silditona (1.3-7)
  - B. Mosesna loo je gug (1.8-11)
3. Pol uqa Anut uqanu waug qon eunu hetaga dona (1.18-20)
4. Timoti uqa me je hewimei Anutna cad gami han cadec me bahic cadigiannu je jaqitona (1.18-20)
5. Tamanec cofadecnu je (dac 2-3)
  - A. Tamanec agena cuha fec (dac 2)
    1. Age dana cajaca cunugnu Anut inondoqagan (2.1-8)
    2. Caja age tamanecna adi biluqagan (2.9-15)
  - B. Tamanec cofadec age ititom kobil coboqagan (3.1-13)
    1. Tamanec cofadec matu agena coboc (3.1-7)
    2. Tamanec cesuldoc cabi dana agena coboc (3.8-13)
  - C. Anutna kobolnu je gug (3.14-16)
6. Uhulec je iwaladec (dac 4)
  - A. Uhulec je iwaladec uqana gug (4.1-5)
  - B. Timoti uqa uhulec je iwaladec adi cilehdugian (4.6-16)
7. Timoti uqa tamanecna am filfil adi cofadigian (5.1-6.2)
  - A. Dana toiaci dana haunca adi cofadigian (5.1-2)
  - B. Caja wij adi cofadigian (5.3-16)
  - C. Tamanec cofadec matu adi cofadigian (5.17-25)
  - D. Cabi dana bega meh adi cofadigian (6.1-2)
8. Ceteh filfil (6.3-19)
  - A. Uhulec iwaladec dana (6.3-5)
  - B. Meen qaig ocnu gawec kobil (6.6-10)
  - C. Timoti uqa cebac biley catanec gagadic hewigian (6.11-16)
  - D. Dana cehewanagaca (6.17-19)
9. Timoti uqa uqana cabinu cofdu cuhadugian (6.20-21)

<sup>1</sup> Ija Pol, ija Krais Jisasna aposel. Anut uqa agena Cahahagec. Ege Krais Jisas caahahagecnu sumuduquna. Ale madecebil ija aposel calem.

<sup>2</sup> Timoti, hina wawi meleec melami bahic, ijana jaqec je i jaqihigina. Anut ege Memigeca agena Tibud Jisas Kraisca ale eelhec uum ihecca, waug qocca, malol bilecca ihesiale.

*Ele uhulec je cunug cilehdowale*

<sup>3</sup> Ija wele Masedonia ono nuige bili cuculihi cesushihi mahem, hina Efesas ene biliga hem, eu odi haun cesushihi mahigina. Ija mahem, "Hina Efesas ono dana leih age me je cuculdi faninadec je filfil dana cajaca iwaladegina eu gagadic maadaga, 'Age faninadec je

filfil cain iwaladowain, age me je bahic iwaladeiga. <sup>4</sup> Ageha dodo gauc saadecca, agena sihil sanijecca, age asagail ijanagana je eu mamadi fee dadanec cali hona eu cunug culeiga,’ adaga,” odi mahem. Eetanu? Je euna dih fee dadaneginanu. Iwaladec eu age adi Anutna ititom coboc odocnu qee iwalgegina. Ege ititom coboc eu wawaga meleecna himec odoqona. <sup>5</sup> Euqa ititom coboc Anut magen uqana sis qoc eu nalug mec. Ege wawige silailca qeefi, ege wawige catanieccafi, ege Jisas Kraisnu wawige mele bahic enafi, ege wawige meleec cotigelnu nalunuga moqona. <sup>6</sup> Dana leih age kobil i culein. Odocob age je gauc dihnu mamadi ilag gad fahalegina. <sup>7</sup> Age Mosesna loo jenu iwaladec dana caloqagannu odogina qa je inu age madeginaca, uqana gug eguna je i mele bahic eginaca eu agedodoc qee fogo adena.

<sup>8</sup> Ege doqona, oso uqa loo jena jic tutuc cobonafi loo je eu me. <sup>9</sup> Euqa egeha doqona, loo je gug eu odi. Loo je eu dana tutuc coboginanu je oso qee madena. Euqa dana age loo je wooldudu bisalu qee bilegina eundecca, dana age Anut hibemdudu silail kobil odogina eundecca, dana age Anutna kobilnu odi fena imeig mahanadec kobil toodogina eundecca, dana uqa anag memegca qagaalena eundecca, dana uqa oso qagadona eundecca, <sup>10</sup> dana age cajaca wal kobil odogina eundecca, dana age danaca Sodom agena kobil odogina eundecca, dana age dana cajaca heje cedegina eundecca, uhulec danaca, dana age uhulimeig mele ohis ec madegina eundecca, dana cunug age ititom cobocnu mele je iwalgena eu tefacdogina eundecca, dana eundec cunugnu loo je niniji je maadena. <sup>11</sup> Mele je i eu me je Anut uqa ija maadecnu iten euna bilia. Me je i uqana gug eu binan benca, eu Anut ege binan suluqale uqana me je.

### *Anut Polnu waug qon eunu hetaga don*

<sup>12</sup> Jisas Krais egena Tibud uqa cabi i ocnu gagadic iten. Uqa ija ugana cabi ihoc ugian imei cabi euna miten. Eunu ija hetaga dugina. <sup>13</sup> Mele, wele ija gaid uqa ijannu je me qee madolig, odocob ija uqa jabudi tootoodolig, odocob uqa deweg tudolig. Euqa ija uqana gug qee du cuhadolom, ija wawi qee melecebnu eu odi oodi bilem eunu uqa ijanu waug qona. <sup>14</sup> Odocob egena Tibud uqana eelgec uum igec ben eu basecdumei wawi meleecca uqanu nalug mecnuca iten eu egena Krais Jisasab gabangec.

<sup>15</sup> Krais Jisas ege silail dana cajaca cahahagecnu maha ina toni nen ec madec eu mele bahic. Je madec eu dana cajaca cunug dumeig wawaga meleigianu ihoc nijia. Ijaha silail dana, ija silail dana cunug wooladec. <sup>16</sup> Euqa Jisas Krais uqa silail dana cajacanu waug qona eu cunug du cuhadocnu waug nijia. Odocob uqa ijanu waug qon, ija silail dana cunug wooladec. Ija wa dodwe, odocob dana cajaca cunug Jisas Krais uqa adi ija oditen eu fimeig age uqanu wawaga meleecb age cebac biley catanec eu oqagan. <sup>17</sup> King saensaen cunug cal mewce qee, eu uqa fecwe qee, uqaduh Anut bilia eu binan sulocomun cataneiale, uqa kobil kobilca biley cataneiale! Mele.

### *Timoti uqa ceteh me qee cilehdugiannu gagadic meiale*

<sup>18</sup> Ija melami Timoti, hina eeta odocnu je i mahigina. Je i eu je hahun madec dana age wele hinanu madein eu toodoga. Hina je i hewimeg Anutna cad gami han cadec me bahic cadagale. <sup>19</sup> Hinana cadec eu odi. Hina wawin meleec gagadic hewagale. Hinana cisdoc silec eu hina silail magana ec qee madeiale. Dana leih age agena cisdoc silec qee dah mimeig age wawaga meleec wagalein. <sup>20</sup> Dana eundec gemonadec oso Haimeniasca Aleksandaca. Dana eu ale ulaulaleceb ale Anutnu je me qee madesina eu culuwasannu ija Seten ulaulaligiannu ebenna culalitom.

## 2

### *Ege Anut dana cajaca cunug cesuladigiannu inondoqale*

<sup>1</sup> Ija casac ulichigina. Ija ninihigina, hina tamanec dana cajaca odi maadaga, age dana cajaca cunugnu Anut cesuladigiannu inondoigale, ec adaga. Age binan suleccca hegaga docca Anut inondoigale. <sup>2</sup> Age kingca gabman danaca eundecnu ha age odocobil ege malol bileyca ititomca binanaga meca ege gemona cobocnu nijigiannu inondoigale. <sup>3</sup> Inondoc i edi eu Anut amegna me bahic. Egena Cahahagec odi uqa gale ben dona. <sup>4</sup> Uqa dana cajaca cunug cahahadijannu odona. Odocob age mele je uqana gug doqagannu gale dona. <sup>5</sup> Ge, Anut osol himec bilia, Anut danaca tanawi tawecnu osol himec eu dana eu Jisas Krais tawena. <sup>6</sup> Uqadodoc deweg ihandon, eu odocna dana cajaca cunug besiadigiannu ceseli fajen. Jisas Krais uqadodoc deweg ihandon saen euna dih Anut uqa dana cajaca cunug cahahadijannu odona eu camasac men. <sup>7</sup> Gug inu Anut uqa ija ulicadecca aposelca cobigennu nesili ehiten. Ija je qee uhuligina, ija je mele madigina. Anut ija Juda dana qee eundec Jisas Kraisnu wawaga meleecca mele jeca ulicadecnu miten.

<sup>8</sup> Ija maadigina, dana cunug age tamanec jonana inondoigale. Dana eu age Anut ijan saolal mumudi ebenega suli u inondoigale. Age inondodoig gemanaga becca fee dadaneca qa cain bahic odowain.

*Kobol me odoc eu caja agena bala me bahic*

<sup>9</sup> Eu odi ija cajaha maadigina, age lotoc ceteteh me eu dewenega jaunecnu ihoc dih taceigale. Age deboecnia gosiniga cubusecca, dewenega gigiloca, gol balaca lotoc meen qaig ben bahicna fajimeig dewenega cain bala faldowain. <sup>10</sup> Age caja Anut cumundoqona ec madegina eundec age me odoc odoginawe odi cunug odoigale. <sup>11</sup> Caja age conoga culeceb jogoecca je dah mimi biluqagan. <sup>12</sup> Ija caja oso culdecemin dana iwaladec qee biliaun, dana agena iloha qee biliaun. Caja age conoga culeceb je dih dah moqagan. <sup>13</sup> Ge, Anut Adam casac ifani muden, odocob hibna Iw ifani muden. <sup>14</sup> Odocob Adam uqa qauec jenu waug qee meleel qa caja uqa qauec jenu waug meleen. Odimei Anutna sisi mec je wooldon. <sup>15</sup> Euqa caja age Jisas Kraisnu wawaga meleecca, wawaga meleec dana cajaca nalunuga mecca, cataniec bielecca, ititom cobocca, eu cunug hewi cobocbilfi Anut uqa caja mel basadecnu caahahaadigan.\*

### 3

*Tamanec cofadec matu age ititom kobol coboigale*

<sup>1</sup> Je i eu je mele, dana oso uqa tamanec cofadec matu bielec cabi eu ugen ec gale donafi eu uqa cabi binanca bahic gale dona. <sup>2</sup> Tamanec cofadec matu mudec eu dana odi biliale. Oso uqa cahuldocca qee, uqa hutan me qee eu cain muduwain. Uqa caja osol gemug. Uqadodoc duman cofdu cuhadugian. Uqa gesili fecca, uqa loo cahulecca, uqa iwaldocnu hutan meca, uqa kobol me tutuc himec toodugian. <sup>3</sup> Uqa ceu jeceb dalul cain qoiaun, uqa hihiban cain teiaun qa waug susumulca, malolca biligian. Uqa meen qaig ocnu himec Cain cidoiaun. <sup>4</sup> Uqadodoc uqana aideg talaculca gami kobol mena tutuc cofadi maadigian. Odimei uqana mel mel aidca odadeceeb uqanu jogoi bieleig uqa jejeg toodu odoqagan. <sup>5</sup> Ge, dana oso uqana aideg talaculca kobol mena iwaladecnu qee donafi Anutna tamanec adi me cofdu cuhadugian? <sup>6</sup> Gadgad uqa waug cisdock toodu deboeceeb Anut uqa Seten geuldenwe eu odi geuldeianu cofadec matu eu uqa wawaga meleec haun Cain biliaun. <sup>7</sup> Dana wawaga qee meleena ageha cofadec matu uqana cobocnu madi, uqa me, oqagan. Qeefi, uqanu hutan me qee madowainnu, odocob uqa Setenna aisaisna toni qugian.

*Tamanec cesuldoc cabi dana cunug age tutuc coboigale*

<sup>8</sup> Eu odiwe tamanec cesuldoc cabi dana eu dana agenu hutana me himec coboigale. Age dana conoga lecisca Cain biluwain. Age ceu jeceb dalul Cain aqeaun. Age dana agena meen qaig celcel quauadecna ocnu Cain cisdowain. <sup>9</sup> Age wawaga meleec uqana caun eu jahunec nijia eu agena cisdock madi, eu mele, ena odi hehewi biluqagan. <sup>10</sup> Dana eundec age casac temadi feigale. Age me ihoc lec eu camasac meceb fifeig tamanec cesuldoc cabi dewenegana meiga. <sup>11</sup> Eu odiwe age aidagailha agenu hutana me himec coboigale. Age osonu hibiloh je me qee Cain madowain. Age agedodoc dumanaga cofdu cuhadigale. Age ceteh cunugnu mele je himec madoqagan. <sup>12</sup> Tamanec cesuldoc cabi dana uqa caja osol uqana dana himec biligian. Odimei uqana aideg talaculca gami kobol mena tutuc cofadi maadigian. <sup>13</sup> Ge, tamanec cesuldoc cabi dana age agena cabi me ogina eu age ijanaga me oqagan. Odimeig age Jisas Kraisnu wawaga meleeanu dana cajaca je gagadicca maaedecnu ihoc.

*Anutna kobolnu je gug*

<sup>14-15</sup> Ija mahucwe humig hina fecihecnia cisdugina qa ceteh oso cahactecefbi jaqec je ina dado mihimei hina Anut talaculna adi me bieleccnu qila ija je i jaqihigina. Talacul eu Anut cebac bilina uqana tamanec, eu mele je cofdudu hehdona. <sup>16</sup> Ege mele doqona, Anutna kobolnu je gug eu me bahic me, oso eunu qee sasac qocwe qee. Je gug eu egi odi qasali madogona:

“Uqa dana deweg ocna camas men.

Kis Gun uqana gug eu tutuc bahic ege ihacgen.

Ensel age fecidoin.

Agena malogom age uqana je dana hatuhatu bieleccina age gemo maaedecbil dah mein.

Mahanadec age uqanu wawaga meleena.

Anut uqa ehudi sao jobon teceb uqa binan ben on,” oqona.

\* <sup>2:15:</sup> But ina Grik je uqana gug eu camasac qee.

**4***Uhulec je iwaladec*

<sup>1</sup> Kis Gun uqa camasac odi madena, saen hibna hugian saen euna dana leih age kis uhulecca, buga me qeeca, agena je dah mimeig toodumeig wawaga meleec eu qisacdoqagan. <sup>2</sup> Uhulec dana eundec age uhulec kobol odimeig uhulec je i dana cajaca iwaladegina. Dana eundec agena cisdoc silec dalul aqeceb agena silailnu qee tebandogina. <sup>3</sup> Dana i edec age dana cajaca cain ocobocobowain ec iwaladegina, odocob age sab leih cain jowain echa iwaladegina. Euqa Anut uqa sab i jecnu ifanen, age wawaga meleecib mele je doin eu age Anut sab eu cunug jegannu hegaga ec inondu hedumeig jeginia. <sup>4</sup> Ge, ceteteh cunug Anut ifanen eu me. Eeta oso culecnu qee nijel qa cunug eu Anut hegaga ec inondumeb jeqan. <sup>5</sup> Ege odi odoqonafi Anutna je inondocca ale eu sab eu Anutnu qagoc calena.

*Timoti uqa Krais Jisasna cabi dana me caligian*

<sup>6</sup> Hina je i wawige meleec cotigeil iwaladifeg hina Krais Jisasna cabi dana me calegan. Odocob hina wawin meleecnu iwaldoc jeca iwaldoc je eu hina toodu cobogonanu euha saniji docomfi hinana kis gagadic tawigian. <sup>7</sup> Euqa mahana dec dodo caunca qee, eu Anutnu je me qee madegina, eu hibemdogale. Hinadodoc Anutna kobilnu iwaldu cuhadoga. <sup>8</sup> Hina dogona, dewenige cabinu iwalgoqona, odocob dewenige gagadic mena, eu nagnag cesulgigliannu ihoc. Euqa Anutna kobil toodocnu iwalgoqonafu eu ege geh bahic cesulgigliannu ihoc. Eetanu? Eu ege cebac bilec qila ina biluquna cesulgecnu ihoc, odocob hibna cebac bilecnu hugian euna ha cesulgecnu ihoc. <sup>9</sup> Je i mele bahic,\* odocob dana cunug je i dumeig wawaga meleigiannu ihoc nijia. <sup>10</sup> Ege Anut cebac bilec uqa caahahagecnu sumuduquuna. Uqa dana cajaca cunug agena caahaha dec. Uqa dana cajaca age uqanu wawaga meleena eu mele bahic caahaha dec. Eunu ege cabi doot oqona, ege cabi gagadic bahic oqona.

<sup>11</sup> Hina je i dana cajaca ulauladi maadagale. Odimeg je i toodoqagannu iwaladagale. <sup>12</sup> Age hina mel haun fecihuqagan qa age hina dana cajaca cain cisdowain. Euqa hina dumain cobocna wawaga meleec dana cajaca dado madagale. Hina connaca, hina nalunuga mecnaca, hina wawin meleecnaca, odoc cataniecncaca age adi cobocnu ihacadagale. <sup>13</sup> Hina Anutna je tamanec sanijiadecnuca, me je silliadecnuca, iwaladecnuca cabi eu uu bibilem ija ono caligen. <sup>14</sup> Cabi ocnu duman oso Kis Gun ihen eu cain alal heiaun. Je hahun madec dana age madecebil tamanec uqana matu age ebenega ilomna mecebil hina duman oso eu om. <sup>15</sup> Odoc eu ihoc ligiannu cisdu cobogale. Hinadodoc cabi i me calecnu gaid odogale. Odocob dana cajaca cunug age hinana cabi eu me bahic caleceb foqagan. <sup>16</sup> Hinadodocnuca hinana iwaladecnuca meccii cuhadogale. Ceteteh i gaid hewi daugdudu hewi tawagale. Hina odi odifeg hinadodoc caahahadogan, odocob dana cajaca hina dah mihegina euha caahaha degan.

**5***Timoti uqa wawaga meleec dana cajaca adi cofadigian*

<sup>1</sup> Dana toia oso je gagadic cain madogaun, hina memenwe dahig hewagale. Dana haun age walinelwe odadagale. <sup>2</sup> Caja toia aninelwe je maadagale, caja haun cebinaminelwe je maadagale, kobil cataniecca odadagale.

*Cel dana uqa caja wij cofadigian?*

<sup>3</sup> Caja wij eu mele bahic wij cuhanuc bilegina eundec lalan madeigale. <sup>4</sup> Euqa caja wij oso uqa uqana melcafi asagulcafi, age mel eu age anaga soadoqagannu maadaga. Mel age eu odocna anagail wele me madein eu ameg adoqagan. Ge, kobil eu Anut gale dona.

<sup>5</sup> Caja oso uqa wij bahic oso uqa cofdocnu qee bilina eu uqa Anutna himec deweg mudeceb ninijen Anut cesuldugianu witic cahinegca inondudu bilina. <sup>6</sup> Euqa caja oso uqana dana wele cal men odi caja eu uqa dewegna dih gale doc toodona eu uqa wele cal men cinigwe. <sup>7</sup> Hina age tutuc bielecibil age dewenegana je oso qee caleiaunnu caja je i toodoqagannu maadaga. <sup>8</sup> Euqa dana oso uqana eundec, uqa talacul, agena togo nijigiannu qee mede qona eu uqa wawige meleec cewudina. Mele bahic, uqa wawige qee meleec dana wooladec bilina, uqa dana me qee bahic.

<sup>9</sup> Caja wij agena cabi gel 60 ihoc lec eundec himec ijanaga wij agena bukna jaqeigale. Caja wij oso uqa dana osol biliton.\* <sup>10</sup> Odocob uqa cabi caunca me odocnu ijanca. Uqa

\* 4:9: Cel je mele bahic eu camasac qee. Eu je but 8na nijiafo, qee eu je but 10na nijiafo Pol uqa cisdon eu ege qee doqona. \* 5:9: Efesas tamanec age caja wij leih ijanaga bukna jaqolig eu odi fena. Caja wij age tamanecnu cabi ocnu cois ecebifil tamanec age caja wij eu sabca, bileyecnu cetechca adoloig.

uqana mel me cobocnu iwaladen, uqa dana cus hoc eundec loo aden, dana cajaca qagoc eundec jaimaga wasacudiaden,<sup>†</sup> dana cajaca age culumenga eundec cesuladen, cabi me ocnu deweg qee sosogon ol, caja wij eundec dih ijanaga buk euna jaqeigale.

<sup>11</sup> Euqa hina caja haunhaun gemunugail cal mein eu age golanaga me qeenu silileceb age Krais qee fagdowain, age dana haun oso ocnu odoqagan. Eunu caja wij eundec ijanaga cain jaqagaun. <sup>12</sup> Odocob age cagoc je casac madein, “Ege dana haun oso qee oqaun,” ein je eu lahacdögina. Eunu age eu odocna dewenega jeca mudegin. <sup>13</sup> Eu himec qee. Age agena saenha cusdumeig jo tobi ul loldudu cobogina. Age cabi ol himec qee, age dana cajaca age odocnu dah mimeig hibilemeka je mamadi cobogina. Odocob age je ilag filfil ege madecwe qee eu age mamadi cobogina. <sup>14-15</sup> Eunu caja wij haun leih age wele jic tutuc siho qumeig Setenna jic toodoinnu ija caja wij haun maadigina, age dana umeig mel basimeig agena joca cetetehca cofdoigale. Age eu odi odocobilfi eguna cad oso egenu je me qee qee madowain. <sup>16</sup> Euqa caja waug meleec eundec oso uqana sihulna osooso age caja wij bielecebili caja waug meleec eu uqadodoc caja wij eundec cofadeiale. Tamanec uqa odi cain odeiaun. Euqa tamanec age uqana eundec cesuladecnu culumenca qee odi biligian. Age caja wij cuhanuc bahic bilegina eu cesuladecnu ihoc odi biligian.

*Ege tamanec cofadec cabi me ogina eundec lalan madec*

<sup>17-18</sup> Anutna jaqec je oso edi madena:

“Age bulmakau uqa wit ceteteh lahacdöcnu cabi ona eu uqa biah cain cufa qowain,” ena. (*Loo 25.4*)

Odocob Anutna jaqec je osoha madena:

“Cabi dana oso uqana cabi ameg ocnu ihoc ugian,” ena.

(*Luk 10.7*)

Eunu tamanec cofadec matu age cabinu megameg mi cuhadogina eundec age lalan mamadi cabi ameg me adeigale. Me je madi fec, iwaladi fec eundec bahic ijanaga ohis madeigale. <sup>19</sup> Tamanec cofadec matu eundec deweneganu um qoc je eu dana osol himec madeceb cain dah magaun. Dana lec исца age uqa cahuldon fein age cofadecnu madeceb uqanu je togodoigale. <sup>20</sup> Cofadec leih age silail megina eundec cofadec matu cunug eu fimeig filiciti cucuii coboqagannu hina cofadec cunug amagana tutuc madec je maadagale.

*Timoti uqa uqadodocnu cofdu cuhadugian*

<sup>21</sup> Ija hina Anutca Krais Jisasca ensel Anut nesili cedadenca amagana tutuc mahigina. Je jaqihem fagana eu toodu bahic odogale. Oso ijanca, oso ijanca qee eu filfil Cain odadagaun, age ihocihoc adadagale. <sup>22</sup> Odocob hina dana oso mahuc ilona eben mimeg cofadec Cain mudecem Anutna cabi dana biliaun. Qee dodom hina dana leih agena silail eu fagheiaunnu. Hinadodoc Anut amegna wawin cataniec biligiannu cofdogale.

<sup>23</sup> Hina gaid hag mahuc ogona eunu gaid wa himec Cain jagau. Wain nag odi jecem bin anag cesuldugian.

<sup>24</sup> Dana leih agena silail eu camasac nijia, odocob agena silail aquniadena, ege mahucwe gesiladoqona. Euqa leih agena silail eu jahunecna nijia, odocob hibna dih camasac moqagan. <sup>25</sup> Eu odiweha dana oso agena me odoc eu camasac nijia. Euqa leih agena me odoc qila qee camasac mel eu jahunecna nijecwe qee, hibnaha camasac migian.

## 6

*Cabi dana bega meh age kobil me himec odoqagan*

<sup>1</sup> Kristen cunug age cabi dana bega meh bileygina eundec age Anut ijannuca, agena me je iwaladecnuca, dana oso cewudec je oso qee madeiaunnu agena ilo lalan mamadi toodu odoc bahic bileigale.

<sup>2</sup> Cabi dana bega meh oso agena ilo Kristen, mel eundec age, ege wawige meleec cotige ihocihoc bliuqunanu, agena ilo lalan qee mudoqaun ec odi cain cisadowain. Euqa agena ilo eu wawige meleec dana, age uqanu nalug meginanu age uqanu nalug mimi cabi oqagan. Eunu age agena cabi oc utogina eu ceteh me bahic utogina.

*Meen qaig ocnu gawec eu kobil me qeenu gug*

Hina hinana tamanec je i toodu odocnu iwaladii maadagale. <sup>3</sup> Egena Tibud Jisas Krais uqana je eu Anutna kobolnu iwalgi cuhadona. Dana oso uqa je i culimei dana je filna iwaladifei uqana je eu Jisasna jeca osol qee. <sup>4</sup> Ege dogona, dana i uqa deboecca, uqa docca qee. Uqa gale doc me qeeca, uqa je osona gugnu fee dadanecnuca jena cadecnuca

<sup>†</sup> **5:10:** Age Jon 13.1-17 feiga. Saen euna cunug age kobil oso odoloig. Leih age agena jona lecebili cois, age jic coboc comis age jaimaga gegehin muden eundec jaimaga wasacudiadoloig. Cabi eu cabi bega meh dana cajaca age odoloig, euqa Jisas uqa malogom age cotogail cunug cewel uadeigale ec maaden. Age Matju 20.25-28ha feiga.

gale ben dona. Je eundecna kobil i edi calena. Age dana osona ceteteh ocnu amaga qona, odocob age jena cadegina, je hibiloh madegina, odocob wawaga meleec cotogana cisdu cahuldogina. <sup>5</sup> Odocob age gaid ilag galac megina. Dana eundec age mele je gagadic qee hewegina. Dana eu odi odogina eu agena cisdoc eu cogogec. Age Anutna kobil eu cehewanigeca bilecnu jic ec cisdogina.

<sup>6</sup> Mele, dana oso Anutna kobil toodufeui uqa ceteh me mati bahic cedigian. Euqa ceteh Anut utona eu cois ihoc enafi uqa ceteh me mati bahic cedigian. <sup>7</sup> Ege doqona, anigeil basigein ege ceteh oso ebenigena qee hewi aholum. Odocob cal mecna ege ceteh osoha maha inadec qee hewi beloqaun. <sup>8</sup> Eunu egena sab jecnuka, dewenige lotoc taqecnuca ihoc nijecebsi ege ijana togo nijia oqale. <sup>9-10</sup> Euqa meen qaig ocnu gawec eu kobil me qeenu gug. Dana leih age wawaga meen qaig ocnu gawec kobil eu diadeceb age wawaga meleec culein. Odocob age culumen sogoec ben gahidogina. Eunu dana age mahana cehewanagaca bilecnu wawaga madena, eu age temadecna toni aqena. Eu aisaisna leginawe odi loqagan. Agehah gadwe odocca golanaga mahana ceteteh ocnu sililec euca fadalecna ehi li madena.

*Cebac biley catanec eu gagadic hewagale*

<sup>11</sup> Euqa hina, hina Anutna dana, hina ceteteh me qee i cunug oninadimeg qisacdu biligina. Hina ititom cobocca, Anutna kobil toodocca, wawin meleecca, nalug mecca, wawin duuec tawecca, gemain jocosaigca eu cunugnu gaunana mamani icocagale. <sup>12</sup> Dana Kraisnu waug meleena eu uqa gugulecna resis mecw meime i uqadodoc cebac biley catanec wooladi ona. Wele hina wawin meleec eu dana mati amagana qasalem saen euna Anut hina cebac biley catanec ocnu utahen. Cebac biley catanec eu hewagale.

<sup>13</sup> Ija hina, Anut uqa ceteh cunugnu cebac biley adena uqa amegnaca, Krais Jisas uqadodoc ugana gug eu Pontias Pailat amegnaca je qasalen uqa amegnaca, ija je gagadic mahigina. <sup>14</sup> Je hina wele om eu toodo odogale. Hina je i cahuldoc osoca qee cofdodom oso je inu je me qee madecwe qee li egena Tibud Jisas Krais ceseli hugian. <sup>15</sup> Uqana ceseli hoc deel euna Anut uqa himec king bahic, uqa eeldocca, uqa King agena king, uqa Tibud agena tibud eu madeceb camasac cali hugian. <sup>16</sup> Uqa himec cal mecw qee gaid biley catanena. Uqa fulacdok bahicca bilina eu ege uqa cemenuq lecwe qee. Anut eu dana oso qee fel, dana osoha fecwe qee. Ege uqa binan sulocomun cataneiale! Uqa gagadic odocca demico biliale! Mele!

*Dana age meen qaig matica age Anutna wawaga meleiale, odimeig age dana cajaca leih cesuladoqagan*

<sup>17</sup> Dana age cehewanagaca maha ina bileyina eundec Cain deboowainnu maadagale. Age cehewanaga cunug maha inadec eu mahuc odi me qee mena eunu Cain wawaga meleialeun. Euqa age Anutna wawaga mele bahic igian. Uqadodoc ege ceteteh mati bahic wawige ceeli bileyina igena. Eu odi maadagale. <sup>18</sup> Age odoc me odoqagan. Odocob odoc me euna cehewanagaca biluqagan. Age loo siwiadeigale, agena meen qaig naha dana me madecnu heleiga. Eu odi maadagale. <sup>19</sup> Eunu age odoc euna cehewan fil bahic agena biligiannu haudogina. Odocob hibna age cebac biley catanec eu oqagan, cebac biley catanec eu cebac biley qila bileyina wooldoc. Eu odi maadagale.

*Timoti uqa ugana cabinu cofdu cuhadugian*

<sup>20-21</sup> O Timoti, hina cabi i Anut hina ebenna men eu cofdu cuhadogale. Dana leih age madein, "Ege doc silecca," ein, odocob age wawige meleec eu culimeig jic ceja qu lec euna belein. Eunu je hetec gauc Anutna kobil qee toodonra eu dana age doc silecca imieig cahuldudu madegina eu hibemdoga.

Anutna eelgec uum igec eu ageca biliale.

## Pol Uqa Jaqec Je Lecisdoc Timoti Jaqiton Aqunec Je

Timoti uqa Pol cabi hijag, eunu Pol uqa Timoti kobil me toodu odocnu ihacduiannu jaqec je i jaqimei sulduton. Saen euna Pol uqa uqana waug meleecnu gihacdoc jona bilen. Pol uqa Timoti me je cofdu cuhadugian (1.14), uqa uqana waug meleec eu hewi daugdumei toodu odigian (3.14), odimei uqa me je gaidgaid qasali maadigian (4.2) ec madona. Odimei culumen eu Timotica hocobfi Timoti uqa Pol osoben sol jeli gahidugian ec madona (1.8, 2.3).

Pol uqa cetehe ben osonu Timoti ulauldona. Timoti uqa je caunca qee dana leih gauc togodogina eunu qisacdu biligian (2.16). Agena je eu isoh alal donawee odi odona eunu. Eu Kristen agena wawaga meleec me qee mudigiannu odona. Euqa Timoti uqa Polna waug meleecca, uqana waug susumulca, uqana nalunuga mecca, uqana waug duuec tawecca, uqana deweg tudocca eu wele fen. Eunu Pol uqa Timoti Polna me coboc toodu cobigiannu cesusdona (1.13, 2.2, 3.10).

### *Je Dunuhnu Dado Mec*

1. Aqunec je (1.1-4)
2. Pol uqa Timotinu cisdona (1.5-14)
3. Pol uqana biley eunu madena (1.15-18)
4. Pol uqa Timoti adi biligiannu madena (dac 2)
  - A. Uqa gagadic tawigian (2.1-13)
  - B. Je caunca qee eunu qisacdu biligian (2.14-26)
5. Deel cit qocna kobil me qee mati caloqagannu ulauldona (dac 3)
  - A. Saen me qee caligian (3.1-9)
  - B. Cetehe me qee adi cilehadigian (3.10-17)
6. Pol uqana odio ec je (4.1-8)
  - A. Timoti uqa Anutna me je gaidgaid qasali maadigian (4.1-5)
  - B. Pol uqa ameg me bahic ugian (4.6-8)
7. Polna inondoc jeca, feele adec jeca (4.9-22)

<sup>1</sup> Ija Pol, ija Krais Jisasna aposel. Anut uqana gale docna ija aposel miten. Ija cebac biley Jisas Kraisnadec egeca hona eu uqa ege Jisas Krais gabangec biluquna igigiannu wele magen eunu silig sildiadecnu cabi dewenina men, eu ugina.

<sup>2</sup> Timoti, hina ija melami bahic, ijana jaqec je i jaqihigina. Anut ege Memigeca eguna Tibud Jisas Kraisca ale eelgec uum igecca, waug qocca, malol bilecca ihesiale.

### *Ele me jenu majanile cain leiaun*

<sup>3</sup> Ija Anut cewel utugina, jajanileilah age Anut cewel utoloiwge ijaha wawi cataniecca cewel utugina. Ija Anut inondudu gaid cishimig hinanu hetaga dugina eu odi ija Anut cewel utugina. <sup>4</sup> Ija hina amulin nec eunu cisdumig ija wawi ceeligiannu hina li mecihecnwu witic cahinegca wawi ben hoolena. <sup>5</sup> Ge, hina wawin meleecnu cisdugina, eu wawin meleec bahic. Wawin meleec eundec wele asin Loisca anin Junisca alena bilen. Qilaqa hinana bilina eu mele bahic dugina. <sup>6</sup> Eunu ija hina dahin hewigina. Hina cabi ocnu duman Anutnadec ija ebeni ilom tatacan mecna ihm, eu tulidocob cebac biliiale. <sup>7</sup> Ge, Kis eu Anut ege igen eu kis cucuianca eundec qee. Kis eu uqa kis gagadic codocca, nalug mecca, uqa odigeceb egdedodoc tutuc moqona.

<sup>8</sup> Eunu eguna Tibudna me je dana cajaca qasali maadecnu majain cain heiaun. Odocob hina ija qila Jisasna gihacdoc jona biligina eunuha majain cain heiaun. Euqa hina ijaca culumen lec Jisasna me je maadi cobowona eunu dewenilena hona, eu osoben sol jeli gahidocnu cain culugaun. Ge, Anut gagadic odoc ihina. <sup>9</sup> Cahahalen eu uqa, ugaha uqana cabi gun bahic ocnu utalen. Eu odilen qa eu cabi oso ooh eu ameg ilecnu qee qa uqadodocna cisdocnuca, uqa waug elenu uum ilecnuca eunu odilen. Uum ilec eu wele bahic gug qoc saen qee calec Anut uqa ele Krais Jisasca gabandoc ilen. <sup>10</sup> Odocob qila uum ilec eu eguna Cahahagec Krais Jisas cali hon euna camasac men. Ge, Jisas uqa cal mec uqana uen tolon, uqa cebac biley catanec eu me je maadecna camasac muden.

<sup>11</sup> Uqa me je ina cabinu ija je qasali maadec danaca, aposelca, iwaladecanu doot qiten.

<sup>12</sup> Eunu ija qila saen ina deweninu sogoigina. Euqa age oditegina eunu ija majani qee tel. Ge, ija innu wawi meleen nijia, eu dugina. Uqa me je cabi ija ebenina men eu cofdutecnu ihoc, eu li deel cit qocna cabi eu gaid me biligian eu du cuhadugina.

<sup>13</sup> Mele je ija iwalhecemin dom eu amenna tataweb fifi toodu iwaladagale. Odimeg wawin meleecca, nalug mecca eu eguna Krais Jisasca gabandoc biluquna euna biliga. <sup>14</sup> Mele je eu cetehe bahic Anut hina ebenna men eu hina Kis Gun, ege dunuhna bilina, uqana gagadic odocna eu cofdu cuhadogale.

<sup>15</sup> Hina dogona, Esia mahanaadec eundec cunug age ija hibemtein. Age eundec leih Figeluska Hemogenisca.

<sup>16</sup> Euqa saen mati Onesiforas uqa cesultec je madecna wawi duuen. Eunu Onesiforas uqa aideg talaculca gami Tibud agenu waug goiale. Ija gihacdoc jona bilem eu uqa qee majag dol. <sup>17</sup> Euqa uqaha Rom ono calimej ija megiti cocobi lili gulucten. <sup>18</sup> Tibud uqa uqanu waug qoc eu cit qoc deelna utiale! Uqa wele Efesas ono bibili me oditen eunu hina du cuhadogona.

## 2

*Timoti uqa Jisas Kraisna han cadec dana me biliale*

<sup>1</sup> O melami, hina ege Jisas Kraisca gabangec euna uqana eelgec uum igecka eunu gagadic magale. <sup>2</sup> Je ija dana mati amemeg maaadigin dom eu umeg dana me nalug mecca leih cofdocnu ebenegana magale. Odocob dana eundec age dana leihha iwaladecnu ihoc.

<sup>3</sup> Hina Krais Jisasna han cadec dana gulicanca cabi eu gawimeg om. Ege han cadec eu dewenige tudoc gahidogona, egeca hocum culumen eu gahidogale. <sup>4</sup> Han cadec dana uqa uqana ilo eu uqana cabi feceh hina cabi me ogona ecnu gale dona eunu cabi ona. Uqa cabi filfil leih osobenga gabandu qee ona. Uqa han cadec danana cabi me himec ona. <sup>5</sup> Odocob gugulec dana uqa dana leih gugulecna wooladecnu duman donafi uqa gugulecnu loo je toodu odona. Qeefi, uqa ameg me qee oiaun. <sup>6</sup> Odocob sab cehec dana cabi gagadic ona eu uqa cabi eunadec sab cehen eu wal meceb casac cedi cili jigian. <sup>7</sup> Tibud uqa dahin fogo duheceb hina cetehe cunugnu gug dogan. Eunu je mahigina eu wawinna cisdogale.

<sup>8</sup> Jisas Kraisna dahin cisdoge, uqa cal mecnadec ceseli cajen, uqa Dewid sihulnadec, me je maaadi cobigina euna nijia. <sup>9</sup> Me je maadec eunu ija culumen sogoec gahidugina, odocob ha ija gihacdoc jona ebeni jaimica libec biligina, loo je tecfacdoc eundec odadegi-nawe oditegina. Euqa Anutna je eu eben jaihc libewcwe qee nijina. <sup>10</sup> Odocob ege Krais Jisasca gabangec biluquna caahagec oqan ageha caahagec eu oqagannu, odocob age cebac bileceb catanec fulacdochca oqagannu ija culumen eu cunug dana cajaca Anut ijana imei nesili cedaden eundecnu gahidugina.

<sup>11-13</sup> Je madoqona eu mele nijia:

"Anut uqadodoc uqana gugnu qee sasac qocwe qee."

Gug eunu ege uqaca cal momfi eunu egeha uqaca cebac bileqan.

Ege culumen gahidudu biluqunafu eunu egeha isi uqaca king bileqan.

Ege uqanu qee sasac qoqonafu eunu uqaha egenu qee sasac quqian.

Ege eguna cagoc je culuqunafu uqaga uqana cagoc je qee culiaun," oqona.

*Timoti uqa cabi dana bahic uqa Anut amegna ijanca eunu cabi gagadic oiale*

<sup>14</sup> Hinana dana cajaca je i cunugnu dahiniga cisdoqagannu maadagale. Hina Anut amegna ha age jena fee dadanec culuqagannu dahiniga hewagale. Ge, eu tutuc odocnu oso qee cesuldona, euqa dana dah mi bilegina eundec cisdoc ihulahaladena.

<sup>15</sup> Hinaqa Anut amegna dewen jeca qee tawegannu cabi megameg mi cuhadogale. Hina cabi dana uqa cabinu nalug mena eu uqa majag docnu silig qee nijelwe eu odi cabi ogale. Oso, uqa mele je tutuc bahic iwaladenawe odi iwaladagale. <sup>16</sup> Dana age je caunca qee gauc madeginna eundec age jic Anut hibemu jic ceja qu lena euna cobigina. Eunu je caunca qee gauc togodogina eunu qisacdu biligale. <sup>17</sup> Agena je eu isoh alal donawee odi odona. Dana odi odogina eundec oso Haimenias oso Failitas. <sup>18</sup> Ale mele je eu siho qumesi jic ceja qu lena euna cobosina. Ale je odi madesina, "Egena cal mecnadec ceseli cajec eu wele calen," esina. Ale je madecnana ege wawige meleec dana cajaca leih agena wawaga meleec eu cawaladesina.

<sup>19</sup> Euqa Anut noh gug gagadicca wele cehen tawena, odocob Anut uqa noh euna sisi meec je i edi jaqen:

"Tibud uqa uqana dana cajaca uqana bileyinananu dona," en. (Namba 16.5)

Odocob je osoha euna odi jaqen, "Dana cajaca cunug age madi, ija Tibudna biligina, eginifi eu age silail kobil hibemdoigale," en.

<sup>20</sup> Dana cehewanca uqana jo ben osona boh dewenega filfil nijadena. Leih eu gold silwacana mudadein, leih eu na mahacana mudein. Odocob leih eu cabi me ocnu deel benna, leih eu cabi gauc ocnu deel cunugna. <sup>21</sup> Dana oso uqa cetehe eu cabi gauc ocnu qisacadi cobona eu catanec biligian, odocob uqa cabi me ocnu ihoc. Uqa uqana Benna cabi ocnu saciadon nijina. Uqa uqana Ben cesuldigannu ihoc.

<sup>22</sup> Mel haun agena golanaga me qeenu sililec eu hibemdogale. Odocob ititom cobocca, wawin meleecca, nalug mecca, wawin malol bilecca eu ocnu sis qocwe biligale, hina gami dana cajaca age wawaga cataniec Tibud cesulgaga ec utadogina odi odoga. <sup>23</sup> Euqa je eu docnu qee nijel, eu silignu wawali sisili togodogina, je gauc eundec culugale. Hina dogona, je eundecnaadec fee dadanecca cadecca cali hona. <sup>24</sup> Tibudna cabi dana uqa jena fee dadani cain coboiaun. Euqa uqa lalafan cahulecca dana cunugnu odadigin, uqa iwaladec cabinu iwaldoc bahic biligian. <sup>25</sup> Uqa gemag jocosaigca feei coboc eundec jic tutuc ihacadigian. Ge, Anut uqa dana eundec wawaga tului falicdocob age mele jenu doqagannu ihoc ec madeiale. <sup>26</sup> Odocob agena cisdoc eu haun camas mudecebil age Setenna aisaisnadece cacawadeceb busaloqagan. Ge, wele Seten uqa maadeceb uqana je toodoo odoin.

### 3

#### *Deel cit qocna kobil me qee mati caloqagan*

<sup>1</sup> Hina je i du cuhadogale. Maha uqana saen hedugia oodob saen me qee cali hugian. <sup>2</sup> Saen euna dana age ija didih i cobocca, meen qaignu gawecca, agedodocnu culunuga occa, deboecca, lelanecca, memegail anagail feeadecca, hetaga ec qee madecca, Anut hibemdoqagan. <sup>3</sup> Odocob age nalug mecca qee, wawaga qocca qee, dana osonu hibilohu je me qee madoqagan. Odocob age hihibanaga tecca, gemanaga becca, me odoc cunug sagagoqagan. <sup>4</sup> Odocob age cotogail agena cad ebenegana madoqagan, agena cisdoc cahuldoc eu cunug mahucwe toodoqagan, agedodoc ege dana binanigeca ec cisdogagan, age dewenega gale docnu gale ben adigian qa age Anutna gale qee adeiaun. <sup>5</sup> Eundec age dana amagana himec Anutna kobil toodu odoginawo odi odoqagan, euqa Anutna kobil caunca qee biluwain. Hina dana eundec qisacdagade.

<sup>6</sup> Dana eundec leih age caja cisdoc dalul aqec biledina agena jona lecnu jic walegina. Age faninaadi agena cisdoc cofduadegina. Caja eu age silail mein. Age agena silailnu majanaga adena qa age wawaga cajeceb age kobil guggug odoc gugca qee eu odogina. <sup>7</sup> Caja eundec age je iwaldoc haun ocnu gaid walegina qa age mele je eu docnu ihoc qee. <sup>8</sup> Wele Janis Jambrisca\* ale Moses je feedudu uqanu teiesinwe dana eu ageha mele je eu feedudu teiegina. Agena cisdoc eu ihulahaldoc njija, agena wawaga meleec eu qaeuc dih, age Kraisnu wawaga qee meleena. <sup>9</sup> Euqa agena kobil jic ben onoca qee leiaun. Ge, dana cajaca cunug agena kobil caunca qee eu foqagan, odiwe age wele Janis Jambrisca alena kobil caunca qee euha fein.

#### *Timoti uqa Anutna je gagadic heweiale*

<sup>10</sup> Hinaqa ijana je iwalheccca, ijana me cobocca, ijana cabi oc cunug uqana gugca, dado mihem eu toodu cobogona. Hina ija Kraisnu wawi meleecca, ija dana cajaca wawi susumulca odadiginaca, ija dana cajaca nalunuga miginaca, wawi duuec tawiginaca, <sup>11</sup> deweni tudocca, wawi sogoecca, euha wele fem. Dana age Antiocka, Aikoniamca, Listraca ono bilein age toooti deweni tudoin, euqa Tibud uqa ebeneganadec ija cahahaten eu hina dogona. <sup>12</sup> Eu mele, cunug age Krais Jisasca gabandu biley Anutna kobil toodu odocnu wawaga nijina eundec dana age jabadi tootoadoqagan. <sup>13</sup> Euqa dana qisol mimi cobocca, faninadecca age me qee odoc nag odi odoin, hibna me qee bahic odoqagan. Age oso quauadeceb ilagenelha quauadoqagan.

<sup>14</sup> Hinaqa age iwalhecebil dumeg wawin meleen eu hewi daugdumeg toodu odogale. Ge, hinaha in iwalhein dogona. <sup>15</sup> Hina mel sim bibileg me je gun dom. Dodog ben mem. Me je gun eu uqa Krais Jisasnu wawin meleeceb cahahahaecnu ihoc iwalhena eu dogona. <sup>16-17</sup> Me je jaqec cunug Anutna Kis uquadodoc dana iwaladecceb jaqein. Odimei dana uqa Anut cewel utona eu cabinu iwaldoc biligiannu, uqa cabi me cunug odocnu saciadoc biligiannu me je jaqec cunug eu iwaladecnu, tutuc madecnu, ulauladecnu, ititom cobocnu dado madecnu iocca nijia.

### 4

#### *Hina Anutna me je bahic qasali madaga*

<sup>1</sup> Ija hina Anut amegnaca, Krais Jisas uqa dana cajaca cebac biledinaca cal meinaga gesiladigiannu humei saen euna uqana cul camas mudigian eu uqa amegna je mahigina.

<sup>2</sup> Me je mamadi gagadic tawagale. Me je madecnu saen me nijecib euna himec qee mada-gaun, olosadec saenna ha me je maadagale. Je wawaga qugiannu, cahacadijanu, cal meinaga gesiladigiannu humei saen euna uqana cul camas mudigian eu uqa amegna je mahigina.

\* **3:8:** Janis Jambrisca ijanalua eu Anutna je weledec jaqecna qee nijel. Euqa Juda agena dodo eu odi saen. Janis Jambrisca ale Isip agena king uqana bal nec dana ale Moses teidosin. Age Kisim Bek 7.22ca, 9.11ca feiga.

cesusadigannuca maadagale. Euqa wawin susumulca cabi eu ocnua, iwaladecnuca cain culugaun. <sup>3</sup> Ge, saen oso hugian, saen euna dana cajaca age mele je iwaladec dah mecnu olosadigian. Euqa age golanaga mahana cetehnu sililec eu ocnu wawaga nijigian. Age cajimeig agedodoc agena iwaladec mati bahic ehadecebile age je laloca gale adena eu maadoqagan. <sup>4</sup> Odocob age mele jenu madi, eu qee doqaun, imeig dahiniga cit qumeig dodo gauc uhuladena eu dahiniga cehimeig dah moqagan. <sup>5</sup> Hinaqa, hina duuec tawagale. Culumen hec sogoech gahidogale. Hina me je madec dana, eunu hinana cabi eu megameg mi cuhadogale.

*Pol uqana cal mec dodoldon*

<sup>6</sup> Ijadodocnu madi madigina. Ija golani ihanecnu basecdocnu madegina, ija cuculadi nuecnu saen wele hona. <sup>7</sup> Ija gugulec me bahic mimi ben guguli hedom, ijana cebac bilec hedocna caliga. Wawige meleec eu ija hewihewi cobom. <sup>8</sup> Wooladec gugulegina eundec ameg me adecebile ogina, ameg me eu ija u itecnu muden nijia. Ameg me eu ititom cobocnu kingna katakat. Egena Tibud, uqa dana cajaca gesiladi cuhadona, uqa cit qoc deelna kingna katakat eu itigian. Ija himec qee itiaun, euqa uqana cit qoc deelna humei camasac migiannu susumudi hoolegina eundec cunughia adigian.

*Timoti uqa mahucwe Polca hoiale*

<sup>9-11</sup> Dimas uqa maha ceteteh gawimei ija cuculti Tesalonaika nuen. Kresens uqa Galesia hatuna nuen, Taitas uqa Dalmesia hatuna nuen. Luk himec ijaca biluwuna. Eunu hina hocnu megameg mimi mahuc cemeni hogale. Mak uqa cabi ocnu ihoc cesultigian. Eunu ehudecem ijaca hosiale. <sup>12</sup> Ija Tikikas suldocomin Efesas ono nuen.

<sup>13</sup> Ijana lotoc ben momosonca ija Troas ono Kapas ebenna culem eu hina hu ono calimeg u ahogale. Buk filfilha cedi ahogale, buk leih dool ganacna mudein euha cedi ocnu bahic ahogale.

<sup>14</sup> Aleksanda uqa kapa cabi oc dana uqa ija me qee bahic miten. Hibna Tibud uqa dana eu uqana odoc eunu ameg utigian. <sup>15</sup> Dana eu hinaha me qee odiliaunnu batut fagale. Uqa, ege je madocomun uqa egena je feedudu gagadic teien.

<sup>16</sup> Saen hahawanna age gesilec jona mitecebile, ijanelnu je cesultec madecnu tawecemin, oso ija homi cehi qee tawel, age cunug ija cultein. Anut age ija oditeinnu dahig celeiale.

<sup>17</sup> Euqa Juda dana qee eundec cunug me je dah moqagannu Tibud uqa homi cehi tawimei uqa cesultimei uqana gagadic odoc iteceb ija me je maadecemin camasac men. Eunu Anut uqa ija laion biahnadec cacawiten. <sup>18</sup> Tibud uqa qisol mec cunugnadech cahahatimei uqana cul saona lecnu cesultigian. Uqa kobolkobolca gaid bileceb cataneiale! Mele.

*Cit qoc feele adec*

<sup>19</sup> Ija Prisilaca Akwilaca Onesiforas uqa aideg talaculca gami feele adec je sulduadigina.

<sup>20</sup> Ege Erastas uqa Korin ono culdom bilina. Trofimas uqa Mailitas ono hag ocob culdem.

<sup>21</sup> Hina duan saen qee hoc ninijeb eu hu calecnu megameg mimi hogale.

Jubulas uqa feele adec je sulduadene, odocob Pudensca, Lainasca, Klodiaca, wawaga meleec cotogail cunugca ageha feele adec je sulduadegina.

<sup>22</sup> Tibud uqa hina doloinca biliale. Anutna eelgec uum igec ageca biliale.

## Pol Uqa Jaqec Je Oso Taitas Jaqiton Aqunec Je

Taitas eu Juda dana qee. Euqa uqa Kristen calenna uqa Polna aposel cabi euna cesuldon. Pol uqa Taitas wawaga meleec dana cajaca age Krit nuina bilein eu cofadecnu culdon eu odi fena. Pol uqa Taitas jaqec je i jaqiton.

Pol cteh cijednu jaqen, eu odi. Dana Krit nuina bilegina mati agena kobel eu me qee. Eunu Pol uqa tamanec cofadec matu adi biligiannu jaqen (1.5-16). Odimei Pol uqa Taitas tamanecna cam filfil adi iwaladiġiannu jaqen. Cam oso eu dana toiatōia, cam oso eu caja toiatōia, cam oso eu caja haunhaun, odocob cam oso eu cabi dana cajaca bega meh (2.1-15). Cit qoc jena Pol uqa Taitas Kristen cobocnu jaqen. Kristen cunug age fee dadanecca, mam cadecca, gonagona mecca eu qisacdu biluqagan. Euqa age malol bibileig me odocnu gaid gagadic cisdoqagan (3.1-11).

### *Je Dunuhnu Dado Mec*

- 1.Feele adec je (1.1-4)
- 2.Tamanec cofadec matunu je (1.5-9)
  - A. Pol uqa Taitas Krit nuina culdon eu uqana gug (1.5)
  - B. Tamanec cofadec matu agena gadac (1.6-9)
- 3.Uhulec iwaladecnu je (1.10-16)
- 4.Tamanecna cam filfilnu je (dac 2)
  - A. Cam filfil agena je maadec (2.1-10)
  - B. Kristen agena bielecca, agena cobocca eu uqana gug (2.11-14)
  - C. Ceteteh Taitas odigian (2.15)
- 5.Wawaga meleec dana caja cunug agena je (3.1-8)
  - A. Age dana caja me bahic biluqagan (3.1-2)
  - B. Eetanu dana caja me bahic biluqagan (3.3-8)
- 6.Kristen age je madec eu cesuladecnu ihoc qee eu qisacdu biluqagan (3.9-11)
- 7.Cit qoc je (3.12-15)

<sup>1</sup> Ija Pol, ija Anut cewel utoc dana, ija Jisas Kraisna aposel. Anut uqa ija dana cajaca Anut uqa ijana imei nesili cedaden eu cesuladecmin age Kraisnu wawaga meleec gulucdogagannu, Anutna kobolna cobocnu mele je eu iwaladecmin doqagannu cabi eunu aposel miten. <sup>2</sup> Mele je uqana gug eu ege cebac biley catanec ogannu susumudi biluquna. Eu Anut, uqa qee uhulina, uqa wele bahic sao mahaca qee ifanec saenna ege cebac biley catanec i igigian ec maden. <sup>3</sup> Odocob saen euna Anut wele maden uqana jena odocob cteh i camasac men. Eu ege me je qasali maadoqona euna dana cajaca dogina. Me je qasali maadec cabi i Anut ebenina men. Odocob Anut eguna Cahahagec uqa maten eunu ija dana cajaca qasali maadigina.

<sup>4</sup> Ija Taitas hina jaqihigina, hina ija melami bahic. Ele wawile meleec gabanlec biluwuna.

Anut ege Memigeca Krais Jisas ege cahahagecca alena eelgec uum igecca malol bielecca hina ihesiale.

### *Pol uqa Taitas cabi Krit nui ono ogan ec madon*

<sup>5</sup> Ija hina culihecemin hina Krit nui ono bilem uqana gug eu odi. Cel cteh eu tutuc qee nijina hina eu tutuc mudiegannu, odimeg hina tamanec cofadec matu age jobon cunugna nesili ehadegannu culihem. Eu ija je wele mahemu cisdog. <sup>6</sup> Tamanec cofadec matu uqa cahuldoc osoca qee eu odi biligian. Uqa caja osol gemug himec biligian. Odocob uqana mel mel aidca age wawaga meleecca biluqagan. Age kobel me qee odogina, age anagail memegailca jejenega qee toodu odogina ec um qoc jeca qee nijigian. <sup>7</sup> Ge, tamanec cofadec matu eu Anutna cabi cofdona. Eunu uqa cahuldoc osoca qee odi biligian. Uqa Cain deboeriaun, uqa mahucwe gemag Cain beiaun, uqa ceu jeceb dalul Cain qoiaun, uqa olohon Cain beiaun, uqa mean qaig ocnu himec cain cisdoiaun. <sup>8</sup> Tamanec cofadec matu uqa loo cahulecca, uqa ceteteh menu nalug migian. Uqa gesili fecca, uqa ittim cobocca, uqa dana gun cobocca, uqadodoc duman cofdugian. <sup>9</sup> Uqa dana cajaca wawaga meleena eu adi cobocnu iwaladecnu ihoc odi biligiannu, odocob uqa dana age mele je iwaladecnu uqa agena cahuldoc ihacadecnu ihoc odi biligiannu uqa mele je ege iwaladoqona eu hewi daugdugian.

<sup>10</sup> Ge, dana mati ono Anutna mele je qee toodu odogina. Age je gauc mamadeig dana cajaca agena cisdoc faninduadegina. Dana mati eundec age dewenega cagu qoc sihulnadec. <sup>11</sup> Age je madecnana ege wawige meleec dana leih aidagailca talaculunugail gami cunug agena wawaga meleec eu besiadegina. Age je madec i cain iwaladowain. Odocob age je i iwaladecna meen qaig ogina eu age majanagaca. Eunu hina agena je eu cahacadegan. <sup>12</sup> Dana eundec agedodoc oso, uqaha Krit dana, uqa agenagul je hahun madec dana oso, uqa maden, "Krit nuidec age gaid uhulec dana, age dool cus me qee. Odocob age sab geh bahic jimeig gaid alal adena," en. <sup>13</sup> Je madec eu mele bahic. Eunu hina dana eundec age uhulec je iwaladegina, age wawaga meleec me caligiannu age cain iwaladowain ec ulauladaga. <sup>14</sup> Odocob age haun Juda agena dodo gaucca, loo je eu dana mele je hibemdoeu conoganadecca qee dah mowain.

<sup>15</sup> Dana age cataniec bilegina eu agenu ceteteh cunug cataniec bilia. Euqa dana agena cisdoc wawaga eu gegehinca, age wawaga qee meleena eu agenu ceteh oso cataniec qee biled. Agena cisdoc silecca, agena wawagaca eu wele gegehin qon eunu. <sup>16</sup> Age madi, ege Anutnu doqona, egina qa agena odoc age Anutnu qee dogina ec madena. Anut uqa agena odoc sagagdona, age Anutna je qee toodu odogina. Age odoc me oso odocnu ihoc qee.

## 2

*Wawaga meleec dana cajaca age iwaladec je tutuc*

<sup>1</sup> Hinaqa, hina je eu mele je toodona eu iwaladaga. <sup>2</sup> Hina dana toiatotia odi maadagale. Age agedodoc dumanaga cofdoqagan, age gesili fecca biluqagan, age cisdoc silecca biluqagan, age wawaga meleecna me biluqagan, age wawaga meleec dana cajaca nalunuga moqagan, wawaga duuecca tawoqagan ec maadagale.

<sup>3-5</sup> Eu odiwe caja toiatotia dana oso Anutna me jenu je me qee qee madeiaunnu age odi odoiga ec maadagale. Ageha gun biluqagan, age dana cajaca hibilemeka je cain madowain, age ceu jecebil dalul cain aqeaun, ceu eu agena ilo taweriaunnu ec maadagale. Age me odoc eu iwaladoqagan. Odocob caja toiatotia age caja haun gemugailca agena melcanu nalunuga mecnucu, age gesili fec bilecnuca, age kobil cataniec odocnucu, age agena jo cofdu cuhadocnucu, age dana cajaca lalafanadecnucu, age gemuga conoga toodu odocnucu, dado madoqagan.

<sup>6</sup> Eu odiwe dana haun agedodoc dumanaga cofdoiga ec maadagale. <sup>7-8</sup> Hinana cad age agenu je me qee madecnu ihoc qee, odocob age teiteieinnu majanaga odigiannu kobil cunug hina odogona hinadodoc kobil me himec odoga eunu age hina cebain oqagan. Hina dana iwaladec cabi euna mele je himec maadagale, je gauc cain gabandogaun. Hina je tutuc dih madagale, odocob dana age euna cahuldooc oso fecnu ihoc qee.

<sup>9-10</sup> Cabi dana cajaca bega meh age ceteh cunug odoginana age Anut ege Cahahagecnu iwaladec je eu binan suluqagannu agena ilo eu conoga toodu odoiga. Ceteh cunug odogina eu agena ilo gale adecnu odoiga ec maadaga. Age agena ilo je cain wadacduadown. Odocob age agena ilona ceteh nag oso cain heje cedowain. Euqa agena odoc cunugna age dana cajaca tutuc himec agena ilo ihacadoqagan.

<sup>11</sup> Ge, Anutna eelgec uum igec eu dana cajaca cunug cahahahaadecnu ihoc nijia eu camasac men. <sup>12</sup> Uum igec eu uqa ege Anut hibemdudu coboqaunnucu, mahana kobil me qee eunu golanige sililiaunnucu, ulaulgena. Ege maha ina egedodoc dumanige cofdoqanucu, ititom cobocnucu, Anutna kobil toodu odocnucu cesusgena. <sup>13</sup> Cesusgegen ege ceteh Anut eeldon eu susumudi biluquna. Eu agena Anut Ben, Jisas Krais agena Cahahagec, uqa fulacdoc gagadic odocca camasac migiannu susumudi biluquna. <sup>14</sup> Uqa ege silail cunugnadec ceseli fajigecnuca, uqa uqadodoc dana cajaca siluh soigeceb ege me odocnu megameq moqona eu uqana bahic bilocomun catanigiannu uqadodoc agenu men.

<sup>15</sup> Hina gaid dana cajaca je i maadagale. Hina tamanec cofadec dana eunu hinana tamanec dana cajaca je i toodu odoqagannu cesusadagale, age silail mecnucu odowainnu ulauladagale. Hina tamanec dana cajaca oso culdecem hina dana gauc ec cain cisdoiaun.

## 3

*Ege Kristen dana cajaca kobil me coboqale*

<sup>1</sup> Hina hinana tamanec dana cajaca dahiniga hewecem age kingca, gabmanca, ilo danaca filfilna bisalu bilecnuca, agena conoga toodu odocnucu, age cabi me cunug odocnu saciadoqagannu maadagale. <sup>2</sup> Age dana osonu je me qee cain madowain qa age cotigcotignu malol bileigale, odocob age gaid wawaga susumulcana dih dana cunug loo cahulec odadeigale.

<sup>3</sup> Ge, ege egdedoc wele cisdoc silecca qee, je toodu odoccia qee, qauadecca cobolob, odocob ege ceteh ilagnu amige qocca, golanige me qeenu sililecca toodu cobolob, ege cus mimi bili qisol mec kobil odadolob, ege dana osona ceteteh ocnu amige qoloi, dana age sagaggoloig, egeha sagagdocobdocobi cobolob.

<sup>4</sup> Euqa Anut egena Cahahagec uqa dana lalafadecca, uqa dana nalunuga mecca camasac men saen euna <sup>5-7</sup> uqa cahahagen. Ege tutuc odoc mati nijen eunu qee cahahagel. Euqa Anut ugana eelgec uum igeeca ege dana cajaca ititom ecnuca, odocob ege Anut huqanehul ibuldumeb cebac bilec catanec ocnu sumuduquna eu dunuh leqannuca uqa egenu waug qocob cahahagen. Anut uqa Kis Gunna cahahagen. Kis gun wa joigimei ege haun basigeceb cebac bilec haun igen. Jisas Krais egena Cahahagec eunu Anut uqa Kis Gun eu dewenigena meca basecdon. <sup>8</sup> Je i cunug eu mele.

Dana cajaca age Anutnu wawaga meleen eundec age me odocnu gagadic cisdoqagannu hina ceteh inu gehca qasali maadegannu gale tena. Me odoc eu ceteh meca, eu dana cajaca cesuladena. <sup>9</sup> Euqa hina je osona gugnu fee dadanecnuca, hina jena cadecnuca, hina dana agena sihul sanijecca age asagail ijanagana je eu mamadi fee dadanecnuca, hina Mosesna loo jenu gonagona mecnuca eu cunug qisacdu biligale. Ge, je madec eu cesulgecnu ihoc qee, eu ceteh gauc himec.

<sup>10</sup> Dana uqa fil cisdoma, uqa tamanec qatanecnu cabi ona eu saen osolnafo, lecisnafo hina madi, cabi i cain ogaun, ecem uqa hinana je qee dah mecebfii dana eu hibemdoga. <sup>11</sup> Hina dogona, dana eundec uqa me jena jic wele culen, odocob uqana coboc eu silail nec himec. Uqana cahuldoc eu camasac bahic, uqadodocha fena.

*Cit qoc je feele adec jeca*

<sup>12</sup> Ija ono duan saenna biligen ec cisdom. Eunu ija Atemasfo, Tikkicasfo suldochomin hinaca ligian saen euna hina jic oso walimeg Nikopolis ono ijaca hogale. <sup>13</sup> Hina Sinas loo jenu doc dana Apolosca alena jic cobocnu cesulali cuhadogale, odocob ale jicnu cetehca qee ec qee madowasin.

<sup>14</sup> Dana cajaca leih age cetehca qee bahic billecebifli age cesuladecnu ihoc biluqagannu, odocob wawige meleec dana cajaca age cain gauc biluwainnu egena wawige meleec dana cajaca iwaladecem agena saen cabi me oigale.

<sup>15</sup> Cunug age ijaca billegina age hina feele ec sulduhegina. Egena feele ec ege cotigeil wawige meleen egenu nalunige megina eu adagale.

Anutna eelgec uum igec eu age cunugca biliale.

## Pol Uqa Jaqec Je Oso Failimon Jaqiton Aqunec Je

Failimon eu dana ben oso. Uqa Kristen dana eu Kolosi taunna bilen. Ugana cabi dana bega meh oso, ijan Onisimas, uqa ugana benna ceteh heje umei ugana ben culdu busalimei taun osona nuen eu odi fena. (Eu 15 feiga.) Saen euna cabi dana bega meh uqa odi odocobfi Rom agena loo jena age qocobil cal moloi. Odocob taun euna Onisimas uqa Pol guludumei Kristen calen.

Saen euna Pol uqa ugana waug meleecnu gihacdoc jona bilen. Odimei uqa Failimon nui fecnu ihoc qee. Euqa uqa jaqec je i jaqimeti Onisimas uti suldocob ugana ben ceseli nuen. Jaqec je ina Pol uqa Failimon Onisimasnu cain gemag beiaunnu ninidona. Euqa qila Onisimas uqa Kristen bilina eunu Failimon uqa wawaga meleec cotigwe ehudigiannu ninidona.

### *Je Dunuhnu Dado Mec*

1. Feele adec je (1-3)
2. Pol uqa Failimon binannu sulen (4-7)
3. Pol uqa Onisimasnu ninidon (8-21)
4. Cit qoc je (22-25)

<sup>1</sup> Ija Pol, ija Krais Jisasnu gihacdoc jona biligina. Ija ege wawige meleec cotige Timotica ele Failimon jaqihuwnuna, hina elena danah bahic, hina ele cabi hijile. <sup>2</sup> Ele cebinamile Apiaca, Akipasha jaqialowona. Akipas uqa han cadec dana eleca osoben Anutna han ina biluquna. Odocob ele tamanec hinana jona ceguleginanu ha jaqiadowona.

<sup>3</sup> Memige Anut Jisas Krais Tibudca alena eelgec uum igecca malol bilecca adesiale.

### *Failimonna nalug mec waug meleeca*

<sup>4-5</sup> O cotile Failimon, ija hina Anutna dana cajaca qagoc cunugnu nalunuga maganaca, hina Jisas Tibudnu wawin meleenaca eunu dah migina. Eunu ija saen cunug ijana inondocna ija hina ijain umig ijana Anut hetaga dugina. <sup>6</sup> Hina eleca osoben gabangec wawige meleena. Eunu hina eleca osoben Kraisca gabangec biluquna eunadec eeldoc me cunug ege ogona eunu du cuhadogannu inondugina. <sup>7</sup> O wawile meleec cotile, hina dana cajaca qagoc cesuladecem age wawaga ceelen. Eunu hina dana cajaca ititomnu nalunuga magana eunu ija dumig wawi ben ceelen, odocob ija wawi duuec taweria.

### *Failimon uqa Onisimas cotigwe ceseli ugian*

<sup>8</sup> Hina nalunuga mec ben gug eunu ija Krais ijanna hina eeta odocnu nijia eu mahecemin odogannu ija gagadicca bilecnu ihoc mahigen. <sup>9</sup> Euqa ija hina nalunin miginanu ija ninihigina. Ija Pol, ija Krais Jisasna me je hewigina, ija qila Krais Jisasnu gihacdoc jona biligina. <sup>10</sup> Ija hina ijana mel Onisimasnu\* ninihigen. Ija gihacdoc jona bibilig saen euna ija ugana memeg calem. <sup>11</sup> Wele uqa hina cesulhecnu cabi qee oloi. Qilaqa uqa hina ijaca cesullecnu cabi ona.

<sup>12</sup> Ija qila uqa suldocomin hinaca ceseli lena. Ija wawica bahic osoben lena. <sup>13</sup> Ija me je maadec cabinu gihacdoc jona bibiligin Onisimas uqa hinana cudun umei cesultecnu ija cahadocomin ijaca bilewan bili odocnu gale toub. <sup>14</sup> Euqa ija je gagadicca mahecemin kobel me odogan eu qee gale tena, euqa hinana gale hecna kobel me odogan eu ija gale tena. Eunu hina eunu cois qee ifeg ija uqa qee cahadugaun.

<sup>15</sup> Eu mele, Onisimas uqa hina saen nag odi culihen. Euqa ija odi cisdugina, hina uqa ceseli oidecem hinaca gaid biluwasan eunu uqa hina saen nag odi culihen. <sup>16</sup> Odocob qila uqa begabeg meh cabi dana dih qee bilina qa uqa begabeg meh cabi dana wooldoc bilina, uqa wawige meleec cotige ija nalug migina eu odi bilina. Ijadodoc uqa ija coti bahic ec cisдумиг uqanu nalug migina! Odocob hina uqa begabeg meh cabi danaca Tibudca gabandoc cotinca ec cisdufeg uqanu gehca nalug Megan.

<sup>17</sup> Eunu hina ija hinana cabi hijen ec cisdufeg hina ija alalagtoumwe ceseli uqa alalagdoga. <sup>18</sup> Uqa hina cauldoci oso odihecebfi, hinana ceteh oso umig isi wadacdugen ecebfii uqa ijan eu falicdumeg ija ijanina maga. <sup>19</sup> Ija Pol, ija ene ijadodoc ebenina je i jaqigina. Ija ceteh eu wadacdru fajihigen. Mele, hina ija ceteh wadacdutecnu nijia eu hinana cebac biley! Euqa ija eunu madecnu qee nijel. <sup>20</sup> Ese ija coti, hina Tibudnu ijan

\* **1:10:** Grik jena ijan Onisimas ugana gug eu “cesuldoc.”

gale tec odogamo. Hina Onisimas ceseli oidogale. Odocob hina Kraisca gabandoc coti eu odiwe ija wawi me muditegan.

<sup>21</sup>Ija je i jaqihigina eu toodu odogannu du hedugina. Euqa ija hina odogannu mahigina eu hina wooldoc odogannu eu dugina. <sup>22</sup>Ija Anut uqa agena inondoc dah migiannu sumudi biligina. Odocob ija ceseli ageca ligen. Eunu saen euna dih cudun oso ijana saciaduteiga.

*Cit qoc feele adec*

<sup>23</sup>Epafras uqa ijaca osoben Krais Jisasnu gihadoc jona biluwuna eu feele adec sulduadena. <sup>24</sup>Odocob ija cabi hijeniel Makca, Aristakasca, Dimasca, Lukca ageha agena feele adec sulduadegina.

<sup>25</sup>Jisas Krais Tibud uqana eelgec uum igec age dolonogaca biliale.

## Oso Jaqec Je i Hibru Dana Jaqiaden Aqunec Je

Jaqec je i Pol ugana jaqec kobil qee toodona eunu me je doc dana age Pol eu qee jaqel ec cisdogina. Dana uqa jaqec i jaqen uqa Juda agena ihanc kobilnu du cuhadon. Doc dana age Banabasfa, Apolosfa eu jaqen ec cisdogina. In oso jaqec je i jaqen uqa Kristen Juda dana cajaca age Juda agena kobil haun ceseli ocnu cisdogina eu agena Jisas Kraisnu wawaga meleec gagadic mudecnu jaqiaden. Odimei Anut uqa Jisas Kraisna cabi ben on eunu jaqen. Eu Jisas Krais himec uqa Anutca ugana eelgec uum igecca camasac ihacgema eunu jaqen.

Jaqec je i ceteh ben cijednu madena eu odi. 1. Jisas uqa Anut Melah bahic. Jisas mahana cobon saenna uqa culumen dainca ben gahidon. Odochob odon eunu Anut uqa Jisas odudeceb uqa dana cunug wooladec calen. Eunu Anut uqa Jisas Kraisnu dana cajaca cunug caahahaadecnu ihoc (eu 2.10 feiga). Odimei Jisas uqa je hahun madec dana wele bilein eu cunugca, ensel cunugca, Mosesha eu cunug wooladen. 2. Anut uqadodoc madeceeb Jisas uqa nawel tawec ihanec dana bieleeb catanena. Odimei uqa Juda agena ihanec dana cunug wooladene. 3. Jisas uqa nawel tawec ihanec dana ilo, uqa sao jobon bilina. Eunu uqa dana cajaca cunug age uqanu wawaga meleena eu caahahaadecnu ihoc. Cuha fec kobil eunu Mosesna loo je madena, eu Jisasna cabi oc ben uqana galolo je himec.

Jaqec je i dana cajaca agena wawaga meleec gagadic mudecnu gale dona. Eunu eu Isrel dana cajaca wele bilein agena wawaga meleec gagadic eunu je mati madena (dac 11). Age celcel culumen gulucadecebfai Cain jaen aqeaun. Age agena wawaga meleec hewi daugdu lili cal moqagan. Age Jisas fefeig ugana kobil toodu odoqagan. Odimeig age agena sogoi coboc hawadoqagan.

### *Je Dunuhnu Dado Mec*

1. Aqunec je: Ceteh haun Anut camasac muden eu ceteh weledec wooldoc (1.1-4)
2. Krais uqa bal cehec je weledec ugana dana ben wooladec (1.5-7.28)
  - A. Krais uqa ensel cunug wooladec (1.5-2.18)
    1. Anutna je eu Krais uqa ensel cunug wooladec bilia ec madena (1.5-14)
    2. Krais uqa Anutna caahagec Anut igen eunu ege Cain ahawadoqaun (2.1-4)
    3. Anutna je haun eu Krais uqa ensel cunug wooladec bilia ec madena (2.5-18)
  - B. Krais uqa Moses wooldoc (3.1-4.13)
    1. Krais uqa adi Moses wooldoc bilia (3.1-6)
    2. Ege Anutna caahagec euna limeb jaen mudeqannu gagadic moqale (3.7-4.13)
  - C. Krais uqa Eron sihulna ihanec dana wooladec (4.14-7.28)
    1. Ege wawige meleec qasali madogona eu hewi daugdoqale (4.14-16)
    2. Dana uqa adi nawel tawec ihanec dana ilo calena (5.1-10)
    3. Ege mel sim agena kobil eu culimeb Kristen dana ben caloqale (5.11-6.12)
    4. Anut wele mele je magen eunu wawige meleigian (6.13-20)
    5. Krais ugana nawel tawec ihanec dana sihul eu ihanec dana sihuugail filfil wooladec (dac 7)
  3. Kraisna ihanec cabi eu ihanec cabi weledec wooladec (dac 8-10)
    - A. Kraisna bal cehec je haun eu Mosesna bal cehec je weledec wooladec (dac 8)
    - B. Kraisna cuha jo gun hamol sao jobon bilia eu Mosesna talah jo gun weledec wooladec (9.1-12)
    - C. Kraisna ihanec cabi eu Mosesna ihanec weledec wooladec (9.13-10.18)
    - D. Age gagadic taweigale (10.19-39)
  4. Age agena wawaga meleec euna gagadic tawoqagan (dac 11-12)
    - A. Anutna dana cajaca weledec age agena wawaga meleecna gagadic tawein (dac 11)
    - B. Anut uqa age melahulwe tutuc madenafi eu ceteh me bahic (12.1-11)
    - C. Age adi agena wawaga meleecna gagadic tawoqagan (12.12-17)
    - D. Age Saion Aluhna wele calein eunu agena wawaga meleecna gagadic taweigale (12.18-29)
  5. Cit qoc je (dac 13)
    - A. Kristen cobocnu dado madec (13.1-17)
    - B. Inondoc je (13.18-19)
    - C. Eeladec je (13.20-21)
    - D. Dahiniga mec je (13.22-23)

E. Feele adec je (13.24-25)

*Anut Melah uqa cona je magen*

<sup>1</sup> Wele bahic Anut uqa saen geh bahic jic filfilna uqana je hahun madec dana conogana ege jajanigeil je maaden. <sup>2</sup> Euqa deel hib cit qoc ina uqa Melah cona je magen. Anut uqa Melahna himec sao mahaca ifanen. Anut uqa Melahnu madi, hina ija huqani, don. Hibna hina ceteteh cunug organ, don. <sup>3</sup> Melah uqa Anut meca bahic ihacgena. Uqa Anutca ale caca, uqa Anut cinigwe. Odimej uqa je gagadic odocca madeceb ceteteh cunug gaid gagadic tawena. Odimej uqa dana cajaca cunug agena silail cacuadi hedumei uqa sao jobon ono King Meca Bahic uqa eben meulana isec bilen.

*Anut Melah uqa ensel cunug wooladec bilina*

<sup>4</sup> Anut uqa Melah u mudeceb uqa ensel cunug wooladen. Eu odiwe Anut uqa Melah ijan oso uten eu ensel ijanaga wooladec. <sup>5</sup> Ge, Anut uqa uqana ensel oso odi qee madel: "Hina ija melami.

Qila ija hina memen caliga," qee dol.

(Buk Song 2.7)

Anut uqana ensel osonuha odi qee madel:

"Ija uqa memeg biligen.

Odocob uqa ija melami odi biligan," qee el.

(2 Samjuel 7.14; 1 Stori 17.13)

<sup>6</sup> Odocob saen Anut uqana mel matu maha ina suldocob nigianni ninijen uqa odi maden: "Anutna ensel cunug age gob cehimeig uqanu cuha foqagan," en. (Loo 32.43)

<sup>7</sup> Anut uqana ensel agenu odi maden:

"Anut uqa uqana ensel fufu fuludocwe mudadena.

Odocob uqa uqana cewel utoc danaha ja belicancawe mudadena," en. (Buk Song 104.4)

<sup>8</sup> Euqa Anut uqa Melahnu maden:

"O Anut, hinana king bilec cabal eu bileceb catanigian!

Hina hinana king culna ititom biligina.

<sup>9</sup> Hina ititom kobol gawem.

Hina loo je tefacdoc kobol sagagdom.

Eunu Anut, hinana Anut ehihimei ceelec dana binainca bahic odi mihen, eu hinana danah eundec wooladem," en. (Buk Song 46.6-7)

<sup>10</sup> Odocob Anut uqaha Melah odi madon:

"Tibud, hina gug qocna maha ifanem.

Odimeg hina ebengulna ceteteh cunug saona nijia eu mudem.

<sup>11</sup> Eu cunug fadaloqagan qa hina odi gaid bilegan.

Ceteteh cunug lotoc cinigwe hilah moqagan.

<sup>12</sup> Hina duan lotoc cecelac cinigwe qahadi helegan.

Odimeg hina lotoc hilahwe helimeg haun oso organ.

Euqa hina biligina, eu odi gaid bileyem catanigian," don.

(Buk Song 102.25-27)

<sup>13</sup> Anut uqa uqana ensel oso odi qee madol:

"Ene hina ebeni meulana isec biliga.

Ene bibilem hinana cad cilehadimig age cabal jaim bisalu isec madigen," qee dol.

(Buk Song 110.1)

<sup>14</sup> Ensel age eeta? Eu age cunug eu kis himec, eu Anutna cewel utoc dana. Anut uqa dana cajaca cahahaadigian eu Anutna mugumuga mec oqagan eu cesuladecnu suladecēb ageca belegina.

## 2

*Anut ege cahahagen, eu ceteh ben bahic*

<sup>1</sup> Eunu ege mele je dah mom eu hewi cuhadoqale. Qeefi, ege mele je toodoc eu culuqaunnu. <sup>2</sup> Me je jaqec Anutna ensel jajanigeil adein eu mele bahic.\* Odocob oso uga qee toodol, tefacdon uqa ameg wadacdoc me qee on. <sup>3</sup> Anut ege cahahagecnu waug nijia eu ceteh me bahic. Eunu ege cahahagec eu qee hehweli cisdufeb ameg wadacdoc me qee adi wooldocnu?

Tibud uqadodoc casac cahahagec eunu maden. Odocob dana leih dah mudein eu age mele bahic ec magein. <sup>4</sup> Saen euna Anut uqaha cahahagec je eu mele bahic ihacgen. Uqa uqana gagadic odoeu ageca suldocob nen. Odocob kobolkobol odoec filfil calen. Odocob

\* 2:2: But i loo je Anut uqa Moses uten eunu maden. Age Kisim Bek dac 19-20 eu feiga. Je Kisim Bekna nijia eu enselnu je oso qee njiel. Euqa Juda age Anut uqa ensel ebenegana Moses loo je uten eunu wawaga meleen. Age Aposel 7.38ca, 7.53ca, Galesia 3.19ca euha feiga.

Kis Gun uqana bagol igec eu Anutna gale doc odinana siwiaden. Euna uqa cahahagec je eu mele bahic ihacgen.

*Jisas himec ege cahahagena*

<sup>5</sup> Anut uqa maha haun hibna caligian eunu madoqona eu uqana ensel king biluqagannu qee mudadel. <sup>6</sup> Eu odi jaqec je oso madena:

“O Anut, dana ege adec hina egenu cisdogona?

Ege dana melemigeil eetanu hina ege cofgagana?

<sup>7</sup> Hina ege saen nag odi himec ensel bisalu migem.

Hina ege binanigeca king bilecca migem.

<sup>8</sup> Odimeg ceteh cunug uqa jaih bisal mecem agena ilo bilen,” ena.† (Buk Song 8.4-6)  
Anut dana muden eu ceteh cunug agena ilo ec odi maden, eu ceteh cunug bahic ec maden. Euqa qila ege ceteh cunug eu dana uqa agena ilo qee bilina eu foqona. <sup>9</sup> Euqa ege Jisas foqona! Anutna eelgec uum igecka uqa dana cajaca mahanaadec cunugnu cal miigliannu Anut odudeceb saen nag odi himec uqa ensel bisalu bilen. Eunu Jisas uqa cal mec waug sogoecca egenu gahidonnu Anut king bilecca binanca muden. Eunu ege qila uqa king bilecca binanca ohis bilina eu foqona.

<sup>10</sup> Anut uqa ceteh cunug ifanena, uqa ceteh cunug hehdona. Uqa uqana dana cajaca cunug ehadi ehi leceb uqana fulacdoc ben biley eu oqagannu waug ben tawen. Eunu uqa Jisas odudeceb cal mec waug sogoe gahidon euna dana cajaca age cahahaadecnu cali hedon. Odocob uqa dana cajaca cunug iwallaadi ehadi ehi li cahahaadena. Anut kobil odom eu tutuc bahic. <sup>11</sup> Jisas uqa dana cajaca agena silailnu qagu gun madena. Odocob uqaca dana cajaca qagu gun madena eu ageca Memega osol himec. Eunu uqa cotiel ec madena uqa eu odi maadecnu majag qee dona. <sup>12</sup> Odimei uqa Anut madona:

“Hina eeta odom eunu ija cotiel qasali maadigen.

Ija hina binain sulec due tamanec gemona siligen,” dona.

(Buk Song 22.22)

<sup>13</sup> Odimei uqa haun madena:

“Ija Anutnu wawi mele bahic igian,” ena.

(Aisaia 8.17)

Odimei haun ha madimei madena:

“Ija ene biligina.

Ija mel sim Anut iten eu ageha ijaca biluquna,” ena.‡

(Aisaia 8.18)

*Jisas egena Cahahagec calen*

<sup>14</sup> Mel sim eu age dana dewenega golanagaca coboginawe Jisas ugaha dana deweg golacca odi bahic umei coboloi. Uqa cal miigliannu eu odi odom. Odocob uqa cal mec euna uqa dana cal necnu gagadic odoc ebenna hewena eu fadaldocnu odi odom. Dana eu uqa Seten. <sup>15</sup> Dana cajaca age mahana coboc saenna cal necnu cucuui coboloig. Odocob saen cunug maha ina biloloig cucuiec eu gihacadoloi. Eunu Jisas uqa gihacadec eunadec besiadigannu cal men.

<sup>16</sup> Ge, eu mele bahic. Uqa ensel cesuladecnu cabi oso qee ol. Qee bahic! Uqa Ebrahamna sihil cesuladecnu cabi on. <sup>17</sup> Eunu uqa cotugulnu Anutna nawel tawec ihanec dana ilo eu waug qocna Anutna je toodudu Anut cewel utocnu cabi ugiannu ceteh cunug uqa cotugul cinigwe bahic calen eu nijen. Uqa Anutna gemag bec gondon. Eunu Anut uqa dana cajaca cunug agena silail casiasiadeceu ihoc. <sup>18</sup> Seten uqa Jisas temdochob uqa waug sogoe. Eunu uqa qila dana cajaca cunug Seten temadena eu cesuladecnu ihoc.

### 3

*Jisas ijan eu Moses ijan wooldoc*

<sup>1</sup> O cotiel gun, Anut sao jobon bilina uqa ageha cahahaadec inu utaaden. Eunu age Jisasnu cisdu cuhadoigale. Uqanu wawige meleec ege qasali madoqona eu uqana nawel tawec ihanec dana iloca aposelca cabi ocnu Anut suldocob nen. <sup>2</sup> Anut uqa cabi inu ehuden. Odocob uqa Anut co tooduu cuhadon. Eu odiwe Anut wele Moses uqa Anutna tamanecnu cabi ocnu ehuden. Odocob uqaha Anut co tooduu cuhadon eu odi odom. <sup>3</sup> Anutna tamanec eu Anutna jo cinigwe. Dana jo cehe na binan eu jo uqana binan wooldoc. Eu odiwe Anut uqa Jisas binan ben eu Moses binan ben eu wooldoc ec cisdon. <sup>4</sup> Jo cunug eu dana cehec himec. Odocob ceteh cunug muden eu Anut uqadodoc himec

† 2:8: Je i Buk Songna nijia eu dana caja cunugnu maden. Euna uqa Hibrus jaqec je jaqen eu Jisas uqa dana calimee uqa dana caja cunugna cudun on ec cisdon. Eunu je i Buk Songna nijia eu ceteh Jisasca calen eunu tutuc madena. ‡ 2:13: Jisasnu je i Aisaia 8.17-18na nijia. Dana uqa Hibrus jaqec je jaqen eu dana caja cunug bileyinawe Jisas ugaha odi bilen eunu ihacadeceu gale don. Dana caja age Jisasnu wawaga meleen eu age Jisas waliagul. Dana cajaca age Anutna wawaga meleena, odocob Jisas ugaha Anutna waug meleen.

muden.<sup>5</sup> Moses uqa Anutna cewel utoc dana uqa Anutna jona cabi on. Uqa Anut co toodu cuhadon. Uqa Anut ceteh hibna madigiannu ninijen je casac qasali maden.<sup>6</sup> Euqa Krais uqa Anut Melah eunu uqa Anutna jo cofdoc cabi uqa melahnu Anut co toodu cuhadon. Ege ceteh wawige meleec susumudi gagadic hehewi culaug oqonafi egeha Anutna jo biluquana.

*Dana cajaca age Anutna je hibemdoeu age malol qee biluwain*

<sup>7</sup> Eunu ege Kis Gunna je dah moqale. Eu odi madena:

“Qila age Anut jejeg dah mifeig<sup>8</sup> age wawaga gagadic bahic cain menowain. Wele bahic dana cajaca fileeig Anut jejeg wooldumeig odooin odi cain odowain. Age hatu danaca qeena isec bibileig temtein.

Saen euna agedodoc wawaga menein.

<sup>9</sup> Hatu euna age jajanagail cabi gel 40 eu cunugna ceteteh cunug odom eu fein. Euqa eunu qee cisdoloin eu age temtecnia mitein.

<sup>10</sup> Eunu ija dana cajaca sihul eunu gemani geh ben odimig madem, ‘Saen cunugna wawaga jic bahic toodoc cuculi qolocdona.

Age ijana jic coboc kobel eu qee toodogina,’ em.

<sup>11</sup> Odocob ija gemani beceb cagoc je madem,

‘Eu age ijana jaen mudec cudun dunuh qee bahic qee lowain!’ em,” Kis Gun odi madena. *(Buk Song 95.7-11)*

<sup>12</sup> O wawige meleec cotiel, agedodoc cofdu cuhadoiga. Qee fefeiq cotoga age gemona oso uqa waugna cisdock me qeeca culdecebil waug meleec eu felacucudi Cebac Bilec Anut eu hibemdoiaunnu.<sup>13</sup> Saen i eu Anut uqa qila ena uqa gaid bilia eunu deel cunugna age cotogail je meme himec maaadeig cisdock fogo duadeiga. Qee fefebil silail kobel age gemonadec oso uhuldocb waug gagadic meneiaunnu.<sup>14</sup> Ege hahawan wawige meleen gagadic hewom. Eunu ege qila wawige meleec eu gagadic hehewi li egene cal mec gadac gulucdogale. Ege eu odi odifeb ege Krais cotugul hijagul biluquana.

<sup>15</sup> Ege doqona, Anutna jaqec je madena:

“Qila age uqa jejeg dah mifeig age wawaga gagadic bahic cain menowain.

Wele bahic dana cajaca fileeig Anut jejeg wooldumeig odooin odi cain odowain,” ena. *(Buk Song 95.7-8)*

<sup>16</sup> Wele inni age Anut jejeg doin odimeig fileeig uqa jejeg wooldoin? Eu dana cajaca cunug Moses ehadeceb Isip hatu cuculi belein eu age. Eu age himec kobel eu odi odooin.

<sup>17</sup> Cabi gel 40 cunug eu Anut uqa innu gemag ben? Uqa dana cajaca silail moloig eu agenu gemag ben odocob cal mein eu age dewenega ganac hatu danaca qeena nijein. Anut uqa eu agenu himec gemag ben.<sup>18</sup> Anut uqa inni eu age cagoc je madi, ugana jaen mudec cudun dunuh qee bahic qee lowain, en? Eu dana cajaca uqa jejeg qee toodoloin eu age. Uqa eu agenu himec maden.<sup>19</sup> Eunu ege foqona, eu age wawaga qee meleelnu Anutna jaen mudec cudun dunuh qee lowain.

## 4

*Anutna dana cajaca age jaen mudec oqagan*

<sup>1</sup> Anut uqa je hahun eu odi maden, “Age cois ijana jaen mudec cudun dunuh loqagan,” en eu qila bilia. Eunu ege cofdu cuhadoqale. Qee fefebil age gemonadec dana oso cahuldudu jaen mudec abusildoiaunnu.<sup>2</sup> Ge, ege me je dah mom wele Isrelha odi dah mein. Euqa eu age dah mein qa wawaga qee meleel. Eunu me je age dah mein eu qee cesuladel.

<sup>3</sup> Ge, ege dana cajaca wawige meleena, ege jaen mudec cudun\* eu dunuh loqona. Wele Anut uqa cudun eunu madimei maden:

“Ija gemani beceb cagoc je odi madem,

‘Eu age ijana jaen mudec cudun eu dunuh qee bahic qee lowain!’ em,” en. *(Buk Song 95.11)*

Eu ugana jaen mudec cudunnu eu odi maden qa wele Anut uqa maha ifanen saen euna ugana jaen mudec cudun saciadu muden.<sup>4</sup> Odocob Anutna jaqec je oso deel sanijec 7-peladocnu odi madena:

“Odocob Anut ugana cabi cunug odi hedon, odimei deel 7-pela euna jaen muden,” ena.

*(Genesis 2.2)*

\* **4:3:** Isrel age Isip hatu culdein saenna Anut uqa Moses Josuaca ale Isrel ehadi lecebile age Kenan hatuna beloqagannu gale don. Odocob maha eu agena jaen mudec cudun calecnu gale don. Euqa dana uqa Hibrus jaqec je jaqen eu Anut ugana jaen mudec cudun oso nijia, eu sao jobon eunu ihacadecnu gale don. Eu ugana jaen mudec cudun gug bahic, odocob uqa wawaga meleec dana cajaca culadeceb age cudun eu dunuh loqagan.

5 Odocob Anutna jaqec je euna haun ha madena, "Eu age ijana jaen mudec cudun eu dunuh qee bahic qee lowain!" ena. <sup>6</sup> Odocob dana cajaca wele bahic je dah mein eu age jejeg qee toodoloirnu dunuh qee lelein. Eunu je eu qila bilia. Leih age uqana jaen mudec cudun eu dunuh loqagan. <sup>7</sup> Eunu Anut uqa haun deel oso men. Uqa deel eu "Qila" ec maden. Odocob hibna cabi gel mati hedocob Anut Dewid cona je qasali maden, je eu ege casac wele madoqa odi:

"Qila age uqa jejeg dah mifeig age wawaga gagadic bahic cain menowain," en. (Buk Song 95.7-8)

<sup>8</sup> Ge, wele Josua uqa jaen mudecnu Anut maden eu adoubmi Anut haun jaen mudecnu deel osonu qee madoub. <sup>9</sup> Eunu ege doqona, jaen mudec cuha deel oso eu Anutna dana cajaca sumadec bilina. <sup>10</sup> Odocobha eu ege doqona, dana Anutna jaen mudec cudunna lena uqa uqana cabi qee mudina. Wele Anut uqadodoc uqana cabi qee mudimei jaen muden eu odiwe jaen mudina. <sup>11</sup> Eunu ege jaen mudec cudun euna legannu gagadic moqale. Qee fifi dana oso age jejeg qee toodoc kobil eu wele odimeig fadalein eu odi fadaladeiaunnu.

<sup>12</sup> Anutna je eu cebac bilecca cabi gagadic u bilina. Eu aigca bahic uqana aig eu han sigin aig lecisca euha wooldoc tawena. Eu dana qohodumei dunuh bahic lena. Li dolonigeca kiscana ono lena, odimei qatanalena. Odimei gob tefulinigeca mihinogca limei qatanalena. Odimei ege wawigena gale gec cisdocca cunug nenesili fena. <sup>13</sup> Anut ceteh cunug muden eu oso uqa olana jahunecwe qee. Qee bahic! Ceteteh cunug eu Anut amegna camasac bahic taweginna. Odocob uqa amegna himec ege kobil cunug odoqona eunu madoqan.

### *Jisas uqa egena nawel tawec ihanec dana ilo*

<sup>14</sup> Jisas Anut Melah, uqa egena nawel tawec ihanec dana ilo, uqa sao jobon dunuh bahic len. Eunu ege wawige meleec qasali madoqona eu hewi daugdoqale. <sup>15</sup> Ge, egedodoc egena gagadic odocna silail cilehdooqwe qee. Euqa egena nawel tawec ihanec dana ilo uqa egenu waug qocca qee odi qee bilina. Temgec egeca calena euha cunug temdoc uqaca calen. Euqa uqa silail qee mel. <sup>16</sup> Eunu ege Anutna king cabal bielecna lecnu qee cucuiuqaun. Anut uqa waug qocca, uqa eelgec uum igina. Ege uqaca lifeb uqa waug qocca eelgec uum igecca eu oqan. Odocob ege culumencafi uqa cesulgigian.

## 5

### *Nawel tawec ihanec dana ilo Jisas uqa cahahagecnu ihoc*

<sup>1</sup> Nawel tawec ihanec dana ilo mugumuga mec kobil eu odi. Anut uqa dana eu dana gemonadec ehudeceb uqa Anut cewel utona. Odimei uqa dana cajaca agena silail cagasecnu uqa Anut bagol utina, uqa Anutna nawel tawec ihanec filfil cabi ona. <sup>2</sup> Uqa dana waug gagadicca qee. Eunu uqa dana cisdocca qee age Anutna jic culegina eundec cehnana iwaladena. <sup>3</sup> Odocob uqa dana cajaca agena silailnu Anut cagasiadecnu ihandona. Euqa uqa waug gagadicca qeenu uqadodoc uqana silail cagositocnu Anut ihandona.

<sup>4</sup> Nawel tawec ihanec dana ilona cabi eu binan benca. Odocob dana oso uqadodoc cabi eu qee hewena. Qee bahic! Anut uqadodoc cabi eu hewigianu ehudina, wele Eron ehudenwe.

<sup>5</sup> Krais uqaha eu odi odon. Uqa uqadodoc binan susuli nawel tawec ihanec dana ilo qee calel. Qee bahic! Anut uqadodoc nawel tawec ihanec dana ilo cabi eu gahidugiannu ehuden. Anut uqa madon:

"Hina ija melami."

Qila ija hina memen caliga," don.

(Buk Song 2.7)

<sup>6</sup> Odocob uqa jaqec je osona ha odi maden:

"Hina nawel tawec ihanec dana gaid bielec catanigan, nawel tawec ihanec dana Melkisedekwe odi bilegan," en. (Buk Song 110.4)

<sup>7</sup> Wele Jisas uqa dana mahana bilen saen euna uqa Anut inondudu bilen. Anut uqa cal mecnadec cahahadocnu ihoc eunu uqa qajec benca amulig nenen utai inondon. Uqa uqadodocnu jogoi Anut bisalu himec biloloi eunu Anut uqana inondoc eu dah moloi.\* <sup>8</sup> Jisas uqa Anut Melah qa uqa waug sogoen culumen gahidon. Odocob uqa waug sogoen

\* 5:7: Jisas Getsemani cabina bilen saenna uqa Anut uqa culumen ben eu uqaca caligia oodon besitocnu inondon. Age Matju 26.36-46ca, Mak 14.32-42ca, Luk 22.39-46ca eu feiga. Odocob but i odi maden. Anut uqa Jisasna inondoc dah men. Anut culdochob Jisas cal men eu mele. Euqa Anut culeceb cal mec eu Jisas gaid qee hewudel. Deel cijed hedocob Anut uqa tulidocob cal mecnadec ceseli cajen. Odimei uqa ijan ben utimei uqa uqana nawel tawec ihanec dana ilo muden. Age Aposel 2.24ca, Hibrus 2.9ca, Filipai 2.6-11ca euha feiga.

culumen gahidon euna Anut jejeg toodoc kobolnu du cuhadon. <sup>9</sup> Euna uqa je toodoc dana bahic calen. Eunu uqa dana age Jisas jejeg toodogina eundec agena cahahaadec gug calen. Cahahaadec eu gaid bileceb catanigian. <sup>10</sup> Odocob Anut uqa ehudimei madon, "Hina nawel tawec ihanec dana ilo bilegan eu nawel tawec ihanec dana Melkisedekwe odi bilegan," don.

*Ege mel simwe gaid bilecnu cois qee*

<sup>11</sup> Krais uqa nawel tawec ihanec dana Melkisedek cinwe eunu je geh bahic nijia<sup>†</sup> ege je eu maadecnu qa qila agena cisdoc eu qee fogo dol. Eunu ege je eu age sildiadecnu cacanigca. <sup>12</sup> Ge, age wawaga meleec dana saen cecelac biley eunu qila age iwaladec dana biloub, eu saen ihoc. Euqa age iwaladec dana qee. Agena cisdoc eu gothic, odocob dana oso haun Anutnu je gug bahic eunu iwaladigiannu nijia. Age sab gagadic ocnu ihocca qee. Age su ocnu ihoc himec. Eu odi nijia. <sup>13</sup> Ege dogona, dana su himec jegina eu age mel sim cinigwe. Odocob age kobol ititomnu batut qee dogina. <sup>14</sup> Sab gagadic eu dana wele ben mein agena. Dana eundec agena cisdoc saen gehca iwaldocobilfi age kobol me qee kobol meca eu nesili docnu ihoc.

## 6

*Ege wawige meleec gagadic hewecnu*

<sup>1-2</sup> Eunu ege Kraisna je gug sanan mec age hahawan iwalgein saen euna ege wawige meleec mel sim cinigwe. Ege je gug sanan mec eundec himec madoqonafi ege mel simwe gaid bileqan. Je gug sanan mec iwalgec eu odi, ege kobol cebac biley qee eunu tului falicdumb Anutnu wawige meleecca biley, odocob wa joc filfilnuca,\* ebenige dana ilona mecnuca, cal mecnadec cunug ceseli cajoqagannuca, silail dana eundec Anut gel hib madeceb je eu bileyceb catanigannuca. Ege je gug eundec himec madoqonafi ege jo nah gehgeh cehoqona qa jo qee cehi hedagonaw. Cois, ege mel sim agena kobol eu culimeb wawige meleec je cauncā dana ben mein eundec je madeginawe madoqale. <sup>3</sup> Anut uqa euwa nijiecebfi eu mele ege odi himec odocnu.

<sup>4-6</sup> Dana leih age wele Anutnu fogo doc eu oin. Age bagol adec sao jobon ohisdec ageca nena eu wele jein. Odocob Kis Gun ageca wele nen. Eu age wele Anutna je temdumeig doin eu me bahic. Age Anutna kobolkobol odocca gesiladec gagadic odoc eu deel hib cit qocna ha eu odi caligian ecca wele doin. Dana eundec age wawaga meleec culecebifl adi haun tului falicdumb wawaga meleigian? Kobol eu odina eu agedodoc Anut Melah haun na babalecna tuitu qocbil cal mena. Odimeig age dana amagana uqa qesaldoqaga bili odi odogina. Eunu dana eundec age haun ceseli humeig wawaga falicdumb jicca qee.

<sup>7</sup> Saen geh bahic wa hocob maha uqa wa eu ona. Odocob dana cajaca age maha euna sab cehi jecnu cesuladuna kobol euna Anut uqa maha i eeldoc me suldocob nena. <sup>8</sup> Euqa euna halu dudca filfil gisinafi maha eu me qee. Saen nag odi Anutnu madi, maha eu me qee bahic, igian. Hibna ja ciji hedugian.

<sup>9</sup> Egena danah bahic, qila ege je culumenca i maadogona. Euqa ege doqona, eu age odi qee me qee madeiaun. Qeoo. Anut eelaadi cahahaadigian. <sup>10</sup> Ge, Anut uqa dana me qee qee, eunu uqa age cabi cunug oin eunu qee dahig celeiaun. Qee bahic. Eu odiha age dana cajaca qagoc cesuladein euna age Anutnu nalug megina eu ihacadein. Odocob age qila odi odogina. <sup>11</sup> Age cunug gagadic himec mimi cabi oqagannu gale gena. Age wawaga meleec eu gagadic heheweig lecebilek age qee mec gadacna caloqagannu gale gena. Eunu cetehnu wawaga meleec sumudegina eu gulucdoqagan. <sup>12</sup> Age cain alal adeiaun. Age dana wawaga meleec agena kobol toodoiga, mahuc qee alal adena. Dana eundec age wawaga meleecca sumudegina age Anut ceteteh uqana mel adigan en eu mugumuga oqagan.

*Anut wele mele je magen eunu wawige meleigian*

<sup>13</sup> Wele Anut uqa Ebrahim mele je madon. Odocob dana oso uqa ben bahic Anut wooldoc oso qee biley, eunu Anut uqa ijanna mele ohis ecnu qee nijel. Eunu Anut uqadodoc ijanna mele ohis ec maden. <sup>14</sup> Uqa odi madon:

"Ija mele je mahigina, hina eelhec ben ihecemin hinana sihul eu fulusdudu maha cunug ihoc ligian," don. *(Jenesis 22.17)*

<sup>15</sup> Eunu Ebrahim uqa qee alal dol uqa Anut sumudi bilen oodi li hibna Anut ceteteh utigia mele je madon eu cunug on.

<sup>†</sup> 5:11: Age Hibrus dac 7 feiga. \* 6:1-2: Je i "wa joc filfil" uqana gug eu camasac qee. Dana leih age wa joc eu Kristen agena kobol qee, euqa eu Juda agena kobol ec cisdogina. Juda age Anut amegna soidoc biley, wa joc eu odi odooin.

<sup>16</sup> Je cagoc madecnu kobil eu odi. Dana age oso ijanca uqa ijanna je cagoc madegina. Dana ijanca uqa dana age je cagoc madegina eu wooladec. Dana oso uqa je cagoc ena uqa uqana je gagadic mudecnu madena, uqa haun qee madeiaun. Odocob leih uqana je cilehdoqaga odocobil conoga afa qocnu age ihoc qee, uqana je cagoc taweia. <sup>17</sup> Dana cajaca age mele je Anut uqa wele maden eu age hibna mugumuga oqagan, Anut uqa uqana je haun falicdocwe queen age camasac bahic ihacadigia bili eunu uqa je cagoc oso uqana mele jeca gabandon. <sup>18</sup> Eunu ceteh lecis nijesia. Oso eu Anut uqa Ébraham mele je madon, oso eu Anut uqa uqadodoc ijanna cagoc je maden. Eu ceteh lecis euna uqana cisdoc haun falicdocwe qee, odocob uqa uhulec je madeweha qee. Eunu ege leih busali limeb uqaca biley me om eu ceteh ege sumudi biluquna Anut uqa olanigena men taweia eu gagadic hewecnu dahinige hewena. <sup>19</sup> Ceteh eu ege sumudi biluquna eu ege cobocnu ca hacgec tawena. Ceteh eu gagadic tawena, eu mele bahic. Eu cuha jo ben dunuh jic cebec lotoc eu cuculdi hamol bahic lena. <sup>20</sup> Ege ijanigenu Jisas uqa aqunigec wele hamol eu dunuh len. Odimei nawel tawec ihanec dana ilo gaid bileceb catanigianu calen, uqa nawel tawec ihanec dana Melkisedekwe odi bilina.<sup>†</sup>

## 7

*Melkisedek uqa dana ijanca*

<sup>1</sup> Melkisedek eu uqa Salem agena king,\* odocob uqa Anut Ohis Bahic uqana nawel tawec ihanec dana. Saen Ébraham uqa king 4-pela han benna wooladennu ceceselen Melkisedek jic cuhul ceguldumei eeldon. <sup>2</sup>Odocob Ébraham uqa han benna ceteteh ceden eu cunug ila meceb li am 10-pela calen. Odocob 10-pela eundec osol eu Melkisedek uten. (Melkisedek ijan eu uqana gug casac bahic eu “Ititomna King.” Odocob saen euna eu uqa Salem agena king bilennu uqa ijan eu uqana gug euha “Malol Bilecna King.”) <sup>3</sup>Melkisedek uqa memeg anagca odocob wele uqana sihul adi hon euha oso qee doloin. Uqana basec deelfo, cal mec deelfo adi cal men euha oso qee doloin. Uqa Anut Melah cinigwe, uqa nawel tawec ihanec dana gaid bilina.<sup>†</sup>

<sup>4</sup> Age feiga, Melkisedek uqa binanca ben bahic! Ege jajanige Ébraham uqa han benna ceteteh ceden eu leih cesawiton. <sup>5</sup>Odocob Liwaina sihul age nawel tawec ihanec dana age loo je gatiti maadeceab age Isrel dana agena ceteteh cedegina. Isrel dana age agena ceteteh cunug ila meceb li am 10-pela caleceb 10-pela eundec osol eu Liwaina sihul adegina. Eu odiwe Ébraham uqa Melkisedek ceteteh uten. Liwaina sihul age Isrel dana agena ceteteh cedegina euqa age cunug hatu osolna bileyina, age sihul osolnадec eu Ebrahamna sihul himec. <sup>6</sup>Melkisedek uqa Liwaina sihulnадec qee qa uqa Ebrahamna ceteteh 10-pela eundec osol cedimei uqa Ébraham Anutna mele je on eu eeldon. <sup>7</sup>Oso uqa eeladena uqa dana eeladec ogina wooladena eu mele bahic.

<sup>8</sup> Qila nawel tawec ihanec dana eu age dana cal megina, age ceteteh 10-pela eundec osol cedegina. Melkisedek uqaha nawel tawec ihanec dana, uqa ceteteh 10-pela eundec osol cedoloi qa uqa cebac bilina. Anutra je eu odi madena. <sup>9</sup>Eu je oso madecnu ihoc eu odi, Ébraham ceteteh 10-pela eundec osol Melkisedek uten saen euna Liwai, uqana sihul hib caloqagan age ceteteh 10-pela eundec osol cedoqagan, uqaha Melkisedek uten. <sup>10</sup>Eu adinu? Mele, Liwai uqa qee calecna Ébraham uqa Melkisedek gulucdon qa saen euna Liwai uqa jajanig Ébraham dewegena bilen.

*Nawel tawec ihanec dana ilo haun uqa nawel tawec ihanec dana weledec wooladen*

<sup>11</sup> Eu nawel tawec ihanec dana Liwai sihul agena cabi oc gadac eu uqana gugna Anut uqa Isrel dana loo je aden. Eunu nawel tawec ihanec dana Liwai sihul agena cabi oc eu ihoc himecmi nawel tawec ihanec dana gug fil oso qee caloub, uqa Eronwe qee qa uqa Melkisedekwe. <sup>12</sup>Eunu saen nawel tawec ihanec cabi dana oso falicdocob caleceb loo je euha falicdocob calen. <sup>13-14</sup>Odocob eguna Tibud uqanu ceteteh cunugnu maden eu uqa sihul filnadec, odocob wele uqana sihulnадec nawel tawec ihanec dana cabi oso qee

<sup>† 6:20:</sup> Cabi gel cunugna deel osolna Isrel agena nawel tawec ihanec dana ilo uqa cabi ben oso olo. Uqa Isrel agena silail casgiadien dool ihanec golanaga umei ehi li Anutra jona hamol gun bahic dunuh loloi. Hamol gun bahic euna Anut biloloi. Age Wok Pris 16ca, Hibr 9.1-7ca feiga. Aria, qila Jisas uqa eguna nawel tawec ihanec dana ilo bahic calen. Odimei uqa Anutra jona hamol gun bahic eu sao jobonna tawena ono dana cajaca agena silail casgiadien cabi ona. Age Hibr 2.17ca, 4.14ca, 8.2ca eu feiga. \* <sup>7:1:</sup> Hibna age Salem eu Jerusalem ein. † <sup>7:3:</sup> Je i Melkisedek uqa memeg anagca qee en uqana gug eu odi. Buk Baibelna je oso eu Melkisedek uqa memeg anagca eunu maden eu qee nijel, odimei je oso eu uqana basec deelfo, cal mec deelfo adi cal men eunu maden euha qee nijel. Eunu dana uqa Hibrjaqec je jaqen eu Melkisedek uqa Jisas nawel tawec ihanec dana gaid bilina eunu galolo oso eu odi maden.

hewel. Eu cunug dogina, eu uqa Juda silihlnadec calen. Odocob Moses uqa saen nawel tawec ihanec dananu maden eu uqa sihul eu oso qee ijan ol.

*Jisas uqa nawel tawec ihanec dana fil, eu Melkisedekwe*

<sup>15</sup> Uqua nawel tawec ihanec dana oso uqa Melkisedek cinigwe wele calen eunu loo je eu falicdocob haun calen eu camasac bahic nijia. <sup>16</sup> Uqa nawel tawec ihanec dana calen. Odocob uqa dana mahanadec agena loo je gadacna qee calet qa uqana cebac biley catanec eu gagadic odocca eunu uqa nawel tawec ihanec dana calen. <sup>17</sup> Eu eetanu? Anutna jaqec je eu odi madena:

“Hina nawel tawec ihanec dana gaid bileyem catanigian, nawel tawec ihanec dana Melkisedekwe odi bileyen,” ena. (Buk Song 110.4)

<sup>18</sup> Odocob loo je gadac hilah eu gagadic qee, odocob eu ceteh gauc himec cinigwe eunu gesac mein. <sup>19</sup> Eu eetanu? Mosesna loo je eu ceteh tutuc bahic mudecnu ihoc qee. Odocob qila ceteh me bahic ege tutuc mudecnu ihoc eu Anut igen eu bilina. Odocob ceteh me bahic eu ceteh hilah wooldona euna ege Anut cemenug loqona.

<sup>20</sup> Eu odi osoha tubdoc eu Anutna cagoc je. Nawel tawec ihanec dana calein saen euna Anutna je cagoc odi oso qee calet. <sup>21</sup> Euqa Jisas uqa Anutna je cagocna nawel tawec ihanec dana cacalen Anut odi madon:

“Tibud uqa cagoc je maden eu cisdock qee falicdoiaun.

Hina nawel tawec ihanec dana gaid bileyem catanigian!” don. (Buk Song 110.4)

<sup>22</sup> Anut uqa Jisasnu cagoc je madeceb Jisas cebac bileyem catanena. Eunu ege doqona, bal cehec je me bahic caligian, eu Anutna bal cehec je hilah wooldugian.

<sup>23</sup> Ceteh fil osoha nijia. Nawel tawec ihanec dana wele bileyin eu age cal mimeig cabi eu culein. Eunu age geh bahic. <sup>24</sup> Euqa Jisas uqa gaid bileyem catanena eunu uqana nawel tawec ihanec dana cabi eu gaid ona. <sup>25</sup> Odocob uqa qilaca, odocob gaid saen cunugna ha dana cajaca age Anutca uqa ijanna legina eu uqa agenu Anut inondudu gaid bileyem catanena. Eunu uqa dana cajaca eu cahahahaadecnu ihoc bilina.

<sup>26</sup> Eunu Jisas uqa nawel tawec ihanec dana ilo, uqa ihoc cesulgena. Uqa gun bahic. Uqa cahuldoc oso uqaca qee bilina, uqa silailka qee. Anut uqa qagu mudceeb silail dana cajaca gami qee bileyina. Anut uqa suldoch obis ti sao jobon wooldoc obis bahic bilina.

<sup>27</sup> Nawel tawec ihanec dana ilo weledec age deel cunugna ihanecnu cabi mugumugaca biloloig. Casac age agedodoc agena silail cagasiadecnu ihanoloig. Hibna age dana cajaca agena silail cagasecnu ihanoloig. Euqa Jisas uqa cabi odica qee. Qee bahic! Uqa ihani osoldon eu saen cunug ihoc. Uqa uquadodoc uqana cebac bileyem Anut uten. <sup>28</sup> Loo je eu uqa dana gagadic odocca qee eundec nesili ehadeceb nawel tawec ihanec dana ilo cabi hewegina. Euqa je cagoc eu hibna calen eu Dana Melah nesili ehuden. Anut uqa cabi ocnu ihoc bahic muden, uqa saen gaid odi bileyem catanena.

## 8

*Jisas uqa nawel tawec ihanec dana ilo sao jobon bilina*

<sup>1</sup> Aria, je ilo ina ege madogona eu odi. Egena nawel tawec ihanec dana ilo eundec uqa Anut King Ben uqana bileyem cabal meulana isec sao jobon bilina. <sup>2</sup> Uqa nawel tawec ihanec dana ilona cabi tempelna hamol gun bahicna ono cabi eu ona. Talah jo eu sao jobon bilia, eu mele bahic. Dana oso uqa talah jo eu qee cehec. Eu Tibud uquadodoc cehen.

<sup>3</sup> Anut uqa nawel tawec ihanec dana ilo cunug age Anut loo uuteig ihanec gug filfil mecnu nesili ehadena. Eunu egena nawel tawec ihanec dana ilo uqaha ihanecnu ceteh osoca bilia. <sup>4</sup> Euqa nawel tawec ihanec cabi dana wele mahana cabi ogina, odimeig Mosesna loo je toododoig loo gug filfilna Anut ihandogina. Eunu egena nawel tawec ihanec dana uqa mahana bileyebfi uqa nawel tawec ihanec dana qee bilina. <sup>5</sup> Age cuha jo gun euna nawel tawec ihanec cabi ogina eu sao jobon uqana cuha jo gun bahic eu uqana ihicon qoc. Ge, saen Moses uqa cuha talah jo cehigia oodon Anut uqa Moses odi madon: “Hina cofdu cuhadoga.

Hina ceteh cunug gaga aluhna ihachem eu odi bahic mudegan,” don. (Kisim Bek 25.40)

<sup>6</sup> Qilaqa Anut uqa Krais nawel tawec ihanec cabi uten. Odimei Anut uqa bal cehec je i mele je madeceb dana cajaca age ceteh me bahic cedoqagan. Eunu Kraisna cabi eu nawel tawec ihanec dana cunug wooladec. Eu odiwe bal cehec je uqa Anutca uqana dana cajaca gemo muden eu bal cehec je weledec wooldona.

*Bal cehec je haun eu bal cehec je weledec wooldon*

<sup>7</sup> Bal cehec je weledec eu cahuldocca qeemi Anut uqa bal cehec je haun qee madoub.

<sup>8</sup> Euqa Anut uqa dana cajaca agena cahuldoc eu camasac mudimei maden:

"Tibud maden, 'Hibna deel oso dodoldona saen euna ija bal cehec je haun ijaca Isrel Juda dana cajaca ageca gemo mudigen.

<sup>9</sup> Bal cehec je haun eu ija wele ijaca jajanagailca gemo mudem eu odi qee, saen wele ija age ebenega hewimig Isip hatu culdi ehadi nuem euna.

Euqa age ijana bal cehec je qee hewelein, odimeig qee toodoloin.

Eunu ija hibemadem,' Tibud odi maden.

<sup>10</sup> Odocob Tibud tubdu maden, 'Saen i hedocob ija bal cehec je haun ijaca Isrel sihul ageca gemo eu odi mudigen.

Ijana loo je eu cunug agena cisdocna miadigen.

Odocob wawaganaha loo je jaqiadigen.

Odimig ija agena Anut biligen, odocob age ijana dana cajaca odi biluqagan.

<sup>11</sup> Odocob dana osolosol cunug ageca jobon osol cotogailca odi iwaladecnu cabica qee.

Age cotogail oso qee madowain, "Hina Tibudnu doga," qee dowain.

Saen euna dana cajaca cunug age ijana doqagan,

dana cajaca mecaca sim calcalca cunug ijana du cuhadogagan.

<sup>12</sup> Ija agenu wawi lal qocca eunu agena cahuldoc eu cagasiadigen.

Odocob agena silailha eunu ija haun qee cisdugaun,' Tibud eu odi maden," en. (*Jeremaia 31.31-34*)

<sup>13</sup> Anut uqa bal cehec je haunnu madeceb uqa bal cehec je weledec eu hilah ibuldon. Ceteh hilah ibuldonia eu uqa cabi ocnu qee mena, saen nag odi himec gieceb qee migian.

## 9

### *Nawel tawec ihanec dana ilo weledec uqa dool golanagana ihanoloi*

<sup>1</sup> Bal cehec je hahawan calen eu cuha fecnu dana cajaca age loo gadac toodoloig. Odocob cuha fecnu ha jo gun oso dana age cehein maha ina tawoloi. <sup>2</sup> Talah jo oso cehein. Jo eu hamol cudun oso age Cudun Gun ec madoloig. Euna cejalca cabal ceteteh mec euca ihanec bred Anut amegna biloloi euca tawoloig. <sup>3</sup> Lotoc ben lecis talah jo eu qagoloig. Lotoc oso eu hamol gun aqunec cebecna fele cehein. Odocob lotoc oso hamol gun eu hibilohu isec cebecna fele cehein, cudun eu Cudun Gun Bahic ec madoloig. <sup>4</sup> Ihane cabal goldna mudein euna casuc dedeman tinca mudoloig eu tawoloi. Odocob bal cehec je alildoc cudauga tawoloi. Eu goldna mudi jahuldoc. Alildoc cudaug eu dunuh eu gabin cecelac goldna mudec manna\* euna nijoloi eu tawoloi. Odocob Eronna na kom wele citac qon euca meen lecis wele Anut loo je gatiti 10-pela jaqen euca alildoc cudaug eu dunuh nijolosi. <sup>5</sup> Anutna ceteh cebac lecis hojonca, eu Anutna fulacdoc ben ihaclesin, eu ale alildoc cudaug eu ohis Anut jobon euna bilia ec ihicon qosin. Eu ale bisalu Anutna gemag bec gondocob dana cajaca silail cagasecnu cabal biley eu hojonola huledu kulodu tawolosi. Euqa qila ege ceteteh eu cunug ugana gug camasac mudewce qee.

<sup>6</sup> Eu age ceteteh eu odi mudein, odocob deel cunugna nawel tawec ihanec dana talah cuha jo hamol cudun aqunechna ono limeig agena cabi oloig. <sup>7</sup> Odocob nawel tawec ihanec dana ilo uqa jo eu hamol hibilohu isec euna uqa himec loloi. Uqa cabi gel cunugna li osoldolio. Eu uqa gauc qee loloi. Uqa dool golac umei dunuh loloi. Golac euna uquadodoc ugana silail cagasiagiaca dana cajaca qee docdoc silail moloig euca cagasiadigiaca loloi. <sup>8</sup> Kobil euna Kis Gun uqa odi ihacgena. Talah jo eu hamol cudun aqunechna ono eu tawenafi eu gaid cabica, odocob jo gun bahic hibilohu isec euna lecnu jic eu qee camasac mel. <sup>9</sup> Talah cuha jo eu saen qila inu ihicon qoc. Talah cuha jo euna age loo gug filfil Anut utoligo. Odocob eu age euna Anutnu ihanec gug filfil madoloig. Euqa ceteteh cunug odoloig eu dana cuha foloig eundec agena cisdoc silec tutuc mudewce qee, odimei age ija silail dana qee ec cisdocnu ihoc qee. <sup>10</sup> Ihane eundec eu sab jecca wa gab jecca wa joc gug filfil eunu. Eu dewenige ganacna gadac himec. Anut uqa gadac eu ifanen eu toodu li uqa ceteteh cunug tutuc mudigian saenna gadac caligian.

### *Krais uqa uquadodoc golacna Anut ihandon*

<sup>11</sup> Euqa qila Krais uqa wele hon. Odocob uqa eu ceteteh meme calen ugana nawel tawec ihanec dana ilo. Uqa talah cuha jo me bahic weledec euha wooldoc euna wele len. Talah jo gun eu dana ebenegana qee mudelein. Odocob ha eu maha ina ceteh qee. <sup>12</sup> Odocob Krais uqa talah jo gun euna li osoldion. Euqa uqa sipsip golac bulmakau nag golacca umei talah jo gunna qee lel. Uqa uquadodoc golac u limei Anut ihandon. Odimei uqa golacna ege fajigimei saen gaid cunugnu ceseli oigen. <sup>13</sup> Dana cajaca dewenige Anut amegna gegehinca nawel tawec ihanec dana age sipsip golac bulmakau manahal golacca umeig

\* **9:4:** Manna eu sab sao jobonnadec Anut uqa Isrel age wadau waca qeena coboin saen euna aden. Age Kisim Bek 16ca, Song 78.24ca eu feiga.

bulmakau nag maneceb comis ibuldoloi euca dana cajaca eu age ilomogana bilisadu aqoloig. Eu odi odocobil age dewenega eu Anut amegna soidoc caloloi. <sup>14</sup> Euqa Krais golac ceteh eu wooldoc. Krais uqa cahuldoc osoca qee. Kis gaid bileceb catanena ugana gagadic odocna Krais ugana cebac biley euna Anut ihandon. Eunu uqa golac eu egene cisdoc silec soidocob ege kobil filfil cebac biley qee eundec qee odoqaun. Eunu ege Anut cebac bilina uqa cewel utuqan.

*Krais golac bal cehec je haun gagadic muden*

<sup>15</sup> Eunu dana cajaca Anutna utaec eu dodoig jejeg toodogina eundec age cebac biley catanec wele Anut ugana mel oqagan ec maden eu mugumuga oqagannu Krais uqa bal cehec je haun mudet dana. Uqa bal cehec je hahawan calen euna dana cajaca cunug cahuldoiu eu cagasiadecnu cal men.

<sup>16</sup> Ge, dana oso uqa cal meceb oso ugana ceteteh cedigiannu dana eu qee cal memen uqa jaqec je bagacna jaqena eu bal cehec je cinqwe. Odocob uqa melah ugana bal cehec je eu toodu memegna ceteteh cedigiannu uqa memeg cal meceb dana age casac du cuhadoqagan. <sup>17</sup> Dana cal meceb bal cehec je maden eu gagadic odocca. Euqa dana qee cal mena, uqa cebac bilina saenna, bal cehec je eu gauc bilina. <sup>18</sup> Eunu age weledec bal cehec je hahawan sanan mein eu gagadic mudet dool qagadumeig golac basecooin. <sup>19</sup> Casac Moses uqa loo je gadacnu je cunug dana cajaca sildiadeceb doin. Odimei hibna uqa sipsip bulmakau nagca golanalana umei waca ibuldon. Odimei hisop batac age sipsip bagic golca wele jelein eu umei dool golacna men. Odimei golac eu loo je jaqec bagacna bilisadu qumei dana cajaca cunug ilomogana ha bilisadu aqen. <sup>20</sup> Bilisadu aqi hedumei maden:

“Ceteh i golac eu bal cehec je toodoqagannu Anut maaden eu gagadic mudina,” en. (*Kisim Bek 24.8*)

<sup>21</sup> Eu odi himec Moses uqa dool golac eu talah jo gunnaca cuha fecnu ceteteh cunugnaca bilisadu aqen. <sup>22</sup> Eu mele, loo je madi, golacna himec ceteteh cunug soidoc ibuldon, ena. Golac qee tonecebfu eu Anut dana cajaca agena silail qee cagasiadena.

*Krais uquadodoc silail cagasigiannu ihandon*

<sup>23</sup> Age ceteteh mahana nijina eu odi soidocnu odi ihanegina eu ceteteh sao jobon nijina eu ihicon qoc bilia. Euqa ceteteh sao jobon nijina eu soidocnu ceteteh wooldoc ihoc nijia. <sup>24</sup> Ge, ege doqona, Krais uqa jo gun dana ebenegana mudein euna oso qee lel, eu jo gun sao jobon bilia eu ihicon qoc himec. Uqa tutuc sao jobon len. Odocob qila uqa Anut amegna camasac men, uqa ege cesulgec cabi ona.

<sup>25</sup> Cabi gel cunugna Juda agena nawel tawec ihanec dana ilo uqa dool golac umei Anut ihandugiannu talah jo gun eu cudun gunna loloi. Odocob golac eu uquadodoc golac qee. Euqa Jisas uqa odi qee odol. Uqa uquadodoc golac umei euna Anut ihandon. Uqa eu odi oodi haunhaun qee odol. <sup>26</sup> Uqa haunhaun eu odi odoubmi waug sogoeu haunhaun dain tebandoub, Anut maha ifanen saenna sanan mimei hu deel ina calen. Euqa qila i saen cit qocna uqa mahana ni osoldon. Odocob uqa silail cagasigiannu uquadodoc cebac biley Anut ihandon. <sup>27</sup> Dana cajaca cunug age cal mi osoldogina. Odimeig hibna age Anut amegna tawecibl uqa gesiladigian. <sup>28</sup> Eu odi himec Krais uqa ihandumei dana cajaca cunug agena silail cagasiadigiannu cal mi osoldon. Odocob hibna uqa ni lecisdugian qa eu uqa silail cagasecnu qee neiaun. Uqa dana cajaca uqa cahahaadigiannu mele bahic sumudi bilegina eunu ni lecisdugian.

## 10

*Ihanec weledec silail cagasecnu ihoc qee*

<sup>1</sup> Mosesna loo je eu ceteteh hibna caligian eu mele bahic qee, eu ihicon qoc himec foqona. Loo je eu age ihanec eu odi himec cabi gel cunugna ihanec oqagan ec madena. Eunu loo je eu dana cajaca age Anut cuha fecnu cemenug legina ihanec euna tutuc madecwe qee. Eu agena silail cagasiadecnu ihoc qee. <sup>2</sup> Loo je eu ihoc odadeceb tutuc bahic caloubmi eu age haunhaun qee ihanoub. Dana cajaca cuhana houb eu ihanec osol himecna wele haun ibuldoub eu age wawagana silailca qee ec tebandoub. <sup>3-4</sup> Euqa bulmakau manahal sipsip golanganaca eu agena silail cagasiadecnu ihoc qee bahic. Eunu cabi gel cunugna ihanec euna age haun agena silailnu cisdoloig.

<sup>5</sup> Eunu saen Krais uqa mahana nimei uqa Anut odi madon:

“Age dool qumeig ihanhecnu hina culuguna.

Euqa hina deweg ganac oso itegannu saciadom bilia.

<sup>6</sup> Hina age dool manecna silail cagasec ocnu ihanhecnu hina qee gale hena.

<sup>7</sup> Eunu qila ija odi madigina,

‘O Anut, ija wele niga.

Wele ijanu jaqec je bagacna jaqein odi qila ija hinana cisdoc toodugennu niga,’ iginia,”  
don. (Buk Song 40.6-8)

<sup>8</sup> Uqa casac loo je kobilna ihanoloig eunu madimei maden, “Age dool qumeig ihanhecnu hina culuguna. Odocob hina age dool manecna silail cagasec ocnu ihanec eu hina qee gale hena,” en. <sup>9</sup> Odimei tubdu maden, “O Anut, ija hinana cisdoc toodugennu wele niga,” en. Eu odinu Anut uqa ihanec kobil weledec eu qee meceb uqa Kraisna ihanec kobil haun eu uqana cunduna cehen. <sup>10</sup> Jisas Krais uqa Anutna gale doc toodon. Odimei uqa uqadodoc deweg ganac euna Anut ihandu osoldon. Eu odina uqa ege qagu migceceb silailca qee ibuldum.

#### Krais uqana ihanec eu silail cagasecnu ihoc

<sup>11</sup> Juda agena nawel tawec ihanec dana cunugca odi tawimeig deel cunugna agena cabi oloig. Age haunhaun ihanec kobil eundecna himec ihanoloig. Euqa ihanec eu odi eu silail cagasegécwe qee. <sup>12</sup> Euqa Krais uqa silail cagasecnu ihanec osoldon eu saen cunugnu ihoc. Uqa eu odiodi hedumei ti Anut eben meulana isec bilen. <sup>13</sup> Uqa eu odi bibili Anut uqana cad uqa jaih bisalu isec madigiannu saen susumudi bilina. <sup>14</sup> Eunu uqa ihanec osolna himec dana cajaca qagu madeceb agena silail cunug cagasiaden. Odocob age saen cunug silailca qee bilecebil catanigan.

<sup>15</sup> Odocob Kis Gunha odi qasali magimei uqa casac magen:

<sup>16</sup> “Tibud madena, ‘Saen hibna odi leceb ija ageca bal cehec je oso eu odi mudigen.

Ijana loo je eu cunug age wawagana miadigen.

Odocob cisdocnaha jaqiadigen,’ ena,” gen.

(Jeremaia 31.33)

<sup>17</sup> Odocob uqa je eu tubdu maden:

“Ija agena silailca kobil me qee odocca eunu haun qee cisdugaun,” en. (Jeremaia 31.34)

<sup>18</sup> Anut dana cajaca agena silail cagasiadeceb eunu nawel tawec ihanec dana age silail cagasecnu ihandoc euu qee nijiaun.

#### Ege wawige mele bahic eceb Anut cemenug lecnu

<sup>19</sup> O wawige meleec cotiel, Jisas golacna ege silailca qee biluquna. Eunu ege ihoc Anutna jo gunna lecnu, odocob eunu cain cucuiuqaun. <sup>20</sup> Jisas uqa jo gun bahic euna lecnu jic haun huden. Eu lotoc ben oso cebecna fele cehec tawen eu cebac biley jic euna gemona isec len. Jic haun eu cebac bileyca, eu Jisas uqadodoc deweg.\* <sup>21</sup> Egena nawel tawec ihanec dana ilo uqa Anutna cuha jo cofdona uqa dana meca bahic. <sup>22</sup> Uqa ege wawige soidudu odoo me qee ege wawigena tebandolob eu ititacdugiannu uqa golac ege wawige dunuh bilisadu qigen. Odimei dewenige wa cataniecna wa joigen. Eunu ege wawigena uhulec eu cunug ititacdumeb Anutnu himec wawige mele bahic eceb uqa cemenug leqan. <sup>23</sup> Ege ceteh me sumudi biluquna eunu qasali madoqona eu ege gagadic hewecnu, cain felacuduqaun. Ege dogona, ceteteh cunug eu Anut mudigiannu wele maden eu mele bahic mudigian. <sup>24</sup> Ege wawige meleec cotigeil nalunuga mecebmecebecnu odocob kobil me odudocobdocoboqagannu tuliadecnu cisdoqale. <sup>25</sup> Ege wawige meleec cotigeil gami ceguli biley kobil eu cain culuqaun, eu odi dana leih odogina. Tibudna deel eu dodoldona eu dogina. Eunu ege wawige meleec cotigeil gagadic madec cabi gagadic ocnu.

#### Ege Anut Melah Cain hibemdoqaun

<sup>26</sup> Ege mele jenu dodo hibna egedodoc eguna gale gecna silail kobil toodu odifeb silail eu cagasecnu ihanec osoca qee. <sup>27</sup> Euqa ege geh cucuii gesilige deel susumudi bileyca eu himec qa nijia. Odocob ja dain cahulec Anutna cad eundec cijadigiannu odi ciciji nijina. <sup>28</sup> Ege dogona, dana oso uqa Mosesna loo je wooldodob dana lecisfo, cijedfo odi fimeig uqana cahuldoc eunu qasali madeginifa dana eunu qee waloc adena. Odocob age dana eu qocobil cal mena. <sup>29</sup> Eunu dana Anut Melah hibemdonanu age adi cisdogina? Anut uqa Krais golacna egeca bal je haun cehen. Dana eu uqa Kraisna ihanec golac eu dana qagoc muden eu cewudina. Euqa dana eu ihanec golac eu ceteh gauc ena. Odimei uqa Kis eelgec uum igina eunu kobil me qee bahic odona. Uqa ameg me qee wadacdoc ben ugian. <sup>30</sup> Ge, Anut uqa odi maden uqanu ege dogona:

“Cahuldoc kobil wadacdoc eu ijana cabi.

Ijadodoc ameg me qee wadacdugen,” en.

(Loo 32.35)

Odimei haun tubdu maden:

\* **10:20:** Jo gun bahic eu hamol gun bahic Anutna jo dunuh nijia. Ono Anut bilen. Wele nawel tawec ihanec dana ilo himec uqa hamol eu dunuh limei Anut cemenug bahic tawecnu ihoc. Dana oso ihoc qee. Odocob age Jisas deweg baladocbil na babalecna cal men saen euna lotoc ben tempel hamol gunna caqusec tawoloi eu ohisdec baladu ni mahana cali lecison. Age Mak 15.38 feiga.

"Tibud uqadodoc uqana dana cajaca gesilec deelna gesiladigian," en. *(Loo 32.36; Buk Song 135.14)*

<sup>31</sup> Cebac Bilec Anut uqa dana oso ameg me qeena wadacdugiannu gagadic hewecebfu eu ceteh me qee, mumusacca bahic dana eu gulucdugian.

### *Ege wawige meleecna gagadic tawecnu*

<sup>32</sup> Euqa age saen wele bileinu cisoiga, Anutna fulacdoc oin saen euna. Saen euna age cabi gagadic adein, odimeig age dewenega geh tudoin. Euqa age gagadic mein. <sup>33</sup> Saen leih age dana cajaca cunug amagana madecebile tawoloig, odimeig amagana je me qee maadoloig, odimeig eu age me qee odadecebile culumen gahiduadoloig. Odocob saen leih age danaca culumen odi gahidoloig eu age gami ihol mimeig cesuladoloig. <sup>34</sup> Ge, age agena ceteteh bahic eu qee cedelein eu gaid ageca biligian ec wele doin. Eunu age dana cajaca age wawaga meleenanu gihacdoc jona bileinu waloc aden. Odocob saen leihna dana agena ceteteh cediadein qa age ceelecca hawaadein.

<sup>35-38</sup> Eunu age kobil me wele odooin eu cisoiga. Age wawaga gagadic meleecbfu age ameg me bahic oqagan. Age gagadic tawifeig Anutna je ihoc toodoqagan. Odocob ceteh me eunadec wele Anut adigia maden eu oqagan. Uqa maden:

"Eu saen cecelac qee.

Saen nag bahic odi himec dana hocnu madena uqa hugian.

Uqa qee daleeiaun.

Euqa ijana dana cajaca ititom age wawaga meleecb cebac biluqagan.

Euqa oso uqa waug meleec eu culifei ija wawi uqanu me qee meiaun," en. *(Habakuk 2.3-4)*

Eunu agena wawaga meleec gagadic eu cain culuwain.

<sup>39</sup> Euqa ege dana cajaca wawaga meleec felacudimeig fadalegina odi qee. Ege Anutnu wawige meleecb uqa cahahagian eu odi.

## 11

### *Wawaga meleec kobolnu gug*

<sup>1</sup> Wawige meleec kobol eu odi. Ege wawige eu Anut wele ege ceteteh igigiannu maden eu gagadic hehweli susumudi biluquna. Odocob ceteteh ege amige qee fec eu ege wawige eunu fogo docca biluquna. <sup>2</sup> Dana wele bahic biloloig wawaga meleecca eunu Anut maden, "Eu agena kobol eu me bahic," en. <sup>3</sup> Ege wawige meleecnu Anut uqa je madenna himec sao mahaca ifanen ec doqona. Eunu ceteteh cunug foqona eu Anut uqa ceteh ege amigena fecwe qee euna muden.

### *Ebelca, Inokca, Noaca age Anutnu wawaga meleen*

<sup>4</sup> Ebel uqa Anutnu waug meleennu ihandon. Odocob uqana ihanec eu me bahic, eu Keinna ihanec wooldon. Mele, Ebel uqa Anutnu waug meleen eunu Anut uqa uqanu dana ititom ec maden. Anut uqa Ebel loo utoloi eunu gale dolo. Ebel uqa wele cal men qa uqana waug meleec eu uqa je magigi bilinawa odi.

<sup>5</sup> Inok uqa Anutnu waug meleennu Anut uqa ehudi sao ohis ehi ten. Uqa qee cal mel. Dana age uqa walec cabi oin qa age uqa qee felein. Anut uqa wele ehuden. Anut uqa Inok qee ehudecna age Inok uqa Anutna gale doc toodon ein. <sup>6</sup> Dana oso uqa Anut cemenug ligiafi uqa Anut bilina, odocob uqa dana Anut walegina eundec Anut uqa ameg me bahic adena ec ha waug meleena. Eunu dana uqa Anutnu waug meleecca qee uqa Anutna gale doc toodocwe qee.

<sup>7</sup> Noa uqa Anutnu waug meleen. Odocob Anut uqa dahig hewec je madon ceteh hibna caligian eunu Noa uqa ceteh qee fel qa Anutna jenu waug meleecb wag ben jelen. Eunu Noa aideg melahulca melahul aidagailca age odi wag ben eu dunuh limeig me himec bilein. Waug meleec euna Noa uqa dana cajaca mahanaadec cunug gesiladecwe men. Odocob Noana waug meleec eunu Anut uqa Noana dana ititom ec maden, eu Anut uqa dana cajaca cunug uqanu wawaga meleena eundecnu odi odona. Eunu uqa Anutna dana ititom huqanehul oso calen.

### *Ebrahim Seraca ale Anutnu wawala meleen*

<sup>8</sup> Ebrahim uqa Anutnu waug meleen. Anut uqa Ebrahim utadocob uqa Anut jejeq toodon. Uqa uqana jobon cuculi Anut maha oso eu Anutna muguh mec uqa uteceb uqana bahic gaid biligianu maden ono nuen. Odocob Ebrahim uqa ana isec nuen eu docca qee. Euqa uqa waug meleecca nuen. <sup>9</sup> Odocob uqa waug meleecca nuimei Anut hatu utigian maden ono bilen. Odocob uqa ono hatu euna bilen eu sihul leih agena hatuna bileswe men. Uqa ono talah jona bilen eu odiwe Aisak Jekobca talah jona bilesin. Dana eu ale uqaca hatu eu oin wele bahic Anutha odi maden. Aleca Ebrahamca age Anut huqanehul.

10 Saen cunugna Ebraham uqa taun ben oso eu ugana noh gug gagadicca gaid biligian foubnu waug nijoloi.\* Ebraham uqa ugana saen cudun oso euna ligiannu sumuden. Anut uqadodoc cudun oso odi mudigiannu cisdumei muden.

11 Sera ugaha Anutnu waug meleen. Ugana mel basec saen hedon qa uqa waug meleen eunu uqa melca mecnu gagadic odoc ihoc on. Sera uqa odi cisdon, "Ija melca migennu Anut uqa mele je wele maden. Anut uqa mele je himec madena," don. 12 Eunu dana osol eu toia bahic cal mecnuc dodoldon uqa mel mati bahic memega calen. Geh bahic fulusdon, eu malaqa saona nijinawé, esic lanna nijinawé odi fulusdon. Sanijadecwe ha qee.

13 Ebraham, Aisak, Jekobca age cunug wawaga meleecca wele cal mein. Mahana bileyin saenna eu age ceteh me Anut adigia ec maden eu qee oloin. Age onoca tatawi fimeig ceelein. Odimeig odi qasali madein, "Ege maha ina biluqa ege dana jobon filecdec cinigwe. Ege maha ina saen nag odi himec bileqan," ein. 14 Ge, dana je eu odi madegina eu ege dogona, eu agena mahana bahic biloubnu walegina. 15 Eu age wawaga eu jobon wele bilimeig cuculi hoin eunu nijecebfí jobon euna haun ceseloqagannu jicca nijoub. 16 Euqa eu age odi qee odoloin. Eu age wawaga eu wele maha osona len, eu me bahic maha iha wooldoc. Eu sao jobon himec. Eunu Anut uqa age egena Anut ec madegina eu agenu qee majag dona. Uqa dana cajaca wawaga meleecca jobon me bahic euna biluqagannu wele saciadon.

17-18 Wele Anut uqa Ebraham temdon. Odocob Ebraham uqa Anutnu waug meleecce Aisak ihanec cinigwe Anut uten. Uqa Anutna mele je ocob Anut uqa Ebraham Aisaknu madon:

"Hina sihulel toohi caloqagan age Aisak sihulna himec caloqagan," don. (*Genesis 21.12*) Euqa Ebraham uqa melah osol eu qagadumei Anut ihandugia odon. 19 Uqa odi cisdon, "Aisak cal mecebfi Anut haun tulidocob cajecnu ihoc," don. Eunu mele bahic galolo je eunu ihoc edi madecnu maden, "Ebraham melah cal mecnadec ceseli on," en.

#### *Aisakca Jekobca Josefca age Anutnu wawaga meleen*

20 Aisak uqa Anutnu waug meleecce Jekob Isoca eeldoc alen. Eeldoc euna uqa ceteh eu aleca hibna caligian eunu maden.

21 Jekob uqa Anutnu waug meleen. Odocob saen uqa cal migiannu saen dodoldodon uqa Josef melahul lecis eeldoc alen. Odimei uqa ugana kom amegna jogomei Anutnu cuha fen.

22 Josef uqa Anutnu waug meleen. Odocob saen uqa cal migia bili hibna Isrel age Isip hatu culimeig beloqagannu maden. Odimei uqa teful adi heel cisuqagannu maaden.

#### *Moses uqa Anutnu waug meleen*

23 Moses memeg anagca ale Anutnu wawala meleen. Moses anag uqa Moses baseceb ale eu uqa mel me bahic fesin. Eunu eu ale jagel cijed Moses jahundeceil bilen. Ale kingna loo jenu qee cucuielesin.

24 Moses uqa Anutnu waug meleen. Hibna uqa meca mimei Isip agena king ateg melah ec madec culen. 25 Uqadodoc ha Anutna dana cajaca gami culumen osoben gahidoqagannu waug nijen. Uqa ceelec ocnu silail kobol toodudu odon ugana saen gothic himecna biliga qee dol. 26 Uqa Krais ijannu majag hewifeig eu Isip agena qaig bala cetetehca cunug wooldoc ec cisdon. Uqa ameg me bahic Anut utigian eunu cisdon.<sup>†</sup>

27 Moses uqa Anutnu waug meleecebnu uqa Isip hatu culen. Uqa king eu gemag becnu qee cucuel. Dana oso uqa Anut amegna fecwe qee qa Moses uqa Anut fecnu uqa gagadic men. 28 Ensel Isip agena mel matucaca eundec qagaadi uqa sipsip golanaga fimei Isrel agena mel matu cain qagaadoiaunnu Moses uqa Anutnu waug meleen. Odocobnu uqa Pasowa Cuha Deel Gunnu sipsip qagadon.<sup>‡</sup> Odimei uqa sipsip golanaga jic cebecna bilisadudu nuen.

#### *Isrel dana cajaca leihha age Anutnu wawaga meleen*

29 Isrel eu age wawaga meleecce Macas Wa Golca maha galalenawe galaleceb letein. Odocob Isip eu ageha odi odoqaga odoin qa wa jimeig cal mein.

30 Isrel eu age Anutnu wawaga meleecce Jeriko meen gel deel 7-pelana cunugca taldudu coboin. Odocob meen gel eu gauc fuhudu golodon.

\* 11:10: Taun ben eu Jerusalem eu sao jobonna nijia. Age Hibrus 12.22 feiga. † 11:26: Ijan i "Krais" ugana gug eu dana Anut ugana cabi ocnu wele nesili ehuden. Dana uqa Hibrus jaqec je jaqen uqa je inu cisdoc leciscia eu odi fena. Cisdoc osoldoc eu odi. Anut uqa Isrel dana caja cunug eu ugana nesili ehaden. Odocob Moses uqa Isrel dana cajaca cesuladecnu gale don. Eunu uqa majag hewigiannu qee cisdomi cesuladen. Anut uqa Isrel dana caja eu ugana nesili ehaden, eunu age ugana Krais. Cisdoc leciscia eu odi. Mosesna saenna Jisas Krais qee calel eu mele, qa cabi oc i Moses odon eu odiwe uqa Krais ijannu majag hewen. ‡ 11:28: Age je Mak 14.1na nijia eu feiga.

<sup>31</sup> Wal caja Rehab uqa Anutnu waug meleen. Odocob uqa dana lecis jobon heje fowasa hosin eu ale cesulalen. Eunu uqa dana cajaca leih wawaga meleecca qee eundec gami gee fadalelein.

<sup>32</sup> Euqa qila ija cel je oso tubdu madigen? Gidionca, Barakca, Samsonca, Jeptaca, Dewidca, Samjuelca Anutna je hahun madec dana ageca eu cunug agena je saecnu saen ihoc qee. <sup>33</sup> Dana eu age wawaga meleecca eunu age han wooldodoig king mati agena han dana fadaladein. Eu age kobil ititom himec odooin. Eu age ceteh Anut adigia maden eu oin. Laion biamaga afa quadein. <sup>34</sup> Eu age ja ben cicjen cabusein. Eu age busalecebil han siginna qee aqelein. Eu age bodoec bibileig hibna gagadic odoc oin. Eu age han dana gagadic odocca bahic calein. Eu age hatu fil agena han dana mati jabadein. <sup>35</sup> Caja agena dana cal mein eundec ceseli cajecebil age haun cedein.

Dana leih gihacdoc jona madein dewenega geh bahic tudoin eu cal mecnu ha ihoc. Anut hibemdcobifli culadecbil beloqagan ec maadein. Euqa eu age cad agena je qee toodolooin. Eu age cal mecnadees ceseli cajimeig cebac biley me bahic eu oqagannu cisdoin. <sup>36</sup> Leigh age agena cad qesalaadein, gehca qisaadi senna qaqqadeig gihacdoc jona madein, culumen eu gahidoin. <sup>37</sup> Cad eundec meen heli aqaelein. Temadec me qeena temaadiein. So umeig dewenega geti lecisduduein. Han siginna qu wogoladecebile cal mimiein. Dana wawaga meleecca leih meme sipsipca ganac lotoc cinigwe taqimeig jic cocobi belein. Eu age ceteteh dewenegana eundecnu sawen bahic biley. Odocob dana eu age culumen aadeig kobil me qee bahic odadein. <sup>38</sup> Eunu age belimeig maha danaca qeena ono jahuni biley, aluhnaca meen hatinnaca maha helonaca odi jahuni biley. Eu age dana cajaca me bahic, agena kobil eu dana cajaca mahanadec age gemona biley eu agena kobil wooldoc.

<sup>39</sup> Dana cajaca eu age cunug eu Anutnu wawaga meleen, odocob age ijjanaga me bahic Anut amegna oin. Eu age ceteh me Anut adigia maden eu qee oloin. <sup>40</sup> Eu eetanu? Anut uqa eguna ceteh me bahic eu wele saciadon bilina. Eunu dana wawaga meleecca wele bahic age age casaccasac ege cuculgi me bahic qee calowain. Ege eu ageca osobon me bahic caleqan eu Anutna cisdoc.

## 12

### *Ege Jisas fimeb uqanu wawige meleigian*

<sup>1</sup> Eunu ege adi? Dana cajaca wele bahic eu age tawimeig taen ben cinigwe talilgec bileyina. Odimeig wawige meleec kobil iwalgegina. Eunu ege ceteh culumenca eundecca silail mec ege faggene eu culecnu. Odimeb ege wawige gagadic mumudi jic ege nuecnu Anut ihaceng eu gagadic guguluqale. <sup>2</sup> Ege amige eu meciocomun Jisasca nuigian. Uqa eguna wawige meleec gug odocob hibna uqa eguna wawige meleec odocob ihoc ligian. Wele Jisas uqa ceelec hibna ugiannu waug ninijen gagadic bilen. Odimei culumen gahidumei na babalecna cal men. Uqa na babalecna ono majag hewudein eu ceteh gauc bahic ec cisdon. Qila uqa Anutna biley cabal meulana isec bilina.

### *Ege tutuc mecnu Anut culumen igina*

<sup>3</sup> Age cain alal adeiaunnu, odocob age wawaga cain guleliaunnu age Jisasnu cisdu cuhadoigale. Silail dana wele age Jisasca cad me qee bahic biley. Euqa uqa gagadic bahic bilen. <sup>4</sup> Age silail cilehdocknu han cadein qa han eunu age golanaga qee basecdolooin. <sup>5</sup> Acahma age wawaga gagadic mudecnu Tibud maaden eu wele dahiniga celen? Eu age ugana mel ec madimei maden:

"Ijana mel, Tibud uqa hina tutuc mihec kobil oso odifei eu gauc himec ec cain cisdogau. Uqa tutuc mihec culumen ihifei eu hina wawin cain me qee meiaun.

<sup>6</sup> Ge hina dogona, Tibud uqa dana oso nalug menafi eu uqa ugana kobil tutuc mudina. Odimei uqa dana oso ehudimei uqa melah ec madifei eu ugaha qisadona," en. (*Sindaun 3.11-12*)

<sup>7</sup> Age gagadic tatawi Anut culdecebile tutuc madeia. Anut uqa melahul kobil odadene eu odiha age odadene. Cel mel oso uqa memeg qee eeldona? Oso qee biley. <sup>8</sup> Mel memega cunug age agena mel eeladegina. Memega qee eeladenafi eu age ugana mel bahic qee. Age eu odi eu mel memega qee cinigwe. <sup>9</sup> Age eunu cisdogina. Memige mahanadec eu age elgelein. Odocob binanaga suluquna. Eunu me bahic ege kis agena Memeg bisalu bibili cebac biley eu ocnu. <sup>10</sup> Ege memige mahanadec eu age agena kobil saen nag odi himec tutuc migine, agena gale adecna. Euqa Anut uqa ege cesulgigianni bahic tutuc migina, odocob ege ugana kobil gun eu oqannu. <sup>11</sup> Memige uqa ege tutuc migec culumen igina qila saen euna ege ceelecca qee biluquna. Ege wawige eu culumen dona. Euqa tutuc migimei ege ititom kobil himec odocomunfi wawige malol biligian.

*Ege hihibanige teceb gagadic tawoqale*

<sup>12</sup> Eunu age ebenega gagadicca qee gauc caculi tawecebfí gagadic mi suli umeig cabi oiga. Odocob age jaimaga gobca laleg mecebfí age gagadic taweiga. <sup>13</sup> Odocob jaimaga oso eu me qeefi gob ameg eu cunug qee casali hoiaunnu  
“age jaimagana bahic jic tutuc coboiga,” en.

(Sindaun 4.26)

Qee bahic! Eu haun me migian.

<sup>14</sup> Age dana cunugca ege gami wawige malol bielecnu cabi gagadic oiga. Odimeig kobil gun euna bielecnu cabi gagadic oiga. Dana oso uqa kobil gun qee toodona uqa Tibud qee feiaun. <sup>15</sup> Age cofdu cuhadoiga. Qee fifi dana cotoga oso culdecebí toni qocob Anutna eelgec uum ipec eu ciliaunnu. Qee fifi dana cotoga oso culdecebí age gemona aig gulihinca gisinalwe caleiaunnu, odimei gulihin aadi Anut amegna gegehinca madeiaunnu. <sup>16</sup> Qee fifi dana oso wal kobil toodoiaunnu. Qee fifi dana oso Anut hibemdoiaun eu odiwe wele Iso odon. Uqa sab fajecna saen osol himec euna matu bielec eeldoc cunug helen. <sup>17</sup> Age dogina, hibna uqa eeldoc eu muguh ugia odon qa Anut qeo ec maden. Iso uqa eeldoc oubnu geh bahic qajen qa uqa haun waug falicdocnu jicca qee.

*Ege wele Saion Aluh Me Bahicna calom*

<sup>18</sup> Age qila ceteh oso amaga fecnu ihoc, ebenega tebandocnu ihoc cemenuq qee li bielein, odiwe Isrel dana cajaca age wele Sinai Aluhna calein. Sinai Aluh euna ja ben cijein, odocob tu gagatuc qam qu nijen, odocob fufu gagadicca, <sup>19</sup> taul eu ecca jejeg oso je madecca, dana cajaca jejeg je mamaden dah mein. Odimeig cucuii Moses madoin, “Ege haun dah maga qee geldoin,” doin. <sup>20</sup> Etanu odi madoin? Eu age Anut je aden eunu cucui bahic ein. Uqa maden:

“Dana oso uqa eben mimei aluh i heheweb fifeig meenna qoiga cal meia.

(Kisim Bek 19.12-13)

<sup>21</sup> Eu age ceteh fein eunu cucui bahic ein. Eunu Mosesha maden:

“Ija cucuiimig qeleti cahuldom,” en. (Loo 9.19)

<sup>22</sup> Age ceteh eundecna oso qee calelein. Age Saion Aluhna wele calein. Odocob Cebac Bilec Anut uqana taun benna calein. Eu Jerusalem sao jobon ono. Age ensel mati bahic amam ceguli ceeli bielecna wele calein. <sup>23</sup> Age Anut melahul matu agena cegulecna wele calein.\* Anut uqa ijanaga wele jaqen, jaqec je eu sao jobon ono bilina. Odocob gesiligeç dana uqa bilia uqa dana cajaca cunug agena Anut eu age hu cemenuq taweiga. Dana cajaca agena kis wele Anut uqa dana cajaca ititom ec maaden eu agha ono bieleiga. <sup>24</sup> Odocob Jisas uqa bal ceheç je haunna nawel tawec dana uqaca calein. Uqa golac wele age bilisadu joaden, bal ceheç je haun eu gagadic mudencu. Odocob golac eu je oso maden eu wele Ebel golac odon eu caca qee. Uqa Ebel golac wooldumei je me bahic eu geh bahic maden.

*Ege cofdu cuhadoqale*

<sup>25</sup> Age fi cuhadoiga. Dana madena eu jejeg filedocnu dahiniga cain afa qoiaun. Wele bahic Anut uqa maha ina dana cajaca je gagadic maaden qa eu age jejeg qee toodoloin. Eunu wele saen euna age busalimeig agena silail ameg me qee wadac ocnu qee wooldoloig. Odocob qila Anut uqa sao jobon bibili je gagadic magena. Ege uqa hibemdufeb busalimeb silail ameg ihoc wooldocnu? Qee bahic! <sup>26</sup> Wele Anut jejeg caleceb maha mim nen. Euqa qila ege wele magen:

“Maha i saen osol himec haun odocomin mim nigian.

Maha himecha qee.

Maha saoca osoben mim nigian,” gen.

(Hagai 2.6)

<sup>27</sup> Je i “Saen osol himec haun,” eu odi ihacgena. Ceteteh wele Anut mudaden odimei gesac maden eu fadaladeceb qee moqagan. Odocob ceteteh qee gesac madel eu qee fadalowain. Age gaid biluqagan.

<sup>28</sup> Anutna cul ege om i dana oso fadalecwé qee. Eunu ege eu odinu Anut hegaga docnu. Odimeb uqa binan susuli uqana cabi uqa gale dona odi cabi ocnu. Ege uqa binan susuli uqana cucuiecnu. <sup>29</sup> Ge, mele bahic:

“egená Anut eu ja ben ceteteh cunug cijinawé,” en.

(Loo 4.24)

\* **12:23:** Jisas uqa Anut melah matu bahic. (Age Hibru 1.6 feiga.) Euqa dana uqa Hibru jaqec je jaqen eu Anut uqa ceteteh me bahic uqa melahul ategulca adena eunu je geh madena. (Age 6.12ca, 9.15ca feiga.) Juda age agena kobilna mel matu himec uqa memegna ceteh cunug on. (Age 12.16 feiga.) Uqa ceteteh me bahic cunug Anut uqa uqana dana cajaca adecnu gale dona eunu cisidumei uqa age “Anut melahul matu” en eu odi fena.

## 13

### *Age wawaga meleec cotogailnu nalunuga meigale*

<sup>1</sup> Age wawaga meleec cotogailnu nalunuga megina, odocob age gaid odi agenu nalunuga meigale. <sup>2</sup> Dana cele agena jona hoqagan eu age cesuladecnu cain dahiniga celeiaun. Age dogina, wele dana leih odi odimeig ensel leih agena jona ehadi ehi limeig cofadein. Eu age eu ensel ec qee doloin. Eu age cisdoin eu dana bahic ein.

<sup>3</sup> Age cotogail age wawaga meleenanu gihacdoc jona bilegina eu agenu cisdoiga, ageha osoben gihacdoc jona biluquunawe ec cisdu cesuladeiga. Odocob dana dewenegana culumen gahidogina eundecnu ha cisdoiga, ageha osoben ege dewenigena culumen gahidoqonawe ec cisdoiga.

<sup>4</sup> Caja danaca ocobocobec eu me bahic. Age cunugnu ocobocobec kobil eu ceteh soidocca bahic Anut amegna nijigian. Qee fifi gegehin qowain. Age dogina, hibna Anut uqa dana cajaca wal kobilna ocobocobec wagalegina euca, dana uqa osona caja cajaca nijesina euca eu age ameg me qee adigan.

<sup>5</sup> Age meen qaignu amaga qoc kobil eu cain toodowain. Odocob Anut wele maden: "Ija hina qee culihigaun.

Ija hina qee tacewhigaun," en. *(Loo 31.6)*

Eunu ceteh age hewegina eunu odi cisdoiga, "Eu me bahic. Eu egenu ihoc," odi doiga.

<sup>6</sup> Eunu ege wawige ihoc gagadic mumudi edi madoqale:

"Tibud ija cesulenanu. Ija qee cucuigaun.

Dana age ija cel oso oditecnu ihoc? Qeeol?" oxale.

*(Buk Song 118.6-7)*

### *Ege Jisas toodocnu cain majanige geiaun*

<sup>7</sup> Age agena cofadec age wele Anutna me je qasali maadoloignu cisdoiga. Age eu agena cobocnu cisdoiga. Odimeig eu agena wawaga meleec kobil toodoiga.

<sup>8</sup> Jisas Kraisna kobil eu cumca qilaca, odocob saen cunugna ha eu kobil osol himec bileceb catanena. <sup>9</sup> Je filfil wawaga dunuh limei wawaga falicdocob Anutna jic culuwainnu Anutna eelgec uum igec ege wawige gagadic mudinafi eu me bahic. Wawige eu ege sab jecnu loo je filfil toodogona euna gagadic odoc qee ona. Dana cajaca kobil eu toodogina eundec oso qee cesuladena.

<sup>10</sup> Ege Anut ihandoc cabalca. Odocob Anutna nawel tawec ihanec dana talah cuha jona cabi oloig age cabal euna sab ocwe qee. <sup>11</sup> Nawel tawec ihanec dana ilo uqa bulmakaucu sipsipca agena golanaga umei talah eu cudun gun hamol limei silail cagasecnu ihanoloi. Euqa dool dewenega eu age jana cudun eu jobon hahagum manoloig. <sup>12</sup> Eunu Jisas uqaha dana cajaca uquadodoc golacna qagu madigiannu gel cebec jobon hahagum deweg tudoc culumen gahidon. \* <sup>13</sup> Eunu egeha cudun eu jobon hahagum uqaca lecnu. Odimeb uqa majag don odi egeha majanige gigian. <sup>14</sup> Ege dogona, maha ina taun ben oso ege gaid bielecnu qee nijina. Euqa ege taun ben hibna caligian eu gulucedocnu odoqona. <sup>15</sup> Eunu ege Jisas ijanna Anut binan suluqale. Odocob binan sulec eu ihanec cinigwe uqa gaigaid utuqale. Mele, ege conigena uqa ijan qasali mamadi uqa binan suluqale. <sup>16</sup> Odimeig age dana cajaca kobil mena meme madecnu cain dahiniga celeiaun. Odocob ceteh ageca bilina eu dana cetehca qee eundec cesuladeiga. Anut uqa ihanec eundec geh bahic gale dona.

<sup>17</sup> Agena cofadec eu age age cesuladec cabi hewegina. Odocob eu age gaid age dolonoga cofaadi bilegina. Odimeig hibna eu age cabi cunug odoginanu Anut qasali madoqagan. Eunu age eu agena je toodudu eu age bisalu bieleiga. Age odi odifeig eu age ceelecca cabi oqagan, wawagaha qee culumen adeiaun. Eu age age cofadecnu wawaga culumen adeccafu eu age cesuladecnu ihocca qee.

### *Age Anut cesulgecnu inondoiga*

<sup>18</sup> Age Anut ege cesulgigliannu inondoiga. Ege wawige Anut amegna eu tutuc himec ec tebandoqona. Egena cisdock silec eu camasac. Odocob ege gaid saen cunug tutuc himec

\* **13:12:** Juda agena loo je eu ihanec dana age dool cuhunuga dana cajaca age Anutna ihanecnua ehadi hoin eu jeiga ec madena. Euqa cuhunuga age Anut Dana Cajaca Agena Silil Cagasiadecnu Deel Benna ihanadein eu age cain jowain, age jobon hahagum maneiga ec madena. Age Wok Pris 6.24-30ca, 16.27ca feiga. Odocob Jisasna ihanec eu Deel Ben ina ihanec uqana cudun on. Age Hibrus 9.7-14 feiga. † **13:13:** Dana leih age Kristen age Juda agena loo je toodu odocnu madein eu odi fena. (Age but 9 feiga. Euqa dana uqa Hibrus jaqec je jaqen eu Kristen age Juda agena jobon dunuhna cain biluwain ec madena. Ege loo je eu toodu odifeig ege Anut amegna cataniec bileyqan eunu cain cisdowain ec madena. Age Kraisna cabi oc euna himec age Anut amegna cataniec bilegina. Eunu age Krais gami bileyinaca, age uqa toodoginaca eunu cain majanaga adeiaun.

cobocnu wawige nijia. <sup>19</sup> Age Anut ija cesultigiannu inondoiga ecnu niniadigina. Eunu ija ageca mahuc ceselecnu ihoc.

<sup>20-21</sup> Anut uqa egena Tibud Jisas tulidocob cal mecnadec ceseli cajen. Jisas uqa sipsip cofadec dana me bahic. Uqa ihanec cabi gug eu golacna bal cehec je bilec catanec eu hedon. Odocob Anut malol biley gug uqa uqana gale doc toodoqagannu ceteteh meme ihocna himec age adeiale. Odocob ege cunug gemona kobol me uqadodoc gale dona, odi camasac mudecnu ihoc Jisas Krais umna. Saen cunugna Krais uqa ijan benca bileyeb cataneiale. Mele.

*Cit qoc je*

<sup>22</sup> O wawige meleec cotiel, ija je gagadic maadigina age wawaga gagadic mudec je i maadiginanu dahiniga meigale ec niniadigina. Je jaqiadigina i eu gohic cinigwe. <sup>23</sup> Age docnu ihoc, ege cabi cotige Timoti gihacdoc jonadec felacudein uqa haun gihacdoc jona qee biley. Uqa mahuc bahic ijaca calecebfii eu ele osoben li age meciadewan.

<sup>24</sup> Age egena feele ec agena cofadec cunug adeigale. Odocob egena feele ec Anutna dana cajaca qagoc cunugha adeigale. Anutna dana cajaca ititom age Italidec feele adec suldoiga ec maadeigale.

<sup>25</sup> Anutna eelgec uum igece cunugca biliale.

## Jems Uqa Jaqec Je Oso Anutna Dana Cajaca Jaqiaden Aqunec Je

Jems i uqa Jisas waliag eu odi fena. Jaqec je i Jems jaqen euna Anutna dana cajaca age kobol me bahic odocnu iwaladec je mati nijina. Uqa dana cajaca age cisdoc meca, doc meca umeig agena je madec eunu cisdu cuhadoqagannu eu cesuladecnu galolo je mati jaqen.

Jems uqa odi gagadic maden. Oso uqa Jisasnu waug meleena uqa gauc cain biliaun. Euqa uqa dana cunug kobol me odadigian. Uqa odi odocobfi uqa waug meleec eu gagadic tawena eunu ihacena.

### *Je Dunuhnu Dado Mec*

1. Feele adec (1.1)
2. Temgec eu ege duuec tawecnu odona (1.2-18)
  - A. Wawaga meleec temdoc (1.2-12)
  - B. Temdoc uqana gug (1.13-18)
3. Ege je dah mimeb toodu ha odoqan (1.19-27)
4. Ege dana cunugnu wawige qoc eu ihocihoc nijiale (2.1-13)
5. Wawige meleecca eguna odocca (2.14-26)
6. Ege conige cofdu cuhadoqale (3.1-12)
7. Doc silecca lecis nijesia (3.13-18)
8. Mahanadec kobol eu Anutna cad (dac 4)
  - A. Gonagona mec kobol (4.1-3)
  - B. Dana mahana kobol gawena eu odi dana uqa aideg culdina (4.4)
  - C. Binani sulecnu kobol (4.5-10)
  - D. Osonu je me qee madec (4.11-12)
  - E. Culaec je madec (4.13-17)
9. Dana cehewanaganaga age dana leih cilehadegina agenu dahiniga hewec je (5.1-6)
10. Age wawaga gagadic mudimeig culumen gahidudu Tibud sumudeiga (5.7-20)
  - A. Age wawaga sosogoei culumen gahidoigale (5.7-11)
  - B. Je cagoc oso cain madowain (5.12)
  - C. Wawaga meleecceb inondoqagan (5.13-18)
  - D. Leih age jic ceja qogina eunu je (5.19-20)

<sup>1</sup> Ija Jems, ija Anutca Jisas Krais Tibudca alena cabi dana.

Ija Isrel sihil 12-pela age bilisadoc bilegina ageca huga feele aadi maadigina. Age ceeli bileigale adigina.

### *Temgec eu ege duuec tawecnu odona*

<sup>2</sup> O cotiel, deweneganu temadec filfil ageca hocobfi age eu ceelecnna ceteh himec eigale. <sup>3</sup> Ceteh oso humei agena wawaga meleec temdocob temdoc eu wooldocobil euna gagadic tatawi culumen gahidoc kobol camasac mudina eu age dogina. <sup>4</sup> Odoc me bahic duman eu age cunugnu ihoc ligiannu, odocob age euna me bahic ititom cobocnu biluqagannu age saen cunug gagadic tataweig culumen gahidoigale.

### *Dana uqa cisdoc sileccanu qaqaguldufe uqa gad inondoia*

<sup>5</sup> Anut uqa dana cunug ceteh adecnu waug nijina, uqa qee gagalena. Eunu age oso uqa cisdoc sileccanu qaqaguldufe uqa Anut eu utigliannu inondoiale, Anut uqa eu utigian. <sup>6</sup> Euqa dana eu Anut uqa utecnu ihofeo, qeefo odi cain cisdoiaun, uqa waug meleecca Anut inondoiale. Dana uqa odi cisdonia eu uqa fufu macas fuludocob qahimei ehi li heli ahu helienawe. <sup>7-8</sup> Dana odi odoc eu uqa cisdoc leciscia. Cisdoc oso Anutnu cisdonia qa cisdoc oso ceteh mahanadecnu cisdonia. Uqana jic cobocnana cunug luculacaena. Dana odi odoc eu Tibud ceteh oso utigian ec cain cisdoiaun.

### *Dana sawen dana cehewanca*

<sup>9</sup> Cotige uqa cehewanca qee bilina eu uqa ija Anut amegna binanica biligina, isi Anut suli u mitigian imei eunu culaeiale. <sup>10</sup> Euqa cotige cehewanca bilina eu uqa ija Anut amegna binanica qee biligina eunu wawi jogoi cobigina imei eunu culaeiale. Ge, gigi sal qoc qaisenawe odi dana cehewanca ugaha qaisi cal migian. <sup>11</sup> Ge, cam bimei agagca tawimei gigi hoodona, odocob sal qoc tonena. Wele galeca tawen qila eu qee mena eu ege doqona. Eu odiwe dana cehewanca uqa uqana cabi cunug oodi gemona qee migian.

*Ceteh dana temdocnu uqana je*

<sup>12</sup> Dana uqa gagadic tatawi temdoc cunugna culumen gahidona uqa ceelecca. Uqa temdoc cunug wooldocobfi Anut demico biley eu utigian. Anut dana cunug uqanu nalug megina eu age ameg i adecnu wele maden. <sup>13</sup> Dana uqa ceteh oso temdocob waug cajenafi eu Anut temteceb wawi cajena ec cain madeiaun. Eu odi qee. Silail uqa Anut temdocwe qee. Odocob Anut dana silail mogagannu qee temadena. <sup>14</sup> Euqa ege cunug abesabes wawige cajeceb euna digena. Egedodoc egene gale gec me qee eu ninigena. Odimei qisol mecnu ehi li megina. <sup>15</sup> Gale gec me qee kobil eu wauga fagdocab silail mec eu mel basewce camasac mena. Hibna silail mec eu ben meceb cal mec cali hona.

<sup>16</sup> O cotiel bahic, fefeig age kobil eu culdecebil quadeiaun. <sup>17</sup> Kobil me ceteteh um ige bagol igece me bahicca eu cunug sao culnadec nena. Fulacdoc cunug memige uqa suladecel egeca nena. Memige eu uqa uqana kobil qee falicfuludona. Uqa eu ceteh osuna salu camna calena dodolog cecelac mimei haun gohic mena odi qee. <sup>18</sup> Qeoo. Uqa uqadodoc uqana cisdocna gale doc eu toodumei basigen, uqa uqana mele je euna basigen. Ceteh cunug Anut ifanen euna ege sab magah age casac cabinadec umeig Anutnu ihanegina eu odiwe uqana mel matu bileqannu maden.

*Ege je dah mimeb toodu ha odoqan*

<sup>19-20</sup> O cotiel bahic, age ceteh eunu du cuhadoigale. Age abesabes oso je madeceb docnu waug nijecelbfi age mahuc dahiniga ceheigale. Age je madecnufi mahuc fecwe Cain madowain. Odocob dana gemag becna Anutna kobil tutuc odoc eu qee odona. Eunu gemanaga ha mahuc Cain beiaun. <sup>21</sup> Eunu wawaga cisdoc gegehinca cunug qisol mec kobil cunug geh bahic calena eu age ititacdcoilgale. Odimeig age jogoi wawaga lal qocna Anutna je wawagana cehen eu oiga. Je eu age dolonoga cahahaadecnu ihoc.

<sup>22</sup> Euqa age je doc dana himec Cain biluwain. Age je eu toodoo odoc dana bileigale. Age gauc himec dah mifeig eu agedodoc quadeqina. <sup>23</sup> Ge, dana oso uqa Anutna je gauc himec dah mimi qee toodoo odifei eu uqa dana uqadodoc ola dodna fenawe. <sup>24</sup> Uqadodoc ola dodna fimei nui cocobi uqa ola adec eu mahuc bahic dahig celena odiwe. <sup>25</sup> Euqa loo je eu silailna gihacdognadec besigena eu tutuc bahic. Dana oso uqa loo je eu meci cuhadudu toodoo odifei uqa gauc dah mimi dahig celec dana qee. Anut uqa dana eu uqana odocona eeldugian.

<sup>26</sup> Dana oso uqa odi cisdoma, "Ija Anutnu wawi meleecca me bahic Anut binan suligina," qa uqadodoc co qee cofdoma eu uqadodoc waug quaudona. Eunu uqana waug meleec cuha fecca eu gauc himec. <sup>27</sup> Cuha fec eu ege memige Anut amegna eu soidoc bahic nijecel odocob gegehinca qee eu odi bilina. Age mel leih anagai memegalica cal mein eundec caja wij cuhanan bilegina eu ageha culumen gahidocnu cesuladeigale. Ceteh osoha. Maha inadec kobil wawaga gegehin Cain quoiaun. Odocob age agena jic coboc cofdu cuhadudu coboiga.

## 2

*Ege dana cunugnu wawige qoc eu ihocihoc nijiale*

<sup>1-4</sup> O cotiel, age egene Tibud Jisas Kraisnu wawaga meleen, uqa Anutna kobolkobil. Dana oso dewegna lotoc me bahicca eben gicna gol saica agena cegulecna hona. Odocob dana sawen oso dewegna lotoc me qeeca uqaha cegulecna hona. Odocob age dana dewegna lotoc me bahicca eu meme mudegin. Odimeig madogina, "Cois hina biley me bahic euna hu bilegale," dogina. Odimeig sawen dana edi madogina, "Hina euna tawaga," doginafo, qee "Hina jaaima isec hu bilegale," dogina. Age kobil eu odi odifeig eu agedodoc cotogail agena cisdocna gesiladegina. Age tutuc bahic ihocihoc qee gesiladegina. Age dana lecis eu cisdoc meca qee euna gesiladegina. Eunu age fifi dana ijanca himec Cain me mudowain. Odimeig dana ijanca qee eundec Cain hibemdwain.

<sup>5</sup> O cotiel bahic, age dah meiga! Dana age dana mahadanadec cunug amagana cehewanca qee dana eu age agena wawaga meleec eu cehewanca odiwe biluqagannu Anut wele nesili cedaden. Wele eu uqa je hahun odi maden. Dana uqanu nalug megina eundec eu uqa uqana me culna ehi li madigian. Eunu uqa dana sawen eundec me cul euna biluqagannu wele ehadan. Age Anut huqanehul. <sup>6</sup> Euqa age sawen dana eundec age majanaga hewadein. Age wele dogina, qaqi dana eu age age bisah bahic mamadeig culumen gahidu adegina. Eu age himec age gesilec jona madegina. <sup>7</sup> Anut uqa Krais ijan me bahic ageca men bilia. Odocob dana eundec age ijan me bahic eu quesaldogina.

<sup>8</sup> Egena king uqa loo je oso maden eu age Anutna jaqec jena jaqein, loo je eu odi madena:

"Hina hinanel nalunin maganawe odi hina utuqain bielec<sup>\*</sup> eundecnu nalug magale," ena.  
(Wok Pris 19.18)

Eunu age mele bahic loo je eu toodu odifeig eu age kobil me bahic odogina. <sup>9</sup> Euqa age dana ijanca oso meme mumudeig dana ijanca qee oso hibemdoginafi eu age silail megina. Eunu loo je eu age aqena eunu age loo je wooldoc dana age tutuc bahic dogina. <sup>10</sup> Ge, dana oso uqa loo je cunug toodudu qa loo je osol himec wooldonafi eu uqa loo je cunug wooldumei silail eu deweg fagdona. <sup>11</sup> Anut uqa odi maden:

"Hina dana cajaca alena sisi jelalec cain wagalagaun," en. (Kisim Bek 20.14; Loo 5.18)  
Odoboc uqana odi maden:

"Hina oso qocom cain cal meiaun," en. (Kisim Bek 20.13; Loo 5.17)  
Eu ege doqona. Doboc hina dana cajaca alena sisi qee wagalagan qa hina dana oso qocom cal menfi eu hina loo je cunug wooldom. <sup>12</sup> Anut uqa silailna gagadic odoc qatanamei ege besigen hibna uqa eguna loo je eu toodu odoc euna gesilgigian. Eunu saen cunugna age je madecnua cel kobil odocnu ha eu loo je eunu ihoc himec odoigale. <sup>13</sup> Dana oso uqa dana hijag osonu qee waloc donafi eu Anut uqa je gesilec deelna ameg wadacdegian. Doboc uqana ha waloc qee doiaun. Euqa dana uqa dana hijag osonu waloc dana eu uqa gesilec je wooldugian.

### *Wawaga meleec tutuc odocca qeefi eu wele cal men*

<sup>14</sup> O cotiel, dana oso uqa ija Kraisnu wawi meleena ec madenafi qa uqa kobil me oso qee odona, dana eu uqana waug meleec eu ceteh gauc himec. Waug meleec eu odi caahahadocnu ihoc qee. <sup>15</sup> Dana cotigfo, caja cotigfo, uqa lotoc me qee himeccaf, sab jecca qeefo, <sup>16</sup> odoboc age oso madugian, "Hina wawin lal qocca biledale. Hina li lotoc taqimeg dewen walac heia. Odimeg li sab umeg wawin wennu jaga," dugian. Age eu odi mamadeig qa lotocca deweg cesuldocnu sab qee utifeig je eu himec adi cesuldugian? <sup>17</sup> Eunu wawaga meleec ha eu odi himec. Uqa gauc bibili kobil me oso qee camasac mudinafi eu ceteh gauc himec.

<sup>18</sup> Euqa dana oso uqa madigian, "Oso uqa waug meleecca, oso me odocca," igian. Eunu ija odi madigina, "Hina wawin meleecca qa me odocca qee adi biligina eu ihactaga figa. Doboc ija ijana wawi meleec ijana me odockna ihachigen," igina. <sup>19</sup> Hinana wawin meleec eu odi, "Anut osol himec bilina," agana. Eu hina me bahic. Buga me qee ageha odi wawaga meleena. Odimeig qeleti cucuiegina. <sup>20</sup> Hina dana gad! Hina wawin himec meleena qa me qee odogonafi hina wawin meleec eu ceteh gauc himec eunu hina wawin fogo dugiannu je oso mahecemin dogale. <sup>21</sup> Weleca ege jajanigeil memega Ebraham uqa melah Aisak ihanec cabalna mudimei Anut ihandocnu odon. Eunu saen ina Anut uqana odoc fimei dana i ititom ec maden. <sup>22</sup> Eu fagana, uqana waug meleecca uqana me odocca eu ihocihoc len. Doboc uqana me odoc eu uqana waug meleec camasac muden. <sup>23</sup> Odi odonnu Anutna jaqec je tawena eu ihoc len. Jaqec je odi madena:

"Ebraham uqa Anutna jenu waug meleen."

Doboc Anut uqa uqana waug meleec fimei dana i ititom ec maden," ena. (Jenesis 15.6)  
Doboc age Ebraham uqa Anutna danah oloig. <sup>24</sup> Age eu camasac feigale, waug meleec gauc himecna Anut uqa dana eu ititom ec qee madena qa uqa dana me odona eunu uqa dana ititom ec madena.

<sup>25</sup> Eu odi himec wal caja Rehab uqa dana Josua suladeceb hoin eu age cofadimei suladeceb jic filna haun ceselein. Eunu Anut uqa uqana odocnu caja ititom ec maden.

<sup>26</sup> Deweg kisca qeefi wele cal men eu ege doqona. Eu odiwe dana uqa waug meleena qa me odoc qee odona dana eu uqana waug meleec euha cal men.

## 3

### *Ege conige cofdu cuhadoqale*

<sup>1</sup> O cotiel! Age mati ege dana iwaladec biledan egina eu cois qee. Ge age dogina, ege dana iwaladoqona Anut uqa ege eguna cabinu eu tutucfo, tutuc qeefo gagadic gesilgigian. Euqa iwaladec dana qee uqa uqana cabinu gagadic qee gesildaun. <sup>2</sup> Ge, ege cunug cabi oc gaid cahaldoqona. Oso uqa je maadecna qee cahuldona eu uqa dana tutuc bahic, uqa deweg cunug dado mudecnu ha ihoc. <sup>3</sup> Ege hos cona ain qagitoqona. Eunu ege hos hewi iwaldoqannuca, odoboc ege eu hewecna hos deweg cunug dado mudeqannuca odi odoqona. <sup>4</sup> Age wag ben ha feigale. Uqa ceteh ben bahic, fufu benben fudocobil nuina. Euqa colum hewec dana eu, wag colum eu ceteh nag bahic, uqa hewi dado mudeceh

\* 2:8: Utuqain bielec uqana gug eu odi. Agena loofo, agena kobolfo eu dana osonu nalug magale ec qee madel, cois hina dana eunu nalug magale.

culum hewec danana cisdock wag ben eu toodu nuina. <sup>5</sup> Eu odiwe conige eu dewegna naha nag bahic. Euqa ceteh benwe ija didih ena.

Ja nag bahic eu odocob bahu ben eu cunug ja cijenanu cisoigai! <sup>6</sup> Odocob conige eu ja cinigwe. Conige eu ege dewenige cunug uqana naha bilina. Odimei kobil me qee filfil odocob calena. Eu odocob dewenige cunug gegehin mudina. Eu dewenige cebac biley cunug ja cijec cinigwe odocob calena, oloqanu uquadoc ja eu madacdonia. <sup>7</sup> Ge, dana age dool cus filfil cunug cedein. Man fululecca man sononecca ceteh cunug macasna wana nijeginia age dool eu agena gawec cilehduadecebile age dana bisalu himec bileyne. Qila ha dana age i edi odocnu ihoc. <sup>8</sup> Euqa dana oso uqa co cilehdowee qee. Eu gaid qisol je madena. Euha dana qocnu jelec cinigwe. <sup>9</sup> Ege conigena eguna Tibud Memigeca qesaldoqona odimeb ege dana cotigeil, Anut uqa wican ifani maden eu geladoqona. <sup>10</sup> Qesaldoq jeca geladec je eundecha conige osol euna himec calena. O cotiel! Eu odi Cain nijaunle. <sup>11</sup> Wa tut maha dunuhnadec macasca osobon qee calena. <sup>12</sup> O cotiel, na dan uqa oliv aig qocnu ihoc qee. Na wain uqa dan aig qocwe qee. Odocob eu odiwe macas uqa wa tutca osobon calecnu ihoc qee.

#### *Doc silecca eu Anutnadech hona*

<sup>13</sup> Age eundec oso uqa cisdock silec mecafi uqa uqana coboc menaca uqana cisdock silecnaca waug jogoechnaca uqana odoc eu me ihacadeiale. <sup>14</sup> Euqa age wawaga dunuhna age dana leihnu heel meginaca cunug agedodoc binanaga sulecnu cisdoginafi age agena docnu cain culaowain, mele jenu eu uhulec je cain madowain. <sup>15</sup> Doc eundec eu sao ohisnadeq qee nena eu mahadanec hona. Eu Anutnadech qee euqa Setennadech. <sup>16</sup> Ge, dana age dana leihnu heel meginaca age agedodoc binanaga sulecnu cisdoginaca dana eu age agena cisdock eu ihulahal, agena odoc cunug eu qisolca. <sup>17</sup> Euqa cisdock silec sao ohisdec eu casac soidocca. Odocob eu malolca, gemag jocosaigca. Odocob eunu dana gami wawaga osolna bileyina, age dana leih agena je ihoc toodogina. Age wawaga qocca odocob kobil me odogina. Age dana cunugnu kobil me osol eu odadegina. Age quauadec kobil qee odogina. <sup>18</sup> Ege malolca ititom cobifeb i eu ege sab cehoqonawee. Hibna ege malolna ititom coboc eu sab me cinigwe haudoqan.

## 4

#### *Dana mahadanec kobil gawena eu uqa Anutna cad*

<sup>1</sup> Age gemona han cadecca gonagona mecca eu cunug anadec hona? Wawaga cajecnu kobil eu ageca bilina. Odi eu age dewenega cunug eu gemona hannu belicanagaca kobil eu himec han cadecca gonagona mecca odocob calena. <sup>2</sup> Age cetetehnu gale adena qa age qee owain. Eunu age qagaadegina. Age cetetehnu amaga qona qa age cedecnu ihoc qee eunu age gonagona mimeig cadegina. Age gale adena eu qee ogina eu eetanu? Age eunu Anut qee sisildogina. <sup>3</sup> Agena cisdock eu tutuc qee. Odocob ceteteh agedodoc agena belicanagana odoqagannu sisildogina. Eunu saen age sisildogina eu age qee ogina. <sup>4</sup> Age dana cajaca ocobocobimeig cagogina cinigwe. Dana uqa mahana kobil gawifei uqa Anutna cad nec kobil odona. Age eunu qee doginafo? Eunu dana uqa mahana kobilnu gawenafi uqa Anutna cad caligian. <sup>5</sup> Anutna jaqec je edi madena, “Kis i Anut ege dunuhna men bilina eu Anut uqa uquadocnu biligiannu gagadic cahacdonia,” ena.\* Age jaqec je i eu gauc himec ec cisdoginafa? <sup>6</sup> Euqa Anut eelgec me geh bahic uum igena. Eunu Anutna jaqec je madena:

“Anut uqa dana ege binanige suli oqan egina eundec hewadeceb nag megina.

Euqa dana wawaga lal qu jogoi cobogina eundec uqa eeladec uum adena,” ena. (*Sindaun 3.34*)

<sup>7</sup> Eunu age lal qu jogoiomeig Anut bisalu bileygale. Age Seten feedoigale. Odocob uqa age culadimei busaligan. <sup>8</sup> Anut cemenug hoiga. Odocob uqa age cemenega hugian. Age silail dana! Ebenega cuseiga. Dana wawaga lecisca age wawaga soidoigale. <sup>9</sup> Age wawaga tucieceb gehca qajeigale. Age qada qajeigale. Dana age qila asalegina eu age asalec culimeig qajeigale. Dana age qila celeboegina age dumanaga culiale. <sup>10</sup> Age Tibud amegna agedodoc lal qu jogoeigale. Age eu odi odifeig Tibud uqa age suladeceb cajoqagan.

#### *Ege cotigeilnu um qoc je cain madoqan*

\* **4:5:** Je i edec Buk Baibel cunugna oso qee nijel. Odocob Grik jena gug eu camasac qee. Jems eu ceteh cunug ifanadec saenna kis cebac Anut uqa fuldotocab dana cebac men eunu madenafo (age Jenesis 2.7 feiga, qee uqa Kis Gunnu madenafo ege qee doqona. Uqa Kis Gunnu madenafi uqa cudun ina dih eunu madena.

<sup>11</sup> O cotiel, agenu je me qee cain madocobmadocabowain. Dana cotig oso cotignu je me qee madenaf i cotig gesildonaf eu uqa loo jenu je me qee madena.<sup>†</sup> Odocob uqa loo je gesildona. Euqa hina loo je gesildogonaf hina loo je toodu odoc dana qee qa hina loo je gesildoc dana. <sup>12</sup> Eu loo je igec dana osol bilia. Euha gesilgec dana osol bilia. Eu Anut himec. Uqa himec cahahagecnuca fadalgecnuca ihoc. Eunu hina cel dana eu hina utuqain gesildogona?

#### *Ege Anut cain feedoquaun*

<sup>13</sup> Age dana leih edi madegina, “Qilafo, uquadecfo ege taun ben osona belimeb cabi gel osolna ihoc bileqan. Odimeb ege idadimeb meen qaig geh bahic oqan,” egina eu age qila ija dah miteiga. <sup>14</sup> Agenu uquadec eeta oso caligian eu age qee dogina. Age hut cinigwe eu qila himec calimec ficagonaw. <sup>15</sup> Age i edi madoub, “Tibud uqa cois ecebf ege cebac bilimeb cabi ifo, cabi osofo odeejan,” oub. <sup>16</sup> Ageqa agena me bilec saenna culaej je madegina. Agena culaej je eu me qee bahic. <sup>17</sup> Age cisdu cuhadoiga. Dana kobol me odocnu dona qa uqa qee odona dana eu uqa silail mena.

## 5

#### *Dana cehewanagaca agenu dahiniga hewec je*

<sup>1</sup> Odocob qila age dana caja cehewanagaca eundec age ija dah miteiga! Culumen cunug agenu cali hugian odona eunu age qaqaji bileig gehca utaeigale. <sup>2</sup> Age cehewanaga eu wele molen. Odocob agena lotoc cumucum ji hedoin. <sup>3</sup> Agena gol silwaca eu tonton cehen. Tonton cehee eu age deweneganu balijeceb agena silail camasac migian. Odocob eu age dewenega ja cinigwe cijadigian. Age cehewanaga ben bahic haudooin eu hib cit qoc saenna agena silail camasac migian. <sup>4</sup> Dana agena cabina cabi ogina eu ameg adecnu cilehdoin eu deweneganu je madena. Cabi dana uteec eu han dana mati bahic age sao ohisna bileyina agena Tibud dahigna ti calen. <sup>5</sup> Age mahana sab ilul qoc ninijen joloig. Age golanaga me qeenu sililec toodoo odoloig. Age bulmakauwe qagaadeceb cal moqagannu sab geh bahic jimeig wawaga iben. Eu odiwe age qagaadeceb cal moqagannu deel wele dodoladena. <sup>6</sup> Age dana tutuc coboc eu wele geladimeig qagaadeceb cal mein. Oodogin age qee wadacadelein.

#### *Age wawaga gagadic mudimeig culumen gahidudu Tibud sumudeiga*

<sup>7</sup> O cotiel, eunu age wawaga gagadic mudimeig culumen cunug gahidodoig leceb Tibud ceseli hugiannu susumudi bileigale. Age dogina, cabi memeg uqa sab aig me bahic qugian imei waug gagadic mudimei wa aquneb hibnaca hugiannu sumudinaw. <sup>8</sup> Tibud hugiannu deel eu onoca qee nijia. Eunu ageha wawaga gagadic mudimeig culumen cunug gahidoigale. <sup>9</sup> O cotiel, Anut age qee gesiladeiaunnu cain gonagona mudeceb mudeceb bowain. Feiga, gesilgec dana uqa jic cebec hibilohu isec tawea. <sup>10</sup> O cotiel, je hahun madec dana Tibud ijanna madeinnu cisoigale. Agena cad age me qee mamaadegin age wawaga gagadic mudimeig culumen eu gahidoin. Age agena kobol eu fimeig eu tooadi odoigale. <sup>11</sup> Age cisoiga, ege odi madoqona, “Dana age wawaga gagadic mudimeig culumen gahidoin eu age eeldoc oqagan,” oqona. Age Jobna dodo wele dah mein. Uqa waug gagadic mudimei culumen cunug uqaca hon eu gahidon. Odocob hibna Tibud uqana kobol mena oduden euha age dogina. Tibud uqa egenu waug qocnuca cesulgecnuca eu geh bahic eu mele ege doqona.

#### *Ege je mele ohis madoqona ec cain madoqona*

<sup>12</sup> Euqa cotiel, cetehe oso meca bahic age odoqagan eu edi. Age sao amegnafo, qee maha amegnafo, cetehe oso amegnafo madigina ec eu cain madowain. Age je cagoc oso cain madowain. Age ao egina eu mele dih nijiale. Age qee egina eu qee dih nijiale. Eunu Anut geladec ageca qee hoiaun.

#### *Dana ititom uqana inondoc eu gagadic*

<sup>13</sup> Age eundec oso culumen gahidonaf uqa inondoiale. Oso uqa waug me nijinafi uqa Anut binan sulec due siliale. <sup>14</sup> Age eundec oso uqa hagcafi uqa tamanec uqana cofadec matu utaadec eb hoigale. Age uqanu inondumeig Tibud ijanna mool joudeigale. <sup>15</sup> Odocob age Anutnu wawaga meleebec inondufeig Tibud uqa hag dana me mudimei haun tulidugian. Odocob uqa silail leih odonfi Tibud silail eu cunug casasitugian. <sup>16</sup> Eunu Anut age meadigiannu age agena silail qasalitocbocbeigale. Odocob euha cotigcotignu inondocob docobeigale. Dana ititom coboc uqana inondoc eu gagadic, eu gagadic odocnu ihoc bahic. <sup>17</sup> Ilaija uqa dana ege cinigwe. Uqa wa cain neiaunnu Anut gagadic

† 4:11: Loo je osonu Jems cisdon eu Wok Pris 19.18na nijia eu odi fena. Age Jems 2.8 feiga.

inondon. Odocob cabi gel cijed nahaca li wa mahana qee nel.<sup>18</sup> Odocob uqa haun inondon. Odocob sao wa suldocob neceb sab mahana haun wasen.

*Dana oso uqa jic ceja qcobf<sup>i</sup> ehudi ahoqan*

<sup>19</sup> O cotiel! Ceteh oso age doiga. Age eundec oso mele je uqana kobol culecebf<sup>i</sup> oso ceseli ehudi honafi eu me bahic.<sup>20</sup> In oso silail dana cesuldocob uqa jic me qee culimei Anutca ceseli hona dana eu silail dana uqa cal mecnadec dolog cahahadona. Odocob uqa eu odocna silail mati cagasiadigiannu cabi ona.\*

---

\* **5:20:** Jems uqa cotig Anutna mele je culen eu uqana kobol tutuc mudecnu cisdon, eunu uqa jaqec je i jaqen eu odi fena.

## Pita Uqa Jaqec Je Osoldoc Anutna Dana Cajaca Jaqiaden Aqunec Je

Pita uqa Kristen dana cajaca age hatu filfil ilagna bilein eu jaqec je i jaqiaden. Kristen eu age culumen me qee gahidoin eunu Pita uqa agena wawaga meleec gagadic mudecnu jaqec je i jaqiaden. Uqa Kristen age Jisas Kraisnu me je haun cisdoqagan ec madena. Jisas uqa cal mimei ceseli cajen. Odimei uqa ija ceseli hugen ec maden. Pita uqa age Jisasna je hahun eunu cisdumeig uqa ceseli hocnu susumudi biluqagan ec madena.

Eu mele, Kristen age culumen gahidoin. Euqa ceteh me qee eu agena wawaga meleec temdocnu calen. Eunu age wawaga gagadic meleean lili Krais ceseli hugian. Odocob saen euna age ameg me bahic oqagan. Pita eu odi madena.

### *Je Dunuhnu Dado Mec*

- 1.Feele adec je (1.1-2)
2. Anut uqa egenu waug ben qumei cahahagen eunu Anut binan suluqale (1.3-12)
3. Ege gun biluqale (1.13-5.11)
  - A. Anut uqa gun eunu ege gun bileyqan (1.13-2.3)
  - B. Ege wawige meleec dana cajaca eguna bileyqan (2.4-12)
    1. Ege Anutna jo Anut uqa cehena (2.4-8)
    2. Anut uqa ege wawige meleec dana cajaca eu wele nesili cedigen (2.9-10)
    3. Ege cele dana jobon filnadec cinigwe odi ege jag maha ina biluquna (2.11-12)
  - C. Ege dana agena iloilo cunug bisalu biluqale (2.13-3.7)
    1. Ege kingca, gabmanca bisalu bileyqan (2.13-17)
    2. Ege eguna cofogec dana bisalu bileyqan (2.18-20)
    3. Krais uqa culumen dain doc sogoecca gahidon eunu egeha odi odeqan (2.21-25)
    4. Aidagail age gemugail bisalu biluqagan (3.1-6)
    5. Gemugail age aidagail me cofaadi gami me biluqagan (3.7)
  - D. Age wawaga meleec cotogail cunugnu nalunuga meigale (3.8-17)
  - E. Krais uqa dana caja silaitca eunu cal men (3.18-4.6)
  - F. Ceteteh cunug qee mec saen eu cemenuq nijia eunu ege kobil me odoqale (4.7-11)
  - G. Ege Krais dain sogoecca gahidonwe odi dain sogoecca gahidoqale (4.12-19)
  - H. Tamanec cofadec age Anutna dana cajaca cofadi cuhadigale (5.1-4)
  - I. Dana haun age tamanec cofadec matu bisalu bileygale (5.5-11)
4. Jaqec je i ugana gug (5.12)
5. Cit qoc je (5.13-14)

<sup>1</sup> Ija Pita, ija Jisas Kraisna aposel. Ija jaqec je i Anutna dana cajaca jaqidigina. Age agena gug jobon culimeig Pontasca, Galesiaca, Kapadosiaca, Esiaca, Bitiniaca hatu ilagna bileygina. <sup>2</sup> Wele bahic Anut ege Memige uqa agenu wele don. Odimei uqa ugana cisdoqna age ugana dana cajaca biluqagannu nesili cedaden. Odimei age Jisas Krais jejeg toodoo odoqagannu nesili ehaden. Odimei Jisas Krais uqa golac eu bilisadu aqeeb age Anut amegna soidoc tawoqagannu nesili ehaden. Eunu Anutna Kis uqa age qaguadecib gun calein. Anut ugana eelgec uum igecca malol bileycca adeceb ageca am bec nijiale.

### *Ege cebac biley me bahic sao jobon bilia eu ocnu sumudi biluquna*

<sup>3</sup> Anut uqa eguna Tibud Jisas Krais Memeg. Eunu ege Anut binan suluqale. Uqa egenu waug ben qon. Odimei uqa Jisas Krais cal mecnadec tulidocob haun cajen. Uqa jic euna ege cebac biley haun igen. Odocob cebac biley haun eu ege gagadic migeeb ege cebac biley catanec Anut hibna igigiannu sumudi biluquna. <sup>4</sup> Cebac biley catanec ocnu sumudi biluquna eu Anut uqa mugumige nec eu wele saciadon agenu cofdona, eu sao jobon bilia. Eu qee fadaleiaun, eu Anut amegna cataniec bahic bilia, eu qee qee meiaun. <sup>5</sup> Age Kraisnu wawaga meleena, eunu Anut uqa ugana gagadic odoqna uqa age caahahaadigianu cofadi cuhadona. Odocob agena caahahaadec eu saciadon bilia eu deel cit qocna camasac mudigian.

<sup>6</sup> Age ceteh i cunug Anut odon eunu cisdumeig ceeleigale. Euqa qila age saen nag odi dih Anut gale docobfi temadec filfil ageca caleceb sogooqagan. <sup>7</sup> Temadec ina Anut uqa agena wawaga meleec eu melefo, qeefo temdonia. Age dogina, gold eu ceteh fajecnu qraig ben bahic, euqa age gold eu melefo, qeefo temdocnu jana manegina. Gold eu ceteh fadaligian. Eunu agena wawaga meleec eu gold wooldona. Odocob temadec filfil ageca caligian saen euna agena wawaga meleec eu gagadicfo, qee, mele qeefo eu odi dugian. Odocob hibna

Jisas Krais camasac cali hugian deel euna uqa agenu ceelimei age binanaga fulacdoc benga adigian. <sup>8-9</sup> Age Jisas Krais qee felein qa age uqanu nalug megina. Age uqa qila qee fegina qa uqanu wawaga meleena. Agena wawaga meleec eu aig qona. Aig eu Anut uqa age dolonoga cahahadona. Odocob age uqanu celebo bahic egina. Agena celeboec eu ben bahic, eu celeboec cunug maha inadec wooldona, eu odi ege conigena qasali madecnu ihoc qee.

<sup>10</sup> Je hahun madec dana wele bilein age Anut uqa age qila bilegina cahahaadigian eunu je hahun madein. Odimeig age je i Anut uqa eeladec me bahic uum adigian ec eu gug doqagannu cabi gagadic oloig. <sup>11</sup> Kraisna Kis uqa je hahun madec dana eu age dunuh bilen. Kis eu uqa conogana Krais culumen dain doc sogoecca filfil gahidumei hibna binan ben fulacdocca ugian ec saaden. Kis saaden saen euna je hahun madec dana age wawali sisilec cabi oin, "Cel dana uqa ege cahahagigian?" ein, odocob "Aadeb dana eu cahahagigiannu hugian?" ein. <sup>12</sup> Euqa Anut uqa je hahun madec dana eu age je hahun inu agenel cesuladecnu qee nijel ec maadeceb doin. Je hahun i agena saenna qee camasac meiaun ec maadeceb doin. Euqa agena je hahun eu Anut uqa age qila hatu ilag bilegina eundec cahahaadigiannu maden. Anut uqa Kis Gun sao jobondec suldocob nen. Odocob dana sos age Kis Gunna gagadic odocna Jisas Kraisnu me je qasali maadeceb doin. Ensel ageha Anut uqa adi uqana dana cajaca cahahaadigian ec foqagannu gale adena.

#### *Anut uqa ege gun bilecnu utagen*

<sup>13</sup> Eunu age agena cisdock tutuc mudimeig dumanaga cofdu cuhadu bileigale. Age agena cisdock cunug gabandumeig Jisas Krais camasac cali hugiannu sumudeigale. Odocob age Anut uqa eeladec me bahic saen euna uum adigianu gaid cisoigale. <sup>14</sup> Age mel sim je toodoo odoginawee odi odoigale. Wele age docca qee, odocob age wawaga cajecka kobil toodoo ololioq. Qila age kobil eundec haun toodoo odochru cain cisdowain. <sup>15-16</sup> Anut age wele utaaden uqa gun, uqana kobil cunug eu tutuc bahic. Anutna jaqec je odi madena: "Ija gun biligina eunu ageha gun bileiga," ena. *(Wok Pris 11.44-45; 19.2; 20.7)*  
Eunu age Anut himec toodoiga, age Anutwe agena coboc cunugna gun bileiga.

#### *Anut uqa fajec ameg ben bahicna ege ceseli fajigen*

<sup>17</sup> Age Anut utadudu madogina, "Memige," dogina. Memige eu uqa ege ijanigecafo, ijanigeca qeefo ec qee cisdona. Uqa ege dana osolosol cunug egena odoc himec ihocihoc gesilingga. Eunu age saen maha ina bilegina euna age gaid Anutnu cumunii coboigale. Age dogina, maha i agena jobon gug qee. <sup>18</sup> Age dogina, wele age kobil caunca qee age jajanagailnadec oin eu toodoloig. Euqa Anut uqa age ceseli fajadimei kobil eunadec cagasaden. Odocob Anut uqa mahanaadec ceteh qee mena eu silwa goldca cinigwe euna qee ceseli fajadel. <sup>19</sup> Uqa Krais golacna ceseli fajaden. Golac eu ihanec meca bahic, meen qaigna fajecnu ihoc qee. Krais uqa sipsip haun oso uqa hulufan osoca qee cinigwe age Anutnu ihanegina.\* <sup>20</sup> Anut maha qee ifanec ninijen uqa Krais cabi i ugianu nesili ehuden. Odocob qila cit qoc saen ina Anut uqa odudeceb Krais uqa age cesuladigianu camasac men. <sup>21</sup> Anut uqa Krais cal mecnadec tulidocob cajen. Odimei binan fulacdocca uten. Krais uqa age cesuladec qee Anutnu wawaga meleena. Eunu age Anutnu wawaga meleena, odocob age Anut cahahaadigiannu sumudi bilegina.

#### *Age wawaga meleec cotogailnu nalunuga meigale*

<sup>22</sup> Age mele je i toodoo odogina, odocob age kobil euna agedodoc wawaga wasacudeceb Anut amegna cataniec bilegina. Odocob age wawaga meleec cotogailnu nalunuga megina. Age cotogail osonu nalug mecebmecebecnu gagadic odoigale. <sup>23</sup> Ge, age haun wasein, eu odiwe sab cabina haun wasadena. Euqa sab aig qee mena eu age eunadec qee waselein. Sab aig gaid bilina eunadec dih age wasein. Sab aig eu Anutna je. Eu uqa cebac bilecca, eu gaid bilina. <sup>24</sup> Ge, Anutna jaqec je eu odi madena:

"Gigi eu galalimei qee mena, uqana bobog eu cagasi tonena.

Dana cajaca cunug age gigi cinigwe mahuc qee megina.

Age binanaga eu bobog cinigwe cagasi tonena.

<sup>25</sup> Euqa Tibudna je eu bileceb catanena," ena. Tibudna je eu me je dana age qasali maadein. *(Aisaia 40.6-8)*

## 2

#### *Tibud uqa meen me cinigwe cebac bilecca*

\* **1:19:** Isrel age sipsipfo, dool osofo Anutnu ihanecnu ehadi leinna agena loo je maden, "Age sipsip me bahic hulufan osoca qee eu himec ihanecnu ehi leiga," en. Age Wok Pris 22.17-25 feiga. Pita uqa loo je eunu cisdumei maden, "Krais uqa sipsip haun oso uqa hulufan osoca qee cinigwe age Anutnu ihanegina," en.

<sup>1</sup> Age haun wasein, eunu age kobil me qeeca quauadec kobilca cunug culeiga. Age me hihi leeig me qee odocnu cain odowain. Age osana ceteh ocnu cain cisdownain. Age oso hibilemeka je me qee cain madowain. <sup>2</sup> Ege doqona, mel momodo age su sugudocnu gale adena. Eu odiwe ageha mel momodowe age su cataniec Anutnaadec sugudocnu gale adeiale. Su eu Anutna je, eu age dolonoga cesuldocob ben mimei cebac biley haun Anut aden euna duuec tawigian. Odimei age Anutca me bileycebil cahahaadigian. <sup>3</sup> Ge, Anutna jaqec je odi madena, "Age ege Tibud kobil mena odigen eu wele tebandoin, odocob age Tibud uqa me ec fein," ena.

<sup>4</sup> Tibud uqa meen oso cebac bileyca cinigwe. Dana age uqa fimeig eu me qee ec cisdumeig uqa hibemdoein. Euqa Anut uqa wele nesili ehudimei uqa me ec cisdon. Eunu age Tibudca hoigale. <sup>5</sup> Ageha age meen cebac bileyca cinigwe. Odocob Anutna Kis uqa age meenwe umei Anutna jo cehigannu gale dona. Eunu age Anutna Kis culdecebile uqa Anutna jo age cebac bileyca meenwe muddec euna cehimei uqa jo euna biligian. Odocob age Anutna jo euna age Anutna nawel tawec ihanec dana gun bilimeig age ihanec Anutna Kis gale dona eu Anut utuqagan. Age odi odocobil Anut uqa Jisas Krais umna cisdumei ihanec eu ocnu gale bahic dugian.

<sup>6</sup> Ge, Anutna jaqec je odi madena:

"Feiga, ija meen oso eu noh gug cudunna cehigennu nesili ehudem.

Meen eu me bahic, eu qaingna fajecnu ameg ben bahic.

Ija meen eu Saion Aluhna mudigen.

Dana oso uqa uqanu waug meleigia eu uqa majag qee doiaun," ena. *(Aisaia 28.16)*

<sup>7</sup> Age dana cajaca wawaga meleena eunu Krais uqa meen me bahic. Euqa dana cajaca age wawaga qee meleena eunu Anutna jaqec je odi madena:

"Meen oso meen gel cehec memei dana culein eu qila meen jo big gug jo hehdocknu tawena," ena. *(Buk Song 118.22)*

<sup>8</sup> Odocob

"Meen eu dana cajaca agena jicna caleceb age qeti aqeeb toni aqigian," ec Anutna jaqec je oso madena. *(Aisaia 8.14)*

Age Anutna je tefacdogina eunu meen eu age jaimaga qeti qocob age toni aqena. Age eu odi odoqagan ec Anut uqana cisdoc wele toodumei je maden.

<sup>9-10</sup> Euqa age Anutna dana cajaca hatu ilagna bileyca eu wele age Anutna waug qoc qee oloin. Odimei age dana cajaca gauc biley. Qilaqa age Anutna waug qoc eu oin, age Anutna dana cajaca bahic bileyca. Age Anut kobil me cunug uqa age odadennu qasali madoqagannu wele nesili cedaden. Qila age Anutna dana cajaca sihul bileyca. Age kingna nawel tawec ihanec dana bileyca. Age dana cajaca gun bileyca. Uqa age utaadeceb age tuca wele biley eu culecebile uqa age ehadeceb age uqana fulacdoc me bahicna dunuh hoin.

### *Ege Anutna cabi danawe bileyca*

<sup>11</sup> O wawige meleec cotiel ija nalunuga migina, age cele dana jobon filnadec cinigwe odi age jag maha ina bileyca. Eunu ija niniadi maadigina, age wawaga hilahna gale adec me qee age dolonoga gami cadegina eu cunug hibemdoiga. <sup>12</sup> Gadgad haiden age agenu age dana cajaca me qee ec madowainnu. Age agena me odo fifeig age Anut uqa dana cajaca cunug gesiladecnu deel hocob Anut binan suluqagan. Eunu age haiden dana cajaca gemona tutuc coboigale.

<sup>13</sup> Age Tibudnu cisdudu bibileig dana agena gabman cunug agena loo je toodu odoiga. Age Rom agena king uqa dana cajaca maha cunugna bileyca agena ilo eu uqana je toodu odoiga. <sup>14</sup> Uqa uqana cofadec cabi dana suladecceb maha cunugna limeig age dana cahuldoc kobil odogina eundec ameg me qee wadacadegina, odocob age dana kobil tutuc odogina eundec binanaga sulegina. Eunu age uqana cofadec cabi dana age maha nahahaha cofadegina euha agena je toodu odoiga. <sup>15</sup> Ge, age kobil tutuc dih odogina eu Anutna gale doc. Age odi odocobilfi age dana docca qee agenu je me qee madegina eu conoga cufa quadoqagan. <sup>16</sup> Age besiadec danawee odi coboigale. Euqa age ege besiadec dana eunu ege qisol mec kobil odeejan ec cain cisdownain. Age Anutna cabi danawee odi coboigale. <sup>17</sup> Age dana cunug ijanaga saolal mudeigale. Age wawaga meleec cotogail nalunuga meigale. Age Anutnu cumuneigale. Age Rom agena king binan suleigale.

### *Ege Krais toodumeb culumen dain gec sogoecca gahidoqan*

<sup>18</sup> Begabeg meh cabi dana age agena cofadecnu jogoi jejenega toodoigale. Age cofadec me wawaga jocosraigca himec jejenega cain toodowain qa age cofadec age cilehadegina euha jejenega toodoigale. <sup>19</sup> Ge, age Anutnu cisdudu cocobobil uqa agena cisdoc dado mudigan. Odocob cofadec me qee odadegina age dain adec gahidocobilfi Anut uqa kobil eu gale dugian. <sup>20</sup> Ge, age kobil me qee odocobil age qisaaadebil age dain

adec gahidocobilfi kobil eunu adi cesuladigian? Euqa age kobil tutuc odocobil age qisaaadegin age dain adec gahidocobilfi eu Anut amegna kobil me bahic odogina.

<sup>21</sup> Ge, age Krais jaih ceen toodoqagannu uqa agenu sogoen. Uqa eu odi odonnu ugana kobil eu age ihacaden. Eunu Anut uqa age kobil i toodoqagannu wele utaaden. <sup>22</sup> Anutna jaqec je oso Kraisna odi madena:

“Uqa silail oso qee mel.

Dana oso uqa conadec uhulec je oso qee dah melein,” ena. *(Aisaia 53.9)*

<sup>23</sup> Age uqa cewudec je madoin saen euna uqa cewudec jena qee wadacduadel. Uqa culumen dain doc sogoecca gahidon saen euna uqa dana me qee wadacadijan ec je oso qee madel. Euqa uqa ugadodoc cebac biley cunug Anut ebenna men, Anut uqa Tutuc Gesilec. <sup>24</sup> Krais uqa ege silail cunugnu hibemdumeb ititom kobil himec toodumeb cebac biley eunu gale don. Eunu uqa ugadodoc egena silail dewegna gahidumei na babalecna cal men. Age uqa deweg tudoin, odocob ugana culumen dain doc sogoeccana uqa ege haun me migen.

<sup>25</sup> Age wele sipsipwe agena jic culein. Qilaqa age sipsip ceseli agena cofadecca hoginawe age dana uqa age cofadena. Uqa age dolonoga cofdona, age uqaca ceseli hoin.

### 3

#### *Aidagail gemugailcanu je*

<sup>1-2</sup> Eu odiwe aidagail age gemugail leih age Anutna je qee toodogina eu age aidagail agena jejenege toodu odocca agena coboc cataniecca eu fimeig aidagail age je oso qee madecna gemugail age agena silailnu tului falicdumeig wawaga meleigiannu age gemugailnu jogoi jejenege toodu odoigale. <sup>3</sup> Euqa age dewenega ganac dih bala cain faldowain. Caja leih age gosiniga galeca bahic luc cubusegina, leih age gold balaca faldogina, leih age lotoc me bahic taqegina. Age odi cain. <sup>4</sup> Euqa age wawaga dunuh bala faldocobilfi eu me bahic. Bala faldoc eu calua mewce qee, eu wawaga susumulca, eu wawaga malolca biley. Kobil eu Anut amegna me bahic. <sup>5-6</sup> Ge, caja gun age wele biley eu Sera cinigwe age agena cebac biley Anut ebenna mudimeig age ceteh me bahic Anut adigian ec maden eu ocnu sumudi biley. Caja gun eundec age kobil me bahic eu bala faloloig, odocob age gemugail jejenege toodoloig. Sera uqa Ebraham jejeg toodoloi, odimei Ebraham madoloi, “Ijana meca,” doloi. Age qila ceteh osonu qee cucuiifeig, kobil tutuc odifeig, age Sera ategul bileyina.

<sup>7</sup> Eu odiwe age gemugailha agena inondoc cahacdoiaunnu age cisdock me umeig age aidagail gami me bileyigale. Ge, cajaha Anut uqa eeladec uum adeceb cebac biley catanec oqagan ec age dogina. Cajaha age Anut huqanehul. Euga caja dewenega eu gagadicca bahic qee, eu dana dewenega wooldoc qee. Eunu age aidagailnu kobil mena odadeiga.

#### *Ege dana cajaca cunug kobil mena odadeqan*

<sup>8</sup> Qila ija je i edi qee mudigen odigina. Age cunug cisdock osolca wawaga osolca bileyigale. Age osona culumen sol meigale. Age wawaga meleec cotogal cunugnu nalunuga meigale. Age osunu wawaga qoiale. Age cotogailnu jogoi coboigale. <sup>9</sup> Anut uqa age ugana eeldoc oqagannu gale don. Eunu uqa age kobil cunug eu odoqagannu utaaden. Eunu dana age kobil me qeena odadecebifli age ameg me qeena cain wadacduadowain. Odocob dana age je me qee maadecebifli age je me qee cain wadacduadowain. Eu odi qee, age Anutna eladec mugumuga oqagannu age Anut uqa dana eu eeladijanu inondoigale.

<sup>10-12</sup> Ge, Anutna jaqec je odi madena:

“Tibud uqa ameg eu dana cajaca ititom eundec feiadena.

Odimei uqa gaid age inondoginanu dahig cehena.

Euga Tibud uqa dana qisol mec kobil odogina eunu cagucag tawena.

Eunu dana oso uqa ugana biley me bahic caligianu waug nijcecebfli,

uqa saen me bahic figianu cisdufeい,

uqa je me qee cain madeiaun,

uqa uhulec je madecha hibemdoia.

Uqa qisol mec kobil cunug hibemdumei kobil tutuc odeiale.

Uqa malol biley walimei eu toodoiale,” ena.

*(Buk Song 34.12-16)*

#### *Ege kobil me odoqonanu dain gec gahidoqan*

<sup>13-17</sup> Age tutuc odocnu megameg mifeig in uqa age me qee odadigian? Euqa Anut gale donafi age tutuc odoc eunu culumen gahidoqagan eu me. Eunu age kobil tutuc odimeig eunu culumen gahidufeig age ceeleiga! Euqa age cahulec odoc eunu culumen gahidoqagan eu me qee. Anut uqa dana age, age Kraisna kobil me toodogina eunu je

me qee maaadi bulamadifeig age je me qee maadec eunu majanaga adigianu gale dona. Eunu

"age dananu cain cucuiadowain, age cain jaen aqeaun," en. (Aisaia 8.12)  
Euqa age Anut amegna wawaga tutuc biliale. Odocob age wawagana Krais cuhanuc agena Tibud mudecebil bilia. Dana age ceteh me i age ocnu susumudi bileginanu, gug doqagannu sisiladecebifli age saen gaid je wadacduadoqagannu saciadoiga. Odocob age wawaga jocosaiga dana agenu lal qu bibileig je wadacdu maadeiga.

#### *Krais uqa egena silail cagasigecnu cal mimei haun cajen*

<sup>18</sup> Age Kraisnu cisdoga, uqa dana ititom. Euqa uqa dana cajaca ititom qee cunug agena cudun umei hehuladen. Odocob uqa dana cajaca agena silailnu cagasiadimei ehadimei Anutca lecnu cal men. Krais uqa mahana cocobi dana bilen. Odocob dana age deweg tudocobil cal men. Uqa saen osolna dih cal men, uqa haun qee cal meiaun. Euqa Anut uqa tulidocob haun cajen. Qila uqa sao jobon kis deweg on bilia. <sup>19</sup> Odimei uqa kis deweg bibilei nuimei kis\* age gihacdoc jona bilingina eu me je qasali maaden. <sup>20</sup> Kis eu age wele Noa uqana saen euna Anutna je tefacdoein. Noa uqana saen euna qisol mec kobil ben wasecnu odon qa Anut uqa dana cajaca ameg mahuc qee wadacadel. Uqa susumudi lili Noa uqa uqana wag ben mudi hedon. Odocob sihul nag oso, eu dana cajaca 8-pela himec, wag ben tobimeig dunuhlein. Odocob wa sil ben cajimei wag eu u suldocob basai cobon. Odocob Anut uqa dana cajaca 8-pela eu wana caahahaaden. <sup>21</sup> Anut uqa qila wa joadecna caahahaadena eu odiwe uqa dana cajaca 8-pela eu wana caahahaaden. Eunu wa eu wa joadec qila caahahaadena eu hahunwe. Wa joadec eu age dewenega gegehin cusi qelecnu qee nijel. Wa joadec eu age Anut amegna cataniec biluqagan ec qeel qeti madein. Anut uqa Jisas Krais tulidocob cajen eunu uqa wa joadecna caahahaadecnu ihoc. <sup>22</sup> Jisas Krais uqa sao jobon ten, Anut eben meulana isec bilina. Odocob ensel cunugca, kis gagadic odoc cunugca, ceteh cunug gagadic odocca eu age Jisas Krais bisalu bilingina.

## 4

#### *Ege wawige hilahna kobil culeqan*

<sup>1</sup> Krais uqa dewegna dain sogoecca gahidon. Odocob oso uqa dewegna dain sogoecca gahidon eu uqa silailna kobil eu wele culen. Eunu ageha jic euna dih uqa cisdonwe age cisdoc eundec gagadicca heweiga. <sup>2</sup> Ge, gug eunu qila saen ina maha ina bielecnu age dewenegana bibileig age dana agena gale adec me qee dana odogina eundecna Cain biluwain. Age Anut gale docna bileyigale. <sup>3</sup> Ge, wele age haiden dana kobil me qee odocnu gale ben adoloi euna ihoc bileyin. Agena biley eu wal kobil majanagaca qeeca, eu gale adec me qeeca, eu ceu jecelbil dalul aqeqca, eu ja qoqoig dana age cajaca njiegina euca, eu kadan tibud cuha fecca. <sup>4</sup> Qila age haiden dana agena kobil me qee cunug odogina eundec qee gabana decebil odoginanu haiden filicitadeginu, eunu age deweneganu je me qee maadegina. <sup>5</sup> Euqa Gesiladec Ben uqa dana cajaca cebac bilinginaca dana cajaca cal mein eundecca gesiladigiannu saciadon bilia. Eunu haiden dana age Gesiladec Ben eu uqa amegna tawimeig age ege eetanu kobil me qee odom ec madoqagan. <sup>6</sup> Ge, gug inu Krais uqa dana cajaca cal mein euha me je qasali maaden.\* Anut uqa dewenegana gesiladeceb age danawe cal mein euqa age kisna Anutwe cebac biluqagannu me je qasali maaden.

#### *Ege bagol ige Anut igen euna me odeejan*

<sup>7</sup> Ceteteh cunug qee miigliannu gadac saen eu wele cemenug nijia. Eunu age du-managanu cisdru cuhadumeig fogo adeiale. Odimeig gaidgaid inondoiga. <sup>8</sup> Age wawaga meleec cotogailnu nalunuga mifeig age agena silail matinu dahiniga celigian. Odocob age cotogailnu nalunuga mecen kobil eu kobil leih cunug wooladec. Eunu nalunuga mecen eu gagadicca heweigale. <sup>9</sup> Age cotogail agena loo jona hocobil bilingina eu age loo adegina eunu Cain wawaga me qee meiaun. Age loo adimeig cofadi cuhaadeigale. <sup>10</sup> Age cunug cabi ocnu dumanaga adec filfil Anut adeceeb oin. Eunu dumanaga adec euna age cotogail cesuladecnu cabi oiga. Kobil euna age Anutna dumanaga adec filfil ila mecen

\* **3:19:** Grik je doc dana leih age kis eu dana cajaca age Noana saenna cal mein eu age dolonoga ec cisdogina. Euqa cisdoci culumen osoca. Anutna jaqcje cunugna "kis" je eu dana cajacanu qee madel, eu buga me qeenu himec madena. Odimeig doc dana leih age kis eu ensel me qee age Anutna je hibemdon ec cisdogina. Juda age Anut uqa Noana saenna kis me qee eu gihacadan eunu wawaga meleen. Euqa cisdoci melefli Noana saenna ensel age danawee caja ocbil ageca njiein. Odocob ha Jisas uqa saen osona ensel me je qee qasali maadel. \* **4:6:** Grik je i gug lecisia nijia. Falicdoc je oso eu odi, "Krais uqa dana cajaca cal mein euha qee cal mec saenna me je qasali maaden." Falicdoc je oso eu 3.19 toodona eu odi, "Krais uqa dana cajaca cal mein euha cal mec cudunna me je qasali maaden."

cabi dana me biluqagan. <sup>11</sup> Oso uqa Anutna je madecnu duman uteceb on uqa Anutna je tutuc madigian. Oso uqa cesuladecnu duman uteceb on uqa dana cajaca cesuladecnu cabi eu uqa Anut gagadic odoc uten euna cabi ugian. Eunu dana age ege ceteteh cunug odoqona ec fimeig age Jisas Krais umna Anut binan suluqagannu kobil eu odoigale. Uqa binan fulacdocca, uqa gagadic odocca gaidgaid biliale. Mele.

*Ege Krais dain sogoecca gahidonwe odi dain sogoecca gahidoqona eunu ceeloqale*

<sup>12</sup> O wawige meleec cotiel ija nalunuga migina, age temadec jaca ageca hocob eunu Cain filicuwain. Temadec eundec ageca hocob eu ceteh fil oso bahic ec Cain cisdowain. <sup>13</sup> Temadec euna age Krais uqa dain sogoecca gahidonwe ageha Kraisca osoben dain sogoecca gahidogina, eunu age ceeleigale. Odocob hibna Krais uqa gagadic odoc fulacdocca camasac migian saen euna age wawaga me bahic bieleeb gehca ceeloqagan. <sup>14</sup> Kis gagadic odoc fulacdocca eu Anutna Kis eu ageca bilina. Odocob age Krais ijan heweginna. Eunu dana age eunu je me qee maaidecebifli age cois ceeloqagan. <sup>15</sup> Euqa gadgad age gemona dana oso uqa dana qagadocob cal menafo, oso heje onafo, oso cahuldonaf, oso dana leih agena cetehnu gugca mecieei cobonafo eunu ameg umei sogoeiaunnu. <sup>16</sup> Euqa age eundec oso uqa Kristen, eunu sogoifei uqa Cain majag doiaun qa Kristen ijan euna uqa Anut binan suliale.

<sup>17</sup> Ge, gesilgec sanan mecnu saen wele dodoldona. Odocob Anut uqana dana cajaca eu age casac gesiladigian. Anutna gesiladec eu egeca sanan mecebifli dana cajaca age Anutna me je eunu wawaga qee meleena eunu adi odigian? <sup>18</sup> Odocob Anutna jaqec je odi madena:

“Dana ititom eundec cahahaadecnu cabi bahicfi,  
dana age Anut hibemduweig silail kobil odogina eu agenu qa adi tawoqagan?” ena.  
(*Sindaun 11.31*)

<sup>19</sup> Eunu dana age Anutna gale docna sogoeinga eundec age agena cebac bielec Anut ebenna mimeig tutuc dih coboigale. Ge, Anut uqa ege ifani migen, odocob uqa gaid ege me bahic cofgena.

## 5

*Tamanec cofadec age Anutna dana cajaca cofadi cuhadoigale*

<sup>1</sup> Qila ija tamanec cofadec matu odi maadigennu odigina. Ijaha ageca osoben tamanec cofadec. Odocob ija amigulna Krais culumen dain doc sogoech fem. Odocob ijaha age gami osobenca gagadic odoc fulacdocca hibna camasac migian eu oqan. Eunu cofadec age cabi odi oqagannu tuliadigina. <sup>2</sup> Age Anutna dana cajaca cofadi cuhadoigale, age age ebenegana sipsipwe bileyina. Age meen qaig ocnu dih cabi i Cain Owain. Odocob age cabi i oqagannu dana leih agena gale adecna toodumeig Cain odowain. Euqa age Anutna cisdocktoodu cabi i oqagannu gale adeiale. Age cabi i ocnu megameg mimeig cabi u cuhadoigale. <sup>3</sup> Age dana ben cinigwe bibili biley Anutna dana cajaca Anut uqa age ebenegana men eu Cain Cilehadowain. Euqa age kobil me odadoqagan, odocob age dana cajaca jic ihacadecbil tooadoqagan. <sup>4</sup> Age odi odocobilfli sipsip cofadec meca uqa camasac caleceb saen euna age King Katakat gagadic odoc fulacdocca dana cajaca ititom oqagan eu ageha oqagan. King Katakat eu ameg me bahic, eu qee qee meiaun.

*Ege egedodoc Anut ebenna meqan*

<sup>5</sup> Eu odiwe dana haun ha age tamanec cofadec matu bisalu bileyigale. Ge, Anutna jaqec je odi madena:

“Anut uqa dana age binanige suli oqan egina eundec hewadeceb nag megina.

Euqa dana wawaga lal qu jogoi cobogina eundec uqa eeladec uum adena,” ena.  
(*Sindaun 3.34*)

Eunu age cunug agedodoc jogoeckobil umeig cotogail bisalu bileyigale. <sup>6</sup> Anut uqadodoc uqana saen mena age u suladecib ohis toqagannu gale dona. Eunu agedodoc agena gale adec eu Cilehdoigale. Odimeig Anut eben gagadic odocca bisalu bileyigale. <sup>7</sup> Anut uqa agena culumen dain adec sogoecca cunug gahidogina ec dona. Odocob uqa me cofadena. Eunu age agena culumen dain adec sogoecca cunug eu uqa ebenna meigale.

<sup>8</sup> Agena cad, Seten, uqa laion osowe gehca euii taliladi cobona. Uqa dana leih aqi jiggiani waladena. Eunu age dumanaga cofdu cuhadoigale. Age meciei cuhadoigale.

<sup>9</sup> Age wawaga meleecna duui tawimeig teidu wooldoiga. Ge, age dogina, age wawaga meleec cotogail mahamaha cunugna bileyina ageha culumen dain adec sogoecca eundec gahidogina eu odiwe age gahidogina. <sup>10</sup> Anut uqa eelgec uum igec cunug uqana gug. Uqa age Kraisca gabadeceb age uqana gagadic odoc fulacdocca oqagannu utaaden. Gagadic odoc fulacdocca eu gaid biligian. Age culumen dain adec sogoecca saen gothicna

dih gahidoqagan. Odocob hibna Anut uqadodoc age haun me madigian. Odimei uqa me madeceb tatawebil gagadicca biluqagannu hehadigian.<sup>11</sup> Anut uqa gagadic odoc euca gaidgaid biliale! Mele.

*Cit qoc feele adec*

<sup>12</sup> Sailas ebenna ija je gothic i jaqidigina. Uqa ege wawige meleec cotige bahic ec cisdugina. Jaqec je ina ija kobil i Anut uqa dana cajaca cunug odadena eu uqana uum igec bahic ec cesusaadi maadigina. Anutna eelgec uum igec i mele bahic ec maadigina, age euna gagadicca taweigale.

<sup>13</sup> Tamanec uqa Babilon<sup>\*</sup> bilia euha Anut uqa wele nesili cedaden eu age feele adec sulduadegina. Odocob Mak, ija melami, uqaha feele adec sulduadena.<sup>14</sup> Age osolosol cunug wawaga meleec cotogail cotec nalug mecna cotdocobdocobeigale.

Cunug age Kraisca gabanadec bilegina eu malol biley ageca biliale.

---

\* **5:13:** Saen euna Rom age Anutna dana cajaca aqeceil cal mein eu odiwe Babilon age wele bahic odi odooin. Eunu Pita uqa Babilon ec maden, euqa uqa je hahun oso maden. Dana age je hahun uqana gug eu Rom ec cisdogina.

## **Pita Uqa Jaqec Je Lecisdoc Anutna Dana Cajaca Jaqiaden Aqunec Je**

Jaqec je i ugana gug eu Kristen cunug age uhulec iwaladec dana leih agena je dah mimeig agena wal kobil majanagaca qee eu toodu odowainnu agena je cain dah mowain (eu 2.1-2). Kristen age mele je aposel adein eu hewi daugdoqagan. Age kobil euna Anutca, Jisas Krais Tibudca du cuhadoqagan. Aposel age amagana Jisas fein, odocobil Jisas iwaladeceb doin.

Jaqec je ina je ben osoha nijia. Dana leih age Jisas uqa qee ceseli hoiaun ec madein (eu 3.3-4). Euqa jaqec je i Jisas uqa ceseli hugian ec madena. Mele, uqa mahuc qee ceseli hoiaun, euqa ugana gug eu odi. Anut uqa dana oso fadaleiaunnu gale dona. Uqa dana cajaca cunug age agena silailnu tului falicdoqagannu gale dona. Eunu uqa camuhulaadi saen cecelac age silailnu tului falicdocnu sumadena (eu 3.9).

### *Je Dunuhnu Dado Mec*

1. Aqunec je (1.1-2)
2. Age Kristen dana cajaca ben caleigale (1.3-11)
  - A. Anutna gagadic odoc eu Anutna kobilna cobocnu cesulgena (1.3-4)
  - B. Age agena wawaga meleec eu Anutna kobil me cunug tubdoigale (1.5-7)
  - C. Age Anutna kobil eu cunug ocobilfi agena Anutnu cabi eu aig mati bahic qugian (1.8-11)
3. Pita uqa eetanu jaqiadena eunu sildiadena (1.12-21)
  - A. Pita uqa agena cisdocko duadigiannu me je haun maadena (1.12-15)
  - B. Pita uquadodoc ameggul Jisas Krais ugana gagadic odoc fulacdocca fen (1.16-21)
4. Pita uqa uhulec iwaladec dananu ulauladena (dac 2)
  - A. Uhulec iwaladec dana age Kristen gemona caloqagan (2.1-3a)
  - B. Anut uqa uhulec iwaladec dana eu gesiladigian (2.3b-9)
  - C. Pita uqa uhulec iwaladec dana age dumangananu madena (2.10-22)
5. Jisas Krais ugana ceseli hoc (3.1-16)
  - A. Pita uqa eetanu jaqiadena ec haun madena (3.1-2)
  - B. Deel cit qocna dana leih age lelanec je madegina eundec caloqagan (3.1-2)
  - C. Jisas Krais uqa ceseli hugian eu mele bahic (3.8-10)
  - D. Krais ceseli hugian eunu age gun kobilna cobimeig Anutna kobil cunug toodu odoigale (3.11-16)
6. Cit qoc je (3.17-18)

<sup>1</sup> Ija Saimon Pita, ija Jisas Kraisna cabi dana aposelca. Ija dana cajaca age Jisas Kraisnu wawaga meleena eu jaqidigina. Jisas Krais uqa eguna Anut, uqa eguna Cahahagec. Jisas Krais uqa ititom. Age uqanu wawaga meleec wele oin. Eunu agena wawaga meleecca eguna wawige meleecca eu ihocihoc. <sup>2</sup> Age Anut Jisas eguna Tibudca eunu dogina. Age alenu dudu cuhadodogin ale eelgec uum igec malol bilecca haunhaun adesiale.

### *Ege Anutna dana cajaca bilecnu nesili cedigen*

<sup>3</sup> Jisas Krais uqa Anut, uqa gagadic odocca. Uqa culgeceb uqanu du cuhadom. Uqa binanca bahic, uqa gagadic meca bahic euna ege ugana bilitoqannu utagen. Odocob uqana gagadic odoc eu cesulgeceb uqa ceteteh cunug eu eguna cebac bilec gagadic mecnuna, ege Anutna kobilna cobocnuca ihoc igen. <sup>4</sup> Jic euna uqa ceteh ben bahic, me bahicca igigian ec je hahun maden eu igen. Euqa Krais uqa ceteh me bahic i igen, odocob uqa euna cesulgeceb wawige cajecnu kobil eu ege dana cajaca mahana biluquna me qee migina eu felacudigeceb busalom. Odocob ege Anutna cebac bilecca, uqa dumanca om.

<sup>5</sup> Gug inu dih age odi odoiga. Age wawaga meleena. Odocob age tutuc cobocnu cabi gagadic bahic umeig agena wawaga meleec tubdoiga. Odocob age Anutna cisdocko silec ocnu cabi gagadic bahic oiga. Anutna cisdocko silec eu age adi cobocnu dado madigian. Odocob Anutna cisdocko silec eu agena tutuc coboc tubdoiga. <sup>6</sup> Odocob age dumanganaga me cofdocko cabi gagadic bahic umeig eu Anutna cisdocko silec tubdoiga. Odocob age wawaga duueccca tawecnu cabi gagadic bahic oiga. Wawaga duueccca tawec eu culmena dain adec sogoecca gahidocnu cesuladigian. Odocob age wawaga duueccca tawec eu dumanganaga me cofdocko tubdoiga. Odocob age Anutna kobilna cobocnu cabi gagadic bahic umeig eu age wawaga duueccca tawec tubdoiga. <sup>7</sup> Odocob age wawaga meleec cotogailnu wawaga

qocnu cabi gagadic bahic umeig Anutna kobolna coboc tubdoiga. Odocob age wawaga meleec cotogailnu nalunuga mecnu cabi gagadic bahic umeig wawaga qoc tubdoiga.

<sup>8</sup> Age Jisas Krais egena Tibudnu wele doin. Age kobil eundec cunug ocobilfi eu ageca gagadic calecebfli agena Jisas Kraisnu doc eu gauc bielecnu ihoc qee. Eu aig mati bahic qugian. <sup>9</sup> Ge, dana uqa kobil eundecca qee, uqa ceteh onoca bilia fecnui ihoc qee, uqa dana ameg galuc mec cinigwe. Uqa Anut uqa uqana silail uqa wele moloi eu cagasiteceb cataniec biligen ec dahig celen. <sup>10</sup> Ija wawige meleec cotiel, Anut uqa age resili cedadimeci age uqana dana cajaca bielecnu utaden. Eunu age agena cobocna age Anutna dana cajaca ihacecnui kobil eundec cunug cabi gagadic oiga. Ge, age odi odifeig agena wawaga meleec toni qocnu ihoc qee. <sup>11</sup> Eunu age odi odocobilfi Jisas Krais, egena Tibud, egena Cahahagec uqa geh bahic cesuladeceb age uqana cul dunuh loqagan. Cul euna Jisas Krais uqa king bileyeb catanena.

<sup>12</sup> Eu mele, age ceteh i cunug wele doin. Age mele je i wele oin, odocob age euna gagadic taweginia. Euqa age kobil eundecnu dahaniga celecadainnu ija kobil eundecnu agena cisdoc gaid fogo duadigen. <sup>13-14</sup> Ija dugina, nag odi ija deweni i cilugen. Egena Tibud Jisas Krais ceteh inu je hahun maten. Eunu saen cunugna ija deweni ina bilingina ija agena cisdoc fogo duadigennu haun maadigen eu me bahic ec cisdugina. <sup>15</sup> Eunu ija ceteh inu maadecnu cabi gagadic ugina. Odocob hibna saen ija wele cal mecemin age je i saen cunugna ceteh inu haun ihoc cisdoqagan.

*Ege aposel Krais uqana gagadic odoc fulacdochca fom*

<sup>16</sup> Ege wele egena Tibud Jisas Krais uqa gagadic odocca, odocob uqa ceseli hugian ec maadocomun doin. Euqa ege Jisas Kraisnu je eu maadocomun doin saen euna ege dodo gauc dana agena cisdocnadeec toodoo qee maadolum. Egedodoc amigegul Jisas Krais uqana gagadic odoc fulacdochca fom.\* <sup>17</sup> Ege uqaca aluh gunna ono tatawoqon saen Anut Memige uqa binan suldumei gagadic odoc fulacdochca uten. Odimei uqa gagadic odoc fulacdochca uutei Anut uqa king binan meca bahic uqa sao jobondes maden:

“Eu ija melami,

ija uqanu nalug migina,

ija uqanu wawi me nijia,” en.

*(Matju 17.5; Mak 9.7; Luk 9.35)*

<sup>18</sup> Ege Anut jejeg eu sao jobondes cacalen dah mom. Ge, saen euna ege uqaca aluh gunna tatawi dom. <sup>19</sup> Odocob ege je hahun madec dana wele bielein agena jenu gagadic bahic wawige meleecnu ihoc. Agena je eu adi Jisas Kraisnu wawaga meleecnu, adi cobocnuca cesuladene. Agena je eu gowoc cudun tuna gogowi bilina cinigwe. Eu gogowi bibilen li walag dadaneb malaqa boei† age wawaga dunuh wasigian. Eunu ageha agena je gagadicca hewifeig eu me bahic.

<sup>20-21</sup> Euqa age ceteh matu inu casac docnu doiga. Je hahun madec dana oso uqa dana agena gale adecna je hahun qee madel. Euqa Kis Gun uqa dana tuliadec age je Anut aden eu madein. Je hahun madec dana agena je eu Anutna jaqc je nijia. Euqa ege dana agena cisdoc himec toodumeb je eu uqana gug sildiadecnu ihoc qee.

## 2

*Uhulec iwaladec dana*

*(Jud 4-13)*

<sup>1</sup> Eu mele, uhulec je hahun madec dana leih wele Isrel dana cajaca gemona calein. Eu odiwe uhulec iwaladec dana ageha gemona caloqagan. Age jahunimeig uhulec iwaladec je filfil ahoqagan. Uhulec iwaladec je eu Anutna je qee toodoiaun. Dana age uhulec iwaladec je toodoqagaqa eu age fadaloqagan. Odocob uhulec iwaladec dana age Tibud uqa ceseli fajaden eu qee sasac qoqagan. Eunu Anut uqa mahuc bahic fadaladec age moqagan. <sup>2</sup> Odocob dana mati age agena wal kobil majanagaca qee toodoo odoqagan. Eunu age u odi odocobil dana cajaca age mele cobocnu jic eunu je me qee madoqagan. <sup>3</sup> Odocob dana eu age ban falec dana bahic eunu age uhulec je mati agena qaig ceteteh diduadoqagannu madoqagan. Euqa wele bahic Anut dana eundec gesiladijanu deel saciaron bilia. Odocob uqa fadaladigian. Aria, agena fadaladec qee us nijina. Tu gegeldon sumadi bilina.

<sup>4</sup> Age dogina, wele ensel leih age silail mein. Odocob Anut uqa ensel eundec qee culadel qa qeladec oloqanihna lein. Ono age mama helo tuca onoca bahic Anut saciadiaden euna gihacaden bileyeb. Euna age Gesiladec Deel Bennu sumudi bileyeb. <sup>5</sup> Odocob ageha dogina, wele dana cajaca age wa sil ben saona qee nec mahana bielein eu age Anutna

\* **1:16:** Je i Jisas deweg ibuldon eunu madena. Matju 17.1-13; Mak 9.2-13; Luk 9.28-36 eu feiga. † **1:19:** Malaqa boei eu Jisas Krais. Jahunec Camasac Muden Je 22.16 eu feiga.

kobolna qee coboin. Anut uqa dana cajaca eundec qee culadel qa uqa odocob wa sil ben nimei dana cajaca eundec fadaladen. Euqa Noa uqa ititom kobilnu je maaden. Odocob Anut uqa Noaca dana cajaca 7-pelaca cofadeceb me bilein.<sup>6</sup> Odocob ageha dogina, Anut uqa madeceb Sodom Gomoraca jobon fadalesin. Uqa jana cijaleceb comis himec qahesin. Uqa hahun ihacadec biliqanu odi odon. Odocob dana cajaca age hibna caloqagan eu age Sodom Gomoraca ale Anutna kobilna qee cobocobil uqa odi fadalalen ec cisoqagan. Odocob dana cajaca ageha Anutna kobilna qee cobocobilf Anut uqa age fadaladigian eu odi uqa Sodom Gomoraca fadalalen ec cisoqagan.<sup>7</sup> Odocob ageha dogina, Lot uqa dana ititom uqa Sodom bilen. Uqa Sodom silail dana agena wal kobil majanagaca qee eu fimei uqa waug culumen ben don. Odocob Anut uqa Lot qee fadadol qa uqa caahahadon.<sup>8</sup> Ge, dana waug ititom eu uqa Sodom dana gemona bibilei deel cunugna uqa agena silail kobil fifi dudu. Odocob age Anutna loo je tefacdoen eunu uqa waug geh dain don.<sup>9</sup> Aria, ceteteh i cunug Tibud odon ec dogina. Eunu age dogina, dana cajaca age Anutna kobilna cobogina eundec temadec ageca caleceb Tibud uqa temadec eunadec caahaaedecu dona. Odocob Tibud uqa silail dana agena me qee odoc wele don. Odimei uqa agena ameg me qee wadacadec cofdudu li agena gesiladecnu deel gadacna caligianu dona.<sup>10</sup> Dana eundec leih age ameg me qee bahic oqagan. Eu age golanaga me qeenu silileceb kobil gegehinca odogina. Odimeig age Tibud uqa agena ilo biliqanu qee gale adena.

Age deboecca, age ija didih ii cobogina. Eunu age ensel fulacdoc gagadic odocca sao jobon biledina eu agenu je me qee madecnu qee cucuieingina.<sup>11</sup> Ensel eu age gagadic odocca bahic age ensel leih silail mein eu wooladegina. Euqa ensel eu age ensel silail mein qee cewadegina, odimeig age Tibud amegna agenu je me qee gesiladi madegina.

<sup>12</sup> Euqa dana eu age dool cus cinigwe. Dool cus age qee cisdogina qa age dewenega gale adec himec toodoo odogina. Dool cus eu dana age cedadimeig qagaadoqagannu himec anagail basadein. Eu odiwe uhulec iwaladec dana eu age qee cisdogina. Age ceteh agena gugnu qee dogina eunu je me qee mamadi qesaldogina. Eunu age dool cuswe fadaloqagan.<sup>13</sup> Age kobil me qee odooin. Eunu age agena ameg umeig sogooqagan. Age cahinec sab wainca gehca jegina eu kobil me bahic ec cisdogina. Age kobil gegehinca wal kobilca oodogin age age gami sab jegina. Eunu age Anutna dana cajaca odadecebil age gegehinca megina. Eu age age majanaga hewadegina. Euga silail dana eundec age uhulec kobil odogina eunu ceelegina.<sup>14</sup> Age gaid caja feciadimeig amaga qocob wal kobil eu me ec cisdogina. Age amaga eu silail kobil nenehdogina eu culecwe qee. Age dana wawaga meleec gagadicca qee eundec faninadimeig silail moqagannu diadegina. Age culunuga eu wele ban falecnu kobil iwaldooin. Tibud uqa dana eundec geladigian!<sup>15</sup> Age jic tutuc culimeig jic ceja qoin. Age jic Belam on eu toodooin. Belam, uqa Bio melah, uqa me qee odocna meen qaig ugiannu gawen.<sup>16</sup> Odocob Tibud uqa ugana silailnu galac muden. Tibud uqa odocob ugana cesel eu jejegca qee qa dana jejegca mamei je madon. Odimei Tibud uqa je hahun madec dana eu gad kobil odocnu cahacdon.

<sup>17</sup> Uhulec iwaladec dana eu age wa mahana hunecebile galalena cinigwe. Age hut fufu ben hu fudocob nuina cinigwe. Eunu Anut uqa agena cudun eu heel tu kaudoc bahic saciaduaden nijia.<sup>18</sup> Ge, dana eu age deboi gad je caunca qee madegina. Age mamadeig dana leih faninadecebile golanaga cajeceb age wal kobil majanagaca qee filfil odocnu odadegina. Odimeig age kobil euna dana age qila bahic haiden agena jic ceja qoc culegina eu diadecnu cabi ocobil age uhulec iwaladec dana beli tooadegina.<sup>19</sup> Ceteh oso dana wooldocobfi dana eu ceteh eu ugana cabi dana bilina. Eunu uhulec iwaladec dana eu age maadegina, "Age Anutna loo je toodocnu qee nijel. Age agena gale adec toodocnu ihoc," adegina. Euqa age odi mamadeig agedodoc age fadalecnu kobilna cabi dana biledina.<sup>20</sup> Ge, dana age egena Tibud, egena Cahahagec Jisas Kraisnu dumeig age mahanaadec wal kobil culculdi busalein eu age kobil me qee haun fagadecelb wooladecebif agena biley haun eu me qee bahic migian. Agena biley haun eu age wele hahawan bilein eu wooldona.<sup>21</sup> Ge, qila age Anut ititom mudecnu jic inu dogina qa age Anutna loo je gun Anutna sos age dana maadecebile oin eu age hibemdooin. Eunu age adi Anut uqa dana ititom mudina ec doin qa age qee docwe moubmi eu me bahic nijoub.<sup>22</sup> Ceteh ageca calen eu odi dado madec je oso odi madena:

"Qa uqa fojimei haun ceseli li ugana fojoc jena," ena.

(Sindaun 26.11)

Odocob dado madec je osoha eu odi madena, "Age ho wa joudecebile uqa nui haun oligna wahol nona," ena.

<sup>1</sup> O ijana danah bahic, jaqec je i eu jaqec lecisdock qila ija age jaqidigina. Jaqec je lecis ina ija age je inu haun cисdoqagannu agena cисdoc tuliduadigina. <sup>2</sup> Ija je inu haun maadiginana age Anutna je hahun madec dana age wele ceteh hibna caligiannu dana cajaca maaden eunu haun cисdoqagannu maadigina. Odocob age Tibud eguna Cahahagec uqana loo je magen eunuha cисdoqagannu maadigina. Tibud uqa uqana aposel suladeceb aqeca limeig aposel conogana Tibudna loo je eu dah mein.

<sup>3</sup> Casac age ceteh ben osonu du cuhadoiga, eu odi. Deel cit qocna dana leih age lelanec je madegina eundec caloqagan. Odimeig age wawagana gale adec me qee eu toodoqagan. Age udoc je odi <sup>4</sup> madoqagan, "Uqa ceseli hugen ec madenfo? Uqa ai? Uqa qee ceseli hoiaun. Ge, ege jajanigeil age wele cal meinnaadec leceb qila ceteteh cunug eu gaid odi dih nijina eu odiwe maha i ifanen saennadec leceb qila ceteteh cunug eu gaid nijina!" oqagan. <sup>5</sup> Age ceteh nijianu cисdumeig doiga ec qee adel. Ceteh eu odi. Wele bahic Anut je madeceb sao calen. Odimei uqa wa umei maha mudeceb wa gemona calen. <sup>6</sup> Odocob hibna Anut je haun madeceb wa sil ben caleceb maha eu cunug wa jebudcon. Odocob maha hilah eu fadalen. <sup>7</sup> Euqa qila Anutna je euha taweia, eu odi. Sao mahaca qila bilesina eu jana cijigiannu saciadon nijia ec madena. Sao mahaca ale Anutna Gesiladec Deel Ben caligiannu sumudi bilesina. Deel euna dana cajaca age Anutna kobilna qee cobogina eu gesiladeceb fadaloqagan.

<sup>8</sup> Euqa ijana danah bahic, age ceteh osol inu cain dahiniga celeiaun! Tibud amegna deel osol eu odi cabi gel 1,000we, odocob cabi gel 1,000 eu odi deel osolwe. <sup>9</sup> Tibud uqa odigiannu je hahun maden eu qee daleena eu odiwe leih age uqa daleena ec cисdogina. Euqa uqa dana oso cain fadaleiaunnu gale dona qa cunug age silailnu tului falicdoqagannu gale dona. Eunu uqa camuhulaadi saen cecelac age silailnu tului falicdocnu sumadena.

#### *Sao mahaca i ale qee mowasan*

<sup>10</sup> Euqa Tibudna deel eu heje danawe hugian. Odocob deel euna sao uqa geh bahic udududuimej jajana qeligion. Odocob mahaca ceteteh cunug mahana nijadenaca ja cijeceb fadaloqagan. Eu maha cunugca ceteteh cunug Anut maha mudenca camasac bahic caloqagan.\* <sup>11</sup> Aria, cисdoiga. Ceteteh i cunug fadaloqagan. Eunu age dana cajaca adi biloub? Age gun kobilna cobimeig Anutna kobil cunug toodoubda. <sup>12</sup> Age kobil euna cocobi Anutna deel susumudi bileigale. Odimeig age deel eu mahucwe hugianu cabi gagadic oigale. Deel eunu saoca ceteteh cunug saona nijadenaca eu ja ben cijadeceb qee moqagan. Odocob ceteteh cunug Anut maha muden eu ja ben cijadeceb wawa mi qojogoeceil qee moqagan. <sup>13</sup> Euqa Anut uqa je hahun wele maden. Uqa sao haun maha haunca mudigian ec maden. Maha haun euna kobil ititom himec biligian. Eunu ege Anutna je hahun eu aig qugianu susumudi biluquna.

#### *Ege meciij cuhadudu Tibud susumudi biluqale*

<sup>14</sup> Eunu ijana danah bahic, age ceteteh i caligiannu sumudi bilingina. Eunu age susumudi bibileig age Anut amegna tutuc bahic cahuldocca qee biluqagannu cabi gagadic oigale. Odocob age uqaca osoben wawaga malolca bileigale. Odocob Tibudna deelna Anut uqa agena kobil me bahic figian. <sup>15</sup> Egena Tibud uqa eguna silailnu tului falicdocnu sumigina. Age cисdoiga, Tibud uqa ege Cahahagecnu kobil eu odi odona. Anut uqa ege cotige bahic Pol cисdoc silecca uten. Odocob uqaha uqana cисdoc silecca toodumei je eundec age jaqidien. <sup>16</sup> Uqa uqana jaqec je cunugna ceteteh inu gaid madena. Uqana jaqec jena ceteh leih eu docnu cabi bahic, eu dana docca qee age wawaga gagadicca qee taweginna eu age Polna jaqec je sildi cahuldogina, eu odiwe age Anutna jaqec je leihha sildi cahuldogina. Age odi odoginanu agedodoc fadaloqagannu euca hogina.

<sup>17</sup> Eunu ijana danah bahic, age ceteh hib caligiannu doin. Eunu loo je tefacdok dana agena uhulec iwaladec je eu diadeceb agena duuec eunadec tonowainnu agedodocnu meciij cuhadougale. <sup>18</sup> Euqa Jisas Krais uqa eguna Tibud, uqa eguna Cahahagec uqa eelgec uum iegc eu age aden. Odocob age uqanu du cuhadogina. Eunu age eeladec uum adecca uqanu docca cesuladeceb ben mimeig duuec taweigale. Uqa qilaca saensaen cunugca kobil kobilca bilingina. Mele.

---

\* **3:10:** Grik jaqec je hilah leih age odi madein, "Eu maha cunugca ceteteh cunug Anut maha mudenca cijeb qee moqagan."

## Jon Uqa Jaqec Je Osoldoc Jaqiaden Aqunec Je

Jaqec je i uqana gug lecis nijia. Gug oso eu Kristen cunug age Memega Anutca uqa Melah, Jisas Kraisca wawaga osol biluqagannu cesuladena. Gug oso eu Kristen age uhulec je tuna toodu cobimeig agena wawaga osol biley wagalowainnu ulauladena.

Uhulec je tuna eu odi madena, "Ceteteh cunug mahana bileygina eu me qee. Odocob Jisas uqa Anut Melah. Eunu uqa dana bahic caleceb uqa ege dana gami mahana bileyen ihoc qee," ena. Odi mamadi madena, "Dana age cebac biley ocnu gale adena eu age mahana bileyen cain cisdowain. Mahana biley eu ceteh gaue eunu dana age Anutna kobil me toodu odoncnu, age cotogailnu nalunuga mecnua eu qee nijel," ena.

Eunu Jon uqa jaqec je ina Kristen age uhulec je tuna eu cain dah mowain ec madena. Uqa madena, "Jisas uqa dana bahic calen. Odocob dana cajaca age Jisas Kraisnu wawaga meleena eu age Anutnu nalug moqagan, odimeig age Kristen cotogailnu nalunuga moqagan," ena.

### *Je Dunuhnu Dado Mec*

1. Aqunec je: Anut Melah uqa dana calen (1.1-4)
2. Fulacdocna cobocca tuna cobocca (1.5-2.28)
3. Anut melahulca Seten melahulca (3.1-24)
4. Mele jeca uhulec jeca (4.1-6)
5. Ege Anut melahul eunu ege nalug mecebmeceboqale (4.7-21)
6. Egena Jisas Kraisnu wawige meleec eu mahana gagadic odoc wooldugian (5.1-21)

### *Cebac bileyen je camasac men*

<sup>1</sup> Ege cebac bileyen je eunu je qasali madoqona. Cebac bileyen je eu gug qoc saennadec bibili li qila bilina. Cebac bileyen je ege dah mom, odocob ege amigena fom, odocob ege fimeb ebenigena qududom. <sup>2</sup> Cebac bileyen eu camasac meceb ege fom eunu ege mele je qasali madoqona. Ege cebac bileyen catanec eunu je qasali maadoqona. Cebac bileyen catanec eu wele Memige Anutca bilen, odocob eu camasac meceb ege fom. <sup>3</sup> Age ege gami osoben gabandu bileyqannu gale gena. Eunu ceteh eu ege fom, ceteh ege dah momca eunu ageha qasali maadoqona. Odocob egeca Memige Anutca uqa Melah Jisas Kraisca gabandoc biluquna. <sup>4</sup> Egena ceelec eu am bigiannu je i jaqiadoqona.

### *Ege Anutna fulacdocna biluqale*

<sup>5</sup> Anut Melahna je dumeb qasali maadoqona. Uqana je eu odi, Anut uqa fulacdoc, odocob uqana nahag oso tuca qee. <sup>6</sup> Ege odi madoqona, "Ege uqa gami osoben gabandu biluquna," qona ege tuna coboqonafi ege uhulec je madoqona, odocob ege mele je eu qee toodu odoqona. <sup>7</sup> Euqa ege fulacdocna cobifeb eu odi uqa fulacdocna bilinawee ege gabandocobocobimeb biluquna. Odocob uqa Melah, Jisas uqa golac eu egena silail cunug cagasiceb soidoc biluquna.

<sup>8-10</sup> Ege silail oso qee molom oqonafi ege Anutnu uqa uhulec dana ec madoqona, odocob uqana je ege dunuh qee bilina. Ege silailca qee oqonafi eu egdedodoc quadoqona, odocob mele je eu ege dunuh qee bilina. Euqa ege egena silailnu qasali madoqonafi Anut uqa uqana je maden eu tutuc toodu odigian, odocob uqa egena silail cagasigimei egena cahuldoc cunug soidugigian.

## 2

### *Krais uqa egena Cesulgjec*

<sup>1</sup> O ijana mel sim, age silail Cain mowainnu ija je i jaqiadigina. Euqa oso silail mecebfi ege tutuanige oc bilia, uqa Jisas Krais eu dana ititom. Uqa cesulgimei egenu Memige Anut madugian. <sup>2</sup> Krais uquadoc Anut ihandumei uqa euna Anutna gemag bec gondocob egena silail cagasigen. Odocob eu egena silail himec qee cagasigel qa dana cajaca cunug mahana bileyen eu agena silailha cagasiaden.

### *Dana uqa Kraisnu du cuhadona eu uqa Kraisna kobil gaid toodu odona*

<sup>3</sup> Ege Kraisna je gagadic eu toodu odifeb ege Kraisnu du cuhadogona eu mele.

<sup>4</sup> Oso uqa madena, "Ija Kraisnu du cuhadugina," ena qa uqa Kraisna je gagadic tefacdonia eu uqa uhulec dana, odocob mele je eu uqa dunuh qee biley. <sup>5</sup> Euqa oso uqa

Kraisna je toodu odona eu uqana Anutnu nalug mec ihoc len eu mele. Ege jic euna ege Anutca gabandoc biluquna eu mele ec doqona.

<sup>6</sup>Oso uqa madena, "Ija Kraisca gabandoc biluwuna," ena eu Krais cobonwe odi coboiale. <sup>7</sup>O cotiel, ija je gagadic inu jaqidigina eu je gagadic haun qee qa eu je gagadic weledec, eu me je age wele dumeig oin. Je gagadic weledec eu age wele hahawan doin.\* <sup>8</sup>Tu eu qee mena, odocob fulacdoc mele bahic eu wele fulacdona. Eunu je gagadic eu Krais uqana cebac biclecna eu mele ec fein. Odocob je gagadic eu agena cebac biclecna eu mele echa fegina. Euqa je i qila jaqidigina euha je gagadic haun.

<sup>9</sup>Oso uqa madena, "Ija fulacdona biligina," ena qa uqa cotignu gemag beceb sagagdona eu uqa saen euna tuna gaid bilina. <sup>10</sup>Oso uqa cotignu nalug mena eu uqa fulacdona bilina. Odocob fulacdoc euna ceteh oso dana qocob toni qugiannu eu qee bilel. <sup>11</sup>Euqa oso uqa cotignu gemag beceb sagagdona eu uqa tuna bilina. Odocob tu eu ameg galuc men, eunu uqa tuna cocobi ana nuina eu qee dona.

<sup>12</sup>Age ijana mel sim, age Krais ijannu Anut agena silail cagasiaden eunu ija je i jaqidigina.

<sup>13</sup>Age memegail, age dana eu uqa wele gug qoc saenna bibili li qila bilinanu du cuhadogina eunu ija je i jaqidigina.

Age dana haun, age Seten wooldoin eunu ija je i jaqidigina.  
Age ijana mel sim, age Memige Anutca biledgina eunu ija je i jaqidigina.

<sup>14</sup>Age memegail, age dana eu uqa wele gug qoc saenna bibili li qila bilinanu du cuhadogina eunu ija je i jaqidigina.

Age dana haun age gagadicca eunu ija je i jaqidigina. Odocob Anutna je age dunuh bilia, odocob age Seten wooldoin.

#### *Ege mahadanadec kobol gale qee geiaun*

<sup>15-16</sup>Ceteteh cunug mahadanadec eu dewenega gale adecca, eu amaga qocca, eu agena bileyecu deboecca bilia. Ceteteh eundec Memige Anutnadec qee, eu mahadanadec. Eunu age maha ica, ceteteh cunug mahadanadeca cain gale adeiaun. Oso uqa maha inu gale dona eu uqa Memige Anutnu qee nalug mena. <sup>17</sup>Odocob mahaca, uqana ceteteh cunug dana eunu gale adenaca qee mena. Euqa oso uqa Anutna cisdock toodu odona eu cebac bileyecb catanena.

#### *Kraisna cad camasac mein*

<sup>18</sup>Ijana mel sim, qila eu cit qoc saen. Age Kraisna cad hona ec doinwe eu odi qila Kraisna cad mati bahic wele hoin. Eunu ege qila eu cit qoc saen ec doqona. <sup>19</sup>Wele dana eundec age ege gami bilom euqa age egene sihul bahic qee eunu age ege culigi belein. Ge, age egene sihul biloubmi age ege gami gaid biloum. Euqa age cunug egene sihul qee bilelein eu camasac migiannu culigi belein.

<sup>20</sup>Euqa Krais uqa age Kis Gun baseeduaden. Eunu age cunug mele jenu dogina.

<sup>21</sup>Ija age mele jenu qee dogina imig eunu qee jaqiadelem qa age mele jenu dogina eunu jaqidigina. Odocob age uhulec je oso eu mele jenadec qee hol ec dogina eunuha jaqidigina. <sup>22</sup>In uqa uhulec dana? Oso uqa Jisas eu Krais<sup>†</sup> qee ec madena eu uqa uhulec dana. Dana uqa odi madena eu uqa Kraisna cad. Dana eundec uqa Memige anutca uqa Melahca hibemalena. <sup>23</sup>Oso uqa Jisas eu Krais qee ec madena eu Memige Anutca qee bilina. Oso uqa Jisas eu Krais ec madena euha Memige Anutca bilina.

#### *Kis Gun uqa mele jenu iwalgena*

<sup>24</sup>Age hahawan je doin eu gagadic heweceil wawagana biliale. Age je eu wawagana bileyecbi Melah Memigeca ale ageca gabandu biluqagan. <sup>25</sup>Odocob Krais uqa je hahun eu odi magen. Uqa cebac bileyecb catanec igigiannu magen.

<sup>26</sup>Dana leih age uhuladoqagannu odogina eunu ija jaqidigina. <sup>27</sup>Euqa Krais uqa Kis Gun baseeduaden eu ageca gaid bilina. Odocob Kis Gun uqa ceteh cunugnu iwaladena. Eunu oso iwaladecnu qee nijel. Euqa Kis Gunna iwaladec eu mele, eu uhulec qee. Eunu age Kraisca gabandu bileyigale odiwe Kis Gun iwaladen.

#### *Ege qila Anutna mel biluquna*

<sup>28</sup>Ijana mel sim, uqa camasac meceb ege gagadic taweqannuca, odocob uqa ceseli hocob ege uqa amegna majanige gecca qee taweqannuha qila age uqaca gabandu bileyigale. <sup>29</sup>Age uqa ititom ec doginafi age dana cunug age tutuc odogina eu age Anutna mel ibuldoein echa dogina.

\* 2:7: Jon uqa loo je Jisas uqa Jon 13.34na uqana malogom aden eu odi fena. Loo je eu odi madena, "Age nalug mudecebmudecebi coboigale. Ija age nalunuga mem eu odi ageha nalug mudecebmudecebi bileyigale," ena. † 2:22: Krais eu Anutna Krais, eu uqa dana Anut uqana dana caja cahaaadecnu wele nesili ehuden.

**3**

<sup>1</sup> Feiga, Memige uqa ege Anutna mel ec madigiannu uqa egenu nalunige geh bahic mena. Odocob eu mele bahic, ege Anutna mel. Dana cajaca mahana bilegina eu age Anutnu qee dogina. Eunu age egenuha qee dogina. <sup>2</sup> O ijana danah bahic, ege qila Anutna mel. Qila ege adi bileqannu eu camasac qee mena qa uqa camasac meceb ege uqa cinigwe bileqan ec doqona. Ge, ege uqa bahic bilina eu feqan. <sup>3</sup> Dana cajaca cunug age uqa camasac meceb fimeig uqa cinigwe ibuldoqagannu sumudi bilegina eu age Anut amegna agedodoc soiadecnu odogina eu odiwe Krais uqa soidoc bilina.

<sup>4</sup> Dana cunug age silail meginia eu age Anutna loo je tefacdoggina. Odocob silail eu Anutna loo je tefacdoggina. <sup>5</sup> Age dogina, Krais uqa egenu silail casagisigiannu camasac men. Odocob uqa silailka qee bilina. <sup>6</sup> Dana cunug age Kraisca gabandoc bilegina eu age silail mimi qee bilegina. Euga dana cunug age silail mimi bilegina eu age Kraisnu qee dogina, odocob age Krais qee felein.

<sup>7</sup> O ijana mel sim, age dana oso culdecebil Cain quauadeiaun. Oso uqa kobol tutuc odona eu uqa dana ititom eu odiwe Krais uqa ititom. <sup>8</sup> Anut Melah uqa Setenna cabi oc fadaldugiannu camasac men. Ge, Seten uqa gug qoc saennadec hu qila silail mimi bilina. Eunu oso uqa silail mimi bilina eu uqa Setennadec. <sup>9</sup> Oso uqa Anutna mel ibuldon eu Anut duman eu uqa dunuh bilia. Eunu uqa silail mimi qee bilina. Odocob uqa Anutna mel ibuldon eunu uqa silail mimi bilecnu ihoc qee. <sup>10</sup> Jic euna ege dana in age Anutna mel, odocob in age Setenna mel eu fecnu ihoc. Oso uqa kobol tutuc qee odona eu uqa Anutnadec qee. Odocob oso uqa cotignu qee nalug mena euha uqa Anutnadec qee.

*Krais uqa ege cotigeilnu nalunuga mec eu ihacgen*

<sup>11</sup> Ge, age hahawan me je i doin eu odi, ege nalug mecebmeceboqale. <sup>12</sup> Odocob ege Kein cinigwe Cain biluqaun. Kein uqa Setennadec, uqa waliag qagadocob cal men. Uqa eetanu waliag qagadocob cal men? Uqana odoc eu qisol mec, odocob waliagna odoc eu tutuc eunu.

<sup>13</sup> O cotiel, mahanadec dana age agenu gemanaga beceb sagagadecebifl eunu Cain filicituwain. <sup>14</sup> Ege wawige meleec cotigeilnu nalunuga moqona. Eunu ege cal mec biley wele culdimeb cebac biley qila biluquna ec doqona. Oso uqa cotignu qee nalug mena uqa cal mec biley gaid bilina. <sup>15</sup> Oso uqa cotignu gemag beceb sagagdona eu uqa Anut amegna dana qagaadec dana. Odocob age dogina, dana qagaadec dana eu cebac biley catanec uqa dunuh qee bilina. <sup>16</sup> Krais uqa egenu ugana cebac biley culen eunu ege cotigeilnu nalunuga mec ec doqona. Odocob eunu egeha ege cotigeilnu eguna cebac biley culuqale. <sup>17</sup> Euga oso uqa mahana cehewanca bilina, odocob uqa cotig oso cetehca qee bibilen fimei cotig eu uqa ceteh Cain utiaunnun onindocobfi eu adi uqa Anutnu nalug mena? <sup>18</sup> O ijana mel sim, ege je madecnaca conigenaca himec cotigeilnu qee nalunuga moqona qa ege egenu odocna mele bahic cotigeilnu nalunuga moqale.

*Ege wawige meleec cotige Anut amegna tawecnu majanige gecca qee*

<sup>19-20</sup> Ege cotigeilnu nalunuga moqonafi Anutna mele je eu egeca bilina ec doqona. Anut uqa ceteh cunugnu dona, odocob uqana doc eu egenu doc wooldona. Eunu ege wawige eguna cahuldoc osonu madenafi ege Anut amegna ihoc tawoqona. <sup>21</sup> O ijana danah bahic, ege wawige eguna cahuldoc osonu qee madenafi ege Anut amegna majanige gecca qee eu ihoc tawoqona. <sup>22</sup> Ege Anutna je gagadic eu toodoo doqona, odimeb ege uqa cetehnu gale dona eu odoqona. Eunu ege cel ceteh osonu sisildocomun uqa igeceb oqona. <sup>23</sup> Odocob uqana loo je eu odi, ege uqa Melah, Jisas Krais, ijannu wawige meleeciale, odocob ege nalug mecebmeceboqale, eu odiwe uqa je gagadic magen. <sup>24</sup> Cunug age Anutna je gagadic eu toodoo odogina eu age uqaca gabandoc bilegina. Odocob ege uqa Kis Gun igen eunu uqa egeca gabandoc bilina ec doqona.

**4***Age kis cunug temadi feiga, eu kis Anutnadecfo, qeefo eunu*

<sup>1</sup> O ijana danah bahic, je hahun uhulec madec dana mati bahic mahana cocobi hatu cunugna belegina. Eunu age je hahun madec dana cunug age ageca humeig madegina, "Anutna Kis uqa je i iten," egina eunu Cain melewain. Euga eu kis Anutnadecfo, qeefo eunu age kis cunug temadi feiga. <sup>2</sup> Age Anutna Kis ec doqagannu kobil eu odi. Je hahun madec dana oso uqa madena, "Jisas Krais uqa dana deweg calen," ena eu Anutnadec,

Anutna Kis eu dana uqaca bilia.\*<sup>3</sup> Odocob je hahun madec dana uqa Jisasnu je eu odi qee madena kis fil oso eu dana uqaca bilia. Kis eu Kraisna cad, age wele eu hugiannu dah mein. Odocob qila eu wele hon bilia.

<sup>4</sup> O ijana mel sim, age Anutnadec. Odocob Kis uqa age dunuh bilina uqa kis eu mahanadec dana age dunuh bilina eu wooldona. Eunu age je hahun uhulec madec dana eu wele wooladein.<sup>5</sup> Je hahun uhulec madec dana eu age mahanadec. Eunu agena je madec eu mahanadec himec, odocob mahanadec dana age agena je dah megina.<sup>6</sup> Euqa ege Anutnadec. Oso uqa Anutnu du cuhadona eu uqa eguna je dah mena. Odocob oso uqa Anutnadec qee uqa eguna je qee dah mena. Ege kabol euna kis eu melefo, qee kis eu uhulecfo ec doqona.

*Dana uqa Anutnu nalug mena eu uqa cotugulnuha nalunuga mena*

<sup>7</sup> O ijana danah bahic, nalug mec eu Anutnadec, eunu ege nalug mecebmeceboqale. Odocob oso uqa nalunuga mena eu uqa Anutna mel ibuldon, eu uqa Anutnu du cuhadona.<sup>8</sup> Anut uqa nalug mec gug. Eunu oso uqa nalunuga qee mena eu uqa Anutnu qee dona.<sup>9</sup> Anut uqa Melah osol himec. Odocob Anut uqa ege uqanu cebac bilec ogannu Melah osol eu suldocob mahana nen. Kobol euna Anut uqa egenu nalunige geh bahic mena euna ihacgen.<sup>10</sup> Anut uqa nalug mec kabol me bahic eu odi ihacgena. Ege casac Anutnu nalug mom eu qee nijel. Euqa casac Anut uqa egenu nalunige meceb uqa Melah uqadodoc Anut ihandumei uqa euna Anutna gemag bec gondocob eguna silail cagasigianu suldocob nen.

<sup>11</sup> O ijana danah bahic, Anut uqa kabol euna uqa egenu nalunige geh bahic mena eunu ihacgen. Eunu ege nalug mecebmeceboqale.<sup>12</sup> Oso uqa Anut qee fel. Ege cotigelnu nalunuga moqonafi Anut uqa ege dunuh bilina, odocob uqana nalug mec eu egeca gagadic ihoc bilina.

<sup>13</sup> Anut uqa uqana Kis igen. Eunu kabol euna ege uqaca gabandoc biluquna, odocob uqa egeca gabandoc bilina ec doqona.<sup>14</sup> Odocob Memige Anut uqa Melah dana cajaca cunug mahana bilegina eu cahaaadigiannu suldocob nen eu fom eunu je qasali madoqona.<sup>15</sup> Oso uqa Jisasnu uqa Anut Melah ec madena eu Anut uqaca gabandoc bilina, odocob uqa Anutca gabandoc bilina.<sup>†</sup><sup>16</sup> Eunu ege Anut uqa egenu nalunige mena eunu dumeb wawige meleena.

Anut uqa nalug mec uqana gug. Eunu oso uqa nalunuga mimi bilina eu uqa Anutca gabandoc bilina, odocob Anut uqaca gabandoc bilina.<sup>17</sup> Ege maha ina Kraisca biluquna eu odiwe Krais uqa Memeg Anutca bilesina. Eunu ege gesilgec deelna Anut amegna tawecnu qee cucuieqannu Anutca gabandoc biluquna. Odocob ege odi bilocomunfi eguna nalunuga mec kabol eu ihoc ligian.<sup>18</sup> Anut uqa osonu nalug mena eu uqa Anut qee cucuidona. Euqa nalunuga mec eu dana osona cebac bilecna ihoc lecebfi dana eu cucuiec culigian. Ge, cucuiec uqana gug eu Anut uqa dana gesildocob ameg me qee ugian. Odocob dana oso uqa cucuinea eu nalunuga mec eu uqana cebac bilecna ihoc qee lel.

<sup>19</sup> Anut uqa casac egenu nalunige men. Eunu ege cotigelnu nalunuga moqona.<sup>20</sup> Oso uqa cotig wele fen uqanu nalug qee mena eu uqa Anut qee felnu nalug mecnu ihoc qee. Eunu oso uqa madena, “Ija Anutnu nalug migina,” enafi qa uqa cotignu gemag beceb sagagdona eu uqa uhulec dana.<sup>21</sup> Odocob ege je gagadic i Kraisnade om eu odi. Oso uqa Anutnu nalug mena eu uqa cotignuha nalug migian.

## 5

*Ege wawige meleec dana, ege mahana gagadic odoc wooldom*

<sup>1</sup> Dana cunug age Jisas uqa Krais ec wawaga meleena eu age Anutna mel ibuldooin. Odocob cunug age memegnu nalug megina eu age melahnua nalug megina.\*<sup>2</sup> Ege Anutnu nalug memeb uqana loo je toodu odoqona. Ege euna Anutna melnu nalunuga moqona ec doqona.<sup>3-4</sup> Ge, Anutna nalug mec eu odi. Ege uqana je gagadic eu toodu odeejan. Odocob Anutna mel ibuldooin eu age mahana gagadic odoc wooldogina. Eunu

\* **4:2:** Jon uqa jaqec je i jaqen saenna uhulec je hahun madec dana leih age Jisas Kraisna je leih madein. Je eu tutuc qee. Ege je eunu qee du cuhadogona, euqa doc dana leih age dana eundec dana cajaca odi iwaladein. Jisasca, Kraisca ale caca qee. Krais eu Je i wele gug qocna sao mahaca qee ifanecna Anutca bilen. (Age Jon 1.1 feiga. Odocob eu Anut Melah. Krais uqa dana calen, eu mele, qa Anut uqa dana cajaca cahaaadecnu cabi on eu uqa Krais ebenna himec odon. Ceteteh cunug Jisas dana uqa mahana bibili li cal memei odon eu Kraisna cabi qee. Odimei eu dana cajaca cahaaadecnu cabi qee cesuldol. Euga Jon uqa uhulec je hahun madec dana agena je eu mele qee ec maden. Jisas Krais uqa Anut Melah, odimei uqa dana bahic calen. Odimei uqana cabi oc odon eu cabi oc osol himec. † **4:15:** Age je 1 Jon 4.2na nijia eu feiga.      \* **5:1:** Age je 1 Jon 2.22ca, 4.2ca euna nijia eu feiga.

Anutna je gagadic eu culumen qee igina. Ege Anutnu wawige meleena. Odocob kobil euna ege mahana gagadic odoc wooldoqona.

*Anut uqa Melahnu je camasac maden*

<sup>5</sup> Inni uqa maha wooldona? Oso uqa Jisas uqa Anut Melah ec waug meleena eu uqadiah maha wooldona.<sup>†</sup> <sup>6</sup> Jisas Krais uqa wa joudecnaca, na babalecna golac basecdocab necnaca hon.<sup>‡</sup> Uqa wa joudecnaca himec qee hol qa uqa humei wa joudec umei na babalecna golac basecdocab nen. <sup>7</sup> Kis Gun uqa mele jena gug. Eunu Kis Gun uqa Jisas Kraisnu mele je qasali madena. <sup>8</sup> Jisas Kraisnu je qasali madec cijed nijeiga eu odi, eu Kis Gun, eu wa joudec, odocob eu na babalecna golac basecdocab nec. Odocob cijed i age je osol madegina.

<sup>9</sup> Anutna je madec eu odi, uqa Melahnu je qasali maden. Eunu ege dana agena je madecnu wawige meleenaifi eunu ege Anutna je madecnu wawige mele bahic ena. <sup>10</sup> Dana oso uqa Anut Melahnu waug meleena eu uqa je eu Anut qasali maden eu wele on, odocob je eu uqa waugna nijia. Dana oso uqa Anutnu waug qee meleena eu uqa Anut uqa Melahnu je qasali maden ec qee waug meleel. Eunu dana eu uqa Anut eu uhulec dana ec maden. <sup>11</sup> Odocob Anutna qasali madec je eu odi. Anut uqa ege cebac biley catanec igen, odocob cebac biley catanec eu uqa Melahna bilia. <sup>12</sup> Dana uqa Melahca gabandoc bilina eu uqa cebac biley catanec eu wele on. Odocob dana uqa Melahca gabandoc qee bilina eu uqa cebac biley catanec eu qee ol.

*Ege cebac biley catanec wele om*

<sup>13</sup> Ija age Anut Melah ijannu wawaga meleena eu age cebac biley catanec wele oin ec doqagannu je i jaqidigina. <sup>14</sup> Odocob ege Anut cemenug limeb inondocum majanige gecca qee ihoc tawoqona. Eunu ege uqana cisidoc toodumeb ceteh osonu sisildocomunfi uqa egena je dah mena. <sup>15</sup> Odocob ege ceteh osonu sisildocomun uqa egena je dah mena ec doqonafi ege ceteh osonu sisildom eu wele om echa doqona.

<sup>16</sup> Dana oso uqa waug meleec cotig oso silail memeb fecebbi, odocob silail mec eu qocob cal mecnu ihoc qeefi, dana eu uqa cotig Anutnu inondutoiale, odocob Anut uqa cotig eu cebac biley utigian. Anut uqa dana eundec agena silail mec eu qocob cal mecnu ihoc qee himec cebac biley utina. Euqa silail mec oso nijia eu qocob cal mecnu ihoc. Ija age dana uqa silail eundec mennu inondoiga ec qee maadigina. <sup>17</sup> Cahulloc cunug eu silail qa silail oso eu qocob cal mecnu ihoc qee nijel.<sup>§</sup>

<sup>18</sup> Ege doqona, Anutna mel ibuldooin oso silail mimi qee bilina. Euqa Anut Melah uqa mel eu me biliyanu cofdona. Odocob Seten uqa mel eu me qee oso qee odudiaun. <sup>19</sup> Ege doqona, ege Anutna mel biluquna, odocob maha i cunug Setenna gagadic odoc cofdona.

<sup>20</sup> Odocob ege doqona, Anut Melah uqa humei Mele Anut docnu cisidoc silec igen. Ege Mele Anutca gabandoc biluquna, odocob ege Anut Melah, Jisas Krais uqaca gabandoc biluquna. Jisas Krais uqa Mele Anut, uqa cebac biley catanec uqana gug.

<sup>21</sup> O ijana mel sim, age kadan tibud qisacadeiga!

---

<sup>†</sup> **5:5:** Age je 1 Jon 4.2na nijia eu feiga. <sup>‡</sup> **5:6:** Grik je eu Jisas Krais uqa wanaca, golacnaca hon eu himec maden. Euqa dana mati age wa eu uqana wa joudec, odocob golac eu na babalecna golac basecdocab nec ec cisdogina. Eunu ege odi falidom. <sup>§</sup> **5:17:** Grik je ina gug eu camasac qee. Euqa doc dana leih age odi cisdogina. Uhulec je hahun madec dana leih age Jisas uqa Krais qee ec madein. (Age je 4.2na nijia eu feiga. Eunu age Jisas Kraisnu wawaga meleecnu ihoc qee. Odocob Anut uqa cahahaadecnu ihoc qee. Odocob agena silailnu oloqaninh jana loqagan. Euqa dana uqa silail oso odona uqa Jisas Kraisnu waug meleecnu ihoc. Odocob Anut uqa cahahadocnu ihoc.

## Jon Uqa Jaqec Je Lecisdoc

### Jaqiaden

### Aqunec Je

Tamanec agena cofadec matu dana oso uqa jaqec je i jaqen. Dana i uqa Aposel Jon. Dana mati age Jon uqa tamanec osona dana cajaca jaqiaden ec cisdogina. Jon uqa age nalug mecebmecebecnuca, uhulec iwaladec jenu ulauladecnuca jaqiaden.

*Je Dunuhnu Dado Mec*

1. Feele adec je (1-3)
2. Nalunuga mec kobil eu kobil cunug wooldona (4-6)
3. Uhulec iwaladec jenu ulauladena (7-11)
4. Cit qoc je (12-13)

<sup>1-2</sup> Ija tamanec agena cofadec matu, ija caja Anut nesili ehudanca ugana melca\* jaqiadigina. Ija mele bahic agenu nalunuga migina. Ija himec agenu qee nalunuga migina qa mele je eu egeca gabandoc bilina, eu egeca gabandu billeceb catanigan eunu cunug age mele je dogina ageha agenu nalunuga megina. <sup>3</sup> Anut ege Memigeca Jisas Krais uqa Memige Melahca ale eelgec uum igecca, wawala qocca, malol billecca iguwasan. Odocob ege mele jeca nalunuga mecca gabandu billeqan.

*Ege nalunuga mec kobil gaid toodoqale*

<sup>4</sup> Agena mel leih age mele je eu toodogina eu odi Memige Anut ege odocnu magenwe ec dah mimig geh bahic ceelem. <sup>5</sup> O caja, qila ege nalug mecebmeceboqale ec ninihigina. Ija je gagadic haunnu eu odiwe qee jaqihigina. Euqa je gagadic hahawan saenna om qila hewoqona eunu ija jaqihigina. <sup>6</sup> Odocob nalug mec eu odi. Ege Anutna je gagadic eu toodu odeejan. Je gagadic eu age hahawan saennadec dah mein eu odi, age nalunuga mec kobil toodoigale.

*Ege Kraisna mele je gagadic hewoqale*

<sup>7</sup> Ge, uhulec dana mati bahic age maha cunugna beladein. Dana eundec age Jisas Krais uqa dana deweg calen ec wawaga qee meleena.<sup>†</sup> Dana eundec oso eu uhulec dana, eu Kraisna cad. <sup>8</sup> Agedodocnu cofdoigale. Gadgad age ceteh ocnu cabi gagadic oin eu culuwainnu qa age ameg me bahic eu am bec oigale. <sup>9</sup> Oso uqa aquinadi nuina, odocob uqa Kraisnu je iwaladecca gabandoc qee bilina eu uqa Anutca qee bilina. Euqa oso uqa Kraisnu je iwaladecca gabandoc bilina eu uqa Memige Melahca aleca bilina. <sup>10</sup> Eunu oso ageca humei uqa je iwaladec eu qee ehi hocobfi age agena jona cain ehudi lowain, odocob age cain feele dowain. <sup>11</sup> Ge, oso uqa dana eundec feele dona eu uqa dana eundec age gami qisol mec cabi osina.

*Tamanecna cofadec uqa tamanec eu feciadecnu gale don*

<sup>12</sup> Ija je jaqiadecnu geh bahic nijia qa ija bagacna jaqiadecnu qee gale tena. Euqa ege gabandu geh bahic ceeleqannu ija ageca limig feciadecemin age gami je madeqan ec cisdigina.

<sup>13</sup> Age caja cotoga Anut nesili ehuden eu ugana mel age feele adegina.<sup>‡</sup>

---

\* **1:1-2:** Dana leih age “caja Anut nesili ehuden” ugana gug eu tamanec oso, odocob “ugana mel” ugana gug eu tamanecna dana cajaca ec cisdogina. Euqa dana leih age Jon uqa caja oso jaqiton ec cisdogina. † **1:7:** Age je 1 Jon 4.2na nijia eu feiga. ‡ **1:13:** Age je 1-2na nijia eu feiga.

## Jon Uqa Jaqec Je Cijeddoc Jaqiaden Aqunec Je

Tamanec agena cofadec matu dana oso uqa tamanecna cofadec matu dana oso, ijan Gaias, jaqec je i jaqen. Gaias uqa Kristen dana cajaca cesuladen, eunu Jon uqa Gaias binan sulina. Jon uqa Gaias dana oso, ijan Daiotrefis, eunu batut fagale ec madena.

### *Je Dunuhnu Dado Mec*

1. Feele adec je (1-2)
2. Jon uqa Gaias ugana cabinu binan sulina (3-8)
3. Daiotrefis uqa kôbol me qee odon ec madena (9-10)
4. Demitrias uqa kôbol me odon ec madena (11-12)
5. Cit qoc je (13-14)

<sup>1</sup> Ija tamanec agena cofadec matu, ija Gaias jaqihigina. Gaias hina ijana danah bahic, ija mele bahic mahigina, ija hinanu nalunin migina.

<sup>2</sup> O ijana danah bahic, hina ceteh cunug odogona eu me caligiannuca, odocob hina hacga qee me bilegannuca inondugina. Hina doloin me bilia echa dugina. <sup>3</sup> Ge, wawaga meleec cotinel leih age ijaca humeig hina mele je toodogona ec matein eunu ija geh bahic ceellem. <sup>4</sup> Ijana mel age mele je toodogina ec dah migina saen euna ija geh bahic ceeligmiga, odocob ceelec eu ijana ceelec cunug wooldona.

### *Gaiasna cabi eu me bahic*

<sup>5</sup> O ijana danah bahic, hina wawige meleec cotigeil me bahic cewel uadagana. Odimeg hina cotigeil leih agenu qee dogonaha cewel uadagana. Hina kôbol euna mele je tutuc toodo odogona. <sup>6</sup> Cotigeil eu age tamanec amagana hinana nalunuga mec eunu je qasali maadein. Odocob age saen agena jic coboqagannu hina haun cesuladegan eu me bahic. Hina odi cesulaadeg hina Anutna gale doc toodogan. <sup>7</sup> Ge, age Kraisna cabi ocnu cocobi belein. Odocob age ameg oso haiden dananadec qee oloin. <sup>8</sup> Eunu ege dana eundecca gami osoben Anutna mele je cabi gagadic mudeqannu dana eu cesulandoqale.

### *Daiotrefis uqa kôbol me qee odon*

<sup>9</sup> Ija je oso tamanec dana cajaca wele jaqiadem. Euqa Daiotrefis uqa aquniadi biligianu gale dona eu ija jejeni qee toodona. <sup>10</sup> Eunu ija ageca hufig ija ugana kôbolnu maadigen. Uqa ijana je me qee madena. Odimei uqa eu himec qee odona qa uqa wawige meleec cotigeil qee ehadena, odimei uqa dana age wawige meleec cotigeil ehadecnu gale adena eu cahacadimei tamanecnadec ititacadena.

### *Demitrias uqa kôbol me odon*

<sup>11</sup> O ijana danah bahic, hina qisol mec kôbol cicilonoga cain ogaun qa hina kôbol me odogina eundec cicilonoga oga. Dana oso uqa me odona eu uqa Anutnadec. Dana oso uqa qisol mena eu uqa Anutna qee fel.

<sup>12</sup> Dana cajaca cunug age Demitrias kôbol me odonanu je qasali madein. Odocob Anutna mele je Demitrias kôbol me odonanu je qasali maden. Ijaha Demitrias kôbol me odonanu je qasali madem. Odocob hina dogona, ijana qasali madec je eu mele.

### *Cit qoc feele adec je*

<sup>13</sup> Ija je jaqihecnu geh bahic nijia qa ija bagacna jaqihecnu qee gale tena. <sup>14-15</sup> Euqa ija saen nag odi hinaca limig fecihecemin gami mecidod bibili je madewan ec cisdugina.

Anutna malol bîlec hinaca biliale. Hinana danah bahic cunug ene bîlegina eu feele hec sulduhegina. Hina ijana danah bahic cunug osolosol feele adagale.

## Jud Uqa Jaqec Je Oso Anutna Dana Cajaca Jaqiaden Aqunec Je

Dana leih age Jud uqa Jisas waliag oso ec cisdogina. Jaqec je i 2 Pita jaqec je cinigwe. Jud uqa Anutna dana cajaca age uhulec iwaladec dana leihnu ulauladena. Uhulec iwaladec dana eundec age me je fil madeginha. Eunu Jud madena, “Saen osolna dih Anut uqa ege uqana qagoc dana cajaca wawige meleec eu igen. Eunu dana leih age me je eunu ege wawige meleena eu falidowainnu age me je eu tutuac gagadic oigale ec cesusadigma,” ena (eu but 3).

### *Je Dunuhnu Dado Mec*

1. Feele adec je (1-2)
2. Jaqec je i uqana gug (3-4)
  - A. Jud uqana cisdoc falidcumuei je haunnu jaqiaden (3)
  - B. Uhulec aposel calein eunu je haunnu jaqiaden (4)
3. Jud uqa uhulec iwaladec dananu ulauladena (5-16)
  - A. Weleca eu age Anut hibemdoiu eu fadalein (5-7)
    1. Isrel dana cajaca age Anut hibemdoiu eu fadalein (5)
    2. Ensel age Anut culein eu fadalein (6)
    3. Sodom Gomoraca ale Anut culesin eu fadalesin (7)
  - B. Uhulec iwaladec danana kobilnu madena (8-16)
    1. Age enselnu qesaldec je madegina (8-10)
    2. Uhulec iwaladec age dumanaganu (11-13)
    3. Inok uqa uhulec iwaladec dana fadaloqagannu wele maden (14-16)
4. Kristen age wawaga meleec gagadicca hewimeig culunuga gagadic mudeigale (17-23)
5. Elaadi cit qon (24-25)

<sup>1</sup> Ija Jud, ija Jisas Kraisna cabi dana. Ijaha Jems waliag. Ija dana cajaca age Anut uqa uqana dana cajaca biluqagannu utaaden eu jaqiadigma. Anut ege Memige uqa agenu nalunuga mena, odimei uqa Jisas Kraisnu age cofadena. <sup>2</sup> Anut uqa agenu gaid waug qoiale, odocob uqana malol biley ageca gaid biliale, odocob uqa agenu gaid nalunuga meiale.

### *Uhulec iwaladec dana age wele jahuni eguna tamanecna dunuh hoin (2 Pita 2.1-18)*

<sup>3</sup> O ijana danah bahic, wele ija Anut ege ageca cunug osoben caahagennu cabi ben onnu jaqiadimig maadigen imig geh bahic cisdom. Eunu qila ija jaqec je i edi jaqiadigen ec cisdom. Saen osolna dih Anut uqa ege uqana qagoc dana cajaca wawige meleec eu igen. Eunu dana leih age me je eunu ege wawige meleena eu falidowainnu age me je eu tutuac gagadic oigale ec cesusadigma. <sup>4</sup> Dana leih age wele jahuni agena tamanecna dunuh hoin. Anut uqa wele bahic odi maden, dana eundec Anut gesiladeceb fadaloqagan ec maden. Dana eundec age ege Anutna eelgec uum igec om eunu ege wal kobil majanigeca qee odocnu eu cois ec madeginha. Age eguna Ben osol, eguna Tibud Jisas Krais, eu qee sasac qogina.

<sup>5</sup> Aria, qila age dahiniga celecdainnu agena cisdoc fogo duadigen. Age wele dogina, Tibud<sup>\*</sup> uqa Isrel dana cajaca Isip hatunadec caahahaaden. Euqa hedocob leih uqanu wawaga qee meleel eundec fadaladen. <sup>6</sup> Ageha wele dogina, ensel age Anut cabi i aden eu ocnu culimeig age agena cudun culein. Eunu Tibud uqa ensel eu senna libadimei mama helo tuca me qee bahic euna gihacadan bilecebil catanena. Age ono bibili li Anutna deel benna gesiladigian. <sup>7</sup> Ageha Sodom Gomoraca jobon ale cemenelail eundecca eunu dogina. Agena dana age odoiu eu odiwe ensel eu age odoiu. Dana eu age wal kobil me qee bahic danaca odoiu. Tibud uqa ameg me qee aden, odocob ja cijadeceb catanena. Eunu Tibud uqa ege eu fimeb ege wal kobil eu toodocnu cucuiuquna ec cisdoqannu odi odon.

<sup>8</sup> Euqa uhulec iwaladec dana age jahuni agena tamanec dunuh hoin eu ageha wal kobil eundecnu odi toodu odogina. Agena bebelec filfil eu tuliadecceb age dewenegana kobil gegehinca odogina. Age Tibud uqa agena ilo biligiannu qee gale adena, odimeig age ensel fulacdoc gagadic odocca sao jobon bileyina eunu qesaldec je me qeeha madeginha.

\* **1:5:** Grik jaqec je hilah leihna age “Tibud” ec qee jaqelein, age “Jisas” ec jaqein.

<sup>9</sup> Euqa wele ensel matu bahic Maikel, uqa jena Setenca cadesin, in uqa Moses deweg ganac ugiannu je geh bahic madesin saen euna Maikel uqa Seten je me qee mamadi qee qesaldol. Uqa Setennu qesaldoc je me qee madecnu qee cisdol qa uqa odi madon, "Tibud uquadodoc hina cahachena," don. <sup>10</sup> Euqa uhulec iwaladec dana i age ceteh cunug i agena gugnu qee dogina eunu je me qee mamadi qesaldogina. Euqa dana eundec age dool cus cinigwe. Dool cus age qee cisdogina qa age dewenega gale adec himec toodu odogina. Eu odiwe dana eundec age dewenega gale adec himec toodu odogina. Odocob agena kobel eu fadaladigan. <sup>11</sup> Dana eu age walocca bileyigale! Ge, age Keinna kobilna jic coboin. Age meen qaig ocnu dih gagadic cisdogina eu odiwe Belam wele odon. Age Anut feedogina odiwe Kora eu wele odon. Age agena feeeecnal fadalogagan.

<sup>12</sup> Ija cotiel, age cegulimeig wawaga meleec cotogailnu nalunuga mimi bibileig sab jeginanu saen euna dana eundec age humeig cegulec i Anut amegna gegehin mudeginia. Mele, age age gami sab jeginanu qa dana eundec agedodocnu dih cofdocnu majanaga nagha qee aden. Dana eundec age taen wa meni ninjien fufu hu fudocob ficagu nuina cinigwe. Age na eu aig qoc saenna aig qee qol cinigwe. Age na wele cal men, odocob dana age bebeig cunug cacalein. Age dana cal mi lecisdoen cinigwe. <sup>13</sup> Age signaladec dana eu fufu ben hocob macas qahena odiwe. Age kobil majanagaca odogina eu camasac mena eu odiwe macas qaheceb gag camasac mena. Age malaqa saona loldudu cobogina cinigwe. Anut uqa mama helo tuca me qee bahic age euna bileyigale catanigiannu wele saciadon.

<sup>14</sup> Inok uqa Adamna sihulnadec 7-peladoc cali hon uqa dana eundec age je hahun maaden, "Doiga! Ija Tibud uqana ensel gun 1,000 matica gami hoin eu feciadem. <sup>15</sup> Tibud uqa dana cunug gesiladeceb agena ameg ogagannu hon. Odocob uqa dana cunug age Anut hibemdoen eundec odadecceb age kobil me qee cunug odoen eu agena cahuldoc tebandu cuhadoqagannu hon. Eu mele, dana eundec age Anut haun gehca hibemdogina. Silail dana age Tibud je me qee filfil madoin eu tebandu cuhadoqagannu Tibud uqa hon," aden. <sup>16</sup> Dana eundec age gaidgaid gonagona megina. Odimeig age leih um aqegina. Age agedodocnu gale adec toodogina. Age deboi agedodocnu binanaga sulegina. Age dana leih faninadimeig agena ceteteh qidatu ogina.

#### *Age wawaga meleec gagadicca hewimeig culunuga gagadic mudeigale*

<sup>17</sup> Euqa ijana danah bahic, age wele egene Tibud Jisas Kris uqana aposl age ceteh hibna caligiannu je madein eunu haun cisoiga. <sup>18</sup> Age odi maadein, "Cit qoc saenna lelanec dana age hoqagan. Age Anut hibemdumeig agena gale adec me qee toodoqagan," adein. <sup>19</sup> Dana eundec age odocobil tamanec qatanena. Age dana mahanadec agena cisdock dih toodogina, age Kis Gunca qee.

<sup>20</sup> Euqa ijana danah bahic, age wawaga meleec gagadicca hewimeig culunuga gagadic mudeigale. Anut uquadodoc wawaga meleec i aden. Age Kis Gun uqana gagadic odocna inondoiga. <sup>21</sup> Anut agenu nalunuga mena, eunu uqa gaid agenu nalunuga migiannu age Anut cemenug bileyigale. Odocob age egene Tibud Jisas Kris sumudi bileyigale. Uqa agenu waug qocob age cebac bileyigale. <sup>22</sup> Age dana leih agena wawaga meleec eu gagadicca gee eu cesusadeceb agena wawaga meleec gagadic meiale. <sup>23</sup> Age dana leih jana bileyigale eundec janadec cacawadimeig cahahaadeiga. Odocob dana leihnu wawaga qocob agena kobil toodocnu cucueiga. Dana eundec age dewenega gale adec me qee toodooin, odocob age gegehinca bahic eu ihoc leceb agena lotoc cunug euha gegehinca bahic men. Age ceteteh i gegehinca bahic eunu batut feigale.

#### *Ege Anut binan suluqale*

<sup>24</sup> Anut uqa age ihoc cofadeceb agena wawaga meleec qee toni qoiaun. Uqa age ehadeceb uqana gagadic odoc fulacdoccana lecnu ihoc, odocob age Anut cemenug cahuldocca qee tawoqagan. Age ben bahic ceeloqagan. <sup>25</sup> Anut osol i dih bilina, uqa ege Jisas Kris umna cahahagen. Jisas Kris uqa egene Tibud, ege uqa binan suluqale. Uqa king ben bahic bilina, uqa gagadic odocca, uqa ceteteh cunug agena ilo bilina. Wele bahic saen cunugna uqa odi bilen, odocob qilaha uqa bilina, odocob hibna saen cunugna eu odi bileyigale! Mele.

## **Krais Uqa Anutna Jahunec Je Jon Camasac Muden Aqunec Je**

Jon uqa je i jaqen saen euna Kristen dana cajaca age Jisas Krais uqa agena Tibud eunu wawaga meleena, dana age eunu me qee odadein. Jon uqa ceteh me qee eu Kristen cilehadowainnu agena wawaga meleec gagadic mudecnu jaqiaden.

Jaqec je ina ceteteh hibna caloqagan eunu galolo je mati nijia. Acahma, saen euna Kristen dana cajaca age galolo je agena gug doin, euqa haiden dana cajaca age qee doloin. Galolo je cunug agena gug eu odi. Jisas Krais eu Tibud, odocob uqa ebenna Anut uqa uqana cad cunug cilehdigian. Uqa Setenza cilehdugian. Odocob Jisas uqa uqana cabi cunug hedocob Anut uqa ameg me bahic utigian. Dana cajaca age gagadic tataweig agena wawaga meleec qee felacudelein eu uqana ameg me bahic. Anut uqa ceteteh cunug haun ifanadceeb wasoqagan. Eunu Anutna dana cajaca age culumencia qee Anut gami bielecebil catanigan.

### *Je Dunuhnu Dado Mec*

1. Aqunec je (1.1-8)
  - A. Je aqunec (1.1-3)
  - B. Feele adimei eeladen (1.4-8)
2. Jisas uqa tamanec 7-pela gemona tawen (1.9-20)
3. Tamanec 7-pela agenu jaqec je (dac 2-3)
  - A. Efesas tamanecnu jaqec je (2.1-7)
  - B. Smena tamanecnu jaqec je (2.8-11)
  - C. Pegamam tamanecnu jaqec je (2.12-17)
  - D. Taiataira tamanecnu jaqec je (2.18-29)
  - E. Sadis tamanecnu jaqec je (3.1-6)
  - F. Filadelfia tamanecnu jaqec je (3.7-13)
  - G. Leodisia tamanecnu jaqec je (3.14-22)
4. Jon uqa sao jobon ohisna king biley cabalca, jaqec je col qocca, Sipsip Nagca eu fen (dac 4-5)
  - A. King biley cabalca (dac 4)
  - B. Jaqec je col qoc eu sisi mec 7-pela libecca (5.1-5)
  - C. Sipsip Nag qocobil cal mecwae tawen (5.6-14)
5. Jisas uqa sisi mec libec 7-pela wagaladen (6.1-8.1)
  - A. Sisi mec libec osahidoc: Hos caubca (6.1-2)
  - B. Sisi mec libec lecisdoc: Hos golca (6.3-4)
  - C. Sisi mec libec cijeddoc: Hos casca (6.5-6)
  - D. Sisi mec libec 4-peladoc: Hos jan jedocca (6.7-8)
  - E. Sisi mec libec 5-peladoc: Ihanec cabal bisaluna dolonogail nijein (6.9-11)
  - F. Sisi mec libec 6-peladoc: Mim ben nen (6.12-17)
  - G. Age dana cajaca 144,000 Anutna sisi mec ilomoga domonna madein (7.1-8)
  - H. Dana cajaca cegulec am ben bahic age Anutnu cuha fein (7.9-17)
  - I. Sisi mec libec 7-peladoc: Sao jobon tiliec bahic nijen (8.1)
6. Ensel agena taul 7-pela fuldoin (8.2-11.19)
  - A. Aqunec je (8.2-5)
  - B. Taul osahidoc: Wa ais aigca jaca, golacca gabanadec mahana toni non (8.6-7)
  - C. Taul lecisdoc: Aluh benwe ja ciji teten macasna toni non (8.8-9)
  - D. Taul cijeddoc: Malaqa ijan eu Gulihinca (8.10-11)
  - E. Taul 4-peladoc: Camca jagelca malaqa cunugca age naha qatani cijedadec oso aqein (8.12-13)
  - F. Taul 5-peladoc: Sis me qee mati calein (9.1-12)
  - G. Taul 6-peladoc: Ensel 4-pela cufaladeceb belein (9.13-21)
  - H. Ensel oso uqa Jon jaqec je col qoc nag oso uteceb jen (dac 10)
  - I. Anutna je qasali maadec dana lecis (11.1-14)
  - J. Taul 7-peladoc: Ameg meca me qeeca ocnu saen (11.15-19)
7. Ceteteh filfil calein (dac 12-14)
  - A. Caja oso man sononec benca calesin (dac 12)
  - B. Dool cus me qee lecis calesin (dac 13)
  - C. Sipsip Nagca dana cajaca 144,000ca (14.1-5)

- D. Sab qetecnu saen (14.6-20)
8. Boh 7-pela eu Anutna gemag bec am bec (dac 15-16)
- A. Aqunec je: Mosesna dueca ensel 7-pela age dana cajaca me qee madecnu cetehe  
7-pela heweinca (dac 15)
- B. Boh osahicdoc: Dain ben adecnu isomoga me qee (16.1-2)
- C. Boh lecisdoc: Macas eu golac ibuldon (16.3)
- D. Boh cijeddoc: Waca wa fifiji becca eu cunug golac ibuldon (16.4-7)
- E. Boh 4-peladoc: Cam bi edebedec agagimei dana cajaca cijaden (16.8-9)
- F. Boh 5-peladoc: Tu calen (16.10-11)
- G. Boh 6-peladoc: Jufretis wa eu galalen (16.12-16)
- H. Boh 7-peladoc: Mahana mim ben bahic nen (16.17-21)
9. Babilon: Wal caja eu binanca (17.1-19.5)
- A. Babilonnu madec (dac 17)
- B. Babilon fadali tonen (dac 18)
- C. Anutna dana cajaca age Babilon fadallen ceelein (19.1-5)
10. Age Sipsip Nag caja ocnu deel eunu ceelein (19.6-10)
11. Jisas Kraisna ceseli hoc (19.11-21)
12. Age kingwe Kraisca cabi gel 1,000 odi king bilein (20.1-6)
13. Seten fadalen (20.7-10)
14. Gesiladecnu king bilec cabal senenec ben (20.11-15)
15. Maha haunca, sao haunca, Jerusalem haunca cali hoin (21.1-22.5)
16. Cit qoc je (22.6-21)

### *Je aqunec*

<sup>1</sup>Jahunec je i eu Jisas Kraisna camasac mec je sanijec. Anut uqa ceteteh isi caloqagannu uqana cewel utoc dana age eu ihacadecnu camasac mec je eu Jisas Krais uten. Odocob Jisas Krais uqa camasac mec je eu uqana ensel utimei suldocob uqa Anutna cewel utoc doc dana, Jonca humei madon. <sup>2</sup>Odocob Jon uqa ceteh cunug camasac fen eunu qasali maaden. Je i cunug eu Anutnadech hon, eu mele, je eu Jisas Krais qasali maaden.

<sup>3</sup>Saen ceteh i cunug caligian eunu utuqan nijia. Eunu oso je hahun jaqec i Anutnadech dana cajaca saniji maadena eu ceelec bilina. Age je i dah mimeig toodoo odogina eu ceelec bilingina.

### *Tamanec 7-pela agena feele ec je*

<sup>4</sup>Ija Jon. Ija je i wawaga meleec tamanec 7-pela age Esia hatuna bilingina eu agena je jaqi sulduadigina. Anut uqa qila bilina, uqa gaid biloloi, uqa hugian uqa eladec uum adeiale, uqa malol bilec adeiale. Kis 7-pela age Anut cewel utogina, age uqana king bilec cabal amegna tawegina eu age eeladeiale, age malol bilec adeigale. <sup>5</sup>Jisas Krais uqa Anutna me je cunug qasali maaden, uqa dana age cal mecnadec ceseli cajec agena aquniadec, uqa dana mahanadec agena king cunug cofadena uqaha eladec uum adeiale, uqa malol bilec adeiale. Age cunug feele adegina.

Jisas Krais nalunige mena, uqa uqana ihanec cal mecna egena silail cagasiigen. <sup>6</sup>Uqa odigeceb ege nawel tawec ihanec dana ibulgen, ege uqaca cofaadi bibileb uqana Anut, uqa Memegnu cewel utuqan. Jisas Krais uqana kobolkobol gagadic odocca eu gaid bileceb catanena! Eu mele.

<sup>7</sup>Feiga! Uqa taenna hona!

Dana cunug age uqa fecidoqagan.

Leih age catuwuteceb il cal men eundec ageha fecidoqagan.

Odocob dana sihil cunug maha inadec age uqanu qada qajoqagan.

Eu odi caligian eu mele.

<sup>8</sup>Anut Tibud gagadic odocca madena, “Ija aqunec, ija cit qoc,” ena, uqa qila bilina, uqa gaid biloloi, uqa hugian.

### *Jon uqa Jisas Krais majaudocna fen*

<sup>9</sup>Ija Jon, age wawaga meleec cotoga. Ija ageca Jisasnu cilehgegina. Ege osoben Jisasna cul hugiannu sumuduquna. Ege susumudeb gagadic tatawi culumen gahidoqona. Ija Anutna me jeca, je mele Jisas odocob camasac menca eunu qasali maaden. Eunu ija Patmos nuina ono mitec bilem.\* <sup>10</sup>Ija Tibudna cuha deelna bibiligin Kis hewiti ibulteceb hibilemi isec jejeg ben oso eu taul jejeg cinigwe mamaden dah mem. <sup>11</sup>Eu odi maden,

\* <sup>1:9:</sup> Rom age dana oso uqa kobol odon eu age qee gale adel eunu gihadocnu gale aden saenna age nui osona suldocobil nui bilen. Patmos eu gihadecnu nui oso.

"Hina fagana eu bukna jaqimeg wawaga meleec tamanec 7-pela, eu Efesasca, Smenaca, Pegamamca, Taiatairaca, Sadisca, Filadelfiaca, Leodisiaca, euna sulduadagale," en.

<sup>12</sup> Odocob ija jejeg mateten fige imig qaalem. Qaalmig eu gowoc goldna mudec 7-pela fem. <sup>13</sup> Gowoc gemona oso tawen eu

"dana melah cinigwe," en (Daniel 7.13)

eu lotoc cecelacca tacec jaihna ihoc lec uqa muguhna oologam goldna mudec taqecca.

<sup>14</sup> Uqa ilo gosic eu senenec bahic, eu sipsip bagic senenec cinigwe, eu taen senenec cinigwe. Uqa ameg eu ja belican cinigwe. <sup>15</sup> Uqa jaih eu ja guaena, eu bras ja benna manecibil walelenaw. Uqa jejeg eu wa mati busali buhohdonaw. <sup>16</sup> Uqa eben meulana malaqa 7-pela hewi bilen. Uqa conadec han sigin walelec nahanaha aigca cali hu tawen. Uqa ola eu cam bi gemona tatawi bilei gagadic fuladonaw.

<sup>17-18</sup> Odocob ija uqa fimig cal mecwe uqa jaihna toni cosolem. Odecemin uqa ijaca humei eben meulana dewennia mimi bilei maten, "Ija aquunec, ija cit qoc, ija cebac biley dana eu. Faga, ija cal mec nijem qa qila ija saensaen cebac bibiligin catanena. Ija cal mecnua dol jobonnaca<sup>†</sup> ki hewi bilingin. Hina cain cucuiagaun. <sup>19</sup> Hina fagana, eu qila nijia euca, isi cali hugian euca eunu jaqaga. <sup>20</sup> Malaqa 7-pela ebeni meulana faga, gowoc goldna mudec 7-pela euca jahunec gug ihen. Malaqa 7-pela eu tamanec 7-pela agena ensel. Gowoc 7-pela eu tamanec 7-pela," maten.

## 2

### *Efesas tamanecnu jaqec je*

<sup>1</sup> Odocob uqa maten, "Hina Efesas tamanecna ensel\* odi jaqitogale:

'Malaqa 7-pela eben meulana hewi bilina, gowoc goldna mudec 7-pela gemona cobona uqa je odi mahena, <sup>2</sup> "Ija hinana me odoc, hinana siwhehen cabi oc, hina gagadic tatawi culumen gahidogona eu cunug figina. Mele, hina qisol megina eundec cewadagana, qa leih age madi, ege aposel egina, qa age aposel qee, eundec hina temadecem age uhulec dana camasac mecebil fem. <sup>3</sup> Hina gagadic tatawi culumen gahidogon ijaninu wawin sogoeen qee us hel euha ija dugina," hena.

<sup>4</sup> "Euqa ija hina dewennu je oso odi nijia. Faga, hinana naluni mec hahawan nijen eu hina wele culdem. <sup>5</sup> Wele hina me odolog qa qila hina me odoc eu culdi cosolem eunu cisdogale! Hina wawin falicdocob hahawan odom odi haun odogale! Hina qee tului falicdocompi ija hinaca humig hinana gowoc goldna mudec uqa bilecnadec suli helecemin nuigian. <sup>6</sup> Mele, osol odogona eu me, hina Nikolas uqana eundec odogina odoc eu sagagdogona. Ge, agena odoc eu ijaha sagagdugina," hena.

<sup>7</sup> "Oso dahigcafi Kis tamanec cunug maadena je eu doiale! Oso gagadic mimi han wooldocobfi ija cebac biley na uqana aig jigiannu cois madugen. Cebac biley na eu Anutna paradiseisa tawena," hena,' odi jaqitogale," ten.

### *Smena tamanecnu jaqec je*

<sup>8</sup> Odocob uqa maten, "Hina Smena tamanecna ensel odi jaqitogale:

'Aquunec, cit qoc, uqa cal mimei haun ceseli cajen eu uqa je odi mahena, <sup>9</sup> "Ija hinana cilehhec, hina cehewainca qee biley eu figina, euqa hina cehewainca.<sup>†</sup> Ija dana age madi, ege Judadec egina, qa age Judadec qee, age dewennu je me qee madegina euha figina. Eu age Setenna cuha jonadec. <sup>10</sup> Hina isi wawin sogoeen ben gahidogon eunu Cain cucuiagaun. Faga, Seten uqa agena wawaga meleec temdochru age eundec leih gihacdol jona heladigia odona. Odocob hina deel 10-pela odi cilehadec gahidogon. Euqa hina wawin meleec eu eheweg li cal mec gadacna calegan. Odocom ija cebac biley king katakat ihigen," hena.

<sup>11</sup> "Oso dahigcafi Kis tamanec cunug maadena je eu doiale! Oso gagadic mimi han wooldocobfi cal mec lecisdoc odudecnu qee nijiaun," hena,' odi jaqitogale," ten.

### *Pegamam tamanecnu jaqec je*

<sup>12</sup> Odocob uqa maten, "Hina Pegamam tamanecna ensel odi jaqitogale:

'Dana han sigin walelec nahanaha aigca hewi bilina uqa je odi mahena, <sup>13</sup> "Ija hina ana bilingina eu figina. Ge, Setenna king biley cabal tawena euna bilingina. Hina ija ijaninu gagadic hewagana, hina ijanu wawin meleec qee falicdol. Antipas eu ijanu gaid qasali madoloi age gemona Seten bileyca euna qocobil cal men saen euna ha ijanu wawin meleec qee sasac qolom," hena.

<sup>†</sup> 1:17-18: Grik je i bahic eu "oloqaninha" \* 2:1: Jaqec je i uqa tamanecna ensel suldon. Euqa eu tamanecna dana cajaca agena kobolnu maden. <sup>†</sup> 2:9: Ceteteh mahana bileyinu Smena tamanec age sawen bileyin, euqa age ceteteh sao jobonna bileyinu Smena tamanec age cehewanagaca bileyin.

<sup>14</sup> “Euqa ija hina dewennu je oso odi nijia. Hinana eundec leih age Belamna iwaladec je hewi toodogina. Belam eu Belak uqa Isrel dana cajaca amagana aisais heligiannu iwaldon. Odocob uqa kadan tibud ihandoc cuhun jogagannuca, cajaca silail moqagannuca ihacaden. <sup>15</sup> Hinana eundec leih ha age Nikolasna iwaladec je hewi toodogina. <sup>16</sup> Eunu wawin falicdu tutuc mudagale. Qeefi, ija mahuc hinaca humig han sinig coninade cali hona euna dana eundec cadi aqigen,” hena.

<sup>17</sup> “Oso dahigcafi Kis tamanec cunug maadena je eu doiale! Oso gagadic mimi han wooldocobfi ija manna<sup>†</sup> jahinec nijia eundec leih utecemin jigian. Ija eu meen senenec oso utigen. Ijan haun utigen, eu meen euna jaqec je nijia, eu oso qee dona qa eu ona himec dona,” hena,’ odi jaqitogale,” ten.

### Taiataira tamanecnu jaqec je

<sup>18</sup> Odocob uqa maten, “Hina Taiatairana ensel odi jaqitogale:

‘Anut Melah uqa ameg eu ja belicanwe, uqa jaih eu bras walelecwe uqa je odi mahena,<sup>19</sup> ‘Ija hinana me odocca, hinana naluni mecca, hina wawin meleeca, hinana cewel occa, hinana gagadic tatawi culumen gahidocca eu figina. Hina qila odogona eu hahawan odom wooldoc tawena euha dugina,’ hena.

<sup>20</sup> “Euqa ija hina dewennu je oso odi nijia. Hina caja eu Jesebel<sup>§</sup> uqa odona qee cahacdologna. Eu uqadodocnu madena, ‘Ija je hahun madec caja,’ ena, uqa ijana cewel itec dana faninadi age cajaca silail moqagannuca, kadan tibud ihandoc cuhun jogagannuca iwaladena. <sup>21</sup> Ija uqa waug falicdu tutuc migiannu saen utem qa uqa danaca silail mec hibemu tutuc meecnu culina. <sup>22</sup> Faga, ija heludecemin uqa cabal osoma sogo hag nijigian. Uqaca silail mein eundec age Jesebel odona eu qee cuculi falicdu tutuc mecebifli ija wawaga sogoec ben bahic adigen. <sup>23</sup> Uqana mel aqecemin cal moqagan. Ija dana cunug culunuga wawagaca temdu figina eu tamanec cunug odadecmin foqagan. Ija age eundec age osolosol agena odoc nijiawe ihoc adigen,” hena.

<sup>24</sup> “Euqa Taiataira ono bilegina eundec leih age iwaladec je eu qee hewi toodogina, age age leih Setenna gug dunuh uqana cetehe egina eunu dahiniga qee qolocijelein, age eundec maadigina, ‘Ija culumen cetehe oso dewenegan qee migau. <sup>25</sup> Euqa age hewegina eu gagadic hehewi li ija ceseli hugen,’ adigina,” hena.

<sup>26-27</sup> “Oso gagadic mimi han wooldufei ijana odoc hewi bibileb hedoc gadacna califei ija gagadic odoc Meinaadec omwe ija hatuhatu cunug uqaha ebenna maden. Uqa agena king bilec age an komna gagadic odocca cofadigian.

Uqa hal qataneginawe qatanadigian,’ en,” hena. (Buk Song 2.9)

<sup>28</sup> “Ijaha malaqa boei utigen. <sup>29</sup> Oso dahigcafi Kis tamanec cunug maadena je eu doiale!” hena,’ odi jaqitogale,” ten.

## 3

### Sadis tamanecnu jaqec je

<sup>1</sup> Odocob uqa maten, “Hina Sadis tamanecna ensel je odi jaqitogale:

‘Anutna kis 7-pela malaqa 7-pela euca hewi bilina uqa je odi mahena, ‘Ija hinana odoc figina. Hinanu madi, uqa cebac bilina egina qa hina cebac qee, hina cal nec biligina.

<sup>2</sup> Ija hinana odoc Anut amegna ihoc qee ninijen figina. Eunu hina seelaga, leih cebac bilegina cal necnu odogina eu gagadic madaga. <sup>3</sup> Hina wele me je adidih om, adidih dah molog eunu cisdogale. Hina me je eu hewi biligale, hina wawin falicdu tutuc mudagale. Hina qee seelecmefli ija heje oc danawe hinaca hugen. Ija cel saen bahic hugen eu hina docnu qee nijaia,’ hena.

<sup>4</sup> “Euqa hinana tamanec eundec leih age binanca Sadis ono bilegina eu age agena lotoc qee gegehin mudelein. Eu age ihoc, age ijaca lotoc senenec bahic tataqi cobeqan,” hena.

<sup>5</sup> “Oso gagadic mimi han wooldocobfi eu odiwe lotoc senenec bahic tataqi biligian. Ija uqa ijan cebac biley bukna tawena euna qee cacu qeligaun. Ija Meica uqana enselca amagana qasali mamadi, uqa ijana bilitina igen. <sup>6</sup> Oso dahigcafi Kis tamanec cunug maadena je eu doiale!” hena,’ odi jaqitogale,” ten.

<sup>†</sup> 2:17: Manna eu sab sao jobonnadec Anut uqa Isrel age wadau waca qeena coboin saen euna aden. Age Kisim Bek 16ca, Song 78.24ca eu feiga. <sup>§</sup> 2:20: Jesebel eu caja me qee bahic ijan, uqa wele Isrel agena kwin bilen. Uqa kadan tibudnu cuha fein. Odimei uqa Anutna je hahun madec dana mati aqecab cal mein. Age 1 King 18.4ca, 19.1-2ca, 21.1-28ca, 2 King 9.22ca, 9.30-37ca eu feiga. Caja oso eu Nikolas sihulnadec uqa Taiataira dana cajaca leih diadeceb age silail kobol toodu odooin eu odi fena. Gug eunu age ijan Jesebel ein.

*Filadelfia tamanecnu jaqec je*

<sup>7</sup> Odocob uqa maten, "Hina Filadelfia tamanecna ensel je odi jaqitogale:

'Gun meleca uqa Dewidna ki hewi bilina, uqa jic hudeceb oso qee meneiaun, uqa jic meneceb oso qee hudiaun eu uqa je odi mahena,<sup>8</sup> "Ija hinana odoc eu figina. Hina gagadic odoc nagca biligina qa ijana je toodu hewi bilem, hina ija ijaninu qee qee sasac qolom eu dugina. Faga, ija hina amenna jic cebec hudem, oso eu menecnu ihoc qee.<sup>9</sup> Faga, ija dana eu age Setenna cuha jonadec age madi, ege Judadec egina qaa Judadec qee, age uhulegina eu odadecemin age humeig hina jaimna jogoi hinanu cuha fogagan. Ija hina nalunin migina eu age camasac foqagan.<sup>10</sup> Ija hina gagadic tatawi culumen gahidoga ec mahecemin je eu toodu hewi bilemnu ija hina temadec saenna eu mahana bilegina cunug temadigianu hona eu odihiaunnu cidachigen.<sup>11</sup> Ija mahuc hugen," hena.

"Hinana king katakat oso cawalheiannu hina hewagana eu hewihewidogale.<sup>12</sup> Oso gagadic mimi han wooldocobfi ija ijana Anut uqana cuha jona nah man mudigen. Euna cuculi nuecnu haun qee nijaun. Euqa uqa dewegna ijana Anut ijanca ijana Anut uqana jobon ijanca jaqigen. Jobon eu Jerusalem haun, eu sao jobonnadec ijana Anutnadec toni nigian. Ija ijanigul haun euha dewegna jaqigen.<sup>13</sup> Oso dahigcafi Kis tamanec cunug maadena je eu doiale!" hena,' odi jaqitogale," ten.

*Leodisia tamanecnu jaqec je*

<sup>14</sup> Odocob uqa maten, "Hina Leodisia tamanecna ensel je odi jaqitogale:

'Eu mele, uqa Anutna je cunug gaidgaid tutuc qasali maadena, uqa Anut ceteh ifanen uqana gug qoc tawec eu uqa je odi mahena,<sup>15</sup> "Ija hinana odoc figina. Hina daec qee, hina dain gulguecca qee. Hina gemona dadainca himec biligina. O, hina daec biloumda, qeefi dain gulguecca biloumda!<sup>16</sup> Eunu hina dadainca himec biliginanu, daeca qee, dain gulguecca qee, ija coninadec cin qihecemin nuegan.<sup>17</sup> Ge, hina madagana, 'Ija cehewanica, ija cabi ocomin cehewanica bencu men, ija ceteh osonu qee oga tena,' agana. Euqa dogona, hina amen lulca, hina walocca, hina sawen bahic, hina amen galuc mec, hina bical biligina eu hinadodoc qee fagana.\*<sup>18</sup> Eunu ija je odi mahigina. Hina cehewainca megannu gold jana wesalecebil euna soidocca bahic mena ijanadec fajagale. Hina bical majain hec camasac meiaunnu hina ijanadec lotoc senenec bahic fajimeg taqagale. Hina fecnu ihoc marasin ijanadec fajimeg amen joudagale.<sup>19</sup> Dogina, ija age nalunuga migina eundec qisaadigina, eundec ulauladigina. Eunu hina wawin falicdu megameg mimi tutuc mudagale," hena.

<sup>20</sup> "Faga, ija jic cebecna lige bili tatawi gouggoudugina. Oso ija jejeni dumei jic cebec hudecebfi ija uqaca lecemun ija uqaca sab jewan," hena.

<sup>21</sup> "Oso gagadic mimi han wooldocobfi ijaha han wooldocomin Meica uqana king biley cabalna bilohwe uqa ijaca ijana king biley cabalna bilewannu cois ec madugen.<sup>22</sup> Oso dahigcafi Kis tamanec cunug maadena je eu doiale!" hena,' odi jaqitogale," ten.

## 4

*Age sao jobonna Anutnu cuha sefegin majaudocna fen*

<sup>1</sup> Ceteh eu hedocob ija majaudoc osona fem, ija sao jobonna jic cebec oso huden tatawen fem. Odocab jejeg eu taul jejeg cinigwe mamaden wele dah mem eu uqa maten, "Hina ene becem ija ceteh i hedocob cel ceteh caligian eu ihachigen," ten.<sup>2</sup> Mahuc bahic Kis hewiti ibulteceb ija king biley cabal oso sao jobonna ono tatawen fem, oso uqa king biley cabal euna bibilen fem.\*<sup>3</sup> Uqa bilen eu uqa ola meen jaspaca meen golca eu konilian cinigwe guaena. Wal oso king biley cabal eu talildon, eu meen cadibca emeral cinigwe.<sup>4</sup> King biley cabal 24 age king biley cabal eu talildoin. Dana matu 24 age king biley cabal 24 euna biley. Dana matu eu age lotoc senenec bahic tacein, age king katak goldna mudec ilomogana gulodoin.<sup>5</sup> King biley cabal eunadec amel falefaleeceb uceldoc bencucalebeb qeli ququen. King biley cabal amegna cejal 7-pela gogowi tawein, eu age Anutna kis 7-pela.<sup>6</sup> King biley cabal amegna macas oso nijen, eu glas cinigwe, eu camasac bahic.

Ceteh cebac 4-pela age king biley cabal tawen euna talildoin, age nanaha tawein. Ceteh cebac 4-pela eu age amaga mati bahicca, olanagana hibilemeganaca amaga jahuldoein.<sup>7</sup> Ceteh cebac oso eu laion fec cinigwe, ceteh cebac oso eu bulmakau fec cinigwe, ceteh

\* <sup>3:17</sup>: Leodisia tamanec age amagagulna age cehewanagaca biley, euqa age Anut amegna sawen bahic biley. Age Jahunec Camasac Muden Je 2.9 feiga. \* <sup>4:2</sup>: Oso Jon uqa king biley cabal euna bibilen fen eu Anut himec. Euqa cudun ina Jon uqa eu Anut qee el. Hibna dac 7 but 10na je oso eu "Anut uqa king biley cabalna bilina" ec madena. Euqa Jon uqa Anut eu dana fecwe ec qee madel. Uqa Anutnu galolo je madena eu Anut uqa fulacdocca, gagaca eu odi fena ec madena.

cebac oso uqa ola eu dana ola fec cinigwe, ceteh cebac oso eu man fululec ben cababac cinigwe ohis fululi cobona fec cinigwe.<sup>8</sup> Ceteh cebac 4-pela cunug age hojonoga 6-pela billein. Age cunug dewenega cunugca hojonoga bisaluca amaga euha jahuldoc billein.

Witic cahinegca age due silecnu qee culoloig:

"Anut Tibud uqa gagadic odocca, uqa Gun, uqa Gun, uqa Gun.

Uqa qila bilina, uqa gaid biloloi, uqa hugian," oloig.

<sup>9</sup> Ceteh cebac eu age king biley cabalna bilina, uqa gaid bileceb catanena eunu eeldumeig binan sulein, ege hegaga ein, saen euna<sup>10</sup> dana matu 24 age king biley cabalna bilina, uqa gaid bileceb catanena, uqa amegna toni mahuli cosolimeig eunu cuha feginanu. Age agena king katakat king biley cabal amegna cacuti qelimeig due sileginanu:

<sup>11</sup> "Egena Tibud, egena Anut, hina ceteh cunug bileygina eu ifani mem.

Hina hinana cisdocna eu ifani madem, age hinana cisdocna bileygina.

Eunu hina kobolkobolca, binain sulecca, gagadic odocca ocnu ihoc," egina.

## 5

### *Jaqec je col qoc oso libein eu Jon fen*

<sup>1</sup> King biley cabalna bilen uqa eben meulanana jaqec je col qoc oso bibilen fem. Jaqec je col qoc eu jaqec je dunuhna ganacnaca nijen. Eu sisi mec 7-pela libec ninijegin.

<sup>2</sup> Odocob ija ensel gagadic odocca fem. Uqa co suli u maden, "In uqa sisi mec libec eu wagaladimei jaqec je col qoc eu huledocnu ihoc?" en. <sup>3</sup> Euqa oso sao jobonnafo, mahanafo, maha bisalunafo uqa jaqec je col qoc eu huledumei dunuh fecnu ihoc oso qee biley. <sup>4</sup> Oso uqa jaqec je col qoc eu huledumei dunuh fecnu ihoc oso qee biley eunu ija geh qajem. <sup>5</sup> Odocob dana matu oso maten, "Hina cain qajagaun! Faga! Dana ben gagadic odocca eu laion uqa Juda sihulnadec, uqa King Dewid Melah, uqa sisi mec libec 7-pela eu wagaladimei jaqec je col qoc eu huledugiannu han wooldon," ten.

### *Jon uqa Sipsip Nag fen*

<sup>6</sup> Odocob ija Sipsip Nag oso qocobil cal mecwe uqa king biley cabal gemona tatawen fem. Ceteh cebac 4-pela eu age talildoin. Dana matu eu age taliladein. Uqa kom 7-pela, uqa ameg 7-pela. Eu age Anutna kis 7-pela, Anut suladecceb mahamaha cunugna beladein. <sup>7</sup> Odocob Sipsip Nag eu limei king biley cabalna bilina uqa eben meulanadec jaqec je col qoc on. <sup>8</sup> Uqa jaqec je col qoc u hedocob ceteh cebac 4-pelaca, dana matu 24ca age Sipsip Nag amegna toni mahuli cosolein. Age osolosol gita cinigwe hewein. Ageha osolosol boh goldna mudec hewein. Boh goldna mudec eu cunug ja casuc dedeman me bahic am bein. Ja casuc dedeman me bahic eu Anutna qagu coboc dana cajaca agena inondoc. <sup>9-10</sup> Odimeig age due haun oso odi slein:

"Age qihecebil cal mem.

Hina hinana ihanec cal mecna Anutnu dana caja sihil filfilnadecca, je madec filfilnadecca, dewenega filfilnadecca, hatu filfilnadecca fajadem.

Hina odadecem age nawel tawec ihanec dana ibuldoein, age cofaadi bibilebil egena Anut cewel utoin.

Age mahamaha cunug agena king biluqagan

Eunu hina jaqec je col qoc eu umeg uqana sisi mec libec wagaladecnu ihoc," ein.

### *Age cunug Sipsip Nag binan sulein*

<sup>11</sup> Odocob ija haun feciimig ensel mati bahic, am geh bahic jejenega dah mem, eu sanijecnu ihoc qee. Age king biley cabalca, ceteh cebac ageca, dana matu ageca taliladein:

<sup>12</sup> Age conoga suli u due slein:

"Sipsip Nag qoin eu uqa gagadic odocca, cehewan gehca, doc silecca, hihibanca, binan sulecca, kobolkobolca, eeldocca ocnu ihoc," ein.

<sup>13</sup> Odocob ija ceteh filfil age sao jobonna bileygina, age mahana bileygina, age maha bisaluna bileygina, age macasna bileygina eu age cunugca due sisilegin dah mem:

"King biley cabalna bilinaca Sipsip Nagca ale kobolkobolca, ale hihibanalaca eunu ege gaid eelalecomun catanena,

ege gaid binanala sulalocomun catanena," ein.

<sup>14</sup> Odocob ceteh cebac 4-pela eu age madein, "Mele!" ein. Odocob dana matu age toni mahuli cosolimeig cuha fein.

## 6

### *Sipsip Nag uqa sisi mec libec wagaladen*

<sup>1</sup> Odocob ija Sipsip Nag uqa jaqec je col qoc hehwei sisi mec libec osahicdoc eu wagaleceb fem. Odocob ija ceteh cebac 4-pela eundec oso uqa jejeg udududonawe

mateceb dom, "Hina hoga!" ten. <sup>2</sup> Odocob ija feciimig hos caubca oso cacaen fem. Dana uqa hos tatacan bilen eu qalic hewen. Anut uqa han wooldocnu king katakat oso uten. Odocob uqa nuimei han wooladecnu cobon. Uqa han woolaadiaadi cobon.

<sup>3</sup> Odocob Sipsip Nag uqa sisi mec libec lecisdoc eu wagaleceb ija ceteh cebac lecisdoc eu mateceb dom, "Hina hoga!" ten. <sup>4</sup> Odocob hos oso calen, eu golca bahic. Anut uqa dana hos tatacan bilen eu cois ec madocob dana age qocobqocobececnu uqa dana cajaca age mahana bilegina odadeceb malol qee bilegina, age han cadecnu himec bilegina. Anut uqa han cadec sign ben oso cabi eu ugianno uten.

<sup>5</sup> Odocob Sipsip Nag uqa sisi mec libec cijeddoc wagaleceb ija ceteh cebac cijeddoc eu mateceb dom, "Hina hoga!" ten. Odocob ija feciimig hos casca cacaen oso fem. Odocob dana uqa hos tatacan bilen uqa ebenna skel oso hewen. <sup>6</sup> Odocob ija ceteh cebac 4-pela gemonadec jejeg oso cinigwe odi madeceb dom, "Hinana cabi ocnu nuecem sabnu cabel ben caligian. Dana cajaca cunug age wit lita osol eu cabi oc deel osolnu qaig ocna fajoqagan! Age bali lita cijed euha cabi oc deel osolnu qaig ocna fajoqagan! Euqa hina mool wainca cain me qee malagaun!" ein.

<sup>7</sup> Odocob Sipsip Nag uqa sisi mec libec 4-peladoc eu wagaleceb ija ceteh cebac 4-peladoc eu mateceb dom, "Hina hoga!" ten. <sup>8</sup> Odocob ija feciimig hos jan jedocca cacaen fem. Dana uqa hos tatacan bilen ijan eu Cal Mec. Odocob Dol Jobon\* eu toodu cemenug hon. Odocob Anut eu age dana cajaca mahana bilegina naaha qatani 4-peladoc oso aqecnu cabi gagadic odoc alen, eu ale han siginnaca, sabnu cahelnaca, hag me qee mecnaca, dool cus mahadanad eunaca aqeceil cal mecnu alen.

<sup>9</sup> Odocob Sipsip Nag uqa sisi mec libec 5-peladoc wagaleceb ija ihanec cabal bisaluna dolonogail leih ninjegin fem. Dolonogail eu dana age Anutna jenua, age me je qasali maadein eunuca aqeceil cal mein agena. <sup>10</sup> Dolonogail eu age jejenega ben utai madein, "O Ben, hina gun, hinana ceteh cunug eu mele himec! Ege hina dana cajaca mahana bilegina age qigein eu gesiladimeg ameg wadacadogannu saen ganic sumudeqan?" ein. <sup>11</sup> Odocob Anut eundec osolosol lotoc cecelac senenecca adimei age aqeinwe odi agena cabi cotogailca wawaga meleec cotogailca age aqoqagan eu sanijec ihoc ligiannu age nag odi jaen mudeigale ec maaden.

<sup>12</sup> Odocob Sipsip Nag uqa sisi mec libec 6-peladoc eu wagaleceb ija feciimig mim ben nenen fem. Odocob cam ibuldumei tu hon, eu bek duh noc cinigwe. Odocob jagel ibuldumei golten, eu golac cinigwe. <sup>13</sup> Odocob malaqa age na dan fufu ben bahic fuludu lahiluhududueceb dan aig qee buic mec tonoginawe saonadec mahana tonein. <sup>14</sup> Odocob sao jausen, eu jaqec je col qonawee col qon. Odocob aluhca nuica cunug agena cudun culimeig onoca belein. <sup>15</sup> Odocob mahadanad king ageca, dana ijanagaca, han dana benbenca, dana cehewanagaca, dana gagadicca, dana qee besiadecca, dana besiadecca, dana age meen hatinnanaca meen ben aluhna njeginna eunanaca cunug busali limeig jahunein. <sup>16-17</sup> Age meen ben aluhcanu utai maadein, "King bilec cabalna bilinaca, Sipsip Nagca ale gemanala becnu deel ben eu wele hon. Oso uqa eu wooldocnu ihoc qee bilel. Eunu age ege gubogimeig king bilec cabalna bilina uqa olaca, Sipsip Nag ugana gemag becca eunu juhunigeiga!" ein.

## 7

### *Anut uqa Isrel dana 144,000 sisi maden*

<sup>1</sup> Ceteh eu hedocob ija ensel 4-pela age maha medeh 4-pelana tatawegin fem. Age mahana fufu 4-pela gagadicca eu mahafo, macasfo, na osofo fuluadeiaunnus hewein. <sup>2</sup> Odocob ija ensel oso uqa cam tobi bena isec cali hohon fem, uqa Anut cebac bilina uqana sisi mec hewen. Uqa co suli u ensel 4-pela Anut maha macasca me qee mudoqagannu gagadic odoc aden eu utai <sup>3</sup> maaden, "Age mahafo, macasfo, nafo eu mahuc cain me qee madowain. Ege casac egena Anutna sisi mec eu ugana cewel oc dana ilomoga domonnana madeqan," aden. <sup>4</sup> Odocob ija dana cajaca sisi madec oin eu sanijec 144,000 ec dom, eu dana cajaca 144,000 age Isrel agena sihul cunugnadec.

<sup>5</sup> 12,000 age Juda sihulnadec age sisi madec oin,

12,000 age Ruben sihulnadec age sisi madec oin,

12,000 age Gad sihulnadec age sisi madec oin,

<sup>6</sup> 12,000 age Asa sihulnadec age sisi madec oin,

12,000 age Naptalai sihulnadec age sisi madec oin,

12,000 age Manasa sihulnadec age sisi madec oin,

<sup>7</sup> 12,000 age Simion sihulnadec age sisi madec oin,

12,000 age Liwai sihulnadec age sisi madec oin,

\* **6:8:** Grik je i bahic eu "oloqanah"

12,000 age Isaka sihulnadec age sisi madec oin,  
 8 12,000 age Sebjulan sihulnadec age sisi madec oin,  
 12,000 age Josef sihulnadec age sisi madec oin,  
 12,000 age Benjamin sihulnadec age sisi madec oin. Dana i cunug age Anutna sisi mec oin.

*Dana cajaca cegulec am ben bahic age Anutnu cuha fein*

<sup>9</sup> Ceteh eu hedocob ija feciimig dana cajaca cegulec am ben bahic fem, oso sanijadecnu ihoc qee biele. Dana cajaca i age dewenega filfilnadecca, sihul filfilnadecca, hatu filfilnadecca, je madec filfilnadecca age king bilec cabalca Sipsip Nagca amalana tawein. Age lotoc cecelac senenec tacecca hinahin ebenegana hewecca tawein. <sup>10</sup> Age conoga suli u madein:

“Egena Anut uqa king bilec cabalna bilinaca Sipsip Nagca ale cahahagesin eunu binanala suluguna!” ein.

<sup>11</sup> Odocob ensel cunug age king bilec cabalca, dana matu ageca, ceteh cebac 4-pelaca taliladimeig king bilec cabal amegna toni mahuli cosolimeig Anutnu cuha fein. <sup>12</sup> Age odi madein:

“Mele bahic!

Ege egena Anut uqa kobolkobolca, doc silecca, binanca, gagadic odocca, hihibanca eunu ege gaid eeldocomun catanena,  
 ege hegaga ec gaid madocomun catanena!

Mele bahic!” ein.

*Dana i age dain ben adec eu qila qee mena*

<sup>13</sup> Odocob dana matu eundec oso sisilti maten, “Dana cajaca lotoc cecelac senenecca tacec eundec age an? Dana cajaca eu age anadec hoin?” ten.

<sup>14</sup> Odocob ija jejeg hewi madon, “O Dana Ben, ija qee dugina qa hina dogona,” don.

Odocob uqa maten, “Dogona, dana cajaca i age cilehadec ben eunadec cagasiaden. Age agena lotoc cecelac wasacudein, agena lotoc eu Sipsip Nag golacna soidocobil senen men.

<sup>15</sup> Eunu

‘age Anutna king bilec cabal amegna tatawi uqana tempelna cahineg witicca gaid cewel utogina.

King bilec cabalna bilina uqa agena cofadec gaid biligian.

<sup>16-17</sup> Sipsip Nag uqa king bilec cabal gemona tawea uqa sipsip cofadec danawe cofadigian. Eunu age haun wen qee adeiaun, wa gab qee adeiaun.

Cam haun dewenega qee cijadeiaun, dain oso qee welacadeiaun.

Odimei uqa iwaladi cocobi cebac bilec wa fifiji becna euna ehi li madigian.

Odocob Anut uqa amaga amulunuga cunug cacu heliadigian,’ en,” ten.

## 8

*Sipsip Nag uqa sisi mec libec 7-peladoc eu wagalen*

<sup>1</sup> Odocob Sipsip Nag uqa sisi mec libec 7-peladoc eu wagaleceb sua na ha odi sao jobon tilieb bahic nijen. <sup>2</sup> Odocob ija ensel 7-pela Anut amegna tatawegin fem. Age taul 7-pela adein.

<sup>3</sup> Odocob ensel oso uqa humei ihanec cabal cemenug tawen. Uga boh goldna mudec ja casuc dedeman me bahic wawasen hewen. Age uga ja casuc dedeman geh bahicca, Anutna qagu coboc dana cajaca cunug agena inondocca ihanec cabal goldna mudec tatacan eu king bilec cabal amegna tawen euna gabanalecnu utein. <sup>4</sup> Odocob ja casuc dedemanca Anutna qagu coboc dana cajaca agena inondocca gabanalec alena ja casuc ensel uqa Anut amegna tawen ebennadec caji ten. <sup>5</sup> Odocob ensel eu boh ja casuc dedeman me bahicca eu umei ja ihanec cabalnadec eu taceceb am beceb uqa mahana qeleceb toni non. Eu qeleceb udududoc uceldoc bencal caleceb amel faleeceb mahana mim non.

*Ensel 4-pela age agena taul fuldoin*

<sup>6</sup> Odocob ensel 7-pela age agena taul 7-pela fuldonu saciادoin.

<sup>7</sup> Ensel osahidoc eu uqana taul fuldon. Odocob wa ais aigca jaca, golacca gabanadec calimei nu mahana toni non. Odocob maha na ha qatani cijeddoc oso eu ja cijen, odocob na cunug agena na ha qatani cijeddoc oso eu ja cijen, odocob gigisac cadibca cunug eu ja cijen.

<sup>8</sup> Odocob ensel lecisdoc eu uqana taul fuldon. Ceteh oso eu fecnu aluh benwe ja ciji teten macasna toni non. Odocob macas na ha qatani cijeddoc oso eu golac ibuldon. <sup>9</sup> Odocob

cebac bielec cetehe macasna bilegina age naha qatani cijeddoc oso eu cal mein. Odocob wag ben age naha qatani cijeddoc oso eu fadalein.

<sup>10</sup> Odocob ensel cijeddoc eu ugana taul fuldon. Malaqa ben bahic oso uqa cejalwe gowona saonadec toni non. Eu wa age naha qatani cijeddoc osa toni non, wa fifiji bec euna toni non. <sup>11</sup> Malaqa ijan eu Gulihinca. Wa naha qatani cijeddoc oso eu gulihinca calen. Odocob wa eu gulihincanu dana mati age wa eu jimeig cal mein.

<sup>12</sup> Odocob ensel 4-peladoc eu ugana taul fuldon. Age camca, jagelca, malaqa cunugca agena fulacdoc naha qatani cijeddoc oso eu tu caligliannu age naha qatani cijedadec oso aqein. Odocob cahineg naha qatani cijeddoc oso cam qee fulacdol, odocob witic naha qatani cijeddoc oso jagel malaqaca qee fulacdoloin.

<sup>13</sup> Odocob ija feciimig man fululec ben cababac cinigwe uqa sao ohisna fululi cocobi co suli umei utai madeceb dom, “O, dana cajaca cunug mahana bilegina eu age walocca bahic, walocca bahic, walocca bahic! Saen ensel cijed eu age haun taul fuldoqaga bili eunu odoc walocca bahic adigian!” en.

## 9

### *Ensel 5-peladoc taul fuldon*

<sup>1</sup> Odocob ensel 5-peladoc eu ugana taul fuldon. Ija malaqa oso saonadec mahana totonen eu fem. Anut uqa ki oso uten, eu maha heel ben eu dunuh bahic non gugca qee eu ugana. <sup>2</sup> Malaqa eu heel ben eu ugana cebec hudeceb casuc eu ja ben bahic ugana casuc calenawee heel ben eunadec calen. Odocob casuc heel ben eunadec caleceb eu cam saoca jahulaleceb tu mesin. <sup>3</sup> Odocob casucnadeb sis mati bahic age mahana toni nein. Anut uqa sis eu gagadic odoc eu lachbaia mahadanadec agena gagadic odocwe aden. <sup>4</sup> Odocob Anut uqa age gigisac mahana, cetehe oso cebac bagacca, na cunugca, cain me qee madowainnu maaden. Euqa dana cajaca age Anutna sisi mec ilomoga domonna qee tawel eu himec me qee madoqagannu maaden. <sup>5</sup> Odocob Anut uqa sis eu culadeceb age jagel 5-pela dana cajaca aqi jejegin dain ben aden, qa culadeceb age dana cajaca aqi jejegin dain ben aaden qee cal melein. Sis eu agena aqi jeceb dain ben aden adec eu lachbaia aqi jeceb dain ben adenawee odi. <sup>6</sup> Saen euna dana cal moqagannu jic waloqagan qee gulucdowain. Age cal mecnu gaunan manogagan qee cal nec eu agenu busaligian.

<sup>7</sup> Sis eu age hos han cadoqagannu saciadu taweginawe odi fem. Age ilomogana eu king katakat goldna mudec cinigwe gulodoin. Age olanaga eu dana olanagawe. <sup>8</sup> Age gosiniga eu caub caja gosiniga cinigwe. Age aimiga eu laion aimiga cinigwe. <sup>9</sup> Age culunuga eu kapa siot cinigwe jahuldoin. Age hojonoga eu karis geh bahic hos diadeceb hanna guguli bebelegin karis uceldonawee. <sup>10</sup> Age hohunuga eu lachbaia hohunuga dudulencia cinigwe. Age dana cajaca jagel 5-pela odi aqi jejegin dain ben aadien eun uqana gagadic odoc eu hohunugana nijia. <sup>11</sup> Agena king eu ensel uqa maha heel ben dunuh bahic non gugca qee eu cofdona. Hibru agena jena ensel eu ijan eu Abadon. Grik agena jena ijan eu Apolian, alena gug eu Fadaladec Dana.

<sup>12</sup> Odoc walocca osahicdoc eu hedon. Faga, odoc walocca lecis haun howasannu nijia.

### *Ensel 6-peladoc eu taul fuldon*

<sup>13</sup> Odocob ensel 6-peladoc eu ugana taul fuldon. Ija jejeg oso eu kom 4-pela ihanec cabal goldna mudec eu Anut amegna tawen eunadec dah mem. <sup>14</sup> Jejeg eu ensel 6-peladoc eu madon, “Ensel 4-pela eu age Jufretis wa benna jeladec bilegina eu cufaladecem beleiga,” don. <sup>15</sup> Odocob uqa 4-pela eu cufaladeceb belein. Ensel 4-pela eu age aua euna himec, deel euna himec, jagel euna himec, cabi gel euna himec age dana cajaca cunug naha qatani cijeddoc oso aqeceil cal moqagannu saciadoc bilia. <sup>16</sup> Han dana age hos tatacan bilein eu agena sanijec eu 200 milion odi eunu dah mem. <sup>17</sup> Ijana majaudocna han dana hos tatacan bibilegin odi fem. Han dana age kapa siot tacein, eu agena bala eu golca bahic ja cinigwe, eu cadibca bahic, eu janca bahic sulfa cinigwe. Hos ilomoga eu laion ilomoga cinigwe, age conoganadec jaca, casucca, ja meen jan dainca calen. <sup>18-19</sup> Hos eu agena gagadic odoc eu conoganaca hohunuganaca nijina. Age hohunuga eu man sononec ilo cinigwe, age euna dana cajaca aqi jeadegina. Odocob dana me qee madecnu cetehe cijed eu age jaca, casucca, ja meen jan dainca conoganadec calena euna dana cajaca cunug age mahana bilegina eu naha qatani cijeddoc oso aqeceil cal mein.

<sup>20</sup> Odocob dana cajaca leih age me qee madecnu cetehe cijed eu qee aqeceil cal melein eu age agena kadan tibud age ebenegana mudadein eunu qee hibemdoloin. Age kadan tibud me qee eu goldnaca, silwanaca, brasnaca, meennaca, nanaca mudec ageca, buga me qee ageca agenu cuha fegina eunu qee tului falidoloin. Kadan tibud eu age fecwe qee, age dah necwe qee, age cobocwe qee. <sup>21</sup> Dana i age agena dana aqecnu odoc euca,

agen a ceeh jeladecnu odoc euca, agena silail cajaca nijecnu odoc euca, agena heje ocnu odoc euca eu cunugnu qee tului falidoloin.

## 10

*Ensel oso uqa Jon jaqec je col qoc nag oso uteceb jen*

<sup>1</sup> Odocob ija ensel gagadic odoccia oso sao jobonnadec nenen fem. Uqa dewegna taen oso lotocwe taqen, uqa ilo walna talildon, uqa ola eu cam ameg cinigwe, uqa jaih eu nah man jaca cinigwe. <sup>2</sup> Uqa jaqec je col qoc nag oso huleldoc ninijen ebenna hewen. Uqa jaih meula eu macasna mimei jaih anse eu mahana men. <sup>3</sup> Odocob uqa laion euenawe co suli umei utaen. Uqa eui hedocob udududoc 7-pela eu age guhudumeig age agena je madein. <sup>4</sup> Age je madi hedodogin ija je jaqie odomqa ija jejeg oso sao jobonnadec dah mimigin maten, “Udududoc 7-pela i age guhududu madein eu hina jahuni cisdochna himec mecem bilia. Cain jaqagaun!” ten.

<sup>5</sup> Odocob ensel macasnaca mahanaca dacali tatawen fem eu eben meula ohisdocob sao jobonna teceb <sup>6</sup> uqa uqa gaid bileceb catanena eu uqa saoca mahanaca macasca ifanaden, eu cunug euna bilegina ifanen eu uqa ijanna je cagu maden. Uqa odi maden, “Anut uqa haun qee daleeaun! <sup>7</sup> Euqa ensel 7-peladoc eu uqana taul fuldugian saen euna Anut uqa uqana jahunec je wele uqana cewel utoc dana eu, je hahun madec dana maaden eu uqana aig camasac mudigian,” en.

<sup>8</sup> Odocob jejeg sao jobonnadec maten ija wele dah mem eu haun maten, “Hina limeg jaqec je col qoc nag eu huleldoc ninijen ensel uqa macasnaca mahanaca dacali tawena eu uqa ebenna nijia eu oga,” ten. <sup>9</sup> Odocob ija enselca limig madom, “Hina jaqec je col qoc nag hewagana eu itiga,” dom. Odocob uqa ija maten, “Umeg jaga. Eu hina wawinna gulihin tigian qa hina conna eu tinca uben wa cinigwe ibuldugian,” ten. <sup>10</sup> Odocob ija ensel eu ebennadec jaqec je col qoc nag eu umig jem. Odochomin eu conina tinca uben wa cinigwe tebandom qa jigin ni hedochomin wawi dunuhna eu gulihin ten.

<sup>11</sup> Odocob age matein, “Hina Anutna je hahun eunu dana cajaca age dewenega filfilnadecca, age hatu filfilnadecca, age je madec filfilnadecca, king filfilca eu maadeiga,” tein.

## 11

*Anutna je qasali maadec dana lecis*

<sup>1</sup> Odocob oso gadac ihoc mec na oso iten, eu kom cinigwe. Odocob Anut maten, “Caji limeg Anutna tempelca ihanec cabal euna bilinaca, dana cajaca age euna cuha feginaca cunug ganic sanijadaga. <sup>2</sup> Euqa ija gel maha gemo isec cudun eu Juda dana qee eundec adem.\* Age jagel 42 leceb Taun Gun eu lahacdoqagan.† Eunu hina cudun eu cain gadac sanijigaun, eu culuga. <sup>3</sup> Ija ijanu je hahun qasali maadec dana lecis gagadic odoc alecemin ale lotoc bek duh noc cinigwe taqowasan eu ale deel 1,260 ijanu je qasali maadowasan,” ten.

<sup>4</sup> Dana lecis i ale eu na oliw lecisca, gowoc lecisca eu maha cunug uqana Tibud amegna tawesina.‡ <sup>5</sup> Odocob oso me qee maligiannu odocobfi ja conolanadec cali humei alena cad eu cijadigan. Dana oso uqa me qee maligiannu odona eu odi cijeceb cal migian. <sup>6</sup> Anut uqa gagadic odoc aleceb ale je hahun mamadebil saen euna sao hudeceb wa qee neiaunnu gagadic muduwasan. Anut uqa gagadic odoc aleceb ale wa fifiji bec golac ibuldugianu gagadic muduwasan. Ale dana cajaca mahana bilegina eu me qee madecnu ceteh filfilna aqowasannu gagadic mowasan. Ceteh cunug odocnu ale alena gale alecna eu odi odowasan.

<sup>7</sup> Ale Anutna je qasali maadi hedocobil saen euna dool cus me qee uqa maha heel ben dunuh bahic non gugca qee eunadec ohis tobi bigian. Uqa han cadimei woolalimei aqaleceb cal mowasan. <sup>8</sup> Odocob ale dewenela ganac eu taun ben uqana jicna nijesin, alena Tibud age na babalecna tuitu qocobil cal men euna. Ege galolo je madecna taun ben eu madi, Sodom Isipca ogona. <sup>9</sup> Odocob dana dewenega filfilnadecca, sihil filfilnadecca, je madec filfilnadecca, hatu filfilnadecca age cunug deel cijed nahaca leceb ale dewenela ganac fecialein. Dana eu age heel cisalecnu cois qee owain. <sup>10</sup> Je hahun madec dana eu ale dana cajaca mahanadec wawaga columen sogoecca adowasan. Eunu dana cajaca

\* **11:2:** (naha osoldoc) Age je Aposel 21.30na nijia eu feiga. † **11:2:** (naha lecisdoc) Jagel 42 eu odi deel 1,260fo, cabi gel cijedca cabi gel nahacafo. Age Daniel 7.25ca, 9.27ca, 12.7ca eu feiga. Je i Juda dana qee eundec age Jerusalem lahadoin eu Luk 21.24na nijia. ‡ **11:4:** Age Sekaraia 4.1-5ca, 4.10-14ca, Jahunec Camasac Muden Je 1.12ca eu feiga. Doc dana leih age dana lecis i ale Moses Ilaijaca ec cisdogina.

age mahana bilegina eu age ale cal mesinnu age ceeli celeboqagan, age ceteh bagol utecebuteceboqagan.

<sup>11</sup> Odocob deel cijed nahaca hedocob Anut cebac biley kis suldocob ale dunuhna len. Odocobil ale wasimesi tawesin. Odocobil cunug age facialimeig age geh bahic cucuein. <sup>12</sup> Odocob je hahun madec dana lecis eu ale jejeg ben oso sao jobonnadec maaleceb dah mesin, “Ohis ene besial!” aleceb alena cad amagana ale taenna sao jobon tesin. <sup>13</sup> Saen euna dih mim ben neceb taun ben eu naha qatani 10-peladoc oso eu fadalen. Odocob dana cajaca 7,000 odi cal mein. Dana cajaca leih bilein eu age geh bahic cucuein. Odocob age Anut uqa sao jobon bilia eu binan solein.

<sup>14</sup> Odoc walocca lecisdock eu hedoia qa faga, odoc walocca cijeddoc eu isi hugian.

#### *Ensel 7-peladoc taul fuldon*

<sup>15</sup> Odocob ensel 7-peladoc eu ugana taul fuldon. Odocob jejenega ben sao jobonna utai maden:

“Mahana cul eu eguna Tibud, ugana Kraisca alena cul ibuldon.

Uqa king gaid cofadi bileyeb catanigian,” en.

<sup>16</sup> Odocob dana matu 24 age agena king biley cabalna Anut amegna bilegina eu age toni mahuli cosolimeig Anutnu cuha fein. <sup>17</sup> Age madein:

“O Anut Tibud gagadic odocka,

    hina qila biligina,

    hina gaid bilolog,

    hina hinana gagadic odoc umeg mahana king bileyen sanan maga.

Eunu ege hegaga hoqona!

<sup>18</sup> Juda dana qee eundec age gemanaga beia qa

    hina gemain becnu saen eu qila caleia.

Qila hina cal nec dana gesiladegan.

Qila hina hinana cewel oc dana, eu age je hahun madec danaca, qagu coboc dana eu age  
    dana hina ijainnu cumunegina euca, age ijanagaca, ijanagaca qee eu agena aig qoc  
    wadacadege!

Dana age dana cajaca mahana bilegina eu fadladegina eunu qila wadac fadladegi!”  
ein.

<sup>19</sup> Odocob Anutna cuha jo sao jobon bilia eu huden. Age cuha jo dunuhna Anutna bal  
cehec je alildoc cudaug eu ono camasac tatawen fein. Odocob amel falefaleeceb uceldoc  
benca calecebili qeli ququeceb mahana mim nen, wa ais aig culumenca nen.

## 12

### *Jon uqa caja oso man sononec benca facienal*

<sup>1</sup> Odocob sao jobonna kobolkobol ben oso cali hon. Caja oso biley, uqa dewegna cam  
eu lotocwe taqen, jagel eu jaib bisalu nijen, uqa ilona eu king katakat tacen eu malaqa  
12-pelana mudec. <sup>2</sup> Uqa melca biley, uqa mel basecnu dain adena eu ugaca cali hon.  
Uqa mel basigiannu dain don eu me qee bahic odudeceb uqa gehca utaen. <sup>3</sup> Odocob sao  
jobonna kobolkobol ben oso haun calen. Eu man sononec ben gelca ono tawen. Uqa ilo eu  
7-pela, ugana kom eu 10-pela. Ugana ilo 7-pela euna king katakat nag abesabes guloaden,  
eu cunug eu 7-pela. <sup>4</sup> Odocob uqa hohugna malaqa naha qatani cijeddoc oso saonadec  
segadimei mahana qeladeceb tonoin.

Odocob man uqa caja eu uqa mel baseceb jigiannu amegna tawen. <sup>5</sup> Odocob caja eu  
mel manahal basen, mel eu uqa ain kom hewimei dana cajaca sihil cunugnadeb gagadic  
odocna cofadigian. Euqaa Anut odocob mel nag eu mahucwe ohis ti nui Anutca ugana king  
biley cabal euna ten. <sup>6</sup> Caja eu busali wadauna nuen, Anut ugana cudun saciadonnu. Ono  
age cofdumeig deel 1,260 leceb sab utuqagan.

<sup>7</sup> Odocob han ben sao jobonna cali hon. Maikel ugana enselca age man sononec ben eu  
cadein. Odocob man sononec ben eu ugana enselca age wadacdu cadein. <sup>8</sup> Euqa uqa han  
wooldocnu gagadicca qee. Odocob uqa ugana ensel am gami haun sao jobonna bileyen  
qee telein. <sup>9</sup> Odocob age man sononec ben eu qeludecebili tonen. Man sononec ben eu  
wele gug qoc saenna biley, age Balijec Dana egina, age Setenha egina. Uqa dana cajaca  
cunug age mahana bilegina eu uhuladec dana. Age ugaca ugana enselca qeladecebili  
mahana tonein.

<sup>10-11</sup> Odocob ija sao jobonna jejeg ben oso dah mimigin utai maden:

“Seten uqa eguna Anut amegna eguna cotigeil cahineg witicca age deweneganu um ququ  
    tawena eu age qeludecebili mahana tonen.

Age agedodoc cebac biley hewecnu qee odoloin qa age agena wawaga meleecnu cal mein.

Eunu ege cotigeil Sipsip Nag uqana ihanec cal mecnaca, agena je mele qasali maadecnaca age Seten wooldoin.

Qila eguna Anut uqa uqana dana cajaca cahahaadigian!

Qila uqa uqana gagadic odoc umei uqa king bibili cofadigian!

Qila uqana Krais eu uqa ijan ben umei maha cunug cofdugian!

<sup>12</sup> Eunu age sao jobonna bilegina eu ceeleigale!

Euqa Seten uqa uqana saen eu gothic eu uqa donanu uqa gemag ben, uqa age mahanaca macasnaca bilegina ageca toni nen.

Eunu age walocca bileginal<sup>13</sup> en.

<sup>13</sup> Odocob man sononec ben eu qeludecebil mahana tonen ec dumei uqa caja mel manahal basen eu jabi cobon. <sup>14</sup> Oso caja eu man fululec ben bahic cababac cinigwe eu uqana hojon lecis eu uteceb uqa man sononec cemenugdec fululi nui uqana cudun wadauna ligian. Ono cabi gel cijed nahaca leceb age sabna cofdoin. <sup>15</sup> Odocob man sononec ben eu conadec wa cue eu caja eu gahidu hewi ehi nuigiannu basecdocob cali hu li caja eu toodon. <sup>16</sup> Euqa maha uqa caja eu cesuldon, uqa biah aimei wa man sononec ben conadec cali hon eu belucdon. <sup>17-18</sup> Odocob man sononec ben eu caja eunu gemag ben. Uqa caja eu uqana mel leih han cadecnu nuen. Mel leih eu age Anutna loo je toodogina, age Jisasnu je qasali maadegina.

## 13

Odocob man sononec ben eu macas lanna li tawen.

### *Dool cus me qee lecis calesin*

<sup>1</sup> Odocob ija dool cus me qee oso macasnade cal beben fem. Uqana kom eu 10-pela. Uqana ilo eu 7-pela. Uqana kom 10-pela abesabes eu king katakat nag gulodon. Eu ilonata ijanganaga nijen. Ijanaga gug eu Anutnu je me qee maden. <sup>2</sup> Dool cus me qee ija fem eu lepat cinigwe, uqa jaih eu bea jaih cinigwe, uqa co eu laion co cinigwe. Odocob man sononec ben eu uqana gagadic odocta, uqana king bilec cabalca, cofadec cabi benca uqa dool cus me qee eu uten. <sup>3</sup> Dool cus me qee uqana ilo oso eu han sigin qeli qocobil cal mec ola onqa isoh qee meceb ilo hulufan nijen. Odocob dana cunug mahana bilegina eundec age dool cus me qee eunu tumatumaeig toodu coboin. <sup>4</sup> Man sononec ben uqa dool cus me qee eu cofadec cabi uternu dana age man sononec bennu cuha fein. Odocob age dool cus me qee eunu ha cuha fefeig madein, “Oso uqa dool cus me qee cinigwe qee bielel. Oso uqa cadecnu ihoc que bielel,” ein.

<sup>5</sup> Odocob Anut uqa dool cus me qee eu hawadocob uqadocob culai uqa Anutnu je me qee maden. Anut hawadocob uqa jagel 42 ihoc lelen uqa cofadec cabi hewen. <sup>6</sup> Uqa Anutnu je me qee maden. Uqa Anut ijannuca, Anutna biley cudadnuca, cunug age sao jobonna bilegina eundecnuca je me qee maden. <sup>7</sup> Anut hawadocob uqa Anutna qagu coboc dana cajaca cadimei wooladen. Anut uqa gagadic odoc uteceb uqa siluh filfilnadecca, dewenega filfilnadecca, je madec filfilnadecca, hatu filfilnadecca dana cunug agena cofadec biley. <sup>8</sup> Dana cunug age mahana bilegina eundec age Sipsip Nag age qocobil cal men eu uqana cebac biley bukna ijanaga qee jaqec taweia, eu age dool cus me qee eunu cuha foqagan. Ijanaga eu Anut maha cunug qee ifanec saen eunadec qee jaqec taweia.

<sup>9</sup> Oso dahigcafi dah meiale.

<sup>10</sup> Oso Anut age umeig gihacdoc jona mudencu madecebfu eu mele, age uqa gihacdoc jona muduqagan.

Oso Anut uqa han siginna qocobil cal mecnaca madecebfu\* eu mele, age uqa han siginna qocobil cal migian.

Je eunu Anutna qagu coboc dana cajaca age agedodoc hulunuga cehecnu, age agena wawaga meleec gagadic hewecnu cisoigale.

<sup>11</sup> Odocob ija dool cus me qee oso mahanaadec cali beben fem. Eu uqa kom lecisa, eu sipsip nagna kom cinigwe. Uqa man sononec benwe je maden. <sup>12</sup> Dool cus me qee milum eu uqa dool cus me qee matuna cofadec cabi oc dool cus me qee matu amegna cabi eu odon. Uqa dana cajaca cunug age mahana bilegina eundec maadeceb age dool cus me qee matu uqa han sigin qeli qocobil cal mec ola onqa isoh qee meceb ilo hulufan nijen eunu cuha fein. <sup>13</sup> Dool cus me qee milum eu kobolkobol benben odon. Uqa dana cajaca amagana odocob ja sao jobonnaadec mahana tonen. <sup>14</sup> Kobolkobol eu Anut hawadocob odon euna uqa dool cus me qee matu amegna dana cajaca mahana bilegina eundec uhuladen. Uqa age eundec maadeceb age dool cus me qee matu age han sigin qeli qocobil

\* **13:10:** Grik jaqec je hilah leihna age je fil oso jaqec eu odi: “Oso Anut uqa han siginna dana aqecnu madecebfu”

cal men qa cebac bilina eunu ihicon qoin. <sup>15</sup> Anut hawadocob uqa dool cus me qee matu ihicon eu cebac bileyecu kis uten. Odocob ihicon eu je maden. Ihicon eu maadeceb age dana age ihicon eunu qee cuha fegina eundec aqecel cal mein.

<sup>16</sup> Dool cus me qee milum eu maadeceb age dana cunug eu age ijanagaca eundecca, age ijanagaca qee eundecca, age cehewanagaca eundecca, age cehewanagaca qee eundecca, age besiadec bileyecu eundecca, age qee besiadec bileyecu eundecca agena ebeneba meulanafo, qee agena ilomoga domonna gaga oso oin. <sup>17</sup> Eunu oso uqa gaga euca qeefi eu uqa ceteh fajecnu ihoc qee, uqa ceteh idadeecnu ihoc qee. Gaga eu dool cus me qee matu uqa ijanfo, qee eu ijan uqana sanijec. <sup>18</sup> Age eu doqagannufi age doc silecca bileyecale. Oso uqa fogo dona eu uqa dool cus me qee matu uqana sanijec uqana gug ihoc doiale. Ge, eu danana sanijec oso, uqana sanijec eu 666.<sup>†</sup>

## 14

### Sipsip Nag uqana dana age due haun silein

<sup>1</sup> Ija feciimig Sipsip Nag eu Saion Aluhna tatawen fem. Uqaca dana 144,000 age uqa ijanca uqa Memeg ijanna ilomoga domonna jaqec tatawegin feciadem. <sup>2</sup> Odocob ija sao jobonnadec jejeg oso dah mem. Jejeg eu docnu wa ben quhodonawewe, eu docnu wa ben guhudonawewe. Jejeg eu dana age gita qoginawewe. <sup>3</sup> Dana 144,000 age king bileyec cabalca, ceteh cebac 4-pelaca, dana matu ageca age amagana fefeig tawein. Age ono due haun silein. Dana cunug age due eu docnu ihoc qee, euqa dana 144,000 eu Anut uqa mahanadec fajadi ceden eundec age dih due haun eu silecnu doin. <sup>4</sup> Dana eundec age dana cos, age caja gami qee nijoloig. Eunu age gegehinca qee.\* Dana eu age Sipsip Nag ana nueceb eu gaid toodoo belegina. Dana eu age sab magah age casac cabinadec umeig Anutnuca Sipsip Nagnuca ihanegina eu cinigwe. Eunu Anut uqa dana eundec dana cunug gemonadec fajadi ceden. <sup>5</sup> Cahuldoc oso agenu qee bileyec. Eunu age uhulec je oso qee madelein.

### Ensel cijed age je madein

<sup>6</sup> Odocob ija ensel oso sao ohisna fululi cocobon fem, dana cajaca cunug mahana bileyecu eundec age hatu filfilnadecca, sihul filfilnadecca, je madec filfilnadecca, dewenega filfilnadecca eu age cunug uqa me je demico bileyec eu maadigan. <sup>7</sup> Odocob uqa co suli u maden, “Anut uqa dana cunug gesiladigiannu saen eu wele cali hoia. Eunu age Anutnu cucuieigale! Uqa binan suleigale! Uqa saoca, mahaca, macasca, wa fifiji becca, ifanen eunu cuha feigale!” en.

<sup>8</sup> Odocob ensel lecisdock eu osahicdock toodoo maden, “Babilon taun ben eu wele fadali tonen! Eu wele fadali tonen! Babilon uqa wal kobol odon. Uqa odadeceb dana hatu filfilnadec cunug age toodumeig uqana wal kobol odoin, eu age wain eu gagadicca, eu belican me qeeca jecebel dalul aqenwe,” en.<sup>†</sup>

<sup>9</sup> Odocob ensel cijeddoc eu osahicdock, lecisdock tooalen. Uqa co suli u maden, “Oso uqa dool cus me qeefi, uqa ihiconfo eunu cuha fenafi, uqa ilo domonnafo, ebennafo gaga onafi <sup>10</sup> uqaha Anutna gemag bec jigian, eu wain jenawewe. Wain eu waca qee ibuldoc eu uqa gabinna basecdugian. Gabin eu uqana gemag bec eu am bigian. Dana eundec age dain adec ben oqagan. Jaca ja meen jan daina ale ensel gunca Sipsip Nagca age amagana dana eu cijadowasan. <sup>11</sup> Ja eunadec age dain aadeb eu uqana casuc gaid ohis teceb catanigian. Dana eu age dool cus me qeeca uqa ihiconca eunu cuha fegina eundecca, age uqa ijannu gaga ogina eundecca age witic cahinegca jaen qee muduwain,” en.

<sup>12</sup> Je eunu Anutna qagu coboc dana cajaca age agedodoc hulunuga cehecnu cisoigale, dana eu age Anutna loo je toodoo cobogina, age Jisasnu wawaga meleec hewegina.

<sup>†</sup> **13:18:** Age Hibru jeca, Grik jeca wele jaqoloig saen euna age nambaca qee. Age leta himec jaqoloig. Age namba oso jaqecnu gale adecebfii age uqana leta jaqoloig, eu odi. Leta “a” eu odi namba “1,” odimee leta “b” eu odi namba “2,” age odiodi jaqoloig. Eunu age dana oso ijan jaqfeig age ijanna leta fimeig agena namba gabandoi. Doc dana age namba 666 uqana gugnu cisdock filfilica. Euqa doc dana mati age Jon uqa Sisa Nero eunu madena. Eu Rom agena king me qee oso uqa Kristen dana cajaca mati bahic aqecel cal mein. \* **14:4:** Grik je eu “Dana eundec age dana cos, age caja gami qee nijoloig. Eunu age gegehinca qee.” ec maden. Euqa doc dana mati age je eu dana cajaca age Anutna kobol tutuc toodoo eunu galolo je madena ec cisdogina. <sup>†</sup> **14:8:** Jon uqa jaqec je i jaqec saenna Babilon taun ben eu saen cecelc bahic fadalen nijen. Eunu doc dana mati age Jon uqa Babilon bahic eunu qee madel ec cisdogina. Age Jon uqa Babilon age weleca kobol me qee odoin eunu cisdumei hatu fil oso eu kobol me qee odimeig age Anutna cad bilein eunu galolo je maden ec cisdogina. Dana leih age hatu oso eu Rom ec cisdogina. (Age je 1 Pita 5.13na nijia eu feiga. Dana leih age ijan i Babilon eu dana caja cunug age Kraisca, uqana tamanecca alena cad bilein eu ijanaga ec cisdogina.

<sup>13</sup> Odocob ija sao jobonnadec jejeg oso dah mimigin maten, “Je i jaqagale. Dana cajaca age qila i hibnaca Tibudnu wawaga meleecna cal moqagan eundec ceeloqagan!” ten. Kis madena, “Eu mele! Anut agena cabi ocnu aig me wadacadigian Eunu age agena cabi oc culumenga eu culimeig jaen muduqagan,” ten.

### *Mahana sab wal mec cedecnu saen*

<sup>14</sup> Odocob ija feciimig ija ono taen senenecca fem. Oso uqa taen euna bilen, uqa “dana melah cinigwe,” en. (Daniel 7.13)

Uqa king katakat goldna mudec eu ilona gubodon, uqa gunacil aigca bahic hewen. <sup>15</sup> Odocob ensel oso uqa tempelnadec cali hon. Uqa co suli u taenna bilen eu utai madon, “Mahana sab eu wele wal men. Sab qetecnu saen eu wele hon. Eunu hina hinana gunacilna sab eu qetadaga,” don. <sup>16</sup> Odocob taenna bilen eu uqana gunacil mahana wilidon. Odocob uqa mahana sab wal mec eu qetaden.

<sup>17</sup> Odocob ensel oso uqa tempelnadec sao jobonna cali hon. Uqaha gunacil aigca hewen.

<sup>18</sup> Odocob ensel oso uqa ihanec cabalnadec cali hon. Ensel eu uqa ja cofdona. Uqa co suli u ensel uqa gunacil aigca hewen eu utai madon, “Wain lihna aig eu cunug wele wal men. Hinana gunacilna wain aig mahana qetadaga. Hina wain lihna aig eu wain mahana nijia eu cedadaga,” don. <sup>19</sup> Odocob ensel uqana gunacil aigca eu mahana wilidumei wain aig eu uqa wain lihnadec cagadon. Odimei uqa hauadimei wain aig afdoc cudun benna qeladeceb dunuh noin, eu Anutna gemag bec. <sup>20</sup> Odocob wain aig afdoc cudun ben eu taun ben hahagum tawen. Ono age wain aig eu lahacluhucadein. Odocob golanaga eu wain aig afdoc cudun bennadec wa cuewe quhuli nuen. Wa cue eu 300 kilomita odi cecelac, eu mita lecis odi dunuh noc.<sup>‡</sup>

## 15

### *Ensel 7-pela age dana cajaca me qee madecnu ceteh 7-pela hewein*

<sup>1</sup> Odocob ija sao jobonna kobolkobel ben oso fem, ija eunu tumatumae. Ono ensel 7-pela tawein. Age dana cajaca me qee madecnu ceteh 7-pela hewein. Euna Anutna gemag bec eu qee migian. Eunu ceteh me qee madec eu eundec agena cit qoc.

<sup>2</sup> Odocob ija ceteh oso fem, eu macas cinigwe qa eu glasna mudec jaca ibuldoc eu cinigwe fem. Odocob ija dana cajaca age dool cus me qeeca, uqa ihiconca, oso uqa ijan eu 666ca wooladein euha fem. Age macas glasna mudec eu gesacna tawein. Age Anut gita aden eu hewi tawein. <sup>3</sup> Age Moses, uqa Anutna cewel oc dana, uqana due silein.\* Age Sipsip Nagna dueha silein:

“O Anut Tibud Gagadic Odocca, hinana odoc eu gagadic, eu me bahic!

O dana hatu filfilnadec cunug agena King, hinana odoc eu tutuc bahic, eu mele bahic!

<sup>4</sup> O Tibud, hina himec gun biligina.

In oso uqa hina qee cucuihiaun?

In oso uqa hina ijain qee suliaun?

Hinana tutuc odoc eu dana cunug amagana camasac feginia.

Eunu dana age hatuhatu cunugnadec age humeig hinanu cuha foqagan,” ein.

<sup>5</sup> Eu hedocob ija feciimig tempel sao jobonna tawen eu hudec fem. Talah jo eu egena sihul weledec age wadauna bibileig Anut uqa ageca bilen eu ihacadene tempel dunuhna bilen. <sup>6</sup> Ensel 7-pela age dana cajaca me qee madecnu ceteh 7-pela hewein eu age tempel dunuhnadec cali hoin. Age lotoc cecelac taqein, lotoc eu senenec bahic, eu soinodoc bahic. Age oologam goldna mudec age mugumugana taqein. <sup>7</sup> Odocob ceteh cebac 4-pela eundec oso uqa ensel 7-pela eu boh goldna mudec 7-pela aden. Boh goldna mudec eu Anut uqa gaid cebac bileyeb catanena eu uqana gemag bec am bein. <sup>8</sup> Odocob tempel eu ja casuc am ben. Ja casuc eu Anutna gagadic odocca kobolkobelca eunadec. Ensel 7-pela agena dana cajaca me qee madecnu ceteh 7-pela eu qee qee nec ninijen oso tempel dunuh lecwe qee.

## 16

### *Anutna gemag bec cit qoc*

<sup>‡ 14:20:</sup> Doc dana mati age taun ben eu Jerusalem ec cisdogina. Grik jena age “1,600 stadia” ec jaqein. Odocob eu qila 300 kilomita odi. Euqa ege tutuc bahic qee doqona. Jon uqa uqana gadac eu 300 kilomita bahic jaqecnu gale donfo, qee sanijec 1,600 uqa jagen eu ceteh fil osonu gadac menafo ege qee doqona. \* <sup>15:3:</sup> Je mati dac ina nijia eu odiwe Mosesna dodonu je. Moses uqa ceteh me qee odadeceb eu age Isip dana cajaca waadein. Odocob Isrel age macas qatani limeig age Isip hatu culdi hedumeig lan ono isec tatawegin Mosesca Isrel gami age Tibudnu due oso silein. Age Kisim Bek dac 15 feiga.

<sup>1</sup> Odocob ija tempelnadec jejeg ben oso dah mimigin eu ensel 7-pela eu age maaden, "Belimeig age boh 7-pela eu Anutna gemag bec am bec eu mahana basecadeiga!" aden.

<sup>2</sup> Odocob ensel osahicdoc eu limei ugana boh eu basecdocob mahana non. Odocob dain ben adecnu isomoga me qee eu dana i age dool cus me qee ugana gagaca bileyin, age uqa ihiconnu cuha fein eu ageca calen.

<sup>3</sup> Odocob ensel lecisdoc eu ugana boh eu basecdocob macasna non. Odocob macas eu golac ibuldon, eu dana cal mec golacwe. Odocob ceteh cunug macasna cebac bileyin eu cal mein.

<sup>4</sup> Odocob ensel cijeddoc eu ugana boh eu basecdocob waca wa fifiji becca euna non. Odocob age cunug golac ibuldoin. <sup>5-6</sup> Odocob ija wa cofdoc ensel eu dah mimigin maden: "O Dana Gun Bahic, hina qila biligina, hina gaid bilolog.

Mahanadec dana age hinana qagu coboc danaca hinana je hahun madec danaca age aqeceil age golanaga toneceb cal mein.

Odocob hina dana mahanadec age golanaga jecnus adem.

Age agena ameg oin, eu me bahic!

Eunu hinana gesiladec hina odoga eu tutuc," en.

<sup>7</sup> Odocob ija ihanee cabalnadec jejeg oso dah mimigin maden:

"O Anut Tibud Gagadic Odocca, hinana gesiladec eu mele bahic, eu tutuc bahic!" en.

<sup>8</sup> Odocob ensel 4-peladoc eu ugana boh eu basecdocob camna non. Eunu Anut culdoch cam bi ededeceeb agagimei cajaca cijaden. <sup>9</sup> Cam ugana gih ben eu cijaden. Odocob age Anut uqa ceteh me qee eu cofadena eu ijannu socaet je madein. Euqa age wawaga tutuc tului falicdumeig Anut binan qee sulelein.

<sup>10</sup> Odocob ensel 5-peladoc eu ugana boh eu basecdocob dool cus me qee ugana king biley cabalna non. Odocob ugana culna tu calen. Odocob dana age dain ben adecnu agedodoc beilamaga taicdoin. <sup>11</sup> Age isomoga me geenuea dain ben adecnu Anut sao jobon bilia eunu socaet je madein qa agena me qee odocnu qee tului falicdoloin.

<sup>12</sup> Odocob ensel 6-peladoc eu ugana boh eu basecdocob Jufretis wa benna non. Odocob wa eu galalen, eu cam tobi becnadec king hoqagannu jic qahiaden. <sup>13</sup> Odocob ija dolonoga gegehinca cijed eu cog cinigwe fem. Age man sononec ben biahnadecca, dool cus me qee biahnadecca, uhulec je hahun madec dana biahnadecca cali hoin. <sup>14</sup> Dolonoga eu age buga me qee agena kobolkobol odogina. Dolonoga cijed eu age hatuhatu cunug agena king ageca belegina eu ageca limeig age king eu Anut gagadic odocca ugana gesiladecnu deel benna han cadencu mede aqegina.

<sup>15</sup> "Dogina! Ija heje oc danawe hugen!\* Oso uqa ameg cebac bilina, uqa ugana lotoc taqena eunu uqa bical qee coboiau, uqa amagna qee majag doiau eu uqa ceelec biligian!" en.

<sup>16</sup> Odocob dolonoga gegehinca eu age king eu cedadi li cudun age Hibru jena Amagedon<sup>†</sup> egina euna mede aqein.

<sup>17</sup> Odocob ensel 7-peladoc eu ugana boh eu basecdocob saona non. Odocob jejeg ben oso king biley cabalnadec tempelnadec maden, "Eu hedoi!" en. <sup>18</sup> Odocob amel falefaleebeb uceldoc benca calecebil qeli ququeceb mahana mim ben bahic nen. Dana mahana bileyin eu saen cunugna mim eundec oso wele qee nel. Mim eu mim wooldoc oso qee nel. <sup>19</sup> Odocob taun ben eu qatani cijeddon. Odocob taun ben cunug mahana nijegina eu age toni aqen. Anut uqa Babilon Ben eunu cisdon. Uqa gabin uteceb uqa Anutna gabinnadec wain eu cunug ji hedon. Wain eu Anutna gemag jawe bec. <sup>20</sup> Odocob nui cunug busali beli hedoin. Aluh cunug qee mi hedoin. <sup>21</sup> Wa ais aig eu culumen ben bahic soanadec dana cajaca dewenegana toni nen. Wa ais aig eundec osol ugana culumen eu 50 kilogram odi. Dana age wa ais aig tonennu Anutna socaet je madein. Ge, wa ais aig tonen eu me qee bahic.

## 17

### Wal caja eu binanca

<sup>1</sup> Odocob ensel 7-pela age boh 7-pela hewein eundec oso humei maten, "Hina hogu. Ija wal caja binanca eu adi ugana gesildoc gulucdugiannu ihachigen, wal caja eu wa mati

\* **16:15:** Je i Jisas Kraisnu madena. † **16:16:** Ijan i "Amagedon" ugana gug eu "Megido Aluh." Weleca Isrelna cad age Isrel cadimeig Megido taun cemenug King Josaia qocobil cal men. Age 2 King 23.29-30ca, 2 Stori 35.20-24ca feiga. Doc dana leih age ijan i Megido bahicnu qee madena, euqa eu galolo je ec cisdogina. Eu cudun euna han dana am mati age limeig fadalooqagan eu ijan himec ec cisdogina.

bahic alildoc euna bilen. <sup>2</sup> Mahanadec king age uqaca nijein, dana cajaca mahana biledina eu age uqana wain jecebile dalul aqen. Wain eu uqana wal kobol odoc eunu,” ten.\*

<sup>3</sup> Odocob Kis ijaca hu hewiti ibulfeceb ensel eu wadauna ehi li miten. Ono ija caja uqa dool cus me qee golca oso tatacan bibilen fem. Dool cus me qee eu deweg cunugna ijan mati bahic eu Anutnu je me qee jaqec fem. Dool cus me qee eu ilo 7-pela euca bilen, uqa uqana kom 10-pelaca bilen. <sup>4</sup> Caja eu lotoc golca tacen. Gol bala filflica, meen jaca, gilolo qaig ohisca eu uqa deweg cunug jahuldoc. Uqa ebanna gabin goldna mudec eu hewen. Gabin eu ceteh bebesacca, ceteh gegehincaca am bec. Eu uqana wal kobol odoc eundec aig. <sup>5</sup> Uqa ilo domonna ijan jahunec oso jaqen eu:

“BABILON BEN,  
WAL CAJA CUNUGCA  
DANA KOBOL ME QEE ODOGGINA  
MAHANA BILEGINA EUNDEC  
AGE ANAGA,” en.

<sup>6</sup> Caja eu uqa Anutna qagu coboc dana cajaca golanagaca, dana cajaca age Jisasnu wawaga meleec qasali maadecnu aqeceil cal mein eu age golanagaca jimei dalul qocob bibilen eu ija fem. Ija uqa odi fimmig tumatumae.

<sup>7</sup> Euqa ensel eu sisilten, “Eetanu tumatumaaagan? Ija caja eunu jahunec gug mahigen. Ijaha dool cus me qee eu ilo 7-pela euca uqa uqana kom 10-pelaca uqa caja eu gahidona eu uqana jahunec gug mahigen. <sup>8</sup> Dool cus me qee eu hina faga eu wele bilen qa qila qee bilel. Uqa maha heel ben eu dunuh bahic non gugca qee eunadec cali bigia odona. Uqa limei isi uqana fadalec ugian. Dana cajaca age mahana biledina eu ijanaga cebac biley bukna Anut maha cunug qee ifanec ninijen saen eu hocob qila qee jaqec nijia eu age cunug dool cus me qee eu fefeig tumatumaoqagan. Ge, dool cus me qee eu wele bilen, qila qee bilina, qa hibna haun cali hugian,” ten.

<sup>9</sup> “Dana oso uqa doc silecca eu uqa cisdu cuhadoiale. Ilo 7-pela eu aluh 7-pela. Aluh euna caja eu bilina. Ilo euha king 7-pela eu odi.” <sup>10</sup> King eundec 5-pela age wele cal mein. Eundec oso uqa qila bilina. Eundec oso uqa qee cali hoc nijia. Uqa humei saen nag odi himec king biligian. <sup>11</sup> Dool cus me qee eu uqa wele bilen qa qila qee biley eu uqa king 8-peladoc odi. Uqa king 7-pela eundec oso, uqa limei isi uqana fadalec ugian,” ten.

<sup>12</sup> Kom 10-pela hina faga eu king 10-pela odi. Age qila king qee biley nijia. Euqa Anut uqa agena cofadec cabi oc adimei age aura osol dih kingwe dool cus me qee gami cofadi biluqagan. <sup>13</sup> King 10-pela eundec age cunug agena cisdoc eu osol dih nijigian. Age agena gagadic odocca cofadec cabi occa dool cus me qee utuqagan. <sup>14</sup> Age Sipsip Nagca cadoqagan qa Sipsip Nagca uqana toodu coboc danaca eu age cacadi wooladoqagan. Sipsip Nag uqana toodu coboc dana eu Anut uqa utaadecib uqaca hoin, Anut uqa dana cajaca eu nesili cedaden, age uqa gaid toodu cobogina. Sipsip Nag eu uqa tibud cunug agena Tibud, uqa king cunug agena King. Eunu uqa han wooladigian,” ten.

<sup>15</sup> Odocob ensel uqa maten, “Wa mati hina faga euna wal caja uqa bilina eu age dana cajaca dewenega filfilnadecca, dana am filfilnadecca, hatu filfilnadecca, je madec filfilnadecca. <sup>16</sup> Kom 10-pela faga euca dool cus me qeeca age wal caja eu sagagdoqagan. Age uqana ceteteh cunug cedi hulitumeig bical culdoqagan. Age uqa deweg cunug jimeig jana manecebil qee migian. <sup>17</sup> Ge, Anut uqa age wawagana cisdoc eu aden. Eunu age wawaga osol Anutna cisdoc toodumeig age agena king biley cofadec cabi oc eu dool cus me qee utecebile uqa king bibileb li Anutna je mele ihoc ligian. <sup>18</sup> Caja hina faga eu uqa taun ben eu mahanadec king cunug agena king bilina,” ten.

## 18

### *Babilon fadali tonei*

<sup>1</sup> Eu hedocob ija ensel oso sao jobonnadec nenen fem. Uqa cofadec gagadic odocca. Uqana kobolkobol eu ben bahic, eu maha cunug iletan. <sup>2-3</sup> Uqa co suli u utai maden: “Babilon Ben uqa wele fadali toneia!

Dana hatu filfilnadecc cunug age uqana wain jein, wain eu gagadicca, eu uqana wal kobol odoc.

Mahanadec king age uqaca nijein eu odiwe dana uqa wal cajaca nijesina.

Mahanadec qaig oc cabi dana age uqana cehewan ocnu gale docna qaig ben bahic oin Eunu uqa wele fadali toneia!

Qila buga me qeeca dolonoga filfil me qeeca age ono biledina.

\* **17:2:** Wal kobolnu je eu Anut hibemdumeig kadan tibudnu cuha fec kobol eunu madena. Anut amegna kobol eu odiwe dana oso uqa aideg culdemei caja fil osoca nijesina. Eunu uqa eu wal kobol en. <sup>†</sup> **17:9:** Dana age aluh 7-pelana Rom cehein.

Man fululec filfil gegehinca me qeeca age ono bilegina," en.

<sup>4-5</sup> Odochob ija jejeg oso sao jobonnadec dah mimigin maden:

"Uqana silail eu am ben bahic, eu mahananadec saona tecwe.

Anut uqa uqana qisol mec odonnu cisdonia.

Eunu ijana dana cajaca, age uqaca gabandumeig uqaca silail mowainnuca age uqaca gabandumeig uqaca ameg wadacowainnuca age cuculdi cali hoiga!

<sup>6</sup> Uqa odadenwe eu odi bahic age odudeiga.

Uqa me qee odoc cunug odon udi age me qee odoc wadacdu lecisdoiga.

Wa me qee age jecnu uqa saciadon eu odi age wa me qee wooldu lecisdoc saciadumeig uqana gabinna basecdocobil am beia.

<sup>7</sup> Uqa waugna madena, 'Ija kwin ene biligina!

Ija caja wij qee biligina, culumen ijaca hocob ija qada qee qajigaun!" ena.

Eunu uqa uqadodocnu kobolkobolca cehewanca uten eu odi age waug sogoecca walocca uteiga.

<sup>8</sup> Odochob ceteteh me qee bahic deel osolna dih uqaca cali hugian, eu hag me qeeca, walocca benca, sabnu cahel benca age uqaca cali hugian.

Anut Tibud uqana gesiladec eu gagadic bahic.

Eunu age jana manudoqagan," en.

<sup>9</sup> Mahananadec king age caja euca nijein, age uqana cehewan ocnu gale docnu kobol odoin eundec age ja mamanudecebil casuc teteb foqagan saen euna age taun ben eunu qada qajoqagan. <sup>10</sup> Age uqaca osoben dain me qee ocnu cucuiuqagan. Eunu age onoca bahic tawoqagan. Age odi madoqagan:

"O Babilon, hina walocca bahic!

Hina culumenga bahic!

Hina taun ben bahic, hina taun gagadicca qa aua osolna dih hinana gesildoc gulucdoga," oqagan.

<sup>11</sup> Odochob oso mahananadec qaig oc cabi dana agena ceteteh fajecnu qee biled. Eunu age uqanu qada qajoqagan. <sup>12</sup> Agena golca, silwaca, meen jaca euca, gigilo uqana qaig benca, lotoc me bahicca, lotoc jaca euca, lotoc golca euca, lotoc susumulca euca, na filfil dedeman meca eundecca, ceteh cunug tefulna mudeinca, ceteh cunug eu qaig ohis fajecnu cetehna mudec, eu nana mudecca, eu brasna mudecca, eu ainna mudecca, eu meen susumulcana mudecca eundecca, <sup>13</sup> mioca, qanaca, ihanec ja casuc dedeman meca euca, lalo dedeman meca euca, sanda meca, wainca, moolca, plauaca, witca, bulmakauca, sipsipca, hosca, karisca, cabi danaca, dana cajaca euha eu cunug oso fajecnu qee bilina. <sup>14</sup> Qaig oc cabi dana age madoqagan, "Ceteh cunug hina cedecnu wawin hoolena eu qee mi hedoa. Hinana ceteteh me bahicca cehewanica eu qee meia. Hina eundec haun qee gulucadagaun!" doqagan.

<sup>15</sup> Qaig oc cabi dana eu age taun ben euna ceteteh i idadeinna cehewanaga mein eundec age uqaca osoben dain me qee ocnu cucuiuqagan. Eunu age onoca bahic tawoqagan. Age qada qaqaji <sup>16</sup> madoqagan:

"Taun ben eu walocca bahic, eu culumenga bahic!

Wele uqa lotoc me bahic, lotoc golca euca taqoloi!

Uqa ceteh golna mudec, meen jaca, gigilo uqana qaig benca bala hewoloi!

<sup>17</sup> Aua osolna dih uqana cehewan cunug eu qee mi hedoa!" oqagan.

Wag cofdoc dana eu ageca, dana wag fajimeig jobon osonana beleginaca, wagna cabi dana eu ageca dana cunug age macasna cabi oginaca age cunug Babilon onoca bahic tawoqagan. <sup>18</sup> Age ja mamanebil eu uqana ja casuc ohis fimeig utai madoqagan, "Taun oso taun ben i cinigwe oso qee njel!" oqagan. <sup>19</sup> Age bobos ilomogana qeloqagan. Age qada qaqaji madoqagan:

"Taun ben i walocca bahic, culumenga bahic!

Taun ben i uqana cehewanagana dana cunug age macasna wagna cocobi bileig age cehewanagaca calein.

Uqa aua osolna dih uqana ceteteh cunug eu qee meia," oqagan.

<sup>20</sup> Anut uqa uqana me qee odaden eunu gesildon.

Eunu age sao jobonna bilegina eu age uqa fadalennu ceeleigale!

Anutna qagu coboc dana cajaca, aposelca, je hahun madec dana ageca age ceeleigale!

<sup>21</sup> Odochob ensel gagadic odochob oso meen ben wit wilidoc cinigwe umei macasna gelimei maden:

"Eu odiwe age Babilon taun ben hihibanca qelecebil tonigian.

Age uqa haun qee fowain.

<sup>22-24</sup> Hinana qaig oc cabi dana eu gagadicca, eu dana mahana bilegina cunug wooladein.

Hina dana cajaca cunug age hatu filfilnadec hinana ceeh jeladecna uhuladem.

Age Anutna je hahun madec danaca qagu coboc danaca golanaga taun euna fein.  
 Mele, mahana dec dana cunug age aqein eundec golanaga taun euna fein!  
 Eunu Babilon uqa ameg me qee bahic on.  
 Age hina dunuhna gita jejegca, due silecca, taul fuldocca, cololo fuldocca eundec  
 jejenega haun qee dowain!  
 Cabi doc dana filfil cunug eundec oso age hina dunuhna haun bibilebil qee  
 meciadownain.  
 Wit wilidoc meen uqana jejeg eu hina dunuhna haun qee dah mowain.  
 Gowocna iletet eu hina dunuhna haun qee iletceeb fowain.  
 Dana cajaca age ocobocobegin a eu age jejenega hina dunuhna haun qee dah  
 mowain,” en.

## 19

### *Dana cajaca age Babilon fadalennu ceelein*

<sup>1</sup> Eu hedocob ija dana cajaca am ben bahic sao jobonna biledina jejenega benwe dah  
 mimigin age madein:

“Ege Anut binan suluquna!\*

Egena Anut uqa cahahagena!

Uqa kobolkobolca bahic!  
 Uqa gagadic odocka bahic!

<sup>2</sup> Uqana gesilec eu mele bahic, eu tutuc bahic!  
 Wal caja ben eu uqa dana cajaca mahana biledina eu age uqana wal kobil odochna jic siho  
 qu ihacadoloi eu Anut uqa gesilda.

Uqa Anutna cewel oc dana aqecel cal mein eunu Anut uqa ameg wadacdoia,” ein.

<sup>3</sup> Age haun utai madein,  
 “Ege Anut binan suluquna!†

Ja taun ben eu maneceb eu uqana casuc gaid ohis teceb catanena!” ein.

<sup>4</sup> Dana matu 24ca ceteh cebac 4-pelaca age toni mahuli cosolimeig Anut uqa king biley  
 cabalna bilina eunu cuha fein. Age madein:

“Mele bahic! Ege Anut binan suluquna!” ein.‡

<sup>5</sup> Odocob king biley cabalnadec jejeg oso maden:

“Anutna cewel utoc dana cunug egena Anutnu binan suleigale!

Dana cajaca cunug age ijanagaca, age ijanagaca qee eundecca, cunug age Anutnu  
 cumunegina eu age egena Anutnu binan suleigale!” en.

### *Sipsip Nag caja ocob sab ben jein*

<sup>6</sup> Odocob ija dana cajaca am ben bahic jejenega cinigwe dah mem, eu wa mati busali  
 buhohdonawe, qeli ben qonawo odi dah mem. Age odi mamadegin dah mem:

“Tibud, egena Anut gagadic odocka eu uqa king bilina!

Eunu ege Anut binan suluquna!§

<sup>7-8</sup> Sipsip Nag caja ugiannu deel wele cali hoia.

Uqana caja eu jauni hedoa, saciadoia bilia.\*\*

Anut uqa lotoc soidoc walelecc tacigiannu utia.

Eunu ege ceeli biley celeboeqale!

Ege uqa binan suluqale!” ein.

(Lotoc me bahic eu Anutna qagu coboc dana cajaca agena tutuc odo.)

<sup>9</sup> Odocob ensel eu ija maten, “Je i jaqaga. Dana cajaca Anut age Sipsip Nag caja ocob sab  
 ben jecna loqagannu utaaden eu age ceelec biledina,” ten. Odocob ensel eu haun maten,  
 “Je i eu Anutna je mele bahic,” ten. <sup>10</sup> Odocob ija uqa jaihna toni mahuli cosolimig uqanu  
 cuha fecnu odom qa uqa maten, “Cain odogaun! Ija cewel oc dana gami hinaca, hina  
 wawaga meleec cotinelca, cunug age mele je Jisas qasali maaden eu hewegina eu age ija

\* **19:1:** Jon uqa jaqec je i Griek jena jaqen, euqa but 1naca, 3naca, 4naca, 6naca uqa je i “ege Anut binan suluquna”  
 Hibru jena jaqen. Hibru jena eu Haleluja. † **19:3:** Jon uqa jaqec je i Griek jena jaqen, euqa but 1naca, 3naca, 4naca,

6naca uqa je i “ege Anut binan suluquna” Hibru jena jaqen. Hibru jena eu Haleluja. ‡ **19:4:** Jon uqa jaqec je i Griek  
 jena jaqen, euqa but 1naca, 3naca, 4naca, 6naca uqa je i “ege Anut binan suluquna” Hibru jena jaqen. Hibru jena eu  
 Haleluja. § **19:6:** Jon uqa jaqec je i Griek jena jaqen, euqa but 1naca, 3naca, 4naca, 6naca uqa je i “ege Anut binan  
 suluquna” Hibru jena jaqen. Hibru jena eu Haleluja. \*\* **19:7-8:** Sipsip Nag caja ugian eu Krais, odocob uqana caja

eu jauni hedoa eu Kraisna tamane. Krais uqa ceseli humei uqana tamane on eu odiwe dana caja on. Odocob uqa  
 uqana tamane hadi cudun me bahic euna lecebile on age Kraisna bileycebil catanigian.

cabi hijiga. Eunu hina Anutnu dih cuha faga!” ten. Ge, mele je Jisas qasali maaden eu me je uqana gug eu Kis Anut uqa je hahun madec dana adeceb age me je qasali maadein.

*Oso uqa hos senenec tatacan bibilen hon*

<sup>11</sup> Odocob ija feciimig sao jobon hudeceb ija ono hos senenecca fem! Oso uqa hos eu tatacan bilen eu Anutna je cunug gaid qasali maadena egina, eu mele bahic egina. Uqa tutuc odocna gesiladena, uqa tutuc odocona han cadena. <sup>12</sup> Uqa ameg eu ja belicanwe, uqa ilona king katakat mati gulodona. Uqa dewegna ijan oso jaqec taweia oso uqa ijan eu qee dona, uqa dih dona. <sup>13</sup> Lotoc cecelac taqen eu golac u men. Uqa ijan eu, “Anutna Je.” <sup>14</sup> Sao jobonnadec han dana am age uqa toodoin. Age lotoc soidoc senenec tataqeig hos senenec tatacan bibili cobogina. <sup>15</sup> Uqa conadec han sign aigca cali hon. Uqa euna dana hatu filfnadec hanni wooladigian.

“Uqa agena king bilec age ain komna gagadic odoccia cofadigian,” en. (*Buk Song 2.9*) Uqa wain Anut gagadic odoccia uqana gemag jawe bec eu uqana wain aig afdoc cudun benna lahadocob basecdugian. <sup>16</sup> Uqana lotoc cecelacnaca uqa tucuhnaca ijan jaqec eu:

“KING CUNUG AGENA KING,  
TIBUD CUNUG AGENA TIBUD,” en.

<sup>17</sup> Odocob ija ensel camna tatawen fem. Uqa co suli u man fululec cunug sao ohisna fululi cocobogin utai maaden, “Age hu Anutna sab jec benna osoben ceguleigale! <sup>18</sup> Age humeig dana cal mec cuhunuga jeigale! Age king dewenegaca, han dana agena ilo ben dewenegaca, han dana dewenegaca, agena hos dewenegaca, dana hos tatacan bileginia eu dewenegaca, dana besiadec bileginaca dana qee besiadec bileginaca eundec dewenegaca, dana ijanagaca dana ijanagaca qee eundec dewenegaca, dana caja cunug dewenegaca eu cuhunuga cunug jeigale!” aden.

<sup>19</sup> Odocob ija dool cus me qeeca, mahadanadec kingca, agena han dana amamca age humeig oso hos tatacan bilinaca, uqana han dana amca han cadecnu gami gabandoi eu fem. <sup>20</sup> Odocob uqa dool cus me qeeca uhulec je hahun madec danaca hewalen. Uhulec je madec dana uqa dool cus me qee amegna kobolkobol uhulec eu odon. Uqa kobolkobol uhulec euna dana cajaca age dool cus me qee uqana gaga oin, dana cajaca age dool cus me qee ihiconnu cuha foloig eu age quauden. Odocob uqa dool cus me qeeca, uhulec je hahun madec danaca osoben helaleceb ale wa gudoc benwe eu jaca ja meen jan daina cijina euna cebac bilesina nosin. <sup>21</sup> Odocob oso uqa hos tatacan bilina uqa han sign uqa conadec cali hona uqa euna alena han dana amam aqeceb cal mein. Odocob man fululec cunug age cuhunuga jejegin wawaga ihoc len.

## 20

*Seten uqa cabi gel 1,000 gihacdoc cudunna biligian*

<sup>1</sup> Odocob ija ensel oso sao jobonnadec nenen fem, uqa ebenna maha heel ben eu dunuh bahic non gugca qee eu uqana kica, sen teehugca hewen. <sup>2</sup> Uqa man sononec ben eu hewi calawandu cilehdon. Eu man sononec weledec bahic, eu Fadalec Dana, eu Seten. Odimei ensel eu uqa sen euna libimei qeludeceb maha heel ben eu dunuh bahic non gugca qee euna non. Uqa cabi gel 1,000 odi bilen. <sup>3</sup> Odocob uqa dana hatuhatu filfnadec haun qee quaudaeiaun, leceb cabi gel 1,000 eu hedugiannu uqa kina jic tatacan menimei uqa jic gagadic bahic cufa qon. Eu hedocob saen gohic dih cobigianu cufaldugian.

<sup>4</sup> Ija king bilec cabal leih bibilegin fem. Dana leih euna bilein eu age Anut uqa gesiladecnu gagadic odoc aden. Dana dolonoga leihha fem. Dana eundec age Jisasnu jeca, Anutna me jeca qasali maadein eunu age benega cagocobil cal mein. Age dool cus me qeeca, uqa ihiconca eunu cuha qee felein. Age ilomoga domonnafo, ebeneganafo dool cus me qee uqana gaga qee oloin. Age haun cebac caji bileyebil age Kraisca cabi gel 1,000 odi king bilein. <sup>5</sup> Eu dana cal mecnadec ceseli cajec osahicdoci. Dana leih cal mein eu age qee cebac caji bileyebil leceb cabi gel 1,000 hedon. <sup>6</sup> Dana age cal mecnadec ceseli cajec osahicdoci ceseli cajoqagan eundec age Anut uqa eeladeceb age gun biluqagan. Cal mec lecisdoc eu cilehadecnu gagadicca qee. Euqa age egena Anutnaca Kraisnaca nawel tawec ihanec dana biluqagan. Age Kraisca cabi gel 1,000 king biluqagan.

*Seten fadalen*

<sup>7</sup> Cabi gel 1,000 hedocob Anut uqa Seten gihacdoc cudunna dec cufaldugian. <sup>8</sup> Odocob uqa dana hatuhatu filfnadec age mahana cunug biluqagan eu quaudecnu nuigian. Dana eundec age Gog Magogca ogagan. Seten uqa han cadecnu gabananadigian. Dana age han cadecnu gabandoqagan eu mati bahic, eu odi esic macas lanna tawenawie. <sup>9</sup> Age hatu cunug filiganadimeig age taun Anut naluq mena, ono Anutna qagu coboc dana cajaca age bileginia eu talildoin. Euqa ja sao jobonnadec toni cijaden. <sup>10</sup> Odocob Seten, uqa quauden

eu, heludecebil wa gudoc benwe eu jaca ja meen jan dainca cijina euna non, ono dool cus me qeeca, uhulec je madec danaca helalecebil nosin. Age ono witic cahinegca gaidgaid dain ben aadeb sogoi billecebil catanena.

### *Gesiladec Ben cali hon*

<sup>11</sup> Odocob ija king billecabal senenec benca oso uqa euna bilinaca eu fem. Maha saoca ale uqa cemenugdec busali belesin. Age haun qee facialowain. <sup>12</sup> Odocob ija dana cal mec feciadem. Dana ijanagaca, dana ijanagaca qee agecaca king billecabal amegna tawein. Ensel eu age buk leih cosocdoin. Odocob buk osoha cosocdoin, eu cebac billecabal agena buk. Cal mec dana eu agena odoc, eu odi buk leih euna jaqein euna odi gesiladen. <sup>13</sup> Odocob macas uqana cal mec dana culaden. Cal mecca dol jobonca<sup>\*</sup> alena cal mec dana age ono bilein eu culadesin. Cal mec dana cunug eu agena odoc euna odi gesiladen. <sup>14</sup> Odocob cal mecca dol jobonca<sup>†</sup> helalecebil wa gudoc benwe jaca cijina euna nosin. Wa gudoc benwe jaca cijina eu cal mec lecisdock. <sup>15</sup> Oso uqa ijan eu cebac billecabal buk euna qee jaqelein eu age heludecebil wa gudoc benwe jaca cijina euna non.

## 21

### *Maha haun sao haunca cali hosin*

<sup>1</sup> Odocob ija sao haun maha haunca fem. Ge, sao weledeci maha weledeccia qee mi hedosin. Macas ha qee mi hedon. <sup>2</sup> Odocob ija taun gun ben fem, eu Jerusalem haun, eu Anut odocob sao jobonnadec toni nen. Eu saciadu hedoc bilia, caja uqa dana ocnu bala falimei gemug sumudinaw. <sup>3</sup> Odocob ija king billecabalnadec jejeg ben oso mamaden dah mem, "Qila Anutna jobon eu dana gemo bilia! Uqa ageca biluqagan. Odocob age uqana dana cajaca biluqagan. Anut uquadodoc age gami biluqagan. Uqa agena Anut biligian. <sup>4</sup> Uqa amaganadec amulunuga cunugca cacuadigian. Ceteh weledeci eu cunug qee mi hedon. Eunu ono dana haun qee cal mowain, age walocca haun qee biluwain, age haun qee qajowain, age haun dain adecnu qee owain," en.

<sup>5</sup> Odocob oso uqa king billecabalna bilina eu maden, "Qila ija ceteh cunug haun ifaniga!" en. Uqa ijaha haun odi maten, "Je i mele bahic, odocob dana cunug age je inu wawaga meleigiannu ihoc. Eunu je i jaqaga," ten. <sup>6</sup> Odocob uqa maden, "Ceteh cunug eu wele hedoa! Ija aqunec, ija cit qoc. Ija sanan nec, ija hedoc. Dana oso wa gab cagudocob eu ija uqa wa cebac fifiji benanadec wa fajecca qee jecnu cois docomin jigian. <sup>7</sup> Oso uqa gagadic mimi han wooldona eu ceteteh cunug eu ijanadec muguh ugian. Ija uqana Anut biligen, uqa ija melami biligian," en.

<sup>8</sup> "Euqa dana cucuiimeig bicbic beleginaca, dana wawaga qee meleena euca, dana kobil gegehinca odoginaca, dana age dana ageginaca, dana wal cajaca nijeginaca, dana ceeh jeladeginaca, dana kadan tibudnu cuha feginaca, dana cunug uhulec je madeginaca eundec agena cudun eu wa gudoc benwe eu jaca ja meen jan dainca cijina agena. Cudun eu cal mec lecisdock," en.

### *Jerusalem haun*

<sup>9</sup> Odocob ensel 7-pela age boh 7-pela eu dana cajaca me qee madecnu ceteh 7-pela am ben eu hewein eundec oso humei maten, "Hoga. Ija caja dana oc ihachigen, eu Sipsip Nag aideg," ten. <sup>10</sup> Odocob Kisca ija hewiti ibulteceb ensel eu gahiti aluh ben oso ohis bahic igocna ehi ti miten. Uqa Jerusalem ihacten. Eu taun gun, Anut odocob sao jobonnadec toni nenen fem. <sup>11</sup> Eu Anutna kobolkobolca waleli nen. Taun ben eu meen uqana qaig ohisca jaspa cinigwe walelen. Eu camasac bahic, eu glas cinigwe. <sup>12</sup> Taun ben eu gel cecelac ohisca. Gel eu jic cebec 12-pela tawen. Ensel 12-pela age jic cebec eu cofdudu tawegina. Jic cebec filfilna eu Isrel dana cajaca agena siluh 12-pela eu age ijanaga jaqijaqi qelein. <sup>13</sup> Jic cebec cijed eu gel qeih 4-pela cunugna tawein. Cijed eu cam tobi benana isec tawein, cijed eu notna isec tawein, cijed eu sautna isec tawein, cijed eu cam toni nonana isec tawein. <sup>14</sup> Taun ben eu uqana gel eu meen big gug 12-pelana cehein. Meen big gug euna Sipsip Nagna aposel 12-pela eu age ijanaga jaqein.

<sup>15</sup> Ensel uqa ija maten eu ihoc mecnu na tutuc goldna mudec hewen. Uqa ihoc nec na euna taun ben eu bagalan ganicca, cecelac ganicca, ohis ganicca ihoc mi figiannu. Uqa taun benna cebecca, gelca ihoc mi figiannu. <sup>16</sup> Taun ben eu tutuc bahic tawen. Uqana cecelac uqana bagalanca eu ihocihoc. Ensel taun ben eu ganic docnu ihoc men. Uqana cecelac eu 2,200 kilomita.\* Uqana bagalan eu uqana cecelac ihocihoc. Uqana ohis eu

\* <sup>20:13:</sup> Grik je i bahic eu "oloqanihca"    † <sup>20:14:</sup> Grik je i bahic eu "oloqanihca"    \* <sup>21:16:</sup> Grik jena age "12,000 stadia" ec jaqein. Odocob eu qila 2,200 kilomita odi. Euqa ege tutuc bahic qee doqona. Jon uqa uqana gadac eu 2,200 kilomita bahic jaqecnu gale donfo, qee sanijec 12,000 uqa jaqen eu ceteh fil osonu gadac menafo ege qee doqona.

uqana cecelac ihocihoc. <sup>17</sup> Ensel uqaha gel uqana teehug eu ganic docnu ihoc men. Uqana teehug eu 144 mita.<sup>†</sup> Sanijec mita i ensel uqa ihoc men eu dana cunug mita eu odi ihoc megina.

<sup>18</sup> Gel eu meen jaspana mudein. Taun ben uqadodoc eu gold soidoc bahic euna mudein, eu camasac bahic eu glas cinigwe. <sup>19</sup> Taun ben uqana gel uqana meen big gug eu meen qaig ohisna fajecnu filfil euna bala faldoin. Meen big gug osahicdoc eu meen jaspa, meen big gug lecisdoc eu meen sapai, eu meen gaga cadibca, meen big gug cijeddoc eu meen aget, meen big gug 4-peladoc eu meen emeral, eu meen gaga na bagacca, <sup>20</sup> meen big gug 5-peladoc eu sadonikis, eu meen gaga gol jedocca, meen big gug 6-peladoc eu meen konilian, eu meen gaga golca, meen big gug 7-peladoc eu meen krisolait, eu meen gaga janca, meen big gug 8-peladoc eu meen beril, eu meen gaga na bagacca, meen big gug 9-peladoc eu meen topas, eu meen gaga janca, meen big gug 10-peladoc eu meen krispres, meen big gug 11-peladoc eu meen haiasin, meen big gug 12-peladoc eu meen ametis, eu meen gaga golca. <sup>21</sup> Jic cebec 12-pela eu gilolo senenec 12-pela, eu fajecnu qaig eu ohis. Jic cebec abesabes eu gilolo osolna mudein. Taun benna jic cunug eu gold soidoc bahicna mudein, eu camasac bahic glas cinigwe.

<sup>22</sup> Ija tempel oso taun ben dunuh qee felem. Ge, uqana tempel eu Anut Tibud gagadic odocka Sipsip Nagca. <sup>23</sup> Taun ben eu camfo, jagelfo fulacdoci qee nijel. Ge, Anutna kobolkobol eu uqana fulacdona. Sipsip Nag eu uqana gowoc. <sup>24</sup> Dana cajaca hatu filfilnade age fulacdoci euna coboqagan. Odocob mahananade king age agena cehewanaga cedi ahu dunuh loqagan. <sup>25</sup> Deel cunug taun benna jic cebec eu age hudi gelec tawigan. Age qee menecebil tawieaun. Odocob ono witic qee nijaun. <sup>26</sup> Hatuhatu filfil age agena ceteteh me bahicca cehewanagaca taun ben dunuh cedi loqagan. <sup>27</sup> Euqa ceteh gegehinca oso taun ben dunuh qee leiaun. Dana oso majagca odonaca, uqa uhulec je madenaca taun ben dunuh qee leiaun. Dana age ijanaga Sipsip Nagna cebac bilec bukna jaqein eu age dih taun ben eu dunuh loqagan.

## 22

### *Jon uqa cebac bilec waca cebac bilec naca fen*

<sup>1</sup> Ensel eu cebac bilec wa ihacten, eu glas cinigwe fililaen. Wa eu Anutnaca Sipsip Nagnaca king bilec cabalnadecca cali hona. <sup>2</sup> Eu taun benna jic gemo odi guguli nuina. Wa gesac nahahanaka cebac bilec na tawena. Eu cabi gel osolna saen 12-pelana aig qona, jagel osolna saen osol aig qona. Uqana bagac eu dana cajaca hatuhatu filfilnade me madigiannu. <sup>3</sup> Ceteh oso Anut uqa geulden eu taun ben eu dunuh qee fowain.

Anutnaca Sipsip Nagnaca king bilec cabal eu taun ben dunuh biligian. Uqana cewel oc dana uqanu cuha foqagan. <sup>4</sup> Age uqa ola foqagan. Uqa ijan age ilomoga domonna jaqigian. <sup>5</sup> Anut Tibud uqa agena fulacdoci biligian. Eunu ono witic haun qee meiaun, age gowocca camca alena fulacdona fecnu qee nijaun. Odocob age king bilecebil catanigan.

### *Jisas mahuc ceseli hugian*

<sup>6</sup> Odocob ensel eu maten, "Je i eu mele bahic, age je inu wawaga meleecnu ihoc. Anut Tibud uqa uqana Kis je hahun madec dana aden eu uqa uqana ensel uqana cewel oc dana cajaca cel ceteh isi caligian ec ihacadigian suldon," ten. <sup>7</sup> Odocob Jisas maden, "Faga! Ija mahuc odi hugen!" ten.

Eu age je hahun jaqec eu buk ina nijia eu toodu cobogina eundec age ceelec bileigale!

<sup>8</sup> Ija, Jon, ceteh i cunug ija fifi dudu em. Ija eu fifi dudu i hedumig ensel uqa ceteh i ihacten eu ija uqanu cuha fecnu jaihna toni mahuli cosolem. <sup>9</sup> Euqa uqa maten, "Eu odi cain odogaun! Ija hinana cewel oc dana hijen oso, ijaha wawaga meleec cotogail eu age je hahun madec dana eu hijiga oso, ijaha cunug je buk ina nijia eu toodu cobogina eu hijiga oso. Anutnu himec cuha faga!" ten. <sup>10</sup> Odocob uqa haun maten, "Saen ceteh i caligian eu cemenug nijia. Eunu je hahun jaqec eu buk ina nijia cain jahuni hewagaun. <sup>11</sup> Oso uqa qisol mec odona eu uqa gaid odi qisol mec odeiale. Oso uqa gegehinca biliale. Oso uqa me odona eu uqa gaid odi me odeiale. Oso uqa gun bilina eu uqa gaid odi gun biliale," ten.

<sup>12</sup> Odocob Jisas maden, "Faga! Ija mahuc odi hugen! Ija ijana ameg adec ahugen, eu ija cunug agena odocna odi abesabes adigen. <sup>13</sup> Ija aquotec, ija cit qoc. Ija sanan nec, ija hedoc," en.

<sup>14</sup> Age agena lotoc cusecebile soidoc nijigian eu ceelec bileigale. Age eu odocobilfi age cebac bilec na eunadec aig u joqagannu cois adigian. Age taun benna jic cebec gemo

<sup>†</sup> **21:17:** Dana leih age odi falicdoin. "Uqana ohis eu 144 mita." Grik jena je i "144 mita" eu 144 kubit bahic. Eu egena sanijecna eu odi 65 mita.

loqagannu ihoc.<sup>15</sup> Euqa taun ben hahagum eu dana me qee age qa cinigwe ono bileen. Dana eundec age gegehin odoc odogina, age ceeh jeladegina, age wal cajaca nijegin, age dana aqegin, age kadan tibudnu cuha fegina, age uhulec je madecnu gawegina, odocob age quauadegina.<sup>16</sup> “Ija Jisas, ijana ensel uqa ceteh i age tamanec agena cuha jonana bilegina eu je qasali maadecnu suldom. Ija Dewid sihulnadec mel. Ija malaqa boei fulacdocca eu,” en.

<sup>17</sup> Kisca caja dana occa ale Jisas madosina, “Hina hogal!” dosina. Cunug age je i dah megina eu ageha madoqagan, “Hina hogal!” doqagan. Oso uqa wa gab dona eu humei jeiale. Oso uqa cebac biley wa eu fajecca qee ocnu gale dona eu oiale.

*Cit qoc je*

<sup>18</sup> Ija cunug age je hahun jaqec eu buk ina nijia eu dah megina eu ija je gagadicca ulauladigina. Oso uqa je ina je oso tubdocobfi Anut uqa ugana ameg euna ceteh me qee odoc buk ina nijia eu tubdugian.<sup>19</sup> Oso uqa je hahun jaqec eu buk ina nijia euna je oso u helecebfi Anut uqa ugana cebac biley na aig muguh mecca taun ben gun muguh mecca, eunu je buk ina nijia, eu u heligian.

<sup>20</sup> Oso uqa ceteh i cunugnu je qasali maadena eu uqa qila madena, “Eu mele bahic! Ija mahuc odi hugen!” ena.

Eu mele bilina. Jisas Tibud, hina hogale!

<sup>21</sup> Jisas Tibud ugana elgec uum igec eu age cunugca biliale. Eu mele.

## Read the New Testament daily

*January*

date	Scripture
1	Matju 1.1–2.12
2	Matju 2.13–3.6
3	Matju 3.7–4.11
4	Matju 4.12–25
5	Matju 5.1–26
6	Matju 5.27–48
7	Matju 6.1–24
8	Matju 6.25–7.14
9	Matju 7.15–29
10	Matju 8.1–17
11	Matju 8.18–34
12	Matju 9.1–17
13	Matju 9.18–38
14	Matju 10.1–23
15	Matju 10.24–11.6
16	Matju 11.7–30
17	Matju 12.1–21
18	Matju 12.22–45
19	Matju 12.46–13.23
20	Matju 13.24–46
21	Matju 13.47–14.12
22	Matju 14.13–36
23	Matju 15.1–28
24	Matju 15.29–16.12
25	Matju 16.13–17.9
26	Matju 17.10–27
27	Matju 18.1–22
28	Matju 18.23–19.12
29	Matju 19.13–30
30	Matju 20.1–28
31	Matju 20.29–21.22

*February*

date	Scripture
1	Matju 21.23-46
2	Matju 22.1-33
3	Matju 22.34–23.12
4	Matju 23.13-39
5	Matju 24.1-28
6	Matju 24.29-51
7	Matju 25.1-30
8	Matju 25.31–26.13
9	Matju 26.14-46
10	Matju 26.47-68
11	Matju 26.69–27.14
12	Matju 27.15-31
13	Matju 27.32-66
14	Matju 28.1-20
15	Mak 1.1-28
16	Mak 1.29–2.12
17	Mak 2.13–3.6
18	Mak 3.7-30
19	Mak 3.31–4.25
20	Mak 4.26–5.20
21	Mak 5.21-43
22	Mak 6.1-29
23	Mak 6.30-56
24	Mak 7.1-23
25	Mak 7.24–8.10
26	Mak 8.11–9.1
27	Mak 9.2-29
28	Mak 9.30–10.12

date	Scripture
1	Mak 10.13-31
2	Mak 10.32-52
3	Mak 11.1-26
4	Mak 11.27-12.17
5	Mak 12.18-37
6	Mak 12.38-13.13
7	Mak 13.14-37
8	Mak 14.1-21
9	Mak 14.22-52
10	Mak 14.53-72
11	Mak 15.1-47
12	Mak 16.1-20
13	Luk 1.1-25
14	Luk 1.26-56
15	Luk 1.57-80
16	Luk 2.1-35
17	Luk 2.36-52
18	Luk 3.1-22
19	Luk 3.23-38
20	Luk 4.1-30
21	Luk 4.31-5.11
22	Luk 5.12-28
23	Luk 5.29-6.11
24	Luk 6.12-38
25	Luk 6.39-7.10
26	Luk 7.11-35
27	Luk 7.36-8.3
28	Luk 8.4-21
29	Luk 8.22-39
30	Luk 8.40-9.6
31	Luk 9.7-27

date	Scripture
1	Luk 9.28-50
2	Luk 9.51-10.12
3	Luk 10.13-37
4	Luk 10.38-11.13
5	Luk 11.14-36
6	Luk 11.37-12.7
7	Luk 12.8-34
8	Luk 12.35-59
9	Luk 13.1-21
10	Luk 13.22-14.6
11	Luk 14.7-35
12	Luk 15.1-32
13	Luk 16.1-18
14	Luk 16.19-17.10
15	Luk 17.11-37
16	Luk 18.1-17
17	Luk 18.18-43
18	Luk 19.1-27
19	Luk 19.28-48
20	Luk 20.1-26
21	Luk 20.27-47
22	Luk 21.1-28
23	Luk 21.29-22.13
24	Luk 22.14-34
25	Luk 22.35-53
26	Luk 22.54-23.12
27	Luk 23.13-43
28	Luk 23.44-24.12
29	Luk 24.13-53
30	Jon 1.1-28

date	Scripture
1	Jon 1.29-51
2	Jon 2.1-25
3	Jon 3.1-21
4	Jon 3.22-4.3
5	Jon 4.4-42
6	Jon 4.43-54
7	Jon 5.1-23
8	Jon 5.24-47
9	Jon 6.1-21
10	Jon 6.22-40
11	Jon 6.41-71
12	Jon 7.1-29
13	Jon 7.30-52
14	Jon 7.53-8.20
15	Jon 8.21-30
16	Jon 8.31-59
17	Jon 9.1-41
18	Jon 10.1-21
19	Jon 10.22-42
20	Jon 11.1-53
21	Jon 11.54-12.19
22	Jon 12.20-50
23	Jon 13.1-30
24	Jon 13.31-14.14
25	Jon 14.15-31
26	Jon 15.1-27
27	Jon 16.1-33
28	Jon 17.1-26
29	Jon 18.1-24
30	Jon 18.25-19.22
31	Jon 19.23-42

date	Scripture
1	Jon 20.1-31
2	Jon 21.1-25
3	Aposel 1.1-26
4	Aposel 2.1-47
5	Aposel 3.1-26
6	Aposel 4.1-37
7	Aposel 5.1-42
8	Aposel 6.1-15
9	Aposel 7.1-29
10	Aposel 7.30-50
11	Aposel 7.51-8.13
12	Aposel 8.14-40
13	Aposel 9.1-25
14	Aposel 9.26-43
15	Aposel 10.1-33
16	Aposel 10.34-48
17	Aposel 11.1-30
18	Aposel 12.1-23
19	Aposel 12.24-13.12
20	Aposel 13.13-41
21	Aposel 13.42-14.7
22	Aposel 14.8-28
23	Aposel 15.1-35
24	Aposel 15.36-16.15
25	Aposel 16.16-40
26	Aposel 17.1-34
27	Aposel 18.1-21
28	Aposel 18.22-19.12
29	Aposel 19.13-41
30	Aposel 20.1-38

date	Scripture
1	Aposel 21.1-16
2	Aposel 21.17-36
3	Aposel 21.37-22.16
4	Aposel 22.17-23.10
5	Aposel 23.11-35
6	Aposel 24.1-27
7	Aposel 25.1-27
8	Aposel 26.1-32
9	Aposel 27.1-20
10	Aposel 27.21-44
11	Aposel 28.1-31
12	Romans 1.1-17
13	Romans 1.18-32
14	Romans 2.1-24
15	Romans 2.25-3.8
16	Romans 3.9-31
17	Romans 4.1-12
18	Romans 4.13-5.5
19	Romans 5.6-21
20	Romans 6.1-23
21	Romans 7.1-14
22	Romans 7.15-8.6
23	Romans 8.7-21
24	Romans 8.22-39
25	Romans 9.1-21
26	Romans 9.22-10.13
27	Romans 10.14-11.12
28	Romans 11.13-36
29	Romans 12.1-21
30	Romans 13.1-14
31	Romans 14.1-23

date	Scripture
1	Romans 15.1-21
2	Romans 15.22–16.7
3	Romans 16.8-27
4	1 Korin 1.1-17
5	1 Korin 1.18–2.5
6	1 Korin 2.6–3.4
7	1 Korin 3.5-23
8	1 Korin 4.1-21
9	1 Korin 5.1-13
10	1 Korin 6.1-20
11	1 Korin 7.1-24
12	1 Korin 7.25-40
13	1 Korin 8.1-13
14	1 Korin 9.1-18
15	1 Korin 9.19–10.13
16	1 Korin 10.14–11.1
17	1 Korin 11.2-16
18	1 Korin 11.17-34
19	1 Korin 12.1-26
20	1 Korin 12.27–13.13
21	1 Korin 14.1-17
22	1 Korin 14.18-40
23	1 Korin 15.1-28
24	1 Korin 15.29-58
25	1 Korin 16.1-24
26	2 Korin 1.1-11
27	2 Korin 1.12–2.11
28	2 Korin 2.12-17
29	2 Korin 3.1-18
30	2 Korin 4.1-12
31	2 Korin 4.13–5.10

date	Scripture
1	2 Korin 5.11-21
2	2 Korin 6.1-13
3	2 Korin 6.14-7.7
4	2 Korin 7.8-16
5	2 Korin 8.1-15
6	2 Korin 8.16-24
7	2 Korin 9.1-15
8	2 Korin 10.1-18
9	2 Korin 11.1-15
10	2 Korin 11.16-33
11	2 Korin 12.1-10
12	2 Korin 12.11-21
13	2 Korin 13.1-14
14	Galesia 1.1-24
15	Galesia 2.1-16
16	Galesia 2.17-3.9
17	Galesia 3.10-22
18	Galesia 3.23-4.20
19	Galesia 4.21-5.12
20	Galesia 5.13-26
21	Galesia 6.1-18
22	Efesas 1.1-23
23	Efesas 2.1-22
24	Efesas 3.1-21
25	Efesas 4.1-16
26	Efesas 4.17-5.2
27	Efesas 5.3-33
28	Efesas 6.1-24
29	Filipai 1.1-26
30	Filipai 1.27-2.18

date	Scripture
1	Filipai 2.19–3.6
2	Filipai 3.7–4.1
3	Filipai 4.2–23
4	Kolosi 1.1–20
5	Kolosi 1.21–2.7
6	Kolosi 2.8–23
7	Kolosi 3.1–17
8	Kolosi 3.18–4.18
9	1 Tesalonika 1.1–2.9
10	1 Tesalonika 2.10–3.13
11	1 Tesalonika 4.1–5.3
12	1 Tesalonika 5.4–28
13	2 Tesalonika 1.1–12
14	2 Tesalonika 2.1–17
15	2 Tesalonika 3.1–18
16	1 Timoti 1.1–20
17	1 Timoti 2.1–15
18	1 Timoti 3.1–16
19	1 Timoti 4.1–16
20	1 Timoti 5.1–25
21	1 Timoti 6.1–21
22	2 Timoti 1.1–18
23	2 Timoti 2.1–21
24	2 Timoti 2.22–3.17
25	2 Timoti 4.1–22
26	Taitas 1.1–16
27	Taitas 2.1–14
28	Taitas 2.15–3.15
29	Failimon 1.1–25
30	Hibru 1.1–14
31	Hibru 2.1–18

date	Scripture
1	Hibru 3.1-19
2	Hibru 4.1-13
3	Hibru 4.14-5.14
4	Hibru 6.1-20
5	Hibru 7.1-19
6	Hibru 7.20-28
7	Hibru 8.1-13
8	Hibru 9.1-10
9	Hibru 9.11-28
10	Hibru 10.1-18
11	Hibru 10.19-39
12	Hibru 11.1-16
13	Hibru 11.17-31
14	Hibru 11.32-12.13
15	Hibru 12.14-29
16	Hibru 13.1-25
17	Jems 1.1-18
18	Jems 1.19-2.17
19	Jems 2.18-3.18
20	Jems 4.1-17
21	Jems 5.1-20
22	1 Pita 1.1-12
23	1 Pita 1.13-2.10
24	1 Pita 2.11-3.7
25	1 Pita 3.8-4.6
26	1 Pita 4.7-5.14
27	2 Pita 1.1-21
28	2 Pita 2.1-22
29	2 Pita 3.1-18
30	1 Jon 1.1-10

date	Scripture
1	1 Jon 2.1-17
2	1 Jon 2.18-3.2
3	1 Jon 3.3-24
4	1 Jon 4.1-21
5	1 Jon 5.1-21
6	2 Jon 1.1-13
7	3 Jon 1.1-14
8	Jud 1.1-25
9	Jahunec Je Camasac Muden 1.1-20
10	Jahunec Je Camasac Muden 2.1-17
11	Jahunec Je Camasac Muden 2.18-3.6
12	Jahunec Je Camasac Muden 3.7-22
13	Jahunec Je Camasac Muden 4.1-11
14	Jahunec Je Camasac Muden 5.1-14
15	Jahunec Je Camasac Muden 6.1-17
16	Jahunec Je Camasac Muden 7.1-17
17	Jahunec Je Camasac Muden 8.1-13
18	Jahunec Je Camasac Muden 9.1-21
19	Jahunec Je Camasac Muden 10.1-11
20	Jahunec Je Camasac Muden 11.1-19
21	Jahunec Je Camasac Muden 12.1-18
22	Jahunec Je Camasac Muden 13.1-18
23	Jahunec Je Camasac Muden 14.1-20
24	Jahunec Je Camasac Muden 15.1-8
25	Jahunec Je Camasac Muden 16.1-21
26	Jahunec Je Camasac Muden 17.1-18
27	Jahunec Je Camasac Muden 18.1-24
28	Jahunec Je Camasac Muden 19.1-21
29	Jahunec Je Camasac Muden 20.1-15
30	Jahunec Je Camasac Muden 21.1-27
31	Jahunec Je Camasac Muden 22.1-21

## Iwaladec Je Leih Megecnu Dado Mec

*Anut uqa odi bilina*

1. Memige Anut uqa odi bilina.

Mak 10.27; 12.29-30; Luk 1.37; 6.35-36; Jon 4.23-24; Aposel 14.14-17; 17.22-31; Rom 1.18-23; 11.33-36; 1 Korin 8.4-6; 2 Korin 1.3; 1 Timoti 1.17; 6.15-16; Hibru 4.13; 10.30-31; Jems 1.17; 1 Pita 1.14-17; 1 Jon 1.5; 4.7-12; 4.16; Jud 24-25; Jahunec Je Camasac Mudec 4.8-11; 15.3-4.

2. Anut Melah, Jisas Krais, uqa odi bilina.

Jisas Krais uqa Anut Melah.

Matju 11.27-30; 16.13-17; Luk 1.35; Jon 1.1-18; 5.19-29; 6.35-40; 8.58; 11.25-27; 14.5-11; 17.1-5; 20.26-31; Aposel 3.13-16; 4.10-12; Rom 1.3-4; 1 Korin 3.11; 2 Korin 4.4-6; 5.21; Galesia 4.4-5; Filipai 2.5-11; Kolosi 1.15-20; 2.9-10; Hibru 1.1-14; 7.26-28; 1 Jon 2.1-2; 5.20; Jahunec Je Camasac Mudec 1.12-18; 19.11-16.

Anut Melah uqa dana caleceb caja basecdon.

Jon 1.14; Luk 1.26-38; Matju 1.18-25; Luk 2.1-20; Matju 2.1-23; Galesia 4.4-5; Filipai 2.6-7; Hibru 2.14-18.

Jisas uqa dana cajaca me je iwalaadei hagca me maden.

Matju 4.23-25; 7.28-29; 9.35-36; 11.1-6; Luk 4.14-44; Aposel 10.36-38; Jon 20.30-31.

Jisas kobolkobol odoc mati odon.

Matju 8.1-4; 8.5-13; 8.14-15; 8.23-27; 8.28-33; 9.1-7; 9.18-26; 9.27-31; 9.32-33; 12.9-14; 12.22; 14.15-21; 14.22-32; 15.22-28; 15.32-38; 17.14-18; 20.29-34; 21.18-22; Mak 1.21-28; 7.32-37; 8.22-25; Luk 5.4-8; 7.11-15; 13.10-13; 14.1-4; 17.12-14; 22.50-51; Jon 2.1-11; 4.46-54; 5.5-9; 9.1-7; 11.11-44; 21.4-6; Aposel 2.22.

Juda agena iloilo age Jisas hewudimeig uqa qocobil cal migian ec madein.

Matju 26.47-68; 27.1-2; 27.11-31; Mak 14.43-65; 15.1-20; Luk 22.47-53; 22.63-71; 23.1-25; Jon 18.1-14; 18.19-24; 18.28-19.16.

Age Jisas na babalecna tuitu qumeig caqusecebil caculimei cal men.

Matju 27.32-56; Mak 15.21-41; Luk 23.26-49; Jon 19.17-37.

Age Jisas heel cisein.

Matju 27.57-66; Mak 15.42-47; Luk 23.50-56; Jon 19.38-42.

Jisas cal mecnadec ceseli cajeceeb leih age fecidoin.

Matju 28.1-20; Mak 16.1-8; Luk 24.1-49; Jon 20.1-21.14; Aposel 1.3-8; 2.24-32; 3.15; 4.10; 4.33; 10.39-43; 13.29-39; 17.2-3; 17.30-31; Rom 1.4; 4.24-25; 1 Korin 15.3-8; 15.12-21; Jahunec Je Camasac Mudec 1.18.

Jisas sao jobon ohis ceseli ten.

Luk 24.50-51; Aposel 1.9-11; 2.32-36; 5.30-31; Rom 8.34; Efesas 1.20-23; Filipai 2.9-11; Hibru 1.3-11; 2.9; 4.14-16; 7.25-26; 10.12-14; 1 Pita 3.22.

3. Kis Gun uqa odi bilina.

Matju 28.19; Mak 1.9-11; 3.28-30; Luk 1.35; 3.16; 4.1; 11.13; 12.12; Jon 1.32-34; 3.5-8; 7.37-39; 14.15-17; 14.26; 15.26; 16.7-15; 20.19-23; Aposel 1.4-5; 1.8; 2.1-18; 2.38-39; 4.31; 5.3-5; 8.14-17; 10.44-48; 13.2-4; 15.28; 16.7-10; 19.1-7; Rom 5.5; 7.6; 8.9-16; 8.26-27; 1 Korin 2.4; 2.9-16; 3.16; 6.11; 6.19; 12.1-13; 2 Korin 1.21-22; 5.5; 13.14; Galesia 3.2-5; 4.6; 5.16-18; 5.22-25; Efesas 1.13-14; 1.17; 3.16; 4.3-4; 4.30; 5.18-20; 6.17-18; 1 Tesalonaika 1.5-6; 5.19; 2 Tesalonaika 2.13; Taitas 3.5-6; Hibru 2.4; 9.14; 1 Pita 1.2; 1.11; 2 Pita 1.20-21; 1 Jon 2.20; 3.24; 4.13; 5.6-8.

4. Anut uqa ceteteh cunug ifanaden.

Matju 19.4; Jon 1.3; Aposel 14.15; 17.24-26; 1 Korin 8.6; Kolosi 1.15-16; Hibru 1.2; 11.3; Jahunec Je Camasac Mudec 4.11.

5. Anut uqa ceteteh cunug cofadena.

Matju 6.25-34; 10.29-31; Aposel 14.15-17; Rom 8.28; 11.36; Kolosi 1.17; Hibru 1.3; Jems 4.13-16.

*Dana cajaca age odi bilegina*

6. Dana cajaca cunug age silail mein.

Jon 8.7-9; Rom 3.9-20; 3.23; 5.12; Galesia 3.22; 1 Jon 1.8-10.

7. Dana cajaca age silail megina saen euna age odi bilegina.

Rom 1.18-32; 8.5-8; Galesia 5.19-21; Efesas 2.1-3; 5.3-5; Kolosi 3.5-10; Jems 4.17; 1 Pita 4.3; 1 Jon 3.4-5.

8. Anut uqa dana cajaca qee cahaadecebf age agena silailnu Anutna geladec bisalu bilegina.

Matju 10.28; 13.41-42; Jon 3.18-20; 3.36; Aposel 17.30-31; Rom 1.18-19; 6.23; Galesia 6.7-8; Kolosi 3.5-6; 2 Tesalonaika 1.7-9; Hibrus 9.27; 10.26-31; 1 Pita 1.17; 4.3-5; Jud 7; Jahunec Je Camasac Mudec 20.11-15.

*Anut uqa dana cajaca agena silailnadec odi cahabaadene*

9. Anut dana cajaca cunugnu nalunuga mena, odimei uqa cahabaadecnu gale dona.  
Jon 3.16; Rom 5.8; 1 Timoti 2.3-6; 2 Pita 3.9; 1 Jon 4.9-10.
10. Anut Melah, Jisas Krais, cahabagecnu cal men.  
Mak 10.45; Jon 3.16; Rom 4.25; 5.8; 1 Korin 15.3-4; 2 Korin 5.19-21; Galesia 3.13; 1 Timoti 2.5-6; Hibrus 2.9; 9.28; 1 Pita 1.18-20; 2.24-25; 3.18; 1 Jon 2.2; Jahunec Je Camasac Mudec 5.8-10.
11. Jisas golac eguna silailnu ameg cagasigen.  
Matju 26.26-29; Rom 3.25; 5.9-10; Efesas 1.7; Hibrus 9.11-14; 1 Jon 1.6-7; Jahunec Je Camasac Mudec 7.14-17.
12. Anut uqa eguna silailnu ameg cagasigena.  
Aposel 5.31; 10.43; 26.18; Efesas 1.7; 4.32; Kolosi 1.13-14; 2.13-14; Hibrus 10.17-18; 1 Jon 1.8-10.
13. Anut odigeceb ege uqa amegna dana cajaca ititom tawoqona.  
Aposel 13.38-39; Rom 1.16-17; 3.21-26; 5.1; 5.18-19; Galesia 2.16; 3.6-9; Taitas 3.7.
14. Anut uqa cebau bielec haun igina.  
Jon 3.1-16; 5.19-29; 10.10; 11.25-26; 14.6; 17.2-3; 20.31; Rom 5.21; 6.5-14; 8.10-17; 2 Korin 5.17; Galesia 2.20; Efesas 2.1-6; Kolosi 2.13; 3.1-4; 2 Timoti 1.10; Taitas 3.4-7; 1 Pita 1.23; 1 Jon 5.11-13.
15. Anut odigeceb ege uqa talacul biluquna.  
Jon 1.12-13; Rom 8.14-17; Galesia 4.6-7; Hibrus 12.5-11; 1 Jon 3.1-3.

*Anut cahabagecnu gale dona eu dumeb ege odi odeqan*

16. Egena silailnu walol geceb silailnu tului falicdumeb haun qee odeqaun.  
Matju 4.17; Mak 6.12; Luk 13.1-5; 15.1-31; 24.45-47; Aposel 2.37-40; 3.19-20; 17.29-31; 20.21; 26.19-20; 2 Korin 7.8-11; 2 Pita 3.9; Jahunec Je Camasac Mudec 9.20-21.
17. Ege Jisas cahabagecnu wawige meleigian.  
Jon 1.12; 3.15-18; 3.36; 6.47; 14.6; 20.31; Aposel 4.12; 16.30-31; Rom 3.20-22; 10.9-10; Galesia 2.16; Efesas 2.8-9.
18. Ege Anutca, ege eeta odeqan gale donaca eu docnu ugana jaqec je sanijeqan.  
Matju 4.1-4; 5.17-20; 22.29; Jon 8.31-32; 20.31; Aposel 20.32; Rom 15.4; 16.26; Kolosi 3.16; 1 Tesalonaika 2.13; 1 Timoti 4.13; 2 Timoti 3.14-17; Hibrus 4.12; 1 Pita 1.22-25; 2 Pita 1.19-21; 2 Jon 9-10; Jahunec Je Camasac Mudec 1.3.
19. Ege wa joigec oqan.  
Matju 28.18-20; Jon 3.22; 4.1-2; Aposel 2.37-42; 8.12; 8.36-38; 10.44-48; 16.14-15; 16.31-33; 19.1-7; 22.12-16; Rom 6.1-4; Galesia 3.26-27; Kolosi 2.12; 1 Pita 3.20-22.
20. Ege wawige meleec cotigil gami gaid ceguleqan.  
Matju 18.19-20; Aposel 2.41-47; Rom 12.4-8; Efesas 1.22-23; 4.11-16; Kolosi 3.15-17; 1 Timoti 4.13; Hibrus 10.24-25.
21. Ege wawige meleec cotigil gami cegulimeb Tibudna bred wain gabinca gaid jegan.  
Matju 26.26-30; Mak 14.22-26; Luk 22.14-20; 1 Korin 10.14-22; 11.17-34.

*Ege Jisas Kraisnu wawige meleena ege odi cobeqan*

22. Ege Anut, ege Memigeca, Jisas Krais, eguna Tibudca, conola toodu odeqan.  
Jon 14.15; 14.21; 14.23-24; 15.10-17; Rom 13.8-10; 1 Pita 1.14-16; 1 Jon 2.3-8; 3.22-24; 2 Jon 5-6.
23. Ege Anutnu nalug meqan, odocob dana cajacanu nalunuga meqan.  
Matju 22.34-40; Mak 12.28-34; Luk 10.25-37; Jon 14.21; 1 Jon 5.3; Matju 5.43-48; Jon 13.34-35; 15.12-17; Rom 12.9-10; 13.8-10; 1 Korin 13.1-3; 16.14; Galesia 5.13-15; 1 Tesalonaika 4.9-10; 1 Pita 1.8; 4.8; 1 Jon 2.9-11; 3.11-18; 4.7-21.
24. Ege Krais duman cicilon oqan.  
Jon 13.34-35; 14.27; Rom 12.9-13; Galesia 5.22-26; Kolosi 3.12-17; 1 Tesalonaika 5.16-18.
25. Ege inondoqan. *Ege odi inondoqan.*  
Matju 6.5-13; 7.7-11; 18.19-20; Mak 11.24-25; Luk 11.1-13; 18.1-8; 21.36; Jon 14.13-14; 15.7; 16.23-26; Rom 8.26-27; 12.12; Efesas 2.18; 6.18; Filipai 4.6-7; Kolosi 4.2; 1 Tesalonaika 5.17; 1 Timoti 2.1-4; 2.8; 4.4-5; Hibrus 4.16; 10.19-22; Jems 1.5-8; 4.2-3; 5.13-18; 1 Pita 4.7; 1 Jon 3.21-22; 5.14-15. *Leih age odi inondoin.*

- Matju 11.25-26; 14.23; 19.13-15; Mak 1.35; Luk 5.16; 6.12; 22.32; 22.39-46; Jon 11.41-42; 17.1-26; Aposel 4.24-31; 16.25; 20.36; 21.5; Rom 1.9-10; 10.1-2; 15.30-33; 2 Korin 12.7-10; Efesas 1.15-20; 3.14-21; 6.19-20; Filipai 1.3-5; 1.9-11; Kolosi 1.9-12; 4.3-4; 1 Tesalonaika 3.9-13; 2 Tesalonaika 1.11-12; 3.1-5; Hibru 5.7; 7.25.
26. Ege gaidgaid Anut hegaga doqan.  
Matju 17.11-19; Jon 6.11; Rom 1.21; Efesas 5.20; Filipai 4.4-7; Kolosi 2.7; 3.17; 4.2; 1 Tesalonaika 5.18; 1 Timoti 2.1; 4.4-5.
27. Ege dana cajaca cesuladeqan.  
Matju 6.1-4; 7.12; 25.31-46; Luk 3.10-11; 6.38; Aposel 11.27-30; 1 Korin 10.24; 2 Korin 8.1-15; 9.1-15; Galesia 6.9-10; Filipai 4.14-19; Hibru 10.24; 13.1-3; 13.16; Jems 1.27; 2.15-16; 1 Jon 3.16-18.
28. Egededoc jogoi wawige lal qocca bileqan.  
Matju 5.3-12; 18.1-5; Luk 14.7-11; 18.9-14; Efesas 4.2; Filipai 2.3-11; Kolosi 3.12-13; Jems 4.5-10; 1 Pita 5.5-7.
29. Ege cehewanigeca, egena cetetehca odi cisdoqan.  
Matju 6.19-21; 6.24-34; Luk 12.13-21; 12.32-34; Aposel 20.35; 1 Timoti 6.6-10; 6.17-19; Hibru 13.5-6; Jems 2.1-9; 5.1-6.
30. Eu ihoc nijeecebf i ege dana dewenigenu je um qigen eu gesilec jona ehudi lecnu bitecdogan.  
Matju 5.25-26; 5.38-42; 18.15-17; Rom 12.14-21; 1 Korin 6.1-8.
31. Dana egena ilo bilegina eu conoga toodu odeqan.  
Matju 22.15-22; Aposel 5.27-29; Rom 13.1-7; 1 Timoti 2.1-4; Taitas 3.1; 1 Pita 2.13-17.
32. Ege kadan tibudnu Cain cuha feqaun.  
Matju 4.10; Aposel 17.22-31; 1 Korin 5.11; 6.9-11; 8.1-13; 10.1-22; 2 Korin 6.14-18; Galesia 5.19-21; 1 Tesalonaika 1.9-10; 1 Jon 5.21; Jahunec Je Camasac Mudec 21.8; 22.15.
33. Ege dool Cain ihaneqaun.  
Matju 9.13; Mak 12.33; Rom 12.1; Hibru 9.6-10.18.
34. Ege dana osona caja Cain oqaun, odocab ege wal kobol Cain odeaqaun.  
Matju 5.27-30; Jon 8.2-11; Rom 13.8-10; 1 Korin 5.9-11; 6.9-20; Galesia 5.19; Efesas 5.3; Kolosi 3.5-6; 1 Tesalonaika 4.1-8; Hibru 13.4; Jud 7.
35. Ege ceu jecomun dalul Cain qigiaun.  
Rom 13.13; 1 Korin 5.11; 6.9-11; Galesia 5.19-21; Efesas 5.18; 1 Timoti 3.1-3; Taitas 1.7; 1 Pita 4.3-5.
- Krais tamanec age odi bilegina*
36. Tamanec agena dana cajaca age odi biluqagan.  
Matju 16.13-20; Aposel 2.41-42; Rom 12.4-8; 1 Korin 12.12-30; Efesas 1.22-23; 2.19-22; 4.1-16; Kolosi 1.18; Hibru 10.24-25; 1 Pita 2.4-10; Jahunec Je Camasac Mudec 19.5-10.
37. Tamanec cofgec ege nesili ehadoqona age dumanaga eu odi biligian.  
Aposel 6.1-6; Aposel 14.23; 1 Timoti 3.1-13; Taitas 1.5-9.
38. Tamanec cofadec age odi coboqagan.  
Matju 28.18-20; Luk 22.24-27; Aposel 20.17-35; 1 Tesalonaika 2.1-12; 1 Timoti 4.1-16; 2 Timoti 2.1-26, 3.10-17, 4.1-5; Taitas 2.7-8; 1 Pita 5.1-4.
39. Ege tamanec cofgec conoga toodu odeqan.  
1 Korin 9.14; Galesia 6.6; 1 Tesalonaika 5.12-13; 1 Timoti 5.17-22; Hibru 13.7; 13.17.
- Dana talac eu odi bilegina*
40. Gemugail aidegailca age odi biluqagan.  
Matju 19.4-6; 1 Korin 7.1-16; Efesas 5.21-33; Kolosi 3.18-19; Taitas 2.3-5; Hibru 13.4; 1 Pita 3.1-7.
41. Melemegail atenegailca age odi biluqagan.  
Matju 15.3-6; Luk 2.51; Efesas 6.1-3; Kolosi 3.20; 1 Timoti 5.4; 5.8; Hibru 12.7-11.
42. Memegail anagailca age odi biluqagan.  
Efesas 6.4; Kolosi 3.21; 1 Timoti 3.4-5.
43. Caja wij age odi biluqagan.  
Aposel 6.1; Rom 7.2-3; 1 Korin 7.39-40; 1 Timoti 5.3-16; Jems 1.27.
44. Ege dana caja sisi jelec Cain cagoquaun.  
Matju 5.31-32, 19.3-9; Luk 16.18; Rom 7.2-3; 1 Korin 7.10-16.
- Kristen age culumen gaid gulucdogina*
45. Age sogoech gahidocnu saciadc biluqagan.  
Rom 8.18-25; 8.28; 2 Korin 1.4; 4.16-18; Jems 1.2-4; 1 Pita 1.6-9; 2.19-21; 5.8-10.
46. Age aaqati tootooadec gahidocnu saciadc biluqagan.

- Matju 5.10-12; Mak 13.9-13; Luk 12.4-9; Jon 15.18-21; 16.1-4; Aposel 5.41; Rom 8.35-37; 12.12-14; 12.17-21; 1 Korin 4.11-13; 2 Korin 4.8-11; 12.10; Filipai 1.28-29; 2 Tesalonaika 1.4-8; 3.2-4; 2 Timoti 3.10-13; Hibru 10.32-39; 12.3-4; 1 Pita 3.13-17; 4.12-19; Jahunec Je Camasac Mudec 2.10.
47. Age cal moqagannu cucuiecnu qee nijel.  
Jon 6.39-40; 11.17-27; 14.1-4; Rom 8.10-11; 8.38-39; 14.7-9; 1 Korin 15.12-58; 2 Korin 5.1-10; Filipai 1.20-24; 1 Tesalonaika 4.13-18; Hibru 2.14-15; Jahunec Je Camasac Mudec 14.13; 21.1-4; 22.1-5.
48. Anut uqa cemenega bibilei cesuladena.  
Matju 18.19-20; 28.19-20; Jon 14.16-23; Rom 8.35-39; 2 Korin 6.16-18; Efesas 3.17-19; Filipai 4.13; Kolosi 2.6-7; 2 Tesalonaika 3.16; Hibru 13.5-6.
49. Seten uqa Kristen waadecnu odona.  
Matju 13.19; Luk 4.1-13; 22.3-4; Jon 8.42-44; 2 Korin 2.10-11; 4.4; 11.13-15; Efesas 2.2; 1 Tesalonaika 2.18; 2 Tesalonaika 2.9-12; 1 Pita 5.8-9; 1 Jon 3.8-10; Jahunec Je Camasac Mudec 12.7-12; 20.1-3; 20.10.
50. Anut uqa Seten teidochnuca, culumen gahidocnuca gagadic ihoc adena.  
Matju 4.1-11; 6.13; Luk 22.31-32; Jon 17.14-19; Rom 8.31-39; 12.12; 16.19-20; 1 Korin 10.12-13; 16.13; 2 Korin 12.7-10; Efesas 3.20-21; 6.10-18; Filipai 4.13; 1 Tesalonaika 3.5-8; 2 Tesalonaika 3.3; 2 Timoti 1.7-8; Hibru 2.18; 4.14-16; 12.1-2; Jems 4.7; 1 Pita 1.5; 5.8-11; 1 Jon 4.4; 5.3-5; Jahunec Je Camasac Mudec 12.7-12.
51. Anut uqa dana caja hagca me madena.  
Matju 4.23-25; 9.35; 11.2-5; Aposel 3.1-6; 8.4-8; 19.11-16; 28.8-9; 1 Korin 12.9; 12.29-30; 2 Korin 12.7-10; 1 Timoti 5.23; 2 Timoti 4.20; Jems 5.14-15.
- Cel cete hibna caloqagan*
52. Jisas uqa mahana ceseli nigian.  
Matju 24.29-44; Jon 14.1-3; Aposel 1.10-11; 3.19-21; Filipai 3.20-21; Kolosi 3.4; 1 Tesalonaika 1.9-10; 3.13; 4.13-5.11; 2 Tesalonaika 1.6-10; 2.1-4; 1 Timoti 6.13-15; 2 Timoti 4.8; Hibru 9.28; 2 Pita 3.1-18; 1 Jon 3.1-3; Jahunec Je Camasac Mudec 1.7; 22.12-13.
53. Anut uqa Jisas Krais umna dana cajaca cunug gesiladigian.  
Matju 7.21-23; 16.24-27; 25.31-46; Jon 3.18-21; 5.24-29; Aposel 17.30-31; Rom 2.1-11; 14.10-12; 1 Korin 3.10-15; 4.5; 2 Korin 5.9-10; 2 Tesalonaika 1.5-10; Hibru 9.27-28; 10.26-31; 1 Pita 1.17; 4.3-5; Jahunec Je Camasac Mudec 20.11-15.
54. Anut caahahaadigian eundec age sao jobon biluqagan.  
Luk 12.32-34; Jon 14.1-3; 2 Korin 5.1-8; Filipai 1.23; 1 Pita 1.4-5; Jahunec Je Camasac Mudec 4.1-11; 21.1-4; 21.22-22.5; 22.14-15.
55. Anut qee caahahaadeiaun eundec age oloqanighna biluqagan.  
Matju 10.28; 13.41-42; 47-50; 25.41; Luk 16.23-26; 2 Tesalonaika 1.9; Jahunec Je Camasac Mudec 20.10-15; 21.8.